


# Yak'usda Ooghuni



New Testament in Carrier (CA:crx:Carrier)

# Yak'usda Ooghuni

## New Testament in Carrier (CA:crx:Carrier)

copyright © 2011 Wycliffe Bible Translators, Inc.

Language: Carrier

Translation by: Wycliffe Bible Translators, Inc.

Carrier

crx

Canada

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Carrier

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 21 Feb 2024 from source files dated 29 Jan 2022  
6f908c0c-fba2-5da5-b9d2-a7770ec96862

## Contents

Soo 'Udechoo Whe'whudit'en-i . . . . .	1
Matthew . . . . .	79
Mark . . . . .	143
Luke . . . . .	180
John . . . . .	246
Whel'a'ne Bube 'Ut'en K'oh . . . . .	292
Rome Whut'enne . . . . .	351
1 Corinth Whut'enne . . . . .	380
2 Corinth Whut'enne . . . . .	407
Galatia Whut'enne . . . . .	425
Ephesus Whut'enne . . . . .	435
Philippi Whut'enne . . . . .	445
Colossia Whut'enne . . . . .	452
1 Thessalonica Whut'enne . . . . .	458
2 Thessalonica Whut'enne . . . . .	464
1 Timothy . . . . .	467
2 Timothy . . . . .	475
Titus . . . . .	481
Philemon . . . . .	484
Hebrew K'uyalhdukne . . . . .	486
James . . . . .	509
1 Peter . . . . .	517
2 Peter . . . . .	525
1 John . . . . .	530
2 John . . . . .	537
3 John . . . . .	538
Jude . . . . .	539
John Ooba Ts'et Hahónkat-un . . . . .	542

## Soo 'Udechoo Whe'whudit'en-i

- 1 Soo 'udechoo whe'whudit'en whe Yak'usda (Elohim)\* ndi yun 'ink'ez yak'uz 'et 'uhóonla.
- 2 Yun, ba ndo hoonli lhiloh 'ink'ez 'aw ook'ut 'et hooloh inle', yatoo k'ut tsaholhgus za hoonli inle'. Yak'usda (Elohim) ooyughi too k'ut nudults'ut.
- 3 'Et Yak'usda (Elohim) 'en 'utni, “‘Et njan be hoot'en-i hole.’” 'Et hoot'en whuzdli'.
- 4 'Ink'ez Yak'usda (Elohim) be hoot'en-i yunilh'en, unzoo whe 'unt'oh 'ink'ez be hoot'en-i 'ink'ez tsaholhgus bulh lhulcho 'uyinla.
- 5 Yak'usda (Elohim) ndi be hoot'en 'i dzin yulhni, 'ink'ez ndi tsalhgus, 'i 'ulhdzis yulhni, 'et whe hulhgha 'ink'ez bundada' 'et soo 'udechoo dzin whuzdli'.
- 6 'Et Yak'usda (Elohim) ndutni, “‘Too toh yat hole' 'ink'ez ndo whutoo' 'ink'ez yun k'ut too cha lhulcho oole.’”
- 7 'Et Yak'usda (Elohim) yat 'uhoonla, 'ink'ez ndi too lhk'eyalhdzo njan too 'ink'ez ndo yat cha, 'et ndúhóoja.
- 8 'Ink'ez Yak'usda (Elohim) ndo yat 'et yak'uz whulhni. 'Et hulhgha 'ink'ez bundada' 'et whulh nat dzin whuzdli'.
- 9 'Et Yak'usda (Elohim) 'utni, “‘Ndi too yak'uz ba nyo 'i 'ilho oole', 'ink'ez 'et yun dizgi hahoolts'it.’” 'Et nduhóoja.
- 10 'Ink'ez Yak'usda (Elohim) ndi yun dizgi 'i yun k'ut whulhni, 'ink'ez ndi too 'ilhoh nedimbun 'i yatoo' yulhni. 'Et Yak'usda (Elohim) ooba hoonzoo.
- 11 'Et Yak'usda (Elohim) 'utni, “‘Ndi yun k'ut 'et t'l'o, ndai 'ut'an hanuyeh ootse whulih. Mai chun oomai' whulih ts'iyawh dich'oh ooch'e' nawhudlih, 'i oole,’” ni 'et whe nduhóoja.
- 12 'Et ndi yun k'ut t'l'o, ndai 'ut'an hanuyeh ootse whulih whuk'un'a, 'ink'ez mai chun oomai' whulih ts'iyawh dich'oh ootse nawhudlih. 'Et Yak'usda (Elohim) ooba hoonzoo.
- 13 'Et hulhgha 'ink'ez bundada' 'et whulh tat dzin.
- 14 'Et Yak'usda (Elohim) 'utni, “‘Ndo yak'uz hoot'en oole', 'i be lhulhcho lhts'e hozit whe dzin 'ink'ez 'ulhdzis, 'i be nts'oh hoozulh, dzin 'ink'ez naoodizulh 'et cha.
- 15 'Ink'ez 'et ndi yak'uz be hoot'en, 'i yun k'ut be hoot'en oole,’” 'et nduhóoja.
- 16 'Et Yak'usda (Elohim) 'en nanki be hoot'en-i cho whulhtsi. 'Et ndi tube be hoot'en-i, 'i dzin huba suli' 'ink'ez dzohyaz be hoot'en-i, 'i 'ulhdzis huba suli'. 'Ink'ez ndi sum 'i cha 'uyinla.
- 17 Yak'usda (Elohim) 'en ndo yak'uz ndi be hoot'en-i whulhtsi, 'i ndi yun k'ut hukw'edodi huba.
- 18 'Ink'ez 'owhi dzin 'ink'ez 'ulhdzis bulh k'une' hool'en ha. 'Ink'ez lhulcho 'uhoonla be hoot'en-i 'ink'ez tsalhgus yo. 'Ink'ez Yak'usda (Elohim) whunilh'en 'ink'ez ooba hoonzoo.
- 19 'Et hulhgha 'ink'ez bundada' 'et whulh did dzin whuzdli'.
- 20 'Et Yak'usda (Elohim) 'utni, “‘Too toh lhai cho lho ndunt'oh-i hole', 'ink'ez dut'ai yun ando yat ndulcho dut'ai be nuhoot'o’”.

\* **1:1** Ndi boozí, “‘Elohim,’” i whunénulhtun, Yak'usda 'en 'aw 'ilhoghun za unli íloh, 'et hoonts'i 'en 'ilhoghun unli whe 'unt'oh. 'Et whuz un'a ndi boozí' ni whe 'utni. 'Et tube neba whe' hoont'oh hooyoh.

- 21 'Et Yak'usda (Elohim) toot lho cho 'ink'ez usjiz-i nuhutnah-i lhelhdoh didoh toot nuyeh-i 'ink'ez nut'o-i lhelhdoh didoh-i 'inla. 'Ink'ez 'owhi yunilh'en, unzoo whe 'unt'oh. 'Et Yak'usda (Elohim) ooba hoonzoo sulì'.
- 22 'Et Yak'usda (Elohim) soo hoonzoo-un hubúlhni, 'ink'ez njan ndutni, "Lhk'uz whe lhai oohle' ndi too doolhbun yatoo' tuz, 'ink'ez dut'ai cha ndi yun k'ut lhk'uz teh lhai oole'."
- 23 'Et hulgha 'ink'ez bundada' 'et kwulat dzin sulì'.
- 24 'Et Yak'usda (Elohim) 'utni, "Ndai la khuna-i dich'oh didoh-i, khuna-i, musdoos te, yun nulh'as-i, 'uyoo khuna-i, ts'iyawh didutch'oh dudun dot'en, yun ts'u halh'as," 'et whuz un'a 'uhooja.
- 25 'Et Yak'usda (Elohim) khuna-i yun k'ut nulh'as 'iloh didoh-i, musdoos 'iloh didoh-i 'ink'ez ts'iya-i yun nulh'as-i, 'iloh didoh-i 'ink'ez Yak'usda (Elohim) yan'en, unzoo whe 'unt'oh.
- 26 'Et Yak'usda (Elohim) 'utni, "Dune 'uts'ooleh, neundot'en-un, nek'un'a 'unt'oh-un, yatoo k'ut, lho, dut'ai ndo nudilh-i, musdoos, yun k'ut cha, yun k'ut nulh'as-i cha, 'owhi ts'iyawh yumoodih oole' sih".
- 27 'Et Yak'usda (Elohim) dune 'inla,  
 duk'un'a Yak'usda (Elohim) ndot'e',  
 'en dune 'ink'ez ts'ekoo cha 'en 'ubinla.
- 28 'Et Yak'usda (Elohim) soo hoonzoo-un 'ubulhni 'ink'ez Yak'usda (Elohim) njan ndubulhni, "Lhane cho nohuzkeh oole', ndi yun doolhbun 'ink'ez oomoodih uhli, lho, dut'ai, nudilh-i cha 'ink'ez ndi yun k'ut usjiz-i cha ts'iyawh".
- 29 'Et Yak'usda (Elohim) 'utni, "Whunulh'en, yun hanuyeh-i oomai' hoonli-i, 'ananukat-i yun k'ut hooni-i, duchun oomai' 'ananukat-i, nohni nohba ut'alh-i tileh.
- 30 'Ink'ez cha ndi yun k'ut usjiz-i, dut'ai ndo nudilh-i, 'ink'ez yun k'ut nulh'as-i cha, ndi yun k'ut hanuyeh-i yuti'ulh huba bugha ínus'ai," 'ink'ez whuz un'a 'uhooja.
- 31 Yak'usda (Elohim) yane'yalh'en-i yunilh'en, ts'iyawh 'uyinla-i 'ink'ez 'alha tube unzoo. 'Et hulgha 'ink'ez bundada' 'et bulh lhk'utat dzin. 'Et ts'iyawh whunalh'en whe tube ooba hoonzoo. 'Et hulgha 'ink'ez bundada' 'et whulh lhk'utat dzin sulì'.

## 2

- 1 'Awet yak'uz, yun k'ut, 'ink'ez ndai ts'iyawh 'uhoonla, 'i lhaoodinla.
- 2 'Et whulh lht'ak'ant'it dzin sulì', 'et Yak'usda (Elohim) be 'ut'en, 'i lhaidinla 'ink'ez whulh lht'ak'ant'it dzin 'et nalyiz. Ndi be 'ut'en 'i ts'iyawh lhaoodinla.
- 3 'Ink'ez Yak'usda (Elohim) whulh lht'ak'ant'it dzin 'et soo hoonzoo-un whulh'tsi 'ink'ez 'udun duba neoninla. Njan whulh lht'ak'ant'it dzin 'et nalyiz be 'ut'en 'i ts'iyawh lhaoodinla 'et huwa, Yak'usda (Elohim) ndi 'uyinla 'i lhaoodinla.
- 4 Njan 'et soo 'udechoo whe'whudit'en hukw'elh'az yak'uz 'ink'ez yun k'ut

njan dzin Moodihti Yak'usda (Yahweh\* Elohim) 'en ndi yak'uz 'ink'ez yun k'ut 'uhoonla,

<sup>5</sup> 'awhuz yun whut'an 'ink'ez oomai' hooni-i, 'ink'ez dilht'an-i cha yun k'ut halhusye whe, Moodihti Yak'usda (Yahweh Elohim) nawhulhtih-un 'ink'ez dune yun gha oona' ha hooloh.

<sup>6</sup> 'Et hoontsi'i tootsul whuzdli' 'i be yun k'ut naooniltsul.

<sup>7</sup> 'Ink'ez Moodihti Yak'usda (Yahweh Elohim) yun lez 'i dune yulhtsi 'ink'ez be ts'uhuna bulh yuni 'ainyulh 'ink'ez dune khuna sulii'.

*Yak'usda (Elohim) ba ha'nuyeh k'et 'et dune nenin'az*

<sup>8</sup> Eden huwun ndaz de 'et Moodihti Yak'usda (Yahweh Elohim) 'en ha'nuyeh k'et newhunin'ai. 'Et 'a'nule ink'ez ndun dune yulhtsi, 'en 'et neinilhti.

<sup>9</sup> Njan yun k'ut Moodihti Yak'usda (Yahweh Elohim) ts'iyai-duchun nul'en huba nzoo-i 'ink'ez ut'alh huba nzoo-i 'ainanla. Duchun oogha ts'ukhuna-i cha whuniz hanuyeh yun 'et 'uyinla. 'Ink'ez ndi duchun be t'eeonudzun ndet hoonzoo 'ink'ez ndet hoontsi' 'et cha.

<sup>10</sup> 'Et ndi took'oh Eden whuts'u hainli, 'i hanuyeh k'et be nawhunulstul, 'et 'ukoh didun lhk'einli whuzdli'.

<sup>11</sup> Soo 'udechoo whuts'u hainli, 'i Pishon huyulhni, ndi 'i yun k'ut Havilah ndul cho whunadzidli, 'et gold hooni.

<sup>12</sup> 'Ink'ez njan yun k'ut gold 'i unzoo. Bdelium 'ink'ez onyx tse 'i 'et hooni.

<sup>13</sup> Njan whulhnat took'oh ye dinli, 'i Gihon hiyulhni, 'i 'unt'oh. Yun k'ut Cush, 'et ndulcho whunasuli.

<sup>14</sup> Bulh ta-i 'ukoh 'i Hiddekel huyulhni, 'i Assyria whanda' ts'e wheinli. Bulh dunghi 'ukoh 'i Euphrates 'unt'oh.

<sup>15</sup> 'Et Moodihti Yak'usda (Yahweh Elohim) hanuyeh k'et Eden 'et dune neninilhti, yughole' 'ink'ez yot'e' ha.

<sup>16</sup> 'Ink'ez Moodihti Yak'usda (Yahweh Elohim) ndun dune khuni yutl'a dan'ai whe nduyulhni, "Ndi duchun ts'iyawh njan hanuyeh 'i on'alh ndet hukwa' ninzin totsuk.

<sup>17</sup> "Ndi duchun be t'eeonudzun-i, ndet hoonzoo-un, 'ink'ez ndet hoontsi'-un, 'i oomai 'aw lhuzon'al. Ndet dzin in'al-un, 'alha datantsah."

<sup>18</sup> 'Et Moodihti Yak'usda (Yahweh Elohim) 'utni, "Dune dich'oh 'uhint'oh de 'aw lhe'hoozoo' whe' hoont'oh, yula' tit'elh-un yundult'oh-un ooba 'oosleh si."

<sup>19</sup> Ndi yun k'ut 'et Moodihti Yak'usda (Yahweh Elohim) ts'iyai khuna-i, dut'ai ndo yat nudilh, 'i ts'iyawh Adam ts'un nebuninla, 'et nts'en'a hubootazih ha. 'Ink'ez nts'en'a hubonzi', 'i huboozi sulii'.

<sup>20</sup> 'Et Adam 'en ndi mudoos, dut'ai ndo yat nudilh, 'ink'ez tl'o k'ut khuna-i, 'i ts'iyawh huboozi' whulhtsi. 'Et 'ink'ez Adam yulh ndult'oh 'en yula 'oot'en hooloh.

<sup>21</sup> 'Ink'ez 'et Moodihti Yak'usda (Yahweh Elohim) Adam bulh cho yuk'edin'ai, 'et Adam nanisti 'ink'ez oocha 'ilhoghi Yak'usda yuts'u ha'idantan 'ink'ez yutsung lhts'un be naifunilhni.

\* **2:4** Ndi boozii "Yahweh," 'i "Mbe Usli, 'En 'Ust'oh," ni whe 'ut'ni. Sizi Gri, 'en Yahweh 'unt'oh. 'Et whuz un'a 'et John 'uk'unéyuguz-i 8:58 ndutni whe Sizi 'en ndunne Lizwifne budáni!, "Soo ts'ih'un un'a nohdúsn, Abraham whutileh whutso da', 'et 'uda' si usli whe 'ust'oh." Ndi khuni 'i be whuts'odul'eh, 'oh da' Sizi Gri ndi yun k'ut nusuya whe 'et Abraham 'en 'uda' 2,000 be yus k'ut at' en ndi yun k'ut nusuya. 'Ink'ez Sizi Gri 'en ndunne Lizwifne ubulhni, "...Abraham whutileh whutsoh da', 'et 'uda' usli whe 'ust'oh." Ndi khuni 'i be whuts'odul'eh Sizi Gri 'en Yahweh unli. 'Et Exodus 3:14, John 'Uk'unéyuguz-i 8:24-25, 58, 17:5,24, 1 Timothy Ts'o K'eyanguz-i 1:17, 'ink'ez 'Udechoo 'Udust'lus John 'Uk'eyánguz-i 5:11-12, 'et cha nduwútni.

22 Moodihti Yak'usda (Yahweh Elohim) ndi 'ucha dune ts'u haidantan, 'i ts'eke yulhtsi 'ink'ez dune yughi nilhti.

23 'Et Adam 'utni,  
 "Ndi 'andit sts'un oots'un 'unt'oh  
 'ink'ez stsung ootsung 'unt'oh,  
 ts'eke boози 'oole' si,  
 dune ts'u halti 'et huwa".

24 'Et huwa dune dubá 'ink'ez duloo bulh bula dootnih 'ink'ez du'at bulh 'oot'e 'ink'ez 'ilho yust'e hoole'.

25 'Ink'ez nahult'oh 'ust'et, dune 'ink'ez du'at bulh whe 'aw yooya cha lhuhiloh.

### 3

#### *Dune ninta 'ut'ih whuts'unint'i*

1 'Et tl'ughus 'i lhelhdoh didoh-i Moodihti Yak'usda (Yahweh Elohim) 'uyinla-i unli 'ink'ez ts'eke 'ulhni, "Duchun yun k'ut whuduchun 'aw ts'iyawh lhuzooh'al, ni eh?"

2 'Et ts'eke nyoon tl'ughus 'uyulhni, "Nyoo duchun mai' hanuyeh-i, 'i ts'oo'alh huba' hoont'oh,

3 'Et hoontsi' hanuyeh k'et whuduchun whuniz nadan'a-i, 'i Yak'usda (Elohim) 'utni, 'Nyoo duchun mai' 'aw lhuzooh'al, k'us oot'aohnalh junih, khun si daohtsah,' " ni.

4 'Et ndi tl'ughus, ts'eke 'en 'uyulhni, "Alha 'aw daohtsah ait'oh.

5 Yak'usda (Elohim) t'ooninzun ndet dzin uh'alh-un, hoo'h'en tihleh 'ink'ez Yak'usda (Elohim) bundutilh'elh, hoonzoo-un 'ink'ez hoontsi'-un cha t'ewhuntaizin."

6 'Et ts'eke duchun ts'u'alh huba unzoo, nul'en huba cha unzoo, duchun ts'uwhunih netilhtselh huba ooka' whuninzun, oomai' yilhchoot 'ink'ez yan'al, duki cha yuloh yutl'a nan'ai 'ink'ez 'en cha yan'al.

7 'Et nahult'oh duna be huhon'en sulí, 'ink'ez nahult'oh 'ust'et 'uhint'oh t'ehonanzin, mai "fig" huyulhni 'i oot'an lhuna' hidunilhka' 'i be be k'e'uzdla 'uhududulhtsi.

8 'Et nawhudunik'az whe Moodihti Yak'usda (Yahweh Elohim) hanuyeh k'et 'oh nuya whe hidits'o 'ink'ez Adam du'at bulh hanuyeh k'et duchun toh Moodihti Yak'usda (Yahweh Elohim) hich'a untilh'i.

9 'Et Moodihti Yak'usda (Yahweh Elohim) Adam hahizya 'ink'ez 'uyulhni, "Nts'e 'int'oh".

10 'Et 'utni, "Hanuyeh k'ez nyudasts'o 'ink'ez whenuzjut, 'ust'et 'ust'oh 'et huwa untiz'i."

11 'Ink'ez 'uyulhni, "Mbe 'unyulhni 'ust'et 'int'oh, duchun oomai' uh'alh junih nohdusni-i eh uh'al?"

12 'Et dune 'utni, "Ts'eke sgha nilht'i-un duchun oomai' sgha inin'ai 'ink'ez 'i us'al."

13 'Ink'ez Moodihti Yak'usda (Yahweh Elohim) ts'eke 'ulhni, "Dahoont'oh-un dainja?" 'Ink'ez ts'eke 'utni, "Tl'ughus nasunan'a 'ink'ez us'al."

14 'Et Moodihti Yak'usda (Yahweh Elohim) tl'ughus 'ulhni, "Et ndinja huwa 'uyoo khuna-i anus nk'ehida whe 'int'oh,  
 'ink'ez 'uyoo khuna-i chuntoh nulh'as-i anus,  
 mbut tl'ah whe nukedutanzut,  
 'ink'ez lhez za tan'ulh, yunka tandalh nduwuhulyiz whe.

15 'Ink'ez nyun 'ink'ez ts'eke bulh lhazdatni nohtiselh,  
 'ink'ez nyuzkeh 'ink'ez buzkeh.

Ntsi yayindunta'us 'ink'ez ookentsul duntalhdah."

- 16 'Et ts'eke 'ulhni,  
 "Ndzi unduda-un 'ink'ez datant'elh-un 'onus 'uwulcho whutiselh,  
 nyulh 'ults'ulh whe nyuzkeh whutaleh,  
 nki ooka' untanzilh 'ink'ez nyumoodih tileh."
- 17 'Et Adam 'ulhni,  
 "N'at oozalhts'ai' 'et huwa 'ink'ez ndi duchun oomai',  
 "On'alh junih,' nyudusni,  
 in'al 'et huwa, nyun mba ndi yun 'i ookehida,  
 'ut'en be oots'u huyukat-i tan'ulh yun ka tandalh ndwhulyiz whe."
- 18 Whuscho 'ink'ez whusyaz bulh nankilt'oh ook'ut mba hantiyeh,  
 'ink'ez yun hanuyeh-i tan'ulh.
- 19 Nyunin ts'u halhdzilh whe ut'alh-i on'alh,  
 yun natandleh whuts'un.  
 'I oots'u hainzut.  
 Lhez 'int'oh 'ink'ez lhez 'i ts'un natandleh."
- 20 'Ink'ez Adam du'at Eve be yoozi, khunane ts'iyawh buloo 'et huwa.
- 21 'Ink'ez Adam oo'at bulh Moodihti Yak'usda (Yahweh Elohim) 'en ndi zuz  
 'i buba 'uyinla hiye óoke' ha.
- 22 'Et Moodihti Yak'usda (Yahweh Elohim) 'utni, "Null'en, dune Neun-  
 dult'oh sul'i, hoonzoo-un 'ink'ez hoontsi'-un t'ewhunozin ha. 'Ink'ez 'andit  
 doo ka si dula be ndi duchun oomai' yolhchoot 'ink'ez yoo'alh 'ink'ez 'ilhiz  
 whutinalh."
- 23 'Et huwa Moodihti Yak'usda (Yahweh Elohim) njan hanuyeh k'et, Eden,  
 'et tenabunilh'a', 'ink'ez njan yun whut'as tileh 'i oots'u haits'alhti 'et, oot'e'  
 ha.
- 24 'Et dune teininyoot 'ink'ez Eden ndaz ts'e 'et lizasne, Cherubne hubulhni,  
 'et nebunilhiti, 'ink'ez saluziti kwun dunukw dot'en lhelhts'un nadighus-i  
 duchun oogha ts'ukhuna-i yughole' ha.

## 4

### *Cain 'en Abel yuzilghhi*

- 1 'Et Adam du'at Eve, t'einanzin 'ink'ez oo'at ulchan 'ink'ez Cain 'en yulhtsi  
 'ink'ez 'utni, "Moodihti (Yahweh) ts'un dune sgha ninzut."
- 2 'Et doo cha Eve 'ulhtsi, 'andit 'et bulhutsin Abel 'en 'usbai ghunli unli, 'et  
 Cain 'en yun ghana-un sul'i'.
- 3 'Et whudizulh whutoh Cain yun whumai', Moodihti (Yahweh) gha italelh  
 ha yughi ninla.
- 4 Abel cha 'usbai 'udechoo whuzdli-i nilhk'a whe whuz wheyanla 'ink'ez  
 Moodihti (Yahweh) Abel yudilhiti' 'ink'ez yuba soo 'uja.
- 5 'Et hoontsi'i Cain yuba whusayanla-i ooba lhe' yizoo' 'ink'ez Cain tube  
 hunilch'e 'ink'ez oonin ts'e 'uts'un un'a 'uja.
- 6 'Et huwa Moodihti (Yahweh) 'en Cain 'uyulhni, "Ndet huwa hunilch'e  
 'ink'ez nyunin ts'e 'uts'un un'a 'inja?"
- 7 "Soo 'ant'en, 'aw lakw 'uyoo neba lhe'hootazoo'? 'Et 'aw soo lhe'zint'en  
 de, 'ut'en untsi'-i dati us'ai whe 'unt'oh. 'Ink'ez nka' ninzun whe 'unt'oh, 'et  
 hoontsi'i whuch'a whumoodih onle'."
- 8 'Et Cain dudulhutsin Abel yulh yailhduk, 'et 'uhooja nus tl'o k'ut 'uhint'oh  
 whe, Cain dudulhutsin Abel yuch'az nedinja 'ink'ez yuzilghhi.
- 9 'Et whe Moodihti (Yahweh) Cain 'uyulhni, "Nyulhutsin Abel daja?" Cain  
 'utni, "T'oonuzuszun, si eh sulhutsin ghusli?"
- 10 'Ink'ez 'utni, "Nts'en'a dainja?" Yun whuts'un nyulhutsin buzkai' sts'un  
 huyih.



11 'Andit 'awet ndi yun mba whutátsi'. Yun dizts'o nla k'ez nyulhutsin buzkai' ook'eijul 'et huwa.

12 Yun gha itanelh te, daltus la hukw'un'a mba ook'ut halhe'untizye. Ndi yun k'ut tandalh whut'oh nunul'i-un 'ink'ez yoh luhoot'i-un tanleh."

13 'Et Cain 'en Moodihti (Yahweh) 'uyúlhni, "Be sba nahisda-i 'onus sba hoondaz k'et 'aw whulh 'oost'e' ait'oh.

14 'Alha 'andit dzin whuts'un ndi yun k'ut suntinyoot nyunin ba whu'iz 'utit'elh, ndi yun k'ut nunul'i-un 'ink'ez yoh luhoot'i-un tisleh, 'ink'ez mbe nasilhiti-un sutuzilhghel whe 'unt'oh".

15 'Et Moodihti (Yahweh) 'uyulhni, "Et huwa, mbe Cain silhghi-un lhtak'ant'it 'uwhultsuk-un ooba k'utitnelh." Doo ka si Moodihti (Yahweh) 'en Cain ye hoodalh'en khun nahiyilhti 'ink'ez hizoolhghel whuch'a.

### *Cain ts'u haindene*

16 'Et Cain Moodihti (Yahweh) ch'a suya 'ink'ez yun k'ut Nod huwhutni-un 'et nenina, ha'nuyeh k'et Eden 'on daz ts'e.

17 'Ink'ez Cain du'at t'einanzin, ulchan 'ink'ez Enoch ooyaz whuzdli. 'Ink'ez keyoh whuti 'uhoonla 'ink'ez duye' boози', Enoch be hoozi.

18 Irad 'en Enoch ooye' suli' 'ink'ez Irad, Mehujael ooye' suli' 'ink'ez Mehujael 'en Methushael, 'ink'ez Methushael, Lamech ooye' suli'.

19 'Et Lamech nane ts'ekoo ilhchoot, du'atke eni, 'ilhoghun oo'at, Adah boози' 'ink'ez 'on 'at-un 'en Zillah huyulhni.

20 'Ink'ez Adah, 'en Jabal ooyaz suli'. 'En buzkehkene nimbali bet huwhut'i 'ink'ez khuna-i 'i nulhyeh.

21 Bulhutsin boози' Jubal, 'en ndi harp 'ink'ez flute hiyulhni 'i be hujun, 'enne ts'iyawh hube 'abá.

22 Zillah, 'en cha buzke hooni. 'Ilhoghun 'en Tubal-Cain hiyulhni. 'En mbe ndi 'utes 'ink'ez dulk'un te 'ink'ez lhuztih bulh yugha khuna 'enne ts'iyawh hubodulh'eh. 'Ink'ez Tubal-Cain bulhtus 'en Naamah ts'utni.

23 'Et Lamech du'atke 'ubulhni,  
"Adah 'ink'ez Zillah, soo zulhts'ai,  
dune ka sulhtsi huwa sisghi, chilh hoonts'i sundilhda' hukwa sisghi".

24 Cain k'utitnelh te, lhtak'ant'it tighan,  
'et de Lamech lhtak'ant'it whunizyat 'on 'at lhtak'ant'it 'uwhultsuk-un.

### *Adam doo cha za ooye' hooni*

25 Adam doo cha du'at t'enananzin whe ooyaz dune suli', 'en Seth yulhni. Eve 'utni, "Yak'usda (Elohim) 'uye' sgha nilhti, 'en Abel yuk'e naidalhti, Cain yuzilhghi-un."

26 Seth cha ooye' whuzdli', Enosh yulhni. 'Et ndoh dzin dunene Moodihti (Yahweh) boози' be ka whehuninyih.

## 5

### *Adam Buzkehne*

1 Ndi 'udustl'us, Adam ts'u haindene ghun 'unt'oh. Yak'usda (Elohim) ndet dzin 'uyinla dzin, Yak'usda (Elohim) ndot'en yulhtsi.

2 Dune 'ink'ez ts'eke bulh 'ubinla 'ink'ez soo hoonzoo-un hubulhni 'ink'ez yun ka dune'ne 'ubinla, dzin 'ubinla-un.

3 'Ink'ez Adam 'ilho whunizyat whunizyat 'on 'at tat whunizyat (130) yus k'ut khuna 'ink'ez ooye' yundot'en-un ooye' suli', Seth yulhni.

4 Seth ooye' suli' hukw'elh'az, Adam lhk'udit whunizyat whunizyai (800) be yus k'ut hukw'elh'az 'ink'ez ooye'ke, ootse'ke cha whuzdli.

<sup>5</sup> Adam khuna' 'uwuldzoh hana'-un 'ilho hooloh whunizyat whunizyai 'on 'at tat whunizyat (930) yus k'ut khuna' 'et dazsai.

<sup>6</sup> Seth 'en 'illoh whunizyat whunizyai 'ink'ez kwulat be yus k'ut (105) khuna' whe Enosh ooye' suli'.

<sup>7</sup> Enosh ooye' suli' hukw'elh'az, Seth lhk'udit whunizyai lhk'udit 'on 'at lhtak'ant'it (807) be yus k'ut whe ooye'ke 'ink'ez ootse'ke cha whuzdli'.

<sup>8</sup> Seth 'ilho hooloh whunizyat whunizyai 'on 'at 'ilho hooloh 'ink'ez 'on 'at nat be yus k'ut (912) whe dazsai.

<sup>9</sup> Enosh 'ilho hooloh whunizyat (90) 'ink'ez Cainan ooye' suli'.

<sup>10</sup> Cainan ooye' suli' hukw'elh'az lhk'udit whunizyat whunizyai 'on 'at whunizyat 'on 'at kwulat (815) be yus k'ut 'ink'ez ooye'ke 'ink'ez ootse'ke cha whuzdli'.

<sup>11</sup> Enosh yinka inda' 'uwulyiz-un 'ilho hooloh whunizyat whunizyai 'ink'ez kwulai' (905) be yus k'ut whe dazsai.

<sup>12</sup> Cainan lhtak'antit whunizyat (70) khana' 'ink'ez Mahaleel ooye' suli'.

<sup>13</sup> Mahaleel whuzdli hukw'elh'az, Cainan lhk'udit whunizyat whunizyai 'on 'at dit whunizyat (840) be yus k'ut 'ink'ez ooye'ke 'ink'ez ootse'ke cha whuzdli'.

<sup>14</sup> 'Et Cainan 'ilho hooloh whunizyat whunizyai 'ink'ez whunizyat (910) be yus k'ut 'et dazsai.

<sup>15</sup> Mahaleel lhk'utat whunizyat 'on 'at kwulat (65) be yus k'ut, 'ink'ez Jared ooye' suli'.

<sup>16</sup> Jared whuzdli hukw'elh'az Mahaleel lhk'udit whunizyat whunizyai 'ink'ez tat whunizyai (830) be yus k'ut 'ink'ez ooye'ke 'ink'ez ootse'ke cha whuzdli'.

<sup>17</sup> 'Et Mahaleel be yus k'ut lhk'udit whunizyat whunizyai 'ink'ez 'ilho hooloh 'ink'ez kwulat (895) be yus k'ut 'et dazsai.

<sup>18</sup> Jared yunka inda' 'ilho whunizyat whunizyai 'ink'ez lhk'utat whunizyat (162) be yus k'ut 'ink'ez nanki Enoch ooye' suli'.

<sup>19</sup> Enoch whuzdli hukw'elh'az Jared lhk'udit whunizyat whunizyai (800) be yus k'ut nahitna' 'ink'ez ooye'ke 'ink'ez oots'eke cha whuhuzdli'.

<sup>20</sup> Jared be yus k'ut 'ilho hooloh whunizyat whunizyai 'ink'ez lhk'utat 'ink'ez nat (962) be yus k'ut khana' 'ink'ez dazsai.

<sup>21</sup> Enoch lhk'utat whunizyat 'ink'ez kwulat (65) be yus k'ut khana' 'ink'ez Methuselah ooye' suli'.

<sup>22</sup> Methuselah whuzdli hukw'elh'az Enoch Yak'usda (Elohim) bulh nusa'az tat whunizyat whunizyai (300) be yus k'ut 'ink'ez ooye'ke 'ink'ez ootse'ke cha whuzdli'.

<sup>23</sup> Enoch yun ka inda'-un tat whunizyat whunizyai 'on 'at kwulat (365) be yus k'ut 'et khana'.

<sup>24</sup> 'Ink'ez Enoch Yak'usda (Elohim) bulh nusa'az 'ink'ez hooel, Yak'usda (Elohim) nayilhchoot huwa.

<sup>25</sup> Methuselah 'ilho hooloh whunizyai whunizyat 'ink'ez lhk'udit whunizyat 'on 'at lhtak'ant'it (187) be yus k'ut khuna' 'et Lamech ooye' whuzdli'.

<sup>26</sup> Lamech whuzdli hukw'elh'az, Methuselah lhtak'ant'it whunizyai whunizyat 'ink'ez lhk'udit whunizyat 'on 'at nanki (782) be yus k'ut whe khuna' 'ink'ez ooye'ke 'ink'ez ootse'ke cha whuzdli'.

<sup>27</sup> 'Et Methuselah 'ilho hooloh whunizyat whunizyai 'ink'ez lhk'utat whunizyat whunizyai 'ink'ez lhk'utat whunizyai 'on 'at 'ilho hooloh (969) be yus k'ut whe dazsai.

<sup>28</sup> Lamech 'en 'illoh whunizyai whunizyat 'ink'ez lhk'udit whunizyat 'on 'at nanki (182) be yus k'ut suli' 'ink'ez 'ilhohun ooye' suli'.

<sup>29</sup> 'Ink'ez, Nowe be yoozi 'ink'ez 'utni, “Nduen 'en si k'unenunoo'ah neye 'ut'en ha 'ink'ez neba be oogha ts'ana-i, yun Moodihti (Yahweh) ye k'ehanya 'et huwa”.

<sup>30</sup> Nowe yun ka neninya hukw'elh'az kwulat whunizyat whunizyai 'ink'ez 'ilho hooloh whunizyai 'ink'ez kwulat (595) be yus k'ut sulii 'et ooye'ke 'ink'ez ootse'ke cha whuhuzdli.

<sup>31</sup> Lamech khana' nduwhulyiz-un lhtak'ant'it whunizyai whunizyat 'ink'ez lhtak'ant'it whunizyat 'on 'at lhtak'ant'it (777) be yus k'ut 'et dazsai.

<sup>32</sup> 'Ink'ez Nowe kwulat whunizyai whunizyat (500) be yus k'ut whe Shem, Ham 'ink'ez Japheth 'enne ooye'ke sulii'.

## 6

### *Dune huye untsi'-i 'ink'ez be buba nahisda*

<sup>1</sup> 'Et 'uhooga, ndi yun k'ut dune 'awet nus za 'uhuniltsuk whe 'ink'ez ts'ekoo bubuzkeh sulii'.

<sup>2</sup> Yak'usda (Elohim) ooye'ke 'enne ndunne ts'ekoo dune ootse'kene huhin-zoo hubo nilh'en. 'Ink'ez mbene la buka' huninzunne 'enne ts'ekoo bubu hihchoot, bu'atke hole' ha.

<sup>3</sup> 'Et Moodihti (Yahweh) 'utni, “Syoghi 'aw 'ilhez when dune bulh buch'az dotni ait'oh. 'Alha ndi yun k'ut dune unli 'et hoonts'i whunizyat whunizyai 'ink'ez nat whunizyai (120) be yus k'ut tileh whe ndi yun k'ut tidalh.”

<sup>4</sup> 'Et 'oh da' njan yun k'ut dunechone hanle'. 'Et hukw'elh'az Yak'usda (Elohim) ooye'ke 'enne ndi yun k'ut dune butse'ke buzisda 'ink'ez bubuzkehke yahonle'. 'Et ndunne dune whuzdli'ne, 'enne dune lhtuscho 'ink'ez nchane 'uhint'oh.

<sup>5</sup> 'Et Moodihti (Yahweh) bunilh'en ndi yun k'ut dune huye untsi' tube ncha sulii'. Ts'iyawh 'ahoolhyiz wheni ndune bubeni untsi', 'et whunilh'en.

<sup>6</sup> 'Et Moodihti (Yahweh) tube huwu dzin unduda ndi yun k'ut dune 'inla-un, oodzi yo tube whunduda sulii'.

<sup>7</sup> 'Et Moodihti (Yahweh) 'utni, “Mbene la dune ndi yun k'ut wheni 'ubus-lane, soo ts'iyawh gak hubutiselh. Ndi dune 'ink'ez khuna-i, yun k'ut nulh'asi 'ink'ez ndo dut'ai nudilh-i cha, 'i ts'iyawh. 'Et tube huwu sdzi unduda 'ubusdla 'et huwa.”

<sup>8</sup> 'Et hoonts'i Nowe 'en Moodihti (Yahweh) oonalh ndi ye nets'un unzoo-i 'et nahoon'ai.

### *Nowe 'en Yak'usda (Elohim) yuba soo nduja*

<sup>9</sup> Nowe ts'u haindene hukw'eguz 'et 'uhoont'oh. Nowe 'en ts'ih'un dune unli, khuna da' whe 'aw ook'eholts'it hooloh. Nowe 'en Yak'usda (Elohim) bulh nuya inle'.

<sup>10</sup> Nowe tane ooye'ke sulii': Shem, Ham, 'ink'ez Japheth.

<sup>11</sup> Yak'usda (Elohim) oonalh ndi yun k'ut ndulcho dune ninta' honilh'en 'ink'ez dune lhezudla-un, dulcho whe whudizbun.

<sup>12</sup> 'Et Yak'usda (Elohim) njan yun k'ut 'et whunilh'en whe 'alha tube ninta' whunt'en. Dunene, 'enne ts'iyawh soo ts'ih'un 'ants'i halhjut le'hint'oh sulii'.

### *Ts'i cho 'ulya*

<sup>13</sup> Yak'usda (Elohim) 'en Nowe 'uyulhni, “Njan ts'iyawh ndai la usjiz-i, 'awet sba whulatoh sulii'. Dunene 'enne bulagha ts'e ndi yun k'ut ts'iyawh be lhezudla-i be hodilhun. 'Et whunilh'en, ndi yun ndulcho whe ndi khuna ts'iyawh yun k'ut husjiz-i, ts'iyawh bulh gak whutiselh.

<sup>14</sup> Ndi duchun gopher hiyulhni, 'i be ts'i cho 'onleh. 'Ink'ez bez ts'e 'et lhelhdun whulai holhtselh. Dzeh 'i be bez ts'e 'ink'ez yoo'az ts'e cha be ondzeh.

<sup>15</sup> 'Ink'ez 'et ndiz un'a ndi ts'i cho 'i 'onleh: 450 feet 'et 'uhoolhyiz, 'ink'ez 75 feet 'et 'uhooltel, 'ink'ez 45 feet naoodalhza'.

<sup>16</sup> Dadint'az cho ooba 'onleh. 'Ilho cubit ndo ooban whuts'un, 'et nenin'a holhtselh. Oozih k'ut 'et datin'un 'onleh. 'Udeyo-un yun cha 'onleh 'ink'ez 'on do cha 'udun 'uhoonleh, 'ink'ez bulh tad-un yun 'et 'uhonleh.

<sup>17</sup> 'Et whunilh'en 'et si 'utisnelh, yun k'ut ndulhcho too hatadutisbilh. Yat whutah 'et gak whutiselh. Ts'iyawh ndai ndi usjiz be ts'ukhuna bulh 'unt'oh, 'i gak tileh. Ndi yun k'ut 'et ts'iyai yatadlah.

<sup>18</sup> 'Et hoonts'i nyun nts'un sghuni ntl'adutis'alh. 'Ink'ez ndi ts'i cho bez tonya', nyun, nye'keh, n'at, 'ink'ez nye'keh bu'atkeh cha, 'en dulh 'úbolneh.

<sup>19</sup> 'Ink'ez ndai la ndi yun k'ut usjiz-i, lhawh didoh 'ilho whe nawh didoh-i, 'i ndi 'i ts'i cho be onlelh. 'Et ts'iyawh khutinalh wheni ts'eke cha 'ink'ez dune cha unli-i didoh-i ts'iyawh.

<sup>20</sup> Ndai la ndo nudilh-i dundult'oh-i, yun nulh'as-i dundult'oh-i cha, 'ink'ez yun nuts'eh-i dundult'oh-i cha, nanki dundult'oh-i ts'iyawh nts'un tidulh, khutinalh wheni.

<sup>21</sup> 'Ink'ez ndai la 'ut'alh-i ts'iyawh, tan'ulh-i ts'iyawh be 'onlelh, 'i ts'iyawh 'ulhonlelh. 'I la ooh'alh nyun 'ink'ez ndi khuna-i cha."

<sup>22</sup> 'Et Nowe 'et nduja, nts'en'a Yak'usda (Elohim) yuba nahizya, 'et ts'iyawh nduja.

## 7

### *Dutadilt'o-un*

<sup>1</sup> 'Et whe Moodihti (Yahweh) 'en Nowe 'uyulhni, "Nyuzkeh cha, nyunch'oh cha, mbene la nyoh whut'ine ts'iyawh ndi ts'i cho behdilh, daint'oh la ts'ih'un dune inli, ndi 'andit dune toh ndoh whuya hoozulh dune toh daint'oh la ts'ih-un dune inli-un 'et whunus'en.

<sup>2</sup> Ndi yun k'ut khuna-i ootsun hooloh-i, lhtak'ant'i dune 'ink'ez ts'eke bulh 'ilho didoh-i nanki whe khuna-i ts'iyawh. Ndi khuna-i dutsun-i cha, dune cha ts'eke cha, 'ohwhi 'i ts'iyawh olhchoot.

<sup>3</sup> 'Ink'ez ndi yun k'ut ndai la nudilh-i dut'ai ts'iyawh cha lhtak'ant'i dune 'ink'ez ts'eke bulh cha, 'ohwhi ts'iyawh ndi yun k'ut khuna-i ndai la khutinalh-i.

<sup>4</sup> Lhtak'ant'i dzin hukw'elh'az 'et ndi yun k'ut dit whunizyat (40) dzin 'ink'ez dit whunizyat 'ulhdzis whuts'un nawhutiltih. Ndai usla ndi yun k'ut usjiz-i ts'iyawh hooloh whutiltselh."

<sup>5</sup> 'Et Nowe nts'en'a Moodihti (Yahweh) yuba nahizya, ts'iyawh 'et nduja.

<sup>6</sup> Nowe 'en 600 be nawhudizut yun k'ut inda whe ndi yun k'ut 'et dutadilt'o.

<sup>7</sup> 'Et Nowe ooye'ke oo'at cha, 'ink'ez ooye'ke bu'atke cha ts'iyawh 'i nyoo ts'i cho huyeindil 'awet too ndo 'utinelh 'et huwa.

<sup>8</sup> Ndai la khuna-i lhidsun-i 'ink'ez khuna-i dutsun 'i cha, dut'ai cha 'ink'ez ndi yun k'ut nulh'az-i ts'iyawh.

<sup>9</sup> Nanki hinli whe ndi ts'i cho bez Nowe ts'un dahunilh'az, dune 'ink'ez ts'eke cha. 'Et nts'en'a Yak'usda (Elohim) 'en Nowe yuba nahizya, 'et nduhuja.

<sup>10</sup> 'Et hukw'elh'az lhtak'ant'i dzin inle' 'et 'awet ndi yun k'ut too whuzdli'.

<sup>11</sup> Nowe be yus k'ut-un, whunizyat lhk'utat whunizyat (600) 'et 'uhooja whulh nanki sanun (2) whunizyat 'on 'at lhtak'ant'it dzin (17) 'et 'uhooja ndi yun k'ut too ts'iyawh oodaha'dilts'ut, 'ink'ez ndo yak'uz whudadint'az cha whudaha'dankat.

<sup>12</sup> Dit whunizyat dzin 'ink'ez dit whunizyat 'ulhdzis 'et ndi yun k'ut yun chan honle'.

<sup>13</sup> Soo 'et dzin za Nowe ooye'ke cha, Shem, Ham 'ink'ez Japheth, 'ink'ez Nowe oo'at, 'ink'ez ooyas'atke cha ts'iyawh ndi ts'i cho huyeindil.

<sup>14</sup> 'Enne cha 'ink'ez ts'iyawh khuna-i lhelhths'un didoh, ts'iyawh musdoos lhelhths'un didoh, ts'iyai yun nulh'as lhelhths'un didoh, 'ink'ez yat whudut'ai lhelhths'un didoh cha, ts'iyai didoh lhelhch'a 'uwhut'en.

<sup>15</sup> Nanki whe ts'iyawh Nowe bulh ndi ts'i cho huyeindil. Nda la khuna-i ndi yun k'ut ooyiz hoonli-i ts'iyawh.

<sup>16</sup> Et ndowhi ts'iyawh ts'ek'e dune tubulh. Ndi yun k'ut hoonli-i Yak'usda (Elohim) 'en yuba nahizya, whuz un'a ndi ts'i huye indil 'ink'ez buch'az na'din'ai.

<sup>17</sup> Ndi hatadilt'o-i too dit whunizyat dzin (40) 'et 'ant'e' too ndo za lhe'inelh 'ink'ez ndi ts'i cho dudinlat yun ando ts'e whuz dudinlat.

<sup>18</sup> Too 'et za ndut'en 'ink'ez nus za lhe'itus ndi yun k'ut, 'ink'ez ndi ts'i cho 'oh nulat.

<sup>19</sup> 'Et ndi yun k'ut too tube takhulh sul'i. Dzulh 'owhi cha ts'iyawh ba ndo hatadilt'o.

<sup>20</sup> Ndo za 'ut'en (15 cubits) 'ink'ez ndi too dzulh ba ndo hatadilt'o.

<sup>21</sup> 'Et ndi yun k'ut khuna-i nuhutnah-i, dut'ai cha, 'ink'ez musdoos ndunt'i-i cha, yun nulh'as-i cha, ts'iyawh dune cha ts'iyawh hooloh huzdli'.

<sup>22</sup> Mbene la ooyiz hoonline husjizne, 'ink'ez hoonli husjiz-i 'ohwhi ts'iyawh yun k'ut 'unt'oh-i, ts'iyawh yaidla.

<sup>23</sup> 'Et ndi yun k'ut hoonli khuna-i ts'iyawh gak whulhths. Yun nulh'as-i cha, dune cha, 'ink'ez khuna-i cha, dut'ai cha, ts'iyawh gak whulhths. Nowe 'ink'ez yulh 'ut'enne 'enne za ndi ts'i cho bet hukhuna.

<sup>24</sup> 'Et whunizyat whunizyat 'ink'ez kwulat whunizyat dzin (150) 'et 'uwulhyz whe ndi yun k'ut too honle'.

## 8

### *Too 'awet yo 'uja*

<sup>1</sup> 'Et Yak'usda (Elohim) Nowe 'ink'ez khuna-i ndai la usjiz-i ts'i bet ts'iyawh yulh 'unt'ohne whunalnih, 'ink'ez Yak'usda nilhths'i 'i 'uyinla 'i ndi yun k'ut nalhths'i, 'et too yo 'uja.

<sup>2</sup> Ndi yun k'ut too ts'iyawh 'ink'ez ndo yak'uz whudadint'az cha ts'iyawh yudana'dinla 'ink'ez yak'uz ts'un chan 'etsul 'uyinla.

<sup>3</sup> 'Ink'ez too ts'iyawh yo whe'ninle, whunizyat whunizyat 'ink'ez 'on 'at kwulat whunizyat dzin (150) 'et too yo 'uja.

<sup>4</sup> 'Et ndi ts'i 'i nts'e ndi dzulh Ararat huyulhni 'unt'oh, 'i lhtak'ant'it sanun 'ink'ez whunizyat 'on 'at lhtak'ant'it dzin (17), 'i k'ut neninkez.

<sup>5</sup> 'Ink'ez too yo 'uja 'ink'ez yo za lhe'inelh whunizyat sanun whuts'un, 'udechoo dzin 'et dzulh oolatoh hooltsai.

<sup>6</sup> 'Et 'uhooja dit whunizyat dzin (40) 'etsul 'uhooja whe Nowe dadint'az 'i daha'idantan.

<sup>7</sup> Datsancho 'i yula ditni 'az ndulcho 'awh nut'o za ut'en, too gak tileh whuts'un.

<sup>8</sup> 'Et doo cha dut'aiyaz, 'imbin huyulhni, 'i yula ditni 'awet tila too yo 'uja ha.

<sup>9</sup> 'Et ndi 'imbin 'aw noot'ah-un hooloh, 'et ka ndi ts'i cho yuts'un naost'o, 'awhuz ndi yun ndulcho too hoonli. 'Et huwa Nowe dula be yuba tedilni 'ink'ez 'et danainilhti.

<sup>10</sup> 'Et doo cha lhtak'ant'i dzin 'et whubailh'e'. 'Et doo cha ndi 'imbin yuladitni.

11 'Et hulhgha 'et ndi 'imbin whusanat'o 'ink'ez duchun, olive hiyulhni, oot'an 'andit hanalhyai, 'i ooze yudiztan. 'Et 'awet Nowe t'eeoninzin ndi yun k'ut 'awet too hooloh suli'.

12 'Et doo cha lhtak'ant'i dzin 'et huba ilh'e', 'et doo cha ndi 'imbin, 'i yuladitni 'ink'ez 'aw whusanalhit'oh.

13 'Et 'uhooya lhk'utat whunizyat yus k'ut 'ink'ez 'et 'udechoo yus k'ut (601), 'ink'ez 'udechoo sanun 'udechoo dzin sanun 'et yun k'ut naoodisgih. 'Ink'ez Nowe ndi ts'i ndo yudaha'dantan 'ink'ez whunilh'en ndulcho yun naoodisgih.

14 'Et whulh nanki sanun nat whunizyat dzin 'on 'at lhtak'ant'i dzin sanun (27), 'et yun naoodisgih.

15 Yak'usda (Elohim) 'en Nowe yulh yailhduk 'uyulhni,

16 "Nyoo ts'i tenanindaih ndai la n'at cha 'ink'ez nyuzkehke, du'atke tubulh tenanuhdilh

17 Ndai la tsi bet dalts'i-i khuna-i usjiz-i ts'iyawh tenaninle, dut'ai cha 'ink'ez khuna-i 'ink'ez yun nulh'as-i cha, 'et si ndi yun k'ut lhai hooole'.

18 'Et Nowe teninya 'ink'ez buzke cha oo'at cha 'ink'ez bu'atke cha ts'iyawh bubulh.

19 Khuna-i ndai la yun nulh'as-i cha, dut'ai cha, ts'iyawh lhulhdidoh-i, 'i ts'iyawh ndi ts'i huye haindil.

*Yak'usda (Elohim) 'en Nowe khuni 'inla.*

20 'Et Nowe 'en Moodihti (Yahweh) ts'un loodel 'uzdilhk'un k'ut, 'i 'inla, 'ink'ez ndai la khuna-i 'aw lhditsun-i, 'ink'ez ndai la dut'ai 'aw lhditsun-i cha, 'ohwhi 'i k'ut yudalhk'un.

21 'Et Moodihti (Yahweh) ndi sooltsun-i yunahoolhtsun. 'Ink'ez Moodihti (Yahweh) didutch'oh dudzi yo 'utni, "Aw 'on 'at ndi yun dune gha 'aw ook'ehoosyih ait'oh. Dahint'oh la dune budzi ntsi' hintsool whuts'un, 'et hoonts'i 'aw doo cha 'on 'at khuna-i ndi yun k'ut gak hooselh ait'oh.

22 Ndi yun hoonli whut'oh 'a' nukat-un 'ink'ez ha' nukat-un,

whuzk'uz 'ink'ez whunulwus-un cha,

khit cha 'ink'ez shin cha.

'Ink'ez dzenis cha 'ink'ez 'ulhdzis cha hoonli-un,

'aw 'etsul lhe'whutasnel."

## 9

1 'Et Yak'usda (Elohim) 'en Nowe 'ink'ez ooye'ke tucha ts'iyawh soo hoonzoo-un hubulhni whe 'ubulhni, "Lhane cho oole' ndi yun doolhbun hubulhni.

2 Ndi yun k'ut khuna-i ts'iyai huye ntiljut, dut'ai cha ndi yun nuhutnah-i 'ink'ez lho cha ts'iyawh nohla k'ez be huwant'ai.

3 Dant'i ts'iyawh usjiz 'i nukhutnah, 'i ut'alh-i nohba oole'. 'Et ndai ts'iyawh nohgha nusla, 'ut'an hanuyeh ts'u'alh-i hoonts'i.

4 'Et hoonts'i ndi khuna-i 'awhuz buzakai be khuna bulh 'unt'oh, 'i 'aw lhuzon'al. Ndi "be khutna", 'i buzakai 'unt'oh ni whe 'utni.

5 'Alha dune nyuzkai' hawhulhtsi de sbut hutiyin whe' hoont'oh. Khuna-i dune silhghi 'i hoonts'i whuz un'a za 'uhoont'oh. Dune 'uyoon dune silhghi-un mbe 'uja-un buzakai' ooka' nuszun.

6 Mbe dune 'uyoon buzakai' whulhtsi-un,

'uyoon dune ndun dune 'uja-un yuzkai' whutilhtselh whe' hoont'oh, Yak'usda (Elohim) dune yulh ndult'oh yulhtsi 'et huwa.

7 'Ink'ez nohni, lhane cho nohuzkeh oole'. Lhan'un cho ndi yun k'ut whut'enne lhane cho nohuzke' hooole'."

8 'Et Yak'usda (Elohim) Nowe 'ink'ez ooye'ke te 'enne 'ubulhni,

9 “Et si whunulh'en sghuni 'i bulh 'i nohbulh lhadusla. Mbene la nohts'u haidene nohk'elh'az 'enne cha.

10 'Ink'ez khuna-i ts'iyawh nohbulh 'unt'oh-i, dut'ai cha, musdoos cha, 'ink'ez khuna-i ts'iyawh ndi yun k'ut hoonli-i nohbulh 'unt'oh-i, 'i ts'iyawh ts'i cho be nohbulh dehailh'az, yun k'ut khuna-i ts'iyawh.

11 Whuz un'a sghuni 'i bulh 'i nohbulh lhadusla. 'Aw doo cha za ndi yun k'ut ndai la khuna-i ts'iyawh usjiz-i, ts'iyawh 'aw too be 'aw huboosghan ait'oh. 'Aw doo cha za dutadilt'o whe ndi yun gak ooselh ait'oh.”

12 'Ink'ez Yak'usda (Elohim) 'utni, “Njan 'et si whehoodalh'eh khuni nohts'un lhadusla-i, si 'ink'ez nohni nohbulh, ndai ndi yun k'ut usjiz-i hoonli-i ts'iyawh 'ilhiz wheni khuni 'unt'oh.

13 Ditni na'anguz kw'us toh 'i 'usla. 'I gha whehoodat'en tileh si 'ink'ez ndi yun k'ut-i bulh khuna-i 'usla-i.

14 'Et 'uhot'e, ndet yun k'ut, kw'us whulhlih teh, 'et ditni na'anguz 'i ts'unoolh'en kw'us toh 'et.

15 Ndai la nohni cha 'ink'ez khuna-i cha ts'iyawh 'i oonatiznih khuni nohts'un lhadusla-i, ts'iyawh 'aw doo cha 'on 'at too ndo hatadilt'o, yun k'ut hoonli-i gak ooselh ait'oh.

16 Ditni kwun 'i kw'us toh hoonli de 'i nus'en de 'et whunatiznih, 'ilhiz wheni ndi khuni Yak'usda (Elohim) 'ink'ez ndi yun k'ut hoonli-i usjiz-i ts'iyawh khuni nohba lhadusla, oonatiznih.”

17 'Et Yak'usda (Elohim) Nowe 'ulhnni, “Njan whehoodat'en-un 'uhoont'oh, 'uwhusla-un, njan khuni nohba lhadusla 'uhoont'oh, Si 'ink'ez ndi yun k'ut hoonli ts'iyawh usjiz-i bulh lhet'o khuni.”

### *Nowe 'ink'ez buye'ke 'en hubulh dahooja*

18 'Andit 'et Nowe ooye'ke 'en ndi ts'i cho be hahandil, 'en Shem, Ham, 'ink'ez Japheth. 'Ink'ez Ham, 'en Canaan be oobá 'unt'oh.

19 Ndunne tane 'enne Nowe ooye'ke hinle, 'enne buts'u haidene. 'Enne bugha ndi yun k'ut whudizbun.

20 'Ink'ez Nowe hanuyeh-i ghana-un sulí, duchun oomai' hoonli-i 'et 'uhoonla.

21 'Et ndi ts'ekoo too' 'uyinla-i yitnai' whe tanisnai' 'ink'ez ook'e'tizkat nimbali t'ah.

22 'Et Ham Canaan oobá 'en dubá ye 'ust'et yan'en 'ink'ez nane dulhusinke 'enne budani' 'az.

23 'Et Shem 'ink'ez Japheth bulh naih hihhchoot 'ink'ez dut'a ts'e k'ehuyilhal duwus k'ut 'ink'ez k'oh un'a hi'us whe dubá hik'ehuyin'oh 'aw dubá lhuhinil'el, ye 'ust'et lhuhuyl'el.

24 'Et Nowe ts'ekoo too' utnai' whe ts'eninzut, 'udek'oh-un duye' 'en dadudinla la 'et teonanzin.

25 'Ink'ez 'utni,  
“Canaan ook'ehidih.

Dune ba 'ut'en-un 'enne buba' tit'elh 'et la dudulhutsinke cha buba' titelh.”

26 'Ink'ez 'utni,  
“Moodihti (Yahweh) soo hoonzoo-un unli.

Shem ooYak'usda (Elohim) 'unt'oh. 'Ink'ez Canaan yunat ne'ut'en-un oole'.

27 Yak'usda (Elohim) Japheth ncha yoolhts'elh,  
Shem oonimbali t'ah 'oh hoot'e',  
'ink'ez Canaan yunat ne'oot'en.”

<sup>28</sup> 'Inkez Nowe butadilt'o hukw'elh'az 'et whunizyat tat whunizyat 'ink'ez kwulat whunizyat yus k'ut (350) 'et nakhitna'.

<sup>29</sup> 'Et Nowe 'alghoh ndi yun k'ut inda'-un whunizyat 'ilho hooloh whunizyat 'ink'ez kwulat whunizyai yus k'ut (950) whe dazsai.

## 10

### *Nowe ts'u haindene*

<sup>1</sup> Nduenne 'enne Nowe ooye'ke ts'u haindene Shem, Ham 'ink'ez Japheth, ts'iyawh buye'ke whuzdli' dutadilt'o hukw'elh'az.

<sup>2</sup> Japheth buzke'eh dunene,

Gomer, Magog, Madai, Javan, Tubal, Meshech 'ink'ez Tiras.

<sup>3</sup> Gomaer buzkeh dunene,

Ashkenaz, Riphath, 'ink'ez Togarmah.

<sup>4</sup> Javan buzkeh dunene,

Elishah, Tarshish, Kittim, 'ink'ez Dodanim.

<sup>5</sup> Nduenne 'enne yatooba 'udun keyoh whut'enne buch'oh nehunindil didutch'oh duyun mbene la 'ilho khuni be za yalhdukne 'ink'ez dahint'oh la lhelhdoh hudidoh 'enne 'oh huwhut'i.

<sup>6</sup> Ham buzkeh 'enne dunene,

Cush, Misraim, Put, 'ink'ez Canaan 'uhant'e.

<sup>7</sup> Cush buzkeh 'enne dunene,

Seba, Havilah, Sabtah, Raamah, 'ink'ez Sabtechah.

Raamah buzkeh 'enne dunene,

Sheba 'ink'ez Dedan 'uhant'e.

<sup>8</sup> Cush 'en Nimrod ooye' suli', 'ink'ez Nimrod tube ulhtus ndi yun k'ut neninya.

<sup>9</sup> 'En 'unt'oh Moodihti (Yahweh) bunalh soo tube cho 'uka 'ut'en-un unli. 'Et huwa 'uwhutni, "Nimrod k'un'a Moodihti (Yahweh) bunalh soo tube cho 'uka 'ut'en-un unli."

<sup>10</sup> 'Udechoo whu Lerwe suli'-un, 'en Babel, Erech, Accad 'ink'ez Calneh, Shinar yun k'ut.

<sup>11</sup> 'Et yun whuts'un Assyria 'ink'ez Nineveh huwhutni-un 'et cha 'uhoonla, Rehoboth Ir 'ink'ez Calah.

<sup>12</sup> 'Ink'ez Resen, Nineveh 'ink'ez Calah whulh eguz, 'et 'udechoo keyoh whuti.

<sup>13</sup> Mizraim buye'ke, 'enne Lud whut'enne, Anam whut'enne, Leheb whut'enne, Naphtuh whut'enne,

<sup>14</sup> Pathrus whut'enne, 'ink'ez Casluh whut'enne, 'enne Philistinene 'ink'ez Caphtor whut'enne hahande.

<sup>15</sup> Canaan 'en Sidon, 'udechoo ooye' yuzdli', 'ink'ez Heth;

<sup>16</sup> Jebus whut'enne, Armor whut'enne, 'ink'ez Girgash whut'enne cha,

<sup>17</sup> ndunne Hiv whut'enne, Ark whut'enne, 'ink'ez Sin whut'enne cha,

<sup>18</sup> ndunne Arvad whut'enne, Zemar whut'enne, 'ink'ez Hanath whut'enne cha. 'Et hukw'elh'az Canaan ts'u haindene 'enne lhelhts'un yahandil.

<sup>19</sup> Canaan whut'enne whukeyoh whuban 'et Sidam, Girard ts'uwheti-un Gaza 'uwuldzoh, Sodom ts'uwheti-un Gomorrah, Admah, Zeboim, Lasha ts'e 'uwuldzoh.

<sup>20</sup> Nduenne, 'enne Ham ooye'ke ts'u haindene cha 'ilho khuni be yahulhduk 'ink'ez duyun 'ink'ez 'ilho hudidoh.

<sup>21</sup> Shem 'en cha oobuzkeh whuzdli', Eber buzkeh, 'en ooba. Bulhutsin Japheth 'udetso whudilhdzulh-un.



- 22 Shem ooye'ke,  
'enne Élam, Assur, Arphaxad, Lud, 'ink'ez Aram.
- 23 Aram ooye'ke,  
'enne Úz, Hul, Gether, 'ink'ez Mash.
- 24 Arphaxad 'en Shelah ooye' 'unt'oh,  
'ink'ez Shelah 'en ooye' Eber 'unt'oh.
- 25 Eber ooye'ke nane hinli.  
'Ihoghun boozi 'en Peleg. 'En khuna da' ndi yun k'ut lhts'e hoolts'ut 'et huwa. 'Ink'ez bulhutsin, 'en Joktan ts'utni.
- 26 Joktan ooye'ke 'enne Almodad,  
Sheleph, Hazarmaveth, Jerah,  
27 Hadoram, Uzal, Diklah,  
28 Obal, Abimael, Sheba,  
29 Ophir, Havilah, 'ink'ez Jobab. 'En ts'iyawh Joktan ooye'ke 'uhint'oh.
- 30 Ndet la huwhut'i-un, Mesha, Sephar ts'uwheti-un nda' dzulh hoonli 'et huwhut'i.
- 31 'Enne Shem ooye'ke ts'u haindene cha, 'ilho khuni yahulhduk. 'ilho hudidoh whe 'ilhoh huwhut'i.
- 32 Ndunde 'enne Nowe ooye'ke ts'u haindene 'enne ts'iyawh lhk'ehidil ndi yun k'ut too whuzdli' hukw'elh'az. 'Ink'ez 'ilhoh huwhut'i ndi yun k'ut lhelhdoh 'uhoont'oh.

## 11

### *Babel whunedan'a*

- 1 Ndi yun k'ut 'oh da' 'ilho khuni za hoonli ts'iyanne lhk'un'a yahulhduk.
- 2 'Et 'uhooja nda' ndaz de hutizdil whe yun, Shiner huyulhni, 'i hik'eindil 'et 'uhoont'oh dachun hooloh-un nahuhoon'ai 'et nehunina.
- 3 'Et lhgha 'uhudutni, "Anih, tse tl'us 'i 'uts'ooleh, 'ink'ez soo cho whe ts'oolht'es." Tse tl'us 'i tse ba huyut'i 'ink'ez be ts'uwhudzeh, 'i hiye whutl'us ba.
- 4 'Et 'uhutni, "Anih njan keyoh whuti 'uts'odoolneh 'ink'ez ndo yak'uz nain'a-i nyiz-i cho 'i 'uts'ooleh. 'Et wheni si neoozi' hoonli hole', ndi 'uts'inla da, doo ka si ndulcho whe ndi yun k'ut yats'odilh."
- 5 'Et whe Moodihti (Yahweh) ndus de hainya 'ink'ez nyo keyoh whunilh'en 'ink'ez nyoo nain'a-i cho yoh huyulhntsi, 'i cha 'uhuyinla-i yunalh'en.
- 6 'Et Moodihti (Yahweh) 'utni, "A 'ilhune za hinli dune 'ink'ez lhk'un'a za yahulhduk. 'Et njan 'et azi whe'honilh'en ndai la 'uhitilelh hukwa' huninzun-un ts'iyawh si 'uhuhooleh.
- 7 'Anih buts'un ts'utoodilh, 'ink'ez bughuni 'i buch'a lhtats'uholelh. 'Et si hlulh hoodosts'o."
- 8 'Et whe Moodihti (Yahweh) lhch'a buninla, 'ink'ez njan yun k'ut ndulhcho nehunindil. 'Et whe dune whut'i whocho nehonin'ai 'et 'etsul 'uhuja.
- 9 'Et huwa nyo nain'a-i cho, 'i Babal huyulhni, ndai la huye yalhduk-i cha ts'iyawh Moodihti (Yahweh) lhelhts'un un'a yahulhduk hubulhntsi 'ink'ez ndulcho yahandil.

### *Shem ts'u haindene*

- 10 Shem huyulhni-un, 'en oots'u hayandene ndi 'i 'unt'oh: whunizyat whunizyai 'et be yus k'ut (100) whe ooye' Arphaxad huyulhni, 'en ooye' sulil' dutadil'o hukw'elh'az nat yus k'ut 'et whuzdli'.
- 11 Arphaxad ookelh'az whudli-un 'et Shem 500 yus k'ut 'et nahinda' whe 'et ooye'ke cha 'ink'ez ootse'ke cha nahodle'.

<sup>12</sup> Arphaxad 'en tat whunizyai 'on 'at kwulat be yus k'ut whe 'et Shelah huyulhni, 'en ooyaz suli'.

<sup>13</sup> Shelah whuzdli hukw'elh'az Arphaxad 403 be yus k'ut whe dune cha 'ink'ez ts'ekoo cha 'enne buzkeh nasdli'.

<sup>14</sup> Shelah 'en tat whunizyat be yus k'ut (30) whe 'et ooye', Eber huyulhni, 'en ooye' suli'.

<sup>15</sup> Eber hukw'elh'az 'et Shelah 403 yus k'ut whe 'et 'uyoonne dune cha 'ink'ez ts'ekoo cha buzkeh nasdli'.

<sup>16</sup> Eber tat whunizyat 'on 'at dit be yus k'ut (34) whe 'et Peleg huyulhni, 'en ooye' suli'.

<sup>17</sup> 'Et Peleg ook'elh'az 'et Eber 430 yus k'ut 'uyoonne dune cha, ts'ekoo cha buzkeh nasdli'.

<sup>18</sup> Peleg tat whunizyat be yus k'ut (30) whe 'et Reu huyulhni 'en ooye' suli'.

<sup>19</sup> Reu whuzdli hukw'elh'az whe 'et Peleg nat whunizyat nat 'ink'ez 'ilho hooloh be yus k'ut (209) whe 'et 'uyoonne dune cha 'ink'ez ts'ekoo cha nawhusdli'.

<sup>20</sup> Reu tat whunizyat 'on 'at nat be yus k'ut (32) whe 'et ooye', Serug huyulhni, 'en ooye' suli'.

<sup>21</sup> Serug whuzdli hukw'elh'az Reu 207 be yus k'ut whe 'et 'uyoonne, dune cha ts'ekoo cha buzkeh nawhusdli'.

<sup>22</sup> Serug tat whunizyat be yus k'ut (32) whe 'et Nahor huyulhni-un, 'en ooye' suli'.

<sup>23</sup> Nahor whuzdli hukw'elh'az Serug 200 be yus k'ut 'et 'uyoonne dune cha ootse'ke cha nawhusdli'.

<sup>24</sup> Nahor nat whunizyat 'on 'at 'ilhohooloh be yus k'ut (29) whe 'et Terah huyulhni-un 'en ooye' suli'.

<sup>25</sup> Terah hukw'elh'az, Nahor 119 be yus k'ut ooye'ke 'ink'ez ootse'ke cha nawhusdli'.

<sup>26</sup> 'Et Terah lhtak'ant'it whunizyat be yus k'ut (75) whe 'et Abram huyulhni-un, Nahor 'ink'ez Haran 'enne buzkeh suli'.

### *Terah ts'u haindene*

<sup>27</sup> 'Et Terah ts'u haindene: 'enne Abram, Nahor 'ink'ez Haran. Haran 'en Lot ooye' suli'.

<sup>28</sup> 'Ink'ez Haran 'en dubá yutso dazsai, didutch'oh dukeyoh 'et Chaldeeane bukeyoh 'et.

<sup>29</sup> 'Et Abram 'ink'ez Nahor bulh bu'at whuzdli'. Abram oo'at, 'en Sarai huyulhni, 'ink'ez Nahor oo'at, 'en Milcah huyulhni, Haran ootse', Milcah oobá 'ink'ez Iscah oobá.

<sup>30</sup> 'Et Sarai 'en oochan danáwhudilts'ut, oobuzkeh hooloh.

<sup>31</sup> 'Ink'ez Terah duye' Abraham, duchai Lot te, Haran ooye' 'ink'ez duyas'at, Sarai duye', Abram oo'at cha. Ur, Chaldean bukeyoh, 'et Canaan ts'e whe-handil, keyoh Haran highu nindil 'ink'ez 'et huhoot'e'.

<sup>32</sup> 'Et whe Terah oodzin 'et 205 be yus k'ut yinka inda', 'ink'ez Terah 'en Haran keyoh ts'uwhutni, 'et dazsai.

## 12

### *Abram ooba hoonzoo oole' la*

<sup>1</sup> 'Et Moodihti (Yahweh) Abram 'ulhni, "Nkeyoh cha whuch'a sinyai', nyunatneke cha whuch'a sinyai', 'ink'ez mbá ooyoh cha teninyai', 'ink'ez yun whununtistun-un hoonli.

<sup>2</sup> Tube didoh-un ncha-un nyutiselh, soo hoonzoon-un nts'un tiszoo' 'ink'ez nyoozi' cha ncha tiselh.

'Ink'ez 'uyoonne ba soo hoonzoo-un bugha hóotalts'ulh 'int'oh nyutiselh.

<sup>3</sup> Mbene la mba soo hoonzoo-un nga hóotalts'ulh,  
'enne cha soo hoonzoo-un bugha hóotalts'ulh,  
'ink'ez mbe la nk'ehiyihne cha buk'ehutisyyih,  
ndi yun k'ut dilhts'ine 'enne ts'iyawh nyun nga soo hoonzoo-un bugha  
hóotalts'ulh."

<sup>4</sup> Et Abram Moodihti (Yahweh) daja la 'et nduja whe tizya Lot 'en yulh tiz'az  
'ink'ez Abram 'en lhtak'ant'it whunizyat 'on 'at kwulat be yus k'ut (75) whe  
'et njan Haran huwutizya.

<sup>5</sup> Et Abram du'at yilhchoot 'ink'ez Lot oo'at cha hubilhchoot 'ink'ez ndai  
la huyut'i-i cha ts'iyawh nahuyalhdzoo 'ink'ez mbe la dune bugha nindene  
'enne cha Haran, Canaan ts'e yun k'uz whehandil 'ink'ez Canaan nehunindil.

<sup>6</sup> Abram 'oh whuya keyoh lhusuya 'ink'ez keyoh Shechem huwutni-un  
Moreh duchun Terabim huyulhni, 'i nadan'a 'et whuts'un 'ink'ez Canaan  
whut'enne 'enne nyo yun k'ut hudilhts'i.

<sup>7</sup> Et Moodihti (Yahweh) Abram yunalh ts'et hainya 'ink'ez 'uyulhni,  
"Mbene la nts'u haindene 'enne ndi yun bugha ítas'ah." 'Et Moodihti (Yah-  
weh) yunalh ts'et hainya-un 'en yuts'un loodel 'inla.

<sup>8</sup> Et whuts'un Bethel huwutni-un dzulh hoonli 'on da' whuz wheinya, 'et  
nimbali nenin'ai ba noo' 'et. Bethel 'ink'ez 'on da' 'et Ai 'et loodel nenin'ai.  
Moodiht (Yahweh) ts'un 'ink'ez Moodihti (Yahweh) yoozi' 'i yuka'dani'.

<sup>9</sup> Abram 'et nyan za Negev lhoyalh.

<sup>10</sup> Et 'uhooja nyo keyoh dai whuzdli' 'inka Abram Egypt ts'e wheinya tube  
dai whuzdli' 'et huwa.

<sup>11</sup> Et 'uhooja 'awet Egypt wheinghoh whe du'at Sarai 'uyulhni,  
"T'eeonuzsun tube ts'eke inzoo' whe 'int'oh.

<sup>12</sup> Et huwa 'et la 'uhoneh Egypt nenit'az de nyo nilh'en whe 'et la 'uhu-  
dooni', 'Ndun oo'at 'unt'oh,' 'ink'ez la sozoolhghelh nyun 'aw nyozoolhghelh  
ait'oh.

<sup>13</sup> Et soo cho 'udoni' ndun 'en sulhutsin 'unt'oh 'et de la soo 'oost'e' nyun  
gha. 'Ink'ez la nyulh khoosna'."

<sup>14</sup> Et Abram Egypt neninya whe nyoonne Egypt whut'enne ts'eke hitilh'en  
whe tube ts'ekezoo'.

<sup>15</sup> Lerwe ooye'ke Pharaoh 'enne cha hinilh'en 'ink'ez dubá 'en hidani',  
"Ndun 'en tube ts'ekezoo'," 'ink'ez nyoon ts'eke 'en Pharaoh ooyoh ts'e  
huyoolhti.

<sup>16</sup> Abram soo cho ne'huyulh'en nyoon oo'at 'en gha. 'Usbai cha mus-  
doos dune cha donkey huyulhni, dune cha, ts'ekoo 'ink'ez dune cha hinat  
ne'ut'enne. Donkey ts'ekoo cha 'ink'ez camel huyulhni, 'i higha hininla.

<sup>17</sup> Et hoontsi Pharaoh tube dada unt'si-i Pharaoh ooyoh cha 'et dinzut  
whulhtsi Sarai, Abram oo'at, 'en gha.

<sup>18</sup> Et Pharaoh Abram 'anih yudani', "Daneinla whe ne'inla? 'Et di ha  
lhunedinelh, ndun ts'eke n'at 'unt'oh?"

<sup>19</sup> Et di ha 'une'dini, 'Ndun sulht's 'unt'oh?' Nedini s'at eni da' 'oschoot  
oole'. 'Et huwa ndun n'at nailhchoot 'ink'ez nts'e tanyalh ts'e inyalh."

<sup>20</sup> Et Pharaoh dudune'ne 'ubulhni 'inka whenahuyalh'a' oo'at cha 'ink'ez  
ndai ts'iyawh yut'i cha.

## 13

### *Abram 'ink'ez Lot 'et lhch'a hust'az*

<sup>1</sup> Et Abram Egypt whuch'a huzdil, oo'at cha 'ink'ez Lot cha bubulh tiz'az  
whe ts'iyawh huyut'i-i tubulh nda' hutizdil.

<sup>2</sup> Abram tube hoonzoo' 'unt'oh, khuna-i cha lhai yut'i 'ink'ez silver ink'ez gold tubulh lhai yut'i.

<sup>3</sup> 'Et hutizdil Bethel whuts'un hutizdil ndet da' 'uda' nimbali nenin'ai inle' 'et 'udechoo whuts'un Bethel 'ink'ez Ai whulhetoh whuz hoozdil.

<sup>4</sup> 'Udechoo loodel nenin'ai inle' 'et whuts'un 'et whuz hoozdil. 'Et Abram Moodihti (Yahweh) yuts'un tenadidli.

<sup>5</sup> Lot 'en cha Abram bubulh tizya, khuna-i cha, musdoos cha, 'ink'ez nimbali cha, lhai cha ut'i.

<sup>6</sup> Ndi yun 'aw soo lhe'ilcho hik'oh hutinalh huba 'aw lhzih huhoot'e' ait'oh, tube lhai hoonli ts'iyai hut'i k'et.

<sup>7</sup> 'Et Abram bughunai' ghunline 'ink'ez Lot bughunai' ghunline 'enne 'aw 'ulhuholdzin ait'oh. 'Oh da' ndunne Canaan whut'enne 'ink'ez Periz whut'enne, 'enne cha njan yun k'ut huwhut'i.

<sup>8</sup> 'Et Abram, Lot yulhni, "Aw hoonli huwun nyun 'ink'ez si bulh lhdulhyoh 'udotni' ait'oh. 'Ink'ez si skhunai-i ghunline, 'ink'ez nyun nghunai-i ghunline, lhulh dulhyoh hudotni ait'oh. Lhulhlhutsinke ts'inli' et huwa.

<sup>9</sup> Nyoo yun lhe'ulcho-i nilh'en. Sch'a sinyai' 'intl'us ts'e whuz inyalh 'ink'ez si cha nailhni' ts'e toosya', k'us nyun nailhni' ts'e inyalh 'ink'ez si 'intl'us ts'e si toosya'."

<sup>10</sup> 'Et Lot whunilh'en Jordon keyoh duchun hooloh-un ts'iyawh yunilh'en. Too cha lhai whe' hoont'oh, (Moodihti (Yahweh) Sodom 'ink'ez Gomorrah bulh gak whutilhtselh whuts'o), Moodihti (Yahweh) hanuyeh k'et 'et nduhoont'oh inle', Egypt dahoont'oh la Zoar ts'u wheti ts'e, 'et nduhoont'oh.

<sup>11</sup> 'Et Lot nyo yun k'ut Jordan whunat ts'iyawh 'et 'utahaoodit'ai, 'ink'ez nda' wheinya 'et 'ink'ez 'et lhch'a hust'az.

<sup>12</sup> Abram 'en Canaan keyoh 'et nenina 'ink'ez Lot 'en keyoh whuti duchun hooloh-un 'ink'ez 'et nimbali nenin'ai Sodom whuts'un.

<sup>13</sup> 'Et hoonts'i nyoonne Sodom dunene tubeh hintsi', 'ink'ez Moodihti (Yahweh) ch'az lubeshi 'uhulh'en.

<sup>14</sup> 'Et Moodihti (Yahweh) 'en Abram 'uyulhni Lot bulh lhch'a hust'az hukw'elh'az whe, "Whunilh'en ndet sinyin 'et whuts'un whunilh'en, no cha, nyan cha, nda' cha, 'ink'ez noo' cha.

<sup>15</sup> Nda'i la yun nilh'en-i 'ilhez wheni ts'iyawh nts'u haindene tubulh 'i nohgha nus'ai.

<sup>16</sup> 'Ink'ez nts'u hahande 'enne yun k'ut lhez k'un'a butiselh. 'Et whe dune yun k'ut lhez hodutilhto de, 'et si nts'u haindene 'enne cha si bulh olto.

<sup>17</sup> Dudinyaih 'ink'ez yun k'inyaih inyalh, dawhulhyiz la 'ink'ez dawhulhtel la ndi yun 'i ngha tis'alh' et huwa."

<sup>18</sup> 'Et Abram dunimbali nanayan'ai 'ink'ez ndun Mamre ooduchun, Terabinth huyulhni, 'et nenina. Keyoh Hebron 'uhoont'oh 'ink'ez 'et loodel 'inla Yak'usda ts'un.

## 14

### *Lot huyilhchoot*

<sup>1</sup> 'Et 'uhooja Amraphel huyulhni, yun k'ut Shinar whulerwe Arioch, keyoh Ellasar whulerwe, Chedorlaomer, yun k'ut Elam whulerwe 'ink'ez Tidal Goiim whut'enne whulerwe.

<sup>2</sup> Bera huyulhni, Sodom whulerwe, Birsha huyulhni Gomorrah whulerwe, Shinab Admah whulerwe, Shemeber Zeboiim whulerwe, 'ink'ez Bela whulerwe, 'enne bubulh lhuwhehungan.

<sup>3</sup> Nduonne ts'iyawh lhts'u nehudindil 'ink'ez Siddim wheguz ('et 'uhoont'oh, lisel yatoo').

4 Whunizyat 'on 'at nat yus k'ut (12) 'et ndun Chedorlaomer huyulhni 'en ba' hit'en 'ink'ez whulh whinizyat 'on 'at tat yus k'ut (13) 'et hich'az nedindil.

5 Whulh whunizyat 'on 'at dunghi be yus k'ut (14) whe Chedorlaomer 'ink'ez nyoonne lerwe yulh 'ut'enne, 'enne hubulh whelhonigan, nyoonne Reph whut'enne, keyoh Ashteroth-Karnaim hudilhths'i, 'ink'ez nyoonne Zuz whut'enne, ndunne keyoh Ham hudilhths'i, 'ink'ez nyoonne Em whut'enne, 'enne keyoh Shaveh Kiriathaim hudilhths'i,

6 'ink'ez ndunne Hor whut'enne, 'enne dudzulh k'ut dzulh Seir 'et El Paran whuts'un 'uhooldzoh, chunt'oh 'uhoont'oh whenghoh 'et whuts'un.

7 'Et lht'anahunisdil 'ink'ez keyoh En-mishpat (Kadesh 'uhoont'oh) whuz hutizdil Amalek whut'enne bukeyoh 'ink'ez Amor whut'enne bukeyoh 'enne Hazazon-tamar huwhut'en, 'enne bubulh whelhonigan.

8 'Ink'ez Sodom whulerwe, Gomorrah whulerwe, Admah whulerwe 'ink'ez Zeboi whulerwe 'ink'ez Bela whulerwe, Zoar huwhutni 'enne ts'iyawh lhts'u nehudindil 'ink'ez Sidom dzulh eguz whuz'ai-un 'et whelhonigan.

9 'Et Chedorlaomer, Elam whulerwe, Tidal, 'udun keyoh whut'enne bulerwe, Amraphel, Shinar whulerwe, 'ink'ez Arioch, Ellasar whulerwe, dine lerwe 'enne kwulane lerwe buch'az nehudindil.

10 'Et njan Sidom dzulh eguz whuz'ai-un, asphalt huyulhni, lhai 'oh dunt'i 'ink'ez Sodom whulerwe 'ink'ez Gomorrah whulerwe bulh whe tse halhdil. Whulohne 'et yahaadla, 'et mbene la lhch'u tizkatne 'enne ndo dzulh tuz whe tse halhdil.

11 'Et ndunne dine lerwene, 'enne Sodom 'ink'ez Gomorrah keyoh whuch'e' ts'iyawh huyilhchoot, ndai la hik'uhuna-i cha 'ink'ez whenahidil.

12 Lot 'en cha huyilhchoot, Abram bulhutsin ooye' 'unt'oh. Sodom 'et whut'i, ndai la yut'i-i cha 'ink'ez ts'iyawh hiyulh whenadil.

13 'Et 'ilhoghun nintanalgai-un whe Abram, Hebrew whut'en-un, ghu ninya 'ink'ez yulhni. Abram 'en njan duchun, oak hiyulhni, 'et whut'i. Ndi duchun 'i ndun Amor whut'en, Mamre 'int'oh, 'en ye 'unt'oh-i 'unt'oh. Boono Eshcol 'ink'ez boono Aner 'en, Abram hits'u dutni 'uhint'oh.

14 'Et Abram bulhutsin Lot huyulhna huyulhni whe dudune'ne 318 'enne hodil'e'ne yuba 'ut'enne, Abram hiyoh whuzdline, 'enne buba untizyoot keyoh Dan whuts'un.

15 'Enne ts'iyawh lhk'ebanla 'ink'ez 'ulhdzis whe yuba 'ut'enne tubulh ndunne bubulh whelhonigan Hobah whuts'un whenabonanyoot Damascus whano 'et 'uhoont'oh.

16 'Et ndai la huyilhchoot-i cha 'ink'ez bulhutsin Lot cha, highu huyilhchoot-i cha, ts'ekoo cha 'ink'ez dunene ts'iyawh nabuhilhchoot.

17 'Et Sodom whulerwe, Shaveh wheguz 'et, 'en Abram yududziza (Lerwe wheguz whuz'ai huwhutni), Chedorlaomer hich'a' nilhde hukw'elh'az 'ink'ez lerwe hiyulh 'ut'enne tubulh.

18 'Et Melchizedek Salem whulerwe, ut'alh-i cha 'ink'ez ts'ekoo too' cha 'i bubut neininla, 'en Yak'usda 'uk'enus dizti'-un (El Elyon)\* 'en oolubret 'unt'oh.

19 Soo hoonzoo-un ubulh yalhdruk whe 'utni

“Yak'usda 'uk'enus dizti'-un (El Elyon) yak'uz

'ink'ez ndi yun k'ut cha ooch'e' hoonli-un 'en gha Abram soo hoonzoo-un oogha hootalts'ulh.

20 Yak'usda 'uk'enus dizti'-un (El Elyon) 'en soo hoonzoo-un 'unt'oh,

\* 14:18 Ndi boozii' El Elyon, 'i “Yak'usda Soo 'Uk'enus Dizti' Unli,” ni whe 'utni. 'Et 1 Timothy Ts'o K'eyanguz-i 6:15 'et Sizi Gri huwun ndutni, “...NeMoodihti 'en za k'une' 'ut'en-un unli. Lerwene ts'iyawh bulerwene unli. 'Ink'ez moodihne cha ts'iyawh buMoodihti unli.”

nch'az ditnine nla k'ebanla." 'Ink'ez 1/10th yut'i ts'iyawh yugha ininla.

<sup>21</sup> 'Et Sodom whulerwe Abram yulhni, "Dune 'enne sgha buninle 'ink'ez ndai la hoonli-i, 'i nyunch'oh ilhchoot."

<sup>22</sup> 'Et hoonts'i Abram Sodom whulerwe yulhni, "Ndi sla 'unt'oh usla Moodihti (Yahweh) Yak'usda 'uk'enus yoodo 'unt'oh (El Elyon) 'en oots'un duduzni, 'en yak'uz cha ndi yun k'ut cha ooch'e' hoonli.

<sup>23</sup> Aw hoonli lhituzaschulh 'ughabats'e' ntsool-i yaz k'us kenat'oolh hoonts'i ndai la nch'e' 'aw hoschoot ait'oh, doo ka la 'udoni' 'Abram hoonzoo' 'unt'oh susi doni' la,'.

<sup>24</sup> Ndaí la chilke hiyan'al-i 'ink'ez dune sulh tizdilne Aner, Eshcol 'ink'ez Mamre 'enne ooch'e' huyolhchoot dulhni."

## 15

### *Yak'usda (Elohim) 'en Abram khuni ooba lhaidinla*

<sup>1</sup> 'Et nduhooja hukw'elh'az Moodihti (Yahweh) ooghuni Abram hon'en whe nduyulhni,

"Abram, wheniljut ilhoh.

Nyun mba kelatun usli,

soo 'uk'enus mba k'elha whutale'-un.

<sup>2</sup> 'Et hoonts'i Abram 'utni, "Moodihti Yak'usda (Adonai\* Yahweh) di sgha tan'alh? 'Aw suzkeh cha hooloh mbe la sk'edutiyaalh 'en Eliezer Damascus whut'en-un eh 'unt'oh?"

<sup>3</sup> 'Et Abram 'utni, "Whunilh'en 'aw suzkeh sghalhinlel. Mbe la syoh whuzdli-un 'en sk'edutiyaalh-un tileh."

<sup>4</sup> 'Et whunilh'en, Moodihti (Yahweh) ooghuni weidilts'ut 'utni, "Ndun 'aw nk'elhdutisyal whe 'unt'oh nyunch'oh nyust'e ts'u hainzut-un 'en nk'edutiyaalh."

<sup>5</sup> 'Et n'az teinilhti 'ink'ez 'uyulhni, "Ndo yak'uz ts'e whunilh'en sum hoolhto hukwa soo tila holhto." 'Ink'ez 'et 'uyulhni, "Mbene la nts'u haindene 'et 'uhutiltsuk."

<sup>6</sup> 'Et Moodihti (Yahweh) yuba 'alha 'udija, 'ink'ez 'Ts'ih'un dune unli,' 'uyulhni.

<sup>7</sup> 'Et 'uyulhni, "Si, Moodihti (Yahweh) 'ust'oh. Ndunne Chaldea whut'en, 'et buyun k'ut Ur, 'et whuch'a njan yun k'ut nch'e' whutileh ha."

<sup>8</sup> 'Et 'uyulhni, "SMoodihti Yak'usda (Adonai Yahweh), nts'en'a t'ewhuntazin stl'awhutikulh 'et?"

<sup>9</sup> 'Et nduyulhni, "Tat be yus k'ut-i musdoos ts'ekeyaz cha, tat be yus k'ut-i ts'eke 'usbai cha, 'ink'ez tat be yus k'ut-i dúbe cha, dut'ai 'imbin cha, turtle dove huyulhni, 'ink'ez dut'aiyaz cha, pigeon huyulhni, 'i ndiz sts'inlelh."

<sup>10</sup> 'Et ndokhi ts'iyawh yughi ninla, ts'iyawh lhk'eyant'az lhzih neininla, 'et nyoo dut'ai 'i 'aw yut'alhanal.

<sup>11</sup> 'Et whe dut'ai cho, vulture huyulhni, 'i ndi khuna-i huyanghan, 'i yuk'endil whe Abram whenabunanyoot.

\* 15:2 Ndi boozí Adonai 'i, "Moodih 'En neK'une'ul'en-un 'Unt'oh," ni whe 'utni. 'Et Philippi Whut'enne But'só k'eyanguz-i 2:9-11 'i be whuts'odul'eh whe Sizi Gri 'en Moodih ndun neK'une'ul'en-un 'Unt'oh. Njan 'udust'l'us 'et ndutni, "'Et huwa Yak'usda ts'iyaintsuk gha ndo yudálhti' 'ink'ez boozí' 'uk'enus hooncha hukw'un'a yoozi' whulhtsi. 'Et whuz un'a ndi Sizi boozí', 'i oogha ts'iyanne dugwutsi be hits'un nudútilyaalh whe' hooht'oh. Yak'uz whut'enne 'ink'ez ndi yun k'ut whut'enne, 'ink'ez yun k'ut 'unt'ohne, 'enne cha ts'iyawh. 'Et ts'iyawh lhenyoo khuni be yalhdukne, 'enne ts'iyawh nja nduwhutanelh, Sizi Gri neMoodihti 'unt'oh. 'Et whuz un'a nduwútanelh, 'et Yak'usda neBá, 'en hidutálhti'whe' hutni." 'Et 1 Timothy Ts'ó K'eyanguz-i 6:14-16, 'ink'ez John Ooba Ts'tet Hahónkat-un 19:15-16 'et cha nduwútuni.

<sup>12</sup> 'Et hulhgha sa nain'ai whe soo bulh cho 'i Abram ookw'eidilts'ut 'ink'ez whunulh'en soo wheioonujut-un 'ink'ez tsaholhghus-un 'et ookw'eoodilts'ut.

<sup>13</sup> 'Et whe Yak'usda (Elohim) Abram 'uyulhni, "Soo soo cho t'eeoonzeh, nts'u hainde 'en 'uyoo yun k'ut 'et 'aw t'elhonizun 'ink'ez 'aw hube' hoolhdzun chailoh. 'Et ndunne yun k'ut whut'en, 'en dzoh ne'bulh'en 'ink'ez bunat ne'hoot'en whe 400 nawhudizut whuts'un buba' hutit'elh.

<sup>14</sup> 'Et mbene la buba' hit'enne hukw'elh'az buba nahutisyehe soo lhai hut'i whe whusahutidulh.

<sup>15</sup> 'Et hoonts'i, nyun mbákene soo ts'ih'un mba oodizghel le'hoont'oh 'et buts'un tanyalh. Soo yoo'un inzulh whe 'et 'anyotilhtel.

<sup>16</sup> 'Et whulh dit dune nawhusdli-un, 'et ndiz nahutidulh. Amor whut'enne tank'us un'a 'uhut'en-un 'awhuz lhalhodusne."

<sup>17</sup> 'Et 'uhooja, hulhgha sa yo whein'ai whe tsaholhghus whuzdli'. Whunulh'en lhes utes-un lhut oots'a hadan'a 'ink'ez dalt'ai bulh 'i ndi khuna-i lhts'elt'az-i beguz lhuyuzkat.

<sup>18</sup> 'Et dzin za Moodihti (Yahweh) Abram ts'un khuni ooba lhaidinla whe njan ndutni, "Nts'u haindene 'enne ndi yun bugha óonus'ai, Egypt whedinli ts'un 'ink'ez ndi 'uk'oh whucho, 'et Euphrates 'uk'oh whucho 'et.

<sup>19</sup> Ken whut'enne cha, Kenez whut'enne cha, 'ink'ez Kadmon whut'enne cha.

<sup>20</sup> Hitt whut'enne cha, Periz whut'enne cha 'ink'ez Reph whut'enne cha.

<sup>21</sup> Amor whut'enne cha, Canaan whut'enne cha, Girgash whut'enne cha 'ink'ez Jebus whut'enne, 'enne cha."

## 16

### *Hagar 'ink'ez Ishmael*

<sup>1</sup> 'Et Sarai, Abram oo'at 'aw buzkeh holoh inle', Egypt whut'en ts'eke yunatne'ut'en-un Hagar huyulhni 'en yut'i.

<sup>2</sup> 'Et Sarai Abram 'uyulhni, "Whunilh'en Moodihti (Yahweh) 'aw suzkeh hooloh sulhnti, ndun sba ne'ut'en-un 'en 'inleh 'ink'ez 'et de tila ts'oodunne oost'e'." 'Et Abram, Sarai yuk'un'a 'uja.

<sup>3</sup> 'Et Sarai, Abram oo'at yuba ne'ut'en-un Hagar ilhchoot, Egypt whut'en-un unli 'ink'ez duki yugha inilhiti, yu'at oole' ha. 'Et Abram whunizyat yus k'ut (10) 'et nyo Canaan keyoh inda'.

<sup>4</sup> 'Et Hagar t'einanzin 'ink'ez ulchan. 'Et ulchan t'eeonanzen, nyoon ts'eke yuba 'ut'en-un ooba yintsi' sul'i.

<sup>5</sup> 'Et Sarai, Abram 'uyulhni, "Whe ninta' nust'en-un nk'eholts'it! Ndun ts'eke ngha nusti 'ink'ez ulchan t'eeonanzen whe, oosts'u dutni sul'i'. Moodihti (Yahweh) nyun, si bulh neba nahutiyeh."

<sup>6</sup> 'Et Abram, Sarai 'uyulhni, "A, 'alha nyun mba 'ut'en-un nyun nlak'et 'uhoont'oh, nts'en'a hukwa' ninzun-un k'un'a 'inleh." 'Ink'ez Sarai yuba 'ut'en-un tubeh dzoh nayulhdzut, 'ink'ez Hagar yughu wheitselhya.

<sup>7</sup> 'Et Moodihti (Yahweh) oolizas nyo too naindli-un, chuntoh 'et whuzih, 'et nayilhiti, nyo too naindli-un whuzih, Shur ts'u wheti-un.

<sup>8</sup> 'Ink'ez 'uyulhni, "Hagar, Sarai ba 'ut'en-un, nts'ez de hainya 'ink'ez nts'e tinya whe 'int'en?" 'Et 'utni, "Sarai smoodih ooba 'ust'en-un ooch'a ts'e tisyia whe ust'en."

<sup>9</sup> 'Et Moodihti (Yahweh) oolizas 'uyulhni, "Ooba 'int'en-un oots'un naindalh 'ink'ez nts'e hukwa' ninzun-un k'un'a ne'nyoolh'en si."

<sup>10</sup> 'Et Yak'usda (Yahweh) oolizas 'uyulhni, "Nts'u haindene lhane ngha tisleh. Huldai k'et 'aw boots'olhto ait'oh tileh."

<sup>11</sup> 'Ink'ez Moodihti (Yahweh) oolizas, cha yulhni,

“Whunilh'en 'awet ts'oodun bulh 'int'oh sul'i.  
Dune nyaz tileh 'ink'ez boozi' Ishmael dutanelh.

Njan tene'nilhazun Moodihti (Yahweh) nyudants'o.

<sup>12</sup> Tube dune nzoodil'i-un tileh,  
ts'iyanne dune buch'az ditni tileh  
'ink'ez ts'iyanne dune hich'az ditni tileh,  
'ink'ez dulhutsinke butoh 'et dune tileh.”

<sup>13</sup> 'Et Moodihti (Yahweh) yuts'u huyih whe 'en dulh yailhduk, “Nyun 'int'oh, ndun Yak'usda-Ndun-Sunilh'en (El Roi)\*” 'Ink'ez 'utni, “Mbe la si'en-un, si cha tila 'us'en eh?”

<sup>14</sup> 'Et huwa njan too diz'ai-un 'et 'uwuhutni Beer-La-Hai-Roi. Whunulh'en Kadesh 'ink'ez Bered bulh whetoh 'uhoont'oh.

<sup>15</sup> 'Et Hagar doneyaz 'en Abram yughu sulhtsi 'ink'ez Abram duye' yoozi Ishmael yulhni.

<sup>16</sup> 'Et 'oh whuya whudizulh Abram 'en lhk'udit whunizyat 'on 'at lhk'utat be yus k'ut (86) whe Ishmael yughu yulhtsi.

## 17

### *Yak'usda (Elohim) Abram ndi khuni 'i ooba lhaidinla*

<sup>1</sup> 'Et Abram 'en 99 nawhudizut whe, Moodihti (Yahweh) yunalhts'et hainya 'ink'ez 'uyulhni, “Yak'usda 'Uk'enus 'Ultus-un (El Shaddai)\* ust'oh, stso inyalh 'ink'ez 'aw hoonli nk'elhuholhts'it.

<sup>2</sup> 'Ink'ez sghuni nyun, si bulh lhadutalneh 'ink'ez 'onus lhane cha tihleh.”

<sup>3</sup> 'Et Abram yubut nachanitno 'ink'ez Yak'usda (Elohim) 'en yulh yalhduk, njan 'uyulhni,

<sup>4</sup> “'Et si whunilh'en, khuni nts'un lhadasla-i 'udun keyoh whut'enne dune lhane 'enne bubá tanleh.

<sup>5</sup> 'Aw 'on 'un Abram lhunyodutasnelh, nyoozi' Abraham nyo dutanelh, lhelhts'un whut'enne didoh lhane 'enne bubá nyuzusi 'et huwa.

<sup>6</sup> Soo ts'ih'un lhane nts'un hakedande nyutiselh, lhelhdoh didohne dune nyutiselh, lwerene 'enne hoonts'i nts'u hahande tileh.

<sup>7</sup> 'Ink'ez khuni nyun bulh lhadilya-i, 'i 'et duta'alh nts'u haindene 'enne lhan'un te, ilhiz wheni ndi khuni lhadutalneh, Nyak'usda (Elohim) tisleh 'ink'ez nts'u haindene cha.

<sup>8</sup> 'Ink'ez cha nyun cha 'ink'ez nts'u haindene nk'elh'az, ndi yun nohgha nus'ai, 'awhuz 'et t'enyuzinzun, Canaan yun ts'iyawh nohche' oole' 'ilhiz wheni, 'ink'ez buYak'usda tisleh.”

<sup>9</sup> 'Ink'ez Yak'usda (Elohim) Abraham 'uyulhni, “Nyun ndi khuni nts'un lhadasla-i ootahtun, nts'u haindene tubulh lhan'un te ndi khuni ootahtun.

<sup>10</sup> Ndi 'i khuni nts'un lhadasla-i, 'i ootahtun, nyun 'ink'ez si bulh 'ink'ez nts'u haindene nk'elh'azne. Dune ts'oodunne whuzdline nohtoh 'enne ts'iyawh hika dune unli-un hubuhoatat'us.

\* **16:13** Ndi boozi' El Roi 'i “Yak'usda 'En Whunilh'en” ni whe 'utni. 'Et John 'Uk'unéyuzguz-i 1:48 whe Nathanael 'en Sizi yughu ninya wheSizi 'en Nathanael yúlhni, “Mai chun t'ah sinda da', Philip 'anih nyudutánelh whutso da', 'et nyunus'en.” 'Et whuz un'a ndi boozi' “El Roi” ni whe 'utni. \* **17:1**

Ndi boozi' El Shaddai, 'i “Yak'usda 'Uk'enus 'Ultus-un,” ni whe 'utni. Whuz un'a John 'Uk'unéyuzguz-i 2:19 'et Sizi 'ubúlhni, “Njan yoh whudiziti'-un nohni musai whulhtsi 'ink'ez tat dzin inle' de, 'et dunaoodutás'alh.” Njan whuts'odul'eh neMoodihti Sizi Gri 'en duyust'e yughu yalhduk whe 'ubudáni'. 'En soo 'ultus unli whewhulh tat dzin inle' de dunaoodutá'alh. 'Ink'ez 'et whuz un'a nduhojja. Tulalhk'us k'ut neba dazsai whe whulh tat dzin dunadija. 'Et Matthew Yuk'unéyuzguz-i 28:18, 'ink'ez Colossia Whut'enne Buts'ó K'eyanguz-i 1:15-17, 'et cha nduwhtúni.



11 Nyun ch'oh cha ooka dune inli-i nyo tit'us, 'et huwa t'entihdzeh ndi khuni lhadilya-i nyun, si bulh.

12 Mbe la lkh'udidzin be yus k'ut sul'i-un, 'en cha hitit'us. Duneyaz 'andit whuzdline nyoh whuzdline, k'us sooniya be dune t'enuzuhzun ts'un ohket-un ts'oodun nts'u hainde lhllohne, 'en cha.

13 Mbe la nyoh whuzdline 'ink'ez mbe la sooniya be ohketne, ts'iyawh ka dune unli-un hubotit'us, ndi sghuni nts'un lhadusla-i nus whe lkh'elh'az te 'et ndi 'i gha 'ilhiz wheni be hoodutaht'en.

14 'Ink'ez dune ts'oodun 'aw lhuhyit'us-un 'en 'udun nehuyolhtelh ndi khuni nts'un lhadusla-i k'eininyuz 'et huwa."

15 'Et Yak'usda (Elohim) Abraham 'uyulhni, "N'at Sarai dini-un 'et 'etsul 'udonih 'ink'ez Sarah 'i boози' tileh.

16 'Ink'ez soo hoonzoo-un ooba whutiselh 'ink'ez duneyaz 'en mba nyaz tileh. 'Ink'ez 'en soo hoonzoo-un ooba whutiselh 'ink'ez ndoh hidoh 'enne buloo tileh, 'ink'ez lerwene cha hits'u hatidoh."

17 'Et Abraham yubut nachanitno 'ink'ez udloh 'ink'ez dudzi yo ts'e 'utni, "Dune 100 be yus k'ut soo toleh ooye' whutaleh? 'Ink'ez Sarah 'en cha 90 be yus k'ut soo tilah ooyaz hole?"

18 'Ink'ez Abraham Yakusda 'uyulhni, "Ishmael soo nyun ba khuna oole?"

19 'Et Yak'usda (Elohim) 'utni, "Awundooh Sarah n'at nye' nghu tilhtsi 'ink'ez Isaac dutanelh. Sghuni lhadusla-i 'ilhiz wheni 'en cha oots'un lhadutisleh, mbene la oots'u haindene hukw'elh'az 'enne cha.

20 'Ink'ez Ishmael 'en ghun nyudasts'o. Whunilh'en soo hoonzoo-un oogha whults'ut, 'ink'ez lhane oots'u hainde tileh. Whunizyane 'on 'at nane lerwe ye'ke oots'u hatidoh 'ink'ez 'en didoh-un ncha tiselh.

21 'Et hoonst'i ndi sghuni Isaac ts'un lhadutisleh. Sarah ndo whuya whudizulh nat de, 'et nye' tileh."

22 'Et yulh yalhduk-un 'etsul 'udija 'ink'ez Yak'usda (Elohim) ndo whenaja.

23 'Et Abraham duye' Ishmael yilhchoot 'ink'ez mbene la yuyoh whuzdline 'ink'ez mbene la sooniya k'elha bubonketne, dune ts'iyawh Abraham ooyoh dilhts'ine 'et dzin za yuka dune unli-un hubuhuzt'us Yak'usda (Elohim) yulhni hukw'un'a.

24 Abraham 'et 99 be yus k'ut whe yuka dune unli-un huyuzt'us.

25 'Et ooye' Ishmael whunizyat 'on 'at tat be yus k'ut whe ooka dune unli-un huyuzt'us.

26 'Et dzin za Abraham ooye' Ishmael 'en bulh hika dune unline hubuhuzt'us.

27 'Ink'ez mbene la ooyoh dune 'et whut'ine, 'ink'ez sooniya be bubonketne, 'enne cha hika dune unli-un ts'iyawh hubuhuzt'us.

## 18

### *Yak'usda (Elohim) 'en Abraham yunalh hainya*

1 'Et Moodihti (Yahweh) 'en Abraham yunalh hainya, njan ndun Mamre, duchun tah terebinth, oak huyulhni, whu'iz whunilghaz whe nimbali dati 'et usda.

2 Ndo yutan'en 'ink'ez yutilh'en, tane dune yuzih nudilhya whe butilh'en. Nimbali dati ts'e dudilgai 'ink'ez bududilhgai 'ink'ez soo yun ts'e bubut nachaniti.

3 'Ink'ez 'utni, "SMoodih (Adonai) tube sba uszoo whe la 'usinla, 'andit khun te mba 'ut'en-un senghonya' junih.

4 Sla'ineh whe tooyaz ntsool-iyaz whusaoskalkh 'ink'ez sih nohke be tu-naoohgus, 'ink'ez nyo duchun sa whus'ih 'et sih naoolhyis.

5 'Ink'ez 'et ut'alh-iyaz nohba haóoslelh, 'et sih nohyust'e naóolhyis. 'Et hukw'elh'az sih 'oya lholdilh. Nts'en'a nohba 'ut'en-un ts'un hahya 'et.' 'Et 'uhuyulhni, "Daja datanelh-un, 'et dineh."

6 'Et Abraham nimbali t'ah ts'e Sarah yughulgai 'ink'ez 'uyulhni, "Soo 'a tawh 'ultsuk-i lhes, 'i lhadinleh 'ink'ez nilhtlus 'ink'ez ilht'es."

7 'Et Abraham khuna-i yughulgai 'ink'ez musdoosyaz soo unzoo-i yilhchoot 'ink'ez chilhyaz 'en yutl'ayalhti 'ink'ez soo 'ahoh lhaidutileh ha yilhchoot.

8 'Et butter cha 'ink'ez lilet cha 'ink'ez musdoosyaz lhadutja-i, 'i bubut neininla 'ink'ez buzih usyin whe nahuyit'al.

9 'Et 'uyulhni, "N'at Sarah nts'e 'ut'en?" 'Ink'ez 'utni, "Nyo nimbali t'ah usda."

10 'Ink'ez 'uyulhni, "Soo 'alha-i be ndo whuya whudizulh-un 'ink'ez 'et Sarah n'at dune ooyaz tileh." 'Ink'ez Sarah nimbali dati usyin 'ink'ez yoozilhts'ai.

11 'Andit 'et Abraham 'ink'ez Sarah 'en tube hoonyan huzdli'. Yoo'un hizulh 'ink'ez Sarah en buzkeh whutaleh 'et tube 'on 'un hainzut.

12 'Et huwa Sarah duyo ts'e udloh 'ink'ez 'utni, "Nisjan hukw'elh'az 'ink'ez smoodih cha nisjan, 'et de sba hoonzoo whutaleh?"

13 'Ink'ez Moodihti (Yahweh) Abraham 'uyulhni, "Di ha 'utni Sarah udloh, 'ink'ez 'utni, 'alha eh syaz whutaleh tube nisjan hoonts'i?"

14 'Aw hoonli hoonts'i eh Moodihti (Yahweh) 'aw ooba hoolhtus eh? Ndet la 'et newhudizut-un 'et la nohghu naoosja' 'ink'ez Sarah dune ooyaz tileh."

15 'Et Sarah 'awundooh ni, "Aw lhuzusdloh," whenuljut. 'Ink'ez Moodihti (Yahweh) 'uyulhni, "Awundooh, indloh inle!"

### *Abraham ndunne Sodom whut'enne buba tenadudli*

16 'Et dune dunahudidil 'ink'ez Sodom keyoh ts'e whuz hunilh'en, 'ink'ez Abraham 'on 'un bubulh nunatit'us ha bubulh tiz'az.

17 'Ink'ez Moodihti (Yahweh) 'utni, "Abraham och'a whuntis'ih eh datisnelh-un?"

18 'Alha Abraham 'en didoh-un ncha 'ink'ez tube ulhtus tileh. 'Ink'ez 'en gha ts'iyawh didohne 'enne soo hoonzoo-un bugha hóotalts'ulh.

19 'T'eniszin duduzkeh buk'unuhilhye', yoh whut'ine cha buk'elh'az Moodihti (Yahweh) ookw'un'a huhoontun za' hint'oh ts'ih'un ne'hut'en, 'et de la Moodihti (Yahweh) Abraham daja yulhni-un 'et yugha whutaleh."

20 'Ink'ez Moodihti (Yahweh) 'utni, "Sodom 'ink'ez Gomorraah bulh tube huwu yaduk hooni, hiye tank'us-i tube ntsi'.

21 'Whuz buts'un tisyalh 'andit 'ink'ez whuntis'elh daja hutni la sdabe cha hintsi'. 'Alha tila 'uhutni khuni sghu dinkat, 'et 'awundooh de la, 'et t'eoonooszeh."

22 'Et nyoonne dune lht'anahunist'az 'ink'ez Sodom ts'e hutiz'az, 'et Abraham 'awhuz Moodihti (Yahweh) yubut usyin.

23 'Ink'ez Abraham yenghun neninya 'ink'ez 'uyulhni, "Et whe eh ndunne ts'ih'un dune hinli 'ink'ez lubeshi 'uhulh'en bulh ts'iyawh gak butilhtselh?"

24 'Khun te kwulat whunizyane (50) dune, 'enne ts'ih'un dune hinli njan keyoh whutoh 'et. 'Et cha eh ts'iyawh gak butalhtselh 'ink'ez buyun k'ut 'et cha eh gak whutalhtselh? Kwulat whunizyane 'et hudilhts'i hoonts'i?"

25 'Tube 'aw ndoneh ait'oh dune nzoone 'ink'ez ntsi'ne tubulh gak butalhtselh huba, ts'iyawh lhgha 'uhoot'e! 'Aw ndi yun k'ut huwun nahiyilh-un, 'en ts'iyawh iloh lakw ts'ih'un un'a 'uhutit'elh?"

26 'Et whe Moodihti (Yahweh) 'utni, "Sodom kwulat whunizyane ts'ih'un 'unt'ohne keyoh hoonli de, 'et de 'aw dalhubutuzisiel."

27 'Et Abraham 'uyulhni, "Si 'ants'i yun lhez usli whe 'ust'oh, 'et hoonts'i Moodihti (Adonai) bulh yatisduk.

28 'Et te kwulai' hukw'elh'ih whe whunizyane 'on 'at kwulane (50) ts'ih'un dune hooni te, 'et whe eh ts'ayawh gak whutalhts'elh ts'uwhut'i wucho 'et?" 'Et 'utni, "Dit whunizyai 'on 'at kwulane (45) nabinla te, 'aw ts'iyawh huboolhts'elh ait'oh."

29 'Et doo cha za yulh yatilhduk 'ink'ez 'utni, "Dit whunizyane nabinla de?" 'Et 'utni, "Enne bugha daboosleh ait'oh."

30 'Ink'ez 'utni, "Moodihti (Adonai) khun te hunolch'eh junih, 'ink'ez yatisduk. Tat whunizyane 'enne ts'ih'un 'unt'ohne nainlane, 'et do?" 'Et 'uyulhni, "Et de 'aw gak lhubutuzissel tat whunizyane 'enne bugha."

31 'Et 'uyulhni, "Ants'i sich'oh khanaoonust'ai whe 'udusni, Moodihti (Adonai) bulh yasduk, nat whunizyane 'enne nabinlane ts'ih'un 'unt'ohne?" 'Et 'utni, "Et 'aw gak hubooselh ait'oh ndunne nat whunizyane 'enne bugha."

32 'Et 'utni, "Khun te Moodihti (Adonai) hunolch'eh junih 'ink'ez doo cha za yatisduk. Whunizyane nainla de 'et do?" 'Et Moodihti (Yahweh) 'utni, "Whunizyane nasla de, 'enne bugha 'aw dalhubutuzisiel."

33 'Et Moodihti (Yahweh) Abraham yalhduk-un 'etsul 'udija whe 'et 'awet yughu whenaja 'ink'ez Abraham dunimbali bez whenaja.

## 19

### *Keyoh Sodom 'ink'ez keyoh Gomorrah hooloh whutilhtselh*

1 'Et hulhgha nyoonne lizas nane Sodom ts'e hooz'az. Lot Sodom dati-un 'et usda, Lot hubutilh'en dudinya 'ink'ez bubut nachaniti.

2 'Ink'ez 'utni, "Njan whunulh'en smoodihne nohba 'ut'en-un ooyoh ts'e uh'us 'ink'ez 'ulhdzis 'et oohtez sih 'ink'ez nohke tunaoohgus 'ink'ez bundada' 'uda' cho duduh'az 'ink'ez sih tooh'as." 'Et 'uhuyulhni, "Awundooh 'et hoonts'i 'andit 'ulhdzis 'et 'az uztitez."

3 'Et tube cho 'ubulhni, 'et huwa hiyoh highu danin'az 'ink'ez hiyu'alh-i bugha nin'ai ut'alh-i bulh yuntuldoh-i yit 'ink'ez 'i cha buba' yinla 'ink'ez 'uhan'al.

4 'Et yun nehutilgwulh whuts'o nyo keyoh whudune'ne ts'iyawh dunetine cha 'ink'ez chilke cha ts'iyawh nyo yoh whunahusguz.

5 'Ink'ez Lot hits'uhuyih 'ink'ez 'uhuyulhni, "Nyoonne dune 'andit nghu danin'azne nts'e 'uhint'oh ndiz t'ebunilhtih 'et 'ink'ez sih t'ebuznoozeh."

6 'Et Lot dati buts'u teninya yoh dana'dintan.

7 'Ink'ez 'utni, "Awundooh sulhtsinke, tube hoonts'i 'et dohneh junih!

8 Whunulh'en 'andit nane stse'ke 'aw dune t'enuszunne ust'i, 'enne nohghu tebstelth 'ink'ez nts'e hukwa' nuhzun k'un'a ne'boolh'en sih. 'Ants'i ndunne dune 'enne buts'ahalhuzoh'ai, njan 'et huwa 'andit syoh dahunin'az whe 'hint'oh."

9 'Et 'uhutni, "Udun sinyin!" 'Et 'uhutni, "Ndun 'andit 'ants'iya whusainya 'ink'ez 'ants'i nahiyilh-un le' 'utni sih! Nyun 'onus nts'itilelh k'at ndune dune lhabuzdinla de!" 'Ink'ez Lot tube cho n'un hinilht'i 'ankw'us dati dahidanyuz.

10 'Et hoonts'i nyoonne dune nane 'az tehudilne 'ink'ez Lot danahinilhtsus 'ink'ez dana'hudintan.

11 'Ink'ez nyoonne 'az dati higha nane ts'iyawh huhoos'en hubuhulhtsi nchane 'ink'ez ntsoolne tubulh, nyoo dati nahuyotan ait'oh k'et nehunintsai.

### *Keyoh Sodom 'ink'ez Gomorrah 'et hooloh whulhtsi*

12 'Ink'ez nyoonne dune Lot 'uhuyulhni, 'Aw eh 'uyoonne cha njan hooloh? Nghundan, nye'ke, ntse'ke 'ink'ez mbe njan keyoh dilhts'i ts'iyawh whus-abinle!"

13 Sdabe cha 'uwhudija njan keyoh hoontsi' huwuyaduk, 'et huwa njan gak ts'otilhtselh. Moodihti (Yahweh) whunilh'en whe, 'en Moodihti (Yahweh) 'en ndiz netilh'a' njan gak ts'otilhtselh ha."

14 'Et Lot teninya 'ink'ez dughundankene ootse'ke ghu dilhts'ine, 'ink'ez 'ubulhni, "Duduhdilh, njan whuch'asuhdilh! Moodihti (Yahweh) njan keyoh gak whutilhtselh!" 'Et ooghundankene 'enne buba 'ants'i la 'utni huninzun.

15 Bundada' yulh kai whe nyoonne lizasne Lot huyulhni, "Soo 'a! Dudinyaih 'ink'ez n'at cha, ntse' nane cha, njan nzih 'unt'ohne, doo ka sih njan nohbulh whudok'un 'ink'ez dzoh notizut!"

16 'Et sa' ne'ut'en 'et nyoonne dune hila ilhchoot, oo'at cha hila ilhchoot, 'ink'ez ootse'ke nane 'enne cha bula ilhchoot, Moodihti (Yahweh) bugha te'ninzun whe, 'ink'ez teboninla keyoh yoo'az ts'e.

17 'Et 'uhooja ts'iyawh teboninla hiyulhni, "Soo 'a tulghas 'ududoolhyih sih! Khun te k'oh naitoht'en junih, k'us njan 'et te dolhts'i' junih, dzulh k'uz ts'e uhdulh doo ka sih gak oohle!"

18 'Et Lot 'ubulhni, "Sla'uhneh whe, 'awundooh smoodihne!

19 'Andit nohba 'ut'en-un nohba unzoo be te'nuhzun-i be 'onus whusunilhtan be khusna-i ba sulhyi', 'et hoontsi' 'aw ndo dzulh k'uz toosya' ait'oh doo ka si hoontsi' sulh 'uhoneh 'ink'ez la daosah.

20 'Andit whunulh'en njan keyoh whuyaz 'et nilhdukwh whe' hoont'oh, whuz toosya', 'et de la szul khoona'."

21 'Ink'ez 'et 'uyulhni, "Whunilh'en tube nla 'usja whe' hoont'oh nja keyoh whuyaz 'aw gak hooselh ait'oh huwu yailhduk-un.

22 Soo 'a 'ududilyih! 'Aw hoonli 'oosneh ait'oh ndet la keyoh ninya whuts'un." 'Et huwa nyo keyoh Zoar huwhutni.

23 'Awet sa hain'ai 'et Lot Zoar ts'e oozya.

24 "Et Moodihti (Yahweh) tse dunizk'un-i 'ink'ez kwun tubulh 'i Sodom 'ink'ez Gomorrah bulh nayalhtan ndo yak'uz whuts'un, Moodihti (Yahweh) 'en 'uhoonla.

25 'Et whuz'un'a nyo keyoh gak whulhtsi, whunat cha 'et whut'ine cha, yun hanuyeh-i cha.

26 'Et hoontsi' Lot oo'at k'oh whunalh'en whe lisel tse nain'a-i suli'.

27 'Ink'ez Abraham bundada' 'uda' 'et nyo whutsoda' Moodihti (Yahweh) yubut inyin-un, whuz oozya.

28 'Ink'ez Sodom 'ink'ez Gomorrah whulh yun tubulh nyo whulut yun cha oolul 'ants'i dizk'un-i cho le'hoont'oh whe ndo whein'a.

29 'Et 'uhooja Yak'usda (Elohim) nyo keyoh gak whulhtsi hukw'elh'az 'et Yak'usda (Elohim) Abraham nalnih 'ink'ez Lot nyo hoot'e'-un keyoh gak whulhtsi 'uch'anayulh'a 'ink'ez 'uts'un whe yalh'a'.

30 'Et Lot Zoar whuch'a nasja 'ink'ez dzulh toh ts'e nenina, ootse'ke nane cha huyulh 'ut'en. Zoar whutit'elh-un whenuljut, 'ink'ez dutse' bulh nyo tse 'an'et huwhuti.

31 'Et 'udetso whuzdli-un 'en dulhtus 'uyulhni, "Ndun nebá tube duneti unli 'ink'ez 'aw ndi yun k'ut dune hooloh suli' bubulh 'uts'oot'en-un hooloh, ndi yun huk'une'whuten.

32 'Anih nebá ts'ekoo too' buts'oolhnai' 'ink'ez sih oozih ts'ootez, 'et de la nets'u haindene hoole'."

33 'Et 'ulhdzis dubá ts'ekoo too' higha nilhdzo 'ink'ez 'udetso whuzdli-un 'en dubá yuchant'elget 'aw t'eeonuszun ndet yuchant'elget, 'ink'ez dunadija-un cha t'eeonuszun.

34 Et 'uhooja 'om bun 'udetso 'udek'oh 'uyulhni, “Alha sbá 'ulhdzis da' oobulh huste' inle'. Hulhgha doo cha za ts'ekoo too' buts'oolhnaí' ink'ez nyun bulh hont'e. 'Et de la nets'u haindene hoolé'.”

35 'Et 'ulhdzis dubá doo cha za ts'ekoo too' higha nilhdzo 'ink'ez 'udek'oh-un 'en dubá yuchant'inte', 'aw t'oonuszun ndet yuchant'elget 'ink'ez dunadija-un cha.

36 'Et whe Lot ootse'ke nahult'oh dubá higholchan.

37 'Udechoo whuzdli-un ooyaz dune suli', ink'ez boozi' Moab yulhni. 'En Moab dunene didohne, 'enne 'andit dzin whuts'un bubá unli.

38 'Ink'ez 'udek'oh-un 'en cha dune ooyaz suli' ink'ez boozi' Ben-Ammi yulhni. 'Enne Ammon dunene bubá unli 'andit dzin whuts'un.

## 20

### *Abraham 'ink'ez Abimelech*

1 'Ink'ez Abraham 'et whedinya whe nyan wheinya, Kadesh 'ink'ez Shur bulh 'et whulh eguz 'et hoot'e', ink'ez Gerar howhutni whuz cha whuloh te whut'i.

2 'Et Abraham nyoon Sarah du'at, 'en 'ubulhni, “Sulhtus 'unt'oh.” 'Ink'ez Abimelech, Gerar whulerwe, 'en Sarah yilhchoot.

3 'Et hoonts'i Yak'usda (Elohim) Abimelech 'ulhdzis nute whe yughu ninya 'ink'ez 'uyulhni, “A, dune dazsai-un inli whe 'int'oh ndun ts'eke ilhchoot-un uyoon dune 'at 'unt'oh.”

4 'Et hoonts'i Abimelech 'aw yuzih nulhiyal 'ink'ez 'uyulhni, “Moodihti (Adonai) dune ts'ih'un 'unt'ohne didohne ts'iyawh eh butanganh?”

5 'Aw lakw sulhdinel, 'Sulhtus 'unt'oh sulhdinel? 'Ink'ez didutch'oh cha 'utni, 'Sulhutsin 'unt'oh,' ni. Sdzi ts'ih'un 'unt'oh 'ink'ez sla cha 'aw lhditsun whe njan 'et dusja.”

6 'Ink'ez Yak'usda (Elohim) 'uyulhni nute whe, “A, t'oonuszun ndzi ts'ih'un 'unt'oh whe 'inja 'ink'ez si cha ninta' tant'elh-un whuch'a nyostun whe 'ust'oh 'et huwa 'aw ootalhanal.

7 'Andit 'et huwa ndun ts'eke ootl'a nayilhtih, nus hoo'en-un dune 'unt'oh, 'ink'ez si mba tenadoodli 'ink'ez khona'. 'Aw ootl'analhuyilhtel de, 'alha dantantsah whe 'int'oh 'ink'ez mbene la nch'e' unline 'enne cha ts'iyawh.”

8 'Et 'om bun Abimelech 'uda' dudinya 'ink'ez mbene la yuba 'ut'enne ts'iyawh 'anah budani' 'ink'ez ts'iyawh daja ni la ts'iyawh bubudani', 'ink'ez dune ts'iyawh hunilhjoot.

9 'Ink'ez Abimelech, Abraham 'anah yudani' 'ink'ez 'uyulhni, “Dane inla whe 'int'oh? Ndet whe tank'us 'unyusla ha lhe'hoont'oh-un sk'ehoon'ai 'ink'ez njan whulerwe usli-un cha 'ut'en untsi-i cha? 'Aw ndusonle' huba' lhe'hoot'oh whuz un'a 'usinla.”

10 'Et Abimelech 'en Abraham 'uyulhni, “Daja ninzun whe 'inja 'et dinja yulhni?”

11 'Ink'ez Abraham 'utni, “Dune Yak'usda (Elohim) ehunuljut-un njan keyoh 'aw hooloh nuszun, 'et huwa 'usja 'ink'ez s'at en gha tila sozoohlghelh nuszun.

12 'Et hoonts'i 'alha sulhtus 'unt'oh. Sba ootse' unt'oh, 'aw sloo ooyaz iloh unt'oh 'ink'ez s'at suli'.

13 'Ink'ez 'et 'uhooja Yak'usda (Elohim) sbá ooyoh huwutisya whe 'et ndun ts'eke dusni, 'Njan whe inzoo whe 'et ts'iyants'uk sba 'et doneh ntsoh te nit'as te, sulhutsin 'unt'oh doni'.”

14 'Et Abimelech 'usbai 'ink'ez musdoos dune cha, ts'eke 'ink'ez dune bulh, yunatne' 'ut'enne 'enne cha, ts'iyawh Abraham gha buninla, 'ink'ez yu'at cha yutl'anayalhti.

15 'Ink'ez Abimelech 'utni, "Whunilh'en ndi syun njan mbut whuz'ai, ndet hukwa' ninzun-un, 'et hoont'i."

16 'Ink'ez Sarah 'en cha 'uyulhni, "Whunilh'en nyulhutsin 1000 silver nukat-i 'i cha oogha inusla. 'I gha mbene la nyulh 'ut'enne cha 'ink'ez 'uyoonne nalh cha, 'awet ts'ih'un mba nawhúsdli' whe' hoont'oh!" 'Et whe hukwa' yudani'.

17 'Et Abraham Yak'usda (Elohim) ts'un tenadidli 'ink'ez Yak'usda (Elohim) Abimelech soo na'yinla, yu'at cha 'ink'ez ts'ekoo yunat ne'ut'enne cha, 'ink'ez bubuzke' whuzdli'.

18 'Et whe Moodihti (Yahweh) ndunne Abimelech ooyoh dilhtsine ts'ekoo ts'iyawh buchan whudana'dinla, ndun Sarah 'en gha.

## 21

### *Isaac whuzdli*

1 'Ink'ez Moodihti (Yahweh) 'en Sarah yughu ninya 'et whe ndutínelh ni da, 'ink'ez Moodihti (Yahweh) 'en Sarah ba nduja, nts'e datni 'et.

2 Sarah 'en ba Abraham ba ooye' tit'elh 'en duneyaz tileh. Hoonyan whe 'et ndet Yak'usda (Elohim) yuba yulhni-un 'et nduhooja.

3 'Ink'ez Abraham ndun ts'oodun yughu yulhtsi-un, duneyaz, Sarah yulhtsi, Isaac yulhni.

4 'Ink'ez Abraham duye' Isaac hukwa dune unli-un yuzt'us lkh'udit dzin be, be inle' whe daja ni la Yak'usda (Elohim) ndoneh yulhni 'et nduja.

5 'Et Abraham whunizyat whunizyat be yus k'ut (100) whe 'et Isaac yughu yulhtsi.

6 'Ink'ez Sarah 'utni, "Yak'usda (Elohim) usdlo-un sgha oonin'ai. Mbene la sudits'one ts'iyawh la sulh hoodloh."

7 'Ink'ez cha 'utni, "Mbe suba Abraham yudoni' Sarah ts'oodun e'tilhtuk hidoni', duneti unli, 'et whe dune ooyaz ba 'ust'i sulí'."

8 'Et ts'oodun nuye 'ink'ez 'ulhtuk-un 'etsul 'uja 'et dzin 'et Abraham dune ghu nusuya.

### *Hagar 'ink'ez Ishmael tebuninyoot*

9 'Et Sarah yunilh'en nyoon ts'eke Egypt whut'en ooye' 'unt'oh, Abraham dune ghu yulhtsi-un, yughudloh.

10 'Et huwa Abraham 'uyulhni, "Ndun ts'ekoo 'ulhna 'ink'ez buyaz bulh tenabuninyoot. Ndun 'ulhna buyaz 'en 'aw syaz Isaac ts'iyai nk'elh'az yolhchoot ait'oh"

11 'Ink'ez daja 'utni whe, 'et Abraham ooba nek'e'hoot'oh nyoon ooye' 'en ghun.

12 'Et hoonts'i Yak'usda (Elohim) 'en Abraham 'uyulhni, "Khun te mba dzoh 'uhoot'e' junih, ndun ts'eke k'us duyaz bulh 'en bughun, Sarah daja nyulhni la oozilhts'ai, Isaac 'en la toh ts'e dune whutaleh 'en, nyun nts'u haíndene uhutit'elh.

13 'Et hoonts'i ndun ts'eke 'ulhna ooyaz, 'en gha didoh-un tiselh, nts'u hainzut 'et huwa."

14 'Et Abraham bundada' 'uda' dudinya 'ink'ez ut'alh-i 'ink'ez too cha, duwus k'eyinla 'ink'ez duye', Hagar ooyaz 'en yugha ininla, 'ink'ez whenay-alh'a'. 'Ink'ez whenaja ts'eke, Beersheba chunt'oh, dune lhuhóot'ih, 'oh nuya.

15 'Ink'ez nyoo too cha haidalhde, 'ink'ez nyoon duyaz dune 'ilhoghun duchun sa whus'ih-un 'et neinilhti.

16 'Ink'ez yanch'az ts'ihyan natl'adida', k'aza be 'uhututsoh-un 'et 'uwhuld-zoh, 'ink'ez didutch'oh 'ududutni, "Ndun syaz datitsah-un 'aw lhozoos'en." 'Ink'ez yanch'az netladida' 'ink'ez whenintse.

17 'Et Yak'usda (Elohim) ndun ts'oodun utso yuduzts'ai. 'Et whe Yak'usda (Elohim) oolizas 'en Hagar yuts'un huyih yak'uz ts'un, 'ink'ez 'uyulhni, "Hagar, dainja whe 'udini? 'Aw whenilhjut iloh! Yak'usda (Elohim) ndun duneyaz yudants'o whe 'unt'oh.

18 Dudinyaih 'ink'ez ts'oodun dudilhtih, 'ink'ez oola oontun, tube dune oots'u hatidoh whutiselh."

19 'Ink'ez Yak'usda (Elohim) ts'eke hoon'en yulhtsi le'yinla 'ink'ez nyo too diz'ai-un ka k'et 'et whutilh'en, 'ink'ez nyoo 'uzuz be too sulhdzo-i nuya'a-i, 'i yudilhun 'ink'ez duyaz cha too yugha nilhdzo.

20 'Et Yak'usda (Elohim) ndun duneyaz yulh 'unt'oh 'ink'ez nizyai. 'Ink'ez nyo chuntoh 'et whut'i 'ink'ez k'aza be' tutsoh sul'i.

21 Keyoh Paran huwhutni-un chuntoh 'et whuti 'ink'ez ooloo Egypt whut'en-un ts'eke 'en yuba yilhchoot oo'at yutaleh ha.

### *Ndun Abimelech 'ink'ez Phichol, 'en Abraham huyulh yalhduk*

22 'Et 'uhooja 'owhuya whudizulh Abimelech 'ink'ez Phicol, lhuganne bumoodih, Abraham huyulh yalhduk 'ink'ez 'uhuyulhni, "Nts'oh tila ne'int'en-un ts'iyawh Yak'usda (Elohim) nyulh 'unt'oh.

23 'Et huwa Yak'usda (Elohim) nalh sudini sts'u haindene cha ndun syaz cha, danyusla la ngha te'nuszun whe ne'nyuzus'en whe nyun cha whuz un'a ne'solh'en ndi yun k'ut cha, ookw'ut ninya-i cha."

24 'Et Abraham 'utni, "A whuz un'a nahutisye."

25 'Et Abraham, Abimelech hukwa' yudani', di ha Abimelech oonatne'ut'enne ndi too diz'ai-un ooghu huhoohlchoot.

26 'Et Abimelech 'utni, "Aw t'oonuzuzun njan duhooja-un 'aw sulhdinel, 'andit dzin 'et 'andits'iya t'ooniszin."

27 'Et Abraham 'usbai cha, musdoos dune cha, 'i Abimelech gha ininla 'ink'ez nahult'oh lhba khuni be ba lhaoodulya.

28 'Ink'ez Abraham lhtak'anti 'usbaiyaz, ts'ekoo 'usbaiyaz 'i udun neininla.

29 'Et Abimelech Abraham yoodulhkut, "Dahoont'oh huwa ndi lhtak'anti 'usbaiyaz 'udun neininla?"

30 'Et 'uyulhni, "Ndi lhtak'anti 'usbaiyaz sla k'ez olhchoot 'i gha t'oonudzun, njan too diz'ai-un si 'uwhusla whe' hoont'oh"

31 'Et huwa njan 'et Beersheba whulhni nahult'oh lhts'un nahuhisda-un 'et huwa.

32 'Et njan Beersheba 'et khuni buba lhaoodulya, 'et Abimelech dunadija, Phicol lhuganne bumoodih bulh 'ink'ez Philistinene bukeyoh ts'e whuz whenahit'az.

33 'Et Abraham nyo Beersheba 'et tamarisk duchun 'i nyoh 'et 'ainanla, 'ink'ez 'et Moodihti (Yahweh Olam)\* yuka huyih, 'en 'ilhiz wheni Yak'usda (El) unli.

34 'Ink'ez Abraham nyo Philistine bukeyoh 'et lhat dzin 'et usda.

\* **21:33** Ndi booz'i El Olam 'i "Ilhiz Wheni Yak'usda Unli" ni whe 'utni. Ndi duchun Abraham 'et 'ainanla, 'i tube sa' hanulhyeh 'ink'ez tube dune ba whudizti' whe' hoont'oh. 'Et John 'Uk'unéyuzguz 1:1-2 'uk'uwuzguz whe njan ndutni, "Soo 'udechoo da' 'et khuni hoonli 'ink'ez ndi khuni 'i Yak'usda yulh 'unt'oh. Ndi khuni 'i Yak'usda 'unt'oh. Ndun 'en soo 'udechoo da' whuts'un Yak'usda bulh 'unt'oh." 'I be whuts'odul'eh, Sizi Gri ndi duchun k'un'a 'en 'ilhiz wheni Yak'usda unli. Whuz un'a ndi booz'i "El Olam" ni whe 'utni. 'Ink'ez Paul Rome Whut'enne Buts'ó K'eyanguz-i 1:20, 'ink'ez 1 Timothy Ts'ó K'eyanguz-i 1:17 'et cha nduwúhti.



## 22

*Yak'usda Abraham yoolhdzai*

1 'Et njan hukw'elh'az 'et 'uhooja, Yak'usda (Elohim), Abraham yoolhdzai 'ink'ez 'uyulhni, "Abraham!" 'Et Abraham 'utni, "Njan 'ust'en."

2 'Ink'ez 'utni, "Nye' ilhchoot, nye' 'aw 'ilhogun Isaac ilhchoot ook'eintsi', 'ink'ez yun k'ut Moriah ts'e whuz ilhtelh. 'Ink'ez dolhk'un nyo dzulh nyu dutasnelh-un, 'et si sts'un dolhk'un sih."

3 'Et Abraham 'ombun 'uda' dudinya, donkey hik'e 'inla 'ink'ez nane chilke 'enne cha dudulh hubutilh'az, 'ink'ez ooye' Isaac cha. Tsuz cha lhts'uneidilhnat yudutalhk'un wheni, 'ink'ez dudinya. Whuz Yak'usda (Elohim) whuyuntilhtun-un ts'e whuz whenya.

4 'Et whulh tat dzin Abraham 'et Abraham ndo yutan'en, 'et nyo nilhdza' 'et whutilh'en.

5 'Ink'ez Abraham nyoonne chilkeyaz 'ubulhni, "Njan donkey oozih suhke ndun tsoodun 'ink'ez n'un tat'us 'ink'ez Yak'usda (Elohim) oots'u teni'uznilhdzun, 'ink'ez sih nohghu naoot'as."

6 'Et Abraham nyoo tsuz lhts'e nidilhnat-i yilhchoot 'ink'ez Isaac 'en yut'uyuz'ai yutooghe' ha. Didut kwun 'i yutiz'ai 'ink'ez lhuzti' cha 'ink'ez whehan'az.

7 'Ink'ez Isaac, Abraham dubá yulh yatilhduk 'ink'ez 'utni, "Ubá!" 'Ink'ez Abraham 'utni, "Sye, njan si 'ust'oh." 'Ink'ez Isaac utni, "Whunilh'en! Kwun cha tit'ai 'ink'ez tsuz cha, 'ink'ez 'usbaiyaz dutalhk'un-i daja?"

8 'Ink'ez Abraham 'utni, "Sye' Yak'usda (Elohim) didutch'oh la ndi 'usbaiyaz netla yoolhtelh," 'ink'ez nahult'oh whehan'az.

9 'Et ndet Yak'usda (Elohim) whenilhtan-un 'et nehunin'az 'ink'ez Abraham loodel 'inla 'ink'ez tsuz cha yuk'edinla 'ink'ez duye' Isaac yulhghel 'ink'ez tsuz yuk'eyilhti.

10 'Ink'ez Abraham lhuztih yilhchoot 'ink'ez duye' yutuzilhghel ha do dutilhni.

11 'Et hoonts'i Moodihti (Yahweh) oolizas yak'uz whuts'un yukahizya 'ink'ez 'utni, "Abraham! Abraham!" 'Et Abraham 'utni, "Njan 'ust'oh."

12 'Ink'ez 'uyulhni, "Nye' ook'edolnih junih k'us hoonli 'onle' junih! 'Andit t'eeoniszin Yak'usda (Elohim) be niljut, nye' 'en hoonts'i ooch'a lhuyoontun 'aw 'ilhoghun nye', si sch'a lhoontun."

13 'Et Abraham ndo yutan'en 'ink'ez whunilh'en njan oot'a 'et 'usbai dune whutoh ts'uldilhtan, 'et oode be usdlooh. 'Et Abraham whuz whenya 'ink'ez 'usbai dune yilhchoot 'ink'ez 'i be yuts'e' dalhk'un ooye' yuk'edalhti.

14 Abraham nyo hoozi' whulhsti, "Moodihti 'En Negha 'oo'alh (Yahweh-Yireh)\*," whulhni. 'Et 'andit whuts'un 'i boozi unli, "Moodihti (Yahweh) oodzulh k'ut 'et la negha 'oo'alh."

15 'Et Moodihti (Yahweh) oolizas 'en ndo yak'uz ts'un whulh nat hikahuyih,

16 'et 'utni, "Sich'oh ooghu nahizusya," ni Moodihti (Yahweh), njan 'et dinja-un huwa, 'aw nye' 'en hoonts'i 'aw 'ilhoghun nye' 'en hoonts'i sch'a lhoontun.

\* 22:14 Ndi boozi' Yahweh Yireh 'i "Moodihti 'en Haooti'alh" ni whe 'utni. Yak'usda dich'oh za ndi 'usbai dune yuk'edalhti Abraham 'en ooye' ts'u yutsu 'udutalhk'un ba yuk'edanya. 'Et whuz un'a Yak'usda 'en 'aw 'ilhoghun za ooye' negha nilhti tualhghus k'ut nek'edanya ha. 'Ink'ez John 'Uk'unéyuzguz 1:29 'et ndutni, "Sizi yuts'un úyalh whe John yutilh'en, 'ink'ez 'utni, 'Nulh'en, Yak'usda be 'usbaiyaz. 'En 'ut'en, yinka dune'ne bulubeshi buts'u hanáyule." 'Et whuz un'a ndi boozi' "Yahweh Yireh" ni whe 'utni.



17 Be soo hoonzoo-un 'i 'utisdliih, mba soo hoonzoo-un tileh. 'Ink'ez nts'u haindene lhané whutaleh, sum k'un'a huldlai tileh, sai taba usdzai-i cha 'et 'ultsuk-i hutileh nts'u haindene, 'ink'ez nch'az ditnine bukeyoh 'i huyootatun.

18 Nts'u hainde-un ndi yun k'ut dune ts'iyawh soo hoonzoo-un bugha hóotalts'ulh, sk'un'a 'inja 'et huwa."

19 'Et Abraham chilkeyaz bughu nahunt'az, dunahudit'az 'ink'ez keyoh Beersheba ts'e whehandil, 'ink'ez Abraham keyoh Beersheba 'et whut'i.

### *Nahor ts'u haindene*

20 'Et 'uhooja hukw'elh'az Abraham hidani', "'Alha Milkah 'en cha buzkeh hooni Nahor nyulhutsin 'en buzkeh:

21 'Udetso ooyaz Uz huyulhni, bulhutsin Buz 'ink'ez Aram oobá Kemuel.

22 Chesed, Hazo, Pildash, Jidlaph, 'ink'ez Bethuel."

23 'Ink'ez Bethuel 'en Rebekah ooyaz sulí, ndune lhk'udine 'enne Milcah, Nahor bubulhutsi, Abraham bulhutsin.

24 Nahor ndun oo'at 'en yugha yulhutsi 'unt'oh, 'en boozi' Reumah, 'en cha buzkeh hooni: Tebah, Gaham, Thahash, 'ink'ez Maachah.

## 23

### *Abraham du'at Sarah nyo tse'an 'et 'ayalhti*

1 Sarah 'en 127 be yus k'ut whe dazsai. 'Et njan duwhuldzoh Sarah khana'.

2 'Et Sarah 'en keyoh Kirjath Arba, (Hebron 'uhoont'oh) Canaan keyoh 'et dazsai 'ink'ez Abraham whusainya 'ink'ez Sarah yuk'enudleh 'ink'ez yuk'etso.

3 'Et Abraham ooch'a dazsai-un oobut dudinya 'ink'ez Heth buzkeh 'ubulhni,

4 "'Udun keyoh whut'en-un usli 'ink'ez ants'i nohtoh nusya. Yun sgha nuh'aih, ts'un'k'ut wheni nohtoh sghu yaidlane 'et si 'abooslelh."

5 'Ink'ez Heth ooye'ke 'uhuyulhni,

6 "Nemoodih, neozilhts'ai, lerwe ye' dune uncha-un inli whe 'int'oh netoh, ndet hukwa' ninzun-un hoonzoo-un 'et nghu yaidlane 'abinle, 'aw nch'a ts'uhotun ait'oh. Dune 'atanlelh-un 'et si nghu yaidlane 'abonlelh."

7 "Et Abraham dudinya 'ink'ez Heth buzkeh soo yun bubut nachaniti.

8 'Ink'ez 'ubulhni, "Hukwa' nahzun de njan snanto 'et 'abuhoolelh, soo zulhts'ai, Ephron, Zohar ooye' 'en bulh yalhduk.

9 Njan nyun k'ut whuz'ai-un ts'e'an Machpelah ooch'e', 'et sgha ho'alh, ndet 'ultsuk-un 'et la hosket 'ink'ez dune 'atislelh-un."

10 'Et Ephron, Heth buye'ke butoh whut'i 'ink'ez Ephron Hitt whut'en-un 'unt'oh, 'en Abraham 'uyulhni. Heth buzkeh bunalh, njan keyoh whuti dati-un dandilhne 'uyulhni,

11 "'Awundooh smoodih! Soo zilhts'ai, njan yun 'ink'ez tse'an hukw'uh whuz'ai, nduwulcho ngha oonus'ai ndune sdune'ne buzkeh bunalh ngha oonus'ai 'et nghu yaidlahne 'abinle."

12 'Et Abraham ts'iyawh yun k'ut whut'enne bubut nachanitno,

13 'Ink'ez Ephron bulh yalhduk nyoonne dune bunalh ubulh 'uyulhni, "'Et sgha oonin'aih de soo zilhts'ai, sooniya hukw'elha tiselh njan yun, sooniya ilhchoot 'ink'ez 'et si sghu yaidlane 'abooslelh."

14 'Ink'ez Ephron, Abraham 'uyulhni,

15 "Smoodih soo zilhts'ai, ndi yun dit whunizyat whunizyai (400) 'ultsuk-i silver 'et di whutaleh da' nyun si bulh eguz, 'et nghu yaidlane 'abinle."

16 'Ink'ez Abrham Ephron yoozilhts'ai, 'ink'ez Abraham nyoo silver nuyulhdaz Ephron yuts'iyoozi-i nyoonne Heth buzkeh bunalh, dit whunizyat whunizyai (400) silver 'et 'ultsuk-i, 'oh da' 'i yutl'ayandzai.

17 'Et Ephron ooyun Machpelah 'uhoont'oh inle', Mamre whuzih, yun 'ink'ez tse'an cha 'ink'ez duchun cha nanudiz'a-i ts'iyawh yuyonket.

18 'Et Abraham nyoonne Heth buzkeh bunalh, 'ink'ez keyoh whuti dati 'et dandilhne cha, 'enne bunalh 'i oogha ininkat.

19 'Et hukw'elh'az Abraham du'at Sarah nyo tse'an 'et 'ayalhti, Machpelah ooyun k'ut, Mamre whuzih (Hebron 'unt'oh), Canaan keyoh 'et.

20 'Et nyo yun k'ut 'ink'ez tse'an cha ook'ut whuz'ai, 'i Abraham yonket, Heth buzkeh 'enne bubuyonket dune 'adutilalh wheni.

## 24

### *Isaac 'awet 'at tit'elh*

1 Abraham 'awet tube yoo'un uzulh 'ink'ez Moodihti (Yahweh) ts'iyaitsuk Abraham soo hoonzoo-un ba whullhtsi.

2 'Et Abraham yuba 'uten-un yoo'un uzulh-un, 'en yoh yuba huwunli-un ts'iyants'uk whumoodih yilh'i-un, 'en 'uyulhni, "Anih njan swuz t'ah nedilnih.

3 'Ink'ez Moodihti (Yahweh) yak'uz whuYak'usda (Elohim), 'ink'ez yun k'ut whuYak'usda (Elohim) cha, 'en nalh sts'un nahitanyeh, 'aw njan Canaan whut'enne, 'enne butoh whust'ine buyaz ts'eke 'en sye' dune 'aw 'enne butoh 'aw oo'at sba tizulalhchulh.

4 'Et hoonts'i sich'oh skeyoh 'ink'ez sich'oh snatneke 'enne butoh 'et sye' Isaac oo'at ooba yitalhchulh."

5 'Et nyoon yuba 'uten-un 'uyulhni, "Ink'ez nyoon ts'eke 'aw ndiz hukwa lhe'nizun tila, 'et nye' whuz eh tistelh nts'ez de hakedanzut ts'e?"

6 'Et Abraham 'utni, "Huwinli 'aw sye' whuz tolhte' ait'oh.

7 Yak'uz whuMoodihti Yak'usda (Yahweh Elohim) 'en sbá ooyoh 'ink'ez ookeyoh whuz de hasalhti, sulh yailhduk 'ink'ez sts'un nahizya 'usulhni, 'Mbene la nts'u haindene ndi yun bugha inus'ai.' 'En la oolizas ntso yutilh'alh 'ink'ez sye' oo'at yutaleh-un 'en whuz de hatalhtelh.

8 'Et ndun ts'eke 'aw ndiz nyulh natit'us hukwa lhe'nizun de, 'et de ndi khuni be sts'un nahizinya-i gak natidleh, 'et hoonts'i 'aw sye' whuz tolhte' ait'oh."

9 'Et nyoon hiba 'uten-un yuwuz t'ah nedilni Abraham 'ink'ez 'uyulhni, yutsu nahizya daja yulhni.

10 'Et nyoon yuba 'ut'en-un, whunizyai oomoodih ooch'e' khuna-i, camel huylhni, yilhchoot 'ink'ez whenya. 'Ndai la oomoodih ooch'e' ts'iyawh didut oola k'et yuzdla whe' hoont'oh 'ink'ez dudinya. 'Ink'ez yun k'ut Mesopotamia, Nahor ookeyoh, 'et whuz whenya.

11 'Ink'ez nyo keyoh whughu ninya whe tadiz'ai, too k'et whuz'ai, 'et nyoo camel dugwut ts'i be 'et nebuninla, 'owhuya whudizulh 'et ts'ekoo too huhudilh

12 'Ink'ez 'utni, "O Abraham smoodih ooMoodihti Yak'usda (Yahweh Elohim), soo ts'ih-un un'a lhaoodoosleh-un 'et sgha oonin'aih 'ink'ez smoodih Abraham soo te'ninzun-i be ne'olh'en.

13 Whunilh'en njan too diz'ai-un 'et whuzih susyin, 'ink'ez njan keyoh whudune'ne butse'ke, too huhutidulh 'awet nilhduk.

14 'Et lhaoodonleh mbe la ts'ekeyaz 'udutasnelh-un, nyoo too be silhdzo-i yun nenin'aih oosnai' sih dusni-un, 'en sih dooni', 'Too intnai 'ink'ez nyoo camel 'i cha si oogha tao'alh,' sulhni-un, 'en 'oot'e', mba 'ut'en-un Isaac oo'at wheni 'et si t'oonoszin, 'awet smoodih oogha t'e'ninzun hukw'un'a 'inla."

15 'Et 'uhooja 'awhuz yalhduk whe 'et Rebekah huyulhni-un, Bethuel ootse', Milcah ooyaz, Nahor oo'at, Abraham bulhutsin, 'en 'owhuya too ha tizya 'oosa' duwus k'ut yulh'ai.

16 'Et nyoon t'etyaz, tube ts'ekeezoo' 'aw dune yat'alhasnai 'awhuz unli, 'et nyooz too ha tizya nyoo dude 'oosa' yudilhun 'ink'ez nyus de hanaja.

17 'Ink'ez nyoon Abraham yuba 'ut'en-un yududilhgai 'ink'ez 'uyulhni, "Sla 'ineh whe nyoo nye'oosa' be sulhdzo-i, too oosnai'-un sgha oonin'aih."

18 'Et ts'ekeyaz 'uyulhni, "Too intnai smoodihti." 'Ink'ez 'aho dude 'oosa' duwus k'eitiz'ai 'ink'ez dula ts'un ye neinin'ai, 'ink'ez yugha tanilhdzo.

19 'Et hukw'elh'az too utnai lhadutja whe 'et 'utni, "Nyoon camel 'i cha sih too nahootnai'."

20 'Et soo 'aho 'et nyoo huye tatnai-i duchun 'i too huba idilhun, 'ink'ez too diz'ai-un whuz whenalgih whe ndi camel ts'iyawh hititnelh huba.

21 'Ink'ez nyoon dune t'edusnih 'et la Moodihti (Yahweh) whusainya-un, ts'iyawh lhaoodutneh tila k'us gak tila.

22 'Et doo cha nyoo khuna-i camel tanatnai' hukw'elh'az 'et nyoon dune nyoo gwul dult'oh-i bunintsis huba, 'ilho shekel huyulhni, 'ilhudzin dune yuk'elha 'ut'ih-i 'uldaz lhalcho 'ink'ez nanki lachun huyulhni-i, 'i whunizyai shekel, 'i cha ts'iyawh gold 'unt'oh.

23 'Ink'ez 'utni, "Mbe ootse' inli whe 'int'oh? Sudini, mbá ooyoh neba soo' whulcho tilah 'et uztitez huba?'"

24 'Et 'uyulhni, "Si Bethuel ootse' Milcah ooyaz, 'en Nahor ooghu yulhntsi-un 'ust'oh."

25 'Ink'ez 'on 'un cha 'uyulhni, "Tl'o cha lhai ts'ut'i, 'ink'ez tihtez-un cha soo' whulcho."

26 'Et dune yo nenint'ai 'ink'ez Modihti (Yahweh) yuts'un teni' nalhdzin.

27 'Ink'ez 'utni, "Ooba 'ust'en-un Abraham ooYak'usda (Elohim) 'ink'ez ooMoodihti (Yahweh) cha 'en doti'. 'Aw ndun ooba 'ust'en-un ye yugha te'ninzun 'ink'ez ye ts'ih'un 'unt'oh-i cha yulalhditnih. 'Et si 'owhuya usyalh Moodihti (Yahweh) 'en ndun ooba 'ust'en-un oonatneke 'en whusunilhtan, 'et whuz oozusya."

28 'Et nyoon t'etyaz yoh ts'u whelgai 'ink'ez duloo ooyoh ts'e hubudani'.

29 'Et Rebekah bulhutsin, Laban huyulhni, 'ink'ez Laban 'en n'az yuts'un telhagai 'ink'ez nyoon dune too diz'ai-un yuzih usyin-un, 'en yuzih neninya.

30 'Et 'uhooja nyoo yuni wheni yugha ininla 'ink'ez nyoo lachun wheni gha ininla 'i cha yunilh'en 'ink'ez nyoon dulhtus ooghuni yudants'o 'et 'ink'ez 'utni, 'Whuz un'a dune sulh yalhduk,' 'ink'ez nyoon dune yubut neninya 'ink'ez 'et yubut usyin nyoo camel oozih cha too k'et whuzih.

31 'Et 'uyulhni, "Daninyaih Moodihti (Yahweh) dawhuldzoo'-un oogha whults'ut! Di ha dati sinyin? Yoh lhaoodusla 'ink'ez khuna-i, Camel, cha ba lhaoodusla."

32 'Et nyoon dune yoh daninya 'ink'ez nyoo khuna-i camel, 'i cha yuk'e' tizdla 'ink'ez tl'o cha yuti'ulh-i cha yubut neidilhdze. 'Ink'ez too duke ye tunatigus-i cha 'ink'ez nyoonne dune yulh nudilhne, 'enne cha buke huye tunatigus inle' buba 'et neininla.

33 'Ink'ez ut'alh-i cha bubut nehuninla 'ink'ez 'utni, 'Ndet huwa njan whusasya-un 'awhuz lhunoduzusnih whe 'oos'alh ait'oh.'" 'Ink'ez 'uyulhni, "A, yalhduk!"

34 'Et 'utni, "Abraham ba 'ut'en-un usli whe 'ust'oh.

35 Moodihti (Yahweh) 'en smoodih tube soo honzoo-un yuba whulhntsi 'ink'ez dune ncha-un sul'i. Khuna-i didoh-i ts'iyawh 'ink'ez silver 'ink'ez dizi'i gold dunt'i-i, 'ink'ez dune cha, ts'ekoo yuba 'ut'enne cha 'ink'ez ndi camel cha 'ink'ez donkey cha lhai yugha ninla.

36 'Ink'ez Sarah, smoodih oo'at, 'en dune ooyaz suli', tube hoonyan unli, 'et hoontsi'. 'Ink'ez 'en huye ts'iyai ut'i ts'iyawh yugha ininla.

37 'Et smoodih nahinyeh sullhni, 'inka nahizusya, "Aw Canaan whut'enne buyun k'ut whust'ine 'enne butsu hainzut-un sye' oo'at olhchoot juni.

38 'Et hoontsi' sba ooyoh 'ink'ez snatneke butoh 'et sye' ba oo'at olhchoot.'

39 'Et smoodih 'udusni, 'Ndun ts'eke 'aw sulh natit'us hukwa lhe'nizun de?'

40 'Et hoontsi' 'usulhni, 'Moodihti (Yahweh) mbe la ootso nusya-un, 'en lizas yulh ti'us ha yutl'aitilhtelh 'ink'ez inyalh whe soo' hoont'oh whe sye' ba oo'at snatneke butoh 'ink'ez sba ooyoh whuts'un, whuz de hainzut-un 'en ooba yutalhchulh.

41 'Ndet la snatneke butoh ninya de, ndun ts'eke 'aw hukwa lhe'hunizun de, be ts'u nahizinya-i gak natidleh.'

42 'Et 'andit dzin nyo too diz'ai-un 'et nenusya whe 'udusni, 'O Moodihti (Yahweh), ooba 'ust'en-un Abraham ooYak'usda (Elohim), soo sba lhaoodonleh nts'e usyalh-un.

43 'Nulh'en too diz'ai-un whuzih susyin whe 'et de la 'uhoneh t'et oot'alhe'asnai-un, too ha tiyalh 'ink'ez 'udusni, "Tooyaz sgha nilhdzeh nyoo nye 'oosa' be."

44 'Ink'ez 'usudutanelh, "Too intnai 'ink'ez nyoo nghuna', Camel, 'i cha sih too ooba 'oosleh ititnelh-i," Moodihti (Yahweh), 'en ts'eke 'oot'e' smoodih ooba 'ust'en-un, ooye' 'en ba oot'e'.'

45 'Et hoontsi' 'awhuz sdzi bez yasduk whe Rebekah 'owhuya uyalh dude 'oosa' duwus k'uyulh'ai 'ink'ez too diz'ai-un ts'e tainkai 'ink'ez 'udusni, 'Awe' too sgha nilhdzeh tiselh-i."

46 'Ink'ez soo 'ahoh 'et dude 'oosa' duwus k'etiz'ai 'ink'ez 'usulhni, 'Too intnai 'ink'ez nghuna' 'enne cha sih too buba 'oosleh.' 'Ink'ez too usnai 'ink'ez sghuna', 'i cha too yutitnelh-i ba lhaidinla.

47 'Et ooduskut 'ink'ez 'udusni, 'Mbe oots'e' inli whe 'int'oh?' 'Ink'ez 'utni, 'Bethuel ootse', Nahor ooye' Milcah ghu yulhtsi-un inle-un.' 'Et nyo ooni huba cha 'ink'ez lachun huba cha 'i oogha inusla.

48 'Et stsi be yo 'usja 'ink'ez Moodihti (Yahweh) ts'un teni' nalhdzin, 'ink'ez smoodih Abraham 'en ooMoodihti Yak'usda (Yahweh Elohim) 'en ooba soo hoonzoo-un whulhtsi, 'en whuz be nts'e ts'ihnus ts'un 'utisnelh whe smoodih be 'ilhoghun 'en ootse', 'en 'utahat'altelh smoodih ooye' ba.

49 'Et soo te'nuzun whe ts'ih'un 'un'a smoodih 'utilelh suduhni, 'et 'awundoo de, 'et de natisdahl nailhni ts'un'k'us tila toosya', k'us 'intl'us ts'e tila natooja', 'et sudohni."

50 'Et Laban 'ink'ez Bethuel bulh 'uhuyulhni, "Moodihti (Yahweh) ts'u hahoolts'ut whe' hoont'oh, 'aw hoonzoo-un hukw'un'a k'us hoontsi' k'un'a nyulh yats'oolhduk ait'oh.

51 'Njan Rebekah, mbut usyin ilhchoot 'ink'ez naindahl. 'En ooba 'int'en-un ooye', oo'at oleh sih, Moodihti (Yahweh) yatilhdruk hukw'un'a."

52 'Et hukw'elh'az Abraham ba ne'ut'en-un ndi khuni yudants'o whe, 'awet yun nachaniti 'ink'ez Moodihti (Yahweh) yuts'un teni' nalhdzin.

53 'Et nyoon Abraham yuba 'ut'en-un, dizti-i khuts'ulhya-i, silver cha, 'ink'ez gold cha 'unt'oh 'ink'ez naih cha, 'i Rebekah yugha ininla, 'ink'ez dizti-i bulhutsin cha 'ink'ez ooloo cha 'i bugha ininla.

54 'Et whe didut 'ink'ez dune hiyulh nudilh 'enne 'uhan'alh 'ink'ez tahitnai'. 'Et 'ulhdzis nduhoolhyiz 'et hantez. 'Et whe bundada' duhudindil 'ink'ez 'et 'utni, "Sumoodih ts'un nasalh'alh."

55 'Et hoonts'i Rebekah bulhutsin 'ink'ez ooloo cha 'uhutni, "Whute ndet t'et 'atsul nezih naooda' whunizyat dzin at'en, 'et de hukw'elh'az 'et sih nyulh natoo'as."

56 'Et 'ubulhni, "Dah sudohni' junih! Moodihti (Yahweh) 'en lhe'whuldzoo'-un sba wuhlhtsi. Sk'oh ndiz nutisyalh-un, whute nasilh'alh smoodih ts'un natoosja'."

57 'Et 'uhuyulhni, "Ndun t'etyaz 'anih ts'udoni' 'ink'ez didutch'oh ts'ooodlhkut."

58 'Et Rebekah, 'anih, hidani', 'ink'ez 'uhuyulhni, "Ndun dune bulh tan'us eh?" 'Et 'utni, "A, whuz toosya' lah."

59 'Et 'inka Rebekah dudulhtus 'ink'ez yughunli-un ts'eke, 'ink'ez Abraham yuba 'ut'en-un 'ink'ez dune tubulh ubulh whe huyalh'a'.

60 'Ink'ez Rebekah soo hoonzoo-un hiba tenadidli 'ink'ez 'uhuyulhni, "Neulhtus, lhez te whunizyai lhk'uz te (100,000,000) dune buloo onle' sih 'ink'ez nts'u haidene mbene la buts'u dutnine hukwuti-un dati 'i hi-moodih oole'."

61 'Et Rebekah 'ink'ez mbene la yuba 'ut'enne ts'ekoo, dodindil 'ink'ez nyoo Camel hik'etl'adiltsi', nyoon dune huyuntizdil 'ink'ez Abraham hiba 'uten-un, Rebekah hubilhchoot 'ink'ez nahutisdil.

62 'Et Isaac nyan whut'i Beer-lahai-Roi huwhutni, nts'un tsun whuz whut'i.

63 'Et Isaac hulhgha nus 'a yun k'ut nuninuzut ha whuz oozya. Ndo yutan'en 'ink'ez whunilh'en, 'et nyo camel whuz de nal'us.

64 'Et Rebekah ndo yutan'en 'ink'ez Isaac yunilh'en whe camel yuk'utizya, nyoo khuna-i k'usda-i.

65 'Et nyoon ba 'ut'en-un yoodulhkut, "Nyoon dune nets'oyalh-un, mbe whe 'ut'en?" 'Et ndun ba 'ut'en-un 'uyulhni, "Smoodih 'ut'en." 'Et Rebekah dunin k'e'nihbal.

66 'Et nyoon Abraham yuba 'ut'en-un nts'oh tila dat'en-un 'et Isaac yudani'.

67 'Et Isaac duloo Sarah oonimbali t'ah ts'e Rebekah dainilhti 'ink'ez Rebekah yu'at sul', 'ink'ez yuk'entsi'. 'Et Isaac ooloo dazsai whe tube k'enainin'a.

## 25

### *Abraham 'ink'ez Keturah*

1 'Et Abraham oo'at cha, Keturah huyulhni, 'en yughu nasda.

2 'En cha yuba buzkeh hooni, Zimran, Jokshan, Medan, Midian, Ishbak, 'ink'ez Shuah.

3 Jokshan 'en Sheba 'ink'ez Dedan bulh buzkeh sul', 'ink'ez Dedan ooye'ke 'enne Asshurim Lutushim 'ink'ez Leumim.

4 'Ink'ez Midian ooye'ke, 'enne Ephah, Epher, Hanoch, Abida 'ink'ez Eldaah 'enne ts'iyawh Kuturh buzkeh.

5 'Ink'ez Abraham ndai la yut'i-i ts'iyawh Isaac gha ininla.

6 'Et hoonts'i Abraham 'uyoonne ts'ekoo oo'at bughu nyus 'uhint'ohne, 'enne bubuzkeh 'enne cha buts'e'tilhdil, butl'a'andla 'ink'ez ooye' Isaac yuch'az nda' 'uts'un keyoh ts'e whuz whe balh'a'.

### *Abraham dazsai 'ink'ez 'ahuyalhti*

7 Njan duwhultsuk yus k'ut 'et ndi yun k'ut inda' Abraham 175 yus k'ut 'et ndi yun k'ut inda'.

8 'Et Abraham 'en 'udek'ez hanaji 'ink'ez soo hoonyan sul' whe dazsai. Tube hoonyan 'ink'ez ndi yinka inda' 'et ba whudizbun. 'Et whe dudune' 'enne buts'un whenaja.

<sup>9</sup> 'Ink'ez ooye'ke Isaac 'ink'ez Ishmael, 'enne nyo Machpelah tse'an 'et 'ahuyalhti. Mamre whutso Ephron oot'l'o k'ut, Zohar Hitt whut'en-un, 'en ooye', 'et nyo tse'an 'et 'ahuyalhti.

<sup>10</sup> Nyoo t'l'o k'ut Abraham Heth buzkeh buts'un yonket-i, 'et Sarah oozih 'et Abraham 'ahuyalhti.

<sup>11</sup> 'Et whe lhuwhuzut Abraham dazsai hukw'elh'az, 'et Yak'usda (Elohim) 'en ooye' Isaac soo hoonzoo-un yuba' hoonla. 'Ink'ez Isaac 'en Beer Lahai Roi 'et whut'i.

*Ishmael 'ink'ez Isaac ts'u haindene*

<sup>12</sup> Ndunne 'enne Ishmael ts'u haindene: Ishmael 'en Abraham ooye', Hagar Egypt whut'en-un, 'en Sarah yunatne'ut'en-un, 'en ooyaz, 'en Abraham yughulhtsi-un ooye'.

<sup>13</sup> Ndowhi 'i Ishmael ooye'ke buboozi': 'udechoo Nabaioth, 'et hukw'elh'az Kedar, Adbeel 'ink'ez Mibsam,

<sup>14</sup> Mishma, Dumah, Massa,

<sup>15</sup> Hadar, Tema, Jetur, Naphish, 'ink'ez Kedemah.

<sup>16</sup> 'Enne Ishmael ooye'ke 'uhint'oh. Ndi 'i buboozi nts'e bukeyoh 'ink'ez hudilhts'i 'et. Whunizyai 'on 'at nanki (12) budayiyaz, 'enne nts'e hahande hukwa sih boozi'.

<sup>17</sup> Ishmael ndi yun k'ut inda-un, 137 be yus k'ut 'et dazai. 'En cha whutsoda' yulh 'unt'ohne buts'un whenya.

<sup>18</sup> Yun k'ut Havilah 'ink'ez Shur 'et 'uwuldzoh, Egypt whanda', Assyria ts'u wheti, 'oh huwhut'i 'ink'ez Ishmael dunatneke butoh 'et dazsai.

<sup>19</sup> Ndi 'i Abraham ooye' Isaac oots'u hayandene. Abraham 'en Isaac oobá.

<sup>20</sup> Isaac 'en dit whunizyai (40) naoodizut whe oo'at Rebekah 'en yughusda. Bethuel ootse' 'en Syria whut'en, Padan Aram keyoh, 'et Laban, 'en Syria whut'en 'en bulhtus.

<sup>21</sup> 'Et Isaac 'en Moodihti (Yahweh) yuts'u tedudlih du'at ba, 'aw buzkeh hole' ait'oh. 'Et Moodihti (Yahweh) 'et yugha oonin'ai 'ink'ez Rebekah ulchan.

<sup>22</sup> 'Et nyo oochan ts'e nane nukahulhoh, "Soo 'ust'oh 'et hoonst'i 'et di ha njan dust'oh?" ni, 'ink'ez Moodihti (Yahweh) yoodalhkut.

<sup>23</sup> 'Et Moodihti (Yahweh) 'en Rebekah 'uyulhni, "Nawh didohne 'enne nchan 'uhint'oh.

Nawh didohne 'enne hubutalhtsi,

'ilhoh didoh-un 'en onghun-un hanus 'ulhtus,

'ink'ez 'udetso whutileh-un 'en duk'oh-un yuba ne'tit'en."

<sup>24</sup> 'Et 'awet ooba newhults'ut ooyaz whutaleh ha, 'et nane lht'udinke oochan.

<sup>25</sup> 'Udetso whuzdli-un 'en dulk'un 'ink'ez ants'i naih 'ugha unli 'i yesda le'unt'oh ndulcho whe ooyust'e, 'en Esau huyulhni.

<sup>26</sup> 'Et hukw'elh'az bulhtusin en whuzdli, 'ink'ez Esau ookentsul 'i yilhchoot. 'En Jacob huyulhni. Isaac lhk'utat whunizyat be yus k'ut (60) 'et nyoon ts'oodunne huwhuzdli.

<sup>27</sup> 'Et nyoonne duneyaz huniyilh, Esau 'en tube 'uka 'ut'en-un 'ink'ez chuntoh whudune' whe 'uyoo unli. 'Et hoonst'i Jacob 'en t'edusnih-un dune unli, nimbali t'ah za whut'i.

<sup>28</sup> 'Ink'ez Isaac 'en Esau yuk'entsi', ndai yughan-i yu'alh, 'ink'ez Rebekah 'en Jacob yuk'entsi'.

*Esau ndai la k'at le oogha itakulh-i, 'i Jacob 'en ye ts'un 'onket*

<sup>29</sup> 'Aw 'et Jacob tazul inla 'ink'ez Esau 'en chuntoh ts'un hanaja 'ink'ez tube nenintsai.

30 'Et Esau 'en Jacob 'uyulhni, "Sla'inle whe nyutazul dulk'un, 'i za sunail'alh, tube nenisai 'et huwa." 'Et huwa boozi' 'i Edom ts'utni.

31 'Et hoonts'i Jacob utni, "Nda'i la mba ootadzilh-i k'at le, 'i 'andit be sts'e 'onket."

32 'Ink'ez Esau 'utni, "Whunilh'en 'awet datisah! Be daost'e' suba ndi sba huyoozi-i?"

33 'Et Jacob 'utni, "'Andit dzin sts'un nahinyeh." 'Et huwa yuts'u nahizya 'ink'ez ndai la k'at le oogha itakulh-i, 'i Jacob 'en ye ts'un 'onket.

34 'Ink'ez Jacob, Esau ut'alh-i 'ink'ez nyoo yuzdliz-i hanuyeh, 'i yugha ininla 'ink'ez 'i yan'al, 'ink'ez dunadija 'ink'ez 'az whenaja. 'Et Esau ndai la k'at le oogha itakulh-i ts'iyawh 'aw yukalhe'nizun, 'un yutilhdil.

## 26

### *Isaac 'ink'ez Abimelech*

1 'Et nyo keyoh dai dinzut, whutso da' Abraham khuna whe 'et cha dai dinzut inle' 'ink'ez Isaac, Abimelech huyulhni, Philistine whut'enne buba lerwe, Gerar whut'i, 'en buts'un whenya.

2 'Et Moodihti (Yahweh) yunalhts'et hainya 'ink'ez 'uyulhni, "'Aw Egypt ts'u tonya' junih. Ndet la yun nyudutasnelh-un 'et sih hont'e'.

3 'Ndi yun 'i k'ut hont'e 'ink'ez nyulh 'utistelh, 'ink'ez mba soo hoonzoo-i ubooselh. Nyun cha 'ink'ez nts'u haindene cha ndi yun bugha inus'ai, ndet la mbá Abraham oots'u nahizusya-i, 'i lhadutisleh 'et huwa.

4 'Ink'ez nts'u haindene, 'enne yak'uz whusum k'un'a lhk'uz te hulldai hubutilhtselh. 'Ink'ez nts'u hainde 'en ts'iyawh njan yun k'ut bugha óotas'alh. 'Ink'ez nts'u haindene, 'enne bugha ndi yun k'ut dune ts'iyawh huba soo hoonzoo-i 'i butilhtselh.

5 Abraham 'en sghuni oontun 'ink'ez sk'oh ts'e ant'e, sghuni 'i yuk'une'ust'en, dadusni, 'et cha hont'un, 'ink'ez nts'en'a ba newhunin'ai, 'et huwa."

6 'Et Isaac nyo keyoh Gerar howhutni-un 'et hoot'e'.

7 'Et nyoonne dune 'et whudune'ne hi'at ka huyoodulhkut 'ink'ez 'ubulhni, "Sulhtus 'unt'oh." "S'at 'unt'oh" hubulhni de, doo ka la sozoolhghelh ninzun 'awhuz ndun Rebekah ts'eke zoo' 'et huwa.

8 'Et 'uhooja sa' nyo 'et keyoh hoot'e' whe Abimelech, Philistinene bulerwe, dadint'az k'et 'az whunilh'en whe Isaac, Rebekah yughu dzedzi' whe yunulh'en.

9 'Et Abimelech Isaac, "'Anih!" yudani, "'Alha 'uhoont'oh whe ndun ts'eke n'at 'unt'oh 'ink'ez nts'en'a 'udini 'Sulhtus 'unt'oh, dini?" 'Ink'ez Isaac 'uyulhni, "Doo ka sih ook'uz daoosah 'inka 'udusni."

10 'Ink'ez Abimelech 'utni, "'Et dane'inla whe ne'inla? Nyoonne dune 'ilhoghun te da', nyoon n'at yuchan t'eoot'e' oole! Njan lhe'hoont'oh-un 'et da' nek'eholts'it oole."

11 'Et Abimelech mbene la dudune'ne 'ubulhni, "Ndun dune k'us oo'at te oot'aizahnai de, datihtsah."

12 'Et Isaac nyo yun k'ut 'a' nanla 'ink'ez yus k'ut ha'nanla. Lhai ha'nanla, 100 'et 'uwultsuk, 'ink'ez Moodihti (Yahweh) soo hoonzoo-un yuba whulh'tsi.

13 'Et ndun dune 'awet hoonzoo wheninle' 'ink'ez lhk'uz te whe tube hoonzoo suli'.

14 'Usbai 'i yulh lhai suli', musdoos 'i cha lhai whe yut'i suli', 'ink'ez hinatne'ut'en 'enne cha hulldai. 'Et whe Philistine whut'enne highe 'oolnih huzli'.

15 'Et nyoonne Philistinene nyo too dizdla-un 'uhuhoonla-un, ts'iyawh lhez buch'a 'ananuhulhkat, Abraham yuba 'ut'enne, 'enne hahuhonkai, Abraham khuna whe, 'ink'ez nyoonne sai dizbun whe 'ananulhkat.

16 'Ink'ez Abimelech, Isaac 'uyulhni, "Nech'a naindalh! Neanus 'ilhtus whe 'int'oh."

17 'Et Isaac nyo huwu natisja 'ink'ez dzulh eguz, Gerar, 'et nimbali nenin'ai 'ink'ez 'et whut'i.

18 'Ink'ez Isaac doo cha nyo too k'et na'hoonla, mbe la oobá 'ulhuhoonla-un inle'-un. 'Oh da' ts'iyawh nyoonne Philistinene ts'iyawh lhez 'anunahulhkat inle'. 'Ink'ez ndai la nyo too dizdla-un oobá ye honzi'-un, whuz un'a hoozi' nawhulhtsi.

19 'Ink'ez Isaac yuba 'ut'enne nyo dzulh eguz ha huhonkai, 'et doo cha too unzoo hoonli-un 'et nahuhoon'ai.

20 'Et hoontsi' nyoonne Gerar whut'enne khuna ghunline, Isaac khuna' ghunline tube hube hududulh. Nyoonne Gerar whut'enne hutni, "Ndi too nech'e' 'unt'oh!" hutni, 'et nyo too k'et, 'et Esek yoozi', hiye dindil 'et huwa.

21 'Et doo cha 'udun too diz'ai-un 'uhuhoonla. 'Et nyo 'et cha hukwa lhedudindil, 'et cha hoozi' whulhtsi, Sitnah whulhni.

22 'Et nyo tizna 'ink'ez doo cha 'udun too k'et 'uhuhoonla. 'Et 'aw hukwa lhelhdulhyoh l'ehuditnelh 'et huwa, Rehoboth whulhni. 'Et 'utni, "Andit njan Moodihti (Yahweh) hooncha neba whulhtsi, soo lhai cho la 'uts'ooleh ndi yun k'ut."

23 'Ink'ez 'et whedinya ndo Beersheba ts'un whenya.

24 'Et 'ulhdzis za Moodihti (Yahweh) yunalhts'et hainya 'ink'ez 'utni, "Mbá Abraham ooYak'usda (Elohim) 'ust'oh. Whenilhjut iloh, nyulh 'ust'en 'ink'ez soo hoonzoo-un mba whutiselh 'ink'ez nts'u haindene cha lhané hutileh, ndun sba 'ut'en-un Abraham 'en gha.

25 'Et nyo loodel 'inla 'ink'ez Moodihti (Yahweh) yukahuyih 'ink'ez 'et nimbali nenin'ai. 'Et doo cha Isaac yuba 'ut'enne too k'et hahonkai.

26 'Et Abimelech yughu ninya keyoh Gerar ts'e hainya, ook'eke 'ilhoghun Ahuzzah huyulhi, 'ink'ez Phichol lhuganne bumoodih 'en tubulh.

27 'Ink'ez Isaac 'ubulhni, "'Et di ha sghu nuhdil, sts'u duhni 'ink'ez whenasuniyoot inle'?"

28 'Et hoontsi' uhuyulhni, "Soo ts'ih'un 'alha t'ets'onanzin Moodihti (Yahweh) nyulh 'unt'oh. 'Et' uts'utni, 'Nats'uhoooyeh nyun 'ink'ez wheni tubulh nats'uhoooyeh,' huyulhni.

29 'Aw hoonli hoontsi' hukw'un'a ne'onleh ait'oh, 'aw nt'alhts'inalh 'et huwa. Hoonzoo-un te za ne'unts'uyulh'en, dalhts'inelh whe za whenants'uyalh'a'. Moodihti (Yahweh) soo hoozoo-un nga óonin'ai inli."

30 'Et bughu nusuya 'ink'ez 'uhan'alh 'ink'ez tahitnai'.

31 'Et bunda' 'uda' duhudindil 'ink'ez lhts'unahuhisda whe Isaac 'un when-abalh'a' 'ink'ez budzi dizghel whe whenahidil.

32 'Et nyoonne 'et dzin za Isaac yuba 'ut'enne, doo cha za too hoonli hahonkai 'ink'ez highu nindil 'ink'ez 'uhuyulhni, "Too k'et 'et 'uts'uhoonla!"

33 'Et nyo too k'et 'et Shibah whulhni, 'et huwa nyo keyoh whuti 'andit dzin whuts'un Beersheba huwhutni.

34 'Et Esau dit whinizyat (40) be yus k'ut whe ts'ekoo nane 'enne bughusda. 'Ilhoghun Judith, Beeri ootse', Hitt whut'en-un 'unt'oh, 'ink'ez Basemath, Elon, Hitt whut'en-un, 'en ootse' bulh.

35 'Ink'ez nyoonne ts'ekoo, Isaac 'ink'ez Rebekah bulh budzi hundulhda.



## 27

*Isaac 'en Jacob ooba soo hoonzoo-un 'uyulhni*

1 'Et 'uhooja Isaac duneti sul'i 'ink'ez oona cha 'awet tetsun sul'i' whe, Esau, ooye' 'udetso-un 'en yuka' dani', "Sye'," yulhni. 'Et 'utni, "Njan 'ust'oh." yulhni.

2 'Et 'utni, "Whunilh'en 'andit duneti susli', ndet dzin datisah-un 'aw t'eoonuzusun.

3 'Andit whe sla'ineh, be 'uka' int'en, k'aza zus, 'ink'ez k'aza bulh 'i tonla. 'Et tl'o k'uz ts'e tonya', 'ink'ez khuna-i sba ka' ont'en.

4 'Ink'ez nyoo ndai la oonust'i-i, 'i sba 'ineh, 'ink'ez sts'u tonka', 'et de sih oos'alh. 'Et de sih szul be soo hoonzoo-un nts'un tizoo' datisah whutso.

5 'Et Rebekah yoozilhts'ai whe 'utni Esau bulh yalhduk, 'ink'ez Esau whenya 'uka' tit'elh ha 'ink'ez whusaitileh.

6 'Et Rebekah 'en duye' Jacob 'uyulhni, "Ilhiz soo oozolhts'ai' mbá 'en Esau 'uyulhni, njan ndi yulhni,

7 'Silhghe-i sts'inlelh 'ink'ez nzoo-i sba 'ineh, tis'ulh ha datisah whutso Moodihti (Yahweh) oonalh 'et sih soo hoonzoo-un nts'un tiszoo.'

8 'Et huwa sye' daja nyudusni la 'et soo zilhts'ai.

9 'Az inyalh 'ink'ez khuna-iyaz toh ts'e nanki dúbe uzkehyaz soo unzoo-i, 'i si mba 'oosleh, mbá oogha itankalh wheni, nts'en'a yoont'i', whuz un'a.

10 'Ink'ez ndi mbá oogha ininkaih 'ink'ez yoo'alh sih 'ink'ez datisah whutso 'et 'en gha soo hoonzoo-un ngha hootalts'ulh."

11 'Et Jacob ooloo Rebekah 'en 'uyulhni, "Whunilh'en sulhutsin Esau tube dughai whe 'unt'oh 'ink'ez 'aw si ndulhust'oh.

12 'Ndun sbá ndi sla tila yukunudoolnih 'ink'ez nanis'a 'ink'ez sich'oh, sk'e hooyeh tila 'ink'ez 'aw soo hoonzoo-un sgha holts'it ait'oh."

13 'Et hoonts'i ooloo 'uyulhni, "Whute ye nk'ehizya-i si sih sk'uz'ooneh! Sye', 'ants'i soo zilhts'ai 'ink'ez ndi khuna-iyaz sba ookainyalh!"

14 'Ink'ez ndi khuna-iyaz yilhchoot 'ink'ez duloo gha ininla 'ink'ez ooloo yuba yuzdliz, ndai la oobá ooba yinzoo-i.

15 'Et Rebekah duyaz 'udetso-un Esau, 'en oonaih k'us unzoo-i yoh yuzdla-i, 'i Jacob 'udek'oh-un, 'en ye yalhti.

16 'Ink'ez nyoo dúbe buzkeh oozuz 'i yula yugha iyozduz, oots'ilchun cha yugha iyozduz.

17 'Ink'ez nyoo yuzdliz-i 'ink'ez ut'alh-i cha 'i duyaz Jacob yutl'ayanla.

18 'Ink'ez dubá yuts'u yoozdla 'ink'ez 'uyulhni, "Ubá." "Njan 'ust'oh. Sye', mbe inli whe 'int'oh?" ni.

19 'Et Jacob dubá 'uyulhni, "Nye", 'udetso whuzdli-un, Esau 'ust'oh. Daja sudani' la whuz un'a 'usja. Dudinyaih 'ink'ez njan sinda 'ink'ez ndi sisghi-i in'alh, 'et de sih nzul be soo hoonzoo-un sgha hoolts'it."

20 'Et hoonts'i Isaac duye' 'uyulhni, "Sye", 'et nts'en'a 'a cho naindla 'i silhghi?" 'Ink'ez 'uyulhni, "Moodihti nYak'usda (Yahweh Elohim) 'en sgha ininla 'et huwa."

21 'Et Isaac, Jacob 'uyulhni, "Njan szih neninyaih 'ink'ez sih nk'unudooznih, sye' 'alha Esau tila 'int'oh."

22 'Et Jacob dubá Isaac yuzih neninya 'ink'ez yuk'unudilhni 'ink'ez 'utni, "Nyiz yailhduk, 'et Jacob ooyiz 'utni, 'et hoonts'i ndi nla 'i Esau oola 'unt'oh."

23 'Ink'ez 'aw nalhuyóolts'ulh, nyoo oola dughai Esau oola k'un'a, 'inka soo hoonzoo-un be ubulh yalhduk.

24 'Ink'ez 'utni, "Alha eh sye' Esau 'int'oh?" "A," yulhni.

25 'Ink'ez 'utni, "Szih nenin'aih nyoo sye' yanghan-i, 'i sih oos'alh 'ink'ez ndi szul be soo hoonzoo-un ngha hóotalts'ulh sih." Yuzih neninkai 'ink'ez yan'al 'ink'ez ts'ekoo too' cha yugha nilhdzo 'ink'ez 'i cha yitnai'.

26 'Et oobá Isaac 'uyulhni, "Sye' szih neninyaih 'ink'ez nasudints'oos."

27 'Ink'ez yuzih neninya 'ink'ez naidits'ooz 'ink'ez nyoo naih yunahoolhtsun 'ink'ez soo hoonzoo-un ootl'aookat, 'ink'ez 'uyulhni, "Alha soo ts'ih'un sye' 'aw hukw'un'a oonawhultsun, ndai la Moodihti (Yahweh) tl'o k'ut soo hoonzoo-un whulhtsih.

28 'Et huwa Yak'usda (Elohim) yak'uz nanaduldzoh-i, 'i ngha yolhdzeh 'ink'ez ndi yun k'ut ndai la nzoo-i ts'iyawh cha, hanuyeh cha 'ink'ez ts'ekoo too' cha lhai 'i ngha yolelh.

29 Dune cha nyunat ne'hoot'en 'ink'ez didohne cha mba nacha hunooldulh. Nyulhutsinke cha bumoodih onle, 'ink'ez nloo buzkeh, 'enne cha mbut nachahunooldulh.

Mbene la nk'ehuyihne 'enne cha buk'ehodeh, mbene la soo hoonzoo-un nts'un hutizoo', 'enne cha soo hoonzoo-un bugha hóotalts'ulh."

30 'Et 'uhooja Isaac, Jacob yuba soo hoonzoo-un za ootl'aookat 'etsul 'udija, 'ink'ez Jacob 'awhuz n'az nalhtusdai, 'et Esau bulhutsin daninya ndai la yuka 'it'en-i bulh.

31 'En cha ndi t'alh-i nzoo-i 'uyinla 'ink'ez dubá yughu daininkai 'ink'ez dubá 'uyulhni, "Sbá dudoya' 'ink'ez ndi ooye' yuzilhghi-i yoo'alh, 'et la nzul be soo hoonzoo-un sgha hóotalts'ulh."

32 'Ink'ez oobá Isaac 'uyulhni, "Mbe inli whe 'int'oh?" 'Et 'uyulhni, "Nye' 'ust'oh. Nye' 'udetsoo-an Esau."

33 'Et Isaac soo tube cho 'et ditlut 'ink'ez 'utni, "Mbe 'uja khuna-i yuzilhghi-i 'ink'ez sghu daininkai? Ts'iyawh us'al dantanyalh whutso 'ink'ez 'en soo hoonzoo-un oots'un uszoo'. 'Ink'ez 'alha 'en soo cho oobulh 'uwhutat'elh."

34 'Et Esau dubá ooghuni yudants'o whe soo 'ultus-un intse 'ink'ez dubá 'uyulhni, "Sbá si cha O sbá soo hoonzoo-un sghá holts'it!"

35 'Et hoonts'i 'uyulhni, "Nyulhutsin whunut'i' 'i be sghu daninya 'ink'ez ndi mba soo hoonzoo-un ngha hóotalts'ulh, 'i yilhchoot.

36 'Ink'ez Esau 'utni, "Alha 'i be Jacob 'uyulhni, 'awet nat 'usinla, 'udechoo ndi sts'u oozinzi-i cha sghu yilhchoot 'ink'ez whunilh'en 'andit be soo hoonzoo-un sgha hóotalts'ulh, 'i cha yilhchoot!" 'Ink'ez 'utni, "Aw eh 'uyoo soo hoonzoo-un sgha hóotalts'ulh sba lhint'ih?"

37 'Et Isaac 'en Esau 'uyulhni, "A, nyumoodih susi. Bulhutsinke 'enne cha hibut ne'tit'en whuzusi. Hanuyeh cha 'ink'ez ts'ekoo too' cha ts'iyawh 'i oogha inusla. Sye', ndet mba dawhutislelh?"

38 'Ink'ez Esau dubá 'uyulhni, "Sbá, 'ilho soo hoonzoo-un za int'i eh? Sbá si cha O sbá soo hoonzoo-un sgha hóotalts'ulh!" 'Ink'ez Esau tube cho whenintse.

39 'Et Isaac oobá 'uyulhni, "Whunilh'en hoont'i-un ndi yun k'ut nzoo-i whutaleh, 'ink'ez ndo yak'uz naduldzoh-i 'i cha tant'elh.

40 Nla luzti 'i be hutanalh 'ink'ez nyulhutsin ooba 'utant'elh. 'Ink'ez 'uwhutanelh mba whe' hoont'oh hooloh sul'i de, ndai la nts'ilchun ye yootun-i k'utanyus."

41 'Et huwa Esau, Jacob yuts'u dutni ndai la yube soo hoonzoo-un oogha whútilts'ulh, yilhchoot, 'ink'ez Esau dudziyo ts'e 'utni, "Sbá ook'eni whuntidleh-un 'awet nilhduk, 'et de Jacob sulhutsin tuzisghelh.

42 'Ink'ez Esau ooghuni 'udetso ooyaz-un Rebekah hidani'. 'Et Rebekah Jacob 'anih yudani' 'ink'ez 'uyulhni, "Alha nyulhutsin Esau nyutuzilhghelh 'et whe hazih k'ena'dunit'ah.

43 'Et huwa syaz sghuni ook'oh ts'e 'ineh. Dudinyaih 'ink'ez sulhutsin Laban, Haran whut'i-un, 'en oots'ilgih.

44 'Ink'ez oozih sinda, 'atsulyaz nyulhutsin ye hunilch'e-i gak naoodleh sih.

45 Nyulhutsin ye hunilch'e-i nch'az na'ootneh, dainla la whunaoodilhnoh de, 'et sih nka nawhutoos'a 'ink'ez whusanaoonja'. 'Et di ha nyun cha nk'eni untisleh 'ilhudzin za?"

46 Rebekah 'en Isaac 'uyulhni, "Awet tube be khúсна-un be nenisai, be khúсна-un be nenisai ndunne Heth butse'ke k'uz. N dunne ndi yun k'ut whut'enne whutse' le'hint'oh. 'Et Jacob, 'en Heth butse' ghusda te, 'et dant'i whe be khúсна-un sba oole' ha?"

## 28

1 'Et Isaac, Jacob 'anih yudani' 'ink'ez soo hoonzoo-un yuba whulhntsi, 'ink'ez 'uyulhni, "Aw Canaan whuts'eke' 'ilhoghun, 'en n'at wheni olhchoot junih.

2 Dudinyaih 'ink'ez Paddan Aram, Bethuel ooyoh ts'e inyalh, nloo oobá, 'ink'ez 'et ts'eke n'at wheni ilhchoot, Laban buzkeh 'ilhoghun nloo bulhutsin.

3 Yak'usda 'Uk'enus 'Ultus-un 'Ust'oh (El Shaddai) soo cho-un cha mba hoonzoo-un ngha hóotait's'ulh 'ink'ez lhane hooleh dune huldlaine oohleh.

4 Abraham ye soo hoonzoo-un whusaínkat, 'i cha nts'un tookat, nyun cha 'ink'ez nts'u hahande nyulh 'uhint'oh'enne cha. 'Et sih njan yun k'ut nohch'e' oole', 'et 'uts'un hoont'en inli. Njan 'et Yak'usda (Elohim) 'en Abraham yugha óoni'ai inle'."

5 'Et Isaac, Jacob wheyalh'a 'ink'ez yun k'ut Paddan Aram ts'e whenya, Laban, Bethuel ooye', Syria whut'en, 'en Rebekah bulhutsin Jacob 'ink'ez Esau buloo.

### *Esau 'en Mahalath yughusda*

6 'Et Esau, Isaac, Jacob 'en soo hoonzoo-un ubulhni 'ink'ez wheyalh'a' yun k'ut Paddan Aram, oo'at yutaleh-un yolhchoot ha, 'ink'ez yuba soo hoonzoo-un whulhntsih whe 'et njan 'uyulhni, "Nyun Canaan whut'enne ts'ekoo butoh, 'enne n'at wheni olhchoot junih!"

7 'Ink'ez Jacob dubá yuk'oh ts'e 'uja, duloo cha yuk'oh ts'e 'uja, 'ink'ez yun k'ut Paddan Aram ts'e whenya.

8 'Ink'ez cha Esau, Canaan whut'enne whuts'ekoo dubá 'aw hukwa' alhe'nizun.

9 'Et Esau, Ishmael, Abraham ooye', 'en ts'u whenya, 'ink'ez Ishmael, 'en ootse' Mahalath, 'en du'at wheni yilhchoot. Ishmael ootse' Nabaiioth, 'en bulhtus 'unt'oh, Mahalath, 'en cha oo'at yole', 'uyoonne oo'atke tubulh.

10 'Andit 'et Jacob 'en Beersheba whuz de hanaja 'ink'ez keyoh Haran ts'un whenya.

11 'Et 'utsun whenya 'ink'ez 'ulhdzis nduwulhyiz whe 'et inda', sa yo whin'ai 'et huwa, 'ink'ez nyoo tse, 'et diz'ai-i 'ilho 'i yuk'ut tse nilh'ai nantitelh wheni.

12 'Et nusuti 'ink'ez whunilh'en, kw'ut dughaiti-i ndi yun k'ut whedin'a, ndo yak'uz ts'e whein'a, 'et Yak'usda (Elohim) oolizasne ndo cha whehudulh 'ink'ez nyo cha whenahudulh.

13 'Ink'ez whunilh'en ndo Moodihti (Yahweh) 'en usyin 'ink'ez 'utni, "Si Moodihti (Yahweh) Abraham ooYak'usda (Elohim) mbá cha 'ink'ez Isaac

ooYak'usda (Elohim) cha 'ust'oh. Ndi yun ookw'ut sinti-i 'andit ngha tis'alh nts'u haindene cha.

<sup>14</sup> 'Ink'ez cha mbene la nts'u haindene ndi yun k'ut lhez lhe'unt'oh. Lhai whuz un'a hutildlai, noo' cha 'ink'ez nda' cha, whuz netihnelh, no cha, nyan 'ink'ez ntsu hainde-un cha, 'en gha ndi yun k'ut dilhts'ine, 'enne ts'yawh soo hoonzoo-un bugha hóotalts'ulh.

<sup>15</sup> Whunilh'en nyulh 'ust'oh, ntsoh te ninya te, nyulh 'utistelh 'ink'ez ndi yun k'ut nenyutastelh. 'Et 'awet nghu natisdulh datisnelh la nyudusni-un, 'et 'awhusla whuts'un."

<sup>16</sup> 'Et Jacob ts'enandzut 'ink'ez 'utni, "Alha la Moodihti (Yahweh) njan 'et usda 'ink'ez 'aw azi t'oonuzusun."

<sup>17</sup> 'Ink'ez nuljut 'ink'ez 'utni, "Tube usla njan huwa 'it'en! 'Alha 'et Yak'usda (Elohim) ooyoh 'ink'ez njan 'et azi yak'uz ti ts'e whudatih!"

<sup>18</sup> 'Ink'ez Jacob 'uda' dudinya 'ink'ez nyoo tse yuk'utsenalh'a-i, 'i nyo whedin'a yulhtsi, 'ink'ez khe yuk'eilhdzo.

<sup>19</sup> 'Ink'ez nyo 'et boози' huwadin'ai, Bethel whulhni, 'et keyoh whutso da' 'et Luz huwhutni inle'.

<sup>20</sup> 'Et Jacob nahizya whe ndutni, "Yak'usda (Elohim) sulh 'unt'oh de, 'ink'ez ndiz un'a 'usilhdzun, 'ink'ez tisyalh ts'e ut'alh-i cha sgha ti'alh, 'ink'ez naih be dune tisleh-i cha,

<sup>21</sup> 'Et de sbá ooyoh ts'e soo ts'ih'un sdzi dizghel whe whuz natoosja, 'et de Moodihti (Yahweh) 'en sih Yak'usda (Elohim) sba oole'.

<sup>22</sup> 'Et ndi tse njan nadan'a k'un'a silhtsi, 'i Yak'usda (Elohim) ooyoh hole', 'ink'ez ndai sgha ninla, 'i whunizyai 'on 'un (10%) nts'un na'óotneh."

## 29

### *Jacob 'en Rachel yughu ninya*

<sup>1</sup> 'Et Jacob tizya ts'e whenya, nda' keyoh whut'enne bukeyoh ts'e oozya.

<sup>2</sup> 'Ink'ez whunalh'en 'ink'ez tl'o k'ut whuniz 'et too diz'ai 'ink'ez whunulh'en tawh didoh-i 'usbai, 'i nus ustez nyo too diz'ai-un 'et whutoo-i higha huylhdzoh, nyo too diz'ai-un too k'et whudah 'et ats'o tse diz'ai.

<sup>3</sup> 'Ink'ez nyoo 'usbai ts'yawh nyo 'et 'ilho ulh'us 'ink'ez nyoo tse 'i ts'o sanahidunulhghih, 'ink'ez 'usbai too highalhdzoh, 'ink'ez nyoo tse 'et nahidu'aih.

<sup>4</sup> 'Ink'ez Jacob 'ubulhni, "Sulhutsinke nts'ez de hahdil whe 'uht'oh?" 'Ink'ez 'uhutni, "Haran ts'e hats'andil."

<sup>5</sup> 'Ink'ez 'ubulhni, "Nahor ooye', Laban, t'enuhzun eh?" 'Ink'ez 'uhutni, "T'ezninzun."

<sup>6</sup> 'Et 'ubulhni, "Soo 'unt'oh eh?" 'Ink'ez 'uhutni, "Soo 'unt'oh 'ink'ez whunilh'en ootse' Rachel 'usbai bugha tatilhdzoh ha whuz de uyalh."

<sup>7</sup> 'Ink'ez 'utni, "Whunulh'en 'awhuz dzetniz whenghoh, 'awhuz khuna-i 'ilhunahuyoontayulh 'ink'ez 'usbai cha higha tatilhdzoh 'ink'ez bugha' huti'alh-un cha."

<sup>8</sup> 'Et hoontsi' 'uhutni, "Aw 'et duts'ooneh ait'oh. 'Usbai tsi'yawh 'ilhu-naoolh'az whutso 'ink'ez tse cha too k'et whusanahidunti lghih, 'et de 'usbai oogha tats'ulhdzoh."

<sup>9</sup> 'Awhuz yalhdruk whe Rachel dubá be 'usbai bulh whusainanyoot, 'usbai ghunli-un ts'eke 'et huwa.

<sup>10</sup> 'Ink'ez 'uhoaja Jacob, Rachel, Laban ootse', ooloo bulhutsin, yutilh'en whe 'ink'ez Laban be 'usbai, ooloo bulhutsin, Jacob 'et nyoo tse whusanaidunalhghai 'ink'ez ooloo bulhutsin Laban be 'usbai 'i yugha tanilhdzo.

<sup>11</sup> 'Ink'ez Jacob, Rachel naidits'ooz 'ink'ez tube cho whenintse.

12 'Ink'ez Jacob, Rachel yulhni, oobá oonadun 'ust'oh, 'ink'ez Rebekah ooyaz 'ust'oh, yulhni. 'Et Rebekah whelgai 'ink'ez dubá yudani'.

13 'Et 'uhooja Laban ndi khuni yudants'o Jacob, bulhtus ooyaz, whuz oolhgai 'ink'ez shih be' yilchoot, 'ink'ez naidits'ooz. 'Ink'ez duyoh dainilhti. 'Et Jacob Laban ndi ts'iyawh yudani'.

14 'Ink'ez Laban 'uyulhni, "Alha syust'e 'ink'ez sts'un cha inli." 'Ink'ez 'ilhoh sanun yuzih inda'.

### *Jacob 'en Leah 'ink'ez Rachel bughusda*

15 'Et Laban, Jacob 'uyulhni, "Snadun inli, 'et huwa 'aw eh 'ants'i 'et sba' tant'elh? Sudini, daltsuk k'elha la 'int'en?"

16 Laban nane ootse'ke hoonli, 'udetso-un 'en Leah huyulhni, 'ink'ez 'udek'o-un 'en Rachel huyulhni.

17 Leah oona soo lhe'iltus, 'et hoonts'i Rachel tubeh soo 'ot'en.

18 'Et Jacob, Rachel yuk'entsi' 'ink'ez 'uyulhni, "Lhtak'antit whunizyat (7) yus k'ut 'et mba 'oost'en, Rachel 'udek'oh-un 'en k'elha."

19 'Ink'ez Laban 'uyutni, "Uyoon dune gha tistelwh whutso, 'et 'onus soo' hoont'oh nyun ngha tistelh. Szih sinda."

20 'Et Jacob lhtak'antit yus k'ut 'et Rachel yuk'elha 'it'en. 'Ants'i 'atsulyaz ooba le 'hoont'oh, tube yuk'entsi' ket.

21 'Et Jacob, Laban 'uyulhni, "S'at sgha nilhtih, 'awet dzin lhaoodusla 'ink'ez la oost'e."

22 'Ink'ez Laban dune ts'iyawh oodune'ne 'ilhubozdla 'ink'ez dune ghu nusuya.

23 'Et 'uhooja 'et hulhgha dutse' Leah yilhchoot 'ink'ez Jacob ghi nilhti, 'en cha oo'at yuzdli'.

24 'Ink'ez Laban yuba 'ut'en-un, Zilpah huyulhni, 'en dutse' Leah yuba 'oot'en ha yugha inilhti.

25 'Et 'uhooja bundada' Leah ats'o 'unt'oh, 'ink'ez Laban 'uyulhni, "Dainja whe 'inja, whe' sinla? Rachel iloh lakw mba 'ist'en 'ink'ez di ha nasunan'a?"

26 'Ink'ez Laban 'utni, "Njan nekeyoh, 'aw 'udek'oh-un, 'en, 'udetso-un ootso dune gha buts'olhtelh ait'oh.

27 'Andit lisman lhaoodinleh, 'ink'ez ndun 'en cha 'ant'en hukw'elha ngha ts'oolhtelh. 'Ink'ez doo cha 'on 'un lhtak'ant'it yus k'ut, 'et sih sba 'ont'en."

28 'Ink'ez Jacob 'et lisman lhaoodinla, 'ink'ez dutse' Rachel 'en cha oo'at yutaleh ha yugha inilhti.

29 'Ink'ez Laban, yuba 'ut'en-un ts'eke, Bilhah, 'en dutse' Rachel yuba 'oot'en ha yugha inilhti.

30 'Et Jacob, Rachel 'en cha oo'at yuzdli', 'ink'ez 'en Leah anus yuk'entsi'. 'Ink'ez Laban doo cha lhtak'ant'it (7) yus k'ut 'et yuba 'it'en.

### *Jacob buzkeh*

31 'Et Moodihti (Yahweh), Leah 'aw dune yuk'elhitsi' 'inka oochan yudaha'dan'ai, 'ink'ez Rachel 'en 'aw buzkeh hooloh.

32 'Et Leah ulchan 'ink'ez dune ooyaz suli'. Ruban 'i be yoozi 'ink'ez 'utni, "Moodihti (Yahweh) 'alha njan whe undusda-un whunalh'en, 'et huwa ski sk'eootsi' la."

33 'Et doo cha za ulchan 'ink'ez dune ooyaz suli'. 'Ink'ez 'utni, "Dune sk'elhitsi', Moodihti (Yahweh) whudants'o, 'et huwa dune 'en syaz sgha inilhti." 'Ink'ez 'en Simeon yulhni.

34 'Et doo cha za ulchan 'ink'ez dune ooyaz suli'. 'Ink'ez 'utni, "Andit 'et la ski sk'eootsi' oole', 'awet tane ooye' susi 'et huwa." 'Et huwa duneyaz boozi, Levi, yulhni.

35 'Ink'ez doo cha za ulchan 'ink'ez dune ooyaz suli'. 'Ink'ez 'utni, "Andit 'et Moodihti (Yahweh) dutásti!" 'Et huwa yoozi', Judah, yulhni. 'Et hukw'elh'az 'et 'awet buzkeh hoonli-un 'etsul 'uja.

## 30

1 'Et 'awet Rachel 'aw Jacob ts'oodunne yughalhilel t'oonanzin, dulhtus 'en hukwa yughe 'oolnih 'ink'ez Jacob 'uyulhni, "Ts'oodunne sgha ninle k'us datisah!"

2 'Et Jacob, Rachel yulh hunilch'e 'ink'ez 'utni, "Si eh Yak'usda ook'edusda? Si 'unyusla 'aw nyuzkeh hole' ait'oh nyuzusi?"

3 'Et Rachel 'utni, "Ndun sba 'ut'en-un, Bilhah, 'en oozih sinti 'ink'ez la 'olhtsi, 'ink'ez sgwut k'ut da' ts'oodun 'ink'ez 'enne suzkeh hole', nghu bulhtsine."

4 'Ink'ez Bilhah, Jacob gha inilti oo'at yole' ha 'ink'ez Jacob yuchant'inte'.

5 'Ink'ez Bilhah ulchan 'ink'ez Jacob duneyaz yughu yulhtsi.

6 'Et Rachel 'utni, "Yak'usda (Elohim) sba nahizya 'ink'ez syiz cha yudants'o 'ink'ez duneyaz, syaz oole' ha sgha inilhti." 'Et huwa Dan yulhni.

7 'Ink'ez Rachel yuba 'ut'en-un, Bilhah, 'en doo cha 'ulchan, 'ink'ez Jacob bulh whulh nat-un ooye' ut'i.

8 'Et Rachel 'utni, "Sulhtus Leah bulh lhch'a 'oldeh hukwa 'it'en, soo 'iltus whe 'ink'ez si whucha' nusde." 'Ink'ez nyoon ts'oodun Naphtali yulhni.

9 'Et Leah 'awet buzkeh hoonli-un 'etsul 'uja, 'et yuba 'ut'en-un, Zilpah, 'en Jacob oo'at yole' ha yugha inilhti.

10 'Ink'ez Leah yuba 'ut'en-un, Zilpah, Jacob duneyaz yughu sulhtsi.

11 'Et Leah 'utni, "Dune lhuganene 'az de hidulh!" 'Inka nyoon ts'oodun Gad\* yulhni.

12 'Ink'ez Leah yuba 'ut'en-un, Zilpah, whulhnat Jacob yughe 'ulhtsi, duneyaz ooyaz suli'.

13 'Et Leah 'utni, "Hoonúst'i, ts'ekoo 'enne soo hoonzoo-un sgha whulst'ut-un sodoni' lah." 'Ink'ez nyoon duneyaz Asher yulhni.

14 'Et Reuban ha'nuyeh-un whuz 'ut'en whe 'et nyoo 'ilho hanuyeh-i duchunyoo cha ootoh hoonli-i (nedoh k'oh ts'e mandrakes huyulhni) 'i ngha ininla 'ink'ez duloo Leah yughi ninla. 'Et Rachel, Leah 'uyulhni, "Nyoo nyaz ngha ininla-i, ooloh sgha ninle."

15 'Et hoonts'i 'uyulhni, "Tube hoontsool-un 'inja ski ilhchoot ninzun eh? Doo cha syaz ndi mandrake sgha ininla-i, 'i cha sghi talhchulh hukwa' ninzun? 'Ink'ez Rachel 'uyutni, "Andit 'ulhdzis ndi 'i k'elha, 'andit 'ulhdzis nzih tidalh."

16 'Et Jacob hulhgha nus 'ut'en-un ts'e hanaja, Leah yududizya 'ink'ez 'uyutni, "Andit 'ulhdzis szih onte', ndi syaz naininla-i mandrake, 'i k'elha." 'Et 'ulhdzis yuchant'inte'.

17 'Ink'ez Yak'usda (Elohim) Leah yudants'o 'ink'ez ulchan, 'ink'ez Jacob whulh kwulane dune ooyaz suli'.

18 Leah 'utni, "Yak'usda (Elohim) 'en sba k'elhla whulhtsi. Sba 'ut'en-un, 'en ski butl'ayalhti 'et huwa." 'Et 'en boozi' 'i Issachar yulhni.

19 'Ink'ez Leah doo cha ulchan 'ink'ez Jacob bulh lkh'utan-un ooye' suli'.

20 'Et Leah 'et 'utni, "Tube Yak'usda (Elohim) hoonzoo-un sgha oonin'ai. 'Awet 'andit ski szih la ooda', lkh'utane dune ooghu susi." 'Ink'ez nyoon ts'oodun Zebulun yulhni.

21 Et hukw'elh'az ts'eke ooyaz suli', 'en Dinah yulhni.

\* 30:11 Ndi boozi' Gad, 'i "Hoonzoo Ngha Whulst'ut" ni whe 'utni.

22 'Awet Yak'usda (Elohim) 'en Rachel yunalnih 'et neodelhdzut 'ink'ez Yak'usda (Elohim) 'en yoozalhts'ai whe oochan 'ants'i yudaha'dan'ai le'yinla.

23 'Ink'ez ulchan whe dune ooyaz suli'. 'Et 'utni, "Yak'usda (Elohim) 'en sba yooya 'i n'un na'yinla."

24 'Ink'ez 'en Joseph yulhni, 'ink'ez 'utni, "Moodihti (Yahweh) doo cha sih 'uye' sugha oolhtelh."

### *Jacob 'ink'ez Laban bulh lhgha' hudija*

25 'Et 'uhooja Rachel, Joseph sulhtsi hukw'elh'az Jacob, Laban 'uyulhni, "Nasalh'alh, sich'oh whust'i-un skeyoh ts'e whuz si natoosja.

26 S'atke cha 'ink'ez suzkeke cha buk'elha 'ist'en, 'ink'ez slanaditnih, daja la mba 'ist'en 'et t'eeoninzin."

27 'Ink'ez Laban 'en 'uyulhni, "'Et sinda, mba uszoo de! T'eeoniszin 'awet nyun ngha Moodihti (Yahweh) soo hoonzoo-un sgha oonin'ai."

28 'Ink'ez 'uyulhni, "Daltsuk k'elha 'utant'elh-un sudini 'ink'ez la ngha oos'alh."

29 'Ink'ez Jacob 'uyulhni, "T'eeoninzun nts'en'a la mba 'ist'en 'ink'ez nghuna' 'i cha ghosle'.

30 Nghu tisyalh whutso tube ntsool-i int'i inle', 'andit ts'iyawh 'onus lhai suli'. Moodihti (Yahweh) soo hoonzoo' mba whulhtsi, si nghu nusya whuts'un 'ink'ez nkede sich'oh syoh dilhts'ine buba' tistelh."

31 'Et 'uyulhni, "Di ngha tis'alh?" 'Ink'ez Jacob 'utni, "'Aw hoonli sgha lhtuzan'a. Njan 'et dusinleh, 'et de doo cha sih nghuna' cha ghosle' 'ink'ez oogha 'oos'aih.

32 'Andit dzin nyoo int'i-i, ts'iyawh ootununoosta'. Ndai la ookw'e'nizdla-i ts'iyawh 'usbai 'i cha 'udun neooslelh, 'ink'ez dulba-i cha 'usbaiyaz toh 'i cha ts'iyawh, 'ink'ez dube ootoh 'i cha ookw'e'nizdla-i, 'i ts'iyawh 'udun neooslelh 'i k'elha 'ist'en whutaleh.

33 'Et de nts'en'a la whe tsih'un 'ust'oh-un, 'et la t'eeonoodzeh. Ndai la ook'elha mba 'ist'en-i, doo cha ooghu yatalduk de, ndai la dube ookw'ulhe'niloh-i 'ink'ez 'usbai dulba-i cha 'i ts'iyawh nghu hidunist'i oole' sih, sba whuz un'a 'uhoont'oh."

34 'Et Laban 'utni, "'Et whuz un'a ncha nghuni k'un'a 'uhooja."

35 'Et dzin Laban 'en dune dube ookw'e'nizdla-i 'ink'ez ts'eke dube ookw'e'nizdla-i cha, lhyul-i ook'ut ut'en-i 'ink'ez ndai la dulba-i usbaiyaz toh, 'i ts'iyawh duye'ke bugha ininla.

36 'Et Laban tat dzin 'uwulhdzoh Jacob yuch'a suya 'ink'ez Jacob nyoo Laban ooghuna' ts'iyawh bube ulh'alh.

37 'Ink'ez Jacob t'ughus duli-i 'ink'ez nyoo duchun almond 'ink'ez chesnut huyulhni, 'i yudilhchoot oot'ooz yuk'eitilhchul 'ink'ez nyo dulyul suli'.

38 Nyoo duchun yuk'e'tilhchul-i, 'i nyo 'usbai dilhts'i-un yananuyuz sih, ndet la tatnai-un, 'et de sih nyo yuzih nyoo duchun tatnai de oolchan.

39 'Et nyo yuzih nyoo duchun tatnai te, 'et ulchan ts'iyawh, 'et nyo ts'iyawh 'usbai ook'e'nizdla 'ink'ez lhyul-i bulh 'uts'un 'ot'en.

40 'Et Jacob nyoo 'usbaiyaz ts'iyawh 'udun nebuninla, 'ink'ez nyoo 'usbai 'on yoghi Laban ooghuna' ts'iyawh lhelhts'un 'ot'en ookw'e'nizdla te 'unt'oh, whuntilh'eh wheni. 'Ink'ez didutch'oh ooghuna' 'i 'udun nebuninla 'aw Laban ooghuna' yutalhuyilel.

41 'Et 'uhooja ndet la nyoo k'us ulhtus-i khuna-i ulchan te, nyoo duchun 'uyinla-i, 'i nyoo khuna-i yubut neidinla, 'et de nyo duchun ootoh 'et oolchan 'inka.

42 'Et hoonts'i nyoo khuna-i tetsun de, kwa nyoo duchun yuzih nelhubilel. Ndai la tetsun-i, 'i Laban ooghuna' 'unt'oh, 'ink'ez ndai la lhtus-i, 'i Jacob ooghuna' 'unt'oh.

43 'Et dune tube hoonzoo' 'unt'oh sulii'. Ndai la khuna yut'i-i lhai sulii'. Ts'ekoo 'ink'ez dune yuba 'ut'enne cha 'ink'ez nyoo khuna-i camel huyulhni, 'i cha 'ink'ez donkey huyulhni, 'ohwhi cha lhai sulii'.

## 31

### *Jacob 'en Laban ch'a tsetilhya*

1 'Et Jacob, nyoonne Laban buzkeh yalhulhduk budants'o, njan nduhutni, "Jacob ndai la 'ubá ooch'e' ts'iyawh yilhchoot 'ink'ez ndai la 'ubá ooch'e' 'i be hoonzoo' 'unt'oh sulii'."

2 'Ink'ez Jacob, Laban oonin yutilh'en 'aw whutso da' yuts'un unzoo-un k'un'a ilhoh yunilh'en.

3 'Et Moodihti (Yahweh) Jacob 'uyulhni, "Mbá ooyun k'ut ts'e naindalh, nyunch'oh nyunatneke butoh ts'e 'ink'ez nyulh 'utist'elh."

4 'Et Jacob, Rachel 'ink'ez Leah bulh nus 'ut'en ts'e khuna-i cha 'et dilhts'i whuz buka' dani',

5 'Ink'ez 'ubulhni, "Mbá oonin nus'en whutsoda' hukw'un'a ilhoh sulh-nilh'en, 'et hoonts'i sbá ooYak'usda (Elohim) 'en sulh 'ant'e'.

6 'Ink'ez t'oonuhzun ndet 'ust'oh-un 'et nohbá oonat ne'zuste'en.

7 'Et hoonts'i nohbá nasunan'a 'ink'ez kw'elha 'ust'en-i cha 'uts'un un'a na'hoonla, whunizyat at'en 'et hoonts'i Yak'usda (Elohim) 'aw mbá sundolh-dhah whuch'a sghunli.

8 Nja dutni de, 'Ndi ookw'e'nizdla-i ook'elha 'utant'elh,' 'ink'ez khuna-i uzkehyaz ts'iyawh ookw'e'nizdla. 'Ink'ez nja dutni de, 'Ndai la lhents'un-un 'ot'en-i ts'iyawh ook'elha 'utant'elh,' 'ink'ez nyoo khuna-i uzkehyaz ts'iyawh lhents'un 'ot'en.

9 'Et whe Yak'usda ndai la mbá ooghuna' ts'iyawh yilhchoot 'ink'ez sgha ininla.

10 'Et 'uhooja ndet la ndi khuna-i ulchan whe ndo yutas'en 'et 'ink'ez nususti 'ink'ez whunulh'en dúbe dune nyoo 'usbai ye k'eilhuk ts'iyawh nyoo ook'e'nizdla 'ink'ez ooka dulgi be nodelhghus.

11 'Et Yak'usda (Elohim) oolizas sulh yatilhduk nuste whe 'ink'ez 'utni, 'Jacob,' 'et 'udusni, 'Njan 'ust'oh.'

12 'Ink'ez 'usulhni, 'Do yutin'en 'ink'ez nyoo dúbe dune 'usbai yuk'eilhuk ts'iyawh lhelhts'un 'ot'en 'ink'ez ook'e'nizdla cha 'unt'oh. Nus'en Laban danyalh'en la ts'iyawh whunus'en 'et huwa.

13 Bethel whuYak'usda (El) 'en 'ust'oh. Ndet da' tse whedintsi-i soo 'inla 'ink'ez sts'un nahuzinya 'awet dudinyaih 'ink'ez njan keyoh whuch'a nasindaih 'ink'ez nyunatneke bukeyoh ts'e naindalh."

14 'Et Rachel 'ink'ez Leah bulh hiyulh yatilhduk 'ink'ez 'uhuyulhni, "Awhuz tole 'ubá ooch'e' 'ink'ez neba yootazilh-i cha neba hoonli?"

15 Wheni cha 'uts'un keyoh neninzun 'ink'ez neye'onket 'ink'ez nezooniya gak yulhtsi.

16 Ndai be hoonzoo' hoont'oh-i Yak'usda (Elohim) 'ubá yughu yilhchoot, 'i ts'iyawh nech'e' 'unt'oh neuzkehne ba cha, 'et 'andit Yak'usda (Elohim) daja nyulhni la 'et whuz un'a 'et ndoneh."

17 'Et Jacob dudinya 'ink'ez duye'ke 'ink'ez du'atke cha 'enne ts'iyawh nyoo camel k'ebinla.



18 'Ink'ez ndai la khuna-i yut'i-i 'ink'ez oogha ininkat-i cha, njan keyoh Paddan Aram ndi khuna-i oogha ininkat-i, oobá Isaac, Canaan keyoh ts'e, whuz whe najaja.

19 'Et Laban nus 'usbai hatit'us whe 'et Rachel ndai la nyo yoh ba 'uk'eltsi hits'u tenadudli-i, oobá ooch'e', 'i ts'iyawh yundunist'i.

20 'Ink'ez Jacob whenanil'i', 'aw Laban t'oonusuzun yuch'a nintanatilgih-un, 'aw lhidinel.

21 Ndai la yuti-i ts'iyawh bulh dudinya 'ink'ez 'ukoh yaninya nts'e la yun k'ut Gilead whudzulh, whuz whenajaja.

### *Laban 'en Jacob yuntizya*

22 Whutat dzin-un 'et 'andit ts'iya Laban hidani' Jacob whenatselya.

23 'Et dulhutsinke dulh hubutilhdil 'ink'ez huyuntizyoot. Lhtak'ant'it dzin la hidulh 'ink'ez Gilead whudzulh toh 'et yutasuya.

24 'Et hoontsi'i 'uldzis 'et Laban, Syria whut'en-un, nusuti whe Yak'usda (Elohim) be hóodiltsai 'ink'ez 'uyulhni, "Huwa'oonli Jacob bulh yatalhdih te, hoontsi' te k'us hoonzoo k'un'a te bulh yaoolhduk junih."

25 'Et Laban, Jacob yut'asuya nyo Jacob nimbali nenin'ai dzulh toh, 'ink'ez Laban dulhutsinke tubulh nyo 'et nimbali nehunin'ai Gilead whudzulh whutoh.

26 'Ink'ez Laban Jacob 'uyulhni, "Daint'en whe 'int'en whe nanalh'i'? T'oonusuzun whe 'ink'ez stse'ke cha 'ants'i 'ulhname hubilhchoot saluzti be k'un'a.

27 Di ha 'inja snanto 'et whenatseilya? Soo hoonust'i' 'ink'ez shun be tubulh da', be ts'ujun-i cha nanyutoos'a' oole'.

28 'Aw sye'ke 'ink'ez stse'ke cha 'aw nalhubudusts'oos? 'Et whe tube whuzini whe 'inja 'et ndinja!

29 Soo 'ustus whe 'ust'oh nyunduntasdoh wheni. 'Et hoontsi'i mbá ooYak'usda (Elohim) 'ulhdzis da' sulh yailhduk 'ink'ez 'usulhni, 'Huwinli 'aw ts'ih'un un'a 'uhoont'oh k'us hoontsi' hukw'un'a te Jacob bulh yaoolhduk junih.'

30 'Et 'andit' alha mbá ooyoh kw'eni inli 'inka whenainja. 'Et hoontsi'i di ha nyoo 'uk'eltsi ts'u tenadusdli-i, ts'iyawh 'i dunint'i'?"

31 'Et Jacob 'uyulhni, "Whenuzjut 'et huwa 'usja. 'Et 'udusni, 'Doo ka la ntse'ke nut'i be sgha hanabolyelh,' dusni.

32 Ndun nyak'usda bulh nainla, khun hoona' junih. Nyulhutsinke bunalh ndai la nch'e' nusle-i, ts'iyawh nahuyolts'it 'ink'ez nailhchoot!" 'Aw Jacob t'oonusuzun Rachel dubá ooyak'usdane yundunist'i-i.

33 'Ink'ez Laban, Jacob oonimbali t'ah ts'e whenya, 'ink'ez Leah oonimbali t'ah cha nane yuba 'ut'enne ts'ekoo bunimbali t'ah cha, ts'iyawh nusuya 'ink'ez gak, 'aw nalhe'ileh 'ink'ez Leah oonimbali t'ah tenanja 'ink'ez Rachel oonimbali t'ah daninya.

34 'Et whutsoda' Rachel nyoo oobá 'uk'eltsi yuts'utenadudli-i yilhchoot, 'ink'ez ndi camel yuk'usda-i, 'i ookw'uyuz'ai-i, 'i ye yanla 'ink'ez yuk'etl'adida'. 'Ink'ez Laban dulcho nimbali t'ah nuniztai 'ink'ez 'aw nalhuyilel.

35 'Ink'ez dubá 'uyulhni, "Khun te smoodihti whuts'un dooni' junih, 'aw mbut dudosya' ait'oh, whuz un'a ts'ekoo 'et nduhoont'oh nek'un'a 'ink'ez nuniztai." 'Ink'ez gak 'aw nyoo 'uk'eltsi yuts'u tenadudli-i nalhuyilel.

36 'Et Jacob hunilch'e 'ink'ez Laban hukwa yidani' 'ink'ez Jacob Laban 'ulyuhni, "Ndet whe tank'us 'usja ha sdabe soo hunilch'e whe suntinyoot?"

37 'Et ndinja, snaih toh whe dulcho nunintai. Dant'i nyoh usla 'i nainla? 'I njan nohbut neninle sih, sulhutsin 'ink'ez nyun, nyulhutsin bunalh! 'Et 'enne sih neba nahooyeh nyun 'ink'ez si bulh!

38 Nat whunizyat (20) yus k'ut whuts'un nyulh 'ist'en, 'usbai ts'eke 'ink'ez dube ts'eke, 'aw 'illoh hoonts'i lhuhiyat 'ink'ez 'usbai dune cha 'aw lhus'ulh.

39 Ndai la khuna-i yayidalhch'ulh-i, 'aw ntl'a lhuslel ts'iyawh ook'elha whuzusi, mba k'elha susi-i slak'et whe ntl'a us'ai, dune yudunist'i tila k'us 'ulhdzis tila hidunist'i ts'iyawh.

40 'Et 'ust'oh dzenis whunulwus, chan yit cha 'ink'ez 'ulhdzis cha yaootull-huk 'ink'ez 'aw lhustoh.

41 Nyoh nat whunizyat (20) yus k'ut 'et 'ist'en, whunizyat 'on 'at dit (14) yus k'ut 'et ntse' buk'elha 'ist'en, 'ink'ez lhk'utat (6) yus k'ut cha ndi khuna-i cha ook'elha 'ist'en. Whunizyat (10) 'et ook'elha 'ust'en-un lhelhts'un un'a na'hoonla.

42 Sba ooYak'usda (Elohim) 'ink'ez Abraham ooYak'usda (Elohim) 'ink'ez Isaac be nuzjut-un sulh 'uhoont'oh de, 'et de soo ts'ih'un 'aw slak'et hoonli hooloh whuda' nasutolh'a' oole'. Yak'usda (Elohim) ndet la hukw'endusda-un 'ink'ez sla be 'ist'en-un ts'iyawh hon'en 'ink'ez 'ulhdzis da' hukwa' nyu-dani'!"

### *Laban 'en Jacob yut 'sun ts'ih'un nahizya*

43 'Ink'ez Laban, Jacob 'uyulhni, "Nduonne stse' 'uhint'oh 'ink'ez bubuzkeh cha suzkeh 'uhint'oh, 'ink'ez ndi khuna-i cha sch'e' 'unt'oh. Ndai la nilh'en-i, ts'iyawh sch'e' 'unt'oh, 'et daosneh subah stse'ke k'us bubuzkeh te?"

44 'Et huwa 'anilh khuni 'olneh, nyun si bulh daja datni' lah, 'et t'eeonodzin."

45 'Et Jacob tse 'ilho dilhchoot 'ink'ez 'et neidin'ai.

46 'Et Jacob dulhutsinke 'ubulhni, "Tse nadulhdzoo 'ink'ez tse nahadalhd-zoo' 'ink'ez lhk'ehidinla." 'Ink'ez nyo tse ook'ut 'et na'hit'al.

47 Laban nyoo tse 'uwhulhni, "Jegar Sahadutha," 'et hoonts'i Jacob 'en "Galeed," whulhni.

48 'Et Laban 'en 'utni, "Ndi tse lhk'udizdla-i, 'i nyun si bulh khuni 'ilya-i, 'i oonalh 'uhoont'oh." 'Et huwa Galeed hidoni'.

49 Mizpah 'i cha 'et njan 'uwhulhni, 'et huwa ndutni, "Moodihti (Yahweh) nyun, si bulh ne-eguz nenilh'en lhch'oh 'it'oh te cha.

50 Stse' dzoh nubilhdzut de, k'us 'uyoonne 'atke te ilhchoot de, 'et hoonts'i Yak'usda 'en nyun, si bulh ne-eguz hoonilh'en whe' hoont'oh."

51 'Et Laban, Jacob 'uyulhni, "Ndi tse lhk'udizdla-i, 'i 'ink'ez njan nain'a-i cha nyun, si bulh ne-eguz 'usla-i.

52 Ndi tse lhk'udizdla-i, 'i t'eeoninzun 'ink'ez ndi nain'ai-i cha t'eeoninzun ndi 'aw ba n'un toosya' ait'oh 'ink'ez nyun cha ndiz un'a 'on 'un tonya' ait'oh lhunduntaldah hukwa.

53 Abraham ooYak'usda (Elohim), Nahor ooYak'usda (Elohim) 'ink'ez bubá buYak'usda (Elohim) cha, 'en ne-eguz nahotiyeh." 'Ink'ez Jacob dubá, k'us mbe ye nuljut-un, 'en 'i be nahizya.

54 'Et Jacob nyoo dzulh k'ut 'et khuna-iyaz dalhk'un 'ink'ez dulhutsinke 'uhoo'alh hubulhni. Nyoo ut'alh-i han'al 'ink'ez 'ulhdzis dulyiz whe dzulh k'ut 'et hudalts'i.

55 'Et bundada' 'et 'uda' Laban dudinya 'ink'ez duchaike, dutse'ke tubulh nabudits'ooz, 'ink'ez soo hoonzoo-i za butl'aookat 'i be soo hoonzoo-un be ubulh yalhdruk 'ink'ez whenaja, 'ink'ez duyoh ts'e whenaja.

1 'Et Jacob whenya nts'e tizya ts'e 'ink'ez Yak'usda (Elohim) oolizasne hidudizdil.

2 'Et hubutilh'en whe 'utni, "Njan 'et Yak'usda whut'i-un 'uhoont'oh," 'ink'ez nyo hoozi' 'et Mahanaim whulhni.

3 'Et Jacob dutso khuni nu'ane 'enne dulhutsin Esau whuz whe balh'a', yun k'ut Seir huwhutni-un Edom keyoh.

4 Ink'ez 'ubulhni, "Smoodih Esau nja dudohni", 'Nyunatne 'uten-un Jacob nja dutni, "Laban 'en 'oozih hoost'e' 'ink'ez 'et usda 'andit whuts'un.

5 Khuna-i lhai ust'i, musdoos cha, donkey cha, 'ink'ez dune 'ink'ez ts'ekoo sba 'ut'enne cha, hoonint'i' whe la son'en 'inka nts'un whebis'a'."

6 'Et nyoonne nukhuni nu'ane Jacob highu nandil 'ink'ez 'uhuyulhni, "Nyulhutsin Esau ooghuznindil. Didut cha ndiz nyudutiyalh, dit whunizyat whunizyat (400) 'et 'enne dune hiyulhtidulh."

7 'Et Jacob tubeh nilhjoot 'ink'ez huwuni sulii', dudune' ts'iyawh nawh hidulh whe lkh'ebanla, ndai la khuna-i 'ink'ez musdoos cha ts'iyawh nyokhi camel 'i cha nawh ukulh whe lkh'eyanla.

8 'Ink'ez 'utni, "Esau njan 'ilhooh udulhne bughu ninya 'ink'ez whe buninghan de, 'onghuni 'udun ulh'usi 'ila yuch'a nintaoolghas."

9 'Ink'ez Jacob 'utni, "O sbá Abraham ooYak'usda (Elohim), sbá Isaac ooYak'usda Moodihti (Elohim Yahweh) 'usulhni, 'Nkeyoh ts'e naindadh 'ink'ez nyunatneke buts'un 'et whuz hoonzoo whe 'utanelh mba ootiselh'.

10 'Aw sgha te'ninzun 'ink'ez ts'ih'un khuni be cha sulh yailduk, 'i aw soo ba lhe'uzdzoo' whe 'ust'oh. Mba 'ut'en-un whunilhtan njan 'ukoh Jordan yanusya ndai la stuz cha nustun 'ink'ez nawh udulhne ts'uzdli'.

11 Nts'u tenadusdli sulhuts'in Esau, 'en oola 'i ch'a. 'En be nuzjut doo ka sih ndiz sghu ninya 'ink'ez seooya' 'ink'ez suzkeh buloo tubulh.

12 'Usudini inle', 'Hoonzoo mba ootiselh sudini inle'. Mbene la nts'u haindene yatooba sai 'et 'uhultsuk, 'aw butsolhto ait'oh butalhtselh."

13 'Et 'ulhdzis nyo 'et hantez 'ink'ez ndai la yula k'eyankat-i, 'i dulhutsin Esau yuts'i yilhdulh.

14 Nat whunizyai whunizyai (200) ts'eke dube, 'ink'ez nat whunizyai (20) dune dube, 'ink'ez nat whunizyai whunizyai (200) 'i 'usbai ts'eke, 'ink'ez nat whunizyai (20) 'usbai dune cha.

15 Tat whunizyai (30) nyoo camel uljas-i ooyazke cha, dit whunizyai (40) musdoos, 'ink'ez whunizyai (10) musdoos dune, nat whunizyai (20) donkey ts'eke, whunizyai (10) buzkeh cha.

16 'I nyokhi yuba 'ut'enne tl'ayanla dich'oh whe 'ink'ez yuba 'ut'enne 'ubulhni, "Senghoozuhlil 'ink'ez nilhdza' beguz whuzdla whe ndi whuz nihyulh khunai uh'ulh whe."

17 'Ink'ez 'udechoo khuni yutl'ayan'ai 'uyulhni, "Ndet la sulhutsin Esau nohdudizya 'ink'ez nohoodulhkut de, 'Mbe ch'e' uhli whe 'uht'oh?' nohulhni de, 'ink'ez, 'Nts'e tihdil?' ni de, 'Mbe ooch'e' 'unt'oh ndi nohtso usdla-i?'

18 'Et 'udoohni', 'Mba 'ut'en-un Jacob ooch'e' unt'oh. Oomoodihti Esau ts'otl'ayanla, 'ink'ez whunilh'en 'udek'oh nehuniyalh."

19 'Et 'ulhnane bulh nat, bulh tane cha 'ink'ez khuna-i yunidulhne 'ubulhni, "Et whuz un'a Esau bulh yatilhdulh nalhti de.

20 'Ink'ez 'et cha ndudoohni', 'Whunilh'en nyunatne'ut'en Jacob 'en nek'oh uyah.' 'Et 'uninzun, "Ndi stoo ulh'us, 'i bugha ininla 'ink'ez 'et hukw'elh'az oonin nilh'en de, 'et de sih soo sulh neho'alh."

21 'Et huwa ndi yuts'i tilhdil-i yutso 'uja, 'et hoonts'i didut nyo 'et 'ulhdzis 'et nimbali nenin'ai 'ink'ez 'et hantez.

<sup>22</sup> 'Ink'ez 'et 'ulhdzis dudinya 'ink'ez du'at nahult'oh cha, buba 'ut'enne cha 'ink'ez whunizyane 'on 'at 'ilhune (11) ooye'ke cha, 'et nyo yahunindil 'ukoh.

<sup>23</sup> 'Enne hubilhchoot 'ink'ez 'ukoh whuyaz yahunindil, ndai la yuts'i tilhdulh-i cha.

### *Jacob Yak'usda (Elohim) bulh nulhuhulte*

<sup>24</sup> 'Et Jacob dich'oh za 'et nelts'ut 'ink'ez Dune bulh nulhuhulte, 'et 'ulhdzis nduhoolhyiz yukaih whuts'un.

<sup>25</sup> 'Et nyoon Dune t'ooninzun 'aw Jacob ch'a lhe'ilhdoh, 'et nyoon Dune Jacob bulh nulhuhulte whe Jacob ook'i lhghu nawhudulhghuz-un, 'et yut'aiznai 'ink'ez 'et nyoo Jacob ook'i 'i k'ulkut.

<sup>26</sup> 'Ink'ez ndun Dune, 'en 'et 'utni, "Slanadintnih 'awet hoot'en." 'Et hoonts'i 'uyulhni, "Aw nlanadoosnih ait'oh soo hoonzoo-un bulh 'usinla 'andit za."

<sup>27</sup> 'Et 'uyulhni, "Ndai la nyoozi?" 'Ink'ez 'utni, "Jacob."

<sup>28</sup> 'Et 'utni, "Aw nyoozi on 'un Jacob lhunyodutasnel. Israel nyo dutanelh. Yak'usda (Elohim) 'en bulh nulhuzilti, dune cha, ink'ez 'enne buch'a nilhde."

<sup>29</sup> 'Et Jacob yoodulhkut, "Nts'u tedusdlih, nyoozi 'i sudini?" 'Ink'ez 'et 'utni, "Di ha soozii 'i ooka 'oodilhkut?" 'Ink'ez 'awet whe soo hoonzoo-un oogha whults'ut.

<sup>30</sup> 'Ink'ez Jacob nyoo boozi, "Penuel," whulhni, "Yak'usda soo oonin ts'es us'en 'ink'ez 'aw dalhusnel," ni 'et huwa.

<sup>31</sup> 'Et soo nyoo Penuel yaninya whe 'et sa hain'ai 'ink'ez nunulk'i sulii'.

<sup>32</sup> 'Andit dzin whuts'un Israel oots'u haundene, 'enne nyoo 'uk'i ts'eh tsung 'aw lhuhayus'al, ndun Dune ook'i yut'aiznai 'et huwa, 'ink'ez nyoo oots'eh sugi sulii'.

## 33

### *Jacob 'ink'ez Esau lhghu hudist'az*

<sup>1</sup> 'Et Jacob ndo yutan'en whe dulhutsin Esau 'az de uyalh yutilh'en, dit whunizyai whunizyat (400) dune 'et 'uhultsuk, 'enne hiyulh udulh whe 'et duduzkeh lhk'ebanla, Leah cha, Rachel cha 'ink'ez nyoonne nane buba 'utenne cha butabuninla.

<sup>2</sup> 'Ink'ez ndune ts'ekoo yuba 'utenne 'ink'ez ts'oodunne cha dubut neb-uninla 'ink'ez Leah duduzkeh te ooniz de nebuninla.

<sup>3</sup> 'Et whe butso neninya 'ink'ez yubut nachaniti, lhtak'ant'it 'et yubut nachaniti 'et dulhutsin yuzih neninya.

<sup>4</sup> 'Et hoonts'i Esau 'az de tilhgai, yududilhgai 'ink'ez yilhchoot 'ink'ez yuts'ilchun k'et 'et naidits'ooz 'ink'ez nahult'oh hantse.

<sup>5</sup> 'Ink'ez ndo yutan'en, 'et nyoonne t'sek'oo 'ink'ez ts'oodunne te, 'enne butilh'en 'ink'ez utni, "Ndunee 'enne mbene whe 'hint'oh?" 'Et 'uyulhni, "Yak'usda (Elohim) ye unzoo-i gha mba 'ut'en-un bugha buninla 'uhint'oh."

<sup>6</sup> 'Et nyoonne ts'ekoo natne'ut'enne 'ink'ez ts'oodunne tubulh nus hutizdil 'ink'ez yubut yo 'untutsulh.

<sup>7</sup> 'Ink'ez Leah cha duduzkeh tubulh hibut nenindil 'ink'ez hibut yo 'untutsulh, 'et hukw'elh'az Joseph 'ink'ez Rachel bulh hizih nenin'az, 'enne cha hibut yo untizsel.

<sup>8</sup> 'Et Esau 'utni, "Daja ninzun whe ndi lheltsuk-i nyulh 'uhint'oh?" 'Et 'uyulhni, "I bududisya, 'et de la soo cho sunolh'en smoodih."

<sup>9</sup> 'Et hoonts'i Esau 'utni, "Soo 'ultsuk-i ust'i sulhutsin, ndai la int'i-i nyunch'oh int'i."

<sup>10</sup> 'Et Jacob 'utni, "Awundooh! Slaineh, 'andit 'awet soo sunalh'en, 'et de ndi nts'u tisdil-i ilhchoot ndet la nyis'en whe 'ants'i Yak'usda (Elohim) oonin nus'en sba le'hoont'oh 'ink'ez tubeh hoonint'i whe sunilh'en.

11 Ndi soo hoonzoo-i sgha whults'ut ngha nus'ai-i ilhchoot, Yak'usda (Elohim) tube sts'un nzoo inle' 'ink'ez ts'iyai lhai ust'i." 'Et doo cha 'uyulhni, 'inka yilhchoot.

12 'Et Esau 'utni, "Dugwe' 'awet uztoodilh 'ink'ez ntso sih natoosja'."

13 'Et hoonts'i Jacob 'en 'uyulhni, "Smoodih t'ooninzun ts'oodunne tehut-sun, 'ink'ez ndi khuna-i whulukhi be 'udulhtuk whe 'unt'oh, 'i cha sulh 'unt'oh, 'ink'ez dune tube 'ilhudzin hiniyulh de nyoo khuna-i yaoodlah lah.

14 Whute smoodih! Stso inyalh, mba 'ut'en-un ootso inyalh, 'ink'ez ndune butso toosya' sih nanilhstulya, khuna-i cha 'ink'ez ts'oodunne cha, ndet la buba soo' hoont'oh-un 'ink'ez smoodih keyoh Seir 'et la ooghosya'."

15 'Ink'ez Esau 'utni, "Ndunne sulh nudilhne, oolohne nzih neboslelh." 'Et hoonts'i 'utni, "Smoodih, 'awundooh, soo' hoont'oh! Soo cho sunoolh'en sih."

### *Jacob 'en yun k'ut Canaan ts'un whuz oozya*

16 'Et Esau 'et dzin whenaja keyoh Seir whuts'un.

17 'Ink'ez Jacob keyoh, Succoth huwhutni, ts'e whuz hoozdil. Yoh 'uhoonla 'ink'ez khuna-i ba cha dilhts'i-un 'uhoonla, 'et huwa nyo 'et 'andit Succoth huwhutni.

18 'Et Jacob soo dalhinel whe nyo keyoh whuti, Shechem huwhutni, whuz oozya, Canaan yun k'ut 'et whuz'ai Paddan Aram ts'e hainya, 'ink'ez nyo keyoh whuti 'et yoo 'az ts'e dunimbali nenin'ai.

19 'Ink'ez nyo nimbali nenin'ai-un yun, 'i Hamor buzkeh 'enne bubuyonket. Shechem oobá, whunizyai whunizyat (1000) sooniya 'i k'elha.

20 'Et nyo loodel 'inla 'ink'ez El Elohe Israel\* whulhni.

## 34

### *Dinah 'en bulh dzoh 'uhooja*

1 'Et Dinah, Leah ooyats'e, Jacob ghu yulhtsi inle'-un, nyo ts'ekoo nyoh whut'ine, 'oh whut'ine, 'enne buts'u tizya

2 'Ink'ez Shechem, Hamor ooye', nyo keyoh lerwe ye' unli, yutilh'en whe yilhchoot 'ink'ez yuchant'inte' 'ink'ez ninta' yunilh'en.

3 Oozul tubeh nyoon Dinah ooba yinzoo, Jacob ootse', 'ink'ez tube yuk'entsi' 'ink'ez soo cho yulh yalhduk.

4 'Et Shechem dubá Hamor yulh yalduk 'uyulhni, "Ndun ts'ekeyaz 'en s'at tileh wheni sba ilhchoot."

5 'Et Jacob whulh 'udants'o yutse' Dinah ninta' yunilh'en, 'et whulh 'udants'o 'et nyoonne ooye'ke nus khuna-i bulh 'uhut'en 'ink'ez Jacob 'aw whusanahidil whuts'un lhubudinel.

6 'Et Hamor, Shechem oobá, Jacob yughu ninya yulh yatilhduk huba.

7 'Ink'ez Jacob ooye'ke nus 'uhut'en whe whuz de hanahidil 'ink'ez whulh 'uhudants'o tube buba dzoh sul'i 'ink'ez honilch'e. Lhe'hoont'oh whe k'un'a hukwaya hoonli 'uja, Israel ootse' yuchant'inte', 'aw nduhoneh huba lhe'hoont'oh.

8 'Et hoonts'i Hamor bubulh yalhduk 'ink'ez 'ubulhni, "Sye' Shechem oozul ntse' tube yuk'eni unli oo'at yutaleh wheni oogha inilhtih.

\* 33:20 Ndi boozi', El Elohe-Yisrael, 'i "Yak'usda 'En Israel Whut'enne buYak'usda Ulhtus 'Unt'oh," ni whe 'utni. Ndunne Israel whut'enne k'us Jacob ts'u hainzutne cha hiyulhni, 'en duyun k'ut whuz lhgha nadija tileh. 'Et Yak'usda yuba nahizya hoontsi' whuch'a yughu tileh ooyun k'ut whusanátidalh ha. 'Et Israel buyun k'ut whusanája whe 'ehoninzun Yak'usda soo ultus dich'oh hoontsi' whuch'a bubulhyih. 'Et huwa Yak'usda 'en "El Elohe-Yisrael 'Unt'oh" 'en ndi boozi'. 'Et John 'Uk'unéyuzguz 10:28 Sizi ndutni, "Ilhiz hune khúna, 'i bugha nús'ai. 'Aw yalhahitádsla 'ink'ez 'aw dune yula k'éhaboollehne hooloh." 'Et whuz un'a ndi boozi' "El Elohe-Yisrael" ni whe 'utni.

9 'Ink'ez nebulh lhgho dolhts'i'. Ntse'kene 'enne negha buninle 'ink'ez wheni netse'ke 'enne hubilhchoot.

10 'Et de sih nezih hooht'e' 'ink'ez nyo yun cha 'et us'ai, 'i k'ut hoot'i 'ink'ez hoohtek 'ink'ez e'ookhet. Te'aht'en 'ink'ez nohnich'oh eni nohgha 'oozit sih."

11 'Et Schechem 'en cha Dinah oobá 'ink'ez bulhutsinke 'enne 'ubulhni, "Nohba uszoo oole'. Daja suduhni-un 'et la nohgha ooslelh.

12 Daltsuk ha'nuhzun 'ink'ez nohts'u tisdulh-i. Daja duhni daltsuk-i 'ink'ez ndun ts'ekeyaz s'at tileh huba nulhtih."

13 'Et hoots'i Jacob ooye'ke Shechem 'ink'ez Hamor bulh 'ubuhutni 'ink'ez whunut'ih 'i be bubulh yahulhduk, nyoon dudulhtus Dinah ninta' inilh'en 'inka.

14 'Ink'ez 'ubuhutni, "Aw 'et duts'ooneh ait'oh, 'aw neulhtus 'aw yuka dune lhitus-un gha ts'oolhtelh ait'oh. Wheni neba hukwaya hoonli whe' hoot'oh.

15 'Et njan 'ilhughun huwa 'et de a'ah usdutinelh nek'un'a 'utant'elh, dune ts'iyawh yuka dune unli-un hubotitus.

16 'Et de la netse'ke nohgha buts'olelh 'ink'ez nohtse'ke hubuts'italhchulh 'ink'ez nohzih ts'otitelh 'ink'ez 'ilhoghun yinka dune'ne uztileh.

17 'Et 'aw lhunedahs'il de, 'ink'ez nohka dune uhli-i nohuzt'us de, 'et de ndun neulhtus nats'italhchulh 'ink'ez naztidulh."

18 'Et ndi khuni 'i tube buba yinzoo Hamor 'ink'ez ooye' Shechem 'en cha.

19 'Et nyoon chilh 'ahoh 'et duja nyoon Jacob ootse' ooba yinzoo 'inka 'onus huwa 'it'en-un 'uja oobá ooyoh dilhts'ine buba nus.

20 'Ink'ez Hamor 'ink'ez Shechem ooye' te nyo keyoh whudatih 'et nehunindil 'ink'ez nyo keyoh whudune'ne bubulh yahulhduk.

21 "Ndunne dune nebulh soo dune hinli whe' hint'oh, 'et huwa njan yun k'ut huhoht'e' 'ink'ez 'uhooket te'hoht'en, ndi yun soo 'ulcho whe 'unt'oh. Butse'ke 'enne buts'olhchoot ne'atke wheni, 'ink'ez wheni netse'ke bugha buts'olelh.

22 Njan 'ilhoghun 'et za nduts'uja te, 'andit za dune neulh dune hutileh, whe 'ilho ts'utileh. 'Et ndun nedune 'enne ts'iyawh hika dune unli 'i ook'ut ts'oot'us, 'et didut ts'iyawh nduhint'oh.

23 Ndi bughuna' huyut'i-i cha 'ink'ez khuna-i ts'iyawh nech'e' tileh? 'Ants'i a'ah uzdoonih 'et de la nebulh dune hoole'."

24 'Et nyo keyoh whuti tenindilne ts'iyawh Hamor, Shechem bulh ooye', hubodants'o, dune ts'iyawh yuka dune unli-i bubuhuzt'us, nyo keyoh tenindilne.

25 'Et 'uhooja whulh tat dzin ts'iyawh bubulh 'ults'ulh, nane Jacob ooye'ke Simeon 'ink'ez Levi bulh Dinah bulhutsin, saluzti huyilhchoot 'ink'ez soo ts'tet 'et nyo keyoh whuti dune ts'iyawh hubuhangan.

26 'Ink'ez Hamor 'ink'ez Shechem ooye', 'enne cha saluzti be bubozilhghi 'ink'ez Dinah Shechem ooyoh 'et tenahinilhti 'ink'ez tenahundil.

27 Jacob ooye'ke ndunne huba hanghanne buzih nehunindil 'ink'ez nyo keyoh cha ts'iyai hilhchoot, bubulhtus ninta' hinilh'en 'et hukwa.

28 'Et nyoo dude'usbai, musdoos dune cha 'ink'ez khuna-i donkey cha, 'ink'ez nyo keyoh usla-i cha nus yun k'ut usla-i cha ts'iyawh huyilhchoot.

29 'Ink'ez huye hoonzoo' 'unt'oh-i cha ts'iyawh huyilhchoot. Ntsoolneyaz 'ink'ez bu'atke cha hubuhilhchoot, 'ink'ez ndai la yoh usla-i cha ts'iyawh huyilhchoot

30 'Et Jacob 'en Simeon 'ink'ez Levi 'en ndo 'ubulhni, "Tube sba dzoh 'uhja! Ndunne dune ndoh whut'ine buba skalh'ehunizun suli'. Canaan whut'enne 'ink'ez Perizz whut'enne, tube wheni ts'intsool whe' ts'int'oh,

ts'iyawh 'ilhohozdil 'ink'ez la sch'az nehudindil 'ink'ez la sozoolhghel. Gak sotilhtselh syoh whut'ine cha, si cha."

<sup>31</sup> 'Et hoonts'i 'uhutni, "Neulhtus 'ants'i 'ul'enne k'un'a ne'uztilh'en?"

## 35

### *Jacob 'en Bethel ts'un whenaja*

<sup>1</sup> 'Et Yak'usda (Elohim) 'en Jacob 'uyulhni, "Dudinyaih 'ink'ez Bethel ts'e inyalh 'ink'ez 'et hont'e' sih. 'Ink'ez Yak'usda (El) nyunalh hainya inle', 'en ts'un loodel 'onleh, nyulhutsin Esau ooch'a tse tilya whe."

<sup>2</sup> 'Et Jacob, yulh dune unline yulh whut'ine, 'et 'ubulhni, "Nyo 'udun keyoh lhelhyoo 'uyak'usdane buts'u tenaduhdli, 'udun nenuhle, nohtsun hooloh nadudulhtsih 'ink'ez nohnaih cha lhk'enaduhle.

<sup>3</sup> 'Ink'ez duzdodilh, 'ink'ez Bethel ts'e uztdodilh. 'Et Yak'usda (El) ts'un loodel 'oosleh sih, mbe la dzin dzoh nuzut-un sulh 'ut'en whe whesya."

<sup>4</sup> 'Ink'ez nyoo 'uts'un keyoh whut'enne, dant'i 'uk'eltsi yak'usda hitsun tenadudli-i nuhuyule-i, 'i ts'iyawh Jacob tl'ahuyanla, 'ink'ez dudzo gwul cha ts'iyawh 'ink'ez Jacob nyo duchun, oak huyulhni, 'i yucheh 'ahuyanla.

<sup>5</sup> 'Ink'ez nahutisdil 'ink'ez Yak'usda oonujut-i, 'i ts'iyawh nyo keyoh whuti bukeidilts'ut, 'aw Jacob ooye'ke lhubontiyulh.

<sup>6</sup> 'Et Jacob 'et Luz (Bethel huwhutni-un) whuz oozya, Canaan yun k'ut mbene la yulh nudilhne cha ts'iyawh.

<sup>7</sup> 'Ink'ez 'et loodel 'inla, 'ink'ez nyo 'et El Bethel whulhni, 'et Yak'usda nghu ninya inle', bulhutsin ch'a tse tilhya whe.

<sup>8</sup> 'Et Deborah, Rebekah yuba ne'ut'en-un, dazsai. Nyo Bethel 'on yo nyoo duchun oak ndi 'i hicheh 'ahuyalhti. 'Et Allon Bacuth huwhutni.

<sup>9</sup> 'Et Yak'usda (Elohim) Jacob doo cha yunalhts'et hainya, whutso da' Padan Aram ts'e hainya whe soo hoonzoo-un oogha whults'ut.

<sup>10</sup> 'Ink'ez Yak'usda (Elohim) 'uyulhni, "Nyoozi' Jacob ts'utni, 'aw 'on 'un Jacob be nts'iyoz'i ait'oh, Israel 'i nyoozi' tileh." 'Et whe booz'i 'i Israel yulhni.

<sup>11</sup> 'Ink'ez 'et cha Yak'usda (Elohim) 'uyulhni, "Si Yak'usda 'Uk'enus 'Ultus-un (El Shaddai) 'en 'ust'oh. Lhai cho nts'u haookat 'ink'ez lhai cho oole' didohne 'ink'ez dune didohne ts'iyawh 'enne nts'u hahutidoh, 'ink'ez lerwene 'enne nyust'e ts'u hahutidulh.

<sup>12</sup> Yun Abraham 'ink'ez Isaac bulh bugha inus'ai-i, 'i ngha nus'ai. Nts'u haindene nk'elh'azne, ndi yun nohgha nus'ai."

<sup>13</sup> 'Et whe Yak'usda (Elohim) 'en ndo yuch'a whenaja, nts'e yulh yailhduk inle' 'et.

<sup>14</sup> 'Et Jacob tse whedintsi Yak'usda (Elohim) bulh yailduk-un, tse lhk'eidinla-i 'i nayantsi. 'Ink'ez ts'utnai-i 'i ook'ut 'i yuk'eyilhdzo 'ink'ez khe cha yuk'eyilhdzo.

<sup>15</sup> 'Ink'ez nyo 'et Yak'usda yulh yailhduk-un, Bethel whulhni.

### *Rachel dazsai*

<sup>16</sup> 'Et hutizdil Bethel whuch'a usdil 'ink'ez Ephrath 'awet nilhdukwyaz, 'et Rachel 'awet ooyaz whutaleh bulh 'utilhtsul 'ink'ez tube ooba hoontsi'.

<sup>17</sup> 'Et 'uhooja bulh 'ults'ulh whe nyoon yughunli-un 'uyulhni, "Wheniljut ilhoh, ndun 'en cha dune nyaz tileh."

<sup>18</sup> 'Et 'uhooja 'awet dawhenintsai whe 'et ndun duneyaz Ben-Oni yulhni, 'et hoonts'i oobá 'en Benjamin yulhni.

<sup>19</sup> 'Et Rachel dazsai 'ink'ez Ephrath ts'u wheti-un ('et Bethlehem 'uhoont'oh), 'et 'ahuyalhti.

<sup>20</sup> 'Ink'ez tse lhk'edinla nyo yunts'un k'ut, 'et 'andit dzin whuts'un Rachel oots'un k'ut huwhutni.

<sup>21</sup> 'Et Israel tizya 'ink'ez Eder whuzih nain'a zih, 'et dunimbali neinin'ai.

<sup>22</sup> 'Et 'uhooja Israel nyo yun k'ut hoot'e' whe Reuban 'en Bilhah nyoon oobá oo'at 'en yugha nyus 'unt'oh, 'en yuchant'inte' 'ink'ez Israel whulh 'udants'o. 'Ink'ez Jacob ooye'ke ts'iyawh whunizyane 'on 'at nane hinli.

*Jacob whunizyane 'on 'at nane (12) ooye'ke*

<sup>23</sup> Leah ooye'ke,

'enne Reuben, Jacob 'udechoo ooye',

'ink'ez Simeon, Levi cha, Judah, Isaachar 'ink'ez Zebulun.

<sup>24</sup> Rachel ooye'ke,

'enne Joseph 'ink'ez Benjamin.

<sup>25</sup> Bilhah ooye'ke, Rachel yuba 'ut'en-un,

Dan 'ink'ez Naphtali.

<sup>26</sup> Zilpah, Leah yuba 'ut'en-un,

ooye'ke dune Gad 'ink'ez Asher hubuhutni.

'Enne ts'iyawh Jacob ooye'ke, Paddan Aram whut'i whe.

<sup>27</sup> 'Et Jacob, dubá Isaac, yughu ninya. Mamre k'ut Kirjath Arba huwhutni, (Hebron 'uhoont'oh), ndet la Abraham 'ink'ez Isaac bulh huhoot'en-un.

<sup>28</sup> 'Et Isaac 'en 180 yus k'ut yinka inda'.

<sup>29</sup> 'Et Isaac 'udek'ez hanaji 'ink'ez dazsai, 'ink'ez whutsoda' hubulh 'ant'e'ne, 'enne buts'un whenya. Tube duneti 'ink'ez lhat dzin cha be yus k'ut. 'Ink'ez ooye'ke Esau 'ink'ez Jacob bulh 'ahuyalhti.

## 36

*Esau ts'u haindene*

<sup>1</sup> Ndi 'i Esau ts'u haindene ghun, Edom huyulhni.

<sup>2</sup> Esau ts'ekoo Canaan whut'enne but'oh 'enne du'at eni hubilhchoot. Adah 'en Elon ootse', Hitt whut'en-un 'unt'oh, Aholibamah, Anah ootse' Zebeon, Hiv whut'en-un 'en ootse',

<sup>3</sup> 'ink'ez Basemath, Ishmael ootse', Nabajoth bulhtus.

<sup>4</sup> 'Et Adah, Eliphaz yulhtsi, Esau ghu yulhtsi 'ink'ez Basemath, Reuel sulhtsi.

<sup>5</sup> 'Ink'ez Aholibamah, Jeush sulhtsi, Jalam 'ink'ez Korah cha, 'en Esau ooye'ke, Canaan yun k'ut whut'i whe.

<sup>6</sup> 'Et Esau du'atke, duye'ke, dutse'ke 'enne mbene la yuyoh whut'ine, ts'iyawh musdoos cha 'ink'ez khuna-i, ndai la yut'i-i oogha ininde-i Canaan okhi yilhchoot 'ink'ez dulhutsin Jacob yughu whenya.

<sup>7</sup> Ndai la huyut'i-i sdabe 'onus lhai suli', 'aw lhzih huhoot'e' ait'oh 'ink'ez nyo yun t'ehonuszun-un huwhut'i-un 'et cha 'aw nahult'oh hik'uhuna-i 'uhoolh'en ait'oh, khuna-i lhai huti k'et.

<sup>8</sup> 'Inka Esau 'en Mt Seir 'et whut'i, Esau 'en Edom 'unt'oh.

<sup>9</sup> 'Ink'ez ndi 'i Esau ts'u haindene Edom whut'enne bubá, Mount Seir huwhut'i.

<sup>10</sup> Ndi 'i Esau ooye'ke buboozi',

Eliphaz, Adah ooyaz Esau oo'at 'ink'ez Reuel, Basemath, Esau oo'at cha.

<sup>11</sup> 'Ink'ez Eliphaz ooye'ke,

'enne Teman, Omar, Zepho, Gatam 'ink'ez Kenaz.

<sup>12</sup> 'Et Timna 'en Eliphaz oo'at 'en yugha nyus 'unt'oh, 'en Esau ooye', 'ink'ez 'en Amelek yughu sulhtsi, 'enne Adah, Esau oo'at buzkeh.

<sup>13</sup> Ndunde 'enne Reuel ooye'ke:



Nehath, Zerah, Shammah 'ink'ez Mizzah. 'Enne Basemath Esau oo'at buzkeh.

- 14 Ndunne 'enne Aholibamah ooye'ke, Esau oo'at, Anah ootse', Zibeon ootse'.  
'En Esau, Jeush, Jalam 'ink'ez Korah 'en yughu bulhtsi.
- 15 Ndunne 'enne Esau ooye'ke moodih hubuhilh'i,  
Eliphaz ooye'ke, Esau 'udechoo ooye' inle',  
'en dayi Teman, dayi Omar, dayi Zepho 'ink'ez dayi Kenaz,  
16 dayi Korah, dayi Gatam 'ink'ez dayi Amalek.  
'Enne Eliphaz oodayi hinli, Edom yun k'ut.  
'Enne Adah oots'u hainzutne 'uhint'oh.
- 17 Ndunne 'enne Reuel ooye'ke, Esau ooye':  
dayi Nahath, dayi Zerah, dayi Shammah ink'ez dayi Mizzah. 'Enne Reuel  
oodayi Edom yun k'ut ndunne 'enne Basemath Esau oo'at buzkeh.
- 18 Ndunne 'enne Aholibamah Esau oo'at buzkeh:  
dayi Jeush, dayi Jalam 'ink'ez dayi Korah 'enne Aholibamah ts'u hahande  
Esau oo'at, Anah ootse'.
- 19 Ndunne 'enne Esau ooye'ke Edom 'unt'oh, 'ink'ez ndunne 'enne budayi  
hanle'.

### *Seir ooye'ke*

- 20 Ndunne 'enne Seir, Hor whut'i-un ooye'ke 'enne ndi yun k'ut huwhut'i:  
Lotan, Shobal, Zibeon 'ink'ez Anah,  
21 Dishon, Ezar 'ink'ez Dishan. 'Enne Hor whut'enne budayi, Seir ooye'ke  
Edom yun k'ut.
- 22 'Ink'ez Lotan ooye'ke:  
'enne Hori 'ink'ez Heman, Lotan bulhtus 'en Timna huyulhni.
- 23 Ndunne 'enne Shobal ooye'ke:  
Alvan, Manahath, Ebal, Shepho 'ink'ez Onam.
- 24 Ndunne 'enne Zibeon ooye'ke:  
Aiah 'ink'ez Anah bulh, ndun Anah 'en 'uja chunt'oh duba donkey  
nulhyeh whe too k'et nahoon'ai.
- 25 Ndunne Anah buzkeh:  
Dishon 'ink'ez Aholibamah, Anah ootse'.
- 26 Ndunne 'enne Dishon ooye'ke:  
Hemdan, Eshban, Ithran 'ink'ez Cheran.
- 27 Ndunne 'enne Ezer ooye'ke:  
Bilhan, Zaavan 'ink'ez Akan.
- 28 Ndunne 'enne Dishan ooye'ke:  
Uz 'ink'ez Aran.
- 29 Ndunne 'enne Hor whut'enne whudayi:  
dayi Lotan, dayi Shobal, dayi Zibeon, dayi Anah,  
30 dayi Dishon, dayi Ezer, 'ink'ez Dishan, 'enne Hor whut'enne whudayi  
hinli, Seir yun k'ut 'et.

### *Edom budayicho*

- 31 'Et ndunne 'enne lerwene Edom yun k'ut 'et hudalts'i', 'aw Israel buzkeh  
whutsoda'ne bulerwe hooloh.  
32 Bela, Beor ooye' Edom 'et whulerwe inle', 'et nyo keyoh whuti 'et  
Dinhabah huwhutni.
- 33 'Ink'ez Bela dazsai whe Jobab, Zerah, Bozrah whut'en-un ooye', 'en lerwe  
inle' yuk'edanya.
- 34 'Et Jobab dazsai whe Teman whut'enne bulerwe Husham huyulhni, 'en  
yuk'edanya.

- 35 'Et Hasham dazsai whe Hadad, Bedad ooye' 'en la Midian neninya whe whelhonigan Moab yun k'ut, ha'nuyeh-un, whe hubuch'a' nilhde, 'en yuk'edanya nyo 'et keyoh Avith huwhutni.
- 36 'Et Hadad dazsai whe Samlah, Masrekah whut'en-un, 'en yuk'edanya.
- 37 'Ink'ez Samlah dazsai whe Saul, Rehoboth-Ukoh-Taba whut'en-un, 'en yuk'edanya.
- 38 'Et Saul dazsai whe Baal-Hanaan, Achbor ooye' 'en yuk'edanya.
- 39 'Et Baal-Hanaan, 'Achbar ooye', dazsai whe Hadar 'en yuk'edanya. Nyo 'et keyoh 'et Pau huwhutni. Oo'at boozi' 'i Mehetabal, Matred ootse' 'en Mezahab ootse' 'unt'oh.
- 40 Ndi 'i Esau oodayine buboozi' nts'en'a lah didohne 'ink'ez huwhut'ine buboozi':  
dayi Timnah, dayi Alvah, dayi Jetheth.
- 41 dayi Aholibamah, dayi Elah, dayi Pinon,
- 42 dayi Kenaz, dayi Teman, dayi Mibzar,
- 43 dayi Magdiel, 'ink'ez Iram.  
'Enne Edom whudayi 'ink'ez nyo yun k'ut huwhut'ine 'ink'ez buch'e' cha,  
Esau 'en Edom whut'enne bubá 'unt'oh.

## 37

### *Joseph hooncha huwunute*

- 1 'Et Jacob nyo Canaan yun k'ut 'et whut'i 'et 'aw oobá t'enuszun.
- 2 Jacob nts'oh tune'ust'en: Joseph 'en whunizyat 'on 'at lhtak'ant'it be yus k'ut (17) 'et nus khuna-i gha' un'aih dulhutsinke tubulh, bubulh 'ut'en nyoonne bulhutsinke 'enne Bilhah buzkeh 'ink'ez Zilpah buzkeh cha, oobá oo'atke, 'enne bubulh 'ut'en 'ink'ez Joseph dubá 'en yulh nahoolnuk tank'us ne'hut'en huwun.
- 3 'Et Israel, Joseph 'onghunne duzkeh buba nus yuk'entsi'. 'Udek'oh ooye' 'ink'ez duneti whe ooye' yuzdli' 'et huwa, 'ink'ez dzoot yuba 'inla, lhelhts'un 'ot'en-i 'i dzoot yuba' yinla.
- 4 'Et bulhutsinke dalcho-i be la bubá Joseph yuk'entsi' huwhunilh'en, 'inka hits'u dutni 'ink'ez 'aw soo cho hiyulh yalhulhduk.
- 5 'Et Joseph nusuti 'ink'ez dulhutsinke bubulh nahoolnuk. 'Et 'onus hits'u dutni suli'.
- 6 'Et 'ubulhni, "Ndi oowanususti-i oozulhts'ai.
- 7 'Et ats'o nus lhes hananyai-i, 'aw lhdunilt'o whe be ne'ts'udulhch'uz 'ink'ez ndi lhadusla-i 'i ats'o do 'uja 'ink'ez ants'i usyin le'unt'oh, 'ink'ez be ne'dilhchus-i nohch'e' 'i ndi lhadusla-i 'i hinadilhya 'ink'ez hibut yo untutsulh."
- 8 'Ink'ez bulhutsinke 'et 'uhuyulhni, "Nelerwe tanleh whe 'udini 'ink'ez nemoodih tanleh whe 'udini?" 'Et ts'o 'onus hits'u dutni nute-un huwa 'ink'ez ooghuni cha huwa ts'iyawh hits'u dutni.
- 9 'Et doo cha 'udun huwunusuti 'ink'ez dulhutsinke hubudani' 'ink'ez 'utni, "Whunulh'en doo cha 'udun huwunusuti. 'Andit ndi dzenis ooza' 'ink'ez 'ulhdzis ooza' cha 'ink'ez whunizyai 'on 'at 'ilho sum, 'i cha sbut yo 'uhuntutsulh."
- 10 'Et dubá yudani' 'ink'ez dulhutsinke cha budani' 'ink'ez oobá hukwa' yundani' 'ink'ez 'uyulhni, "Dainja whe 'inja? Ndiz un'a nusinti nloo 'ink'ez si cha 'ink'ez nyulhutsinke ts'iyawh mbut yo untitsulh whe' dini?"
- 11 'Ink'ez bulhutsinke highe 'oolnih 'ink'ez oobá 'en 'ants'i huwu nuninuzut za 'unt'oh.

### *Joseph 'en bulhutsinke hiye'onket*

12 'Et bulhutsinke bubá ooghuna' Shechem ts'e higha' ti'alh ha whuz whehandil.

13 'Ink'ez Israel, Joseph 'ulhni, "Nyulhutsinke Shechem ts'e whuz khuna-gha' hu'aih. 'Anih whuz nyutoos'a sih!" 'Et 'uyulhni, "A, njan susda."

14 'Et whe Israel 'uyulhni, "Sla 'ineh whe, inyalh nyulhutsinke soo 'uhint'oh whe, khuna-i cha soo 'unt'oh whe, 'ink'ez khuni 'i whuz sba naton'alh." 'Et whe njan Hebron whenkoh 'et wheyalh'a' 'ink'ez Shechem ts'e whenya.

15 'Et 'uyoon dune Joseph nayilhti 'ants'i nus 'et ats'o nus lhelhts'oyalh 'ink'ez dune 'uyulhni, "Di huninta whe 'int'en?"

16 'Et utni, "Sulhutsinke bukunusta whe 'ust'en. Sudini nts'e suba khuna-i gha' hun'aih."

17 'Et dune 'utni, "'Utsun whehandil whe 'hint'oh. 'Dothan nts'ez uztoodilh,' hutni whe 'et hubudasts'o.'" 'Et Joseph whuz buba whenanya 'ink'ez Dothan 'et nabinla

18 'Et 'az de uyalh hitilh'en whe lhahodinla hituzilhghelh-un.

19 'Et 'ulhodutni, "Nyoon nute-un 'az de uyalh.

20 'Et huwa 'andit ts'uzoolhghel' 'ink'ez tsak'et 'ats'ooneh! 'Ink'ez la 'uzdooni', 'Khuna-i yellhoh,' uzdooni' la, huwunute-un dahoneh subah!"

21 'Et hoonts'i Reuban budants'o 'ink'ez bula k'ehayalhti 'ink'ez 'utni, "'Aw lhts'uzoolhghelh."

22 'Ink'ez Reuban 'ubulhni, "'Aw buzkaih hoolhtselh junih! 'Ants'i njan tsak'et 'et 'atsoolhtel, chunt'oh 'uhoot'oh, 'aw ootalhizohnal.'" 'Et de la yoolhyih 'ink'ez dubá ts'un naitoolhtel, 'inka 'utni.

23 'Et 'uhooja Joseph dulhutsinke bugha ninya whe nyoo dzoot huye hayalhti, nyoo dzoot lhelhtsun 'ot'en-i.

24 'Et huyilhchoot 'ink'ez nyo tsak'et 'et 'ahuyano, nyo tsak'et 'aw too hooloh.

25 'Ink'ez natl'ahudilts'i 'uhuti'ulh wheni, 'et do hitan'en whe 'az de Ish-mael whut'enne 'az de hidulh, Gilead ts'e hahandil. Camel dunt'i-i khuna-i cha ts'iyawh bulh, bulh buta'whut'en-i, lhai cha huyilelh, 'ink'ez balm 'ink'ez myrrh huyulhni, ndunt'i-i cha Egypt ts'e huyutizdla.

26 'Et Judah dulhutsinke 'ubulhni, "Di suba negha ookat neulhutsin ts'uzilhghi 'ink'ez buzkai' ts'untill'i de?

27 'Anih nyoonne Ismael whut'enne 'az de udulhne, 'enne be buts'e' ts'oket, 'aw kw'elhts'udolhni, neulhutsin 'unt'oh, 'ink'ez neyust'e cha unli.'" 'Et bulhutsinke huyoozalhts'ai'.

28 'Et ndunne Medianne 'ooketne 'owhuya hidulh, 'et bulhutsinke Joseph nyo tsak'et hanahuyalhti 'ink'ez nyoonne Ismail whut'enne, 'enne nat whunizyai (20) silver, 'i k'elha huye 'onket 'ink'ez nyoonne Joseph huyilhchoot 'ink'ez Egypt ts'e whehuyalhti.

29 'Et Reuban nyo tsak'et whuz naosja 'ink'ez Joseph 'aw nyo tsak'et hooloh, 'et dunaih yayidalhch'ul.

30 'Ink'ez dulhutsinke bughu nanja 'ink'ez 'utni, "Duneyaz 'awet hooloh sul!' Nts'e subah toosya?"

31 'Et nyoo Joseph oodzoot huyilhchoot 'ink'ez dúbe ntsool-iyaz, 'i hizilhghi 'ink'ez nyoo dzoot 'i buzkaih hiye tunahuyulhchooz.

32 'Et ndi dzoot lhelhts'un 'ot'en-i, 'i bubá hits'u nahuyoolhchooz 'ink'ez 'uhutni, "Ndi nats'ilhchooz nye' oodzoot tila 'unt'oh k'us 'awundooh tilah?"

33 'Et nayoolhts'it 'ink'ez 'utni, "'Sye' oodzoot 'unt'oh! Khuna-i 'ants'i yellhoh, 'aw nawh lhe'hoot'oh Joseph yabe' yidalhch'ul."

34 'Et Jacob dunaih yayidalhch'ul 'ink'ez doso 'i duts'itoh nayuzguz, 'ink'ez duye' lhatdzin whe yuk'eninudleh.

<sup>35</sup> 'Et ooye'ke 'ink'ez ootse'ke cha ts'iyawh k'enahino'ah kwa' hut'en. 'Et hoonts'i 'aw k'enahino'ah ait'oh 'ink'ez 'utni, "Nyo sts'un k'ut ts'e tisyalh, sye' ook'eni untisleh." 'Ink'ez oobá yuk'etso.

<sup>36</sup> 'Et nyoonne Median whut'enne, yun k'ut Egypt ts'e, nyoon Potiphar huyulhni, 'en ts'un huye 'onket. 'En Pharaoh lhuganne moodih, nyo huwun-line bumoodih cha unli.

## 38

### *Judah 'ink'ez Tamar*

<sup>1</sup> 'Et owhuya whudizulh whe Judah dudulhutsin bughu tizya 'ink'ez dune Adullam whut'en-un, Hirah huyulhni, 'en yughu hato ts'e whenya.

<sup>2</sup> 'Et nyo Judah Canaan whut'en-un, 'ilhoghun ootse', 'en yunilh'en, Shua huyulhni, 'ink'ez yughusda 'ink'ez yuchant'inte'.

<sup>3</sup> 'Et ulchan 'ink'ez duneyaz sulhsti 'ink'ez boozii Er yulhni.

<sup>4</sup> Doo cha za ulchan 'ink'ez doo cha za dune ooyaz suli'. 'Et boozii Onan yulhni.

<sup>5</sup> 'Et doo cha za ulchan 'ink'ez duneyaz ooyaz suli'. 'En boozii' Shelah yulhni. Chezib keyoh huwhutni-un, 'et nyoon ooba 'et 'ut'en whe yulhsti.

<sup>6</sup> 'Et Judah duyaz 'udetso-un, 'en ba ts'eke yughu tidalh ha yilhchoot. Ndun ts'eke boozii Tamar huyulhni.

<sup>7</sup> 'Et hoonts'i Judah ooye' 'udetso Er, 'en Moodihti (Yahweh) bunalh whe ninta' ut'ih, 'ink'ez Moodihti (Yahweh) 'en Er yuzilhghi.

<sup>8</sup> 'Ink'ez Judah 'en Onan 'uyulhni, "Nyulhutsin oo'at ilhchoot 'ink'ez ooghu sinda, 'ink'ez nyulhutsin yuk'edutiyaalh-un oole' sih."

<sup>9</sup> 'Et Onan t'eeoninzun 'et ndun-un ts'oodun hotileh de, 'en 'aw didut ooyaz lhiloh. 'Ink'ez Er ndai yut'i 'i 'aw oogha ilhtaskulh. 'Et huwa 'et njan duhooja whe hukw'elh'az dulhutsin oo'at ts'un daninya whe yuchantinte'. 'Ink'ez ooch'a 'uhooja, 'i yun k'uz ts'e whenluz, dulhutsin yuba ts'oodun tit'elh whuch'a.

<sup>10</sup> 'Ink'ez njan 'et duja-un, Moodihti (Yahweh) tube whuts'u dutni 'inka 'en cha yuzilhghi.

<sup>11</sup> 'Et Judah duyas'at Tamar 'uyulhni, "Mbá ooyoh 'et sinda 'ink'ez tsandilh za inli, ndun sye' Shelah untiyeh whuts'un." 'Ink'ez 'utni, "Doo ka sih dulhutsinke k'un'a daootsah." 'Ink'ez Tamar dubá ooyoh ts'e whuz whutitelh ha whenya.

<sup>12</sup> 'Et whe nduhooja hukw'elh'az Shua ootse', 'en Judah oo'at, 'en dazsai 'ink'ez Judah k'enahinu'ah. 'Ink'ez be 'usbai hat'asne buts'un keyoh Timnah 'et, didut 'ink'ez yulh dune Hirah, 'en Adullam whut'en, 'en bulh, ndo whuz whe han'az.

<sup>13</sup> 'Et Tamar hiyulh nahoolnuk, 'uhuyulhni, "Whunilh'en nzaz, Timnah ts'e tiyalh 'usbai hatit'us wheni."

<sup>14</sup> 'Et nyoo tsandilh naih ye dune unli-i, ye hanaja 'ink'ez ne'dilbal, 'ink'ez kha'osduz. 'Ink'ez ts'et, Timnah ts'uwhuti-un, 'et usda. Shelah 'awet nizyai yunilh'en 'ink'ez 'awhuz oo'at tileh wheni yugha lhiyulhti 'inka.

<sup>15</sup> 'Et Judah yutilh'en, 'ul'en-un 'unt'oh yuninzun, dunin k'e'nilhbal 'et huwa.

<sup>16</sup> 'Et yughu ninya 'ink'ez 'utni, "Nzih ooste'." 'Aw nyoon duyas'at 'unt'oh 'aw t'eeonuzun. 'Et ts'eke 'utni, "Di sgha tan'alh 'et de szih tantelh?"

<sup>17</sup> 'Ink'ez 'utni, "Dúbe ntsool-i 'ilho 'i nts'o t'atistelh." 'Ink'ez ts'eke 'utni, "Sts'u nahitanyeh eh, sts'otl'atalhtelh whuts'un?"

18 'Et Judah 'utni, "Di suba 'et ngha oos'alh be nts'un nahitasyeh-i?" 'Et nyoon ts'eke 'utni, "Nyoo latult'o nyoozi' be, 'ink'ez nyoo tuz nintun-i cha." 'I ts'iyawh yugha ininla 'ink'ez yuzih inte' 'ink'ez ulchan.

19 'Et dudinya 'ink'ez 'uts'un whenya. Dunin k'einizbal-i cha k'unaitilhalbh, 'ink'ez doo cha tsandilh unli-i naih ye naja.

20 'Ink'ez Judah dube ntsool-i dut'eke Adallam whut'en-un, 'en whuz yuts'u wheyalhti ts'eke 'ink'ez ye yuts'u nahizya-i cha 'et hoonts'i 'aw nayolhtelh ait'oh.

21 'Et nyoonne 'et whudune'ne buboodulhkut, "Nyoon 'ul'en-un, nyoo ti whuzih usda-un, nts'e whenya?" 'Et 'uhuyulhni, "Aw njan 'aw 'ul'enne hooloh whe' hoont'oh."

22 'Ink'ez Judah ts'un naoosja 'ink'ez 'uyulhni, "Aw naoostelh ait'oh 'ink'ez nyo 'et whut'enne 'enne 'uhutni, "Aw nyo 'ul'enne hooloh, 'hutni."

23 'Et Judah 'utni, "Whute, duba yoolhchoot, ndi doo ka sih yooya ts'oole'. Ndi dube oots'otl'ayisti 'ink'ez 'aw nalhilhtel."

24 'Et whudizulh whutoh ta sanun inle' at'en, 'et Judah hiyulh nawhulnuk, "Tamar nyas'at 'ul'en-un na'dudalhtsi 'ink'ez 'ul'en whe ulchan." 'Et Judah 'utni, "Tenulhtih 'ink'ez hidolhk'un!"

25 'Et tenhinilhti whe 'et duzaz yuts'o t'ahunin'ai, "Ndi mbe dune oowuzchan-un, 'en ooch'e' unt'oh, ndi latult'oh, booz'i' be t'oolhyaz 'ink'ez tuz cha."

26 'Et Judah 'utni, "A, sch'e' 'unt'oh. Sanus ts'ih'un ne'ut'en, 'aw sye' Shelah oogha lhuyustel'et huwa." 'Ink'ez 'on 'at 'aw t'enalhinidzil.

27 'Et 'awet whudizulh whe 'awet 'ulhtsi whe nane ts'oodunne bulhtsi.

28 'Et nyo 'awet whe bulh utiltsut whe ilhoghun 'en oola cho ilt'ai. 'I nyoo ts'eke yughunli-un 'ugha batse' dulk'un-i, 'i yulasga ye yulchuz 'ink'ez 'utni, "Nduun 'en 'udechoo whuzdli."

29 'Et 'uhooja dulayaz 'udun nenadilni whe bulhutsin ookwatselhuhoodli whe 'en cha whuzdli. 'Et nyoon ts'eke 'utni, "Dainja whe 'inja! Whuzinli nyunch'oh za mba 'uhoont'oh!" 'Et huwa 'en booz'i' Perez huyulhni.

30 Hukw'elh'az bulhutsin whuzdli, 'et nyoon gha batse' dulk'un-i oolasga be yulchuz, 'en Zerah huyulhni.

## 39

### *Joseph 'en keyoh Egypt 'et 'ulhna suli'*

1 'Andit whe Joseph ntsun Egypt ts'e whehialhti, 'ink'ez Potiphar, 'en budayi cho Pharaoh lhuganne 'en huba ne'duni, 'en 'ilhoghun bumoodih unli, 'en Egypt whut'en 'en yonket. Ishmael whut'enne ts'un 'en nts'un whehuyalhti.

2 'Et Moodihti (Yahweh) Joseph yulh 'unt'oh 'ink'ez tube soo din'a suli'. Nyoon Egypt whut'en oomoodih yinli-un 'en ooyoh usda.

3 'Ink'ez oomoodih yinilh 'en 'ahoolhyiz Moodihti (Yahweh) yulh 'unt'oh 'ink'ez oolak'ez ts'iyawh be unzoo yulhtsi.

4 'Ink'ez Joseph tube ooba yinzoo 'ink'ez yuba 'ut'en. 'Et ooyoh dulcho whumoodih unli yulhtsi, 'ink'ez ndai la yut'i-i cha ts'iyawh yula k'enyanya.

5 'Et yoh moodih yulhtsi 'et whuts'un 'ink'ez ndai la yuti-i cha ts'iyawh yutl'ayanla. 'Et huwa Moodihti (Yahweh) nyoo Egypt whut'en ooyoh dilhts'ine soo hoonzoo-un bugha whults'ut. 'Ink'ez ndai la yuti-i cha, yoh yut'i-i cha 'ink'ez ootl'o k'uz cha yut'i-i, ts'iyawh Moodihti (Yahweh) soo hoonzoo-un oogha whults'ut.

<sup>6</sup>'Et ndai la yut'i-i, ts'iyawh Joseph yula k'eyanla, 'aw didut t'oonuszun di ut'i, ut'alh-i yu'alh-i, 'i yu'alh. 'Ink'ez Joseph dunezoo', ooyust'e dulcho whe unzoo, soo 'ot'en cha 'unt'oh.

<sup>7</sup>'Et hukw'elh'az whudizulh, 'et nyoon oomoodih oo'at, Joseph 'en yuka' ninzun hukw'un'a yunilh'en 'ink'ez 'uyulhni, "Schan t'esinti."

<sup>8</sup>'Et hoonts'i yuch'a tse disnih, 'ink'ez nyoon oomoodih oo'at 'uyulhni, "Whunilh'en smoodih 'aw njan yoh dast'en 'et t'oonuszun. Ndai la yut'i-i cha ts'iyawh sla k'eyanla. 'Et 'ink'ez ndi yut'i, 'i ts'iyawh stl'ahonla slak'ez ts'e.

<sup>9</sup>'Aw njan yoh 'aw sanus 'ulchone hooloh. 'Aw hoonli cha sch'a nulhonulh'i'. 'Et 'andit nyun 'en oo'at inli, 'et huwa nts'en'a utisnelh lhe'whulcho-un, lhe'whulsi'-un 'et 'utisnelh 'ink'ez Yak'usda ooch'az lubeshi nedutasdahl?"

<sup>10</sup>'Et dzin totsuk yulh yalhduk, 'et hoontsi 'aw lhidusts'o, yuchan t'eote' yulhni.

<sup>11</sup>'Et 'uhooya 'oh whuya whudizulh at'en, 'et Joseph yoh ts'e whenaja 'utit'elh huba, dune cha yoh hooloh.

<sup>12</sup>Ts'eke yunaih yilhchoot 'ink'ez 'uyulhni, "Schan t'esinti!" Ndi naih yoontun-i, 'i yoontun whe yuch'a tilhgai 'ink'ez 'az telgai.

<sup>13</sup>'Et ndi oonaih oolak'et yulhchooz, nyoon ts'eke yunilh'en, 'en cha 'az whelgai.

<sup>14</sup>Nyoonne dune 'enne whuyoh dunene buts'ahanyih 'ink'ez 'ubulhni, "Whunulh'en, ndun Hebrew whut'en-un 'en neghi nilhti neghodloh ha, 'ink'ez yoh daninya 'ink'ez duchan t'eooste' sulhni, 'ink'ez tube cho 'asuzdul!

<sup>15</sup>'Et 'awet hisiyih 'et sudants'o whe 'et 'ink'ez uso, ndi oonaih 'i ndi slak'ez yula ditni 'ink'ez 'az whelgai!"

<sup>16</sup>'Et ndi naih yoontun, Joseph oomoodih dananja whuts'un yoontun, 'ink'ez yulh yatilhduk.

<sup>17</sup>'Ink'ez 'uyulhni, "Nyoon Hebrew dune ba 'ut'en-un njan danilhti-un, szih neninya 'ink'ez sghudloh.

<sup>18</sup>'Et ooch'a 'azdul whe ndi oonaih 'i szih yula ditni 'ink'ez 'az whelgai."

<sup>19</sup>'Et Joseph oomoodih whulh 'udants'o ndi khuni yudants'o oo'at daja yulhni la, "Mba 'ut'en-un njan 'et dusinla," 'et hunilch'e.

<sup>20</sup>'Et Joseph oomoodih yilhchoot 'ink'ez dune 'ahudin'ai-un, ndet lerwe be 'ulhnane 'adinlane, 'et 'ayan'ai, 'ink'ez nyo tsak'et 'et 'adin'ai.

<sup>21</sup>'Et hoonts'i Moodihti (Yahweh) Joseph yulh 'unt'oh, 'ink'ez yugha te'ninzun, nyo 'adin'ai-un humoodih 'en yuba unzoo sul'i.

<sup>22</sup>'Ink'ez nyo tsak'et 'ahudinla-un humoodih, nyo 'adinlane ts'iyawh Joseph tl'abanla. Nts'oh dahut'en-un 'et Joseph ba 'uhoont'oh.

<sup>23</sup>'Et nyo 'ahudinla-un whumoodih, Joseph ndai la yughana-i 'aw lhinilh'en, Moodihti (Yahweh) yulh 'unt'oh 'et huwa. 'Ink'ez ntsoh dat'en ndai la yughana ts'iyawh Moodihti (Yahweh) diziti yulhtsi.

## 40

### *Adinlane buba nute*

<sup>1</sup>'Et hukw'elh'az 'et nduhooja whe ndunne Egypt whutenne lerwe ooyoh 'uhut'en, dayi ne'ut'en, 'ink'ez nyo yoh lhes ulht'es-un cha, bumoodih lerwe hiba dzoh 'uja.

<sup>2</sup>'Ink'ez lerwe Pharaoh 'en ndunne nane yuba ne'ut'enne, 'enne dayi ne'ut'en 'ink'ez dayi 'ulht'es, 'enne tube whe bubulh hunilch'e.

<sup>3</sup> 'Ink'ez nahult'oh 'aban'ai, nyoon Pharaoh lhuganne oodayi cho ooyoh, 'en tl'abalhti, Joseph 'adin'ai-un 'et.

<sup>4</sup> 'Ink'ez nyo Pharaoh lhuganne oodayi cho, Joseph 'en tl'abalhti 'ink'ez buba ne'ut'en. 'Ink'ez 'atsul 'et 'ahudan'a.

<sup>5</sup> 'Et nyoon yoh 'ut'en moodih 'ink'ez nyoon lhes ulht'es-un lerwe ba 'ut'enne nyo 'ahudin'ai, nahult'oh nuhuztez, 'ilhe 'ulhdzis za, lhelhts'un un'a nuhuztez.

<sup>6</sup> 'Ink'ez Joseph bugha daninya bundada', 'ink'ez bunilh'en, 'ink'ez nahult'oh ni hinli.

<sup>7</sup> 'Et Pharaoh oomoodihne hubulh 'uhut'enne 'ubulhni, "Di ha 'uht'oh nohdzi unduda 'andit dzin?"

<sup>8</sup> 'Ink'ez 'uhuyulhni, "Nanilt'oh 'andit 'ulhdzis nusítez 'ink'ez daja ni whe 'utni-un, 'aw nedoni'ne hooloh." 'Ink'ez Joseph 'ubulhni, "Ndet huwa 'et nusuhtez-un, Yak'usda 'en za iloh lakw ba 'uhoont'oh. T'ewhutihzeh hukwa' nuzun de, sudúhni."

<sup>9</sup> 'Et nyoon yoh 'ut'en moodih, Joseph daja la nusuti 'et yadani' 'ink'ez 'utni, "Whunilh'en njan nuste-un 'ants'i duchun 'i sbut nadan'a.

<sup>10</sup> 'Et ndi duchun 'i ta oozoschum hoonli 'ink'ez oots'u ha'nulhyeh. Oots'aha' nalhyai 'ink'ez mai ts'ekoo too' huyilh'i, 'i mai 'i oots'aha inalhyai.

<sup>11</sup> 'Ink'ez Pharaoh oolubot 'i sla k'es'ai 'ink'ez nyoo mai uschoot 'ink'ez nyo Pharaoh oolubot 'et dunisni 'ink'ez Pharaoh oola k'eyiskai."

<sup>12</sup> 'Ink'ez Joseph 'uyulhni, "Daja ni whe 'utni nyudutasnelh. Ndi ta 'uzoschum 'i tat dzin 'unt'oh.

<sup>13</sup> Tat dzin inle' de, Pharaoh whutso da' daint'en la, 'et nenyanutalhtelh, ntsi ndo 'uyutilelh ink'ez oolubot 'i ootl'aitankalh, whutso da' dailh'en lah ba 'int'en da'.

<sup>14</sup> 'Et hoonts'i snaoolnih 'awet mba soo' hooja de, 'ink'ez sts'un onzoo', Pharaoh sba oobulh yaoolhduk 'ink'ez njan tenaoojsa'.

<sup>15</sup> 'Alha Hebrew whut'enne bukeyoh 'et whuts'un sgho ndunist'i whe 'ust'oh. 'Aw hoonli lhe'usnel whe njan 'aw 'asuhoo'alh huba lhe'hoot'oh."

<sup>16</sup> 'Et nyoon lerwe ba lhes ulht'es-un, nyoon 'onghun-un huwu nusuti-un hoonzoo, 'et Joseph 'uyulhni, "Si cha whuz un'a nususti 'ink'ez njan 'et ta lhyul lhests'ai, 'i stsi k'usla.

<sup>17</sup> 'Udedo telh 'i lhelhdoh-i lhes sut'e-i te, 'i Pharaoh ba 'unt'oh, 'ink'ez dut'aiyaz ndo stsi k'uskai whe ts'iyawh huyan'al."

<sup>18</sup> 'Et Joseph 'uyulhni, "Daja ni whe 'utni nyudutasnelh. Ta telh, 'i tat dzin 'unt'oh.

<sup>19</sup> 'Et tat dzin inle', 'et Pharaoh ntsi 'i nch'a ndo 'itilelh, 'ink'ez duchun k'ez 'et nze'tigus 'ink'ez dut'ai 'i nyust'e hiti'ulh."

<sup>20</sup> 'Et 'uhooja whulh tat dzin inle' whe, 'et Pharaoh whuzdli dzin 'ink'ez dune ghu nusuya duba 'ut'enne ba, 'ink'ez nyoon yoh huwunli, 'ut'en ghunli-un whumoodih, 'ink'ez nyoon lhes ulht'es-un bulh, 'enne butsi do 'uyinla.

<sup>21</sup> 'Et ndun 'ut'en moodih yilh'i-un, cha za 'et nenainilhti 'ink'ez lubot 'i Pharaoh oola k'eyan'ai.

<sup>22</sup> 'Et hoonts'i nyoon lhes ulht'es-un, 'en yuze'uzguz, Joseph daja yulhni la whuz 'un'a.

<sup>23</sup> 'Et hoonts'i nyoon 'ut'en moodih-un, 'aw Joseph yunaoodilhnoh.

## 41

### *Lerwe Pharaoh 'awet nusuti*

<sup>1</sup> 'Et 'uhooja soo nat yus k'ut inle' whe Pharaoh nusuti, 'ink'ez whunilh'en, 'ukoh taba usyin 'et huwun nusuti.

<sup>2</sup> Khuntsul 'et nyo 'ukoh lhtak'ant'i musdoos 'i too halghaz, nilhk'a 'unt'oh unzoo 'ink'ez nyo tl'o k'ut 'et 'u'alh.

<sup>3</sup> 'Et whunilh'en, 'uyoo musdoos lhtak'ant'i 'i cha yunilh'us, 'ukoh ts'e hailh'az. Ntsi' 'ink'ez oodanusugi 'ink'ez nyo 'uyoo musdoos 'i yuzih taba nudilhya.

<sup>4</sup> 'Ink'ez nyoo musdoos ntsi'-i oodanusagi-i, nyoo lhtak'ant'i musdoos nilhk'a nzoo-i, 'i ts'iyawh yan'alh. 'Et Pharaoh ts'enandzut.

<sup>5</sup> 'Et doo cha nanisti 'et whulhnat nusuti. Khuntsul lhtak'ant'i nyoo hunuyeh, lhes te, ooghu hoonli-i, 'i 'ilho hanalhyai-i, 'i yuts'u hanalhyai ncha 'ink'ez nzoo.

<sup>6</sup> 'Et 'ink'ez lhtak'ant'i dindot-iyaz ndaz nilhts'i be 'utsi' sul'i, 'i hukw'elh'az hanalhyai.

<sup>7</sup> 'Ink'ez nyoo lhtak'ant'i hanalhyai-i, 'i nyo lhtak'ant'i nzoo cha 'unt'oh 'ink'ez ncha, 'i yan'alh. 'Et Pharaoh ts'eninzut 'ink'ez 'alha nusuti.

<sup>8</sup> 'Et 'uhooja bundada' ndi ooyughi tube 'uts'un un'a ooba 'uhooja, 'ink'ez Egypt whut'en keyoh-un mbene ne'dulhdeh cha 'ink'ez mbene la whunihne cha, 'enne buka' dani' 'ink'ez Pharaoh daja la nusuti-un 'et hubudani'. 'Ink'ez ts'iyawh 'aw gak ndet 'uhoont'oh-un 'et 'aw lhuhidusnih, t'ehonuszun.

<sup>9</sup> 'Et nyoon yoh 'ut'en moodih-un, 'en Pharaoh yulh yailhduk 'ink'ez 'uyulhni, "Andit dzin whe tank'us 'ust'oh-un 'et whunaznih.

<sup>10</sup> 'Et Pharaoh yuba 'ut'enne bubulh hunilch'e' 'ink'ez si 'ink'ez lhes ulht'es-un moodih cho bulh nanilt'oh whe nyo Pharaoh lhuganne budayi cho ooyoh, 'en zih 'anean'ai.

<sup>11</sup> Nanilt'oh nusitez 'ilhe 'ulhdzis 'ink'ez whenich'oh nek'un'a 'et nusitez nanilt'oh.

<sup>12</sup> 'Et nyo 'ilhoghun Hebrew chilhyaz, 'en nebulh 'adin'ai nyo Pharaoh lhuganne budayi cho, 'en ba ne'ut'en-un, 'ink'ez 'en datni' 'ink'ez nedani' nusitez-un, ts'iyawh nedani'.

<sup>13</sup> 'Ink'ez 'et 'uhooja nts'en'a lah nedani' nusitez-un, whuz un'a 'uhooja. Si njan se'ut'en 'et nenasunilhti 'ink'ez nyoon yuze'uzguz."

<sup>14</sup> 'Et Pharaoh, Joseph yuka' dani' 'ink'ez 'ahoh yughu dahinilhti. Na'dunidzo cha 'uja 'ink'ez dunaih cha lhk'enaidanla, 'ink'ez Pharaoh yughu ninya.

<sup>15</sup> 'Et Pharaoh 'en Joseph 'uyulhni, "Nususti 'ink'ez 'aw dune sudoni'ne hooloh. Dasja whe 'ust'en nyun nyulh 'udasts'o t'eeoninzun, dune nutes-un 'ink'ez hubudini."

<sup>16</sup> 'Et Joseph 'en Pharaoh 'uyulhni, "Aw si syo ts'e 'ilho 'uhoont'oh. Yak'usda 'en la Pharaoh hoonzoo hukw'un'a yudoni'."

<sup>17</sup> 'Et Pharaoh 'en Joseph 'uyulhni, "Whunilh'en, nuste whe 'ukoh taba susyin 'et huwun nususti.

<sup>18</sup> Khuntsul lhtak'ant'i musdoos 'i tooz hail'az. Nzoo cha 'unt'oh 'ink'ez nilhk'a cha 'unt'oh, 'ink'ez nyo tl'ok'et 'et 'u'alh.

<sup>19</sup> 'Et whunilh'en, 'uyoo musdoos 'i yunilh'us. Tel'en 'ink'ez 'utsi' 'ink'ez oodanusugi, 'aw whutsoda' ndulsi'-un lhuzis'en Egypt whukeyoh 'et.

<sup>20</sup> 'Ink'ez nyoo danusugi 'ink'ez 'utsi'-i musdoos, 'i nyoo lhtak'ant'i 'udechoo hailh'az-i nilhk'a-i ts'iyawh yan'alh.

<sup>21</sup> 'Et nyoo musdoos ts'iyawh yan'al, 'aw dune t'eeoninzunne hooloh nts'en'a ts'iyawh yan'al. Whutsoda' dant'oh la, 'utsi' 'et za 'edunt'oh. 'Et ts'enzut.

<sup>22</sup> 'Ink'ez cha nuste-un, khuntsul lhtak'ant'i lhes k'ut, 'ilho hanuye'-i, 'i nyus de haki tube nzoo 'ink'ez dincha cha 'unt'oh.

<sup>23</sup> 'Et whunilh'en, lhtak'ant'i nyoo mai hunuyeh-i dindat 'ink'ez ndaz nilhts'i-i be ninta 'unt'en, 'i hukwelh'az 'i haki.



24 Nyoo lhtak'ant'i 'utsi'-i dindat-iyaz, 'i nyoo 'udechoo lhtak'ant'i dincha-itsiyawh yan'al. 'Ink'ez ne'dulhdehne budasni', 'et hoontsi'i 'aw daja ni whe 'utni 'aw sulhodinel."

25 'Et Joseph 'en Pharaoh 'uyulhni, "Ndi Pharaoh ooghun nusinti-i, 'ilho za unli whe 'unt'oh, Yak'usda (Elohim) Pharaoh 'en wheinilhtan datinelh lah.

26 Nyoo musdoos lhtak'ant'i nzoo-i, 'i lhtak'ant'it yus k'ut 'unt'oh. 'Ink'ez nyoo hanalhyeh-i lhtak'ant'i nzoo-i, 'i cha lhtak'ant'it yus k'ut 'unt'oh. 'I 'ilho be nusinti whe 'int'oh.

27 'Ink'ez lhtak'ant'i musdoos daningi 'ink'ez 'utsi'-i, nyoo musdoos unzoo-i yuk'elh'az too hailh'az-i, 'i cha lhtak'antit yus k'ut 'unt'oh. 'Ink'ez ndi hananyai-i lhtak'ant'i ndaz nilhtsi whe 'utsi' suli'-i, 'i cha lhtak'ant'i yus k'ut dai whutaleh-i, 'i 'unt'oh.

28 Ndi 'i Pharaoh ooghun bulh yasduk, Yak'usda (Elohim) Pharaoh wheinilhtan datit'elh-un.

29 Tube lhtak'ant'it yus k'ut soo ts'iyaitsuk lhai hoonli whe 'et Egypt yun k'ut whutaleh.

30 'Et hoontsi'i, hukw'elh'az lhtak'ant'it yus k'ut 'et dai whutaleh 'ink'ez daltsuk iloh hoonli inle', Egypt 'et dune whunaoodutilnoh 'ink'ez nyoo dai yun dulcho gak yutilhtselh.

31 Lhai hoonli-un nyo yun k'ut whunaoodutitnoh nyoo dai niz de dutizulh tube hoontsi' whutaleh.

32 'Ink'ez Pharaoh oonusute nat 'et hidani', Yak'usda (Elohim) 'uhoonla 'et huwa. 'Ink'ez 'atsulyaz inle' de, 'et de Yak'usda (Elohim) 'et nduwhtalelh.

33 "'Et huwa Pharaoh soo dune 'unt'oh-un, whunih-un, 'en 'uhutayoolhtelh 'ink'ez Egypt yun k'ut ndulcho whe whumoodih yoolhtselh.

34 'Et Pharaoh 'et doneh dune moodihne ndulcho whe yun k'ut 'et 'utahaboolelh. Ndai la 'uhuyulh'en-i, ts'iyawh ilhoh kwulai' (½) 'ul'en-i ts'iyawh 'ilhunahuyolelh lhtak'ant'it yus k'ut whuts'un.

35 'Ink'ez ndai la ut'alh-i 'i cha nyo ho hoonzoo-un 'ulya-i, 'i ts'iyawh 'udun nehuyolelh. Pharaoh 'en whumoodih hoole', 'ink'ez ndi t'alh-i nyo ho lhelhdoh keyoh whuti, 'et az oola'.

36 'Et de ndi ut'alh-i 'i ts'iyawh 'et tilalh, ndet la lhtak'ant'it yus k'ut dai whutalelh, 'et wheni Egypt 'et za tilalh. Doo ka la nyo dai whuzdli' de, dune yaodlah 'et whuch'a."

### *Joseph huba ne'duni' suli'*

37 'Et ndi khuni Pharaoh 'en ooba hoonzoo 'ink'ez yuba 'ut'enne cha buba hoonzoo.

38 'Ink'ez Pharaoh duba 'ut'enne 'ubulhni, "'Aw njan ndunt'oh-un dune naoots'olhtelh ait'oh, Yak'usda (Elohim) ooyughi bulh 'unt'oh-un?"

39 'Et Pharaoh, Joseph 'uyulhni, "'Et 'alha Yak'usda ts'iyawh njan whunyunilhtan. 'Aw nyun dult'ohne whunihne hooloh.

40 Syoh 'et ndulcho whumoodih tanleh. Nyun daja dini, whuz un'a sdune'ne cha ne'hutit'en. Njan lerwe kw'uts'uzda cho k'ususda-un, 'et 'awet za nyando 'utist'elh."

41 'Ink'ez Pharaoh Joseph 'uyulhni, "Whunilh'en, Egypt yun k'ut nduwulcho-un 'et whumoodih tanleh nyuzusi."

42 'Et Pharaoh dulasgayaz latult'o nidil'ai-i, 'i ts'ahayit'ai 'ink'ez Joseph oola 'i yuneidan'ai. 'Ink'ez soo naih dizti'-i nzoo-i be dune yulhtsi 'ink'ez gold 'unt'oh-i ulh'ool-i, 'i yuts'ilchun neidanla.

43 'Ink'ez bulh nanki nyoo luwagin huyilh-i, chariot huyulhni, ndai la yut'i-i, 'i ye noya' yulhni, 'ink'ez ntsoo uyalh-un 'en dugwut nyo yuntootsih yubut 'ink'ez Egypt yun k'ut nduwulcho whe whumoodih unli yulhtsi.

44 'Ink'ez cha Pharaoh, Joseph 'uyulhni, "Pharaoh 'ust'oh. 'Aw nyun a'ah lhduzinih de, 'aw dune dula cha do huyolhchoot 'ink'ez duke cha do 'uhuyooleh-un hooloh."

45 'Ink'ez Pharaoh, Joseph yoozi' yugha din'ai, Zaphnath-Paaneah yulhni. 'Ink'ez oo'at yole' ha Asenath, Poti-Phera, On whulubret ootse', 'en yugha inilhti. 'Et Joseph nyo Egypt yun k'ut ndulcho whe nuya.

46 Joseph tat whunizyat (30) be yus k'ut Pharaoh Egypt whulerwe but inyin whe 'ink'ez Joseph nyo tenanja 'ink'ez Egypt keyoh ndulcho whe nuya.

47 'Et nyo lhtak'ant'it lhai hoonli, ts'iyai lhai hoonli-un 'owhuya whudizulh whe.

48 Ndai la ut'alh-i Egypt yun k'ut hoonli-i, ts'iyawh nayalhdzoo, 'ink'ez keyoh whuti totsuk neininla. Ndai la hanuyeh-i cha ts'iyawh keyoh whuti totsuk 'et neininla.

49 Joseph hanuyeh-i ut'alh-i lhai yulhtsi, yatoo taba sai k'un'a 'et 'ultsuk-i, 'udek'ez 'awet 'ulhto-un cha 'etsul 'udija 'aw yoolhto ait'oh 'et huwa.

50 'Ink'ez Joseph nyo dai whutaleh whutso, 'et nane duneyaz ooye' sulii'. Nyoon ts'eke Asenath, Poti-Phera ootse', On bulubret, 'en yughu bulhtsi.

51 Joseph 'en 'udetsoh whuzdli-un, 'en Manasseh yulhni: "Yak'usda (Elohim) nts'en'a la te'iz'en 'ink'ez sba ooyoh cha whunaoodiznoh 'inka."

52 'Ink'ez whulh nat ooye', 'en Ephraim yulhni: "Njan yun k'ut dzoh nusuzut inle', 'andit whe Yak'usda (Elohim) 'en sba whulai whulhtsi 'et huwa."

53 'Et lhtak'ant'it yus k'ut ts'iyai tsuk lhai dai hooloh-un, Egypt yun k'ut 'et etsul 'uhooja.

54 'Ink'ez lhtak'ant'it yus k'ut dai hoonli-un whe' whudit'en. Joseph daja ni la whuz un'a, ndulcho whe dai whuzdli'. 'Et hoonts'i Egypt yun k'ut 'et ut'alh-i hoonli.

55 'Et tube 'awet Egypt dai whuzdli' whe Pharaoh 'en dune hits'un tedudlih ut'alh-i ha. 'Et Pharaoh hubulhni, "Joseph ootsohdulh. Daja nohulhni la 'et nduht'en."

56 Ndi yun k'ut ndulcho whe dai whuzdli' 'ink'ez Joseph 'uzdla bayoh Egypt 'et daha'danla. 'Ink'ez Egypt whut'en ye buts'e 'ooket. Tube dai be oonujut sulii' Egypt yun k'ut.

57 Yun k'ut totsuk whut'enne 'enne Egypt yun k'ut whuz Joseph hits'un lhgha dindel, hanuyeh hootakulh ha. Dai cho 'i yun k'ut nduhoolhcho whe be 'uhooja 'et huwa.

## 42

### *Joseph bulhutsinke Egypt ts'e whehandil*

1 'Et Jacob yun k'ut Egypt 'et lhes mai' hoonli whunilh'en 'et duye' 'ubulhni, "Di ha 'ants'i lhunulh'en?"

2 'Ink'ez 'et 'utni, "Egypt 'et lhes mai' hoonli 'et whulh 'udasts'o, whuz uhdulh 'ink'ez 'et neba 'oohk'et 'et de sih ts'uhooona' 'ink'ez yats'ilhosdla."

3 'Et Joseph bulhutsinke whunizyane, Egypt ts'e whenandil lhes mai' hootakulh ha.

4 'Et hoonts'i Jacob 'aw Joseph bulhutsin Benjamin, 'en 'aw bubulh whel-huyilh'alh, "Doo ka sih hoonts'i-un bulh 'uhoneh," ni 'inka.

5 'Et Israel ooye'ke whuz lhes mai' hootakulh ha whuz whehandil, Canaan 'et cha dai hoonli 'et huwa.

6 'Et Joseph nyo usda-un dulcho whe bumoodih unli. 'En za ndi lhes mai' ye 'ooket keyoh whudune'ne ts'un. 'Et Joseph bulhutsinke whusahandil 'ink'ez hibut soo yooyo cho yo 'uhuntutsulh 'ankw'us yun nonut'a whe.

7 'Et Joseph dulhutsinke bunilh'en 'ink'ez naboohlts'it, 'et hoonts'i t'ebunuzun hukw'un'a ne'ut'en 'ink'ez khuni ulhtus 'i be bubulh yalhduk 'ink'ez 'ubulhni, "Nts'ez de hahdil?" 'Et 'uhutni, "Canaan yun k'ut ts'e hats'andil t'alh-i ts'ootakulh ha."

8 'Et Joseph dulhutsinke naboohlts'it 'ink'ez didut 'aw nalhuhuyoolts'ulh.

9 'Et Joseph nts'en'a la bughu nusuti-un 'et whunalnih 'ink'ez 'ubulhni, "Nunuf'i'ne 'uht'oh! Dats'int'oh la tets'ul'en neuntilh'elh ha 'uhja, ndiz tihdil!"

10 'Et 'uhuyulhni, "Awundooh nemoodih, mba 'ut'enne njan ut'alh-i hootakulh ha 'uhuja whusahandil.

11 Ts'iyawh 'ilhoghun dune ooye'ke za 'uts'int'oh, 'aw dune 'undunut'ihne lhts'iloh. Mba 'ut'enne 'aw nulhdulh'enne iloh 'uhint'oh."

12 'Et hoonts'i 'ubulhni, "Awundooh! 'Et hoonts'i njan dats'int'oh la tets'ul'en, 'et whuntilh'elh ha 'uhja!"

13 'Et 'uhuyulhni, "Mba 'ut'enne 'enne whunizyane 'on 'at nane lhulhutsinke hinli. 'Ilhoghun dune za ooye' Canaan whut'en-un, 'udekoh-un 'en 'ubá yuzih netl'adida', 'ink'ez 'ilhoghun cha hooloh suli 'inle'."

14 'Et hoonts'i Joseph 'ubulhni, "Daja dusni la, 'et 'alha 'udusni, nulhdulh'enne unli whe 'uht'oh!"

15 Ndiz un'a 'et ootalhdzih. Pharaoh ye khuna-i njan 'aw whuch'a nalhtuz-ihdulh, 'udek'oh-un nohulhutsin whusainya de za.

16 'Ilhoghun whuz nalh'alh 'ink'ez 'udek'oh-un nohulhutsin whusayoolhtelh. 'Ink'ez nohni 'adutilalh, 'et de nohghun ootalhdzih ts'ih'un un'a 'uduhni tilah. Pharaoh ye khuna-i be nulhdulh'enne uhli tilah 'uht'oh!"

17 'Et ts'iyawh 'abanla tat dzin whuts'un.

18 'Et Joseph 'ubulhni whulhtat dzin-un, "Et nduhneh 'ink'ez hoozna', Yak'usda (Elohim) be nuzjut 'et huwa.

19 Ts'ih'un dunene uhli de, nohni nohtoh 'ilhoghun 'en 'adoo'a' 'ink'ez nohni lhes mai' bulh whuz nohyoh ts'e nahdulh.

20 'Ink'ez 'udek'oh-un nohulhutsin, 'en sba whusalhtih. Nohghuni ootalhdzih 'et huwa 'ink'ez 'aw yaoohdlah ait'oh.'" Inka 'et nduhuja.

21 'Et 'ulhodutni, "Alha nek'ehoonkatne ts'inli. Neulhutsin oozul nets'utedudlih inle' 'ink'ez 'aw lhts'udits'il, 'et huwa njan nek'ehoolts'ut."

22 'Ink'ez Reuben bubulh yatilduk 'ink'ez 'ubulhni, "Aw lakw lhunodusnel inle! 'Nduun duneyaz oots'un ninta 'ooht'en junih!' nohdusni, 'ink'ez 'aw lhusoozulhts'ai. 'Et huwa whunulh'en buzkaih 'awet nets'un hukwa' whutni."

23 'Et hoonts'i 'aw t'ehonuszun Joseph t'ewhuninzun, yuba yalhduk-un 'en yuba yalhduk whe bubulh yalhduk 'et huwa.

24 'Ink'ez buch'az nalh'a 'ink'ez intse. 'Et doo cha buts'un nalh'a bubulh yalhduk 'ink'ez Simeon yilhchoot 'ink'ez bubut 'et yulghel

### *Bulhutsinke Canaan ts'e whenahidil*

25 'Et Joseph 'ubulhni, 'uyoonne dune ndi 'e'uzdla-i ts'iyawh lhes mai' be buba idulhbun 'ink'ez ndai la hik'elha hitilttselh-i, 'i ts'iyawh sooniya 'e'uzdla-i be nayuhdzai' 'ink'ez nahidutilyelh-i cha butl'ahle. 'Et whuz un'a 'ubinla.

26 'Et nyoo budonkey cha ts'iyawh hit'una'uzdla lhes mai' be 'ink'ez whenahidil.

27 'Et nahunina 'ilhoghun nyoo 'e'uzdla-i k'unayan'uk, nyoon dughuna' yugha' ti'alh ha, nehunina-un soo 'udedo nyoo sooniya 'et usdzai yutilh'en.

28 'Et dulhutsinke 'ubulhni, "Szooniya stl'anahuyan'ai, njan 'et 'unt'oh, s'ezdla-i bet! 'Et budzin soo ts'ih'un yo 'uja 'ink'ez hunilhjoot 'ink'ez 'ilho-dutni "Dahoont'oh-un 'et Yak'usda (Elohim) negha oonin'ai?"

29 'Et Jacob dubá 'en hits'u naosdil Canaan yun k'ut, 'ink'ez hiyulh nahool-nuk nts'oh te bubulh dahoot'en-un 'uhuyulhni,

30 "Mbene la nyo yun whumoodih unli-un, tubeh khuni duts'un 'i be nebulh yalhduk, 'ink'ez nulhdulh'enne keyoh honilh'en ooba le'ts'int'oh.

31 'Et hoontsi'i 'uts'utni, 'Ts'ih'un dunene ts'inli, 'aw nulhdulh'enne lhts'ilo.

32 Whunizyane 'on 'at nane lhulhutsinke ts'inli, 'ubá ooye'ke 'uts'int'oh. 'Ilhoghun hooloh sulí', 'ink'ez 'udek'oh-un 'en 'ubá yuzih usda, Canaan yun k'ut 'et,' ts'utni.

33 'Et dune nyo keyoh whumoodih unli neulhni, 'Njan whe la tsih'un dune uhli t'eeonoozh, 'ilhoghun nohulhutsin njan nenulhtih, 'ink'ez ut'alh-i nohyoh ts'e t'alh-i hooloh ts'e nahlelh 'ink'ez nahdulh.

34 'Ink'ez 'udek'oh-un nohulhutsin, ndiz toolhte'. 'Et de la t'eeonooszin 'aw nulhdulh'enne lhuhloh, ts'ih'un dune uhli 'ink'ez ndun nohulhutsin nohtl'anatistel 'ink'ez njan 'et sih 'ohket.''

35 'Et 'uhooja, du'ezdla-i huye ha'alhkat whe 'ilhoghun dune buzooniya yuk'elha yulhtsi-i, 'i be 'uzdla-i be yuzdzai 'et hitilh'en. Bubá cha yunilh'en. TUBE hunilhjoot.

36 'Ink'ez Jacob bubá 'ubulhni, "TUBE ts'odi suzulhtsi nohtoh. Joseph 'en hooloh sulí, Simeon cha hooloh sulí, 'ink'ez 'andit Benjamin 'en natilhtelh hukwa' nuhzun. 'I ts'iyawh sdach'e 'uhooht'oh."

37 'Et Reuben dubá yulh yatilhduk 'ink'ez 'uyulhni, "Sy'e'ke nahult'oh bubu-zolghel 'aw Simeon nts'u nalhtustel de. Sla k'elhtih 'ink'ez whusunaoost-el lah."

38 'Et hoontsi'i 'uyulhni, "Aw sye' nohbulh too'as ait'oh. Ndun nohulhutsin 'en dazsai. Dich'oh 'et ndun sye' hoonli bulh 'uhooja de uhdulh whe, 'et de stsi dulgi-i ts'odi bulh nyo ts'un k'ut ts'e tsiyalh."

## 43

### *Joseph bulhutsinke 'enne Benjamin bulh whusanahidil*

1 Tubeh nyo yun k'ut dai be oonisjoot.

2 'Et 'uhooja ndi lhes mai' gak huyulhtsi whe Egypt huyonket-i, bubá 'ubulhni, "Whuz nahdulh 'ink'ez 'ut'alh-iyaz oohket."

3 'Et hoontsi'i Judah 'en 'uyulhni, "Nyoon dune soo tsih'un negha dani' njan dune neulhni, "Aw snin doo cha noolh'en ait'oh nohulhutsin nohbulh e'ust'en de."

4 Neulhutsin nebulh whelh'a' de, 'et de za whuz uztidulh 'ink'ez 'ut'alh-i mba ts'ootakulh.

5 'Et 'aw ndun nebulh tolh'a' ait'oh de, 'aw whuz uztoodilh ait'oh. Nyoon dune njan dune neulhni, "Aw snin ooh'en ait'oh noulhutsin nohbulh whusal-hiyal de."

6 'Ink'ez Israel 'utni, "Et dahoont'oh huwa sdabe tank'us un'a 'usuhla nyoon dune dahni, 'awhuz 'uyoon cha nohulhutsin 'et dahni?"

7 'Et 'uhutni, "Dune soo ts'ih'un neoodalhkut, wheni 'ink'ez nenatneke cha 'ink'ez 'utni, 'Nohbá khuna eh? 'Uyoon cha eh nohulhutsin?' 'Ink'ez 'et ts'udani'. Nts'en'a t'ets'ontazin, 'Nyulhutsin ookwa nahdulh,' nedutanelh?"

8 'Et Judah, oobá Israel 'uyulhni, "Nyoon duneyaz, si stl'ailhtih 'ink'ez sih whuz naztoodilh 'ink'ez ts'uhooona'. 'Aw yats'odlah ait'oh, wheni cha 'ink'ez nyun cha 'ink'ez neuzkehkeyaz cha.

9 Si sich'oh 'et ndun ookw'edutisyalh, soo sla k'ez 'et oola dutanih. 'Et 'aw mba whusanalrustel 'ink'ez mbut nenalrustel de, 'ilhez wheni si sk'eholts'it.

10 'Et 'aw sa' nulhe'ts'it'el de, 'andit 'awet whulhnat da' whusanats'idil oole'."

11 'Ink'ez bubá Israel hubulhni, "Whuz un'a sih 'uhot'e'. 'Ink'ez nja duhneh, ndoho hanuyeh-i, mai 'uk'enus unzoo-i buba deyulhle, 'ink'ez dune oots'itilhdulh 'i cha bahlelh. Be 'uzdudultlo-i na'ulhyeh-i, ntsool-iyaz cha, 'ink'ez ts'ihna t'uz ntsool-iyaz cha bulh buta'whut'en-i cha 'ink'ez myrr huyulhni, 'i cha, 'ink'ez duchun k'ut hanuyeh-i pistachio 'ink'ez almond huyulhni, 'i cha ooba yihlelh.

12 Sooniya nawh 'uniltsuk-i, 'i toohdzaih 'ink'ez nyoo sooniya nohba de-nahuyandzai inle'-i, 'i cha toohdzaih, nahunit'a whutilah 'uhuja.

13 Nohulhutsin cha nohbulh too'as. Dugwe' duduhdilh 'ink'ez dune oots'u nahdulh.

14 'Ink'ez Yak'usda 'Uk'enus 'Ultus-un 'unt'oh (El Shaddai), 'en nohgha te'nozeh nyoon oobut. 'Ink'ez si 'ilhoghun nohulhutsin 'en cha yuladootnih 'ink'ez Benjamin. 'Et 'awet ts'odi susli' de, 'awet ts'odi susli'."

15 'Et nyoonne dune nyoo hits'u hitilhdulh-i cha 'ink'ez Benjamin cha, 'en cha hubulh tiz'az, sooniya nawh 'uniltsuk-i cha, 'ink'ez Egypt ts'e whehandil. 'Ink'ez Joseph hibut nenindil.

16 'Et Joseph, Benjamin bubulh nu'as yutilh'en whe nyoon ooyoh huwunli-un 'uyulhni, "Nduhne dune syoh ts'e hubulh in'us, 'ink'ez khuna-i nasilghe 'ink'ez lhadinleh. Dzetniz 'et ndunne dune sulh na'hutit'ulh."

17 'Et dune Joseph daja yulhni la whuz un'a 'uja. 'Ink'ez nyoonne dune Joseph ooyoh ts'e dabuninla.

18 'Et nyoonne dune whehunuljut, Joseph ooyoh ts'e dabunila, 'ink'ez uhutni, "Nyoo sooniya 'i k'a la ne'inla ne'uzdla-i be nahuyandzai-i 'udechoo njan daneuninla. Nech'az nedutadalh-un 'et hukwunuta 'ulhnane k'un'a neutalhchulh nyoo ghuna', donkey cha."

19 'Et nyoon Joseph buyoh whumoodih yuzih nenindil nyo dati 'et hiyulh yailhduk.

20 'Et 'uhiyulhni, "O dune ncha-un, 'alha 'udecho whusats'andil whe ut'alh-i ts'ootakulh ha' ts'uja.

21 'Et 'uhooja, nenats'untatus naztisdil whe ndi 'e'uzdla-i ookw'unats'un'uk 'ink'ez 'ilhoghun ts'inli whe nezoonyu' nyo 'ezdla-i be yuzdzai whe, 'inka ndi sooniya whusanats'andzai.

22 'Ink'ez 'uyoo sooniya cha whusats'an'ai, 'ut'alh-i be ts'ootakulh ha. 'Aw t'ets'onuszun mbe subah nyoo sooniya ne'ezdla-i be nayandzai."

23 'Et hoonts'i 'utni, "Nohbulh whudoghel. 'Aw whenulhjut iloh. No-hYak'usda (Elohim) 'en nohbá ooYak'usda (Elohim) ndi 'en noh'ezdla-i ye yan'ai whe 'unt'oh. Nohzoonyu nus'a whe." 'Ink'ez Simeon butl'anayalhti.

24 'Et ndun dune Joseph ooyoh dabuninla, 'ink'ez too bughu nilhdzo 'i be duke tanahuzguz 'ink'ez bughuna' cha yutl'a'dantsut.

25 'Ink'ez nyoo Joseph hits'u hitilhdulh-i lhahidinla, dzetniz wheni nyo 'et ut'alh-i nahutit'ulh 'et t'ehonanzin.

26 'Et Joseph duyoh dananja whe nyoo hits'u hitilhdulh-i hitl'ahuyanla, 'ink'ez hibut yo huntizsel soo yun whuts'un.

27 'Et dahint'oh lah 'et hukwa boodulhkut 'ink'ez 'utni, "Nohbá soo 'unt'oh eh, duneti ooghu yalhdud-un, 'awhuz eh khuna?"

28 'Et 'uhuyulhni, "Mba 'ut'en-un nebá tube soo 'unt'oh. 'Awhuz khuna." 'Ink'ez yubut yo 'untizsel 'ink'ez nyo na'hududilhdil.

<sup>29</sup> 'Et ndo yutan'en 'ink'ez dudulhutsin Benjamin yutilh'en, ooloo ooye', 'ink'ez 'utni, "Ndun 'en 'udek'oh nohbulhutsin, ooghun sulh yalhdud inle?" 'Ink'ez 'utni, "Yak'usda (Elohim) soo cho nts'un oozoo' sye'."

<sup>30</sup> 'Et oodzi tubeh dulhutsin yuk'eni unli 'ink'ez 'uts'un whenaja soo 'a cho. 'Ink'ez 'et whenintse, 'ink'ez usti ts'e whuz dananja 'ink'ez 'et utso.

<sup>31</sup> 'Et nena'nilde 'ink'ez tenanja 'ink'ez k'oh 'ududootun 'ink'ez 'utni, "Ut'alh-i 'et nenuhle bubut neinuhle."

<sup>32</sup> 'Et didutch'oh 'uti'ulh-un hiba ne'ninla, 'ink'ez nyoonne cha didutch'oh 'et 'uhuti'ulh-un buba ne'ninla. 'Ink'ez Egypt whut'enne, Hebrew whut'enne 'enne cha didutch'oh duba ne'huninla. 'Aw Egypt whut'enne, Hebrew whut'enne 'aw bubulhe'hus'al, Egypt whut'enne buba hoontsi'.

<sup>33</sup> 'Et hibut natl'adilts'i. 'Udetso whuzdli-un, 'udechoo 'ink'ez 'udek'oh whuzdli-un, 'en 'udek'ez, 'ink'ez nyoonne dune tube buba hooncha lhonul'en.

<sup>34</sup> 'Et ts'iyawh bubut ne'ninkai, 'et hoontsi' Benjamin yuba deyanla, 'i kwulat 'i be 'onus 'ultsuk, 'i yugha inin'ai. 'Ink'ez too hitnai' 'ink'ez hiyulh whunalhni.

## 44

### *Joseph oolubot*

<sup>1</sup> 'Ink'ez nyoon duyooh whumoodih unli-un 'en 'uyulhni, "Dune ts'iyawh 'ezdla-i ut'alh-i buba idilhbun, soo nahitilelh-un 'et 'uldaz-i, 'ink'ez sooniya huye huyonket, 'i cha 'ezdla-i buba denayin'aih.

<sup>2</sup> 'Ink'ez slubot silver 'unt'oh-i, 'i 'udek'oh-un 'en 'ezdla-i ooba deyin'aih, 'ink'ez lhes mai' huye onket-i cha buba denayin'aih." 'Et daja Joseph yulhni la, whuz un'a 'uja.

<sup>3</sup> Soo bundada' yulhkai 'et 'awet dune whenabuhalh'a' dudonkey tucha.

<sup>4</sup> 'Et nyo keyoh whuti 'awet whan'unyaz hanahidil, 'et Joseph nyoon yuba 'ut'en-un 'uyulhni, "Dudinyai", nyoonne buba nanyalh 'ink'ez but'asinya de, 'et 'ubudini, "Et di ha hoonzoo-un 'et hoontsi' hukw'un'a kw'elha whuzulhutsi?"

<sup>5</sup> 'Ndi lubot 'i iloh eh smoodih ye 'utnai-i 'ink'ez 'i be nus whunilh'en yutnai te? Hoontsi' hukw'un'a uhja 'et dahja."

<sup>6</sup> 'Et butasuya 'ink'ez ndi khuni 'i be bubulh yailhdud.

<sup>7</sup> 'Ink'ez 'uhuyulhni, "Et di ha smoodih ndi khuni 'i be nebulh yailhdud? 'Aw mba 'utenne 'aw whuz un'a ndulhuts'ut'en whe' hoont'oh.

<sup>8</sup> Nilh'en ndi sooniya yun k'ut Canaan ts'e ha nats'andzai, ne'ezdlai-i bet nats'in'ai-i. Nts'en'a silver k'us gold bulh 'i nemoodih ooyoh 'et ts'uduntit'ih?"

<sup>9</sup> 'Mbe la mba 'uten-un ooghu nayinla-un de, 'en daootsah 'ink'ez wheni cha nemoodih be 'ulhna ts'ooleh sih."

<sup>10</sup> 'Ink'ez 'utni, "Et daja duhni la, mbe ooch'e' toh nats'inla de, 'en si se'ulhna tileh 'ink'ez nohni 'aw nohk'elhoowhualts'ulh."

<sup>11</sup> 'Et soo 'a cho 'et 'ilhona hinli ndai la be 'uzdla-i yun nahuyanla 'ink'ez hik'una'an'uk.

<sup>12</sup> 'Et nyoon dune 'udetso whudilhuzulh-un, 'en ooch'e' 'i cho yet nuniztai, 'udek'oh-un whuts'un, 'ink'ez nyoo lubot 'i Benjamin oo'ezdla-i bet nayin'ai.

<sup>13</sup> 'Et dunaih ye yidalhch'ul 'ink'ez nyoo dudonkey hik'ena 'inla, 'ink'ez keyoh whuti ts'e nahoosdil.

<sup>14</sup> 'Et Judah 'ink'ez dulhutsinke Joseph ooyoh ts'u nahoosdil, 'awhuz 'et 'ut'en, hibut 'et yun nachaniti.

<sup>15</sup> 'Ink'ez Joseph 'ubulhni, "Dant'i 'ut'en i' 'uhla? 'Aw eh t'eeonuzuhzun dant'oh-un 'ust'oh, 'en dune nus whunilh'en whe 'unt'oh t'eeoninzin!"

<sup>16</sup> 'Et Judah 'utni, "Nemoodih daja uzdutanelh? K'us nts'en'a 'aw nek'elhuholh'tit hukw'un'a na'ts'uhooleh? Yak'usda (Elohim) mba 'ut'enne

'ut'en nts'ih-i bulh nabinla. Njan nuzdilhya, moodihti be 'ulhna wheni cha 'ink'ez mbe ndi lubot oo'ezdlai-i be yuz'ai 'en cha."

17 'Et hoonts'i 'utni, "Aw 'et ndosneh ait'oh. 'Et hoonts'i mbe slubot nuyu'a-un, 'en se'ulhna tileh. 'Et nohni, nohdzi whudooghel whe nohbá oots'u nahdulh."

### *Judah 'en Benjamin ba tedudlih*

18 'Et Judah yuzih neninya 'ink'ez 'utni, "Aw smoodihti si mbut yatisduk 'et sgha oonin'aih, 'ink'ez be hunilch'e-i mba 'ut'en-un bulh hunolch'eh junih. Pharaoh dilt'oh whe 'int'oh.

19 Smoodih mba 'ut'enne budini, 'Nohbá hoonli k'us nohulhutsin?'

20 'Et nemoodih 'uts'utni, 'Nebá hoonli, duneti 'ink'ez duneti sulí' whe ooyaz whuzdli', ts'oodun unli, 'en bulhutsin dazsai, 'ink'ez ndun ts'oodun ooloo buzkeh 'enne didutch'oh gaih 'unli, 'ink'ez oobá yuk'entsi.'

21 'Et mba 'ut'enne 'ubudini, 'Ndiz sts'olhtelh. Noos'en sih.'

22 'Et smoodihti 'uts'utni, "Aw ndun duneyaz dubá yuch'a ooya' ait'oh. Dubá yuch'a suya de, oobá datitsah.'

23 'Et hoonts'i mba ut'enne 'ubudini, "Ndun 'udek'oh-un nohulhutsin, 'aw ndiz lhtulhtel de, 'aw snin 'aw naoht'en ait'oh.'

24 'Et whuz un'a mba 'ut'en-un oozih neznindil, 'ubá 'ink'ez daja dini la, nemoodih inli uzdani'.

25 'Ink'ez 'ubá 'une'ulhni, 'Whuz nahdulh 'ink'ez ut'alh-iyaz oohket.'

26 'Et hoonts'i 'uts'utni, "Aw whuz naztoddilh ait'oh, 'udek'oh-un neulhutsin nebulh 'ut'en de, 'et de za whuz naztidulh. 'En ooyit de 'aw nyoon dune oonin nalhts'utist'el.'

27 'Et mba 'ut'en-un, 'ubá 'une'ulhni, 'T'oonuhzun s'at nane dune sghu sulhtsi.

28 'Ink'ez 'ilhoghun 'en sgho whenya 'ink'ez 'udusni, "Alha la yabe' yudalch'ul." 'Et whuts'un 'aw nalhuzist'en.

29 'Et hoonts'i ndun 'en cha sghulhchoot de, 'ink'ez hoonli hoonts'i-un bulh 'uhooja de, ndi sts'egha' dulgi-i ts'odi be nyo ts'un k'ut ts'e tisyalh.'

30 'Et huwa mba 'ut'en-un, hukwa ndun ts'oodun 'aw nebulh lhe'ust'en, tube nzih utitelh-un hukwa' ninzun 'et huwa.

31 'Et 'uwhutanelh, ndun dune-un nebulh lhe'ust'en de, datitsah. 'Et mba 'ut'enne, wheni gha, mba 'ut'en-un nebá, 'en ootsigha' dulgi sulí' k'et ts'un k'ut ts'e tiyalh.

32 'Et ndun mba 'ut'en-un, ndun duneyaz yuk'edanya whe 'unt'oh. "Aw whusanalrustel de, 'en sbá ghun 'ilhiz sk'ewhualts'ulh whe' hoont'oh,' dasni'.

33 'Et huwa si nyo ndun duneyaz 'en ook'et nye'usna oosle', 'ink'ez nyoon duneyaz dudulhutsinke bubulh natoot'as.

34 'Et huwa nts'en'a suba, sbá oots'u toosya' ndun duneyaz sulh lhe'ust'en de, 'et sih ntis'elh dawhulsi' lah sbá ook'ewhualts'ulh 'et huwa?'"

## 45

### *Joseph bubulhutsinke bunalh hahon'ai*

1 'Et Joseph 'aw 'on 'un 'oododotun ait'oh, nyoonne yunat nudilhyane bunalh, 'ink'ez 'udija, "Ts'iyanne n'az nahutoodilh!" 'Et Joseph nyoonne dudulhutsin mbe 'unt'oh-un hubudani'.

2 'Ink'ez soo 'ultus-un intse 'ink'ez nyoonne Egypt whut'enne 'ink'ez Pharaoh ooyoh cha ts'iyawh whulh hidants'o.

<sup>3</sup>'Et Joseph bubulhtsinke 'enne 'ubulhni, "Si Joseph 'ust'oh. Sbá 'awhuz eh khuna?" 'Et hoontsi'i bulhutsinke 'aw hiyulh yatoólhdih ait'oh. Whuz tube buba nek'e'hoonil k'et.

<sup>4</sup>'Et Joseph dudulhtsinke 'ubulhni, "Anih szih nenuhdilh. 'Ink'ez hizih nenindil 'ink'ez 'utni, "Joseph 'ust'oh! Nohulhutsin Egypt ts'e be 'ohk'et inle'-un.

<sup>5</sup>'Ink'ez 'andit nohdzi undooda' k'us dulh nahunolhch'eh junih. Njan se'ohket 'et huwa, Yak'usda 'en ndiz sutilh'a' dune yalhosdla ha.

<sup>6</sup>Nat yus k'ut whuts'un njan dai hone'. 'Awhuz kwulat yus k'ut 'et 'aw dune 'a' noolelh cha ait'oh, ha' hunoolelh cha ait'oh tileh.

<sup>7</sup>'Ink'ez Yak'usda (Elohim) nohtso ndiz whe salh'a', Ndi yun k'ut nohts'u haindene huhoona, 'aw dalhuhoosa. Hooncha whe bula'tinelh.

<sup>8</sup>'Et 'andit nohni iloh ndiz whe silh'a'. Yak'usda (Elohim) 'en Pharaoh cha oobá sulhtsi 'ink'ez ooyoh cha whumoodih usli. 'Ink'ez Egypt yun k'ut ndulcho whucha whumoodih usli.

<sup>9</sup>Soo 'a 'ink'ez 'ubá oots'un nahdulh 'ink'ez 'uduhni, 'Nye' Joseph 'utni, "Yak'usda (Elohim) 'en Egypt whumoodih sulhtsi. Ndiz sts'inyalh, sa' 'ont'en junih!

<sup>10</sup>Njan Goshen yun k'ut 'et sih hont'e'. Soo szih 'utant'elh, nyun cha 'ink'ez nyuzkeh cha, nyuzkeh bubuzkeh cha, nghuna', 'usbai bulh cha 'ink'ez ndai int'i ts'iyawh.

<sup>11</sup>'Et njan oowk'ut yinka dutalhts'ilh-i 'i nohgha tis'aih doo ka sih nyun cha 'ink'ez nyoh dilhts'ine cha, ndai int'i-i cha telh'en oole' 'awhuz kwulat yus k'ut dai whutaleh whe' hoont'oh.'

<sup>12</sup>'Ink'ez whunilh'en nohna cha 'ink'ez sulhutsin Benjamin oona be nanulht'oh sze 'uwhutni, nohbulh yasduk.

<sup>13</sup>'Et de sih 'ubá dast'oh la njan Egypt dust'i', ndet hooh'en-un cha 'ink'ez soo 'a 'ubá ndiz ulhtelh."

<sup>14</sup>'Et dulhutsin Benjamin yuts'ilchun k'et yilhchoot 'ink'ez intse 'ink'ez Benjamin cha yuts'ilchun k'ut 'et intse.

<sup>15</sup>'Et 'on 'un cha dulhutsinke ts'iyawh nabuditsooz 'ink'ez bughintse. 'Et hukw'elh'az bulhutsinke yulh yahalhduk.

<sup>16</sup>'Et ts'iyawh dawhudani' lah Pharaoh ooyoh bulh 'uhudantso 'ink'ez 'uhutni, "Joseph bulhutsinke whusahandil," 'ink'ez Pharaoh cha 'ink'ez yuba 'ut'enne cha ts'iyawh huhoont'i.

<sup>17</sup>'Ink'ez Pharaoh Joseph 'ulhni, "Nyulhutsinke budini, 'Nohghuna' buna'ilhghelh 'ink'ez nahdulh Canaan yun ts'e.

<sup>18</sup>Nohbá ndiz ulhtelh 'ink'ez nohyoh whut'ine cha, ts'iyawh ndiz sts'un uhdulh. Nda la k'us unzoo-i njan yun Egypt 'i si nohgha ooslelh 'ink'ez njan yun k'ut whuk'o, 'i sih ooh'alh.

<sup>19</sup>'Et whuz un'a khuni mba 'ulya, 'et dineh, 'Njan Egypt yun k'ut mbene 'ulgoo-i ts'iyawh ilhchoot. Nohuzkehyaz 'ink'ez noh'atke cha 'ink'ez nohbá cha 'ink'ez whusahdilh.

<sup>20</sup>'Ink'ez ndai la njan uht'i-i ooghuni oohle' junih. Nda la Egypt yun k'ut 'uk'enus nzoo-i, 'i nohch'e 'unt'oh.'

<sup>21</sup>'Et Israel ooye'ke 'et nduhuja, 'ink'ez Joseph be ne'ulgoo-i cha ts'iyawh butl'ayanla. Daja Pharaoh daja yulhni la hukw'un'a 'ink'ez nuhudilh-un hiti'ulh-i cha butl'ayanla.

<sup>22</sup>Ts'iyawh 'ilhoghun hinli whe naih lkh'enahidutilelh-i cha 'ink'ez Benjamin 'en tat whunizyai tat 'ultsuk-i (300) 'i silver yugha inindzai, 'ink'ez kwulat k'enaidutilelh-i naih, 'i cha yugha ininla.

<sup>23</sup>'Ink'ez dubá 'en ndi donkey 'i yuts'otl'ayanla, whunizyai donkey, Egypt ndai la unzoo-i ts'iyawh 'i hik'enahuyinla, 'ink'ez whunizyai ts'eke donkey,



'i cha lhes mai' cha, lhes cha 'ink'ez ut'alh-i cha, oobá yuti'ulh ha cha, ndiz nahatidulh huba, 'i hik'enahuyinla.

<sup>24</sup> 'Et dudulhutsinke whenabalh'a 'ink'ez whenahidil 'ink'ez 'ubulhni, "Khun te nyo nuhdil whute dzoh nohdeh junih."

<sup>25</sup> 'Et Egypt whenahidil 'ink'ez Canaan yun k'enahidil, dubá Jacob 'en oots'un.

<sup>26</sup> 'Ink'ez hidani', "Joseph 'awhuz khuna 'ink'ez Egypt yun k'ut ndulcho whe moodih unli." 'Et Jacob oodzi 'ankw'us 'etsul 'uja, 'aw hiba 'alha lhe'dusnih 'et huwa.

<sup>27</sup> 'Et Joseph daja hubulhni la hidani', 'ink'ez nyoo be ne'ulgoo-i cha hinilh'en Joseph buts'o t'l'ayanla-i, 'et Jacob ooyughi ndo na'uja.

<sup>28</sup> 'Et Israel 'utni, "Awet soo' hooja. Sye' Joseph 'awhuz khuna, whuz toosya ink'ez sih naoost'en datisah whutso."

## 46

### *Jacob 'en Egypt yun k'ut ts'un tizya*

<sup>1</sup> 'Et Israel ndai la yut'i-i tubulh tizya, Beersheba keyoh ts'e oozya 'ink'ez oobá Isaac ooYak'usda (Elohim) ts'un khuna-i dalhk'un.

<sup>2</sup> 'Et Yak'usda (Elohim) 'en Israel 'ulhdzis yunalhts'et hainya 'ink'ez 'utni, "Jacob, Jacob" ni, 'et 'uyulhni, "Njan 'ust'oh".

<sup>3</sup> 'Ink'ez 'utni, "Yak'usda (El) 'ust'oh, mbá ooYak'usda (Elohim). 'Aw whe-niljut whe Egypt ts'e tonya' junih, nyun tube didoh-un ncha-un 'et nyutiselh.

<sup>4</sup> Egypt ts'e nyulh 'utisnelh 'ink'ez ndo na'nyutislelh. 'Ink'ez 'alha Joseph 'en nyuna k'edutalni."

<sup>5</sup> 'Et whe Jacob 'en Beersheba 'et dudinya, 'ink'ez Israel whuye'ke 'en hube 'ubá whuz hitilhti, bubuzkehyaz cha, 'ink'ez bu'atke cha, 'en ndi nulbas be buhanla, 'i Pharoaoh hubuts'otl'ayanla.

<sup>6</sup> 'Ink'ez khuna-i cha 'ink'ez ndai la huyut'i-i cha, Canaan bugha ininkat-i, 'i tubulh Egypt ts'e whehandil, Jacob 'ink'ez ts'u haindene bubulh.

<sup>7</sup> Ooye'ke 'ink'ez ooye'ke 'on 'un ooye'ke, ootse'ke 'ink'ez buye'ke butse'ke, ts'iyawh Egypt ts'e boozdla.

<sup>8</sup> 'Et ndi Israel buzkeh buboozi: Jacob ooye'ke, 'ink'ez Egypt ts'e whendilne,

Reuben 'en 'udetso ooye', Jacob ooye'.

<sup>9</sup> Reuben ooye'ke 'enne:

Hanock, Pallu, Hezron 'ink'ez Carmi.

<sup>10</sup> Simeon ooye'ke 'enne:

Jemuel, Jamin, Ohad, Jachin, Zohar 'ink'ez Shaul, Canaan whut'en-un ts'eke ooye'.

<sup>11</sup> Levi ooye'ke 'enne:

Gershon, Kohath 'ink'ez Merari.

<sup>12</sup> Judah ooye'ke 'enne:

Er, Onan, Shelah, Perez 'ink'ez Zerah ('et hoonts'i Er 'ink'ez Onan bulh 'enne Canaan keyoh dahuzsai).

Perez ooye'ke 'enne:

Hezron 'ink'ez Hamul bulh.

<sup>13</sup> Issachar ooye'ke 'enne:

Tola, Puvvah, Iob 'ink'ez Shimron.

<sup>14</sup> Zebulun ooye'ke 'enne:

Sered, Elón 'ink'ez Jahleel.

<sup>15</sup> Ndunne Leah ooye'ke, 'enne Jacob ghu bulhts'i Paddan Aram ts'e. Ootse' Dinah, 'en cha. Mbene la ooye'ke 'ink'ez oots'eke cha tat whunizyai 'on 'at tane (33) hinli.

<sup>16</sup> Gad ooye'ke 'enne:

Zipheon, Haggi, Shuni, Ezbon, Eri, Arodi 'ink'ez Areli.

<sup>17</sup> Asher ooye'ke 'enne:

Imnah, Ishvah, Ishvi, Beriah 'ink'ez Serah bubulhtus.

'Ink'ez Beriah ooye'ke 'enne: Heber 'ink'ez Malchiel.

<sup>18</sup> Ndunne 'enne Zilpah ooye'ke:

Laban, Leah dutse' gha inilhti, 'en Jacob ghu bulhtsine whunizyane 'on 'at lhk'utane (16) hinli.

<sup>19</sup> Rachel ooye'ke, Jacob oo'at:

Joseph 'ink'ez Benjamin.

<sup>20</sup> 'Et Joseph oots'un keyoh Egypt hooni, 'enne Manasseh 'ink'ez Ephraim. 'Enne Asenath Poti-Pherah whutse', keyoh On lubret, 'en buzkeh.

<sup>21</sup> Benjamin buzkeh 'enne:

Bela, Becher, Ashbel, Bera, Naaman, Ehi, Rosh, Muppim 'ink'ez Ard.

<sup>22</sup> Ndunne 'enne Rachel ooye'ke, 'alghoh whunizyane 'on 'at dine (14), 'en Jacob ghu bulhtsi.

<sup>23</sup> Dan ooye' 'en Hushim huyulhni.

<sup>24</sup> Naphtali ooye'ke 'enne:

Jahzeel, Guni, Jezer 'ink'ez Shillem.

<sup>25</sup> Ndunne 'enne Bilhah ooye'ke, 'en Laban ootse', Rachel, gha inilhti, 'en ndunne Jacob ghu bulhtsi lhtak'ant'ine hinli.

<sup>26</sup> 'Et Jacob yulh whendilne Egypt ts'e, ts'iyawh hits'u hainde, Jacob ooye'ke, bu'atke, 'aw 'enne iloh, 'alghoh lhk'utat whunizyai 'on 'at lhk'utane (66) hinli

<sup>27</sup> 'Ink'ez Joseph ooye'ke, Egypt 'enne nane hinli, Jacob bulh whusa-handilne Egypt ts'e hoozdil whe lhtak'ant'it whunizyane (70) hinli.

### *Jacob 'en yun k'ut Goshen 'et nenina*

<sup>28</sup> 'Et Judah 'en butso yutilh'a' Joseph ts'un nts'e la Goshen ts'e whuz'ai 'ink'ez Goshen yun k'uz ts'e hoozdil.

<sup>29</sup> 'Et Joseph nyoo ye nuya-i, 'i lhaidinla, 'ink'ez Goshen ts'e whenya, dubá Israel yudutizya 'ink'ez yubut neninya. 'Ink'ez yuts'ilchun k'et yuk'ilhts'ut 'ink'ez sa' whe 'et yuts'ilchun k'et intse.

<sup>30</sup> 'Ink'ez Israel, 'en Joseph 'uyulhni, "Awet white daosah-un sgha oonin'aih, nyunin us'en 'awhuz khina 'et huwa."

<sup>31</sup> 'Et Joseph dulhutsinke 'ink'ez dubá ooyoh dilhts'ine cha 'ubulhni, "Toozya' 'ink'ez Pharaoh dosni, njan dudoosni' sih, 'Sulhutsinke 'ink'ez sbá ooyoh dilhts'ine cha, Canaan huwhut'ine sgho nindil.

<sup>32</sup> 'Ink'ez dune 'enne 'usbai ghunline, whuz un'a khuna-i gha 'aihne hinli, 'ink'ez dughuna' cha ts'iyawh ndai la huyut'i-i cha ts'iyawh sahuylanla.'

<sup>33</sup> 'Et 'uhoneh Pharaoh nohkahizya 'ink'ez 'utni de, 'Dahoont'oh-un la huwahna?'

<sup>34</sup> 'Et 'udoohni', 'Mba 'ut'enne bube 'ut'en dak'ez whuts'un, khuna-i gha hana ts'oodunne ts'inli whuts'un 'andit whuts'un, wheni cha 'ink'ez netsoda' nebáke 'enne cha.' 'Et de sih ndi yun k'ut Goshen yun k'ut hooht'e', 'usbai ghunline ts'iyawh 'ilhoghun hinli whe Egypt whut'enne bubu' huninzun 'et huwa."

## 47

<sup>1</sup> 'Et Joseph Pharaoh ts'u whenya 'ink'ez 'uyulhni, "Sbá 'ink'ez sulhutsinke, bughuna' te 'ink'ez ts'iyai huyut'i-i cha, Canaan ts'e hahandil 'andit Goshen yun k'ut 'uhint'oh."

<sup>2</sup> 'Ink'ez kwulane dudulhutsinke 'enne butizdla 'ink'ez Pharaoh ghu buninla.

<sup>3</sup> 'Et Pharaoh bulhutsinke 'ubulhni, "Ndet la huwahna?" 'Et 'uhuyulhni, "Mba 'ut'enne, 'usbai ghunline ts'inli, wheni cha 'ink'ez nebákene cha."

<sup>4</sup> 'Ink'ez cha Pharaoh 'ubulhni, "Ndi yun k'ut ts'otit'elh ha whusats'andil. Mba 'ut'enne 'aw bughuna' yoo'alh-i hooloh Canaan yun k'ut dai tube 'uja, 'et huwa mba 'ut'enne Goshen yun k'ut huhoot'en-un 'et negha oonin'aih."

<sup>5</sup> 'Et Pharaoh, Joseph bulh yalhduk 'ink'ez 'utni, "Mbá 'ink'ez nyulhutsinke ngho nindil.

<sup>6</sup> Egypt yun k'ut mbut whuz'ai, mbá 'ink'ez nyulhutsinke 'uk'enus ndi yun unzoo-i Goshen yun k'ut, 'et huwhutit'elh. 'Et 'enne butoh soo 'uk'enus ts'ih'un ne'ut'en-i 'ink'ez 'uyoo unline, 'enne butoh hoonli de, 'enne ndi sghuna', ts'iyawh himoodih oole'."

<sup>7</sup> 'Et Joseph dubá Jacob sayalhti 'ink'ez Pharaoh yubut neinilhti, 'ink'ez Jacob Pharaoh soo honzoo-un oots'un tizoo' yuba tenadidli.

<sup>8</sup> Pharaoh Jacob yoodulhukut, "Dawhultsuk nyeyus k'ut?"

<sup>9</sup> 'Et Jacob 'en Pharaoh 'uyulhni, "Sunawhudizut whe dzin whe lhususya, 'et 130 nawhudizut. 'Aw whulai iloh 'ink'ez hoontsi' whe nawhudizut whudzin whe syust'e 'ant'e'. 'Et hoontsi 'aw sbáke ndi yun k'ut nuhuzdil-un ndoh whulhdzoh ilhoh 'et khisna'."

<sup>10</sup> 'Et Jacob, Pharaoh 'uk'enus soo honzoo-un ubulh yalhduk 'ink'ez yughu tenanja.

<sup>11</sup> 'Ink'ez Joseph, dubá 'ink'ez dulhutsinke Egypt yun ooloh 'i bugha inin'ai, soo 'uk'enus honzoo-un, Rameses whuyun k'ut 'et, Pharaoh daja yulhni la, whuz un'a.

<sup>12</sup> 'Et Joseph dubá 'ink'ez dulhutsinke 'ink'ez mbene la buyoh whut'ine cha, lhes dawhultsuk huwa 'i bugha ininla.

*Joseph dai cho whuzdli' 'et hukw'un nuhulhye'*

<sup>13</sup> 'Et 'aw njan yun k'ut ut'alh-i hooloh, tube dai be oonisjoot 'et huwa. Egypt yun k'ut cha 'ink'ez Canaan yun k'ut cha tube tehul'en ndi dai 'i gha.

<sup>14</sup> 'Ink'ez Joseph ndai la Egypt sooniya, ts'iyawh nayalhdzoo. Canaan yun k'ut cha ndai la lhes hanuyeh-i huyonket-i, 'ink'ez ndi Joseph, Pharaoh ooyoh ts'e wheyan'ai.

<sup>15</sup> 'Et Egypt yun k'ut cha sooniya hooloh Canaan yun k'ut cha sooniya hooloh. 'Et Egypt whut'enne ts'iyawh Joseph highu nindil 'ink'ez 'uhutni, "Lhes negha nin'aih. Diha 'et nyunalh yats'itadlah? Sooniya gak suli' 'et huwa."

<sup>16</sup> 'Et Joseph 'utni, "Nohghuna' 'et nenuhle 'ink'ez 'i k'elha sih ut'alh-i nohgha ooslelh, sooniya hooloh suli' de."

<sup>17</sup> 'Et dughuna' ts'iyawh Joseph highu hininla 'ink'ez Joseph ut'alh-i bugha ninla ndi yeztli khuna-i te, budonkey te, ts'iyawh, 'i k'elha lhes huyu'alh-i bugha ininla, ndi khuna-i ts'iyawh 'et nawhudizut whe.

<sup>18</sup> 'Et nawhudizut whe 'on 'at yus k'ut 'et 'uhuyulhni, "Aw nemoodih nch'a nuznoot'i' ait'oh, nezooniya' gak whuzdli'. Ndai la khuna-i ts'ut'i-i ts'iyawh nemoodih nyun za int'i suli', 'aw neyun k'ut 'aw hoonli ngha ts'oolelh-i hooloh, neyust'e' 'ink'ez neyun bulh za 'et neninkat.

<sup>19</sup> 'Et di ha nenilh'en whe yats'itadlah, wheni 'ink'ez neyun bulh cha neoont'et 'ink'ez neyun cha oont'et lhes k'elha. 'Ink'ez wheni 'ink'ez neyun

bulh 'et sih Pharaoh ba 'ut'enne ts'oole'. 'Ats'untilelh-i negha ninle, 'et de la ts'ukhoona' 'ink'ez yalhitsu'osdla, 'et de ndi yun 'aw gak uztisle."

<sup>20</sup> 'Et Joseph Egypt whuyun ts'iyawh ndulcho whe Pharaoh ba yonk'et. Egypt whut'enne dune ndai la yun huyut'i, ts'iyawh huye 'onket tubeh dai be oonujut huba suli'. 'Et huwa 'et ndi yun ts'iyawh Pharaoh ooch'e' suli'.

<sup>21</sup> 'Et nyoonne dune 'enne ts'iyawh keyoh whuti ts'e nebuninla, Egypt keyoh nduwulcho whe.

<sup>22</sup> Mbene la lubret unline, 'enne buyun 'i za 'aw lhuyookulh. Pharaoh 'uda' butl'a'dantsut, 'et huwa nyoo butl'aidantsut-i, 'i huyu'alh, 'et huwa duyun 'aw huye lhe'ookulh.

<sup>23</sup> 'Et Joseph dune 'ubulhni, "Nohyun ts'iyawh osket. 'Andit dzin Pharaoh ba whunulh'en ndi 'antilelh-i nohba hooni, 'i sih yun k'ut 'anoolelh.

<sup>24</sup> 'Et de si ha'nule de (½) ndai la 'anihla-i, 'i Pharaoh oogha yohlelh. (½) 'i nohch'e' tileh, 'antilelh wheni 'ink'ez tih'ulh-i wheni cha, mbene la nohyoh whut'ine 'ink'ez nohuzkehkeyaz ba cha."

<sup>25</sup> 'Et 'uhutni, "Be ts'ukhuna-i silhyih. Nemoodih ba soo ts'inzoo ts'oole' 'ink'ez ba 'ut'enne ts'oole'."

<sup>26</sup> 'Ink'ez Joseph 'i khuni yulhtsi, Egypt yun k'ut wheni 'andit dzin whuts'un Pharaoh 'en (½) 'i ooch'e' yutaleh, lubretne buyun 'i ooyit, 'i 'aw Pharaoh ooch'e' lhilelh.

### *Joseph 'en Jacob ts'un ts'ih'un nahizya*

<sup>27</sup> 'Et Israel, Egypt yun k'ut 'et hit'e', keyoh Goshen huwhutni-un 'et hoot'e', lhai huyut'i-i 'ut'i suli'.

<sup>28</sup> 'Ink'ez Jacob Egypt yun k'ut 'et whut'i, whunizyai 'on 'at lhtak'ant'it (17) yus k'ut. Jacob ndi yun k'ut inda', 'et 147 yus k'ut 'et hoot'e'.

<sup>29</sup> 'Et 'awet Israel datitsah whenghoh neooninzut, duye' Joseph 'anih yudani' 'ink'ez 'uyulhni, "Alha mba uszoo nahoon'ai de, nla swuz t'oh nedilnih 'ink'ez soo cho ne'solh'en, 'aw Egypt 'et 'asolhtel' junih.

<sup>30</sup> 'Ants'i sbáke 'enne bubulh 'oost'e'. Egypt whuch'a nasolhtel' 'ink'ez la 'ahudinla-un 'et 'asoltel'h." 'Et 'uyulhni, "Daja dini-un 'et si ndosneh."

<sup>31</sup> 'Ink'ez 'utni, "Sts'u nahinyeh." 'Ink'ez yuts'u nahizya. 'Et Israel tse nilh'al-un hukw'ut 'et yo nenint'ai.

## 48

### *Jacob 'en Joseph ooye'ke, soo hoonzoo-un buts'un tizoo'*

<sup>1</sup> 'Et hukw'elh'az njan duhooja whe Joseph 'uhuyulhni, "Mbá nduda," 'ink'ez duye'ke nane Manasseh 'ink'ez Ephraim 'enne hubilhchoot.

<sup>2</sup> 'Ink'ez Jacob huyulhni, "Whunilh'en nye' Joseph nts'un tizya." 'Ink'ez Israel do 'uja 'ink'ez lili k'ut ndo netl'adinda'.

<sup>3</sup> 'Et Jacob, Joseph 'uyulhni, "Yak'usda 'Uk'enus 'Ultus-un 'ust'oh (El Shad-dai) snalhts'et hainya Canaan whu yun k'ut Luz whe 'ink'ez soo hoonzoo-un sts'un tizoo'.

<sup>4</sup> 'Ink'ez 'usulhni, "Whunilh'en lhane nts'u hatidoh dune lhane whe nts'u hahutidoh, 'ink'ez ndi yun 'i nts'u haundene nk'elh'az de 'ilhiz wheni bugha itas'alh."

<sup>5</sup> 'Andit 'et nane nye'ke Ephraim 'ink'ez Manesseh, Egypt 'et nyuzkeh huzdli', nghu tisyalh whutso 'enne sch'e 'uhint'oh. Reuben 'ink'ez Simeon bulh buk'un'a sch'e' hutileh.

<sup>6</sup> Nyuzkeh njan hukw'elh'az nyuzkeh hutilehne, 'enne ndunne dudul-hutsin be nabootanzi, ndai la buch'e' yutaleh-i 'inka.

7 'Et si keyoh Padden ts'e hasya, Rachel szih 'et Canaan yun k'ut dazsai, ts'idulh whe keyoh Ephrath 'awet nilhduk suli' whe 'et, 'ink'ez Ephrath ts'u ti (Bethlehem ts'uwhutni-un) 'et 'asti."

8 'Et Israel, Joseph ooye'ke bunilh'en 'ink'ez 'utni, "Ndunne 'enne mbene whe' hint'oh?"

9 'Ink'ez Joseph dubá 'ulhni, "Sye'ke 'uhint'oh. Njan yun k'ut Yak'usda (Elohim) sgha bunilhtine." 'Ink'ez 'utni, "De' ndiz sts'u bilhtelh 'ink'ez si soo hoonzoo-un but'sun tiszoo'."

10 'Ink'ez Israel oona 'awet njan be tetsun suli' tube hoonyan 'et huwa 'aw soo cho lhubis'en. 'Et Joseph hizih nebunilh'ti 'ink'ez nabudits'ooz 'ink'ez bubontun.

11 'Ink'ez Israel, Joseph 'ulhni, "Aw nyunin ntis'elh 'aw huwuni lh-nuzusuz, 'et hoonts'i 'alha Yak'usda (Elohim) nyuzkeh bubusunilhtan."

12 'Et Joseph dugwut zih uzyin whuz de habalhti 'ink'ez soo yun ts'e nenint'ai yubut nachaninti.

13 'Ink'ez Joseph nahult'oh hubilhchoot, Ephraim 'en nailhnih ts'un'k'us yilhchoot, Israel 'intl'us ts'e oola ts'un 'ink'ez Manesseh 'en 'intl'us ts'e dula be Israel nailhnih ts'un'kus hubilhchoot 'ink'ez hizih nebunilh'ti.

14 'Ink'ez Israel dula nailhnih be Ephraim ootsi k'ut nedilni, 'en 'udek'oh-un 'unt'oh, 'ink'ez 'intl'us ts'e 'et Manesseh ootsi k'ut 'et nedilni, 'ink'ez yuk'unudulnih-un Manesseh 'en 'udetso-un whuzdli.

15 'Ink'ez Joseph soo hoonzoo-un be ubulh yalhduk 'ink'ez 'utni, "Yak'usda (Elohim) mbe la sbáke Abraham 'ink'ez Isaac bulh hitso nusu'azne, Yak'usda (Elohim) mbe la 'andit dzin whuts'un yinka susda nduwulhyiz whe sgha 'an'aih,

16 Ndun Lizas mbe la hoonts'i-un whuch'a nasonket-un, 'en ndunne duneyaz soo hoonzoo-i be za tl'aookat.

Ndai sooz'i 'i be bubo'hozi,

'ink'ez sbáke Abraham 'ink'ez Isaac buboozi' be cha, 'ink'ez soo ndi yun k'ut 'et lhane cho hoole'."

17 'Et Joseph dubá nailhnih ts'un'k'us 'et Ephraim k'edilni 'et whunilh'en, 'et whuts'udutni 'ink'ez dubá oola yilhchoot Ephraim ootsi k'udilhni whe 'ink'ez Manesseh ootsi k'edilhni.

18 'Ink'ez Joseph dubá 'ulhni, "Awundooh sbá, ndun 'en 'udetso-un whuzdli whe 'unt'oh, nailhnih ts'un'k'us 'et ootsi k'edilni."

19 'Et hoonts'i oobá hukwa lhe'nizun 'ink'ez 'utni, "T'oonuszun sye', t'oonuszun 'en cha ndi yun k'ut dune tileh 'ink'ez ncha tileh. 'Et hoonts'i ndun ook'oh-un, 'en yanus 'ulcho tileh 'ink'ez soo keyoh whudzibun whe yuts'u hayandene hutileh."

20 'Et nahult'oh soo hoonzoo-un be ubulh yalhduk whe 'utni,

"Nohni nohbá Israel soo hoonzoo-un be nohbulh yalhduk 'ink'ez 'udutinelh, 'Yak'usda (Elohim), Ephraim 'ink'ez Manesseh buk'un'a 'ooht'e'."

'Et whuz un'a Ephraim 'en Manesseh tso nenilh'ti.

21 'Et Israel, Joseph 'uyulhni, "Whunilh'en 'awet dassah whe 'ust'oh, 'et hoonts'i Yak'usda (Elohim) nyulh 'utit'elh mbáke bukeyoh ts'e whuz nanyu-tilhtelh.

22 'On 'un cha ndai la nyulhutsinke bugha inusla-i, yun 'ilho 'ultsuk 'i be nyun ngha nusla. 'I Amor whut'enne ooghu yuschoot inle', saluzti be 'ink'ez sk'aza be."

- 1 'Ink'ez Jacob duye'ke buka'dani 'ink'ez 'utni, "'Ilhoozahdilh 'et de sih nohbulh dawhutanelh la 'udek'ez dzin nohudutasnelh.
- 2 'Ilhoozahdilh 'ink'ez oozulhts'ai Jacob ooye'ke  
'ink'ez nohbá Israel oozulhts'ai.
- 3 Reuben nyun 'udetso sye' whuzdli-un inli.  
Ndai la be ustus-i 'ink'ez 'udechoo be ustus suli'-i,  
ndai la ilhoh tune' zust'en-un 'ink'ez dalcho-i be be ustus-i cha.
- 4 Too nudutunne oot'aniuзнootan ait'oh.  
'Aw hoonzoo lhotuzan'el mbá oolili k'ut 'et inte'  
'ink'ez whudutsun whuzilhtsi.  
Ndai la ook'oste'-i 'i ookw'ut inte' 'et huwa.
- 5 Simeon 'ink'ez Levi bulh lhulhutsinke hudli.  
Be dzoh ne'udzut-i bubulh 'unt'oh,  
ndet la huwhut'i-un.
- 6 'Aw szul buzih neooya' junih.  
Be dasti'-i, ndet la huwhut'i-un bubulh 'uyot'e' junih.  
Huhunilch'e whe dune huzilghhi 'et huwa,  
'ink'ez k'une' hut'en whe musdoos dune kechun dugha hininguz.
- 7 Bube huske-i ookw'ehookeh,  
tube be oonujut 'et huwa.  
Huye huske-i tube ookw'ehunduda.  
Jacob 'et lhk'e butistelh 'ink'ez Israel 'et lhelhdun nebutastelh.
- 8 Judah nyun 'utant'elh,  
nyulhutsinke nyuhudutalhti'.  
Nla 'i mbene la nch'az ditnine buk'udutalni,  
mbá buzkeh 'enne mbut yo 'uhuntitsulh.
- 9 Judah 'i khuna-iti lion huyulhni,  
'i ooyaz 'unt'oh.  
Ndai la inghan-i sye',  
'i bulh ndo 'inja.  
Yo untut'aih 'ink'ez khuna-iti lion huyulhni,  
'i k'un'a usti 'ink'ez khuna-iti lion unli de,  
mbe suba hinolhch'eh?
- 10 Ndai la lerwene tuz nuhidutun-i,  
'i Judah yuyit lhe'tist'el.  
'Ink'ez keyoh huwuni ook'une' whut'en-i, 'i 'aw ooke eguz whuch'a naodzit  
ait'oh,  
Shiloh whusainya 'et whuts'un.  
'Ink'ez dunene 'en buk'oh ts'e hik'une' oot'en ha.
- 11 Oodonkey 'i nyoo duchun nudunulhye 'idutaguz,  
'ink'ez donkey ooyaz 'i duchun nudunulhye 'i soo 'uk'enus unzoo yuzih  
neitalhtelh.
- Dunaih 'i ts'ekoo too' be tunayuzguz,  
'ink'ez dunaih 'i mai ts'ekoo too' huyilh-i,  
i ootoo 'i be tunayuzguz.
- 12 Oona 'i ts'ekoo too' anus dunulhgus,  
'ink'ez ooghoo lilet anus 'ulhyul
- 13 Zebulun 'en yatooba hoonzoo-un 'et whutit'elh.  
Ndai la ts'i yanakuk-i,  
'i ba, 'ink'ez keyoh Sidon 'et whuzih whutit'elh.
- 14 Issachar 'en donkey ulhtus-i 'unt'oh.  
Ndai ndaz-i yeguz nanki, 'i 'et tit'elh.
- 15 Nats'ulyiz-un hoonzoo-un 'et hon'en  
'ink'ez yun k'ut hoonzoo 'utighelh wheni yo 'utinelh.

- 'Ink'ez 'ulhna didohne huzdli'.  
 16 Dan 'en dudune 'ne buba nahutiyeh.  
 Israel 'ilho didohne oots'u haindene 'enne 'uhint'oh.  
 17 Dan 'en ti whuzih tl'ughus, viper, tileh.  
 Tl'ughus 'oolch'oolh-i ti whuzih,  
 'ink'ez yeztl'i k'ents'ul cha oolhch'oolh.  
 'Ink'ez mbe la yuk'usda-un 'en k'oh un'a yuk'udutildus.  
 18 O Moodihti (Yahweh) ndet la whesutalhyih-un hubas'e!  
 19 Gad 'en lhuganne didohne 'enne hik'ut nutidulh,  
 'et hoonts'i 'udek'oh 'et whuch'a' tilhdoh.  
 20 Asher ut'alh-i oots'u hayults'uk-i,  
 'i tube dutati', 'ink'ez nzoo-i oots'u hatikulh.  
 21 Naphtali 'en yezts'e oolazditni-i le'unt'oh,  
 khuni nzoo-i za huwa'aih.  
 22 Joseph 'en duchun zooschum cho oots'a ha'ukat-i unli.  
 Too k'et whuzih 'et oots'a hakat-i 'uzooschum unli.  
 'Ink'ez be 'uzoozchum nyo sih hukw'ut ndulcho whe hoonli.  
 23 Mbene la k'aza be lhuganne tube hidzi undalhdha'.  
 Nuhinultso 'ink'ez huts'uditni.  
 24 'Et hoonts'i ook'aza ulhtus-un 'et za 'unt'oh inle'.  
 'Ink'ez oogan 'i cha 'onus oonut'i lhtus suli'.  
 Jacob ooYak'usda (Elohim) be oonujut-un ulhtus-un,  
 oola 'i be 'unt'oh (en 'Usbai Ghunli-un unli, Israel Whutse' 'unt'oh).  
 25 Mbá ooYak'usda (El)\*, 'en nla'utinelh.  
 'Ink'ez 'Uk'enus 'Ultus-un (EL Shaddai),  
 'en soo hoonzoo-i za ntl'aookat.  
 Yak'uz ts'e hakat-i, 'i be mba soo hoonzoo-i ntl'aookat.  
 Yatoo t'ah ts'e hoonli 'i be cha mba soo hoonzoo-i whutaleh.  
 Ts'ekoo buts'oo' ts'oodunne huye 'ulhtuk-i be  
 'ink'ez ts'ekoo buchán cha mba soo hoonzoo-i ntl'aookat whutaleh.  
 26 Mbá soo hoonzoo-i nohtl'aookat,  
 'i stsoda'ne 'onus soo hoonzoo-i za butl'ayilts'ut,  
 whanus unzoo suli'.  
 Ndo yak'uz 'ilhiz wheni nodist'ai-un soo 'uk'enus nilhdza'-un 'et whuts'un,  
 'i Joseph ootsi k'ut 'utit'elh 'ink'ez ootsit'ah hukw'ut,  
 'i bulhutsinke anus 'utit'elh.  
 27 Benjamin 'en yus tube ooye'ilts'ul-i unli,  
 bundada' 'et si yuzillghi-i yoo'alh,  
 'ink'ez 'ulhdzis 'et ndai la yughan-i,  
 oogha yunkat-i lkh'e'yulih.  
 28 Nduhne 'enne ts'iyawh Israel ts'u haindene whunizyane 'on 'at nane  
 didohne, 'et ndi khuni 'i be buba hubulh yailhduk 'ink'ez soo hoonzoo-i  
 buts'un tizoo', lhoghun hinli whe nts'en'a la didutch'oh soo hoonzoo-i be  
 ubulh yalhduk.

*Jacob dazsai 'ink'ez 'ahuyalhti*

\* 49:25 Ndi boozi' El, 'i "Yak'usda 'En Ts'iyai-i Anus Ulhtus-un 'Unt'oh," ni whe 'utni. Sizi Gri 'en cha ts'iyai-i anus ulhtus-un 'unt'oh. Whuz un'a Sizi Gri dant'oh unli. 'Et John Ooba Ts'et Hahónkat-un 1:8 whe neMoodihti Sizi Gri njan ndutni, "Si 'ust'oh Alpha 'ink'ez Omega usli. 'Udechoo whe'whudit'en-un 'ink'ez 'etsul 'wuhutánelh-un, 'en 'ust'oh. Mbe usli 'ink'ez 'ist\*'-un, 'ink'ez whusat'yalh-un 'ust'oh, 'ink'ez ts'iyai-i anus ulhtus-un, 'en 'ust'oh." 'Et Matthew Uk'unéyuzguz 3:11, John Ooba Ts'et Hahónkat-un 4:8, 11:17, 'ink'ez 16:5-7 'et cha nduwútni.

29 'Et 'ink'ez 'ubulhni, “Awet sulh dune'ne, ubulh 'ist'e'ne 'enne 'awet buts'un tisyalh. Ndet la tse'an Ephron yun k'ut 'i Hitt whut'en-un 'unt'oh, 'en ootse'an 'et sbákene bubulh 'asoolhtelh,

30 tse'an 'et Machpelah yun k'ut 'et 'uhoont'oh, Mamre whutso Canaan yun k'ut 'i Abraham, Ephron, Hitt whut'en-un unli-un, 'en ooyun, ts'unk'ut wheni 'et honket.

31 'Et Abraham 'ink'ez Sarah oo'at bulh cha 'abuhalhti, 'et Isaac 'ink'ez oo'at Rebekah bulh cha 'abuhalhti, 'ink'ez si cha 'et Leah 'asti.

32 Ndai la yun 'ink'ez tse'an ook'uwhuz'ai-i, 'i Heth ooye'kene ts'un huyonket.”

33 'Ink'ez Jacob 'awet buzkeh hubulh yalhduk-un 'etsul 'udija whe, lili k'enadil'ez 'ink'ez 'udek'ez hanajiz. 'Ink'ez whutsoda' oonatneke bubulh 'unt'ohne 'enne buts'un whenya.

## 50

1 'Et Joseph dubá yunin k'echaniti 'ink'ez yuk'ut intse 'ink'ez naidits'ooz.

2 'Ink'ez Joseph yuba 'ut'enne, yoo be duyunne, 'enne dubá oozi lhahidooleh hubulhni. 'Et yoo be duyunne, 'enne Israel oozi yesa' soo' tit'elhi, 'i be highaizna.

3 Dit whunizyat dzin (40) 'et whuz un'a huba' hoont'oh ts'et ubuhulhti, 'ink'ez buk'enihunudleh. Whuz un'a buzih lhadulyanne, 'ink'ez Egypt whut'enne, 'enne lhtak'ant'it whunizyat dzin (70) 'et hik'enudleh whe inle'.

4 'Et 'awet ndi dzin lhaoodinla 'et Joseph, Pharaoh ooyoh whut'ine hubulhni, “Andit nohna soo ts'ih'un sulh newhuna'ai de, 'et Pharaoh soo nehoozulhts'ai, 'en dudoohni',

5 “Ubá oots'un nahizusya whe njan dudusni, “Whunilh'en 'awet datisah. Ndet la sts'un k'ut, Canaan yun k'ut 'uwhusla-un 'et 'asolhtelh,” sulhni. 'Et huwa sladinih, 'ubá 'atistelh 'ink'ez la whusanaoosja.”

6 'Ink'ez Pharaoh 'utni, “Whuz inyalh 'ink'ez mbá 'ailhtih, khuni daja dini la oots'u nahizinya-i k'un'a.”

7 'Et Joseph whuz dubá whenayalhti 'aitilhtelh ha, mbene la Pharaoh yuba 'ut'enne cha ts'iyawh hiyulh whendil. Ooyoh 'udetso whudilh dzulhne, 'enne cha 'ink'ez Egypt yun k'ut 'udetso whudilh dzulhne, 'enne cha hiyulh whendil.

8 Joseph ooyoh whut'ine, bulhutsinke 'ink'ez oobá ooyoh dilhts'ine cha ts'iyawh hiyulh whendil. Ts'oodunne 'ink'ez bughuna' cha, musdoos cha, 'ink'ez ts'iyawh nyo Goshen whuyun k'ut 'et neboninla.

9 'Et yeztl'i 'ink'ez nyowhi huye nudilh-i huye 'uzdla-i cha tubeh lhane dune 'ilhozdil

10 'Et nyo Atad ooch'e' lhes mai' dunuldus-un, 'et nehunindil, Jordan whanoo' 'uhoont'oh, 'ink'ez soo tube 'et hik'eniudle. 'Et Joseph 'en lhtak'ant'it dzin 'et dubá yuk'enudleh whe inle'.

11 'Et nyo Canaan whut'enne dune nyo lhes mai' dunuldus-un 'et hik'enudleh whunilh'en, 'et whuhunilh'en 'ink'ez 'uhutni, “Njan 'et tube Egypt whut'enne hukw'ehunduda whe hik'enudleh.” 'Et huwa ooboozih Abel Mizraim, Jordan whanoo' whuz'aih 'i hoozi' huyulhtsi.

12 'Et duye'ke daja hubulhni la, whuz un'a 'uhuyinla.

13 Ooye'ke Canaan keyoh ts'e nahuyoolhti 'ink'ez nyo Machpelah yun 'et tse'an 'et 'ahayalhti, Mamre whutso 'et Abraham nyoo yun Ephron, Hitt whut'en-un, 'en ts'un yonket ts'unk'ut wheni.

14 'Et Joseph dubá 'ayalhti whe 'et Egypt ts'u naoosja, bulhutsinke cha, yulh nusudilne 'enne cha ts'iyawh whuz nahoosdil.



*Joseph bulhutsinke soo na'budutni*

<sup>15</sup> 'Et Joseph bulhutsinke bubá 'awet dazsai 'et 'uhutni, "Joseph nets'u dootni tilah, dats'inla la hoonts'i hukw'un'a 'uts'inla 'et tilah neba k'elha hoolhtselh."

<sup>16</sup> 'Et Joseph hits'otl'a khuni in'ai 'uhuyulhni, "Mbá datitsah whutso njan ndutni,

<sup>17</sup> "Et Joseph dohni', 'Nts'u tezdudlih, nyulhutsinke buba whunahodolnoh 'ink'ez wheninta' hunt'en cha tube hoonts'i k'un'a 'unyuhinla, 'et huwa mbá ooYak'usda (Elohim) ba 'ut'enne, 'enne buba whunahoodolnoh." 'Ink'ez Joseph intse hiyulh yailhduk whe.

<sup>18</sup> 'Et bulhutsinke 'enne cha hinin ts'e 'et hibut nahankat 'ink'ez 'uhutni, "Whunilh'en mba 'ut'enne ts'inli."

<sup>19</sup> Joseph 'ubulhni, "Whenulhjut iloh. Yak'usda (Elohim) 'en la ook'edusda whe' duhni?

<sup>20</sup> 'Et nohni tube hoontsi' hukw'un'a 'usutilelh k'un'a 'usuhla, 'et hoonts'i Yak'usda (Elohim) 'en ooba hoonzoo hukw'una 'uhoonla, 'andit dzin wheni dune lhane hubutisyih ha.

<sup>21</sup> 'Et huwa whenulhjut iloh, nohuzkehyaz cha nohni cha ts'iyai be lhanohdutisleh." 'Ink'ez k'enabunin'a 'ink'ez soo cho khuni nzoo-i be bubulh yailhduk.

*Joseph dazsai*

<sup>22</sup> 'Et Joseph Egypt yun k'ut 'et hoot'e', dich'oh cha 'ink'ez oobá ooyoh whut'ine inle'ne, 'enne cha 'ink'ez Joseph whunizyat whunizyai 'on 'at whunizyai (110) yus k'ut 'et khana.

<sup>23</sup> Joseph 'et Ephraim buzkeh tawh whudidoh whuts'un bunalh'en, Machir buzkeh Manasseh ooye', 'enne cha Joseph oogw'ut k'ut 'et hunizyai.

<sup>24</sup> 'Ink'ez Joseph dulhutsinke 'ubulhni, "Awet datisah, 'et hoonts'i Yak'usda (Elohim) 'alha nohts'un nutiyalh 'ink'ez ndi yun ch'a nanohtalelh, 'ink'ez Abraham, Isaac 'ink'ez Jacob cha yun buts'i yoozi'-i, whuz nanohtilelh."

<sup>25</sup> 'Et Joseph, Israel buzkeh hits'u nahizya 'et 'ubulhni, "Alha Yak'usda (Elohim) nohts'un nutiyalh 'ink'ez usts'un 'i njan whuch'a naoooleh."

<sup>26</sup> 'Et Joseph dazsai, 110 be yus k'ut 'ink'ez hizi sa' soo' tit'elh huba lhahidinla 'ink'ez Egypt 'et chunkelh 'et hitalhtelh ha.

## Yak'usda Ooghuni Unzoo-i Matthew 'Uk'unéyuzguz-i

### *Sizi Gri ubé dinzutne*

<sup>1</sup> Ndi 'udustl'us 'uk'eguz-un 'et dutni, 'i be Sizi Gri 'en ubé dinzutne 'uhínt'oh, 'i Sizi David ts'u hainzut-un 'unt'oh. David 'en Abraham ts'u hainzut-un 'unt'oh.

<sup>2</sup> Abraham 'en Isaac oobá 'unt'oh.

Isaac 'en Jacob oobá 'unt'oh.

Jacob 'en Judah 'ink'ez bulhutsinke bubá 'unt'oh.

<sup>3</sup> Judah 'en nyoon ts'eke Tamar 'en be Perez 'ink'ez Zerah bubá 'unt'oh.

Perez Hezron oobá 'ink'ez Hezron Ram oobá 'unt'oh.

<sup>4</sup> Ram 'en Amminadab oobá.

Amminadab Nashon oobá,

'ink'ez Nashon Salmon oobá 'unt'oh.

<sup>5</sup> Salmon oo'at Rahab 'en be Boaz oobá. Boaz Ruth 'en be Obed oobá.

'Ink'ez Obed Jesse oobá 'unt'oh.

<sup>6</sup> Jesse lerwe David oobá.

'Et lerwe David, mbe la Uriah oo'at inle'-un, 'en be Solomon oobá 'unt'oh.

<sup>7</sup> Solomon Rehoboam oobá.

Rehoboam Abijah oobá,

'ink'ez Abijah Asa oobá 'unt'oh.

<sup>8</sup> Asa Jehoshaphat oobá.

Jehoshaphat Joram oobá,

'ink'ez Joram Uzziah oobá 'unt'oh.

<sup>9</sup> Uzziah Jotham oobá.

Jotham Ahaz oobá,

'ink'ez Ahaz Hezekiah oobá 'unt'oh.

<sup>10</sup> Hezekiah Manasseh oobá.

Manasseh Amon oobá,

'ink'ez Amon Josiah oobá 'unt'oh.

<sup>11</sup> 'Oh da' 'oh whuya whudizulh whe ts'iyanne dune keyoh whuti Babylon ts'e whebuanla, 'et Josiah 'en Jeconiah 'ink'ez bulhutsinke 'enne bubá 'unt'oh.

<sup>12</sup> Keyoh whuti Babylon whuz whebuanla hukw'elh'az 'et Jaconiah Shealtiel oobá 'unt'oh.

Shealtiel Zurubbabel oobá 'unt'oh.

<sup>13</sup> Zerubbabel Abiud oobá.

Abiud Eliakim oobá,

'ink'ez Eliakim Azor oobá 'unt'oh.

<sup>14</sup> Azor Zadok oobá.

Zadok Achim oobá,

'ink'ez Achim Eliud oobá 'unt'oh.

<sup>15</sup> Eliud Eleazor oobá.

Eleazor Matthan oobá,

'ink'ez Matthan Jacob oobá 'unt'oh.

<sup>16</sup> Jacob Joseph oobá 'unt'oh.

'En Mary ooki 'ink'ez Mary 'en be Sizi whuzdli. 'En Christ huyulhni.

17 'Inka Abraham David whuts'un, 'enne ts'iyawh whunizyat 'on 'at dit-un bubé dindene 'uhint'oh. 'Ink'ez David 'oh da' whudizulh whe ts'iyanne keyoh whut'enne Babylon ts'e whebuhlanla whuts'un, 'enne ts'iyawh whunizyat 'on 'at dit-un bubé dindene hinli. 'Ink'ez 'oh da' whudizulh whe ts'iyanne keyoh Babylon ts'e whebuhlanla 'et hukw'elh'uz dich'oh dukeyoh yun k'ut Judah, whuz whenáhidil, Christ 'et whuts'un, 'enne ts'iyawh whunizyat 'on 'at dit-un bubé dindene hinli whe hint'oh.

### *Sizi Gri whuzdli-un*

18 'Et 'awet Sizi Gri whuzdli-un, ndiz un'a 'uhooja. Ooloo Mary 'en Joseph 'en yughu tidalh ha lhahódinla, 'ink'ez yughu tidalh whutso whe 'et nahoon'ai 'uda' ts'oodun ba 'unt'oh. Ndoni, 'i be 'uja.

19 'Et ndun Joseph 'en ts'ih'un dune unli, 'et huwa lhgho tikelh ts'iyanne toh yooya yoolhtselh whuch'a dudeni lhaidinla. 'Ink'ez whu'iz yuch'a natidalh hukwa' ninzun.

20 'Et howu nuni nuzut whe 'et huwu nusúti whe neMoodihti oolizas 'en yulhni, "Joseph David oots'u hainzut-un inli whe 'int'oh. Wheniljut iloh whe Mary n'at tileh. Ndun ts'oodun Ndoni be chainya whe 'unt'oh.

21 'Et 'awet ooyaz, duneyaz tileh. Nyunch'oh boozi' oogha ídon'alh. Sizi dóni'. 'En 'utinelh ts'iyanne lubeshi ch'a ubutilhyih."

22 'Et ndiz un'a 'uhooja, neMoodihti nyoon nus hoo'en-un, 'en be daja ni la, whunilhchoh 'oh túne'whust'en. 'Et nyoon nus hoo'en-un ndiz un'a nja dutni,

23 "Soo zullhts'ai ndun ts'eke 'aw dune t'enusun-un 'et hoonts'i khunsul ts'oodun ba 'uja, 'ink'ez ooyaz dune tileh, boozi' Emmanuel hidutánelh, Yak'usda nebulh 'únt'oh, ni whe utni."

24 'Inka Joseph ts'enzut whe neMoodihti oolizas daja yulhni la, 'oh tune' 'ust'en 'ink'ez 'awet Mary yilhchoot oo'at yutáleh ha.

25 'Udechoo ooyaz whutileh t'oonanzin 'et whuts'un 'aw yut'álhasnai. 'Et 'awet ooye' whuzdli, 'et 'andit za soo yughusda. 'Inka boozi' yugha ídin'ai Sizi yulhni.

## 2

### *Dune whunihne, Majine hubuwhútnine, 'enne Jerusalem ts'e hoozdil*

1 'Et 'awet yun k'ut Judea, keyoh Bethlehem whuz'ai-un, 'et Sizi whuzdli. 'Oh da' whuz un'a Herod lerwe unli whe 'et 'uhooja. 'Et 'awet whuzdli hukw'elh'az khunsul nda' whut'enne keyoh Jerusalem ts'e hoozdil. 'Enne whunihne Majine hubuwhútnine, 'enne 'uhint'oh.

2 'Ink'ez dune hoodulhkut, "Lizwifne bulerwe 'andit whuzdli-un, 'en nts'e whuzdli? 'Et ndi sum cho ts'an'en, 'i gha lhuts'úzdil. 'Et huwa ndaz de ndun ts'oodun 'en oots'un teni' ts'untilhdzilh ha whusats'ándilh."

3 'Et hoonts'i lerwe Herod whulh udants'o whe ooba dzoh 'uhutni. Jerusalem whut'enne, 'enne cha whuz un'a za buba dzoh 'uhutni.

4 'Ink'ez ts'iyanne ba lubret bumoodihne 'ink'ez Moses be 'udust'us 'uk'ununáguzne cha, 'enne ts'iyawh Herod 'anih ubudani'. 'Et 'enne buts'un nahootá'alh Christ ndet whutileh.

5 'Ink'ez huyulhni, "Yun k'ut Judea, keyoh Bethlehem whuz'ai-un, 'et whutileh. Ndet la nus hoo'en-un 'et 'uk'ehónguz-un, 'et whuz un'a nja dutni,

6 'Yun k'ut Judea ts'e keyoh Bethlehem whut'enne, 'et nohkeyoh hoontsool-unyaz hoonli,

'et hoonts'i tube whudiziti' fileh.

'Alha nohkeyoh 'et whuts'un 'ilhoghun moodih ncha-un, 'et whusatiyalh. 'Ink'ez sdune'ne,

Israel oots'u haindene,  
'enne 'usbai ghunline k'un'a bughu tileh.' "

7 'Et Herod whu'iz whe ndunne whunihne 'anah ubudáni'. 'Enne buts'un nahootá'ah ha 'et soo ndet dzin nts'oya hoozulh whe ndi sum be hóodiltsai.

8 'Et hukw'elh'az keyoh Bethlehem ts'e whebalh'a' 'ink'ez ndúbulhni, "Ah-dulh 'ink'ez howa 'óohli whe ts'oodun nalhtih. 'Et nawhah'ai de, nts'e 'unt'oh 'et sts'ótl'a khuni ooh'alh. Si cha whuz tisyalh oots'u teni' ntisdzilh ha."

9 'Et lerwe 'et ndúbulhni whe 'aho whehándil. 'oh whuya hidulh whe khunsul ndai la ndi sum ndaz ts'e hinalh'en-i, 'i hitilh'en 'ink'ez 'ants'i butso ults'ulh. 'Et nts'e la ts'oodun usda-un 'on do, 'et lhghá nelts'ut.

10 'Et ndet la sum hinalh'en da' 'uk'enus huhóont'i' k'et 'aw 'uhoot'e' ait'oh.

11 'Et 'ink'ez yoh dahunindil whe ndun ts'oodun hitilh'en. Ooloo Mary 'en cha 'et usda. Hibut nachánilya 'ink'ez hits'un teni' nalhdzun. Unzoo-i huye 'úzdlá-i hidah lhch'az hiyilhchoot whe ndai la unzoo-i hiyé hahúyanla 'ink'ez hits'u hitilh'il. Gold, yoo sooltsun-i frankencense huyulhni, 'ink'ez yoo Myrrh huyulhni cha, 'i ts'iyawh hits'u hitilh'il.

12 'Ink'ez Yak'usda bubul be bugha dáni' 'et 'aw Herod 'en ookw'unaoohdilh junih budáni' 'Et huwa 'uts'o whuya dukeyoh ts'e whenáhidilh.

*Joseph, Mary te, 'ink'ez Sizi bulh yun k'ut Egypt ts'uwhútni, whuz whehándil*

13 'Et 'awet whunáhíidil hukw'elh'az neMoodihti oolizas Joseph nute whe benghun whe hóodiltsai. 'Et 'uyulhni, "Dudinyaih, ndun ts'oodun ooloo bulh ubilhchoot 'ink'ez yun k'ut Egypt 'a cho whuz ubalhtelh! 'Et nohdutásnelh 'et whuts'un 'et dólhts'i'! 'Et 'awet 'áho Herod ts'oodun yuka it'á'elh yutuzil-hghelh ha!"

14 'Inka 'ulhdzis dunadija 'ink'ez ts'oodun ooloo bulh ubilhchoot 'ink'ez yun k'ut Egypt ts'outni whuz whehándil.

15 'Et Herod datitsah whuts'un 'et 'udutá'lt's'ilh. 'Et ndúhut'en whe neMoodihti nyoon nus hoo'en-un, 'en be daja ni la 'et whunilhchoh 'oh tune' whust'en whe nja dutni, "Sye' 'anah dasni' yun k'ut Egypt whuch'a naooja' ha."

*Lerwe Herod lhuganne ubulhni, "Keyoh Bethlehem ts'e duneyaz nat yus k'ut be suli'ne, 'enne ts'iyawh huboohghan"*

16 'Et 'awet Herod t'oonanzin ndunne whunihne, Majine huyulhni, nahan'a, 'et huwa tube hunilch'e. 'Inka nts'oya hoozulh Majine hidáni' whe whulöhne lhuganne keyoh Bethlehem ts'e whebalh'a'. 'Et 'ubulhni, 'et keyoh whut'enne ts'iyawh 'ink'ez whunat whut'enne cha mbene la duneyaz nat yus k'ut be suli'ne 'ink'ez whuts'un whudilhhdzulhne cha, 'enne ts'iyawh huboohghan.

17 'Et whuz un'a nyoon nus hoo'en-un Jeremiah huyulhni, daja ni la 'et ts'iyawh whunilhchoh 'oh tune' whust'en whe nja dutni,

18 "Et keyoh Ramah buyiz dahts'o da' tso yahalhduk

'ink'ez duduzkeh k'ehúntai.

Rachel ts'oodunne buk'etso yahalhduk.

'Aw budzi do na'otneh ait'oh,

bubuzkehke gak huzdli' 'et huwa."

*Joseph, Mary, Sizi cha, keyoh Nazareth huwhútni hudutá'lt's'ilh*

19 'Awet Herod dazsai whe' hoont'oh. 'Et 'awet Egypt yun k'ut ts'e neMoodihti oolizas Joseph huwunute whe benghun néwhults'ut.

20 'Et ndúyulhni, “Dudinyaih! Ts'oodun duloo bulh nabilhchoot. Israel yun k'ut whuz nahdulh. 'Et whutso da' mbene la ts'oodun yukúniztaine hituzilghel ha, ts'iyawh yahadla.”

21 'Inka dudinya. Ts'oodun duloo bulh nabilhchoot 'ink'ez Israel yun k'ut ts'e whenáhidil.

22 'Et hoonts'i Joseph whulh udants'o Herod ooye' Archelaus huyulhni, 'en dubá k'edanya 'ink'ez 'andit Judea yun k'ut whulerwe unli. 'Et whuz tiyalh whe nuljut whe howu nusúti 'et Yak'usda yugha dáni'. 'Et huwa Galilee yun k'ut ts'e whuz whehándil.

23 Whuz hoozdil whe keyoh Nazareth huwhútni, 'et hudutáts'ilh. 'Et whuz un'a nus hoo'enne daja hutni la, 'oh túne'whust'en whe nja duhútni, “'En Nazareth whut'en-un hidutánelh.”

### 3

*John dune too be 'ulh'en-un ts'iyanne ubulhni, “Mbe la Yak'uz k'une' whul'en-un, 'awet nilhduk'w netoh 'utit'elh”*

1 'Et 'oh whuya hoozulh whe John dune too be 'ulh'en-un Judea yun k'ut dune lhuhoot'i ts'e, whuz whinya 'ink'ez dune bulh yalhduk.

2 'Et 'ubulhni, “Noheni náhandunooheh. Mbe la yak'uz k'une' whul'en-un nohtoh 'utit'elh-un, 'awet nilhduk'w.”

3 Ndu 'en nus hoo'en-un Isaiah yughu yalhduk whe nja dutni, “Dune lhuhoot'ih ts'e dune yiz dusts'ai whe 'ultus-un huyih whe nja dutni, 'NeMoodihti ooti lhaoodahleh!

Ooti soo lhts'eoodiz'a ooba whulhtsi.' ”

4 'Ink'ez John dich'oh khuna-i gha, camel huyulhni, 'i ye dune unli 'ink'ez 'uzus se be ts'udilh'oo. Tulk'us cho 'ink'ez ts'ihnatl'uz 'ohwhi ya'alh.

5 'Et 'oh da' dunene ts'iyawh ndunne Jerusalem whut'enne cha, Judea yun k'ut whut'enne cha, 'ink'ez dunene 'et 'ukoh Jordan whut'enne, 'enne ts'iyawh John gho nindil.

6 'Ink'ez dulubeshi ghun hunahuhoolnuk whe 'et nyo 'et 'ukoh Jordan John 'en too be' balh'en.

7 'Et hoonts'i lthane Phariseene 'ink'ez Sadduceene cha, 'enne too be' hutinelh ha highu nindil. 'Et hubunilh'en whe ndúbulhni, “Nohni lubezo tl'ughus buzkehke le'áht'oh! Yak'usda lubeshi 'ulh'enne bubulh huntalch'oh-un, 'et whuz de hóolts'ulh, mbe 'unohulhni whuch'a úlh'wus?

8 Whute lubeshi ch'a noheni nahandunooheh de, ndaht'en-un ts'iyanne t'ehonózin ndaht'oh la.

9 'Ink'ez khun lhts'un njan dudoohntni' junih, wheni Abraham oots'u haindene 'uts'int'oh. 'Alha ts'ih'un un'a nohdusni Yak'usda soo 'ultus whe 'unt'oh, ndi tse 'i hoonts'i 'i be Abraham oots'u haindene ubutilhtselh.

10 Njan soo cho whunulh'en, nohni duchun lé'áht'oh. 'Awet tsetselh be lhadint'oh-un. 'Et nohni whulohne duchun oomai' hooloh-i, 'et ndaht'oh. 'Andit hoonts'i ndai la oomai' hooloh-i, tsetselh oogih tubulh tshídantsel 'ink'ez hidutálh'kun.

11 Noheni nahunduníhla 'et huwa too za-i be too be' nohúsdla. 'Et whuz un'a za 'unohus'en. 'Et hoonts'i 'ilhoghun sk'elh'az whusatiyalh-un, 'en sanus dizi' whe 'unt'oh. 'Aw ookegon 'i hoonts'i ooba nétisidleh huba soo lhe'usdzoo'. Ndu 'en Ndoni 'ink'ez kwun bulh 'i be too be' nohtilh'elh.

12 Lufoos tl'o mai' be tahawhúts'ih-i, 'i 'ahoolhyiz nuyútun. 'Ink'ez ndi tl'o mai' yutahawhúts'ih-i, 'ink'ez yuk'ut 'ut'en-i cha yuk'ut lhadút'ih de, 'ink'ez yuna'ulhdoh. 'Ink'ez ndi mai ndai la lhaduja-i, 'i ts'iyawh deínudzih 'ink'ez

mai bayoh ts'e wheyúli. 'Et hoonts'i ndai la ndi kwun 'aw nalhnusne, ndi oot'ooz, 'i be duták'un," ubulhni.

*John, Sizi too be 'ulya*

<sup>13</sup> 'Et 'awet Sizi Galilee yun k'ut huwhutni ts'e hainya. 'Et Jordan koh ts'oozya John too be' yutilelh ha.

<sup>14</sup> 'Et hoonts'i John dah yúlhni. "Nyun too be' sonleh huba' hoont'oh. 'Ink'ez di ha si sts'ú tinya too be' nyoosdleh ha?"

<sup>15</sup> 'Et hoonts'i Sizi 'uyulhni, "Whute soo cho nilh'en, be ts'ih'un 'uhoont'oh-i, 'et ts'iyawh lhaoodutanelh whe' hoont'oh." 'Et 'awet whute 'et dúyinla.

<sup>16</sup> Sizi too be' yinla whe tooz hanája ibulh 'et 'aho 'en ba 'aho yak'uz daha' dankez 'ink'ez Yak'usda Ooyughi yunilh'en whe ndus de dut'ai, 'i dove huyúlhni, 'i k'un'a Sizi ookw'édinde.

<sup>17</sup> Khunsul ndus de 'uwutni, "Ndun 'en sYe' ook'esi' 'en 'unt'oh, 'ink'ez tube 'en bulh hoonúst'i," ni.

## 4

*Netsudule Sizi tank'us yúnoolht'i hukwa'yulh'en*

<sup>1</sup> 'Awet Sizi nts'e la dune lhuhoot'ih ts'e Ndoni 'onilha Sizi whuz wheyálh'a' netsudule yootáldzih ha.

<sup>2</sup> Dit whunizyat dzin sóo honih, 'et hukw'elh'az 'awet ooye'ílt'sul.

<sup>3</sup> 'Et yóolhdzih-un, 'en yughu ninya 'ink'ez 'uyúlhni, "Alha Yak'usda ooYe' inli de, ndi tse lhes oole' dini."

<sup>4</sup> 'Et hoonts'i Sizi yulhni, "Ndun un'a Yak'usda ooghuni k'ut 'uk'usgus whe nja dutni, "Aw lhes za iloh dune yuk'ukhuna, 'et khuni ts'iyawh Yak'usda daja ni, 'i cha hik'ukhuna.' "

<sup>5</sup> 'Et netsudule keyoh whudizti' ts'e yulh whin'az, 'ink'ez njan lugliz whu-cho 'udedo hukw'ut, 'et soo whuban nenilhya.

<sup>6</sup> 'Ink'ez 'uyulhni, "Alha Yak'usda ooYe' inli de, njan whenghe' dudintneh! 'Alha 'uk'ehooguz whe nja dutni, 'Yak'usda oolizas butl'ahon'ai whe 'enne nyun nka huwuhinli,

'ink'ez dula be do nyuhóotatun, 'et huwa 'aw nke tse t'aonalh ait'oh.' "

<sup>7</sup> 'Et Sizi nduyulhni, "Cha za njan 'uk'ehooguz whe nja dutni, 'Khun te Moodihti nYak'usda 'en nantan'ah hukwa ólhdzih junih! "

<sup>8</sup> 'Et doo cha za netsudule ndi dzulh 'udedo hadít'ai ts'e whuz yulh whin'az. 'Et ndi yun k'ut ndulcho whe whenulhtun lerwene bube 'ut'en k'oh 'ink'ez huyé dizi'-i, 'i cha.

<sup>9</sup> 'Ink'ez 'uyulhni, "Ngwutsi be neninya 'ink'ez sts'u téni' nilhdzun de, 'et de ndi ts'iyawh, nch'e tileh!"

<sup>10</sup> 'Ink'ez Sizi yulhni, "Satan naindalh! 'Et 'uk'ehooguz whe nja dutni, 'Moodihti nYak'usda, 'aw 'en za oobut negwutsi be nets'iyaih, 'ink'ez oots'u téni' uznilhhdzun, 'ink'ez 'en za ba né'ts'ut'en.' "

<sup>11</sup> 'Et 'awet netsudule whenaja 'ink'ez khunsul lizasne whusahándil 'ink'ez hiba ne'ut'en.

*Sizi dune bubulh yawhénilhduk*

<sup>12</sup> 'Awet Sizi whulhúdants'o John 'ahuyan'ai. 'Et huwa Galilee yun k'ut ts'u whinya.

<sup>13</sup> 'Et keyoh Nazareth whuch'a séya 'ink'ez keyoh Capernaum whuz oozya 'ink'ez 'et tidalh. Njan keyoh 'et taba whuz'ai. 'Et lhendun yun k'ut Zebulun 'ink'ez Naphtali lhodin'ai.

14 'Et Isaiah nus hoon'en-un, 'et howu yailhduk-un lhaóodotneh whe nja dutni,

15 "Yun k'ut Zebulun 'ink'ez yun k'ut Naphtali,  
ya too' k'uz wheti 'et whuz'ai.

'Et njan Galilee yun k'ut,  
i 'udun yun k'ut whut'enne,  
'enne buba 'uhoont'oh.

16 Mbene la tsalhgus yo dilhts'ine,  
'enne kwun uncha-i hitilh'en.

Nts'e la yun k'ut sa whus'ih whuz'ai-un,  
ndi sa whus'ih, 'i be daztitsah-i, 'i 'unt'oh.

Mbene la 'et whut'enne, 'enne be hóot'en unli-i,  
'i be buba yulhkai le'hint'oh."

17 'Et whuts'un Sizi dune bubulh yawhénilhduk whe ubúlhni, "Noheni náhandunooheh! Yak'uz k'une' whul'en-un 'awet nilhdukw sulí!."

*Dine lho ha 'ut'enne Sizi, "Anih," ubúlhni*

18 'Awet bungun Galilee taba Sizi 'oh whuya uyalh 'et nane dune lhulhutsinke ubutilh'en. 'Ilhoghun 'en Simon cha huyulhni Peter cha huyulhni, 'et 'ilhoghun bulhutsin 'en Andrew huyulhni. 'Enne lhembilh tahúyalhdil lho ha 'ut'enne hinli.

19 'Ink'ez 'ubulhni, "Nanúlht'oh sunih'us. Dune ha 'ut'enne nohtiselh."

20 'Et 'aho dulembil hiladitni 'ink'ez hik'oh ts'e oot'en ha huyuntiz'az.

21 'Et 'on 'un hidulh 'et doo cha za nane dune tilh'en. 'Enne cha lhulhutsinke Zebedee ooye'ke. 'Ilhoghun James huyulhni 'ink'ez 'ilhoghun John huyulhni. Dubá te ts'i cho be húdilhts'i 'ink'ez dulembil nahuyutl'oo. 'Et Sizi bukahizya.

22 'Et 'aho dubá bughu déhain'az 'awet ye usda whe 'ink'ez Sizi hik'oh ts'e oot'en ha hiyuntiz'az.

*Sizi lhane dune undudáne soo ná'bulh'en*

23 'Et 'awet Galilee yun k'ut Sizi ndulcho nuya whe Lizwifne bulugliz 'et dune bubulh yálhduk. Mbe la yak'uz k'une' whul'en-un, 'en ghun khuni unzoo-i be bubulh yálhduk. Dune toh mbe la ndudane 'ink'ez ooyust'e tétsunne, 'enne cha ts'iyawh soo ná'bulh'en.

24 'Et Syria yun k'ut whut'enne, 'enne cha ts'iyawh hiyulh údits'o. 'Et huwa mbene la lhenyoo dada bé undudane, 'ink'ez mbe la 'on nus bulh 'últs'ulhne cha, mbe la ntsi-i nudúde ooyudindane cha, whusnine cha 'ink'ez ookaootuzukne 'ink'ez delh dusnine cha, 'enne ts'iyawh Sizi ts'u buhoodzla whe ts'iyawh soo ná'binla.

25 'Ink'ez Galilee yun k'ut whut'enne, Decapolis yun k'ut whut'enne cha, 'ink'ez keyoh Jerusalem whut'enne, Judea yun k'ut whut'enne cha, 'ink'ez Jordan koh 'on yah whéya whut'enne cha, 'enne ts'iyawh 'et huldai k'et 'aw 'uzdooni' ait'oh. 'Et 'ultsukne 'ilhunaosdil 'enne ts'iyawh hiyuntizdil.

## 5

*Sizi ubulhni, "Dawhuldzoo-un 'et bughá whults'ut"*

1 'Awet Sizi 'ilhunaosdilne ubunilh'en whe ndo dzulh enun ts'e ndo whinya 'ink'ez 'et nátl'adida'. Mbene yugha hódul'ehne, 'enne hits'oozdil.

2 'Et 'awet whuwhebondunilh'e', 'et nja dúbulhni,

3 "Mbene la ndunne lubeshi 'ulh'enne, 'enne bugha budzi tel'en online,  
'enne yak'uz k'une' whul'en-un ooch'e' huzdli',  
'et huwa 'uk'enus hoonzoo-un bugha whults'ut.

- 4 Mbene la dulubeshi ghu ni unline, 'enne 'uk'enus k'enánit'ane hutileh.  
'Enne 'uhuja 'uk'enus hoonzoo-un bugha whults'ut.
- 5 Mbene la yo údudildzunne,  
'enne ndi yun k'ut buch'e' whutale 'et huwa 'enne 'uk'enus hoonzoo-un  
bugha whults'ut.
- 6 Mbe la Yak'usda ye ts'ih'un 'unt'oh-i tube yuka' ninzunne, 'enne ndet  
hukwa' whuninzun-un, 'et bugha óotalts'ulh.  
'Et huwa 'enne 'uk'enus hoonzoo-un bughá whults'ut.
- 7 Mbe la 'uyoonne gha te'ninzunne, 'enne Yak'usda cha bugha te'untazeh,  
'et huwa 'enne 'ukenus hoonzoo-un bughá whults'ut.
- 8 Mbene la oodzi dutsun lhilohne,  
'enne k'at le Yak'usda huti'elh 'et huwa 'enne 'uk'enus hoonzoo-un bughá  
whults'ut.
- 9 Mbe la ts'ih'un lhts'un 'uhoot'e'ne, 'enne Yak'usda buzkeh ubodutánelh.  
'Et huwa 'uk'enus hoonzoo-un bughá whults'ut.
- 10 Mbene la ts'ih'un 'uhint'oh huwa dzoh nubuhulhdehne, 'enne yak'uz  
k'une' whul'en-un, 'et buch'e' hinli.  
'Et huwa 'uk'enus hoonzoo-un bughá whults'ut.
- 11 Nkede suba dune nohch'az yahutilhduk 'ink'ez dzoh nunohotilhdzut,  
'ink'ez ts'iyaitsuk whuts'it khuni dutsun-i be nohch'a 'uts'un un'a yahutilh-  
duk, 'et si sgha whuz un'a dune dzoh nunohulhdzut de, 'et 'uk'enus hoonzoo-  
un nohghá whults'ut.
- 12 'Et 'andit whuts'un k'udada whunúlhni 'ink'ez 'uk'enus hoonáht'i'! 'Alha  
yak'uz hooncha whe nohba k'elha whutaleh. Soo cho whunulh'en, njan mbe  
la nohtso nus hoo'en inle'ne, 'enne cha whuz un'a za bube huzula inle'.

*Ndi yun k'ut lubeshi 'ulh'enne buba be hoot'en-i 'ink'ez lisel cha léaht'oh*

- 13 Nohni ndi yun k'ut lubeshi 'ulh'enne buba lisel leaht'oh. 'Et hoonts'i  
lisel 'aw nalhuwhúlhnih 'ulh'ih te, nts'en'a suba doo cha lisel oonawhúlni'  
naoodle'? 'Et whuz un'a 'aw hoonli ba lhe'ízoo' whe 'unt'oh. 'I 'ants'i dune  
tehúyulhkuk 'ink'ez hik'unúdlh whe' hoont'oh.
- 14 Ndi yun k'ut dunene buba be hoot'en-i le'aht'oh. 'Aw keyoh whuti dzulh  
k'ewhah'ai de, 'aw whuntoolh'ih aít'oh.
- 15 'Et whuz un'a za dune ndi too dizk'un naidulhk'an 'ink'ez 'aw chalh'yal  
yunedóo'alh aít'oh. 'Et k'us lutab k'eyíta'alh 'ink'ez kwun 'i gha ts'iyanne  
huwhuntl'h'elh.
- 16 'Et whuz un'a za nts'en'a la dune ba be hoot'en-i unli, 'et whuz un'a nohni  
cha nohedútadi. 'I be nohe'ut'en unzoo-i daldzoo' la, 'et whuz un'a dune  
yuntl'h'elh 'ink'ez nohBá yak'uz usda-un, 'en 'uk'enus hidutálhti'."

*Sizi ubulhni, "Moses be 'udustl'us 'ink'ez nus hoo'enne bube' 'udustl'us  
ts'iyawh lhadútisdeh"*

- 17 "Moses be 'udustl'us 'ink'ez nus hoo'enne bube' 'udustl'us 'i gak natiselh  
'et hukwa whusáya noohzin junih. 'I ts'iyawh lhadútisdeh 'et hukwa  
whusáya.
- 18 'Alha' dusni whe nohdusni, Moses be 'udustl'us Hebrew bughuni k'un'a  
hoont'um-unyaz whe 'uk'eguz-un 'ink'ez hoont'um-unyaz usgus-un, ndet  
'uwulh'ni, 'et ts'iyawh 'et ndúhooja de, 'et whuts'un 'aw ndi yun 'ink'ez yak'uz  
cha 'etsul 'uhóneh aít'oh.
- 19 Ndai khuni neghalts'ut-i, 'i k'une' ts'ooot'en huba' hoont'oh, 'aw  
hoontsool-unyaz hoonts'i dune k'uhinínyuz de, 'ink'ez 'uyoonne cha whuz



un'a za whubodutilh'eh, dune ndut'en de, 'et nts'e la yak'uz k'úne' whul'en-un, 'en 'aw hoonli lhiloh-un hidutánelh. 'Et hoonts'i ndi khuni netl'adilts'ut-i, dune ts'iyawh hik'une' 'ut'en de, 'ink'ez 'uyoonne cha whuz un'a 'az whubodutilh'eh, dune ndut'en de, 'et nts'e la yak'uz k'úne' whul'en-un, 'et 'i be ncha-un 'unt'oh hidutánelh.

<sup>20</sup> Ts'ih'un nohdusni ndunne Moses be 'udustl'us 'uk'ununáguzne 'ink'ez Phariseene cha, 'enne hiye ts'ih'un un'a 'unt'oh-i 'ink'ez nohni be ts'ih'un un'a aht'oh-i, 'i buba nus ahzoo de, 'et de za nts'e la yak'uz k'úne' whul'en-un ts'e ts'u tíhdulh.

*Nyulh dune hoonli-unyaz whe nch'az ditni t'ewhunínzun de, ooghu ninya 'ink'ez k'eke naooltselh*

<sup>21</sup> “‘Et whutso da’ whulh udahts'o nts'en'a dune daja hutni whe nja duhutni, ‘Dune solhghelh junih,’ ‘ink'ez mbe la dune silhghi-un, ‘et hukw'un'a buba nahutiye hwe’ hoont'oh.

<sup>22</sup> ‘Et hoonts'i sich'oh 'unohdusni, mbene la 'ants'et dulh dune bulh huln'el'eh de, 'enne ts'iyawh buba nahutideh whe' hoont'oh. ‘Et mbe la dudulh dunene ‘Raca!’ ‘ulh'ine de, ‘et ndi khuni dakeh k'un'a 'nts'i!', ni whe 'utni, 'i gha nahiyilh-un but hutiyin. ‘Ink'ez cha za mbe la dune, ‘Whuzini dune inli whe 'int'oh!’ yulhni de, mbe la ndutnine, 'enne tube whewhúnujut-un kwuncho yo ts'u buhutinoh.

<sup>23</sup> ‘Et huwa hoonliyaz loodel k'ut howa' tán'alh-i, 'ink'ez nyulh dune hoonli-unyaz whe nch'az ditni t'eeonínzun de,

<sup>24</sup> ‘et whutso nyulh dune bulh k'eke nalhoolhtselh. ‘Et hukw'elh'az 'et 'andit za ndai la loodel k'ut huwa' tan'alh-i, 'et huwa óon'alh.

<sup>25</sup> ‘Et khun dune hoonli-unyaz whe nch'az ditni de, 'aho oots'un ts'ih'un na'honleh. ‘Et nahiyilh-un but nényutalhtelh 'et whutso ndóneh. ‘Et 'aw ndúlhinel de, 'en mbe la nch'az ditni-un, 'en nahiyilh-un but nényutalhtelh. ‘Et nahiyilh-un, 'en neilhchuk-un tl'anyutilhtelh 'ink'ez nch'az dána'duta'alh.

<sup>26</sup> Ts'ih'un un'a nohdusni, ndai la ts'iyaitsuk ook'elha whutilhtselh 'et whuts'un, nts'en'a suba whuch'a naoohja'? ‘Aw oohneh ait'oh!

*Mbe la ts'ekeyunilh'en whe dudzi yo whe njan duninzun, “Bulh ninta' tist'elh hukwa' nuszun,” ‘et 'uda' yulh ninta' ant'en whe 'unt'oh*

<sup>27</sup> “‘Et whutso da’ whulh udahts'o nts'en'a dune daja hutni whe nja dúhutni, ‘Uyoon ts'eke bulh ninta' ont'en junih.’

<sup>28</sup> ‘Et hoonts'i sich'oh 'unohdusni mbe la ts'eke yunilh'en whe dudzi yo whe nja duninzun, ‘Bulh ninta' tist'elh hukwa' nuszun,’ ‘et 'uda' yulh ninta' ant'en whe 'unt'oh.

<sup>29</sup> ‘Et nailhni ts'e nyuna 'i be lubeshi inla de, hanón'alh 'ink'ez 'un ntolh'is. ‘Et 'on nus soo' hoont'oh nohyust'e ndulcho dutágun-un whanus soo' hoont'oh whe' hoont'oh.

<sup>30</sup> ‘Ink'ez nailhni ts'e nla be ninta' nint'en de, k'ont'as 'ink'ez 'un tolh'is. ‘Et 'on nus soo' hoont'oh nohyust'e ndulcho dutágun-un whanus soo' hoont'oh.

*Dune ts'eke bulh lhgho dilhts'i-un, 'et 'ilhiz wheni 'otát'elh*

<sup>31</sup> “‘Ink'ez 'et cha ndutni ‘Mbe la du'at 'etsul 'utilelh-un, 'et du'at 'udustl'us ye 'etsul itilelh-i yutl'ayóolhchoos huba' hoont'oh.’

<sup>32</sup> ‘Et hoonts'i sich'oh 'unohdusni oo'at 'uyoon dune bulh ninta' 'ant'en hukw'elh'az 'et huwa za ndi 'udustl'us dai la ye 'etsul itilelh-i yutl'ayóolhchoos huba' hoont'oh. ‘Et whuz un'a ndúlhinel whe du'at 'etsul 'uyinla de, 'et de dich'oh du'at ninta' 'ant'en-un yulhtsih. ‘Ink'ez ndun ts'eke 'uyoon dune ghu nasda de, 'et ndun dune 'en cha ninta' ut'ih-un unli whe 'unt'oh.

*Khun nyunch'oh nghuni k'ónyis junih*

33 “Et doo cha za niz de whudizulh da' ts'iyawh t'eeonáhzun 'uda' dune daja hutni whe nja duhutni, 'Khun nyunch'oh nghuni k'ónyis junih. 'Et k'us neMoodihti whe oots'u nahizinya 'et whunilhchoh hukw'un'a 'ont'en huba' hoont'oh.

34 'Et hoontsi' sich'oh 'unohdusni, khun whuz un'a te ndudóohni junih. Khun 'Yak'uz whunalh 'udusni,' doohtni' junih. 'Alha yak'uz ts'e Yak'usda kw'uts'uzda cho dizti'-i, 'i 'et us'ai.

35 K'us 'Ndi yun k'ut whunalh dusni,' doohtni' junih. Yak'usda duke yuk'udílh'ez-i, 'i 'unt'oh 'et huwa. K'us khun te 'Keyoh Jerusalem whunalh 'udusni,' doohtni' junih. Lerwe k'us dizti'-un ookeyoh whucho 'uhoont'oh 'et huwa.

36 K'us khun te 'Whe khusna-un whenahoosyeh,' junih. 'Aw 'ilhudzin hoontsi' 'aw huwa naoodooh'ah ait'oh 'et huwa.

37 'Et k'us ndiz un'a nja dúdohtni, 'et 'awet 'A,' dahni, 'A,' 'unt'oh. 'Ink'ez "Awúndooh,' dahni de cha, "Awúndooh,' uhoont'oh. 'Et 'uts'un un'a 'udutih-nelh de, 'et de ntsi'-un ts'u hadutídoh whe 'unt'oh.

*Dune ntsi'-un, 'en ooch'az nónt'i*

38 “Et whutso da' whulh udahts'o nts'en'a dune daja hutni inle' whe nja duhutni, 'Dune oona hoos'en silhtsi de, nyunch'oh nyúna be hoos'en tanleh. 'I be kw'elha whutalhtselh. 'Et ooghu dádílhchus de, nyunch'oh nghoo be kw'elha whutalhtselh,' hutni inle'.

39 'Et hoontsi' sich'oh 'unohdusni, dune ntsi'-un k'ól'en junih. 'Et k'us mbe la nailhni ts'e nohnizkuk de, 'et 'intl'us ts'e oots'un nándunont'ah.

40 Khun mbe la nts'oot'an nahiyilh-un but nts'u yuka 'utni de, ndzoot 'i cha ooghá yolhchoos.

41 'Et mbe la dune dawhuldzoh la ha tányalh nyulhni de, 'et nat 'et 'uwuldzoh ts'e bulh haóonya'.

42 'Et mbe la hoonliyaz nts'u há' 'utni de, 'i ooghá yon'alh. Hoonliyaz dughu sinla-un yulhni de, khun ooch'az naool'ah junih.

*Nohch'az ditnine buk'eohtsi'*

43 “Njan cha whulh údahts'o nts'en'a dune daja hutni whe 'et nduhutni, 'Nyenghoh whut'i-un ook'eoontsi' 'ink'ez nch'az ditni-un, 'en oots'u doni'.

44 'Et hoontsi' sich'oh 'unohdusni, nohch'az ditnine hoontsi' buk'eohtsi'. Mbene la denóhdulene, 'enne khuni unzoo-i be bubulh yaóolhduk. Mbene la nohts'u dutnine, 'enne buts'un oohzoo'. 'Et mbene la hoontsi'-un nohts'un ne'hut'en 'ink'ez dzoh nunohulhdzutne, 'enne cha buba tenadoohdli huba' hoont'oh.

45 'Et whuz un'a ts'iyanne whunúlhun nohBá yak'uz usda-un, 'en buzkeh ahli whe 'aht'oh. 'Alha Yak'usda ndi sa ntsi'ne 'ink'ez unzoone lhgha ndi sa buk'idindi. 'Ink'ez ts'ih'un 'unt'ohne 'ink'ez ts'ih'un lhe'it'ohne, 'enne cha lhgha buk'ut nawhúlhtih.

46 Ndiz un'a nja duhoont'oh, mbene nohk'entsi'ne, 'enne za buk'ehtsi' de, di suba nohgha óokat? Gak! Nduhne sooneya nalhdzoohe, 'enne cha whuz un'a za nduhut'en.

47 'Ink'ez nohulhutsinke, 'enne za hadih budahni de, 'et 'uyoonne anus ahzoo na'dunáhzun eh? Gak! Nduhne sooneya nalhdzoohe, 'enne cha whuz un'a za nduhut'en.

48 Ndiz un'a nja dútiht'elh, nohBá yak'uz usda-un, 'en dant'oh whe ts'ih'un 'unt'oh, 'et nohni cha whuz un'a za 'ooht'e' huba' hoont'oh.

## 6

*'Ut'en unzoo-i 'ulh'en de, khun ts'iyanne nalh tube cho whe' 'ududolhti' junih*

1 "Soo cho huwahli! Khun tel'enne gha' tih'alh de, ts'et whucho ndóht'en junih. 'Et whuz un'a ndaht'en de, nohBá yak'uz usda-un, 'en 'aw nohba k'elha hoohltsehl ait'oh.

2 'Et huwa tel'enne gha' tih'alh de, khun ts'iyanne nalh tube cho whe' 'ududolhti' junih. Nduenne duba na'udzoo'ne, 'enne 'et whuz un'a 'et duhút'en. Lizwif bulugliz k'us ti whulheguz-un 'et ts'iyanne ubunoolh'en ha, 'et nduhut'en. 'Alha' dusni, mbene la ba k'elha whutalehne, 'uda' buba k'elha whuzdli' whe' hoont'oh.

3 'Et hoonts'i tel'enne gha' tih'alh de, mbene la 'uk'enus nohts'un unzoone, 'enne hoonts'i bunanto 'oohneh.

4 'Et whuz un'a 'uyoonne t'ehonúszun 'et daht'en whe tel'enne gha 'áh'aih. 'Ink'ez nohBá yak'uz usda-un, 'en dahoont'oh huwa 'et ndaht'en-un, 'et ts'iyawh nohnilh'en whe 'unt'oh. 'Et huwa dich'oh ts'iyanne but hoonzoo whe nohba k'elha whutiltsehl.

*Ndz un'a tenadoohdli huba' hoont'oh*

5 "'Et tenadahdli de, khun duba na'udzoo'ne k'oh ts'e tenadoohdli junih. 'Enne whuz un'a lizwif bulugliz cha nódilhya, k'us ti whulhetoh cha, 'ants'i huhóont'i' whe whuz un'a tenahududli ts'iyanne ubunoolh'en ha. 'Alha' whe nohdúsní, mbe la ndut'enne buba k'elha yutáleh, 'i 'uda' buba k'elha yuzdli' whe' hoont'oh.

6 'Et nohni tenadutihdli de, nohnich'oh whaht'i-un, 'et danaoohdilh 'ink'ez dána'dihtan whe tenadoohdli. 'Et ndaht'en de 'et la nohBá lhist'en-un, 'en 'unt'oh, 'et nts'en'a la 'et ndaht'en de, ts'iyawh nohnilh'en. 'Et huwa dich'oh ts'iyanne nalh nohba k'elha whutiltsehl.

7 'Et tenadahdli de, lhat cho 'oh lhunahoohdeh junih. Whuz un'a lhendun keyoh whut'enne k'un'a tenahududli. 'Enne lhai khuni be tenahududli de, 'i be Yak'usda budutáts'o huninzun 'et huwa.

8 Khun te 'enne buk'un'a 'udoohtni' junih. NohBá ndet hukwa oodutalhkut-un, nohtso da' t'ewhunínzun whe 'unt'oh.

9 'Inka ndiz un'a tenadoohdli, 'NeBá yak'uz sinda.

Nyoozi' dóti'.

10 Dahoont'oh whe lerwe inli, 'et cha nets'ó toolts'it.

Nts'en'a la hukwa' ninzun, 'et ndo honeh.

'Ink'ez ndet la yak'uz ts'e hukwa' ninzun dahooja la, ndi yun k'ut cha, 'et whuz un'a za 'et dúhoneh.

11 Ndai 'andit dzin uzti'ulh-i, negha nín'aih.

12 'Uyoonne bulh dulhyoh ts'uwhulh'ai de, buba whunats'odoolnoh.

'Et whuz un'a za nelubeshi neba oonaoodolnoh.

13 'Ink'ez ntsi'-un, 'en ch'a neghinli.

'Et yak'uz k'une' 'int'en-un 'int'oh, 'ink'ez be ilhtus-i cha,

'ink'ez bé dinti'-i cha, 'i 'ilhiz wheni 'i ts'iyawh nch'e' 'unt'oh.

'Et ndo honeh.'

14 'Et dune nohdulhyoh né'hut'en de, 'ink'ez buba whunaoodúlhnoh de, 'et de nohBá yak'uz usda-un, 'en cha nohba whunaoodutilnoh.

15 'Et hoonts'i dune nohdulhyoh né'hut'en de, 'ink'ez buba whunalhoduzulhnoh de, 'aw nohBá yak'uz usda-un, 'en cha nohba whunaoodoolnoh ait'oh.

*Soo hootahni de, 'et 'onghohne buch'a nonah'i'*

16 “Et ndet soo hóotahnih de, mbe la duba na'udzoo'ne, 'enne buk'un'a 'ooh't'e' junih. 'Et dut'enne, 'enne dudzi yo 'uhilhdzun na'hududil'i whe' hint'oh. 'Ink'ez dunin be te'hududil'en 'ink'ez dzoh nuhuzut na'hududil'i. 'Et whuz un'a 'uyoonne whúbonulhtun nts'en'a la soo huhooni hukw'un'a. 'Alha' whe nohdusni, mbe la ndut'enne buba k'elha yutaleh-i, 'uda' buba k'elha whuzdli' whe' hint'oh.

17 'Et hoonts'i nohni soo hóotahni de, soo cho nena'noohdeh 'ink'ez noht-segha cha naoolhtlo.

18 'Et whuz un'a soo hóotahni de, 'et 'onghohne buch'a nonah'i'. 'Et hoonts'i nohBá lhuhoost'en ts'e hoonts'i whunilh'en, 'en ts'iyanne nalh nohba k'elha whutilhtselh whe' hoont'oh.

*Ndai la yak'uz be hoonzoo' hoont'oh-i, 'i yak'uz ts'e 'et whuz 'ilhoozóhleh*

19 “Ndi yun k'ut oonáht'i'-i 'ilhoozáhle iloh. Ndulh'en de, 'ants'i k'enaditsih 'ink'ez musdziyaz cha gak yutilhtselh. 'Undunut'ihne, 'enne cha nohghu dá'hutiyus 'ink'ez hiduntit'ih.

20 'Et k'us ndai la yak'uz be hoonzoo' hoont'oh-i, 'i yak'uz ts'e 'et whuz 'ilhoozáhla. 'Et whuz un'a 'aw k'enádotsih ait'oh. 'Ink'ez musdziyaz cha 'aw gak yoolhtselh ait'oh. 'Ink'ez 'aw nohghu da'hooyis 'ink'ez nohgh'e' hundunoot'ih ait'oh.

21 'Et huwa ndet la oonáht'i'-i 'ilhoozáhla, ndet 'usdla-un, nohdzi cha 'et za dutá'alh.

*Dune na 'ants'i too dizk'un le'unt'oh*

22 “Et nena 'ants'i neyust'e ba too dizk'un le'unt'oh. 'Et nohna soo 'unt'oh de, 'et nohyust'e be hoot'en-i dizbun.

23 'Et hoonts'i dune na lubeshi be untsi' de, 'et ooyust'e ndulcho whe tsalhgus be dutabun. 'Et huwa ndi be hoot'en nohbulh 'unt'oh tsalhgus k'un'a be hoodat'en de, 'et dáhoolcho-i be suba tsahóhlgus oole'?

*Yak'usda ook'une' 'int'en de, 'aw sooneya cha k'une' 'ont'en ait'oh*

24 “Aw 'ilhoghun dune nane moodih ba 'oot'en ait'oh. 'Et 'ilhoghun 'en yuts'u dutitni 'ink'ez 'ilhoghun yuk'etitsi'. K'us 'ilhoghun yuk'úne' tit'en 'ink'ez 'ilhoghun yuch'az dátatni. 'Aw Yak'usda cha k'une' 'int'en 'ink'ez sooneya cha k'une' 'ont'en ait'oh.

*Yinka dúlhts'i-un huwu ni oohle' junih*

25 “Et huwa njan dunóhdusni, yinka dúlhts'i-un huwu ni oohle' junih. Ndai la tih'ulh-i 'ink'ez ndai la tihnelh-i cha, 'ink'ez nohyust'e soo naidutihleh, 'i cha, 'i ts'iyawh khun ooghu ni oohle' junih. Ndi tih'ulh-i be kháhna-i anus dizi' nahzun eh? K'us naih 'i nohuyust'e anus dizi' nahzun eh?

26 Ndo dut'ai núdilh-i nulh'en! 'Aw 'alhe' nusdloh 'ink'ez 'aw khit huba ilhe'osdle iloh. 'Et hoonts'i nohBá yak'uz usda-un, 'en bugha 'á'aih. 'I iloh lakw buba nus dáhti'?

27 Nohni nohtoh mbe 'unt'oh dalcho tileh howu ni unli? 'Aw 'et huwa 'on nus 'ulyiz oole' ait'oh!

28 'Et huwa di ha be dune tihleh wuni ahli? 'Indaiyaz nts'en'a haniyeh, 'et howu nuni nahzut. 'Aw lhe'hust'en 'ink'ez 'aw naih cha lhe'hulh'en hiye dune tileh ha.

29 'Et nohdusni Solomon 'en hoonts'i soo nadut'ih te, 'aw 'indaiyaz anus lhe'ildzoo'.

30 'Et Yak'usda tl'o unzoo-i yilh'i. 'I 'andit dzin tl'o k'ut haniyeh 'ink'ez bunde 'i tsehidutilhkut 'ink'ez duták'un. 'Et dáhoolcho-i be nohni 'on nus soo nanohdutileh? Nohni 'aw soo cho ooba 'alha lhe'hoot'ohne 'unohdúsní!

31 'Et huwa khun lhoodolhkut junih, di suba ts'oo'alh, k'us di suba ts'ootnai', k'us di suba be dune ts'oole', noohzin junih.

32 'Alha 'udun yun k'ut whut'enne 'et za hukwa hitís'en. 'Ink'ez 'alha 'i be nohBá yak'uz usda-un, ndai hoonliyaz be ts'uwhulhdoh-i, 'et ts'iyawh t'ooninzun.

33 'Et hoonts'i nts'en'a Yak'usda nohba lerwe tileh 'ink'ez be ts'ih'un un'a 'uhoont'oh-i nohch'e' tileh cha, 'et za hukwa' nahzun de, 'et de 'on 'un-i cha njan ts'iyawh nohgha tíkulh whe' hoont'oh.

34 'Et huwa bunde dawhútanelh, 'et howu ni oohle' junih. Bunde whusa-hoolts'ut de, 'et de la howu ni oohle'. Dzin totsuk soo' hoolcho hoontsi'-un whutih'elh 'et huwa.

## 7

### *'Uyoonne ba nahoohyeh junih*

1 "'Uyoonne ba nahoohyeh junih. Doo ka si nohba nahoodeh.

2 Nts'en'a 'uyoonne ba nahahyeh, 'et soo whuz un'a nohba nahutideh. 'Ink'ez nts'en'a 'uyoonne ghu nuni nahdzut, whuz un'a za nohghu nuni huntuzt.

3 'Et di ha nyulhutsin lhusyaz oona k'et diztan, 'i nilh'en, 'et hoonts'i 'aw t'oonuzinzun nyunch'oh duchun cho nyuna k'et diztan?

4 Nts'en'a nyulhutsin 'udutánelh, 'Nyuna k'élts'ut-i nyuna k'ehanaóos'alh, 'ink'ez nyunch'oh lhelcho-i nyuna k'et 'us'ai-i 'aw lhnílh'en?

5 Nyunch'oh duba na'indzoo! 'Udechoo lhelcho-i nyuna k'élts'ut-i, 'i cho nyuna k'éhanain'aih. 'Et de la soo whunilh'en whe oona k'ehanáyon'alh.

6 Yak'usda ooghuni lubeshi ooghu hooloh-un, khun te lhike dult'ohne gha óoh'alh junih. K'us Yak'usda ye whúneodulh'eh-i, 'i kw'usul dizti'-i, pearl huyulhni 'et dult'oh-i, khun gugoos dult'ohne butso naóolhdilh junih. 'Et ndahja de, dulcho hik'unutílh'us 'ink'ez 'aho nohts'u náhulhya 'ink'ez yanoho-dutálhch'ulh.

### *Yak'usda nohts'o hukwa' ninzun-un, 'et Yak'usda hukwa' oodolhkut 'ink'ez nohgha whúta'alh*

7 "'Et nohdusni Yak'usda ndai la ookayoodulhkut-i nohgha íta'alh. Ookunáhta 'ink'ez nahootáh'alh. Dati dunulhkw'uz 'ink'ez nohba dáha'dutikwus.

8 'Et 'oodulhkutne, 'enne Yak'usda bugha whúta'alh. Mbene la hoonliyaz hukunútane, 'enne nahahootá'alh. 'Ink'ez mbene la dati dunulkw'uzne, 'enne Yak'usda buba dáha' dutit'elh.

9 Mbene nohbáke nohtoh, ooye' lhes yuts'u ha 'utni de, 'aw tse yughá nduno'alh ait'oh.

10 K'us lho yuts'u ha 'utni de, 'aw 'i k'et tl'ughus yugha óot'elh ait'oh.

11 'Et ndiz un'a nja duhoont'oh, nohni lubeshi 'ulh'enne ahli, 'et hoonts'i t'oonahzun nts'en'a unzoo-i nohuzke gha tíh'alh. 'Et dáwhulcho-i be 'on nus ndo yak'uz nohBá, mbene la yoodulhkutne, unzoo-i bugha tí'alh.

12 'Et huwa nts'en'a hukwa' nahzun dune danohotilh'elh-un, 'et whuz un'a za nohni cha 'et ndúbooh'en. 'Alha Moses be 'udustl'us cha 'ink'ez nus hoo'enne bube' 'udustl'us cha, 'et náhoolt'oh 'et duwhútni.

*Datí-un hoondat-un*

13 “Njan datí-un hoondat-un 'et hukohdilh huba' hoont'oh. 'Et datí-un 'ink'ez ti hoontel-un, 'et kwuncho yo ts'u ti 'uhoont'oh 'ink'ez lhane whuz whedilh.

14 Njan 'et huwa 'et nduhut'en, njan datí-un hoondat 'ink'ez njan ti 'ilhiz be ts'ukhuna-un 'et howa whulna' whe' hoont'oh. 'Aw lhane iloh nahuhó'aih.

*Dune dahút'en-un, 'et 'i be dahint'oh la t'ebuntihzeh*

15 “Mbene la whuts'it be nus hoo'enne na'dudil'i, 'enne buka huwahli! 'Usbai zuz be soo dint'ohne, 'enne buyo ts'e yus soo 'uk'enus nts'i-i 'enne lé'hint'oh.

16 'Et huwa dahút'en-un, 'et 'i be t'ebuntihzeh. 'Et duje isdloo whus chun gha huyoonuyin eh? K'us ndi mai, figs huyulhni, chuntoh whuduts'ul-un whutoh huyoonuyin eh? 'Awúndoo!

17 'Et whuz un'a za duchun unzoo-i, 'i mai unzoo-i ooghu haniyeh.

18 'Ink'ez duchun dalhjut-i, 'aw mai unzoo-i ooghu hanóoyeh ait'oh.

19 Ts'iya-i duchun 'aw mai unzoo-i ooghu hanooyeh ait'oh, 'i nánuhidutself 'ink'ez hidilhk'un.

20 'Et huwa dune cha whuz un'a duhint'oh. 'Et huwa la t'ebunohzin.

*Yak'usda k'únulhe'ust'enne, 'enne Sizi Gri ooch'e'ne luhiloh*

21 “Aw ts'iyanne, 'SMoodihti, sMoodihti,' sulhnine, 'aw nts'e la yak'uz k'une' ts'uwhul'en-un whuz hutooya' ait'oh. Mbene la 'uBá but's'o hukwa' ninzun tune' 'ut'enne, 'aw 'enne za yak'uz ts'e hutidulh.

22 'Et mbene la njan dzin whusahoolts'ut de, 'SMoodihti sMoodihti, 'alha iloh lakw nyoozi' be nus ts'úhoo'en? Nyoozi' be nts'i-i nududeh-i 'uyoonne bughu whe náts'inanyoot! 'Ink'ez nyoozi' 'i be huwa 'ít'en tune' ts'ut'en.'

23 'Et ndunt'ohne dune ts'iyawh budutásnelh, “Aw t'enohtuzúsun. Sch'a nasahdilh! Nohni 'aw 'uk'unulhe'ust'enne aht'oh!

*Sizi Gri ooghuni soo cho whulh ts'ooyin*

24 “Et huwa mbene la sghuni yoozilht's'aine, 'ink'ez daja dusni-un hukw'une' hut'en, mbe la dune whunih-un duyoh tse k'ut neoonin'ai, 'en k'un'a 'uhint'oh.

25 'Et 'awet náhoonilhtan 'ink'ez too 'awet ulhtus sulí', 'i njan yoh whut'aiznai. Nilhtsi ulhtus-i cha whudilht's'uk. 'Et hoont's'i njan yoh 'aw dalhúhoonel. Njan yoh tse k'ut whuz'ai 'et huwa.

26 'Et hoont's'i mbene la sghuni yudits'one 'ink'ez 'aw hik'unulhe'ust'en de, mbe la dune whusni-un, 'en yoh 'ants'i sai k'ut neoonin'aih, 'en duhúlt'oh.

27 'Et 'awet náhoonilhtan 'ink'ez too 'awet ulhtus sulí', 'i njan yoh whut'aiznai. Nilhtsi ulhtus-i cha whudilht's'uk. 'Ink'ez njan yoh nahóolts'ut. 'Ink'ez wheóonujut whe nahóolts'ut.”

28 'Et Sizi ndi khuni ye bubulh yailhduk, 'i lhaduja whe 'ilhunaosdilne tube buba hooncha.

29 T'eeonínzun daja ni whe whubodalh'e'. Nyoonne mbe la Moses be 'udustl'us k'ut 'uk'ununáguzne, 'aw whuz un'a hubulhodil'h'el.

**8***Dune ooka whulhjut-un Sizi soo na'yinla*

1 'Et 'awet Sizi ndus de shus k'uz hanaja whe lhane dune yunantisdil,

2 whe dune ooka whulhjut-un, 'i leprosy huyúlhni, 'en yududizya 'ink'ez yubut nachaniti 'ink'ez 'uyulhni, “SMoodihti nyun hukwa' ninzun de, ndi ndai la be ilhtus-i 'int'i-i, 'i be suna'ilhdeh.”

3 'Et Sizi dula be yut'aiznai 'ink'ez, "A, hukwa' nuszun. Nyuna'isdeh!" yúlhni. 'Et ooka whulhjut-un, 'et 'aho soo na'uja.

4 'Et Sizi 'uyulhni, "Khun te 'uyoonne doni' junih! 'Et k'us lubret oots'inyalh 'ink'ez ts'ih'un un'a d'ini nyust'e nts'en'a whe soo na'uja 'ink'ez nyunoolh'en. 'Et la Moses be 'udustl'us yuk'uyaoohlduk. 'I gha la ndai huwa tan'alh-i nyudóni'. 'Et whuz un'a ts'iyanne whubuntalhtun dainja whe soo na'inja-un."

*Thoghun Rome whut'enne saldanne bumoodih, 'en ooye' Sizi soo na'yinla*

5 'Awet Sizi keyoh Capernaum ts'u whutni-un ts'oozya whe 'ilhoghun Rome whut'enne saldanne bumoodih, 'en yududizya whe yuts'u tedudli,

6 "SMoodihti se'ustlen k'us unsool-un, 'en njan yoh yun sulhti 'aw delhusni whe tube dzoh nuzut."

7 'Et Sizi yulhni, "Oots'u tisyalh 'ink'ez soo na'tisdlelh."

8 'Et hoontsi' ndun saldanne bumoodih yulhni, "SMoodihti syoh ts'u tanyalh huba 'aw soo lhe'uzdzoo'. 'Ants'i nghuni be 'et ndúdinja de, 'et hoontsi' se'ustlen-un k'us unsool-un soo na'ootnelh la.

9 'Alha si cha 'onghohne sando 'uhint'oh whe hukwa' huninzun tune' suhulh'en. 'Et si cha whuz un'a za saldanne buba ndo 'ust'oh. 'Et 'ilhoghun, 'Inyalh!' dusni de, 'et 'aho whe yaih. 'Et 'uyoon 'Anih,' dúsni de, 'et 'aho sghu yaih. 'Et se'ulhna-un, 'Nja dineh!' dúsni de, 'et 'aho 'et ndút'ih."

10 Sizi ndun dune ndet 'uw'húlhni whulhúdants'o whe tube ba hooncha. 'Et huwa ndunne yunidulhne ubúlhni, "Israel ndulcho whe keyoh, 'aw ndun dune whuz un'a ooba 'alha' hoont'oh-un nalhizústi.

11 'Et nohdusni ndaz de 'ink'ez nooz de lhane whusatidulh whe yak'uz k'une' whul'en-un ts'e 'et Abraham cha, Isaac cha, 'ink'ez Jacob cha, 'enne 'alghoh lhla ná'hutit'ulh.

12 'Et hoontsi' mbene la yak'uz k'une' hool'en huba 'unt'oh inle'ne, 'enne 'az tsahólhgus ts'e hubotilhdulh. 'Et ts'iyawh hutso 'ink'ez dughoo lnehídutik'us."

13 'Et Sizi ndun saldanne bumoodih 'en 'uyulhni, "Awet inyalh! 'Et nts'e whula mba 'alha' 'ust'oh, whuz un'a za mba whutánelh." 'Et soo 'oh whuya 'uwhunit'o whe be' ustlen k'us unsool-un soo na'uja.

*Peter oo'at ooloo, 'en cha Sizi soo na'yinla*

14 'Et Sizi Peter ooyoh daninya whe oo'at ooloo yunilh'en. 'Et lili k'ut sulhti dada nulwus-i be nduda.

15 Yuzih neninya 'ink'ez yula t'aiznai. 'Et 'aho nulwus nduda oots'u hanaidide. 'Et 'aho dunadija 'ink'ez bugha ná'unt'ai.

*Lhane ntsi'-i nududeh ooyudúls'ine, Sizi dughuni be buts'a hábunanyoot*

16 'Et 'awet sa yo tiz'ai whe lhane ntsi'-i nududeh ooyudúls'ine, 'enne Sizi highu bunínla. Dughuni be ntsi'-i nududeh-i buyáhanainanyoot. 'Et ts'iyawh mbe la ndudane, 'enne ts'iyawh soo na'binla.

17 'Et whuz un'a Isaiiah nus hon'en whe ndutni, 'et ts'iyawh 'et ndúhooja. 'Et huwa njan nja dutni,

"Ndai la tetsun neilh'i-i, 'i ts'iyawh neghu nayílhchoot.

'Ink'ez nedada' cha 'et ts'iyawh nets'u hanáhonla."

*Mbe la Sizi Gri ba ne'tit'en-un hukwa' ninzun de, 'et de ndai la ndi yun k'ut hukw'entsi-un, 'et ts'iyawh whuladootni huba' hoont'oh*

18 'Et 'ilhunaosdilne ts'iyawh hinasguz. 'Et Sizi whunalh'en whe 'et mbene la yulh 'ut'enne, 'enne ts'iyawh ubulhni, "Nyan uztooke'."

19 'Et 'ilhoghun Moses be 'udustl'us 'uk'ununáguz-un, 'en yughu ninya whe 'uyulhni, "Nehodulh'eh-un nts'oh tula nutányalh, 'et dulcho nyunún tisyalh hukwa' nuszun."

20 'Et Sizi 'uyulhni, "Soo cho howu nuní ninzut! Nanguz 'enne cha 'an whut'i whe' unt'oh 'ink'ez dut'aiyaz cha t'o ut'i. 'Et hoonts'i yinka dune ye', 'aw hukw'ut tsén tal'alh-un 'et hoonts'i lhuhóot'!'."

21 'Et 'uyoon yugha hodul'eh-un, 'en 'uyulhni, "SMoodihti sba silh'i. 'Udechoo 'ubá' aostelh."

22 'Et hoonts'i Sizi 'uyulhni, "K'at whute, sunanyalh. Dudulh yaidlanne didutch'oh 'anallhuoolyelh."

*Nilhtsi 'ink'ez tatsi bulh 'i hoonts'i Sizi hik'une' 'ut'en*

23 'Et 'awet ts'i beinya 'ink'ez yugha hodul'ehne, 'enne ts'iyawh hiyulh 'úja.

24 Nus huzki ibulh bubulh taoodilts'ut 'ink'ez 'awet ts'i be tawhendunitih, 'et hoonts'i Sizi 'en nanisti.

25 'Ink'ez yugha hodul'ehne, 'enne hits'u whindil ts'enahuyulhts'it. "NeMoodihti nefalhyis! 'Awet too netighan!"

26 'Et 'ubulhni, "Di ha whénulhjut? 'Aw bé 'alha' whut'en-i soo 'últus-i lhaht'i' whe' dahni." Dudinya whe khuniti be hukwa' yudáni' too 'ink'ez nilhtsi bulh yatilhduk, 'ink'ez 'awet dinghel.

27 'Et nyoonne dune buba hooncha whe 'ulhodutni, "Ndun dant'oh-un dune suba 'unt'oh? Nilhtsi 'ink'ez tatsi bulh 'i hoonts'i hik'une' 'ut'en."

*Nane dune ntsi'-i nududeh-i buyudindane, 'enne Sizi ntsi'-i nududeh-i buts'a hanábunanyoot*

28 'Et 'awet nyan hoozki whe ndunne Gergesene buyun k'ut huwhutni, whuz hoozdil. 'Et nane dune highu nin'az. 'Enne ntsi'-i nududeh-i buyudinda. Ndet la nezi 'ahule-un, 'et whuz de hahán'az. Soo ts'ih'un 'uhuninzun k'et 'aw dune buzih noya' ait'oh.

29 'Et khunsul tube cho 'uhutni, "Sizi nyun Yak'usda ooYe' inli whe 'int'oh! Ndet nets'u hukwa' ninzun? Nkede neba whusaóotilts'ulh-un whutso, dzoh nunetalhdzut ha 'inja whusainya?"

30 'Et njan howu nilhdza'-un, gugoos huldlai ndi ndai la butl'ahidantsut-i, 'i huyu'alh.

31 'Inka ntsi'-i nududehne, 'enne hits'u tedudlih whe huyulhni, "Whusanáneuntanyulh de, 'et de nghuz gugoos yúzdoodilh-un netl'ahón'alh."

32 'Et "Ahdulh!" ubulhni. 'Et 'awet ntsi'-i nududeh-i ndunne dune buts'u haídande whe gugoos yudande. 'Aho gugoos bubulh whenghu hilghaz 'ink'ez too ubanghan.

33 'Et ndunne gugoos ghunline, ts'iyawh 'aho keyoh ts'e whehilghaz. 'Ink'ez keyoh whut'enne ts'iyawh bubodáni' dahooja la. Nyoonne nane mbene la ntsi'-i nududeh-i ooyudande inle'ne, 'et dahuja la whunilhchoh hubodáni'.

34 'Aho za 'et keyoh whut'enne, ts'iyawh 'az whehilghaz 'ink'ez Sizi dodizdil. Hítih'en ibulh njan buyun k'ut whuch'a naóoja', 'et hukwa hits'u tedudli.

## 9

*Sizi ndun dune 'et dúyulhni, "Nlubeshi ts'iyawh mba hooloh suli'"*

1 Sizi 'et 'awet ts'i benya 'ink'ez nyan yahúzkih nts'e la dich'oh dukeyoh ts'e.

2 'Aho 'awet ndun delhdusni-un, 'en lili be whusaháyankai. Sizi ubunilh'en 'ink'ez t'eeoninzun buba 'alha' hoont'oh. 'Et délhdusni-un yulhni, "Hadih ts'oodun, do 'un dunilt'i! Nlubeshi ts'iyawh mba hooloh suli'!"



<sup>3</sup> 'Et 'aho za whulohne Moses be 'udustl'us 'uk'ununáguzne 'ulhodutni, "Ndun dune Yak'usda ch'az yalhduk whe 'utni!"

<sup>4</sup> 'Et daja huninzun za Sizi 'et ts'iyawh t'ooninzun. 'Inka ubulhni, "Di ha nohdzi yo whe ntsi'-i za ghu nuni nahzut?"

<sup>5</sup> Nts'en'a suba huwa lhúhoolna' k'un'a uzdooni'? 'Lubeshi mba hooloh sulí,' k'us, 'Dudinyaih 'ink'ez inyalh'?"

<sup>6</sup> 'Et njan t'oonóhzin yinka dune ye', 'en ndi yun k'ut ooba' hoont'oh whe 'unt'oh lubeshi 'un toolhdilh huba' hoont'oh whe 'unt'oh," ubúlhni. 'Ink'ez ndun delhdusni-un, "Dudinyaih 'ink'ez kw'usinti-i nailhchoot 'ink'ez nyoh ts'e naindalh!" yulhni.

<sup>7</sup> 'Et 'aho za dunadíja 'ink'ez duyoh ts'e whenája.

<sup>8</sup> 'Et 'ilhunaoodúlhne ts'iyawh buba hooncha 'ink'ez Yak'usda hudílhti', dunene, 'enne cha butl'ahon'ai whe buba hót'e' ha.

### *Matthew sooneya nahulhdzooch-un*

<sup>9</sup> 'Et hukw'elh'az Sizi 'oh whuya lhuseya whe ndet la sooneya naldzooch-un, 'et 'ilhoghun dune Matthew huyulhni, 'et usda whe yunilh'en. "Sunanyalh," yulhni. 'Et dudinya 'ink'ez hik'oh ts'e oot'en ha yuntizya.

<sup>10</sup> Sizi yeyoh ts'e daninya 'ink'ez buzih usda bula na'utit'ulh. Sooneya 'ilhunaos'aihne 'ink'ez lubeshi 'ulh'enne, 'enne cha yoh dahunindil 'ink'ez Sizi 'ink'ez yugha hodul'ehne bubulh bulanahut'alh.

<sup>11</sup> 'Ink'ez nyoonne Phariseene hinilh'en whe yugha hodul'ehne bubuhoodulhkut, "Nohodulh'eh-un, 'et di ha sooneya 'ilhunaos'aihne 'ink'ez lubeshi 'ulh'enne cha bubulh na'ut'alh'?"

<sup>12</sup> 'Et Sizi bubulh údants'o daja huyulhni-un 'et ubúlhni, "Mbene la soo 'únt'ohne 'aw yoo be duyun halhe'hunizun. Ndudáne, 'enne za yoo be duyun ha' huninzun.

<sup>13</sup> 'Et huwa ahdulh ndet la hodulh'eh-un 'et noheni toh neonahle 'et 'uk'uwhusguz whe nja dutni, "Uyoonne gha te'ntihzilh 'et nohts'o hukwa' nuszun. Ndai loodel k'ut hidutalk'un-i, 'i ooka lhe'núszun.' Si cha whuz un'a za 'aw ts'ih'un 'unt'ohne, 'enne bubení naháhundunooleh huba iloh sáya. 'Et lubeshi 'ulh'enne, 'enne dulubeshi ch'a bubení naháhundunooleh ubudutásnilh ha, 'et huba whusáya."

### *John yugha hodul'ehne, 'enne hoonliyaz Sizi huyoodulhkut*

<sup>14</sup> 'Et 'awet John yugha hodul'ehne, 'enne Sizi ts'u hoozdil whe huyoodulhkut, "Dáhoont'oh huwa wheni cha 'ink'ez Phariseene, 'enne cha lhat soo ts'úhoni. 'Ink'ez nyun ngha hoodulh'ehne, 'enne gak'?"

<sup>15</sup> 'Et Sizi ubulhni, "Mbe la oo'at whutaleh-un, 'en ook'ekene, 'awhuz huyulh 'unt'oh, 'enne cha eh soo húhootanih? 'Awundooh! 'Et hoonts'i 'oh de de ook'ekene buch'a nahuyítáhtelh, 'et de za soo húhootanih.

<sup>16</sup> 'Ink'ez cha, 'aw 'uda'-i dzoot 'aw 'andidi-i naih be naoolhkut ait'oh. 'Et nyoo 'andidi-i naih naootátsulh 'ink'ez oots'u hanaitich'ulh. 'Et de 'on nus hootátsi'.

<sup>17</sup> 'Et doo cha, 'aw ts'ekoo too' 'andidi-i 'aw 'ujut-i 'uzus be yóolhdzeh ait'oh. 'Et déyinla de, 'aho la bulh hóok'uholtalh. 'Et nyoo 'andidi-i ts'ekoo too' ts'iyawh nadutijulh, 'ink'ez ndi 'uzus 'i cha ninta' tit'elh. 'Et 'andidi-i ts'ekoo too', 'andidi-i 'uzus be húyalhdzo de, 'aw whe ninta' oot'en-un hooloh."

*Sizi ts'oodun yula ilhchoot whe dunadíja 'ink'ez 'ilhoghun ts'eke soo na'yinla*

<sup>18</sup> 'Et nja dahooja la 'awhuz howu yalhduk whe khunsul 'ilhoghun moodih yughu ninya 'ink'ez yubut nachániti. 'Et ndúyulhni, "Stse' 'andit za dazsai.

'Et hoonts'i soo tilah syoh ts'e tónya', 'ink'ez nla be ookw'édolni, 'et de la nakhátna!"

<sup>19</sup> 'Et Sizi dudinya 'ink'ez yuntizya. Yugha hodul'ehne, 'enne cha ts'iyawh huyulh 'ut'en.

<sup>20</sup> 'Et 'oh whuya hidulh whe khunsul 'ilhoghun ts'eke, 'en whunizyat 'on 'at nat yus k'ut inle' whe 'uskai' 'uyulh'en. Ndun ts'eke Sizi yut'a ts'e gha ninya 'ink'ez nayits'uz-i nyus ts'e yuban whut'aiznai.

<sup>21</sup> 'Et njan 'et dutinelh whuts'o dich'oh na'dudútni, "Ants'i oonaih oot'aizasnai de, 'et de la soo ná'tisnelh."

<sup>22</sup> Sizi yuts'u nálh'a 'ink'ez yunilh'en 'ink'ez 'uyulhni, "Stse' do 'un dunilt'i! Be 'alha' hoont'oh-i mba 'alha' 'unt'oh 'et huwa soo na'inja."

<sup>23</sup> 'Et 'awet Sizi ndun moodih ooyoh ts'e daninya whe ndi be ts'ujun-i, flute huyulhni, 'i hiye ujun whe bunilh'en. 'Et 'onghohne tube tahúditni whe tso yahalhduk whe ubúlhni,

<sup>24</sup> "Az náhdulh! Ndun ts'ekeyaz 'aw dálhital, 'ants'i nanisti whe 'unt'oh." 'Et highudloh.

<sup>25</sup> 'Et dune ts'iyawh 'az whenábahalh'a'. Sizi yoh ts'e daninya whe ts'oodun yula ilhchoot ibulh dunadija.

<sup>26</sup> 'Et dahooja la, 'et yun k'ut ndulcho whe 'et hukw'u nahuwhulnuk.

### *Nane dune hoos'enne, 'enne Sizi soo na'binla*

<sup>27</sup> 'Et 'awet Sizi natisja whe nane dune hoos'enne hiyuntiz'az 'ink'ez hikazulh, "NeMoodihti David oots'u hainzut-un negha te'ninzeh!"

<sup>28</sup> 'Et Sizi yoh ts'e daninya whe nyoonne hoos'enne huyudánin'az. 'Et Sizi ubúlhni, "Nohba 'alha' hoont'oh eh njan 'et dutísnelh huba?" 'Et 'uhuyulhni, "A, neMoodihti!"

<sup>29</sup> Buna yut'aiznai 'ink'ez ndúbulhni, "Nts'en'a la nohba 'alha' hoont'oh, whuz un'a 'uhóneh."

<sup>30</sup> 'Et 'aho nahitát'en 'ink'ez honilh'en. Sizi khuni ulhtus-i be ndúbulhni, "Khun 'uyoonne dóhni' junih!"

<sup>31</sup> 'Et hoonts'i tenáhunt'az 'ink'ez ndi 'oh keyoh ndulcho whe ts'iyanne hudáni'.

### *Ooba 'alha lhe'hoot'ohne, 'enne hutni, "Sizi 'en netsudule ye ulhtus-i be 'ut'en"*

<sup>32</sup> 'Et tenáhundil whe 'ilhoghun dune 'aw yalhulhduk-un, ntsi'-i nududeh-i ooyudinda 'et huwa. 'En Sizi highu hiníhti.

<sup>33</sup> 'Et ndun ntsi'-i nududeh-i ye yáhanainanyoot. Nyoon dune 'aho yawhénilhduk. 'Et 'ilhunaosdilne 'ulhodutni, "Israel yun k'ut ndulcho whe 'aw ndiz un'a lhe'whusne 'et 'andit ts'iya 'et 'udechoo ndúhooja!"

<sup>34</sup> 'Et nyoonne Phariseene nduhutni, "Ants'i ntsi'-i nududeh-un, 'en bu-moodih ye ulhtus-i, 'i gha ndi nududeh ntsi'-i yuts'u hanainanyoot!"

### *Sizi dune bugha te'ninzun*

<sup>35</sup> 'Et 'awet Sizi njan keyoh whuti 'ink'ez keyoh whuyaz cha whunilhchoh nusiya. 'Ink'ez lizwifne bulugliz ndi khuni unzoo-i be yak'uz k'úne' whul'en-un, 'en ghun whubodulh'eh. 'Et dunene mbene la ooyust'e ndudane 'ink'ez tetsunne, 'enne ts'iyawh soo na'bulh'en.

<sup>36</sup> 'Ink'ez 'ilhunaodilhne ubunilh'en. 'Enne ts'iyawh nehunintsai dóhot'en, 'aw 'uhooneh ait'oh. 'Ink'ez ts'iyaitsuk laditnine dohot'en. 'Ants'i 'usbaiyaz lhane 'aw bughunli-un hooloh le'hint'oh.

37 'Ink'ez yugha hodul'ehne, 'enne ubulhni, "Alha 'awet ha' nukat-un newhúminzut 'ink'ez tl'o mai' lhai sulí, 'et hoonts'i 'ut'enne 'aw soo lhe'huníltuk.

38 'Inka Yak'usda ha' nukat-un whumoodih, dich'oh 'a'dudinla-un, 'uy-oonne 'ut'enne cha whusáboolh'a, 'et huba tenadoohdli," ubúlhni.

## 10

### *Whunizyane 'on 'at nane whel'a'ne buboozi' 'uk'eítagus*

1 'Et whunizyane 'on 'at nane Sizi yugha hodul'ehne, 'enne 'alghoh 'anih ubudáni'. Ntsi'-i nududeh-i 'enne ts'iyawh ndet la whehíltus-un cha, 'ink'ez k'une' bool'en ha, 'et cha, 'ink'ez ndet hukw'e húndudá-un cha, 'et ts'iyawh 'et whuch'a soo na'botilh'elh, 'et cha ts'iyawh butl'ahón'ai.

2 Njan 'et whunizyane 'on 'at nane whel'a'ne buboozi' 'uk'eítagus; 'udechoo Simon, 'en Peter cha huyulhni; 'en bulhutsin 'en Andrew huyulhni; 'et doo cha James cha Zebedee ooye', 'ink'ez John 'en cha 'en bulhutsin 'unt'oh;

3 Philip 'ink'ez Bartholomew; Thomas 'ink'ez sooneya nalhdzooch-un Matthew huyulhni; James 'en cha Alphaeus ooye' 'unt'oh, 'ink'ez Lebbaeus 'en ooboozi' 'udek'ez-un Thaddaeus huyulhni;

4 'et Simon cha, 'en Canaanite yun k'ut whut'en-un 'unt'oh, 'ink'ez Judas Iscariot 'en 'uja Sizi be 'onket-un 'unt'oh.

### *Ndunne whunizyane 'on 'at nane, 'enne Sizi ubutilh'alh*

5 'Et 'awet ndunne whunizyane 'on 'at nane, 'enne nts'e la 'uhutit'elh Sizi whuz ubutilh'alh. 'Et la khuni ulhtus-i butl'adan'ai whe ndubulhni, "Khun 'udun yun k'ut whut'enne buti ts'u te toohdilh junih. 'Ink'ez Samaritan bukeyoh ts'i whuz te toohya' junih.

6 'Et k'us Israel oots'u haindene, 'enne 'ants'i 'usbai ninta nilh'az-i lé'hint'oh, 'enne za buts'un toohdilh.

7 'Et 'awet ahdulh whe butoh lhohdilh, njan 'et budutáhnelh, 'Nts'en'a la yak'uz k'úne' whul'en-un 'awet nilhdukw.'

8 Ndudáne 'ink'ez ooka whulhjutne, leprosy huyúlhni, 'enne cha ts'iyawh soo na'boolh'en. Yaidlanne cha dunabudóhleh. Ntsi'-i nududehne, dune buts'a hanábunuhyukw. Ndaí la 'ants'i nohgha nkat-i, 'i cha 'ants'i huwaóohle.

9 Khun te sooneya nohsooneya zus be óohdzaih junih!

10 Khun tíhdulh de hoonliyaz toohla' junih. Lhook'ez 'ink'ez be kélh'a-i cha 'ink'ez nanki ts'oozt'an 'ink'ez nohtuz. 'Alha 'ut'en-un nts'en'a la ne'ut'en, 'et whuz un'a za nohni cha ooh'alh huba' hoont'oh.

11 Ndet la keyoh ts'u tíhdulh 'et keyoh whuyaz k'us keyoh whuti, 'et ndunne keyoh whut'enne, 'enne hukwa boodólhkut k'us mbe suba dune oodzi unzoo, 'en ooyoh dólhts'i.

12 'Et ooghú danáhdil de, mbene la yoh dílhts'ine ts'iyawh hoonzoo-un nohghá holts'it-un, nohba hukwa' nídzun, 'et whuz un'a 'et dubúdohni.

13 'Et ndunne yoh 'et dílhts'ine, 'enne huhóont'i' whe bughu danáhdil de, 'et nohdzi dant'oh la, ts'iyawh buts'ú be holhni. 'Et 'aw 'et ndulhúhit'oh de, daja ubudáhni-un, 'aw whe la'hootneh ait'oh.

14 'Et mbene la 'aw nohghu nulhúhiyal 'ink'ez lhunoh huhoozilhts'ai de, 'et yoh tenaóohdilh 'et nyoh keyoh whuti 'et cha whuch'a naoohdilh. 'Ink'ez nohke ts'iyawh lhez ch'a naoohghat.

15 'Alha nohdusni ndet dune ba nahidzilh-un whusahoolts'ut de, ndunne Sodom whut'enne 'ink'ez Gomorrah whut'enne cha, njan keyoh whut'enne mbene la nohghu núlhiyalne, 'enne 'on nus 'uwहुल्त्सि'-un bugha óotalts'ulh.

*Sizi 'utni, "Si soozi' gha ts'iyanne nohts'u dutitni"*

16 "Soo zulhts'ai, 'ants'i 'usbai yus yugha óolh'az le'hoont'oh ts'e whuz nohtis'a'. 'Et huwa tl'ughus k'un'a duwhunih áhlih 'ink'ez ndi dut'ai, dove huyulhni, 'i k'un'a nohbulh dune ndólhda' junih.

17 Whulohne dune buch'a kháhdli. 'Enne Lizwif nahiyilhne, 'enne bubut nenóhotalelh. 'Ink'ez Lizwif lugliz whambez ts'e 'et nohóhóotalhtsus.

18 'Et 'ants'i yun k'ut whumoodihne 'ink'ez lerwene cha si sgha 'enne bubut nenóhotalelh. 'Ink'ez si sghun whubuntlhtun. 'Udun yun k'ut whut'enne, 'enne cha si sghun whubuntlhtun.

19 'Et 'awet whutl'anohuhanla de, nts'en'a la daja dutihnelh, 'et huwu ni oohle' junih. Nts'oya hoozulh whu la ndai la be yátilhduk-i, 'et la t'ewhunoozh.

20 'Alha 'aw nohnich'oh iloh yatilhduk. NohBá ooyughi 'i 'udutinelh.

21 'Et dune dulhutsin datítsah ha whutl'aítlhtelh. Bubá 'en duduzkeh cha whuz ubutlelh. Bubuzkeh dudusneke cha buch'az nehúdadulh 'et whe dahútsah-un huwá botalelh.

22 'Ink'ez si soozi' gha ts'iyanne nohts'o dutitni. 'Et hoonts'i mbene la 'udek'ez whuts'un 'et whulh núdalya'ne, 'aw 'enne za hudutijih.

23 'Et hoonts'i njan keyoh 'enne dzoh nanóhahulhdzut de, 'et 'udun keyoh ts'e buch'a tóohdil. 'Et keyoh whuti 'et cha dzoh nunohohulhdeh de, doo cha 'on 'un keyoh buch'a tóohdil. 'Alha' dusni 'et yinka dune ye' whusatiyalh whutso, 'aw njan Israel oots'u haindene, 'enne bukeyoh ts'iyawh whutulhóhdilh ait'oh.

24 Dune yugha hodul'eh-un, 'aw yuba dune hodul'eh-un ando lhe'it'oh. 'Ink'ez be 'ulhna-un, 'en cha 'aw dumoodih ando lhe'it'oh.

25 Dune yugha hodul'eh-un, whuyodulh'eh-un k'un'a 'oot'e' huba' hoont'oh, 'ink'ez be 'ulhna-un, 'en dumoodih k'un'a 'oot'e' huba' hoont'oh. 'Et si Beelzebul suhútni de 'et nohni sgha hodul'ehne, nohni cha whuz un'a za 'et dunohodutánelh!

26 'Et huwa 'enne bube noolhjut junih! Ts'iyaitsuk lubeshi whu'iz 'unt'oh 'ink'ez ntilh'i-i, 'i ts'iyawh ts'et haóotikulh 'ink'ez ts'iyanne t'ehuntizeh.

*Yak'usda 'en za be noolhjut*

27 "Njan daja nohdusni-un tsaholhgus-un ts'et whucho howu yaoolhduk. Ndet la whu'iz whudahts'o-un, 'et bun k'ut whuts'un khuniti be howu yaoolhduk.

28 Mbe la neyust'e hughanne 'et 'aw nezul 'i hizoolhghelh ait'oh, 'et ndunt'ohne, 'enne bube noolhjut junih. 'Et hoonts'i Yak'usda mbe la nohzul nohyust'e bulh kwuncho yo ts'e nohtinoh, 'en za bé noolhjut.

29 'Alha iloh lakw ndi nanki 'uchas, 'i 'ilho sooneya ts'uditi'-i, 'et 'ultsuk 'i be oohket? A, 'alha' uhoont'oh. 'Et hoonts'i neBá 'aw hukwa lhe'nizun de, 'aw 'ilhoghun ndi yun k'ut naoolts'it ait'oh.

30 'Ink'ez nohtsigha', 'i ts'iyawh 'ilho whe t'eininzun.

31 'Et huwa khun whenoolhjut junih. Nohni 'uchas anus dáhti' whe aht'oh.

*Dune nalh Sizi 'en sch'e' uzdooni'*

32 "Et huwa mbe la dune nalh 'et ndutni-un, Sizi, 'en si sch'e' 'unt'oh, mbe la 'et ndutnine, 'uBá yak'uz usda-un, 'en dutasnelh, nyoon 'en sch'e' 'unt'oh.

33 'Et hoonts'i mbene la dune nalh sts'ooditdlaine, si cha 'uBá yak'uz usda-un ndunne, 'enne 'aw sch'e' lhuhiloh dósni' la.

*Mbe la si sgha dich'oh ye khuna-i ninta inín'ai, 'en ndai la ye khuna-i nayitá'alh*

<sup>34</sup> “Ts'iyanne lhts'un ts'ih'un 'uhoot'e', 'et hukwa ndi yun k'ut whusásya noohzin junih! 'Aw lhts'un ts'ih'un 'uhoot'e' bugha ootas'alh hukwa iloh whusásya. 'Et ndi saluzti le'únt'oh-i, 'i bugha tís'alh 'et huba whusásya.

<sup>35</sup> Dune dubá ch'az nedútadalh 'ink'ez ootse' 'en duloo ch'az nedútadalh.

'Ink'ez 'en ooyas'at 'en dubiz ch'az nedútadalh, 'et huba whusásya.

<sup>36</sup> Mbene la dune hiyoh whut'ine,  
'enne cha hich'azne dutadulh.

<sup>37</sup> Mbe la dubá k'us duloo, si sanus buk'entsi' de, ndunt'ohne, 'enne 'aw sba soo lhe'hildzoo!' 'Ink'ez mbe la duye' 'ink'ez dutse' bulh, si sanus buk'entsi' de, 'en 'aw sba soo lhe'ildzoo'.

<sup>38</sup> 'Ink'ez cha mbene la dutulalh gus lhodistel de, 'ink'ez sulhonisdulh de, 'enne ts'iyawh sba soo lhe'hildzoo'.

<sup>39</sup> Mbe la dich'oh whe khuna-un, 'et hoolhyih hukwa 'ut'en, 'en whe khuna-un ts'iyawh ninta ootá'alh whe 'unt'oh. 'Et hooonts'i mbe la si sgha dich'oh ye khuna-i ninta inín'ai, 'en ndai ye khuna-i nayitá'alh.

*Mbe la hoont'i' whe danyunilhti-un, 'en si cha hoont'i' whe dasúnilhti whe 'unt'oh*

<sup>40</sup> “Mbe la hoont'i' whe danyunilhti-un, 'en si cha hoont'i' whe dasúnilhti le'hoont'oh. Mbe la whesalh'a'-un, 'en cha hoont'i' whe daínilhti whe' hoont'oh.

<sup>41</sup> Mbe la nus hoo'en-un, 'en 'et huwa dune hoont'i' whe daínilhti. 'Et nts'en'a ooba k'elha whutale, 'et ndun cha whuz un'a za ooba k'elha whutale. 'Et whuz un'a za mbe la ts'ih'un dune-un, 'en 'et huwa dune hoont'i' whe daínilhti, 'en ndet whe ooba k'elha whutale, 'et whuz un'a za ndun cha ba k'elha whutale.

<sup>42</sup> 'Ink'ez mbene la si sgha hodul'ehne, 'ink'ez mbe la butoh k'us hukw'e'ih 'unt'oh-un, 'en sgha hodul'eh-un 'unt'oh 'et huwa dune too suk'uz yubainkai de, 'alha' nohdusni, 'en hooonts'i ooba k'elha whutale whe' hoont'oh.”

## 11

*Nane John yugha hodul'ehne, 'enne John Sizi ts'u whebalh'a'*

<sup>1</sup> 'Awet Sizi whunizyane 'on 'at nane yugha hodul'ehne, ts'iyantsuk ubudáni'-un 'etsul 'udija, 'et bughu whínaya. 'Uts'un keyoh ts'e whinya dune hodutilh'eh 'ink'ez bubulh yatilhduk wheni.

<sup>2</sup> 'Awet John 'alts'ut whe 'et Christ be 'ut'en k'oh whulh udants'o. 'Et huwa nane yugha hodul'ehne, 'enne John Sizi ts'u whébalh'a'.

<sup>3</sup> 'Et huyoodulhkut, “Nyun eh whusatíyalh-un inli, k'us 'uyoon tilah ha ts'itó'en?”

<sup>4</sup> 'Et Sizi nja dúbulhni, “John ooghu nanaht'az de, ndet hoo'h'en 'ink'ez ndet whudáhts'o-un, 'et ts'iyawh dóhni.

<sup>5</sup> 'Et hoos'enne cha 'et huhoo'cha nasdli'. Dzoh nudilhne, 'enne soo nahudilh nasdli'. Ooka whulhjutne cha leprosy huyúlhni, butsun hooloh nasdli', 'ink'ez lhe'dústs'one cha 'uhudits'o nasdli'. Yaidlanne cha dunahudidil 'ink'ez tel'enne cha khuni unzoo-i be bubulh yainduk whe' hint'oh.

<sup>6</sup> 'Et mbene la si sgha 'aw buba dzoh lhilel de, 'enne 'uk'enus hoonzoo-un bughá whults'ut.”

<sup>7</sup> 'Et ndunne nane whehán'az whe Sizi ndunne 'ilhunaosdilne, 'enne njan John ghun bubulh yawhenilhduk whe ndúbulhni, “Di tih'elh ha dune luhóot'ih ts'e whéhdil? Tl'o ghazilh nonulhts'i, 'i tilah tih'elh nahzun eh?”

<sup>8</sup> Ndet suba hukwa tse hooqli whutih'elh-un? Dune naih duchut-i be soo naduja, 'en tilah tih'elh nahzun eh? Soo zulhts'ai mbene la naih duchut-i be dune unline, 'aw 'enne za lerwe yoh hudilh'ts'i.

<sup>9</sup> 'Et ndet whutih'elh-un hukwa tse hóohli? Nus hoo'en-un tilah? A, 'alha' hoont'oh. 'Et 'ink'ez nohdusni, nus hoo'en-un anus hoonzoo-un whunalh'en!

<sup>10</sup> Ndun 'en ghun 'uk'unusguz-i 'et ndutni, 'Soo zulhts'ai 'uyoon khuni sba na'a-un, 'en ntso tis'alh.

Nts'oya la lhutányalh-un mba lhaoodutieleh ha.'

<sup>11</sup> Ts'ih'un un'a nohdusni, ts'iyanne whuzdline, 'aw John dune too be 'ulh'en-un anus dízti'-un hooloh. 'Et hoonts'i nts'e la yak'uz k'úne' whul'en-un, mbe la 'uk'enus dízti' lhiloh-un, 'en anus uncha whe 'unt'oh.

<sup>12</sup> 'Et 'oh da' John dune too be 'ulh'en-un be whe' whudit'en, 'et 'andit dzin whuts'un, yak'uz nts'e la k'úne' whul'en-un, 'et yak'uz huhooldhil, 'ink'ez huhooldhíle, 'enne ts'iyawh yak'uz da'hudolhdís hukwa' hut'en.

<sup>13</sup> John whusatiyahl whuts'un, nus hoo'enne bube' 'udustl'us cha, 'ink'ez Moses be 'udustl'us cha, ndet daóotanelh 'et hudani', 'et 'uwuhluni.

<sup>14</sup> 'Et daja nohdúsní-un, soo nohba 'alha' whutat'elh de, ndun nus hoo'en-un Elijah whusatiyahl-un, John 'en 'unt'oh, 'et huwa.

<sup>15</sup> Mbe la oodzo hoonine, 'enne huhoozólhts'ai' huba' hoont'oh.

<sup>16</sup> 'Et yuk'edúdehne nts'en'a suba nohba lhzih nebosdleh? Ndiz un'a nja duhínt'oh whe ts'oodunneyaz duhúlt'oh 'ink'ez nts'e la t'alh-i be 'ooket-un 'et hudilh'ts'i whe duk'ekene buts'u hahuyih whe ndúbotni,

<sup>17</sup> 'Nohba ts'ujun be ts'ujun be, 'et hoonts'i neba lhnuzahdai. 'Ink'ez nohni nohba ts'odi ts'inli, 'et hoonts'i 'aw oochtso ait'oh!'

<sup>18</sup> 'Et John dune taninya whe 'aw lhe'us'al 'ink'ez 'aw talhusnai'. 'Et highu yalhduk whe' hutni, 'Nududeh-i nts'i-i ooyudinda,' dahni.

<sup>19</sup> 'Et yinka dune ye', 'en dune butaninya whe bula whé'nin'al 'ink'ez bula tawhénitnai', 'et 'uhutni, 'Ndun 'en oocha hooncha 'ink'ez ts'ekoo too' cha 'utnai. Sooneya nalhdzoohe 'ink'ez lubeshi 'ulh'enne, 'enne buk'eke 'unt'oh,' dáhni. 'Et hoonts'i mbene la Yak'usda gha whunih sulí'ne, 'enne ts'iyawh ndi hiye whunih-i, 'i be ts'ih'un 'uhint'oh sulí'."

*Mbene la dudeni nahánundunooleh hukwa lhe'hunízun, dawhul'tsi'-un bugha óotalt's'ulh*

<sup>20</sup> 'Et hukw'elh'az nts'e la keyoh whuti totsuk 'ut'en ncha-i ba' yílya-i, ndut'enne hukwa' budáni'. 'Aw dubeni nahándunooleh hukwa lhe'hunízun.

<sup>21</sup> 'Et huwa 'utni, "Nohni Chorazin whut'enne, 'ink'ez nohni Bethsaida whut'enne, nohni cha, dawhul'tsi'-un 'et nohts'u hóolt's'ulh! Soo cho soo zúlhts'ai! 'Uda' ndet la whunilhchoh hoolhtus-un nohnat ne'whust'en-un, ndunne Tyre 'ink'ez Sidon whut'enne, 'enne cha bunat 'et dúhooja de, 'uda' da' bubení naháhundunooleh oole' da', 'et hoonts'i 'aw ndulhúhinel. Doso naih be húdilh'ts'i de 'ink'ez lhez k'ehidzih, 'et whuz un'a 'et nduhóoneh uhóoneh oole' da'.

<sup>22</sup> 'Et hoonts'i nohdusni, ndet dzin nohba whusaootil'ts'ulh nts'en'a la nohba nahutideh ha, 'et ndunne bubulh dawhutanelh la, 'et nohni 'on nus 'uwulhtsi-un 'et nohts'u hoolt's'ulh.

<sup>23</sup> 'Ink'ez nohni Capernaum whut'enne ndo yak'uz huba soo áht'oh nahzun eh? Awúndooh! 'Et k'us kwuncho yo ts'u nohotilhdulh! 'Alha 'uda' ndet la hoolhtus-un nohnat ne'whust'en-un, ndunne Sodom whut'enne, 'enne cha bunat 'et dúhooja de, 'enne dudzi nahondunizdla de, 'awhuz da' bukeyoh 'et whuz'ai oole' da'.

24 'Et hoontsi ts'ih'un 'unohdusnih, dahoont'oh-un la nohba whusaootilts'ulh-un, nts'en'a whe nohba nahutideh ha, 'et ndunne Sodom whut'enne bubulh dawhutanelh la, 'et nohni 'on nus 'uwulhulsi'-un 'et nohts'u hoolts'ulh."

*Sizi ubulhni, "Nohni ts'iyawh diz ahdulh 'ink'ez natilhyis-un nohgha óotas'alh"*

25 Sizi 'awhuz bubulh yalhduk whe 'et ndutni, "'UBá nyun nyudústi'. Yak'uz 'ink'ez yun k'ut huMoodihti inli. Whunihne 'ink'ez hodul'ehne, ndi 'i ts'iyawh buch'a whuntin'i. 'Et hoontsi ts'oodunyaz le'unt'ohne, 'enne bunalhts'et hahon'ai.

26 'Et hoontsi 'uBá ndet 'uhóonla-un hoonínt'i'. Ndo honeh.

27 'UBá ts'iyawh stl'ahónla, 'ink'ez 'en ooYe' mbe unli ts'iyanne t'ehonúszun. OoBá 'aw 'en za t'eininzun. 'Ink'ez mbe ooBá unli, ooYe' 'aw 'en za t'eininzun. 'Ink'ez mbe la ooYe' 'onghohne ts'iyawh whubuntilhtun hukwa' ninzun de, 'en za ooba' hoont'oh.

28 Nohni ts'iyawh mbe la 'ut'en ulhtus-i 'ulh'enne 'ink'ez mbe la ndaz-i nulene le'aht'oh, nohni ts'iyawh diz ahdulh 'ink'ez natilhyis-un nohgha óotas'alh.

29 Ndai la se' 'ut'en-i, 'i ulhchoot 'ink'ez nedúht'aih le'ahleh 'ink'ez si sghun hodulh'eh. 'Aw dune dach'e nulhezust'en 'ink'ez ts'iyanne toh te'duduz'en 'et huwa. 'Et whuz un'a la nohzul whe nátilyis-un ooba nahóh'alh.

30 Ndi la úlhchoot-i, 'aw nohba oogha lhúhoolna' tileh, 'ink'ez se' 'ut'en k'oh cha hoondza tileh."

## 12

*Sizi 'en nats'ulyis dzin hoontsi huMoodihti whe 'unt'oh*

1 'Et 'awet 'ilhoh dzin 'et la lizwifne buba nalyis dzin huhoohl'i. 'Oh da' Sizi tl'o k'ut uyalh, 'ink'ez yugha hodul'ehne, 'enne cha huyulh udulh whe buye'ílt'sul. 'Et tl'o mai' huyoonuyin 'ink'ez huya'alh.

2 'Et ndunne Phariseene bubotilh'en ibulh Sizi huyoodulhkut, "Ngha hodul'ehne dahút'en ubunilh'en eh? 'Andit dzin nats'ulyis dzin 'uhoont'oh. 'Aw 'et nduhóot'en huba lhe'hoont'oh!"

3 'Et Sizi 'ubúlhni, "'Et lerwe David daja-un 'aw lakw hukw'u yalhuzulhduk? 'Et 'oh da' David 'ink'ez yulh 'ut'enne buye'ílt'sul?"

4 'Et 'awet Yak'usda ooyoh daninya whe ndi lhes ndai la Yak'usda gha t'aih-i, 'i yu'alh 'ink'ez yulh 'ut'enne, 'enne cha huyan'al. Lubretne 'aw 'enne za huyoo'alh huba' hoont'oh, 'et hoontsi David 'ink'ez yulh 'ut'enne cha nduhuja.

5 Moses be 'udustl'us do, 'aw ook'uyalhuzulhduk whe eh dahni? Ndiz un'a nja dutni, lubret nats'ulyis-un dzin lugliz whucho dahunindil 'ink'ez 'et 'uhut'en. Nts'en'a la 'uhuhoolhdzun-un, 'et k'uhoninyuz, 'et hoontsi 'aw buk'elhúhoolts'ulh.

6 Whuz un'a nohdusni njan lugliz whucho 'et nohtoh 'ilhoghun whanus 'ulcho-un hoonli.

7 'Et 'uk'uwhusguz 'et ndutni, "'Uyoonne gha te'ntihzilh, 'et nohts'o hukwa' nuszun. Ndai loodel k'ut hidutalhk'un-i, 'i ooka lhe'nuszun,' ni. 'Et ndi nja dutni-un, 'et t'eoonahtun de, 'et de mbe la ookw'elhúwhulhts'itne, 'enne 'aw buk'ehoh'alh hukwa aht'en iloh!

8 'Et huwa yinka dune ye' nats'ulyis dzin 'et hoontsi humoodihti whe 'unt'oh."

*Nats'ulyis dzin 'ut'en unzoo-i 'uts'oolh'en*

9 'Et 'awet hukw'elh'az bugho whinya whe ndunne Lizwifne bulugliz ts'e daninya.

10 'Ilhoghun dune 'en 'et usda 'ink'ez 'aw oola 'aw ye nulhé'ust'en. 'Et Sizi huyoodulhkut, "'Et nats'ulyis dzin soo na'uztitnelh huba' hoont'oh eh?" 'Et whe hoonliyaz highu nahootá'alh hukwa' hut'en.

11 'Et ndúbulhni, "Mbe nohtoh 'utinelh 'usbaiyaz tsak'et 'ált's'ut whe hanaítihlhelh nats'ulyis-un dzin 'et hoont's'i?"

12 'Et dawhulcho-i be dune 'usbai anus dizti' whe 'unt'oh? 'Et huwa netl'ahóolts'ut nats'ulyis dzin 'ut'en unzoo-i 'uts'ulh'en whuba."

13 'Et ndun dune ndúyulhni, "Nla lhts'e nadíntsih!" 'Et 'awet lhts'e naidizsi whe ookw'uz ts'e k'un'a sóo na'uja.

14 'Et Phariseene 'az whuhandil 'ink'ez huwu yahalhduk nts'en'a hituzil-hghelh hukwa.

*Sizi mbe unli-un, 'aw whubuntilhtun hukwa lhe'nínzun*

15 'Et Sizi hituzilhghelh huwu yahalhduk, 'et t'ewhunanzin ibulh bugho whenaja. Lhane ndudáne hiyuntizdil, 'et ts'iyawh soo ná'balh'en.

16 Khuni ulhtus-i be ubulhni, "'Uyoonne khun sghu yahoolhduk junih."

17 'Et whe la nus hoo'en-un Isaiah, daja ni-un, 'oh te ne'whust'en. Ndi khuni nja dutni,

18 "Ndun sYe' se'ustlen-un,  
'en 'utahásti-un 'unt'oh.

'En 'aw 'en za ookw'esi'.

'En gha szul tube yé hoont'i'.

Syughi ookw'édutasdoh.

'Et nts'en'a dahoont'oh dune ba nahisyilh,

sYe' whuz un'a za 'udun yun k'ut whut'enne ubódotánelh.

19 'Aw dune budulhyoh 'udooni' ait'oh.

'Aw bubúlh 'aooldzul ait'oh.

Ti nuya de, 'aw bubulh dóoltul ait'oh.

20 'Aw tl'oghazilh nisdus-i, 'i hoont's'i k'idóch'as ait'oh.

'Aw too dizk'un 'awet nanutneh-i, 'i hoont's'i, 'aw nainoolhneh ait'oh.

'Et 'awet Yak'usda lubeshi ba nahuyeh 'et whuch'a' nilhde de, whuz un'a za sYe' 'utit'elh.

21 'Ink'ez 'udun yun k'ut whut'enne ndun sYe' se'ustlen-un,

'en boozí, 'i be 'et whut'aníhüntatan."

*Mbene la lhch'az nedindilne, 'enne cha gak hutileh*

22 'Et 'ilhudzin whe 'ilhoghun ntsi'-i nududeh ooyudinda-un, 'en hoos'en 'ink'ez yaoolhduk cha ait'oh. 'En Sizi ts'u huyoolhti whe soo na'yinla. 'Ink'ez ndun hoos'en-un 'ink'ez yaoolhduk cha ait'oh, 'en 'aho hoo'en 'ink'ez yawhenilhduk.

23 'Et 'ilhunaosdilne ts'iyawh tube buba hooncha 'ink'ez dich'oh lhulh yáhalduk, "'En 'alha David oots'u hainzut-un toleh 'unt'oh."

24 'Et Phariseene whulhódants'o whe 'et 'uhuyulhni, "Ndun Sizi, 'en Beelzebul, ntsi'-i nududehne bumoodih 'unt'oh, 'en be za ntsi'-i nududeh-i dune ts'u hanahinuyukw,," hutni.

25 Daja huninzun-un Sizi t'eeoninzun 'inka 'et dúbulhni, "Nts'e la yak'uz k'une' whul'en-un, 'enne lhch'a nehúdindil de, 'enne ts'iyawh gak hutileh. 'Ink'ez keyohti whudune'ne k'us yoh dilhts'ine cha, ts'iyawh lhch'az nehúdindil de, 'enne cha gak hutileh.



26 Whuz un'a za Satan didutch'oh dune ts'u hanainuyukw de, 'et 'alha didutch'oh lhch'az ditni whe 'unt'oh. 'Ink'ez nts'en'a la whulerwe unli-un, 'ilhiz whutat'elh?

27 'Et si Beelzebul 'en be 'ust'en de, 'et de sudahni nohni nohye'ke, k'us mbe suba ntsi-i nududeh-i dune ts'u hanábonuyukw? 'Et huwa 'enne bugha t'ewhutihzeh tank'us údahni!

28 'Et hoontsi Yak'usda ooyughi be ntsi-i nududeh-un dune ts'u hanánusyukw de, 'et 'alha' hoont'oh whe nts'e la Yak'usda whe lerwe unli-un, 'et 'awet nohghu whults'ut whe' hoont'oh.

29 'Et nts'en'a 'utinelh 'ilhoghun dune 'et dune ulhtus-un ooyoh daninya 'ink'ez hoonli yughi tálhchulh? 'Aw ooneh ait'oh. Ndun dune 'udechoo yulghel de, 'et de za ts'iyaitsuk yughi tálhchulh.

30 Mbene la sulh lhe'it'ohne, 'enne sch'az huditni whe' hint'oh. 'Ink'ez mbene la 'aw dune sla 'ilhulhósdlene, 'enne ts'iyawh 'ants'i yahitákulh le'hutinelh.

*Mbene la Ndoni ch'az ditni be yalhdukne, 'aw buba whunaoodotnoh ait'oh*

31 “‘Et huwa 'unohdusni, lubeshi ts'iyawh 'ink'ez Yak'usda ch'az yalhdukne, 'et ts'iyawh nohba whunaoowhudutilnoh. 'Et hoontsi Ndoni ch'az ditni be yalhdukne, 'aw buba whunaoodotnoh ait'oh.

32 'Ink'ez mbene la yinka dune ye' ch'az yalhdukne, daja hutni-un, soo buba 'un whutilhdulh. 'Et hoontsi mbene la Ndoni ch'az yalhdukne, 'aw buba 'un whutooldhilh ait'oh. 'Andit dzin k'us nus de hoontsi 'aw 'uhoneh ait'oh.

*Dant'oh-i duchun 'unt'oh, oomai' gha t'enahzun*

33 “‘Ndiz un'a 'uhoont'oh, mai chun unzoo-i hanálhyai de, oomai' unzoo tileh. 'Et mai chun 'utsi-i hanálhyai de, oomai' ntsi' tileh. 'Et oomai' whuzdli de, dant'oh-i duchun 'unt'oh, oomai' gha t'entidzeh.

34 Nohni ts'iyawh lubezo tl'ughus buzkeh le'aht'oh! Nts'en'a ahtsi 'ink'ez khuni unzoo-i be yalhduk? 'Alha nohdzi ndai be dizbun 'i be yalhduk.

35 Dune unzoo-un ndai la unzoo-i dudzi bez 'ilhunayodle-i, 'aw 'i za oots'u hanaídukat. 'Et dune untsi-un, 'en ndai untsi-i dudzi bez 'ilhunayosdle de, yalhduk te, 'aw 'i za oots'u hanaídukat.

36 'Et nohdusni mbene la 'aw khuni lhe'it'oh-i be yalhdukne, dune ba nahidilh-un dzin whusahóolts'ut de, nts'en'a khuni 'i be yalhduk-un, whuz un'a buba nahutideh.

37 'Et huwa nohghuni gha Yak'usda nalh ts'ih'un dune tihleh, k'us nohghuni gha kwuncho yo ts'u tihdulh k'un'a, whuz un'a nohba nahutideh.”

*Sizi buba 'alha' lhe'it'ohne, 'enne hoonliyaz hooncha tune' whut'en-un, 'et za hoti'en hukwa' huninzun*

38 'Awet whulohne Moses be 'udustl'us 'uk'ununáguzne cha 'ink'ez Pharseene, 'enne cha huyulhni, “‘Dune hodulh'eh-un neba huwa 'it'en tune' tant'en nts'u hukwa' uzninzun.”

39 'Et ubulhni, “‘Andit whudizulhne dune hintsi, 'ink'ez 'ahoolhyiz dune ts'eke bulh ninta' hut'ih. 'Et hoonliyaz hooncha tune' whut'en-un, 'et za hukwa ihitis'en. 'I gha la t'ehonózin. 'Et hoontsi' i huhoo'en-un bughá holts'it ait'oh. 'Et nts'en'a la nus hoo'en-un Jonah bulh dahooja-un, 'et za hoti'elh.

40 Ndiz un'a nja dúhooja, tat dzin 'ink'ez tat 'ulhdzis Jonah lho cho chandanda'. 'Et whuz un'a za yinka dune ye' 'en tat dzin 'ink'ez tat 'ulhdzis yun yo ts'e tidalh.

<sup>41</sup> 'Ink'ez 'oh whuya hoozulh-un dzin dune ba nahutideh de, Nineveh whut'enne nohni 'andit whudizulhne nohtoh do dutádulh 'ink'ez nohba nohotiyeh. Soo cho whunulh'en, 'oh da' Jonah bubulh yailhduk da', ts'iyawh dudeni nahondunizdla. 'Et 'awet soo zulhts'ai, 'ilhoghun 'en Jonah anus 'unt'oh-un 'andit nohtoh usyin.

<sup>42</sup> 'Et 'oh whuya hoozulh-un dzin dune ba nahutideh de, 'et whe nyaz de whulerwe ts'eke 'en nohtoh dudutáyalh 'et whe nohk'ehóotalts'ulh. Ndi yun k'ut nilhdzaz de hainya Solomon ye whunih-i yudutáts'o ha 'et huwa. 'Et hoonts'i 'ilhoghun Solomon anus whunih-un 'andit nohtoh usyin."

*Dahooja la whe ntsi'-i nududeh-i doo cha za dune buyunaidide de*

<sup>43</sup> 'Ink'ez 'ubúlhni, "'Et ntsi'-i nududeh-un dune ts'u hanádide whe yun whudizgih-un, 'et whuz nududeh natilyis-un hukwu núta. 'Et 'aw ndoohóont'oh-un nalhuhoo'al.

<sup>44</sup> 'Inka dich'oh na'dudútni, "Et mbe la ooyudísda'-un, 'en oots'un za nátoosja'; ni. 'Et whuz naosja whe 'aw hoonli hooloh. 'Et ndun dune dudzi yo lhoditsun nawhulhtsi 'ink'ez ts'ih'un na'uja, 'et 'uw hulhni.

<sup>45</sup> 'Ink'ez 'et 'uts'un whedande 'ink'ez lhtak'ant'ine ntsi'-i nududeh-i, 'enne yanus 'ultsi'ne, 'enne 'et dune hiyéndil 'ink'ez 'et nehunina. 'Et ndun dune mbe la hiyudalts'i-un, 'en 'et whutsoda' whanus 'ultsi' suli'. Nohni 'andit ndo whuya whudizulhne, nohni dune tube untsi'ne aht'oh, 'et whuz un'a za nohba 'uwhtánelh!"

*Sizi ooloo 'ink'ez bulhutsinke te hiyulh yatilhduk hukwa' huninzun*

<sup>46</sup> Sizi 'awhuz 'ilhunaooosdilne bubulh yalhduk whe ooloo 'ink'ez bulhutsinke te, 'az nódilhya 'et hiyulh yatilhduk hukwa' huninzun.

<sup>47</sup> 'Et 'ilhoghun dune yulhni, "Nilh'en! Nloo 'ink'ez nyulhutsin 'az nódilhya nyulh yahutilhduk hukwa' huninzun!"

<sup>48</sup> 'Et mbe la 'et nduyulhni-un, 'et Sizi 'uyulhni, "Mbe la sloo? 'Ink'ez mbe la sulhutsinke? Mbene hinli whe' dini?"

<sup>49</sup> 'Et Sizi mbene la yugha hodul'ehne, 'enne butune'úlgha, "Nilh'en ndunne, 'enne sloo 'ink'ez sulhutsinke 'uhint'oh.

<sup>50</sup> 'Et huwa sBá 'en yak'uz usda, hik'une' 'ut'enne, 'enne sulhutsin, 'ink'ez sulhtus, 'ink'ez sloo te 'uhint'oh!"

## 13

*Khuni be whuts'odul'eh-i 'a'nule-un ghun*

<sup>1</sup> 'Et dzin za Sizi yoh teninya whe bun bá natl'adida'.

<sup>2</sup> 'Et 'awet dune lhane higha oozdil 'inka ts'i beinya, 'ink'ez ts'i bet natl'adida'. 'Et ts'iyawh taba 'et nódilhya.

<sup>3</sup> N dai la khuni be whuts'odul'eh-i 'et whe lhelhdun huwa bubulh yalhduk whe ndúbulhni, "Soo zulhts'ai, 'ilhoghun 'a'nule-un 'a'ntilelh ts'u whinya.

<sup>4</sup> 'Et 'a'nule whe ooloh ti nanánkat. 'I dut'aiyaz whusahándil 'ink'ez ts'iyawh hinildil.

<sup>5</sup> 'Et ooloh tse toh nanánkat, 'et huwa 'i 'aho hánuski, 'ankw'us yun hooloh huwa.

<sup>6</sup> Ooghíh hooloh 'et huwa hasain'ai whe ts'iyawh yanúdzigi 'ink'ez gak suli'.

<sup>7</sup> 'Et ooloh cha whus toh nanánkat. 'I cha whus cho whutoh bulh dúduninyai 'ink'ez bulh lhéwhultloh.

<sup>8</sup> 'Et 'onghoh-i yun unzoo-i k'ut nanánkat whe soo hananyai. Oomai whulukhi whunizyay whunizyay (100) oomai' suli', whulukhi lkh'utat whunizyay (60) oomai' suli', 'ink'ez whulukhi tat whunizyay (30) oomai' suli'.

9 Mbene la budzo hoonline, 'enne soo cho huyoozólh's'ai' huba' hoont'oh."

*Khuni be whuts'odul'eh-i, 'i be za Sizi bubulh yalhduk*

10 'Et 'awet yugha hodul'ehne highu nindil, 'et huyoodulhukut, 'ink'ez 'uhuyúlhni, "Di ha ndi khuni be whuts'odul'eh-i be za bubulh yáilhdúk?"

11 'Et ndúbulhni, "Yak'uz be k'úne' whul'en-un be whe hoont'oh hooyoh-i, daja ni-un, nohni za nohghá whunt'ai. 'Et 'onghohne 'aw bugha l húhoolts'ulh. 'Et huwa whuz un'a za bubulh yasduk.

12 'Et huwa ndiz un'a nja duhoont'oh, mbene la hoontsool-unyaz t'ehonínzunne, 'enne 'on nus lhat-un t'ehonínzun-un, 'et bugha whútalts'ulh. 'Et mbene la hoonli t'ewhunúszunne, hoontsool-unyaz, hodits'o ndai la 'aw 'i huyut'i-i, 'i hoonts'i bughu nayítálchulh.

13 'Et huwa ndi khuni be whuts'odul'eh-i, 'i be za bubulh yasduk. 'Et whe doo ka la honalh'en 'et hoonts'i 'aw lhuhoonih'en.

'Ink'ez hodits'o-un 'et hoonts'i 'aw lhuhodústs'o, 'aw t'ehonoozeh cha aít'oh.

14 'Et Isaiah nus hon'en whe daja ni 'enne bughun ts'iyawh lhaóodulya 'oh da' za. Ndiz un'a njan dutni, 'Ahoohyiz whudahts'o 'et hoonts'i 'aw t'elhonuzahze.

'Ahoohyiz whunulh'en 'et hoonts'i 'aw ts'ih'un nelhózah'ai.

15 Nduhne dune budzi 'ants'i buba' hoont'oh sulí'ne 'et huwa, 'ink'ez 'aw hoonli hodóts'o-un hooloh, 'ink'ez ndai la be 'alha' hoont'oh-i, 'aw hinoohl'en hukwa lhe'hunínzun.

'Et huwa hoohoos'en lé'hint'oh.

'Et whula gha ts'e huhoo'en aít'oh,

'ink'ez dudzo be 'aw hodóts'o aít'oh.

'Ink'ez dudzi be 'aw t'ehonoozeh-un hooloh.

'Et whuz un'a ndulhúhit'oh de,

'uda' da' dulubeshi ch'az nahulhya oole' da',

'ink'ez da' Yak'usda uboolhyih,'

ni Isaiah.

16 'Et hoonts'i nohni ndai la nohna be whunulh'en-un, ts'ih'un un'a whunulh'en. 'Ink'ez nohdzeh whe soo whúdahts'o, 'et huwa 'uk'enus hoonzoo-un nohghá whults'ut.

17 Ts'ih'un 'unohdusni, 'oh da' l hane nus hoo'enne 'ink'ez ts'ih'un 'unt'ohne, ndai la nulh'en-i, 'i huyuntih'el'h hukwa' huninzun, 'et hoonts'i 'aw lhuhyuí'el! Ndet la whudahts'o-un, 'et soo ts'ih'un hodutats'o hukwa' huninzun, 'et hoonts'i 'aw lhuhodíts'il.

*Khuni be whuts'odul'eh-i be 'a'nule-un, 'en ghun nja dutni whe 'utni*

18 "'Et huwa ndi khuni be whuts'odul'eh-i be 'a'nulih-un, 'en ghun, ndiz un'a nja dutni whe 'utni,

19 mbene la yak'uz nts'en'a 'uhuhoolhdzun-un whulh 'úhudits'o ndi khuni daja ni whe 'utni 'et hoonts'i dudeni be 'aw t'ehonuszun. N dai la dune dudzi bez 'ahinanla-i, mbe la ntsi'-un whusayaih 'ink'ez budzi be hanaídan'ai! Ndi 'i 'unt'oh ti 'anilya-i, 'i 'unt'oh.

20 Ndi ndai da' tse toh 'anilya-i, ndunne 'i k'un'a za 'uhint'oh. Ndi khuni hidits'o te, 'ink'ez soo 'aho huhóont'i' whe huyilhchuk.

21 'Et hoonts'i didutch'oh 'aw bughih hooloh le'hint'oh. 'Et huwa 'atsulyaz za buba 'alha' hoont'oh. 'Ink'ez ndi khuni 'i gha dzoh nuhudeh 'ink'ez 'onghohne buch'az huditni. 'Et huwa 'aho whulahudutnih.

<sup>22</sup> Ndaï la whus toh 'anankat-i le'unt'ohne, 'enne ndiz un'a 'uhint'oh. 'Enne khuni hidits'o, 'et hoonts'i ndi yun k'ut huwu ni ts'inli-un, ndi yun k'ut hoonzoo' hoont'oh-un, 'et 'i ts'iyawh whus cho 'i be bulh lheyúllhuk dult'oh. 'Et huwa 'aw lhadúlyane hoole' ait'oh.

<sup>23</sup> 'Et hoonts'i ndet la yun unzoo-i k'éninkat-i le'unt'ohne, 'enne ndiz un'a nja duhint'oh. Ndi Yak'usda ooghuni hidits'o-i, t'ehinuzih te daja ni whe 'utni. 'Et huwa bumai' lhai lhih le'hint'oh. Whulukhun whunizyat whunizyai (100) suli'. 'Et doo cha whulukhun lkh'utat whunizyai (60) suli'. 'Et doo cha whulukhun tat whunizyai (30) suli'."

*'Uyoo khuni be whuts'odutil'eh-i, 'i nts'en'a la yak'uz lerwe 'uhuhoolhdzun-un*

<sup>24</sup> Doo cha 'uyoo khuni be nawhutnuk-i be whuts'odul'eh-i, 'i be bubulh yalhduk 'et whe nja dúbulhni, "Nts'en'a la yak'uz lerwe 'uhuhoolhdzun-un, 'et diz un'a nja duhoont'oh. Dune ndi yun ookw'ut 'a'nukat. 'Uzoo'-i 'anukat-i 'ananla.

<sup>25</sup> 'Awhuz huztez whe dune yuch'az ditni-un whusainya. 'Et ndi 'ainanla-i 'uzoo'-i toh, ndi 'anukat-i, 'ut'antsi' ts'utni, 'i yutoh 'ananla, 'ink'ez whenaja.

<sup>26</sup> 'Et ts'iyawh hanányai whe ndi 'ut'antsi', 'i cha bulh hainyai.

<sup>27</sup> 'Et yoh whumoodih be 'ulhnane highu nindil 'ink'ez 'uhuyulhni, 'Hadih nemoodih di whe inla ndi unzoo-i hunuyeh ootoh 'ainanla? 'Di whe 'unt'oh ndi 'ut'antsi' dult'oh?'

<sup>28</sup> 'Et ubulhni, 'Sch'az ditni-un la 'uja.' 'Et be 'ulhnane huyulhni, 'Ndi 'ut'an untsi'-i ootoh hananyai-i, 'i hats'úntileh hukwa' ninzun eh?'

<sup>29</sup> 'Et ubulhni, "Awúndooh! Whute 'unt'oh doo ka la ndi unzoo-i cha bulh 'óohneh.

<sup>30</sup> Whute 'et ndulhdzun ha' úntikulh whuts'un. 'Et 'awet ha' nukat-un neoninzut de, ha' untilelhne, 'enne si budósní', 'udechoo 'ut'antsi' hanáhlle 'ink'ez ulhghel duták'un huba. 'Ink'ez ndaï la unzoo-i ts'iyawh hanáhle 'ink'ez haníyeh-i ba yoh whuz danáhle.' "

*Nts'en'a la yak'uz lerwe 'uhuhoolhdzun-un, ndi mai, mustard huyulhni, 'i k'un'a 'unt'oh*

<sup>31</sup> Doo cha 'uyoo khuni be nawhutnuk-i be whuts'odul'eh-i, 'i be bubulh yalhduk 'et whe nja dúbulhni, "Nts'en'a la yak'uz lerwe 'uhuhoolhdzun-un, 'et ndiz un'a nja duhoont'oh. Ndi mai, mustard huyulhni, 'i k'un'a 'unt'oh. 'I dune yílhchoot 'ink'ez duhanuyeh k'et 'ainanla.

<sup>32</sup> Ndi mai soo 'uk'enus nint'um-i, 'i hanányai 'ink'ez oochun 'uk'enus dincha suli'. Ndi mustard huyulhni oochun, mai chun 'i ts'iyawh ba ndo idilyiz suli'. 'Et 'i dut'aiyaz 'i duchun dut'aiyaz yuzischum toh t'ó neníla. 'Et whuz un'a yak'uz lerwe 'uhuhoolhdzun-un 'on nus hooncha tileh.' "

*Nts'en'a la yak'uz lerwe 'uhuhoolhdzun-un, 'et lhes ntuldoh-i dult'oh*

<sup>33</sup> Doo cha 'uyoo khuni be nawhutnuk-i be whuts'odul'eh-i, 'i be bubulh yalhduk 'et whe nja dúbulhni, "Nts'en'a la yak'uz lerwe 'uhuhoolhdzun-un, 'et ndiz un'a nja duhoont'oh, lhes ntuldoh-i dult'oh. Ndaï la ts'eke yílhchoot 'ink'ez lhes nudzaih-i, 'i ta tsetsai be únde'ooldzih-i dizbun. 'I ntuldoh-i bulh 'ilho be yándzai, 'ink'ez yunilhtlus. 'Et hukw'elh'az 'udun neíninkai whe untílhdo. Ts'iyawh ntuldoh lhih.' "

*Khuni be nawhulnuk-i be whuts'odul'eh-i, 'et whuz un'a za Sizi 'ilhu-naoodulhne bubulh yailhduk*

<sup>34</sup> Ndi ts'ya-i khuni be nawhutnuk-i be whuts'odul'eh-i, 'et whuz un'a za Sizi 'ilhunaoodulhne bubulh yailhduk. 'Aw 'uts'un un'a lhe'budínel. 'Et diz un'a za budáni'.

<sup>35</sup> 'Et whuz un'a nyoon nus hoo'en-un daja dani' la, 'et ts'iyawh lhaóoduja whe nja dutni,

"Khuni be nawhutnuk-i be whuts'odul'eh-i, 'i be bubulh yatisduk.

Nts'oya hoozulh whe ndi yun 'uyinla 'et whuts'un,  
ndai la buch'a yuntiz'i-i, 'i ghun budutásnel."

*Ndi haniyeh-i toh 'ut'antsi' hanányai-i whubuntilhtun daja ni*

<sup>36</sup> 'Et Sizi 'ilhozdilne, 'enne ts'iyawh whenábalh'a' 'ink'ez yoh danínya. 'Et yugha hodul'ehne highu nindil 'ink'ez huyúlhni, "Ndi khuni be nawhutnuk-i be whuts'odul'eh-i, ts'ih'un un'a nedini ndi haniyeh-i unzoo-i toh 'ut'antsi' hanányai-i, 'et daja ni whe 'utni?"

<sup>37</sup> 'Et ndúbulhni, "Ndai unzoo-i hanányai oomai' 'i, mbe la 'ainanla-un, 'en yinka dune ye' 'en 'unt'oh.

<sup>38</sup> Haniyeh k'et, 'et ndi yun k'ut whunduwhult'oh whe' hoont'oh. Ndi mai unzoo-i, 'i yak'uz whulerwe buzkehne, 'enne duhúlt'oh. 'Et hoonts'i ndi 'ut'antsi', 'i ntsi'-un buzkeh duhúlt'oh.

<sup>39</sup> 'Ink'ez mbe la yuch'az ditni-un, ndi 'ut'antsi' 'ainanla-un, 'en netsudule. Ha'nukat-un 'et 'andit ndóya whudizulh-un 'et whulatoh. Mbene la ha'úntilelhne, 'enne lizas duhult'oh.

<sup>40</sup> 'Et huwa nts'en'a la ndi 'ut'antsi' nahidulhdzoooh 'ink'ez hidilhk'un, whuz un'a za njan 'andit whudizulh-un whulatoh de cha, nduwhutanelh.

<sup>41</sup> 'Ink'ez yinka dune ye', 'en oolizas whunilhchoh ts'e whutl'abutilelh. Nts'e la whulerwe unli-un, mbene hukwaya hooni tune' 'úst'enne, 'enne 'ink'ez yuk'unulhe'ust'enne, 'enne ts'iyawh 'ilhunabotálelh.

<sup>42</sup> Nts'e la kwun dizk'un huba' hoont'oh-un, 'et whuz hubotilhduhl. 'Ink'ez tso yahutilhduk 'ink'ez dughoo luhuhidutik'us.

<sup>43</sup> 'Et dzin nts'en'a la sa hadánat, mbene la ts'ih'un un'a 'unt'ohne, nts'e la buBá lerwe unli-un, 'enne cha whuz un'a za sa k'un'a buts'u haítiduz whe' hoont'oh. Mbene la budzo hoonline, 'enne soo cho huyoozólhst'ai' huba' hoont'oh.

*Yak'uz k'une' whul'en-un, dáwhudizti' la, 'et ndiz un'a nja dúhoont'oh*

<sup>44</sup> "Doo cha za nohdusni, yak'uz k'úne' whul'en-un, dáwhudizti' la 'et diz un'a nja dúhoont'oh. Ndun dune njan yun k'ut hoonzoo-un, 'et 'oh ho nunúta whe hoonliyaz dizi'-i, 'i la nayin'ai. 'Ink'ez 'on yo nayuntilh'i. 'Et hoont'i k'et ndun dune ndai hoonli yut'i-i, 'i ts'iyawh ye 'ónket 'ink'ez ndi yun yuk'ut nayin'ai-i, 'i yun ndulcho whe yonket.

*Doo cha za yak'uz k'úne' whul'en-un, dáwhudizti' la, 'et ndiz un'a nja duhoont'oh*

<sup>45</sup> "Doo cha za nohdusni, yak'uz k'úne' whul'en-un, dáwhudizti' la 'et ndiz un'a nja duhoont'oh. 'Et doo cha 'uyoon dune, 'en hoonliyaz 'i ts'iyawh yooket. 'Et 'on 'un doo cha ye ná'ooket. 'En kw'usul k'us dunizti'-i, 'i hunúta.

<sup>46</sup> 'En 'ilho kw'usul k'us dunizti'-i, 'i la nainin'ai. Ndun dune ndai hoonli yut'i-i, 'i ts'iyawh ye 'ónket whe ndi kw'usul k'us dunizti'-i, 'i yoonanket.

*Yak'uz k'une' whul'en-un, 'et lhembilh tahúyalhdil, 'et whuz un'a nja duhoont'oh*

47 “Et doo cha za nohdusni, yak'uz k'úne' whul'en-un, 'et ndiz un'a nja dúhoont'oh. Ndiz un'a 'uhut'en, lhembilh tahúyalhdil 'ink'ez nonáhuyigus lhawh didowh-i huzdlooh.

48 'Et nohúyigus whe ts'iyawh lhtahaháyule. Ndai la lho 'utsi'-i, 'i ts'iyawh tanáhuyulhdilh. 'Ink'ez ndai la unzoo-i ts'iyawh nts'e 'uhitilh'elh ts'ú whe-huyulhdilh.

49 'Et 'awet nts'oya hoozulh whe buba neónin'ai-un, 'et buba whusahóolts'ut de, 'et hukw'un'a za 'uwhutánelh. Lizas whusahutidulh, 'enne ts'iyawh unzoone dune 'ink'ez ntsi'ne dune lhtahábotileh.

50 Ntsi'ne, 'enne nts'e la kwun dizk'un huba' hoont'oh-un, 'et whuz hubotilhdulh. 'Ink'ez tso yahutilhduk 'ink'ez dughoo lhuhidutik'us.”

51 'Et 'awet Sizi ubúlhni, “Njan ndunóhdusni-un, 'et ts'iyawh eh t'eoonáhzun?” 'Et 'uhuyulhni, “A, neMoodihti, ts'iyawh t'ets'oninzun.”

52 'Et 'ubulhni, “'Et huwa mbe la Yak'usda ooghuni 'uk'eguz-i 'ink'ez yak'uz k'une' whul'en-un 'et huwun wheyodalh'e', ndun dune 'en yoh whumoodih-un, 'en dult'oh. 'Ink'ez ndai la yut'i-i toh ts'iyawh ts'et hayúle, 'andidi-i 'ink'ez 'uda'-i cha. 'Et whuz un'a dune hodulh'eh.”

*Keyoh Nazareth ts'e mbene la Sizi ooba 'alha lhe'hoot'ohne, 'enne ts'iyawh hits'u disnih*

53 'Et ndi khuni be nawhutnuk-i be whuts'odul'eh-i, 'et 'awet Sizi ts'iyantsuk lhaoodinla whe nyo usda-un whuch'a nasja.

54 'Ink'ez dich'oh dukeyoh ts'e naosja whe Lizwif bulugliz 'et whe-whúbondunilh'e'. 'Et whe ts'iyanne buba hooncha sulí', 'ink'ez 'et 'ulhodutni, “Ndun dune nts'ez de hahón'ai ndi khuni whutnih-i be yalhduk? 'Ink'ez hooncha tune' 'ut'en nts'en'a dat'en whe 'ut'en?”

55 'Alha iloh lakw yoh 'uwuhulh'en-un, 'en ooye' 'unt'oh? 'Ink'ez 'en iloh lakw ooloo Mary? K'us bulhutsinke iloh lakw 'enne James, Joses, Simon, 'ink'ez Judas?

56 'Et bulhtuske 'aw lakw ts'iyawh nebulh lhe'hit'oh? 'Et ndun dune ndi ts'iyawh nts'ez de hahónla whe 'utni?”

57 'Et huwa ts'iyawh hits'u disnih. 'Et Sizi ndúbulhni, “Mbe la nus hoo'en unli-un, 'en ts'iyanne yúdilhti'. 'Et hoonts'i dich'oh ookeyoh whut'enne 'ink'ez dich'oh ooyoh, 'enne cha 'aw lhuhidilhti'.”

58 'Et Sizi 'en 'aw buba 'alha lhe'yit'oh. 'Et huwa dich'oh dukeyoh 'aw lhat-un hooncha tunulhé'it'el.

## 14

*John dune too be 'ulh'en-un, 'en hizilghí*

1 'Et 'oh da' 'oh whuya whudzulh whe lerwe Herod 'en Sizi yulh údants'o.

2 'Et Herod de 'ustlene 'ubulhni, “Ndun 'en John dune too be 'ulh'en-un, 'en 'unt'oh. Yaidlanne toh nahitna. 'Et huwa 'ut'en hoolhtus te ne'út'en.”

3 Ndiz un'a 'uhooya whe 'oh da' Herod John huyílhchoot 'ink'ez huyulhghel 'ink'ez 'ahúyan'ai. Oobulhutsin Philip huyulhni, 'en oo'at Herodias huyulhni, 'en la toh ts'e yinla.

4 'Et John Herod ndúyulhni, “Aw nyun mba ts'ih'un un'a lhe'hoot'oh whe 'uyoon oo'at oozih sinda.”

5 'Et Herod yutuzilghel hukwa' ninzun. 'Et hoonts'i dunene John 'en nus hoo'en-un 'unt'oh huninzun, 'et huwa Herod whenilhjoot.

6 'Et 'ilhooh dzin 'et Herod whuzdli dzin 'uhoont'oh whe Herodia ootse' 'en bubut nídai. Herod tube ooba hoonzoo.

7 'Et 'aho hits'u náhizya whe 'uyulhni, "Ndet sts'o hukwa' ninzun-un sts'o hukwa' dini."

8 'Et nyoon ts'eke ooloo, 'en, "Herod oodilhkut 'ink'ez John dune too be 'ulh'en-un ootsi lusyet be stl'ainkaih dóni!," yulhni.

9 'Et huwun lerwe oodzi únduda sulí. 'Et ts'iyanne mbene la yuzih dilh'ts'ine, 'enne ts'iyawh hidánts'o, 'et whe ts'ekeyaz dughuni yutl'aidan'ai. 'Et huwa 'et whuz un'a 'uhuyooleh huba' hoont'oh.

10 'Et 'awet nts'e la 'adin'ai ts'e whuz wheyálh'a, 'ink'ez 'adinlane ghunline, John hitsi k'úrintsel.

11 'Ink'ez lusyet be whusahúyankai, 'ink'ez ndun ts'ekeyaz tl'ahúyankai. 'Ink'ez duloo yughi nínkai.

12 Yugha hodul'ehne, 'enne whusahandil. Hizi huyilhchoot 'ink'ez 'ahúyalhti. 'Et hukw'elh'az Sizi ts'u whehandil 'ink'ez hidáni'.

### *5,000ne dunene Sizi huyoo'alh-i bugha nín'ai*

13 'Et Sizi whulh udants'o whe buch'a násja 'ink'ez ts'i be inya 'ink'ez nts'e la disoh ts'e whuz nehúninki. 'Et hoonts'i lhane dune t'ehonanzin ibulh nts'e la nehúninki ts'e, whuz lhelhdun keyoh whut'enne hiyuwhenándil.

14 'Et Sizi ts'i bé hainya whe dune soo ts'ih'un huldlai k'et 'aw 'uzdooni' ait'oh, 'enne bunilh'en. 'Et 'aho bugha té'nanzin 'ink'ez ndudane cha ts'iyawh soo na'binla.

15 'Andit 'awet hulgha 'uhoont'oh 'et huwa yugha hodul'ehne, 'enne highu nindil 'ink'ez huyulhni, "Njan disoh 'uhoont'oh. 'Awet yoo 'un hoozulh. Ndunne ts'iyawh 'uts'un keyoh ts'e nabalh'alh, 'et whuz la huya'alh-i hoket."

16 'Et hoonts'i Sizi ndubulhni, "Aw nahutoodilh huba lhe'hóot'oh. Nohnich'oh bugha náinuht'aih."

17 'Et 'uhuyulhni, "Aw hoonli lh'ts'it'ih. Lhes kwulai' 'ink'ez lho nanki, 'aw 'i za ts'ut'i."

18 'Et ndubulhni, "Diz sts'óhlelh!"

19 'Et mbene la 'ilhunaosdilne, 'enne ts'iyawh tl'oyaz k'ut natl'ahudoolts'ih ubúlhni. 'Et ndi kwulai' lhes 'ink'ez nanki lho cha, 'i hitl'ahúyanla whe ndo whúnalh'en whe musí ni whe tenadidli. Lhes taidanyuz 'ink'ez lho cha 'et diyinla 'ink'ez yugha hodul'ehne butl'ayánla, 'ilhozdilne bugha húyo'alh ha.

20 'Et ts'iyawh 'uhan'al 'ink'ez 'uhunisdaí. Ndaí la ch'utizkat-i ts'iyawh nahuyalhdzoo whe whunizyai 'on 'at nanki chalhyal dizbun.

21 'Et nyoonne dunene, 'enne 'ankw'us 5000ne 'uhan'al. 'Et ts'oodunne 'ink'ez ts'ékoo 'enne cha 'uhan'al.

### *Sizi too k'ut nuya*

22 'Et 'aho Sizi yugha hodul'ehne ts'i bez whenábalh'a' whe, "Sto nyan ahkelh," ubulhni. 'Ink'ez 'ilhunaosdilne, 'enne cha dukeyoh ts'e whenábalh'a'.

23 'Et 'awet ndunne ts'iyawh whenábalh'a' whe didutch'oh ndo dzulh k'uz whinya tenadutidli ha. Dich'oh únli whe bé nadalghel.

24 'Et 'awet ts'i bun k'ut taniz 'oh whuya ukwus nilh'ts'i tube búdudzits'i, 'ants'i lhents'ó dildus.

25 'Et 'awet bundada' yutilhkai whe Sizi too k'ut buts'u tizya.

26 'Et khunsul yugha hodul'ehne hitilh'en whe hunílhjoot, "Dune tsin 'ut'en!" hutni ibulh tsoya whehúnilhduk.

27 'Et 'aho Sizi buts'u yatilhduk, "Nohdzi ulhtus úlhtsi! Si 'ust'en! Whenulhjt íloh!"

28 Peter diz un'a yoodulhkut, “SMoodihti 'alha nyun 'int'en de, too k'ut nts'u toosya'-un stl'ahóon'aih.”

29 'Et 'aho 'uyulhni, “Anih!” 'Et 'awet Peter ts'i be hainya 'ink'ez Sizi too k'ut yuts'u tiyalh ha.

30 'Et nyo whunilh'en whe nilhtsi tube ulhtus 'ink'ez whenilhjoot 'ink'ez yo útízdat whe, “SMoodihti, sla 'ineh!” yulhni.

31 'Et 'aho Sizi yula sùgooh whe ndi yulhni, “Aw soo 'ultsuk-i be 'alha' hoont'oh-i lhint'ih. 'Et dahoont'oh huwa mba nawh 'uhoont'oh?”

32 'Et ts'i be náhit'az whe 'aho nilhts'i k'oh 'úja.

33 'Et mbene la ts'i bet dilhts'ine, ts'iyawh hibut nachánilya 'ink'ez 'uhuyulhni, “Alha nyun Yak'usda ooYe' 'int'oh!”

### *Gennesaret whut'enne undudáne Sizi soo na'bulh'en*

34 'Et 'awet nyan Gennesaret ts'e yahuzki whe,

35 'et keyoh whut'enne Sizi hitilh'en ibulh, nahuyóolhts'it whe lhtunuhúnihus't'ai. 'Ink'ez ts'iyawh ndudane hits'ú boozdla.

36 “Ndai la nyunaih naints'uz-i 'ants'i yus ts'e oot'áts'onalh,” huyulhni. Ts'iyawh mbene yut'aiznaine, 'enne soo ts'iyawh ts'ih'un un'a soo ná'huja.

## 15

### *Ndai la nedzi be yats'ulhduk-i, 'i gha ts'intsi' lhih*

1 'Et 'awet Jerusalem keyoh whuts'un ndunne Moses be 'udust'us 'uk'ununáguzne 'ink'ez Phariseene, 'enne cha ts'iyawh Sizi highu nindil 'ink'ez 'uhutni,

2 “‘Et di ha nga hodul'ehne, netsoda'ne 'uda' ne'whust'en hukw'un'a 'aw hukw'unulhe'hust'en? Whunilh'en, ndunne nga hodul'ehne, 'aw lanalhe'hulhde 'uhuti'ulh whutso!”

3 'Et dúbulhni, “‘Et di ha nohnich'oh nohk'oh ts'e huwa Yak'usda ooghuni ook'unulhe'zajt'en?”

4 Whunulh'en, nohni nts'en'a daht'en! Yak'usda dughuni nohtl'aidan'ai whe nja dutni, 'Mbá 'ink'ez nloo bulh hubudólhti'. 'Et doo cha 'udun 'et nja dutni, 'Mbe la duloo 'ink'ez dubá bulh dzoh ts'e bughu yatilhduk-un, 'en daootsa huba 'unt'oh.'

5 'Et hoonts'i nohni ndiz un'a 'udahni, 'Mbe la dubá k'us duloo nja dúbulhni-un, ndai 'ust'i-i, 'i be da' nohla 'oost'en oole', 'et hoonts'i 'i ts'iyawh Yak'usda gha núsdlá.'

6 'Et whuz un'a nohe'ut'en k'oh be 'aw duloo 'ink'ez dubá bulh lhubudíłhti'. 'I be Yak'usda ooghuni nohtl'aidan'ai-i, 'i 'aw hoonliyaz lhiloh sulhtsi!

7 Nohni duba na'udzoo'ne ahli! Ndun nus hoo'en Isaiah, 'en 'uda' hon'en 'ink'ez ts'ih'un un'a 'utni nohni nohghun. Njan 'et nja dutni,

8 'Ndunne dune dughuni be be za sodíłhti'.

'Et hoonts'i budzi, sughun nilhdza' 'unt'oh.

9 'Ndunne doo ka la 'ants'et sts'un teni 'uhunoolhdzin.

'Ink'ez ndet la dune bube 'ut'en k'oh,

'i Yak'usda ooghuni netl'aidan'ai-i 'i k'un'a 'uyoonne hubuhodoolh'eh hukwa' hut'en.’”

10 'Et Sizi 'ilhunaoodulhne, “‘Anih! Diz áhdulh!” ubulhni, 'ink'ez 'et ndúbulhni, “Soo zúlhts'ai 'ink'ez soo cho t'eeonahzeh!

11 'Ndai la dune buza yúkat-i, 'aw 'et whe iloh hintsi' hulhih. 'Et hoonts'i ndai khuni 'aw lhizoo-i dune ye yalhdruk-i, 'i be dune hintsi' lhih.’”



12 'Et yugha hodul'ehne higho nindil whe 'uhuyulhni, "T'eoonínzun eh ndunne Phariseene nyodants'o whe daja dini-un, 'et ndúwhulcho whe buba dzoh 'údinja?"

13 'Et Sizi ubulhni, "UBá yak'uz usda, ndai la 'aw 'alhinile-i, 'i ooghih tubulh hahitilhch'ulh.

14 Whute! N dunne 'aw but's'áhalhozah'ai! 'Enne moodih hoos'enne le'hint'oh. 'Et ndiz un'a nja duhoont'oh, 'ilhoghun hoos'en-un 'ink'ez 'ilhoghun hoos'en-un ghunli de, nahúlt'oh tsa k'et 'áhatilts'ulh."

15 'Et Peter yoodulhkut, "Ndi be nawhutnuk 'i be whuts'odul'eh-i, nts'en'a daja ni, 'et ts'iyawh whunénihltun."

16 'Et 'uyulhni, "Aw eh noheni talhodulhts'it whe eh dahni?"

17 'Awhuz eh ts'ih'un nelhózah'ai? Dune ndai la oozá yúkat-i, 'i ts'iyawh oobut za be yukat. 'Ink'ez ooyust'e ts'u hanáyukat.

18 'Et ndai la dune khuni be yailhduk-i, 'i budzi ts'u hayúkat 'i 'unt'oh, 'ink'ez 'i dune dilhtsi'.

19 Soo cho whunulh'en, ndi 'et ndunt'oh-i, 'i dune budzi bez hayúkat, be ne-eni untsi'-i, dune hutuzilghel, 'uyoon dune oo'at k'us 'uyoon ts'eke ooki bulh ninta' ant'en-un, 'ink'ez 'aw lghulhdilts'ine hoontsi' whuz un'a za ne'hut'en. 'Uduntit'ih-un, 'uyoonne ba whuts'it-un, 'ink'ez Yak'usda ch'az yalhduk-un cha.

20 'Et njan 'et dúhoont'oh-un, whunilhchoh whe dune hintsi' lhih. 'Et 'aw lanalhe'zuhlde whe 'ah'alh-un, 'aw 'et huwa iloh hintsi' lhih."

*Ndun ts'eke, 'udun yun k'ut whut'en-un, 'en ooba 'alha' hoont'oh hooncha whe' hoont'oh*

21 'Et 'awet Sizi nyo usda-un whuch'a nasja whe Tyre keyoh 'ink'ez Sidon keyoh 'oh ho whenghoh ts'u naóosja.

22 'Et whuts'un 'ilhoghun ts'eke, 'en Canaan whut'en-un 'unt'oh, 'en yughu ninya. Tso bulh yalhduk whe' yulhni, "SMoodihti sgha te'ninze, t'enyunúsun David oots'u hainzut-un 'int'oh! Syaz ts'ekeyaz 'en tube hoontsi' hukw'un'a ntsi'-i nududeh-i ooyudinda!"

23 'Et 'aw daja lhidinel. 'Et yugha hodul'ehne highu nindil 'ink'ez 'uhuyulhni, "N'un nailh'alh, 'et la tso bulh yalhduk-un 'etsul udónih."

24 'Et 'ubulhni, "Mbene la Israel ooyoh whut'ine, 'enne 'ants'i 'usbai ninta nih'az-i le'unt'ohne, 'enne za but's'ú tiz'a."

25 Ndun ts'eke 'en yughu ninya whe yubut nachaniti 'ink'ez, "SMoodihti, sla 'ineh!" yulhni.

26 'Et Sizi diz un'a 'uyulhni, "Ndai la ts'oodunne yu'alh-i lhikeyaz gha óoh'alh junih."

27 'Et ts'eke 'uyulhni, "SMoodihti 'alha' dini. 'Et hoontsi' ndai la moodihti ludab k'ut tukat-i, 'i lhikeyaz huyuldil."

28 'Et Sizi 'uyulhni, "Ooh ts'eke hooncha whe mba 'alha' hoont'oh-un, 'et hooncha whe' hoont'oh. 'Et huwa hukwa' ninzun k'un'a 'uhoneh.'" 'Et soo 'oh whuya hoozulh-un, ooyats'e soo na'uja.

*Lhane undudane, 'enne Sizi usda-un highu nindil 'ink'ez ts'iyawh soo ná'balh'en*

29 'Et 'awet Sizi bughu natisja whe Galilee bun 'oh ho neninya. Ndo dzulh k'uz whinya, 'et nat'l'adida'.

30 'Et khunsul lhane dune, 'enne highu nindil. Mbene la nulhúsdiine, hoos'enne, yalhulhdukne, ooyust'e bodin'aine, 'ink'ez 'uyoonne cha, 'enne ts'iyawh hits'u botule. Hibut neboninla 'ink'ez ts'iyawh soo ná'balh'en.

<sup>31</sup> Yal hulhdukne cha yawhehunilhduk, ooyust'e bodin'aine, 'enne cha soo na'huja. Nulhúsdilne cha nahúdilh nahusdli, hoos'enne cha huhoo'en nahusdli'. Ts'iyanne bunalh'en whe tube buba hooncha 'ink'ez Israel oodune'ne, 'enne buYak'usda 'en 'on nus hidálhti'.

### *Sizi 4,000ne ghá' nin'ai*

<sup>32</sup> Sizi yugha hodul'ehne, 'enne 'anilh budáni' 'ink'ez ndúbulhni, "Ts'iyawh ndunne dunene bugha té'nuszun. Tat dzin whuts'un nja szih hudilh'ts'i 'ink'ez 'aw huya'alh-i lhuht'i'. 'Et 'aw lhe'hus'al whe bukeyoh ts'e nabutoos'a' ait'oh. 'Et dúbusdla de, nahidulh ts'e la bukaootoozit."

<sup>33</sup> Yugha hodul'ehne huyulhni, "Njan keyoh 'aw dune hooloh-un 'uhoont'oh. Nts'ez de suba soo 'últuk-i t'alh-i nats'ólelh lhe'ultsukne dune gházt'i'ah-i?"

<sup>34</sup> 'Et Sizi ubúlhni, "Daltsuk lhes sut'e aht'i?" "Lhtak'ant'i lhes sut'e 'ink'ez lho nt'umiyaz bulh," huyulhni.

<sup>35</sup> 'Et 'ilhozdilne natl'adulh'ts'ih ubulhni.

<sup>36</sup> 'Et ndi lhes lhtak'ant'i lho bulh yílhchoot 'ink'ez musi ni whe tenadidli. Taidanyuz 'ink'ez yugha hodul'ehne butl'ayánkai. 'I ts'iyawh natl'adil'ts'ine butahinínla.

<sup>37</sup> Ts'iyawh na'hit'al 'ink'ez 'uhunisda. 'Et yugha hodul'ehne lhtak'ant'i chalyal dizbun 'i highá'oz'al-i nahuyalhdzoo.

<sup>38</sup> 4,000ne dunene at'en 'uhan'al. Ts'oodunne 'ink'ez ts'ekoo 'enne cha 'uhan'al.

<sup>39</sup> 'Et 'awet Sizi 'ilhunaosdilne bukeyoh ts'e whuz whenábalh'a' whe 'et ts'i be naja 'ink'ez yun Magdala huwhutni ts'e whuz whehánki.

## 16

### *Phariseene 'ink'ez Sadduceene cha, 'enne huwa 'ít'en-un buba' hooleh hukwa huyoodulhkut*

<sup>1</sup> 'Awet ndunne Phariseene 'ink'ez Sadduceene cha, 'enne highu nindil 'ink'ez huyóolhdzih whe huyoodulhkut, "Aw yak'uz whuts'un hooncha tune' whut'en-un, whunéolhtun ait'oh?"

<sup>2</sup> 'Et ndúbulhni, "Et hulhgha ts'e ndo yat whunulh'en. 'Et whudulk'un de, 'et dzin hoonzoo tileh dahnih.

<sup>3</sup> 'Et bundada' yat kw'us bulh dulk'un sul'i whunulh'en de, 'awet azih whudutitsi' dahni. Nohni duba na'udzoo'ne ahli! 'Et ndo yat dawhut'en la, 'et t'oonáhzun. 'Et hoonts'i ndoyá whudizulh dawhut'en la, 'et ndet 'uwuhulhni, 'aw t'oonuzáhzun!

<sup>4</sup> Njan 'andit whudizulhne, 'enne lubeshi ts'u nint'ine za' 'uhint'oh. 'Ink'ez 'ahoolhyiz dune ts'eke bulh ninta' hutit'elh-un, 'et za whuts'ónint'i. 'Ink'ez hooncha huwa 'ít'en-un whuntih'elh hukwa' nahzun. 'Et hoonts'i 'aw hoo'h'en-un nohghá holts'it ait'oh. 'Et nts'en'a la Jonah bulh dáhooja inle' la, 'et za whutih'elh whe' hoont'oh!" ubúlhni, 'ink'ez bughu whenája.

### *Huwohoole' Phariseene 'ink'ez Herod bules untuldoh-i, 'i ch'a ubúlhni*

<sup>5</sup> 'Et 'awet nyan nahooski whe yugha hodul'ehne lhes nahodilhnoh.

<sup>6</sup> 'Et Sizi ndúbulhni, "Ahoohyiz wheni khahti ndunne Phariseene 'ink'ez Sadduceene cha, 'enne bules untuldoh-i ch'a."

<sup>7</sup> 'Et 'aho lhulh yawhehunilhduk, "Et 'aw lhes lhts'ít'ih 'et huwa 'utni."

<sup>8</sup> 'Et Sizi t'oonanzin whe 'et dúbulhni, "Nohni be 'alha' nahzun-i unsool! 'Et huwa' 'udahni. 'Aw lhes sálhah'al, 'et huwa eh 'et howu yalhduk?"

<sup>9</sup> 'Awhuz eh 'aw ts'ih'un t'oonuzahzun? 'Aw whunalhuzulhni whe kwulai' lhes 'i be 5,000ne gha náh'ai, 'ink'ez daltsuk chalhial ch'utzikat-i, 'i nalhdzoo?

<sup>10</sup> 'Et doo cha lhtak'ant'i lhes 'i be 4,000ne gha náh'ai, 'et daltsuk chalhial ch'utzikat-i, 'i nalhdzoo?

<sup>11</sup> 'Et nts'en'a aht'oh t'oonuzahzun, 'aw lhes ghun nohbulh yalhuzusduk? 'Uda' nohdasni, ndunne Phariseene 'ink'ez Sadduceene cha, 'enne bules untuldoh-i huwohle', 'i ooghu yasduk whe' dusni."

<sup>12</sup> 'Et 'aho t'ehoninzun ndunne Phariseene 'ink'ez Sadduceene cha, dune huhudulh'eh-un, 'et whuch'a buch'a huwahli, 'et 'uwuhulhni. Ndi lhes bulh untuldoh-i, 'i ch'a huwahli ni iloh whe 'utni.

### *Sizi 'en Christ 'unt'oh 'et Peter huwu yalhduk*

<sup>13</sup> 'Et Sizi Caesarea Philippi buyun k'uz whinya whe yugha hodul'ehne, 'enne uboodulhkut, "Si yinka dune ye' 'ust'oh. 'Et hoonts'i n'awh dunene, mbe whe 'ust'oh hutni?"

<sup>14</sup> 'Et 'uhuyulhni, "Whulohne, 'enne nyun John dune too be 'ulh'en-un 'int'oh hutni. 'Et whulohne cha, nyun Elijah 'int'oh hutni. 'Et 'onghohne cha, nyun Jeremiah 'int'oh hutni. 'Ink'ez whulohne nyun nus hoo'en-un 'ilhoghun 'int'oh hutni."

<sup>15</sup> 'Et 'ubulhni, "Nohni do', mbe 'ust'oh dahni?"

<sup>16</sup> 'Et Simon Peter yatilhduk whe 'uyulhni, "Nyun Christ, Yak'usda khuna-un, 'en ooYe' 'int'oh."

<sup>17</sup> 'Et Sizi 'uyulhni, "Simon Jonah ooye', 'uk'enus hoonzoo-un nghá whults'ut! Ndet sudini-un, 'et 'aw ndi yun k'ut dune, 'enne iloh nyunalhts'et hahúhon'ai. 'Ubá yak'uz usda-un, 'en nyunalhts'et hahon'ai.

<sup>18</sup> 'Ink'ez nyun Peter 'int'oh. 'Et ndi tse 'i k'ut slugliz neootas'alh. Njan mbe la kwuncho ulhtus-i yo ts'u haindilne, 'enne hoonts'i 'aw whuch'a hoolhdeh ait'oh.

<sup>19</sup> Nts'e la yak'uz whulerwe usda-un, whulugli ntl'atis'alh. 'Et ndi yun k'ut ndai la whedinguz-i, 'et 'uda' yak'uz cha whuz un'a za whedint'i. 'Et ndai la ndi yun k'ut k'unain'uk-i, 'et yak'uz cha 'uda' whuz un'a za k'unatit'uk."

<sup>20</sup> 'Et yugha hodul'ehne khuniti be 'ubúlhni, "Khun te 'uyoonne dóhni' junih si Sizi mbe la Christ, 'en 'ust'oh."

### *Dzoh nutizut-un 'ink'ez datitsah-un, 'et Sizi huwu yalhduk*

<sup>21</sup> 'Et 'oh whuya hoozulh whuts'un Sizi yugha hodul'ehne, 'enne whubunulhtun nus daootanelh la. Nts'en'a whe Jerusalem ts'u tiyalh. 'Et keyoh ndunne 'utso whudilhdzulhne, 'ink'ez lubret bumoodihne cha, 'ink'ez Moses be 'udustl'us 'uk'ununáguzne cha, 'enne bube lhat-un whe dzoh nuhítihdzut, 'ink'ez hituzilghelhel. 'Et whulh tát dzin, 'et dunadutádalh.

<sup>22</sup> 'Et Peter Sizi yílhchoot 'ink'ez 'udun neínilhiti 'ink'ez hukwa' yudáni', "SMoodihti nyun Yak'usda ngha te'untazeh! 'Aw nyulh 'et dúhoneh ait'oh!"

<sup>23</sup> Peter yuts'u nálh'a 'ink'ez 'uyulhni, "Satan st'a nenínyaih! Nyun yooya suzilhts'i! Yak'usda nts'en'a la dat'en-un, 'et 'aw howu nuni lhnuzinzut. Ndi yun k'ut dune nts'oh tula ne'hut'en-un, 'et hukw'un'a za nuni ninzut!"

### *Mbe la whe khuna-un Sizi gha ninta oonin'ai de, 'en whe khuna-un whuch'a ootalhdoh*

<sup>24</sup> 'Et Sizi yugha hodul'ehne ndúbulhni, "Mbe la dune se' 'ut'en k'oh oot'en ha suntiyalh hukwa' ninzun de, ndi yun k'ut dats'ínt'oh-un, 'et ts'iyawh whula dootni, 'ink'ez dutulalghus yólhchoot 'ink'ez suntooya'.

<sup>25</sup> 'Et huwa mbene la whe khuna-un hotilhyihne, 'enne 'et hoonts'i ninta huhúta'alh. 'Et hoonts'i mbe la whe khuna-un si sgha ninta oonin'ai de, 'en whe khuna-un nahootá'alh.

26 'Et huwa dune ndi yun 'i ndulcho whe ooch'e' yúzdlí' de, 'ink'ez duzul 'i ninta inín'ai de, ndet whe ooba whutázoo'? 'Ink'ez dich'oh duzul nayital-hchulh hukwa' ninzun de, di k'elha suba duzul nayoket?

27 'Et huwa yinka dune ye' whusatiyalh, ndai la ooBá ye dizti'-i 'ink'ez oolzas, 'enne bubulh, 'et whusainya de, nts'en'a la ts'iyanne dahit'en, whuz un'a 'ilhone whe buba k'elha whutaleh.

28 Soo ts'ih'un un'a nohdusni, whulohne njan núdilhyanne, 'enne ndet la dahutitsah-un 'et whuts'un yinka dune ye' nts'en'a la whe lerwe unli-un, 'et whuz un'a whuz de uyalh de, ndunne dahútitisa whuts'o huyuntilh'elh."

## 17

### *Sizi 'uts'un ot'en suli'*

1 'Et awet whulh lkh'utat dzin inle' whe Sizi 'en Peter, James cha, 'ink'ez dulhutsin John, 'enne ndo dzulh k'uz dulh ubílya.

2 Khunsul bubut 'uts'un ot'en suli'. Oonin 'ants'i sa k'un'a oots'u ha'ánduz, 'ink'ez oonaih 'i cha khunsul 'ulhyul suli', 'ink'ez 'i cha oots'u ha'ánduz.

3 'Et khunsul Moses 'ink'ez Elijah bulh bube hóodiilts'ai 'ink'ez Sizi hibulh yáwhenilhduk.

4 Peter Sizi ndúyulhni, "NeMoodihti njan uzdilhts'i hoonzoo. Hukwa' ninzun de, tat-un whut'ah uzтитеz-un 'uts'otileh. 'Ilhoghun nyun mba, 'et 'ilhoghun Moses ba, 'ilhoghun cha Elijah ba."

5 Peter yalhduk whe khunsul kw'us be tidat'en whe buk'einde. Kw'us toh ts'e khunsul 'uwhutni, "Ndun sYe' 'uk'enus ook'esi-un 'unt'oh. 'En bulh hóonust'i'. 'En za 'oozúlhts'ai!"

6 Yugha hodul'ehne hídants'o whe hibut nachánildil, 'ink'ez tube whehúnilhjoot.

7 Sizi bughu ninya 'ink'ez but'aiznai whe ubulhni, "Dunadahdilh 'ink'ez whénulhjut iloh!"

8 'Et ndo nahítat'en whe 'aw 'uyoonne hooloh. Sizi didutch'oh za hiyan'en.

9 Ndet la dzulh k'ut whenáhudidil whe, 'et yo nahidulh whe Sizi khuni ulhtus-i be bubulh yalhduk whe 'et ndúbulhni, "Yinka dune ye' yaidlanne toh dunadutádalh whuts'un ndet hooch'en-un, khun 'uyoonne dóhni' junih!"

10 'Et yugha hodul'ehne, 'enne huyoodulhku, "Ndunne Moses be 'udustl'us 'uk'ununáguzne, 'et di ha' hutni, Elijah 'en cho whusatiyalh huba' hoont'oh hutni?"

11 'Et Sizi ndúbulhni, "Et 'alha Elijah 'en cho whusatiyalh 'ink'ez ndai hoonliyaz ts'iyawh lhanaidutileh.

12 'Et hoonts'i nohdusni, Elijah 'uda' whusainya whe 'unt'oh. 'Ink'ez 'en 'aw t'ehinúszun. 'Et hukwa' huninzun k'un'a 'uhuyinla. 'Et whuz un'a za 'enne bula be yinka dune ye' dzoh nutizut."

13 'Et yugha hodul'ehne, 'enne ts'iyawh John dune too be 'ulh'en-un, 'en ghu yalhduk t'ehonanzin.

### *Ts'oodun ntsi'-i nudúdeh-i ooyudinda-un, 'en Sizi soo ná'yinla*

14 'Awet 'ilhozdilne butanahundil whe 'ilhoghun dune yughu ninya 'ink'ez yubut dugwutsi be neninya. 'Ink'ez 'utni,

15 "SMoodihti sye' 'en oogha te'ninze! Ookaootuzuk 'ink'ez tube dzoh nuzut. Lhat tsudúlts'uk 'ink'ez talts'uk cha 'ut'i.

16 'Et ngha hodul'ehne bughi nústih hoonts'i 'aw soo na'huyooleh ait'oh."

17 'Et Sizi ndutni, "Nohni 'andit whudizulhne, nohni 'aw be 'alha hoont'oh-i lhaht'ih, 'ink'ez tank'us za 'iht'elh. 'Et dawhuldzoh nohtoh tisdalh? 'Ink'ez dawhuldzoh nohba 'et ndutist'elh? De', nye' 'en sghu nilhtih!"

18 'Et ntsi'-i nududeh-i ooyudinda-un, Sizi 'en ts'un khuni ulhtus-i be hukwa' yudáni'. 'Et whulh hulhgha za yuts'u hanája 'ink'ez ndun ts'oodun soo na'uja.

19 'Et Sizi yugha hodul'ehne, 'enne disoh ts'e highu nindil whe 'uhuyulhni, "'Et dahoont'oh huwa whe ndun ts'oodun ntsi'-i nududeh-i oots'u hanáts'inooyoot ait'oh?"

20 'Et Sizi ndúbulhni, "'Aw nohba 'alha lhe'hoot'oh 'et huwa 'aw 'oohleh ait'oh. 'Alha nohdusni ndi 'anukat-i lhe'niltsool-i, 'i mustard huyulhni, 'i k'un'a be nohba 'alha' hoont'oh-i, 'et 'ulcho de, 'et ndiz 'un'a da' 'udoohntni'. Ndi dzulh njan whuts'un, 'et nguz nailts'ut dahni de, 'aho 'et dutinelh. 'Et whuz un'a ts'iyaitsuk whuz un'a 'udahni de, 'et ndutit'elh.

21 'Et hoonts'i ndi ntsi'-i nududeh-i, netenadudli-i, 'ink'ez soo ts'úhoonih, 'et de za dune buts'u hanáts'iyuntiyulh whe' hoont'oh."

### *Sizi datitsah-un, 'et doo cha huwu yalhduk*

22 'Et 'awet Sizi 'ink'ez yugha hodul'ehne, 'enne Galilee yun k'ut hudilhts'i whe ndúbulhni, "'Awet nilhdukw yinka dune ye', 'en 'uyoonne dune tl'ahítihlhelh.

23 Hituzilghelhel 'ink'ez whulh tat dzin inle' de, dunadutádah." 'Et hodánts'o whe ts'iyawh tube ts'odi huzdli'.

### *Sizi 'en cha lugliz whucho whuzooneya yuk'elha hoolh'i*

24 'Awet keyoh Capernaum whuz hoozdil whe 'ilhoghun sooneya 'ilhunaoo'aih-un, 'en Peter yughu ninya whe yoodulhkut, "'Whunohodulh'eh-un 'en cha iloh lakw lugliz whucho whuzooneya yuk'elha hoolh'i?"

25 'Et, "A," ni. 'Et Peter yoh ts'u whinya. 'Et Sizi yutso yatílhduk 'ink'ez 'et dúyulhni, "'Simon, daja ninzun? Ndi ndai la sooneya dune buba k'elha yutaleh-i, ndi yun k'ut whulerwene, 'enne ndi sooneya 'ilhunahos'aih? Dich'oh bubuzkeh tilah k'us n'awh whut'enne tilah?"

26 'Et Peter ndúyulhni, "'Aw n'awh whut'enne, 'aw 'enne za." Sizi 'uyúlhni, "'Et 'alha' dini. Lerwene dich'oh bubuzkeh 'enne 'aw buba k'elha hole' ait'oh.

27 'Et hoonts'i ndunne Capernaum whut'enne, 'enne nebulh hónilch'e hukw'un'a 'ubuts'oolh'en ait'oh. 'Et huwa ndi lugliz whucho whuzooneya', 'i la buba k'elha ts'uyoolhtselh. Dugwe', bun guz ts'inyalh 'ink'ez oolhjas. Soo 'udechoo lho silhjus-i, 'i ooze lhch'az 'uhoonleh. 'Et sooneya naitán'alh. 'I ilhchoot 'ink'ez neba bugha ínin'aih."

## 18

### *Yak'uz whulerwe dilhts'i-un mbe suba 'uk'enus dízti'?*

1 'Et 'oh da' za Sizi yugha hodul'ehne, 'enne highu nindil 'ink'ez huy-oodulhkut, "'Yak'uz whulerwe dilhts'i-un mbe suba k'us dízti'?"

2 'Et Sizi ndun ts'oodunyaz 'anilh yulhni, 'ink'ez butoh neínihli.

3 'Ink'ez 'et ndúbulhni, "'Et soo ts'ih'un un'a 'unohdusni, 'et 'aw 'uts'un un'a nalhe'zahne de, 'ink'ez ts'oodunneyaz k'oh ts'e aht'oh nasahdli' de, 'et de za nts'e la yak'uz whulerwe unli-un whuz tíhdulh.

4 'Et huwa ndun ts'oodunyaz, mbe la yuk'oh ts'e 'unt'oh-un, whuz un'a dich'oh te'dudil'en, 'et ndunt'oh-un, 'en nts'e la yak'uz k'une' whul'en-un, 'enne butoh k'us hidilhti'-un tileh whe 'unt'oh.

<sup>5</sup> 'Ink'ez mbe la ndun ts'oodunyaz, mbe la yuk'oh ts'e 'unt'oh-un, huhóont'i 'i bulh highu nuseya, si cha whuz un'a za 'usuhinla."

*Dune ntsi'-un lubeshi 'itálhchulh-un, 'et whuts'u yúlha*

<sup>6</sup> "'Et ndunne ts'oodunne buba 'alha' 'ust'ohne, ts'oodunne hoontsi' ts'e ubonilht'ine, mbe la dune edújane, 'enne tse cho butsi'ilchun ehudinguz 'ink'ez k'us takhulh-un 'et tábuhano de, 'et 'on nus hootázoo'.

<sup>7</sup> Ndi yun k'ut dilhts'ine, 'enne mbene la hukwaya hooni tune' 'ut'enne, 'enne dawhultsi'-un, 'et butsi'u hóolts'ulh whe' hint'oh. 'Alha njan hukwaya hooni tune' hutit'en whe' hoont'oh. 'Et hoontsi' mbe la oogha 'et 'úhooja-un, 'enne dawhultsi'-un, 'et hoti'el'h whe' hoont'oh!

<sup>8</sup> 'Et nla k'us nke 'i be hukwaya hooni tune' 'ínt'en de, k'unint'as 'ink'ez 'un tilh'is! 'Et dzoh ninya k'us nyust'e bodin'ai de, 'et whuz un'a 'ilhiz be ts'ukhuna-i nghalts'ut de, 'et whuz un'a 'uk'enus mba hootázoo'. 'Et hoontsi' nke nankult'oh cha 'ink'ez nla nankult'oh cha bulh 'ínt'oh whe kwun nalhnusne-i tanyoníno de, 'uk'enus mba hootátsi'.

<sup>9</sup> 'Ink'ez nyuna be hukwaya hooni tune' whut'en-un whunilh'en de, nyuna hanín'aih 'ink'ez 'un ntilh'is! 'Et nyuna 'ilho bulh za, 'et whuz un'a 'ilhiz be ts'ukhuna-i ngha nínzut de, 'uk'enus mba hootazoo'. 'Et hoontsi' nyuna nankult'oh bulh kwun nalhnusne-i tanyoníno de, 'uk'enus mba hootatsi'.

*Mbene la ninta ninkatne, 'enne Sizi ubutilhyih ha, 'et huba whusainya*

<sup>10</sup> "'Et ndunne ts'oodunne khun buka lhe'nuzoozhin junih! 'Alha lizas yak'uz dilhts'ine, 'enne bughu hinli 'ink'ez 'uBá yak'uz usda-un, bulizas 'enne ahoolhyiz hinalh ne'ut'en.

<sup>11</sup> 'Et huwa mbene la ninta ninkatne, 'enne yinka dune ye' 'ubutilhyih ha, 'et huba whusainya.

<sup>12</sup> Nts'en'a daja nahzun? 'Et dune 'en whunizyat whunizyai (100) 'usbai 'ut'i whe 'enne butoh 'ilhoghun ninta nílhet whe yuloh 'et nébuninla 'ink'ez ndun 'ilhoghun ninta nilhget-un, 'en dzulh k'uz yukawhenántai.

<sup>13</sup> 'Et nayilhti de, ts'ih'un un'a nohdusni ndunne yuloh 'et nébuninlane, 'enne bugha whunilhni. 'Et hoontsi' ndun 'ilhoghun ninta nilhget-un, nayilhti de, 'en gha dahoolcho 'i be suba 'on nus whuntálhnhil!

<sup>14</sup> 'Et whuz un'a za ndunne ts'oodunne, 'et 'ilhoghun hoontsi' kwuncho yo ts'u tiyalh de, nohBá yak'uz usda-un, 'en 'aw hukwa lhe'nizun.

*Nyulhutsin lubeshi be ndulhyo 'uja de, datánlelh?*

<sup>15</sup> "'Et nyulhutsin lubeshi be ndulhyo 'uja de, 'et oozih neninya 'ink'ez daja whe ndulhyo 'uja-un, 'et dóni'. 'Et nyun 'ink'ez nyulhutsin bulh nohnich'oh lhanaódoohle. 'Et nghuni yílhchoot de, nyulhutsin whuch'a nanilde whe' hoont'oh.

<sup>16</sup> 'Et 'aw lhunyoozilhts'ai de, 'ilhoghun k'us nane te ilhchoot 'ink'ez 'et ooyoh ts'u natoohdilh. Nane k'us tane te mba lhgha 'úhudija de, 'et whuz un'a la 'uhót'e'. 'Et 'i be la daja hutni, ts'iya-i khuni ts'ih'un un'a 'uhoneh.

<sup>17</sup> 'Et hoontsi' 'et cha 'aw lhunoh oozilhts'ai de, 'et de Yak'usda ba 'ilhu-naoodulhne, 'enne cha budóhni. 'Et 'enne cha 'aw lhuboozilhts'ai de, 'et de mbe la 'aw ooba 'alha lhe'hoot'oh-un k'us mbe la sooneya 'ilhunaoos'aih-un, 'et ndun lubeshi be ndulhyo 'uja-un, 'en 'enne buk'un'a noolh'en.

<sup>18</sup> 'Alha' dusni whe' dusni, nohni ndai la ndi yun k'ut ooladihni de, 'i ndo yak'uz cha oolaooodutitnih. 'Et ndi yun k'ut ndai lhgha 'úhudija de, 'i ndo yak'uz cha lhgha 'úwhutanelh.

<sup>19</sup> Doo cha za nohdusni, ndai la ookwa oodutalhkut-i, 'ink'ez nane k'us tane ndi yun k'ut lhgha nohba soo' hoont'oh de, 'et mbe la yak'uz usda-un sBá, 'en nohba whutilelh.

<sup>20</sup> 'Et huwa nts'e la soози' gha nane k'us tane 'ilhunaoodilh de, 'et de si cha nohtoh 'ust'oh whe' hoont'oh."

### *Lhba whunats'odoolnoh-un*

<sup>21</sup> 'Et Peter yughu ninya whe yoodulhkut, "SMoodihti mbe la sulhutsin 'en lubeshi be sdulhyoh 'uja-un. Dawhultsuk sdulhyoh lubeshi 'utilelh 'ink'ez ooba whunaoodutiznoh? Lhtak'ant'it tilah 'et 'uwultsuk-un?"

<sup>22</sup> 'Et Sizi ndúyulhni, "Aw lhtak'ant'it lhduzusnih. 'Et lhtak'ant'it whunizyat (70) k'us 'on 'un tilah 'et 'uwultsuk dusni whe' dusni.

<sup>23</sup> 'Et yak'uz k'úne' whul'en-un, 'et ndiz un'a nja duhoont'oh. Ilhoghun lerwe unli da', 'et be 'ulhnane, 'enne daltsuk be buts'ú whulh'ai, 'i ts'iyawh ye bubúlh lhanaoodutile, 'et hukwa' ninzun.

<sup>24</sup> 'Et whe' whunilh'en whe 'ilhoghun be 'ulhna-un dahinilhti. Ndai la ye yuts'ú whulh'ai-i, 'i 10,000 sooneya dizti'-i, 'et 'ultsuk.

<sup>25</sup> Gak! Yuk'elha yoolhtselh-i hooloh. 'Et ndun lerwe dughuni be 'et ndi yulhni, 'et ndun dune, du'at, duduzkeh, 'ink'ez ndai yut'i-i cha, ts'iyawh ye 'óket. 'Et de soo sba k'elha whutilhtselh.

<sup>26</sup> 'Et huwa ndun be 'ulhna-un yubut nachániti 'ink'ez yuts'un tedudli whe 'uyulhni, 'Smoodih k'at, huba silh'i! Ts'iyawh mba k'elha whutiselh!'

<sup>27</sup> Oomoodih tube yugha te'nanzin. 'Et ndai la ye yuts'u whulh'ai-i, ts'iyawh yuba whunaoodilhnoh, 'ink'ez whenayalh'a'.

<sup>28</sup> 'En 'ulhna za 'az whinya whe doo cha 'ilhoghun dudulh 'ulhna-un, 'en nayilhti. 'En whunizyat whunizyai (100) sooneya ts'uditi'-i, 'et 'ultsuk yuts'u whulh'ai. Yuzool ílhchoot whe 'uyúlhni, 'Ndai la bé nts'o zus'ai-i, sba ook'elha hoolhtsi!'

<sup>29</sup> Ndun yubut dugwutsi be neninya 'ink'ez yuts'u tedudlih whe 'uyulhni, 'K'at, huba silh'i. Ts'iyawh mba k'elha whutiselh!'

<sup>30</sup> 'Et hoontsi 'aw lhuyoozilhts'ai. 'Et k'us 'ayan'ai ndai la ye yuts'u whulh'ai-i, ts'iyawh yuba k'elha whutilhtselh 'et whuts'un.

<sup>31</sup> 'Et 'onghoh 'ulhnane, 'enne ts'iyawh honalh'en 'et dahooja la. 'Et ts'iyawh howu ni huzdli'. 'Et huwa dumoodih ts'u whehandil 'ink'ez ts'iyawh hidani'.

<sup>32</sup> 'Et mbe la 'et dúja-un, 'en oomoodih 'anilh yudani' 'ink'ez 'et ndúyulhni, 'Nyun 'ulhna-un k'us ntsi-un azih 'int'oh! Sts'u tedindli ha 'et huwa ndai la be sts'o zilh'ai-i, ts'iyawh mba oonawhudizno!

<sup>33</sup> Nts'en'a la ngha te'niszin, 'et whuz un'a za 'oneh huba' hoont'oh, nyulh 'ulhna-un ts'un!' yulhni.

<sup>34</sup> 'Et oomoodih yulh hunilch'e. 'Et mbene la dune dzoh nulhdehne, 'enne butl'ayálhti. 'Et ndai la ye yuts'u whulh'ai-i, 'i ts'iyawh yuba k'elha whutilhtselh whuts'un.

<sup>35</sup> 'Et nohni cha nohulhutsinke ninta' hant'en de, 'ink'ez nohdzi ndulcho-i be 'aw buba whunalhodulhnoh de, 'et de sBá yak'uz usda-un, 'en cha whuz un'a za 'aw nohba whunaoodoolnoh ait'oh."

## 19

<sup>1</sup> 'Et 'awet ndi khuni Sizi 'i be bubulh yalhdruk-un 'etsul 'udija whe njan Galilee yun k'ut whuch'a nasja. 'Et Judea yun k'ut Jordan koh 'on ch'az whuz oozya.

<sup>2</sup> Lhane dune 'et whuz huyoonizdil. 'Et soo na'balh'en.

3 'Et ndunne Phariseene, 'enne cha highu nindil hiyootáldhzih ha. 'Et huyoodulhkut, "'Et ndet huwa ne'atke 'ants'i 'oh huwun buch'a naztidalh de, 'et Moses khuni netl'aidan'ai-i, 'i ook'un'a eh 'uhoot'oh?"

4 'Et Sizi ubulhni, "'Et ndi 'udustl'us k'ut 'uk'eguz-i, 'i 'aw lakw ook'uyalhuzulhduk? Njan 'et, 'et ndutni, 'udechoo whe' whudit'en da' mbe dune inla-un, 'en dune 'ink'ez ts'eke bulh 'ubínla da'.

5 'Et 'ink'ez 'et ndutni, 'Nja huwa dune dubá 'ink'ez duloo bulh buch'a ooya' huba' hoot'oh, 'ink'ez du'at bulh lhulh za hoot'e' huba' hoot'oh. 'Et whuz un'a nahúlt'o 'ilho hutileh.'

6 'Et whuz un'a 'aw 'on 'un nane lhihiloh, 'ilho za hinli sulí'. 'Et huwa mbe la Yak'usda lhgha bunilhtine, 'aw dune lhch'a nabóhltelhuba lhe'hoot'oh.'

7 'Et huyulhni, "'Et di ha Moses 'oh da' whuz un'a netl'ahón'ai 'ink'ez 'udustl'us cha neba inla inle' whe dune, 'i du'at tl'ayóolhchoos 'ink'ez naitoolh'a'."

8 'Et ndúbulhni, "Nohni nohnich'oh nohdzi dulhts'un, 'et huwa Moses noh'at whuch'a naoohja-un nohtl'ahón'ai. 'Et hoonts'i whe'whudit'en whuts'un, 'aw 'et dulhúhoot'oh.

9 'Inka 'unohdusni, dune oo'at 'en 'uyoon dune bulh ninta' 'ant'en t'eeonanzin de, 'et de za ndi 'udustl'us ndai la ye 'etsul itilelh-i, 'i du'at tl'ayóolhchoos. 'Et oo'at 'aw edúlhinel'et hoonts'i ndi 'udustl'us yutl'ayáalhchooz de, 'ink'ez 'uyoon ts'eke ghu nasda de, 'et de dune ts'eke bulh ninta' 'ant'en-un sulí'. 'Ink'ez ndun dune oo'at 'etsul 'uyinla-un 'ink'ez 'uyoon dune ghu nasda de, ndun dune 'en cha dune ts'eke bulh ninta' 'ant'en-un tileh.'

10 'Et Sizi yugha hodul'ehne, 'enne 'uhuyulhni, "'Et dune du'at bulh whuz un'a 'uhutit'elh de, 'aw lhghu lhuhíkoh de, 'et 'on nus soo' hoot'oh."

11 'Et ndúbulhni, "Ndi khuni, 'i 'aw ts'iyanne ba lhe'it'oh. Mbe la ooghá whunt'aine, 'aw 'enne za buba' hoot'oh.

12 'Et whulohne dune 'aw bughez hoonuloh whe huwhuzdli. 'Et 'onghohne 'et whuz un'a dune 'ubinla. 'Ink'ez whulohne yak'uz whulerwe-un, 'en ba whuz un'a soo whulh 'utit'elhne, 'enne whuz un'a la whulh 'úhoot'e'."

### *Sizi ts'oodunneyaz dula be buk'udalni*

13 'Et 'awet ts'oodunneyaz highu bunínla. Khun tilah buk'édolnih 'ink'ez buba tenadoodli ha. 'Et hoonts'i yugha hodul'ehne, 'enne dah hubuhútni.

14 'Et Sizi ndúbulhni, "Whute ts'oodunneyaz st'ó toodilh. Khun te dah budóhni' junih! Mbene la yak'usda whe lerwe unli-un whuz dilhts'ine, 'enne ndunne ts'oodunneyaz ubunduhúlt'oh whe' hint'oh."

15 Dula be buk'udalni, 'ink'ez buch'a nasja.

### *Dune hoonzoo' unt'oh-un*

16 'Et 'awet 'ilhoghun dune Sizi yughu ninya 'ink'ez yoodulhkut, "Dune hodulh'eh-un unzoo-un, nts'en'a hoonzoo k'un'a 'utist'elh whe 'ilhiz khutisnalh-un whuch'a ootásdoh?"

17 'Et Sizi ndúyulhni, "'Et di ha sudini, unzoo-un sudini? 'Aw 'ilhoghun unzoo-un hooloh. Yak'usda 'aw 'en za unzoo whe 'unt'oh. 'Et hoonts'i 'ilhiz be ts'otinalh-un hukwa' ninzun de, ndai la Yak'usda khuni dune tl'aidan'ai-i, 'i ook'une' 'int'en da."

18 'Et 'uyulhni, "'Et k'us ndai whe' dini?" 'Ink'ez Sizi ndúyulhni, "Dune sóhghelh junih! Ts'ekoo bulh ninta' 'ont'en junih! Undunont'ih junih! 'Uyoonne ba honts'it junih!

19 Mbá 'ink'ez nloo bulh ubudólhti!! Nts'en'a la nyunch'oh k'enaintsi', whuz un'a za nyulh dune buk'eontsi!!"



<sup>20</sup> 'Et ndun chilh ndúyulhni, "Usool da' whuts'un, ndi ts'iyawh ook'une' zust'en. Nts'en'a 'on 'un datíst'elh?"

<sup>21</sup> Sizi ndúyulhni, "Lhadulya-un tant'elh hukwa' ninzun de, ndai la 'int'i-i, 'i ts'iyawh be 'oonket, 'ink'ez tel'enne butainínle. 'Et de la ndo yak'uz ndai 'ilhoozanla-i, 'et mba tilalh. 'Ink'ez 'anilh se' 'ut'en k'oh tune' ónt'en ha sunanyalh."

<sup>22</sup> 'Et ndun chilh ndi khuni yudánts'o whe tube oodzi unduda whe yuch'a nasja. Tube hoonzoo' 'unt'oh-un 'unt'oh 'et huwa.

*Dune 'uhuholeh ait'oh-un, 'et hoonts'i Yakusda ba huwa lhúhoolna' whe' hoont'oh*

<sup>23</sup> 'Et Sizi yugha hodul'ehne ubúlhni, "Ndi 'i be soo ts'ih'un un'a nohdusni, yak'uz ts'e, nts'e lerwe unli-un, tube howa whulna' whe hoonzoo' 'unt'oh-un whuz tiyahl.

<sup>24</sup> Doo cha za 'unohdúsní, ndi khuna ncha-i, camel huyulhni, 'i ooba howa whulna' whe ughabátsulh oola toh ookonín'a-un hukwa tígwwulh. 'Et hoonts'i whanus howa whulna' whe hoonzoo' 'unt'oh-un, 'en Yak'usda whe lerwe unli-un whuz datíyahl."

<sup>25</sup> 'Et yugha hodul'ehne, 'enne hidants'o whe buba hooncha 'ink'ez 'et duhutni, "Mbe za dutijih ha' dini?"

<sup>26</sup> Sizi ubunilh'en 'ink'ez ndúbullhni, "Dunene, 'aw ndet la 'uhuholeh ait'oh-un, 'et hoonts'i Yak'usda ba huwa lhúhoolna' whe' hoont'oh."

<sup>27</sup> 'Et Peter yatilhduk whe Sizi nja dúyulhni, "Whunilh'en, ndai la ts'ut'i-i, 'i ts'iyawh oolazditni, 'ink'ez nye 'ut'en k'oh ts'e ts'oot'en ha nyuts'un tizdil. 'Et huwa ndi la negha níkat?"

<sup>28</sup> Sizi ndúbullhni, "Ts'ih'un un'a nohdusni, nts'oya hoozulh whe ts'iyaitsuk 'andidi-i natidleh, 'et 'oh whuya hoozulh whe yinka dune ye, yukw'uts'uzda cho dizti-i, 'i yuk'etl'adutadalh. 'Et nohni suntizdil inle'ne, nohni cha whunizyai 'on 'at nanki kw'uts'uzda-i dune buba nahutiyeh ha, 'et dutálhts'ilh. 'Et whe la Israel oots'u haundene, 'enne whunizyat 'on 'at nane lhendoh didowhne, 'enne buba nahutiyeh.

<sup>29</sup> 'Ink'ez mbe la si soozí' gha duyoh huwu tizya de, k'us dulhutsinke te, k'us dulhtuske te, k'us dubá cha 'ink'ez duloo cha te, k'us du'at te, k'us duzkehke te, k'us dukeyoh cha, njan si soozí' gha huwu tizya de, 'en la whunizyat whunizyai (100) 'et 'uwhultsuk-un ootl'anaóotikulh. 'Ink'ez 'ilhiz whe ts'ukhuna-un, 'et cha oogha óotalts'ulh.

<sup>30</sup> 'Et hoonts'i lhane mbene la 'udechoo 'unt'ohne 'udek'ezne nahutidleh. 'Ink'ez lhane mbene la 'udek'ez online, 'enne 'udetstone nahutidleh."

## 20

*Yak'uz whulerwe ts'iyawh k'une' whul'en-un*

<sup>1</sup> "Ndiz un'a yak'uz whulerwe ts'iyawh k'une' whul'en, 'Ilhoghun dune 'en ndi yun k'ut yun ut'i-un. 'Et ts'ekoo too' mai chun haniyeh k'et, 'et huba 'utit'elhne ha' ninzun. Bundada 'uda' 'et dune tilh'alh ha whuz whinya.

<sup>2</sup> 'Et ndunne ubalh'a'ne 'ilho sooneya ts'uditi' 'i dzin dulyiz whe hik'elha utit'elh-un, huhóost'et. 'Et huwa oots'ekoo too' mai chun haniyeh k'ez whebalh'a'.

<sup>3</sup> 'Et hukw'elh'az 9:00 at'en t'alh-i be 'óoket-un daninya whe dune bunilh'en 'ants'i 'oh nodilhya.

<sup>4</sup> 'Et nja dúbulhni, 'Nohni cha nghuz ts'ekoo too' mai chun haniyeh ts'e ahdulh. 'Ink'ez nts'en'a la sooneya ts'ih'un 'unt'oh-i, 'i nohba k'elha tiselh.' 'Ink'ez whuz whe handil.

5 'Et doo cha hukw'elh'az ts'etniz at'en k'us 3:00 at'en cha whuz whinya. 'et whuz un'a za doo cha za 'uja.

6 Doo cha za hulhgha ts'e at'en whuz whinya 'ink'ez 'uyoonne cha 'ants'i 'oh nodilhya whe bunilh'en. 'Enne cha ndúbulhni, "Et di ha dzin dúwhulyiz whe 'ants'i 'oh nudulhya?"

7 "Et 'aw dune lhuneulh'oh 'et huwa ts'int'oh,' huyulhni. 'Et ndúbulhni, 'Nohni cha ghuz ts'ekoo too' mai chun haniyeh ts'e ahduh. 'Ink'ez nts'en'a la sooneya ts'ih'un 'unt'oh-i, 'i nohba k'elha tiselh.'

8 'Et 'awet hulhgha ts'e dune 'etsul ut'ih-un whe ndun ts'ekoo too' mai chun 'ut'i-un, 'en bughunli-un 'anih yudani' 'ink'ez 'uyulhni, "It'enne ts'iyawh whusábinle, 'ink'ez buba k'elha hoolhtsi. 'Et mbe la 'udek'ez whe'dit'en-un, 'en cho ooba k'elha hoolhtsi.'

9 Mbene la hulhgha ts'e at'en ul'a'ne whusahandil whe 'ilhone hinli 'ilho sooneya ts'uditi'-i buba k'elha yulhtsi.

10 'Et ndunne 'udechoo ul'a'ne, 'enne cha whusahandil. 'On nus lhai duba k'elha tileh huninzun. 'Et hoonts'i whuz un'a za 'ilhone hinli 'ilho sooneya ts'uditi'-i buba k'elha yulhtsi.

11 'Enne ts'iyawh buba 'uk'elha whuzdli' hukw'elh'az, 'et ndun yun ut'i-un hich'az yawhenilhduk.

12 'Et 'uhuyúlhni, 'Nduenne 'udek'oh ubalh'a'ne, 'enne 'ilhoh sadzi hukw'uhoonist'oh-un za' hit'en. 'Ink'ez wheni dzin ndúwhulyiz whe sa ulhtus-i niz 'uts'it'en. 'Et hoonts'i 'enne neulh húlhgha za buba 'uk'elha whuzilhtsi.'

13 'Et yun ut'i-un 'et ubúlhni, 'Sk'ekene 'aw hoonliyaz whe 'aw tank'us un'a lhenohúsdli. 'Et ts'iyawh nohba soo' hoont'oh 'ilho sooneya ts'uditi'-i k'elha nohis'a'.

14 'Et 'awet ndai la nohch'e' ulhchoot 'ink'ez nahduh. 'Et mbene la ndunne 'udek'oh 'ubis'a'ne, 'enne nohni nohk'un'a za 'et 'ultsuk' i za buba k'elha tiselh 'et hukwa' nuszun.

15 'Alha iloh lakw ndai la ust'i-i nts'en'a hukwa' nuszun tune' 'ús'en? 'Uzsoo' 'et huwa eh sghe oolhni?' ubúlhni."

16 'Et 'awhuz Sizi njan howu yalhduk whe ubúlhni, "Mbene la 'udek'oh unline, 'enne 'udechoo nahutidleh. 'Ink'ez mbene la 'udechoo unline, 'enne 'udek'oh nahutidleh. 'Et huwa Yak'usda lhane 'anih dáni', 'et hoonts'i ntsoolneyaz za 'utahaínla."

### *Sizi datitsah-un whulh tat huwu yatilhduk*

17 'Et 'awet Sizi Jerusalem ts'u tizya. 'Ink'ez ndunne whunizyanne 'on 'at nane mbene la yugha hodul'ehne, 'enne 'udun nebuninla 'ink'ez ndúbulhni,

18 "Soo zúlhts'ai, Jerusalem ts'uztidulh 'ink'ez yinka dune ye, 'en ndunne lubret moodihne, 'enne cha, 'ink'ez Moses be 'udust'us 'uk'ununáguzne cha, 'et 'awet butl'ahitilhtelh, datitsah ha hiba nahutiyeh.

19 'Ink'ez 'udun yun k'ut whut'enne butl'ahitilhtelh. 'Et butl'ahúyalhti de, highu tidloh, huyootalhtsus, 'ink'ez 'et tualhghus k'ehuyitalhtelh. 'Ink'ez hukw'elh'az whulh tat dzin dunadutádalh."

### *James 'ink'ez John bulh 'enne buloo, 'en Sizi yoodulhkut-un*

20 'Et 'awet Zebedee buzkeh duloo te, 'et 'awet Sizi ts'o tizdil huyoodulhkut ha. Buloo yubut nachaniti.

21 'Et Sizi ndi yulhni, "Ndet sts'o hukwa' ninzun?" 'Et ts'eke 'utni, "Nts'e whulerwe inli-un, ndunne nane suzkeh, 'enne 'ilhoghun nailhni ts'un'k'us tidalh 'ink'ez 'ilhoghun intl'us ts'un'k'us tidalh, sgha óonin'ai."

<sup>22</sup> 'Et Sizi nja dutni, "Ndet hukwa' oodulhkut-un 'aw t'oonuzahzun. Ndi lubot 'awet be' tiselh-i, nohni cha be' tihnelh nahzun eh? 'Ink'ez ndai la dune be too be 'ul'en-i, 'i be 'usotileh. Nohni cha whuz un'a za eh too be' tilhnelh?" 'Et nduhúyulhni, "A, 'et la 'et nduts'óoneh!"

<sup>23</sup> 'Et ndúbulhni, "Alha slubot be' tihnelh, 'ink'ez be too be úzya-i, 'i be too be' tilhnelh. 'Et 'aw doosni' ait'oh mbe nailhni ts'e sts'unk'us tidalh 'ink'ez mbe intl'us ts'e sts'unk'us tidalh. Mbene la 'uBá buba lhaóodinlane, 'aw 'enne za buba' hoont'oh."

<sup>24</sup> 'Et 'onghohne whunizyanne hidants'o whe, 'awet ndunne nane lhul-hutsinke buba dzoh 'uhudija.

<sup>25</sup> 'Et Sizi ndunne ts'iyawh 'anih ubudani' 'ink'ez 'ubulhni, "Nohni t'oonahzun ndunne 'udun yun k'ut whut'enne bumoodihne, 'enne dunene k'une' buhul'en. 'Ink'ez mbene la nchane, 'enne ndunne bumoodihne buba ando 'uhint'oh. 'Et whuz un'a bube 'ut'en k'oh hooni.

<sup>26</sup> 'Et hoonts'i nohni nohtoh whuz un'a 'utiht'elh noohzin junih. 'Et mbe la nohtoh ncha tileh hukwa' ninzun-un, 'en nohba ne'út'en-un oole'.

<sup>27</sup> 'Et mbe la nohtoh 'udechoo tileh hukwa' ninzun-un, 'en nohe'ulhna-un oole'.

<sup>28</sup> Whuz un'a za yinka dune ye, 'aw ba ne'whutit'en hukwa whusálhiyal. 'Et k'us dune buba ne'ut'en-un tileh 'ink'ez buba datitsah, 'et whuz un'a lhane naootakulh. 'Et hukwa whusainya."

### *Nane hoos'enne, 'enne huhoo'en nasdli'*

<sup>29</sup> 'Et 'awet hukw'elh'az Jericho keyoh whuch'a náhusdil whe lhane dune huyuntizdil.

<sup>30</sup> Nane hoos'enne ti whuzih huzkeh. 'Et Sizi 'oh whuya uyalh whe hiduzts'ai. 'Et 'ultus-un hika huyih, "Moodihti, David oots'u haínzut-un, negha te'ninze!"

<sup>31</sup> 'Et 'ilhunaoodilhne, "T'eduzahnih!" hubuhútni. 'Et hoonts'i 'on nus 'uhutni, "Moodihti, David oots'u haínzut-un, negha te'ninze!"

<sup>32</sup> 'Et Sizi lhgha neninya 'ink'ez ubulhni, "Diz áh'us. Ndet nohba 'uwhutisleh hukwa' nahzun?"

<sup>33</sup> "NeMoodihti nena be ts'ontilh'elh hukwa' uzninzun," huyúlhni.

<sup>34</sup> 'Ink'ez Sizi bugha te'nanzin whe dula be buna yut'aíznai. 'Et 'aho huhoo'en sulí. 'Et 'awet huyuntiz'az.

## 21

### *Lhane huhoost'et whe Sizi keyoh Jerusalem ts'oozya 1*

<sup>1</sup> 'Et 'awet Jerusalem whenghoh hidulh whe keyoh whuyaz Bethphage huwhutni-un, 'et whuz hoozdil. 'I dzulh enun, Olive huwhutni. 'Et Sizi nane yugha hodul'ehne, 'enne dutso whébalh'a'

<sup>2</sup> whe ubulhni, "Njan keyoh whuyaz nohanch'az whuz ah'us. 'Et whuz oozah'az de, 'et 'aho yeztliyaz, donkey huyulhni, ooyaz bulh whehudint'i, 'et la ubunoolh'en. k'unabooh'uk 'ink'ez diz sts'ún 'ubutoolhlooh.

<sup>3</sup> 'Et dune nohodulhkut de, 'Di ha 'ubulh'en?' nohuwhútni de, 'NeMoodihti yuka' ninzun, 'dóhni'. 'Et 'aho sts'un bula dutitnih."

<sup>4</sup> 'Et whuz un'a ndi ts'iyawh 'oh tune' whust'en. 'I be nus hon'en-un daja ni la, 'et ndulcho 'et dúhooja. Njan 'et nja dutni,

<sup>5</sup> "Zion ookeyoh whuti whut'enne, whunulh'en! Nohlerwe te'dudil'en whe nohts'u tiyalh. Donkey ooyaz, 'en yuk'usda.

'En be nohts'u tiyalh."

6 'Et ndiz un'a nja dúhooja, Sizi yugha hodul'ehne whuz whehan'az, 'ink'ez Sizi daja ubúlhni la, 'oh te né'hust'en.

7 'Et whuz un'a Donkey ooyaz bulh hits'u boolhti. Dunaih hik'ehíyinla 'ink'ez 'on dus de Sizi hik'etl'ahidilhda'.

8 Lhane dune dunaih ti hiba néhinilhbál nts'oya la lhutiyalh-un. 'Ink'ez 'onghohne, 'enne cha 'uzisichum nanehidutselh 'ink'ez ti hiba nehídinla.

9 'Et 'awet 'ilhunaoodilhne whulohne ootso 'ink'ez whulohne ook'oh ts'e hidulh 'ink'ez tube cho huhuyih whe hutni,

"David oots'u haínzut-un ba ts'odilhiti'!

NeMoodihti boozi' be whuz de úyalh.

'En 'uk'enus hoonzoo-un ooba whults'ut.

'Et soo yoodughi hidílhti!' hutni.

10 'Et 'awet Sizi keyoh Jerusalem whuz oozya whe ndunne keyoh whut'enne khunahuntisdil whe 'ulhodutni, "Ndun mbe whe 'unt'oh?"

11 'Et 'ilhunaosdilne hubuhútni, "Ndun 'en Sizi nus hoo'en-un, 'en 'unt'oh. Keyoh Nazareth yun k'ut Galilee whuz'ai-un, whuz de hainya-un 'unt'oh."

*Mbene la lugliz whucho 'ooketne 'ink'ez 'e'ooketne, 'enne ts'iyawh Sizi tenabuninyoot*

12 'Et 'awet Jerusalem bulugliz whucho whuna'niztl'oo-un daninya whe mbene la 'ooketne 'ink'ez 'e'óoketne, 'enne ts'iyawh tenabuninyoot. Sooneya lhk'enadulene bulutab 'i cha ts'iyawh buch'a yuntiz'ai. Mbene la dut'aiyaz, dove huyulhni, be 'óoketne, 'enne bukw'uts'uda 'i cha buch'a yuntiz'ai.

13 'Et ubúlhni, "'Uk'ehóoguz whe nja dutni, "Et njan syoh tenadudli ba yoh dahni, 'et hoonts'i 'et cha nja dutni, "Undunut'ihne, 'enne buyoh whuzúlhtsi.'"

14 'Et lugliz whucho 'et hoos'enne 'ink'ez ookechun ndudane, 'enne highu nindil, 'et soo na'balh'en.

15 'Et ndunne lubret bumoodihne 'ink'ez Moses be 'udust'us 'uk'ununáguzne, 'enne njan huwa 'ít'en tune' 'ust'en whe hinalh'en. 'Ink'ez ts'oodunne, 'enne cha lugliz whucho sulyahalhduk whe nja duhutni, "David oots'u haínzut-un ooba ts'odilhiti!" 'Et njan ts'iyawh honalh'en whe hukwa honilch'e.

16 'Ink'ez Sizi 'et nduhúyulhni, "Ndi daja hutni la uboozilhts'ai eh?" 'Et ubulhni, "A, 'ink'ez dahúja-un 'aw hukw'uyalhuzusduk whe eh dahni? Ndziz un'a 'uk'ehonguz whe nja dutni,

'Ts'oodunne 'ink'ez ts'oodunne nulhyehne cha,

'enne bughuni 'i be' hutni, ts'ih'un un'a sba hodilhiti' ubulhtsi.'"

17 'Et ndunne 'awet buch'a nasja 'ink'ez keyoh whuti huwu whenája. 'Ink'ez keyoh whuyaz Bethany ts'oozya whe 'et usda.

*Ndi duchun mai oots'u haniyeh-i, 'i Sizi yek'éhanya*

18 'Et 'om bun 'uda' 'et keyoh whuti whuts'u hídulh whe khunsul ooye'ílt'sul.

19 'Et ti whuzih khunsul ndi mai chun, fig huyulhni, yutilh'en. 'Et yuts'oozya whe 'et 'aw oomai' ooghu hooloh. 'Ut'an za ooghu hoonli whe 'uyulhni, "'Et 'aw 'ilhiz nyumai' hootáloh." Ni ibulh ndi duchun uyulhni-i dizgi.

*Ndi duchun, fig huyulhni, 'i be whuts'odutil'eh*

20 Mbene la yugha hodul'ehne huyan'en whe tube buba hooncha. 'Et 'uhutni, "Nyoo mai chun, fig huyulhni, daja whe 'uja 'á stla dizgi?"

21 'Et Sizi ndúbulhni, "'Alha nohdusi, bé 'alha' hoont'oh-i aht'i de, 'ink'ez 'aw nohba nawh lhe'whutást'el whe ndi mai chun cha 'á dizgi, nohni cha

whuz un'a za 'et dutihnelh. 'Ink'ez 'aw 'et za iloh, njan shus 'i la' dóhni, 'Dudilhts'ih 'ink'ez bunghun whucho ts'e tailhts'ih,' dahni de, 'et whuz un'a 'et duwhútanelh.

<sup>22</sup> 'Et ndai la ooka' dahni tenadudli be, nohba 'alha' hoont'oh de, 'i ts'iyawh nohgha t'ikulh."

*Sizi ndai gha dune ando 'unt'oh, 'et hukwa huyoodulhkut*

<sup>23</sup> 'Et 'awet lugliz whucho daninya whe 'et dilhts'ine whe whúbondunilh'e'. 'Et 'udedo lubretne 'ink'ez dune 'utso whudilhdzulhne cha, 'enne highu nindil 'ink'ez 'uhuyúlhni, "Nedini ndai gha dune ando 'int'oh whe nja dint'en-un. K'us mbe ntl'ahon'ai whe dune ando 'int'oh-un?"

<sup>24</sup> 'Et Sizi 'ubulhni, "Si cha 'ilhoghun hukwa nohoodutaskut. 'Et sudahni de, 'et nohdutasanelh ndai gha dune ando 'ust'oh whe nja dust'en.

<sup>25</sup> Nts'en'a John dune too be 'úl'h'en? Mbe yutl'ahon'ai dune too be tilh'elh huba? Yak'uz ts'e tilah hahóolts'ut, k'us dune tilah ts'u hahóolts'ut?" Dich'oh lhtoh howu yahalhduk 'ink'ez 'uhutni, "Et yak'uz ts'e hahóolts'ut ts'utni de, 'et la 'unedóne', "Et diha John nohba 'alha' lhe'dusni?"

<sup>26</sup> 'Et hoonts'i, 'Dune ts'u hahóolts'ut whutilah 'uhoont'oh,' ts'utni de, 'aw uzdooni' ait'oh, dune bubeznuljut, ts'iyawh John 'en nus hoo'en-un 'unt'oh huninzun 'et huwa."

<sup>27</sup> 'Inka Sizi nduhuyulhni, "Aw nts'ez de hahóolts'ut t'ets'onuszun." 'Ink'ez Sizi ndúbulhni, "Ndaí be dune ando 'ust'oh whe ndi nja duwhús'en-un, 'et si cha 'aw nohdósni' ait'oh."

*Ndunne nane ndet oobá buba hukwa' ninzun 'oh te ne'hut'en eh?*

<sup>28</sup> "Nja huwun daja nahzun? 'Ilhoghun dune nane buzkeh. 'Enne 'udechoo-un yughu ninya 'ink'ez yulhni, 'Sye' ts'ekoo too' mai chun haniyeh ts'e whuz inyalh 'ink'ez sba 'int'en.'

<sup>29</sup> 'Et yuch'a tsédisnih inle'. 'Et hoonts'i hukw'elh'az ndunát'e' 'ink'ez whuz whinya.

<sup>30</sup> 'Et bulh nat-un ooye', 'en cha yughu ninya 'ink'ez yulhni. 'A, whuz toosya' 'ink'ez 'oost'en la!' yulhni. 'Et hoonts'i 'aw whuz lhtiyal."

<sup>31</sup> 'Et Sizi 'utni, "Ndunne nane k'us mbe ndet oobá buba hukwa' ninzun 'oh te hukw'une' hust'en?" "Et 'udechoo-un, 'en za," hutni. 'Et Sizi ndúbulhni, "Ts'ih'un nohdusni ndunne sooneya nalhdzoohe 'ink'ez ts'ekoo 'ul'enne cha, nts'e la Yak'usda lerwe unli-un, whuz nohtso hutidulh.

<sup>32</sup> Ndiz un'a nja duhoont'oh, be ts'ih'un un'a 'uhoont'oh-i, 'i be John dune too be 'ulh'en-un nohts'ó whusainya, 'ink'ez 'aw nohba 'alha' lhe'hoot'oh. 'Et hoonts'i sooneya nalhdzoohe 'ink'ez ts'ekoo 'ul'enne, 'enne ts'iyawh buba 'alha' hoont'oh 'et huwa. 'Et nohni whunulh'en 'et hoonts'i 'aw noheni k'oh nálhe'uhel. Whuz un'a za nohba 'alha' lhe'hoot'oh."

*Mai haníyeh k'et whulh'aíne, 'enne bughá whúts'odul'eh*

<sup>33</sup> "Nja 'uyoo be nawhutnuk-i be nohdutásnelh. Soo zólhts'ai! 'Ilhoghun yoh whumoodih-un, 'en haniyeh k'et 'uhoonla, 'ink'ez mai ts'ekoo too' chun 'ananla. 'Ink'ez whuna'niztl'oo. 'Et tsak'et hahónkai mai too' 'utahahúlhtsus-un, 'et cha neóonin'ai. 'Ink'ez ook'ut yutist'en-i cha wheni 'uhinla. 'En la njan haniyeh k'et ndunne ha' nulhyehne butl'ahón'ai, 'ink'ez nilhdza' keyoh ts'e whinya.

<sup>34</sup> 'Et 'awet 'oonujin-un neooninzut whe yoh whumoodih de 'ulhnane, 'enne whuz whebalh'a' 'ink'ez ndunne 'ut'enne, 'enne buts'un mai hital-hchulh ha.

35 'Et ndunne ha' nulhyehne, 'enne yoh whumoodih de 'ulhnane hubílhchoot. 'Ilhoghun soo 'uzi 'unhitizno. 'Ilhoghun cha hizilhghi. 'Ilhoghun cha tse be hizilhghi.

36 'Et doo cha za 'onghohne 'ulhnane 'on nus 'ultsukne whuz whebalh'a'. 'Enne cha whuz un'a za 'et dúbuhinla.

37 'Et 'udek'ez-un duye' whuz buts'ú wheyalh'a'. "En tilah hidólhiti," ni.

38 'Et hoonts'i ndunne bughu whulh'aaine hitilh'en whe 'et 'ulhodutni, 'Ndun 'en nyoo haníyeh k'et ooch'e'-un, 'en ooye' 'út'en. Ts'uzoolhghel! 'Et de la ndet la oots'ó tilts'ulh-un ts'iyawh 'et ndúwhulcho whe la ts'ohólhchoot!'

39 'Inka huyílhchoot 'ink'ez njan haníyeh k'et tenáhinino 'ink'ez hizilhghi.

40 'Et huwa 'et njan mai ts'ekoo too' chun haníyeh-un, 'en ooch'e', 'en whusatiyalh. Whusainya de, 'et dábooleh suba?"

41 'Et nduhúyulhni, "Et ndunne untsi'ne, 'enne hooncha hukw'un'a musai ubutilhtselh 'ink'ez njan haníyeh k'et 'uyoonne ha' úntilhyehne bughó tálh'alh. 'Et whuz un'a newhúzuk totsuk ndi mai higha hitalelh."

42 'Et Sizi ndúbulhni, "Aw eh hukw'u yalhuzulhduk Yak'usda ooghuni daja ni inle' da'? 'Et diz 'uk'ehooguz,

'Ndi tse yoh 'uwuhulh'enne 'ún hidutilh'uz-i,

'i yoh ook'uwuhuz'ai-un huba soo 'uk'enus tse 'unt'oh-i sulí'.

'Et la Moodihti whuz un'a 'uhoonla.

'Ink'ez wheni tube neba hooncha whe' hoont'oh,' ni.

43 'Et huwa nohdúzni, nts'e la Yak'usda lerwe unli-un, 'et ts'iyawh nohghu nahootálhchulh 'ink'ez 'udoh didowhne butl'aóoti'alh. 'Enne la 'ut'en unzoo-i buts'u haóokat.

44 'Ink'ez mbene la ndi tse hik'ílts'utne, 'enne ts'iyawh yahidutátih. 'Ink'ez mbene la ndi tse buk'édilts'utne, 'enne ts'iyawh musai hutileh."

45 'Et ndunne Lizwif lubret bumoodihne 'ink'ez Phariseene cha, 'enne ndi khuni be nawhutnuk-i whulh 'úhudants'o whe t'ehonanzin Sizi 'enne didut bughu yalhduk.

46 Nts'en'a suba Sizi huyitálhchulh-un 'et hukwa' hut'en. 'Et hoonts'i dune éhunuljut. 'Enne Sizi 'en nus hoo'en-un 'unt'oh huninzun 'et huwa.

## 22

### *Yak'uz k'une' whul'en-un, 'et lerwe ooye' oo'at whutaleh-un, 'et dult'oh*

1 'Et doo cha za Sizi be nawhutnuk-i, 'i be whuts'odul'eh-i, 'i be bubulh yalhduk whe 'et dúbulhni,

2 "Et yak'uz k'une' whul'en-un, ndiz un'a nja dóohoont'oh, 'ilhoghun lerwe ooye' oo'at whutaleh, 'et huba lhadútitneh.

3 'Ink'ez mbene la bughu nuséyane, dude'ulhnane buts'u whebalh'a', 'anilh ubuhudóni' ha, 'et hoonts'i buch'a tséhudisnih.

4 'Et doo cha za 'uyoonne cha dude'ulhnane whuz whilh'a'. Mbene la ooghu nusjane sba budóhni, "Awet t'alh-i lhadínt'oh. Njan musdoos ts'iyawh ndai la nilhk'a-i ts'iyawh sba huyanghan dune yuti'ulh whuba. Ts'iyai lhadínt'oh. 'Et 'awet ndunne lhghuskene bubulh na'uztiti'ulh. Soo 'a dizáhdulh! sba budóhni!'

5 'Et hoonts'i ndunne bugha nusjane buba 'ants'i 'uhoont'oh. Ts'iyawh lhents'un whehándil. Whulohne cha há' hunulhyeh t'se whenáhidil. 'Et whulohne cha bube 'ut'en k'oh whuz'ai ts'e whenáhidil.

6 Whulohne lerwe be 'ulhnane ubihílhchoot 'ink'ez dzoh ne'buhalh'en 'ink'ez ubuhanghan.

<sup>7</sup>'Et lerwe whulh údants'o whe tube hunílh'e. Mbene la lhuganne ubut'ine ts'iyawh whuz whebalh'a'. Mbene la be 'ulhnane inghanne, 'enne ts'iyawh musai ubulh'tsi 'ink'ez bukeyoh ts'iyawh hodálhk'un.

<sup>8</sup>'Et hukw'elh'az 'uyoonne cha be 'ulhnane, 'enne ubulh'ni, "Awet na'tit'úlhn-lhaooint'oh, 'et hoon'ts'i ooghu nusjane 'aw huba soo lhe'hildzoo.'

<sup>9</sup>'Et huwa 'et 'awet ti ts'óhdulh. 'Ants'i lhane cho nahla de, 'enne ts'iyawh bughu nóhdilh.

<sup>10</sup>'Et ndunne be 'ulhnane ti ts'e whehandil. Mbene la nabuhinlane, ntsi'ne 'ink'ez unzoone tubulh 'alghoh ts'iyawh whusábahanla. 'Et 'awet na'hutit'ulh-un yoh whudizbun.

<sup>11</sup>'Et 'awet lerwe but's'ó whusainya ooghu nusjane ubuntilh'elh ha. 'Et 'ilhoghun dune 'en 'aw naih dune lhghu dilh'ts'i whunaih be dune lhiloh whe uutilh'en.

<sup>12</sup>'Et 'uyulh'ni, 'Sk'eke 'aw dune lhghu dilh'ts'i whunaih be dune lhinhoh. 'Ink'ez nts'en'a dani'ya?' 'Et ndun dune 'aw whé 'oodoni'-un hooel.

<sup>13</sup>'Et lerwe duba ne'ut'enne ubúlh'ni, 'Ndun dune ulhchoot 'ink'ez ulhghel. 'Ink'ez 'az tsalghus yo ts'e táhneh! 'Et whuz la titso 'ink'ez dughoo lhudook'us.'

<sup>14</sup>Njan 'et ndutni whe 'utni, lhane ghu nusja 'et hoon'ts'i whulohne za 'utahálya."

### *Yun k'elha huhoolh'i-un hukwa' hoodulh'kut*

<sup>15</sup>'Et 'awet ndunne Phariseene 'udun nehúindil 'ink'ez howu yahalhduk, nts'en'a la Sizi ye yalhduk-i, 'i be hitilghooh hukwa' hut'en.

<sup>16</sup>'Et whe Phariseene bugha hodilh'e'ne 'ink'ez Herod didowhne cha, 'enne Sizi ts'e whebualh'a'. 'Et duhúyulh'ni, "Dune hodulh'eh-un t'ets'oninzun nyun ts'ih'un dune 'int'oh 'ink'ez khuni 'alha' 'unt'oh-i be Yak'usda k'un'a dune hodilh'eh. Ts'iyanne mba lhgha 'únt'oh. Nts'en'a la dune dahót'en 'et hoon'ts'i mba 'ants'i 'uhoont'oh.

<sup>17</sup>'Et huwa nedini, ndi yun hik'elha huyilh'i-i, 'et ts'ih'un tilah 'uhoont'oh whe lerwe Caesar 'en tilah ooba k'elha ts'uyoolhtselh, k'us 'awúndooch tilah? Daja ninzun?"

<sup>18</sup>'Et Sizi t'eeoninzun nts'en'a la hoon'ts'i k'oh ts'e hoont'oh, 'et huwa ubulh'ni, "'Et di ha soo zúlhts'i? Nohni ts'iyawh duba na'udzoo'ne aht'oh!

<sup>19</sup>De' la nyoo sooneya snalh ts'et nah'a!" 'Ilho sooneya ts'uditi'-i hitl'ahúyan'ai.

<sup>20</sup>'Et ubulh'ni, "Mbe oonin 'ink'ez booz'i' cha ook'usguz?"

<sup>21</sup>"Lerwe Caesar," huyulh'ni. 'Et ndúbulh'ni, "'Et huwa ndai la lerwe Caesar ooch'e', 'i ootl'anáyahle. 'Ink'ez ndai la Yak'usda ooch'e', 'i Yak'usda ootl'anáyahle."

<sup>22</sup>'Et hidants'o whe ts'iyawh buba hooncha 'ink'ez hich'a nasdil.

### *Nat ts'uhítmaih huwun huyoodulh'kut*

<sup>23</sup>'Et dzin za ndunne Sadduceene, 'enne highu nindil. 'Enne la 'uhutni dats'úzsai 'ink'ez 'aw nats'uhót'nah aít'oh.

<sup>24</sup>'Et nduhúyulh'ni, "Dune hodulh'eh-un Moses ndiz un'a nja dutni, 'et dune 'aw buzkeh hooloh whe dazsai 'ink'ez oo'at za khuna de, 'et bulhutsin 'en yughu naooda'huba' hoont'oh. 'Et ndun bulhutsin 'en dughe yughu nasda de, 'en ts'un dulhutsin ba buzkeh whutaleh.

<sup>25</sup>'Et netoh lhtak'ant'ine lhulhutsinke, 'en 'udetso whudilh'dzulh-un, 'en 'at ut'i. 'Ink'ez 'aw buzkeh hooloh whe dazsai. 'En du'at dulhutsin ba nayoosdzi.

<sup>26</sup>Whúlh nane whuz un'a za dazsai. 'Et whulh tat-un, 'en cha whuz un'a za 'uja. 'Et dúwhulyiz whe lhtak'ant'ine ts'iyawh yahadla.

<sup>27</sup> 'Et 'udek'ez ndun ts'eke 'en cha dazsai.

<sup>28</sup> 'Et huwa nedini 'ilhudzin whusaootilts'ulh whe ts'iyanne dunadutádulh, 'et 'oh de de ndun ts'eke mbe oo'at tileh? 'Et whunulh'en lhtak'ant'ine ts'iyawh highinda'."

<sup>29</sup> 'Et Sizi ndúbulhni, "Nohnich'oh na'dunaht'ah! 'Aw Yak'usda ooghuni t'enuzahzun. Ye ulhtus-i cha 'aw t'enuzahzun.

<sup>30</sup> 'Et ndet dzin dune dunadidil de, 'aw lhghu lhodutalhts'il 'et huwa. Dune dunadidilne, 'enne Yak'usda oolizas k'un'a 'uhutit'elh whe' hoont'oh.

<sup>31</sup> 'Et daja sudini yaidlanne toh dunadutádulh-un huwun, Yak'usda daja ni, 'aw eh hukw'u yalhuzulhduk? Njan nja dutni,

<sup>32</sup> 'Si Abraham, Isaac, 'ink'ez Jacob, buYak'usda 'ust'oh.' 'Aw yaidlanne buYak'usda iloh 'unt'oh. Khunane buYak'usda unli 'et huwa."

<sup>33</sup> 'Et 'ilhunaosdilne dahoont'oh huwun budani' whe tube buba hooncha.

*Tlho khuni 'uk'enus dizti'-i netl'aídan'ai*

<sup>34</sup> 'Et Phariseene whulh 'úhudants'o nts'en'a la Sizi ubudani'-un, 'et hukwa Sadduceene 'aw yahutooldhíh ait'oh whe hinat 'ilhunahosdil.

<sup>35</sup> 'Et 'awet 'ilhoghun butoh-un, ni moodih unli-un, 'en Sizi yóolhdzih whe yoodulhkut,

<sup>36</sup> "Dune hodulh'eh-un k'us undai khuni k'us dizti'-i neba yutulhúhizye'?"

<sup>37</sup> 'Et Sizi ndúyulhni, " 'Yak'usda nyuMoodihti ndzi ndulcho-i be cha, nzul ndulcho-i be cha, nyunut'i ts'iyawh 'i be cha, nyeni ts'iyawh 'i be cha, 'et whuz un'a 'en ook'eoontsi'."

<sup>38</sup> Ndi ndai la nohba yutulhuhizye'-i, 'i 'udechoo 'ink'ez 'uk'enus dizti'-i 'unt'oh.

<sup>39</sup> 'Et bulh nanki, 'i 'udechoo-i k'un'a 'unt'oh whe ndiz un'a nja dutni, "Et dahoont'oh hukw'un'a nyunch'oh k'enaintsi', 'et whuz un'a za 'onghohne cha buk'eoontsi'."

<sup>40</sup> Ndi nanki khuni nohtl'adílts'ut-i, 'i be Moses be 'udustl'us cha 'ink'ez nus hoo'enne bube' 'udustl'us cha, 'i ts'iyawh 'ants'i yoh ook'ut whuz'ai-i, 'i le'unt'oh."

*Christ mbe unli-un 'unt'oh?*

<sup>41</sup> 'Et 'awhuz ndunne Phariseene 'ilhunahosdil whe Sizi uboodulhkut,

<sup>42</sup> "Christ mbe unli-un 'unt'oh nahzun? K'us mbe oots'u hainzut-un suba 'unt'oh?" "En David oots'u hainzut-un 'unt'oh," huyulhni.

<sup>43</sup> 'Et 'ubúlhni, "Nts'en'a 'unt'oh David Ndoni be nyun sMoodihti 'int'oh nyudúzni ni whe 'et ndiz un'a nja dutni,

<sup>44</sup> 'Moodihti 'en sMoodihti 'uyulhni, nailhni ts'ungus sinda 'oh de la nch'az ditnine buk'ut nke naóolhyis mba ubooselh.'

<sup>45</sup> 'Et whuz un'a David, 'sMoodihti,' yulhni. Nts'en'a suba 'en oots'u hainzut-un oole'?"

<sup>46</sup> 'Aw dune yuts'u yatooldhíhne hooloh. 'Et ts'iyanne whehunuljut whe 'aw 'on 'un huyoodolhkut ait'oh.

## 23

*Moses be 'udustl'us 'uk'ununáguzne 'ink'ez Phariseene cha, 'enne dawhultsi'-un 'et buts'u hoolts'ulh*

<sup>1</sup> 'Et 'awet Sizi 'ilhunaosdilne 'ink'ez yugha hodul'ehne cha bubulh yawhenilhduk whe ndutni,

<sup>2</sup> "Mbe la Moses be 'udustl'us 'uk'ununáguzne 'ink'ez Phariseene, 'enne cha 'enne dune hodutilh'eh 'et wheni Moses yuk'usda-i k'ut natl'ahudílts'i.



3 'Et huwa ndai la khuni hiye nohbulh yalhduk-i, 'et ts'iyawh hólhchoot 'ink'ez buk'úne' 'ooh't'en. 'Et hoonts'i khun buk'un'a ne'óoh't'en junih. 'Et 'alha daja hutni-un, 'oh te nullhé'hust'en.

4 'Et diz un'a né'hut'en, lhai cho lhunuhúhlti!oo tube howa whulna' dune neyúghe huba. Dune buwus k'ehúyile. 'Et didutch'oh dulasga 'ilho hoonts'i nahuyoolhna' ait'oh.

5 Ndai la 'uhuyulh'en-i, 'i 'uyoonne yunoolh'en huba za 'uhuyulh'en. 'Ink'ez ndi Yak'usda ooghuni zus, Phylacteries huyulhni, 'on nus ncha huyilh'i ts'iyanne hinoolh'en ha. 'Ink'ez ndi luglok tenahududli te nahuyits'uz-i, 'i cha ootso 'on nus 'udilyiz nahuyulhtsih.

6 'Et 'uhat'alh-un 'ink'ez lugliz cha soo k'us hoonzoo-un 'et za hudutáts'ilh hukwa' huninzun.

7 'Ink'ez ndet la t'alh-i be 'óoket-un, 'et ts'iyanne hubodíhlti' whe hadih buhutni, 'et huhóont'i'. 'Ink'ez ts'iyawh 'ilhone hinli whe, 'Rabbi! Nehodulh'eh-un!' hubodóni' hukwa' huninzun.

8 'Et hoonts'i khun te 'uyoonne 'Rabbi' nohodóni' junih! 'Aw 'ilhoghun za whunohodulh'eh-un hoonli 'et huwa, Christ 'en 'unt'oh. 'Et nohni ts'iyawh lhulhutsinke ahli.

9 'Et ndi yun k'ut 'ants'i 'ohne "ubá' budohne' junih. 'Aw 'ilhoghun za nohBá unli 'et huwa, Yak'uz usda-un, 'en 'unt'oh.

10 'Ink'ez khun te 'uyoonne 'nemoodih' nohodóni' junih. 'Aw 'ilhoghun za nohMoodiht'i hoonli 'et huwa, 'en Christ 'unt'oh.

11 Mbene la nohtoh unchane, 'enne nohba ne'út'enne oole'.

12 'Ink'ez mbe la dich'oh ncha nadudil'i-un, 'en 'udeyo tel'en-un tileh. 'Et mbe la 'udeyo 'ududildzun-un, 'en 'udedo ncha-un tileh."

13 'Et nohni Moses be 'udustl'us 'uk'ununáguzne nohni Phariseene cha, nohni duba na'udzoo'ne aht'oh! Dawhultsi'-un 'et nohts'u hóolts'ulh. Ndiz un'a nja daht'en, nts'e la lerwe yak'uz usda-un, 'et whudáti dune ch'a dána'dihtan. Nohnich'oh hoonts'i daóohya' ait'oh. 'Ink'ez mbene la whuz udulhne, 'enne cha 'aw dábohleh ait'oh.

14 Nohni Moses be 'udustl'us 'uk'ununáguzne, nohni Phariseene cha, nohni duba na'udzoo'ne aht'oh! Dawhultsi'-un 'et nohts'u hóolts'ulh! Tsandilhne buyoh bugha haoondunaht'ah. 'Et ndi tenadudli 'i be whuz un'a za 'onilha sa' cho tenadahdli. 'Et huwa 'on nus 'uwulcho whe nohba nahutideh.

15 Nohni Moses be 'udustl'us 'uk'ununáguzne, nohni Phariseene cha, nohni duba na'udzoo'ne aht'oh! Dawhultsi'-un 'et nohts'u hóolts'ulh! Ndi yun k'ut ndulcho whe náhdilh 'ink'ez too k'ut ndulcho whe nahke, 'ilhoghun tilah nohnich'oh nohk'un'a 'unt'oh oolhtselh. 'Et whuch'a nulhde de, 'et de ndun nat 'uwultsi' whe nohanus kwuncho yo whuye' tileh.

16 Nohni hoos'enne lé'ah't'oh, dawhultsi'-un nohts'u hóolts'ulh. Lhe'ah't'oh whuzih'en 'et hoonts'i dune ti whubuntilhtun hukwa' aht'en. 'Et ndiz un'a dune whubodulh'eh, njan lugliz whucho hoozi' be dune nahuhizya de, 'et 'ants'i 'uhoont'oh. 'Et hoonts'i lugliz whucho 'et gold 'ink'ez silver bulh 'uhoolya, 'et 'i be whuz un'a nahuhizya de, 'et whuz un'a 'uhuhoolh huba' hoont'oh, dahni.

17 Nohni whusnine 'ink'ez hoos'enne ahli! K'us ndet 'uk'enus whudziti? Lugliz whucho k'us gold bulh 'uhoolya-i, 'et tilah? 'Et lugliz whucho 'et 'uk'enus whudziti'. 'Et gold bulh 'uhoolya-i, 'i 'ants'i Yak'usda ba 'udun neninkat-i 'unt'oh.

18 Ndi 'i cha dune whubodulh'eh, mbe la loodel 'i be hoonliyaz whe yuts'u nahizya, 'et 'ants'i 'uhoont'oh. 'Et hoonts'i ndai la 'ants'i huwa t'aih-i, 'i loodel

k'eyin'ai, 'et 'i be dune yuts'u nahizya de, 'et nduyóoleh huba' hoont'oh. 'Et whuz un'a dune whubodul'héh.

<sup>19</sup> Nohni whusnine 'ink'ez hoos'enne ahli. K'us ndet 'uk'enus whudiziti?' 'Ants'i huwa t'aih-i tilah k'us loodel tilah? Ndi loodel 'i 'uk'enus diziti!' Ndi 'ants'et huwa t'aih-i, 'i loodel 'i gha Yak'usda ooch'e' suli' 'et huwa.

<sup>20</sup> 'Et huwa mbe la loodel 'i be hoonliyaz whe yuts'u nahizya, ndi loodel 'ink'ez ook'uyuzdla-i, 'i ts'iyawh 'i be yuts'u nahizya.

<sup>21</sup> 'Ink'ez mbe la lugliz whucho 'et whe yuts'u nahizya-un, lugliz whucho 'ink'ez Yak'usda 'et usda-un, 'et ts'iyawh whe yuts'u nahizya.

<sup>22</sup> 'Ink'ez mbe la yak'uz whe yuts'u nahizya, Yak'usda yukw'uts'uzda cho diziti-i, 'ink'ez mbe la yuk'usda-un, 'en be yuts'u nahizya.

<sup>23</sup> Nohni Moses be 'udustl'us 'uk'ununáguzne, nohni Phariseene cha, nohni duba na'udzoo'ne aht'oh! Dawhulsi'-un 'et nohts'u hóolts'ulh! Ndiz un'a nja daht'en, ndai la haníyeh-i, 'ut'an sooltsun-i cha, anise huyulhni, 'i cha, 'ink'ez cummin huyulhni, 'i cha, 'i ooloh za, 10%, 'i Yak'usda ghah'aih. 'Et hoonts'i Moses be 'udustl'us k'ut 'uk'enus whudiziti'-un, 'et ts'iyawh whuladihtnih. Ndiz un'a ts'ih'un 'uhoont'oh. Njan ndet la ts'ih'un un'a neáht'en-un, ye negha te'untazeh-i cha, 'ink'ez be néba 'alha' hoont'oh-i, 'i cha, njan 'et ts'iyawh whuladihtnih, 'et hoonts'i whuz un'a ndóht'en huba' hoont'oh, 'ink'ez 'onghun-i cha 'aw lhálhduzahle whe oola doohtnih junih.

<sup>24</sup> Lhe'aht'oh whuzih'en 'et hoonts'i dune, ti whúbuntilhtun hukwa' aht'en. Lhe'aht'en, ndai ahnai-i nizgheş yé tat'o de, 'i 'ukutilhsus, 'et hoonts'i nohni ndi khuna-i cho, camel huyulhni, 'ants'i le'hoont'oh tilhnoh!

<sup>25</sup> Nohni Moses be 'udustl'us 'uk'ununáguzne, nohni Phariseene cha, nohni duba na'udzoo'ne aht'oh. Dawhulsi'-un 'et nohts'u hóolts'ulh! Lusyét 'ink'ez lubot cha yoo'az ts'e tunágus. 'Et hoonts'i bez ts'e 'et whe ndai la 'uyoonne be bé' whulhts'it-i, 'ink'ez nts'en'a la hukwa' nahzun tune' aht'en 'et whe 'i be nohlusyét 'ink'ez nohlubot te dizibun.

<sup>26</sup> Nohni Phariseene hoos'enne ahli! Ndi lusyet 'ink'ez lubot bulh 'udechoo bez ts'e tunáwhahgus 'et de la yoo'az cha 'aw lhditsun oole'.

<sup>27</sup> Nohni Moses be 'udustl'us 'uk'ununáguzne, Phariseene nohni cha, duba na'udzoo'ne aht'oh! Dawhulsi'-un 'et nohts'u hóolts'ulh! 'Ants'i ts'un k'ut whuduchun 'udustl'us-i lé'aht'oh. Yoo'az ts'e tube soo ot'en, 'ink'ez bez ts'e whudutsun 'ink'ez dune ts'un be whudizibun.

<sup>28</sup> 'Et whuz un'a za dune nalh nohyust'e yoo'az ts'e ts'ih'un dune unline dóht'en. 'Et hoonts'i nohyo ts'e ts'ih'un lhe'aht'oh. Ndai la duba na'udzoo' 'ink'ez 'uk'únulhe'ust'en-i cha, 'i be whudizibun.

<sup>29</sup> Nohni Moses be 'udustl'us 'uk'ununáguzne, Phariseene nohni cha, duba na'udzoo'ne aht'oh! Dawhulsi'-un 'et nohts'u hóolts'ulh! Nohni nus hoo'enne, 'enne buba tse bet 'ahudutilhtel'h-un 'uwulh'en. 'Ink'ez ts'ih'un 'unt'ohne, 'enne buts'un k'ut hoonzoo whulhts'i.

<sup>30</sup> 'Ink'ez ndiz un'a nja dudáhni, "Uwhe 'oh da' netsoda'ne bubúlh ts'ukhuna inle' ndúcha. 'Oh da' ts'ukhuna de, 'et nus hoo'enne buhughan da', 'aw bula' ts'oot'en ait'oh inle'."

<sup>31</sup> 'Et ndi nja dudáhni, 'i be nohnich'oh ch'az dahtni. Ts'iyanne whubunulh-tun 'aw 'uyoonne mbene la nus hoo'enne bubanghanne, nohni 'enne buts'u haíndene ahli!

<sup>32</sup> 'Et 'awet ndai la 'ut'en untsi'-i nohbáke whe'hidilh'en-un, 'et ts'iyawh lhaóodahla.

<sup>33</sup> Tl'ughus lubezo buzkehke lé'aht'oh! Njan kwuncho yo wheni nohba nahutideh-un, nts'en'a 'utihnelh whenghoo táhdulh? Soo gak!

<sup>34</sup> 'Et hukwa soo cho soo zullhts'ai, 'et nus hoo'enne cha, 'ink'ez dune whunihne cha, 'ink'ez Yak'usda ooghuni hodulh'ehne cha, 'enne ts'iyawh nohts'ú butis'alh. 'Enne whulohne butihghan. 'Et whuz un'a tulalhghus ubunduntáhl't'oh. Whulohne nohlugliz bez ts'e 'et ubootalhtsus. 'Et whuz un'a lhendun keyoh whut'enne nubuntihyulh.

<sup>35</sup> 'Ink'ez 'et huwa 'et ndiz un'a nohk'ehootalts'ulh. Mbene la ts'ih'un 'unt'oh buz kai' yun k'ut nájul, 'enne bughá 'utihnelh nohk'ehootalts'ulh. 'Oh da' Abel 'en 'uja buz kai' yun k'ut nájul. 'Et njan Zechariah buz kai' yun k'ut nájul 'et whuts'un. 'En 'unt'oh Berechiah ooye'. Ndu 'en njan lugliz whucho 'et loodel eguz 'et nohtsoda'ne, 'enne hizilhghi inle'.

<sup>36</sup> Ts'ih'un un'a be nohdusni 'andit whudilhduzhne, 'et nohni hukw'elha whutihltselh whe' aht'oh.

### *Jerusalem whut'enne, 'enne bughá Sizi oodzi unduda suli'*

<sup>37</sup> "Nohni Jerusalem whut'enne, dáwhultsi'-un nohts'u hóolts'ulh! Nohni aht'en nus hoo'enne ahghan. 'Ink'ez mbene la nohts'u tílh'a'ne, 'enne cha tse be bubahghan. Dant'oh la lugok duduzkeh dudints'un be buboontun, whuz un'a nohni cha lhat-un whe 'ilhunanohootásdlelh hukwa' nuszun, 'et hoonts'i 'aw hukwa lhe'nahzun.

<sup>38</sup> Soo cho whunulh'en, 'awet nohni Jerusalem whut'enne nohkeyoh 'aw hoonli hooloh suli' whe nohba 'et nenáwhults'ut, 'et whuz un'a Yak'usda nohladutitnih.

<sup>39</sup> 'Inka 'aw 'on 'un sulhtuzih'el. 'Et ndet la whusaootilts'ulh, 'et whusahóolts'ut de, 'et ndudútihnelh, 'Mbe la Yak'usda boozi' be whusatiyalh-un, 'en 'uk'enus hoonzoo-un oots'ó tilts'ulh, 'et de sutih'elh!"

## 24

### *Njan Lizwifne bulugliz whucho gak whutáleh-un, 'et Sizi huwu yalhduk*

<sup>1</sup> 'Et 'awet njan lugliz whucho Sizi 'az whenaja whe yugha hodul'ehne highu nindil. Njan lugliz whucho nts'en'a 'uhóolya 'et whuhínulhtun.

<sup>2</sup> 'Et Sizi ndúbulhni, "Njan ts'iyawh 'áw lhonúlh'en? Ts'ih'un un'a nohdusni, 'aw 'ilho tse lhk'ulhduhtásdlal, ts'iyawh nadúntijulh whe' hoont'oh."

### *Ndet whe hóodutalts'ilh-un, 'et la huwa t'ets'onoozeh*

<sup>3</sup> 'Et 'awet haoodit'ai-unyaz dzulh Olive huyulhni, 'et usda. 'Et mbene la yugha hodul'ehne ts'iyawh highu nindil, 'ink'ez whu'izyaz huyoodulhkut, "Njan nkede 'uwhutánelh? Nts'owhuya hoozulh whe whusanátandalh, 'ink'ez nts'owhuya whudizulh whe whulatoh whutaleh? Ndet whe hóodutaltsilh-un, 'et huwa la t'ets'onoozeh? 'Et nedíni!"

<sup>4</sup> 'Et 'awet Sizi ndúbulhni, "Soo cho howahli. Khun te dune nanohnoo'ah junih.

<sup>5</sup> 'Alha lhane soozi' gha whusahutidulh 'ink'ez 'uhudutinelh, mbe la Christ unli-un, si 'ust'oh, duhutni whe lhane nahunt'ah.

<sup>6</sup> Dune lhugan-un whulh 'úduhts'o. 'Ink'ez dune lhutigan-un cha howu yahutilhduk. 'Et cha whudutáhts'o. Khun te whénoolhjut junih. Njan dawhutanelh la 'et ts'iyawh nduwhutanelh, 'et hoonts'i 'awhuz whulatoh iloh 'uhoont'oh.

<sup>7</sup> 'Et huwa lhelhdowh didowhne lhch'az nehúdadulh. 'Ink'ez yinka ndulcho lerre be 'ustlene, 'enne cha lnehútidulh. 'Et dai whútaleh, 'ink'ez dada cha whutáleh. 'Et lhelhdun yun nukhutitnah.

<sup>8</sup> Njan dzoh nuts'udeh-un 'andit ts'iya whe'whudit'en whe'whutat'elh.

<sup>9</sup> 'Oh de 'et neooninzut de, 'et dzoh nunohotilhdeh ha whutl'anohotilelh. Whulohne nohotighan. 'Ink'ez si soози' gha 'udun yun k'ut whut'enne nohts'o dutitni.

<sup>10</sup> 'Et hukw'elh'az 'et lhane la buba dzoh tileh, 'ink'ez nohnich'oh nohtoh lhgha hawhútilhyeh 'ink'ez lhst'udutihtni.

<sup>11</sup> Lhane whuts'it be nus hoo'en unline, 'enne lhane dune nahunti'ah.

<sup>12</sup> 'Ink'ez mbene la 'uk'unulhe'ust'enne, 'enne 'on nus 'uhultsi' tileh. Dune ye lhk'etsi'-i, 'i cha k'oh 'utinelh.

<sup>13</sup> 'Et whonts'i mbene la soo whulatoh whuts'un whulh úsyinne, 'aw 'enne za hudutijih.

<sup>14</sup> 'Et yak'uz k'une' whul'en-un, 'en ghun khuni unzoo-i yun k'ut ndulcho whe be yatiduk. 'I be 'udun yun k'ut whut'enne, 'enne buba whubuntihlhtun tileh. 'Et de 'awet whulatoh whusaóotilts'ulh.'

### *'Uk'enus whewhunujut-un*

<sup>15</sup> "'Et huwa ndi 'uk'enus be whunujut-un, 'en musai yutilhtselh-un, 'en 'uk'enus whudizti' ts'e usyin whe nulh'en de, ndun Daniel nus hoo'en-un 'oh da' howu yalhduk inle'. (Hadi' ndi mbe la yuk'uyalhdrukne, 'enne soo cho bubeni taóodolts'it). 'Et nkede la nulh'en de,

<sup>16</sup> 'et mbe la Judea yun k'ut dilhts'ine, shus k'uz tsehutooldhilh.

<sup>17</sup> Mbe la duyoh hukw'usda-un khun te nanaóoja' 'ink'ez duyoh ts'e na'ólhchoot junih.

<sup>18</sup> Mbe la haníyeh k'et 'ut'en-un, 'en khun duyoh ts'e dunaih kunaóoda' junih.

<sup>19</sup> 'Et 'oh de de, mbe la ts'ekoo buzkeh whutalehne, 'ink'ez duzkeh e'úlht'ukwne, 'enne buba tube 'on nus hootátsi'.

<sup>20</sup> Nkede whuch'a tsétihdulh-un, khit k'us nats'ulyis dzin, 'et te 'uhoneh junih, 'et huba tenadahdli.

<sup>21</sup> 'Et 'alha 'oh de whusahoolts'ut de, hooncha whe dune dzoh nuhutide. 'Et ndi yun k'ut whe'whudit'en da', 'ink'ez 'andit dzin whuts'un, 'aw whuz un'a doo cha za ndó honeh ait'oh, 'ilhoz za' whutanelh.

<sup>22</sup> 'Oh de hoondukw nalhuhóodle de, 'aw dune doojihne hooloh. 'Et hoonts'i 'utahályane, 'enne bugha hoondukw whutilhtselh.

<sup>23</sup> 'Et 'oh de de, ndun Christ nja usda k'us nguz usda, 'et nohoútni de, khun nohba 'alha' hudooni' junih.

<sup>24</sup> 'Alha whuts'it be Christne 'ink'ez whuts'it be nus hoo'enne, 'enne lhane nohtoh whutaleh. 'Ink'ez nohtoh tube hooncha te ne'hutit'en. 'Ink'ez huwa 'it'en-un cha nohtoh ne'hutit'en. 'Et ndi nja dótit'elh-un, khun tilah 'utahályane nabonoo'ah huninzun, 'et hukwa' hutit'elh.

<sup>25</sup> 'Et soo zulhts'ai, whutsoda' 'uda' nohdásni'.

<sup>26</sup> 'Et huwa dune nohúlhni de, 'Nulh'en nda' at dune lhuhoot'ih-un 'et usda' hutni de, khun whuz toohdilh junih. K'us, "Et yoh bez ts'e usda,' hutni de, khun nohba 'alha' hudooni' junih.

<sup>27</sup> Ndiz un'a nja duwhúanelh, 'et ditni kwun ndaz de hadánat 'ink'ez noo' whe dánat. 'Et ts'iyanne dune yunoolh'en ha, 'et whuz un'a yinka dune ye' whusatiyalh.

<sup>28</sup> 'Et huwa nts'e la nezi súlht'-i-un, 'et la tsibalyan huwe' 'ulhozdil.

### *Yinka dune ye' whusanátidalh-un*

<sup>29</sup> "'Et 'oh de de dune dzoh nuhutideh-un, 'et 'oh de ndúhooja de, hukw'elh'az 'aho sa dulhgus tileh.

'Ulhdzis ooza' cha 'aw be lhóoost'en tileh.

Sum cha ts'iyawh ndus de hatíkulh.

'Ink'ez ndai la yak'uz whelhtus-un dulcho whe nuhótitnah.

30 'Et 'awet ts'iyanne dune yunoolh'en ha yinka dune ye' yak'uz ts'e be hóodutaltsilh. 'Et 'oh whuya hoozulh de, 'et dune ndi yun k'ut ndulcho whe tso yahutilhduk. 'Et yinka dune ye' whuz de yalh whe huyuntilh'elh. Kw'us k'ut yak'uz ts'e hatiyalh. Ye dizti'-i 'ink'ez ye ulhtus-i, 'i be tinelh.

31 Be ts'ujih-i tube cho be' duts'o whe oolizas whuz ubutilh'alh. 'Utahályanne, 'enne ts'iyawh 'ilhunaboohootáleh. Diwh hukw'un'a hutidulh 'ink'ez yat dulcho nótidulh. 'Et ndulcho whe 'ilhunaboohootáleh.

*Mai, fig huyulhni, ooduchun, 'i be nawhutruk be whuts'odul'eh-i*

32 "Ndi mai, fig huyulhni, ooduchun, 'i be nawhutruk be whuts'odul'eh-i, soo ts'ih'un un'a cho bodulh'eh. Ndi 'i 'unt'oh, oozischum ulughih te, 'et 'awet oot'an whulih, 'i gha t'ewhunáhzun 'awet shin nilhdukw sulí'.

33 Nohni cha whuz un'a za ndi ts'iyawh nohdasni'. 'Et whe nkede la nulh'en 'et 'awet t'ewhunóhzin, 'en nohenghoh. 'Ants'i dati usyin le'hoont'oh.

34 'Alha ts'ih'un un'a nohdusni, 'andit whudizulhne 'aw yalhihitásdla, 'et ndi dótanelh-un ts'iyawh 'et lhawhúdutanelh, 'et whuts'un.

35 Yat 'ink'ez ndi yun k'ut cha gak whutaleh. 'Et hoonts'i ndi sghuni 'aw gak lhtisdleh.

36 Ndet dzin 'ink'ez nts'oya hoozulh whe whutanelh, 'aw t'eeonínzunne hooloh. Lizas yak'uz dilhts'ine, 'enne hoonts'i 'aw t'ehonúszun. 'UBá yak'uz usda-un, 'aw 'en za t'eeoninzun.

37 'Et 'oh da' Noah khuna da', dune dahínt'oh la, 'et whuz un'a za 'uwhutát'elh whe yinka dune ye' whusanátidalh.

38 Soo cho whunulh'en, yunka too be' whutanelh da', whutso da', ts'iyanne 'a'alh 'ink'ez 'uhutnai. Dune 'ink'ez ts'ekoo bulh lhgho dilhts'i, Noah ts'i cho be tiyalh 'et whuts'un.

39 Dunene 'aw t'ehonuszun nkede too dudutált'o. 'Et 'awet dutadilt'o whe ts'iyawh too ubanghan. 'Et whuz un'a za yinka dune ye' whusainya de, 'et ndó tanelh.

40 'Et dzin nane, 'enne haniyeh k'et 'uhut'en. Lizasne, 'enne 'ilhoghun hitalhchulh 'ink'ez 'ilhoghun 'awet tidalh.

41 Nane hiti'ulh-i hundunulhdus. 'Ilhoghun hitalhchulh 'ink'ez 'ilhoghun 'awet tidalh.

42 'Et huwa soo cho huwahli! Nts'oya hoozulh whe nohMoodihti whusatiyalh 'aw t'eeonuzahzun.

43 'Et ndi noheni taonahle, mbe la yoh moodih-un, nts'owhuya la whudizulh-un undunut'ih-un whusatiyalh, 'et t'ewhuninzun de, 'et soo ts'ih'un da' huwole', 'ink'ez 'aw hiyoh da'óoyis ait'oh.

44 'Et huwa nohni cha lhadóht'e'. 'Alha nts'owhuya whudizulh-un, 'et ookwa tse lhúwhahlih-un, 'et yinka dune ye' 'et whusatiyalh.'

*'Ulhna-un ts'ih'un 'unt'oh-un*

45 "K'us mbe 'ulhna-un, 'en ts'ih'un 'unt'oh 'ink'ez whunih-un 'unt'oh? Oomoodih dich'oh de 'ulhna-un, 'en 'onghohne de 'ulhnane duyoh humoodih yutilhtselh. 'Oh de de 'awet 'et neoninzut de, 'et 'andit za 'onghohne hiti'ulh-i bugha ita'alh.

46 'Et oomoodih whusanaja de 'ink'ez de 'ulhna-un whuz un'a nduja-un 'et whunilh'en de, 'en 'uk'enus hoonzoo-un oots'u hóolts'ulh.

47 'Alha nohdusni ndai la yut'i-i, 'i cha ts'iyawh k'une' yul'en yutilhtselh.

48 'Et hoonts'i ndun be 'ulhna-un ntsi'-un dich'oh dudzi yo whe 'et ndun-inzun, 'SMoodih sa' sla whusanádaih.'

49 'Et khunsul 'onghohne dudulh 'ulhnane bube whe ninyaih, 'ink'ez tatnaine cha bula whe'nin'al 'ink'ez bula tawhénitnai'.

50 Ndet dzin ndun oomoodih whusanátidalh 'ink'ez nts'oya 'uhunit'oh-un utinelh 'aw t'ewhunúszun, 'et 'oh whuya 'uhunit'oh whe whusanátidalh.

51 'Et k'ube' yutáht'oh 'ink'ez ndai la oots'itikulh-i, 'i ts'iyawh ndai la duba na'udzoo'ne buts'itikulh-i, 'enne buk'un'a 'i za oots'itikulh. 'Et whuz un'a tso bulh dughoo lhidutik'us."

## 25

*Whunizyane t'edukoo 'enne dune t'enuszunne, kwulane, 'enne huwhunih 'ink'ez kwulane, 'enne huwhusni*

1 "Yak'uz nts'e la lerwe usda-un ndi yun k'ut whusahóolts'ut de, 'et whuz un'a ndótanelh, whunizyanne t'edukoo 'enne dune t'enuszunne, ndi kwun be hoot'en-i huyilhchoot 'ink'ez mbe la dune 'at tit'elh-un 'az 'et hiba sulh'i.

2 Kwulane, 'enne huwhunih 'ink'ez kwulane, 'enne huwhusni.

3 Nduhne whusnine ndi too dizk'un hut'i 'et hoonst'i ndi too dizk'un hiye náhitilhdzoh-i hiyit 'uja.

4 'Et whunihne too dizk'un denáhitilhdzoh-i cha hutiz'ai.

5 'Et 'at tit'elh-un sa' sla whusayaih. 'Et ts'iyawh nehunintsai 'ink'ez ts'iyawh bulh buk'édilts'ut, whe nahunistez.

6 Tuzniz at'en 'ilhoghun huyih, "Awet 'at tit'elh-un 'az de yalh. Dunadahdilh 'ink'ez oodudihdilh!"

7 'Et ndunne t'edukoo ts'iyawh dodindil 'ink'ez too dizk'un-i ts'iyawh nahidulhk'an.

8 Whusnine, 'enne ndunne whunihne hubuhutni, 'Too dizk'un negha núldzeh, netoo dizk'un 'awet bé ha' duk'aih!"

9 'Et whunihne, "Awúndooh!" hutni 'Nohgha uznilhdzo de, nohni cha 'ink'ez wheni cha 'aw neba soo lhé'iltuk.' 'Et ubuhutni, "E'óoket ts'e whuz ahdulh, 'ink'ez nohnich'oh 'oohket."

10 'Et whuz whehandil whe 'at tit'elh-un buk'elh'o whusaínya. 'Ink'ez ndune yuba lhadint'ohne, 'enne na'hutit'ulh ts'e huyúlh danindil, 'ink'ez dati dánahidintan, 'ink'ez dánahidin'ai.

11 'Et hukw'elh'az ndunne t'edukoo whusnine sanáhidil whe, 'NeMoodih, nemoodih, neba dáhana'dintih!' huyulhni.

12 'Et ndúbulhni, "Alha 'aw t'enuhnuzúszun!"

13 'Et whuz un'a nohni cha soo cho huwahli! 'Alha ndet dzin 'ink'ez nts'oya hoozulh whe yinka dune ye' whusanatidalh, 'aw dune t'oonúszunne hooloh."

*Dune dude 'ulhnane, ndai la yut'i-i, 'i butl'ayánla, 'et yak'uz lerwe usda-un dult'oh be nawhutnuk-i*

14 "Yak'uz ndet la lerwe usda-un, ndi yun k'ut whusahóolts'ut de, 'et whuz un'a ndótanelh, ndun dune dukeyoh huwu tiyalh. 'Et tiyalh whutso dude 'ulhnane 'anih ubudani'. Ndai la yut'i-i, 'i butl'ayánla.

15 'Ilhoghun kwulai' sooneya dizti-i yutl'ainla. 'Et 'ilhoghun cha nanki sooneya dizti-i yutl'ainla. 'Et doo cha 'ilhoghun 'en 'ilho za yutl'ain'ai. 'Ihlohne hinli whe nts'en'a la soo hoonzoo hukw'un'a hiye' whutilelh, 'et wheni butl'ayánla.

16 'Et hukw'elh'az 'awet whinya. 'Et 'ilhoghun kwulai' yutl'ainla-un, 'en 'on 'un kwulai' uniltsuk-i ye' ínla.

17 'Et whuz un'a za 'ilhoghun 'en nanki yutl'ainla whe nanki ye yúba na'yinla.

18 'Et hoontsi' 'ilhoghun 'ilho za yutl'ain'ai-un, 'en yun hahónkai 'ink'ez whuz dumoodih oozooneya yuntilh'i.

19 'Et hukw'elh'az sa' inle' whe ndunne 'ulhnane bumoodih whusanaja. 'Et nahootá'alh hukwa' ninzun nts'en'a la dahúylna.

20 'Et ndun kwulai' yutl'ainla-un, 'en kwulai' be 'on 'un 'uniltsuk-i, 'i yuba whusanáylna. 'Et ndúyulhni, 'Smoodih kwulai' sooneya dizti'-i stl'ainla. Nah! Nilh'en kwulai' be 'on nus mba na'usdla.'

21 'Et oomoodih ndúyulhni, 'TUBE soo 'inja! Nyun tube inzoo. Whunilhchoh whe k'une' nyutis'en. Nyun tube 'ulhna-un unzoo-un inli. 'Et hoontsool-unyaz whe k'une' nyutis'en inle'. 'Et 'andit n'un whe lhai ghu tanleh. 'Anih, ndai la nyumoodih ye hoont'i'-i, nyun cha be hóotant'e'.

22 'Et 'ilhoghun nanki sooneya dizti'-i yutl'ainla-un, 'en cha whusainya. 'Et ndúyulhni, 'Smoodih nanki sooneya dizti'-i stl'ainla. Nah! Nilh'en nanki be 'on nus mba na'usdla.'

23 'Et oomoodih ndúyulhni, 'TUBE soo 'inja! Nyun cha tube inzoo. Whunilhchoh whe k'une' nyutis'en. Nyun cha tube 'ulhna unzoo-un inli. 'Et nyun cha hoontsool-unyaz whe k'une' nyutis'en inle'. 'Et 'andit nyun cha n'un whe lhai ghu tanleh. 'Et nyun cha 'anih, ndi ndai la nyumoodih ye hoont'i'-i, nyun cha be hootant'e'.

24 'Et doo cha 'ilhoghun 'ilho sooneya dizti' yutl'ain'ai-un, 'en cha whusainya 'ink'ez yúlhni, 'Smoodih t'oonuszun nyun 'aw t'elhe'ninzun-un 'int'oh. Nts'e la alhe'nuzinloh-un 'et hoontsi' 'et na'ilhdzoo. Nts'e la haníyeh 'ulhe'nínlel-un 'et hoontsi' 'et cha ha' ninlih.

25 TUBE whenuzjut 'et huwa ndi sooneya dizti' yun yo ts'e ntís'i'. Nah! Nilh'en ndi stl'ain'ai-i ntl'anás'aih.'

26 'Et oomoodih yulhni, 'Nyun untsi'-un 'ink'ez tsedutni-un 'ulhna 'int'oh. 'Alha t'ooninzun nts'e la alhe'nuzusdloh-un, 'et hoontsi' 'et cha na'usdzoo. 'Ink'ez nts'e la haníyeh 'ulhnúsdlel-un, 'et hoontsi' 'et cha ha' nusdle.

27 'Et huwa 'oh da' ndiz un'a nja dónleh huba' hoont'oh. Ndi uszooneya ntl'as'ai-i, sooneya lkh'enada'aihne, 'enne butl'alhizin'ai. 'Et de da' szooneya 'on nus 'uniltsuk-i be ná'oozneh oole' da'.

28 'Et huwa ubulhni, 'Ndun ndi uszooneya dizti'-i, ooghu nayulhchoot. Mbe la whunizyai sooneya dizti'-i yut'i-un, 'en oogha ínah'aih.

29 'Et mbe la yuloh za 'ut'i-un, 'en 'on nus lhai oogha tílts'ulh. 'Et whuz un'a lhai tí'elh. 'Et hoontsi' mbe la ntsool-iyaz ut'i-un, 'i hoontsi' ooghu nayítálchulh.

30 'Et 'awet ndun 'ulhna-un ntsi'-un, ulhchoot 'ink'ez 'az tsaholhgus yo ts'e táhneh.' 'Et whuz la tso bulh la dughoo lhudook'us si.'

*Yinka dune ye' whusanátídalh de, 'et de yinka dune'ne, 'enne ts'iyawh buba nahutíyeh*

31 "'Et 'awet yinka dune ye' nkede oots'u ha' 'ánduz whe whusanátídalh, 'et nyoonne lizas lubeshi ooghu hoolohne, 'enne huyulh whusanátídulh. 'Et 'ink'ez 'oh de de, yukw'uts'uzda cho dizti'-i, 'i k'ut nanát'adutídalh.

32 'Et 'ink'ez yinka dune'ne, 'enne ts'iyawh hibut 'ilhunabuhootálelh. 'Et 'usbai ghunli-un k'un'a 'usbai, 'i dube tahananáílelh, 'et whuz un'a ndótanelh.

33 'Usbaiyaz 'enne nailhni ts'unk'us nebutalelh. 'Et dube 'enne 'intl'us ts'unk'us nebutalelh.

34 'Et lerwe 'et ndunne nailhni ts'unk'us 'unt'ohne 'et whuz un'a ndubudutanelh, 'Nohni 'uBá 'uk'enus hoonzoo-un la nohghá whults'utne ahli. 'Et

huwa 'anih! Ndi yun 'utilnelh whutso, ndet la lerwe yak'uz úsda-un, 'et ndet nohba lhaoodinla, 'et 'andit za nohtl'aootilts'ulh.

<sup>35</sup> Soo cho whunulh'en, sye'ílts'ul whe tis'ulh-i sgha náh'ai. Ta'oosda whe ndai la tishnelh-i sgha náhkai. 'Uts'un whút'en-un usdli 'et hoonts'i nohyoh ts'e dásunulhti.

<sup>36</sup> 'Aw naih lhúst'i whe 'enásalhti. Ndusda whe sts'un nusahdil. 'Adus'ai whe sts'un nusahdil.'

<sup>37</sup> 'Ink'ez ndunne ts'ih'un 'unt'ohne huyoodutalhkut, 'NeMoodihti nkeda' nye'ílts'ul whe nts'uyan'en 'ink'ez tan'ulh-i ngháznin'aih? 'Ink'ez ta'óonda whe tantnelh-i nghá uzninkai?

<sup>38</sup> 'Et nkeda' 'uts'un whút'en-un inli whe dánt's'inilhti inle'? K'us naih lhint'i' whe naih ngházninla inle'?

<sup>39</sup> Nkeda' ndinda whe nts'inálh'en k'us 'adin'ai whe nts'un nuts'uzdil inle'?"

<sup>40</sup> 'Et lerwe nja dúbudutanelh, "Alha-i be nohdusni, ndunne sulhutsinke, mbene la 'aw nchane lhiloh, 'enne 'ilhoghun hoonts'i whuz un'a 'et dúbahla de, 'et si 'usáhla whe' hoont'oh.'

<sup>41</sup> 'Et 'awet ndunne 'intl'us ts'ungus 'unt'ohne diz un'a ubudutánelh, 'Ndai la Yak'usda ye hunilch'e-i nohbulh 'unt'ohne sahlí! Sch'a nasahdilh! 'Et 'awet ndi kwun 'aw nalhnusne-i netsudule dulizasne te bubá' hóolya-un, 'et nohni cha whuz tihdulh!

<sup>42</sup> Sye'ílts'ul inle' 'et hoonts'i 'aw tis'ulh-i sgha lhah'al. Ta'óosda 'et hoonts'i 'aw tishnelh-i sgha lhahkal.

<sup>43</sup> 'Uts'un whut'en-un usdli, 'aw 'et dasúlhulhtel. 'Oh da' 'aw naih lhust'i' 'et hoonts'i 'aw be oosda-i hooloh naih sgha lhahlel. 'Oh da' ndusda whe 'ink'ez adus'ai-i whe 'aw sts'un nulhahdulh.'

<sup>44</sup> 'Et diz un'a 'uhidutanelh, 'NeMoodihti nkeda da' nts'uyan'en whe dini? Nkeda' nye'ílts'ul 'ink'ez ta'óonda? K'us 'uts'un whut'en-un inle', k'us be dune onle-i lhint'i'? K'us ndinda 'ink'ez 'adan'a'? 'Et whuz un'a nts'uyan'en 'et hoonts'i 'aw hoonliyaz whe nlah'ts'ínel dini'?

<sup>45</sup> 'Et la budutanelh, "Alha-i be 'unohdusni, ndunne mbene la sulhutsinke 'aw ncha lhilohne, 'et 'aw 'ilhoghun hoonts'i whuz un'a lhebáhllel. 'Et huwa si cha 'aw ndusúlhahlel le'hoont'oh.'

<sup>46</sup> 'Et ndunt'ohne, 'enne 'ilhiz wheni dzoh notideh ts'o tidulh. 'Et hoonts'i ndunne ts'ih'un 'unt'ohne, 'enne 'ilhiz whe ts'ukhuna-un bugha óotakulh."

## 26

### *Sizi yooya whútsul hikunúta hituzilghel ha*

<sup>1</sup> 'Et 'awet Sizi ts'iyantsuk whe lhadúja whe yugha hodul'ehne 'et ndúbulhni,

<sup>2</sup> "'Et t'oonahzun 'awet nat dzin whuz'ai whe butus lhuseya-un 'et whu-nahutilnih. 'Et 'oh de de yinka dune ye' 'awet butl'ahitilhtel 'ink'ez tulalhgus k'ehúyitalhtelh."

<sup>3</sup> 'Et soo 'oh whuya hoozulh whe za, 'et lubret 'udedone, 'ink'ez Moses be 'udustl'us 'uk'ununáguzne, 'ink'ez dune 'utso whudilhdzulhne cha, 'enne ts'iyawh lubret 'uk'enus dízt'i'-un, 'en Caiaphas huyulhni, ooyoh soo' whulcho 'inka 'et 'ilhunahootádulh.

<sup>4</sup> 'Et 'alhgoh yahalhduk 'ink'ez howhuts'it whe hoonli hiba' hoonla whe Sizi huyitálhchulh 'ink'ez hituzilghelh.

<sup>5</sup> "'Et hoonts'i njan butus lhuseya-un 'et whutoh 'uts'inla de kwa la dunene lhtahahót'ah." hutni.

*Datitsah whutso ts'eke Sizi k'unutsútjul-i yutsi k'eyilhdzo*



<sup>6</sup> 'Et 'awet keyoh whuyaz Bethany huwhútni-un, 'et Simon ooka whulhjut ínle'-un, leprosy huyúlhni, ooyoh 'en Sizi yuzih usda.

<sup>7</sup> 'Et 'ilhoghun ts'eke bughu daninya whe 'en ndi tse dízti'-i, Alabaster huyúlhni, 'i be ndi luboodai 'ulya, 'i yí'alh. Ndi yoo sooltsun-i, 'i tube dizti' whe 'unt'oh. 'Et lutab k'ut na'ut'alh whe yutsi k'eyilhdzo.

<sup>8</sup> 'Et ndunne yugha hodul'ehne hinilh'en whe hukwa lhe'hunizun. 'Ink'ez 'enne ndúlhodutni, "‘Et di ha ndi 'ants'i ninta' yulh'ih?"

<sup>9</sup> Ndi yoo dizti'-i bé' ts'onket de, 'i ts'iyawh tel'enne gha ts'oodzaih oole' da'!"

<sup>10</sup> 'Et Sizi t'oonanzin whe 'et ndúbulhni, "Ndun ts'eke oots'áhalhozah'ai. 'Ut'en unzoo-i sba inla whe 'unt'oh.

<sup>11</sup> 'Ahoohyiz tel'enne bubulh áht'oh, 'et hoontsi' si 'ahoolhyiz 'aw nohbulh lhe'tuzist'el.

<sup>12</sup> 'Alha ndi yoo sooltsun-i 'adutistelhuba syust'e yuk'éyilhdzo whe 'ut'en. 'Et whuz un'a lhasúdinla.

<sup>13</sup> 'Alha nohdusni ndi yun k'ut ndulcho whe ndi khuni unzoo-i nudútkat, ndun ts'eke ndet 'uhoonla-un, 'et hukw'u naootitnuuk 'et whe dune yunatilnih."

### *Judas Sizi be 'óotakulh hukwa' ninzun*

<sup>14</sup> 'Et 'awet ndunne whunizyanne 'on 'at nane, 'enne butoh 'ilhoghun Judas Iscariot huyulhni, 'en lubret bumoodihne butsu' whinya.

<sup>15</sup> 'Et ndúbulhni, "Daltsuk sgha tih'alh ndun dune nohtl'ásti de?" "‘Et tat whunizyai sooneya, silver;” huyulhni, 'et 'ultsuk hiba huyolhto.

<sup>16</sup> 'Et whuts'un nts'en'a butl'aitilhtel-un 'et hukwunúta.

### *Sizi 'en yugha hodul'ehne butus lhuséya-un bubulh na'ut'alh*

<sup>17</sup> 'Et 'andit 'awet ndi lhes lhuntildoh-un dzin whusahóolts'ut whe mbene Sizi yugha hodul'ehne, 'enne highu nindil 'ink'ez huyoodulhdu, "Njan butus lhuseya-un 'uta'úlh-un, nts'e mba lhats'odutileh hukwa ninzun?"

<sup>18</sup> 'Et ubúlhni, "Nghuz keyoh whuti whuz ahdulh. 'Ilhoghun dune sba dáhni, 'Nehodulh'eh-un nja dutni, 'awet sba nilhdukw hoozulh. Nyoh ts'e ndunne sgha hodul'ehne nja butus lhuseya-un, 'et 'alghoh bubulh whunatiznih.' "

<sup>19</sup> 'Ink'ez yugha hodul'ehne Sizi daja ubudani, 'et whuz un'a nduhuja. 'Ink'ez njan butus lhuseya-un 'et wheni lhaháduja.

<sup>20</sup> 'Et 'awet hulhgha whusahonzut whe whunizyanne 'on 'at nane yugha hodul'ehne, 'enne bubulh natl'adida' bula natit'ulh ha.

<sup>21</sup> 'Et 'uha'alh whutoh 'et ndúbulhni, "Alha nohdusni njan nohtoh 'ilhoghun whutl'asutilhtelh."

<sup>22</sup> 'Et ts'iyawh ni huzdli, 'ink'ez 'ilhone hinli whe huyoodulhku, "SMoodihti si tilah sudini?"

<sup>23</sup> 'Et ndúbulhni, "Mbe la dules sulh tunayuz'ai-un, 'en 'utinelh whutl'asutilhtelh.

<sup>24</sup> 'Alha yinka dune ye' nts'en'a la ba 'uk'ehooguz, whuz un'a 'utinelh datitsah. 'Et dune mbe la whutl'ayálhti-un, 'en dune 'uk'enus hoontsi-un oogha óotalts'ulh. Ndun dune 'aw lhuhóolel de, 'et de da' 'on nus ooba hózoo' oole.' "

<sup>25</sup> 'Et Judas, mbe la whutl'aitilhtel-un, 'en Sizi yoodulhku, "Rabbi si eh sudini?" 'Et 'uyulhni, "Nyunch'oh údini!"

### *Sizi 'udek'ez na'ut'alh-un*

<sup>26</sup> 'Et 'awet 'uhan'al whe Sizi lhes yilhchoot. Musi ni whe tenadidli. Lhts'e danyuz 'ink'ez yugha hodul'ehne butl'ayán'ai. 'Et ndúbulhni, "Ulhchoot 'ink'ez ah'alh. Ndi syust'e 'unt'oh."

27 'Et lubot 'i cha yilhchoot 'ink'ez musi ni whe tenadidli. 'Et ndúbulhni, "Nohni ts'iyawh 'i be ahnai.

28 'Et huwa ndi suzkai' 'i be 'andidi be nohts'u nahizusya, 'et huba 'ulya. Lhane ba nadútilt'ih. 'Et 'i be bulubeshi buba gak natidleh.

29 Njan 'et nohdusni, ndi mai too' 'aw doo cha za oosnai' ait'oh. 'Et hoonts'i ndi mai too' 'andidi-i, 'i nohbulh tiselnelh. Nts'e la 'uBá lerwe unli-un, 'et whuz oozahdil-un, 'et dzin nohbulh tiselnelh."

30 'Et Yak'usda ooyun be híjun 'ink'ez ndo shus k'us Olive huyulhni, whuz whehandil.

31 'Et 'awet Sizi ndúbulhni, "'Andit 'ulhdzis nohni ts'iyawh skayátihleh. Diz un'a 'uk'ehoogus whe ndutni,

"Usbai ghunli-un, tuzilghelhelhuba whutl'atístelhel.

'Et de 'usbai ts'iyawh yahitalh'us.'

32 'Et dunadusja hukw'elh'az de, 'et yun k'ut Galilee ts'e nohtso tisyalh."

### *Sizi Peter ulhni, "T'esunuzinzun dutanelh"*

33 'Et Peter 'uyúlhni, "'Et ts'iyawh nyun nkayahutileh 'et hoonts'i si 'aw nkayáhtuzisde."

34 'Et Sizi nja dúyulhni, "'Alha-i be nyudusni, 'et 'andit 'ulhdzis lugok dune 'udutinelh whutso, 'et tat t'esunuzinzun dutanelh."

35 'Et Peter 'utni, "Nyúlh datisah de, 'et hoonts'i 'aw t'enyunúzúszun doosni' ait'oh." 'Et 'onghohne yugha hodul'ehne, 'enne cha whuz un'a za 'uhutni.

### *Sizi Gethsemane 'et tenadudli*

36 'Et la 'ilhoghun haniyeh k'et Gethsemane huwhútuni-un ts'e whuz hoozdil whe Sizi yugha hodul'ehne ubúlhni, "Nohni njan dulhts'i. 'Et si nda 'at tenadutisdi."

37 Peter 'ink'ez Zebedee buzkeh, nane, 'enne ubilhchoot 'ink'ez dulh whe-bildilhel. 'Et 'awet ts'odi cho ook'édilts'ut 'ink'ez oodzi tube yo 'uja.

38 'Ink'ez ubulhni, "Szul tube ts'odi suli' k'et 'awet datisah le'ust'oh. Nja dúlhts'i 'ink'ez sla huwahli."

39 'On 'unyaz le whinya whe 'et nachániti 'ink'ez tenawhendunidli 'ink'ez nja dutni, "'UBá ndi lubot be dzoh nutiszut-i, whuz un'a 'unt'oh de, 'et whute senghólt'sit. 'Et hoonts'i 'aw si hukwa' nuszun k'un'a iloh. Nyun hukwa' ninzun hukw'un'a 'et 'uhóneh."

40 'Et nyoonne yugha hodul'ehne nahunistez whe bughu nanja. 'Et Peter ndúyulhni, "'Aw eh 'ilhoh sadzi hukw'uhunist'o whe sulh huwonle' ait'oh?"

41 Tank'us nínt'i-un whuch'a howinli 'ink'ez tenadinli! 'Alha dune yughi whuz un'a hukwa' ninzun, 'et hoonts'i ooyust'e tetsun."

42 'Et doo cha za whulh nat bughu whenaja tenadutidli ha. 'Et nja dutni, "'UBá ndi lubot 'aw sghu naóolhchoot ait'oh, 'i ts'iyawh usnai' 'et de za. 'Et whuz un'a za hukwa' ninzun de, 'et ndó honeh."

43 'Et doo cha za nahuniztez whe bughu nanja. Bulh buba yilhtus k'et 'aw hit'oen ait'oh.

44 'Et 'awet bughu whenaja 'ink'ez whulh tat-i khuni 'i be za tenadidli.

45 'Et 'awet yugha hodul'ehne bughu nanja 'ink'ez 'ubulhni, "'Awhuz nalhyis 'ink'ez sahtez whé eh aht'oh? Soo zulhts'ai 'awet sba whusahóolts'ut. Yinka dune ye' ndunne mbene la lubeshi 'ulh'enne, 'enne butl'ahítihlhel.

46 Soo 'ah dunadahdilhel! 'Awet uztoodilhel sihl! Whunulh'en mbe la whutl'asútilhleh-un, 'awet senghoh uyalh!"

### *Sizi 'awet huyilhchoot*

47 'Awhuz yalhduk whe 'et khunsul Judas, 'en whusainya whe 'en ndunne whunizyanne 'on 'at nane whel'a'ne, 'enne ndun 'ilhoghun 'unt'oh. 'En bulh lhane dune yulh whusaindil. Whulohne saluzti nuhúle, 'ink'ez whulohne tut'oh nódule. Lubret bumoodihne 'ink'ez dune 'utso whudilh dzulhne, 'enne whusahábahalh'a'.

48 'Et 'awet mbe la Sizi whutl'aitilhtelh-un, 'en 'ilhunaosdilne ubulhni, "Mbe la nadists'ooz-un, 'en 'udúsní. 'En 'aho ólhchoot!"

49 'Et 'aho 'en Sizi yughu ninya whe "Hadih Rabbi," yulhni 'ink'ez naid-its'ooz.

50 'Et Sizi ndutni, "Syadan di ha whusainya?" 'Et 'awet whusahandil Sizi 'aho huyilhchoot.

51 'Et khunsul 'ilhoghun Sizi yulh 'unt'oh-un ndi saluzti hayálhtsus 'ink'ez lubret 'uk'enus dizti'-un be 'ulhna-un, 'en yudzo yuts'a ha bé' yalht'o.

52 'Et Sizi ndúyulhni, "Nyoo saluzti t'unádint'aih! 'Alha mbene la 'et dut'enne, 'enne 'et hukw'e dahutitsah.

53 'Et si hukwa' nuszun de, 'uBá ooduskut de 'ink'ez 'andit 'aho 70,000ne lizas 'on 'un 'ultsukne, 'enne da' sts'o t'l'aboolelh oole' da' sla hutinelh ha. 'Et 'aw t'oonuzínzun whe 'int'en.

54 'Et za ndust'en de, nts'en'a Yak'usda ooghuni lhadútineh? Nts'en'a la sts'un dawhut'ih-un, 'et whuz un'a 'uhóneh huba' hoont'oh."

55 'Et 'awet 'oh whuya 'uhunit'oh whe Sizi 'ilhunaosdilne ndúbulhni, "'Et di ha saluzti cha 'ink'ez tut'oh cha nuhle 'ink'ez 'undunust'ih hukw'un'a skatíhdí? Dzin totsuk lugliz whucho 'et nohtoh susda 'ink'ez whunohodus'eh. 'Et hoontsi'aw sulhúlhchulh.

56 'Et huwa, nus hoo'enne bube' 'udustl'us ook'ehooguz-un, 'et ts'iyawh lhawhúdutanelh." 'Et 'awet higha hodul'ehne, 'enne highu whetsélhdil.

### *Sizi nahiyilhne bubut nenínya*

57 'Et 'awet mbene la Sizi yilhchootne, 'enne lubret 'uk'enus dizti'-un, Caiaphas huyulhni, ghu hinílhí. Moses be 'udustl'us 'uk'ununáguzne, 'ink'ez dune tso whudilh dzulhne cha, whuz 'ilhunahosdil.

58 'Et Peter 'on niz de bubuniyalh whe lubret 'uk'enus dizti'-un ooyoh whuna'niztl'oo-un whuz bubunéninya. Whuz bughu daninya whe neilhchukne buzih natl'adida' 'ink'ez naldzilh, daootanelh whuntilh'elh 'et hukwa.

59 'Et lubret bumoodihne, 'ink'ez 'utso whudilh dzulhne cha, 'ink'ez nahiyilhne cha, 'enne ts'iyawh hoonli-unyaz whuts'it huwun highu nahó'alh hukwa' hut'en whe hituzilhghel-un.

60 'Et hoontsi'aw hiyulh náho'alh-un hooloh. Lhane dune whusahándilh 'ink'ez huwhuts'it be highu yalhduk. 'Et hoontsi'awhuz hoonli hiyulh nalhuwhus'ai. 'Et khunsul nane dune whuts'itne whusain'az

61 whe nduhútni, "'Et ndun dune 'utni Yak'usda oolugliz whucho hooloh whutilhtselh 'ink'ez tat dzin whutoh 'udun na'whutílelh ní," hutni.

62 'Et 'awet lubret 'uk'enus dizti'-un duninya 'ink'ez Sizi yoodulhktut, "'Aw eh daja lhdtuzanel? Daja hutni-un 'et huwun daja ninzun?"

63 'Et Sizi 'aw t'edusnih. 'Et lubret 'uk'enus dizti'-un, 'en yulhni, "Mbe la Yak'usda khuna-un, 'en be nyudusni yatolhdih huba' hoont'oh. 'I be mba nahutideh. Nedini Christ Yak'usda ooYe, 'en eh 'int'oh?"

64 'Et Sizi ndúyulhni, "Nyunch'oh 'et 'údini. 'Et njan huwun nohbulh yasduk, k'at le de yinka dune ye,' 'en mbe la ulhtus-un, 'en nailhni ts'un'k'us yughu usda, 'et whutih'elh. 'Ink'ez kw'us k'ut ndus de hatiyalh, 'et cha whutih'elh."

65 'Et lubret 'uk'enus dizti'-un ye usda-i dubut ka lhts'e yalhch'ul 'ink'ez 'utni, "Yak'usda ch'az ditni whe yalhduk. 'Aw 'uyoonne nedóni' hukwa

lhe'uznizun. 'Andit whunulh'en Yak'usda ch'az ditni-un ts'iyawh nohni nohnalh 'utni.

<sup>66</sup> Daja nahzun?" 'Et 'uhutni, "Daóotsah huba 'unt'oh!"

<sup>67</sup> Hinin ts'e huyoonuzo. Huyoolhchis 'ink'ez whulohne huyoonukat.

<sup>68</sup> 'Et whuz un'a nduhúyulhni, "Neba nus whutan/elh. Nyun 'int'oh Christ inli de, mbe nyinla nyunízukuk?" huyúlhni.

*Peter 'utni, "Sizi 'aw t'enuzusun"*

<sup>69</sup> 'Et Peter n'az whuna'niztl'oo-un whez ts'e usda whe ts'ekeyaz yughu ninya. 'Ink'ez ndúyulhni, "Ndun Sizi Galilee whut'en-un, nyun cha bulh 'int'en inle!"

<sup>70</sup> 'Et ts'iyawh bubut whuts'oodidlai whe ndutni, "Daja dini-un 'aw t'eeonuzúszun."

<sup>71</sup> Inka 'az tenánja. 'Uyoon ts'eke cha yunilh'en, 'ink'ez 'oh nudilhyanne, 'enne ndúbulhni, "Ndun 'en cha Sizi Nazareth whut'en-un bulh 'unt'oh inle."

<sup>72</sup> 'Et doo cha za Ndoghi nalh whuts'oodísdlat whe ndutni, "Ndun dune 'aw t'enuzusun!"

<sup>73</sup> Hukw'elh'az mbene la yuzih nudalya'ne, 'enne highu nindil whe huyúlhni, "'Alha mbene la yulh ant'e'ne, 'enne nyun cha 'ilhoghun 'int'oh. Nts'en'a la yailhduk-un, 'et huwa t'ets'unyunínzun."

<sup>74</sup> 'Et Peter 'et ndutni, "Yak'usda sts'e'tilhtsus 'aw ts'ih'un lhe'duzusnih de, ndun dune 'udáhni-un, 'aw t'enuzusun." 'Et 'aho lugok dune 'udíja.

<sup>75</sup> 'Et Sizi daja ni la 'et Peter whunalni whe nja dutni, "'Et lugok dune 'udutinelh whutso, tat 'aw t'esunuzinzun dutanelh." 'Et 'az whenaja 'ink'ez tube cho howintse.

## 27

*Sizi Pilate but nenínya*

<sup>1</sup> 'Et 'om bun bundada 'uda' lubret bumoodihne, 'enne ts'iyawh, dune 'utso whudilhduzhne, 'enne cha, 'enne Sizi hich'az ditni whe howu yahalhduk hituzilhghel hukwa.

<sup>2</sup> 'Et Sizi hiyulhghel 'ink'ez yun k'ut whumoodih, 'en Pontius Pilate huyulhni, hits'u hayoolhti.

*Judas tsená'usguz*

<sup>3</sup> 'Et mbe la whutl'ayálhti-un, 'en Judas huyúlhni-un, 'et 'awet Sizi datitsah huba ba nahisda whe, 'et t'eeonanzin whe tube oodzi nduda sulí. 'Et ndi tat whunizyai sooneya silver huyulhni, ndunne lubret bumoodihne 'ink'ez dune 'utso whudilhduzhne cha, buba whusanáyandzai.

<sup>4</sup> 'Et ndúbulhni, "Ndun dune ninta lhe'ust'í-un, 'en whutl'ásti-un 'et whe ninta' nust'en." 'Et 'uhuyúlhni, "Wheni neba lhe'hóot'oh. Nyunch'oh za mba' hoont'oh!"

<sup>5</sup> 'Et ndi tat whunizyai silver ts'utni-i sooneya lugliz whucho yun bubut nayántsut. 'Et 'ink'ez 'az whenaja 'ink'ez tsená'usguz.

<sup>6</sup> 'Et ndunne lubret bumoodihne ndi sooneya silver ts'utni-i, 'i huyilhchoot 'ink'ez 'uhutni, "Dune buzkai' sulí-i 'unt'oh. 'Et huwa 'aw Yak'usda ba be 'úzdla-i be náts'oodzaih ait'oh."

<sup>7</sup> 'Et dich'oh dutoh howu yahalhduk. 'Ink'ez mbe la lhez oosa' 'ulh'en-un, ndi sooneya 'i be 'en yun hiyónket. 'I k'ut 'uts'un whut'enne, 'enne 'uhule 'et wheni.

<sup>8</sup> 'Et huwa soo 'andit njan dzin 'et whuts'un ndi yun boozí 'i 'uskai' yun huyulhni.

<sup>9</sup> 'Et whuz un'a 'oh da' ndun nus hoo'en-un Jeremiah daja ni la 'et whunilh-choh 'oh túne' whust'en whe lhaóduja whe nja dutni, "Ndi sooneya silver ts'utni, 'et tat whunizyai 'et 'ultsuk ushoot. 'Et 'ultsuk whe hiyolhto 'et ndunne Israel oots'u haindene, 'enne buba k'elha huyulhtsi.

<sup>10</sup> 'Ink'ez lhez oosa' 'ulh'en-un, 'en ooyun hiyónket. 'Et whuz un'a Moodihti sudani'."

### *Sizi Pilate yubut usyin*

<sup>11</sup> 'Et 'awet Sizi mbe la yun moodih 'en yubut usyin. 'Et yun moodih yoodulhkut, "Nyun eh 'int'oh Lizwif bulerwe inli?" 'Et Sizi 'uyulhni, "A, 'alha' dini."

<sup>12</sup> 'Ink'ez ndunne Lizwif bumoodihne 'ink'ez dune 'utso whudilhduzhne cha, 'enne hik'eho'alh hukwa' hut'en. 'Et hoonts'i 'aw hoonliyaz lhe'dínel.

<sup>13</sup> 'Et Pilate yoodulhkut, "Aw eh lhubuduzints'o lhe'whultsuk-un whe nch'az yáhalhduk?"

<sup>14</sup> 'Et 'aw 'ilho khuni be hoonts'i daja lhdinel. 'Et whe yun k'ut whumoodih tube ooba hooncha.

### *Pilate Barabbas buba yulanaditni*

<sup>15</sup> 'Et nawhudizulh totsuk lizwif butus lhuseya 'et whunahulnih, 'et whutoh yun moodih mbe la 'adin'ai-un 'ilhoghun hika' ninzun-un, 'en ts'iyanne buts'u lanadutitnih. 'Et whuz un'a buk'oh ts'e 'uhoont'oh.

<sup>16</sup> 'Ilhoghun 'adin'ai-un, 'en Barabbas huyulhni, ts'iyanne t'ehinínzun.

<sup>17</sup> 'Et ts'iyawh 'ilhunahosdil whe Pilate uboodulhkut, "Mbe nohba oolanadutisnih hukwa' nahzun, Barabbas k'us Sizi, 'en Christ huyulhni?"

<sup>18</sup> T'eeoninzun 'oonih gha butl'ahayalhti.

<sup>19</sup> 'Et Pilate dune ba nahidilh-i, kw'uts'uzda k'usda whe oo'at 'en khuni yuts'ó t'l'ain'ai, 'et ndúyulhni, "N dun dune 'en ts'ih'un 'unt'oh-un. Hoonliyaz onleh junih! 'Alha 'andit dzin 'en oogha huwu nusústi 'et whe dzoh nusúszut."

<sup>20</sup> 'Et ndunne lubret bumoodihne 'ink'ez 'utso whudilhduzhne cha, 'enne 'ilhunaoodilhne ba hunint'i 'et whuz un'a 'uhóoneh ha, 'enne Pilate Barabbas yulanadootni 'ink'ez Sizi hooloh huyoolhtselh ha. Whuz un'a 'uhudooni' ha.

<sup>21</sup> 'Et 'awet yun moodih 'en uboodulhkut, "N dunne nane, 'enne k'us mbe nohba oolanadutisnih hukwa' nahzun?" 'Ink'ez 'et 'uhuyúlhni, "Barabbas."

<sup>22</sup> 'Et ndun Pilate ndúbulhni, "Et ndun do', Sizi mbe la Christ huyúlhni-un, 'en nts'en'a cha daóosdlih ha la?" 'Et 'ilhunaooosdilne nduhúyulhni, "Tulalhgus kélhtih!"

<sup>23</sup> 'Et yun moodih 'et ndutni, "Di ha? Ndet whe ninta' 'ant'en?" ubulhni. 'Et hoonts'i sul'ehúdiya, "Tulalhgus kélhtih!" hutni.

<sup>24</sup> 'Et ndun Pilate t'ewhunínzun 'aw hoonliyaz 'uhooleh ait'oh. N dunne 'ilhunaooosdilne 'awet lhtahotát'alh le'hoont'oh. 'Ink'ez 'ilhozdilne bubut too be lana'ilde 'ink'ez ubúlhni, "N dun ts'ih'un dune buzkaí' oot'aóosnalh hukwa lhe'núszun. Nohnich'oh za nohba 'uhoont'oh."

<sup>25</sup> Ts'iyanne dune 'et nduhutni, "Wheni ts'iyawh neuzkeh tubulh buzkaí' whutaleh-un, 'et nek'éholts'it!"

<sup>26</sup> 'Et 'awet Barabbas buba yulanaditni 'ink'ez Sizi huyolhtsus. 'Et hukw'elh'az butl'ayálhti tulalhgus k'ehíyolhtelh ha.

### *Lhuganne Sizi highu núwhulhya*

<sup>27</sup> 'Et 'awet yun moodih 'en la lhuganne ubut'ine, 'enne Sizi huyilhchoot 'ink'ez duyoh ts'e whehúyalhti, 'i Praetorium huwhútni. 'Et ts'iyawh ndunne lhuganne Sizi higha óosguz.

28 'Et hinaih hits'u húnuhuyulhch'ul whe luglok dulk'un-i hit'uháyulhchooz.

29 Whus cho nahinílhzaz-i, 'i hitsi nehídan'ai. 'Ink'ez t'l'oghazilh nailhni ts'e hila k'ehídan. Lerwe k'un'a yot'e' ha hitl'ahídan. Hibut nachánuldulh cha' huyulh'en. 'Et whuz un'a highudloh. 'Ink'ez "Lizwif bulerwe sa' cho hona!" huyúlhni.

30 Highá dizoh, 'ink'ez t'l'oghazilh be hitsi oonulht'a.

31 'Et highudloh-un 'etsul 'uhudija whe ndi luglok highun náhuyilhchoot 'ink'ez dich'oh oonaih be náhuyalhti. 'Et 'awet tulalhgus k'ehuyítalhtelh ts'e hítilhti.

32 'Awet Sizi tehínilhti whe 'ilhoghun dune Cyrene whut'en-un 'unt'oh, 'en Simon huyulhni, 'en hidudizdíl whe ndi Sizi ootulalhgus ooba idantelh huyúlhni.

33 'Et 'awet njan Golgotha ts'uw'hútni-un whuz hoozdil. 'Et ndi khuni 'utsints'un niz'ai ni whe 'utni.

34 'Et ts'ekoo too' dunink'oz-i 'ink'ez yoo, gall ts'utni, hitadínla. 'I yulh yootnai' hukwa' huyinla. 'Et hoonts'i yunawhúzdlih 'ink'ez 'aw yootnai' hukwa lhe'nízun.

35 'Et tulalhgus 'uhidunilht'o hukw'elh'az hinaih higha 'áinli. Dahuja-un 'et 'oh da' nus hoo'en-un nts'en'a 'udani', 'et ts'iyawh hukw'un'a 'uhooja. Ndziz un'a nja dudani', "Ndi snaih dich'oh lhtahuyulya.

'Ink'ez ooloh higha 'ainli cha' huyinla."

36 'Et 'awet nátl'ahudilts'i 'ink'ez highunli.

37 Ootsi 'an dus ts'e dzihtelyaz hodunilht'o. 'Ink'ez ndet la hik'ehoon'ai-un 'et 'uk'ehuhonguz. 'Et ndutni,

Ndun Sizi 'en 'unt'oh Lizwifne bulerwe.

38 Nane undunut'ihne, 'enne cha hiyulh tulalhgus k'ebuhilhti. 'Ilhoghun nailhni ts'e, 'ink'ez 'ilhoghun 'intl'us ts'e.

39 Mbene la 'oh whuya whedilhne nodunul'us 'ink'ez hich'az ditni whe yahalhduk.

40 'Et 'uhuyúlhni, "Nyun 'int'oh lugliz whucho nanaóodutanlelh 'ink'ez tat dzin za na'whutanlelh dini! Nyunch'oh 'ududilyih! Yak'usda ooYe' inli de, ndi tulalhgus k'ut ook'ut nanaíndaih!"

41 'Et ndunne lubret bumoodihne, 'enne cha whuz un'a za highudloh. Moses be 'udustl'us 'uk'ununáguzne, 'enne cha 'ink'ez dune 'utso whudilhdzuhlne cha, ts'iyawh whuz un'a za 'uhutni whe ndiz un'a nja duhutni,

42 "'Uyoonne ulhyis 'et hoonts'i dich'oh 'aw 'ududoolyih ait'oh. Israel oots'u haindene, 'enne ba lerwe unli de, 'et de ndi tulalhgus yuk'ut nanaóoja' oole' da'. 'Et de da' neba 'alha' 'oot'e'.

43 'En Yak'usda t'aníntan. 'Et huwa Yak'usda yuka' ninzun de, 'andit 'aho da' yoolhyih. 'En 'utni si Yak'usda ooYe' 'ust'oh."

44 Nduunne 'undunut'ihne yuzih tulalhgus k'usulhtine, 'enne cha whuz un'a za 'et duhúyulhni.

### *Sizi ye khuna-i yuladitni*

45 Dzetniz hukw'elh'az 3:00 at'en 'ink'ez hulhgha 6:00 at'en 'et whuts'un ndi yun k'ut ndúwhulcho whe tsahólhgus sulí'.

46 'Et 6:00 at'en Sizi tube cho ka' dija whe, "Eli, Eli, lama sabachthani?" Ndi khuni, "SYak'usda, SYak'usda di ha sla dantnih," ni whe 'utni.

47 Whulohne dune 'et núdilhyane hidánts'o 'ink'ez 'uhutni, "Ah! Elijah hahayih whe 'utni!"

48 'Et 'aho 'ilhoghun whusalgai, 'ink'ez duchun oola'dul'oo-i ts'ekoo too' dunink'oz-i ye tunayuzsi 'ink'ez ndo Sizi yuze yunaóonulhtsul.

49 'Onghohne "K'at oots'ú ha lhozah'ai! Elijah yughu ninya 'ink'ez tilah yoolhyih."

50 Cha za Sizi tube cho 'udjá 'ink'ez duyughi yula ditni.

51 Khunsul lugliz wuhocho dutai-i hukwa dímbal-i lhulcho lhk'ench'ul. 'Et yun cha núhsnai, 'ink'ez tse cho lhts'edankat.

52 Ts'un k'ut dune 'adinla-un dáhana'dankat. 'Ink'ez lhane Yak'usda ooch'e'ne nahunistez inle', 'enne dunahudidil.

53 'Et 'awet tse be tsa k'et ts'e hanáhidil, 'ink'ez keyoh Jerusalem ts'e whehandil. 'Et lhane nalhts'et bube hóodiltsai, 'et whe whúbunilhtan. Sizi nakhitna hukw'elh'az ndulcho whe 'et dúhooja.

54 'Et 'awet ndun lhuganne bumoodih 'en, 'ink'ez yulh 'ut'enne, 'enne mbene la Sizi yughunline, yun núkhisnai 'ink'ez nts'oh te ne'whust'en-un, 'et honalh'en, 'et whe tube whehúnilhjoot 'ink'ez 'et 'uhutni, "Alha azih ndun dune, 'en Yak'usda ooYe' 'unt'oh."

55 Ts'ekoo cha 'et núdilhya whe yoo 'az de whuts'un honilh'en. 'Enne Galilee ts'u haindilne 'uhut'en. 'Enne Sizi huyuwhusanándilne 'ink'ez hiba ne'úst'enne 'uhint'oh.

56 'Enne butoh Mary Magdala whut'en-un, 'en cha 'ut'en, 'ink'ez Mary James 'ink'ez Joses bulh 'enne buloo, 'en cha 'ut'en, 'et Zebedee ooye'ke 'enne buloo cha, 'ut'en.

### *Joseph Sizi 'ayalhti*

57 'Et 'awet hulgha whenghoh hoozulh whe 'ilhoghun Arimathea whut'en-un, dune hoonzoo' 'unt'oh-un, 'en Joseph huyulhni. 'En cha Sizi yugha hodul'eh-un 'ilhoghun sulí'.

58 'En Pilate ts'u whinya, 'ink'ez Sizi oozi yuts'u yuka 'utni dutl'ayóolhtelh ha. 'Et Pilate ubulhni, "Sizi oozi ndun dune ootl'ayúlhtih."

59 'Et Joseph Sizi oozi ndus de hanáyalhti 'ink'ez naih dizti'-i, 'aw lhditsun, 'i yugha iyozduz.

60 'Et dich'oh ootse be tsa k'et 'andit-un 'uhoonla, 'et whambez ts'e 'et neínilhti. 'Et tse cho whudanádan'ai 'ink'ez whenája.

61 Mary Magdala whut'en-un, 'en cha 'et usda. Njan tsa k'et whanch'az, 'et 'uyoon Mary cha 'et usda.

### *Sizi nts'e la 'ayalhti-un, ndi tse k'ut whuduná'hudalhdze*

62 'Et njan dzenis whutih 'et wheni lhazdutneh-un dzin 'uhoont'oh. 'Et 'om bun dzin ndunne lubret bumoodihne 'ink'ez Phariseene cha, 'enne ts'iyawh Pilate ts'u whehandil.

63 'Et nduhúyulhni, "Nemoodih ndun nenan'a-un 'awhuz khuna whe daja neúlhni la, 'et whunats'ilni whe 'Tat dzin inle' de dunáduťásdah, 'ni.

64 'Et whe nghuni be budóni' njan tsa k'et da'duta'alh whulh tat dzin 'et whuts'un. 'Et 'aw ndúlhinel de ndunne yugha hodul'ehne 'ulhdzis whusahándil 'ink'ez tilah hizi hidunoot'ih. 'Ink'ez la ts'iyanne hudóni' ndunne yaidlanne butoh dunadija whé 'unt'oh. 'Et whuz un'a 'udek'ez whuts'it-i, 'udechoo-i anus 'ultsi' whutáleh," huyulhni.

65 'Et Pilate ndúbulhni, "Nohni cha huwunline aht'i whe aht'oh. 'Awet nahdulh 'ink'ez nohnich'oh soo duts'o cho whe dána'dih'aih!"

66 'Et whehándil 'ink'ez ndi tse k'ut whuduná'hudilhdze. 'I be duts'o cho whuzdli'. 'Et 'ink'ez huwunline 'et nehúninla.

## 28

*Sizi dunadija*

<sup>1</sup> Nats'ulyis dzin hukw'elh'az lisman 'udechoo dzin-un, soo yutilhkai-un, 'et Mary Magdala whut'en-un 'ink'ez 'uyoon Mary bulh ts'un k'uz hooz'az 'ink'ez honilh'en.

<sup>2</sup> Khunsul 'ilhoghun neMoodihti oolizas yak'uz hainya-un. 'Et huwa yun cha núhisnai. Whusainya 'ink'ez ndi tse whudahaidunalngai, 'ink'ez yuk'étl'adida.

<sup>3</sup> Oonin 'ants'i ditni kwun duwhút'en. Oonaih yus k'un'a 'ulhyul.

<sup>4</sup> 'Et huwa nyoonne huwunline nujut k'et hudutlut, 'ink'ez 'ants'i dune dazsaine lhe'huja.

<sup>5</sup> Lizas ndunne ts'ekoo ubúlhni, "Nulhjut íloh. T'oonuszun Sizi mbe la tulalhgus k'ut dazai-un, 'en ookwunáhta whé 'aht'en.

<sup>6</sup> 'Aw njan hooloh! Dunadija whe 'unt'oh. Nts'en'a la datínelh ni, whuz un'a dunadija whé 'unt'oh. 'Anih, njan whunulh'en, ndet la neMoodihti ilhte'-un!

<sup>7</sup> 'Et 'a cho whuz ah'us 'ink'ez mbene la yugha hodul'ehne ubudáhni yaidlanne toh dunadija whé 'unt'oh. Soo zulhts'ai nohtso Galilee ts'oyalh. 'Et tih'elh. Soo cho soo zulhts'ai 'uda' nohdásni."

<sup>8</sup> 'A cho tse be tsa k'et whuch'a nahust'az. Whehunuljut 'et hoonts'i 'on nus huhóont'i' cha' hint'oh. 'Ink'ez mbene la yugha hodul'ehne buts'u whuhilgaih ubodutánelh ha.

*Sizi hits'u teni' nilhdzun*

<sup>9</sup> 'Et mbene la yugha hodul'ehne ts'u hí'us whe khunsul Sizi buts'u dizya 'ink'ez, "Whunúlhni," ubulhni. Hizih nenin'az 'ink'ez hike óontun 'ink'ez hits'u téni' nalhdzin.

<sup>10</sup> 'Et Sizi ndúbulhni, "Aw whénulhjut íloh. Sulhtsinke buts'oh'us 'ink'ez sba budúhni, nohni ts'iyawh Galilee ts'u toohdil. 'Et la sooh'en."

*Saldanne sooneya bugha hinindzai*

<sup>11</sup> 'Et 'awet hutizdil whe 'et huwunline oolune Jerusalem ts'ú hoozdil. 'Et whuz hoozdil whe 'et ndunne lubret bumoodihne, 'enne ts'iyantsuk bubodáni' njan ndet la dahooja-un huwun.

<sup>12</sup> 'Et 'awet lubret bumoodihne 'ink'ez dune 'utso whudilhdzulhne, 'enne ts'iyawh 'ilhunahozdil 'ink'ez howu yahalhduk. 'Ink'ez lhai sooneya 'i saldanne bugha hinindzai 'ink'ez 'ubuhútni,

<sup>13</sup> "Et nohni diz un'a 'udutihnelh, "Et 'ulhdzis 'awhuz ts'uztez whe mbene la yugha hodul'ehne whusahániil'i 'ink'ez oozi neghu hitilhti.'

<sup>14</sup> 'Et yun moodih whulh 'údants'o de, soo kháznint'a whe yats'oolhduk si. 'Et de la whuz un'a 'aw hoonli nohts'u lhe'hosne."

<sup>15</sup> 'Et huwa ndunne saldanne ndi sooneya huyilhchoot, 'ink'ez nts'en'a la ubodáni', 'et whuz un'a za 'onghohne cha budáni'. 'Et soo 'andit dzin 'et whuts'un, 'et whuz un'a lizwifne dich'oh dutoh howu yahalhduk.

*Sizi yak'uz whenaja whutso khuni netl'aídan'ai hik'une' ts'oot'en ha*

<sup>16</sup> 'Et 'awet ndunne whunizyanne 'on 'at 'ilhoghun 'enne yugha hodul'ehne, 'enne Galilee ts'e whehandil. Ndi dzulh k'uz Sizi ubudáni', whuz whehandil.

<sup>17</sup> Hiyan'en whe hits'u teni' nalhdzin. 'Et hoonts'i whulohne buba nawh 'uhoont'oh.

<sup>18</sup> Sizi buts'o whusainya whe bubulh yalhduk 'ink'ez nja dúbulhni, "Yak'uz 'ink'ez ndi yun k'ut 'et ts'iyawh whando 'ust'oh-un, 'et stl'ahóolts'ut.



<sup>19</sup> 'Et huwa lhelhts'un keyoh whut'enne, 'enne ts'iyawh buts'óhdulh 'ink'ez si sgha hodul'ehne ubulhts'i. 'UBá 'ink'ez 'uYe' 'ink'ez Ndoni, ndi boozi' be 'i be too be' butilh'elh.

<sup>20</sup> Ndai khuni nohtl'adís'ai-i, 'i ts'iyawh hik'une' 'oot'en-un hubodoolh'eh. 'Ink'ez soo zulhts'ai, 'et dzin whulatoh lhaooduja de, 'et whuts'un 'ahoolhyiz nohbulh 'útist'elh whe' hoont'oh." 'Et ndo honeh.

## Yak'usda Ooghuni Unzoo-i Mark 'Uk'unéyuzguz-i

*John dune too be 'ulh'en-un Yak'usda ooghuni be yalhduk*

1 Ndi khuni unzoo-i, 'i khuni 'udechoo-i Sizi Gri, Yak'usda ooYe' ghun.

2 'Uda' Yak'usda be nus hoo'enne, ndi Yak'usda ooghuni ghun uk'unuhíyuzguz-i, 'et nja dutni,

“Yak'usda 'ust'oh, soo zílhts'ai,  
'uyoon khuni sba na'á-un ntsó tis'alh,  
mba lhawhúduleleh 'et wheni.’

3 'Et 'oho keyoh, 'aw dune lhuhóot'ih-un,  
dune 'ultus-un huyih whe,

'NeMoodihti whuz de úyalh, ooti ooba lháoodahleh.

Lhutiyalh-un hoonzoo 'ink'ez lhts'e whudiz'a ooba whulhtsi,' ” hutni.

4 'Et 'uhóoja John dune too be 'ulh'en-un, 'aw dune lhuhóot'ih ts'e oozya 'ink'ez tube' budáni', “Nohlubeshi 'ulh'en-un noheni náhandunooohleh, 'ink'ez too be' 'úlhneh, 'aw 'et de za Yak'usda nohklubeshi nohba 'ún yutilhdulh.”

5 Ts'iyanne Judea whunat whut'enne 'ink'ez Jerusalem whut'enne cha tehúndil 'ink'ez John dune too be 'ulh'en-un huyoozílhts'ai. 'Ink'ez du-lubeshi ghun hunahuhoolnuk whe nyo 'et 'ukoh Jordan huwhútni-un toot 'et John dune too bé' balh'en.

6 'Ink'ez John dune too be 'ulh'en-un khuna-i\* gha stl'oo-i ye dune unli 'ink'ez 'uzus se be tsúdilh'oo. Tulk'us cho 'ink'ez ts'ihnatl'uz 'ohwhi za ya'alh inle'.

7 'Et 'ubúlhni, “Dune sk'élh'az whusatíyalh-un sanus dízti' whe 'unt'oh. 'Aw ookechun natl'ool ooba k'unaítis'uk 'et hoonts'i huba soo lhé'uzdzoo'.

8 Too be' nohus'en 'et hoonts'i ndun dune 'en Ndoni be too be' nohtilelh 'ink'ez Ndoni nohyéduti'alh.”

*Sizi too be' 'úlya 'ink'ez netsudúle tank'us 'óoneh-un hukwa yóolhdzih*

9 'Et sa' iloh hukw'elh'az Sizi Gri Nazareth† ts'e hainya 'ink'ez 'ukoh Jordan huwhútni-un toot 'et John dune too be 'ulh'en-un Sizi too be' yínla.

10 Soo Sizi tooz hanaja ibulh, ndo yak'uz dáha' dankez whutílh'en, 'ink'ez Ndoni dut'ai k'un'a ndus de Sizi ook'édilts'ut.

11 'Et 'uwhtútni, “Nyun sich'oh sYe' inli. Tube nk'esi', 'ink'ez tube nyulh hoonúst'!”

12 'Et 'ahoh Ndoni 'en Sizi n'un 'aw dune lhuhóot'ih-un ts'e wheyálh'a'.

13 'Et dit whunizyat dzin Sizi 'aw dune lhuhóot'ih-un inda' 'ink'ez Satan tank'us 'óoneh-un hukwa yóolhdzih. Ts'ant'i 'i cha 'oh ho hoonli. 'Et lizasne whusahándil, 'ink'ez hiba ne'ut'en.

*Dine lho ha 'ut'enne Sizi, “Anih,” 'ubúlhni*

14 John dune too be 'ulh'en-un, 'ahúyan'ai hukw'elh'az, Sizi Galilee ts'e oozya 'ink'ez bubulh yálhduk nts'en'a Yak'usda ook'úne' whut'en-un, 'et huwun.

\* 1:6 Ndi khuna-i “camel” huyúlhni. † 1:9 Nazareth, Galilee 'oh whuz'ai.

15 'Ink'ez 'et 'utni, “Ndi khuni unzoo-i 'unt'oh. 'Andit 'awet whusahónzut. 'Awet nilhdukw Yak'usda ook'úne' whutit'en whe' hoont'oh. Lubeshi 'ulh'en-un noheni náhandunooohleh, 'ink'ez ndi khuni unzoo-i nohba 'alha' 'oot'e' 'ink'ez ulhchoot!”

16 'Et Sizi bunghun Galilee taba nuya whe nane lho ha 'ut'enne uban'en, Simon 'ink'ez bulhutsin Andrew bulh lhembilh tahúyalhdil lho ha' 'ut'enne hinli 'et huwa.

17 'Et 'ubúlhni Sizi, “Sunih'us, dune ha 'ooht'én-un whunohdoos'eh si.”

18 'Et 'aho dulembil hiladitni 'ink'ez hik'oh ts'e oot'en ha huyuntiz'az.

19 'Et 'on 'unyaz hahándil 'et 'uyoonne nane lhulhutsinke James 'ink'ez John bulh Zebedee ooye'ke 'enne ubutilh'en duts'i bet dulembil na'hulh'en.

20 Soo Sizi ubutilh'en ibulh, “‘Anih,” 'ubúlhni. 'Et 'awet Zebedee ooye'ke Sizi bulh whehán'az. Zebedee 'ink'ez yuba 'ut'enne cha 'awet ts'i bet húdilhts'i whe bughu whehán'az.

### *Dune ntsi-i ooyúinda-un*

21 Keyoh Capernaum‡ huwhútini-un whuz hoozdil. 'Om bun dzin Lizwif nahulyis dzin, 'et Sizi Lizwif bulugliz 'et bughu danínya 'ink'ez whe-whúbondunilh'e'.

22 Dune yudánt'sone tube buba hooncha, soo ooba' hoont'óh-un k'un'a whe dune whubodulh'eh, 'aw Moses be 'udustl'us 'uk'ununáguzne buk'un'a iloh 'utni.

23 'Et 'ilhoghun dune butoh usda-un, 'en ntsi-i nududeh-i k'úne' 'ut'en-un, 'aldzul whe 'utni,

24 “Sizi Nazareth whut'en-un ndet nets'ú hukwa' ninzun? Gak netalhtselh ha whusaínya? Mbe inli t'enyunúszun, nyun Yak'usda ba lubeshi ooghu hooloh-un, 'en 'int'oh.”

25 'Et Sizi hukwa' yudani' whe 'uyúlhni, “T'eduzinih whe ooyáhanaindaih!”

26 'Et ntsi-i nudúdeh-i ndun dune yukaootilhdzut, 'alhdzul, 'ink'ez yuyáhanaja.

27 Ts'iyanne buba hooncha k'et 'et 'ulhodútini, “Dant'óh-un dune 'unt'oh, whutso da' lhts'odústs'o-un 'et whuneoodulh'eh? Ooghuni be whúnujut k'et ntsi-i nudúdeh-i hoonts'i hik'úne' 'ut'en.”

28 'Aho Galilee keyoh whuti whunat whut'enne Sizi huyulh údants'o.

### *Sizi lhane dune undudáne soo ná'bulh'en*

29 'Et 'awet Lizwif lugliz tenáhundil. Simon 'ink'ez Andrew buyoh ts'e hoozdil, James 'ink'ez John bulh cha whuz hooz'az.

30 Simon oobiz lili k'ut sulhti. Ooyust'e nulwus-i be únduda. Sizi whuz oozya ibulh hidáni'.

31 'Et yughu ninya 'ink'ez yula t'az do yilhchoot. 'Aho ts'eke soo 'úja 'ink'ez bugha ná'unt'ai.

32 Hulgha sa yó whin'ai hukw'elh'az, ndudáne 'ink'ez mbene la ntsi-i nudúdeh-i k'úne' 'ut'enne cha Sizi ghu bonína.

33 Ts'iyanne 'et keyoh whut'enne dati 'ílhuhózdil.

34 Lhawh didowh dada-i be undudáne, 'enne Sizi soo ná'balh'en 'ink'ez ntsi-i nudúdeh-i k'úne' 'ut'enne, 'enne cha dune yé hanabunanyoot. Ntsi-i nudúdeh-i 'aw yahoolhduk-un butl'alhúhoo'al t'ehinínzun 'et huwa.

### *Keyoh Galilee huwhútini-un, 'et Sizi Yak'usda ooghuni be yálhduk*

‡ 1:21 Capernaum Galilee 'oh whuz'ai.

<sup>35</sup> 'Om bun 'uda' 'awhuz lhuyulhkoh da' 'et Sizi dudinya 'ink'ez 'az whenya. 'Et nyo keyoh whuch'a suya, ndet la soo disoh ts'e, whuz oozya. 'Et tenadudli.

<sup>36</sup> Simon 'ink'ez duk'ekene te Sizi hikunuta.

<sup>37</sup> Nahayilhti whe 'et 'uhuyúlhni, "Ts'iyanne nkunúta."

<sup>38</sup> 'Et Sizi 'ubulhni, "'Uts'un keyoh ts'e cha uztoodilh huba' hoont'oh 'oh cha dune bulh yátisduk 'et huba whusálya."

<sup>39</sup> Galilee ndulcho nukéhudizde lugliz totsuk bubulh yálhduk 'ink'ez ntsi'-i nudúdeh-i dune ye hanábuuyukw.

### *Ooka whulhjú-tun, 'en Sizi soo ná'ynla*

<sup>40</sup> Ilhohgun dune, ooká whulhjut-un, leprosy huyulhni, 'en Sizi ghu ninya, dugwutsi bé nenínya 'ink'ez yuts'u tédudli dula 'ooneh ha. "Nyun hukwa' ninzun de, be ilhtus-i 'int'i-i, 'i be suná'ilhdeh," yulhni.

<sup>41</sup> Sizi yugha té'ninzin yuts'ú nudilhni 'ink'ez yut'aíznai. "Hukwa' nuszun soo na'íntneh," yulhni.

<sup>42</sup> 'Et za nyoon dune ulhjutun soo ná'uja.

<sup>43</sup> Sizi khuniti be yulh yálhduk 'ink'ez 'et za whenáyalh'a'.

<sup>44</sup> Nyoon dune natisja whe 'et Sizi 'uyulhni, "Soo zilhts'ai, 'uyoonne dóni' junih! Inyalh ts'e lubret 'en oots'ínyalh 'ink'ez nyunoolh'en. 'Et 'ants'íya soo na'ínja hukw'élha ndet la Moses ooghuni k'un'a lubret nts'u húkwa' utni-un, 'i oogha íon'alh. 'Et ts'iyanne whúntalhtun ts'ih'un soo na'ínja."

<sup>45</sup> 'Et hoonts'i ndun dune whenája 'ink'ez ts'iyanne dáni' 'on nus huwe yalhduk k'et Sizi 'aw keyoh dune tunóya' ait'oh. 'Inka n'awh dune lhuhóot'i 'oh dune unli. Lhelhts'iz de whut'enne whuz highu lkh'esúdil.

## 2

### *Dune délhdsni-un Sizi soo ná'ynla*

<sup>1</sup> 'Et hukw'elh'az whutizútya whe Sizi duyoh Capernaum ts'e naosja. Ts'iyanne whulh 'úhuduzts'ai.

<sup>2</sup> 'Et 'ahoh dune 'ilhuhozdil. Whuz dune lhane 'alghoh daníndil k'et 'aw whuz'ái-un hooloh, dati 'i bulh whudizbun. 'Et Sizi Yak'usda ooghuni ghun ubulh yálhduk.

<sup>3</sup> Yalhduk whe dine dune, 'enne 'ilhohgun dune délhdsni-un Sizi ts'un hítizkai.

<sup>4</sup> Whuz dune lhai k'et 'aw Sizi híyénghun neóodilh ait'oh. 'Inka ndo bun 'i k'ihinílhti 'ink'ez soo ndet la Sizi 'unt'oh-un at'en, whuz ndun dune délhdsni-un ndus de yuk'usti-i, 'i bulh hukwu huyankai.

<sup>5</sup> 'Et Sizi dalcho-i be hit'anínintan t'oonínzun 'et huwa ndun dune délhdsni-un 'ulhni, "Hadih ts'oodun nlubeshi ts'iyawh mba hooloh sulí."

<sup>6</sup> Whulohne Moses be 'udust'l'us 'uk'unáguzne, 'enne nyo 'et hudilhts'i 'ink'ez 'uhinínzun,

<sup>7</sup> "Mbe na'dunúdzun whe 'utni, Yak'usda ch'az yalhduk. 'Aw 'oh dunene lubeshi n'un hutoolhdilh ait'oh, Yak'usda 'en za lubeshi n'un tulhdilh whe 'unt'oh."

<sup>8</sup> 'Et Sizi duyughi be daja huninzun t'ewhunínzun 'et 'ahoh 'ubulhni, "Dáhoont'oh huwa 'oh te núní nahzut?"

<sup>9</sup> Ndet 'uk'enus huwa l húhoolna' ndun dune délhdsni-un 'udutásnelh, 'Nlubeshi mba n'un tisdil, k'us 'Dunadindaih 'ink'ez ninya?"

<sup>10</sup> Whunoh untistun, yinka dune ye, 'en njan ndi yun k'ut lubeshi n'un tulhdilh-un ooba hoont'oh." 'Inka ndun dune délhdsni-un 'ulhni,

11 “Nyudúsni, ookw'usinti-i ilhchoot 'ink'ez nyoh ts'e naíndalh.”

12 Ts'iyawh hinilh'en whe 'a ho dunadija, yuk'usti-i yilhchoot 'ink'ez ts'iyanne nalh whenája. Soo ts'iyawh buba hooncha 'ink'ez Yak'usda hidálhti 'ink'ez 'uhútni, “Aw whutsoda 'et duhoont'oh-un lhts'uhooş'en.”

### *Sizi Levi, “Anih,” yúlhni*

13 'Et cha za Sizi taba ts'e naóosja. 'Ilhozdílné highu nindil whe 'et whubodul'h'e.

14 'Et Sizi 'oh whuya uyalh whe Alphaeus ooye' Levi, Capernaum whenkuti huwunli ha sooneya náldzoooh-un, 'en Sizi yutílh'en 'et 'uyúlhni, “Sunanyalh.” 'Et Levi dudinya 'ink'ez hik'oh ts'e oot'en ha yuntizya.

15 Hukw'elh'az 'et Levi ooyoh lhanne ndunne sooneya nalhdzóohne 'ink'ez lubeshi 'ulh'enne, Sizi yugha hodul'ehne cha 'et bula na'ut'alh.

16 'Et Moses be' 'udust'l'us 'uk'ununáguzne 'ink'ez Pharisee didowhne, Sizi hinilh'en nyoonne lubeshi 'ulh'enne, 'ink'ez sooneya nalhdzóohne bula na'ut'alh. Nyoonne Phariseene Sizi yugha hodul'ehne hubuhoodulhkut, “Dáhoont'oh huwa ndunt'óhne bula 'a'alh?”

17 Sizi budánts'o 'ink'ez 'ubulhni, “Mbene la soo 'únt'ohne 'aw yoo be duyun-un halhe'hunízun, mbene la ndudáne, 'enne za yoo be dúyun-un ka' huninzun. 'Et whuz un'a si cha dune ts'ih'un 'unt'oh na'dunúdzunne ba whusálhusyal, lubeshi 'ulh'enne lht'anahunoodilh hubudutásnelh 'et wheni whusásya.”

### *Dune soo huhooni-un hukwa hoodulhkut*

18 'Et John dune too be 'ulh'en-un yugha hodul'ehne 'ink'ez Phariseene bugha hodul'ehne cha soo húhoonih whe 'uyoonne Sizi highu nindil 'ink'ez 'uhuyúlhni, “‘Et dáhoont'oh huwa John dune too be 'ulh'en-un yugha hodul'ehne 'ink'ez Pharisee bugha hodul'ehne soo húhoonih 'et hoonts'i nyun ngha hodul'ehne, 'enne gak?”

19 Sizi 'ubúlhni, “Andít lhghuskéne ba nóye 'ul'en de, ndunne bughu nusdílné soo húhoonih la nahzun eh? Ndun dune oo'at whuzdli'-un, 'et butoh usda de, 'aw nduhóoneh aít'oh.

20 'Et hoonts'i whusaóotílt's'ulh ndet la ndun dune 'at ut'í-un bughu nay-ítálchulh. 'Et dzin whusahóolt's'ut de, 'oh de za soo húhootanih.”

21 “‘Aw 'ílhoghun naih 'andidi-i naih jut be naoolhkut aít'oh. 'Et ndúja de, ndi naih 'andidi-i be nalhkut-i, nyoo naih jut nalhkut-i bulh hanaitich'ulh 'ink'ez 'on nus hooncha tileh.

22 'Et whuz un'a 'aw 'ílhoghun ts'ekoo too', 'awhuz 'ut'en-i, 'uzus 'ujut-i be húyoolhdzeh huba lhe'hóot'oh. 'Et nduhúyinla de nyoo ts'ekoo too' zus 'ujut-i ook'otáltulh 'ink'ez nankílt'oh ts'ekoo too' 'ink'ez oozus bulh ninta' tit'elh. Ts'ekoo too' 'awhuz 'ut'en-i 'uzus 'andidi-i be óoldzeh huba' hoont'oh.”

### *Nahulyis dzin hukwa' hoodulhkut*

23 'Et doo cha nahulyis dzin 'uhoont'oh whe, Sizi 'ink'ez yugha hodul'ehne tubulh t'l'o k'ut 'oh whuya hidulh whe, t'l'o mai' hoonuyin.

24 'Et Phariseene Sizi 'uhuyúlhni, “Nilh'en dáhoont'oh huwa ngha hodul'ehne nats'ulyis dzin 'et 'uhut'en? 'Aw 'et nduhóot'en huba lhe'hoot'oh.”

25 Sizi 'ubúlhni, “‘Aw lakw hukw'u yalhúldih David dája 'oh da', yoo'alh-i hooloh whe yulh 'út'enne te buye'ílt's'ul whe 'et 'uja,

26 Yak'usda ooyoh 'et danínya 'ink'ez nyoo lhes Yak'usda gha t'aih-i, 'i yu'alh 'ink'ez yulh 'ut'enne, 'enne cha huyan'al. Lubretne 'aw 'enne za huyoo'alh huba' hoont'oh, 'et hoonts'i David 'inkez yulh 'ut'enne cha nduhuja. 'Oh da' Abiathar 'en lubretne bumoodih unli whe' hooja.”

<sup>27</sup> 'Et Sizi 'ubúlhni, "Nahulyis dzin dune whe soo' hoot'e' ha 'oohoolya, 'ink'ez dune, 'enne 'aw nahulyis dzin huba lhe'húlnel.

<sup>28</sup> 'Et huwa yinka dune ye', nahulyis dzin 'et hoonts'i hukwa' ninzun k'un'a 'ut'en."

### 3

#### *Sizi Gri dune oola únduda-un soo na'yinla*

<sup>1</sup> 'Et Sizi Lizwif bulugliz ts'e naóosja. 'Ilhoghun dune oola 'aw ye nulhé'ust'en-un, 'et usda.

<sup>2</sup> 'Et Phariseene tube Sizi highunli nahulyis dzin tilah nyoon dune ka únli-un nayoohyih, hukwa hik'ého'alh-un, 'et hukwa highunli.

<sup>3</sup> Sizi nyoon dune oola ka únli-un 'ulhni, "Dunadindaih 'ink'ez ndiz nus ínyalh!"

<sup>4</sup> 'Et Sizi uboodulhkut, "Neghá whunt'ai eh nahulyis dzin, 'ula' ts'utinelh k'us 'uts'uduntálhda, uztilhyih k'us gak uztilhtselh?" 'Aw dája lhodinel.

<sup>5</sup> Sizi tube huníh'e whe butunuyú'en 'et hoonts'i whudulhyoh bugha té'ninzun, stabe butsi dunuts'un. 'Et nyoon dune ka únli-un yulhni, "Lhts'edílnih!" Nyoon dune lhts'edílni ibulh 'ilhoghi oola k'un'a soo ná'uja.

<sup>6</sup> 'Et 'ahoh Phariseene nyo lugliz tenáhundil 'ink'ez Herod didowhne bulh highu yalhduk nts'en'a Sizi hituzilghel 'et wheni lhaóóduleh.

#### *'Ilhozdíne bunghun taba húdílhts'i*

<sup>7</sup> 'Et cha za Sizi yugha hodul'ehne tubulh Galilee bun ts'e náhoosdil. Galilee keyoh whut'enne whuz huyoonizdí 'ink'ez lhelhts'iz de keyoh ts'e haíndilne tubulh. Judea ts'e haíndilne cha,

<sup>8</sup> Jerusalem whut'enne cha, Idumea ts'e haíndilne cha, Jordan koh whanyan whut'enne cha, 'ink'ez ndunne Tyre 'ink'ez Sidon whut'enne, 'enne cha, ts'iyawh Sizi high'e 'ilhozdílh that te ne'út'en huyulh 'údants'o 'et huwa.

<sup>9</sup> 'Ilhozdíne huldlai 'ink'ez Sizi huyulh lhedindil 'et whuch'a yugha hodul'ehne, "Ts'i sba lhadáhleh," 'ubúlhni.

<sup>10</sup> Lhane ndudáne soo na'binla 'ink'ez 'uyoonne hit'aóonalh hukwa' hut'en

<sup>11</sup> 'ink'ez mbene la ntsi-i nudúdeh-i buyudíndane, Sizi hitulh'ih te, hibut nachánuldulh, 'ink'ez hahúzulh whe 'uhutni, "Nyun Yak'usda ooYe' inli whe 'int'oh."

<sup>12</sup> 'Et Sizi khuniti be ndunne ntsi-i nudúdeh-i 'ubúlhni, "Khun mbe 'ust'oh doohtni' junih!"

#### *Whunizyáne 'on 'at nane, 'enne Sizi 'et 'utahábanla*

<sup>13</sup> Shus k'ut ndo whenya whe mbene la buka' ninzun 'enne buka' dani' 'ink'ez hits'o whúsaindil.

<sup>14</sup> Whunizyáne 'on 'at nane, 'enne 'utahábanla. "Sulh 'óoht'e' ha 'utahanóhisdla," 'ubúlhni, "Dune bulh yátílhduk ha nohtis'alh

<sup>15</sup> 'ink'ez ntsi-i dune nudúdeh-i dune yáhananoohyoot 'ink'ez dune soo na'boohl'en-un, 'et nohtl'ahóos'ai."

<sup>16</sup> N dunne whunizyane 'on 'at nane, 'enne 'utahábanla Simon, 'en Sizi "Peter" naidútni.

<sup>17</sup> James 'ink'ez bulhutsin John Zebedee ooye'ke 'enne Sizi Boanerges nabudátni, ndi 'oozí'-i "huskéne" ni whe 'utni;

<sup>18</sup> Andrew, Philip, Bartholomew, Matthew, Thomas, James Alphaeus ooye', Thaddaeus, Simon huwu daóodit'owh-un,

<sup>19</sup> 'ink'ez Judas cha 'en Sizi be ná'oodutakulh-un.

*Netsudule Sizi Gri ooyudinda hutni*

<sup>20</sup> 'Et yoh ts'u náhoosdil. 'Et doo cha za 'ilhozdilne huldlai k'et Sizi 'ink'ez yugha hodul'ehne bulh 'uhuti'ulh, 'et hoontsi'i 'aw 'uhooneh aít'oh.

<sup>21</sup> Lhane dune 'uhutni, "Beni hooel" hutni 'ink'ez ook'ekene huyulh údants'o whe hika natisdil dudeni yit ninta' 'oot'en whuch'a.

<sup>22</sup> Moses be 'udust'lus 'uk'ununáguzne, Jerusalem ts'u haíndilne, 'enne 'uhutni, "Beelzebul ooyudinda 'en yugha óonin'ai huwa 'ut'en ntsi'-i nududeh-i bughu whenábunuyukw."

<sup>23</sup> 'Inka Sizi, "Anih," hubúlhni, 'ink'ez bubulh náwhulnuk higha hodool'eh ha, "Nts'en'a netsudule dich'oh nadudúntíjuh?"

<sup>24</sup> Keyoh whut'enne lhch'az nehúdindil 'ink'ez l'ehúndil de, 'et keyoh gak whutale,

<sup>25</sup> k'us 'ilhoghun yoh whut'enne lhch'az nehúdindil de, 'et yoh whut'enne ts'iyawh yahitádulh.

<sup>26</sup> 'Et ntsi'-i nududeh-i lhch'az nehúdindil de, 'aw sa 'uhoot'e' aít'oh lhch'á náhúsdil 'ink'ez la gak hooel'.

*Mbene la Ndoni ch'az ditni be yalhdukne, 'aw buba whunaoodotnoh aít'oh*

<sup>27</sup> "Dune ulhtus-un ooyoh dahá' danyuz 'ink'ez te'óolelh nehooloh, 'udechoo dune ulhtus-un yulghel de, 'et de za yughu té'tilelh.

<sup>28</sup> Soo ts'ih'un nohdúsní, ts'iyanne dune bulubeshi cha 'ink'ez Yak'usda ch'az yáduk-un cha ts'iyawh buba n'ún whutildulh.

<sup>29</sup> 'Et hoontsi'i mbene la Ndoni ch'az yálhdukne, 'enne 'aw bulubeshi buba n'un yutooldhilh aít'oh, 'ilhiz wheni lubeshi hut'í."

<sup>30</sup> Sizi ubudani'-un, 'et huwa ndunne Moses be 'udust'lus 'uk'ununáguzne 'uhútni, "Ntsi'-i nudúdeh-i ooyudinda!"

*Sizi ooloo 'ink'ez bulhutsinke hits'u tídulh*

<sup>31</sup> 'Et Sizi ooloo 'ink'ez bulhutsinke te whusahándil yoh yoo 'az ts'e, 'et nódilhya whe yoh ts'e khuni hits'o t'l'ain'ai.

<sup>32</sup> Dune 'ilhozdilne Sizi hinat dilhts'i 'ink'ez 'et 'uhuyúlhni, "Nilh'en nloo 'ink'ez nyulhutsinke n'at 'az 'uhut'en 'ink'ez nka' hoodulhkut."

<sup>33</sup> 'Et Sizi 'ubúlhni, "Mbe la sloo k'us mbene la sulhutsinke?"

<sup>34</sup> Ts'iyawh dilhts'íne butunúyuz'en 'ink'ez 'utni, "Whunulh'en njan ndunne, 'enne sloo 'ink'ez sulhutsinke cha 'uhint'oh.

<sup>35</sup> Mbene la Yak'usda k'úne' 'ut'en unli-un, 'en sulhutsin, sulhtus, 'ink'ez sloo 'uhint'oh."

## 4

*'Anulé-un oogha whúts'odul'eh*

<sup>1</sup> 'Et bungun Galilee huwhútni-un, 'et doo cha za 'ilhozdilne Sizi higha óozdil 'ink'ez hubodulh'eh. 'Ilhozdilne huldlai k'et ts'i bet t'l'adida. 'Et ndanus le dodikelh whe 'et whuts'un 'ilhozdilne taba nódilhya whe hubodulh'eh.

<sup>2</sup> Lhat-un whe hukw'u bubulh nawhulhnuuk huwa há hodool'eh 'et wheni.

<sup>3</sup> "Soo zúlhts'ai 'ilhoghun 'a'nule-un, 'á'untilelh ts'u whenya.

<sup>4</sup> 'Et 'a'nule whe ooloh ti nanánkat. 'Idut'aiyaz whusahándil 'ink'ez ts'iyawh hínildil.

<sup>5</sup> 'Et ooloh tse toh nanánkat, 'ankw'us yunyaz hooloh-un, 'et huwa 'ahoh hánuski.

<sup>6</sup> Ooghíh hooloh 'et huwa hasain'ai whe ts'iyawh yanúdizgi 'ink'ez gak sulí'.

7 'Et ooloh cha whus cho tanínkat. 'I cha whus cho whutoh bulh hainanyai bulh lhéwhultloh 'ink'ez 'aw háhlniyil.

8 'Et 'onghoh-i yun unzoo-i k'ut nanánkat whe soo hananyai 'ink'ez oomai' whulukhi tat whunizyai (30) oomai' sulí', whulukhi lhk'utat whunizyai (60) oomai' sulí', 'ink'ez whulukhi whunizyat whunizyai (100) oomai' sulí'."

9 'Et Sizi 'ubulhni, "Mbe la oodzo hoonine, 'enne huyoozólhts'ai' huba' hoont'oh."

*Oogha whúts'odul'eh-i, 'i di unli whe' 'unt'oh?*

10 'Et Sizi dich'oh 'únt'oh whe whulohne yoozálhts'ai'ne whel'a'ne bulh Sizi higha óozdil 'ink'ez 'uhuyúlhni, "Dája dani'-un, 'et neba hukw'u nuhílhye'."

11 Sizi ndúbulhni, "Nts'en'a 'utinelh Yak'usda dudune'ne hik'úne' 'ut'en-un, 'andit whuts'un dune ch'á nona'i'. 'Et 'andit ts'iyawh nohba hahónla t'eoonohzeh ha, 'et hoonts'i 'uyoonne dune, 'enne higha hódool'eh k'un'a za bubulh yáduk.

12 'Et huwa:

'Honilh'en 'et hoonts'i la 'aw lhuhuhoo's'en oole'.

'Uhoozílhts'ai' 'et hoonts'i la 'aw t'el'uhonoosze.

'Et bubeni taóodilts'ut 'ink'ez Yak'usda ts'u náhulh'a de 'et bulubeshi buba 'ún yutilhdulh.' "

*'A'nule-un oogha whúts'odul'eh-un, 'et Sizi neba hukw'u nuhílhye'*

13 'Et Sizi 'ubúlhni, "Ndi oogha hódulh'eh-un, 'aw ts'ih'un nelhúwhu'al de, 'et nts'en'a suba 'oohne 'uyoo oogha hódutilh'eh-un ts'ih'un neootah'alh?"

14 'Et Sizi ndúbulhni, "Yak'usda ooghuni 'i 'uyulh'en 'á'nule-un 'aínule, 'et whuz un'a Yak'usda ooghuni 'uhuyulh'en.

15 Whuloh te Yak'usda ooghuni ti nanúkat, 'i hidits'o te, 'et 'ahoh Satan khuni budzi bughu yílhchuk.

16 Ndi ndai da' tse toh 'anilya, ndunne 'i k'un'a za 'uhint'oh. Ndi Yak'usda ooghuni hidits'o 'ink'ez soo 'ahoh huhóont'i' whe huyilhchuk.

17 'Et hoonts'i didutch'oh 'aw bughih hooloh le'hint'oh. 'Et huwa 'atsulyaz za buba 'alha' hoont'oh. 'Ink'ez ndi khuni 'i gha dzoh nuhudeh 'ink'ez 'onghohne buch'az huditnih. 'Et huwa 'aho ndi khuni hiladutnih.

18 Ndai la whus toh 'anankat-i le'unt'ohne, 'enne ndiz un'a 'uhint'oh.

19 'Enne khuni hidits'o, 'et hoonts'i ndi yun k'ut huwu ni udli-un, ndi yun k'ut hoonzoo' hoont'oh-un, 'ink'ez ndai la ndi yun k'ut huhóont'i' tune' hut'en-un, 'et 'i ts'iyawh whus cho 'i be bulh lhe'ullhuk. 'Et huwa 'aw lhadúlyane hoole' aít'oh.

20 'Et whulohne yun unzoo-i k'ut nanánkat 'i unduhúlt'oh Yak'usda ooghuni hidits'o, huyílhchuk, 'ink'ez dudzi yo-un nehídi'aih, 'et oomai' whulih. Whulohne tat whunizyai (30), whulohne lhk'utat whunizyai (60), 'ink'ez whulohne cha whunizyat whunizyai (100)."

*Too dízk'un kw'uz yo yudin'ai-i Sizi yughu yalhduk*

21 'On 'un Sizi ndúbulhni, "Too dízk'un dune daínin'ai 'ink'ez yuk'uz yoná'diz'ai tilah k'us lili t'a tilah 'aiyan'ai? 'Awundooh! Hukw'us'ai-un, 'et hukw'éyi'aih.

22 'Et huwa ndai la whu'iz 'unt'oh-i, ts'iyawh ts'et hatíkulh."

23 'Et Sizi 'ubúlhni, "Mbe la oodzo hoonine, 'enne huyoozólhts'ai' huba' hoont'oh."

24 'Et cha ndúbulhni, "Huwahli 'ink'ez soo cho soo zúlhts'ai de, soo la oogha hódoolh'eh whuz un'a za Yak'usda 'on 'un cha la nohla 'ooneh.



25 Mbene la sghuni soo cho huyoozilhts'aine, 'enne 'on 'un cha huyootuzálhts'ilh 'ink'ez higha hóduutil'eh. 'Et bugha whútat'alh 'ink'ez mbene la luhuyootuzálhts'ilhne, 'enne sghuni hidánts'o 'i hoonts'i hinaoodutilnoh."

*Haníyeh-i oogha whúts'odul'eh*

26 'Et Sizi 'utni, "Nohbulh naóowhutiznuk Yak'usda ook'úne' whut'en-un, 'et huwun dune lhé'ut'en 'anulye-i 'anúle whuz un'a 'unt'oh.

27 'Et hukw'elh'az 'ulhdzis usti 'ink'ez dzenis 'et n'awh ne'út'en, 'et ndulyiz whe 'ainanla-i ook'unónultalh 'ink'ez haníyeh 'et hoonts'i 'aw t'eeonúszun dat'en whe hanúlhyih.

28 'Et yun 'i gha hanúlhyih 'ink'ez oomai' whulih. 'Udechoo yun ghu nuki 'et nuyih 'ink'ez dinyiz lhih te oomai' whulih.

29 'Et oomai' nut'ih te 'et dune lufoo be yut'us 'awet há' nukat newhúninzut 'et huwa."

*Haníyeh-i Mustard huyúlhni 'i oogha whúts'odul'eh*

30 'Et Sizi 'utni, "Daja uzduutilnelh whe Yak'usda ook'úne' whut'en-un, 'et hukw'u nuts'úhulhye' whe higha hódool'eh 'i ook'únats'otilnuk?

31 'Uk'enus 'anulye-i nintsool-i, 'i mustard huyúlhni. 'I dune yilhchuk 'ink'ez 'ainulih.

32 'Et hanúlhyih te, 'ink'ez dilhtán-i 'uk'enus 'udilcho lhih oozischum dincha whe lhts'enunúlhye' 'et dut'aiyaz yutoh net'o ulih."

33 Lhat-un higha hódool'eh ha bubulh yálhduk dáhoolcho-i be t'ehontizeh-un, 'et za hukw'u bubulh náwhulnuk.

34 Higha hódool'eh-i, 'i be za bubulh yálhduk 'et hoonts'i dich'oh 'úhint'oh te yugha hodul'ehne, 'enne soo cho buba hukw'ú nuhúlhye'.

*Whudutilhts'ut whe Sizi whudílghel*

35 'Et hullgha za Sizi yugha hodul'ehne 'úbulhni, "Nyan tadatus ts'e uztooke'."

36 'Inka 'ilhozdilne buch'a nahusdil yugha hodul'ehne ts'i be hándil, Sizi 'uda' ye usda-i, 'i be nyan hutizki 'uyoo ts'iyaz cha bubulh tizkat.

37 Khunsul nilhts'i ulhtus tizts'i whe tatsi dincha k'et ts'i be tádutih 'ink'ez 'ankw'us too be whendunimbun.

38 'Et Sizi ts'i niz ts'e 'et tse'alh k'ut tsenilh'al 'ink'ez nanisti. 'Et yugha hodul'ehne ts'e nahinílhdzut 'ink'ez 'uhuyulhni, "Nehodulh'eh-un, 'awet yats'itádlá 'aw neghu ni lhínloh?"

39 Sizi dudinya whe too k'ut nilhtsi khuni ulhtus-i be hukwa' yudáni', "Nilhts'i, 'etsul 'ineh," 'ink'ez, "Tatsi nulhózina," 'ink'ez 'et 'awet díngel.

40 'Et Sizi yugha hodul'ehne ndúbulhni, "Dahoont'oh huwa stabe nulhjut, 'aw eh bé 'alha' hoont'oh-i lhuht'ih whé aht'oh?"

41 'Et tube whéhunilhjoot 'ink'ez 'ulhodútni, "Dant'oh-un dune unli whe 'unt'oh? Nilhts'i 'ink'ez tatsi bulh hoonts'i yuk'úne' 'ut'en."

## 5

*Dune ntsi'-i nudúdeh-i ooyudúlts'i-un Sizi soo ná'yinla*

1 'Et bun k'ut nyan hoozki whuz Gadarenne bukeyoh 'et 'úhoont'oh.

2 Soo Sizi ts'i bé hainya ibulh 'ilhoghun dune tse bet dune 'adinla-un whuz de haínya.

3 Ndun dune tel'en ntsi'-i nudúdeh-i, 'i ooyudínda 'ink'ez ts'un k'ut 'et whut'i. 'Aw dune lhuzt'ih t'l'ool be hoonts'i whehídolht'i aít'oh.

4 Lhat whe oola 'ink'ez ooke bulh huyulhghelh 'et hoonts'i 'oh totsuk lhuztih tl'ool k'unuyúch'us 'ink'ez lhuztih ooke be lhulh'oo-i, 'i cha yayalh'us. Ulhtus k'et 'aw dune hich'a' oolhdeh aít'oh.

5 Dzin 'ink'ez 'ulhdzis 'i bulh ts'un k'ut whutoh 'ink'ez nódist'ai-un, 'oh nuya whe 'aldzul 'ink'ez tse be oodudut'as.

6 Dzoh nilhdza-un, 'et yughusyin whe Sizi yutilh'en. 'Ahoh yuts'u tílhgai 'ink'ez dugwut si be yubut nachánitno,

7 'ink'ez soo 'ultus-un 'aldzul whe 'utni, "Sizi 'uk'enus Yak'usda ooYe' ndet sts'u húkwa' ninzun. Yak'usda 'int'oh 'inka nts'u tédusdlih dzoh nusílhdzut iloh."

8 'Et ndutni whe Sizi ndúyulhni ntsi'-i nudúdeh-i ndun dune ooyáhanaindaih.

9 'Et Sizi yoodulhkut, "Ndai la nyoozi'?" yúlhni. 'Et 'utni, "Legion, 'i soozí' 'unt'oh. 'I lhane lhuganne 'uts'int'oh ni whe 'utni."

10 'Et ntsi'-i nudúdeh-i Sizi soo yuts'u tédudlih, "Njan keyoh whuch'a netolh'a' junih," yúlhni.

11 Dzulh enghoh 'et gugoos lhai 'et 'a'álh.

12 'Et ntsi'-i Sizi ts'u tehududlih n'únne gugoos 'enne buts'u néilh'alh 'et de la buyúdoodeh.

13 'Et huwa 'ahoh Sizi butl'ahón'ai ntsi'-i nudúdeh-i dune yuts'a hanádide 'ink'ez gugoos 'i yudande. Gugoos 'ankw'us 2,000 'unt'oh, 'i ts'iyawh whenghólghaz 'ink'ez too yanghan.

14 'Et nyoonne gugoos ghunline whehílgaz 'ink'ez keyoh whutakhuni hunin'ai. 'Et lhane whusaíndil dáhooja hontilh'elh ha.

15 'Et Sizi highu nindil 'ink'ez dune hinilh'en ntsi'-i nudúdeh-i ooyudúlts'i inlé'-un, 'et hukw'usda beni oogha nádíls'ut 'ink'ez soo dint'oh cha 'unt'oh. Buba hooncha k'et tube whéhunilhjoot.

16 'Et mbene la hon'éne, 'enne dune hudáni' ndun dune ntsi'-i nudúdeh-i ooyudúlts'i inlé'-un dája la 'ink'ez gugoos ghun cha.

17 'Et Sizi highu tedudli bukeyoh whuch'a naóoja' ha.

18 'Et Sizi ts'i be nádaíh 'et ndun dune mbe la ntsi'-i nudúdeh-i ooyudúlts'i inle'-un, 'en Sizi yuts'u tédudlih, "Nyulh 'óosneh," yúlhni.

19 'Et Sizi, "Awundooh," yúlhni 'ink'ez 'uyúlhni, "Nyoh ts'un naíndalh 'ink'ez nk'ekene te hubudáni dalcho 'i be la nyuMoodihti nts'un oodzi únzoo 'ink'ez dalcho 'i be nla 'uja."

20 'Et ndun dune whenája 'ink'ez whunizyat-un keyoh 'et whutulhuséya Sizi daíyinla whe yula 'uja 'ubúlhni. 'Et mbene la yudits'one ts'iyawh buba hooncha.

*Sizi Jairus ootse' dunaidilhti 'ink'ez ts'eke Sizi yunaih t'aíznai-un*

21 'Et Sizi nyan tadatus ts'e whenáhiki 'ink'ez bunghun whuzih lhane dune higha óozdil.

22 'Et Lizwif bulugliz whumoodih Jairus huyúlhni 'en yughu ninya 'et Sizi yutilh'en whe yubut nachániti.

23 'Ink'ez tube cho yuts'u tédudlih, "Ustse'yaz 'awet datítsa, sulh naínt'us 'ink'ez ook'udólmi sih soo ná'ootne 'ink'ez khoona' sih."

24 'Et 'awet Sizi yulh nátist'az. 'Et whuz lhane dune yulh tizdil k'et lhts'un ún'a huyúlhedindil.

25 'Ilhoghun ts'eke tube dzoh nuzut whunizyat 'on 'at nat yus k'ut 'et duwhulyiz whe 'uskai' uyulh'en-un,

26 yoo be dúyunne lhane cha hukwa' huyalh'en. Duzooneya ts'iyawh gak yulhtsi 'et hoonts'i nus za lhe'ínelh.

27 'Et Sizi yulh údants'o 'et huwa dune toh Sizi yut'a ts'e yugha nínya 'ink'ez oonaih yut'aíznai.

28 "Ants'i oonaih 'i te oot'aízasnai de 'et de la soo ná'oosneh," dich'oh 'et ndunínzun.

29 'Inka Sizi yunaih 'i yut'aíznai ibulh 'et 'ahoh 'uskai' 'uyulh'en-un 'etsul 'uja 'ink'ez 'ahoh t'éoonanzin whe dzoh nuzut-un soo ná'uja.

30 'Et 'ahoh Sizi t'éoonanzin yé ulhtus ye dune la'ut'en-i ooloh oots'ahadílts'ut. 'Et 'ilhozdílne buts'u nálh'a 'ink'ez 'utni, "Mbe whe 'uja snaih yut'aíznai?"

31 'Ink'ez yugha hodul'ehne huyúlhni, "Dadíni whe' dini? Lhe'ultsuk 'il-hozdilne lhane whe nyan do hahúnildo 'ink'ez, 'Mbe 'uja snaih yut'aíznai dini?"

32 'Et hoonts'i Sizi mbe 'uja-un yukuyú'en.

33 'Et nyoon ts'eke daja whe soo ná'uja t'éoonanzin whe butahaínya whenuljut k'et dutlut 'ink'ez Sizi yubut nachániti 'ink'ez khuni 'alha' 'unt'oh-i be ts'iyawh yulh náhoolnuk.

34 Sizi 'uyúlhni, "Stse' be 'alha' hoont'oh-i int' 'i 'et huwa soo ná'inja. Ndzi hóont'i' whe natonja' 'ink'ez ndai la be dzoh ninzut-i soo ná'ontneh."

35 'Et 'awhuz Sizi nusíyilh whe khuni na'áne Jairus ooyoh ts'e haíndilne 'uhuyúlhni, "Ntse'yaz dazsai, ndun dune hodulh'éh-un di ha 'on 'un ooghu tédínlh?"

36 'Et Sizi 'aw 'oh cha lhnízun daja hutni whe ndun lugliz whumoodih 'uyúlhni, "Aw whéniljut hoonts'i 'ants'i mba 'alha hot'e."

37 'Aw 'uyoonne dune dulhúltildulh ndunne Peter cha, James cha 'ink'ez bulhutsin John cha, 'enne za hiyulh tizdil.

38 'Et 'awet Lizwif lugliz whumoodih ooyoh ts'e hoozdil 'et Sizi whunilh'en ndulcho whe tahuditni 'ink'ez tso yahalhduk.

39 Sizi yoh danínya 'ink'ez 'ubúlhni, "Di ha sdabe tádahtni 'ink'ez ahtso? Ndun ts'oodun 'aw dálhítsal 'ants'i usti whe 'unt'oh."

40 'Et 'awet ts'iyawh highudloh. 'Inka ts'iyawh tenábunilh'a'. Ts'oodun oobá 'ink'ez ooloo bulh hubílhchoot, yugha hodul'ehne tane cha 'ink'ez ts'oodun sulhti ts'e danínya.

41 'Et ts'ekeyaz yula ílhchoot 'ink'ez 'uyúlhni, "Talitha koumi," 'et dakelh k'un'a, "Ts'ekeyaz dunadindaih nyudúsní," ni whe 'utni.

42 'Et 'ahoh dunadíja 'ink'ez nádinya. Nyoon ts'ekeyaz whunizyat 'on 'at nat be yus k'ut 'et ndúhooja whe soo ts'ih'un buba hooncha.

43 Sizi soo khuni ulhtus-i be 'ubúlhni, "'Et dune dóhni' junih, 'ink'ez hoonliyaz yuti'úlh-i oogha óoh'alh," 'ubúlhni.

## 6

### *Sizi Nazareth whut'enne ch'a hinílhjoot*

1 'Et Sizi nyo usda-un whuch'a nasja 'ink'ez dukeyoh ts'e whenája. Yugha hodul'ehne cha huyulh whenadil.

2 Nahulyis dzin 'et Lizwif bulugliz whubodulh'eh whe lhane dune 'et dilhts'íne hidánts'o whe tube buba hooncha 'ink'ez 'uhútni, "Ndun dune nts'ez de hahónla whe 'utni? Ndi whunih-i be nts'ez dehahónla whe 'utni? 'Et nts'en'a 'ut'en sdabe huwa 'ít'en te ne'út'en?"

3 Yoh 'uwuhulh'en-un, 'en iloh lakw 'unt'oh? Mary ooye 'et bulhutsinke cha James, Jose, Judas, Simon, 'ink'ez bulhtuske cha iloh nja huwhut'i?' 'Et 'inka hits'u disnih.

4 'Et Sizi 'ubúlhni, "Yak'usda be nus hoo'en-un yalhduk te ndulcho whe hidílhni, 'et hoonts'i ookeyoh whut'enne, soo didutch'oh oonadneke 'ink'ez ooyoh whut'ine cha, 'enne za lhuhidílhni!'"

5 'Et huwa nyo 'et Sizi 'aw huwa 'ít'en te ne'óot'en aít'oh, 'et hoonts'i whulohne ndudáne, 'enne za buk'udílhni whe soo ná'bulh'ih.

6 'Et ndunne 'aw be 'alha' hoont'oh-i lhahuyí'ih, 'et Sizi ooba hooncha. 'Ink'ez whunat keyoh 'oh nuya 'ink'ez dune hubodulh'eh.

*Yugha hodul'ehne whunizyane 'on 'at nane, 'enne Sizi whébalh'a'*

7 'Et 'awet nyoonne whunizyane 'on 'at nane, "Anih," hubudáni\* 'ink'ez nane hinli whe lhelhts'un whebalh'a'. 'Ink'ez hiye úlhtus-i bugha nín'ai ntsi-i nudúdeh-i dune yudúts'ine buts'a hanáhinooyoot ha.

8 'Ink'ez khuni ulhtus-i butl'adán'ai, "Tih'us ts'e hoonli te toohla' junih! T'alh-i cha, 'ézdla-i cha, k'us sooneya te bulh ts'údoh'oo junih! Tuz 'i za dutóohtan.

9 Be kets'alh'a-i 'ink'ez dzoot'an 'ilhiz be súhke-i, 'i za be 'óohneh."

10 'Et 'udun cha 'ubúlhni, "Keyoh nah'az de dune duyoh danoh honilhti de, 'et yoh 'et 'oohke' 'uts'un keyoh ts'e tíh'us whuts'un.

11 'Et keyoh nenáh'az-un dune nohts'u hódilh'oh de k'us lhunohodústs'o de huwu nátóoht'as 'ink'ez whulez ch'a nohke naóohghat. 'Et la dahúja-un t'ehonoozeh. Ts'ih'un nohdúsní Sodom 'ink'ez Gomorrah whut'enne sdabe hintsi'. 'Udék'ez dzin de huyé dzoh nutízut-i ba nús 'et mbe la lhunohdústs'one dzoh notízut."

12 'Et 'awet whehándil 'ink'ez dune Yak'usda ooghuni be bubulh yáhulhduk, "Nohlubeshi ch'a lht'ananoohdilh," hubuhútni.

13 Lhane ntsi-i nudúdeh-i ooghú dilhts'ine bughu whenábonanyoot 'ink'ez dune lhane undudáne khe be 'ubuhulho whe soo ná'bulhalh'en.

*John dune too be 'ulh'en-un, 'en hizilghí*

14 'Et 'awet bulerwe Herod huyúlhni-un yulh údants'o Sizi dulcho whe búlh nukhuni uzut. 'Ink'ez 'utni, "John dune too be 'ulh'en-un 'ut'en. Dazsai inle' 'ink'ez nahít'na' 'et huwa Yak'usda ye ulhtus-i ooghi diz'ai whe 'út'en whunul'en te ne'út'en."

15 'Et whulohne cha, "Elijah 'ut'en," hutni. 'Et 'uyoonne cha 'uhutni, "Uda' hukw'un'a Yak'usda be nus hoo'en-un 'ut'en," hutni.

16 'Et bulerwe Herod whulh 'údants'o whe 'et 'utni, "John dune too be 'ulh'en-un 'ut'en. Ootsi sba k'uhiníntsel inle' da', 'et hoonts'i la nakhít'na,'" ni.

17 Herod dich'oh John dune too be 'ulh'en-un 'ahuyoo'alh huwá bulh'a inle'. Há yulghel 'ink'ez 'ahuyán'ai. Ndun ts'eke Herodias huyúlhni-un, 'en yughusda. 'En gha' yinla inle'. Dulhutsin Phillip oo'at lhch'a nijoot bulh hoonts'i yughusda.

18 John dune too be 'ulh'en-un Herod lkh'uzte yulhni, "Yak'usda ooghuni k'uninyis whe 'int'oh nyulhutsin oo'at zih silda."

19 'Et huwa oo'at Herodias John dune too be 'ulh'en-un yuts'u dutni 'ink'ez yuzoolhghelh hukwa' ninzun. 'Et hoonts'i duki, Herod, 'en gha 'aw yuzoolhghelh aít'oh.

20 'Et Herod 'en cha John dune too be 'ulh'en-un yé nuljut, t'oonínzun John dune too be 'ulh'en-un, ts'ih'un dune unli, 'ink'ez Yak'usda oodune' 'unt'oh. 'Et huwa yugha 'óoli yoozilhts'ai hóont'i', 'et hóonts'i yoozilhts'ai totsuk oodzi dútults'uk.

\* 6:7 'Enne whel'a'ne 'uhint'oh.

21 'Et 'ilhudzin Herodias ooghá whults'ut Herod whuzdli dzin 'et dune dízti'ne 'ink'ez lhuganne moodih cha 'ink'ez Galilee whut'enne dizti'ne tubulh ts'iyawh bughu nusúya.

22 Herodias ootse' danínya 'ink'ez buba nidai. Herod 'ink'ez ooghu nusjáne tubulh buba hoonzoo. 'Et Lerwe Herod Ndun ts'eke 'uyúlhni, "Ndai sts'o ooka' dini, 'i ngha tísdlelh," yúlhni.

23 Lhat whe yuts'u náhizya whe 'uyúhni, "Ndai sts'o ooka' dini-i ngha tísdlelh ndai lerwe be usdli-i lhulcho 'i hoonts'i ngha tísdlelh," yúlhni.

24 'Inka nyoon ts'ekeyaz 'az whenája 'ink'ez duloo 'en yoodalhkut, "Di suba oots'u ka' doosni?" yúlhni, "John dune too be 'ulh'en-un ootsi," yúlhni, ooloo.

25 'Et ts'eke 'ahoh lerwe yuts'u naóosja 'ink'ez 'uyúlhni, "John dune too be 'ulh'en-un ootsi 'andit 'ahoh tssets'ai be sgha nín'aih," yúlhni.

26 'Et lerwe 'ahoh ni suli' 'et hoonts'i 'aw yuch'a tsédootni ait'oh, ooghu nusjáne bunalh yuts'u náhizya 'et huwa.

27 'Inka 'ahoh 'ilhoghun huwunli-un, 'adinlane dilhts'i ts'e wheyálah'a' John dune too be 'ulh'en-un ootsi whusaínoo'ah wheni. Huwunlí-un, 'adinlane dilhts'i ts'e whénya 'ink'ez John dune too be 'ulh'en-un yutsi k'únintsel.

28 Tssets'ai bé nan'ai 'ink'ez ts'eke yutl'ayánkai. 'On 'un ts'eke duloo tl'ayánkai.

29 'Et John dune too be 'ulh'en-un yugha hodul'ehne huyulh 'údants'o oozí hikunásdil 'ink'ez 'ahayalhti.

### *5,000ne dunene Sizi huyoo'alh-i bugha nínla*

30 'Et 'awet whel'a'ne whusanáhidil 'ink'ez Sizi te 'ilhuhozdil 'et hidáni' nts'oh te né'hust'en 'ink'ez ndet za dune whubuhodalh'e'.

31 Lhane dune whusanáhidil 'ink'ez whenáhudilh 'et huwa Sizi 'ink'ez yugha hodul'ehne tubulh 'uhúti'ulh 'et hoonts'i búgha lhúwhulhts'it 'inka ndúbulhni, "Uts'un uztoodilh nts'e la whenich'oh úzti'elh-un, 'et la 'atsul naoolhyis."

32 'Et 'awet nus ts'i be hutizki disoh ts'e whuz nehúninki.

33 'Et hoonts'i lhane dune huban'en hutizki whe 'ink'ez 'ahoh t'ehonínzun mbe 'unt'oh 'et huwa keyoh totsuk whut'enne lhane hilwus whe Sizi 'ink'ez yugha hodul'ehne tubulh butso 'et whuz hoolhghaz.

34 'Et Sizi ts'i be hainya whe lhane 'ilhozdil 'et ubunilh'en tube bugha té'ninzun 'ants'i 'usbaiyaz ooghulhídloh-i lé'hint'oh 'inka lhat-un 'et whubuwhéoodunilh'e'.

35 'Et 'awet yoo 'ún hoozulh whe yugha hodul'ehne highu nindil 'ink'ez 'uhuyúlhni, "Awet tube yoo 'ún hoozulh 'ink'ez njan disoh cha 'uhoont'oh.

36 Nyoonne dune ts'iyawh nabalh'alh n'aho keyoh hoontsool-un, 'ink'ez khuna-i nuyéh-un whutoh 'oho t'alh-i náhoodoket huyoo'alh-i hooloh 'et huwa."

37 'Et Sizi 'ubúlhni, "Nohnich'oh hiti'ulh-i bugha nán'aih dah." 'Et huyoodulhkut, "Whuz uztidulh hukwa' ninzun 'ink'ez \$200.00 k'oh t'alh-i ts'onket 'ink'ez eh bugha 'úzti'ah?"

38 'Et hoonts'i Sizi uboodulhkut, "Lhes dáltsuk aht'i 'et whunulh'en." 'Et nahuhoon'ai whe 'et 'uhuyúlhni, "Kwulai' liba 'ink'ez nanki lho cha."

39 Sizi 'et yugha hodul'ehne 'ubúlhni, "Ts'iyawh dune lhendun nébunulhle 'ink'ez tl'oyaz k'ut hudólts'i'."

40 'Et 'awet dune nét'ahudilts'i' tl'oyaz k'ut whunizyat whunizyai 'ink'ez kwulat whúnizyai whe lhaniwh te lhuhúsguz.

41 'Et 'awet Sizi nyoo liba 'ink'ez lho bulh yílhchoot ndo yak'uz ts'e yután'en 'ink'ez, "Musi," ni whe tenadidli. 'Et lhes taidanyuz whe yugha hodul'ehne whutahayólelh ha butl'ayánla. 'Et nanki lho cha 'et dúyinla whe za butainínla.

42 Ts'iyawh 'uhan'al 'ink'ez 'uhunisdaí.

43 'Et yugha hodul'ehne whunizyat 'on 'at nanki chalhial dizbun-i lho 'ink'ez lhes bulh 'et nenínkat-i nahúyalhdzoo.

44 5,000ne dunene buts'ekoo' 'ink'ez bubuzkeh cha 'enne ndi lhes huyan'al.

### *Sizi too k'ut nuya*

45 'Ahoi Sizi yugha hodul'ehne ts'i be nábalh'a' 'ink'ez Bethsaida huwhútni keyoh whuz dutso whebalh'a' nyan tadatus ts'e whuz'ai. 'Et didut nyoonne 'ilhozdíline whenábalh'a'.

46 'Et whenáhidil whe tenadutidli ha 'awet buch'a násja 'ink'ez dzulh k'uz ts'e whénya.

47 'Awet húlhgha suli' 'et la nyoo ts'i be 'andit za taniz hikelh 'ink'ez la Sizi 'en dich'oh 'awhuz nyo yun k'ut 'unt'oh.

48 Yugha hodul'ehne ubunilh'en nilhts'i dulhyo hikelh tube hunint'i, 'aw hoot'o cha aít'oh. 'Et bundada' yutilhkaí-un, 'et Sizi too k'ut uyalh whe nus whuz bughu ninya bube nghootáyalh inle'.

49 'Et hóonts'i hitilh'en too k'ut uyalh whe, "Dune tsin 'ut'en," huninzun. Tube whéhunilhjoot 'ink'ez 'uhúldzul.

50 'Et Sizi 'ahoh bubulh yátílhduk, "Nohdzi ulhtus úlhtsi! Si 'ust'en. Whenuhjt íloh," 'ubúlhni.

51 'Et ts'i bet bughu dénya. 'Et 'awet oozts'i 'ink'ez yugha hodul'ehne tube buba hooncha.

52 Whutsoda' liba dáyinla la 'et 'aw ts'ih'un nelhúhohoo'al, 'et huwa njan lhes ghun dahóoja-un bubeni taóodolts'it aít'oh.

### *Gennesaret whut'enne undudáne Sizi soo ná'bulh'en*

53 'Et 'awet nyan bun k'ut yahúninki 'ink'ez keyoh Gennesaret huwhútni-un, 'et ts'i whehídinguz.

54 Ts'i hich'az údulh whuz za 'ahoh Sizi 'en nahuyóolhts'it.

55 'Et huwa ndulcho whe nahúlhghaz 'ink'ez nts'oh la Sizi usda huyulh 'údíts'o 'oh ndudáne hik'ustez whe 'i be hits'ú butule.

56 'Ink'ez nts'oh la Sizi nuya keyoh whuyaz k'us keyoh whuti k'us khuna-i nuyéh-un 'e'óoket-un whutoh dune 'ilhodúlh-un whuz ndudáne nébuhunle 'ink'ez Sizi híghu tédudlih, "Nyunaih 'ants'i ooban 'et ndudáne hit'aóonalh," huyúlhni. 'Et mbene la yut'aíznaine ts'iyawh soo ná'huja.

## 7

### *Sizi Lizwif butsodá'ne whubuhodalh'e'-un huwu yalhdruk*

1 'Et 'awet Phariseene 'ink'ez Moses be 'udustl'us 'uk'ununáguzne tubulh Jerusalem ts'e haíndilne Sizi higha óozdil.

2 'Et hubonilh'en whulohne Sizi yugha hodul'ehne dula tsun bulh 'uha'alh. 'Uda' Phariseene, 'enne 'et, "Me" huwhútni inle' 'inka buts'ú hahuhon'ai.

3 Phariseene 'ink'ez 'on 'awh Lizwifne ts'iyawh butsodá'ne whubuhodalh'e' whuz un'a 'uhint'oh soo ts'ih'un un'a dula tunáhugus te za 'uhá'alh.

4 'Ooket bayoh ts'e hanahudulh te la'huldoh 'et 'ants'iya 'uha'alh. Lhat-un buba hoosdzi te né'hut'en, dulubot, dude 'oosa', 'ink'ez 'uyoo huyé buta'ut'en-i cha, dilili cha, soo buba' hoont'oh k'un'a za tunáhuyugus.

<sup>5</sup> 'Et huwa Phariseene 'ink'ez Moses be 'udustl'us 'uk'ununáguzne Sizi huy-oodulh'kut, "'Et dáhoont'oh huwa ngha hodul'ehne netsodá'ne whuneodalh'e' k'un'a lhe'hust'en 'ink'ez dula tunálhuhusgus whe 'uha'alh?'"

<sup>6</sup> 'Et Sizi 'ubúlhni, "'Alha azi Isaiah nohghun nus hón'en whe 'unohúlhni, 'Dune duba 'uzoo' na'dudíl'íne,' whuz un'a nohghun 'uk'e'ánguz inle' Yak'usda 'utni, 'Ndunne dughuni be sba hodílhti', 'et hoonts'i 'aw budzi yo whe buba 'alha lhe'úst'oh.

<sup>7</sup> Sts'un téni hunilhdzun doo ka 'uhutni, ndi yun k'ut dune yugha néulh'ai-i, 'i Yak'usda ooghuni huyilh'i whe dune whubuhodulh'eh'."

<sup>8</sup> 'Et Sizi 'utni, "Yak'usda dughuni nohtl'aídan'ai, 'i 'aw lhoozúlhts'ai 'ink'ez yinka dune' whubuhodalh'e'-un, 'et za ook'úne' 'uht'en, tsets'ai, lubot, 'ink'ez 'uyoo be buta'whut'en-i tunáhgus-un, 'oh dúhoont'oh-un, 'et dune whubodulh'eh'."

<sup>9</sup> 'Et 'on 'un cha Sizi 'utni, "Tube 'uyoo ahli Yak'usda dughuni nohtl'aídan'ai ooladíhtni, 'ink'ez nohnich'oh be dune hodulh'e'-i, 'i za nulht'i whe whubodulh'eh'."

<sup>10</sup> 'Et Moses 'uk'unéyuzguz-i nja dutni, 'Mbá 'ink'ez nloo bulh hubudólhti', 'ink'ez 'Mbá la duloo k'us dubá dzoh ts'e bughu yatílhduk-un 'en daóotsa huba 'unt'oh.'

<sup>11</sup> 'Et hoonts'i hoonli duloo 'ink'ez dubá ye búla tit'el'h-i dune yut'i de 'ink'ez 'en 'Corban 'uhoont'oh,' ní de (ndi 'Corban' Lizwifne bughuni 'et dakelh k'un'a 'Yak'usda ooch'e', 'ni whe 'utni),

<sup>12</sup> 'et whe la 'aw duloo 'ink'ez dubá bulh bula oot'en whuch'a whubodulh'e whe' dahni.

<sup>13</sup> 'Et njan huwa Yak'usda ooghuni 'aw lhoozúlhts'ai 'ink'ez ook'únulhe'zaht'en. Whuz un'a dune whúbunulhtun lhat-un whe 'udun cha nohnich'oh nohk'un'a whe whuz un'a whúbunulhtun."

### *Nts'en'a la lubeshi ts'ilhchuk*

<sup>14</sup> 'Et 'ilhozdíline Sizi doo cha za, "'Anih! Soo zúlhts'ai ts'iyanne 'ink'ez noheni taóodolts'it,'" 'ubúlhni.

<sup>15</sup> "Ndaí la dune hiyilhchúk-i 'aw oogha lubeshi ólhchoot aít'oh, 'et hoonts'i ndai la dune buts'u haídults'it-i, 'i gha lubeshi hihlchuk.

<sup>16</sup> Mbe la oodzo hoonine, 'enne huyoozólhts'ai' huba' hoont'oh."

<sup>17</sup> 'Ilhozdíline butáhanája 'ink'ez yoh danánja whe yugha hodul'ehne ndi hígha hódul'eh yé yáilhduk-i hikwa huyoodulh'kut.

<sup>18</sup> 'Et 'ubulhni, "Nohni cha eh 'uyoonne k'un'a, noheni hooloh? 'Aw noheni taóodolts'it aít'oh. Ndaí la dune yu'alh-i, 'i gha lubeshi olhchoot aít'oh.

<sup>19</sup> 'Aw oodzi be lhéyuskat oobut za be yúruk 'ink'ez ooyust'e ts'ahanáyakat, 'et whuz un'a 'utsi-i neyust'e táhanakat."

<sup>20</sup> 'Et 'on 'un cha 'ubúlhni, "Ndaí la dune oodzi yo whuts'ahadúlts'it-i, 'i gha lubeshi ilhchuk.

<sup>21</sup> 'Et dune budzi yo ts'e whuz de 'aw beni lhe'ízoo' 'et huwa 'ut'en, 'uyoon dune oo'at bulh lubeshi hihlchuk, dune ts'eke bulh ninta' hut'ih, nehughan cha,

<sup>22</sup> 'uhundunut'ih cha, 'uyoonne ch'e' ha' huninzun, hoonts'i k'un'a túne' hut'en, dune nahuna'ah cha 'uhut'en, yooyá lhilohne, 'uhoolnih cha, Yak'usda ch'az yahalhdruk, 'ududílti', 'ink'ez hoonts'i tune' hut'en.

<sup>23</sup> 'I ts'iyawh ndi dune budzi yo ts'e hadúlts'it-i, 'i gha lubeshi hihlchuk."

*Ndun ts'eke ooba 'alha hoont'oh-un*

<sup>24</sup> 'Et Sizi whenája whe Tyre 'ink'ez Sidon huwhútni-un keyoh 'et whunat whuz naosja. 'Et 'ilhoghun yoh danínya 'ink'ez 'et usda 'uyoonne t'ehonózin hukwa lhe'nízun, 'et hoonts'i 'aw buch'a ntool'ih aít'oh.

<sup>25</sup> 'Ilhoghun ts'eke ooyats'e ntsi'-i nudúdeh-i ooyúdinda Sizi yulh údits'o whe yughu ninya 'ink'ez yubut nachánitno.

<sup>26</sup> Ndun ts'eke 'uts'iz de haínya 'ink'ez 'en Greekne buk'uyálhduk 'ink'ez Phonecia, Syria whuz'ai, 'et whuzdli-un 'unt'oh. 'Et Sizi yughu tédudlih whe yúlhni, "Ntsi'-i nudúdeh-i syats'e oots'u hanaíninyoot."

<sup>27</sup> 'Et hoonts'i Sizi ts'eke 'uyúlhni, "Ts'oodunne, 'enne cho bubé' ts'oolh'alh. 'Aw ts'ih'un lhe'hóot'oh ts'oodunne huya'alh-i ts'ílhchoot 'ink'ez lhike gha ts'óo'alh aít'oh."

<sup>28</sup> 'Et yúlhni, "Moodih, 'alha' dini, 'et hoonts'i whuloh te lhike 'enne hoonts'i ludab t'ah yun nakat-i ts'oodunne yughá 'oo'ulh-i huya'alh."

<sup>29</sup> 'Et Sizi ndúyulhni, "'Et ndúdinja-un huwa nyoh ts'e naíndalh ntsi'-i nudúdeh-i nyaz yuyáhanadidzut."

<sup>30</sup> 'Et duyoh ts'u whenaja 'ink'ez ooyaz lili k'ut usti ntsi'-i nudúdeh-i yuyáhanadidzut.

*Dune lhe'dústs'o 'ink'ez yal hulhduk cha 'unt'oh, 'en Sizi soo ná'yinla*

<sup>31</sup> 'Et 'awet Sizi keyoh Tyre huwhútni whunat 'ut'en inle' 'ink'ez Sidon huwhútni 'oh whuya lhuséya whe whunizyat-un bukeyoh whutulh lhuséya 'ink'ez Galilee Bun whuz oozya.

<sup>32</sup> 'Ilhoghun dune lhe'dústs'o 'ink'ez yal hulhduk cha 'unt'oh, 'en Sizi highu hinílhya 'ink'ez Sizi highu tédudlih yuk'udólni ha.

<sup>33</sup> 'Et Sizi bughe'udunyaz nénilhya whe yudzeh 'ádilga, 'úntizo, 'ink'ez dune yutsoola t'aíznaí.

<sup>34</sup> Sizi ndo yak'uz ts'e yután'en, yughudzoh 'úja whe tenadudli 'ink'ez dune yulhni, "Ephphatha!" ndi lizwif bughuni 'et "Mba dáha' doolts'it" ni whe 'utni.

<sup>35</sup> 'Et 'ahoh dune 'udits'o nasdli' 'ink'ez soo yálhduk cha nasdli'.

<sup>36</sup> "Khun te dune dóhni' junih!" 'ubúlhni. 'Awet, "Dah" 'ubúlhni, 'et hoonts'i 'on nus huwu yahalhdruk.

<sup>37</sup> 'Ink'ez mbene la ubodits'óne ts'iyawh buba hooncha, "Sóo usdla ts'iyantsuk né'whulh'en, lhe'dústs'one 'uhudits'o 'ink'ez yal hulhdúkne cha yahalhdruk ubulh'tsi," hutni.

## 8

*Sizi 4,000ne ghá' nin'ai*

<sup>1</sup> 'Aw sa' iloh hukw'elh'az doo cha za dune lhane 'ilhuhozdil 'awet ut'alh-i gak suli' whe Sizi yugha hodul'ehne, "Anih," ubudáni' 'ink'ez 'ubúlhni,

<sup>2</sup> "Ndunne dune bugha' te'nuszun. 'Awet tat dzin sulh 'úhit'en 'ink'ez huyoo'alh-i hooloh.

<sup>3</sup> 'Et duhínt'oh whe buyoh ts'e whenábis'a' de nahidulh whe la bukaootoodeh. Whulohne tube nilhdzaz de hahándil 'et huwa."

<sup>4</sup> 'Et yugha hodul'ehne huyoodulh'kut, "Ndo ho dune cha lhuhoot'ih, nts'e suba t'alh-i nats'ólelh lhe'hultsukne dune gházt'i'ah wheni."

<sup>5</sup> 'Et Sizi uboodulh'kut, "Daltsuk lhes sut'e aht'i?" 'Et huyúlhni, "Lhtak'ant'i lhes sut'e."



6 'Et 'ilhozdílné yun hudółts'i' huwa bulh'a. 'Et lhtak'ant'i lhes yíłhchoot 'ink'ez, "Musi," ni whe tenadidli. Tánidizyuz 'ink'ez yugha hodul'ehne butainílna whutahayóleł ha, 'ink'ez dilhts'íne butahinílna.

7 'Et lho cha ntsool-iyaz hut'i, 'i cha Sizi "Musi," ni whe yuba tenadidli 'ink'ez 'i cha yugha hodul'ehne, "Whutahayóleł," 'ubulhni.

8 Ts'iyanne 'ahan'al 'ink'ez 'uhunisai. 'Et yugha hodul'ehne lhtak'ant'i chalhyał dizbun 'i highá 'ozal-i nahuyalhdzoo.

9 4,000ne at'en 'enne 'ahan'al. 'Et 'awet Sizi whe nábalh'a'.

10 'Et 'ahoh yugha hodul'ehne bulh ts'i be náhidil 'ink'ez keyoh Dalmanutha huwhútni-un whuz yanáhuski.

### *Phariseene huwa 'ít'en-un duba' hooleh hukwa huyoodulhkut*

11 'Et whulohne Phariseene Sizi highu nindil 'ink'ez hidulhyoh whe' dunini' huyóolhdzih whe huyóodúlhkut, "Huwa 'ít'en-un 'uhóonleł 'alha Yak'usda ntl'ahón'ai de huwa t'éts'onoozeh ha."

12 Sizi tube hibadzo 'údija 'ink'ez 'ubúlhni, "Di ha 'andit dunene huwa 'ít'en-un hukwa' hutni? 'Alha nohdúsní 'aw ndi yun k'ut whudune'ne ndúhoont'oh-un huhoo'en ait'oh."

13 'Et 'ahoh buch'a nasja ts'i be nája 'ink'ez bun k'ut nyan whenáki.

### *Huwohle' Phariseene 'ink'ez Herod bulhes untuldoh-i, 'i ch'a 'ubúlhni*

14 Yugha hodul'ehne lhes nahodilhnoh 'ilho liba za ts'i be húlh'ai.

15 'Et Sizi bugha utni whe, "Huwohle', 'ahoolhyiz khuhdli Phariseene 'ink'ez Herod bulhes untuldoh-i ch'a," 'ubúlhni.

16 'Et 'awet lhulh yáwhehunilhduk, "'Et 'aw lhes ulhts'ít'ih 'inka 'utni."

17 'Et Sizi whe daja hutni la 'uda' t'eeonínzun 'et 'úbulhni, "'Et di ha lhes lháht'ih-un 'et huwa yalhduk, 'awhuz t'eeonuzúhzun k'us noheni t'alhodúlhts'it nohdzi 'awhuz eh duts'un whe' dahni?"

18 Nohna hoonli be lhóził'en, nohdzo hóonli be lhe'duzahts'o. 'Aw eh whunalhuzulhni?

19 5,000ne dune kwulai' liba butaidísyuz whe dalsuk chalhyał dizbun 'i dune yughá'oz'al-i nalhdzoo ínle'?" "Whunizyai 'on 'at nanki," huyúlhni.

20 "'Ink'ez lhtak'ant'i liba 4,000ne dune butaidísyuz, dalsuk chalhyał dizbun-i highá 'oz'al-i nalhdzoo ínle'?" 'ubúlhni. "Lhtak'ant'i," huyúlhni.

21 'Ink'ez 'ubúlhni, "'Et 'awhuz eh noheni talhodúlhts'it'?"

### *Bethsaida 'et Sizi dune hoos'én-un hoo'en nayulhtsi*

22 'Et Sizi yugha hodul'ehne bulh keyoh Bethsaida huwhútni-un whuz hoozdil whe 'ilhoghun dune hoos'én-un, 'en Sizi highu hiníłhya 'ink'ez highu tedudlih yuk'udółni ha.

23 Sizi hoos'én-un yula ilhchoot 'ink'ez keyoh whuch'a yúlhya whe lhch'az dune yuna k'énzó 'ink'ez yuna k'údilhni whe 'uyúlhni, "Hadíł hon'en eh?" yúlhni.

24 Dune yután'en 'ink'ez 'utni, "A, dune nus'en 'et hoonts'i 'aw ts'ih'un lhozis'en, dune 'ants'i duchun lé'hint'oh 'oh nuhúdilh."

25 Sizi doo cha za lhch'az dune yuna k'údalni 'ink'ez 'on nus yutís'en. 'Et 'ahoh hoo'en nasdli 'ink'ez ts'iyaitsuk ooba hooltsai.

26 'Et Sizi yuyoh ts'e whenáyalh'a' 'ink'ez khuni ulhtus-i be 'uyúlhni, "Bethsaida ts'e nátonja' junih 'ink'ez Bethsaida whut'enne budóni' junih!"

### *Sizi mbe unli 'et Peter huwu yalhduk*

27 'Ink'ez yugha hodul'ehne bulh Caesarea Philippi 'et keyoh whuz whehándil. Hidulh whe uboodulhkut, "N'awh dune sghu yahulhduk te, mbe usdli hutni?"

28 'Et yugha hodul'ehne huyúlhni, "Whulohne 'uhutni John dune too be' 'ulh'en-un inle'-un 'int'oh. 'Et 'uyoonne 'uhutni Elijah 'en Yak'usda whusaítílh'alh-un 'int'oh. 'Et 'uyoonne cha Yak'usda be nus hóo'enne 'ilhoghun 'int'oh hutni."

29 'Ink'ez yugha hodul'ehne 'ubúlhni, "Nohni do' mbe 'ust'oh dahni?" 'Et Peter 'utni, "Nyun Christ\* 'int'oh."

30 Sizi khuni ulhtus 'i be 'ubúlhni, "Si sghun dune dóhni' junih!"

*Dzoh nutizut-un, 'ink'ez datítsah-un, 'et Sizi huwu yalhduk*

31 'Et 'awet Sizi yugha hodul'ehne whubodulh'eh 'ink'ez 'ubúlhni, "Yinka dune ye' tube cho dzoh nuhítílhdzut. 'Et netso whudílhdzúlhne, lubret moodíhne 'ink'ez Moses be 'udustl'us 'uk'ununáguzne cha ts'iyawh 'aw huy-oozólh'ts'ai aít'oh. Hituzílhghel'h 'ink'ez whulh tát dzin dunádutádah."

32 Soo ts'et cho ubúlhni, 'et huwa Peter Sizi 'udun nénílh'ti 'ink'ez hukwa' yudáni'.

33 Sizi yugha hodul'ehne but's'un nálh'a whe Sizi Peter hukwa' yúlhni whe yúlhni, "Satan st'a nenín'yah! Ndi yun k'ut hoonli za ghu nuní ninuzut. 'Aw Yak'usda ooch'e' ooghu nuní lhnuzinzut."

34 'Et Sizi 'ílhodzílne 'ink'ez yugha hodul'ehne tubulh, "Anih," ubúlhni, "Mbene la sulh tídulh hukwa' nínzunne dich'oh duba moodih nahoodle' aít'oh. Dutulalghus hídutootan 'ink'ez suntooya'.

35 'Et mbene la si sanus duk'un'a za hukwa' nínzunne, 'enne 'aw 'ílhiz wheni hukhoona' aít'oh. 'Et hoont'si mbene la si sba, 'ink'ez khuni unzoo-i gha 'et huwa daház'sai de, 'enne 'ílhiz wheni hukhutinalh.

36 'Et dune yinka ndulcho 'uhoolhdzun 'ink'ez daz'sai de, ndet suba whuch'a hólhdeh? Soo gak!

37 Dats'úzsai de, 'aw hoonli be hoont'si 'ílhiz ts'otinalh-un nats'uhoket aít'oh.

38 'Et 'andit yuk'edinzutne lhane dune ts'eke bulh ninta' hut'ih, 'ink'ez Yak'usda nahodílhno whe' hint'oh. 'Et huwa 'ílhoghun dune si 'ink'ez sghuni bulh hukwaya unli de, yinka dune ye', 'en yukaya oole' la 'oh de lizas bulh ooBá oots'u hayánduz-i toh whusanája de."

## 9

1 'Et 'on 'un cha ndutni, "Njan whunaoohlhni, ndet la ts'iyanne Yak'usda ye últus-i be hik'úne' 'ut'en-i whusáwhutílt's'ulh, whulohne dune njan dílh'ts'ine hoti'elh dahútsa whutso."

*Sizi 'uts'un un'a be hóodílt'sai*

2 Lhk'utat dzin inle' whe 'et Sizi, Peter, James 'ink'ez John dulh húbutílh'dil ndo dzulh k'uz dulh ubílya. 'Et hínílh'en whe 'uts'un un'a be hóodílt'sai.

3 'Ink'ez oonaih be hóodílt'sai ulhyul k'et soo yus 'et nduja 'uk'enus ndi yun k'ut soo tunasguz-i ba nus ulhyul sulí'.

4 Nyoonne tane yugha hodul'ehne khunsul Elijah 'ink'ez Moses bulh Sizi híhiz usyin 'ink'ez huyulh yálhduk whe hubotílh'en.

\* 8:29 Ndi 'oozi' "Yak'usda nets'ítílh'a'-un" ni whe 'utni.

5 'Aho Peter Sizi bulh yátilhduk, "Nehodulh'eh-un hoonzoo whe' hoont'oh njan uzdilhts'i. Ta nimbali nohba nets'ooelch, 'ilho nyun mba, 'ilho Moses ba, 'ink'ez 'ilho Elijah ba."

6 Peter ndi khuni be yalhduk whe daja dutinelh 'aw t'éwhunúszun tane hult'oh bugha 'únjaz k'et 'et huwa 'utni.

7 Khunsul kw'us buk'inde 'ink'ez ndo kw'us toh ts'e yaztilhduk, "Ndun sich'oh sYe' 'unt'oh, tube ook'esi'. 'En soo oozúlhts'ai," whutni.

8 'Et 'ahoh dunat nuhúyuz'en 'aw 'uyoonne lhuhi'elh, Sizi 'en za bubulh 'út'en.

9 'Et 'awet dzulh k'ut nyo nanáhidil whe Sizi khuni ulhtus-i be 'ubúlhni, "Khun te 'uyoonne dóhni' junih! Ndet la hoo'hén-un, yinka dune ye' dunadutádalh 'et whuts'un."

10 Hik'un'a 'uja 'ink'ez dich'oh 'alhgoh howu yawwehúnilhduk, "Ndi khuni 'Dazsai 'ink'ez dunadutádalh? di ni whe 'utni?" hutni.

11 'Ink'ez Sizi huyoodulhduk, "Et Moses be 'udustl'us 'uk'ununáguzne di ha ubodulh'eh Elijah 'en 'udechoo whusatíyah?"

12 Sizi 'et 'ubúlhni, "Elijah 'alha 'udechoo whusaínya ts'iyantsuk lhaóodutileh ha. 'Et hoonts'i di ha Yak'usda ooghuni 'uk'unusgúz-i 'et ndutni 'Yinka dune ye' dzoh nutízut 'ink'ez hits'o dilh'oh tileh?"

13 'Et hoonts'i nohdúzni Elijah 'uda' whusaínya 'ink'ez dune nts'en'a hukwa' huninzun te, 'oh te né'huyulh'en. 'Et Yak'usda be 'udustl'us k'ut whuz un'a 'uk'unúwhusguz íne!."

*Ts'oodun ntsi'-i nudúdeh-i ooyudinda-un, 'en Sizi soo ná'yinla*

14 'Et la Sizi 'onghunne yugha hodul'ehne butananja whe, dune bughu 'ilhozdil 'et ubunilh'en 'ink'ez whulohne Moses be 'udustl'us 'uk'ununáguzne yugha hodul'ehne budulhyo 'uhutni.

15 'Ilhozdíne Sizi hitilh'en ibulh buba hooncha whe hidudílghaz 'ink'ez, "Hadih," huyúlhni.

16 'Et Sizi Moses be 'udustl'us 'uk'ununáguzne uboodulhduk, "Di ghun budulhyoh 'udahni?" 'ubúlhni.

17 'Ilhozdíne 'ilhoghun dune butahaínya, "Nehodulh'eh-un sye' ntsi'-i nudúdeh-i ooyudínda 'et huwa 'aw yaoolhduk aít'oh 'inka nts'o whúsasya.

18 'Et ndet la ndi ntsi'-i ooyédinda 'i gha ooba hoolhtus de, 'et yun nadúldus, huwus oozá hanúldoh, dughoo lhúduk'us, 'ink'ez lhts'edunukw. Ngha hodul'ehne ntsi'-i nudúdeh-i hiyáhanahinooyoot, ubudúzni 'et hoonts'i 'aw 'uhuy-ooleh aít'oh."

19 'Ink'ez Sizi 'uyúlhni, "Aw nohni dune nohba 'alha' hot'e' aít'oh! Dáwhuldzoh nohzih tisdalh? Dawhuldzoh nohtoh tisdalh sudutáhts'o whuts'un 'ink'ez nohba 'alha' tist'elh? Ts'oodun ndiz sts'u túlhtih!" 'ubúlhni.

20 'Inka highu hinílhti. 'Et ndi ntsi'-i nudúdeh-i yuyudínda-un Sizi yutilh'en ibulh, 'ahoh ts'oodun ookaootízut 'ink'ez nadílduz, 'ink'ez huwus oozá hanul-doh whe núkallhoh.

21 'Et Sizi oobá yoodulhduk, "Dáwhuldzoh ndun ts'oodun 'et dunt'oh?" yúlhni. "Ntsool da' whuts'un," ní oobá.

22 "Lhat whe ts'oodun yuzoolhghelh hukwa' yulh'en. Too be cha yuzool-ghelh hukwa' yulh'en 'ink'ez tsídunoh cha' yulh'en. Soo' tanelh de, negha té'ninzech 'ink'ez nela 'ineh!"

23 "A," yúlhni, "Soo 'úlcho 'i be be 'alha' hoont'oh int'i de, mbene la be 'alha' hoont'oh ut'íne ts'iyantsuk ne'hutit'en-un buba huwa lhótilhna!"

<sup>24</sup> 'Aho oobá oonatsulto' hoonli whe 'utni, "SMoodihti be 'alha' hoont'oh 'ust'i, 'et hoonts'i 'aw soo lhé'uztus. 'Et huwa sla 'ineh, 'on nus 'ultus-i be 'alha' hoont'oh-i oost'e' ha, 'et hukwa' nuszun."

<sup>25</sup> 'Ezi whutilh'en 'ilhozdíline 'awet bughá holhghaz whe 'ahoh khuni ulhtus-i be ntsi'-i nudúdeh-i hukwa' yudáni, "Ntsi'-i nudúdeh-i lhe'hudúst's'o 'ink'ez yalhuhulhduk 'ilh'í-un, ndun ts'oodun ooyáhanaindaih nyudúzni, 'ink'ez doo cha 'on 'at ooyunádondzit junih!" yúlhni.

<sup>26</sup> 'Et ntsi'-i nudúdeh-i ndun ts'oodun yukaootilhdzut, 'ink'ez tube cho yudalhtlut, 'alhdzul, 'ink'ez yuyáhanaja. Nyoon ts'oodun 'ants'i dazsai 'et ndúja. 'Et huwa lhane, "Dazsai whe 'unt'oh," hutni.

<sup>27</sup> 'Et hoonts'i Sizi ts'oodun yula ílhchoot 'ink'ez ndo 'úyinla. 'Et ts'oodun dich'oh dunadija.

<sup>28</sup> 'Et hukw'elh'az Sizi yoh danínya whe yugha hodul'ehne whu'iz huyoodulhkut, "'Et dáhoont'oh huwa wheni ntsi'-i nudúdeh-i 'aw oots'u hanáts'inooyoot ait'oh?"

<sup>29</sup> 'Et Sizi 'ubúlhni, "Mbene la tenadudline, 'ink'ez soo hóonihne, 'aw 'enne za ntsi'-i nudúdeh-i ndi k'un'a 'unt'oh-i nahuyuntuyukw."

*Sizi datitsah-un doo cha huwu yalhduk*

<sup>30</sup> 'Et 'awet keyoh whuch'a nahusdil 'ink'ez 'et keyoh Galilee huwhútni-un 'oh whuya lhunáhusdil. Sizi nts'e la whénya ts'e dune t'éoonózin hukwa lhe'nízun,

<sup>31</sup> yugha hodul'ehne hubodulh'eh 'et huwa. 'Ink'ez 'ubúlhni, "Yinka dune ye, 'uyoonne dune t'ahitilhtelh 'ink'ez hituzilghel. Hizilghighi hukw'elh'az whulh tat dzin 'et dunadutádalh."

<sup>32</sup> 'Aw daja ni whe 'utni t'ehonuszun 'ink'ez huyé nuljut 'aw huyoodulhkut ait'oh.

*Mbe suba netoh 'uk'enus dune uncha-un unli*

<sup>33</sup> 'Et keyoh Capernaum huwhútni ts'e whuz nahóosdil. Yoh danáhandil whe 'et Sizi yugha hodul'ehne uboodulhkut, "Ndanit ti ts'idulh whe, di za ghu yalhduk whe dahni?"

<sup>34</sup> 'Ti 'et lhdulhyo 'uhutni, "Mbe suba netoh 'uk'enus dune uncha-un unli?" Daja hutni-un hukwayá hinli 'et huwa t'ehudusni.

<sup>35</sup> Sizi nátl'adida' ndunne whunizyane 'on 'at nane yugha hodul'ehne, "'Anih," 'ubudáni' 'ink'ez 'ubúlhni, "Mbene la 'uk'enus dune uncha-un tileh hukwa' ninzun de, 'en 'udek'oh oole' huba' hoont'oh, 'ink'ez ts'iyanne natné'tit'en."

<sup>36</sup> 'Et Sizi 'ilhoghun ts'oodunyaz yílhchoot 'ink'ez bubut nénilhya 'ink'ez yunasúni whe 'ubúlhni,

<sup>37</sup> "Mbe la si sgha ndun ts'oodun dult'óh-un danílhti de, si dasúnilhti 'et za hoont'oh, 'ink'ez mbe la dasúnilhti-un, si za iloh dasútalhtelh. Mbe la sutílh'a'-un, 'en cha dahinilhti whe' hoont'oh."

*Sizi 'ubúlhni, "Mbe la nech'az úlhdiitni 'en neba 'unt'oh."*

<sup>38</sup> 'Et John 'uyúlhni, "Nehodulh'eh-un, 'ilhoghun dune nyoozi' be ntsi'-i nudúdeh-i dune but's'u hanaídulhdoh, 'en uznilh'en. "Etsul ooneh ts'utni, 'aw nebulh lhe'ust'en 'et huwa."

<sup>39</sup> Sizi 'ubúlhni, "'Aw whuch'a nahyoot iloh, mbe la sooz'i' gha huwa 'ít'en 'uwuhulh'en-un, 'en 'aw hukw'elh'az de dzoh k'un'a sghu yaoolhduk ait'oh.

<sup>40</sup> Mbene la nech'az úlhdiitine, 'enne wheni nets'ó ditni whe' hint'oh."

<sup>41</sup> 'Ink'ez 'utni, "Njan whunalhnih, nohni Christ ooch'e'ne ahli huwa dune too hoonts'i nohgha nílhdo de, 'enne Yak'usda buba k'elha whutilhtselh."

*Sizi dune tank'us nílht'ine bughu yalhduk*

42 “Et la 'ilhoghun ts'oodun ooba 'alha' ust'oh de, 'ink'ez 'ilhoghun dune lubeshi be sch'a itálhtelh de, ndun dune ts'oodun tank'us un'a wheyúntilhtun 'et whutso huyúlh tatse oohl'is 'on nus soo hoont'oh.

43 'Et nla 'i gha lubeshi inla de, nla k'unint'as! 'Et nla k'uz za int'i whe yak'uz whénya de whuz 'ilhiz hutanalh, 'et 'uk'enus mba hootázoo'. 'Et lhch'az nla bulh kwuncho yo ts'e whénya de 'uk'enus mba hootátsi', whuz kwun nalhnusne whe 'unt'oh.

44 Whuz 'ilhiz wheni dune dzoh notizut 'ink'ez buyust'e 'usgo yuti'ulh, 'et whuz 'usgo 'aw yalhitásdla 'ink'ez kwun nalhnusnoh.

45 'Et nke 'i gha lubeshi inla de, nke k'unint'as! 'Et nke k'uz za int'i whe yak'uz whénya de whuz 'ilhiz khutanalh, 'uk'enus mba hootázoo'. 'Et lhch'az nke bulh kwuncho yo ts'e whénya de 'uk'enus mba hootátsi', whuz kwun nalhnusne whe 'unt'oh.

46 'Et 'ilhiz wheni dune dzoh notizut 'ink'ez buyust'e 'usgo yuti'ulh 'et whuz 'usgo 'aw yalhitásdla 'ink'ez kwun nalhnusnoh.

47 'Et nyuna 'i gha lubeshi inla de, hanín'aih! 'Et nyuna k'uz za int'i whe Yak'usda ook'úne' whut'en-un whénya de, 'et 'uk'enus mba hootázoo'. 'Et lhch'az nyuna bulh kwuncho yo ts'e whényuhano de, 'uk'enus mba hootátsi', whuz kwun nalhnusnoh whe 'unt'oh.

48 'Et 'ilhiz wheni dune dzoh notizut 'ink'ez buyust'e 'usgo yuti'ulh 'et whuz 'usgo 'aw yalhitásdla 'ink'ez kwun nalhnusnoh.

49 Lizwifne Yak'usda ts'un khuna-i hudílhk'un whe 'udechoo lisel hik'unúdzih. 'Et whuz un'a ts'iyanne dzoh nutizut whe' hoont'oh.

50 Lisel unzoo whe 'unt'oh, 'et hooontsi' lisel oonalhuwhúlhni 'ulhieh te, nts'en'a doo cha lisel oonawhúlhni uztíhtselh? Whuz un'a nohdzi ootsi' junih 'ink'ez nyulh dune ts'un nohdzi dóghel.”

## 10

*Dune lhghu díhts'íne lhch'á nahusdilh 'et huwun Sizi hubodulh'eh*

1 'Et Sizi whuch'a nasja 'ink'ez Judea 'oho nenínya 'et 'ukoh Jordan huwhútni-un, 'et yanínya. 'Et lhane dune yugha óozdil. 'Et whutso da' datni la 'ahoolhyiz whuz un'a doo cha za hubodulh'eh.

2 'Et whulohne Phariseene highu nindil 'ink'ez huyóolhdzih whe huy-oodulhkut, “Nedíni dune, 'enne eh bughá whunt'ai du'at lahudootnih ha?”

3 'Et Sizi 'utni, “Daja ni whe Moses khuni noht'áídan'ai inle'-i?”

4 'Et 'uhuyúlhni, “Moses bugha óonin'ai dune 'udustl'us 'uk'unéyuzguz-i, 'i be du'at duch'a nayólhelh.”

5 'Et Sizi 'ubúlhni, “Stabe nohdzih duts'un 'et huwa ndi khuni Moses nohba 'uk'eyánguz.

6 'Et hooontsi' udechoo Yak'usda ts'iyaitsuk inla whe dune cha 'ink'ez ts'eke cha inla.

7 'Et la njan huwa dune dubá 'ink'ez duloo bulh buch'a óoya', 'ink'ez du'at 'en za zih ooda'.

8 'Et la nuhult'oh 'ilho hutileh, 'et 'on 'un whe nane lhuhíloh.

9 Mbe la Yak'usda lhghá buninlane, 'enne 'aw dune lhch'a nabohólelh huba lhe'hóot'oh.”

10 'Et yoh danáhandil whe yugha hodul'ehne Sizi njan dáhoont'oh la 'et hukwa huyoodulhkut.

11 'Et 'ubúlhni, "Dune mbe la du'at 'úntizno 'ink'ez 'uyoon ts'eke ghu nasda de, 'en 'uyoon ts'eke bulh ninta' tit'elh whe 'unt'oh.

12 'Et whuz un'a za ts'eke duki 'úntizno 'ink'ez 'uyoon dune ghu nasda de, 'en cha 'uyoon dune ninta' tit'elh."

*Sizi ts'oodunne buk'udílhni 'ink'ez buba tenadudli*

13 Whulohne dune ts'oodunne Sizi ts'un ubúhoozdla buk'udólni ha, 'et yugha hodul'ehne nyoonne ts'oodunne whusaínlane hukwa' bodáni'.

14 'Et Sizi whunalh'en whe hunílch'e 'ink'ez yugha hodul'ehne 'ubúlhni, "Whute ts'oodunne sts'ó toodilh. Khun te dah budóhni' junih. Mbene la Yak'usda whe lerwe unli-un whuz dilhts'ine, 'enne ndunne ts'oodunneyaz ubunduhúlt'oh whe' hint'oh.

15 Soo ts'ih'un 'alha' nohdúsní, ndet la Yak'usda whulerwe unli ts'e, mbene la Yak'usda bulerwe unli-un 'aw ts'oodunneyaz k'un'a lhuhuhóolhchulh de, ndunne 'aw whuz dahóoya' ait'oh."

16 'Et ts'oodunne ts'iyawh bunasuni 'ink'ez 'ilhone hinli whe buk'udální 'ink'ez buba tenadidli.

*Dune hoonzoo' 'unt'oh-un*

17 'Et Sizi doo cha za natisja whe dune yududílhgai 'ink'ez yubut dugwutsi be nenínya 'ink'ez yoodalhkut, "Dune hodulh'eh-un unzoo-un, nts'en'a dast'en whe 'ilhez khutisnalh-un whuch'a ootásdoh?"

18 'Et Sizi yúlhni, "Di ha sudíni, unzóo-un sudíni? 'Aw 'ilhoghun unzoo-un hooloh. Yak'usda 'aw' en za unzoo whe 'unt'oh.

19 Ndi khuni Yak'usda nohtl'aídan'ai-i 'et 'eninzun: nezolhghelh junih, dune k'us ts'eke bulh ninta' 'ont'en junih, 'undunont'ih junih, honts'it junih, 'e'holhts'it junih, 'ink'ez mbá cha nloo cha hubudólhti'."

20 'Et dune 'utni, "Nehodulh'eh-un ndet la chilh usdli da' whuts'un, ndi khuni ts'iyawh ook'úne' zust'en."

21 'Et Sizi soo yuk'entsi' whe yunalh'en 'ink'ez 'uyúlhni, "'Ilhoghun za whuyit 'int'oh, inyalh 'ink'ez ndai la int'i-i ts'iyawh be 'óonket 'ink'ez sooneya tel'enne gha nindzaih, tulalhgus ilhchoot 'ink'ez 'anih, se' 'ut'en k'oh tune' ónt'en ha sunanyalh. 'Et de ndo yak'uz hoonzoo-un, 'et whuch'a ootálhdoh."

22 'Et ndun dune ndi khuni whudánts'o whe ni sulí, 'ink'ez ts'odi unli whe yughu natisja tube hoonzoo' 'unt'oh 'et huwa.

23 Sizi yugha hodul'ehne bunilh'en 'ink'ez 'ubulhni, "Dáhoont'oh la huwa whúlna' whe ndunne hoonzoo' 'unt'ohne, 'enne Yak'usda whe lerwe unli-un, 'et dahútidulh."

24 'Et yugha hodul'ehne ndi khuni hudánts'o whe buba hooncha. 'Et Sizi whuz hiyilh whe ndutni, "Suzkehke dahoont'oh la huwa whúlna' whe 'enne duzooneya hit'az 'unt'ohne Yak'usda whe lerwe unli-un, 'et dahútidulh.

25 Dant'oh la khuna-i cho, camel huyúlhni-i, 'aw 'ughabátsulh 'aw yukaóolget ait'oh. 'Et whuz un'a dune hoonzoo' 'unt'oh-un, 'on nus ooba huwa whúlna Yak'usda whe lerwe unli-un datíyalh huba."

26 'Et yugha hodul'ehne tube buba hooncha 'ink'ez lhoohoodulkut, "Mbe suba doojih?"

27 'Et Sizi ubunalh'en 'ink'ez 'ubúlhni, "Njan 'et dune ba 'uhóneh aít'oh, 'et hoots'i Yak'usda ba ts'iyantsuk huwa lhúhoonlna' whe' hoont'oh."

28 'Et Peter yatílhduk, "Soo cho whunilh'en, ts'iyaitsuk oolazditni 'ink'ez nyuts'un tizdil."

29 'Et Sizi 'ubúlhni, "A, ts'ih'un nohdúsní, mbe la duyoh huwu tizya-un 'ink'ez dulhutsinke, k'us dulhtuske, duloo, dubá, du'at, duzkehke, k'us duyun

k'ut te, si sgha 'ink'ez ndi khuni unzoo-i k'uz ts'iyantsuk whuladitni de, 'ink'ez suntizya de, nus de 'on nus

<sup>30</sup> Ihai únli whe ootl'anaitikulh: yoh 'ink'ez bulhutsinke, bulhtuske, ooloo, buzkehke, 'ink'ez ooyun k'ut cha 'ink'ez dune huye túzilalh cha 'et nus de 'ilhiz hutinalh.

<sup>31</sup> 'Et hoonts'i lhane 'udechoo 'unt'ohne 'udek'ez hutileh, 'ink'ez lhane mbene la 'udek'ez unline, 'enne 'udechoo hutileh."

*Sizi datitsah-un whulh tat-un huwu yatilhduk*

<sup>32</sup> 'Et 'awet Jerusalem ts'u ti hidulh Sizi 'en yugha hodul'ehne butso uyalh whe 'enne bugha 'únjaz, 'ink'ez hidulh whe hunílhjoot. 'Et doo cha Sizi yugha hodul'ehne whunizyane 'on 'at nane 'udun nébuninla 'ink'ez nus de bulh daóotanelh-un, 'et huwun bubulh yálhduk.

<sup>33</sup> "Soo zúlhts'ai, Jerusalem ts'uztidulh 'ink'ez yinka dune ye', 'en Lizwif lubret moodihne 'ink'ez Moses be 'udustl'us 'uk'ununáguzne, 'enne butl'aihítihlhelh. 'Et datítsa wheni hiba nahutiyeh 'ink'ez ndunne 'udun yun k'ut whut'enne, 'enne butl'aihítihlhelh.

<sup>34</sup> 'Et 'enne highu tidloh, highu dútazoh, huyootálhtsus 'ink'ez hituzilghelh. 'Et tat dzin inle' de, dunadutádalh," ubúlhni.

*James 'ink'ez John bulh Sizi huyoodulhkut*

<sup>35</sup> 'Et James 'ink'ez John bulh Zebedee ooye'ke Sizi highu nin'az 'ink'ez huyoodulhkut, "Nehodul'éh-un ndai nts'o ookwa' ts'utni-i, 'et neba whutanlelh hukwa' uzninzun."

<sup>36</sup> Sizi uboodulhkut, "Ndet nohba 'uwhutisdlelh hukwa' nahzun?"

<sup>37</sup> 'Et 'uhutni, "Ndet la yak'uz 'uk'enus dínti' ts'e sinda de, nzih tákelh 'et hukwa' nítzun, 'ilhoghun 'en nailhni ts'e 'ink'ez 'ilhoghun 'en 'intl'us ts'e 'unt'oh."

<sup>38</sup> 'Et Sizi 'ubúlhni, "Ndet sts'u hukwa' dahni 'aw t'éoonuzúhzun k'us ndi lubot be tísnelh-i soo tilah oohnai' 'ink'ez nts'en'a la too bé' uzya soo tilah whuz un'a too be' óolhneh?"\*

<sup>39</sup> "Soo la 'uts'ooneh," huyúlhni. 'Et Sizi 'ubúlhni, "Ndai la lubot be tísnelh-i nohni cha tíhtnelh whe' 'unt'oh. 'Ink'ez too bé' uzya whuz un'a nohni cha too bé' tilhnelh.

<sup>40</sup> 'Et hoonts'i mbe la nailhni ts'e sghu tidalh, 'ink'ez 'intl'us ts'e sghu tidalh, 'aw si huwá hos'alh ait'oh, mbene la buba lhawhúdulyane, 'enne buba' hoont'oh."

<sup>41</sup> 'Et la 'on 'unne whunizyane yugha hodul'ehne, 'enne la James 'ink'ez John bulh bubulh hónilch'e.

<sup>42</sup> 'Inka Sizi soo ts'iyawh, "Anih," hubudáni' 'ink'ez 'ubúlhni, "'Et t'éoonáhzun 'udun yun k'ut whut'enne butoh, mbene la dune tso whudíhhdzulh unlíne, 'enne dune buk'ut moodih hinli. 'Ink'ez mbene la bumoodih unline, 'enne cha bumoodih hinli.

<sup>43</sup> 'Et hoonts'i 'aw whuz un'a iloh nohni aht'oh. 'Ilhoghun nohtoh dune uncha-un tileh hukwa' ninzun de, 'on 'awhne buba ne'út'en-un cha oole' whuba' hoont'oh.

<sup>44</sup> 'Et nohtoh 'ilhoghun 'udetso tileh hukwa' ninzun de ts'iyanne e'ulhna oole' huba' hoont'oh.

<sup>45</sup> Yinka dune ye', 'en hoonts'i 'aw ba né'whutit'en huba whusálhiyal 'et huwa. Dune buba né'tit'en 'ink'ez dune buba datítsa 'et whe dune ts'iyawh nabootakulh."

\* **10:38** "Nts'en'a la dzoh nutíszut whuz un'a la dzoh nohzut eh?" ni whe 'utni.

*Dune hoos'en-un Bartimaeus huyúlhni, 'en Sizi hoo'en nayulhtsi*

<sup>46</sup> Jericho ts'e hoozdil whe Sizi yugha hodul'ehne tubulh nahutisdil whe, lhane 'ilhozdíline cha 'ut'en. Dune hoos'en-un Bartimaeus huyúlhni-un, Timaeus ooye', 'en ti whuzih usda datso whe whudánts'o,

<sup>47</sup> Sizi Nazareth whut'en-un 'óh whuya uyalh. 'Aho hazulh whe 'utni, "Sizi David oots'u hainzut-un sgha té'ninzeh!"

<sup>48</sup> Lhane t'edoosnih huyulhni 'ink'ez whuch'a hínyoot. 'Et hoonts'i 'on nus 'aldzul whe 'utni, "Sizi David oots'u hainzut-un sgha té'ninzeh!"

<sup>49</sup> Sizi lhgha nenínya 'ink'ez, "Anih dúhni," 'ubúlhni. 'Et dune hoos'en-un hika huyih, "Hoonínt'i 'ink'ez dudinyaih, 'anih nyúlhni," huyúlhni.

<sup>50</sup> Duluglok ts'ahayít'oh, dudillhoh, 'ink'ez Sizi yuts'óozya.

<sup>51</sup> "Et dányutisdlelh 'et sts'u hukwa' ninzun?" ni whe Sizi yoodulhkut. "Nehodulh'eh-un doo cha hoo'en-un, 'et sgha holts'it," yúlhni.

<sup>52</sup> "Naindahl, si sts'un be 'alha' hoont'oh-i, 'i be soo ná'inja," yúlhni. 'Et 'ahoh dune hoo'en nasdli' 'ink'ez Sizi ti yuntizya.

## 11

*Whuníni whe Jerusalem unindil*

<sup>1</sup> 'Awet Jerusalem whéngun hidulh whe nat-un keyoh Bethphage 'ink'ez Bethany whulh 'et la shus Olive be hóodzi-un, 'et whuz nehúnindil. 'Et Sizi nane yugha hodul'ehne whébalh'a' whe 'ubúlhni,

<sup>2</sup> "Keyoh whuyaz nohda ts'e whuz'ai-un whuz ah'us. Whuz oozah'az, yeztliyaz, donkey huyúlhni, whutso da' dune yak'ulhídhoh-i, 'et whédint'i, 'i k'unaooh'uk 'ink'ez sts'u toolhdlooh.

<sup>3</sup> Dune, 'Di ha 'et ndaht'en?' nohúlhni de, 'NeMoodihti yuka' ninzun' doohtni'. 'Aho la nohtlayoolhtelh."

<sup>4</sup> 'Et whehán'az 'ink'ez keyoh 'et yeztliyaz nahuyilhti 'ilhoghun yoh dati 'et whédint'i.

<sup>5</sup> K'unáhúyú'uk whe 'et núdilhne hubuhoodulhkut, "Et daht'en whe aht'en yeztliyaz k'unah'uk?" hubuhútni.

<sup>6</sup> 'Et Sizi buba náhizye' k'un'a ubuhútni 'et 'ants'i t'ehudínel 'ink'ez bula huditni.

<sup>7</sup> 'Et Sizi yeztliyaz highu hinílhti whe whulohne duluglok hiba hik'élhbal 'ink'ez Sizi yuk'étl'adida'.

<sup>8</sup> Lhane dune cha duluglok ti 'et hinulhbulh. Whulohne cha 'ul k'us 'ut'an k'unuhídut'as-i, 'i ti nahídulhdilh Sizi yuk'ut lhutíyahl 'et wheni.

<sup>9</sup> Mbene la dune Sizi hitso udulhne 'ink'ez hik'oh údulhne ts'iyawh húzulh whe 'uhutni,

"Yak'usda ba whudílhti!"

NeMoodihti boozi' gha whusaínya-un, 'en 'uk'enus hoonzoo-un ooghá whults'ut.

<sup>10</sup> Netsoda'-un David oolerwe keyoh 'et dúhoont'oh-un cha za whusawhútilts'ulh 'inka Yak'usda ba ts'odólhti'."

<sup>11</sup> 'Et 'awet Sizi Jerusalem keyoh neninya whe Lizwif bulugliz wucho ts'e danínya 'ink'ez dulcho núyuz'en. 'Awet náwhendunilhghel 'et huwa Bethany huwhútni-un ts'e whuz whunizyane 'on 'at nane yugha hodul'ehne whuz bubulh wheín'az.

*Ndi duchun mai kw'ahunúlhye, 'i Sizi yek'éhanya*

<sup>12</sup> 'Om bun Bethany ts'e whuz de náhidulh whe 'et la Sizi ooye'ílt's'ul.



<sup>13</sup> Nilhdza' 'et la mai cho chun nilh'en oot'an cha hoonli. 'Et la yughu ninya mai ntálhchulh ha. Yughu ninya whe 'ut'an za 'unt'oh 'awhuz oomai' hooloh.

<sup>14</sup> 'Et la Sizi ndi mai chun 'uyúlhni, "'Aw 'on 'at dune nyumai' hoo'alh aít'oh!'" 'Et ndutni whe yugha hodul'ehne hidánts'o.

### *Sizi Lizwif bulugliz whucho ts'e tizya*

<sup>15</sup> 'Et la Jerusalem ts'e hoozdil. Sizi Lizwif bulugliz whucho 'et daninya. Mbene la 'e'óoketne 'ink'ez 'ooketne ts'iyawh tenábuninyoot. Sooneya lhk'enádudzaihne buludab cha náneniz'ai, 'ink'ez dut'ai be 'óoketne cha,

<sup>16</sup> 'aw lugliz hoonli nuhóole' hukwa lhe'nizun.

<sup>17</sup> 'Ink'ez Sizi dune whubodulh'eh whe 'ubúlhni, "Yak'usda be 'udustl'us k'ut 'uk'uwhusguz,

'Njan syoh ts'iyanne tenadudli bayoh 'úhoont'oh, ni.

'Et 'uw'húhla undunut'ihne 'ink'ez nanúl'i'ne bayoh whuzúlhtsi!"

<sup>18</sup> 'Et lubret moodihne 'ink'ez Moses be 'udustl'us 'uk'ununáguzne hodánts'o whe hizoolghelh-un hukónuta tube huyé nilhjoot ts'iyanne 'ilhozdílne hubodulh'eh buba hooncha 'et huwa.

<sup>19</sup> Soo nadálhghel ibulh Sizi yugha hodul'ehne bubulh Jerusalem whuch'a nahusdil.

### *Ndi mai chun gha húhodul'eh*

<sup>20</sup> 'Om bun bundada' 'uda' 'et la ti hidulh whe nyoo mai cho chun hinilh'en. Soo ts'ih'un ooghih tubulh ats'o disuz.

<sup>21</sup> Peter 'en la whunalni whe Sizi bulh yátihlduk, "Nehodulh'eh-un nilh'en nyoo mai cho chun bulh ookw'ehanya disuz," yúlhni.

<sup>22</sup> 'Et Sizi 'ubúlhni, "Njan whunaoolhni, Yak'usda nohba 'alha' 'unt'oh de,

<sup>23</sup> ndi shusyaz 'i la' dóhni, 'Dudilts'it 'ink'ez bungun whucho ts'e tailts'it.' 'Et soo nohdzi yo whe 'aw nawh lhe'hoot'oh de 'ink'ez nohba 'alha' hoont'oh de, dawhútanelh dahni, ts'iyawh nohba 'edótanelh.

<sup>24</sup> 'Et huwa' nohdúsní, be 'alha' hoont'oh-i be tenadahdli de, 'ink'ez hoonli ha' dahni te 'alha' nahzun whe nohgha tikulh nahzun de, ndai la ooka' dahni-nohgha tikulh whe 'unt'oh.

<sup>25</sup> 'Et sahyin whe tenadahdli de, 'ink'ez 'uyoonne ts'un nohba dzoh de buba n'ún whutulhdilh 'et la nohBá, yak'uz úsda-un, 'en nohni cha nohlubeshi nohba 'un yutooldhil.

<sup>26</sup> 'Et 'uyoonne buba n'ún lhotulhdulh de, nohBá, yak'uz úsda-un, 'en 'aw nohlubeshi nohba 'un yutooldhil aít'oh."

### *Sizi be 'ut'en k'oh 'et hukwá hoodulhkut*

<sup>27</sup> 'Et Jerusalem ts'e nahoosdil Sizi Lizwif bulugliz whucho nuya whe lubret moodihne, Moses be 'udustl'us 'uk'ununáguzne, 'ink'ez dune tso whudilhdzuhlne, 'enne la Sizi highu nindil,

<sup>28</sup> 'ink'ez hiyoodulhkut, "Nedini ndai gha dune ando int'oh whe njan dint'en-un? Mbe nghá whunin'ai whe 'int'en?"

<sup>29</sup> 'Et la Sizi 'ubúlhni, "'Ilhoghun za hukwa nohoodutaskut. 'Et sudáhni de, 'et la nohdutasnelh ndai gha dune ando 'ust'oh whe nja dust'en.

<sup>30</sup> Sudáhni mbe John dune too be 'ulh'en-un mbe yutl'ahón'ai whe dune too be 'úlh'en inle', Yak'usda tilah k'us dune tilah yugha óonin'ai?"

<sup>31</sup> 'Et 'ahoh didutch'oh dutoh hukw'u nahúhulhye' whe nja duhútni, "Daja cha uzdooni, 'Yak'usda yugha óonin'ai,' ts'utni de, 'et la dooni, 'Di ha John nohba 'alha' lhe'dusni?"

<sup>32</sup> 'Et, 'Dune yugha óonin'ai ts'utni de,' " 'et nja dudune'ne be bé hunuljut huwa, ts'iyawh dune t'ehonínzun John dune too be 'ulh'en-un, 'en Yak'usda be nus hoo'en-un unli inle'.

<sup>33</sup> 'Et huwa Sizi huyúlhni, "Aw t'ets'onúszun."

Sizi 'et 'ubúlhni, "Si cha mbe sghá whunin'ai-un 'aw nohdósni' aít'oh."

## 12

### *Mai haníyeh k'et whulh'aíne bugha whúts'odul'eh*

<sup>1</sup> 'Et 'awet Sizi huwa húhodooll'eh-un huwun bubulh yálhduk, "Ilhoghun dune, 'en la mai haníyeh-un, mai ts'ekoo too' lhih-i, 'ananla. Yuna'niztl'oo tsak'et hahónkaih mai tahawhúndunutih-un huba, 'ink'ez la yutist'en-un cha 'uhóonla. 'Et la dune bugu whulh'ai 'ink'ez la whenádija.

<sup>2</sup> 'Et la 'awet mai oontajin néwhuninzut whe de 'ulhná-un 'ilhoghun 'en la mai haníyeh k'et butl'ahónlane buts'ú wheyalh'a, ndai la oonajin-i ooloh oots'itookat huba' hoont'oh-i, 'i ha.

<sup>3</sup> 'Et la 'uhuyínla nyoonne mai k'et butl'ahónlane 'ulhna huyílhchoot yahúyalht'o 'ink'ez la hoonli highálhilel whe whenáhinanyoot.

<sup>4</sup> Nyoon dune ooch'e-un, 'en la doo cha 'uyoon 'ulhna whuz whelh'a'. 'En la tse be nahínih'uz hitsi ts'e nalh'uz whe ka húyulhtsi, 'ink'ez hukwa yáhoonli k'un'a 'uhuyínla whe whenáhinanyoot.

<sup>5</sup> Doo cha la 'uyoon 'ulhna whuz whelh'a'. 'En la hizilghí. Lhane 'uyoonne cha 'et ndúbuhinla whulohne ubuhoolht'ah 'ink'ez whulohne cha ubuhangan.

<sup>6</sup> 'Ilhoghun za whuz yutilh'alh-un, 'et usda sulí' duye' yuk'entsí'-un, 'en la 'udek'ez whuz buts'un wheyálh'a, 'Sye', 'en la hidólhti', ni 'inka.\*

<sup>7</sup> Nyoonne dune mai k'et butl'ahónlane 'et la 'ulhodútni, 'Ndun njan mai k'et ooch'e-un, 'en ooye' 'únt'oh. 'Anih, ts'uzoolhghelh. 'Et la ndun ooye' oots'itikulh-i ts'iyawh nech'e' oole'.

<sup>8</sup> 'Inka ndun ooye' huyílhchoot, hizilghí 'ink'ez hizi 'i la nyo haníyeh k'et tenáhinino."

<sup>9</sup> 'Et Sizi uboodulhkt, "Daóoneh suba ndun mai k'et whulh'aí-un? Whu-sanája, 'ink'ez la ndunne dune ts'iyawh hubooghan, 'ink'ez la mai k'et 'uyoonne ghu hólh'a'.

<sup>10</sup> 'Aw whutsoda' ndi Yak'usda ooghuni 'uk'unusgúz-i 'aw eh ook'uyálhuzulhduk? 'Et ndutni,

'Ndi tse yoh 'uwulh'énne 'ún hidutilh'uz-i,  
'i la 'uja 'uk'enus ookadáhotni-i sulí'.

<sup>11</sup> 'Et la Moodihti whuz un'a 'uhóonla.

Tube buba hooncha k'un'a ubínla, whe' hoont'oh.'

'Et whuz un'a Yak'usda be 'udustl'us k'ut ndutni," 'ubúlhni.

<sup>12</sup> 'Et Lizwif bumoodihne Sizi huyólhchoot hukwa' hut'en t'ehonínzun didut buch'az yálhduk whe dune hodalh'e', 'et hoonts'i dune 'ilhozdíline ehunuljut 'inka Sizi dalhúhuyilel whe whenáhidil.

### *Yun k'elha huhoohl'i-un hukwa' hoodulhkt*

<sup>13</sup> 'Et la whulohne Phariseene 'ink'ez Herod oodune'ne cha 'enne Sizi khuni be huyoolhgooh ha hits'ú whe bahalh'a'.

\* **12:6** Njan mai k'et haníyeh-un humoodih 'en Yak'usda 'unt'oh, 'ink'ez ooYé' 'en Sizi Gri 'unt'oh. 'Et mbe la buga hólh'a'ne, 'enne Lizwif bumoodihne 'uhínt'oh ni whe 'utni.

14 'Et Sizi highu nindil 'ink'ez 'uhutni, "Dune hodulh'éh-un t'ets'onínzun ts'ih'un za' danelh. 'Aw 'uyoonne daja huntizilh-un huwu ni lhínlo whe dune dant'óhne hoonnts'i lhubunílh'en whe Yak'usda beni k'oh ts'e huwun khuni 'alha' 'unt'oh-i be whúbodilh'eh. 'Et nedíni wheni khuni netl'ahon'ai-i, 'i whudulhyoh 'uts'oot'en eh tilah Roman keyoh whumoodih oots'un yun k'elha ts'uhoohl'i buba ook'elha ts'uholh'e' tilah k'us 'awundooh tilah?"

15 'Et hoonnts'i Sizi huyoolhgooh hukwa' huyulh'en t'eeonanzin, 'ink'ez 'ubulhni, "'Et di ha sóolhdzih? Sooneya stl'ah'aih noos'en si,"

16 'Ahoh 'ilhoghun sooneya yutl'áin'ai. 'Et Sizi uboodulhkut, "Mbe whe 'unt'oh oonin 'ink'ez boozi' ook'usguz?" 'Et 'uhuyúlhni, "Keyoh whumoodih Caesar huyúlhni-un, 'en 'unt'oh."

17 'Et Sizi 'ubúlhni, "Ndai la Caesar ooch'e'-i oots'un ook'elha whulh'i, 'ink'ez ndai la Yak'usda ooch'e'-i, Yak'usda ts'un ook'elha whulh'i." 'Et soo tube buba hooncha.

### *Nat ts'ukhítinah huwun 'oodulhut*

18 'Awet Sadducee ubuhútnine, 'enne la Sizi highu nindil. 'Enne la 'uhutni, "Dats'úzsai 'ink'ez 'aw nats'ukhótinah áit'oh."

19 'Enne huyoodulhkut whe 'uhutni, "Nehodulh'eh-un Moses 'en khuni higha néilh'ai-i neba 'uk'unéyuzguz, 'Dune oo'at hoonli-un dazsai de, 'ink'ez buzkeh hooloh de, ndun dune dazsaí-un bulhutsin 'en la ndun tsandilh yughu nooda' ndun dune dazsaí-un, 'en ba buzkeh hole' ha.'

20 'Ihoh 'et la lhtak'ant'ine lhulhutsinke hónle', 'udetso whudilh dzulh-un, 'en la 'at ut'i 'awhuz buzkeh hooloh whe dazsai.

21 'Et la yuk'oh whúdilh dzulh-un, 'en tsandilh doo cha yughu nasda. 'En cha buzkeh hooloh whe dazsai. 'Et whulh tat-un cha la whuz un'a za 'uja.

22 'Ts'iyawh lhtak'ant'ine lhodunildzulhne whe highu dált's'i', ts'iyawh bubuzkeh hooloh whe yaháda. 'Udek'ez ndun ts'eke dich'oh cha dazsai.

23 'Mbene la yaidláne ts'iyawh dunazdutádulh dzin dunahudidil de, k'us mbe suba oo'at tileh, ts'iyawh lhtak'ant'ine 'uhultsuk highu dált's'i'?"

24 'Et Sizi but's'u yátilhduk, "Tube 'uts'un un'a 'uduhni. Ndet huwa' dahni t'eeonuzáhzun eh? Yak'usda ye ulhtus-i 'ink'ez ooghuni k'eguz-i t'énuzuhzun, 'et huwa whuz un'a 'uduhni.

25 'Ndet la yaidláne dunahudidil de, ndo yak'uz lizas le'hint'oh. 'Et ndó tit'elh dune cha 'ink'ez ts'ekoo cha 'aw lhgho dólts'i' áit'oh.

26 'Ink'ez ndunne yaidláne dunáhudutádulh huwun, ndi Moses 'uk'unéyuzguz-i 'aw eh ook'uyalhúldih whus dilhtán-i toh whudizk'un whe Yak'usda yulh yalhduk inle?' 'Et 'uk'unusgúz-i ndutni ndun Moses Yak'usda ndéyulhni, 'Si 'ust'oh Abraham 'en ooMoodihti 'ust'oh, Isaac cha ooMoodihti 'ust'oh, 'ink'ez Jacob cha ooMoodihti 'ust'oh.'

27 'Et huwa khunane buYakusda 'unt'oh, 'aw yaidláne buYak'usda iloh whe 'unt'oh. 'Et 'uts'un un'a gaih 'udahni."

### *Itho khuni neba yútulhuhizye'-i, 'i 'uk'enus dízti'*

28 'Moses be 'udustl'us 'uk'ununáguz-un, 'en la 'et 'ut'en, 'ink'ez ubudánts'o 'ink'ez 'en t'eeonínzun la Sizi Sadduceene soo 'ubudáni'. 'Inka la didut cha Sizi yoodulhkut, "K'us ndai khuni neba yutulhúhizye'-i k'us dízti'?"

29 'Et Sizi uyúlhni, "Ndi 'uk'enus dízti'-i, 'Israel oodune'ne, oozúlhts'ai, neMoodihti 'en Yak'usda unli. 'En za 'ilhoghun Moodihti 'unt'oh.

30 'Yak'usda nyuMoodihti ndzi ndulcho-i be cha, nzul ndulcho-i be cha, nyeni ts'iyawh ndulcho whe cha.'

<sup>31</sup> Bulh nanki khuni higha néulh'a-i 'uk'enus diziti'-i, 'Nts'en'a la nyunch'oh k'enaintsi', whuz un'a nyulh dune cha buk'eoontsi'. 'Aw 'uyoo khuni higha néulh'ai-i ndi nanki ba nus yudízi'-i hooloh."

<sup>32</sup> 'Et Moses ooghuni 'uk'unéyuzguz-un, 'en Sizi 'ulhni, "Nehodulh'eh-un soo' dinja! Khuni 'alha' 'unt'oh-i be yailhduk! 'Udéoh Moodihti 'en za Yak'usda unli, 'aw 'uyoonne Yak'usda lhíloh.

<sup>33</sup> 'Ink'ez dune dudzi ndulcho 'i be Yak'usda k'eootsi' huba' hoont'oh, dudeni ts'iyawh 'i be cha, duzul be cha, oonut'i ts'iyawh whe cha 'ink'ez dich'oh k'enatsi' whuz un'a dulh dunene buk'eootsi'. 'Et 'uk'enus neba hooncha ndi nanki khuni higha néulh'ai-i ook'úne' ts'oot'en. Khuna-i 'ink'ez 'uyoo hoonliyaz loodel k'ut Yak'usda gha dizk'un, 'i ba nus whudízi'."

<sup>34</sup> Sizi t'éoonanzin dalcho 'i be whunih k'un'a 'udíja 'et 'uyúlhni, "Awet nilhdukw Yak'usda k'úne' nyul'en-un tileh." 'Et hukw'elh'az 'aw 'udun hukwa lhúhuyoodílhkulh huyéntsaz 'et huwa.

*Christ nts'en'a 'en David oots'u haínzut-un, 'et huwun hika huyoodulkut*

<sup>35</sup> 'Et la Sizi Lizwif bulugliz whucho dune hodulh'eh whe huboodulhkut, "Nts'en'a Moses be 'udustl'us 'uk'ununáguzne, 'Christ 'en David oots'u hainzut-un tileh whe 'unt'oh,' hutni?

<sup>36</sup> 'Et la David Ndoni 'i gha la 'et dutni, 'Moodihti 'en sMoodihti 'úyulhni njan nailhni ts'unghus sinda. 'Oh de la nch'az ditnine buk'ut nke naóolhyis mba ubooselh.'

<sup>37</sup> David dich'oh, 'Smoodihti,' yúlhni, 'et nts'en'a Christ 'en David ts'u haínzut-un oole'?" 'Ants'i 'oh dunene huhoont'i' whe hidants'o

*Sizi dune 'ubúlhni, "Moses be 'udustl'us 'uk'ununáguzne, 'enne buch'a kháhdli."*

<sup>38</sup> 'Et Sizi hubodulh'eh whe 'et 'ubúlhni, "Moses be 'udustl'us 'uk'ununáguzne, 'enne buch'a kháhdli. 'Enne e'óoket-un dune toh nahúchun t'asus yiz be húdílh'ts'i, 'ink'ez dune ubudólh'ti'-un hukwa húdúdú'en.

<sup>39</sup> Njan lugliz ndet la hunt'il'el'h-un, 'et 'utahaoodit'a'ih, 'ink'ez dune dahúlih te, 'et cha k'us whúdízi'-un, 'et didut nátl'ahududaih.

<sup>40</sup> Tsandilh cha khábonit'oh, 'ink'ez buyoh bugha hawhúhut'a'ih. 'Ink'ez ncha ná'hadudil'i whe sa' cho tenahududli. 'Enne 'et hukw'elha 'on nus dzoh notizut whe' hint'oh."

*Tsandilh sooneya huwa nín'ai-un*

<sup>41</sup> Lizwif bulugliz whucho sooneya dekat-un, 'et la Sizi usda, 'ink'ez ubunilh'en sooneya dehúle. Lhane hoonzoo' 'unt'ohne, 'enne la sooneya lhai whe dehúya'a'ih.

<sup>42</sup> 'Et la 'ilhoghun tsandilh tel'en-un, 'en la 'óh whuya uyalh, 'ink'ez nanki sooneyayaz dénalhdil.†

<sup>43</sup> 'Et la Sizi yugha hodul'ehne ts'un bé' buntilhni 'ink'ez 'ubúlhni, "No-hdúśni ndun tsandilh tel'en-un, ndunne ts'iyawh buba nus lhai 'i deyán'ai whe 'unt'oh.

<sup>44</sup> Nduhne 'uyoonne, 'enne ndai la huye hóonzoo' 'unt'oh-i, ujutukat-i, 'i 'uhuyulh'en dehúyule. 'Et ndun lhe'unt'oh tel'en ndai la 'aw 'i yut'i-i yuk'otinalh, 'i hoontsi ts'iyawh deyán'ai."

† 12:42 Ndi sooneya 'uk'enus tsudíti' 'i 'unt'oh.

## 13

*Njan Lizwif bulugliz wucho gak whatáleh-un, 'et Sizi huwu yalhduk*

<sup>1</sup> 'Et Sizi Lizwif bulugliz wucho tenánja whe 'ilhoghun yugha hodul'eh-un 'uyúlhni, "Nehodulh'eh-un whunilh'en, njan lugliz wucho 'et cha 'ink'ez tse cha 'ink'ez lhé'uldzoo' 'i be 'uhóolya."

<sup>2</sup> 'Et Sizi 'utni, "Njan yoh wucho whuzdla whunilh'en eh? 'Aw 'ilho tse 'i hoonts'i lhk'ulhdutásdlal ts'iyawh nadúntijulh whe' hoont'oh."

*Dune ye túzilah 'ink'ez dzoh núzut bulh huwun ubulh yátilhduk*

<sup>3</sup> 'Et 'awet Lizwif bulugliz wucho whanch'az shus Olive huyúlhni, 'i k'ut, 'et la Sizi usda. Peter, James, John, 'ink'ez Andrew te 'enne disoh Sizi huyoodulhkut.

<sup>4</sup> 'Et la huyúlhni, "Nedíni nkede 'uwhutánelh? 'Ink'ez nedíni ndet huwa t'ets'ontázin daóotanelh whe 'et neóotalts'ulh?"

<sup>5</sup> Sizi 'ubúlhni, "Huwuhli dune nanohnoo'ah junih.

<sup>6</sup> Lhane dune whusahúdulh 'ink'ez soozí' gha 'uhudutinelh, 'Christ 'ust'oh!' 'Et nduhutni whe dune lhane nahuntí'oh whe

<sup>7</sup> nohgha 'óojas junih. Nilhdukw dune lhutigan whulhudahts'o de, 'ink'ez nilhdza' lhuhugan whulh 'údahts'o de, 'et ndo honeh huba' hoont'oh. 'Et hoonts'i 'awhuz whulatoh iloh whe' hoont'oh, 'awhuz 'udun cha whusawhútikulh whe' hoont'oh.

<sup>8</sup> Lhelhts'un keyoh whut'enne, 'enne lhch'az nehúdutadulh, 'ink'ez lhelhts'un lerwe be 'ustléenne, 'enne cha lhch'az nehúdutadulh. Ndulcho whe yun cha nótitnah, 'ink'ez dai cha whutáleh 'ink'ez ndulcho whe dune dzoh nulhotildeh. 'Et nduhwít'en sulí' de, t'ewhúntázhin 'on nus hooncha tune' whutit'en. 'Et dzoh nutideh-un 'andit whe' whudit'en.

<sup>9</sup> Nohnihch'oh cha huwohle'. Keyoh huwunline but nenóhotalelh 'ink'ez lugliz cha la nohoohotalht'oh. 'Et si sgha la mbene la moodihne 'ink'ez lerwene cha bubut nenóhotalelh whe, khuni unzoo-i be bubulh yaoolhduk.

<sup>10</sup> 'Ink'ez 'udechoo ndi yun k'ut ndulcho whe dune ts'iyawh khuni unzoo-i ghun bubulh yatiduk.

<sup>11</sup> 'Anóhuanla 'ink'ez nahiyílh-un but nenóhnihliti de dája dutihnelh-un huwu ni oohle' junih 'ink'ez nohdzi dóghel. 'Et neóoninzut de, 'ants'i ndai la nohza dánkat, 'i be yaoolhduk. Ndoni ooghuni 'i be yatilhduk 'aw nohghuni be iloh 'udutihnelh.

<sup>12</sup> Dune, 'enne dulhutsinke dahútsah-un huwá botalelh. 'Et bubáke 'enne cha, duduzkeh 'et ndúbotilh'elh, 'ink'ez ts'oodunne, 'enne cha, dudusne buch'az náhulhya 'ink'ez dahátitsah-un huwá botalelh.

<sup>13</sup> Si sgha sunihdulh huwa ts'iyanne nohts'o dutitni. 'Et hoonts'i mbene la 'udek'ez whuts'un whulh nudalya'ne, 'aw 'enne za hudutijih."

*'Uk'enus whéwhunujut-i*

<sup>14</sup> "Nduun 'uk'enus bé whunjut-un, 'aw ooba lnehóot'oh-un 'et usyin nulh'en de, (Ndi yuk'ú yalhúdkne soo cho noheni taóodolts'it. Daniel, Yak'usda be nus hóo'en-un, 'en la 'uda' húwu yailhduk ínle'). Judea dilhts'íne shus k'uz ts'e tse hutooldhilh.

<sup>15</sup> Dune duyoh bun k'ut\* usda de, 'aw duyoh ts'e nunátidalh 'ink'ez ndi ndai la duch'e' yutilelh-i nayitálhchulh 'et hoonts'i ooneh ait'oh.

<sup>16</sup> 'Ink'ez dune haníyeh k'et 'ut'en-un cha 'aw yoh ts'e duluglok hunaóoda' ait'oh.

\* **13:15** Lhat-un Lizwifne buyoh 'et bun k'ut lhts'ewhúdzí'a.

17 Dalcho 'i be whéwhunujut tileh, 'oh de ts'ekoo, yazba 'unt'ohne ba, 'ink'ez duzkeh e'ulht'úkwe cha.

18 Njan dzoh nutihzut-un whuch'a ténadoohdli khit nohbe' honeh whuch'a.

19 'Et la Yak'usda yun inla 'andit dzin whuts'un 'aw lhe'whúsne 'ink'ez 'aw 'et 'ulcho 'i be whutso da' hiye dzoh nulhuzut-i, 'i be dzoh notieh.

20 'Et hoonts'i Moodihti lhat dzin whe k'oh ná'hoonla. 'Et ndúlhinel de, 'aw 'ilhoghun hoonts'i doojih ait'oh. 'Et ndunne 'utahábanlane, 'enne bugha' hoonla 'oh de hoondukw whutilhtselh.

21 'Et la 'oh de dune ndunóhohutni de, 'Nulh'en njan Christ 'en njan usda!' K'us, 'Ngut usda!' nohoútni de, khun te nohba 'alha' 'uhudooni' junih.

22 'Et hoonts'i ndunne Christ na'dudil'íne, 'ink'ez nus hó'enne na'dudil'íne cha, 'enne lhane hutileh whe lhat te huwa 'ít'en 'ink'ez hooncha túne' hutit'en ndunne Yak'usda 'utahábanlane, 'enne hoonts'i nahunoo'a hukwa hutit'elh.

23 'Ahoohlhyiz tse hóohli! Ts'iyantsuk whutso da' nohdásni'.

### *Yinka dune ye' whusatíyahl-un*

24 "'Et 'oh de dune dzoh nuhuzde, hukw'elh'az de, sa 'i cha dulhghus tileh, 'ink'ez 'ulhdzis ooza' cha 'aw be lhoohost'en tileh.

25 Sum cha nántikulh 'ink'ez ndo yat be hóolhtus-i, 'i be nuhótitnah.

26 'Oh de la yinka dune ye', 'en ndo kw'us toh bé whunujut ye ulhtus-i bulh 'ink'ez Yak'usda oots'u hayánduz-i, 'i be ndo be hóodutaltsilh.

27 'Ink'ez la dulizas 'enne butilh'alh nus de, n'az de, nooz de, 'ink'ez ndaz de, ndi yun k'ut ndulcho whe Yak'usda 'utahábanlane 'ilhúbuhootálelh 'et wheni."

### *Mai cho chun, oomai' fig huyulhni-i, oogha whúts'odul'eh*

28 'Ndi mai, fig huyulhni, ooduchun, 'i be nawhutnuk be whuts'odul'eh-i, soo ts'ih'un un'a cho bodulh'eh. Ndi 'i 'unt'oh, oozischum ulughih te, 'et 'awet oot'an whulih, 'i gha t'ewhunáhzun 'awet shin nilhduk w suli'.

29 'Et ndi whuz un'a nohdúсни né'whutit'en-un whunulh'en de, 'et la whuz un'a za t'éoonóhzin 'awet nilhduk w he' whudutat'elh.

30 'Alha ts'ih'un un'a nohdusni, 'andit whudizulhne 'aw yalhihitásdla, 'et ndi dótanelh-un ts'iyawh 'et lhawhúdutanelh, 'et whuts'un.

31 'Yat 'ink'ez ndi yun k'ut cha gak whutaleh. 'Et hoonts'i ndi sghuni 'aw gak lhtisdleh."

### *'Aw dune t'éoonúszun ndet dzin 'ink'ez nts'oya hoozulh whe 'uwhutánelh*

32 "'Aw dune t'éoonúszun ndet dzin k'us nts'owhuya 'uhunit'oh-un, 'et whusaótilts'ulh. 'Aw lizas yak'uz dilhts'íne k'us Yak'usda ooYe' cha t'éhonúszun, 'uBá dich'oh za t'éoonúszun.

33 'Ahoohlhyiz huwahli 'ink'ez tenadahdli. 'Aw t'éoonuzúhzun nts'oh de whusaótilts'ulh.

34 'Et ndiz un'a 'uwhutánelh, 'ilhoghun dune duyoh huwu tizya 'ink'ez yuba 'ut'éne 'et nébuninla 'ilhone hinli whe dude 'ut'en 'uhoohlh'en ha, 'ink'ez 'et datí ghunli-un 'uyúlhni, 'Soo cho huwonle!'

35 'Et whuz un'a nohdúсни, huwahli!' 'Et nts'oh de yoh humoodih whusanátidalh 'aw t'éoonuzúhzun, hulhgha tilah, tuzniz tilah, yukaihts'un tilah, k'us sa haín'ai de tilah.

36 'Et huwa 'ahoolhyiz lhadáht'oh. 'Aw hukwa tse lhúwhuhlih 'ink'ez nanítez de, nohche tilah nohmoodih nohghu naooja'.

37 'Et daja nohdúсни-un, 'et ts'iyanne cha budúсни, huwahli!'"

## 14

*Sizi yooyo whútsul hikunúta hituzilghel ha*

<sup>1</sup> 'Awhuz nat dzin whuz'ai Lizwifne butus lhuseya-un\* whewhúnahulni 'ink'ez lhes lhuntíldoh-i ut'alh-un, whewhúnahulnih cha, 'et lubret moodihne 'ink'ez Moses be 'udustl'us 'uk'ununáguzne, Sizi yooyoh whútsul hikunúta hituzilghel ha.

<sup>2</sup> 'Et 'uhutni, “Njan butus lhuséya-un, 'et whutoh iloh uts'ooleh doo ka la dunene lhtahohót'alh.”

*Bethany 'et la ts'eke Sizi k'unutsútjul yutsi k'eyilhdzo*

<sup>3</sup> 'Ilhoghun keyoh wheyaz Bethany huwhútini-un, 'et Simon ooka whulhjut ínlé'-un, leprosy huyúlhni, ooyoh 'en Sizi yuzih usda. 'Et la na'ut'alh whe ts'eke k'unutsútjul dízti'-i tse bé hahoogaz-i be súlhdzo 'ink'ez oodé' duldze yi'alh whe danínya. Ndi 'i yayányuz 'ink'ez k'unutsútjul 'i Sizi yutsi k'eyilhdzo.

<sup>4</sup> Whulohne dune hukwa hunílch'e 'ink'ez 'ulhodútni, “'Et di ha nyoo k'unutsútjul 'ants'et ninta' yulh'ih.

<sup>5</sup> Dízti' whe da' be 'óket' 'ink'ez da' sooneya tel'enne gha húyodzaih,” 'ink'ez duyoh ts'e ts'eke tube cho hich'az yálhduk.

<sup>6</sup> 'Et Sizi 'ubúlhni, “Oots'áhalhozah'ai! Di ha teduhle? 'Ut'en unzoo-i sba inla whe 'unt'oh.

<sup>7</sup> 'Ahoohyiz tel'enne nohnat whutáleh. Hukwá' nahzun de totsuk bula 'aht'en. 'Et si 'ahoohyiz huba nohbulh lhé'tuzist'el whe' hoont'oh.

<sup>8</sup> K'unutsútjul-i syust'e yuk'éyilhdzo 'adutistelhe wheni lhasúdina. Ndun ts'eke 'aw 'on 'un ooneh aít'oh-un, 'et 'uhóonla whe 'unt'oh.

<sup>9</sup> 'Alha nohdusni ndi yun k'ut ndulcho whe ndi khuni unzoo-i nudútkat, ndun ts'eke ndet 'uhoonla-un, 'et hukw'u naootitnuk 'et whe dune yunatilnih.”

*Judas Sizi be 'óotakulh hukwa' ninzun*

<sup>10</sup> Whunizyane 'on 'at nane yugha hodul'ehne, 'ilhoghun Judas Iscariot huyúlhni-un, 'en Lizwif bulubret bumoodih buts'ú whinya Sizi butl'aítihlhel ha.

<sup>11</sup> Dája 'ubúlhni-un huhóont'i' 'ink'ez sooneya hits'óози. 'Et Judas Sizi ye 'óotakulh-un, 'et hukwa itís'en.

*Sizi 'en yugha hodul'ehne butus lhuseya-un bubulh na'ut'alh*

<sup>12</sup> 'Et 'udechoo dzin lhes lhuntíldoh-i nahut'úlh-un, 'et dzin 'usbaiyaz na'hitit'ulh-i naihizulghih, ndi 'usbaiyaz Lizwifne butus lhuseya-un huba 'unt'oh. 'Et Sizi yugha hodul'ehne 'uhuyúlhni, “Nts'e netalh'alh ndi natant'ulh-i, 'i mba lházdutileh?”

<sup>13</sup> 'Et Sizi nane, 'enne whébalh'a' 'ink'ez 'ubúlhni, “Jerusalem ts'e ah'us 'ink'ez dune too na'á-un, 'en la nohdudóya'. Nts'e la yoh ts'ú tizya ts'e whuz bun tooh'as,

<sup>14</sup> 'ink'ez yoh ooch'e'-un nja dúdohni', 'Dune hodulh'éh-un nja dutni ndet la sgha hodul'ehne bulh butus lhuseya-un huwa na'uztit'úlh-un yoh negho tálh'alh eh?”

<sup>15</sup> 'Et la dohyoh hooncha-un lháoodint'oh-un whunóhnoolhtun, 'et la naztit'úlh-i lhadóhleh.”

\* **14:1** Nawhudizulh totsuk 'iluhodulh, 'ink'ez ndi 'usbai k'us unzoo-i nahayut'ulh. Njan whewhúnahulni 'oh da' Yak'usda yun k'ut Egypt whuch'a hanábanla da'. † **14:5** Tel'enne ba 'ilhu yus k'ut yuk'elha 'it'en 'et 'ultsuk.

16 'Et 'awet yugha hodul'ehne Jerusalem ts'e whehán'az 'ink'ez Sizi soo daja ubulhni-un ts'iyawh whuz un'a nahoohóon'ai 'ink'ez butus luséya-un wheni lhahodinla.

17 'Et hulhgha 'awet Sizi whunizyane 'on 'at nane te whusahándil.

18 'Et na'hut'alh whe Sizi 'ubúlhni, "'Et njan dunóhdusni 'ilhoghun nohtoh sulh ná'ut'alh-un, 'en se'óotakulh."

19 'Et yugha hodul'ehne budzi únduda whe 'ilhoghun hinli whe huy-oodulhkut, "Si eh 'usudíni," huyúlhni. 'Et 'uyoon cha ndutni, "Si eh 'usudíni?"

20 'Et Sizi 'ubúlhni, "'Et whunizyane 'on 'at nane njan netoh mbe la dulessulh tunayuz'ai-un, 'en 'utinelh.

21 Ndi Yak'usda ooghuni 'uk'unusgúz-i 'et ndutni, 'Yinka dune ye', 'en datítsa. 'Et ndun ye 'ónket-un, dalcho-i be ooba wheóonujut tileh.' Ndun dune 'aw lhuhóole de, 'et da' 'on nus soo' hot'e' oole'."

### *Sizi 'udek'ez na'ut'alh*

22 'Et na'hut'alh whe Sizi lhes yílhchoot yuba tenadidli 'ink'ez lhts'edanyuz. 'Et yugha hodul'ehne bugha íninla 'ink'ez 'ubúlhni, "Ndi ulhchoot, 'ink'ez ah'álh. Ndi sust'e 'unt'oh."

23 'Et lubot yílhchoot, 'ink'ez duBá "Músi," yúlhni. Butl'ayánkai 'ink'ez ts'iyawh huyitnai'.

24 'Ink'ez 'ubúlhni, "Ndi 'i suzkai' 'unt'oh. Lhane buba nadútilt'ih 'ink'ez 'i gha 'andit nohts'u nahízúsa.

25 'Et nohdúsní, ndi ts'ekoo too' 'aw doo cha za oosnai' ait'oh 'ink'ez ndet dzin 'uyoo 'andidi-i ts'ekoo too' tiselh de, ndet la ts'iyanne Yak'usda ook'úne' hutit'en 'et whuts'un."

26 'Et Yak'usda ooyun be híjun 'ink'ez ndo shus k'uz Olive be hóodzi whuz whehándil.

### *Sizi Peter ulhni, "T'esunuzínzun dutanelh"*

27 'Ink'ez Sizi 'ubúlhni, "'Andit 'ulhdzis nohni ts'iyawh skayátihleh, 'ink'ez ninta tilhwus, ndi Yak'usda ooghuni ndutni,

"'Et huwa Yak'usda 'en 'usbai ghunlí-un yutuzilghel

'ink'ez ndi 'usbai ts'iyawh yaitálh'us."

28 'Et dunadusja hukw'elh'az de, 'et yun k'ut Galilee ts'e nohtso tisyalh."

29 Peter 'uyúlhni, "Ts'iyanne nkayá tileh, 'et hoonts'i 'aw si íloh!"

30 'Et Sizi 'uyúlhni, "Peter, njan whunaoolnih, 'andit 'ulhdzis lugok dune nat 'udutinelh whutso, tat 'et 't'esunuzínzun' dutanelh."

31 'Et Peter soo khuni ulhtus-i be ndutni, "Nyulh datísah 'et hoonts'i 'aw t'enyunuzúszun doosní' ait'oh." 'Onghunne yugha hodul'ehne cha ts'iyawh whuz un'a nduhútni.

### *Sizi Gethsemane 'et tenadudli*

32 'Et la 'ilhoghun haníyeh k'et Gethsemane huwhútni ts'e whehándil 'ink'ez Sizi yugha hodul'ehne 'ubúlhni, "Njan dulhts'i. Si n'un tenadutisdli."

33 'Et Peter James 'ink'ez John te 'on 'un bubulh when'az. 'Et 'awet ts'odi be tewhéndunilne

34 'ink'ez 'ubulhni, "Szul tube ts'odi suli' k'et 'awet datisah le'ust'oh. Nja dúlhts'i 'ink'ez howahli."

35 'Et 'on 'unyaz whenya 'ink'ez nachánitno. 'Et tenadudli whe ndutni, "'UBá njan whusawhútilts'ulh-un, whuz un'a 'unt'oh de, 'et whute senghólsit.



36 'UBá, nyun za ts'iyantsuk nk'úne' whut'en. Ndi dzoh nutiszut-un sba hooloh nahooltsi, 'et hoonts'i si hukwa' nuszun íloh, nyun hukwa' ninzun hukw'un'a 'et 'uhóneh."

37 'Et nyoonne tane yugha hodul'ehne nahunistez whe bughu nanja 'ink'ez Peter 'ulhni, "Simon nanínti whe 'int'oh. 'Aw eh 'atsulyaz honih ait'oh?"

38 'Ink'ez 'úbulhni, "Howahli tank'us-un tiht'i whuch'a tenadoohdli. No-hyughi be tihzoo' hukwa' nahzun, 'et hoonts'i nohyust'e tetsun whe 'unt'oh."

39 'Et doo cha 'on 'un whenaja 'ink'ez whutso da' tenadidli whuz un'a za tenadudli.

40 Doo cha za yugha hodul'ehne nahunistez whe bughu nanja 'aw huhoonih ait'oh 'ink'ez 'aw whé' hidoni' hooyoh.

41 Whulh tat-un bughu nanja 'et 'ubúlhni, "Whute sahtez 'ink'ez nalhyis. 'Awet whusahóolts'ut, soo cho whunulh'en, yinka dune ye', 'en dune ntsi'ne butl'ahítihlhel.

42 Dunadahdilh uztoodilh, nulh'en ndun dune se'óotakulh-un, 'awet 'oh whuya uyalh."

### *Sizi 'awet huyílhchoot*

43 'Et 'awhuz Sizi yalhdruk whe Judas 'en whusaínya. Ndun Judas 'en whunizyane 'on 'at nane whel'a'ne, 'ilhoghun-un 'unt'oh. Dzoh sa' inle' Lizwif lubret bumoodihne, Moses be 'udustl'us 'uk'ununáguzne cha, 'ink'ez dune tso whudilh dzulhne cha, 'uda' buts'ú nuséya, 'ink'ez Sizi ye búts'e'onket. 'Enne Judas buts'ó whenáhiyalh'a', 'ink'ez dune lhane yulh údulh saluzti cha 'ink'ez tut'oh cha hilelh whe whusahándil.

44 Hídulh whe Judas 'ubúlhni, "Ílhoghun dune oonimbus k'ut nadists'ooz-un, 'en oohgooh 'ink'ez oogha 'óohli whe tóolhelh."

45 'Et huwa Judas Sizi yughu ninya ibulh 'uyúlhni, "Hadih, Rabbi," 'ink'ez naidits'ooz.

46 'Et 'awet Sizi huyílhchoot 'ink'ez duts'o cho huyoontun.

47 'Et hoonts'i 'ilhoghun Sizi zih usyin-un saluzti hayáhtsus 'ink'ez Lizwif lubret 'uk'énus dízti'-un be 'ulhna-un yudzoo k'uz haílh'to.

48 'Et Sizi yatilhduk 'ink'ez 'ubúlhni, "Et di ha saluzti cha 'ink'ez tut'oh cha nuhle 'ink'ez 'undunust'ih hukw'un'a skatíhdil?"

49 Dzin totsuk nohbulh 'úst'oh 'ink'ez lugliz whucho whunohodus'eh, 'et di ha 'oh da' sulhúlhchulh inle'. 'Et hoonts'i Yak'usda ooghuni dája ni whuz un'a 'ohóneh huba' hoont'oh."

50 'Et ts'iyawh yugha hodul'ehne hich'a sudil 'ink'ez nintahulgaz.

51 'Ílhoghun chilh naih ts'ut'an-i za khaóosduz, 'en Sizi uniyalh. Ndun chilh 'en 'uyoonne chilke huyílhchoot.

52 'Ust'et bula k'éhalgai whe naih za bula k'eyáno.

### *Sizi nahiyílhne bubut nenínya*

53 'Et Sizi huyílhchoot 'ink'ez Lizwif lubret 'uk'enus dízti'-un ooyoh ts'e whehúyalhti. 'Et Lizwif lubret bumoodihne, dune tso whudilh dzulhne cha, Moses be 'udustl'us 'uk'ununáguzne cha 'ilhuhozdil.

54 Peter yoo níz de bubuniyalh. Lizwif lubret 'uk'enus dízti'-un ooyoh 'et whuna'nistl'óo-un whuz bughu danínya. 'Et howunline buzih natl'adida' 'ink'ez naldzilh.

55 Lizwif lubret bumoodihne 'ink'ez nahíyilhne cha 'enne bubut Sizi néhinilhti hukwá hituzilhghelh-un highu nahó'alh hukwa' hut'en, dune

yuch'az yaoolhdukne nahólhtelh hukwa' hut'en, 'et hoonts'i 'aw 'ilhoghun nalhihilhtel.

<sup>56</sup> Lhane dune huwhuts'it whe hich'az yálhduk, 'et hoonts'i ts'iyawh lhelhts'un un'a 'uhutni.

<sup>57</sup> Whulohne dune dodindil 'ink'ez Sizi hiba whuts'it whe njan duhútni,

<sup>58</sup> “Njan dutni whe nenalh 'útni, 'Njan lugliz whucho dune 'uhóonla-un, 'et nanaóoduntisyus. 'Et hukw'elh'az tat dzin inle' de, 'aw dune whut'álhanal whe 'udun na'whutislelh.’”

<sup>59</sup> 'Et hoonts'i 'aw ts'ih'un lhgha 'úhudootni' aít'oh.

<sup>60</sup> 'Et lizwif bulubret 'uk'enus dízti'-un butoh dudinya 'ink'ez Sizi 'ulhni, “Ndun dune nch'az yáhlhduk daja datanelh?”

<sup>61</sup> 'Et hoonts'i Sizi t'edusni 'ink'ez 'aw yalhtíldih. 'Et doo cha za lubret yoodulhkut, “Nyun eh Christ 'int'oh? Yak'usda dízti'-un ooYe' inli?”

<sup>62</sup> Sizi uyúlhni, “A, 'en 'ust'oh, 'ink'ez nohni ts'iyawh si, yinka dune ye', huyuntílh'elh Yak'usda ooghu nailhni ts'unk'us usda whe ndus de kw'us toh hanátidalh.”

<sup>63</sup> 'Et nyoon lubret tube hunílh'e k'et dunaih lhts'e yalhch'ul 'ink'ez nja dutni, “Aw 'on 'un 'uyoonne ts'oodolhkut aít'oh.

<sup>64</sup> Ndi ooghuni Yak'usda yech'az yálhduk-i dahts'o! Nohba dáhoont'oh?” 'Et ts'iyawh úhutni, “Daóotsah huba' unt'oh.”

<sup>65</sup> 'Et whulohne highá whenduninzo, hinak'ená'uzguz 'ink'ez huyoonukat cha' huyulh'en 'ink'ez, “Mbe nyunízuk?” huyúlhni. 'Et nyoonne dune ghunline huyílhchoot 'ink'ez 'enne cha huyoonankat.

*Peter 'utni, “Sizi 'aw t'enuzúszun.”*

<sup>66</sup> 'Et 'awhuz Peter 'on yo nanist'oo bet 'ut'en whe Lizwif bulubret 'uk'enus dízti'-un ts'ekeyaz yuba 'ut'en-un, 'oh whuya uyalh.

<sup>67</sup> Peter naldzilh yutilh'en 'ink'ez 'uyúlhni, “Nyun cha Sizi Nazareth whut'en-un bulh 'int'en inle'.”

<sup>68</sup> 'Et Peter 'utni, “Tilah, ndet 'uwhudíni 'aw t'éoonuzúszun,” 'ink'ez 'az whenya. Soo 'et 'ahoh lugok dune 'udíja.

<sup>69</sup> 'Et ts'ekeyaz cha za nyo 'et yan'en nyoonne 'oh nudilhyanne cha za 'ubúlhni, “Nyoon 'en cha 'ilhoghun 'unt'oh.”

<sup>70</sup> 'Et hoonts'i Peter cha za, “Awundooh!” ni. 'Et 'atsulyaz inle' nyoonne 'oh nudilhyanne cha za Peter 'et duhúyulhni, “Alha nyun cha 'ilhoghun 'int'oh. Nyun cha Galilee hoont'en whe 'int'oh whuz un'a yailhduk 'et huwa.”

<sup>71</sup> 'Et Peter 'utni, “Ndughi nalh, ‘Alha' dusni whe' dusni, ndun dune 'udáhni-un, 'aw t'enuzúszun!”

<sup>72</sup> 'Et lugok dune whulh nat 'udíja. 'Et Peter Sizi dája yulhni la whunalni, “Lugok dune nat 'udutinelh whutso 'et tat t'esunuzúszun dutanelh.” 'Et huwu nuni nuzut 'ink'ez intse.

## 15

*Sizi Pilate but nenínya*

<sup>1</sup> 'Et 'om bun bundada' 'uda' Lizwif lubret moodihne, dune tso whudílhdzulhne, Moses be 'udust'l'us 'uk'ununáguzne cha, 'ink'ez dune ba nahiyilhne cha, ts'iyawh yahalhduk. 'Et Sizi hiyulhghel 'ink'ez Pilate t'ahúyalhti.

<sup>2</sup> 'Et Pilate 'uyulhni, “Nyun eh Lizwif bulerwe inli?” 'Et Sizi 'utni, “Alha' dini whe' dini.”

<sup>3</sup> Lizwif lubret moodihne lhat-un Sizi hich'az yalhdruk, 'ink'ez hiba honts'it, 'et hoonts'i Sizi t'edusnih.

4 'Inka Pilate doo cha za Sizi yoodulhikut, “Dáwhultsuk-un nk'ehúhoon'ai, 'et huwun 'aw eh dája lhdutuzanel?”

5 'Et doo cha za Sizi 'aw yalhtíldih. 'Et Pilate ooba hooncha.

*Pilate Sizi datítsah-un whuts'uyúlha*

6 Nawhúdizulh totsuk Lizwifne butus lhuséya whunahulníh-un, 'et 'il-hoghun dune 'adin'ai-un Lizwif 'utahahúyulhtih, 'en Pilate yula nadutnih.

7 'Et 'oh da' mbene la lhtahuwhunt'ai da' dune inghanne ts'iyawh 'abahanla. Barabbas 'en cha butoh 'adin'ai dune silhghi hukwa.

8 Ts'iyanne 'ilhozdil 'ink'ez Pilate 'uhuyúlhni, “Nawhudizulh totsuk 'il-hoghun dune 'adin'ai-un, 'en oolanadintnih. Doo cha za 'et dineh.”

9 'Et 'ubulhni, “Lizwif bulerwe, 'en oolanadutistnih hukwa' nahzun?”

10 Didutch'oh soo t'eoonínzun Lizwif lubret bumoodihne 'oonih gha Sizi hitl'aháyalhti 'et huwa.

11 'Et hoonts'i Lizwif lubret bumoodihne dune buba nus hónilht'i, Barabbas 'en Pilate yulanadootnih hidóni' ha.

12 'Et Pilate doo cha za dune 'ilhozdíline 'ubúlhni, “Ndun Lizwif bulerwe dáhni-un datísdlel hukwa' nahzun?”

13 'Et tube cho 'uhuyúlhni, “Tulalhgus undunilht'ah!”

14 'Et Pilate 'ubulhni, “Ndet whe tank'us 'úja?” 'Et hoonts'i 'on nus 'uhutni, “Tulalhgus undunilht'ah!” hutni.

15 'Et 'ilhozdíline hohót'e' ha Barabbas 'en Pilate buba yulanaditni. 'Et Sizi yahuyalhtsus, 'ink'ez tulalhgus k'ehíyolhtel ha butl'ayálhti.

*Lhugánne Sizi highu núwhulhya*

16 'Et lhugánne moodih\* ooyoh whunanistl'oo-i bez ts'e Sizi dáhinilhti 'ink'ez 'onghunne lhugánne ts'iyawh buka' hudáni'.

17 Luglok dulk'ún-i, 'i Sizi hit'aháyalhal. Whus n'awh nahínilhjaz, 'i hitsi nehídan'ai.

18 'Et hidílhiti' nahoooolh'i, 'ink'ez 'uhuyúlhni, “Lizwif bulerwe-un sa' cho hona.”

19 Duchun be hitsi ts'e' nalht'o, highá dizoh, hibut dugwútsi be nehúdulh, 'ink'ez hibut nachánuldulh cha' huyulh'en.

20 Sizi highu núwhulhya 'etsul 'uhayínla hukw'elh'az luglok dulk'ún-i highu nahuyílhchoot, 'ink'ez dich'oh hinaih be náhayalhti. 'Et 'awet tulalhgus k'ehuyitalhtel ts'e hitilhti.

*Sizi tulalhgus k'ehíyilhti*

21 'Et hidulh whe 'ilhoghun dune, Simon huyúlhni-un, Jerusalem ts'e tizya. 'En hidudizdil 'ink'ez Sizi ootulalhgus yuba idutitelh ha 'et néhininyoot, ndun Simon Cyrene whut'en-un, 'en Alexander 'ink'ez Rufus 'enne bubá 'unt'oh.

22 'Et Sizi Golgotha huwhútnei ts'e huyoolhti. Ndi Golgotha 'utsints'un niz'ai hutni whe' hutni.

23 'Et ts'ekoo too' 'ink'ez yoo, myrrh huyúlhni, hitadínla, 'i Sizi huyúhuyoolhna'i hukwa' huyínla, 'et hoonts'i 'aw lheyílhchulh.

24 'Et tulalhgus k'ehúyilhti 'ink'ez hinaih 'i 'uhúntúlhdulh whe higha 'aínlih whe hinaih lhtáhayulya.

25 Bundada' whe 9:00 'uhunit'oh at'en Sizi tulalhgus k'ehíyilhti.

26 Ndet la hukwa' huyínla hutni-un, 'et 'uk'ehúhoonguz, 'i hiyando whahidin'ai. Ndi khuni 'uk'ehúyínguz-i ndutni,

\* 15:16 Ndun moodih Pilate 'unt'oh.

Lizwif bulerwe, ni.

<sup>27</sup> Nane 'undunut'íhne cha huyulh tulalhgus k'ébihilhti, 'ilhoghun ooghu naílhni ts'ungus 'ink'ez 'ilhoghun ooghe 'intl'us ts'e.

<sup>28</sup> 'Uda' Yak'usda ooghuni 'uk'unusgúz-i whuz un'a 'uhóoja ndutni whe, "Dune ntsi'ne dult'oh huninzun."

<sup>29</sup> Dune 'oh whúya 'oh nudilhne nóndunul'us 'ink'ez Sizi highudloh, "Hee! Nyun lakw 'udini, 'Lugliz whucho yanahootányus 'ink'ez tat dzin na'whutanlelh,' dini?

<sup>30</sup> 'Andit 'ahoh nanaíndaih, 'ink'ez 'ududílyih," huyúlhni.

<sup>31</sup> Whuz un'a za Lizwif lubret bumoodihne 'ink'ez Moses be 'udustl'us 'uk'ununáguzne, 'enne cha, Sizi highudloh 'ink'ez njan dúlhodutni, "Uyoonne ilhyiz, 'et hoons'ti didutch'oh 'andit 'ududoolyih aít'oh.

<sup>32</sup> 'Andit Christ, Lizwif bulerwe ts'unoolh'-en nanaóoja,' 'et la neba 'alha' oot'e.'" 'Et nyoonne nane hizih tulalhgus k'ut sulhtíne, 'enne cha highudloh.

### *Sizi dazsai*

<sup>33</sup> Dzetniz 'et whuts'un n'un whe 3:00 at'en 'uhúnit'oh keyoh ndulcho whe tsalhgus naki.

<sup>34</sup> Whulh 'ilho hooloh sadzi ook'oh 'uhoonist'oh, 'et Sizi soo tube cho haínzul whe, dughuni k'un'a 'utni, "Eloi, Eloi, lama sabachthani," "SYak'usda, sYak'usda, di ha sladantni?" ni whe 'utni.

<sup>35</sup> 'Et whulohne dune 'et núdilhiane hidánt's'o, 'ink'ez 'uhutni, "Hadih Elijah hahuyih."

<sup>36</sup> 'Ilhoghun whusálgai, 'ink'ez duchun oolá'dul'oo-i ts'ekoo too' dunink'oz-i ye tunayuzsi, 'ink'ez ndo Sizi yuza bé yunintan, 'ink'ez 'utni, "K'at Elijah whusaínya 'ink'ez tilah tulalhgus k'ut nanáyoolhtelh."

<sup>37</sup> 'Et Sizi tube cho haínzul 'ink'ez dazsai.

<sup>38</sup> Lizwif bulugliz whucho chunkelh dizti-i oo'ih yúnant'i, 'i cha soo lhóohoolcho yo ún'a lhts'enchl'ul.

<sup>39</sup> Lhuganne moodih tulalhgus yubut usyin. Sizi nts'en'a la haínzul, 'ink'ez dazsai 'et yunalh'en. "Ndun dune 'alha azi Yak'usda ooYe' unli," ni.

<sup>40</sup> Ts'ekoo cha 'et núdilhya yoo 'az de whuts'un huwhunilh'en. Butoh Mary Magdalene cha, 'ink'ez Mary Jamesyaz, 'ink'ez Joses bulh buloo, 'ink'ez Salome cha.

<sup>41</sup> 'Enne Sizi Galilee 'et 'ut'en whe hiyunúnizdil 'ink'ez hila 'ít'en. 'Uyoonne ts'ekoo lhane cha 'et 'uhut'en. 'Enne Jerusalem ts'e heyuhanándil.

### *Joseph Sizi 'ayalhti*

<sup>42-43</sup> 'Et 'awet hulhgha ts'ótizut whe Joseph Arimathea whut'en-un whusaínya. 'En nahíyilhne toh boozi' unzoo-un 'unt'oh. 'En, 'oh de Yak'usda ook'úne' whut'en-un, 'et hukwa itís'en. 'Et dzin nats'ulyis dzin huba lhahúdutneh-un 'óohoont'oh. Soo Joseph oodzi hooni whe Pilate yubut nenínya, 'ink'ez Sizi oozu yuts'u yúka' dani'.

<sup>44</sup> 'Et Pilate ooba hooncha Sizi 'uda' dazsai. Lhugan moodih, 'en yuka' dani' 'ink'ez 'uyulhni, "Sizi 'uda' tilah dazsai?"

<sup>45</sup> 'Et hukw'elh'az lhugánne moodih, "Alha dazsai," ni. 'Et Pilate Joseph, "Sizi oozu nayólhchoot," yúlhni.

<sup>46</sup> Joseph naih dizti-i onket, 'ink'ez yuzi nanáyalhti, 'ink'ez nyoo naih dizti-i yughá yozduz. 'Et tse 'an whuz 'ayalhti, 'ink'ez tse cho whudunaídan'ai.

<sup>47</sup> Mary Magdalene 'ink'ez Mary Joses ooloo bulh 'enne bunalh, Sizi 'et nehínilhti.

## 16

*Sizi dunadija*

<sup>1</sup> Lizwif nahulyis dzin hukw'elh'az hulhgha ts'e Mary Magdalene, 'ink'ez Salome cha, 'ink'ez Mary James ooloo cha, yoo sooltsun-i honket, Sizi ooyust'e hiye hitilho huba.

<sup>2</sup> 'Om bun bundada' 'uda' lisman 'udechoo dzin, 'et sa haín'ai whe ts'un k'uz hutizdil.

<sup>3</sup> Whuz hidulh whe 'ulhodútni, "Tse cho ts'un k'ut whudándunin'ai-i mbe suba neba whusaídoo'alh?"

<sup>4</sup> Tse 'uda' whusandunilgai whe hotilh'en.

<sup>5</sup> 'Et tse 'an 'uhandil whe chilh ulhyul-i be dune unli, 'en nailhni ts'un'k'us usda whe hitilh'en. 'Et bugha 'ánjaz.

<sup>6</sup> 'Et 'ubúlhni, "Nulhjut iloh! T'eoonúszun Sizi Nazareth whut'en-un, tulalh-gus k'ehíyilhti-un, 'en ookunáhta whe 'aht'en. Hooloh! Dunadija whe 'unt'oh! Njan whunulh'en ilhté'-un.

<sup>7</sup> 'Awet nahdulh, Peter 'ink'ez 'onghunne Sizi yugha hodul'ehne cha ubudúhni, Sizi dája nohúlhni da' nohtso Galilee ts'e tíyalh 'et la ooh'en," 'ubúlhni.

<sup>8</sup> 'Et 'awet tse 'an tenáhalghaz 'ink'ez nahutílhghaz tube bughá ne'usjaz 'ink'ez 'aw dune lhodínel hunuljut 'et huwa.

*Sizi Mary Magdalene yunalhts'et haínya*

<sup>9</sup> 'Et Sizi dunadija hukw'elh'az, Lizwif nahulyis dzin 'om bun bundada' 'uda' 'et Sizi 'udechoo Mary Magdalene, 'en cho yunalhts'et hainya. 'En la lhtak'ánt'i ntsi'-i nudúdeh-i ye yáhanananyoot ínle'.

<sup>10</sup> Sizi yulh 'út'en ínle'ne hík'enudle, 'ink'ez hutso whe bughu ninya 'ink'ez 'ubudáni',

<sup>11</sup> Sizi khuna whe yan'en, 'et hoonts'i 'aw buba 'alha lhe'dusnih.

*Sizi nane yugha hodul'ehne bunalhts'et hainya*

<sup>12</sup> 'Et hukw'elh'az Sizi 'uts'un un'a be hóodat'en whe nane 'uts'un keyoh ts'e hí'us whe bunalhts'et hainya.

<sup>13</sup> Whusanáhit'az whe, 'onghunne bubulh náwhuhulnuk whe 'aw buba 'alha lhe'hudusnih.

*Sizi whunizyane 'on 'at 'ilhoghun bunalhts'et hainya.*

<sup>14</sup> 'Et hukw'elh'az Sizi yugha hodul'ehne whunizyane 'on 'at 'ilhoghun na'hut'alh whe bunalhts'et hainya. 'Et 'aw be 'alha' hoont'oh-i lhuht'i 'ink'ez 'uts'un 'oninzun. 'Et huwa mbene la yan'enne 'aw buba 'alha lhe'hudusnih, 'et Sizi hukwa' budáni',

<sup>15</sup> 'ink'ez 'ubulhni, "Yinka ndulcho whe náhdilh, 'ink'ez khuni unzoo-i yinka dune'ne whubunulhtun.

<sup>16</sup> Mbe ooba 'alha hoont'oh-un, 'ink'ez too be 'úlya de, 'en dutijih. Mbe la ooba 'alha lhe'hoot'oh-un, 'en hoonts'i hukw'un'a ooba nahutideh.

<sup>17</sup> Mbene la ooba 'alha' 'ust'ohne, 'enne la be úlhtus-un bugha óotas'alh. Si soozi' gha ntsi'-i nududeh-i dune ts'u hanáhuyuntiyulh. 'Uyoo khuni be cha yahatilhduk.

<sup>18</sup> Nahunit'a whe tl'ughus ntsi'-i hílhchoot, k'us lubezo whe hítnai' de, 'et hoonts'i 'aw dalhótisnel. 'Ink'ez undudáne butsi k'ehudilnih, 'enne cha soo ná'hutitnelh."

*Sizi yak'uz whenaja*

<sup>19</sup> 'Et hukw'elh'az 'et Sizi neMoodihti dune bubulh yálhduk 'etsul 'udíja whe, 'et yak'uz whenája 'ink'ez Yak'usda ooghu náilhnih ts'unk'us nátl'adida'.

<sup>20</sup> Yugha hodul'ehne ndulcho nahúdilh, 'ink'ez dune bulh yáhalhduk. 'Et neMoodihti bubulh 'út'en 'ink'ez be úlhtus-i butl'adán'ai, 'et huwa ooghuni be yahulhduk-un, 'alha' hutni whe' hutni. 'Et ndo honeh.

## Yak'usda Ooghuni Unzoo-i Luke 'Uk'uneyuzguz-i

*Luke ndi 'udust'us ndun Theophilus ba 'uk'uneyuzguz*

<sup>1</sup> Lhane 'uda' hoolhtus whe hit'en ndi be nawhutnuk-i ts'ih'un un'a ookwa ditni'-i, 'i ts'iyawh 'uk'ehuyanguz. 'Et 'uk'ehuyanguz whutso, 'i ts'iyawh ndi whenich'oh netoh neba 'alha' unt'oh.

<sup>2</sup> Soo 'udechoo whe' whudit'en 'et dich'oh duna be honalh'en 'ink'ez Yak'usda ooghuni be ne'úst'enne huzdli', 'enne nduwhi khuni netl'ahídanla-i 'unt'oh.

<sup>3</sup> 'Et Theophilus nyun dune uncha-un inli. 'Ink'ez si cha ndi 'uk'unutísuz whe 'unt'oh. 'Udechoo whe' whudit'en-un whuts'un nts'en'a la dahooja-un 'ink'ez ndet 'uwuhulhni, 'et ts'iyawh soo ts'ih'un un'a t'oonúszun 'et huwa.

<sup>4</sup> 'Et whe la ndet la 'onghohne whunyohodalh'e'-un, 'et tank'us un'a 'uhoont'oh k'us ts'ih'un un'a 'uhoont'oh-un, 'et la ts'ih'un un'a t'ewhüntanzeh.

*Zacharias oo'at, Elizabeth ooyaz duneyaz tileh. 'En 'unt'oh John dune too be 'ulh'en-un 'unt'oh*

<sup>5</sup> 'Et 'oh da' Herod 'en Judea yun k'ut whulerwe inle', 'et 'oh da' 'ilhoghun lubret, 'en Zacharias huyulhni, 'en Abijah bulh didowh-un 'unt'oh. Oo'at Elizabeth huyulhni, 'en Aaron yé dinzut-un 'unt'oh.

<sup>6</sup> 'Et nahult'oh Yak'usda nalh ts'ih'un dune 'uhint'oh. Ndet la Yak'usda ooghuni buba yutulhúhizye'-i 'ink'ez ndet buts'u hukwa' nínzun hik'une' tit'en ha, 'et ts'iyawh hukw'ú ne'hut'en. 'Aw hoonli-unyaz buk'eho'alh áit'oh.

<sup>7</sup> 'Et hoonts'i Elizabeth 'aw ooyaz hole' ait'oh 'ink'ez nahult'oh yoo'un hizulh, 'et huwa cha 'aw buyaz hole' ait'oh.

<sup>8</sup> 'Et 'awet Zacharias bulh 'únt'ohne k'un'a whe Yak'usda nalh lubret be 'ut'en k'oh huwana,

<sup>9</sup> nts'en'a la 'ilhone hinli whe lubret k'un'a né'hutileh, 'et whuz un'a Zacharias, 'en cha lubretne 'utahahúyalhti yoo sooltsun-i dutálhk'un ha. 'Inka neMoodihti oolugliz whucho ts'e danínya.

<sup>10</sup> 'Et yoo sooltsun-i yudilh'k'un whe 'et nduwhulyiz lhane 'az ts'e tenahududli.

<sup>11</sup> 'Et loodel k'ut yoo sooltsun-i dilhk'un, 'et nailhni ts'e, 'et lizas be hoodilt-sai 'et ts'eyin.

<sup>12</sup> Zacharias khun yutilh'en 'i be oogha únjaz 'ink'ez whenilhjoot.

<sup>13</sup> 'Et lizas 'uyulhni, "Zacharias wheniljut iloh. Yak'usda ntenadudli yudánt's'o. N'at Elizabeth ooyaz duneyaz tileh, 'ink'ez boozi' John be ootanzilh.

<sup>14</sup> 'En gha dawhulcho be hootánt'e' 'ink'ez whuntálhni. 'Ink'ez whuzdli de, lhane cha huwhuntálhni.

<sup>15</sup> 'Alha neMoodihti oonah dune uncha-un tileh. Ts'ekoo too' k'us too ulhtus-i cha lhitisnel. Whutileh whutso 'et hoonts'i Ndoni be dutibun.

<sup>16</sup> 'Ink'ez Israel oots'u hainzutne, 'enne lhane neMoodihti buYak'usda ts'u butileh.

<sup>17</sup> 'Et nus hoo'en-un Elijah huyulhni, 'en k'un'a 'et whuz un'a Ndoni ye ulhtus-i be neMoodihti yutso tiyalh. Ndiz un'a nja dotat'elh, lhane ts'oodunne bubáke budzi buts'un tizoo' nabutilhtselh. Mbene la 'uk'unulhe'ust'enne, 'enne lhane ts'ih'un 'unt'ohne ye whunih-i

hitálhchulh. 'Ink'ez dune, 'enne lthane neMoodihti buts'u tiyalh-un, 'et wheni lhábudutileh," lizas 'uyulhni.

18 'Et Zacharias nyoon lizas yoo dulhkut, "Nts'en'a t'ewhuntsizeh? Nilh'en duneti 'ust'oh 'ink'ez s'at 'en cha yoo 'un uzulh whe 'unt'oh."

19 'Et lizas 'uyulhni, "Si Gabriel 'ust'oh. Yak'usda zih usyin-un 'ust'oh. Nts'u whúsaz'a' whe 'ust'oh nyulh yatisduk ha. Ndi khuni unzoo-i nyudutásnelh ha.

20 Soo zilhts'ai! Sghuni daja dusni, soo 'et néwhults'ut de, 'et ts'iyawh 'et dótanelh. 'Et hoonts'i daja dusni-un 'aw mba 'alha lhe'hoot'oh. 'Inka ndet dzin 'uwhutanelh whuts'un, 'aw yalhtuzalhduk!" yulhni.

21 'Ink'ez dune, 'enne ts'iyawh Zacharias hika tse hooli, 'ink'ez daja whusuba 'unt'oh sa' whe luglíz wucho ts'e 'ut'en.

22 Tenanja whe 'aw bubulh yaóolhduk ait'oh. 'Ink'ez t'ehoninzun hoonliyaz benghun néwhults'ut whe 'unt'oh. 'Ink'ez 'ants'i buba núlhni whe bubulh yalhduk.

23 'Et hukw'elh'az ne'úle-un 'etsul 'uhooja whe, 'et 'awet duyoh ts'e whenája.

24 'Et hukw'elh'az oo'at Elizabeth ooyaz 'ucháinya whe kwulat sanun 'et duwhulyiz 'et 'ilhoghun inda'. 'Et nja dutni,

25 "Et whuz un'a azih neMoodihti sulh 'ut'en. 'Oh da' dzin sunalni inle' whe ndet la hukwaya usdli-un, ts'iyawh sts'u hanáhonla."

*Ndun lizas Gabriel, 'en Mary 'uyúlhni, "Ts'oodun ba' tanelh. 'En Sizi dutanelh."*

26 'Et 'awet bulh lkh'utat sanun whe Yak'usda ndun lizas Gabriel huyulhni, 'en keyoh Nazareth ts'e wheyalh'a'. Njan keyoh 'et yun k'ut Galilee whuz'ái.

27 Whuz ts'e 'ilhoghun ts'eke sak'úsda unli-un, 'en ts'un whel'a'. 'Ilhoghun dune, Joseph huyúlhni, 'et David ts'u haindene, 'en 'ilhoghun 'unt'oh. 'En yughu tidalh-un yuts'u lhaoodinla. 'Et ndun sak'úsda-un, 'en Mary huyúlhni.

28 Lizas yuts'o whusainya de, 'et nja dúyulhni, "Whunílhni! Yak'usda nts'un unzoo! Nemoodihti nyulh 'unt'oh 'et huwa ts'ekoo toh 'uk'enus hoont'i'-un inli!"

29 'Et yutilh'en whe 'et tube oogha únjaz. 'Ink'ez 'et howu nuni nuzut ooghuni daja ni whe 'utni.

30 'Ink'ez lizas 'en 'uyúlhni, "Mary niljut iloh! Yak'usda nyulh hoont'i'.

31 Hadi' ts'oodun ba' tanelh. Duneyaz nyaz tileh. 'En Sizi dutanelh.

32 'En ncha-un tileh. 'En 'uhidutanelh soo 'udedo-un ooYe' tileh. 'Ink'ez Yak'usda neMoodihti David ootsoda'-un, ndet la hukw'inda'-un, 'et yutl'aóoti'alh.

33 'Et whuz un'a Jacob oots'u haindene 'ilhiz wheni buba lerwe tileh. 'Ink'ez njan lerwe tileh-un, 'aw whutoh hootáloh."

34 'Et Mary lizas 'ulhni, "Nts'en'a 'uwhutanelh, 'aw dune t'enuzusun whe 'ust'oh."

35 'Et lizas yulh yalhduk, "Ndoni nk'edinde 'ink'ez 'udedo-i ye ulhtus-i, 'i nk'ut sawhus'ih be whútaleh. 'Et huwa ndi yust'e lubeshi ooghu hooloh-i, 'i whuzdli de, 'en Yak'usda ooYe' hidutanelh.

36 'Andit 'awet nyunat-un Elizabeth yoo'un uzulh-un, 'en hoonts'i duneyaz oochainya. Ndun 'aw buzkeh hole' ait'oh huyulhni, 'et hoonts'i 'en 'awet whulh lkh'uta sanun be sul'i.

37 'Alha 'i be Yak'usda 'en 'aw hoonli-unyaz ooba hoolhtus-un hooloh."

38 'Et Mary 'uyúlhni, "Hadi', si neMoodihti be 'ulhna-un 'ust'oh! Nts'en'a la nghuni k'un'a daootanelh dini, whuz un'a sulh 'úhoneh." 'Et lizas yugho whenája.



*Mary 'en Elizabeth 'atsulyaz whuba yuzisda*

39 'Et hukw'elh'az Mary lhadúja. 'Et yun k'ut nódist'ai, whuz Judea yun k'ut 'ilhoghun keyoh whuz'ai, 'aho whuz whinya.

40 Zacharias ooyoh daninya 'ink'ez Elizabeth hadih yulhni.

41 'Et Elizabeth Mary daja ni yuduzts'ai ibulh ts'oodun oochan ts'e tilhtloh. 'Ink'ez 'aho Ndoni be dizbun.

42 Elizabeth soo tube cho 'uyúlhni "Ts'ekoo toh 'uk'enus hoonzoo-un nyulh 'uhooja. 'Ink'ez nyaz whutáleh-un, 'en dawhuldzoo'-un nghá whults'ut!

43 Nts'en'a whe sgha whults'ut sMoodihti ooloo 'en sghu ninya.

44 'Alha, hadih 'usudini whe nyuduzústs'ai ibulh, ts'oodun schan ts'e hoont'i' k'et tilhtloh.

45 Mbe la ts'eke ooba 'alha' hoont'oh-un, 'en 'uk'enus hoonzoo-un oogha whults'ut. Nts'en'a la neMoodihti daja yulhni-un, ooba 'alha' hoont'oh, 'et huwa 'oh te ooba ne'whutit'en."

*Mary ooyun*

46 'Et Mary nja dutni,

"Szul, 'i be neMoodihti ye uncha-i yudílhiti'.

47 'Ink'ez Yak'usda súlh yih-un. 'En be syughi whunílhni.

48 'Alha ndun be 'ulhna-un, nts'en'a yo 'ududildzun-un, 'et t'ewhuninzun.

Soo cho whunulh'en, 'andit whuts'un, nus de cha, 'ilhiz wheni ndi yun k'ut ts'iyanne soo 'uk'enus hoonzoo-un bulh 'úhooja sodutánelh.

49 'Alha mbe la hooncha whe tune' sulh'en-un, 'en be óonujut-un 'unt'oh 'ink'ez boozi', 'i 'uk'enus diziti'.

50 Ndi yun k'ut didohne, 'ink'ez 'on 'un 'ubundunidohne, mbene la 'unt'oh-un k'un'a hidólhti', 'ink'ez ye nuljutne, 'enne ts'iyawh bugha te'ninzun.

51 Dugan oonut'i be hoolhtus tune' 'ut'en. Mbene la dudzi be 'ududílti'ne, 'enne ts'iyawh yabanla.

52 Mbene la dune nchane huk'odáls'i', 'et 'enne nanábanla. 'Et mbene la 'aw soo 'unt'oh lhilohne, 'enne híncha ubulhtsi.

53 Mbene la ooye'últs'ilhne, 'enne unzoo-i be ubudilhun. 'Ink'ez mbene la hoonzoo' 'unt'ohne, 'aw hoonliyaz bughá lhi'al whe whenábalh'a'.

54 Be 'ustlene Israelne, 'enne bugha te'ninzun, 'et whunalnih whe bula 'uja.

55 'Et whuz un'a la nebáke ubulh yailhduk whe Abraham 'ink'ez yuts'u haíndene, 'enne 'ilhiz wheni 'uhint'oh, 'et whuz un'a ubudáni'!"

56 'Et Mary ta sanun at'en whe Elizabeth yuzih inda'. 'Et hukw'elh'az duyoh ts'e whenaja.

*John dune too be 'ulh'en-un 'awet whutaleh*

57 'Et 'awet Elizabeth ooyaz whutaleh 'et neóodilhdzut 'ink'ez ooye' whúzdi'.

58 'Et yenghoh dilhts'ine 'ink'ez oonatneke whulh 'úhuduzts'ai nts'en'a la neMoodihti yugha te'ninzin. 'Ink'ez ts'iyawh hiyulh whunílhni.

*John 'awet yuka dune unli-i k'ut hitit'us*

59 'Et 'awet whulh lkh'udit dzin whe ts'oodun 'en yuka dune unli-i k'ut hitit'us. 'Ink'ez oobá boozi' Zacharias 'i be huyootázilh.

60 'Et hoonts'i ooloo, "Awundooh! Ndi boozi' John be huyootázilh," ubulhni.

61 'Et huyúlhni, "Aw nyunatneke butoh 'aw John boozi'ne hooloh!"

62 'Et oobá di oozí' higha dúta'alh 'et t'ehontizeh hukwa' huninzun. 'Inka dula be hiba núlhni whuz un'a huyoodulhkut.

63 Dula be núlhni whu 'udustl'us buts'u ha' dani', 'ink'ez 'uk'une'uzguz, "Boozi' John hidutanelh." 'Ink'ez ts'iyawh buba hooncha.

64 'Et khunsul yanawhénilduk whe Yak'usda dálhti'.

65 Yunat whut'enne, 'enne ts'iyawh nujut bughu nédilt'sut. 'Ink'ez Judea yun k'ut nodist'ai-un dulcho 'et whut'enne, 'enne ts'iyawh howu yahalhduk.

66 'Et mbene la whulh udants'one, ts'iyawh dudzi be hódanla 'ink'ez 'ulhodutni, "Ndun ts'oodun dant'oh-un suba oole?" hutni. 'Ink'ez neMoodihti dula be yula 'ut'en.

### *Zacharias nus hoo'en-un*

67 'Et 'awet oobá Zacharias, Ndoni be dizbun 'ink'ez nus hoo'en whe yailhduk whe nja dutni,

68 "Israelne buYak'usda 'ink'ez neMoodihti, 'en dalzoo' la! Oodune'ne, 'enne buts'oozya nabootakulh ha.

69 David 'en Yak'usda be 'ustle-un, 'en yuts'u haindene, 'enne bugha neulhyis-un hooncha-un, 'en neba yulhtsi.

70 'Uda' whe' whudit'en whuts'un, 'et whuz 'un'a Yak'usda be nus hoo'enne, 'enne bube yailhduk.

71 'Et whe nech'az yalhdukne 'ink'ez mbene nets'u dutnine, 'enne ts'iyawh bula k'éhaoodilt'sut, 'et whe neulhyis.

72 Nebáke 'enne Yak'usda bugha te'ninzun. 'Ink'ez ndi khuni buba lhaídinla-i, 'et yunalnih.

73 Netso da'-un Abraham nts'en'a Yak'usda dughuni yutl'adan'ai whe 'ink'ez yuts'u náhizya,

njan 'et wheni neba' whutilelh ha,

74 'et whe nech'az ditnine bula k'éhaoodilt'sut 'et whe neulhyis. 'Ink'ez 'aw whelhts'uniljut whe Yak'usda ba' uztit'elh.

75 Lubeshi lhe'ulh'enne uztiléh 'ink'ez ts'ih'un un'a uztit'elh, 'et whuz un'a Yak'usda oonalh dzin totsuk ts'ukhuna whe 'en ba' ts'ut'en.

76 'Ink'ez nyun ts'oodunyaz, 'en mbe la k'us 'udedo-un, 'en ba nus hoo'en-un nyodutanelh.

NeMoodihti 'en ti hoonzoo ooba whutalhtselh ha ootso tanyalh 'et huwa.

77 'Ink'ez wheni oodune'ne soo cho t'ets'onózin dahoont'oh whe uzditjih-un 'ink'ez nelubeshi cha neba gak yutilhtselh,

'et huwun nedutanelh.

78 'Et whutso neYak'usda nek'entsi' whe negha te'nanzin.

'Inka mbe la sa yo tá'aih ts'utni-un,

'en ndus de whuts'un nets'ú k'unadaih.

79 Mbene la tsalhgus yo dilhts'ine 'ink'ez datsah huba 'unt'ohne cha, 'enne ts'iyawh ubeidutadih.

'Ink'ez lhutiyalh-un whe nedzi soo' hot'e',

'et nts'e whehon'a-un, 'et whuneuntilhtun.

'Et huwa Yak'usda be nus hon'en-un nyodutanelh,"

ni Zacharias.

80 'Et ndun ts'oodun John, 'en nizyai 'ink'ez ooyughi ulhtus suli'. 'Ink'ez nkede suba Israel oodune'ne bunalhts'et haooya' dunábuntiltun ha, 'et whuts'un nts'e la dune lhuhoot'ih ts'e inda'.

## 2

*Mary 'udechoo ooyaz whuzdli', Sizi 'en 'unt'oh*

<sup>1</sup> 'Et 'oh da' 'ilhoghun dune Caesar Augustus huyulhni-un, 'en whunilh-choh keyoh dilhts'ine, 'enne ndi khuni bunalh yutulhuhizye'. Ts'iyanne oozi' 'i ts'iyawh uk'ehitagus ha.

<sup>2</sup> 'Et 'oh da' 'oh whuya whudizulh whutoh, 'ilhoghun dune Cyrenius huyulhni, 'en yun k'ut Syria whumoodih inle'. 'Et 'oh whuya whudizulh 'et whuts'un buboozi' 'uk'ewhehininguz.

<sup>3</sup> 'Inka ts'iyanne dich'oh dukeyoh whuz whehandil buboozi' uk'ehuyitagus ha.

<sup>4</sup> 'Et Joseph 'en yun k'ut Galilee 'ink'ez keyoh Nazareth, 'et whehúdin'az 'ink'ez David ookeyoh, Bethlehem huwhutni, whuz whehan'az Joseph David ts'u hainzut-un 'unt'oh 'et huwa.

<sup>5</sup> Mbe la Mary yughu tidalh whe yuts'u nahizya-un, 'en njan Mary ts'oodun ba 'unt'oh whe yulh whin'az buboozi' 'uk'ehuyitagus-un ha.

<sup>6</sup> 'Awet 'et huzke whe ooyaz whutaleh-un bulh 'et neoodinzut.

<sup>7</sup> 'Et 'awet 'udechoo ooyaz whuzdli'. 'Et nyoo layin naih yughá ozduz 'ink'ez musdoos yez a'alh-i, 'i be yalhti. 'Aw ts'uztez bayoh nahuhó'alh ait'oh, ts'iyantsuk whudizbun 'et huwa.

*NeMoodihti oots'u hayanduz-i, ndulcho whe bunat bube dindi*

<sup>8</sup> 'Ilhoghun yun k'ut dzoh nilhdza'yaz, 'et 'usbai ghunline tl'o k'ut 'et huwhut'i, 'ink'ez 'ulhdzis nduwhulyiz whe dughuna' highunli.

<sup>9</sup> 'Ink'ez nilh'en, 'awet neMoodihti oolizas bubut usyin. 'Ink'ez neMoodihti oots'u hayanduz-i, ndulcho whe bunat bube dindi. 'Ink'ez 'awet tube whe hunilhjoot.

<sup>10</sup> 'Et lizas ubulhni, "Whenoolhjut junih! Nulh'en ndi khuni unzoo-i soo ts'iyanne dune ye hóotat'e'-i, 'i nohts'ú tis'ai.

<sup>11</sup> 'Andit dzin David ookeyoh, nohtilhyis-un nohba whuzdli. 'En Christ neMoodihti ts'utni-un, 'en 'uja.

<sup>12</sup> Ndiz un'a whe t'ewhutihzeh ha nohba whe hoodal'en nts'en'a la dahooja, lhe'unt'oh layin oogha ósduz 'ink'ez musdoos yez a'alh-i, 'i bet usti."

<sup>13</sup> Khunsul lizas 'ink'ez lhane lizas lhuganne, 'enne ndus de hahandil. 'Et whe Yak'usda 'on nus hiba oodilhti' whe nduhutni,

<sup>14</sup> "Yak'usda 'udedo yak'ut, 'en uzdilhti'.

'Ink'ez ndi yun k'ut nedzi doghel,

'i be ts'iyanne dune buts'un hoonzoo hole!'"

<sup>15</sup> 'Et 'awet ndunne lizasne yak'uz ts'e bugho whenáhidil. 'Usbai ghunline 'ilhodonti, "Dugwe' Bethlehem ts'uztoodilh. 'Ink'ez nts'en'a la dahooja 'et neMoodihti nedani', 'et la ts'onoolh'en!'"

<sup>16</sup> 'Et 'a cho n'az de hidulh. 'Aho Mary 'ink'ez Joseph 'ink'ez ts'oodun musdoos yez a'alh-i bet usti whe bugho hunindil.

<sup>17</sup> Hiyen'en hukw'elh'az, nts'en'a ts'oodun ghun lizas 'en ubudáni', 'et whunat ts'iyanne ut'ehonalhdzin whe

<sup>18</sup> mbene la yudants'one 'usbai ghunline daja hubulhni, 'enne ts'iyawh buba hooncha sulí,

<sup>19</sup> 'Et Mary dahooja-un, dudzi be oodanla 'ink'ez 'ahoolhyiz howu nuni nuzut.

<sup>20</sup> 'Et 'awet 'usbai ghunline de 'usbai hits'u whenadil. 'Et ndet hodants'o-un, 'ink'ez huhon'en-un cha, 'ink'ez nts'en'a bubulh yahalhduk, 'et huwun Yak'usda hidilhti' 'ink'ez 'on nus hoonzoo k'un'a highu yalhduk.

*Sizi 'awet yuka dune unli-i k'ut hitit'us*

21 Whulh lhk'udit dzin lhaóoduja whe ts'oodun yuka dune unli-i k'ut hitit'us, 'ink'ez huyoozi' be huyootázilh, Sizi huyulhni. 'Awhuz 'ucha dinda whe 'et ndi boozi', 'i lizas yugha ídin'ai.

*Sizi lugliz whucho ts'e, 'et neMoodihti oonalh ts'et hahítihltel*

22 'Et Moses be 'udustl'us k'ut daja ni whe ts'ekoo buyaz whulih hukw'élh'az soo ná'hut'ih te za lugliz danáhadaih, 'et ndúwhulcho whe Mary lhaóodinla. 'Ink'ez ts'oodun Jerusalem ts'e whehíyalhti neMoodihti oonalh ts'et hahúyoolhtel' et hukwa.

23 NeMoodihti dughuni butl'aidan'ai-i whuz un'a 'uk'ehúhonguz whe nja dutni, “Mbene la duneyaz 'udechoo whuzdline, 'enne ts'iyawh neMoodihti ba 'udun neltine hinli whe' hint'oh.”

24 'Ink'ez ndai la loodel k'ut hidutálhk'un-i, “I nanki dut'ai dove huyulhni, k'us nanki dut'aiyaz 'i cha pigeon huyulhni.” NeMoodihti dughuni butl'aidan'ai-i, 'i cha whuz un'a za 'utni.

*Simeon 'en neMoodihti ooChrist yunalh'en*

25 'Et 'ilhoghun dune Simeon ts'utni-un, Jerusalem whut'i-un. Ts'ih'un un'a 'unt'oh 'ink'ez 'ahoolhyiz Yak'usda be 'ut'en k'oh 'uwwhulh'en-un. Mbe la Israel oodune'ne k'enábunta'oh-un, 'en yuka tse hóolih. 'Ink'ez Ndoni cha yulh 'unt'oh.

26 Datitsah whutso neMoodihti ooChrist ts'utni-un, 'en yuti'elh. 'Et whuz un'a Ndoni 'en whut'einalhdzin.

27 'Et whe Ndoni gha lugliz whucho daninya. 'Ink'ez ts'oodunyaz Sizi, 'en oodusneke, 'enne hik'uz dahinilhti. NeMoodihti dughuni butl'aidan'ai-i, ndet la nanki 'u hukwa' ninzun-un, 'et hukw'u ne'hutit'en ha.

28 'Et 'aho Simeon yilhchoot 'ink'ez nja dutni whe Yak'usda yudílhiti',

29 “SMoodihti si nye 'ulhna-un usdli.

'Ink'ez nts'en'a nghuni k'un'a,  
'et 'uhoont'oh sdzi dizghel whe daóosa.

30 'Alha sna be be nétalhyis-un hoos'en.

31 Ts'iyanne dune bunalh lhaoodinla.

32 'Udun yun k'ut whut'enne, 'enne cha buba be hoot'en-i 'unt'oh. 'En be hiti'elh.

'Ink'ez ndune'ne Israel oodune'ne,  
'enne cha buba idizti-un 'en 'unt'oh,” ni.

33 Nts'en'a yughu yatilhduk-un 'et huwa Joseph 'ink'ez ts'oodun ooloo bulh buba hooncha.

34 'Et Simeon Yak'usda ts'u hukwa' dani' buts'un óozoo' ha. 'Ink'ez ooloo Mary 'en nja ndi yulhni, “Ndet huba ndun ts'oodun Yak'usda 'en buba 'utahayálhti-un 'unt'oh, 'et nyudutasnelh. Israel oots'u hainzutne, 'en gha lhane natikulh 'ink'ez lhane dunahudutádulh. 'Ink'ez highu t'eeoninzun 'et hoonts'i hich'az yatilhduk.

35 'Ink'ez nyunch'oh nzul saluzti be huyuzgwut le'tinelh. 'Ink'ez lhane dudzi be daja huninzun, 'et ts'iyawh ts'iyanne nalh ts'et haootilts'ulh.”

*Anna 'en cha Sizi yan'en 'ink'ez Yak'usda dílhiti*

36 'Et 'awet 'ilhoghun ts'eketi, Anna huyulhni, Yak'usda be nus hoo'en. Phanuel ootse', 'ink'ez Asher bubulh didowh-un, 'ilhoghun 'unt'oh. Tube yoo 'un uzulh. 'Udechoo ki tit'elh whutso, 'aw dune t'enuszun-un 'unt'oh. Lhtak'ant'it yus k'ut duki zih inda'.

<sup>37</sup> Ndun tsandilh, 'en lhk'udit whunizyat 'on 'at dit be yus k'ut at'en (84). 'Et 'aw lugliz whucho whuch'a lhiyal. 'Et hoonts'i dzenis 'ink'ez 'ulhdzis ibulh soo hooni 'ink'ez tenadudli, 'i be Yak'usda ba ne'ut'en-un unli.

<sup>38</sup> 'Et ndun 'oh whuya hoozulh whe daninya 'ink'ez Yak'usda dílhí'. Jerusalem dílhíts'ine, mbe la nabootakulh-un, 'en hika itís'en, 'et 'en ghun Anna budáni'.

*Joseph 'ink'ez Mary, ts'oodun bulh bukeyoh Nazareth ts'e whenahit'az*

<sup>39</sup> 'Et 'awet Joseph 'ink'ez Mary neMoodihti dughuni butl'aidan'ai-un, 'et ts'iyantsuk whe lhahuduja whe yun k'ut Galilee 'ink'ez bukeyoh Nazareth ts'e whenahit'az.

<sup>40</sup> 'Et ts'oodun 'awet nuyeh 'ink'ez ooyughi be ulhtus súli'. Ye whunih-i be dizbun 'ink'ez Yak'usda ye unzoo-i bulh 'unt'oh.

*Sizi 'awet chilh unli whe keyoh Jerusalem usda. Mbe la yudits'one tube buba hooncha sulí'*

<sup>41</sup> 'Awet oodusneke naoodizulh totsuk Jerusalem ts'e k'unáhut'us. Na'hutit'ulh whe whunahutilnih butus lhusiya-un, 'et hukwa whuz whehán'az

<sup>42</sup> 'Oh da' ndun ts'oodun 'en whunizyat 'on 'at nat be yus k'ut (12) whe Jerusalem ts'e k'unáhudulh, butus lhusiya da' hukw'un'a 'et huwa 'uhut'en.

<sup>43</sup> Nkeda' la 'etsul hooja whe k'oh nahutist'az. 'Et hoonts'i 'awhuz ts'oodun Sizi Jerusalem usda. Joseph Sizi ooloo bulh 'aw t'ehonúszun.

<sup>44</sup> 'Uyoonne bulh la 'ut'en huninzun. 'Ilhudzin at'en nuhúz'az 'et 'andit za hika itís'en. 'Et oonatnéke 'ink'ez ook'ekene, 'enne butoh hikunúta.

<sup>45</sup> 'Et 'aw nalhuhuyílhtel 'et doo cha Jerusalem ts'e whenáhíht'az. 'Ink'ez 'et hikunúta.

<sup>46</sup> Tat dzin hukw'elh'az 'et 'andit za nahuyilhti. Lugliz whucho 'et whubodulh'ehne butoh usda. Uboozílhts'ai 'ink'ez uboodulh'kut.

<sup>47</sup> Mbe la yudits'one tube buba hooncha sulí'. Ts'iyantsuk t'ewhunínzun 'ink'ez ts'iyawh ts'ih'un un'a ubúlhni.

<sup>48</sup> Oodusneke ngut ndet la 'ut'en-un 'et usda whe hinilh'en whe buba hooncha. 'Et ooloo yúlhni, "Neye' di ha whuz un'a une'ilh'en? Mbá 'ink'ez si tube nghu ni ídli whe nkúnita."

<sup>49</sup> 'Et ubúlhni, "Di ha skunahta? 'Aw lawk t'ewhunuzúhzun 'uBá be 'ut'en k'oh huwa óosna' huba' hoont'oh?"

<sup>50</sup> 'Et daja ni whe 'utni, 'et 'aw t'ehonúszun.

<sup>51</sup> 'Enne bubulh whenát'az. Nazareth ts'e whenáhidil 'ink'ez butl'a'dudilti. 'Et ooloo ndi ndet 'uwuhulhni-un, dudzi yo danla.

<sup>52</sup> 'Ink'ez Sizi 'on nus whunih cha lleh 'ink'ez nus lhuniyelh. Yak'usda yuba hoont'i, 'ink'ez dunene, 'enne cha hiba hoont'i'.

### 3

*John dune too be 'ulh'en-un ts'iyanne, "NeMoodihti ooti ooba lhaoodahleh' ubulhni*

<sup>1</sup> 'Et 'awet Caesar Tiberius, 'en yun k'ut ndulcho whe lerwe inle'. Whunizyat 'on 'at kwulat yus k'ut (15) ant'e'. 'Et Pontius Pilate, 'en Judea yun k'ut whumoodih unli. Herod, 'en Galilee yun k'ut whumoodih unli. Bulhutsin Philip, 'en Iturea 'ink'ez Trachonitis yun k'ut whumoodih unli. 'Ink'ez Lysanius, 'en Abilene yun k'ut whumoodih unli.

<sup>2</sup> Annas 'ink'ez Caiaphas, 'enne 'udedo lubretne 'uhint'oh. 'Et 'oh whuya whudizulh whutoh 'et John Zacharias ooye' 'en dune luhoot'ih ts'e usda whe Yak'usda ooghuni ookw'édilts'ut.

<sup>3</sup> 'Et Jordan koh 'et whunat 'oh nuya whe dune ubulh yalhduk too be' hoolneh ha hukwa. 'Et whe whubunulhtun dulubeshi ch'a dudeni náhoondunooleh ha. 'Et whe lubeshi buba hooloh yutilhtselh.

<sup>4</sup> 'Et whuz un'a Isaiah ooghuni 'uk'eguz whe nja dutni, "Dune luhoot'ih ts'e dune yiz dusts'ai whe 'ultus-un huyih whe nja dutni, 'NeMoodihti ooti lhaoodahleh!

Ooti soo lhts'e oodiz'a ooba whulhtsi!

<sup>5</sup> Deyo totsuk naoodutibun.

Dzulh 'ink'ez shus bulh ts'iyawh lhgha yo na'titnelh.

Whuduzoh-un 'et cha lhts'enaoodutákih.

Yun núdist'ai-un 'et cha lhgha na'whutátnelh.

<sup>6</sup> 'Ink'ez nts'en'a la Yak'usda dune ulhyis-un, 'et ts'iyanne whuti'elh."

*John dune too be 'ulh'en-un, 'en dune bulubeshi huwun khuni ulhtus-i be ubulhni*

<sup>7</sup> Dune lhane yughu nindil too be' hutilnelh hukwa' huninzun. 'Et 'ubulhni, "Nohni lubezo tl'ughus buzkehke le'áht'oh. Yak'usda lubeshi 'ulh'enne bubulh húnalch'oh-un 'et whuz de hoolts'ulh, mbe 'unohúlhni whuch'a úlhwas?

<sup>8</sup> Whute, noh lubeshi ch'a noheni náhandunooheh de, ndaht'en-un ts'iyanne t'ehonózin ndaht'oh la. 'Ink'ez khun lhts'un njan dudoohni' junih wheni Abraham oots'u haindene 'uts'int'oh. 'Alha ts'ih'un un'a nohdusni, Yak'usda soo 'ultus whe 'unt'oh, ndi tse 'i hoonts'i 'i be Abraham oots'u haindene ubutilhtselh.

<sup>9</sup> Njan soo cho whunulh'en, nohni duchun lé'áht'oh. 'Awet tsetselh be lhadint'oh-un. 'Et nohni whulohne duchun oomai' hooloh-i, 'et ndaht'oh. 'Andit hoonts'i ndai la oomai' hooloh-i, tsetselh be oogih tubulh tshidantsel 'ink'ez hidutálhk'un."

<sup>10</sup> 'Ink'ez dunene ts'iyawh huyoodulhkut, "Ink'ez nts'en'a suba dats'óneh."

<sup>11</sup> 'Et ubulhni, "Mbe la ts'oot'an nanki 'ut'i-un, mbe la ts'oot'an lhitih-un, 'en 'ilho yugha óolhchoos. 'Ink'ez mbe la t'alh-i 'ut'i-un, 'en cha whuz un'a za edóneh."

<sup>12</sup> Ndunne sooneya 'ilhunaos'aihne, 'enne cha too be' hutilnelh ha hits'u whusaindil whe huyoodulhkut, "Whuneodulh'eh-un nts'en'a daztinelh"

<sup>13</sup> 'Et 'ubulhni, "Ndet 'ultsuk italhchulh huba' hoont'oh-un, 'et 'aw 'on lhe'izólhchoot."

<sup>14</sup> Lhuganne, 'enne cha huyoodulhkut, "Wheni do' daztinelh." 'Et ndúbulhni, "Khun nohni dune sooneya nogha hoo'alh uboolhtselh junih! Khun dune whuts'it be buk'éhoh'alh junih! 'Ink'ez daltsuk nohba k'elha whutaleh-un, 'et 'awet hóht'e' huba' hoont'oh!"

<sup>15</sup> Ts'iyanne hoonli-unyaz hukwa tse huhooli. 'Et dudzi be dahoot'oh suba John 'en ghun. Mbe la Christ ts'utni-un, 'en tilah 'unt'oh k'us 'awundoo.

<sup>16</sup> John ts'iyawh 'et 'ubúlhni, "Too za-i be too bé' nohus'en. 'Et hoonts'i sk'elh'az whusatiyalh-un, 'en sanus dizti' whe 'unt'oh. 'Aw ookechun natl'oolh ooba k'unatis'uk 'et hoonts'i huba soo lhe'ust'oh. Ndon 'en Ndoni 'ink'ez kwun bulh 'i be too be' nohtilh'elh.

<sup>17</sup> Lufoos tl'o mai' be tahawhúlts'ih-i, 'i lhaídilhduz. 'Ink'ez ndi ndai la tl'o mai' yuk'ut tahawhúlts'ih-i, 'i cha yuk'ut lhadút'ih de, 'ink'ez yuna'ulhdoh.

'Ink'ez ndi mai ndai la lhaduja-i, 'i ts'iyawh dénudzih 'ink'ez mai bayoh ts'e wheyúli. 'Et hoonts'i ndai la ndi kwun 'aw nalhnusne, ndi oot'ooz 'i be duták'un," ubúlhni.

<sup>18</sup> Ndi Khuni 'ink'ez 'uyoo khuni 'i bulh 'et whuz un'a khuni unzoo-i be budáni'. 'Et whuz un'a khuni ulhtus-i be ubúlhni.

<sup>19</sup> 'Et awet ndi yun yumoodih Herod, 'en 'ilhoghun 'unt'oh. 'En dulhutsin Philip oo'at 'en yuzih usda. John yulhni, "Lubeshi 'ilh'en." 'Udun tank'us un'a cha 'ut'en. 'Et cha ts'iyawh lubeshi 'uhoont'oh yulhni.

<sup>20</sup> 'Et ndi ndai la lubeshi 'uyulh'en-i, 'i 'uyoo cha yuts'u na'ul'ih. Ndiz un'a nja duja, John 'en 'azdinla-un 'aiyan'ai.

### *Sizi too be 'úlya*

<sup>21</sup> 'Et 'awet ts'iyanne dune too be 'úlya. Sizi 'en cha too be' yinla. Tenawhéndunidli 'i bulh yat dáha' dankez,

<sup>22</sup> 'ink'ez Ndoni dut'ai, dove huyulhni, 'i k'un'a ndus de hát'oh 'ink'ez yuk'ítoh. 'Et ndo yak'uz khuni huduzts'ai, 'i njan dutni, "Nyun s'Ye' ook'esi'-un 'int'oh. Tube nyulh hoonúst'i'."

### *Sizi 'ubé dínzutne*

<sup>23</sup> 'Et Sizi tat whunizyat at'en be suli' (30) 'et 'awet whé'nit'en. Ts'iyannetsuk 'en Joseph ooye' huninzun.

'Ink'ez 'en Heli ooye'.

<sup>24</sup> 'En Matthat ts'u hainzut-un,

'en Levi ts'u hainzut-un,

'en Melchi ts'u hainzut-un,

'en Janna ts'u hainzut-un,

'en Joseph ts'u hainzut-un.

<sup>25</sup> 'En Mattathiah ts'u hainzut-un

'en Amos ts'u hainzut-un,

'en Nahum ts'u hainzut-un,

'en Esdli ts'u hainzut-un,

'en Naggai ts'u hainzut-un.

<sup>26</sup> 'En Maath ts'u hainzut-un,

'en Mattathiah ts'u hainzut-un,

'en Semei ts'u hainzut-un,

'en Joseph ts'u hainzut-un,

'en Judah ts'u hainzut-un.

<sup>27</sup> 'En Joannas ts'u hainzut-un,

'en Rhesa ts'u hainzut-un,

'en Zerubbabel ts'u hainzut-un,

'en Shealtiel ts'u hainzut-un,

'en Neri ts'u hainzut-un.

<sup>28</sup> 'En Melchi ts'u hainzut-un,

'en Addi ts'u hainzut-un,

'en Cosam ts'u hainzut-un,

'en Elmodam ts'u hainzut-un,

'en Er ts'u hainzut-un.

<sup>29</sup> 'En Jose ts'u hainzut-un,

'en Eliezer ts'u hainzut-un,

'en Jorim ts'u hainzut-un,

'en Matthat ts'u hainzut-un,

'en Levi ts'u hainzut-un,

<sup>30</sup> 'En Simeon ts'u hainzut-un,

'en Judah ts'u hainzut-un,

'en Joseph ts'u hainzut-un,  
 'en Jonan ts'u hainzut-un,  
 'en Eliakim ts'u hainzut-un,  
<sup>31</sup> 'En Melea ts'u hainzut-un,  
 'en Menan ts'u hainzut-un,  
 'en Mattatha ts'u hainzut-un,  
 'en Nathan ts'u hainzut-un,  
 'en David ts'u hainzut-un,  
<sup>32</sup> 'En Jesse ts'u hainzut-un,  
 'en Obed ts'u hainzut-un,  
 'en Boaz ts'u hainzut-un,  
 'en Salmon ts'u hainzut-un,  
 'en Nahshon ts'u hainzut-un,  
<sup>33</sup> 'En Amminadab ts'u hainzut-un,  
 'en Ram ts'u hainzut-un,  
 'en Hezron, ts'u hainzut-un,  
 'en Pharez ts'u hainzut-un,  
 'en Judah ts'u hainzut-un,  
<sup>34</sup> 'En Jacob ts'u hainzut-un,  
 'en Isaac ts'u hainzut-un,  
 'en Abraham ts'u hainzut-un,  
 'en Terah ts'u hainzut-un,  
 'en Nahor ts'u hainzut-un,  
<sup>35</sup> 'En Serug, ts'u hainzut-un,  
 'en Reu ts'u hainzut-un,  
 'en Peleg ts'u hainzut-un,  
 'en Eber ts'u hainzut-un,  
 'en Salah ts'u hainzut-un,  
<sup>36</sup> 'En Cainan ts'u hainzut-un,  
 'en Arphaxad ts'u hainzut-un,  
 'en Sem ts'u hainzut-un,  
 'en Noah ts'u hainzut-un,  
 'en Lamech ts'u hainzut-un,  
<sup>37</sup> 'En Methuselah ts'u hainzut-un,  
 'en Enoch ts'u hainzut-un,  
 'en Jared ts'u hainzut-un,  
 'en Mahalaleel ts'u hainzut-un,  
 'en Cainan ts'u, hainzut-un,  
<sup>38</sup> 'En Enos ts'u hainzut-un,  
 'en Seth ts'u hainzut-un,  
 'en Adam ts'u hainzut-un,  
 'ink'ez 'en Yak'usda ts'u hainzut-un.

## 4

### *Netsudule Sizi tank'us 'óoneh-un hukwa yóolhdzih*

<sup>1</sup> 'Et Sizi Ndoni dizbun whe Jordan koh ts'e hanája. 'Ink'ez dune lhuhóot'ih ts'e Ndoni whuz wheyalh'a'.

<sup>2</sup> 'Et whulh dit whunizyat (40) dzin 'et dzin totsuk netsudule tank'us ooneh hukwa' yulh'en 'et whe yoolhdzih. 'Et duwhulyiz whe 'aw hoonli lhus'al. 'Et lhaóodinla hukw'elh'az ooye'ílt's'ul.

<sup>3</sup> 'Et netsudule yúlhni, "Alha Yak'usda ooYe' inli de, ndi tse lhes oole' dini."



4 'Et Sizi nja dúyulhni, “Ndiz un'a Yak'usda ooghuni k'ut 'uk'usguz whe nja dutni, “Aw lhes za iloh dune yuk'ukhuna. 'Et ndai la Yak'usda ooghuni 'i ts'iyawh dune yuk'ukhuna.”

5 'Et netsudule 'udedo-i dzulh k'ut yulh whin'az. 'Et 'aho yun k'ut nts'oh tula dune whut'i, 'ink'ez lerwene bube 'ut'en k'oh, 'oh nduwulcho whinulhtun.

6 Netsudule yulhni, “'Et nyun ndi ts'iyawh humoodih tanleh, 'ink'ez hiye dizti-un 'et cha ngha ootas'alh. Njan sgha whulya. 'Et huwa mbe la ooka' nuszun-un tl'aootis'alh.

7 'Inka ngwutsi be neninya 'ink'ez sts'u téni' nilhdzun de, 'et de ndi ts'iyawh nch'e' tileh.”

8 'Et Sizi nduyulhni, “Satan st'áts'inyalh! 'Et 'uk'ehóoguz whe nja dutni, 'Moodihti nYak'usda 'aw 'en za oobut negwutsi be nets'iyaih, 'ink'ez 'en za oots'u teni' uznilhdzun. 'Ink'ez 'en za ba nets'ut'en.”

9 'Et Jerusalem ts'e yulh whin'az 'ink'ez njan lugliz whucho 'udedo hukw'ut 'et soo whuban nénilhya 'ink'ez 'uyúlhni, “'Alha Yak'usda ooYe' inli de, 'et njan whenghe' dudintneh!

10 'Alha 'et 'uk'ehooguz whe njan dutni, 'Yak'usda oolizas ngho hoole' ha 'ink'ez nyuhotun 'ink'ez wheni butl'ahón'ai.

11 Dula be do nyuhóotatun, 'et huwa 'aw nke tse t'aoonalh ait'oh.”

12 'Ink'ez Sizi ndúyulhni, “Njan 'et 'uk'ehooguz whe nja duwhutni, 'Khun te Moodihti nYak'usda 'en nantan'ah hukwa ólhdzih junih.”

13 'Et netsudule ts'iyantsuk whe tank'us ooneh hukwa yóolhdzai, 'et 'awet lhaooduja whe 'atsulyaz whuba yugho whenája.

### *Sizi dude 'ut'en 'awet wheyudilh'en*

14 'Et Sizi Ndoni ye ulhtus-i be yun k'ut Galilee ts'e whenaja. 'Ink'ez ndai la yughu yalhduk-i Galilee yun k'ut dilhts'ine ndulcho whe huyulh údants'o, 'ink'ez ts'iyawh highu yalhduk.

15 'Et ts'iyawh Lizwif lugliz totsuk whubehóndunilh'e' 'ink'ez ts'iyanne hidilhti'.

16 'Et ndet la keyoh nizyai-un Nazareth huwhutni, whuz whinya. 'Et dzin dune nalyis-un dzin 'uhoont'oh, 'et Lizwifne bulugliz whuz oozya. 'Et whuz un'a dich'oh be 'ut'en k'oh 'uhoont'oh. 'Ink'ez buba 'uk'uyatilhduk ha dudinya.

17 'Ink'ez nus hoo'en-un Isaiah be 'udustl'us 'i hitl'ahúyan'ai. Lhk'eyuntlilghal 'ink'ez ndet la hukw'uyatilhduk-un 'et nahoon'ai. 'Et buba k'uyawhénilhduk whe nja dutni,

18 “Moodihti ooyughi 'i sulh 'unt'oh.

I be 'utahasalhti, tel'enne khuni unzoo-i bugha tis'alh ha.

Mbene la whe oodzi undudane, 'enne nabutisye ha buts'ó sasya.

Mbene la ílchootne,

'enne whubuntistun nts'en'a la oolanaditnine hutileh.

'Ink'ez hubuntistun mbene la hoos'enne,

'enne cha huhoo'en nahutidleh.

Mbene la dune 'abo'en,

'enne cha doná'butisdlelh.

19 'Et ndet la nawhudizulh-un soo 'et neMoodihti ooba hoonzoo-un, 'et ts'iyanne budutasnelh.”

20 'Et 'Awet 'udustl'us nainílhghal 'ink'ez 'et 'ut'en-un yutl'anayán'ai 'ink'ez nanát'l'adida'. 'Ink'ez mbene la Lizwif lugliz dilhts'ine, ts'iyawh 'en za hinilh'en.

21 'Ink'ez 'awet bubulh yawhenilhduk, "'Et nohni ndi Yak'usda ooghuni dáhts'o-un, 'et 'andit dzin ts'iyawh lhaooduja."

22 Ts'iyanne soo highu yalhduk. Khuni unzoo-i ye yailhduk-i ts'iyanne buba hooncha. Dich'oh 'ulhodutni, "Ndun 'en Joseph ooye' 'en iloh eh 'unt'oh?"

23 'Et ubúlhni, "'Aw nawh lhe'hoot'oh ndi khuni 'ahoolhyiz 'et dudáhni-un whe nja dutni, 'Yoo be duyun nyunch'oh cho soo na'dudilneh,' 'et whuz un'a si cha 'et ndusúdutahnelh. 'Inka ndiz un'a dutihnelh, 'Ndet la keyoh Capernaum howhútni-un, dawhut'en-un whulh údzits'o, 'et njan nyunch'oh nkeyoh 'et cha whuz un'a za ndint'en.' "

24 'Ink'ez 'et ndutni, "'Alha ts'ih'un nohdusni, nus hoo'en-un dich'oh dukeyoh ts'oozya whe 'aw 'ilhoghun hoonts'i yuka lhe'nizun.

25 Ndet la nohdutásnelh-un soo ts'ih'un 'et 'alha' hoont'oh. 'Et 'oh da' ndun Elijah, 'en yun k'ut Israel nus hoo'en-un buba unli inle'. 'Et lhane tsandilh hoonli inle'. 'Oh da' tat yus k'ut 'on 'at lkh'utat sanun whe 'et dúwhulyiz 'aw chan hooloh. 'Et 'uhooja yun k'ut ndulcho whe dai whuzdli'.

26 'Et Elijah 'aw 'ilhoghun hoonts'i ts'ú whelhil'al. 'Et 'ilhoghun za tsandilh. 'Et yun k'ut Sidon nts'e la keyoh Zerepath 'et whut'en-un, 'en za ts'u whel'a'.

27 'Et doo cha za 'oh da' nkeda' Elisha nus hoo'en-un buba unli inle', 'et 'oh da' yun k'ut Israel ooká whulhjutne, leprosy huyulhni, hulldai. 'Aw 'ilhoghun hoonts'i soo nálhe'ilel, k'us Naman, mbe la Syria whut'en-un, 'en za soo na'yinla," ubulhni.

28 'Et Lizwif lugliz dilhts'ine hidánts'o whe dahoolcho-i be huyulh húnilh'e.

29 Ts'iyawh dodindil huyílhchoot 'ink'ez njan keyoh hukw'un'a hitilhya. 'Ink'ez ndo ndet la shus k'ut keyoh whuzdla-un, 'et néhinilhya whunoh ts'e whenghi hitinoh ha.

30 'Ink'ez ts'iyawh butoh lhuseya 'ink'ez nts'e la hukwa' ninzun ts'u whínya.

### *Dune ntsi'-i ooyudinda-un*

31 'Et 'awet Galilee yun k'ut 'et keyoh Capernaum whuz'ai whuz whinya. Nats'ulyis dzin totsuk whubodulh'eh.

32 'Et njan hubodulh'eh-un tube buba hooncha. Dughuni hoolhtus whe ook'une' 'oot'en k'un'a bubulh yalhduk.

33 'Et nyo Lizwif lugliz 'et 'ilhoghun dune, 'en ntsi'-i nududeh-i yudínda. Ndun ntsi'-i nududeh-i tube cho 'alhdzul

34 'ink'ez 'utni, "Ah! Nyun Sizi Nazareth whut'en-un 'int'oh. Ndet nets'u hukwa' ninzun? Gak netalhtselh ha eh whusainya? Mbe inli t'enyunúszun! Yak'usda ba lubeshi ooghu hooloh-un, 'en 'int'oh!"

35 'Et Sizi hukwa' yudáni' whe 'uyulhni, "'T'eduzinih whe ooyáhanaindaih!" Ntsi'-i nududeh-i nyoon dune butoh nayáno 'ink'ez yuts'u hanaja. 'Ink'ez 'aw lhuyundíldal.

36 Ts'iyawh bugha 'únjaz 'ink'ez whehúnilhjoot 'ink'ez 'ulhodutni, "Ndi khuni ndai whe 'unt'oh? Ulhtus 'ink'ez ookw'une' whut'en. Ndun ntsi'-i nududeh-i, 'et ndúyulhni ibulh 'et yuts'u hanaja."

37 'Et yun k'ut ndulcho whe huyulh údants'o.

### *Sizi Peter oobiz soo na'yinla*

<sup>38</sup> 'Et Sizi Lizwif lugliz dunadija 'ink'ez Simon ooyoh ts'e whuz whinya. 'Et Simon oobiz dada nulwus-i be nduda. 'Et Sizi hidani' khun tilah yula 'ooneh ha.

<sup>39</sup> 'Et lili zih neninya 'ink'ez yutus cha nuti. 'Ink'ez dada hukwa 'judáni' whe ndi nulwus-i ye nduda-i yuts'ahanádoolts'it yulhni, 'ink'ez oots'ahanaídilts'ut. 'Et 'aho dunadija 'ink'ez bugha ná'unt'ai.

*Nats'ulyis-un dzin 'et lhane undudane, Sizi soo na'binla*

<sup>40</sup> 'Awet sa yo tá'aih whe mbene la ook'ekene lhelhdowh didowh-i dada be ndudane ts'iyawh Sizi highu bonínla. 'Ink'ez ts'iyawh buk'událni 'ink'ez 'et whuz un'a soo ná'binla.

<sup>41</sup> 'Ink'ez whulohne dune ntsi-'i nududeh-i 'ahúlzul whe buts'u hanáhudide, 'ink'ez 'uhutni, "Nyun Yak'usda ooYe' mbe la Christ huyulhni-un, 'en 'int'oh!" T'eduzahnih 'ubúlhni 'aw yahutilhdih hoontsi' butl'alhúhoo'al, t'ehonínzun Christ 'en 'unt'oh 'et huwa.

*Yun k'ut Galilee ndulcho whe Sizi dune ubulh yalhduk*

<sup>42</sup> 'Et 'om bun bundada sa há whenin'ai whe 'et disoh ts'e whinya. 'Et dune ts'iyawh hikunúta. 'Et nts'e la usda-un highu nindil, bughu tooya' whuch'a né'huyulh'en.

<sup>43</sup> 'Ink'ez 'et 'ubúlhni, "Udun keyoh cha ndi khuni unzoo-i be yatisduk, dant'oh whe nts'e la whuba Yak'usda lerwe unli budutasnelh. 'Et huba whusáz'a!"

<sup>44</sup> 'Et yun k'ut ndulcho Galilee Lizwifne whulugliz whuz oozya 'ink'ez ubulh yalhduk

## 5

*Dine lho ha 'ut'enne Sizi, "Anih," ubúlhni*

<sup>1</sup> 'Et 'ilhoh dzin Gennesaret bun taba usyin whe dunene ts'iyawh hinat 'ilhozdil, Yak'usda ooghuni 'i hidutáts'o ha.

<sup>2</sup> Ts'i cho nanki yasá'a yunilh'en. 'Et hoontsi'lho ha 'ut'enne 'udun dulembil tunáhugus.

<sup>3</sup> 'Ink'ez 'ilhoghi ts'i bénya. 'I Simon oots'i 'unt'oh. 'Ink'ez 'uyulhni, "Nusyaz le inleh." 'Ink'ez 'et ts'i bet natl'adida' 'ink'ez dunene, 'enne whubodulh'eh.

<sup>4</sup> 'Et ubulh yalhduk-un 'etsul lhiduja whe Simon ulhni, "Nts'e soo takhulh-un 'et nlembil ts'iyawh teninle 'utanlooh huba."

<sup>5</sup> Simon nduyulhni, "Smoodih wheni 'ulhdzis doohoolyiz whe 'uts'it'en 'et hoontsi' 'aw hoonliyaz lhets'ilooh. Dini de 'et lhembilh 'ilho tenaoodslelh la."

<sup>6</sup> Te'huninla whe lho lhai whe huyuzdlooh. Lhai huzdlooh k'et bulembil 'awet lhk'enguch'oolh.

<sup>7</sup> 'Et 'onghohne lubaz bet 'ut'enne 'anih buhutni bula 'hooneh ha. 'Enne cha whusahanki 'ink'ez nankilt'oh ts'i cho hidilhun k'et 'awet tewhéninat.

<sup>8</sup> Simon Peter whunalh'en whe Sizi oobut dugwutsi be neninya 'ink'ez, "Smoodihti sch'az naindalh, si lubeshi 'ulh'en-un usdli," yúlhni.

<sup>9</sup> Peter 'ink'ez yulh 'ut'enne, 'enne ts'iyawh bugha 'únjaz 'ink'ez whe húnilhjoot ndi lho lheltsuk whe huyuzdlooh 'et huwa.

<sup>10</sup> 'Et James 'ink'ez John Zebedee ooye'ke 'enne Simon ts'uditnine, 'enne cha bugha 'únjaz 'ink'ez whehúnilhjoot. 'Et Sizi yulhni, "Simon khun whenoljut junih. 'Andit whuts'un dune ha' tant'elh."

<sup>11</sup> 'Et 'awet yanáhuski whe ts'iyaitsuk 'et hiladitni. 'Ink'ez hik'oh ts'e oot'en ha huyuntizdíl.

*Ooka whulhjut-un, Sizi soo ná'yinla*

12 'Et hukw'elh'az Sizi 'ilhoghun keyoh 'ut'en. 'Ink'ez 'ilhoghun dune ndulcho whe ooka whulhjut-un, 'i leprosy huyulhni, 'i be nduda, 'en cha 'et keyoh whut'en. Sizi yutilh'en whe yubut nachaniti, yuts'u tedudli, "SMoodihti nyun hukwa' ninzun de be ilhtus-i 'int'i-i, 'i be suna'ilhdeh," yulhni.

13 'Et Sizi dula be yut'aíznai 'ink'ez 'uyulhni, "A, hukwa' nuszun whe nyuna'isde." 'Et yuka whulhjut-un 'et 'aho soo na'uja.

14 'Et Sizi khuniti be nja dúyulhni, "Khun te 'uyoonne dóni' junih! 'Et k'us lubret oots'inyalh 'ink'ez nyulh dahooja-un, 'et nyunoolh'en. 'Et Moses be 'udustl'us k'ut daja ni whe 'aw ts'ih'un lhe'it'oh, 'et ooba gak whutaleh, 'et whuz'un'a loodel k'ut hoonliyaz dutálh'k'un. 'Et whe la whubunolhtun dainja whe soo na'inja," yulhni.

15 'Et hoontsi'i be nawhutnuk-i Sizi Gri 'en ghun lhan'un te whulh 'úhudits'o. 'Et whu la toh ts'e 'on nus huldlai 'ink'ez nus za lhe'hiltsuk whe highudulh, ndai la hiye unduda-i ts'iyawh naitilhyeh hits'u hukwa' ninzun.

16 'Et didutch'oh lhat disoh ts'e tenadutidli ts'u wheyaih.

*Dune delhdusni-un, Sizi soo ná'yinla*

17 'Et 'ilhoh dzin dune hodulh'eh whe 'ink'ez Phariseene cha 'ink'ez Moses be 'udustl'us hodulh'ehne, 'enne cha, yun k'ut Galilee 'ink'ez Judea cha, 'ink'ez Jerusalem cha 'enne ts'iyawh Sizi hiyenghoh dilhtsi. 'Ink'ez neMoodihti ye ulhtus-i ndudane soo ná'tilh'elh ha, 'i cha yulh 'unt'oh.

18 'Et 'awet ndun dune delhdusni-un, 'en lili be whusahúyankai. 'Ink'ez Sizi yoh ts'e hits'u hitoolhtelh hukwa' huyulh'en.

19 'Et hoontsi'i dune lhai k'et 'aw 'uhuyooleh ait'oh. 'Inka bun k'ehuyinkai. Bun hikonintsi 'ink'ez whuz hukwuhininkai. 'Ink'ez soo buniz Sizi oobut yun néhininkai.

20 Ndo ts'iyawh ubunilh'en 'et t'eeoninzun buba 'alha' 'uhoont'oh 'ink'ez delhdusni-un 'uyulhni, "Hadih dune nlubeshi ts'iyawh mba hooloh suli."

21 'Et Moses be 'udustl'us 'uk'ununáguzne 'ink'ez Phariseene, didutch'oh 'et ndoninzun, "Nduun dune 'en Yak'usda ch'az yalhduk. Mbe na'dunúdzun whe 'utni? Mbe la lubeshi 'untulhdulh? Yak'usda didutch'oh za lubeshi 'un tulhdilh!"

22 'Et Sizi t'ewhunínzun daja huninzun, 'ink'ez ndúbulhni, "Et di ha nohdzi yo whe 'et ndunahzun?"

23 Nts'en'a suba lhúhoolna' k'un'a uzdooni', 'Lubeshi mba hooloh suli', k'us, 'Dudinyaih 'ink'ez ninya'?"

24 'Et njan t'eeonóhzin yinka dune ye', 'en ndi yun k'ut ooba' hoont'oh whe 'unt'oh lubeshi 'un toolhdilh huba' hoont'oh whe 'unt'oh," ubulhni. 'Ink'ez ndun delhdusni-un, "Dudinyaih, ookw'usinti-i nailhchoot, 'ink'ez nyoh ts'e naindahl!" yulhni.

25 'Et 'aho ts'iyanne nalh dudinya 'ink'ez yuk'usti-i cha náilhchoot 'ink'ez Yak'usda dilhti' whe duyoh ts'e whenaja.

26 'Ink'ez 'et ts'iyanne buba hooncha. 'Enne cha Yak'usda hidálhti'. Tube whe hunuljut, "Njan tube huwa 'it'en-un ts'onalh'en," hutni.

*Sizi Levi, "Anih," yúlhni*

27 'Et hukw'elh'az Sizi 'az whinya 'ink'ez 'ilhoghun sooneya nalhdzoo-un, Levi huyulhni-un, 'en 'ut'en-un usda whe yunilh'en, 'ink'ez 'uyúlhni, "Sunanyalh."

28 'Et dudinyai, 'ink'ez ts'iyaitsuk yula ditni whe yuk'oh ts'e oot'en ha yuntizya.

29 'Et Levi duyoh ts'e Sizi ba hooncha whe dune gha nátit'alh. 'Et sooneya 'ilhunaos'aihne, 'enne cha huldlai. 'Ink'ez 'uyoonne cha lhané bubulh 'et dilhts'i.

30 'Et ndunne Moses be 'udustl'us 'uk'ununáguzne 'ink'ez Phariseene, 'enne didutch'oh highu yalhduk 'ink'ez Sizi yugha hodul'ehne, 'enne ubuhútni, "'Et nyoonne mbene sooneya 'ilhunaos'aihne 'ink'ez lubeshi 'ulh'enne, 'enne di ha bubulh áh'alh 'ink'ez bubulh 'áhtnai?"

31 Sizi 'et ndúbulhni, "Mbene la soo 'únt'ohne, 'aw yoo be duyun ha lhe'hunizun. Ndudane, 'enne za yoo be duyun ha' huninzun.

32 Si cha whuz un'a za 'aw ts'ih'un 'unt'ohne, 'enne dulubeshi ch'a dudeni naháhunduntileh huba iloh sásya. 'Et lubeshi 'ulh'enne, 'enne dulubeshi ch'a dudeni naháhundunooleh ubudutásnelh ha, 'et huba whusásya."

### *Dune soo hóohooni-un hukwa hoodulhkut*

33 'Et huyoodulhkut, "Dahoont'oh huwa John yugha hodul'ehne, 'enne lhat soo hóohoonih 'ink'ez tenahududli? 'Ink'ez Phariseene hiye hodul'ehne, 'enne cha 'et za nduhút'en. 'Et hoonts'i nyun nga hodul'ehne, 'uha'alh cha' hut'en 'ink'ez 'uhutnai cha' hut'en?"

34 'Et ubulhni, "Mbe la oo'at whutáleh-un, 'en ook'ekene, 'enne 'awhuz huyulh 'ut'en, 'enne do' soo húhootanih eh? 'Awundooh!

35 'Oh de whusaootilts'ulh, 'oh de de oo'at whutaleh-un bughu nayítálchulh. 'Oh de la soo hóohoonih."

36 'Et be nawhutnuk 'i be whuts'o dul'eh-i, 'i be bubulh yalhduk whe nja ndutni, "'Aw 'ilhoghun naih 'andit-i ts'u hayalhch'ul 'ink'ez 'ujut-i yunaidunókalh aít'oh. 'Et whuz un'a 'et nduja de, 'et 'andit naih-i tooch'oolh la, 'ink'ez ndi 'andit-i naih, 'ink'ez naih jut bulh 'aw lkh'un'a oot'e' aít'oh.

37 'Et doo cha, 'aw 'ilhoghun 'andit-i ts'ekoo too' 'i 'aw 'ujut-i ts'ekoo too' zus be yóoldzeh aít'oh. 'Et nduja de, 'andidi-i ts'ekoo too' ndi 'ujut-i ts'ekoo too' zus ook'ohóltal la. 'Et whe ts'iyawh ts'ekoo too' bé haitijulh. 'I 'uzus 'i cha ninta' tit'elh.

38 'Et hoonts'i 'andit-i ts'ekoo too', 'andidi-i ts'ekoo too' zus be naoldzeh huba' hoont'oh. 'Et whuz un'a nankilt'oh soo' tit'elh.

39 'Aw 'ilhoghun ts'ekoo too' 'ujut-i utnai' de, 'aho 'andit-i ts'ekoo too' ha' noozin aít'oh. "Ujut-i, 'i za 'on nus 'uzoo,' hutni," 'et ubúlhni.

## 6

### *Yinka dune ye', 'en nats'ulyis-un dzin, 'et cha huMoodihti unli whe 'unt'oh*

1 'Andit whulhnat dune nalyis dzin. 'Udechoo-un 'et hukw'elh'az 'uhoont'oh. Sizi 'ink'ez higha hodul'ehne, 'enne bulh tl'o k'ut 'oh whuya hidulh whe, tl'o mai' huhoonuyin. 'Ink'ez dula k'et hinulhguk 'ink'ez huya'alh.

2 'Et whulohne Phariseene hubuhútni, "Daht'en whe aht'en? 'Andit dzin nats'ulyis-un dzin 'uhoont'oh! 'Aw 'et nduhóot'en huba lhe'hoot'oh!"

3 Sizi 'ubúlhni, "Lerwe David daja-un 'aw lawk hukw'u yalhuzulhduk. 'Et 'oh da' David 'ink'ez yulh 'ut'enne buye'ílt's'ul.

4 'Et 'úja, Yak'usda ooyoh daninya. Lhes 'i Yak'usda oogha yut'aih-i, ndi lhes lubretne 'aw 'enne za huyoo'alh huba' hoont'oh. 'Ink'ez 'i yilhchoot 'ink'ez yan'al. 'Ink'ez dulh 'ut'enne, 'enne cha yuloh bughá nín'ai."

5 'Ink'ez Sizi 'ubulhni, "Yinka dune ye', 'en njan nats'ulyis dzin, 'et cha huMoodihti unli whe 'unt'oh."

### *Nats'ulyis dzin 'et Sizi Gri dune oola únduda-un soo ná'yinla*

6 'Et hukw'elh'az 'on 'at nats'ulyis dzin Lizwif lugliz daninya 'ink'ez whu-bodulh'eh. 'Et 'ilhoghun dune 'en cha 'et usda. Ndun oola nailhni ts'e 'aw yé nulhe'ust'en.

7 Mbene la Moses be 'udustl'us 'uk'ununáguzne 'ink'ez Phariseene cha soo cho highunli 'ink'ez hinilh'en daoonelh suba. 'Et dune nalyis-un dzin 'et tilah soo na'yooleh. 'Et whe hoonliyaz highu nahootá'alh hukwa' hut'en.

8 'Et daja huninzun t'eeoninzun. 'Et dune oola yunulhe'ust'en-un 'uyulhni, "Dudinyaih 'ink'ez taniz sinyin." 'Inka dudinya 'ink'ez buniz suyin.

9 'Ink'ez Sizi 'ubulhni, "Hoonli-unyaz hukwa nohoodutaskut. 'Et nats'ulyis-un dzin, nts'en'a netl'ahóolts'ut, 'et ts'ih'un un'a uztinelh, k'us hoontsi' k'un'a uztinelh? Dune ye khuna-i uztilyih k'us daztilhsta?"

10 'Ink'ez 'et ts'iyawh bunilh'en. 'Et ndun dune 'uyulhni, "Nla lhts'eh nadíntsih!" 'Et ndúja 'ink'ez oola kw'uz ts'e dalhit'oh, 'et whuz un'a za ndunája.

11 'Et 'onghohne tube soo ts'ih'un howunílch'e, 'ink'ez didutch'oh howu yahalhduk Sizi dahítileh-un 'et huwun.

*Whunizyane 'on 'at nane whel'a'ne, 'enne Sizi 'utahábanla*

12 'Oh da' 'et dzin nja dúhooja, Sizi shus k'ut tenadutidli ha whuz whinya. 'Ulhdzis nduwuhulyiz Yak'usda ts'un tenadudli.

13 'Et yulhkai-un higha hodul'ehne, 'anih ubulhni. 'Et butoh whunizyanne 'on 'at nane, 'enne 'utahábanla. 'Enne whel'a'ne buboozi' súlhtsi.

14 Simon, 'en ndi oozí' Peter, 'i cha yugha ídin'ai. 'Ink'ez bulhutsin Andrew, James 'ink'ez John, Philip 'ink'ez Bartholomew.

15 Matthew 'ink'ez Thomas. James Alphaeus ooye', 'ink'ez Simon 'en huwu daóodit'oh-un huylhni.

16 Judas James ooye', 'ink'ez cha Judas Iscariot, 'en 'utinelh whu'iz buch'az nedutadalh.

*Lhane undudane 'ink'ez ntsi'-i nududeh-i be dzoh nudehne, 'enne Sizi soo ná'balh'en*

17 'Et whududlun-un ndus de yugha hodul'ehne bubulh hainya 'ink'ez lhts'e oodiz'a-un nenáhundil. Yun k'ut Judea whut'enne, Jerusalem whut'enne cha, 'ink'ez yatoo ba keyoh Tyre 'ink'ez Sidon whut'enne, 'enne cha hulldai k'et 'aw uzdooni' ait'oh. Hiyootuzálhts'ilh 'ink'ez soo na'butilh'elh, 'et hukwa 'ilhuhozdil.

18 'Ink'ez mbene la ntsi'-i nududeh-i be dzoh nudehne, 'enne cha 'et hudilhts'i, 'ink'ez soo na'balh'en.

19 Ts'iyanne hit'aoonalh hukwa' hut'en. Ye ulhtus-i oots'u haidults'uk, 'i be ts'iyawh budada' 'et whe soo na'binla.

*Sizi ubulhni, "Uk'enus hoonzoo-un nohbulh 'uhooja"*

20 Sizi 'et yugha hodul'ehne, 'enne ts'iyawh butunuyú'en whe njan dúbulhni,

"Nohni tel'enne ndet la Yak'usda whe lerwe unli, 'et nohni nohch'e' 'uhoont'oh.

'Et huwa 'uk'enus hoonzoo-un nohgha whults'ut.

21 Nohni mbene la ooye'últs'ilhne,

untihdai 'et huwa 'uk'enus hoonzoo-un nohgha whults'ut.

Mbene la 'andit usone tihdloh 'et huwa dawhuldzoo'-un nohgha whults'ut.

22 'Oh de dune nohts'o dutitni 'ink'ez 'aw bubulh óóht'e' ait'oh nohohulhtsi.

'Ink'ez nohch'az yahutilhduk whe yinka dune ye',

'en gha 'et huwa nohoozi' dutsun hitilhtselh 'ink'ez 'un hitilhduh.

'Et whuz un'a ndunóhuhulh'en de,  
'et de 'uk'enus hoonzoo-un nohgha whults'ut.

23 'Et dzin ndóhooja de, 'et hootaht'i' 'ink'ez hoonah't'i' k'et do tóolhuk. 'Alha 'uhoont'oh ndo yak'uz hooncha whe nohba k'elha whutaleh. 'Oh de whu-sawhutilts'ulh mbene la whuz un'a za ndunohotilh'elh, 'et ndunt'ohne but-soda'ne, 'enne cha niz dak'ez nus hoo'en inle'ne, whuz un'a za ndubuhalh'en 'et huwa.

*Whulohne 'uk'enus hoontsi'-un bugha whútalhts'ulh*

24 "Et hoonts'i nohni hoonzoo' 'unt'ohne soo cho howahli!  
Ndai la be hoonah't'i'-i,  
'i be 'uda' ts'iyawh nohba 'uk'elha whuzdli'.

25 Nohni mbene la soo a'alhne,  
nohni cha soo cho howahli!  
Nohyé'tilts'ulh! Mbene la udlóhne howahli!  
Nohdzi dúntida' 'ink'ez tih'tso!

26 'Et huwahli mbene la sóo nohghu yalhdukne.  
'Oh da' nus hoo'enne na'dudil'ine,  
'enne cha but-soda'ne 'et za ndúbuhutni."

*Nohch'az ditnine buk'ehtsi'*

27 "Et hoonts'i ndiz un'a nohdusni, nohch'az ditnine buk'ehtsi'. Mbene la nohka lhe'nizunne, 'enne cha sóo ne'bulh'en.

28 Mbene la nohk'ehuyihne, Yak'usda but's'un óozoo' ha buba tenadoohdli. 'Et mbene la dzoh ne'nohulh'enne, 'enne cha buba tenadoohdli.

29 Mbene la nohnimbus k'ut nohnizkukne, buba 'awh nandunaht'ah 'ink'ez ookw'uz ts'u cha 'unohuhooleh. Mbe la ndzoot nghu halchooz-un, ndzoozt'an cha ooch'a yóntun junih.

30 Ts'iyanne hoonliyaz ha nohts'u ka 'utni de, bugha íyohlelh. Ndai la nohch'e' 'uyoonne yílhchoot de, but's'o kwana' doohni' junih.

31 Nts'en'a hukwa' nahzun dune danohotilh'elh-un, 'et whuz un'a za nohni cha 'et né'boolh'en.

32 Mbene la nohk'entsi'ne, 'enne za buk'ehtsi' de, whuz un'a hoonzoo nahzun eh? 'Awundooh! Lubeshi 'ulh'enne, 'enne hoonts'i mbene la buk'entsi'ne, ts'iyawh buk'ehints'i'.

33 Mbene la soo ne'nohulh'enne, 'enne za soo ne'bulh'en de, whuz un'a hoonzoo nahzun eh? 'Awundooh! 'Et lubeshi 'ulh'enne cha whuz un'a za 'et duhút'en.

34 'Et mbene la nohtl'anátí'alh nahzun de, 'enne za bughe zulh'ai, whuz un'a hoonzoo nahzun eh? 'Awundooh! 'Et lubeshi 'ulh'enne, 'enne hoonts'i lubeshi 'ulh'enne ghe' hulh'ai 'ink'ez 'et 'ultsuk za butl'anáha'aih.

35 'Et hoonts'i nohch'az ditnine buk'eooh'tsi', 'ink'ez soo ne'boolh'en. Bughe 'oolhla' 'ink'ez hoonliyaz nohtl'unátílt's'ulh hukwa tse hólhle' junih. 'Et whuz un'a ndaht'en de, hooncha whe nohba k'elha whutaleh. 'Et la mbe la yak'uz soo 'udedo 'unt'oh-un, 'en k'un'a tihleh. 'Alha mbene la musi lhudusnine 'ink'ez ntsi'ne cha, ts'iyawh but's'un unzoo.

36 'Inka nohBá nts'en'a la te'ninzun, nohni cha whuz un'a za te'noohzin.

*'Uyoonne ba nahoohyeh junih*

37 "'Uyoonne ba nahoohyeh junih, doo ka si 'aw nohba nahooddeh ait'oh. 'Uyoonne k'ehoh'alh junih, 'et de 'aw nohk'eholts'it ait'oh. 'Uyoonne ba whunaoodolnoh, 'et de nohni cha nohba whunaoodutitnoh.

<sup>38</sup> 'Uyoonne gha náh'a-i, 'i nohtl'anátikulh whe 'unt'oh. Lht'usúkat 'ink'ez lhai cho tileh. 'Et la nudúl'us whe bé haitikat. 'Et 'ultsuk whe nohbut nehítakalh. Daltsuk oogha náh'a-i 'et 'ultsuk za nohtl'anátikulh 'et huwa."

<sup>39</sup> Be nawhutnuk-i be whúts'odul'eh-i, 'i be bubulh yailhduk, "Soo eh hoos'en-un 'uyoon hoos'en-un nutíguz? 'Alha nahúlt'oh la ha hóokai-un 'ahoolts'it!

<sup>40</sup> Hodul'eh-un 'ink'ez whuyodulh'eh-un, 'en 'aw yando lhe'ít'oh. 'Et hoonts'i mbene la soo ts'ih'un un'a hodul'ehne, 'et la hubodulh'e-un 'en k'un'a 'uhutit'elh.

<sup>41</sup> 'Et di ha nyulhutsin lhusyaz oona k'et diztan, 'i nilh'en, 'et hoonts'i 'aw t'oonuzinzun nyunch'oh duchun cho nyuna k'et diztan?

<sup>42</sup> Nts'en'a nyulhutsin 'udutanelh, 'Sulhutsin nyo lhusyaz nyuna k'ehanádoostan.' 'Et hoonts'i nyunch'oh duchun cho nyuna k'et diztan-i 'aw lhuзан'en. Nyunch'oh duba nainzoo! 'Udechoo duchun cho nyuna k'ehanadintih. 'Et de la soo hón'en whe nyulhutsin nyoo lhusyaz 'i oona k'ehanaidontan.

### *Dune di la oodzi yo be whudizbun, 'i be la yatilhduk*

<sup>43</sup> "Et la duchun dinzoo-i 'aw mai 'utsi'-i ooghu noot'ai ait'oh. 'Et whuz un'a za duchun dintsi'-i mai unzoo-i ooghu noot'ai ait'oh.

<sup>44</sup> 'Et whuz un'a za oomai' gha duchun dant'oh-i 'unt'oh t'enudzun. 'Et whuz un'a za ndi mai unzoo-i, figs huyulhni, 'aw whus chun ghun huyoonoyin ait'oh. 'Ink'ez whuz un'a za whuscho chun, 'aw duje do 'ut'en-i ooghu oononyin ait'oh.

<sup>45</sup> 'Et whuz un'a za dune unzoo-un, ndai unzoo-i dudzi yo hoonli-i, 'i gha khuni unzoo-i be yalhduk. 'Ink'ez dune untsi'-un, ndai untsi'-i oodzi yo hoonli-i, 'i be khuni untsi'-i be yalhduk. Ndiz un'a nja duwhutni, dune di la oodzi yo be whudizbun, 'i be yatilhduk.

### *Sizi Gri ooghuni soo cho whulh ts'ooyin*

<sup>46</sup> "Ink'ez di ha 'SMoodihti, sMoodihti,' sudahni, 'ink'ez daja nohdusni la, 'aw húk'w'u nulhe'zagt'en?

<sup>47</sup> Mbene la sts'un túyaih 'ink'ez soo zilhts'ai 'ink'ez huk'w'ú ne'ut'enne, 'et mbene 'uhint'oh 'enne bunóhntistun.

<sup>48</sup> Ndiz whuz un'a 'et duhint'oh. Dune yoh 'uwhtilelh whe, soo yoo yo cho hahónkai 'ink'ez yoh ook'uwhez'ai-i 'et tse k'ut newhúta'alh. 'Et ndet la too tilht'o de, 'et ninli ulhtus-i yoh whut'aiznai, 'et hoonts'i yoh 'aw dalhuhoonel. Tse k'ut neoonin'ai 'et huwa.

<sup>49</sup> 'Et hoonts'i mbene la sghuni yoozilhts'aïne 'ink'ez 'aw hik'unulhe'ust'en de, 'et diz un'a nja duhint'oh. Dune yun k'ut yoh 'uhoonla. 'Ink'ez yoh ook'uwhez'ai-i 'aw lhe'ílel. 'Et ninli ulhtus-i yoh whut'aiznai whe 'aho naóonit'ai. Tube wheóonujut whe musai whuzdli'."

## 7

### *Lhuganne whumoodih-un yuba ne'út'en-un, Sizi soo ná'yinla*

<sup>1</sup> 'Et dune Sizi yoozilhts'aïne ndet huwun ubulhni-un, 'et 'awet ts'iyawh lhaoodinla. 'Ink'ez keyoh Capernaum huwhutni-un whuz oozya.

<sup>2</sup> 'Ink'ez nja 'et keyoh whut'en-un 'et 'ilhoghun lhuganne whumoodih-un yuba ne'út'en-un. Tube yúk'entsi'-un, 'en tube unduda 'ink'ez 'awet datitsah.

<sup>3</sup> 'Et ndun lhuganne whumoodih-un Sizi yulh údants'o 'ink'ez Lizwif tso whudilhduzhne, 'enne whuz whebalh'a'. Sizi huyoodutalhkut ha lhuganne whumoodih yuba ne'út'en-un soo na'yooleh ha.



4 'Et Sizi highu nindil whe soo tube cho hits'u tedudli 'ink'ez 'uhuyulhni ndun lhuganne whumoodih-un, 'en soo 'uldzoo' whe 'unt'oh yuba ne'ut'en-un, 'en soo na'yooleh ha.

5 "Nedune'ne, 'enne buk'entsi' 'ink'ez 'en gha lizwifne nelugliz neba' hoonla," huyulhni.

6 'Inka bubulh tizya. 'Et Sizi yoh whenghoh uyalh whe, 'et ndun lhugan whumoodih 'en ook'ekene Sizi hits'ú whebalh'a'. Hidudizdil 'ink'ez Sizi huyulhni, "Lhugan whumoodih njan dunyulhni, 'SMoodihti 'ants'et dzoh ne'dudoldzut junih. Syoh datányalh huba 'aw soo lhe'uzdzoo' 'et huwa.'

7 'Et si cha 'et ndunuszun 'aw soo lhe'uzdzoo' ndudutásyalh huba. 'Et hoonts'i 'ants'i nghuni be dini de, 'et la sba ne'út'en-un soo na'óotneh.

8 'Alha si cha 'onghohne sando 'uhint'oh whe hukwa' huninzun tune' sotilh'en. 'Et si cha whuz un'a za lhuganne buba ando 'ust'oh. 'Et 'ilhoghun, 'Inyalh! dúsni de, 'et 'aho 'awet tiyalh. 'Et 'uyoon, 'Anih! dúsni de, 'et 'aho sts'u tuyaih. 'Et sba ne'út'en-un, 'Nja dineh! dúsni de, 'et 'aho 'et ndút'ih."

9 Sizi ndun dune daja ni la yulh údants'o whe tube ooba hooncha. 'Et ndunne yunidulhne buts'ú nalh'a 'ink'ez ubúlhni, "Israel ndulcho whe keyoh ndun dune 'en k'un'a 'aw 'ilhoghun ndulcho-i be ooba 'alha' hoont'oh-un nalhizústi."

10 Mbene la yuts'un whel'a'ne ndun lhugan whumoodih hiyoh ts'u naóosdil whe, 'et ndun yuba ne'út'en-un ndida' 'aw dálhit'oh whe highu danándil.

### *Dune dazsai-un, Sizi dunaidilhti*

11 'Et 'om bun dzin Sizi njan keyoh Nain huwhutni-un, yugha hodul'ehne bulh, 'ink'ez hooncha whe lhanne unidulhne, 'enne cha ts'iyawh whuz whe hándil.

12 'Et njan keyoh nanist'oo ghu ti-un whenghoh nehúnindil whe khunsul dazsai-un hiduhidizkai. 'Et ooloo tsandilh, 'aw 'ilhoghun za ooye' 'unt'oh. 'Et keyoh whut'enne, 'enne lhane yulh údulh.

13 'Et neMoodihti yan'en whe yugha te'ninzin whe 'uyulhni, "Intso iloh!"

14 'Ink'ez nezi chunkelh yughu ninya 'ink'ez yut'aiznai. Mbene la yilhtel-hne, 'enne cha 'ilhiz nehunindil. 'Ink'ez 'et 'utni, "Chilh dune dudinyaih nyudúsni!"

15 'Ink'ez ndun dune dazsai-un donetl'adinda' 'ink'ez yawhénilhduk. 'Ink'ez Sizi ooloo tl'anayalhti.

16 Ts'iyanne hunilhjoot, 'ink'ez Yak'usda hidílhti' whe nja duhutni, "Njan netoh nus hoo'en-un hooncha-un whusainya." 'Ink'ez 'et cha nduhútni, "Yak'usda dudune'ne buzih nunasja."

17 'Et Judea yun k'ut dulcho whe 'ink'ez 'et whunat keyoh dulcho whe cha, ts'iyanne huyulh údants'o.

### *John dune too be 'ulh'en-un yugha hodul'ehne, 'enne Sizi ts'un whebalh'a' huyoodutalhkut ha*

18 John yugha hodul'ehne ts'iyawh hidutánelh dahooja la.

19 'Ink'ez nane 'anih ubulhni 'ink'ez Sizi ts'un whebalh'a' huyoodutalhkut ha, "Nyun eh whusatíyalh-un inli, k'us 'uyoon tilah ha ts'itó'en?"

20 'Inka Sizi highu nin'az 'ink'ez 'uhuyulhni, "John dune too be 'ulh'en-un, 'en nts'u nétilh'a' nts'u yoodutaskut ha, nyun eh whusatányalh-un inli, k'us 'uyoon tilah hats'itó'en?"

21 'Et 'aho mbene la ndudane 'ink'ez ooka cha, 'ink'ez ntsi-i nududeh-i ooyudindane, 'enne cha lhane whe soo na'balh'en. Hoos'enne, 'enne cha huhoo'en-un butl'anáhon'ai.

22 'Et Sizi John yugha hodul'ehne ubulhni, "John ts'u naht'us. Ndet whunilh'en-un 'ink'ez whudáhts'o-un 'et dóhni', nts'en'a la hoos'enne huhoo'en nasdli'. Nulhúsdilne, 'enne nahúdilhne nahusdli'. Buka nódutsi', leprosy huyulhni, 'enne cha butsun hooloh nasdli'. Lhe'dusts'one, 'enne cha 'ahudits'o nahusdli'. Yaidlanne cha dunahudidil. Tel'enne, 'enne cha khuni unzoo-i, 'i be bubulh yaínduk whe' hint'oh.

23 'Ink'ez mbene la si sgha ooba dzoh lhúhoolohne, 'enne 'uk'enus hoonzoo-un bughá whutalts'ulh."

24 'Et John khuni yuba na'áne whenáhit'az whe 'et 'awet Sizi John ghu yatil-hduk whe 'ilhunaosdilne nja dúbulhni, "Dune lhuhoot'ih ts'e ndet hukwa tse hooih whutih'elh-un? Tl'o ghazilh nónulhts'i, 'i tilah tih'elh nahzun eh?

25 Ndet suba hukwa tse hooih whutih'elh-un? Dune naih duchut-i be soo naduja, 'en tilah tih'elh nahzun eh? 'Alha ndiz whuz un'a soo nadut'ihne, 'enne lhai sooneya ts'iyá hulhtsih 'ink'ez lerwe ooyoh huwhut'i.

26 'Et ndet suba hukwa tse hooih whutih'elh-un? Nus hoo'en-un tilah? A! 'Alha nohdusni nus hoo'en-un ba nus unzoo-un 'et nulh'en!

27 'En ghun 'uk'une'usguz inle' whe nja dutni, 'Soo zillhts'ai, khuni sba na'a-un, 'en ntso tis'alh. 'En ntso ti lhutanyalh-un,

mba lhaoodutileh 'et wheni.'

28 'Alha nohdusni, nus hoo'enne mbene la whuzdline, 'enne butoh John dune too be 'ulh'en-un, 'en 'uk'enus ncha-un 'unt'oh. 'Et hoonts'i nts'e la Yak'usda whulerwe unli-un, mbe la 'udeyo 'unt'oh-un, 'en yanus uncha-un unli."

29 Ts'iyanne dune 'ink'ez sooneya nalhdzoohe, Sizi daja ni hidants'o whe Yak'usda buba 'alha' yija, John 'enne too be 'balh'en 'et huwa.

30 'Et hoonts'i ndunne Phariseene 'ink'ez Moses be 'udustl'us k'ut daja ni whe 'uyoo unli be yalhdukne, 'enne ts'iyawh Yak'usda nts'e la butsu hukwa'ninzun-un, 'ants'i 'un huhutilhdil. 'Enne 'aw John too be lhé'bilel 'et huwa.

31 'Et neMoodihti diz un'a ubúlhni, "Dunene 'andit yuk'edúdehne nts'en'a suba nohba lhzih nebosdleh, k'us dant'ohne dune hinli, 'et nohdutásnelh.

32 Diz un'a nja duhínt'oh, ts'oodunneyaz duhúlt'oh whe huya'alh-i be 'óoket-un 'et hudilh'ts'i. 'Ink'ez lh'ts'u háhudih whe nja dulhódutni,

'Be ts'ujun-i be nohba ts'ujun,  
'et hoonts'i 'aw lhnuzahdai.  
'Ink'ez nohba ts'odi ts'inli,  
'et hoonts'i 'aw lhuzah'tso!'

33 Soo cho whunulh'en, John dune too be 'ulh'en-un whusainya whe 'aw lhes lhus'al 'ink'ez ts'ekoo too' cha lhusnai'. 'En udáhni 'Ntsi-i nududeh-i ooyudinda,' dahni.

34 'Et yinka dune ye' whusainya, 'a'alh 'ink'ez 'utnai. 'Et 'udáhni, 'Ndu dune 'en oocha hooncha 'ink'ez tanutnai. Sooneya 'ilhunaos'a'ih-un 'ink'ez lubeshi 'ulh'enne, 'enne buk'eke,' dáhni.

35 'Ink'ez ndunne hiye whunih-i na'dudil'ine, 'enne bughá ndi be whútnih-i, 'i ts'ih'un un'a 'uhóoja."

*Ts'eke lubeshi 'ulh'en-un oolubeshi lhai, Sizi ts'iyawh yuba whunaoodilh-noh*

36 'Et Pharisee 'ilhoghun yughu nusíya dudulh ná'oot'alh yulhni. 'Inka whuz ooyoh ts'e yughu danínya. 'Et lutab yooyo 'unt'oh-i yuzih nelget uti'ulh wheni.

<sup>37</sup> 'Et 'ilhoghun keyoh whut'en-un, 'en lubeshi 'ulh'en-un ts'eke. 'Et Pharisee ooyoh ts'e 'et Sizi 'a'alh yulh údants'o whe whuz whinya. Ndi sooltsun-i diziti'-i, 'i alabaster luboodai bé yulhdzo, 'i whuz yooz'ai.

<sup>38</sup> 'Et yut'a suyin. Utso 'ink'ez oonatsultoo' ooke k'eidilt'ih. 'I dutsigha' be yuna'ulhdeh, 'ink'ez yuke nadits'ooz. 'Ink'ez ndi sooltsun-i diziti'-i, 'i be yuke yulhtlo.

<sup>39</sup> 'Et ndun Pharisee, mbe la 'anilh yudani'-un, dich'oh na'dudutni, "'Et ndun nus hoo'en-un unli de, t'eeonózin da' dant'oh-un ts'eke 'unt'oh yut'ainaih-un. 'En lubeshi 'ulh'en-un 'unt'oh."

<sup>40</sup> 'Et Sizi 'uyúlhni, "Simon, hoonliyaz nyudutásnelh." "Nehodulh'eh-un dini," ni.

<sup>41</sup> 'Et Sizi 'uyulhni, "'Ilhoghun sooneya 'ughu sulh'ai-un nane dune ghe 'ulh'ai. 'Ilhoghun 'en 500 'ilho unli sooneya, 'ink'ez 'ilhoghun 50 'ilho unli sooneya.

<sup>42</sup> 'Aw hiba k'elha hitilhtselh lhihít'ih. 'Inka nahúlt'oh buba whuladitni. 'Et sudini, k'us mbe 'uk'enus yuk'entsi'?"

<sup>43</sup> 'Et Simon 'utni, "Si ndunúszun, mbe la 'uk'enus lhai yuba laditni-un, 'en la 'uk'enus yuk'entsi.'" 'Et Sizi 'uyúlhni, "Soo ts'ih'un un'a 'udinja."

<sup>44</sup> 'Et ndun ts'eke ts'u nalh'a 'ink'ez Simon 'ulhni, "Ndun ts'eke nilh'en eh? Nyoh danusya whe 'aw too sba 'et nélhinkal ske be tunatisigus huba. 'Et hoonts'i ndun ts'eke dunatsúltoo' be ske nainilhtsul 'ink'ez dutsigha' be yuna'alhde.

<sup>45</sup> Nyun 'aw na'duts'oos be hadih sulhdínel. 'Et hoonts'i ndun ts'eke 'udechoo danínya whuts'un 'aw ske naduts'oos-un 'etsul lhe'ínel.

<sup>46</sup> 'Aw stsi khe be lhihlhoh 'et hoonts'i ndun ts'eke ndi khe be ske yulhtlo.

<sup>47</sup> 'Et huwa nyudusni, oolubeshi lhai ts'iyawh ooba whunaoodízno. Nilh'en eh lhetube skentsi' whe 'unt'oh? 'Et hoonts'i mbene la ntsool-iyaz lubeshi buba hooloh online, 'enne hoonts'i dzoh ts'ulya shehinti'."

<sup>48</sup> 'Ink'ez Sizi ts'eke ndúyulhni, "Nlubeshi ts'iyawh mba hooloh suli'."

<sup>49</sup> 'Et ndunne 'onghohne lutab k'ut na'ut'alhne, 'enne dich'oh 'ulhodutni, "Ndun mbe whe 'unt'oh? Lubeshi 'i hoonts'i yuna'alhdeh?"

<sup>50</sup> 'Ink'ez ts'eke ndúyulhni, "Mba 'alha' hoont'oh-i, 'i be dinjih. 'Et 'awet ndzi dizghel whe naindalh!"

## 8

### *Lhane ts'ekoo 'enne Sizi hila 'ut'en*

<sup>1</sup> 'Et hukw'elh'az 'et Sizi kedutizut keyoh whucho 'ink'ez keyoh whuyaz totuk, ndet whe la Yak'usda lerwe unli, 'et huwun khuni unzoo-i be yatilhduk. 'Et ndunne whunizyat 'on 'at nane, 'enne cha huyulh 'ut'en.

<sup>2</sup> 'Ink'ez ndunne ts'ekoo 'enne cha huyulh 'ut'en whe ntsi'-i nududeh-i buyudinda 'ink'ez buka nódutsi, 'enne ts'iyawh soo na'binla. Mary Magdala whut'en-un, 'en cha 'ut'en. 'En 'unt'oh lhtak'ant'i ntsi'-i nududeh-i 'en ooyáha naidide.

<sup>3</sup> 'Ink'ez Joanna, Chuza oo'at, 'et Chuza, 'en Herod yoh dilhts'ine bumoodih unli, 'en oo'at 'ink'ez Susanna cha 'ink'ez 'uyoonne lhane cha, ndai la huyut'i-i, 'i be hila 'ut'en.

### *'A'nulé-un oogha whúts'odul'eh*

<sup>4</sup> 'Et njan dulcho keyoh whut'enne 'ilhuhozdil 'ink'ez Sizi nawhutnuk-i be whuts'odul'eh-i, 'i be yatilhduk,

5 “‘Ilhoghun 'a'nule-un 'en 'a'untilelh ha. 'Et 'a'nule whe 'et ndi ninutsut whe 'et ooloh tinch'oh nanánkat. 'Ink'ez hik'ut nusúdiil 'ink'ez 'et dut'aiyaz cha ts'iyawh yunildil.

6 'Et ooloh cha tse toh nanánkat. 'Et ndet la hánuski whe 'et ndi hanulhyeh-i too hooloh 'et huwa yanúdzigi.

7 'Et 'onghoh-i cha whus cho tanínkat. 'I cha whus cho bulh dúduninyai 'ink'ez bulh lhéwhultloh.

8 'Et 'onghoh-i yun unzoo-i k'ut nanánkat, 'ink'ez hánuski. 'Ink'ez oomai' 'i lhan'un te lhai suli' whunizyat whunizyai 'et 'ultsuk suli'." 'Et hukw'elh'az 'et tube cho 'ubulhni, “Mbene la oodzo hoonine, 'enne huyoozólh's'ai' huba' hoont'oh!”

*Di ha Sizi ndi be nawhutnuk-i be whuts'odul'eh-i be ubulh yalhduk?*

9 'Et yugha hodul'ehne huyoodulhkut, “Ndi be whuts'odul'eh-i, 'i daja ni whe 'utni?”

10 'Et 'ubúlhni, “Ndi buba whe' hoont'oh hooyoh-un Yak'usda lerwe unli-i, 'i ghun, t'eeonoozhah ha 'uda' nohtl'ahóolts'ut. 'Et hoonts'i 'onghohne be whuts'odul'eh-i, 'et whuz un'a za bubulh yasduk. 'Et whe doo ka la, 'Honah'en 'et hoonts'i 'aw lhuhuhoo's'en.

'Et hodits'o 'et hoonts'i 'aw t'ehonuszun daja ni.' ”

*'A'nule-un oogha whuts'odul'eh-un, 'et Sizi neba hukw'u nuhúlhye'*

11 “Ndi be nawhutnuk-i be whuts'odul'eh-i, ndi 'et ndutni. Ndi 'anukat-i, 'i Yak'usda ooghuni 'unt'oh.

12 Mbene la ti 'unt'ohne, 'enne Yak'usda ooghuni hidits'o 'ink'ez netsudule ndi khuni budzi be hanaídan'aih. 'Et whuz un'a 'aw buba 'alha lhe'hoont'oh 'ink'ez 'aw hudoojih ait'oh.

13 Ndai la tse toh nanánkat-i le'unt'ohne hodits'o 'ink'ez huhóont'i' whe khuni huyilhchuk. 'Et hoonts'i 'aw bughih hooloh. 'Et huwa 'atsulyaz buba 'alha' hoont'oh. 'Et 'aho bé tank'us uznint'i-i, 'i be tinch'u nahuskat, 'enne 'uhint'oh.

14 Ndai la ndi whus cho toh nanánkat-i 'et nja duwhutni, dune Yak'usda ooghuni hidits'o 'et hoonts'i ndi yun k'ut huwu ni ts'inli-un, ndi yun k'ut hoonzoo' hoont'oh-un, 'ink'ez ndai la ndi yun k'ut huhoont'i' tune' hut'en-un, 'i ts'iyawh whus cho 'i be bulh lhellhoh dult'oh. 'Et huwa 'aw lhadúlyane hoole' ait'oh.

15 'Et hoonts'i ndai la yun unzoo-i k'ut nanánkat-i, ndiz un'a nja duwhutni, 'enne huhóont'i' whe khuni hidants'o 'ink'ez budzi unzoo whe huyoontun. Nts'oh dahoont'oh hoonts'i 'ilhiz huyilhchoot. 'Et whuz un'a bumai' lhai tileh.

*Too dízk'un ookw'uz yo 'udin'ai-i, Sizi yughu yalhduk*

16 “Dune too dízk'un 'ink'ez 'i nahidilhka'aih 'ink'ez 'aw oosa' yuk'uz yo nádooh'ah ait'oh. K'us lili t'a ts'e ayoo'alh ait'oh. 'Et nts'e la too dízk'un-i hukw'us'ai-un, 'et hukw'e yin'ai. 'Et de mbene la dandílhne ts'iyawh hinoohl'en.

17 Ndiz un'a 'et dúhoont'oh, di la nist'i-i, 'i hoonts'i nus de 'et ts'iyawh haootikulh. Di la whu'iz 'uts'ulh'en hukwa' ts'ut'en-i, 'et hoonts'i ts'iyanne t'ewhuntizeh. 'I ts'iyawh ndet la hoot'en-un, nus de ts'et haootikulh.

18 'Inka soo cho howahli nts'en'a la ndi khuni dutáhts'o. Soo ts'ih'un 'alha mbene la hootsool-unyaz t'ehonínzunne, 'enne 'on 'us lhat-un t'ehonínzun-un, 'et bugha whútalts'ulh. 'Ink'ez mbene la hoonli t'ewhunúszunne, hoonts'ool-unyaz hodits'o, ndai la 'aw 'i huyut'i-i huninzun, 'i hoonts'i bughu nayitálchulh.”

*Sizi ooloo 'ink'ez bulhutsinke te hiyulh yatilhduk hukwa' huninzun*

19 'Et 'awet ooloo 'ink'ez bulhutsinke te, hits'u hukwa' hut'en. Dune lhai k'et 'aw hiyenghoh neooya' ait'oh.

20 Whulohne 'et ndúhuyulhni, “Nloo 'ink'ez nyulhutsinke te 'az nodilhya, nyoti'elh hukwa' huninzun.”

21 'Et 'ubúlhni, “Mbene la Yak'usda ooghuni yoozilhts'aine 'ink'ez hik'une' ut'enne, 'enne sloo 'ink'ez sulhutsinke hinli, whe 'hint'oh.”

22 'Et hukw'elh'az 'ilhoh dzin yugha hodul'ehne bulh ts'i be handil. 'Ink'ez “Nyan uztooke,” ubúlhni. 'Et 'awet nus huzki.

23 Nus huzki whe Sizi 'aho nanisti. Khunsul bubulh taoodilts'ut 'ink'ez 'awet ts'i too be tádutih. 'Ink'ez tube howa óodli wheninle’.

24 'Inka ts'enahuyulhts'it, “NeMoodihti, neMoodihti, 'awet too netighan!” huyúlhni. 'Et ts'enandzut, 'ink'ez dudinya whe too k'ut nilhts'i khuni ulhtus-i be hukwa' yulhni. 'Et 'aho k'oh 'úhooja 'ink'ez dínghel.

25 'Et “Nohba 'alha' 'ust'oh-un, dáhooja?” ubúlhni. Ts'iyawh whehunilhjoot 'ink'ez buba hooncha. 'Et 'ulhodutni, “Ndun dune, 'en mbe unli whe 'unt'oh? Nilhts'i 'ink'ez tatsi 'i hoonts'i ndahne yulhni te yuk'une' ut'en.”

*Dune ntsi'-i nududeh-i ooyudúlts'i-un, Sizi soo ná'yinla*

26 'Et 'awet Gadarene yun k'ut yahuzki. 'Et njan 'et Galilee whanch'az whuz'ai.

27 'Et dehainya 'et 'aho dune 'et keyoh whut'en-un yududizya. 'En sa' whuts'un ntsi'-i nududeh-i lhai ooyudúlts'i. 'En tsan yit nuya, 'ink'ez 'aw yoh hliloh, 'et ts'un k'ut whut'i.

28 'Et Sizi yutilh'en whe yuts'u huyih 'ink'ez yubut nachániti. 'Ink'ez tube cho yuts'u tédudli, “Sizi nyun soo 'udedo Yak'usda ooYe' 'int'oh! Ndet sts'u hukwa' ninzun? Nts'u tedusdlih, dzoh nusilhdzut iloh!”

29 'Et 'uda' ndi ntsi'-i ndudeh-i khuniti be ubulhni ndun dune ye yáhanadoodeh ha. 'Oh da' lhuztih t'l'ool be huyulhghel oola 'ink'ez ookechun cha, 'et whuz un'a highunli inle'. 'Et hoonts'i lhat whe ndi ntsi'-i ndudeh-i yilhchuk whe ndi lhuztih t'l'ool tániduch'as 'ink'ez ndi ntsi'-i nududeh-i, 'en dune lhuhoot'ih ts'e whuz whéneyukw.

30 'Ink'ez Sizi 'en yoodulhkut, “Ndai la nyoozi?” “Legion,” yulhni. Lhane ntsi'-i nududeh-i ye yudúlts'i 'inka 'utni.

31 Ntsi'-i nudúdeh-i Sizi hits'u tedudli 'et nyo tsak'et whucho whut'ah hooloh-un, whuz te netolh'a' junih, huyúlhni.

32 'Et lhai nilhdukw-un gugoos whenun núlh'as. 'Et ntsi'-i nududeh-i Sizi hits'u tedudli gugoos ooyúdoodeh ha. 'Inka 'et butl'ahon'ai.

33 'Et ntsi'-i nududeh-i dune, 'i oots'u haídande whe gugoos yudánde. 'Aho gugoos bubulh whenghu hílghaz 'ink'ez too ubanghan.

34 'Et ndunne gugoos ghunline dahooja-un honalh'en whe ts'iyawh whehílghaz. Hidulh whe 'et keyoh whunat whut'enne 'ink'ez 'et keyoh whut'enne ts'iyawh hubodáni'.

35 'Et ndunne dune hodánts'o whe 'et whuz whehándil 'ink'ez honalh'en. 'Et Sizi highu nindil whe 'et ndun dune mbe la ntsi'-i nududeh-i oots'u hanáídide-un, 'en Sizi yuk'etl'a usda whe hinalh'en. Naih be dune unli 'ink'ez beni cha oogha nádilts'ut whe soo 'unt'oh. Ts'iyawh hinalh'en 'ink'ez hunílhjoot.

36 'Et mbene la dahooja-un honalh'enne, 'uyoonne cha hudáni' 'et dahooja la ndun ntsi'-i nududeh-i ooyudinda-un 'awet dujih.

37 'Et la ndunne Gadarene whut'enne 'et whunat whut'enne ndulcho whe hunílhjoot. 'Et huwa Sizi buch'a naooja' huyúlhni. 'Inka ts'i be naja 'ink'ez nahutikelh.

38 'Et ndun dune mbe la ntsi'-i nududeh-i oots'u hanádide-un, 'en Sizi yuts'u tedudli yulh útinelh hukwa' ninzun. 'Et hoonts'i Sizi whenáyalh'a' 'ink'ez 'uyulhni,

39 "Nyoh ts'e naindahl 'ink'ez dáhoolcho whe Yak'usda mba daja la, ts'iyawh budóni!'" 'Inka whenaja 'ink'ez keyoh ndulcho whe ts'iyanne Sizi dahoolcho yuba' hoonla-un ts'iyawh 'et huwun dune dáni'.

*Sizi Jairus ootse' dunaidilhti, 'ink'ez ts'eke Sizi yunaih t'aíznai-un*

40 'Et 'awet nyan whenaki. Ts'iyanne Sizi hónuta whe whusanaki ts'iyanne hóont'i' hinilh'en whe.

41 Soo yanáski íbulh 'aho dune Jairus yughu ninya. 'En Lizwif bulugliz whumoodih 'unt'oh. Yubut nachaniti 'ink'ez yuts'u tedudli duyoh ts'e yulh nátoot'as ha.

42 'Ilhohgun za ootse', whunizyat 'on 'at nat be yus k'ut at'en-un. 'En 'awet dáwhenintsai. Sizi Jairus ooyoh ts'e yulh nátist'az. 'Et 'awet 'ilhozdilne lhane higha óozdil.

43 'Ilhohgun ts'eke tube dzoh nuzut whunizyat 'on 'at nat yus k'ut 'et dúwhulyiz whe 'uskai' 'uyulh'en-un, yoo be dúyenne lhane cha hukwa' huyalh'en. 'Et hukw'uz duzooneya ts'iyawh gak yulhtsi, 'et hoonts'i nus za lhe'ínelh.

44 Ndun 'en ts'eke Sizi yut'a ts'e yughu ninya 'ink'ez nayits'uz-i yus ts'e ooban 'et yut'aíznai. 'Et 'aho uskai' 'uyulh'en-un 'etsul 'uja.

45 'Et Sizi 'utni, "Mbe 'uja st'aíznai?" "Ts'iyawh wheni iloh 'uts'uja," hutni. Peter 'ink'ez mbene la yulh 'uh'enne, 'enne 'uhutni, "Nemoodih lheltsukne nyando hahuníldo 'ink'ez nyuhoolhkalh. 'Ink'ez di ha dini 'Mbe st'aíznai?' dini?"

46 'Et Sizi 'utni, "T'oonuszun 'ilhohgun st'aíznai. Be stus-i sts'u hadílt's'ut t'oonuszun."

47 'Et ndun ts'eke t'oonanzin 'aw yuch'á ntool'ih ait'oh. Dutlut whe yughu ninya 'ink'ez yubut nachaniti. 'Et ts'iyanne nalh Sizi 'uyulhni ndet huwa yut'aíznai 'ink'ez daja whe 'aho soo ná'uja.

48 'Ink'ez 'uyulhni. "'Ustse' mba 'alha hoont'oh 'et huwa soo na'inja. 'Awet ndzi dizghel whe 'int'oh naindahl."

49 'Et 'Awhuz ndun ts'eke yulh yalhduk whe Lizwif bulugliz whumoodih ooyoh usda-un, 'en yughu ninya 'ink'ez 'uyulhni, "Ntse' dazsai. Whute ndun dune hodulh'eh-un, 'aw 'on 'un dzoh nilhdzut iloh. 'Awet dazsai whe 'unt'oh."

50 'Et Sizi yulh údants'o whe Jairus 'uyulhni, "Whenoljut junih, 'ants'i mba 'alha' hot'e', 'ink'ez la soo na'titnelh whe 'unt'oh."

51 'Ink'ez yeyoh ts'e daninya. 'Et 'aw 'uyoonne cha dalhoosya'. Peter, 'ink'ez James, 'ink'ez John, 'ink'ez ndun ts'oodun oobá cha 'ink'ez ooloo cha, 'enne za dahóodilh.

52 'Et ts'iyanne tso yahalhduk 'ink'ez hik'etedudli. 'Et Sizi 'ubulhni, "Ahtso iloh! 'Aw dalhital 'ants'i nanisti whe 'unt'oh."

53 'Ink'ez ts'iyawh highudloh, t'ehonínzun dazsai whe 'unt'oh.

54 Sizi ts'iyawh tenábunilh'a', 'ink'ez ts'oodun yula ilhchoot 'ink'ez, "Ts'oodun dudinyaih," yúlhni.

55 Ooyughi ooyunaídide 'ink'ez 'aho dudinya. 'Ink'ez oodusneke ubulhni, "Hoonliyaz yuti'ulh-i oogha náh'aiah."

56 Oodusneke tube buba hooncha, 'ink'ez khuni ulhtus-i be ubulhni, "'Uy-oonne dóhni' junih njan bulh dáhooja-un."

## 9

*Whunizyai 'on 'at nane yugha hodul'ehne, Sizi whebalh'a' huye 'ut'en k'oh 'uhotil'elh ha*

1 'Et whunizyane 'on 'at nane yugha hodul'ehne Sizi 'alhgoh buka' dani'. Ntsi-i nududeh-i, 'i ts'iyawh ndet la whehíltus-un cha, 'ink'ez himoodih hoole' ha, 'et bugha óonin'ai. 'Ink'ez dune ndet hukw'e hunduda-un, 'et cha soo na'boohoolh'en, 'et cha bugha óonin'ai.

2 'Uyoonne nts'en'a la Yak'usda lerwe unli-un 'et huwun ubulh yalhduk 'ink'ez ndudane soo na'boohooleh, 'et wheni whebalh'a'.

3 'Ink'ez ubulhni, "Nts'e la tíhdulh ts'e khun hoonliyaz toohla' junih. Nohtuz, 'ink'ez lhook'ez, 'ink'ez lhes cha, 'ink'ez sooneya cha, 'et ndunt'oh-i toohla' junih. Nanki dzoozt'an nyiz-i ooh't'e' junih.

4 Ndet yoh danáh'az-un, 'et za oohke', 'ink'ez 'et yoh za whenádoht'as.

5 'Et mbene la danáh'as lhuhonohdúsnine, 'et keyoh howu natiht'us whuts'o, 'et whulez ch'a nanke naóohghat. 'I gha la t'ehonózin buk'ehóotalts'ulh-un 'et but's'u hóolts'ulh."

6 'Inka whenáhidil 'ink'ez keyoh totsuk whutulh lhunáhusdil. 'Et whuz un'a dune khuni unzoo-i be bubulh yahulhduk. 'Ink'ez keyoh totsuk dune soo na'hulh'en.

*John dune too be 'ulh'en-un, 'en hizilghí*

7 'Et 'awet lerwe Herod huyulhni-un whulh udants'o nts'oh te Sizi ne'ut'en. Whulohne nduhutni, "John yaidlanne butoh nahitna', 'en 'unt'oh," hutni. 'Et huwa ba nawh 'uhooja.

8 'Ink'ez 'uyoonne cha 'uhutni, "Ndun 'en Elijah 'unt'oh whe nenalhts'et hainya." 'Et 'onghohne cha nduhutni, "'En 'uda' yinka Yak'usda be nus hoo'enne, 'ilhoghun nakhítna'-un 'ink'ez 'ut'en."

9 'Et Herod 'utni, "John ootsi k'únist'o inle'. 'Et hoontsi' mbe whe 'ut'en ndun lhe'hoont'oh te ne'ut'en-un bulh 'údusts'o?" 'Ink'ez yuti'elh hukwa' ninzun.

*5,000ne dunene, Sizi huyoo'alh-i bugha nín'ai*

10 'Et ndunne whel'a'ne whusanáhidil whe dahít'en-un, 'et ts'iyawh hidani'. 'Ink'ez "Dugwe", uztoodilh!" ubulhni, 'ink'ez njan Bethsaida keyoh whunat disoh ts'e whébanla.

11 'Et hoontsi' 'ilhozdilne nahooohon'ai whe huyuntizdil. 'Et Sizi hoont'i' whe highu nindil 'ink'ez nts'en'a la Yak'usda lerwe unli hukw'un'a huwun ubulh yalhduk. 'Ink'ez mbene la soo na'titnelh hukwa' ninzun, 'enne cha ts'iyawh soo ná'balh'en.

12 'Awet ts'etniz hukw'elh'az yoo'un hoozulh-un 'ink'ez ndunne whunizyat 'on 'at nane, 'enne highu nindil 'ink'ez 'uhuyulhni, "Ndunne 'ilhozdilne nabalh'alh njan disoh-un 'uts'int'oh. 'Et la ndoho keyoh whunat huya'alh-i hoket 'ink'ez 'et la hutítez-un cha nahohóleh."

13 'Et hoontsi' Sizi ndúbulhni, "Hoonliyaz huyoo'alh-i bugha nánuht'aih." 'Et 'uhuyulhni, "Lho nanki 'ink'ez lhes kwulai' cha, 'aw 'i za ts'ut'i. 'Et ndunne 'ilhozdilne t'alh-i buba ts'onket de, 'et de za soo bugha ná'uztít'ulh."

14 'Et njan 'ilhozdilne 'ankw'us 5,000ne dune hinli. 'Et Sizi yugha hodul'ehne ubulhni, "Kwulat whunizyane hinli whe lhendun natl'ahudoolts'ilh budáhni."

15 'Et whuz un'a huja. 'Et 'awet ts'iyawh natl'ahudilts'i whe

16 'et kwulai' lhes yilhchoot 'ink'ez lho nanki cha, 'et ndo whunalh'en 'ink'ez musi ni whe yuba tenadidli. 'Et taidanyuz 'ink'ez yugha hodul'ehne butl'ayánla, 'ilhozdilne bugha húyo'alh ha.

17 Ts'iyawh 'uhan'al 'ink'ez soo' huja. Ndai la ch'utizkat-i ts'iyawh nahuyalhdzoo whe whunizyai 'on 'at nanki chalh'al dizbun.

*Sizi 'en Christ unli, 'et Peter huwu yalhduk*

18 'Et hukw'elh'az Sizi didutch'oh gaih tenadudli 'ink'ez yugha hodul'ehne huyulh 'ut'en 'ink'ez uboodulhkut, "Ilhozdilne, mbe usdli hutni?"

19 'Ink'ez 'uhuyulhni, "John dune too be 'ulh'en-un 'int'oh hutni. 'Et 'onghohne cha Elijah 'int'oh hutni. 'Ink'ez 'onghohne cha hutni 'uda' nus hoo'enne, 'ilhoghun dunadija-un, 'en 'int'oh, hutni."

20 'Et, "Nohni do?" ubulhni, "Mbe usdli dahni?" Peter yatilhduk whe 'uyulhni, "Mbe la Yak'usda ooChrist ts'utni-un, 'en 'int'oh."

*Dzoh nutizut-un 'ink'ez datítsah-un, 'et Sizi huwu yalhduk*

21 'Et khunite be 'ubulhni, "Khun te 'uyoonne te dóhni' junih!"

22 'Ink'ez 'ubulhni, "Yinka dune ye' lhat-un whé dzoh nutizut ooba' hoont'oh. 'Ink'ez ndunne tso whudilhduzhne cha, 'udedo lubretne cha, 'ink'ez Moses be 'udustl'us 'uk'ununáguzne cha, 'enne ts'iyawh hich'az dútatni whe' hint'oh 'ink'ez 'et hituzilhghelh. 'Ink'ez whulh tat dzin dunadutádah."

*Sizi ubulhni, "Mbe la sulh tídul hukwa' ninzunne, dich'oh duba moodih nahoodle' ait'oh"*

23 'Ink'ez ts'iyawh úbulhni, "Mbe la dune se' 'ut'en k'oh ts'e oot'en ha hukwa' ninzun-un, 'et ndunt'oh-un ndai la dats'int'oh-un, ts'iyawh whuladootnih 'ink'ez dzin totsuk dutulalhguş yólhchoot 'ink'ez suntooya'.

24 'Et huwa mbene la whe húkhu-na-un hotilhyihne, 'enne 'et hoonts'i ninta huhúta'alh. 'Et hoonts'i mbe la whe khuna-un si sgha ninta oonin'ai de, 'en whe hukhu-na-un hotilhyih.

25 'Et dune ndi yun k'ut ndulcho whuch'a oonilhde de, 'et hoonts'i didutch'oh ye khuna-i ninta nín'ai k'us ye khuna-i yugha nahootálhchulh de, 'et ndet suba whuch'a hólhdeh?

26 'Et mbene la dune si cha 'ink'ez sghuni cha yukayá unli-un, 'et de yinka dune ye', nts'o de dich'oh ye dizti'-i cha, ooBá ye dizti'-i cha, 'ink'ez Yak'usda oolizas hiye dizti'-i cha, 'et whuz un'a whusanaja de, 'et 'oh de bukayátileh.

27 'Alha nohdusni, whulohne njan nudilhyanne ndet la dahutitsah-un 'et whuts'un ndet la Yak'usda whe lerwe unli-un, 'et dahutitsa whutso hoti'elh."

28 Lhk'udit dzin at'en hukw'elh'az 'et nja dutni-un, 'et Peter, John, 'ink'ez James ndo dzulh k'uz dulh úbilya, whuz tenadutidli ha.

29 'Et 'awhuz tenadudli whe 'et oonin ts'e 'uts'un oonat'en suli'. 'Ink'ez oonaih cha soo ts'ih'un 'ulhyul suli', 'ink'ez oots'u ha' ánduz cha 'uja.

30 Khunsul nane dune, 'enne hiyulh yálhduk. 'Ilhoghun Moses 'ink'ez 'ilhoghun Elijah.

31 Busaoolkalkh 'ink'ez be hóodat'en. 'Et Jerusalem ts'e datinelh whe datítsah-un lhaóodutileh, 'et huwun huyulh yálhduk.

32 'Et Peter 'ink'ez yulh 'ut'enne sa' tube hantez. 'Et ts'ih'un un'a t'enawhehunide whe 'et Sizi oots'u hayánduz-i, nane dune yuzih usyin whe hitilh'en.

33 'Et hukw'elh'az 'ink'ez highu whin'az whe Peter Sizi 'uyulhni, "Nemoodih hoonzoo njan uzdilhts'i. Tat-un whut'ah uzтитеz-un 'uts'oohooleh. 'Ilhoghun nyun mba, ilhoghun Moses ba, 'ink'ez 'ilhoghun cha Elijah ba." 'Et hoonts'i Peter daja dutinelh 'aw t'oonuszun.



34 Yalhduk whe kw'us buk'einde. 'Et kw'us bunasut'i whe 'et whe hunil-hjoot.

35 Kw'us toh ts'e khuni huduzts'ai, "Ndun sYe' 'en ookw'esi-un 'unt'oh. 'En oozóolhts'ai," ni.

36 'Et yaduk-un 'etsul 'uwuhudija whe Sizi dich'oh za 'unt'oh whe hinilh'en. 'Et 'aw hoonliyaz lhe'hudínel ndet hohon'en-un. 'Et 'oh da' dzin 'aw dune lhodínel nts'en'a hinalh'en-un.

*Ts'oodun ntsi'-i nudúdeh-i ooyudinda-un, 'en Sizi soo ná'yinla*

37 'Et 'om bun dzin shus k'ut ts'e hanáhidil whe 'ilhozdilne Sizi hidudizdil.

38 'Ilhoghun dune 'ilhozdilne butoh Sizi 'últus-un yuts'u háyih whe nja dúyulhni, "Hodulh'eh-un nts'u tédusdlih sye' nolh'en. 'En 'aw 'ilhoghun syaz 'unt'oh.

39 'Et khunsul ntsi'-i nududeh-i yilhchuk ibulh hazulh, ookaootuzuk, 'ink'ez huwus oozá hanúldoh. 'Ink'ez tube howa whúlna whe ye yáhanadudoh. 'Et huwa ndulcho whe ooka hootsulh.

40 'Inka nye hódil'e'ne buts'u tédusdli hits'u hanáhidoolhdeh ha 'et hoonts'i 'aw 'uhooneh ait'oh."

41 'Et sizi 'utni, "Nohni 'andit whudizulhne 'alha 'aw nohba 'alha lhe'hoot'oh. Nohni dune 'aw ts'ih'un lhe'it'ohne ahli. Dawhuldzoh nohtoh 'utist'elh whe nohbulh óosyin? Nye' sts'ílhelhel!"

42 'Et 'awhuz Sizi ts'u yilhelh whe ndi ntsi'-i nududeh-i nayáno 'ink'ez yukaootilhzut. 'Ink'ez Sizi ntsi'-i nududeh-i khuniti be 'uyulhni 'et whe khuniti be hukwa' yudáni', 'ink'ez ts'oodun soo na'uja whe oobá tl'anáyalhti.

*'Awet nilhdukw yinka dune ye', 'en dune ntsi'ne tl'atitelh k'une' hitil'en ha*

43 'Ink'ez Yak'usda daltus la 'et huwa ts'iyanne buba hooncha sulí. 'Ink'ez Sizi nts'oh tula ne'ust'en-un buba hooncha k'et, 'aw buk'ohoodózit ait'oh. 'Oh da' za yugha hodul'ehne 'et 'úbulhni,

44 "Ndi khuni be nohbulh yatisduk-un, soo cho nohdzi be whudoolts'it. 'Awet nilhdukw yinka dune ye', 'en dune ntsi'ne tl'atitelh k'une' hitil'en ha."

45 'Et hoonts'i njan daja ni-un 'aw ts'ih'un 'elhehonízil. 'Aw buba ts'et ha lhúhoolts'ulh. 'Et huwa daja ni, 'aw ts'ih'un nelhúhuhoo'al. 'Et hoonts'i whehúnuljut, 'aw hukwa huyoodolhkut ait'oh.

*Mbe suba netoh 'uk'enus dune uncha-un unli?*

46 'Ink'ez dich'oh dutoh lhdulhyoh 'ahudutni k'us mbe 'uk'enus uncha-un tileh.

47 Dudzi yo whe daja huninzun Sizi t'eeoninzun. 'Et huwa 'ilhoghun ts'oodunyaz yilhchoot 'ink'ez duzih neyulti.

48 'Ink'ez ubulhni, "'Et soo ts'ih'un un'a 'unohdusni, mbene la soozí' gha ndun ts'oodunyaz hik'esutsitne, 'enne sk'ehintsi' whe' hint'oh. 'Ink'ez mbene la sk'esutsitne, 'enne mbe la whuz de sútílh'a'-un, 'en cha hik'esutsit whe' hoont'oh. 'Et huwa, mbe la nohtoh-un 'uk'enus dune ba tel'en-un, 'en 'uk'enus ncha tileh."

*Sizi ubulhni, "Mbe la nech'az úlhdi'ni-un, 'en nebulh 'unt'oh"*

49 'Et John 'uyulhni, "NeMoodihti 'ilhoghun dune nyoozi' be ntsi'-i nududeh-i dune buts'u hanaídulhdoh, 'et ts'uhon'en. 'En 'aw nebulh 'ilhoghun lhiloh, 'et huwa 'et dut'en-un whuch'az níyoot."

50 'Et hoonts'i Sizi 'uyulhni, "Whuch'a nahyoot iloh! 'Alha mbe la 'aw nech'az úlhdi'ni-un, 'en nets'ú ditni-un 'unt'oh."

*Keyoh Samaria whut'enne, 'enne Sizi hikalhe'nízun*

51 'Et 'awet Sizi ooba whusaóodanzut ndo yak'uz nátidalh-un huba, 'et 'awet Jerusalem whuts'u nalh'a 'ink'ez whuz natidalh-un howun nanínuzut.

52 Khuni yuba na'ane dutso whe balh'a'. 'Enne hutizdil whe 'et 'awet 'ilhoghun Samaria keyoh ts'u hoozdil hiba lhaoodutileh ha.

53 'Et hoonts'i Jerusalem ts'u tizya-un 'et nahuhoon'ai whe njan keyoh Samaritan whut'enne 'aw hikalhe'nizun.

54 'Et yugha hodul'ehne James 'ink'ez John honal'h'en bulh dahooja la whe Sizi huyoodulh'kut, "NeMoodihti Elijah k'un'a ndi kwun ndus de yak'uz ts'e hadóonat 'ink'ez ts'iyawh hadók'un uzdooni', 'et eh neba hukwa' ninzun?"

55 'Et hoonts'i but's'u nálh'a 'ink'ez hukwa' budani', 'ink'ez 'utni, "'Aw daja nahzun t'ewhunuzáhzun 'et huwa' dahni!

56 Soo cho soo zúlhts'ai, yinka dune ye', dune ye khuna-i musai yutilhtselh ha iloh whusainya, ubutilhyih ha whusainya." 'Ink'ez 'et 'udun keyoh whuyaz ts'e whehándil.

*Mbe la yun wheoonilhch'ul-un 'ink'ez k'oh naidutut'ih de, ndunt'ohne ndet la Yak'usda whulerwe unli-un, 'et 'aw huba soo lhé'hit'oh whe' hint'oh*

57 'Awet ti hidulh whe 'ilhoghun dune Sizi yughu ninya 'ink'ez 'uyulhni, "SMoodihti nts'e la t'inya ts'e ts'iyawh nyun tisyalh."

58 'Et Sizi 'uyulhni, "Nanguz 'enne cha 'an whut'i whe' unt'oh 'ink'ez dut'aiyaz cha t'o ut'i. 'Et hoonts'i yinka dune ye', 'aw tsén tal'al-un 'et hoonts'i lhuóot'i."

59 'Et 'uyoon cha 'ulhni, "Nyun cha sunanyalh." 'Et hoonts'i 'uyulhni, "SMoodihti, k'at 'udechoo sbá oozí 'aóostelh."

60 'Et hoonts'i Sizi 'uyulhni, "Whute dudulh yaidlanne didutch'oh 'anal-huhooyelh. 'Et hoonts'i nyun ndulcho whe nónya' 'ink'ez ndet la Yak'usda lerwe unli-un, ts'iyanne 'et huwun budóni!'"

61 'Et 'uyoon cha 'utni, "SMoodihti nyun tisyalh, 'et hoonts'i 'udechoo snatneke syoh ts'e but's'ú nunatisdalh-un 'ink'ez 'ilhiz wheni nohghu tisyalh budutásnelh, 'et stl'ahóon'aih."

62 'Et hoonts'i Sizi 'uyulhni, "Mbe la wheoonilhch'ul-un 'ink'ez k'oh naidutut'ih de, ndunt'ohne ndet la Yak'usda whulerwe unli-un, 'et 'aw huba soo lhé'hit'oh whe' hint'oh."

## 10

*Lhtak'ant'it whuizyane (70) yugha hodulh'ehne, Sizi dutso whebalh'a'*

1 'Et hukw'elh'az neMoodihti lhtak'ant'it whunizyane (70) 'enne 'utahábanla keyoh whuti totsuk nutiyalh-un, nane hinli whe dutso whebalh'a'.

2 'Et 'ubulhni, "'Alha 'awet há' nukat-un newhúninzut 'ink'ez t'l'o mai' lhai sulí', 'et hoonts'i 'ut'enne 'aw soo lhe'huniltsuk. 'Et huwa Yak'usda ha' nukat-un whumoodih, dich'oh 'a'duninla-un 'uyoonne cha 'ut'enne whusáboolh'a', 'et huba tenadahli.

3 'Awet ahdulh 'ink'ez soo zúlhts'ai! Lhe'hoont'oh yus 'usbai talgok te howaóodli, 'et whuz un'a nohni cha nohba howaóodli, 'usbai k'un'a yús toh ts'e nohtís'a'.

4 'Aw sooneya zus cha, 'ink'ez lhook'ez cha, k'us kegon cha, 'i dunt'oh-i toohla' junih. 'Ink'ez ti dune dudíh'az de, khun te hadih hoonts'i budóhni' junih.

5 Ndet yoh danáhya de, 'et yoh dilhts'ine njan dúbudohni', nohyoh whudóghel oole'.

6 'Et dune t'edusni-un 'et usda de, 'et de nohdzi dizghel-un 'et dutá'alh. 'Et 'aw ndunt'oh-un hooloh de, be nohdzi dizghel-i nohts'u nádutilts'ulh.

7 'Et yoh za oohke'. Ndaí nohgha húya'aih 'i za ooh'alh 'ink'ez oohnai'. 'Alha 'ut'enne bube 'ut'en k'elha hole' huba' hoont'oh. 'Ink'ez lhelhdun yoh te danaóohdaih junih.

8 'Ink'ez nts'e la 'udun keyoh ts'óozah'az de, 'et 'anìh nohuwhútni de, 'et ndai la nohbut nehiniñla-i, 'i ooh'alh.

9 'Et mbe la 'et yoh ndudane, 'enne cha soo na'boohle 'ink'ez 'ubudóhni', 'Ndet la Yak'usda lerwe unli-un, 'awet nohenghoh 'uhoont'oh.'

10 'Et nts'e la keyoh ts'oozah'az-un, 'et 'aw nohghu nulhíhiyal de, 'et ti k'enaoojha, 'ink'ez 'udoohni',

11 "Et njan nohkeyoh whulez ndai la neke ghu hoonli-i, 'i hoonts'i, nohch'a búna'ts'alhde. 'Et hoonts'i t'ewhunóhzin huba' hoont'oh, ndet la Yak'usda whulerwe-un, 'et nohenghoh 'uhoont'oh,' 'et budóhni'.

12 'Alha ts'ih'un nohdusni, 'et dzin whusaootilts'ulh-un, 'et keyoh Sodom whut'enne, 'oh da' nts'en'a la bubulh dahooja la inle', 'et nja keyoh whut'enne, mbene la nohka lhe'nízunne, 'enne 'on nus hoontsi-un bughá óotalts'ulh.

*Mbene la dudeni nahádunooleh hukwa lhe'hunízunne, dáwhultsi'-un butsu hóoltsulh whe'hoont'oh*

13 "Et nohni Chorazin whut'enne, 'ink'ez nohni Bethsaida whut'enne, nohni cha 'awet dawhultsi-un 'et nohts'u hóolts'ulh! Soo cho soo zúlhts'ai, ndet la hoolhtus-un nohnat 'uhooja-un, ndunne Tyre 'ink'ez Sidon whut'enne, 'enne bunat 'et cha 'et ndúhooja de, 'uda' da' dudeni náhondunizdla oole' da'. 'Ink'ez da' doso be hudilhts'i 'ink'ez da' kwun lez k'éhidzi. 'Et whuz un'a da' 'uhooneh oole'.

14 'Et dzin nohba whuz de hoolts'ulh nohba nahutideh ha, 'et ndunne bubulh dawhutanelh-un, nohni 'on nus nohba hootatsi'.

15 'Et nohni Capernaum whut'enne ndo yat huba soo áht'oh nahzun eh? 'Awundooh! 'Et k'us kwuncho yo ts'e nóhotilhdulh!

16 'Ink'ez nohni stso tihdulh mbene la nohoozilhts'aïne, si cha soo hoozilhts'ai. Mbe la ch'a nohnísjoot-un, si cha ch'a sunísjoot whe' hoont'oh. 'Ink'ez mbe la ch'a sunísjoot-un, mbe la whuz de sútìlh'a'-un, 'en cha ch'a inísjoot whe' hoont'oh."

*Ndo yak'uz nohoozi' 'uk'usguz, 'et huwa whunólhni*

17 'Et hukw'elh'az lhtak'ant'it whunizyane huhoont'i' whe whusanáhidil. 'Et nduhúyulhni, "NeMoodihti ndunne ntsi'-i nududeh-i, 'enne hoonts'i, nyoozi' gha nek'une' hut'en!"

18 'Ink'ez 'ubulhni, "Ditni kwun k'un'a ndus hadúnat, 'et whuz un'a Satan ndus de yak'uz ts'e hadílduz, 'et nus'en.

19 Soo zúlhts'ai, t'l'ughus 'ink'ez lubezo unli-i, scorpion huyulhni, tube cho ook'unahya. 'Ink'ez ndai la nohch'az ditnìne hiye ulhtus-i, 'et ts'iyawh ndi bando 'ooht'e'-un, 'et nohtl'ahóos'ai 'ink'ez 'aw hoonli nohondólhda ait'oh.

20 'Et hoonts'i ntsi'-i nududeh-i nohk'une' 'oot'en huba 'unt'oh, 'aw 'et huwa iloh whunólhni. 'Et k'us ndo yak'uz nohoozi' ts'iyawh 'uk'usguz, 'et huwa za whunólhni."

*Sizi Ndoni be whunólhni*

21 'Et 'oh whuya 'uhunit'oh Sizi Ndoni be whunólhni whe nja dutni, "UBá nyun nyudústi"! Yak'uz 'ink'ez yun k'ut huMoodihti inli. Whunihne 'ink'ez

hodul'ehne, ndi 'i ts'iyawh buch'á whuntin'i. 'Et hoontsi' ts'oodunyaz le'unt'ohne, 'enne bunalhts'et hahon'ai. 'Alha 'uBá dainja la hoonint'i.

<sup>22</sup> 'UBá ts'iyawh stl'ahónla, 'ink'ez 'en ooYe' mbe unli ts'iyanne t'ehonúszun. OoBá 'aw 'en za t'eininzun. 'Ink'ez mbe ooBá unli, ooYe' 'aw 'en za t'eininzun. 'Ink'ez mbe la ooYe' 'onghohne whubuntilhtun hukwa' ninzun de, 'en za ooba' hoont'oh."

<sup>23</sup> 'Ink'ez yugha hodul'ehne butsu náhl'a 'ink'ez yooyo whútsul 'ubúlhni, "Ndet la hoo'h'en-un 'uyoonne duna be honilh'en, 'enne 'uk'enuz hoonzoo-un bugha whults'ut.

<sup>24</sup> Nohdusni lhane nus hoo'enne cha 'ink'ez lerwene cha 'enne dalcho-i be ndet hoo'h'en-un hoti'elh hukwa' huninzun, 'et hoontsi' 'aw lhuhuhó'el. 'Ink'ez ndet la whudáhts'o-un 'enne cha hidutáts'o hukwa' huninzun 'et hoontsi' 'aw lhohodits'il."

*Daztit'elh whe 'ilhiz be ts'ukhuna-i ts'ítálhchulh?*

<sup>25</sup> 'Et hukw'elh'az 'ilhoghun Moses be' 'udustl'us 'uyoo unli be yalhdruk-un, 'en dudinya 'ink'ez Sizi 'onilha yoodulhkut, "Nehodulh'eh-un datist'elh whe 'ilhiz be ts'ukhuna-i hootáschulh?"

<sup>26</sup> 'Et Sizi 'utni, "Ndet 'uk'uwhusguz Moses be 'udustl'us k'ut? Ookw'uyailhdruk whe nts'en'a mba daja ni?"

<sup>27</sup> 'Et ndúyulhni, "Ndiz un'a nja dutni, 'Yak'usda nyuMoodihti ndzi ndulcho-i be cha, nzul ndulcho-i be cha, nyunut'i ts'iyawh 'i be cha, nyeni ts'iyawh 'i be cha, 'et whuz un'a 'en ook'eoontsi'. 'Et dáhoont'oh hukw'un'a nyunch'oh k'enaintsi', 'et whuz un'a za nyenghoh whut'i-un 'en cha ook'eoontsi'."

<sup>28</sup> Sizi ndúyulhni, "Soo ts'ih'un 'udini. 'Et ndint'en de, 'et de 'ilhiz wheni khutanalh."

<sup>29</sup> 'Et hoontsi' ndun dune ts'ih'un 'unt'oh-un na'dudil'i. 'Et huwun Sizi yoodulhkut, "Mbe la senghoh whut'i-un?"

<sup>30</sup> 'Et Sizi nja dúyulhni, "Ilhoghun dune Jerusalem whe dinya 'ink'ez Jericho ts'u tizya whe 'undunut'ihne huyílhchoot. Oonaih ts'iyawh higha haháyulya 'ink'ez ka huyulhtsi, 'ink'ez 'et nehinihlhti, 'ink'ez higho whenádil, 'awet dátsa whe.

<sup>31</sup> Soo 'oh da' za 'ilhoghun lubret ti 'oh whuya uyalh whe ndun 'en yutilh'en. Yutilh'en whe 'ants'i yanch'az lhusiya.

<sup>32</sup> 'Ink'ez soo whuz un'a za 'ilhoghun dune Levi ts'u hainzut-un, 'en cha 'oh whuya uyalh whe yunalh'en 'ink'ez 'ants'i yanch'az lhusiya.

<sup>33</sup> 'Et hoontsi' 'ilhoghun Samaria whut'en-un, 'en cha 'oh whuya uyalh whe yutilh'en 'ink'ez 'aho yugha te'ninzin.

<sup>34</sup> Yughu ninya 'ink'ez khe cha yukailhdzo 'ink'ez ts'ekoo too' cha, 'ink'ez yuka' dalh'oo. 'Ink'ez dughuna' k'éyilhti 'ink'ez dune ts'uztez bayoh ts'ú yoolhti 'ink'ez 'et yughunli.

<sup>35</sup> 'Et 'om bun dzin tiyalh whutso nanki sooneya ts'uztez whumoodih tl'ayan'ai 'ink'ez 'uyulhni, 'Ooghonle'. 'Ink'ez ndai la 'on 'un ookw'uz ts'iyai-yilh'i-i whusanásja de mba ookw'elha whutiselh.' "

<sup>36</sup> 'Et Sizi 'uyoo unli be yalhdruk-un 'en yoodulhkut, "Et ndun mbe la dune untsi'ne 'ankw'unli be yizilhghi whe ndunne tane dune hinalh'en da, 'et k'us mbe soo ts'ih'un un'a yenghoh whut'i-un 'unt'oh ninzun?"

<sup>37</sup> 'Et 'uyulhni, "Mbe la yugha te'ninzit-un, 'en 'unt'oh!" 'Et Sizi 'uyulhni, "Awet inyalh 'ink'ez nyun cha whuz un'a za 'et ndónt'en!"

*Mary 'uk'enus hoonzoo-un 'utahahón'ai*

<sup>38</sup> 'Et hukw'elh'az hidulh whe Sizi 'udun keyoh ts'oozya 'ink'ez ts'eke Martha huyulhni, duyoh ts'e ghu nuseya.

39 'Ink'ez bulhtus Mary huyulhni, 'en cha Sizi yucheh usda 'ink'ez yughuni yoozilhts'ai.

40 'Et hoonts'i Martha nts'en'a la bugha ná'tit'alh-un 'et tube 'uníst'et. 'Et Sizi yughu ninya 'ink'ez 'uyulhni, "SMoodihti 'ants'i mba hoont'oh eh sulhtus sich'oh za 'et nesunilhti butaost'en ha? 'Ink'ez sla oot'en dini!"

41 'Et hoonts'i Sizi 'uyulhni, "Martha Martha lhat-un la hoot'oh-un howu nuni ninzut!

42 'Et hoonts'i 'aw 'ilhoghun za 'uk'enus nduts'ooneh huba' hoont'oh. 'Et Mary 'uk'enus hoonzoo-un 'utahahón'ai whe' hoont'oh 'ink'ez 'aw oola k'éhahoolts'it ait'oh."

## 11

### *Ndiz un'a tenazdoodli huba' hoont'oh*

1 'Et 'ilhoh dzin, 'ants'i 'oh ho Sizi tenadudli. 'Etsul 'udija whe 'ilhoghun yugha hodul'eh-un yulhni, "John nts'en'a la yugha hodul'ehne whubodalh'e, nyun cha whuz un'a tenazdutidli-un whuneoodil'h'eh."

2 'Et ndubulhni, "Nja dudahni whe tenadoohdi, 'NeBá yak'uz sinda.

Nyoozi' dóti'.

Dahoont'oh whe lerwe inli, 'et cha nets'ó toolts'it.

'Ink'ez ndet la yak'uz ts'e hukwa' ninzun dahooja la, ndi yun k'ut cha, 'et whuz un'a za 'et dúhoneh.

3 Ndai la 'andit dzin uzti'ulh-i, negha nín'aih.

4 'Ink'ez 'uyoonne bulh dulhyoh ts'uwhulh'ai de, buba whunats'odoolnoh.

'Et whuz un'a za nelubeshi neba oonaoodolnoh.

Nts'e la tank'us uznint'i-un whuch'a neghinli.

'Ink'ez ntsi'-un 'en ch'a néghinli.' "

5 'Ink'ez Sizi 'ubulhni, "Nohni nohtoh mbe 'unt'oh ook'eke hoonli 'ink'ez tuzniz oots'u tíyahh 'ink'ez 'udutáhnell, 'Sk'eke lhes ta sghu sinla!

6 Njan sk'eke-un 'ilhoghun sghu ninya. Nilhzaz de hainya, 'aw oogha íyos'alh-i hooloh.'

7 'Ink'ez la yoh whuts'un idóni', "Aw sgha ínai iloh. Dati 'awet dánadilts'ut whe 'unt'oh. Suzkeh te ts'iyawh naznitez. 'Aw dunadósja' ait'oh. 'Ink'ez hoonliyaz ngha óos'alh ait'oh.'

8 'Et nohdusni, 'aw dunadoja' ait'oh 'ink'ez hoonliyaz yugha óo'alh ait'oh, ook'eke-un 'unt'oh 'et hoonts'i. 'Et hoonts'i whuz yoodulhkut za 'uyulhni, 'et huwa dunadutádalh 'ink'ez ndai yuka' ninzun ts'iyawh yugha ítalelh.

9 'Et whuz un'a za nohdusni, Yak'usda ndai la ooka yoodulhkut-i nogha íta'alh. Oooknáhta 'ink'ez nahootáh'alh. Dati dunulhkw'uz 'ink'ez nohba dáha' dutikwus.

10 'Et mbene la Yak'usda hoonli hits'u hukwa 'utni de, 'enne 'et bugha whútakulh. Mbene la hoonliyaz hukwunútane, 'enne nahuhootá'alh. 'Ink'ez mbene la dati dunulkw'uzne, 'enne cha buba dáha' dutikwus.

11 Mbene nohbáke nohtoh, ooye' lhes yuts'u ha 'utni de, 'aw tse yutl'adóo'alh ait'oh. K'us lho yuts'u ha 'utni de, 'aw 'i k'et t'l'ughus yutl'a oolelh ait'oh.

12 K'us lugok ghez yuts'u ha 'utni de, 'aw 'i k'et ntsi'-i neoolht'ah-i, scorpion huyulhni, 'i yutl'ayóolhtelh ait'oh.

<sup>13</sup> Ndziz un'a nja duhoont'oh, nohni lubeshi 'ulh'enne ahli, 'et hoonts'i t'eonáhzun nts'en'a unzoo-i nohuzkeh gha tihlelh. 'Et dáwhulcho-i be 'on nus ndo yak'uz nohBá, mbene la yoodulhikutne, Ndoni bugha tí'alh."

*Ooba 'alha lhe'hoot'ohne, 'enne hutni, "Sizi, 'en netsudule ye ulhtus-i be 'ut'en"*

<sup>14</sup> 'Et 'awet ndi ntsi'-i nududeh ooyudinda-un 'aw yaoolhduk ait'oh whe Sizi dune ts'u hanainanyoot. 'Et ts'u hanainanyoot whe dune yalhduk-un 'awet yawhenilhduk. 'Et 'ilhozdilne ts'iyawh buba hooncha.

<sup>15</sup> 'Et whulohne nduhutni, "Beelzebul mbe la ntsi'-i nududehne bumoodih, 'en be ntsi'-i nududeh-un dune yuts'u hanainanyoot."

<sup>16</sup> 'Et 'uyoonne huyoolhdzih whe huyoodulhikut, "Yak'uz ts'e whuts'un neba huwa 'it'en tune' tant'en eh, 'et whunenilhtun?"

<sup>17</sup> Daja huninzun-un t'eoninzun 'inka 'et dúbulhni, "Nts'e la whulerwe hinli-un, 'enne lhch'az nehúdindil de, 'enne ts'iyawh gak hutileh. 'Et whuz un'a za 'ilhoghun yoh dilhts'ine, 'enne cha lhch'az nehúdindil de, 'enne cha gak hutileh.

<sup>18</sup> 'Et whuz un'a za nts'e la Satan lerwe unli, 'et didutch'oh lhch'az nedinja de, nts'en'a ookw'úne' whut'en za tileh? Lhe'dahni Beelzebul 'en be ntsi'-i nududeh-i dune ts'u hanánusyukw dahni.

<sup>19</sup> 'Et si Beelzebul 'en be 'ust'en de, 'et de sudahni nohni nohye'ke k'us mbe be suba ntsi'-i nududeh-i dune ts'u hanábonuyukw? 'Et huwa 'enne bugha t'ewhutihzeh tank'us údahni!

<sup>20</sup> 'Et hoonts'i Yak'usda oolagga be ntsi'-i nududeh-i dune ts'u hanánusyukw de, 'et 'alha' hoont'oh whe nts'e la Yak'usda whe lerwe unli-un, 'et 'awet nohghu whults'ut whe' hoont'oh.

<sup>21</sup> 'Et dune ulhtus-un lhutigán-un huba lhadint'oh whe, 'et duyoh huwunli 'ink'ez ndai la 'et yuzdla-i, 'aw oot'á'onalh ait'oh de.

<sup>22</sup> 'Et 'uyoon yanus 'ultus-un yundílhda' 'et whe yuch'a' nilhde. 'Et dune ye lhutigán-i yut'aninintan-i ts'iyawh yugha hayulya. 'Et hukw'elh'az mbe la ooch'a' ninde-un ndai la 'et yuzdla-i, 'i cha ts'iyawh 'uyoonne ba lhk'eyanla 'ink'ez butainíla.

<sup>23</sup> Mbene la sulh lhe'it'ohne, 'enne sch'az huditni whe' hint'oh. 'Ink'ez mbene la 'aw dune sla 'ilhulhósdlene, 'enne ts'iyawh 'ants'i yahitákulh.

*Dahooja la whe ntsi'-i nududeh-i doo cha za dune buyunaidide de*

<sup>24</sup> "Et ntsi'-i nududeh-i dune ts'u hanáidide whe, yun whudzigh-un 'et whuz nududeh natilyis-un hukwu níta. 'Et 'aw ndoohóont'oh-un nalhuhoo'al 'inka dich'oh na'dudútni, "Et mbe la ooyudisda'-un, whuz za natoosja."

<sup>25</sup> 'Et whuz naoodaih te 'ink'ez 'et nahoo'aih ndun dune dudzi yo lhodítsun nawhulhtsi 'ink'ez ts'ih'un na'uja.

<sup>26</sup> 'Ink'ez 'et 'uts'un whedudoh 'ink'ez lhtak'ant'ine ntsi'-i nududeh-i 'enne yanus 'ultsi'ne, 'enne 'et dune hiye nádudoh 'ink'ez 'et nehúnih. 'Et ndun dune mbe la hiyudúls'ti-un, 'en 'et whutsoda' whanus 'ultsi' suli'."

*Mbene la Yak'usda ooghuni yudits'one 'ink'ez yoontunne, 'enne 'uk'enus hoonzoo-un buts'u hools'ulh*

<sup>27</sup> 'Et Sizi nja dutni-un hukw'elh'az, 'ilhozdilne butoh 'ilhoghun ts'eke yuts'u huyih, "Mbe la oochan ts'u hainzut-un 'ink'ez mbe la nye 'alht'ukw-un, 'en ts'eke 'uk'enus hoonzoo-un oogha whults'ut," ni.

<sup>28</sup> 'Et hoonts'i Sizi 'uyulhni, "Et 'uk'enus hooncha-un 'uhooont'oh, mbene la Yak'usda ooghuni yudits'one 'ink'ez yoontunne, 'enne 'uk'enus hoonzoo-un bubulh 'uhooja!"

*Hooncha tune' whut'en-un, 'et za hukwa hit's'en*

<sup>29</sup> 'Et 'ilhozdilne lhan'un te nus za lhe'huniltsuk 'ink'ez 'ubulhni, "Njan 'andit whudizulhne dune, 'enne hintsi'. 'Et hoonliyaz hooncha tune' whut'en-un 'et za huwhuntih'elh hukwa' huninzun. 'I gha la t'e honózin. 'Et hoonts'i 'aw huhoo'en-un bughá holts'it ait'oh. 'Et nts'en'a la nus hoo'en-un Jonah bulh dahooja-un, 'et za hoti'elh.

<sup>30</sup> 'Alha nts'en'a la Nineveh whut'enne, 'enne Jonah be buba whehóodal'en-un inle', 'et whuz un'a za 'en k'un'a 'andit whudizulhne dune, yinka dune ye', 'en be buba whehoodal'en-un tileh.

<sup>31</sup> 'Oh whuya hoozulh-un dzin dune ba nahutideh de, 'et whe nyaz de whulerwe ts'eke 'en buniz dudutáyalh, 'et whe buba nahutideh. Soo cho whunulh'en, ndi yun k'ut nilhdzaz de hainya lerwe Solomon ye whunih-i yudutáts'o ha. 'Et hoonts'i 'ilhoghun lerwe Solomon anus 'unt'oh-un 'andit nohtoh usyin.

<sup>32</sup> 'Ink'ez 'oh whuya hoozulh-un dzin dune ba nahutideh de, Nineveh whut'enne nohni 'andit whudizulhne nohtoh do dutáduh 'ink'ez nohba nahotiyeh. Soo cho whunulh'en, 'oh da' Jonah bubulh yailhduk da', ts'iyawh dudení náhundunizdla. 'Et 'awet soo zulh'ts'ai, 'ilhoghun 'en Jonah anus 'unt'oh-un 'andit nohtoh usyin.

*Nena 'i 'ants'i neyust'e ba too dizk'un 'et dunt'oh*

<sup>33</sup> "Dune 'aw too dizk'un naidulhk'an 'ink'ez whunist'i-un k'us chalyal t'ah te 'aw néyo'alh ait'oh. 'Et k'us too dizk'un hukw'us'ai-un, hukw'eyi'aih. 'I gha la ts'iyanne dándilhne ndi be hóot'en-i hinoolh'en.

<sup>34</sup> 'Et whuz un'a nohni nohna 'i 'ants'i nohyust'e ba too dizk'un le'unt'oh. 'Et nohna soo 'unt'oh de, 'et nohyust'e dulcho whe be hoot'en-i be whudizbun. 'Et hoonts'i nohna lhe'ízoo' de, 'et nohyust'e 'i cha tsalhgus be dizbun.

<sup>35</sup> 'Et huwa ndai be la nohyust'e be hoot'en-i ahli, khun te nohyust'e tsalhgus naoodle' junih. 'Et whuch'a soo cho huwohle'!

<sup>36</sup> 'Et huwa nohyust'e ndulcho whe be hoot'en-i dizbun, 'ink'ez 'aw hoontsool-unyaz hoonts'i tsalhgus ooghu hooloh de, 'et de la ndulcho-i be be hoot'en oole'. 'Et whuz un'a soo ts'ih'un be hoot'en-i ulhtus-i k'un'a whedindi, 'i gha la soo whunoolh'en."

*Duba na'udzoo'ne, 'enne dawhul'tsi-un, 'et bugha whútal'ts'ulh*

<sup>37</sup> Sizi 'awhuz yalhduk whe 'ilhoghun Pharisee yoodulh'kut, "Sdlanaint'alh syoh ts'e." 'Et Sizi yoh daninya 'ink'ez natl'adida' 'uti'ulh wheni.

<sup>38</sup> 'Uti'ulh whutso lanalhe'ildoh. 'Et Pharisee yunilh'en 'ink'ez tube ooba hooncha.

<sup>39</sup> 'Ink'ez neMoodihti 'et nduyulhni, "Nohni Phariseene soo cho whunulh'en, nohlusyet 'ink'ez lubot bulh, ooka za tunáwhahgus. 'Et hoonts'i nohdzi yo whe dát'ni-i cha 'ink'ez 'ut'en ntsi'-i bulh, 'i ts'iyawh 'i be nohyo ts'e whudizbun.

<sup>40</sup> Whusnine ahli! 'Aw eh t'oonuzáhzun? Mbe la yoo'az ts'e 'uhoonla 'ink'ez bez ts'e cha, 'en za 'uhoonla.

<sup>41</sup> 'Et hoonts'i ndai la aht'i-i, 'i be 'i ooloh tel'enne be la 'ooht'en. 'Et de la ts'iyantsuk nohba whuna'oodeh.

<sup>42</sup> 'Et hoonts'i nohni Phariseene 'awet dawhul'tsi-un 'et nohts'u hóolts'ulh! Ndz un'a nja daht'en, ndai la hanúlhyeh-i, 'ut'an sooltsun-i cha, rue cha huyulhni, 'ink'ez 'onghoh-i, 'i 'ooloh, 10%, 'i Yak'usda ghah'aih. 'Et ndóht'en huba' hoont'oh. 'Et hoonts'i ndet la ts'ih'un un'a ne'áht'en-un, 'ink'ez Yak'usda ye nek'entsi'-i, 'aw ndulhúzaht'en. 'Et whuz un'a cha ndóht'en huba' hoont'oh.

<sup>43</sup> Nohni Phariseene 'awet dawhulsi'-un 'et nohts'u hóolts'ulh! Lizwif lugliz dahyaih de, 'uhoont'oh-un natl'adahdaih, 'et za hukwa' nahzun! 'Ink'ez ndet la 'e'óoket-un, soo ts'iyanne nohodólhti' hukwa' nahzun.

<sup>44</sup> 'Et nohni Moses be 'udustl'us 'uk'ununáguzne 'ink'ez nohni Phariseene, dune nalh duba na'ahdzoo'. 'Awet dawhulsi'-un 'et nohts'u hóolts'ulh! Nohni ts'un k'ut 'adahla-un, 'aw dune lhunohis'en le'aht'oh. 'Ink'ez 'adahla-un dune t'ehonúszun whe nohk'unuhudilh."

<sup>45</sup> 'Et 'ilhoghun Moses be 'udustl'us k'ut daja ni whe beni hoonli be yalhduk-un, 'en Sizi yulhni, "Nehodulh'eh-un njan 'udini-un, wheni cha nebulh 'udini, 'et huwa neba dzoh 'udíña."

<sup>46</sup> 'Et 'uyulhni, "Nohni cha Moses be 'udustl'us k'ut daja ni whe beni hoonli be yalhdukne, 'awet dawhulsi'-un 'et nohts'u hóolts'ulh! Nohni nohgha dune 'ut'en howa whúlha'-un butl'awhahle, 'aw hoontsool-unyaz whe hoonts'i bula 'oohneh ait'oh.

<sup>47</sup> Nohni 'awet dawhulsi'-un 'et nohts'u hóolts'ulh! Nohtso da' nus hoo'enne, 'enne buba tse bet 'ahudutilhtelh-un 'uwuhulh'en. 'Ink'ez nohbáke 'enne bubuhangan inle'.

<sup>48</sup> 'Et 'alha nohbáke 'et dahája, 'et nohni nohba ts'ih'un 'uhoont'oh nahzun. 'Et soo cho whunulh'en, nohbáke nus hoo'enne ubuhangan 'ink'ez nohni 'ahudutilalh-un buba 'uwuhulh'en.

<sup>49</sup> 'Et huwa njan Yak'usda ye whunih-i, 'i be 'et dutni, 'Nus hoo'enne 'ink'ez whel'a'ne, 'enne nohts'u butis'alh. 'Enne whulohne dzoh nubotilhduz 'ink'ez 'onghohne cha hubotighan.'

<sup>50</sup> 'Et ndi yun 'udechoo 'ulya 'et whuts'un ndunne nus hoo'enne bubuzkai' whúzdli'ne, nohni 'andit whudizulhne dune nohni hukw'elha whutilhtselh whe' hoont'oh.

<sup>51</sup> 'Et huwa la 'oh da' Abel buzakai' whuzdli'-un whuts'un 'ink'ez Zacharias buzakai' whuzdli' da', ndun 'en 'unt'oh Zacharias njan lugliz whucho 'et loodel eguz 'et hizilhghi, 'alha ts'ih'un nohdusni, 'oh da' dahooja la, 'et 'andit whudizulhne dune, 'et nohni hukw'elha whutilhtselh whe' aht'oh.

<sup>52</sup> 'Et nohni Moses be 'udustl'us k'ut daja ni whe beni hoonli be yalhdukne, 'awet dawhulsi'-un 'et nohts'u hóolts'ulh! Nts'en'a la dune t'ehonózin-un, 'et bughu nawhúlhchoot! Nohnich'oh 'aw lhuwhúlhchulh. 'Et mbene la hóolhdzihne, 'enne cha k'oh úbootun!"

<sup>53</sup> 'Et 'awhuz 'oh whúya hiyilh whe, ndunne Moses be 'udustl'us 'uk'ununáguzne, 'ink'ez Phariseene, 'enne tube huyóolhdi. Khun tilah hoonliyaz 'uts'un un'a 'udooni' 'inka lhelhdun hukwa huyoodulhkt.

<sup>54</sup> 'Ahoohyiz hinilh'en 'onilha khun tilah tank'us 'údooni'. Khunsul hoonliyaz 'udija de, 'et hik'ehóota'alh.

## 12

### *Phariseene bules be untuldoh-i, 'et whuch'a khohdle'*

<sup>1</sup> 'Oh da' whe lhane dune 'ilhuhozdil. Huldai k'et lhk'unuhúdilh cha' hut'en. Mbene la yugha hodul'ehne, 'enne cho ndubulhni, "Ndunne Phariseene bules be untuldoh-i, 'i ch'a soo cho howahli. 'I dune nalh ye dúbá na'udzoo'-i, 'i 'unt'oh.

<sup>2</sup> 'Alha ndai la ts'iyawh whunist'i-un, ts'iyawh ts'et haóotikulh. 'Et ndai la whu'iz 'unt'oh-i, 'i cha ts'iyawh t'entidzeh.

<sup>3</sup> 'Et huwa ndet la tsalhgus yo ts'e yalhduk, 'et hoot'en-un hidutats'o. 'Et ndet la yoh whez ts'e 'uyoon yudze khuni in'aiah daja dani'-un, 'et bun k'ut whuts'un khuniti be howu yatilhduk.



*Yak'usda 'en za be noolhjut*

4 “Ink'ez sk'ekene nohdusni, mbene la nohyust'e ughanne, 'et hoonts'i 'aw 'on 'un hoonliyaz 'uhooneh ait'oh, ndunt'ohne bube noolhjut junih.

5 'Et hoonts'i mbe la be ntilhjut-un, 'en bunóhunistun. Mbe la nohyust'e silhghi-un, 'et hukw'elh'az, 'en za ooba' hoont'oh whe kwuncho yo ts'e cha nohtinoh, 'en za be noolhjoot! 'Alha nohdusni, soo ts'ih'un un'a 'en be noolhjut!

6 'Alha eh 'uhoont'oh kwulai' 'uchas, 'i nanki sooneya tsuditi'-i be 'óket? 'Ink'ez ndi dut'aiyaz Yak'usda 'aw 'ilho hoonts'i yunalhodulhnoh whe' hoont'oh.

7 'Ink'ez daltsuk nohtsigha' 'i hoonts'i ts'iyawh t'einínzun. 'Et huwa whenoolhjut junih! Nohni 'uchasanus dáhti' whé aht'oh!”

*Dune nalh Sizi 'en sch'e' 'unt'oh uzdooni'*

8 “Ink'ez 'et cha nohdusni, mbe la dune nalh, Sizi Gri 'en ooch'e' usdli ni-un, 'en yinka dune ye' Yak'usda oolizas ubudutánelh, ndun 'en sch'e' unli whe 'unt'oh.

9 'Et hoonts'i mbene la dune nalh sts'ooditdlaine, 'enne Yak'usda oolizas bunalh buts'oodutásdlai.

10 'Ink'ez mbene la yinka dune ye' ch'az ditni be yalhdukne, daja hutni-un, soo buba 'un whutilhdulh. 'Et hoonts'i mbene la Ndoni ch'az ditni be yalhdukne, 'aw buba 'un whutookat ait'oh.

11 'Ink'ez lizwifne lugliz, k'us nahiyilhne, k'us moodihne cha, 'enne bubut nenohonilhya de, daja dutihnelh-un, 'et huwu ni oohle' junih.

12 'Et soo 'et whudizulh-un Ndoni whunohuntlhtun daja dutihnelh-un.”

*Khuni be nawhutnuk-i dune whusni-un, 'en ghun*

13 'Et 'awet dune toh 'ilhoghun dune 'utni, “Whuneoodulh'eh-un nedusneke buk'élhutizkat-i, 'i sulhutsin ndai la sch'e' unli, 'i stl'ayóolelh sba dini!”

14 'Et Sizi 'uyulhni, “Dune, mbe usinla nohba nahiyilh-un, k'us nohba yatilhduk-un sulhutsi?”

15 'Ink'ez Sizi 'ubulhni, “Nohni soo cho khahdl! 'Uyoon dune ch'e' ha' noohzin junih! Dune daltsuk hoonli yut'i ndi yun k'ut, 'ohwhi 'ants'i 'únt'oh whe 'unt'oh.”

16 'Ink'ez 'et khuni oogha whuts'odul'eh huwun ubulh yalhduk whe nja dutni, “'Ilhoghun dune hoonzoo 'unt'oh-un, ooyun k'ut ts'iyaitsuk soo haníyeh.

17 'Ink'ez didutch'oh 'uninzun, 'Nts'en'a cha la daosneh? Haníyeh-i bayoh whudizbun k'et. 'Aw 'on 'un cha 'uyoo dánosdzaih ait'oh.’

18 'Ink'ez 'et dutni, 'Nja dutísnelh lhat-un haníyeh-i yoh naná'whuduntisyus 'ink'ez 'on nus 'uhoolcho-un na'whutisdlelh. 'Ink'ez 'et la ndai la hanísyai-i 'ink'ez ndai la ust'i-i, ts'iyawh datísdlelh.

19 'Ink'ez la na'dudóstni', lhai unzoo-i mba 'ulhozkat, lhat yus k'ut whuba. 'Inka nailyis, 'in'alh, taintnai, 'ink'ez whunílhni.’

20 'Et hoonts'i Yak'usda 'uyulhni, “Tube whusni-un inli! 'Andit 'úlhdis nzul naitálchulh. 'Ink'ez ndai la int'i-i, mbe ts'u tikulh?”

21 'Et whuz un'a mbe la lhai duba 'ilhozdla-un 'ink'ez Yak'usda ba hoonli lhit'i.”

*Yinka dúlhts'i-un huwu ni oohle' junih*

22 'Ink'ez yugha hodul'ehne 'ubulhni, “'Et huwa nohdúsni, yinka dúlhts'i-un, ndai la tih'ulh-i 'ink'ez be sóo nadutihneh-i, 'i ts'iyawh ooghu ni oohle' junih!”

<sup>23</sup> Ndai la 'ut'alh-i, 'ink'ez naih cha, 'ohwhi 'ants'i unli whe 'unt'oh. Yinka sahda-un cha, 'ink'ez nohyust'e cha 'i 'on nus dízti'.

<sup>24</sup> Ndunne datsancho dahint'oh la bughu nuni nahzut. 'Aw 'alhé'hunusdle 'ink'ez 'aw halhé'hunusdle cha' hint'oh. 'Ink'ez 'aw uzdlá bayoh 'ink'ez haníyeh-i yoh cha lhuhuhóot'i'. 'Et hoonts'i Yak'usda bugha 'á'aih. 'Ink'ez nohni ndi dut'ai anus dáhti' whe aht'oh.

<sup>25</sup> Nohni nohtoh mbe 'unt'oh dalcho tileh howu ni unli? 'Aw 'et huwa 'on nus 'ulyiz oole' ait'oh.

<sup>26</sup> Ndi hoontsool-unyaz hoonts'i 'oohoohele aht'oh de, 'et di ha 'udun cha howu ni ahli?

<sup>27</sup> 'Ink'ez 'indaiyaz unzoo-i, nts'en'a haníyeh, howu nuni nahzut. 'Aw lhe'ust'en 'ink'ez 'aw hoonliyaz hiye soo nadootnih-i cha lhe'husdle. 'Et lerwe Solomon naih dízti' 'i be soo nadut'ih te, 'et hoonts'i 'aw 'indaiyaz anus lhe'íldzoo' whe 'unt'oh.

<sup>28</sup> 'Et Yak'usda tl'o unzoo-i yilh'i. 'I 'andit dzin tl'o k'ut haníyeh 'ink'ez bunde 'i tsehíduhtíhkuhl 'ink'ez duták'un. 'Et nohni dalcho-i be suba 'on nus soo nanohdooleh. Tube ustla ntsool-i be nohba 'alha hoont'oh.

<sup>29</sup> Ndai la tih'ulh-i 'ink'ez tihntel'h-i cha, 'ahoolhyiz tube cho ooka daóhtni 'ink'ez ooghuni oohle' junih.

<sup>30</sup> 'Et ndi yun k'ut 'udun yun k'ut whut'enne 'et za hukónuta. 'Et hoonts'i Yak'usda nohBá ndai la be ndunahdzit-i ts'iyawh t'eínízun whe 'unt'oh.

<sup>31</sup> 'Et hoonts'i nts'en'a Yak'usda whe lerwe unli-un, 'et za hukwaitah'en de, 'et ndi cha 'on nus nohghá' tikulh whe' hoont'oh.

<sup>32</sup> Nohni se 'usbai 'ílhoh núlhas-i, 'aw noolhjut junih! Soo cho whunulh'en, nohBá nts'en'a whe lerwe unli-un, 'et hoont'i' whe nohgha óota'alh.

<sup>33</sup> Ndai la aht'i-i ts'iyawh be 'óhket 'ink'ez tel'enne, 'enne bugha yohlelh. 'Et whuz un'a 'et daht'en de, 'ants'i sooneya zus ninta lhe'ust'i-i, 'i 'udulhneh. 'Ink'ez ndai la unzoo-i 'ílhiz wheni oola toh hoolóh-i, 'i ts'iyawh be yóohlelh, 'i la yak'uz ts'e neóohlelh. 'Aw whuz undunut'ih-un daoooya' ait'oh 'ink'ez 'aw yun nulh'as-i hoonts'i ninta' yolh'en ait'oh.

<sup>34</sup> 'Et ndet la oonáht'i-i ulhoozáhla, ndet la usdla-un, nohdzi cha 'et za dutá'alh.

*Lhazdoot'e', 'aw t'ets'onúszun nkede la neMoodihti whusanátídalh*

<sup>35</sup> "Nohni nohnaih be 'áht'en-i ts'iyawh be náhdilh 'ink'ez nohtoo dízk'un-i cha dók'un

<sup>36</sup> 'Et nohni nohnich'oh dune mbene la dumoodih ba sulh'ine, 'enne buk'un'a 'ooh't'e'. Nts'e la dune lhghuske ts'e hanája, 'ink'ez dati dunulkw'uz de, 'aho la hiba dáha' dootan.

<sup>37</sup> 'Et ndet la ndun moodih whusanaja de, 'ink'ez be 'ulhnane hika tse hooli, 'ink'ez hika ítis'en, mbene la ndun moodih ndut'enne bunilh'en de, 'enne 'uk'enus hoonzoo-un bugha whults'ut. 'Alha nohdúsní, bumoodih soo nadutitneh ha, 'ink'ez dude 'ulhnane nátl'adulhts'ih budutánelh, 'ink'ez bubut né'tílelh.

<sup>38</sup> 'Ink'ez moodih tuzniz at'en k'us tuzniz hukw'elh'az at'en, 'et sanatídalh 'ink'ez be 'ulhnane hika tse hooli, 'ink'ez hika ítis'en, 'et whuz un'a moodih ndut'enne bunilh'en de, 'enne 'uk'enus hoonzoo-un bugha whults'ut.

<sup>39</sup> 'Ink'ez soo cho t'eeonahzeh, mbe la yoh whumoodih nts'owhuya la whudizulh-un undunut'ih-un whusatíyalh, 'et t'ewhunízun de, 'et soo ts'ih'un da' huwole', 'ink'ez 'aw hiyoh da'óoyis ait'oh.

<sup>40</sup> 'Et huwa nohni cha lhadóht'e'. 'Alha nts'owhuya 'uhunit'o-un 'et ookatselhúwhahlíh-un, 'et yinka dune ye' 'et whusanátídalh,' ni Sizi.

41 'Ink'ez 'et Peter 'uyulhni, “NeMoodihti, ndi khuni oogha whuts'odul'eh-i be yailhduk, 'i wheni za tilah k'us ts'iyanne ba tilah 'udini?”

42 'Ink'ez neMoodihti 'utni, “K'us mbe ts'ih'un 'unt'oh 'ink'ez whunih-un unli whe yoh huwunli-un? 'En oomoodih duyoh whumoodih yutilhtselh. 'Et 'oh de de, soo 'et neoduzuk de, 'et de la 'onghohne hiti'ulh-i bugha ná'tit'aih. K'us mbe 'utinelh?

43 'Et oomoodih whusanaja de, 'ink'ez hibe 'ulhna-un whuz un'a ndut'en yunilh'en de, 'et de ndun yoh whumoodih yulhtsi-un, 'en 'uk'enus hoonzoo-un bulh 'uwhútanelh.

44 'Alha nohdusni ndun oomoodih ndai la yut'i-i, ts'iyawh k'une' yul'en-un yutl'aóoti'alh.

45 'Et hoonts'i ndun be 'ulhna-un dich'oh dudzi yo whe 'et duninzun de, 'Smoodih sa' sla whusanádaih.' 'Ink'ez 'et dune oomoodih yuba 'ut'enne 'ink'ez ts'ekoo yuba 'ut'enne cha whéboonilhtsus. 'Ink'ez whé'nin'ulh 'ink'ez tanutnai, 'ink'ez tanutnih,

46 'oh de ndet dzin 'et ndun be 'ulhna-un 'aw yuka ts'e lhúhooli 'ink'ez nts'owhuya 'uhunit'oh-un utinelh 'aw t'oonuszun, 'et 'oh whuya 'uhunit'oh whe oomoodih whusanátidalh. Tube ye'whutilhyah, 'ants'i lhulcho k'eitat'us le'yutileh 'ink'ez ndai la Yak'usda k'unulhe'ust'enne buts'ítikulh-i 'et didut cha whuz un'a za oogha óotat'alh.

47 'Ink'ez mbe la 'ulhna-un 'en oomoodih ndet la yuts'u hukwa' ninzun-un, 'et ts'iyawh t'ooninzun, 'et hoonts'i 'aw wheni lhálhdit'oh 'ink'ez yuk'unulhe'ust'en, 'et huwa lhat whe ootaltsus.

48 'Et hoonts'i mbe la t'oonúszun dumoodih ndet la yuts'u hukwa' ninzun-un, 'ink'ez dude 'ut'en k'oh huwa ootaltsus huba, dzoh tsulyaz za ootaltsus, 'aw lhat iloh. 'Et mbe la dune lhai oogha nt'ai-un, 'en lhat-un yuts'u hukwa' ntizilh. 'Ink'ez mbe la lhat-un ootl'ahoolya, 'en 'on nus lhat-un yuts'u hukwa' untizilh.

*Sizi 'utni, “Dune lhch'az nehúdutadalh 'et hukwa whusasya”*

49 “Ndi yun kwun ookw'ítas'alh ha whusasya. 'Uda' ncha duzk'an.

50 'Et hoonts'i be dune too be 'ul'en-i, 'i be too be 'tiznelh huba' hoont'oh. 'Et lhaoodutanelh 'et whuts'un 'et huwa tube dzoh nuszut.

51 Ts'iyanne lhts'un ts'ih'un 'úhoot'e', 'et hukwa ndi yun k'ut whusasya nahzun eh? 'Awundooh! 'Et nohdusni, dune lhch'az nehúdutadulh 'et hukwa whusasya.

52 'Et 'andit njan whuts'un kwulane 'ilhughun yoh dilhts'ine, 'enne lhch'az nehúdutadulh. Tane, 'enne nane ch'az nehudutadulh, 'ink'ez nane, 'enne tane ch'az nehúdat'us.

53 Bubá duye' ch'az nédutadalh, 'ink'ez ooye' 'en dubá ch'az nedutadalh. Buloo 'en cha dutse' ch'az nedutadalh, 'ink'ez ootse' duloo ch'az nedutadalh. 'Ink'ez oobiz 'en cha duyas'at ch'az nedutadalh, 'ink'ez ooyas'at 'en cha dubiz ch'az nedutadalh.”

*Sizi Gri whusanatidalh-un soo cho ooka tse ts'úhole'*

54 'Et lhane 'ilhozdilne, 'et cha 'ubulhni, “'Et ndet la nooz de kw'us whúzdl'i nulh'en de, 'et 'aho 'udahni’, ‘Ts'oh tselyaz naootilhtelh.’ 'Ink'ez 'et nduwhút'i.

55 'Ink'ez n'az tizts'i te 'et 'udahni, “Tube whúntalwus whe' whut'en,’ 'ink'ez 'et nduwhút'i.

56 Nohni dune nalh duba na'udzoo'ne aht'oh! Ndi yun k'ut 'ink'ez yat cha dawhutanelh-un, 'et t'oonahzun. 'Et hoonts'i dáhoont'oh huwa 'andit dawhutanelh 'aw t'oonuzáhzun?

57 'Ink'ez nohnich'oh dahoont'oh huwa nts'en'a ts'ih'un'un'a 'uhoont'oh-un, 'et 'aw t'eoonuzáhzun?

58 'Et mbe la nch'az ditni-un, 'en nahiyilh-un but nenyutalhtelh, 'et whuz ah'us whe 'et tube oots'un lhanaoodonleh hukwa' ont'en. Doo ka la nahiyilh-un but nényutalhtelh 'ink'ez nahiyilh-un neilhchuk-un tl'anyutilhtelh, 'ink'ez neilhchuk-un 'anyuti'alh.

59 'Et nohdusni ndi sooneya nt'um-iyaz hoonts'i, 'i ts'iyawh ookw'elha whutalhtselh, 'et whuts'un 'adutan'alh."

## 13

*Nohni noheni náhandunooheh 'et dúlhahnel de, 'et de nohni ts'iyawh kwuncho yo ts'e tíhdulh*

1 'Et 'oh da' whulohne dune, 'enne Sizi 'uhuyulhni nts'en'a la Galilee whut'enne ubanghane bubulh dahooja la. 'Enne 'uhint'oh Galilee whut'enne Yak'usda ba 'uhudílhk'un whe Pilate ubanghan 'ink'ez bubuzkai' nyoo hidílhk'un-i ootayunjut.

2 'Et Sizi 'ubulhni, "Ndunne Galilee whut'enne, 'enne nts'en'a 'uhuja dzoh nuhuzde, 'et huwa 'uyoonne Galilee whut'enne anus lubeshi 'uhulh'en nahzun eh?

3 'Awundooh nohdusni! 'Et hoonts'i nohni cha noheni náhandunooheh 'et dúlhahnel de, 'et de nohni cha ts'iyawh, whuz un'a za ts'iyawh yaitáhdlah!

4 'Et keyoh Siloam huwhútni, 'et tse whedin'ai-i, 'i ndunne whunizyanne 'on 'at lhk'udine, 'enne buk'éningez whe ts'iyawh higan. 'Et Jerusalem whut'enne, 'enne buba nus lubeshi 'uhulh'enne 'uhint'oh nahzun eh?

5 'Awundooh nohdusni! 'Et hoonts'i nohni cha noheni náhandunooheh 'et dúlhahnel de, 'et de nohni cha ts'iyawh, whuz un'a za ts'iyawh yaitáhdlah!"

*Ndi duchun, fig huyulhni, 'i be Lizwifne huhodutil'eh*

6 'Et doo cha Sizi huwa whuts'odul'eh-i be bubulh yalhduk whe nja dutni, "Ílhoghun dune 'en mai chun, figs huyulhni-i, 'i oomai' haníyeh-i k'ut, 'et 'ilho há inulhyeh. 'Ink'ez 'ilho dzin mai yughun ha itís'en. 'Ink'ez gak 'aw mai ooghu hooloh.

7 'Ink'ez 'et oomai haníyeh-un huwunli-un 'uyulhni, 'Whunilh'en eh? Tat yus k'ut whuts'un ndi mai chun, figs huyulhni-i, oomai' kaitús'en 'ink'ez 'aw oomai' ooghu hooloh. Di ha yun k'ut bulh hóonsool? Ntintselh!"

8 'Ink'ez 'utni, 'Moodih whute 'andit yus k'ut za oots'ú halhozin'aih. K'at oonat naootiskulh 'ink'ez oogha soo ha' nuyeh-i bulh oogha ítasnalh.

9 'Et soo oomai' whúzdlí de, 'et soo' hoont'oh. 'Et dúlhinel de, 'et de la ntooselh.'"

*Ts'eketi 'en Satan yulhghel*

10 'Et 'awet dzin nats'ulyis-un 'et 'ilhoghun Lizwifne lugliz 'et whubodulh'eh.

11 Khunsul 'et 'ilhoghun ts'eke whunizyat 'on 'at lhk'udit yus k'ut 'et la nts'i-i nududeh-i tetsun yulhútsi whe 'en yudinda. 'Et huwa chanuti 'ink'ez didutch'oh 'aw do na'ootneh ait'oh.

12 Sizi yutilh'en ibulh, yuka huyih 'ink'ez 'anih yulhni, 'ink'ez 'uyulhni, "Ts'eke whe teintsun-un 'awet mba hukw'una'it'oh!"

13 'Et yuk'edilni 'ink'ez 'aho lhts'e nadiski 'ink'ez Yak'usda dílhiti'.

14 'Et hoonts'i ndun Lizwifne lugliz whumoodih 'en hunílh'e. Nats'ulyis dzin 'et Sizi ndun ts'eke soo na'yinla 'et hukwa hunílh'e. 'Ink'ez 'ilhozdilne bumoodih, 'en 'utni, "Lhk'utat dzin 'et dune 'uhoot'en huba' hoont'oh.

'Et huwa 'uts'ut'en dzin 'et 'awet za soo na'nohohooleh huba' hoont'oh. 'Et nats'ulyiz dzin 'et 'aw soo na'nohotilelh 'et huba whusaóohya' huba lhe'hoot'oh," ubulhni.

<sup>15</sup> 'Et neMoodihti 'uyulhni, "Nyun dune nalh duba na'udzoo'-un 'int'oh! 'Alha lawk nohni ilohghun ahli whe nats'ulyis-un dzin nohmusdoos dune k'us nohmuyool te musdoos bayoh 'adultsi'-un, k'unawh'uk 'ink'ez too k'ez toolhdlooh ait'oh?"

<sup>16</sup> Ndun ts'eke 'ilhoghun Abraham oots'u haínzut-un 'ink'ez Satan whunizyat 'on 'at lhk'udit yus k'ut whe yulhghel. Soo cho howu nuni nahzut! 'Alha lawk nats'ulyis-un dzin 'et 'aw k'unaoot'uk ait'oh whe' dahni?"

<sup>17</sup> 'Et Sizi ndi khuni 'et dudáni' whe yuch'az ditnine, 'enne ts'iyawh yooya huzdli'. 'Ink'ez 'onghohne lhane 'en gha hoonzoo tune' 'ust'en-un 'et huwa howu nálhni whe huhoont'i'.

*Haníyeh-i, mustard huyúlhni, 'i oogha whúts'odul'eh*

<sup>18</sup> 'Et Sizi 'ubulhni, "Yak'usda whe lerwe unli-un, 'et nts'en'a nohba da-hoont'oh? 'Ink'ez nts'en'a suba di bulh nohba lhundúwhult'oh nahzun?"

<sup>19</sup> Ndiz un'a nja duhoont'oh, ndi mai nint'um-i mustard huyulhni, 'i k'un'a 'unt'oh. 'I dune yunílhchoot 'ink'ez haníyeh k'et 'ainan'ai 'ink'ez hanányai. 'Ink'ez tube duchun dincha suli'. 'Ink'ez dut'aiyaz oozischum k'ut t'o nenínla."

*Yak'usda whe lerwe unli, lhes ntuldoh-i dult'oh*

<sup>20</sup> 'Ink'ez doo cha 'ubulhni, "Nts'en'a suba whunohuntistun Yak'usda whe lerwe unli?"

<sup>21</sup> Lhes ntuldoh-i dult'oh. Ndaí la ts'eke yílhchoot 'ink'ez lhes núdzaih-i, 'i ta tsetsai be únde'ooldzih-i dizbun. 'I ntuldoh-i bulh 'ilho be yandzai, 'ink'ez yunílhthlus. 'Et hukw'elh'az 'udun neíninkai whe untílhdo."

*Hoondat-un datí-un hukwa daóohtni*

<sup>22</sup> 'Et hukw'elh'az Sizi Jerusalem whuz tizya. 'Ink'ez keyoh whuti 'ink'ez keyoh whuyaz 'et dune toyalh 'ink'ez dune hodulh'eh.

<sup>23</sup> 'Et 'ilhoghun 'uyulhni, "Nemoodihti oolune za eh hudutijih?" 'Ink'ez Sizi 'ubulhni,

<sup>24</sup> "Hoondat-un datí-un hukwa daóohtni. 'Et nohdusni lhane 'et datí-un dahátidulh hukwa' huntizilh, 'et hoontsi 'aw 'uhooneh ait'oh.

<sup>25</sup> 'Et 'iloh yoh whumoodih dudinya 'ink'ez datí dánaidintan, 'et nohni 'az nudulhya 'ink'ez datí dunulhkw'uz 'ink'ez 'udahni, 'Moodihti, moodihti neba dáha' dintih!" 'Et la' nohdóni, "Aw t'enoahnuzúszun nts'ez de háhdil."

<sup>26</sup> 'Ink'ez la' 'udoohni, 'Nyulh 'uts'u'ah 'ink'ez nyulh 'úts'etnai'. 'Ink'ez nekeyoh whuti 'et da' whuneodilh'e inle'."

<sup>27</sup> 'Et hoontsi 'la' dooni, 'Nohdusni nts'ez de háhdil 'aw t'enoahnuzúszun. Sch'a nasahdilh! Nohni ts'iyawh tank'us ne'zaht'en!"

<sup>28</sup> Abraham, Isaac, Jacob, 'ink'ez nus hoo'enne, 'enne ts'iyawh, ndet la Yak'usda whe lerwe unli-un, 'et hudutáls'ilh 'ink'ez 'et la bunoolh'en. 'Et 'oh de nohni tenanohonihdil. 'Et de tíhtso 'ink'ez nohgoo lhudutihk'us.

<sup>29</sup> 'Oh de de lhane la ndaz de 'ink'ez nyooz de, 'ink'ez nus de, 'ink'ez nyaz de, whuz de hahátidulh 'ink'ez ndet la Yak'usda whe lerwe unli-un, 'et la nátl'ahudutíls'ilh 'uhuti'ulh ha.

<sup>30</sup> 'Et ndóohoont'oh, whulohne 'udechoo online, 'enne la 'udek'oh hutileh. 'Ink'ez whulohne 'udek'oh online, 'enne la 'udechoo online nahutidleh."

<sup>31</sup> 'Et dzin za whulohne Phariseene, 'enne Sizi highu nindil 'ink'ez 'uhuyúlhni, "Naindalah 'ink'ez njan whuch'a nasindaih. Herod nyutuzilhghel hukwa' ninzun!"

<sup>32</sup> 'Ink'ez 'ubulhni, "Nyoon 'uyoo unli-un, ndiz un'a sba dáhni, 'Soo zolhts'ai!' 'Andit dzin 'ink'ez bunde cha ntsi'-i nududeh-i dune ch'a hanánusyoot 'ink'ez dune soo ná'us'en, 'ink'ez whullh tat dzin 'et la hukwa whusásya-un 'et lhadúlya-un tisdleh.'

<sup>33</sup> 'Et hoonts'i 'andit dzin, 'ink'ez bunde dzin 'ink'ez 'om bun dzin kedu-tooszit huba' hoont'oh. 'Alha' hoont'oh whe 'aw nus hoo'en-un, 'en 'aw keyoh Jerusalem whan'az daóotsah huba lhe'hóot'oh.

### *Jerusalem whut'enne, 'enne bugha Sizi oodzi unduda suli'*

<sup>34</sup> "Nohni Jerusalem whut'enne, Jerusalem whut'enne, nohni aht'en nus hoo'enne aghhan. 'Ink'ez mbene la nohts'u whel'a'ne, 'enne cha tse be bubahghan. 'Dant'oh la lugok duduzkeh duts'unt'a' ubudilhts'i, whuz un'a nohni cha dáwhultsuk whe 'ilhunanohootásdleh hukwa' nuszun, 'et hoonts'i 'aw hukwa lhe'náhzun.

<sup>35</sup> Soo cho whunulh'en, 'awet nohni Jerusalem whut'enne nohkeyoh 'aw hoonli hooloh suli' whe nohba 'et nenáwhults'ut, 'et whuz un'a Yak'usda nohladutitnih. 'Ink'ez 'alha' nohdusni, ndet la whusaóotilts'ulh, 'et 'oh de 'et ndudútihnelh, 'Mbe la Moodihti boozi' be whusatiyalh-un, 'en 'uk'enus hoonzoo-un oogha whults'ut.' 'Et ndudútihnelh 'et whutso, 'aw sooh'en ait'oh."

## 14

### *Nats'ulyis-un dzin, 'et Sizi unduda-un soo ná'yinla*

<sup>1</sup> 'Et 'awet 'ilhoh dzin 'ilhoghun Pharisee bumoodih ooyoh, 'et nats'ulyis-un dzin, 'et Sizi lhes natit'ulh ha danínya. 'Et soo cho hinilh'en.

<sup>2</sup> 'Et khunsul 'ilhoghun dune ooyust'e toh too whudizbun suli', 'et hukw'é unduda, 'en Sizi but usyin.

<sup>3</sup> 'Ink'ez Sizi ndunne Moses be 'udustl'us k'ut, daja ni whe beni hoonli be yalhdukne, 'ink'ez Phariseene, 'enne cha 'ubulhni, "'Et neba ts'ih'un 'uhoont'oh eh nats'ulyis-un dzin dune soo na'ts'oolh'en?"

<sup>4</sup> 'Et ts'iyawh t'ehudusnih. 'Ink'ez nyoon dune yílhchoot 'ink'ez soo na'yinla, 'ink'ez yulanaditni.

<sup>5</sup> 'Et 'ubulhni, "Mbene 'unt'oh nohtoh muyool 'ut'i-un k'us oomusdoos dune tsa k'et 'alts'ut de, 'aw nats'ulyis dzin 'uhoont'oh 'et huwa eh 'aho 'aw hanálhuhitilhtelh nahzun eh?"

<sup>6</sup> Njan 'et huwun uboodulhkut-un, 'aw daja hudooni' ait'oh.

### *Dune 'unt'ohne tihleh-un, 'et hukwa ooht'en junih*

<sup>7</sup> Mbene la ooghu nusjane k'us hoonzoo-un 'utahahódit'ai' 'ink'ez bunilh'en whe 'hut'en. 'Inka huwa whuts'odul'eh-i be bubulh yalhduk whe nja dutni,

<sup>8</sup> "Nts'e la dune lhghu tikelh ts'e nohghu nusja de, k'us hoonzoo-un te natl'adoohdalh junih. Doo ka la nohan do 'unt'oh-un tilah highu nóya'.

<sup>9</sup> 'Et de mbe la nohghu nusiya-un, 'en la 'unyudóni', 'Sinda-un ootl'ahóon'aih, ndun 'et ooda.' 'Ink'ez 'et la yooya sinli' whe 'uk'enus 'udeyo 'et la nanátl'adondalh.

<sup>10</sup> 'Et hoonts'i nts'e nohghu nuhúzya-un whuz toohya' 'ink'ez 'ants'i dati whenghoh nátl'adondalh. 'Et de la mbe nohghu nusiya-un 'en tilah 'unohdóni', 'Sk'eke 'uhoont'oh-un natl'adindaih.' 'Et mbene la lutab k'ut nyulh dilhts'ine, 'enne la nyodólhti'.

<sup>11</sup> Soo cho whunulh'en, mbe la ncha na'dudil'i-un, 'en yooya tileh. 'Ink'ez mbe la te'dudil'en-un, 'en la 'unt'oh-un huyoolhtselh."

<sup>12</sup> Mbe la yughu nusiya-un, 'en Sizi 'uyulhni, "Ndet la dzetniz k'us hulhgha huwa' tan'alh de, khun te nk'eke, k'us nyulhutsinke, k'us nyunatneke, k'us nyenghoh whut'ine mbene la hoonzoo' unt'ohne, 'enne ts'iyawh bughu nónya' junih. 'Et bughu nusinya de, 'enne tilah nghu nunáhooda' whe mba k'elha whutale.

<sup>13</sup> 'Et hoonts'i huwa' tan'alh de, 'et mbe la tel'enne, 'ink'ez dzoh nudilhne, 'ink'ez ooyust'e bodin'aine, 'ink'ez hoos'enne cha, 'enne ndunt'ohne, 'enne za bughu nonya'.

<sup>14</sup> 'Et la nyun 'uk'enus hoonzoo-un nyulh 'úhoneh. 'Enne 'aw mba k'elha hoochooltselh ait'oh. 'Ink'ez nyun tsih'un unt'ohne dunahudidil de, 'et de mba k'elha whutaleh 'et huwa.'

*'Udechoo bughu nusiyaane, mbene la 'awundooh hutni, 'aw 'ilhoghun hoonts'i ndi tit'ulh-i, 'aw hinalhuhootásdli*

<sup>15</sup> 'Et 'ilhoghun dune lutab k'ut yulh usda-un, 'en yudants'o, 'en 'uyulhni, "Ndet la Yak'usda whe lerwe unli-un, mbene la 'et 'a'alhne, 'enne 'uk'enus hoonzoo-un bughu whutalts'ulh!"

<sup>16</sup> 'Ink'ez Sizi 'uyulhni, "'Ilhoghun dune hulhgha hooncha whe huwa' nin'ai. 'Ink'ez lhane ghu nusiya.

<sup>17</sup> 'Et hulhgha na'hutit'ulh-un dude 'ulhna-un whe yáhl'a' 'ink'ez mbene la bughu nusjane ubudóni', "Awet ts'iyai lhadúja, diz ahdulh!"

<sup>18</sup> Ts'iyawh 'ilhone hinli whe 'onilha 'aw 'uhooneh ait'oh hutni. 'Et 'udechoo-un nja dutni, 'Si yun osket 'ink'ez whuz tisyalh nts'elh ha, 'et huwa 'aw oosneh ait'oh sba dóni'.

<sup>19</sup> 'Et 'uyoon dune 'en cha nja dutni, 'Kwulai' lhghuske musdoos dune osket. Ts'iyawh ubootásdzih 'ink'ez nabuduntiz'elh dahóot'e' suba, 'et huwa 'aw oosneh ait'oh sba doni'.

<sup>20</sup> 'Uyoon cha 'et dutni, "Ants'iya 'at ust'i 'et huwa 'aw whuz toosya' ait'oh.'

<sup>21</sup> 'Et be 'ulhna-un yughu nanja 'ink'ez dumoodih 'et huwun ts'iyawh yudáni'. 'Ink'ez ndun yoh whumoodih 'awet hunilch'e 'ink'ez dude 'ulhna-un 'uyulhni, 'Soo 'a cho! Keyoh whuti ts'inyalh 'ink'ez tiyaz ndulcho whe ninya 'ink'ez tel'enne cha, 'ink'ez dzoh nudilhne cha, 'ink'ez hoos'enne cha 'ink'ez ooyust'e bodinlane cha, 'enne ts'iyawh sabinle!' 'Ink'ez wheyáhl'a'.

<sup>22</sup> 'Ulhna-un whusanája 'ink'ez 'utni, 'Smoodih nts'en'a 'udini-un, hukw'un'a 'usja, 'et hoonts'i 'awhuz hooncha-un whuz'ai.'

<sup>23</sup> 'Ink'ez moodih dude 'ulhna-un 'ulhni, "Awet ti whucho ts'inyalh 'ink'ez ti whuyaz cha ts'inyalh 'ink'ez dune ts'iyawh diz hutoodilh hukwa' bilh'en, syoh whudoobun ha.

<sup>24</sup> 'Alha' dusni whe nyudusni, ndunne 'udechoo bughu nusúsyane, 'aw 'ilhoghun hoonts'i ndi tit'ulh-i 'aw hinalhuhootásdli.' "

*Nohni nohtoh 'ilhone ahli whe ts'iyawh aht'i-i, 'aw oolahduzahni de, 'aw sgha hodul'ehne oohle' ait'oh*

<sup>25</sup> 'Ink'ez 'et lhane 'ilhozdilne huyulh tizdil. 'Ink'ez buts'u náhl'a 'ink'ez 'ubulhni,

<sup>26</sup> "Mbe la sts'u tiyalh se' 'ut'en k'oh 'uwhtulh'elh-un 'ink'ez dubá 'ink'ez duloo, du'at cha, 'ink'ez duzkeh, dulhutsinke, 'ink'ez dulhtuske, 'alha 'ink'ez dich'oh whe yinka usda-un cha, ndi njan ts'iyawh hukwa lhe'hunizun de, 'en 'aw sgha hodil'e'-un oole' ait'oh.

<sup>27</sup> 'Ink'ez cha mbe la dutulalhghus lhudistel-un 'ink'ez sulh untiyal-un, 'en 'aw sgha hodil'e'-un oole' ait'oh.

<sup>28</sup> Soo cho whunulh'en, mbe 'unt'oh nohtoh-un, whedin'ai-i 'utilelh de, 'alha lawk 'aw 'udechoo nátl'adida 'ink'ez daltsuk tileh 'aw lhuyóolhtoh daltsuk tileh nja whenin'ai-i bé lhaoodutaneh-i?

<sup>29</sup> Doo ka la 'aw ndulhinel de, 'ink'ez yoh ook'uwhuz'ai-i inla, 'et 'aw soo 'ultsuk ye lhaoodutieleh-i lhit'i' de, 'et mbene la whunilh'enne, ts'iyawh highu tidloh.

<sup>30</sup> 'Ink'ez la 'uhudooni', 'Ndun dune whedin'ai-i whe'yuninle' 'ink'ez 'aw lhai dooleh ait'oh!'

<sup>31</sup> K'us mbe lerwe 'utinelh 'uyoon lerwe bulh lhutigan hukwa' ntizilh. 'Alha lawk 'aw 'udechoo nátl'adida 'ink'ez hukw'u nuni noolhdzut datinelh. 'Et soo tilah 10,000ne dudune'ne, 'enne be ndun 'uyoon lerwe 'en 20,000ne lhuganne, 'enne soo tilah ndunne 10,000ne be bududóya'?

<sup>32</sup> 'Et k'us ndun 'uyoon lerwe 'en 'awhuz nilhdza' 'az de hídulh whe, 'et khuni yuba na'ane yuts'u whébalh'a', nts'en'a suba ts'ih'un nenáhoho'alh 'et huwa.

<sup>33</sup> 'Et huwa nohni nohtoh 'ilhone ahli whe, ts'iyawh aht'i-i, 'aw oolah-duzahni de, 'aw sgha hodil'e'ne oohle' ait'oh.

<sup>34</sup> Lisel 'i 'uzoo' whe 'unt'oh. 'Et hoonts'i 'aw oonalhuwhúlhnih sulí' de, nts'en'a suba doo cha oonawhúlni' naoodle'?

<sup>35</sup> Lisel oonalhuhóolni de, 'aw hoonli huba lhe'ízoo' whe 'unt'oh. 'Aw yun ba hoonts'i lhe'ízoo'. 'Ink'ez 'aw musdoos dálts'i'-un 'et hoonts'i huba lhe'ízoo' whe 'unt'oh. 'I'ants'i dune tehúyulhkuk, huba 'unt'oh. Mbe la oodzeh hoonine hohoozólhts'ai!'"

## 15

### *'Usbai ninta nilhti-un*

<sup>1</sup> 'Et 'awet ndunne sooneya nalhdzoohe 'ink'ez lubeshi 'ulh'enne, 'enne cha ts'iyawh Sizi huyootuzálhts'ilh ha highu nindil.

<sup>2</sup> 'Ink'ez ndunne Phariseene 'ink'ez Moses be 'udustl'us 'uk'ununáguzne cha highu yawhenilhdruk whe nja duhutni, "Nulh'en ndun dune 'en lubeshi 'ulh'enne, 'enne bubulh ne'ut'en 'ink'ez bubulh á'alh cha 'ut'en."

<sup>3</sup> 'Et huwa oogha whuts'odul'eh-i be bubulh yalhdruk whe nja dutni,

<sup>4</sup> "Mbe 'unt'oh nohtoh dune 'en 'usbai 100 ut'i whe 'ilho ninta nilhti. 'Aw 99 'enne chuntoh 'awet nébuninla 'ink'ez 'ilhoghun ninta inilhti-un nayitálhtelh whuts'un yukunúta?

<sup>5</sup> 'Ink'ez ndet la nayilhti whe duwus k'eyilhti 'ink'ez hootát'e'.

<sup>6</sup> 'Et 'oh da' duyoh ts'u naóosja duk'ekene 'ink'ez yenghoh whut'ine, 'enne ts'iyawh 'anih budani' 'ink'ez 'ubulhni, 'Sulh hoonah't'i'. Ndun se'usbaiyaz ninta nusti inle', 'en nasti!'

<sup>7</sup> 'Et nohdusni, whuz un'a za ndun 'ilhoghun dune dudeni nahunduniz'ai, 'en 99 ts'ih'un 'unt'ohne, 'enne 'uda' dulubeshi ch'a dudeni nahundunizdla. 'Et hoonts'i ndun 'ilhoghun dune 'en gha ndo yak'uz dilhts'ine, 'enne buba nus 'on nus howun tálhni."

### *'Itho sooneya dizti'-i ninta inin'ai-i*

<sup>8</sup> "Et doo cha za 'ilhoghun ts'eke whunizyai silver ut'i 'ink'ez 'ilho ninta nin'ai. 'Aw eh too dizk'un nadulhk'an 'ink'ez yoh tunáwhulhtsas, 'ink'ez nayitá'alh whuts'un yukunúta?

<sup>9</sup> 'Ink'ez ndet la nayin'ai de duk'ekene 'ink'ez yenghoh whut'ine, 'enne 'alghoh 'anih budani' 'ink'ez 'ubudúanelh, 'Sulh hóonaht'! Ndi sooneya 'ilho ninta nus'ai-i nas'ai!'



10 Whuz un'a za nohdusni, 'ilhoghun dudeni nahunduniz'ai de, 'et de Yak'usda oolizasne, 'enne ts'iyawh howun tálhni."

*Ilhoghun nintalts'ut inle' 'awet nasti*

11 Sizi 'et 'utni, "'Ilhoghun dune, nane ooye' hooni.

12 'Udek'oh-un 'et dubá ndúyulhni, "Ubá ndai la sba naootándzilh-i 'andit ts'iyawh stlainle.' 'Inka ndun oobá ndai la duye' buba nayootádzilh-i, ts'iyawh buba lhk'éyanla.

13 'Et hukw'elh'az 'aw lhat dzin lhiloh, 'et 'udek'oh-un yugha ininlai-i, ts'iyawh soo neninla. 'Ink'ez keyoh nilhdza' ts'e ts'u whinya. 'Et whuz oozya whe ndai la yut'i-i, 'i ts'iyawh ye nzóodal'e' 'ink'ez gak yulhsti.

14 'Oh da' 'et ndai la yuts'u yoozi-i ts'iyawh gak yulhsti whe, 'et nyo yun k'ut dai cho whúzdlí'. 'Ink'ez ndun chilh ts'iya-i ye ndunidzit sulí'.

15 'Inka 'ilhoghun dune 'et yun ut'í-un, 'en 'ut'en yugha nín'ai. 'Ink'ez hanulhyeh ts'e wheyálh'a', 'et gugoos ghá ti'aih ha.

16 'Et ooye'ílt's'ul k'et 'et dunínzun, nyoo gugoos yu'alh-i, 'i uncha us'alh, ninzun. 'Et hoonts'i 'aw dune yugha lhé'us'ai.

17 'Et beni oogha nadilts'ut le'uja 'ink'ez 'utni, 'Daltsukne 'ubá ba 'ut'enne huya'alh-i buba nus-i niltsuk, 'ink'ez si njan lhe'ust'oh! 'Awet dai súzulhghé!

18 Dunadósj'a' 'ink'ez 'ubá oots'u nátoosja' 'ink'ez la 'udósní', 'ubá yak'uz whudulhyoh cha lubeshi usdla 'ink'ez nyun mbut cha.

19 'Aw 'on 'at sye' sudutanelh huba soo lhe'uzdzoo'. 'Et huwa ndunne mba 'ut'enne k'un'a 'usolhdzin.'

20 'Inka 'et 'awet dubá ts'u nátisja. 'Awhuz yoo 'az de nádalh, oobá yutilh'en whe 'aho yugha te'ninzin. Yududílhgaih 'ink'ez duye' dushih be' yilchoot 'ink'ez naidits'ooz.

21 'Ink'ez ooye' 'uyúlhni, "Ubá yak'uz whudulhyoh lubeshi usdla 'ink'ez nyun mbut cha. 'Aw 'on 'at nye' sodutánelh huba soo lhé'uzdzoo'!

22 'Et hoonts'i oobá dude 'ustlenne but's'un 'et dutni, 'Naih 'uk'enus unzoo-i whusalhchoos 'ink'ez be sóo naidulhle, 'ink'ez la tult'o cha oola nedah'aih 'ink'ez kegon cha belh'es.

23 'Ink'ez musdoosyaz nilhk'a-i ulhchoot 'ink'ez nasulhghé! 'Et la 'uts'oo'alh 'ink'ez ts'onóhni.

24 'Sye' dazsai inle' 'ink'ez 'andit nahít'na' le'hoont'oh. Ninta nusti inle', 'ink'ez 'andit nasti.' 'Et la 'awet ts'iyanne hiyulh whúnihni.

25 'Et ooye', 'udetso whudilhdzulh-un, 'en haníyeh ts'e 'ut'en. 'Et yoh ts'u natisja. 'Awet whenghoh nadalh whe 'et shun cha 'ink'ez hanudaih-un 'et whuduzts'ai.

26 'Ink'ez 'ilhoghun ts'oodun ye 'ulhna-un 'anih yulhni 'ink'ez yoodulhkut, 'Dawhutni whe' whutni'?

27 'Ink'ez 'uyúlhni, 'Nyulhutsin whusanája. Soo 'unt'oh 'ink'ez dálhit'oh whe whusanája. 'Et huwa mbá musdoosyaz nilhk'a-i nasilhghi.'

28 'Et hoonts'i bulhutsin 'udetso-un hunilch'e. 'Ink'ez 'aw yoh ts'u nátooja' hukwa lhe'nizun. 'Et oobá tenínya 'ink'ez yughu tedudli.

29 'Ink'ez dubá 'uyúlhni, 'Nilh'en lhe'whuldzoh mba 'ust'en. 'Ink'ez 'aw nghuni 'ilho hoonts'i k'ulhúsyus. 'Et hoonts'i 'aw 'usbai t'umyaz hoonts'i sgha lhilhtel sk'ekene bululh whúnosni ha.

30 'Et hoonts'i ndun nye', 'en, ndai oogha ínín'ai-i, 'i ts'ekoo 'ul'enne, 'enne buk'uz ts'iya-i yulhsti 'ink'ez musdoosyaz nilhk'a-i ooba nasílhghi!

31 'Ink'ez 'uyulhni, 'Sye' 'ahoolhdzin sulh 'int'oh. 'Ink'ez ndai la ust'i-i, ts'iyawh nyun nch'e'unt'oh.

<sup>32</sup> 'Et ts'ih'un un'a 'uhoont'oh ts'onóhni 'ink'ez ts'ohót'e' huba' hoont'oh. Nyulhutsin dazsai inle', 'en nakhitna'. Nintalts'ut inle', 'awet nasti.' "

## 16

### *'Aw Yak'usda cha 'ink'ez sooneya cha ba 'ont'en ait'oh*

<sup>1</sup> 'Ink'ez 'et cha yugha hodul'ehne, 'enne 'ubulhni, "Ilhoghun dune hoonzoo' 'unt'oh-un, 'en yoh whumoodih ut'i. 'Et 'uyoonne 'uhuyulhni, 'Nyoh whumoodih-un ndai la int'i-i, ye únzoodli'.

<sup>2</sup> 'Inka 'anih yudani' 'ink'ez 'uyulhni, 'Daja hutni-un nyulh udusts'o? Nts'en'a syoh whumoodih inli-un, 'et ts'iyawh sba 'uk'ehóonges. 'Awet syoh whumoodih inli-un 'etsul 'inja whe' hoont'oh!'

<sup>3</sup> 'Et ndun yoh whumoodih inle'-un dich'oh na'dudutni, 'Daosneh cha há la? Smoodih 'awet se' 'ut'en sghu nailhchoot. 'Aw soo lhe'uztus yun whutiskaih whuba. 'Ink'ez datísó-un cha hukwayá usdli.

<sup>4</sup> 'Datísnelh-un howu nuni nízut. Ndet la se' 'ut'en njan ninta nus'ai de, dunene buyoh ts'e soo la dasóholhtelh.'

<sup>5</sup> 'Inka mbene la oomoodih 'ilhóne hinli whe buts'ú whulh'aine, ts'iyawh 'anih budáni'. 'Ink'ez 'udechoo-un 'en yoodulhkut, 'Smoodih daltsuk nts'u whulh'ai?'

<sup>6</sup> 'Et 'uyúlhni, 'Khe 100 bundé'oolhdzai-i.' 'Ink'ez 'uyulhni, 'Soo 'a natl'adindaih 'ink'ez bé nts'u whuz'ai-i 50 za 'uk'einges!'

<sup>7</sup> 'Et 'ilhoghun cha 'uyulhni, 'Nyun do', daltsuk nts'ú whuz'ai?' 'Ink'ez 'uyúlhni, 'Tl'o mai' 100 bundé'oolhdzai-i.' 'Et 'uyulhni, 'Bé nts'u whuz'ai-i, 80 za 'uk'einges!'

<sup>8</sup> 'Ndun ts'ih'un lhe'it'oh-un yoh whumoodih, tube 'uyoo unli whe 'uja. 'Inka 'uyulhni oomoodih, "Aw soo ts'ih'un un'a lhe'inel, 'et hoonts'i 'uyoo inli whe 'inja!' " 'Et Sizi 'ubulhni, "Ndiz un'a nja duhoont'oh, mbene la ooba 'alha lhe'hoot'ohne, 'enne 'uyoo unline 'unt'oh 'ink'ez mbene la Yak'usda ba be hoot'en unline, 'enne buba nus 'uyoo hinli.

<sup>9</sup> 'Ink'ez nohdusni, ndi sooneya, 'i be k'eke nahultsih. 'Ink'ez datíhtsah de, 'et de si, ndo yak'uz 'ilhiz 'uhoont'oh ts'e, whuz la danóhoholeh.

<sup>10</sup> 'Ndai la 'aw hoonli lhuhóloh-un, 'et ts'ih'un ne'whulh'en de, ndai hooncha-un 'et cha ts'ih'un ne'whutilh'en. 'Et mbe la hoontsool-unyaz be tank'us 'unt'oh-un, 'en hooncha cha whuz un'a za 'et ndutit'elh.

<sup>11</sup> 'Et huwa ndi sooneya, 'i be ts'ih'un nulhé'zagt'en de, nts'en'a suba ndai la soo be hoonzoo' hoont'oh-i, nohtl'ayóo'alh?

<sup>12</sup> 'Et nohni ndai la 'uyoonne ch'e' 'i be ts'ih'un lhe'áhnél de, 'et mbe suba ooneh ndi nohch'e' unli-i nohtl'ayóo'alh?

<sup>13</sup> 'Aw 'ilhoghun 'ustlé-un 'en 'aw nane moodih ba 'oot'en ait'oh. 'Et 'ilhoghun 'en yuts'u dutitni 'ink'ez 'ilhoghun yuk'etitsi'. K'us 'ilhoghun yuk'úne'tit'en 'ink'ez 'ilhoghun yuch'az dútatni. 'Aw Yak'usda cha k'une' 'int'en 'ink'ez sooneya cha k'une' 'ont'en ait'oh."

### *Ndai la dune ba dízti'-i, 'i Yak'usda yuts'u dutni whe 'unt'oh*

<sup>14</sup> 'Et nyoonne Phariseene, 'enne sooneya buba dízti'ne 'uhint'oh. 'Enne cha soo nts'en'a la daja ni ts'iyawh hidants'o, 'ink'ez highudloh.

<sup>15</sup> 'Inka 'ubulhni, "Nohni ndiz un'a nja daht'oh. dunene toh nohnich'oh soo ts'ih'un 'unt'ohne na'dudulh'i, 'et hoonts'i Yak'usda nohdzi dant'oh la ts'iyawh soo ts'ih'un t'ooninzun. Ndai la dune ba dízti'-i, 'i Yak'usda yuts'u dutni whe 'unt'oh.

16 Moses be 'udustl'us cha 'ink'ez nus hoo'enne bube' 'udustl'us cha ndet whuts'un la John dune too be 'ulh'en-un khuna da', 'et whuts'un dune hik'une' 'oot'en huba' hoont'oh. 'Et whuts'un whudutizut ndet la Yak'usda whe lerwe unli-un, 'et huwun khuni unzoo-i dunene hiye yalhduk. 'Ink'ez ts'iyanne 'et whuz un'a húkwa' hut'en.

17 'Et tube howa whulna' whe ndo yat'ah 'ink'ez ndi yun cha hooloh whutaleh. 'Et hoonts'i 'on nus howa whulna' whe Moses be 'udustl'us k'ut 'uk'enus hoontsool-unyaz 'uk'ehóoguz-un, 'et hoonts'i 'aw hooloh hóle' ait'oh.

18 'Et mbe la dune du'at 'etsul 'inla-un 'ink'ez 'uyoon ts'eke ghu nasda de, ndun dune 'en lubeshi 'ulh'en. 'Ink'ez mbe la ts'eke duki ch'a nasja-un 'ink'ez 'uyoon dune ghu nasda de, ndun dune 'en cha lubeshi 'ulh'en whe 'unt'oh."

### *Lazarus 'ink'ez dune hoonzoo 'unt'oh-un*

19 "'Et 'awet 'ilhoghun dune hoonzoo' 'unt'oh-un, 'en naih dulk'un-i dizti'-i 'ink'ez laiyin dizti'-i cha, 'i ye dune unli. Dzin totsuk unzoo-i za duyeyul'alh.

20 'Ink'ez 'ilhoghun dune tel'en-un, 'en Lazarus huyulhni, 'en ooyust'e ndulcho whe ooka whulhjut. 'Ink'ez nyoon dune hoonzoo' 'unt'oh-un yudati 'et huyulhti.

21 Ndai hoonzoo' 'unt'oh-un oolutab k'ut whenghukat-i, 'i uncha us'alh ninzun. Lhike 'enne hoonts'i highulgok whe hika k'et whúdlat.

22 'Et ndun dune tel'en-un dazsai. 'Ink'ez lizasne, 'enne Abraham zih nehinihiti. 'Ink'ez nyoon hoonzoo' 'unt'oh-un cha dazsai. 'Ink'ez 'ahuyalhti.

23 'Et ndun 'en yaidlanne toh usda 'ink'ez tube dzoh nuzut. 'Et ndo yútan'en whe nilhdza' 'et Lazarus, Abraham yuzih usda whe 'ubutilh'en.

24 'Et tube soo cho yuts'u huyih 'ink'ez yulhni, "Ubá, Abraham, sgha te'ninzeh! Lazarus 'en sts'ilh'alh! Dzohtsulyaz dulasga be toot nudoolga 'ink'ez 'i be la stsoola k'ut nawhunoolhtsul, 'i be la nanósk'as! Ndi kwun 'i be dzoh nuzut!' yulhni.

25 'Et hoonts'i Abraham 'uyulhni, 'Sye' yinka sinda da' whunailnih eh? Ts'iyaitsuk unzoo-i nghánkat. 'Et hoonts'i Lazarus ntsi'-i za ooghankat. 'Ink'ez 'et 'awet 'en hoonzoo-un ooghá whults'ut, 'ink'ez nyun 'andit dzoh ninzut.

26 'Ink'ez 'aw 'et za iloh, nyun 'ink'ez wheni neulh eguz tube yádalhdza' whe' hoont'oh. 'Et huwa njan whuts'un 'aw nts'ó tooya' ait'oh k'us nyun nts'ungus whuts'un cha 'aw diz hutooya' ait'oh.'

27 'Et 'uyúlhni, "Ubá Abraham nts'u tedusdli, Lazarus 'en 'ubá ooyoh ts'e ilh'alh.

28 Kwulane sulhutsinke hooni. Khun tilah khuni bugha óo'alh. Doo ka si njan dune dzoh nudeh ts'e hutoodilh.'

29 'Et Abraham 'uyulhni, 'Moses be 'udustl'us cha 'ink'ez nus hoo'enne bube' 'udustl'us cha hut'i. 'I huyoozólhts'ai' da.'

30 'Ink'ez 'uyulhni, "Awundooh 'ubá Abraham. 'Et 'ilhoghun yaidlanne toh ts'e hanája de 'ink'ez buts'u tizya de, 'et huwa la dudeni nahondunooleh.'

31 'Ink'ez 'uyulhni, 'Moses be 'udustl'us cha 'ink'ez nus hoo'enne bube' 'udustl'us cha, daja ni la 'aw huyoozólhts'ai hukwa lhe'hunizun de, 'et nts'en'a 'ilhughun dazsai-un yaidlanne tuz hanaja de, 'en hoonts'i 'aw bubeni 'uts'un ná'yooleh ait'oh.' "

## 17

*Mbe la dune tank'us nénilht'ine, 'en oogha 'et duwhut'en-un, 'et dawhultsi-un oots'u hóolts'ulh*

1 'Ink'ez Sizi yugha hodul'ehne 'et ndubulhni, "Whe tank'us uznint'i-un 'ahoolhyiz 'et whuzdla whe' hoont'oh. 'Et hoonts'i mbe la dune oogha tank'us 'úwhut'en-un, 'et dawhultsi'-un oots'u hóolts'ulh.

2 Nduhne ts'oodunneyaz 'ink'ez ndun dune 'en gha tank'us 'úhuhut'en sulí' de, 'en dune tse cho hits'ilchun edinguz 'ink'ez soo takhulh-un tahúyano de, 'et da' 'on nus hózoo' oole'.

3 'Et huwa soo cho khaadli. 'Et nohulhutsinke nohdulhyoh 'uhuja de, 'et de hukwa' budóhni'. 'Et dudení náhunduniz'ai de, 'et de buba whunaoodoolnoh.

4 'Et 'ilhoh dzin lhtak'ant'it ndulhyoh 'uja de, 'et 'oh totsuk nghu nadaih 'ink'ez, 'Sení náhandunis'ai, nyúlhni de ooba whunaoodolnoh."

*Nts'oh dahooja hoonts'i, be 'alha' hoont'oh-i be neMoodihti ook'une' ts'oot'en*

5 'Ink'ez whel'a'ne neMoodihti huyulhni, "Be néba 'alha' hoont'oh-i, 'on nus 'ultus neba ilhlsi."

6 'Et neMoodihti 'ubulhni, "'Uk'enus haníyeh mai' nint'um-i, mustard huyulhni, 'et nohba 'alha' hoont'oh-un, 'et 'uwhulcho de, nyoo duchun haníyeh-i, mulberry huyulhni, 'et Yak'usda oodolhkut, 'Ndi duchun ooghih tubulh hanaílhch'oolh 'ink'ez nyo bun cho k'et 'et 'anain'aih.' 'Et la Yak'usda nohk'oh ts'e 'ooneh.

7 'Ink'ez nohni nohtoh 'ilhoghun nohe'ulhna-un unli. 'Et ndun 'en haníyeh k'et nawhulhch'ul k'us 'usbai ghunli. 'Et ndi hanúlhyeh k'us whuz de hanája. 'Et diz un'a tilah 'udóni', 'Soo 'a! Natl'adindaih 'ink'ez na'int'alh!"

8 'Awundooh! K'us ndiz un'a njan dúdoni', 'Hulgha natist'ulh-i sba lhadinle, 'ink'ez soo cho soo nadintneh! 'Ink'ez sba hukw'e'inle, bulh na'tist'ulh-i cha sba hukw'eínkaih. 'Ink'ez na'ist'al hukw'elh'az 'et la na'ont'alh.'

9 'Et nyoon be 'ulhna-un ndet la yutl'ahonla-un 'et ts'iyantsuk lhaoodinla. 'Et duja-un 'et huwa eh musi yudutanelh? 'Awundooh nuszun.

10 'Et whuz un'a za nohni cha, ndet la daooh't'en-un nohodani', 'et ts'iyawh lhaoodahla de, 'et 'ink'ez nja dudútihnelh, "Aw whulukhun za huba ts'inzoo-un hoonli. Daja nehutni, 'oh te za ne'ts'ut'en."

*Dune ooka whulhjut-un, ooba 'alha' hoont'oh-i, 'i be soo ná'uja*

11 'Et 'awet Sizi Jerusalem tizya whe yun k'ut Samaria 'ink'ez yun k'ut Galilee cha whulheguz lhuseya.

12 'Et whuz uyalh whe keyoh whuyaz nenínya. 'Et whunizyane ndulcho whe buka whulhjut-i, 'i leprosy huyúlhni, 'i be undudane, hidudizdil. 'Ink'ez highu nilhdza' nódilhya.

13 'Et whuts'un hits'u huyih, "Sizi neMoodih, negha te'ninze!"

14 'Et Sizi ubunilh'en 'ink'ez 'ubulhni, "Lubret ts'ohdulh. 'En nohnooh'en hoonli-unyaz tilah nohghu nahó'alh." 'Et 'awhuz whuz hidulh whe soo na'huja.

15 'Et 'ilhoghun soo na'uja t'ewhunanzin whe 'et nohundunizya 'ink'ez yuts'u naosja. 'Et soo tube cho Yak'usda dálhti'.

16 'Et Sizi yubut yun 'et nachániti, 'ink'ez lhk'uz te musi yulhni. 'En dune Samaria whut'en-un 'unt'oh.

17 'Et Sizi 'uyúlhni, "Whunizyane lakw eh soo na'huja? Nduhne 'ilho hoolohne nts'e whehándil?"

18 'Et ndun 'udun keyoh ts'u hainya-un, 'en za whusanaja 'ink'ez Yak'usda musi yulhni."

19 'Ink'ez Sizi 'uyulhni, "Dudinyaih 'ink'ez naindadh. Mba 'alha' hoont'oh-i, 'i be soo na'inja."

*Nkede 'uwhutanelh Yak'usda whulerwe unli-un whusaootilts'ulh*

<sup>20</sup> 'Et whulohne Phariseene, 'enne Sizi huyoodulhkut, "Nkede 'uwhutanelh Yak'usda whulerwe unli-un whusaootilts'ulh?" 'Et 'ubulhni, "Yak'usda whulerwe unli-un, 'aw nts'en'a whusaootilts'ulh-un, 'et 'aw whunoolh'en ait'oh.

<sup>21</sup> 'Aw 'ilhoghun hoonts'i dooni' ait'oh, 'Njan whunulh'en 'et 'uhoont'oh,' k'us, 'Nghut 'uhoont'oh.' 'Et Yak'usda whulerwe unli-un 'uda' nohbulh 'oohoont'oh whe' hoont'oh."

<sup>22</sup> 'Ink'ez 'et yugha hodul'ehne ubulhni, "'Et 'oh dzin whusaootikulh 'ink'ez yinka dune ye', 'ilhoh dzin whutih'elh hukwa' ntihzilh, 'et hoonts'i 'aw hoo'h'en ait'oh.

<sup>23</sup> 'Et la 'onghohne dune 'et la ndunóhodoní, "'On 'un whunulh'en!' k'us 'Njan whunulh'en!' Khun buts'u toohdilh junih 'ink'ez bubun toohdilh junih!

<sup>24</sup> Nts'en'a la ditni kwun 'oolhges te ndulcho whe bé hooltsih, 'et whuz un'a za yinka dune ye', oodzin de ndulcho whe ts'iyanne ba be hoodutaltsilh.

<sup>25</sup> 'Et hoonts'i 'udechoo lhat-un whe dzoh nutizut huba' hoont'oh. 'Ink'ez 'andit whudizulhne dune hikalhe'untiszil.

<sup>26</sup> 'Et nts'en'a la 'oh da' Noah oodzin whudizulh da', dahoont'oh inle' la, 'et whuz un'a za yinka dune ye' dzin 'et duwhútat'elh.

<sup>27</sup> 'Et ts'iyanne 'uha'alh za' hut'en, 'ink'ez tahunutnai. Dunene cha 'ink'ez ts'ekoo cha lhgho dilhts'i. 'Ink'ez 'oh da' nts'en'a la Noah ts'i cho be inya 'ink'ez 'et too dudilt'o 'ink'ez ts'iyanne too hubanghan.

<sup>28</sup> 'Ink'ez ndun Lot 'en khuna da' whuz un'a 'et dúhooja. 'Et ts'iyanne 'uha'alh za' hut'en 'ink'ez tahunutnai. 'Oohooket 'ink'ez 'e'hooket. 'Ahunule 'ink'ez yoh 'uhuwulh'en cha' hut'en.

<sup>29</sup> 'Et 'oh da' dzin Lot keyoh Sodom huwhutni-un huwu whenaja whe kwun 'ink'ez tse dizk'un-i ndus de yak'uz ts'e náilhtan, 'ink'ez ts'iyawh gak hubulhtsi.

<sup>30</sup> 'Ink'ez ndet dzin 'uwhutanelh whe yinka dune ye' be hóodutaltselh, 'et whuz un'a ndó tanelh.

<sup>31</sup> 'Et 'oh de dzin, mbe dune dubun k'ut nalyis whe, 'en 'aw yo natooja' 'ink'ez duyoh ts'e ye 'unt'oh-i 'aw nayólhchoot ait'oh. 'Et whuz un'a za mbe la dune haníyeh k'et 'ut'en-un, 'en duyoh ts'e 'aw ye 'unt'oh-i hanaója' ait'oh. Khun 'uwhutánelh 'et huwa.

<sup>32</sup> Lot oo'at 'en oonalhni!

<sup>33</sup> Mbe la dich'oh whe khuna-un, 'et 'ududoolyih hukwa 'ut'en-un, 'en ye khuna-i ninta itá'alh. 'Ink'ez mbe la dich'oh whe khuna-un ninta oonin'ai de, 'en 'udutilyih whe 'unt'oh.

<sup>34</sup> 'Et nohdusni ndiz un'a nja duwhútanelh, 'et 'ulhdzis nane 'ilho lili k'uhuztez. 'Ilhoghun itálchulh, 'ink'ez 'ilhoghun 'awet ndutít'elh.

<sup>35</sup> Nane hiti'ulh-i hundunulhdus. 'Ilhoghun itálchulh, 'ink'ez 'ilhoghun 'awet ndutít'elh.

<sup>36</sup> Nane, 'enne haníyeh k'et 'uhut'en. 'Ilhoghun itálchulh, 'ink'ez 'ilhoghun 'awet ndutít'elh."

<sup>37</sup> 'Ink'ez, "NeMoodihti nts'e 'udini?" 'et hukwa huyoodulhkut. 'Ink'ez 'ubulhni, "Ndet la nezi usala-un, 'et la tsibalyan huwe' 'ilhootáduh."

## 18

*Dune 'ahoolhiz tenazdoodli 'ink'ez whulazdootnih junih*

<sup>1</sup> 'Et Sizi be whuts'odul'eh-i, 'i ghun 'ubulhni. 'Et diz un'a whunehodulh'eh whe nja dutni, dune 'ahoolhyiz tenazdoodli 'ink'ez whulazdootnih junih.

2 'Inka 'ubulhni, "Et la 'ilhoghun keyoh, 'et ndun nahíyilh-un, 'en 'aw Yak'usda élniljut, 'ink'ez 'aw dune lhe'ílh'i.

3 'Et keyoh za 'ilhoghun tsandilh, 'en 'ahoolhyiz yughu ninya 'ink'ez 'uyulhni, 'Ndun sch'az ditni-un, dásinla-un sba ts'ih'un na'hoonleh!'

4 'Et 'atsulyaz hoont'i 'aw yoozólh's'ai' ait'oh. 'Et 'udek'ez na'dudútni "Aw Yak'usda be lhnuzjut 'ink'ez dune cha 'ants'i sba hinli.

5 'Et hoont's'i ndun tsandilh sdabe tesudule 'et huwa ooba ts'ih'un na'whutisdlelh, doo ka si nasúdoohlhdzas!'"

6 'Ink'ez neMoodihti 'ubulhni, "Ndun nahiyilh-un ts'ih'un lhe'it'oh-un, daja ni oozúlh's'ai.

7 'Et whuz un'a za mbene la Yak'usda oodune'ne, mbene la dzin 'ink'ez 'ulhdzis-i bulh hits'u tedudlihne, 'enne 'aw talhúbudini. 'Et hoont's'i soo eh buba k'utítnelh? Whuz un'a buba' whutilelh.

8 'Ink'ez 'unohdusni, 'a cho buba k'utítnelh! 'Et hoont's'i yinka dune ye' ndi yun k'ut whusanája de, soo eh dune ooba 'alha' hoont'ohne naitáleh?"

### *Dahoont'oh huwa dune Yak'usda nalh ts'ih'un na'uja*

9 Whulohne ts'ih'un un'a 'ust'oh na'hundunúdzun, 'ink'ez 'onghohne, 'enne hintsi' ubunínzun. 'Et huwa Sizi 'enne ndi nawhutnuk 'i be whúts'odul'eh 'i be 'ubulh yalhduk whe nja dúbulhni,

10 "Nane dune Lizwifne bulugliz whucho tenahudutidli ha whuz whehan'az. 'Ilhoghun 'en Pharisee 'unt'oh, 'ink'ez 'ilhoghun sooneya 'ilhunaos'a'ih-un 'unt'oh.

11 Ndun Pharisee 'en dich'oh usyin 'ink'ez tenadudli whe nja dutni, 'Yak'usda musi nyudusni. 'Aw 'uyoonne dune dúlhuzt'oh. 'Uyoonne e'whuhalhts'it sooneya be, 'enne 'aw ts'ih'un lhe'it'ohne 'uhint'oh, 'ink'ez ts'ekoo k'us dunene bulh ninta' 'ut'ihne. 'Ink'ez ndun sooneya 'ilhunaos'a'ih-un, 'en hoont's'i bundúlh uzt'oh.

12 Lisman totsuk nat sóo hoosnih. 'Ink'ez ndai la sba k'elha unli-i, 'i cha ooloh, 10%, lugliz huwas'a'ih, 'ni Pharisee.

13 'Et ndun sooneya 'ilhunaos'a'ih-un, 'en cha 'udun usyin. 'Aw ndo hoont's'i yutó'en ait'oh 'ink'ez yo nilh'ai. 'Ink'ez dudzi k'ut hoolhchis, 'Yak'usda sgha te'ninzeh! Lubeshi 'ulh'en-un 'ust'oh, 'ni."

14 'Et Sizi 'ubulhni, "Nohdusni ndun sooneya 'ilhunaos'a'ih-un, 'en Yak'usda nalh ts'ih'un na'uja whe duyoh ts'e naosja. 'Et 'ilhoghun 'aw ndúlhinel. 'Et ndiz un'a nja dúhoont'oh, mbe la duba na'udzoo'-un, 'en yooya yutílh'selh. 'Ink'ez mbe la yo 'údudildzun-un, 'en Yak'usda ndo ná'yutilelh."

### *Sizi ts'oodunneyaz buba tenadudli*

15 'Et 'awet chalhts'ulne highu ninla khun tilah buk'udólni ha. 'Et yugha hodul'ehne honilh'en whe dah buhutni.

16 'Et hoont's'i Sizi yugha hodul'ehne 'anilh 'ubulhni, "Whute ts'oodunneyaz sts'ó toodilh. Khun te dah budóhni' junih. Mbene la Yak'usda whe lerwe unli-un whuz dilhts'ine, 'enne ndunne ts'oodunneyaz ubunduhúlt'oh whe' hint'oh.

17 Soo ts'ih'un 'alha' nohdusni, ndet la Yak'usda whulerwe unli ts'e, mbene la Yak'usda bulerwe unli-un 'aw ts'oodunneyaz k'un'a lhuhuhóolhchulh de, ndunne 'aw whuz dahóoya' ait'oh."

### *Dune hoonzoo' unt'oh datinelh whe 'ilhiz hutinalh-un whuch'a ootálhdoh*

18 'Et 'awet 'ilhoghun dune moodih uncha-un 'en Sizi yoodulh'kut, "Dune hodulh'eh-un unzoo-un, nts'en'a la datisnelh whe 'ilhiz khutisnalh-un whuch'a ootásdoh?"

19 'Inka Sizi 'uyulhni, "Di ha sudini, unzoo-un sudini? 'Aw 'ilhoghun unzoo-un hooloh. Yak'usda 'en za unzoo whé 'unt'oh.

20 Ndai Yak'usda khuni dune butl'aidan'ai-i, 'i t'eninzun. Khun te ts'ekoo bulh ninta ooh't'en junih. Dune soolhghel' junih. 'Undunooht'ih junih. 'Uyoonne ba hoohts'it junih. Nohbá 'ink'ez nohloo bulh budóhlti!"

21 'Et 'uyulhni, "Usool da' whuts'un, ndi ts'iyawh ook'une' zust'en."

22 'Et Sizi njan whudants'o whe 'et 'uyulhni, "'Awhuz 'ilhoghun mba 'et whuz'ai. Ndai la int'i-i ts'iyawh be 'óonket, 'ink'ez tel'enne gha nín'aih. 'Et de la ndo yak'uz dizti'-i, 'et mba oola'. 'Ink'ez 'anih se' 'ut'en k'oh tune' ónt'en ha sunanyalh."

23 'Et whudánts'o whe tube oodzi yo 'úja. Ndun dune tube hoonzoo' 'unt'oh-un 'et huwa.

24 'Et Sizi yunilh'en whe ndun dune tube oodzi unduda sulí, 'et 'utni, "Hoonzoo' 'unt'ohne dawhulcho whe buba howa whulna' whe Yak'usda whe lerwe unli ts'e hutidulh.

25 'Et ndi khuna ncha-i, camel huyulhni, 'i ooba howa whulna' whe ughabatsulh oolato'ookonín'a-un hukwutilgwulh. 'Et whuz un'a whanus howa whulna' whe hoonzoo' 'unt'oh-un Yak'usda lerwe unli-un datíyalh."

26 'Et mbe la whudants'one 'uhutni, "Mbe za suba doojih?"

27 'Et hoohts'i 'ubulhni, "Dunene ndai bulh 'uhuhool'ait'oh, 'et hoohts'i Yak'usda ba huwa lhúhoolna' whe' hooht'oh."

28 'Et Peter yatilhduk whe Sizi nja dúyulhni, "Whunilh'en ndai la ts'ut'i-i, 'i ts'iyawh oolazditni 'ink'ez nye'ut'en k'oh ts'e 'oot'en ha nyuts'un tizdil."

29 'Ink'ez 'ubulhni, "'Alha nohdusni, ndet Yak'usda whe lerwe unli-un, 'et huwa dune duyoh huwu tizya de, k'us dudusneke, k'us dulhutsinke te, k'us du'at, duzkeh cha, ndi ts'iyawh huwu tizya de,

30 'et mbe la 'et ndúja-un, 'en 'on nus lhat-un ootl'anaóotikulh. 'Et nus de whusahóolts'ut de, 'et de 'ilhiz khutinalh."

### *Sizi datitsah-un whulh tat huwu yatilhduk*

31 'Et 'awet ndunne whunizyanne 'on 'at nane, 'enne 'udun nebuninla 'ink'ez 'ubulhni, "Soo zulhts'ai, Jerusalem ts'uztidulh 'ink'ez yinka dune ye', ndunne nus hoo'enne, 'en ghun 'uk'ehuyanguz-i, 'i ts'iyawh lhawhudutaneh.

32 Lizwifne 'udun yun k'ut whut'enne butl'ahítihltel. 'Enne highu notilyeh, 'ink'ez highu tidloh, 'ink'ez higha dútazoh.

33 Huyootalhtsus 'ink'ez hituzilghel. 'Et whulh tat dzin dunadutádalh."

34 'Ink'ez njan ubúlhni-un, 'aw bubeni tálhodulhts'it. Ooghuni daja ni buch'a whuntist'i whe' hooht'oh. 'Aw daja ni whe 'utni-un, 'aw t'ehonúszun.

### *Dune hoos'en-un, 'en Sizi hoo'en nayulhtsi*

35 'Et hukw'elh'azyaz Sizi keyoh Jericho whenghoh uyalh whe, dune hoos'en-un ti whuzih usda, 'ink'ez datso.

36 'Et dune lhane 'oh whuya udulh whe 'et buduzts'ai. "'Et dawhut'en whe' whutni?" ubulhni.

37 'Et 'uhuyulhni, "Sizi Nazareth whut'en-un 'oh whuya uyalh."

38 'Et huyih, "Sizi, David oots'u hainzut-un, sgha te'ninzeh!"

39 'Et 'udetso udulhne khuni ulhtus-i be, "T'eduzinih!" huyúlhni. 'Et hoohts'i 'on nus nint'i whe huyih, "David oots'u hainzut-un, sgha te'ninzeh!" ni.

40 'Et Sizi 'ilhiz neninya 'ink'ez dune hoos'en-un duts'e' hítoolhtel ubúlhni. 'Et Sizi hizih nehinihlti whe yoodulhkt,

41 “Ndet mba 'uwhtusidlelh hukwa' ninzun?” “Moodihti doo cha za hoos'en nasilhtsi!” ni.

42 'Et Sizi 'uyulhni, “Hon'en naoodle! Mba 'alha' 'ust'oh-un 'et huwa soo na'inja.”

43 'Et 'aho hoo'en nasdli, 'ink'ez Sizi yuntizya 'ink'ez Yak'usda dilhti'. 'Et ts'iyanne, mbene la whunalh'enne, 'enne cha ts'iyawh Yak'usda hudilhti'.

## 19

### *Zacchaeus 'en cha dune hiye dujis-i oogha íyults'ut*

1 'Et Sizi 'awet Jericho ts'oozya 'ink'ez 'oh whuya lhuseya.

2 'Ink'ez 'et la 'ilhoghun dune 'en 'et usda, Zacchaeus huyulhni. 'En sooneya 'ilhunaos'aihne bumoodih, 'ink'ez soo din'a-un.

3 'Ink'ez Sizi mbe 'unt'oh yuntilh'elh hukwa' ninzun. 'Et hoontsi' 'ilhu-naosdilne, 'enne bugha 'aw yoo'en ait'oh. Ndun dune tube ndukw 'et huwa.

4 'Inka butso tilhgai 'ink'ez duchun, Sycamore huyulhni yuntilh'elh ha, 'et hukwa 'i k'ut dugailget. Whuz un'a Sizi 'oh whuya lhuriyalh.

5 'Et Sizi 'et neninya, 'et ndo yútan'en whe yutilh'en, 'ink'ez 'uyulhni, “Zacchaeus 'a cho 'andit 'aho nanáindaih! 'Andit dzin nyoh tisdalh huba' hoont'oh.”

6 'Inka 'a cho nanája. 'Ink'ez hoont'i' whe duyoh ts'e yughu nuséya.

7 'Et ts'iyanne hinalh'en whe whuts'o disnih, 'ink'ez howu yahalhduk whe 'ulhodutni, “Ndun lubeshi 'ulh'en-un, 'en zih tidalh.”

8 'Et hoontsi' Zacchaeus dudinya 'ink'ez Moodihti 'uyulhni, “SMoodihti whunilh'en, ndai la ust'i-i ts'iyawh lhulcho tel'enne gha tisdlelh. 'Ink'ez mbene la bube' hoostsi'tne, 'enne dit 'et 'uniltsuk-i butl'anátis'alh.”

9 'Et Sizi 'uyulhni, “Andit dzin dune hiye dujis-i whe njan yoh dilhtsi'ine bugha íyults'ut. Ndun 'en cha Abraham ts'u hainzut whe 'unt'oh 'et huwa.

10 'Alha mbene la ninta ninkatne, 'enne yinka dune ye', 'en bukúntitalh 'ink'ez 'ubutilhyih ha, 'et whuba whusainya.”

### *Ndi khuni be whuts'odul'eh-i, 'i be t'ezninzun neMoodihti whusanátidalh whuts'un, ndiz un'a ndi yun k'ut uzdóts'i'*

11 'Et njan hidants'o whe ndai la 'uyoo khuni be whúts'odul'eh-i be bubulh yawhénilhduk. Jerusalem whenghoh hidulh 'ink'ez ts'iyanne 'uhuninzun ndet Yak'usda whe lerwe unli-un, 'awet soo 'aho whe óodutaltsilh huninzun.

12 'Et huwa ndiz un'a 'ubulhni, “Ilhoghun dune ncha-un, 'en nilhdza' keyoh ts'u tiyalh. 'Et whuz oozya de, 'et ndun nts'ez de dukeyoh ts'u hainya-un, 'et whuz whulerwe hitilhtselh. 'Ink'ez 'et dukeyoh ts'e nátidalh.

13 Tiyalh whutso whunizyanne dude 'ulhnane 'anilh ubudani'. 'Ink'ez ilhoghun hinli whe sooneya dizti'-i, 'ilho butl'ain'ai, 'ink'ez 'ubulhni, 'Whusanátisdalh whuts'un be óoht'en 'ink'ez be 'é'oohle, 'ubulhni.

14 'Et hoontsi' bulh keyoh whut'enne hika lhe'nizun. 'Inka whinya hukw'elh'az 'aho njan keyoh whudune'ne, 'enne whulohne 'utahábahanlane, 'enne keyoh whunat whuz whebahalh'a' buba yahutilhduk ha, “Aw ndun dune 'aw nelerwe oole' hukwa lhe'uznizun, hutni.

15 'Et ndun dune lerwe sulí' whe whusanája, 'et ndunne dude 'ulhnane, mbene la sooneya butl'ain'aine, 'enne 'anilh ubúlhni. 'Ilhone hinli whe daltsuk hiba inla-un 'et nahootá'alh hukwa' ninzun.

16 'Et 'udechoo-un yughu ninya 'ink'ez 'uyulhni, ‘SMoodih ndi sooneya dizti'-i szih nenín'ai-i, 'i be whunizyai 'uniltsuk-i be mba 'usdla.’



17 'Ink'ez 'uyulhni, 'Se 'ulhna-un, tube soo 'ínja! Ntsool-iyaz ntl'as'ai-i, ts'ih'un un'a be ne'zint'en. 'Et huwa whunizyat-un keyoh whuti whumoodih tanleh 'et ntl'ahóos'ai.'

18 'Et bulh nane whusainya 'ink'ez 'uyulhni, 'SMoodih nzooneya dizti'-i zsih nenín'ai-i, 'i be kwulat 'uniltsuk-i be mba 'usdla,' yúlhni.

19 'Et ndun 'uyulhni, "Et huwa nyun cha kwulat-un keyoh whuti whumoodih tanleh, 'et ntl'ahóos'ai.'

20 'Et 'uyoon cha yughu ninya 'ink'ez 'uyulhni, 'SMoodih soo zilhts'ai. Nah njan nzooneya dizti'-i zsih nenín'ai-i. 'I dzezoh be be' zuschuz 'inkez mba 'et 'us'a'.

21 'Aw dune te'ninzun-un lhínloh t'enyunúszun, 'et huwa nyenuzjut. Ndai la nch'e' lhiloh, 'i hoonts'i nailhchuk. Ndai la 'alhnuzinloh-i, 'i hoonts'i hanínle,' yulhni.

22 'Inka 'uyulhni, 'Nyunch'oh nze whe dája dini-un, 'et whe mba nahutisye. Se'ulhna-un intsi, 'aw huba inzoo-un hooloh. T'ooninzun dant'oh-un dune usdli. Ndai la dalhúzus'ai-i, 'i hoonts'i uschuk. 'Ink'ez ndai la 'alhnúsdlel-i, 'i hoonts'i hanúsdlíh 'ink'ez be sooneya us'en.

23 'Et 'oh da' di ha nyoonne sooneya lkh'unáda'aihne uszooneya 'enne butl'alheyin'al? 'Et de da', whusanasja de, 'on 'un be 'é'oodleh?'

24 'Et de 'onghoh nudilhyanne 'ubulhni, 'Ndi sooneya dizti'-i ooghu nayulhchoot. 'Ink'ez mbe la whunizyai inla-un, 'en oogha inah'aih.'

25 'Et hoonts'i 'uhuyulhni, 'Moodih 'uda' 'awet whunizyai ut'i.'

26 'Et huwa nyoon dune dizti'-un 'en 'utni, 'Mbene la hoonliyaz 'ut'i-un, 'en 'on 'un lhai oogha tít'alh. 'Ink'ez mbe la hoonliyaz lhit'ih-un, ndai 'aw 'i yut'i, 'i hoonts'i ooghu nayitálchulh.

27 'Et ndunne mbene la sch'az ditnine, skalhe'hunízun whe bulerwe tisdleh, 'enne ts'iyawh sábahle 'ink'ez soo sbut 'et bubaghan.' "

### *Yak'usda hudilhti' whe keyoh Jerusalem hunindil*

28 'Et ndubúdani'-un hukw'elh'az Sizi Jerusalem ts'o tizdil whe butso tizya.

29 'Et 'awet shusyaz, Olive huyulhni, 'et la keyoh whuyaz Bethphage 'ink'ez Bethany huwhutni shusyaz zih whuzdla. 'Et shusyaz whenghoh hidulh whe nane yugha hodul'ehne ubutílh'a'.

30 'Ink'ez 'utni, "Keyohyaz nohanch'az ts'e whuz ah'us. 'Et 'awet keyoh whuyaz nenah'az de, 'et la 'ilhoghun yeztliyaz, donkey huyúlhni, whédint'i, 'i 'aw whutso da' 'awhuz dune yuk'ulhídoh-i, 'i tih'elh. K'unaooh'uk 'ink'ez ndiz tóolhdlooh.

31 'Et dune nohoodulhkut de, di ha 'ulh'en k'unah'uk? 'Et njan dúdohni' la, neMoodihti yuka' ninzun."

32 'Et ndunne whebalh'a'ne whuz hooz'az whe, soo nts'en'a la daja ni-un, 'et whuz un'a nahuhoon'ai.

33 'Et 'awet nyoo yeztliyaz k'unuháyu'uk whe ooch'e'ne 'ubuhutni, "Di ha 'ulh'en ndi yeztliyaz k'unah'uk?"

34 'Ink'ez 'et 'ubuhútni, "NeMoodihti yuka' ninzun."

35 'Et 'awet Sizi highu hiníhldukw. 'Ink'ez dich'oh dunaih yeztliyaz hik'ehúyinla, 'ink'ez Sizi hik'ehúyilhti.

36 'Et 'awet tizya whe dunaih ti yun hiba nehíníhbal.

37 'Et 'awet njan shusyaz, Olive huyúlhni, 'awet whuduhándil whe 'et huwu nilhdukw whe, 'et lhané yugha hodul'ehne huhóost'et. 'Et ndet da' dáhooltus-un 'uhóoja-un 'et honalh'en da', 'et huwa soo tube cho Yak'usda hudilhti'.

<sup>38</sup> 'Ink'ez 'uhutni,  
 "Lerwe 'en Moodihti boozi' be whusainya-un,  
 'en 'uk'enus hoonzoo-un oogha whults'ut!

Ndo yak'uz 'et soo whudutághel,  
 'ink'ez 'et soo 'udedo 'et k'us whudutati'."

<sup>39</sup> 'Et la whulohne Phariseene butoh whults'un hits'u huyih, "Dune hodulh'eh-un, nye hódil'e'ne hukwa' budini!"

<sup>40</sup> 'Et hoonts'i 'ubulhni, "Nohdusni, njan t'ewhudusnih de, tse 'i hoonts'i da' 'aho la yatooldhieh."

*Jerusalem whut'enne bubulh dawhutanelh, 'et huwa Sizi howintse*

<sup>41</sup> 'Et keyoh whuti whenghoh uyalh, 'et Jerusalem whutilh'en whe howintse.

<sup>42</sup> 'Ink'ez 'et ndutni, "Nohni Jerusalem whut'enne, nohni hoonts'i, 'andit dzin soo cho uncha t'oonahzun nohdzin 'uhoont'oh. 'Et huwa da' t'oonóhzin nts'en'a whe nohba whudutághel-un. 'Et hoonts'i 'andit whulst'un nohna ch'a whuntist'i.

<sup>43</sup> 'Et 'oh de dzin whusaoitilts'ulh ndet la nohch'az ditnine nohnahtugus. 'Ink'ez lhez lhk'ehitalhkuh nohnat ndulcho whe, 'ink'ez whez ts'e nohuhootatun.

<sup>44</sup> 'Ink'ez njan keyoh whuti-un lhk'unahuhootáhlkuh. 'Ink'ez mbene la whez ts'e dilhst'ine, 'enne cha ts'iyawh bubulh 'uwútanelh. 'Aw 'ilho tse lhk'udiz'ai-i nohba 'et nenáhodutas'al. Nts'oh whuya whudizulh-un 'uhooja nohulhyis-un nohts'ó whusatiyalh-un, 'aw t'elhonázhil, 'et huwa whuz un'a 'uwhutánelh."

*Lugliz whucho ts'e 'óoketne 'ink'ez 'e'óoketne, 'enne ts'iyawh Sizi tenábuninyoot*

<sup>45</sup> 'Et lugliz whucho whuna'niztl'oo-un daninya 'ink'ez 'óoketne 'ink'ez 'e'óoketne, 'enne ts'iyawh tenábuninyoot.

<sup>46</sup> 'Ink'ez 'ubulhni, "'Uk'ehóoguz whe' nja dutni, 'Syoh 'et tenadudli bayoh 'úhoont'oh. 'Et hoonts'i 'et cha nja dutni, "Undunut'ihne bayoh whuzúlhtsi'."

<sup>47</sup> 'Ink'ez 'et nyoo lugliz whucho dzin totsuk dune hodulh'eh. 'Et hoonts'i soo 'udedo lubretne, 'ink'ez Moses be 'udustl'us 'uk'ununáguzne, 'ink'ez dune tso whudilhduzhne cha, ts'iyawh nts'en'a hituzilghel-un 'et hukwa hitís'en.

<sup>48</sup> 'Et hoonts'i 'ilhunaosdilne, ts'iyawh hinat nódilhya 'ink'ez soo cho huyoozilhts'ai. 'Et huwa 'aw nyoonne hizoolhghelh ait'oh.

## 20

*Sizi ndai gha dune ando 'unt'oh, 'et hukwa hoodulhku*

<sup>1</sup> 'Et 'oh da' 'et 'ilhudzin diz un'a 'et dúhooja. Lugliz whucho Sizi dune hodulh'eh whe khuni unzoo-i be bubulh yalhduk whe 'udedo lubretne, 'ink'ez Moses be 'udustl'us 'uk'ununáguzne cha, 'ink'ez 'alghoh 'utso whudilhduzhne, 'enne hik'udugháhinya.

<sup>2</sup> 'Ink'ez 'uhuyulhni, "Nedini ndai gha dune ando 'int'oh whe ndowhi 'ut'en oowaina? K'us mbe ntl'ahón'ai whe 'udini?"

<sup>3</sup> 'Et hoonts'i 'ubulhni, "Si cha 'ilhoghun hukwa nohoodutaskut, 'et sudáhni,

<sup>4</sup> nts'en'a John dune too be 'úlh'en? Mbe yutl'ahon'ai dune too be tilh'elh huba? Yak'uz ts'e tilah hahóolts'ut, k'us ndi yun k'ut dune tilah ts'u hahóolts'ut?"

<sup>5</sup> Dich'oh lhtoh howu yahalhduk 'ink'ez 'uduhutni, “‘Et yak'uz whuts'un tilah hahóolts'ut ts'utni de, 'Et la di ha John nohba 'alha' lhe'dusni, nedóni' la.

<sup>6</sup> 'Et hoonts'i dune ts'u hahóolts'ut, ts'utni de, 'et dune ts'iyanne la tse be nehooghan. John 'en nus hoo'en-un 'unt'oh 'et buba 'alha' 'uhoont'oh 'et huwa.

<sup>7</sup> 'Inka Sizi nduhuyulhni, “‘Aw nts'ez de hahóolts'ut t'ets'onúszun.”

<sup>8</sup> 'Ink'ez Sizi ndubulhni, “‘Ndaí be dune ando 'ust'oh whe ndi nja duwhús'en-un, 'et si cha 'aw nohdósni' ait'oh.”

*Mai haníyeh k'et whulh'aíne bughu whuts'odul'eh*

<sup>9</sup> 'Et 'awet 'uyoo khuni be whúts'odul'eh-i be bulbul yawhénilhduk whe nja dutni, “‘Ilhoghun dune haníyeh k'et ts'ekoo too' mai 'ananla. 'En la njan haníyeh k'et ndunne há' nulhyehne bughu whulh'ai, 'ink'ez sa' wheni nilhdza' keyoh ts'e whinya.

<sup>10</sup> 'Et la 'awet mai oontajin néwhuninzut whe 'ilhoghun de 'ulhna-un buts'ú whe yalh'a'. 'Et la ndai mai oots'ítikulh-i, 'i la ooloh highá nodzaih. 'Et hoonts'i nyoonne haníyeh k'et bughu whulh'aíne, ndun 'ulhna-un yahíyálhchus 'ink'ez la za-i whe whenáhinanyoot.

<sup>11</sup> 'Inka doo cha 'uyoon de 'ulhna-un buts'ú whilh'a'. 'En cha yahíyálhchus, 'ink'ez yooya hiyulhtsi, 'ink'ez 'en cha la za-i whe whenáhinanyoot.

<sup>12</sup> 'Et búlh tane dude 'ustlen-un buts'ú whilh'a'. 'En cha ka húyulhtsi 'ink'ez tenáhinino.

<sup>13</sup> 'Et la haníyeh k'et whut'i-un 'utni, 'Daoosneh cha há la? Sich'oh sye' ookw'esi'-un, 'en la buts'ítoos'a'. 'En tilah hiyan'en de, 'unt'oh-un k'un'a né'yiyoolh'en, ni.

<sup>14</sup> 'Et hoonts'i ndunne bughu whulh'aíne hitilh'en whe 'et 'ulhodutni, 'Ndun 'en nyoo haníyeh k'et ooch'e'-un 'en ooye' 'út'en. Ts'uzoolhghel! 'Et de la ndet la oots'ó tilts'ulh-un ts'iyawh 'et ndúwhulcho whe nets'ó tools'it.'

<sup>15</sup> 'Inka njan haníyeh k'et tenáhinino 'ink'ez hízilghhi. 'Et huwa soo cho nohdusni, nyoon haníyeh k'et ooch'e' hoonli-un, dábooleh suba?

<sup>16</sup> 'Ndiz un'a nja dutínelh, whusanátidalh 'ink'ez ndunne mai k'et bughu whulh'aíne, 'enne ts'iyawh gak ubutilhtselh. 'Ink'ez dumai' haníyeh k'et 'uyoonne gha óotalh'ah.” 'Et dune hohodánts'o whe 'uhutni, “‘Aw uncha 'et dulhúhoonel!”

<sup>17</sup> 'Et Sizi ubunilh'en 'ink'ez 'utni, “‘Ndi Yak'usda ooghuni daja ni whe 'uk'eguz,

'Ndi tse yoh 'uwulh'enne 'ún hidutilh'uz-i,

'i yoh 'ook'uwhez'ai-un huba soo 'uk'enus tse 'unt'oh-i sulí.'

<sup>18</sup> 'Mbene la ndi tse hik'ílts'utne, ts'iyawh yahidutáti. 'Ink'ez mbene la ndi tse buk'édilts'utne, ts'iyawh musai hutileh.”

<sup>19</sup> 'Nduenne Lizwif lubret bumoodihne, 'ink'ez ndunne Moses be 'udustl'us 'uk'ununáguzne, 'enne cha, 'et soo 'et sadzi hunít'oh-un, 'enne Sizi hiyólhchoot hukwa' hut'en. 'Et hoonts'i ndunne dune bubé hunuljut 'et huwun 'aw 'uhooneh ait'oh. T'ehoninzun ndi khuni bé whuts'odul'eh-i, 'i be didut buch'az yalhduk whe 'utni 'et huwa.

*Yun k'elha huhoolh'i-un hukwa' hoodulhktut*

<sup>20</sup> 'Ink'ez highunli, 'ink'ez ts'ih'un 'unt'oh na'dudil'i nunúl'i'ne, 'enne hits'un whilh'a'. 'Enne khun tilah Sizi ye yalhduk-i, 'i gha la huyoolhgooh. 'Et de la yun k'ut whut'enne bumoodih yutl'ahúyoolhtelh. 'En 'unt'oh hoolhtus te ne'ut'en, 'ink'ez ts'iyanne k'une' 'ul'en.

21 'Et nunúl'i'ne huyoodulhkut, "Whunehodulh'eh-un t'ets'oninzun ts'ih'un un'a yailhduk. Ts'iyanne mba lhgha 'únt'oh. 'Et ts'ih'un un'a Yak'usda k'un'a dune hodilh'eh.

22 Nedini ndi yun hik'elha huyilh'i-i, tax huyúlhni-i, 'et ts'ih'un tilah 'uhoont'oh whe lerwe Caesar 'en ooba k'elha ts'uyoolhtselh, k'us 'awundooh tilah?"

23 'Et hoonts'i Sizi t'eeoninzun 'onilha 'uhutni. 'Ink'ez 'ubulhni, "Di ha sóolhdzih?"

24 De' nyoo sooneya snalhts'et nah'a! Mbe onin 'ink'ez boozí' cha ook'usguz?" 'Et 'uhuyulhni, "Lerwe Caesar 'unt'oh."

25 'Et Sizi 'utni, "'Et huwa ndai la Lerwe Caesar ooch'e', 'i ootl'anáyahle. 'Ink'ez ndai la Yak'usda ooch'e', 'i cha Yak'usda tl'anáhle."

26 Ndai khuni be la dunene bubulh yailhduk, 'i gha 'aw huyoolhgooh ait'oh. 'Et njan ts'iyanne nalh bubudáni' whe tube buba hooncha sulí', 'ink'ez ndunne nunúl'i'ne, 'enne ts'iyawh t'ehudínel.

### *Sizi dunádutádalh-un huwun huyoodulhkut*

27 'Et oolune Saduceene Sizi highu nindil. 'Enne la 'uhutni dats'úzsai 'ink'ez 'aw nats'ukhótnah aít'oh. 'Ink'ez huyoodulhkut,

28 "Dune hodulh'eh-un njan Moses daztit'elh-un neba 'uk'ehonguz whe' hoont'oh. 'Et 'ilhoghun dune buzkeh hooloh whe dazsai 'ink'ez oo'at khuna de, ndun dune bulhutsin 'en dughe inle'-un yughu naooda' huba' hoont'oh. 'Ink'ez bubuzkeh whúzdlí' de, 'et de la ndunne ts'oodunne ndun dazsai-un, 'en boozí' huyólhchoot huba' hoont'oh.

29 'Et 'uhoont'oh lhtak'ant'ine lhulhutsinke hoonli. 'En 'udetso whudilhduh-un, 'en 'at ut'i. 'Ink'ez 'aw buzkeh hooloh whe dazsai.

30 'Et bulh náne 'en ndun ts'eke yughu nasda. 'En cha ndun dune buzkeh hooloh whe dazsai.

31 'Et bulh tane, 'en cha yughu nasda. 'Et whuz un'a za ts'iyawh lhtak'ant'ine, 'enne ts'iyawh ndun ts'eke highu dálts'i'. 'Ink'ez ts'iyawh bubuzkeh lhuhóolel whe yahadla.

32 'Et 'udek'ez ndun ts'eke 'en cha dazsai.

33 'Et ndet la dune dunadidil de, ndun ts'eke mbe oo'at tileh? N dunne lhtak'ant'ine ts'iyawh ndun ts'eke 'enne bughinda'."

34 'Et Sizi 'ubulhni, "Dune 'ink'ez ts'ekoo te ndi yun k'ut ts'iyawh lhgho dilhts'i.

35 'Et ndet la 'oh de de whusawhútilts'ulh whe mbene la Yak'usda ba hoonzoo whe bughá whults'utne yaidlanne toh dunahudutádulh 'ink'ez yak'uz hutidulh. Whuz 'aw dune lhghu lhdílts'ih whe' hoont'oh.

36 'Aw doo cha yahódlah aít'oh. 'Enne Yak'usda buzkeh huzdlí' 'ink'ez lizasne ubulh hulhgha 'uhint'oh. 'Enne dujihne 'uhint'oh.

37 'Ink'ez Moses 'en ts'ih'un newhunin'ai yaidlanne dunahudutádulh whe' hoont'oh. 'Et 'oh da' njan dahooja la dilhtan-i toh whudizk'un 'et hoonts'i 'aw whudók'un aít'oh. 'En Moodihti ghu yalhduk whe nja dutni, 'Abraham ooYak'usda, Isaac cha ooYak'usda, 'ink'ez Jacob cha ooYak'usda 'unt'oh, 'ni.

38 Nohni 'uts'un un'a unahzun. 'Aw yaidlanne buYak'usda lhiloh, khunane buYak'usda 'unt'oh. Soo cho whunulh'en, 'en be ts'iyanne khuna."

39 'Ink'ez whulohne Moses be 'udustl'us 'uk'ununáguzne 'uhuyúlhni, "Dune hodulh'eh-un tube soo' dinja!"

40 'Et whehunilhjoot k'et 'aw 'on 'un huyoodulhkut ait'oh.

*Nts'en'a Christ 'en David oots'u hainzut-un 'unt'oh?*

41 'Ink'ez 'ubulhni, "Nts'en'a oolohne nduhutni, Christ dahni-un, 'en David oots'u hainzut-un 'unt'oh?"

42 David dich'oh 'et dutni njan Yak'usda ooghuni Shun be 'udustl'us k'ut, 'Moodihti 'en SMoodihti 'uyulhni,

Snailhni ts'unk'us sinda,

43 'oh de la nch'az ditnine buk'ut nke naóolhyis mba ubooselh.'

44 'Et huwa David, 'SMoodihti,' yulhni, nts'en'a suba Christ 'en oots'u hainzut-un oole'?"

*Sizi dune ubúlhni, "Moses ooghuni 'uk'ununáguzne buch'a kháhdli"*

45 'Et ts'iyanne dune huyoozilhts'ai whe Sizi yugha hodul'ehne 'et ndúbulhni,

46 "Moses be 'udustl'us 'uk'ununáguzne, 'enne la naih nyiz-i be húdilhts'i, 'ink'ez ndet la t'alh-i be 'óoket-un, 'et ts'iyanne hubodílhti' whe hadih buhútni, 'et huhóont'i'. 'Ink'ez lizwif bulugliz soo k'us hoonzoo-un hudutáts'ilh hukwa' huninzun. 'Ink'ez dune ghunuda-un, soo k'us hoonzoo-un hutidálh whuka' huninzun. 'Et ndunt'ohne soo cho buka tse hooqli!

47 'Enne 'uhint'oh tsandilhne buyoh bugha hahódunit'ah 'ink'ez bughu huhoolhchuk. 'Ink'ez 'onilha sa' cho tenahúdudli hoochoolh'i. Nduhne, 'enne 'on nus 'uwulcho whe buba nahutideh."

## 21

*Tsandilh tel'en-un, ndai huwa ínin'ai-i*

1 'Et doo cha ndo yútan'en whe hoonzoo' 'unt'ohne ndai sooneya howa híta'ah-i, 'enne sooneya be kát-i be húa'yaih, 'et 'ubunilh'en.

2 'Ink'ez 'ilhoghun tsandilh tel'en-un, 'en ndai la 'aw 'iyaz yut'i-i, nanki sooneya tsuditi'-i, 'i deyán'ai.

3 'Ink'ez 'ubulhni, "Alha nohdusni, ndun tsandilh tel'en-un, ndunne ts'iyawh buba nus lhai deín'ai whe 'unt'oh.

4 Soo cho whunulh'en, ndunne hoonzoo' 'unt'ohne ndai la lhai huyut'i-i, 'i Yak'usda ba hiloh za dehúyan'ai. 'Et ndun tsandilh tel'en-un 'aw 'i yuk'ehútinalh-i, 'i ts'iyawh deyán'ai."

*Njan lugliz whucho gak whutáleh-un, 'et Sizi huwu yalhduk*

5 'Et oolune 'awet lugliz whucho howu yahalhduk 'ink'ez hutni, "Lhe'whuldzoo'yaz tse lhe'uldzoo' 'i be 'uhoolya. 'Ink'ez Yak'usda gha t'aih 'i cha 'i be 'uhoolya." 'Et Sizi 'ubulhni,

6 "Ndaí la ndi ts'iyawh nulh'en-i, 'oh de whusaóotilts'ulh whe 'aw 'ilho tse lhk'ulhdutásdlal, ts'iyawh nadúntijulh whe' hoont'oh."

*Nkede 'uwhutánelh?*

7 'Ink'ez huyoodulhkut, "Whuneoodulh'eh-un, nts'o whúde 'uwhutánelh? 'Ink'ez 'awet nilhdukw sulí' de, dant'i-i be whe hóodutaltsilh, 'et la huwa t'ets'onoozeh?"

8 'Ink'ez 'ubulhni, "Soo cho howahli. Khun te dune nanohonoo'ah junih. Lhane soozí' gha whusahútidulh 'ink'ez 'uhudutinelh, 'Si 'en 'ust'oh,' 'ink'ez 'awet whusawhútikulh, hutni de, khun te ubuntoohya' junih.

9 Dune lhugan-un whulhúdahts'o de, 'ink'ez dune lhdulhyoh nehóninla de, njan 'et 'udechoo whusawhútikulh whe' hoont'oh. Khun te whénoohljut junih. 'Awhuz whulatoh-un, 'aw whenghoh iloh 'uhoont'oh."

10 'Et 'ubulhni, "Lhelhdowh didowhne lhch'az nehúdadulh. 'Ink'ez yinka ndulcho lerwe be 'ustlene, 'enne cha lhch'az nehúdadulh.

11 Lhelhdun ndulcho whe wheóonujut whe yun nuhútitnah. 'Ink'ez dai cha 'ink'ez lhane lhelhdun cha dada whutáleh. 'Et ndo yat dune whehunuljut-un hoti'elh, 'ink'ez hooncha-un whe hóodutalsilh-un cha hoti'elh.

12 'Et ndoho nduwhútanelh-un whutso, 'et nohotálhchulh 'ink'ez dzoh nuhóhotilhdeh. Lizwif bulugliz whumoodihne, 'enne butl'anóhotilelh 'ink'ez 'anohotilelh. 'Ink'ez lerwene 'ink'ez yun humoodihne si soози' gha 'enne bubut nenohotalelh.

13 'Et 'oh de si sghun khuni unzoo-i be yátilduk.

14 'Et huwa 'oh de, 'Daja doosni' suba' noohzin junih.

15 Khuni 'ink'ez be wháhnihi nohtl'adutis'alh. 'Et de la mbene la nohch'az ditnine 'aw nohts'oohoodódlai ait'oh. 'Awet buch'a' nilhde 'ink'ez 'aw 'on 'un hoonliyaz 'uhudooni' ait'oh.

16 'Ink'ez nohdusneke, 'ink'ez nohulhutsinke, 'ink'ez nohnatneke, 'ink'ez nohk'ekene, 'enne whutl'anóhotilelh 'ink'ez whulohne nohtoh nohotighan.

17 'Ink'ez si soози' gha ts'iyanne nohts'u dutitni.

18 'Et hoontsi' Yak'usda 'aw nohla dootnih ait'oh. Nohtsigha' 'aw 'ilho hoontsi' i ninta dókes ait'oh.

19 Yak'usda ba soo cho núdulhya. 'I gha la nohzul ohtun.

### *Jerusalem musai whutilhtselh-un*

20 "Ndet la Jerusalem lhuganne whunasguz de, 'et whunulh'en de, 'et huwa la t'eoonoohzeh 'awet nilhdukw sulii' nyo keyoh whuti teoodutálneh.

21 'Et dúhooja de, 'et Judea whut'enne shus k'uz tse hutooldhilh. 'Et mbene la 'et keyoh whuti 'et dilhts'ine, ts'iyawh whuch'az hoodilh. 'Ink'ez mbene la whunat whut'ine, 'enne cha khun te keyoh whuti-un ts'ó tooya' junih.

22 'Alha nohdusni 'awet dzoh nutiszut-un whusawhutilts'ulh whe' hoont'oh. 'Et huwun 'uk'ehooguz-un, 'et ts'iyawh lhaóodutaneh.

23 'Et 'oh de dzin mbene la ulchane cha, 'ink'ez mbene la duyaz e'úht'ukwne cha, 'enne buba tube 'on nus hootátsi'. Ndi yun hoontsi'-un ook'e whudutalts'ulh 'et huwa. 'Ink'ez tube Yak'usda ye húnilch'e-i, 'i cha ndunne dune buk'eidutalts'ulh.

24 'Et whulohne saluzti ook'a be ts'iyawh hútigán. 'Ink'ez 'onghohne hitálchulh 'ink'ez lhelhdun keyoh ts'e hubotilhna. 'Ink'ez 'udun yun k'ut whut'enne, buba ne'unguz-un, 'et whuts'un, Jerusalem 'et dulcho whe hukw'unótidulh.

### *Yinka dune ye' whusanátidalh-un*

25 "Sa cha 'ink'ez 'ulhzi ooza' cha, 'ink'ez sum cha, 'i ts'iyawh hoonli be hóodutalsilh. 'Et ndi yun k'ut ndulcho whe lhenoone dunene, 'enne ts'iyawh tube dzoh notideh 'aw dahútinelh-un ts'iyawh t'ehonúszun. 'Oh de de yatoo' 'i cha tatsi taditni whe taba ndulcho yántighus.

26 Ndi yun k'ut daóotanelh la, hukwa tse húhooli 'ink'ez whe hunuljut k'et, whulohne budzi 'etsul 'utinelh. Ndo yat'ah ts'e be hóolhtus-i ts'iyawh ndulcho nohótitnah 'et huwa.

27 'Oh de de, yinka dune ye' kw'us toh ye ulhtus-i be 'ink'ez oots'u hayánduz-i cha, 'et whuz un'a huyuntilh'elh whe whusatiyalh.

28 'Et ndiz un'a nja duwhewhúnit'en de, ndo yatoh'en 'ink'ez whunólhni. Nohlaoodutitnih-un 'awet nilhdukw sulii'."

### *Mai cho chun, fig huyúlhni-i, oogha whúts'odul'eh*

29 'Et be náwhutnuk 'i be whuts'odul'eh 'i be ubulh yalhduk whe nja ndúbulhni, "Nyoo fig huyulhni ooduchun 'ink'ez 'uyoo duchun cha nulh'en.

<sup>30</sup> Bindai 'awet hawhenilh'az 'i gha la t'eoonohzin danghun 'awet nilhdukwh' hoont'oh.

<sup>31</sup> 'Et nohni cha whuz un'a nohnalh 'et duwhút'en de, 'et huwa la t'eoonohzeh Yak'usda whe lerwe unli-un 'awet nilhdukwh' hoont'oh.

<sup>32</sup> 'Alha ts'ih'un un'a nohdusni, 'andit whudizulhne 'aw yalhihitásdla 'et ndi ndótanelh-un ts'iyawh 'et lhawhúdutanelh 'et whuts'un.

<sup>33</sup> Yat 'ink'ez ndi yun k'ut cha ts'iyawh gak whutáleh, 'et hoonts'i ndi sghuni 'aw hooloh lhtisdle.

### *Soo cho khahdli*

<sup>34</sup> "Et hoonts'i soo cho khahdli. Khun te stabe zoodulh'i, 'ink'ez tanahtnai, 'ink'ez ndi yun k'ut hooni 'et za huwu nuni nahzut, ndi ts'iyawh 'i be nohdzi be whudoobun junih. Doo ka si 'et dzin soo hukwa tse lhúwhulhlih whe whusahóolts'it.

<sup>35</sup> 'Oh de de, ndi yun k'ut ndulcho whe whudune'ne 'ants'i hulhgooh le'hutinelh whuz un'a khun whusaóotilhts'ulh.

<sup>36</sup> 'Et huwa 'ahoolhyiz hukwa tse hóhle' 'ink'ez nts'oh whude daóotanelh-un nohyit 'uwhutánelh-un huba soo 'úlhdzoo' 'ink'ez yinka dune ye' 'en oobut tihyin, 'et huba tenadoohdli."

<sup>37</sup> 'Awet dzin totsuk Sizi lugliz whucho dune hubodulh'eh. 'Ink'ez hulhgha totsuk ndo shusyaz, Olive huwhútni, 'et whuz wheyaih, titelh ha.

<sup>38</sup> 'Et ts'iyanne soo 'uda' cho lugliz whucho dahúdulh huyootuzalhts'ilh ha.

## 22

### *Sizi yoo yo whútsul hikunúta hituzilghel ha*

<sup>1</sup> 'Et 'awet ndi lhes lhuntulhdoh-i, 'i nahitit'ulh, 'awet whenghoh hoozulh. 'Et butus lhuseya-un dzin huwhútni.

<sup>2</sup> 'Ink'ez nyoonne 'udedo lubretne, 'ink'ez Moses be 'udust'us 'uk'ununáguzne, 'enne Sizi whe hituzilghel-un, 'et hukónuta. 'Et dunene bube hunuljut 'et huwa whunist'i be né'hut'en.

<sup>3</sup> 'Ink'ez Satan Judas ye yínya. 'En 'unt'oh Iscariot huyulhni. Whunizyanne 'on 'at nane, 'enne butoh 'ilhoghun 'en 'unt'oh.

<sup>4</sup> 'Et lubret bumoodihne 'ink'ez saldan bumoodihne cha 'enne buts'u whinya 'ink'ez bubulh hukw'unótilhye' nts'en'a la Sizi butl'aitilhtelh.

<sup>5</sup> 'Ink'ez 'awet huhóost'et whe ts'ih'un huyúlhni whunin'ai 'ink'ez sooneya higha tí'alh huyulhni.

<sup>6</sup> 'Awet Judas buts'u náhizya nts'en'a la dune ch'oh butl'aitilhtelh, 'et hukwunúta.

### *Sizi 'en yugha hodulh'ehne butus lhuséya-un bubulh na'tit'ulh lhahodutileh*

<sup>7</sup> Ndet la 'awet lhes lhuntildoh-i, 'i nahitit'ulh dzin whusahóolts'ut. 'Et butus lhuseya-un 'et whunahilni whe ndi 'usbai k'us unzoo-i hituzilghel.

<sup>8</sup> 'Ink'ez 'et Sizi, Peter 'ink'ez John bulh whe balh'a' 'ink'ez 'ubulhni, "Ah'us 'ink'ez neba lhaoodahleh nts'e la butus lhuseya-un 'et na'uztit'ulh-un."

<sup>9</sup> 'Ink'ez 'uhuyúlhni, "Nts'e hukwa' ninzun mba lhats'ódutileh-un?"

<sup>10</sup> 'Ink'ez 'ubulhni, "Soo zulhts'ai, ndet la keyoh whuti nenáh'az de, 'et dune nohdudutáyalh. 'En too be sulhdzo-i na'a. 'En nts'e la yoh danátidalh ts'e budánoh'as.

<sup>11</sup> 'Ink'ez 'et la ndun yoh whumoodih 'en la 'udóhni', 'Whuneodulh'eh-un nja dúnyulhni, ndet la 'uhoont'oh nyoh dune 'ilhodulh-un 'uha'alh wheni? 'Et la sgha hodul'ehne ndi butus lhuseya-un bubulh ná'tist'ulh.'

12 'Ink'ez 'et la doh yo hooncha-un lhaoodint'oh-un whunóhnoolhtun. 'Et lhaoodahleh."

13 'Inka whehán'az whe soo nts'en'a la ubudáni', whuz un'a nahahoon'ai. 'Ink'ez 'et butus lhuseya-un 'et wheni lhaháduja.

*Sizi 'udek'ez na'ut'alh-un*

14 'Et 'awet 'oh whuya whudizulh-un whusahóolts'ut, 'et ndunne whunizyanne 'on 'at nane whel'a'ne bubulh natl'adida'.

15 'Ink'ez ubulhni, "Dzoh nutiszut-un whutso sdzi ndulcho-i be njan butus lhuseya-un 'et nohbulh ná'tist'ulh tube hukwa' nuszun.

16 'Alha nohdusni, Yak'usda whe lerwe unli-un, ndi butus lhuseya-un lhaoodutaneh, 'et whuts'un, 'aw ndi 'on 'at oos'alh ait'oh."

17 'Et 'awet lubot yilhchoot 'ink'ez duBá musi yulhni 'ink'ez 'utni, "Ulhchoot 'ink'ez ts'iyawh alghoh ahtnai.

18 Nohdusni, Yak'usda whe lerwe unli-un, 'et whusaooilts'ulh 'et whuts'un, doo cha 'aw ndi mai too' oosnai' ait'oh."

19 'Et 'ink'ez lhes yilhchoot. 'Ink'ez duBá musi yulhni, 'ink'ez taídanyuz 'ink'ez butainíla, 'ink'ez 'ubulhni, "Ndi syust'e 'unt'oh. Nohni nohba huwalti. 'Et ndaht'en de, 'et whe la snaoolhnih."

20 'Uhan'al hukw'elh'az 'et whuz un'a za lubot yilhchoot 'ink'ez 'utni, "Ndi lubot 'i suzkai' be 'andidi khuni nohba lhadúsda-i, 'i 'unt'oh. Nohni nohba nadútilt'ih.

21 'Ink'ez soo cho whunulh'en, mbe la whu'izyaz dune ch'az ditni-un, 'en njan lutab ba sulh usda.

22 'Alha' hoont'oh yinka dune ye', nts'en'a ooba 'et néwhults'ut, 'et whuz un'a 'et 'uwhutánelh. 'Et hoonts'i ndun dune mbe la whu'izyaz dune tl'aitilhtelh-un ndun dune dáwhulsi'-un oots'u hóolts'ulh!"

23 'Ink'ez didutch'oh dutoh lhoohoodulkut, "K'us mbe suba yulhni, mbe 'utinelh whe 'utni?"

*Yugha hodul'ehne butoh, k'us mbe suba 'uk'enus 'unt'oh-un oole'?*

24 'Et cha 'alghoh didutch'oh dulhyoh 'uhudutni butoh k'us mbe suba 'uk'enus 'unt'oh-un oole'?

25 'Ink'ez Sizi 'ubulhni, "Lerwe dune k'une' bul'en-un 'unt'oh. 'Ink'ez mbene la buba ndo 'unt'ohne, 'enne nets'un unzoone 'uhint'oh hubuhútni.

26 'Et hoonts'i nohni nohtoh 'edóht'e' junih! 'Et k'us nohtoh mbe 'uk'enus 'unt'oh-un oole' la, 'en 'udek'oh-un k'un'a oole'. Mbe la nohtso whudilhduhulh-un, nohba ne'út'en-un k'un'a oole'.

27 Daja nahzun? K'us mbe 'uk'enus 'unt'oh-un 'unt'oh? Mbe la lutab k'usda uti'ulh ha, k'us yuba ne'út'en-un? 'Alha 'uhooont'oh mbe la lutab k'usda 'ink'ez 'uti'ulh-un 'en 'unt'oh. 'Et hoonts'i nohni nohtoh nohba ne'út'en-un 'ust'oh.

28 Nohni aht'oh ndet la dzoh nusuzut-un, 'et ndulyiz whe sulh 'iht'e'.

29 'Inka nts'en'a la sBá stl'ahón'ai whe lerwe usdli-un, whuz un'a za nohni cha lerwe tihleh-un nohgha óotas'alh.

30 'Et la nts'e la whe lerwe usdli-un, 'et slutab k'ut sulh utih'ulh 'ink'ez sulh utihtnelh. Ndet la kw'uts'uzda cho dizti'-i, 'et hukw'u dutálhts'ilh 'ink'ez whunizyat-un 'on 'at nat-un Israel oots'u hainzutne bulh didowhne, 'enne buba nahutihyeh."

*Sizi Peter ulhni, "T'esunuzínzun dutanelh"*

31 'Ink'ez neMoodihti 'utni, "Simon, Simon, soo zilhts'ai! Satan tube nohka' ninzun. Tl'o mai' k'un'a ukunohtálhkuh hukwa' ninzun.



32 'Et hoonts'i mba tenadisldi, ndet la whe mba 'alha 'ust'oh-un, 'et 'aw nla k'éhahoolts'it ait'oh. 'Ink'ez ndet la sts'u naóozinja de, nyulhutsinke 'enne hilhtusne nabolhtselh."

33 'Et hoonts'i 'uyulhni, "SMoodihti lhadúst'oh nyulh tisyalh, 'adutis'alh k'us mba datísah."

34 'Ink'ez 'uyulhni, "Nyudusni Peter, 'andit dzin lugok dune 'udutinelh whutso, tat, "Aw ndun t'enuzusun, 'dutanelh."

#### *Ts'iyawh lhawhúdoneh huba' hoont'oh*

35 'Ink'ez 'ubulhni, "'Oh da' whenóhis'a' whe, sooneya zus, lhook'ez cha, 'ink'ez neketl'a whulh tl'oo-i ts'iyawh ooyit. 'Aw eh hoonliyaz lhundunuzáhdzit?" 'Ink'ez, "Gak!" huyulhni.

36 'Ink'ez 'ubulhni, "'Et 'andit mbe la sooneya zus ut'i-un, whute yólhchoot. 'Ink'ez whuz un'a za bé ne'uge-i cha ólhchoot. 'Ink'ez mbe la saluzti lhit'i'-un, 'en duluglok ye 'óket 'ink'ez saluzti 'ilho oket.

37 'Et huwa 'unohdusni, ndet la Yak'usda ooghuni k'ut si sghun 'uk'unúsguz-i, 'i ts'iyawh lhawhúdoneh huba' hoont'oh. Ndiz un'a nja duwhutni, 'Ndunne 'uk'únulhe'ust'enne, 'en bubun dult'oh hudooni,' ni. 'Et huwa si sghun 'uk'uneusguz-un 'et lhawhúdoneh huba' hoont'oh."

38 'Ink'ez 'uhuyulhni, "NeMoodihti njan whunilh'en nanki saluzti 'et 'us'ai." 'Ink'ez 'ubulhni, "'I 'awet soo 'úlsuk."

#### *Sizi Gethsemane 'et tenadudli*

39 'Et 'awet tenánja whe whutsoda' hukw'un'a nyoo shusyaz Olive huyulhni, 'i k'uz whenaja. 'Ink'ez yugha hodul'ehne, 'enne cha hiyuwhenándil.

40 Whuz hoozdil whe 'et 'ubulhni, "Tank'us úntiht'i'-un whuch'a ténadahdli." 41 Nts'e la tse nazdulh'us-un, 'et 'uwuldzoh ts'e bughu nenínja. 'Ink'ez dugwutsi be nenínja 'ink'ez tenadudli.

42 'Et njan dutni, "'UBá hukwa' ninzun de, ndi be dzoh nutiszut-i sghu nahoolhchoot. 'Et hoonts'i 'aw si hukwa' nuszun k'un'a iloh. Nyun hukwa' ninzun k'un'a 'uhóneh!"

43 'Et Khunsul ndus de yak'uz lizas be hoodiltsai. 'En ulhtus náyulhtsi.

44 Tube oodzi unduda whe 'on nus ulhtus whe tenadudli. 'Ants'i uskai' k'un'a oots'u halhdzil whe yun nadúlt'i.

45 Tenadudli-un 'etsul 'udija 'ink'ez dunadija whe yugha hodul'ehne ts'odi k'et nahunistez whe bughu nanja,

46 'ink'ez 'ubulhni, "Di ha sahtez? Doo ka si tank'us nóht'i dunadahdilh 'ink'ez whuch'a tenadahdli."

#### *Sizi 'awet huyílhchoot*

47 'Awhuz ubulh yalhdruk whe khunsul lhane dune whuz de údulh. Nyoon mbe la Judas huyulhni, 'en butso uyalh. 'En whunizyanne 'on 'at nane, 'enne bubulh 'ilhoghun 'unt'oh. 'Et Sizi yenghoh nenínja naidutits'oos ha.

48 'Ink'ez Sizi 'uyulhni, "Judas, yinka dune ye' nadutánt's'oos 'i be eh whunist'i whe whutl'atálhtelh?"

49 Sizi oonat núdilhyanne, dawhútanelh la 'et honilh'en, 'et 'uhuyulhni, "NeMoodihti saluzti be eh lhts'utigan?"

50 'Et 'ilhoghun yuzih usyin-un, 'en Lizwif lubret 'uk'enus dizti'-un be 'ulhna-un nailhni ts'unk'us yudzo yuts'a ha be' yalht'o.

51 'Ink'ez Sizi 'ubúlhni, "Ndiz un'a njan dutísnelh, 'et stl'awháh'aih." 'Ink'ez nyoon 'en oodzo yut'aiznai 'ink'ez soo na'yinla.

52 'Ink'ez nyoonne lubret bumoodihne, lugliz whucho whusaldanne bumoodih, 'ink'ez butso whudilhdzulhne cha, 'enne la highu nindil, 'ink'ez Sizi

'udubúlhni, "Et di ha saluzti cha 'ink'ez tut'oh cha nuhle 'ink'ez 'undunust'ih hukw'un'a skatfhdil?

<sup>53</sup> 'Et dzin totsuk lugliz whucho nohtoh susda whe, 'aw 'oh da' 'aw sólhchoot hukwa lhe'zaht'en inle'. 'Et hoonts'i 'andit netsudule, tsalhgus yo usda-un, 'en nohmoohdi tileh, 'et 'awet nohba né'hunint'o."

*Peter 'utni, "Ndun dune 'aw t'enuzuszun"*

<sup>54</sup> 'Et 'awet Sizi huyilhchoot 'ink'ez lubret 'uk'enus dizti-un highu dáhinilhti. 'Ink'ez Peter yooniz de yuniyalh.

<sup>55</sup> 'Et naniztl'oo bez ts'e whuniz ts'e kwun húdulhk'an 'ink'ez 'alhgoh nátl'ahudilts'i'. Peter 'en cha butoh usda.

<sup>56</sup> 'Et kwun zih usda whe 'ilhoghun ustlen-un ts'ekeyaz 'en soo yunin ts'e yunilh'en 'ink'ez 'uyulhni, "Ndun dune 'en cha yulh 'ut'en inle'."

<sup>57</sup> 'Et hoonts'i yuts'oodildlai 'ink'ez 'uyulhni, "Ts'eke, ndun dune 'aw t'enuzuszun."

<sup>58</sup> 'Et hukw'elh'az 'atsulyaz inle' whe 'et cha 'ilhoghun dune 'uyulhni, "Nyun cha bubulh 'ilhoghun 'int'oh." 'Et hoonts'i Peter 'utni, "Awundooh!"

<sup>59</sup> 'Et doo cha 'ilho sadzi hukw'uhoonist'o 'et doo cha 'ilhoghun 'uyulhni, "Alha' hoont'oh ndun 'en cha yulh 'ut'en. 'En cha Galilee whut'enne 'ilhoghun 'unt'oh 'et huwa."

<sup>60</sup> 'Et Peter ndun dune 'en 'uyulhni, "Aw daja dini-un 'aw t'ewhunuzúszun!" 'Et 'awhuz yalhduk whe lugok dune 'udija.

<sup>61</sup> 'Et neMoodihti Peter ts'u nálh'a 'ink'ez soo yunin ts'e yunalh'en. 'Et Peter 'aho neMoodihti yughuni yunalni daja yudani' inle' whe nja dúyulhni, "Lugok dune 'udutinelh whutso tat t'esunuzínzun dutanelh."

<sup>62</sup> 'Et Peter 'az whinya 'ink'ez tube cho intse.

*Lhugánne Sizi highu níwhulhya*

<sup>63</sup> Ndundne dune Sizi huyilhchootne, 'enne highudloh 'ink'ez huyoolhchis.

<sup>64</sup> Ink'ez hina k'úna'uzguz 'ink'ez huyoonukat 'ink'ez huyoodulhkut, "Nebanus hoon'en, 'ink'ez nedini mbe 'unyinla nyunizkuk?"

<sup>65</sup> 'Ink'ez lhat-un hoontsi' whe hich'az yalhduk.

*Sizi nahiyilhne bubut nehinilhti*

<sup>66</sup> 'Awet yulhkai ibulh dune tso whudilhdzulhne, ndunne 'udedo lubretne nahúlt'oh, 'ink'ez Moses be 'udustl'us 'uk'ununáguzne cha, 'enne 'ilhuhozdil 'ink'ez buba nahiyilhne but nehinilhti. 'Ink'ez 'uhuyúlhni,

<sup>67</sup> "Nyun Christ inli de, nedíni!" 'Et hoonts'i 'ubulhni, "Nohdasni' de, 'aw nohba 'alha' doosni' ait'oh.

<sup>68</sup> Si cha hoonliyaz nohooduskut de, 'aw sudóhni' ait'oh 'ink'ez 'aw sla nadoohtnih ait'oh.

<sup>69</sup> 'Et 'ink'ez 'andit whuts'un yinka dune ye' 'et la nailhni ts'e Yak'usda whelhtus-un ooda'."

<sup>70</sup> 'Ink'ez ts'iyawh 'uhutni, "Nyun Yak'usda ooYe' eh 'int'oh?" 'Ink'ez 'ubulhni, "Ts'ih'un 'udahni si, 'en 'ust'oh."

<sup>71</sup> 'Ink'ez 'uhutni, "Aw 'on ghun hoonliyaz highun nedóni' hukwa lhe'ts'unízun. 'Awet whenich'oh ooze ts'odánts'o."

## 23

*Sizi, 'en Pilate but néhinilhti*

<sup>1</sup> 'Et ndunne dune 'ilhozdilne ts'iyawh dunáhudidil 'ink'ez Pilate but néhinilhti.

<sup>2</sup> 'Ink'ez 'awet hik'e whehonin'ai 'ink'ez 'uhutni, "Ndun dune 'en lizwifne tank'us úbunilh't'i 'et bulh náts'uhoon'ai. 'Ink'ez lerwe Caesar ts'un ndi yun hik'elha huyilh'i-i, 'i tax huyulhni, 'et cha whuch'a bunízyoot. 'Ink'ez didut mbe la lerwe Christ ts'utni-un, 'en usdli na'dudútni."

<sup>3</sup> 'Et Pilate yoodulhkut, "Nyun eh 'int'oh Lizwif bulerwe inli?" 'Et Sizi 'utni, "A, 'alha' dini."

<sup>4</sup> 'Ink'ez 'et Pilate Lizwif bumoodihne, 'ink'ez 'ilhozdilne ts'iyawh 'ubulhni, "Ndun dune 'aw hoonliyaz ninta' 'ant'en-un ooghu nalhuwhus'al."

<sup>5</sup> 'Ink'ez 'et 'on nus huhuní'ch'e 'ink'ez 'uhutni, "Yun k'ut Judea ndulcho whe 'ink'ez Galilee yun k'ut cha 'ink'ez njan cha, dune nohni nohch'az nehudodilh whuz un'a whubodulh'eh."

*Lerwe Herod, 'en cha Sizi yóolhdzih*

<sup>6</sup> 'Et Pilate njan whudants'o whe, 'et uboodulhkut, "Alha eh ndun dune Galilee whut'en-un 'unt'oh?"

<sup>7</sup> 'Et Pilate Sizi lerwe Herod ookeyoh whuch'e' unli t'oonanzin, 'et 'aho yuts'u wheyá'lh'a'. Ndun lerwe 'en cha 'oh da' soo 'et Jerusalem 'ut'en inle'.

<sup>8</sup> 'Et la Herod tube hoont'i' whe Sizi yutilh'en. 'Et tube sa' whuts'un yuti'elh hukwa' ninzun 'et huwa. 'Et lhat-un whe yulh údits'o inle'. 'Et huwa khun tilah huwa 'ít'en dunalh 'óhooleh.

<sup>9</sup> 'Ink'ez khuni lhai be yoodulhkut. 'Et hoonts'i Sizi 'aw yuts'u t'édusnih.

<sup>10</sup> 'Et 'oh da' za nja dúwhut'en whe nyoonne 'udedo lubretne 'ink'ez Moses be 'udustl'us 'uk'ununáguzne, ts'iyawh dunahúdidil 'ink'ez soo tube cho huske be hik'éhoon'ai.

<sup>11</sup> 'Ink'ez 'et Herod 'ink'ez yuba lhuganne, 'enne bubulh ts'iyawh hoonliyaz buba lhíloh hinínzun 'ink'ez highudloh. 'Et lerwe nayits'uz-i be húyalhti 'ink'ez Pilate ts'un whe náhuyalh'a'.

<sup>12</sup> 'Et soo 'et dzin Pilate 'ink'ez Herod bulh k'eke lhuhulh'tsi. 'Et whutso da' lhch'az huditni inle'.

*Pilate Sizi butl'ayá'hti datitsah ha, 'ink'ez Barabbas buba yulanaditni*

<sup>13</sup> 'Et 'awet Pilate nyoonne 'udedo lubretne, dune k'une' 'ul'enne cha, 'ink'ez ts'iyanne dune, 'enne ts'iyawh 'alghoh ilhubozdla,

<sup>14</sup> 'ink'ez 'ubulhni, "Ndun dune, 'en dune tank'us ubunilh't'i-un k'un'a, 'en sghu nulhti. 'En nohbut soo ts'ih'un un'a ooghu núnistai. 'Et hoonts'i ndet ook'éwhah'ai-un 'aw hoonliyaz ooghu nalhuwhus'al.

<sup>15</sup> 'Ink'ez Sizi Herod ts'un nohbulh whés'a'. 'En cha whe tank'us 'unt'oh-un yughu nalhuhó'o'al. 'Alha' hoont'oh ndun dune 'aw hoonli hukwa daóotsah-un hooloh.

<sup>16</sup> 'Inka huyootalhtsus 'ink'ez oolanadutisnih."

<sup>17</sup> 'Et la njan butus lhuseya na'hut'alh-un 'et 'oh totsuk 'ilhoghun 'adin'ai-un lanahudutni. 'Et whuz un'a buk'oh ts'e 'uhoont'oh.

<sup>18</sup> 'Et 'alghoh hits'u háyih 'ink'ez 'uhutni, "Ndun Barabbas neba oolanadint-nih, 'ink'ez ndun dune sulhghi!"

<sup>19</sup> Ndun Barabbas 'en gha lhtahuwhunt'ai whe 'ilhoghun dune silhghi 'et hukwa 'ahuyan'ai inle'.

<sup>20</sup> 'Et hoonts'i Pilate 'en Sizi lanadutitnih hukwa' ninzun, 'inka 'ilhozdilne doo cha za bubulh yáilhduk.

<sup>21</sup> 'Et hoonts'i 'on nus hits'u huyih, "Tulalghus k'eí'lh'tih! Tulalghus k'eí'lh'tih!" hutni.

<sup>22</sup> 'Ink'ez 'et 'awet whulh tat ubulhni, "Et di ha? Ndet dáhoont'oh whe hoonts'i-un whe ninta' 'unt'en? 'Aw hukw'elha daóotsah-un ooghu nalhuwhús'al! 'Et huwa 'ants'i huyootalhtsus 'ink'ez oolanadutisnih."

23 'Et hoonts'i 'aw huyoozóolts'ai' ait'oh. 'Ink'ez 'et 'on nus hits'u huyih, "Tulalhgus k'eílhthi!" Daja hutni-un 'ink'ez ndunne 'udedo lubretne, 'enne cha, daja hutni 'et whe Pilate hich'a' nilhde.

24 'Inka Pilate nts'en'a hukwa' huninzun hukw'un'a yuba nahizya.

25 'Ink'ez ndun Barabbas 'en gha lhtahuwhunt'ai whe 'ilhoghun dune silghhi, 'et hukwa 'ahuyan'ai, 'en Pilate buts'un yulanaditni. 'Et hoonts'i Sizi 'en nts'en'a hukwa' huninzun k'un'a 'uhitileh ha butl'ayálhti.

### *Sizi tulalhgus k'ehíylhti*

26 'Awet Sizi hitilhti whe 'ilhoghun dune Simon huyulhni, 'en Cyren whut'en-un 'unt'oh, 'en whenghoh keyoh ts'e hainya, 'en Sizi ootulalhgus yuba idutootan ha hiwus k'ehídintan.

27 Lhane dune hiyuntizdil, ts'ekoo cha. 'En gha ts'odi hinli 'ink'ez hutso.

28 'Ink'ez Sizi buts'u nalh'a 'ink'ez 'ubulhni, "Nohni Jerusalem whuts'ekoo', si sghahtso iloh. 'Et k'us nohnich'oh khunahtso, 'ink'ez nohuzkehke cha ghahtso.

29 Soo cho whunulh'en, dzin whuz de hóokulh whe' hoont'oh, 'et la 'uhudooni', 'Mbene la buzkeh hoolohne, mbene la 'aw lhe'ílhthsilne, 'ink'ez mbene la chahths'ul 'ulhe'ílh't'ukwne, 'enne 'oh de de 'on nus buba soo' whutat'elh.'

30 'Oh de de 'et la dune 'uhudooni'

'Ndi dzulh 'i uncha nek'énit'ai 'ink'ez ndi shusyaz 'i cha dulcho be nek'enáhokat.'

31 'Alha' hoont'oh, duchun 'awhuz duli whe 'et hoonts'i 'awhuz njan 'et duhút'en. Duchun disuz de, dawhútanelh nahzun?\*"

32 'Et nane untsi'ne, 'enne cha, huyulh bubotuzilghelh.

33 'Ink'ez ndet la shusyaz Calvary huwhút'ni, 'i 'utsint'sun niz'ai huwhutni-un, whuz huyoolhti whe, 'ink'ez tulalhgus k'ehuyilhti. Nyoonne dune ntsi'ne, 'enne 'ilhoghun nailhni ts'e 'ink'ez 'ilhoghun 'intl'us ts'e, 'enne cha tulalhgus k'ébihilhti.

34 'Et 'awet Sizi 'utni, "UBá buba whunaoodilnoh. 'Aw dahút'en-un t'ehonuszun, 'et huwa 'uhut'en." 'Ink'ez 'et 'awet lhk'ehuyilya 'ink'ez hinaih higha 'ainli.

35 'Et dunene 'et nódilhya 'ink'ez honilh'en. Nyoonne bumoodihne, 'enne cha buzih nodilhya 'ink'ez highudloh whe nduhutni, "Uyoonne, 'enne ubulhyis inle'. 'Et huwa ndun 'en Christ mbe la Yak'usda 'utahayálhti-un 'unt'oh de, dich'oh 'ududoolyih da!"

36 Lhuganne, 'enne cha highudloh. Hizih neníndil 'ink'ez ts'ekoo too' dunink'oz-i, 'i hits'u dúhidinkai.

37 'Ink'ez 'uhúyulhni, "Lizwifne bulerwe inli de, nyunch'oh 'ududílyih!"

38 Dzihtelyaz hik'une'úzguz. 'udechoo Greek bughuni k'un'a, Latin bughuni k'un'a cha, 'ink'ez Hebrew bughuni k'un'a cha whe 'et 'awet tulalhgus k'ut sulhti, hiyandus ts'e tulalhgus 'uhidunilht'o. Ndiz un'a nja dutni, Ndun 'en Lizwifne bulerwe 'unt'oh.

39 Nyoonne nane untsi'ne, hizih tulalhgus k'ut hulhti, 'ilhoghun hich'á 'uts'un 'utni whe 'et dúyulhni, "Nyun Christ inli de, 'et nyunch'oh 'ududílyih 'ink'ez wheni cha neílyih!"

\* **23:31** Ndi duchun duli-i, 'i Sizi Gri ndi yun k'ut useya-un 'uwulhni. 'Ink'ez ndi duchun disuz-i, 'i lhdijizne 'ubulhni. 'Ink'ez Sizi Gri yak'uz whenája te, tube hoontsi-un buts'u hóolts'ulh, ni whe 'utni.

40 'Et 'ilhoghun untsi'-un hukwa' yudáni' whe 'uyúlhni, "Aw eh Yak'usda hoontsi' bé lhnijut whe eh 'udini? Aw t'oonuzínzun nts'en'a la ooba nahisda, 'et whuz un'a za wheni cha neba nahisda.

41 'Ink'ez wheni ts'ih'un un'a neba nahisda. Daít'en la, 'et huwa 'andit tulalhgus k'ut neba k'elha sítli. 'Et huwa neba 'uk'elha whuzdli'. 'Et hoontsi' ndun dune 'aw hoonliyaz whe ninta lhe'ít'el. 'Et hoontsi' wheni nek'un'a za ooba nahisda."

42 'Et ndun dune untsi'-un 'et Sizi 'ulhni, "SMoodihti nts'e la whulerwe inli, whuz naozinja de, snaoolnih!"

43 'Et Sizi 'uyúlhni, "Ts'ih'un un'a nyudusni, nts'e la 'uk'enus hoonzoo-un, 'et soo 'andit dzin sulh 'útant'elh."

### *Sizi tulalhgus k'ut ye khuna-i yuladitni*

44 Dzetniz hukw'elh'az 3:00 at'en 'et whuts'un ndi yun k'ut ndúwhulcho whe tsahólhgus inle'.

45 Sa cha 'aw lhist'en sulí'. 'Ink'ez lugliz whucho Daitai-i hukwa dímbal-i, 'i cha l hulcho lhk'ench'ul.

46 'Ink'ez 'et Sizi tube cho 'utni, "UBá, syughi 'i nts'o la disni." 'Ink'ez 'et dúdija 'et 'awet 'udek'ez hanájiz.

47 'Et dahooja la ndun lhuganne bumoodih whunalh'en whe Yak'usda yudilhí' whe 'utni, "Ndun 'alha soo ts'ih'un dune azi 'unt'oh."

48 'Et 'ilhozdilne ts'iyawh 'et nehunindil huwhuntilh'elh ha, ndet la ndulcho-un dáhooja la huwhunalh'en, ts'odi k'et 'et dudzi k'ut hoochoolchis 'ink'ez whusanáhidil.

49 Mbene la t'einzunne, 'ink'ez mbene la ts'ekoo Galilee whuts'un hiywhusanándilne, 'enne cha nilhdza'yaz highu núdilhya whe ndi ndulcho dawhut'en-un honilh'en.

### *Joseph Sizi 'ayalhti*

50 'Et 'awet 'ilhoghun dune Joseph huyulhni-un, 'en cha Lizwifne ook'úne' whut'enne, 'en 'ilhoghun 'unt'oh. 'En dune unzoo 'ink'ez ts'ih'un dune unli.

51 Nyoonne ook'úne' whut'enne, dahuja-un, 'aw ooba ts'ih'un lhe'hoot'oh. Joseph 'en Arimathea whut'en-un 'unt'oh. 'Et njan keyoh whucho Lizwifne bukeyoh, 'et 'ilhoghun 'uhoont'oh. Joseph 'en cha ndet la Yak'usda whe lerwe unli-un, 'et cha huba sulh'i.

52 'Et Joseph Pilate ts'u whinya 'ink'ez Sizi oozí yuts'u yúka 'utni dutl'anáyoolhtelh ha.

53 'Et 'awet oozí nanáyalhti whe ndi naih dizti'-i, layin huyulhni-i, 'i be yugha 'ozduz. 'Et tse be hahuhontsel-un, 'et whuts'o da', 'aw 'uyoonne 'et 'alhdílhtoh, 'et 'ayalhti.

54 'Et 'awet 'et dzin wheni lhahúdutneh-un 'uhoont'oh. 'Et 'awet lizwifne nats'ulyis-un dzin yutilhkai.

55 'Ink'ez nyoonne ts'ekoo Galilee whuts'un yuwhusanándilne, 'enne Joseph hiyuntizdil whe 'et oozí 'et 'ayulhtih whe hinilh'en.

56 'Et whenáhidil. Yoo sooltsun-i, khe sooltsun-i cha ts'iyawh lhahídina. 'Et nats'ulyis dzin, 'et Yak'usda ooghuni be buba' hóonla, 'et dzin nahilyiz.

## 24

### *Sizi dunadija*

1 'Et 'awet ndi lisman 'udechoo dzin 'uhoont'oh. Bundada 'uda', nyoonne ts'ekoo 'ink'ez 'uyoonne cha bulh 'et ts'un k'uz ts'e hutizdil. Ndi yoo sooltsun-i lhahídina-i, 'i cha hitizdla.

<sup>2</sup> Tse 'uda' 'udun diz'ai whe hotilh'en.

<sup>3</sup> 'Et dahúnindil 'ink'ez gak Sizi oozi hooloh.

<sup>4</sup> 'Et ts'iyawh buba whe' hooja hooyoh 'et dáhooja whusuba 'uhoont'oh. 'Et khunsul nane dune buzih usyin. Bunaih soo ts'ih'un busaoolkahl.

<sup>5</sup> 'Ink'ez ndunne ts'ekoo tube whehunuljut whe yun nacháhunilya. 'Ink'ez ndunne dune 'uhutni, "'Et di ha yaidlanne toh khuna-un, 'en ookunáhtah?

<sup>6</sup> 'Aw njan hooloh, dunadija whe 'unt'oh! 'Awhuz Galilee 'ut'en whe, daja nohulhni-un, 'aw whunalhuzulhni?

<sup>7</sup> Nja dunóhulhni, 'Ndz un'a nja dótanelh, yinka dune ye', 'en lubeshi 'ulh'enne tl'ahitilhtelh 'ink'ez tulalhgus k'ehúyitalhtelh ha. 'Ink'ez whulh tat dzin dunadutádalh.' "

<sup>8</sup> 'Ink'ez 'aho highuni hinalni.

<sup>9</sup> 'Et ts'un'k'uz hanáhidil, 'et ndi ts'iyawh whunizyanne 'on 'at 'ilhoghun, 'ink'ez 'onghohne cha, ts'iyanne hudáni'.

<sup>10</sup> Mbene la ubodáni'ne, 'enne Mary Magdala whut'en-un, Joanna cha, Mary James ooloo cha, 'ink'ez 'uyoonne ts'ekoo bulh 'ut'enne, 'enne 'uhuja ndunne whel'a'ne 'ubodáni'.

<sup>11</sup> 'Et hoonts'i nyoonne whel'a'ne, 'ants'i 'oh ne'huduni' whula 'uhutni ubonúnzun 'ink'ez 'aw buba 'alha lhe'hudusnih.

<sup>12</sup> 'Et hoonts'i Peter dudillhoh 'ink'ez ts'un k'uz ts'e oolhgai. Yo le 'uja 'ink'ez tsa k'et whunilh'en. 'Et naih dizi'-i za 'et sulhchooz whe yutilh'en. 'Et duyoh ts'e whenaja. 'Et howu nuní nuzut 'ink'ez ooba hooncha dahooja whusuba 'uhoont'oh.

### *Sizi nane yugha hodul'ehne bunalhts'et hainya*

<sup>13</sup> 'Et 'awet 'et dzin za keyoh whuyaz, Emmaus ts'outni, nane dune whuz hutiz'az. Jerusalem whuts'un 7 miles at'en 'uhoont'oh.

<sup>14</sup> 'Et whuz hi'us whe 'et ndóohool cho dahóot'en la 'oh howu yahulhduk.

<sup>15</sup> 'Awhuz 'et howu yahulhduk dahóot'en la ne'whust'en-un, 'et Sizi bughu ninya 'ink'ez bubulh tiz'az.

<sup>16</sup> Duna be hinilh'en 'et hoonts'i 'aw butl'alhúhoo'al 'et huwa 'aw t'elhihinízil.

<sup>17</sup> 'Ink'ez 'ubulhni, "'Et 'oh whuya ah'us whe, ndet whe' whudahni? Stabe hupun nohdzi unduda whe howu yalhduk?"

<sup>18</sup> 'Et ndun 'ilhoghun, Cleopas huyulhni, 'en 'uyulhni, "'Aw nyun za iloh eh nts'oh te 'andit ne'whust'en-un, 'aw eh t'ewhunuzínzun. 'Aw Jerusalem whut'en-un lhinloh whe la' dini?"

<sup>19</sup> 'Et 'ubúlhni, "Ndet whe' whudahni?" 'Ink'ez 'uhuyulhni, "Sizi Nazareth whut'en-un, 'en ooghun dahooja la. Ndun dune nus hoo'en-un 'unt'oh. Yak'usda 'ink'ez dunene cha bunalh ts'iyawh hoolhtus whe ne'úst'en 'ink'ez hoolhtus whe cha yáilhduk.

<sup>20</sup> 'Ink'ez 'et cha dahooja la 'udedo lubretne, 'ink'ez wheni nemoodihne cha, 'enne Rome whut'enne hiba nahuhooyeh ha butl'ahúyalhti, 'ink'ez tulalhgus k'ehíyilhti.

<sup>21</sup> 'Et hoonts'i 'en úncha Israel oots'u hainzutne nabootakulh uzninzun da'. Nts'oh te ne'whust'en 'et whuts'un 'andit 'et 'awet whúh tat dzin 'uhoont'oh.

<sup>22</sup> A, 'alha 'uhoont'oh, 'ink'ez whulohne ts'ekoo dulyiz whe nebulh 'ít'enne, daja hutni-un, tube neba hooncha. Soo 'uda' bundada ts'un k'uz hoozdil.

<sup>23</sup> 'Aw hizi nálhilhtel. 'Ink'ez lizasne han'en whe 'enne 'uhutni, 'Khuna whe 'unt'oh!'

24 'Ink'ez 'et oolune nebulh 'ut'enne, 'enne cha ts'un k'uz nahúz'az. Soo nts'en'a la ts'ekoo daja hutni la, whuz un'a nahahoon'ai. 'Et hoonts'i Sizi 'aw luhuyú'el."

25 'Ink'ez 'et Sizi 'ubulhni, "Tube nohni whusnine ahli! Ndet la ts'iyawh nus hoo'enne daja hutni-un, tube sa' whe nohdzi be nohba 'alha' whuneh!

26 'Alha eh 'uhoont'oh Christ, 'en dzoh nutizut huba 'uhoont'oh 'ink'ez 'et hukw'elh'az whe dizti' ts'u natidalh?"

27 'Ink'ez soo 'udechoo Moses be 'udustl'us 'uk'ununáguz-un 'ink'ez nus hoo'enne bube' 'udustl'us cha, ndai 'uk'unuhúyuzgus 'en ghun, 'i ts'iyawh Yak'usda ooghuni yúbunilhtan whe 'utni.

*'Et 'ants'iya hitán'en le'huja 'ink'ez nahuyóolhts'it*

28 'Et njan keyoh whuyaz hutizdil ts'e, 'awet whenghoh hidulh. 'Ink'ez Sizi 'onilha njan keyoh whenghoh táyalh le'ut'en.

29 'Ants'i tube cho duzih ooda' hukwa' huyulh'en, 'ink'ez 'uhuyúlhni, "Awet sa naín'ai, hulhgha 'uhoont'oh." 'Ink'ez yoh bubúlh danánt'az buzih tidalh ha.

30 'Et hukw'elh'azyaz natl'ahudilts'i 'ink'ez 'uhuti'ulh. Sizi lhes yilhchoot 'ink'ez Yak'usda musi yulhni. 'Ink'ez lhtaídanyuz 'ink'ez butl'ayánla.

31 'Et 'ants'i hitán'en le'huja 'ink'ez nahuyóolhts'it. 'Ink'ez 'et khunsul hooloh nasdli'.

32 'Et 'ulhodutni, "Niz de ti nebulh yalhduk 'ink'ez Yak'usda ooghuni daja ni whunenulhtun whe 'aw lawk nedzi dízk'un le lhé'ts'it'oh inle?"

33 'Aho 'et 'oh whuya 'uhunit'oh whe dodindil 'ink'ez Jerusalem ts'u náhoosdil. 'Et nyoonne whunizyane 'on 'at 'ilhoghun 'ink'ez mbene la bubulh 'ut'enne, 'enne ts'iyawh ndet 'ilhoh 'úhint'oh whe bughu nahundil,

34 'ink'ez njan 'et dilhts'ine, 'enne 'uhutni, "Alha neMoodihti dunadija whe 'unt'oh! 'Ink'ez Simon yunalh be hódiltsai!"

35 'Ink'ez nyoonne nane njan ti dahooja la 'et huwun bubulh náhoohoolnuk nts'en'a la Sizi ndi lhes taídanyuz whe 'oh da' mbe unli nahuyóolhts'it.

*Sizi dich'oh buniz be hódiltsai*

36 'Awhuz njan howu yahalhduk whe, Sizi dich'oh buniz be hódiltsai, 'ink'ez ubulhni, "Nohbulh soo' hot'e."

37 'Et hoonts'i bughu 'únjaz 'ink'ez tube hunílhjoot. Dune dazsai-un tsin han'en huninzun.

38 'Ink'ez 'ubulhni, "Et dahoont'oh huwa whénulhjut? 'Ink'ez dahoont'oh huwa nohdzi yo whe nohba nawh 'uhoont'oh?"

39 Sla cha 'ink'ez ske cha nulh'en. Si 'ust'oh. St'afhnaih 'ink'ez sunulh'en! 'Alha nohnich'oh whunulh'en. Syust'e cha hoonli 'ink'ez sts'un cha. Dune tsin 'aw whuz un'a ndúlhit'oh, yust'e 'ink'ez oots'un cha hooloh, ndi ts'iyawh bulh 'ust'oh."

40 'Et 'awet 'et dudáni' whe, dula cha 'ink'ez duke cha bunalh ts'et neyuzdla.

41 Soo ts'ih'un huhóont'i' 'ink'ez huwá' hi'en 'et hoonts'i 'awhuz buba 'alha lhe'hoot'oh. 'Ink'ez 'ubulhni, "Aw njan 'ut'alh-i lhaht'ih?"

42 'Inka lho sut'e-i 'ink'ez ndai la ts'ihna dutl'uz ye 'ulh'en-i, 'i yoo'alha higha híninla.

43 'Ink'ez yílhchoot 'ink'ez bunalh yan'al.

*Sizi whubunulhtun Yak'usda ooghuni daja ni*

44 'Ink'ez 'ubulhni, "Awhuz nohbulh 'úst'oh da' ndi khuni 'i da' be nohbulh yasdúk-i, 'et la ndi ts'iyawh lhaoodoneh ndai la Moses be 'udustl'us k'unusguz-i, 'ink'ez nus hoo'enne, 'ink'ez Yak'usda ooghuni Shun e'dustl'us k'ut cha si sghun 'uk'unusguz."

<sup>45</sup> 'Et bubeni t'ehonoozeh ha butl'ahón'ai Yak'usda ooghuni t'ehinoozeh ha.

<sup>46</sup> 'Ink'ez 'ubulhni, "Ndi 'i 'uk'unusguz whe 'et dutni, Christ, 'en dzoh nozut huba' hoont'oh, 'ink'ez whulh tat dzin dunadutádalh.

<sup>47</sup> 'Ink'ez mbene la boozi' be yatilhdukne, 'enne 'en boozi' gha nts'en'a whe ts'iyanne dulubeshi ch'a dudeni naháhundunooleh, 'ink'ez nts'en'a whe bulubeshi buba úntukuk cha, 'ohwhi ghun boozi' gha ts'iyanne dóhni' huba' hoont'oh. 'Et njan Jerusalem 'et cho whe' doht'en. 'Et hukw'elh'az de, ts'iyanne yun k'ut ndulcho whe whubodoolh'eh.

<sup>48</sup> 'Ink'ez nohni njan 'et ts'iyawh dune whúntilhtunne ahli whé aht'oh.

<sup>49</sup> 'Ink'ez soo zulhts'ai, ndi sBá nohts'u yoozi-i, 'i nohts'o tl'adutis'alh. 'Et hoonts'i yak'uz ndus de whelhtus-i, 'i nohk'edútalts'ulh 'et whuts'un, njan Jerusalem keyoh 'et za dólhts'i!"

*Sizi ndo yak'uz whenálti*

<sup>50</sup> 'Et 'awet keyohyaz Bethany ts'uwhútni, whuz naboozdla. Dula do 'uyinla 'ink'ez Yak'usda yoodulhkut buts'un oozoo' ha.

<sup>51</sup> 'Et 'awhuz Yak'usda yoodulhkut whe buts'un oozoo' ha, 'et buch'a nasdzut 'ink'ez ndo yak'uz whenálti.

<sup>52</sup> Hits'un teni' nalhdzin, 'ink'ez tube hooncha whe huhóont'i' whe Jerusalem ts'e náhoosdil.

<sup>53</sup> 'Et 'ahoolhdzin lugliz whucho hudilhts'i whe Yak'usda hidilhti' 'ink'ez dalzoo' whe 'unt'oh hutni. 'Et ndo honeh.



## Yak'usda Ooghuni Unzoo-i John 'Uk'unéyuzguz-i

### *Ndi khuni 'ilhiz 'unt'oh*

<sup>1</sup> Soo 'udechoo da' 'et khuni hoonli 'ink'ez ndi khuni 'i Yak'usda yulh 'únt'oh. Ndi khuni 'i Yak'usda 'unt'oh.

<sup>2</sup> Ndun 'en soo 'udechoo da' whuts'un Yak'usda bulh 'unt'oh.

<sup>3</sup> 'En la toh ts'e ts'iyaitsuk 'ulya ínle'. Ndaí la 'ulya-i toh 'aw 'ilhughi lhe'yílel-i hooloh.

<sup>4</sup> Be ts'úkhuna-i 'en oots'u haídanzut 'ink'ez 'i ts'iyanne dune buba be hoot'en-i 'unt'oh.

<sup>5</sup> Ndi be hóot'en-i tsalhgus\* yo ts'e whíndi 'ink'ez ndi tsalhgus yo ts'e haínya-un, 'aw yuch'a' 'oolhdeh aít'oh.

<sup>6</sup> 'Ilhoghun dune John† huyulhni, 'en Yak'usda whusayáhl'a'.

<sup>7</sup> Ndun dune 'en ts'iyanne dóni' ndi be hóot'en-i, 'i ghun. Hukwa' huninzun de, 'en gha la ts'iyanne ooba 'álha' hot'e'.

<sup>8</sup> Ndun 'en 'aw be hóot'en-i ilóh 'unt'oh. 'En 'unt'oh be hóot'en-i, 'i ghun ts'iyanne dóni'-un 'unt'oh.

<sup>9</sup> Ndi be hóot'en-i, 'i ts'ih'un 'unt'oh, 'ink'ez be hóot'en-i, 'i ts'iyanne dune bugha ita'alh, 'et wheni 'en ndi yun k'eínya.

<sup>10</sup> Ndi yun k'ut inda'. Ndi yun 'uyínla 'et hoonts'i yinka dune' t'ehinózin hukwa lhe'hunizun.

<sup>11</sup> Mbene la dulh whút'enne oole' ha 'utahábanlane, 'enne butaninya whe 'aw lhuhuyílhchulh.

<sup>12</sup> 'Et hoonts'i mbene la yílhchootne, Yak'usda buzkeh huzdli' 'et bugha óonin'ai. 'Enne 'uhint'oh ndi boozí' buba 'álha' yint'oh.

<sup>13</sup> 'Aw hahánde whu la toh ts'e iloh Yak'usda buzkeh huzdli', k'us buyust'e hukwa' nínzun huwa iloh, k'us dich'oh dune hukwa' huninzun huwa cha iloh, Yak'usda 'en gha za huwhuzdli.

<sup>14</sup> 'Et ndi khuni Yak'usda unli, 'i dune sulí' 'ink'ez netoh dune inle', 'et whe dádílti' la ts'onalh'en. Ndi yé dadanti', 'i Yak'usda 'aw 'ilhoghun za ooYe' yé díztí-i 'unt'oh. Ye unzoo-i 'aw oola tanalhuhoó'oh 'ink'ez khuni 'alha' 'unt'oh-i za be yálhduk.

<sup>15</sup> 'En ghun John ubudáni' inle', dune bulh yálhduk whe, "Ndun 'en ghun nohdásni', sk'elh'az whusatíyáhl 'et hoonts'i whutisdleh whutso da' hoonts'i, 'uda' 'et khuna whe 'unt'oh, 'et huwa 'unt'oh sando 'unt'oh," ubúlhni.

<sup>16</sup> 'Ink'ez ndaí la neba yut'i-i 'andit ts'iyawh negha ínínla. Dzin totsuk ye unzoo-i neba 'on 'un 'unt'oh.

<sup>17</sup> Yak'usda ndi khuni yutulhúhizey'-i, 'i Moses 'en gha netl'aídan'ai ínle'. 'Et hoonts'i 'andit Sizi Gri 'en gha ye unzoo-i 'ink'ez khuni 'alha' 'unt'oh-i neghalts'ut.

<sup>18</sup> 'Aw Yak'usda yan'en-un hooloh 'et hoonts'i ndun 'aw 'ilhoghun ooYe', oobá 'uk'enus yuk'entsi'-un, 'en Yak'usda ghun 'et whunénulhtan.

*John dune too be 'ulh'en-un, 'en ubúlhni 'aw ndun Christ 'en iloh 'ust'oh*

\* **1:5** Ndi tsalhgus ts'iyaitsuk 'utsi'-i 'ink'ez tank'us únt'oh-i ni whe 'utni. † **1:6** "En Zan Badis," 'ulhni.

19 'Et 'ilhudzin ndunne Lizwif Jerusalem whut'enne, 'enne lubretne 'ink'ez Levitne John ts'un whe bahalh'a' huyoodolhkut mbe unli-un 'et hukwa. 'Et John ubúlhni,

20 soo ts'ih'un un'a 'aw whuts'u lhoodídlai whe ubudáni', "'Aw Christ, 'en íloh 'ust'oh,'" ubúlhni.

21 'Et doo cha huyoodulhkut, "Mbe inli? Elijah tilah 'int'oh?" "'Awundooh, 'aw 'en hoonts'i 'ust'oh,'" ubúlhni. "Nyoon Yak'usda be nus hoo'en-un ooghu yaduk inle'-un, 'en tilah 'int'oh?" huyúlhni. 'Et cha, "'Awundooh,'" ubúlhni.

22 'Et 'uhuyúlhni, "Kwa, mbe whé 'int'oh. Nyunch'oh daja na'dudintni. 'Et ts'ih'un nedáni, 'et de la nyoonne whuz de nétílh'a'ne ubuzdóni,'" huyúlhni.

23 'Et John ubúlhni,

"Si 'ust'oh 'aw dune lhuhóot'ih-un ts'e duztúl whe ts'iyanne dune ubudúzni, neMoodihti lhutiyalh-un hoonzoo 'ink'ez lhts'e whudiz'a ooba whultsi. 'Et whuz un'a Yak'usda be nus hoo'en-un Isaiah ndutni inle,'" ubúlhni.

24 'Et ndunne John ts'u whé! 'a'ne, 'enne Pharisee lohne za 'uhint'oh.

25 'Et doo cha huyoodulhkut, "'Aw Christ, k'us Elijah, k'us nyoon Yak'usda be nus hoo'en-un, 'enne íloh 'int'oh de, di ha dune too bé' bill'en?" huyúlhni.

26 'Et John ubúlhni, "Si too za-i be dune too be' us'en 'et hoonts'i nohtoh 'ilhoghun dune hoonli, 'en 'aw t'enuzáhzun.

27 'En 'unt'oh sk'élh'az whusatíyalh-un sanus dízti' whe 'unt'oh. 'Aw ookechun natl'ool ooba k'unáitís'uk 'et hoonts'i huba soo lhé'uzdzoo,'" ubúlhni.

28 'Et njan keyoh Bethabara huwhútni-un Jordan koh whanch'az whuz'ai-un, 'et 'John dune too be' 'ulh'en whe ndi ts'iyaitisuk ghun nyoonne hits'u whel'a'ne hubudáni'.

29 'Om bun dzin khunsul Sizi yuts'un uyalh whe John yutilh'en, 'ink'ez 'utni, "Nulh'en, Yak'usda be 'usbaiyaz. 'En 'ut'en yinka dune'ne bulubeshi buts'u hanáyule, ubúlhni.

30 'En ghun nohdásni' sk'elh'az whusatíyalh, 'et hoonts'i whutisdleh whutso da' hoonts'i, 'uda' khuna whe 'unt'oh, 'et huwa sanus dízti' whe 'unt'oh.

31 Mbe unli-un 'aw seni be t'éoonuzúszun inle', 'et hoonts'i nohni Israel oots'u haindene nohts'u whúsasya 'ink'ez too za-i be too be' nohus'en 'i gha la mbe 'unt'oh-un soo cho t'ewhunoozhéh,'" ubúlhni.

32 Njan 'et Sizi ghun John ndutni, "Ndoni dut'aiyaz doút'en whe yak'uz ts'e hadánde 'ink'ez ooyédande, 'et whunis'en.

33 'Oh da' 'aw seni be t'éoonuzúszun mbe 'unt'oh, 'et hoonts'i ndun whuz de sútílh'a'-un too za-i be dune too be' oos'en ha 'en sudáni', 'Mbe la Ndoni ndus de yuk'édílt's'ut-un 'ink'ez 'ilhiz yulh 'únt'oh-un, 'en 'unt'oh Ndoni be dune too be' 'ulh'en-un unli,' 'et sudáni'.

34 'Et ndúhooja-un 'et whunis'en. Soo ts'ih'un khuni be nohdúzni, 'alha ndun 'en Yak'usda ooYe 'unt'oh,'" ubúlhni John.

35 'Et 'om bun dzin John 'ink'ez yugha hodul'ehne nane 'et nódihya.

36 Sizi 'oh whuya uyalh whe John yunilh'en, "Nulh'en ndun Yak'usda be 'usbaiyaz 'únt'oh!'" ubúlhni.

37 'Et ndunne nane dune John yugha hodul'ehne daja ni hidánts'o whe 'awet Sizi Gri hiyuntiz'az.

38 'Et Sizi ubunilh'en huyuni'us whe 'et huboodulhkut, "Di khunáhta whe aht'en?" ubúlhni. 'Et 'uhuyúlhni, "Rabbi, nts'e la hoont'i?" ('Et ndi khuni Rabbi 'i Lizwif k'un'a dune hodulh'eh-un ni whe' utni.) 'Et Sizi ubúlhni,

39 "'Anih, whunoolh'en sil'" ubúlhni. 'Et huyúlh tiz'az 'ink'ez nts'e la usda-un honalh'en. 'Et dzin ndulyiz whe hizih hinke' 'ink'ez, 'oh da' 10:00 at'en 'uhunit'oh.

40 'Et ndunne nane dune John hidánts'o huwa Sizi huyuntiz'azne, 'en 'ilhoghun, Andrew huyulhni, 'en Simon Peter bulhutsin 'unt'oh.

41 'En 'aho dulhutsin, Simon huyulhni, 'en yughu ninya 'ink'ez yudáni', "Ndun Messiah 'awet nats'ilhti," yúlhni. (Ndi Messiah, Christ ni whe' utni.)

42 'Et Sizi 'en yughu inílhti. 'Et soo cho Sizi yunalh'en 'ink'ez 'uyulhni, "Nyun Simon Jonas ooye" 'en 'int'oh, 'et hoonts'i Cephas nyuhudutánelh," yúlhni. (Ndi Cephas 'i Peter 'i za 'unt'oh 'ink'ez 'i tse ni whe' utni.)

43 'Et 'om bun dzin Sizi Galilee yun k'ut huwhútni ts'e tiyalh hukwa' ninzin. Whuz oozya whe dune Philip huyúlhni, 'en nayilhti 'ink'ez "Sunanyalh," yúlhni.

44 'Et ndun Philip 'en keyoh Bethsaida huwhútni-un, 'et whut'en-un 'unt'oh. 'Et keyoh za Andrew 'ink'ez Peter bulh huwhut'í.

45 'Et Philip 'en dune Nathanael huyúlhni, 'en nayilhti, "Ndun mbe la Moses dude 'udustl'us k'ut yughun 'uk'uné'uzguz-un, 'ink'ez Yak'usda be nus hó'enne highun 'uk'une'úzguz-un, 'en 'awet nats'ilhti. 'En 'unt'oh Sizi, Joseph ooye' unli. Keyoh Nazareth huwhútni, 'et whut'í," yúlhni.

46 'Et Nathanael 'utni, "Nts'en'a suba hoonli 'uzoo'-i Nazareth ts'u haóolts'it?" 'Et Philip 'utni, "Anih, sulh ín'ús 'ink'ez whunolh'en si!" yúlhni.

47 'Et Sizi Nathanael 'az de úyalh yunilh'en 'ink'ez yughun 'et ndutni, "Ndun 'en soo Israel oots'u hainzut-un 'unt'oh, 'aw tank'us 'úhoont'oh te nulhe'ust'en," ni.

48 'Et Nathanael Sizi yoodulhkut, "Di gha t'ewhunínzun dant'oh-un dune usdli?" 'Et Sizi yúlhni, "Mai chun t'ah sinda da', Philip 'anih nyudutánelh whutso da', 'et nyunus'en," yúlhni.

49 'Et Nathanael 'uyúlhni, "Rabbi, 'alha Yak'usda ooYe' inli 'ink'ez Israel oots'u haindene bulerwe cha inli," yúlhni.

50 'Et Sizi 'uyúlhni, "Mai chun t'ah sinda whe nyunus'en nyudúsni. 'Et whu la toh ts'e Yak'usda ooYe' usdli-un mba 'álha 'uhoont'oh, 'et hoonts'i nus de 'on nus hooncha-un, 'et whuntal'h'elh.

51 'Et soo ts'ih'un un'a nyudutásnelh, yak'uz dáha' dankez 'ink'ez Yak'usda oolizasne ndus de hahádudoh 'ink'ez ndo cha whenáhadudoh ndun yinka dune ye<sup>‡</sup> 'en ba 'uhut'en, 'et whuntal'h'elh," yúlhni.

## 2

### *Sizi huwa 'ít'en túne' 'ut'en 'et huwa la dunene 'en Christ 'únt'oh t'ehonózin*

1 'Et whulh tat dzin sulí' whe Galilee yun k'ut 'et 'ilhoghun keyoh Cana huwhútni, 'et keyoh 'et la lhghuskene ba honílhni. 'Et Sizi ooloo 'en cha 'et usda.

2 Sizi 'ink'ez yugha hodul'ehne tubulh 'enne cha bughu nahúzdil.

3 'Et njan lhghuskene ba honílhni whutoh 'et la ndi ts'ekoo too' ntsool súli'. 'Et Sizi ooloo yughu ninya 'ink'ez yúlhni, "Aw ts'ekoo too' luhúh'í'."

4 Sizi 'et 'uyúlhni, "Ts'eke 'et di ha 'et ndusúdimi? 'Aw 'awhuz sba 'et nelhódiszit, 'awhuz sts'ó dizulh whe 'uhoont'oh," yúlhni.

5 'Et ooloo ndunne ustlénne ubúlhni, "Daja nohbulhni la 'oh te ne'óoht'en."

6 'Et njan lkh'uta tse oosa' cho, too huye súlhdoz wheni, 'et usdla. 'I la Lizwifne bube 'ut'en k'oh hukw'un'a lana'huldoh wheni.

7 'Et Sizi ndunne ustlénne ubúlhni, "Ndi tse oosa' cho ts'iyawh too be nadulhbun." 'Inka soo ts'iyawh oodah whuts'un yanahídilhun.

‡ 1:51 Yinka dune ye' ni, 'et dich'oh nadudutni.

8 “Dugwe' íhkaih 'ink'ez mbe la njan howunli-un, 'en oots'u yihkalh,” ubúlhni. 'Inka hiloh hits'u whinkai.

9 Ndi too ts'ekoo too' suli'-i, 'aw nts'ez de hahuyalhdzo ndun howunli-un t'éoonúszun, 'et hoonts'i ndunne ustlénne huyínkaine, 'enne t'ehonínzun. 'Ink'ez ndet la howunli-un yunahóozdlih whe dune 'at ut'i-un, 'en 'anih yudáni',

10 'ink'ez 'uyúlhni, “Dune ts'iyanne ndi ts'ekoo too' 'uzoo'-i, 'i cho howu há yulhdzoh, 'et hukw'elh'az sooltsuk hutnih te, 'et 'andit za hukw'elh-i 'unt'oh-i ts'ekoo too' 'i bughu há yulhdzoh. 'Et nyun ndi 'uzoo'-i, 'i 'udek'o whuts'un ontun!” yúlhni.

11 Njan keyoh Cana Galilee yun k'ut whuz'ai 'et soo 'udechoo Sizi huwa 'ít'en te na'dít'en, 'ink'ez dádilti' la 'et whúbunilhtan. 'I gha la yugha hodul'ehne 'en ghun buba 'alha yint'oh suli'.

### *Jerusalem lugliz whu cho Sizi 'oocketne tenábuninyoot*

12 'Et ndúhooja hukw'elh'az Sizi keyoh Capernaum huwhutni ts'e whinya. Ooloo cha 'uja, 'ink'ez bulhutsinke cha, 'ink'ez yugha hodul'ehne cha, 'aw sa' iloh 'et hudáls't'i.

13 'Et 'awet whenghoh whudizulh ndet da' Lizwifne buyoh Yak'usda oolizas Butus Lhuséya whúnahulnih-un,\* 'et Sizi Jerusalem ts'u whinya.

14 'Et lugliz whucho whuna'ulhyó-un whambez ts'e oozya 'et la dune 'e'óocketne ubunilh'en. Khunai-i, musdoos, 'usbai te, 'ink'ez dut'aiyaz te, dove huyúlhni, huye 'óocket, 'ink'ez dune sooneya lhk'enádudzaihne, 'enne cha 'et 'uhut'en.

15 Tl'oolhyaz be tutsus inla. 'I be khuna-i ts'iyawh tenaíninyoot. Sooneya lhk'enádudzaihne cha buzooneya nus wheyantsut, 'ink'ez buludab cha yun tiz'ai.

16 'Ink'ez dut'aiyaz be 'óocketne cha ubúlhni, “Ndowhi tenánuhle! 'Aw sBá ooyoh 'et e'óocket bayoh whulhtsi iloh!” ubúlhni.

17 'Et ndunne yugha hodul'ehne whunahilni ooghun 'uk'unusguz-i daja ni la, 'et ndutni, “Njan nyoh hukwa' nuszun k'et 'ants'i syo ts'e dusk'un le'ust'oh.”

18 'Et Lizwifne 'uhuyúlhni, “Njan nts'oh te la ne'ínt'en-un di gha 'ínt'en honcha túne' 'int'en, 'et whunénilhtun?”

19 'Et Sizi ubúlhni, “Njan yoh whudízi'-un nohni musai whulhtsi 'ink'ez tat dzin inle' de, 'et dunaóodutás'alh.”

20 'Et ndunne Lizwifne úhuyúlhni, “Njan yoh whudízi'-un dit whunizyat 'on 'at lhk'utat yus k'ut inle' whe lhaóodulya. 'Et daja ninzun whe' dini, tat dzin whutoh za dunaoodután'alh dini,” huyúlhni.

21 'Et njan Sizi yoh whudízi'-un howu yalhduk whe, didutch'oh duyust'e 'i ghu yalhduk whe' utni inle'.

22 'Et huwa la Sizi Gri dazsaine butoh dunadija whe yugha hodul'ehne whunahilni daja ubúlhni inle' da', 'ink'ez ndi Yak'usda ooghuni 'uk'unusguz-i 'ink'ez khuni 'i Sizi ye yaílhduk-i bulh daja ni la ts'iyawh buba 'álha 'uhoont'oh.

23 'Awhuz Jerusalem 'et za 'ut'en whe njan Butus Lhuseya-un, 'et whutoh ne'whut'en-un, whulohne mbene la Sizi yunilh'enne nts'o tula ne'út'en-un, 'et huwa k'us lhane boozí' buba 'alha' yint'oh suli'.

\* **2:13** Nawhudizulh totsuk 'ilhunahodulh, 'ink'ez ndi 'usbai k'us unzoo-i nahayut'ulh. Njan whewhúnahulni 'oh da' Yak'usda yun k'ut Egypt ts'e hanabanla da'.

<sup>24</sup>'Et hoontsi'i Sizi didutch'oh 'aw dunene but'anílhñitan, t'ewhunínzun dune dahínt'oh la 'et huwa.

<sup>25</sup>'Ink'ez 'aw 'uyoonne dune dahínt'oh la 'et hidóni' aít'oh, didutch'oh dunene dahínt'oh la t'ewhunínzun 'et huwa.

### 3

#### *Sizi Nicodemus yúlhni doo cha za honleh huba 'uhoont'oh*

<sup>1</sup>'Ilhoghun dune Pharisee bulh dizulh-un, 'en 'ilhoghun Lizwifne butso whudilh dzulh-un, 'en Nicodemus huyulhni.

<sup>2</sup>'En 'ulhdzis 'et Sizi ghu ninya 'ink'ez 'uyúlhni, "Rabbi, Yak'usda yulh 'unt'oh-un dune, 'en za njan huwa ít'en-un tune' oot'en huba 'uhoont'oh. 'Et huwa soo t'ets'onínzun dune hodul'eh-un Yak'usda ts'u haínya-un, 'en inli whe 'int'oh."

<sup>3</sup>'Et Sizi yúlhni, "Soo ts'ih'un un'a nyudúsni, dune doo cha za whuzdli de, 'et de za nts'e la Yak'usda 'en lerwe unlí-un whuti'elh."

<sup>4</sup>'Et Nicodemus 'uyúlhni, "Nts'en'a suba 'ilhoghun dune tube yoo'un uzulh-un, 'en doo cha za hooleh whe' dini? 'Aw whulh nat duloo yuchan naooja' 'ink'ez doo cha hooleh aít'oh!" yúlhni.

<sup>5</sup>'Et Sizi 'uyúlhni, "Soo ts'ih'un un'a nyudúsni, dune too 'ink'ez Ndoni be cha whuzdli de, 'et de za nts'e la dunene Yak'usda dich'oh za bulerwe unline 'et 'aw dahóoya' aít'oh.

<sup>6</sup>Mbe la dune gha whuzdlí-un, 'en dune ch'e' 'unt'oh, 'ink'ez mbe la Ndoni be whuzdlí-un, 'en Ndoni ooch'e' 'unt'oh.

<sup>7</sup>'Et nyudúsni' nohni doo cha za hooleh huba 'uhoont'oh. Khun te 'et huwa mba hócha junih!

<sup>8</sup>'Ants'i nilhtsi'i dilts'ulh le'hoont'oh. Nilhtsi'i dints'o 'et hoontsi'i nts'ez de hadílt'ut k'us nts'e dutilts'ulh-un 'aw t'éoonuzínzun. 'Et whuz un'a za 'aw t'éoonóznin aít'oh nts'en'a dune Ndoni be whuzdlí-un," yúlhni.

<sup>9</sup>'Et Nicodemus 'uyúlhni, "'Et nts'en'a 'uwhutat'elh?"

<sup>10</sup>'Et Sizi 'uyúlhni, "'Et nyun Israel oots'u haíndene whubodilh'eh-un inli, 'ink'ez nts'en'a 'int'oh njan 'aw nyeni be t'éoonuzínzun?"

<sup>11</sup>Soo ts'ih'un un'a njan nyudúsni, t'éts'onínzun ndet howu yats'ulhduk-un 'ink'ez ts'ih'un un'a nohts'útni ndai la ts'an'en 'i ghun 'ink'ez nohni 'aw neghuni nohba 'alha lhe'ít'oh.

<sup>12</sup>Ndi yun k'ut nts'oh tula né'whut'en-un, 'et huwun nohdúsni 'et hoontsi'i nohba 'álha lhe'hóot'oh de, nts'en'a suba ndo yak'uz né'whut'en-un, 'et huwun nohdúsni de, 'et nohba 'alha 'uhot'e?"

<sup>13</sup>'Aw 'ilhoghun dune ndo yak'uz whenya-un hooloh, 'aw 'ilhoghun za 'uja-un ndus de yak'uz haínya. 'En 'unt'oh yinka dune ye' unli, 'en 'unt'oh yak'uz ookeyoh whuz'ai.

<sup>14</sup>'Uda' 'aw dune luhoot'ih-un ts'e whe Moses 'en tl'ughus k'eltsi dube' yudíltsi inle', whuz un'a za yinka dune ye' dube' hidutálhtsih huba 'uhoont'oh.

<sup>15</sup>'Et huwa mbene la 'en ghun buba 'alha 'uhoont'ohne, 'enne 'aw dalhótisa,\* 'ilhiz oole' wheni hukhutinálh.

<sup>16</sup>Yak'usda ndi yun k'ut dunene buk'entsi' k'et 'aw 'ilhoghun duYe' 'en bugha ínilti. Mbene la 'en ghun ooba 'alha' yint'ohne 'aw dalhótisa, 'ilhiz wheni hukhutinálh.

\* 3:15 Njan dalhótisa ní-un, 'aw neyust'e iloh, nezul 'ink'ez neyughi ghu yalhduk whe 'utni.

17 'Aw dune ba nahutiye wheni íloh Yak'usda duYe' ndi yun k'uz yutilh'a'. 'En gha ndi yun k'ut whut'enne ts'iyawh hudoojih, 'et wheni ndi yun k'uz yutilh'a'.

18 Mbene la buba 'álha yint'ohne 'aw buba nalhotisde. 'Et mbene la 'aw ooba 'álha lhe'yít'ohne, 'enne 'uda' buba nahisda whe' hint'oh, 'aw Yak'usda ooYe' boozí' 'aw buba 'álha lhe'yít'oh 'et huwa.

19 'En 'unt'oh be hóot'en-i unli whe ndi yun k'eínya. 'Et hoontsi' ndi yun k'ut dunene tsalghus yo ts'e haínya-un, 'en ndi be hóot'en-i anus hik'entsi', njan ne'hut'en-un 'on nus hoontsi' ts'e za hit'elh' 'et huwa. 'Et huwa la buba nahookeh.

20 Mbene la hoontsi' te ne'út'enne, 'enne ndi be hóot'en-i hits'u dutni. 'Et huwa ndi be hóot'en-i, 'aw hits'un tóoya' aít'oh, doo ka la tank'us 'úhut'en-un ts'et hahóolts'it 'et whuch'a.

21 'Et hoontsi' mbe la ts'ih'un un'a 'it'elh-un, 'en ndi be hóot'en-i ts'u tiyalh, 'et whe la ts'iyanne t'ehonózin, nts'oh tula ne'út'en-un, Yak'usda 'en gha za 'it'en."

*John dune too be 'ulh'en-un doo cha za Sizi yuba whudílti'*

22 Njan 'oh túne' whust'en hukw'elh'az Sizi 'ink'ez yugha hodul'ehne te Judea yun k'ut ts'e hoozdil. 'Et yugha hodul'ehne te 'et hudáalts'i' 'ink'ez dune too be' halh'en.

23 'Oh da' za John 'en cha keyoh Aenon huwhútni-un keyoh Salem huwhútni-un whenghoh whuz'ai-un, 'et dune too be 'úlh'en, tube 'et too lhai 'inka. Dune hits'u lhodulh 'ink'ez whulohne dune too be' binla.

24 'Et 'awhuz John 'aluhúáyus'ai da' 'et huwa.

25 'Et 'oh da' John yugha hodul'ehne Lizwifne bulh howun lhduhyoh 'uhudtni, Lizwifne bube 'ut'en k'oh hukw'un'a lana'huldoh 'et huwun.

26 'Inka John highu nindil 'ink'ez huyoodulh'kut, "Rabbi ndun dune 'ilhoghun nga hodul'eh-un, Jordan koh nyaz ts'e, 'en ghun dune bubulh yaílhduk ínle', 'awet 'en dune too be 'úlh'en 'ink'ez ts'iyanne hits'ú lhodulh," huyúlhni.

27 'Et John ubúlhni, "Yak'usda yugha óonin'ai de za, 'et huwa 'aw 'ants'i 'et hoonliyaz oot'e' aít'oh.

28 Nohnich'oh hoontsi' la daja dusni-un la t'éoonáhzun, si 'aw Christ 'en íloh 'ust'oh, 'et hoontsi' 'ilhoghun yutso whusál'a'-un, 'en 'ust'oh.

29 'Et ndóohoont'oh whe, 'ilhoghun dune ts'eke yughusda-un, 'en 'at ut'í-un 'unt'oh. 'Et ooyadan yuzih usyin-un 'ink'ez yughuni yoozilhts'ai whe la tube yuba hóont'i'. 'Et nohdúsní si cha whuz un'a tube cho hoonúst'i'.†

30 'On nus tube cho hidólhti' 'ink'ez si hukw'elh'i le sba hodólhti', 'et whuz un'a 'uhót'e' huba' hoont'oh.

31 Ndun yoo dus de haínya-un, 'en ts'iyane ando 'unt'oh 'ink'ez ndun yinka ts'u haínya-un, 'en yinka dune unli, 'et huwa ndi yun k'ut hoonli-i, 'i za ghu yalhduk. 'Et ndun yak'uz haínya-un, 'en ts'iyane an do 'unt'oh.

32 'Et ndet la ndun whunalh'en 'ink'ez whudánts'o-un, 'et 'uyoonne cha ubúlhni, 'et hoontsi' daja ubúlhni-un la 'aw highuni lhulhchoot.

33 'Et hoontsi' mbe la yughuni ilhchoot-un daja ni-un, 'en 'utni ndun Yak'usda 'en ooba 'álha' yint'oh, ní.

34 Ndun 'en Yak'usda whusayálh'a'-un, 'en 'ink'ez didut Ndoni be yudilh-bun, 'et huwa Yak'usda ooghuni za be yálhduk.

† 3:29 Ndun dune 'at ut'í-un, 'en Sizi Gri dult'oh, 'ink'ez ooyadan 'en John dune too be 'ulh'en-un dult'oh ní whe 'utni.

35 Yak'usda 'en duYe' yuk'entsi' 'et huwa ts'iyaitsuk k'úne' hool'en-un, 'et yugha óonin'ai.

36 'Et mbene la ndun Yak'usda ooYe' ooba 'alha' yint'ohne, 'enne 'ilhiz wheni be ts'úkhuna-i, 'i huyut'i, 'et hoonts'i mbene la ooba 'alha lhe'yit'ohne, 'enne 'aw huhoo'en aít'oh, Yak'usda yé bubulh húnilch'e-i 'ahoolhyiz wheni buk'ut 'uyítát'elh," ni John.

## 4

*Thhoghun ts'eke Samaria yun k'ut whut'en-un, 'en Sizi ndi 'ilhiz wheni be ts'ótinah-i ghun yulh yálhduk*

1 'Et la ndunne Phariseene huyulh údits'o whe la 'uhutni, "Sizi 'en John anus lhane dune cha yugha hodul'ehne sulí, 'ink'ez dune too be' úlh'en cha 'ut'en," hutni.

2 'Et hoonts'i 'alha Sizi 'aw dich'oh iloh dune too be' bulh'en, yugha hodul'ehne, 'enne za 'uhut'en.

3 'Et neMoodihti whulh údants'o whe 'awet Judea yun k'ut whuch'a nasja 'ink'ez Galilee yun k'ut ts'e natisja.

4 'Et nadalh whe la Samaria yun k'ut 'oh whuya lhunátidalh,

5 'ink'ez Samaria yun k'ut keyoh Sychar huwhútni ts'e oozya. Njan keyoh 'et yun k'ut Jacob duye' Joseph yugha óonin'ai ínle', 'et whenghoh whuz'ai.

6 'Et Jacob too k'et 'uhóonla-un, 'et whuz'ai. 'Et Sizi tube sa' nusúya 'ink'ez nénintsai, 'inka too k'et whuzih 'et nátl'adida'. 'Et 6:00 at'en 'uhúnit'o whe 'ut'en.

7 'Et usda whe la 'ilhoghun ts'eke, Samaria whut'en-un, 'en too huya. 'Et Sizi 'uyúlhni, "Too sgha nínkaih!" yúlhni.

8 Dich'oh za 'unt'oh, yugha hodul'ehne keyoh ts'e t'alh-i hootakulh ts'e whehándil 'et huwa.

9 'Et ndun Samaria ts'eke' 'en yúlhni, "Nyun Lizwif 'int'oh 'ink'ez si Samaria ts'eke' 'ust'oh, 'ink'ez di ha' dini too sts'u ha' dini?" Lizwifne 'aw Samaria whut'enne 'aw buka lhe'hunízun 'et huwa 'utni.

10 'Et Sizi 'uyúlhni, "Ndi Yak'usda huwa ínín'ai-i, 'i soo cho t'eninzun de, 'ink'ez mbe 'utni nyulh yálhduk whe too nts'u ha' utni-un, 'en t'enínzun de, 'et de nyun da' oodolhkut 'ink'ez ndai la too oogha huye khuna-i, 'i da' nghá yolhdzeh oole,'" yúlhni.

11 'Et ndun ts'eke 'uyúlhni, "Nyun 'aw be taóonkalh-i lhínt'ih, 'ink'ez njan too k'et hádaldza', nts'en'a ndi too be ts'úkhuna-i, 'i itánkalh?"

12 Netsoda'-un Jacob 'en njan too k'et negha óonin'ai. Didut, duye'ke, 'ink'ez bughuna' te, njan too k'et 'et too hitnai' ínle', 'et huwa nyun ooba nus incha nínzun eh?" yúlhni.

13 'Et Sizi 'uyúlhni, "Mbene la njan too k'et too utnai-un, doo cha za ta'hóosda hulhíh,

14 'et hoonts'i mbene la too bugha ítasdzoh, 'i huyitnai' de, 'aw 'on 'at ta'hóda' aít'oh. Mbe la ndi too oogha ínusdzo-un, 'i too 'ahoolhyiz ninli dult'oh, 'i be 'ahoolhyiz wheni hukhutinálh," yúlhni.

15 'Et ts'eke 'uyúlhni, "Kwa, ndi too 'udíni-i sgha nílhdzeh, 'et de la 'aw 'on 'at ta'ósda 'ink'ez 'aw 'on 'at njan too oskálh aít'oh."

16 "Nki 'anéh díní 'ink'ez 'en bulh díz náht'us," yúlhni Sizi.

17 'Et ts'eke 'utni, "Aw ski hooloh whe 'ust'oh." 'Et Sizi 'uyulhni, "Soo' dini! Ts'ih'un un'a sudíni, 'aw nki hooloh dini.

18 T'éoonúszun kwulane nkike inle', 'ink'ez 'andit oozih sinda-un, 'en cha 'aw nki iloh 'unt'oh. 'Et ts'ih'un un'a 'udinja," yúlhni.

19 'Et ts'eke 'uyúlhni, "Nyun nus hoo'en-un tilah 'int'oh?"

20 Netsoda'ne, 'enne ndi dzulh k'ut 'et teni 'uhunilhdzun ínle'. 'Et nohni 'udúhni Jerusalem 'et 'ilhoghun whuz'ai-un, 'et dune teni 'uhunoolhzin huba 'uhoont'oh," yúlhni.

21 'Et Sizi 'uyúlhni, "Mba 'alha 'udoosni', 'ilhudzin diz hóolts'ulh whe 'uhoont'oh, 'aw ndi dzulh k'ut k'us Jerusalem 'et za iloh Yak'usda 'en oots'u téni 'untillhdzun whe 'uhoont'oh.

22 Ndoi la nohni 'oots'un téni 'unulhdzun-i 'aw noheni be t'enuzúhzun. Whzeni mbe la oots'u téni 'uznilhzun-un t'ezninzun, Lizwifne, 'enne bula toh ts'e za dune hudutjih 'et huwa.

23 Ndet la whuz de whúdizulh-un 'andit 'et buba 'uhoont'oh, ts'ih'un un'a teni hunilhzunne soo dudzi ndulcho-i be ts'ih'un un'a Yak'usda hits'un téni hunoolhzin wheni. 'Enne ndunt'ohne, 'enne Yak'usda buka' ninzun duts'u téni 'uhunoolhzin ha.

24 Yak'usda 'en nudúdeh-i unli whe 'unt'oh. 'Ink'ez mbene la hits'un téni 'unilhzunne, 'enne ts'ih'un un'a buyughi be hits'un teni' noolhdzin huba' hoont'oh," yúlhni.

25 'Et ndun ts'eke 'uyúlhni, "T'éoonúszun ndun Messiah whusatíyalh, mbe la Christ huyúlhni, 'en whusaína de, ts'iyantsuk whunéuntillhtun."

26 'Et Sizi 'uyulhni, "'Andit si nyulh yálhduk-un, si usdli whe 'ust'oh."

27 Soo 'et ndutni-un 'awet 'etsul 'udíja whe yugha hodul'ehne whusanáhidil. Tube buba hooncha Sizi ndun ts'eke 'en yulh yálhduk, 'et hoonts'i 'aw 'il-hoghun hoonts'i lhuyoodulhkut, "Di ha ndun ts'eke 'en bulh yailhduk?" k'us, "Ndet nahootan'alh?" lhuhidínel.

28 'Et ndun ts'eke too ye huya-i cha 'awet nenin'ai 'ink'ez keyoh ts'e whenája. 'Et dunene ts'iyawh ubúlhni,

29 "'Anih! Ndu dune noolh'en si! Nts'oh tula né'zust'en-un, ts'iyawh sudani'. 'En toleh Christ 'unt'oh?" ubúlhni.

30 Inka soo ts'iyanne keyoh ts'e hahándil 'ink'ez Sizi highu nindil.

31 'Et 'oh whuya hoozulh yugha hodul'ehne huyúlhni, "Rabbi, na'int'alh!"

32 'Et Sizi 'ubulhni, "'Uda' ndi 'ut'alh-i, 'aw nohni t'enuzúhzun-i, 'i ust'i."

33 'Et yugha hodul'ehne dich'oh 'úlhodutni, "'Uyoon toleh yuti'ulh-i yuba whusaína?"

34 'Et Sizi ubúlhni, "Mbe la whuz de sutilh'a-un, ndet sts'u húkwa' ninzun, 'oh te ne'óost'en 'ink'ez be 'ut'en lhadóosdleh huba 'uhoont'oh. Ndi 'i za s'alh-i 'unt'oh.

35 'Awhuz dunghi sanun whuz'ai, t'l'o 'util'elh whuts'un. 'Et hoonts'i nohdúsní whe soo zúlhts'ai, soo cho nohna be whunulh'en. T'l'o k'ut 'awet whudizgi t'l'o 'utihlelh huba.

36 Mbe la whut'as-un, 'en ooba k'elha hoonli, 'ink'ez mbe la 'ilhunayodilhdzeh-un, 'et mbene la 'ilhunabosdlénne, 'enne 'ilhiz oole' huye khúna-i, 'i bugha ítalts'ulh. 'Et huwa mbe la 'a'nule-un 'ink'ez mbe la 'ilhunayoodilhdzeh-un, nahúlt'oh 'alghoh huhontálhni.

37 'Et whuz un'a daja ni la 'alha 'utni, "Ilhoghun dune 'en 'a'nule 'ink'ez 'uyoon dune 'en ha' nule.' 'Et ndi 'utni-un 'i 'alha 'uhoont'oh.

38 'Aw whutso da' lhezah't'en ts'e whenóhis'a' na'oolhdzooch wheni. Whuz whutso da' 'uyoonne sba 'it'en ínle'. 'Et 'andit nohni whusáhdil 'ink'ez 'uyoonne 'a'nanla 'et ha' nilhla," ubúlhni.



<sup>39</sup> 'Et ndun ts'eke, njan keyoh whut'en-un, 'en ts'iyanne dáni', "Dast'en la ts'iyawh sudáni'," ni. 'Et huwa 'en ooghuni gha lhanne Samaria whut'enne buba 'alha' yint'oh suli'.

<sup>40</sup> 'Inka Samaria whut'enne dune Sizi highu nindil whe duzih ooda' huyúlhni. 'Inka nat dzin 'et buzih inda'.

<sup>41</sup> Ooghuni 'i gha tube 'on nus uniltsúkne, 'en ghun buba 'alha' uhoont'oh.

<sup>42</sup> 'Et ndun ts'eke 'uhuyúlhni, "Aw nyun nghuni 'i gha za iloh neba 'alha' unt'oh, whenich'oh ooghuni uzdánts'o. 'I gha 'alha' ndun 'en dune tilhyis wheni, Christ, 'en ndi yun k'einya t'ets'onanzin," huyúlhni.

<sup>43</sup> Nat dzin inle' whe Sizi Galilee yun k'ut ts'e whénya,

<sup>44</sup> whe ndutni, "Mbe la Yak'usda be nus hóo'en-un nts'oh tula inda'-un, 'oh ho hoonts'i, 'aw lhuhidílhni," ni.

<sup>45</sup> 'Et Galilee yun k'ut ts'e oozya whe ndunne Galilee whut'enne dune tube huhóont'i' whe bughu ninya. Didut cha Jerusalem dzenis whuti ndúwhuliyiz whe 'et 'uhit'en 'ink'ez Sizi hinilh'en whe bunalh hooncha túne' 'ust'en.

<sup>46</sup> 'Et doo cha Sizi Galilee yun k'ut, keyoh Cana huwhútni ts'e naoosja. 'Et 'uja too, 'i ts'ekoo too' yulhsti ínle'. 'Et la 'ilhoghun dune keyoh dune tso whudilhduh-un ooye' tube únduda keyoh Capernaum huwhútni 'et.

<sup>47</sup> 'Et la Sizi Judea yun k'ut ts'u haínya 'ink'ez Galilee yun k'ut ts'e oozya, whulh údants'o whe yuts'oozya, Capernaum ts'e dudulh nátoot'as duye' 'awet datítsa, 'en soo ná'yooleh, 'et hukwa yuts'u tedudli.

<sup>48</sup> 'Et Sizi 'uyúlhni, "Nyunalh huwa 'ít'en tune' 'úst'en 'ink'ez hooncha te ne'úst'en de, 'et de za la mba 'alha' oost'e'."

<sup>49</sup> 'Et ndun keyoh dune tso whudizulh-un 'uyúlhni, "Smoodih 'anah soo 'a syaz datítsah whutso!"

<sup>50</sup> 'Et Sizi 'uyulhni, "Naindalh, nye' khuna." 'Et ndun dune daja yulhni la, Sizi yuba 'alha' dija 'ink'ez whenája.

<sup>51</sup> 'Awhuz duyoh whuts'un nádalh whe, be' ustlenne hidudzidil 'ink'ez, "Nye' khuna," huyúlhni.

<sup>52</sup> 'Et 'uboodulhkut, "Soo nts'óya hoozulh whe ts'oodun soo na'uja?" 'Et huyúlhni, "Hulhda' 7:00 'uhunit'o whe ndi nulwus-i dada oots'u haídilts'ut."

<sup>53</sup> 'Et ndun dune t'ewhunínzun soo 'oh whuya hoozulh whe Sizi yúlhni, "Nye' khuna." 'Et didut 'ink'ez ooyoh 'unt'ohne tubulh, ts'iyawh Sizi ghun buba 'alha' yint'oh suli'.

<sup>54</sup> 'Et la Judea yun k'ut ts'u haínya 'ink'ez Galilee yun k'ut ts'e oozya whe whulh nat 'i yun k'ut za Sizi hooncha tune' 'ust'en.

## 5

### *Tadiz'ai-un Bethesda huwhútni, 'et Sizi 'ilhoghun dune soo ná'yinla*

<sup>1</sup> Njan 'oh te ne'whust'en-un hukw'elh'az 'et Lizwifne budzenis whuti 'et wheni Sizi Jerusalem ts'e whinya.

<sup>2</sup> Nyo Jerusalem 'et 'usbai ba dá dintan-i hoonli, 'et la whenghoh tádziz'ai-un whuz'ai. Njan tádziz'ai-un, 'et Hebrew k'un'a Bethesda huwhútni, 'et whunat-un kwulat-un bun tsilh t'ah whuzda.

<sup>3</sup> Nyo bun tsilh t'ah 'et tube lhane ndudane 'et husdla. Whulohne hoos'enne, 'ink'ez whulohne bodin'aíne, 'ink'ez whulohne cha délhudusnine. 'Enne ndi too nóitnah-un, 'et huba hihl'ih.

<sup>4</sup> Soo nenaóoduzuk le'whut'ih totsuk la, lizas ndus de hadúdoh 'ink'ez tadiz'ai-un, 'et too nunáhuyilnaih. Mbe la soo 'udechoo toot tayaih-un, nts'oh dant'i-i dada be nduda, 'et hoonts'i soo na'ut'ih.

5 'Ilhoghun dune tat whunizyat 'on 'at lhk'udit yus k'ut naóodizut, 'en 'et ndída'.

6 'Et sulhti whe Sizi yunilh'en. T'ewhunínzun tube sa' 'et ilhte'. 'Et la 'uyúlhni, "Soo ná'tantnelh hukwa' nínzun eh?"

7 'Et 'aho dune nduda-un 'utni, "Ndi too núhitnaih te, 'aw dune tasóolhtel-un hooloh. 'Awhuz whuts'un húkwa 'ust'en whe 'uyoon whusayaih 'ink'ez stso tayaih."

8 Sizi 'et 'uyúlhni, "Dudinyaih, kw'usintí-i ilhchoot, 'ink'ez ninya!"

9 'Et 'aho dune ndudá-un soo ná'uja. Yuk'ustí-i yílhchoot, 'ink'ez tizya. Lizwifne nahulyis-un 'et dzin 'et 'uhóoja.

10 Ndun dune soo ná'uja-un, 'en la Lizwifne 'uhuyúlhni, "Andit dzin na'hulyís-un 'uhooont'oh. 'Aw ookw'usintí-i nón'a' huba lhe'hóot'oh!"

11 'Et 'ubúlhni, "Mbe la soo ná'sinla-un, 'en 'usúlhni, 'Kw'usintí-i ilhchoot 'ink'ez ninya,' sulhni."

12 'Inka huyoodulhkut, "Mbe whe 'unt'oh ndun ookw'usintí-i ilhchoot 'ink'ez ninya nyudáni'-un?"

13 'Et ndun dune dich'oh cha 'aw t'einúzun mbe 'uyinla soo ná'yinla-un. Tube lhane dune tadiz'ai-un, 'et 'uhut'en whe Sizi whu'ih ts'e whenya, 'et huwa 'aw t'elhihinízil.

14 Njan 'et ndúhooja-un hukw'elh'az lugliz whucho 'et Sizi ndun nayilhti 'ink'ez 'uyulhni, "Hadih, 'andit 'awet soo ná'inja. Lubeshi 'ilh'en-un 'etsul 'oneh, doo ka la 'on nus 'uwहुल्ति'-un 'et nghá holts'it!"

15 'Et ndun dune whenája 'ink'ez Lizwifne 'ubudáni' Sizi 'en 'uyinla soo ná'yinla.

16 'Et huwa Lizwifne Sizi dzoh nahídilhdzut 'ink'ez hituzilhghelh 'et hukwa' húnuta. Njan nahulyis-un dzin 'et 'oh te ne'ust'en 'et hukwa.

17 'Et hoonts'i Sizi 'ubúlhni, "SBá 'ahoolhyiz 'ut'en, 'inka si cha 'oost'en huba 'uhooont'oh."

18 'Et hukwa Lizwifne 'on nus hituzilhghelh-un hukwa' huninzun. 'Aw nahulyis dzin k'onínyuz 'et huwa za iloh, 'ink'ez cha Yak'usda 'en duBá yulhni. 'Et ndutni whu la gha ts'e Yak'usda bulh húlhgha 'unt'oh ni, 'et huwa hituzilhghelh-un hukwa' huninzun.

*Sizi Yak'usda ooYe' unli 'ink'ez ts'iyanne ando ooBá yugha óonin'ai-un, 'et whúbunulhtun.*

19 'Et Sizi 'ubúlhni, "Soo ts'ih'un un'a nohdúsní, sí Yak'usda ooYe' usdli, 'et hoonts'i 'aw sich'oh hukwa' nuszun te ne'oost'en aít'oh. Yak'usda sBá nts'oh la ne'út'en nus'en, 'et whuz un'a za ooYe' ne'út'en.

20 SBá duYe' yuk'entsi' 'inka ts'iyantsuk be 'ut'en k'oh whínulhtun. Ndet la whunalh'en-un, 'et 'on nus 'ut'en k'oh hooncha-un, 'et whuyúntilhtun. 'I be la tube nohba hochá.

21 SBá 'en 'ut'en, yaidlanne dunabudile 'ink'ez mbene la buka' nínzunne, 'enne 'ilhiz huye khúna-i bugh'a'aih. Whuz un'a za sí Yak'usda ooYe', mbene la buka' nuszunne, 'enne 'ilhiz huye khúna-i bughas'aih.

22 SBá 'en 'aw dune ba nahiyilh íloh, k'us duYe' 'en dune ba nahooyeh-un, 'et yutl'ahón'ai.

23 Njan 'et ndúja-un, 'et huwa la ooYe' dune ts'iyanne 'en hidólhti' nts'en'a la ooBá hidílhiti' hukw'un'a. Mbene la ooYe' lhídílhiti'ne 'aw ooBá 'en cha lhuhidílhiti', 'ink'ez 'en 'uyinla duYe' whusayáhl'a' inle'

*Mbene la sghuni ilhchoot 'ink'ez ndun whuz de sútílh'a'-un, 'en ghun buba 'alha 'unt'ohne, 'enne 'ilhiz huye khúna-i huyut'i.*

24 Soo ts'ih'un un'a nohdúsní, mbene la sghuni ílhchoot 'ink'ez ndun whuz de sùtilh'a'-un, 'en ghun buba 'álha 'unt'ohne, 'enne 'ilhiz huye khúna-i huyut'i. "Aw buba nahoodéh aít'oh, 'uda' be dats'utsaih-i huye nghoozdil 'ink'ez 'ilhiz huye khúna-i, 'i huyut'i.

25 Soo ts'ih'un un'a nohdúsní, ndet la whuz de whúdizulh-un 'andit 'awet 'et néwhulst'ut. 'Andit 'et 'awet yaidlanne Yak'usda ooYe' ooghuni hidutáts'o, 'ink'ez mbene la yudánts'one, 'enne hukhutinálh.

26 SBá 'en dich'oh huye khúna-i yut'i. 'Et whuz un'a za duYe', 'en cha be khútna-i dich'oh yut'i, 'et yugha óonin'ai.

27 'Ink'ez ts'iyanne ba ndó 'oot'e'-un, 'et cha yugha óonin'ai. Yak'usda ooYe' unli 'ink'ez yinka dune ye' cha unli, 'et huwa ts'iyanne dune ba nahutiye huba 'uhoont'oh.

28 Daja nohdúsní la 'aw nohba hochá junih! 'Awet whuz de whúdizulh, 'et la ts'un k'ut yaidlánne cha highuni hodóts'o,

29 'ink'ez la dunáhudódilh. Mbene la 'ut'en unzoo-i 'alh'éne, 'enne dunábudutálelh 'ilhiz wheni hukhutinálh ha, 'ink'ez mbene la hoontsi' tune' úst'enne, 'enne cha dunábudutálelh 'ilhiz wheni dzoh notizut ha buba nahutiye h.

30 'Aw sich'oh ndúhoont'oh-un 'uhoos'en aít'oh. 'Aw sich'oh hukwa' nuszun te ne'óost'en aít'oh. Nts'oh tula sBá sts'u húkwa' ninzun 'oh te za ne'úst'en. 'Et huwa dune ba nahutisye h de, sBá súlhni, 'et whuz un'a za dune ba nahusyeh-un, 'et ts'ih'un un'a 'uhoont'oh.

31 Sich'oh sghun nohdúsní de, 'aw la nohba 'álha lhe'hóst'e'.

32 'Et 'uyoon 'unt'oh-un, 'en si sghun ts'iyanne dune whúbunulhtun 'ink'ez si sghun daja ni, 'álha 'uhoont'oh 'et t'ewhunúszun.

33 'Et nohni 'uyoonne, 'enne John ts'un whébilh'a', 'et daja ni la, 'et khuni 'álha' 'unt'oh-i be ubudáni'.

34 'Aw dune si sghun daja ni la, 'et huwa za íloh, njan ndúhoont'oh-un huwun nohdúsní, 'et huwa la whedóohjih 'ínka 'unohdúsní.

35 John 'en la too dízk'un 'ink'ez be hóot'en-i 'oots'u hayándi 'et ndánt'e'. 'Atsulyz wheni ndi be hóot'en-i, 'i be whunúlhni inle'.

36 'Et hoontsi' John si sghun 'uyoonne whúbunilhtan-un, 'on nus 'uwulhuló-un, 'et whust'i. Ndi 'ut'en 'i sBá stl'ayán'ai lhádóosdeh wheni, 'i 'ut'en 'aw 'i za ooghásna, 'i gha la 'uyoonne t'ehonózin, sBá 'en whuz de sùtilh'a'.

37 'Ink'ez sBá, mbe la whuz de sùtilh'a'-un, 'en didutch'oh si sghun ts'ih'un un'a whulhtsi. 'Aw yalhdúk whe lhduzúts'o, 'ink'ez dant'óh-un unli 'aw lhuzih'en.

38 'Ink'ez ooghuni 'aw lhóohtun. Mbe whuz de yútilh'a'-un 'aw nohba 'álha lhe'ít'oh, 'et huwa ooghuni 'aw nohyo lhdi'oh.

39 Yak'usda ooghuni 'uk'unusgúz-i, 'i be 'ilhiz huye khúna-i aht'i nahzun, 'ínka 'áht'en soo cho bodulh'eh, 'ink'ez ndi khuni 'uk'unusgúz-i, 'i si sghun za 'unt'oh.

40 Si sgha la 'ilhiz oole' huye khúna-i ooht'e', 'et hoontsi' 'aw sts'u tóohdilh hukwa lhe'náhzun.

41 'Aw dunene ye súdilhti'-i óschoot aít'oh,

42 'et hoontsi' nohni nohghun ts'iyawh t'éoonúszun. Nohyo ts'e daht'oh whe 'aw Yak'usda ook'elhátsi' 'et t'ewhunúszun.

43 SBá 'en boozi' gha whusásya, 'et nohni 'aw ska lhe'náhzun, 'et hoontsi' 'uyoon te didutch'oh dudoozi' gha whusaínya de, 'et de da' 'en ooka' noohzin.

<sup>44</sup> Nohnich'oh nohtoh lhudúhlti'. 'Et hoonts'i, ndai la be 'úzdilhti'-i Yak'usda didutch'oh oots'u haídilts'ut-i, 'i 'aw ookúlhnuzahtoh, 'et huwa nts'en'a nohba 'alha whutat'elh?

<sup>45</sup> SBá 'en oobut la nohk'éhos'alh khun te noohzin junih! 'Uts'un un'a cha hoonli. Yak'usda neba lhúhizye'-un, 'i Moses 'en yutl'aídan'ai ínle', 'i oot'anínuhtan hoonts'i, 'i la nohk'ého'alh.

<sup>46</sup> Ndi Moses 'uk'uneyúzguz-i, nohba 'alha 'unt'oh de, 'et de si sghun cha da nohba 'alha 'uhót'e', Moses si sghun 'uk'unéyuzguz-i 'unt'oh 'et huwa.

<sup>47</sup> 'Et hoonts'i ndi Moses 'uk'unéyuzguz-i 'aw nohba 'alha lhe'yít'oh 'et huwa nts'en'a suba si sghuni 'i nohba 'alha 'oot'e'," 'et Sizi ndubulhni.

## 6

### *Huwa 'ít'en-i gha 5,000ne dunene Sizi huyoo'alh-i bugha nín'ai*

<sup>1</sup> 'Et hukw'elh'az Galilee bun k'ut 'et Sizi nyan whinki, 'i bunghun za Tiberias bun k'ut huyúlhni.

<sup>2</sup> Ndudane butoh tube huwa 'ít'en tune' 'ut'en 'et hinilh'en, 'inka tube lhane 'ilhunaosdilne, 'enne huyununúdhil.

<sup>3</sup> 'Et Sizi yasúya whe yugha hodul'ehne tubulh, 'on do shusyaz k'ut 'et nátl'a'hudilts'i'.

<sup>4</sup> 'Et 'awet whenghoh whudizulh Lizwifne Yak'usda oolizas Butus Lhuséya whúnahulnih-un.

<sup>5</sup> 'Et nyo shusyaz k'ut Sizi whunilh'en tube lhane dune hits'ú lhodulh, 'et ubunilh'en whe la Philip 'ulhni, "Nts'e za lhes ts'oket ha la, 'et de da' ndunne dune 'uhoo'alh?"

<sup>6</sup> 'Et Sizi didutch'oh datínelh la t'éwhunínzun, 'et hoonts'i Philip 'en yóolhdzi whe 'utni.

<sup>7</sup> 'Et Philip 'utni, "\$200.00 'udustl'us 'ultsuk-i, lhes 'aw buba soo lhe'yiltsuk, 'i 'ilhoghun hinli whe ntsool-iyaz han'al 'et hoonts'i."

<sup>8</sup> 'Et 'ilhoghun Sizi yugha hodul'eh-un, Andrew, Simon Peter bulhutsin, 'en Sizi 'uyulhni,

<sup>9</sup> "Njan 'ilhoghun duneyaz netoh 'ut'en-un, 'en lhes sut'e kwulai' cha 'ink'ez lho nt'um-iyaz nanki cha, 'i yut'i, 'et hoonts'i di oole' lhe'ultsukne yuti'ulh huba?"

<sup>10</sup> 'Et Sizi 'utni, "Ts'iyanne hudólts'i' budáhni." 'Et nyo 'uhut'en-un tl'oyaz k'ut hoonli, 'et dunene 5,000ne at'enne hinli whe 'et natl'áhudilts'i'.

<sup>11</sup> 'Et Sizi lhes yílhchoot, Yak'usda ts'un musi ni whe tenadidli, 'ink'ez yugha hodul'ehne butl'ayánla, dilhts'íne ts'iyawh butahuyólelh wheni. 'Et lhoyaz yílhchoot 'ink'ez 'i cha 'et ndúyinla. Ts'iyanne soo 'últuk whe huyílhchoot 'ink'ez hiyan'al.

<sup>12</sup> 'Ink'ez ts'iyanne 'uhunisdai whe, Sizi yugha hodul'ehne ubúlhni, "Ndai la ch'utízkát-i, soo ts'iyawh nalhdzoo, 'et de la 'aw hoonli nintaookat aít'oh."

<sup>13</sup> 'Inka soo ts'iyanne 'an'al hukw'elh'az, ndai la highá 'oz'al-i ndi kwulai' lhes sut'e 'ink'ez nanki lhoyaz bulh, ch'utízkát-i nahuyalhdzoo whe whuzyai 'on 'at nanki chalyal 'i dizbun.

<sup>14</sup> 'Et ndunne dune honalh'en whe Sizi dahoolcho-un la 'uja-un, "'Et 'alha' hoont'oh whe ndun 'en nus hóo'en-un ndi yun k'eítayal-un, 'en 'unt'oh," hutni.

<sup>15</sup> 'Et Sizi t'éwhunínzun dulerwe tileh-un, 'et nehuyuntayulh hukwa' hun-inzun, 'inka doo cha za dich'oh shusyaz k'uz whenája.

### *Sizi too k'ut nuya*

<sup>16</sup> 'Awet hulgha sulí' whe yugha hodul'ehne bunghun ts'e nahoosdil,

17 'ink'ez ts'i be náhidil nyan keyoh Capernaum ts'e whuz nahutikelh hukwa huninzun. 'Awet tube tsahólhgus sulí 'ink'ez Sizi 'awhuz bughu nalhusdai.

18 Tube nilhtsi ulhtus, 'et huwa too k'ut tatsi díncha.

19 'Awet bunghun lhulcho at'en hikelh whu la, Sizi too k'ut uyalh whe hitil'h'en, 'ink'ez 'awet butsi ye nghoh úyalh whe tube húnuljut.

20 'Et, "Nulhjut íloh, si 'ust'en!" ubúlhni.

21 'Et ndúbulhni hukw'elh'az huhóont'i' whe butsi be naja. 'Et bughu denája ibulh, 'a ho nts'e la yun k'ut hutizki ts'e, 'et yahúzki.

*Sizi 'ilhosdílne ubúlhni, "Si ndi lhes 'ilhiz oole' huye khúna-i, 'i 'ust'oh"*

22 'Om bun dzin 'et la ndunne bunghun ts'e 'ilhozdil inlé'ne, ts'iyaz 'ilho za 'et hinalh'en ínle', 'et huwa Sizi 'aw yugha hodul'ehne bughu denálhidal, hiyit whenáki t'éhonínzun.

23 'Et hoontsi nyo ndet da' neMoodihti Yak'usda ts'un lhes ba tenadidli 'ink'ez dune tainínla huyoo'alh-un wheni, 'et whuzih, 'et hukw'elh'az 'uyoo ts'i cha Tiberias whuz de hainkat.

24 'Et nyo 'ilhozdílne ts'iyawh t'éhonanzin Sizi hooloh 'ink'ez yugha hodul'ehne cha ts'iyawh huhooloh, 'et huwa didut cha ts'iyawh ts'i be hándil 'ink'ez nyan Capernaum ts'e hoozki Sizi hikunúta wheni.

25 'Et ndunne 'ilhozdílne bunghun lhéya huninki whe Sizi nahuyilhti 'ink'ez huyoodulhkút, "Rabbi nkeda' njan 'et whusaínnya?" húyulhni.

26 'Et Sizi 'ubúlhni, "Soo ts'ih'un un'a nohdúzni, 'aw njan nohnal huwa 'ít'en túne' 'ust'en-un, 'et huwa za iloh skunáhta. Ndi lhes nohgha nús'ai, 'ink'ez be soo 'uhja, 'i ha za 'aht'en skunúhta.

27 Ndi t'alh-i gak nadleh whe 'unt'oh, 'aw 'i iloh ookunáhta, k'us ndi 'ut'alh-i dune 'ilhiz oole' huye khúna-i, 'i za ookunáhta. Yinka dune ye, 'en la 'i nohghá yo'alh, ooBá Yak'usda 'en yugha óonin'ai, 'en ooYe' 'unt'oh 'et huwa."

28 'Et 'uhuyúlhni, "Dats'út'en whe ndi Yak'usda be 'ut'en 'uztilh'elh?"

29 'Et Sizi 'ubulhni, "Mbe la ndun Yak'usda nohts'u whusayáhl'a'-un, 'en nohba 'alha 'oot'e'. Ndi 'i Yak'usda be 'ut'en 'unt'oh."

30 'Et 'uhuyúlhni, "Dant'i 'ut'en 'utalh'elh? 'Ilhoghun huwa 'ít'en-un neba 'uhoonleh, 'et de la ts'onoolh'en, 'ink'ez neba 'alha 'ont'e'.

31 Wheni netsoda'ne 'aw dune lhuhoot'ih-un ts'e manna ndus de hainkat-i, 'i huyan'al. Yak'usda be 'udust'l'us k'ut 'uk'unusguz-i ooghuni, 'i 'utni, 'Lhes yak'uz hainkat-i, 'i bughá ín'in'ai huyoo'alh wheni, ' "huyulhni.

32 'Et Sizi 'ubulhni, "Soo ts'ih'un un'a nohdúzni, 'aw Moses 'en íloh ndi lhes yak'uz hainkat-i nohgha yá'aih ínle', 'et k'us sBá 'en 'ut'en yak'uz whules nohgha yú'aih.

33 Ndi Yak'usda ooles 'en 'unt'oh ndus de yak'uz háinya 'ink'ez yinka whudune'ne 'ilhiz wheni huye khútinalh-i bughá nín'ai."

34 'Et 'uhuyúlhni, "NeMoodihti, 'andit whuts'un 'ahoolhyiz ndi lhes negha ín'aih."

35 'Et Sizi 'ubúlhni, "Si 'ust'oh ndi lhes ndai la dune yugha khúna-i usdli. Mbe la sghu yaih-un, 'en 'aw 'ilhiz wheni ooye'óolts'ilh aít'oh, 'ink'ez mbe la si ooba 'alha 'ust'oh-un, 'aw 'ilhiz wheni ta'óda' aít'oh.

36 'Et nohdúzni 'andit sih'en 'et hoontsi 'aw nohba 'alha lhe'úst'oh.

37 Mbene la sBá sgha bunínlane, 'enne la sts'un hútoodilh, 'ink'ez mbe la sghu yaih-un, 'aw ooch'az naóoz'ah aít'oh.

38 'Et hukwa ndus de yak'uz ts'e hášya. 'Aw sich'oh hukwa' nuszun te né'tist'en huba iloh, mbe la whuz de sútilh'a'-un, 'en nts'oh tula daóotanelh hukwa' ninzun-un, 'i 'ut'en oosdleh wheni whusásya.

39 'Ink'ez sBá, whuz de sútilh'a'-un, 'en mbene la sgha buninlane 'aw 'ilhoghun hoonts'i nintaostelth hukwa lhe'nízun, 'ink'ez la 'udek'ez dzin de dunábudutásdleh.

40 Mbene la Yak'usda ooYe' t'einínzunne 'ink'ez 'en buba 'alha 'uyint'ohne, 'ilhiz wheni huye khúna-i hitát'elh, 'ink'ez 'udek'ez dzin de 'enne dunábudutásdleh. Ndun whuz de sútilh'a'-un njan 'et hukwa' ninzun 'et huwa," ubúlhni.

41 'Et Lizwifne Sizi hich'az yáwhenilhduk, "Datni whe 'utni si ndi lhes yak'uz ts'e halts'ut-i 'ust'oh ni?"

42 'Ink'ez cha 'uhutni, "Nilh'en lhe'hoont'oh k'un'a yalhduk! Ndun 'utní-un, 'en Joseph ooye' Sizi 'en 'unt'oh, 'ink'ez oobá cha, ooloo cha, t'ébuznínzun. Nts'en'a 'utni ndus de yak'uz ts'e hášya ni?" hutni.

43 'Et Sizi 'ubúlhni, "Aw nohni nohtoh sch'az yálhduk iloh!

44 Mbene la sBá sts'ú butilh'a'ne, 'enne za la sts'un hutoodilh, 'ink'ez 'udek'ez dzin de 'enne dunábudutásdleh.

45 Nus hoo'enne ndi 'i 'uk'unuhúyuzguz ínle', 'Yak'usda 'en ts'iyanne hubo-dutilh'e,' 'Et huwa mbene la sBá highuni dants'o 'ink'ez 'i gha huhodil'e' de, 'enne 'uhutinelh sts'un hutidulh.

46 'Aw sBá yan'enne hooloh 'et hoonts'i ndun Yak'usda oots'u haínya-un 'unt'oh, 'en za yan'en.

47 'Alha' nohdúsni, mbene la si buba 'alha 'ust'ohne, 'enne 'ilhiz oole' huye khúna-i hut'i.

48 Si 'ust'oh lhes dune ye khúna-i, 'i usdli.

49 Nohtsoda'ne 'aw dune luhoot'ih-un ts'e huwhut'i ínle', 'ink'ez manna 'i huyan'ulh 'et hoonts'i yahadla.

50 'Et ndi lhes yak'uz ts'e haínkat-i, mbene la yan'al de, 'aw dahóotsah aít'oh.

51 Ndi lhes yak'uz ts'e haínkat-i, 'ilhiz oole' wheni huye khúna-i, 'i 'ust'oh. Mbene la ndi lhes yan'al de, 'enne 'ilhiz wheni hukhutinalh, 'ink'ez ndi lhes nohgha tís'alh-i, 'i syust'e 'unt'oh. 'I huwa tís'alh, 'i gha la yinka whudune'ne, 'ilhiz oole' wheni hukhutinalh," ubúlhni.

52 'Et doo cha ndunne Lizwifne huwun lhdulhyoh 'uhudutni, "Nts'en'a ndun dune ooyust'e ts'uti'ulh?" hutni.

53 'Et Sizi 'ubulhni, "Ts'ih'un 'unohdusni, 'aw ndun yinka dune ye' ooyust'e lháh'ulh 'ink'ez buzkaí' cha lháhtnel de, 'et de ndi 'ilhiz wheni huye khúna-i 'aw lháht'ih whe 'uht'oh.

54 Mbene la syust'e yan'al 'ink'ez suzkai' cha hitnai, 'enne 'ilhiz wheni hukhutinalh 'ink'ez 'udek'ez dzin de dunábudutásdleh.

55 Syust'e soo 'ut'alh-i 'unt'oh 'ink'ez suzkai' cha soo utnai-i 'unt'oh.

56 Mbe la syust'e yan'ál-un, 'ink'ez suzkai' cha yitnai'-un, 'en 'ilhiz wheni sulh 'útit'elh 'ink'ez si cha bulh 'útit'elh.

57 sBá, 'ilhiz wheni khuna-un, 'en whuz de sútilh'a'. 'En gha si cha 'ilhiz wheni khusna. 'Et whuz un'a mbene la sk'ut dune unline, si sgha 'ilhiz oole' hukhutinalh.

58 'I 'unt'oh, ndi soo lhes unli whe ndus de yak'uz ts'e haínya. 'Aw manna dulhilt'oh nohtsoda'ne 'aw dune luhoot'ih-un huwhut'i 'ink'ez huyan'al inle', 'et hoonts'i yahadla. Ndi lhes 'andit ooghu yasduk-i, mbene la yan'álne, 'ilhiz wheni hukhutinalh," ubúlhni.

59 Sizi njan 'et ndutni inle' keyoh Capernaum huwhútni 'et lugliz dune hodul'eh da'.

*Lhane Sizi yugha hodul'ehne hich'a nasdil*

60 Lhane yugha hodul'ehne daja ni la hidánts'o hukw'elh'az 'uhutni, "Njan whuneodul'h'e, 'et neba howu whulna' k'un'a utni. Nts'en'a ookw'úne' 'uztit'en?"

61 Sizi dich'oh t'éwhunínzun daja ni la 'et huwun dudzi yo ts'e hich'az yálhduk, 'inka yugha hodul'ehne uboodulhkut, "Nohba dzoh 'úusni eh?"

62 'Ink'ez yinka dune ye' ndo nts'e la whutso da' usda ts'e, whuz nadalh nulh'en de, daja ntihazilh?

63 Ndoni 'en 'ut'en yinka dune'ne 'ilhiz hukhutinálh-un bugha whu'aih. Dune just'e a'alh-un, 'aw hoonli lhuhooh whe' hoot'oh. Ndi khuni be nóhbulh yasduk-i, Yak'usda oots'u haídankat-i, 'i 'unt'oh 'ink'ez 'i be la 'ilhiz wheni hukhutinálh.

64 'Et hoonts'i nohtoh whulohne 'aw nohba 'alha lhe'hoot'oh." Sizi 'uda' t'eeonínzun mbene buba 'alha lhe'hoot'oh, 'ink'ez mbe ye 'óotakulh-un, 'et cha t'eeonínzun 'et huwa.

65 'Et Sizi 'utni, "Inka 'unohdúsnih, mbene la sBá bugha óonin'aine, 'enne za sts'un hutídulh whe' hint'oh," ubúlhni.

66 'Et whuts'un lhane yugha hodul'ehne hich'a nasdil 'ink'ez 'aw 'on 'at huyulh núlhusdil.

67 'Et Sizi ndunne whunizyanne 'on 'at nane yugha hodul'ehne uboodulhkut, "Nohni cha eh sch'a natihdulh hukwa' nahzun?" ubúlhni.

68 'Et Simon Peter 'uyúlhni, "NeMoodihti, mbe suba oots'uztoodilh? Nyun za khuni 'ilhiz wheni be ts'úkhuna-i 'int'i,

69 'ink'ez neba 'alha' 'int'oh. T'éts'onínzun nyun Christ 'en 'int'oh. Yak'usda 'ilhiz wheni khuna-un, 'en ooYe 'int'oh!" yúlhni.

70 'Et Sizi 'ubulhni, "Alha nohni whunizyanne 'on 'at nane, 'enne 'utáhanóhisla, 'et hoonts'i nohtoh 'ilhoghun 'en netsudule unli."

71 Judas Iscariot, Simon ooye, 'en ghu yalhduk whe 'utni, 'en 'utinelh 'awet ye 'óotakulh t'éwhunínzun 'inka 'utni. 'En cha whunizyanne 'on 'at nane 'ilhoghun butoh 'unt'oh.

## 7

*Bulhutsinke 'aw buba 'alha lhe'hóot'oh Sizi 'en Christ 'unt'oh*

1 Njan hukw'elh'az Sizi Galilee yun k'ut za whe nusúya. Lizwifne hizuzilghelh hukwa' huninzun 'et whuch'a 'aw Judea yun k'ut nóya' hukwa lhe'nízun.

2 Lizwifne budzenis whuti, 'et la 'ulbun be yoh nehúwhulih-un\* cha huwhútni, 'awet nilhdukwh whuz'ai.

3 'Et bulhutsinke khuni be' huyulhni, "Njan huwinyalh 'ink'ez Judea yun k'ut ts'e inyalh, 'et de la ngha hodul'ehne ndai 'ut'en oogha ina-un honoolh'en.

4 Mbe la ts'iyanne t'einózin hukwa' ninzun-un 'aw whu'iz ne'oot'en aít'oh. 'Alha hooncha túne' 'int'en de, ndi yun k'ut dunene ts'iyanne nyun nghun t'ehonózin huba 'uhoont'oh!"

5 Bulhutsinke 'enne hoonts'i 'aw ndun Christ 'en 'unt'oh 'aw buba 'alha lhe'hóot'oh, 'inka 'oh te né'hiduni'.

\* 7:2 Njan nimbali nehulih huwhútni-un, 'et la t'l'o 'uhulh'ih hukw'elh'az. Lizwifne 'uda' Moses bulh dune lhuhooh'ih-un ts'e inle' whe whúnahulnih. 'Et whutoh 'et la Jerusalem 'et 'ulbun be yoh nehuhulih 'ink'ez tube cho honúlhni lhih.

6 'Et Sizi 'ubulhni, "Stso whudizulh-un 'awhuz whusalhúwhulh'ts'it, 'et nohni nohts'u hoolts'ulh-un, 'ahoolhyiz lhawhúdint'oh.

7 Ndi yun k'ut dunene 'aw nohni nohts'o dootni aít'oh, 'et si sts'u hudutni. Tank'us 'úhut'en-un ts'iyawh 'et huwun 'ubudúsní, 'et huwa.

8 Whute dzenis whuti ts'e whuz áhdulh. Sghá whunt'ai-un 'awhuz 'aw lhalhódusne, 'et huwa 'awhuz 'aw si dzenis whuti ts'e toosya' aít'oh," ubúlhni.

9 Njan 'et ndubúdani' hukw'elh'az Galilee yun k'ut 'et inda'.

10 Bulhutsinke dzenis whuti ts'e whehandil hukw'elh'az, Sizi didutch'oh cha whu'iz 'et whuz whinya, 'aw dunene bunalh iloh.

11 'Et nyo dzenis whuti whutoh 'et Lizwifne hika itís'en 'ink'ez 'uhutni, "Nts'e 'ut'en whe 'unt'oh?" hutni.

12 'Et la 'ilhozdíline didutch'oh dutoh whu'ízyaz whe highu yalhduk. Whulohne cha 'en unzoo hutni, 'ink'ez whulohne cha 'awundooh ts'iyanne nana'ah, 'et huwa 'en untsi' hutni.

13 'Et 'aw 'ilhoghun hoonts'i ts'et highu yalhulhduk, ndunne Lizwif moodihne bubé hunuljut 'et huwa.

14 'Awet dzenis whuti lhoohoolcho at'en 'uhoot'elh, 'et Sizi ndo lugliz whucho ts'e oozya, 'ink'ez dune hubodulh'eh,

15 'ink'ez daja ni la Lizwifne tube buba hooncha 'ink'ez 'uhutni, "Aw dune hodul'eh ts'e inda' iloh, 'ink'ez nts'en'a stabe 'on nus lhat-un t'éwhunínzun?"

16 'Et Sizi 'ubulhni, "Ndai la bunohodus'eh-i, 'aw si sch'e' iloh 'unt'oh. Mbe la whuz de sùtilh'a'-un, 'en oots'u háidilts'ut-i, 'i 'unt'oh.

17 Mbene la Yak'usda yuk'úne' tit'en hukwa' ninzunne, 'enne la t'ehonózin, ndi khuni Yak'usda oots'u haidilts'ut-i 'unt'oh, k'us sich'oh sghuni be tilah yasduk, 'et la t'ehonózin.

18 'Et dune didutch'oh khuyanalduk de, dich'oh dutáti'-i 'et za hukwunúta whe 'utni. 'Et hoonts'i dune yalhdúk-un, mbe la whuz de yútilh'a'-un, 'en yudutálhti'-un hukwunúta de, 'en ts'ih'un un'a dune unli whe 'utni 'ink'ez tank'us ne'ut'en-i ooghu whéyooloh.

19 Moses 'en ndi khuni ootulhúhise'-i, 'i nohtl'aidan'ai, 'et hoonts'i 'aw ook'únulhe'zucht'en, 'ink'ez di ha sutuzilghelhel hukwa' nahzun?" ubúlhni.

20 'Et 'ilhozdíline 'uhuyulhni, "Ntsi'-i ndúdeh-i, 'i nyudínda! Mbe nyutuzilghelhel-un hukwunúta whe' dini?"

21 'Et Sizi 'ubulhni, "'Et nats'ulyís-un dzin 'ilhoghi 'ut'en ncha-i 'úsdla, 'et nohni huwa 'ih'en.

22 'Andit daja nohdutásnelh la 'et howun nuní nahzut. Moses, 'en gha ooka dune uhli-i, 'i oonaht'us ínle'. ('Aw Moses 'en gha za iloh, nohtsoda'ne, 'enne buts'u hahóolts'ut whe 'uht'en.) 'Ink'ez 'et nats'ulyis-un dzin chalhts'ul doneyaz whulih te, 'on 'at nats'ulyis dzin 'et yuka dune unli-i, 'i huyit'us.

23 'Et ndúhoont'oh whu la Moses be 'udustl'us k'ut ootulhúhise'-i k'ohyis whuch'a, nats'ulyís-un dzin 'et dzin hoonts'i chalhts'ul dune whulih te yuka dune unli huyooh't'as. 'Ink'ez di ha 'et si dune nats'ulyis-un, 'et dzin dune soo ná'usdla 'et hukwa sulh húnulhch'e?

24 'Aw whunulh'en-un 'et huwa iloh dune ba nahahyeh, ts'ih'un un'a 'uhoont'oh hukw'un'a za dune ba nahoohyeh," ubúlhni.

### *Whulohne dune Sizi 'en Christ 'unt'oh huninzun.*

25 Whulohne Jerusalem whut'enne 'uhutni, "Ndun 'en lakw 'unt'oh hituzilghelhel hukwa' huninzun?"



26 'Et njan ts'iyanne dune bez usda 'ink'ez ubulh yálhduk, 'et hoonts'i 'aw dune yudach'e yalhtulhdi. 'Aw whuz un'a lhe'hoot'oh whutole ndunne moodihne, 'enne t'ehonínzun 'et ndun 'en 'alha Christ 'unt'oh?

27 'Et ndun 'en nts'ez de haínya la t'ets'onínzun, 'et hoonts'i Christ whusaínya de, nts'ez de hainya, 'aw 'ilhoghun hoonts'i t'ewhunózin aít'oh," hutni.

28 'Et nyo lugliz whucho dune hodulh'eh whe Sizi soo khuni ti be ubúlhni, "Nohni t'esunáhzun 'ink'ez nts'ez de hásyá-un cha t'ewhunáhzun, 'aw sich'oh sghá iloh whusásyá, 'et hoonts'i mbe la whuz de ha sálh'a'-un, 'en soo ts'ih'un 'en unli whe 'unt'oh, 'en 'aw nohni t'enuzuhzun.

29 'Et 'en oots'u hásyá 'et huwa t'enuszun 'ink'ez 'en whuz de ha sálh'a!'" ubúlhni.

30 'Et hukwa huyólhchoot hukwa 'hit'en 'et hoonts'i oots'un whudilts'ulh-un 'awhuz whusalhúwhulh'tit, 'et huwa 'aw dalhúhuyilel.

31 'Et 'ilhozdílne butoh lhane 'en buba 'alha yint'oh sulí 'ink'ez 'uhutni, "Ndun Christ whusaínya de, ndun yanus toleh huwa 'ít'en te né'tit'en? 'Awundooh!" hutni. 'Et huwa 'en Christ 'unt'oh huninzun.

32 'Et ndunne 'ilhozdílne whuz un'a Sizi highu yalhduk whe Phariseene hubodánts'o, 'et Phariseene 'ink'ez lubret moodihne, neilhchúkne whuz whe halh'a' Sizi hiyólhchoot ha.

33 'Et Sizi t'ewhunínzun 'inka 'ilhozdílne ubúlhni, "Awhuz dzoh sa'yaz tileh 'et nohbulh 'utist'elh 'et 'ink'ez mbe la whuz de ha sálh'a'-un, 'en oots'u nátsidalh.

34 Nohni skunoohta' la 'et hoonts'i 'aw nasóltelh aít'oh, 'ink'ez nts'e la 'ust'oh ts'e 'aw nohni whuz toohya' aít'oh."

35 'Et Lizwifne dich'oh 'ulhodutni, "Nts'e at'en tiyalh whe 'utni? 'Aw nats'ólhtelh aít'oh neúlhni. 'Udun yun k'ut whut'enne, 'enne butuz toleh tiyalh whuz Lizwifne whulohne yahandil inle', 'ink'ez whuz toleh 'udun yun k'ut whut'enne hubodutilh'eh?

36 'Ink'ez njan neúlhni inle', 'Nohni skunóhta' la 'et hoonts'i 'aw nasóltelh aít'oh, 'ink'ez nts'e la tisdalh ts'e 'aw nohni whuz toohya' aít'oh, 'et daja ni whe 'utni?" hutni.

### *Sizi Ndoni butsyúyoozi*

37 'Et 'awet nohwúh'eh-un cho whutoh, 'udek'ez dzin-un, 'et dzin 'uk'enus hooncha. 'Et dzin 'et Sizi butoh usyin 'ink'ez soo khuni ti be bubulh yálhduk, "Mbene la ta'óosdane sts'un túhdilh 'ink'ez uhtnai!

38 Mbene la si ooba 'alha 'ust'ohne, Yak'usda ooghuni 'uk'unusguz-i ndutni, 'Ndi too, 'i 'ilhiz wheni be ts'úkhuna-i, 'enne buts'u haít'ili," ubúlhni.

39 'Et Sizi ndutni whe Ndoni ghun bubulh yaílhduk. Mbene la didut buba 'alha yint'ohne, 'enne buyudútilts'ulh. 'Aw 'aho iloh. Sizi ooba whudálti' hukw'elh'az de, 'et de nduwhutanelh.

### *Dunene Sizi mbe 'únt'oh huninzun-un whe lhch'az nehúdíndil*

40 'Et la 'ilhozdílne butoh ndi khuni hidánts'o whe whulohne, 'enne 'uhutni, "Alha-i be ndun 'en nyoon nus hoo'en-un ooghu yaduk inle'-un 'unt'oh."

41 'Et whulohne cha 'uhutni, "Ndun 'en Christ 'en 'unt'oh." 'Et 'uyoonne cha 'uhutni, "Awundooh! 'Aw Christ Galilee yun k'ut ts'e iloh ha tíyalh!

42 Yak'usda ooghuni 'uk'unusguz-i, 'i ndutni, David yuts'u ha kédanzuten, 'en keyoh Bethlehem huwhútni, David ookeyoh ínle', Christ whuz de ha tíyalh," hutni.

43 'Inka 'et huwa ndunne 'ilhozdílne nyoon 'en ooghun lhch'az nehúdíndil.

44 Whulohne, 'enne huyitálhchulh hukwa' huninzun, 'et hoonts'i dalhúhuyilel.

45 'Et nyoonne neilhchúkne, mbene la lubret moodihne 'ink'ez Phariseene te hubuhalh'a'ne cha hiyit whuz náhoosdil whe ubuhodulhkut, "Di ha whesálhulhtel?"

46 'Et neilhchúkne 'uhutni, "Aw whutso da' 'uyoon dune 'en ndun dune k'un'a yalhulhduk."

47 'Et Phariseene 'uhutni, "Nohni cha eh nohnan'a whe' dahni?"

48 Wheni moodihne k'us Phariseene wheni cha neba 'alha' 'unt'oh nahzun eh? 'Awundooh!

49 'Et hoonts'i ndunne 'ilhozdíline lugliz whucho 'et, ts'iyawh lait'énne 'uhint'oh 'et huwa ndai la Moses 'uk'unéyuzguz-i 'aw dudeni be t'éhinúszun!' hutni.

50 'Et Nicodemus, 'en la 'ilhe 'úlhdsiz Sizi yughu ninya inle'-un, 'en cha Pharisee bubulh 'ilhoghun unli whe dudulh Phariseene ubulhni,

51 "Wheni neba khuni ootulhúhisde'-i, 'i 'utni, dune ooghuni uzdánt's'o 'ink'ez be 'ut'en uznalh'en de, 'et de za ooba nats'uhooyeh huba 'uhoont'oh."

52 'Et 'uhuyúlhni, "Nyun cha eh Galilee yun k'ut ts'e haínya-un inli? Yak'usda ooghuni 'uk'unusguz-i soo cho nilh'en, 'et de la nyeni be t'éoonóznin, 'aw 'ilhoghun hoonts'i nus hoo'en-un, 'en Galilee yun k'ut ts'e haínya-un hooloh!"

53 'Et 'awet ts'iyanne duyoh ts'e whenáhidil.

## 8

1 'Et Sizi shusyaz Olive huyulhni, 'i k'uz whinya.

*Ts'eke dune bulh lubeshi 'uleh whe nahuyúlhtus. Sizi highu hinlíhti 'ink'ez tse be hituzilghelht hutni*

2 'Et 'om bun dzin soo 'uda' 'et Sizi lugliz whucho ts'e oozya. Ts'iyanne dunene highu nindil. 'Et nátl'adida' 'ink'ez whewhubuhóndunilh'e'.

3 'Et whubodulh'eh whe Moses be 'udust'us 'uk'ununáguzne 'ink'ez Phariseene te, ts'eke dune bulh lubeshi 'uleh whe nahuyulhtus, 'en soo buniz 'et néhinilhtí.

4 'Et Sizi 'uhuyúlhni, "Neoodulh'éh-un ndun ts'eke 'en dune bulh lubeshi 'uleh whe soo 'ef nats'ulhtus.

5 Moses khuni ootulhúhisde'-i ootl'aídit'ai, 'i k'ut 'utni, 'Mbene la ndi lubeshi 'ulh'enne, 'enne tse be 'ubuts'uzoolhghelht,' ni. Nyun do' 'et huwun daja dini?"

6 'Et 'onilha huyóolhzih hoonli hukwa hik'eóota'alh 'inka 'uhutni, 'Et Sizi nyo duja 'ink'ez dulasga be yun k'ut 'uk'ene'úsguz.

7 'Et 'awhuz huyoodulhkut whe ndo dunaja 'ink'ez ubulhni, "Nohni nohtoh mbe la lubeshi lhit'ih-un, 'en 'udechoo tse be yuts'e 'oolh'is," ubúlhni.

8 'Et doo cha nyo dunaja 'ink'ez doo cha za yun k'ut hukw'u ne'úzguz.

9 'Et la mbene la whudánt's'o whe neyo ts'e oogha t'ets'oninzun-i\* whúbunilhtan didut cha lubeshi 'ulh'enne hinli, 'ink'ez 'ilhoghun hinli whe hoonyanne 'udetso hidulh whe ts'iyawh highu whenádil 'ink'ez nyoon ts'eke didutch'oh za Sizi yubut usyin.

10 'Et Sizi doná'uja whe nyoon ts'eke whusaílhine huhooloh whunilh'en whe ndun ts'eke 'uyulhni, "Ts'eke ndunne nk'éhoon'a'ine nts'e whe nahidil? 'Aw 'ilhoghun hoonts'i eh mba nahooyeh aít'oh?"

\* 8:9 Ndi khuni, 'neyo ts'e oogha t'ets'oninzun-i,' 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun ts'utni whe' ts'utni.

11 'Et ts'eke 'uyulhni, "Awundooh, 'aw 'ilhoghun hoonts'i hooloh." 'Et Sizi 'uyulhni, "Aw si cha mba nahoosyeh aít'oh. 'Et huwa naindalth 'ink'ez 'on 'at cha lubeshi 'olh'en junih!" yúlhni.

*Yínka whut'enne didut 'unt'oh buba be hóot'en-i unli ubúlhni Sizi*

12 'Et Sizi doo cha za bubulh yálhduk whe ndutni, "Si 'ust'oh yinka whudune'ne buba be hóot'en-i usdli. Mbe la suniyalh-un, 'aw tsálhghus yo hutooya' aít'oh, k'us ndai la be hóot'en-i higha 'ilhiz wheni hutinalh-i, 'i la huyót'e," ubúlhni.

13 'Et Phariseene 'uhuyúlhni, "Nyun ch'oh khuyanaiduk whe' dini, 'et huwa nghuni 'aw ts'ih'un lhe'ít'oh."

14 'Et Sizi 'ubulhni, "Nts'ez de hásysa la t'éwhunúszun 'ink'ez nts'e tisyalh-un cha t'éwhunúszun, 'et huwa daja dusni la, si sghun 'alha 'uhoont'oh, sich'oh 'úusni 'et hoonts'i. 'Et nts'ez de hásysa-un 'ink'ez nts'e tisyalh-un nohni 'aw t'éoonuzúhzun.

15 Nohni dune ba nahihyilh, si 'aw 'uyoonne ba nahusyéhne hooloh.

16 'Et si cha dune ba nahusyeh de, ndi be náhusyeh-i, 'i ts'ih'un un'a 'unt'oh. 'Aw sich'oh za iloh 'ust'oh, sBá, mbe la whuz de sútih'a'-un, 'en sulh 'únt'oh, 'et huwa ndi be dune ba náhisyilh-i, 'i ts'ih'un un'a za 'unt'oh.

17 'Et whuz un'a za 'uk'unusguz ndi khuni nohba ootulhúhise'-i k'ut whe ndutni, 'Nane dune ndet la huhon'én-un lhgha 'úhudija whe howu yahulhduk de, 'et ts'ih'un un'a 'uhoont'oh,' ni whe 'utni.

18 Sich'oh duba yanazduk 'ink'ez sBá mbe la whuz de sútih'a'-un, 'en cha sba yalhduk," ubulhni.

19 'Et huyoodulhkut, "MBá 'en nts'e usda?" 'Et Sizi 'ubulhni, "Aw si 'ink'ez sBá bulh 'aw t'enenuzúhzun. Si t'esunáhzun de, sBá cha da' t'enóhzin oole'."

20 Sizi ndi khuni 'i be yailhduk lugliz whocho 'et dune hodul'eh da'. Nts'e la sooneya nahulhdzóh-un, 'et dune hodul'eh. 'Et 'awhuz ooba whudizulh-un whuts'un hoozulh 'et huwa 'aw lhuhuyílhchulh.

21 'Et Sizi doo cha 'ubúlhni, "Nohghu tisyalh. Ska itóh'en la 'et hoonts'i nohclubeshi bulh la yaóohdlah, 'et huwa nts'e la tisyalh ts'e nohni cha 'aw whuz toohdilh aít'oh."

22 'Et doo cha nyoonne Lizwifne 'ulhodutni, "Nyoon dich'oh toleh na'dutuzilghel? 'Et huwa toleh 'utni, 'Nts'e la tisyalh ts'e nohni cha 'aw whuz toohdilh aít'oh; neúlhni?"

23 'Et 'ubúlhni, "Nohni ndi yun k'ut ts'e hahdil, 'et si ndus de hásysa whe 'ust'oh. Nohni ndi yun k'ut ts'e hahdil, 'et si 'aw ndi yun k'ut ts'e haszut iloh whe 'ust'oh.

24 'Et huwa 'unohdusni nohclubeshi bulh la yaóohdlah. 'Aw nohba 'alha lhe'hóot'oh si mbe 'ust'oh 'et huwun, 'et huwa la nohclubeshi bulh la yaóohdlah," ubúlhni.

25 "Mbe inli whe 'int'oh?" huyúlhni. 'Et Sizi 'ubulhni, "Nohdusni soo 'udechoo whuts'un, 'en za 'ust'oh.

26 'Aw huz tube lhat-un nohni nohghun howu yatisduk, 'ink'ez tube lhat-un nohni nohghun nahutisyeh-un whuz'ai, 'et hoonts'i mbe la ndun whuz de sútih'a'-un, 'en ts'ih'un un'a 'unt'oh. Ndai la oots'un whudásts'o-un, 'et whuz un'a za yinka whudune'ne bubulh yásduk," ubúlhni.

27 'Et hoonts'i 'aw dudeni be t'ehonúszun duBá, 'en ghun bubulh yálhduk whe 'utni.

28 'Et Sizi 'ubúlhni, "Yinka dune ye' ndo dube' dunahtan de, 'et de la soo ts'ih'un mbe usdli-un, 'en 'ust'oh t'éoonóhzin. 'Ink'ez 'aw sich'oh duba moodih nasdli íloh, sBá nts'en'a la whusodalh'e, 'i khuni za be yásduk,

29 'ink'ez mbe la whuz de sútilh'a'-un, 'en sulh 'únt'oh. 'Ahoonlyiz wheni sBá hóont'i' te za ne'úst'en, 'et huwa 'aw sch'a nalhusdai," ubúlhni.

30 'Et ndi khuni ye yailhduk whe tube lhane 'en buba 'alha' yint'oh suli'.

31 'Et ndunne Lizwifne, mbene la Sizi yuba 'alha' 'unt'ohne, 'enne ubúlhni, "Sghuni oohun 'ink'ez ook'úne' 'uht'en de, 'alha' 'uhoont'oh whe sgha hod'ehne ahli.

32 'Ink'ez 'et huwa ndai la khuni 'alha' 'unt'oh-i t'enóhzin, 'ink'ez 'i gha la 'aw 'on 'un 'ulhnáne oohle' aít'oh."

33 'Et 'uhuyúlhni, "Wheni Abraham oots'u haíndene 'uts'int'oh. 'Aw whutso da' 'uyoonne ba 'ulhna lhts'íloh, 'ink'ez di ha' nedíni, nohla nahudutitnih nedíni?"

34 'Et sizi 'ubulhni, "Soo ts'ih'un un'a nohdúsní, mbene la lubeshi 'ulh'enne, 'enne lubeshi ba 'ulhnáne hinli.

35 'Ndet la yoh 'ilhoghun 'ulhna unlí-un, 'aw 'ahoolhyiz 'et lhídoh, 'et ndun yoh whudune'-un ooye', 'en 'ahoolhyiz wheni, 'et usda.

36 'Et huwa ndun ooŷe' lubeshi ch'a nohlanaditni de, 'et de ts'ih'un un'a 'aw 'on 'un 'ulhna oohle' aít'oh.

37 'T'ewhunúszun Abraham oots'u haíndene ahli, 'et hoonts'i sghuni 'aw ooka lhe'náhzun, 'et huwa sutuzilghel'h hukwa' nahzun.

38 'Ndet la sBá whusunilhtan-un, 'et nohdúsní. 'Et hoonts'i nohni nohbá unohulhni, 'oh te né'aht'en."

39 'Et 'uhuyúlhni, "Abraham 'en oots'u haindene ts'inli." 'Et Sizi 'ubulhni, "Abraham 'en ts'u hahde de, 'en be 'ut'en k'oh za da' ne'óoht'en.

40 'Et hoonts'i 'andit si nts'oh te la 'unohdúsní-un ts'ih'un un'a 'uhoont'oh whe Yak'usda ts'un whudásts'o. 'Et hoonts'i nohni sutuzilghel'h hukwa' nahzun. Njan 'et 'aw Abraham be 'ut'en k'oh íloh 'uhoont'oh.

41 'Nohbá be 'ut'en k'oh 'uwuhulh'en." 'Et doo cha 'uhuyúlhni, "Aw wheni soh ulhts'íne íloh 'uts'int'oh! 'Ilhoghun nebá 'en Yak'usda unli!"

42 'Et Sizi 'ubulhni, "Yak'usda 'en nohbá unli de, si sk'eohtsi' oole' da', Yak'usda oots'un hasya 'et huwa. 'Aw sich'oh sghá íloh whusásya, Yak'usda whusasálh'a'.

43 'Nts'en'a la nohbulh yasduk-un, 'aw t'ewhunuzáhzun. Daja nohdusni-un 'aw sudóhts'o hukwa lhe'náhzun 'et huwa.

44 'Netsudule 'en nohbá 'unt'oh. 'Ndet la 'en hukwa' nínzun, 'oh te za ne'óoht'en hukwa' nahzun. Soo 'udechoo da' whuts'un dune ughan-un unli. 'Aw ts'ih'un 'uhoont'oh-un hukwa lhe'nizun, 'et huwa 'aw ndi khuni 'alha' 'unt'oh-i ooghu whéyooloh. Nts'oh tula ne'duni'-un tank'us un'a za yalhduk, dich'oh duk'un'a 'utni 'et huwa. Whuts'it-un unli, 'ink'ez whuts'it-i, 'en za oots'u haídukat.

45 'Et si khuni 'alha' 'unt'oh-i be yasduk, 'et 'aw nohba 'alha' lhe'duzusni.

46 'Aw nohtoh 'ilhoghun hoonts'i si lubeshi 'ulh'en-un usdli doohni' aít'oh. 'Et huwa khuni 'alha' 'unt'oh-i be 'unohdúsní te, di ha 'et nohba 'alha' lhe'duzusni?"

47 'Mbene la Yak'usda ooch'e' unline, 'enne za Yak'usda ooghuni hidits'o. Nohni 'aw Yak'usda ooch'e' lháhlh 'et huwa ooghuni 'aw dóhts'o aít'oh," ubúlhni.

48 'Et Lizwifne 'uhuyúlhni, "Alha-i be nts'uyútni nyun Samaria whut'en-un 'int'oh 'ink'ez ntsi'-i nudúdeh-i nyudínda!"

49 'Et Sizi 'ubulhni, "Aw ntsi'-i nudúdeh-i sghu hooloh, k'us sBá 'en dústi', 'et nohni 'aw sulhdúlhti'.

50 Nts'oh dádúzti' 'et hoontsi' sba 'ants'i 'uhoont'oh. 'Aw 'uyoonne sudólhti' hukwa lhe'núszun, 'et 'ilhoghun sba whudutálhti'-un hoonli, 'en nahiyilh-un cha 'unt'oh.

51 Soo ts'ih'un un'a nohdúzni, mbene la sghuni yoontúnne, 'aw dahóotsah aít'oh."

52 'Et Lizwifne 'uhuyúlhni, "Andit 'awet t'éts'onínzun ntsi'-i nudúdeh-i nyudínda! Abraham 'ink'ez nus hóo'enne yahadla, 'et hoontsi' 'unedíni, mbene la nghuni yoontúnne, 'aw dahóotsah aít'oh díni.

53 Nebá Abraham dazsai inle'. 'En ba nus 'ilcho whe eh 'udini? 'Et nus hóo'enne, 'enne cha yahadla. 'Enne cha buba nus 'ilcho eh? Soo mbe inli dini whe' dini?"

54 'Et Sizi 'ubulhni, "Sich'oh duba naodúzti' de, sich'oh be úscha-i 'ants'i 'unt'oh. 'Et hoontsi' nohni mbe la nohYak'usda dáhni-un, 'en si sBá 'unt'oh, 'ink'ez 'en sudílhti'.

55 'Et nohni 'aw t'elhnázhil, 'et si t'enuszun. 'Aw si t'enusuzun dusni de, 'et de nohni nohk'un'a whuts'it-un usdli whe' dutisnelh. 'Et soo t'enuszun 'ink'ez ooghuni 'ahoolhyiz wheni ook'úne' 'ust'en.

56 Nohbá Abraham tube hóont'i' whe stsó dizulh-un, 'et whuti'elh. 'Awet whunalh'en 'ink'ez tube whunálhni."

57 'Et Lizwifne 'uhuyulhni, "Nilh'en lhe'hoont'oh te ne'dini! 'Awhuz kwulat whunizyai nyeyus k'ut iloh, 'ink'ez 'udini Abraham 'uda' in'en dini!"

58 'Et Sizi 'ubulhni, "Soo ts'ih'un un'a nohdúzni, Abraham whutileh whutso da', 'et 'uda' si usdli whe 'ust'oh."

59 'Et ndúbulhni whe, ts'iyawh tse huyeni dízgooh, 'i be nahúyuntilh'uz 'ink'ez hituzilhghel 'inka. 'Et Sizi buch'a úntilh'i 'ink'ez soo butoh 'et lhunásja whe lugliz whucho 'et tenánja.

## 9

### *Dune whuzdli da' whuts'un hoos'én-un, Sizi soo na'yuleh*

1 'Et Sizi 'oh whuya uyalh whe, dune whuzdli da' whuts'un hoos'én-un yutilh'en.

2 'Et yugha hodul'ehne huyoodulhkut, "Whunehodulh'éh-un ndun dune mbe oolubeshi gha 'úja hoos'en whe whuzdli? Didutch'oh k'us oodusneke bulubeshi k'elha tilah 'uja?"

3 'Et Sizi 'ubulhni, "Aw didutch'oh oolubeshi gha, k'us oodusne bulubeshi gha iloh hoos'en-un unli. Yak'usda be 'ut'en k'oh ooghá t'ewhunoodzeh 'inka 'uja hoos'en whe whuzdli.

4 'Awhuz dzenis hoot'en whe, mbe la whuz de sútilh'a'-un, 'en be 'ut'en oos'en huba 'uhoont'oh. 'Ulhdzis whusahóolts'ut 'ink'ez tsalhgus yo sulí' de, 'aw dune oot'en aít'oh.

5 'Awhuz ndi yun k'ut susda whe, ndi yun k'ut whudune'ne buba be hóot'en-i usdli."

6 'Et ndúdija hukw'elh'az yun 'úntizo, 'ink'ez duzo 'i be whutl'us inla, 'ink'ez nyoon dune hoos'en-un yuna yé yulhlho,

7 'ink'ez 'uyulhni, "Nguz too diz'ai Siloam ts'e inyalh 'ink'ez né'nildeh." 'Et ndi khuni Siloam ni, 'et whél'a', ni whe 'utni. 'Inka whuz whinya, ne'nilde, 'ink'ez hoo'en whe whusanája.

8 'Et ndun hinat whut'ine 'ink'ez 'uyoonne cha, mbene la hoos'en whe hinalh'en da', 'enne 'ulhodútni, "Ndun 'en da' 'oh úsda 'ink'ez datsó-un, 'en eh 'unt'oh?"

9 Whulohne 'uhutni, "A, 'en 'unt'oh." 'Et whulohne cha 'uhutni, "Awúndoo, 'ants'i yundót'en-un 'unt'oh." 'Et ndun hoos'en inlé'-un ubúlhni, "A, si 'ust'oh."

10 'Et 'uhuyúlhni, "Daínja whe hon'en suli?"

11 'Et 'ubúlhni, "Ilhoghun dune, Sizi huyulhni, 'en whutl'us 'ínla, sna k'ut yé sulhlo, 'ink'ez 'usulhni, "Ta diz'ai ts'e, Siloam huwhútni, whuz inyalh 'ink'ez ne'nildeh.' Whuz oozusya 'ink'ez ne'nizde whe 'et hoos'en súli'."

12 'Et doo cha huyoodulhkut, "Ndun dune nts'e 'ut'en?" "Aw t'éoonuzúszun," ubúlhni.

13 'Et ndun hoos'en inle'-un, Phariseene bughu hinílhti.

14 Njan dzin ndun dune Sizi whutl'us 'ínla 'ink'ez hoo'en nayulhtsi-un, 'et nats'ulyis-un dzin 'uyínla,

15 'inka doo cha za Phariseene huyoodulhkt, "Dáhoont'oh-un huwa hon'en suli?" 'Et 'ubúlhni, "Ndun dune whutl'us 'ínla, sna k'ut yé whulhlo, hukw'elh'az ne'nizde, 'ink'ez hoos'en susdli'."

16 'Et ndunne Phariseene whulohne 'uhutni, "Ndun dune ooghu yailhdúk-un, 'en 'aw Yak'usda oots'u haínja-un iloh 'unt'oh. 'Aw nats'ulyis-un dzin hukw'u nulhe'ust'en 'et huwa." 'Et 'uyoonne cha 'uhutni, "Nts'en'a 'uwहत'at'elh, 'aw lubeshi 'ulh'en-un, 'en huwa 'ít'en túne' óot'en aít'oh!" 'Et huwun lhch'a nehudindil.

17 'Et doo cha za ndun hoos'en inle'-un 'uhuyúlhni, "Hón'en nyulhtsi, 'et huwa 'en ooghun daja dini?" "Alha nus hoo'en-un 'unt'oh," ubúlhni.

18 'Et hoontsi' Lizwif moodihne 'aw buba 'alha lhe'hóot'oh, hoos'en inle' whe whuzdli 'ink'ez 'andit 'et hoo'en, 'inka oodusneke 'anilh'ubodáni,

19 'ink'ez ubuhútni, "Ndun 'en nohye' 'unt'oh 'ink'ez whuzdli whuts'un hoos'en nedúhni, 'ink'ez nts'en'a 'andit hoo'en?"

20 'Et oodusneke 'uhutni, "T'ets'onínzun ndun 'en neye' 'unt'oh 'ink'ez whuzdli whuts'un hoos'en inle'.

21 'Ink'ez ndet huwa 'andit hoo'en, 'ink'ez mbe hoo'en yulhtsi-un, 'aw t'ets'onúszun. 'Aw ts'oodun lhiloh whe 'unt'oh, oodulhkut da. Didutch'oh la ts'ih'un un'a nohdóni'."

22 'Et oodusneke t'ehonínzun Lizwif moodihne 'uda' lhgha 'úhudija mbene la Sizi Christ 'unt'oh, 'uyoonne hudáni' de, lugliz 'et whuch'a huntájulh. 'Et huwa ndun dune oodusneke Lizwif moodihne bube hunuljut.

23 Njan hunuljut-un, 'et huwa 'uhutni, "Aw ts'oodun lhilhlhoh whe 'unt'oh, 'en oodulhkut da," hutni.

24 'Et doo cha za whulh nat ndun dune hoos'en inle'-un, "Anih," huyúlhni, 'ink'ez 'uhutni, "Njan daínja-un la Yak'usda 'en ooba whudílhti', 'aw ndun dune 'en iloh, t'ets'onínzun lubeshi 'ulh'en-un 'unt'oh 'et huwa."

25 'Et 'ubulhni, "Lubeshi 'ulh'en-un tilah 'unt'oh, 'aw t'éoonuzúszun. 'Et 'ilhoghun t'éoonúszun, whuzis'en inle' 'et 'andit hoos'en."

26 'Et doo cha za 'uhuyúlhni, "Dányin la inle'? Nts'en'a hon'en-un nyulhtsi?"

27 'Et 'ubúlhni, "Uda' nohdasni' 'et hoontsi' 'aw sulh oozúlhts'ai, di ha 'et doo cha nohdóni' hukwa' nahzun? Soo tuzálhts'ilh hukwa' nahzun eh? Nohni cha eh oogha hodul'ehne tihleh hukwa' nahzun eh?" ubúlhni.

28 'Et soo hoontsi' te ne'hiduni, "Nyun 'en yugha hodul'eh-un inli! 'Et wheni Moses bulh 'út'enne ts'inli!

29 T'êts'onínzun Yak'usda 'en Moses bulh yaílhduk ínle'. 'Et ndun 'en, 'aw nts'ez de hainya-un hoonts'i t'êts'onuszun," huyúlhni.

30 'Et ndun dune hoos'en inle'-un ubúlhni, "Ndun dune hoos'en nasulhtsi 'et hoonts'i nohni 'aw t'éoonuzúhzun nts'ez de haínya duhni! TUBE sba hooncha!

31 T'êts'onínzun Yak'usda 'aw lubeshi 'ulh'enne lhuboozilhts'ai. 'Et mbene la Yak'usda ts'u téní' nilhzunne, 'ink'ez buts'u húkwa' nínzun te ne'út'enne, 'enne za uboozilhts'ai.

32 Soo 'udechoo yinka 'uhóolya whuts'un 'aw dune hoos'en whe whuzdli-un, 'en dune soo ná'yinla-un whulhe'uzdusts'o.

33 Ndun dune mbe la hoos'en nasulhts'i-un, 'aw Yak'usda oots'un iloh 'unt'oh de, 'aw ndóneh aít'oh," ubúlhni.

34 "Whuzinli da' whuts'un nyun lubeshi 'ulh'en-un za inli! Mbe na'dunínzun whe whuneoodlh'eh hukwa' dini?" huyúlhni 'ink'ez 'az tenáhinino.

35 'Et Sizi whulh údants'o Lizwifne nyoon dune tenáhinino, hukw'elh'az nayilh'ti 'et 'uyulhni, "Yak'usda ooYe' ghun mba 'alha 'uhoont'oh eh?"

36 'Et dune 'utni, "Moodihti mbe whe 'unt'oh? Busúniltun 'et de la ooghun sba 'alha hot'e'."

37 'Et Sizi 'uyulhni, "'Uda' in'en whe 'unt'oh, 'ink'ez 'en 'utni nyulh yálhduk."

38 'Et dune yubut nachániti 'ink'ez, "SMoodihti, sba 'alha 'int'oh!" yúlhni, 'ink'ez yuts'u teni' nalhzn.

39 'Et Sizi 'utni, "Ndi yun k'ut whusálya 'et huwa la yinka dune'ne buba nahookeh. Whusálya-un, 'et huwa hoos'enne, 'enne huhoo'en hutileh. 'Et mbene la hoo'enne, 'enne cha huhoo's'en hutileh."

40 'Et whulohne Phariseene yugha hodul'ehne hodánts'o whe, 'et 'uhuyúlhni, "Wheni cha lhts'uhoo's'en dini whe eh dini?"

41 'Et Sizi 'ubulhni, "Whuzih'en de, nohni 'aw lubeshi nohba hooloh. 'Et 'uduhni, 'Wheni ts'oo'hoo'en, 'dahni, 'et huwa lubesh nohba hoonli."

## 10

*Sizi hubodulh'eh whe 'utni, "Si 'usbai ghunli-un 'ust'oh. Mbene la soo sulh 'út'enne, 'enne se' 'usbai hinli."*

1 'Et Sizi 'ubúlhni, "Soo ts'ih'un un'a nohdusni, mbe la 'usbai ba na'nistl'óo-un 'aw dáti k'et dálhiyal 'ink'ez 'ants'i nanist'oo tus tilhget de, 'en dune 'undunut'ih-un 'unt'oh.

2 'Et mbe la dáti ts'e dayaih-un, 'en 'usbai ghunli-un 'unt'oh.

3 'En dáti ghunli-un yuba dahá'duti. 'Et la de 'usbai, buboozi' be buka huyih te, hidits'o huwa t'ehinínzun 'ink'ez 'az huyuntulh'us.

4 Tenábulih hukw'elh'az, 'et butso tuyaih 'ink'ez 'usbai ts'iyawh huyunilh'us, highuni t'ehinínzun 'et huwa.

5 'Et 'ants'i 'oh nuya-un, 'en 'aw huyuntoolh'as aít'oh. 'Ants'i 'oh núya-un 'unt'oh 'aw ooghuni t'ehinúsun 'et huwa hich'a nutselhdilh," ubulhni.

6 'Et Sizi ndi higha hódool'eh ha bubulh náwhulnuk 'et hoonts'i daja ni whe 'utni-un 'aw t'ehonúsun.

7 'Inka doo cha za Sizi ubulhni, "Soo ts'ih'un un'a nohdúsni, Si 'usbai ba dáti usdli whe 'ust'oh.

8 Mbene la stso whusaíndilne, 'enne 'undunut'ihne 'uhint'oh 'et huwa 'aw 'usbai lhuboozilhts'ai.

9 Si datí-un 'ust'oh. Mbene la si sgha daníndilne, 'enne ts'iyawh hudutjih. Dahúnindil 'ink'ez whuz 'az whehándil de, t'l'o k'ut nahuhootá'alh.

10 'Undunut'ih-un, 'en 'uduntit'ih 'ink'ez dune tuzilhghel'h 'ink'ez ninta' e'tilh'elh 'et wheni za dayaih. 'Et si whusásya whe 'ilhiz wheni huye khúna-i hutit'elh 'ink'ez ndi 'ilhiz huye khúna-i, 'i huyut'i de, 'aw hoonli huye ndunódzit aít'oh.

11 Si 'usbai ghunli-un unzóo-un 'ust'oh. 'Usbai ghunli-un unzóo-un, 'en la ye khúna-i dude 'usbai ba yuladutitni.

12 'Et ustle-un ul'á'-un, 'en 'aw 'usbai ghunlí-un iloh 'unt'oh. 'Ants'i 'usbai yughole' ha ul'a'. 'Usbai 'aw ooch'e' iloh 'uhint'oh, 'et huwa yus whuz de úlgwulh yunilh'en te, 'usbai bula dutnih 'ink'ez whetsélhyai. 'Et yus whulohne hoboogoo' 'et 'onghunne cha hich'e yáilwus.

13 Nduun ustle-un ul'á'-un, 'en 'ants'i ul'á'-un 'unt'oh, 'et huwa 'usbai 'ants'i hiba unli 'ink'ez didut bughu whetsélhyaih.

14 Si 'usbai ghunlí-un unzóo-un 'ust'oh, 'et huwa mbene la usche'ne t'ebunúszun 'ink'ez didut cha t'ésónínzun.

15 'Et whuz un'a za sBá 'en t'ésunínzun 'ink'ez si cha t'enuszun. 'Ink'ez se' 'usbaine be khúsna-i buba oola dutisnih.

16 'Uyoo cha 'usbai 'ust'i-i hoonli. 'Aw ndi toh iloh. 'Enne cha whusáboosdle'h huba 'uhoont'oh. Sghuni hidóts'o, 'ink'ez la 'ilhoh ulh'us-i za hutileh 'ink'ez 'ilhoghun za 'usbai ghunlí-un ahutáleh.\*

17 Se' 'usbaine ba be khúsna-i oola dutisnih 'et huwa la be khúsna-i doo cha za naóozchoot. 'Et 'inka sBá tube sk'entsi'.

18 'Aw be khúsna-i dune sghu yólhchootne hooloh. Sich'oh za huwa tís'alh. Ndi be khúsna-i huwa tís'alh 'ink'ez naitázchulh-un, 'et sghá whunt'ai whe 'ust'oh. sBá 'en 'uja ndi khuni stl'aídan'ai ndi 'ut'en 'oos'en ha," ubúlhni.

19 Ndi khuni 'i gha doo cha Lizwifne dich'oh dutoh lhch'a hudisdil.

20 Tube lhane, 'enne 'uhutni, "Ntsi'-i nudúdeh-i ooyudínda! Whusni whe' 'utni, di ha oozúlhts'ai?"

21 'Et 'onghohne cha 'uhutni, "Aw ntsi'-i nudúdeh-i ooyudínda-un, 'en ooghuni iloh 'utni. Nts'en'a ntsi'-i nudúdeh-i, 'i dune hoos'en-un, 'en hoo'en yutílttselh?"

### *Lizwifne Sizi 'aw hika lhe'nízun*

22 'Et 'awet khít suli'. Jerusalem keyoh 'et nowhújuh-un néhonin'ai. 'Et njan 'awhundidi nahuwhulhtsi huwhútni.†

23 'Et lugliz whucho bun tsilh t'ah 'et la Solomon oobun tsilh t'ah huwhútni, 'oh whéya Sizi uyalh

24 whe la Lizwifne higha óozdil 'ink'ez huyoodulh'kut, "Dawhuldzoh 'et nech'a hóotalh'e'. 'Alha whe Christ 'en 'int'oh de, 'andit 'et ts'ih'un un'a nedíni."

25 'Et Sizi ubúlhni, "Uda' nohdásni" 'et hoon'ts'i 'aw nohba 'alha lhe'duzusni. Ndi sBá booz'i' gha 'ut'en 'us'éni, 'i gha si sghun cha t'éwhunóh'zin huba 'uhoont'oh.

26 'Et hoon'ts'i nohni nohdúsni hukw'un'a 'aw se' 'usbai iloh 'aht'oh. 'Et huwa ndi 'ut'en 'us'éni 'aw nohba 'alha lhe'ít'oh.

27 Se' 'usbaine t'ebunúszun. Sghuni hidits'o 'ink'ez sunónudilh.

28 'Ilhiz huye khútinalh-i, 'i bughu nús'ai. 'Aw yal'ahitásdla 'ink'ez 'aw dune sla k'éhaboolelhne hooloh.

\* **10:16** 'Et ndi 'udechoo ulh'ús-i, 'i Israel oots'u haindene ubúlhni. 'Et ndi 'uyoo ulh'ús-i yughu yal'hduk, 'i 'udun yun k'ut whut'enne 'uhint'oh. 'Enne 'awhuz Sizi huyulhé'dusts'o 'et huwa 'aw buba 'alha lhe'yit'oh. † **10:22** 'Et njan nowhújuh-un, 'et la Lizwifne whunahulnih 'uda'yaz inle' whe lugliz whucho, dune untsi'-un danínya whe ninta' whunílh'en. 'Inka hukw'elh'az Lizwifne 'awhundidi nahuwhulhtsi 'et huwa la dahóodulh 'ink'ez Yak'usda ts'un téni 'uhunoolh'zin 'inka.



<sup>29</sup> SBá, mbe la sghá buninla-un, ts'iyanneando 'unt'oh, 'ink'ez mbene la sch'e' sulí'ne, 'enne 'ilhiz sulh ótít'elh. 'Aw dune soo 'últus-un hooloh sBá yula k'éhanabutilelh wheni.

<sup>30</sup> Si 'ink'ez sBá bulh 'ilho za ídli," ubúlhni.

<sup>31</sup> 'Et doo cha za Lizwifne tse hiye hituzilhghel-hi hidílhchoot.

<sup>32</sup> 'Et Sizi ubulhni, "SBá be 'ut'en k'oh hoonzóo-un lhat-un si sgha whunulh'en. 'Ink'ez k'us ndet hukwa' sutilhlelh tse be suzoolhghel hukwa' nahzun?"

<sup>33</sup> 'Et Lizwifne 'uhuyúlhni, "Aw 'ut'en unzóo-i, 'i ha iloh tse be nts'utuzilhghel! Nyun 'ants'i 'oh dune inli 'ink'ez Yak'usda ch'az yáilhdud. Nyunch'oh Yak'usda na'dudil'i, 'et hukwa tse be nts'ituzilhghelh."

<sup>34</sup> 'Et Sizi ubúlhni, "Aw lakw eh Yak'usda ooghuni oonalhuzulhni whe njan Yak'usda nja dunohúlhni inle', 'Nohni yak'usdane ahli?"

<sup>35</sup> T'éts'onínzun 'aw Yak'usda dughuni k'uoyoyis aít'oh, 'ink'ez mbene la Yak'usda ooghuni ooghi dílts'utne, 'enne yak'usdane ubúlhni.

<sup>36</sup> 'Et Yak'usda ooYe' usdli nohdúsni-un, 'et whu la gha ts'e Yak'usda ch'az yásduk dahni whe sk'ehoo'h'aih. SBá 'en 'udun nésunilhti whe ndi yun k'ut ts'e sutilh'a'.

<sup>37</sup> SBá be 'ut'en lhe'zus'en de, whute, nohba 'alha lhe'úst'oh.

<sup>38</sup> 'Et hoonts'i sBá be 'ut'en us'en de, 'aw si nohba 'alha lhe'ust'oh hoonts'i, ndi 'ut'en us'en-i, 'i gha nohba 'alha 'uhot'e'. 'I gha la noheni be t'éwhunóhzin 'ink'ez nohba 'alha 'uhót'e' sBá 'en syudínda 'ink'ez si cha ooyudúsda," ubúlhni.

<sup>39</sup> 'Et doo cha za huyólhchoot hukwa 'uhuja whe Sizi butáhanája 'ink'ez buch'a nintaninya.

<sup>40</sup> Jordan koh nyaz ts'e ndet da' John 'udechoo dune too be 'ulh'en inle'-un, whuz whenaja 'ink'ez 'et inda'.

<sup>41</sup> Lhane dune highu nindil 'ink'ez 'ulhodút'ni, "John 'aw huwa 'ít'en te nulhé'it'el, 'et hoonts'i ndun dune 'en ghun daja dani' la, ts'ih'un 'udani'."

<sup>42</sup> 'Ink'ez nyo 'et tube lhane ooba 'álha yint'oh sulí'.

## 11

### *Lazarus dazsai whe Sizi nahuyílhna'*

<sup>1</sup> 'Ilhoghun dune Lazarus huyúlhni, keyoh whuyaz Bethany huwhút'ni, 'et whut'en-un. 'En la unduda sulí'. Bulhtuske nane Mary 'ink'ez Martha bulh hizih whut'i.

<sup>2</sup> Ndun Mary 'en 'uja ínle' neMoodihti khe sooltsun-i be yuke tunásuguz 'ink'ez dutsigha' be yuna'alhde ínle'. 'En bulhutsin Lazarus 'en unduda.

<sup>3</sup> Bulhtuske Sizi khuni hits'ó t'l'adan'ai, "NeMoodihti dune ook'entsí'-un, 'en unduda," huyúlhni.

<sup>4</sup> 'Et Sizi whulh údants'o whe 'ut'ni, "Aw ndi dada 'ilhiz ye daóotsah aít'oh. Njan undudá-un, 'et whe la Yak'usda ooba whudólti', 'ink'ez 'et whe za Yak'usda ooYe' 'en cha ba whudutálti'."

<sup>5-6</sup> 'Et Lazarus unduda-un Sizi whulh údants'o whe Martha, bulhtus cha, 'ink'ez Lazarus cha tube buk'entsí' 'et hoonts'i whut'i-un nat dzin, 'et naná'il'ai.

<sup>7</sup> Nat dzin 'et nada' 'et yugha hodul'ehne ubúlhni, "Doo cha za Judea yun k'ut ts'e naztoodilh."

<sup>8</sup> 'Et yugha hodul'ehne 'uhuyúlhni, "Rabbi, 'andit 'aho Lizwifne tse be nyotúzilhghel hukwa' huninzun 'ink'ez di ha whuz natandalh hukwa' ninzun?"

9 'Et Sizi 'ubulhni, “‘Et whunizyat 'on 'at nat ne'hunut'oh-un sadzi gha 'et 'ilhudzin 'uhoont'oh. Mbene la dzenis nudilhne, 'aw khun tooghalh aít'oh. Ndi yun k'ut be hóot'en-i, 'i be huhoo'en 'et huwa.

10 'Et hoonts'i mbene la 'ulhdzis nudilhne, 'enne nónughalh, 'aw be hóot'en-i bubulh lhé'it'oh 'et huwa.”

11 'Et ndúbulhni hukw'elh'az 'et 'utni doo cha, “Neyadan Lazarus nanisti 'et hoonts'i oots'u tísyalh 'ink'ez ts'enatisdzulh.”

12 'Et yugha hodul'ehne 'uhuyulhni, “NeMoodihti Lazarus nanisti de, 'et de soo na'titnelh whe 'unt'oh.”

13 'Et Sizi njan dazsai-un, 'et howu yalhduk whe 'utni. yugha hodul'ehne, 'enne 'ants'i nanisti 'ink'ez nalyis 'et howu yalhduk whe 'utni huninzun.

14 'Et Sizi soo ts'et gaih ubulhni, “Lazarus dazsai.

15 'Et nohni nohba hoonúst'i 'i 'aw 'et lhúsdoh whe 'uja. 'Et de la nohba 'alha' 'oost'e'. 'Et hoonts'i 'andit 'awet oots'uztoodilh.”

16 'Et Thomas, 'en 'ut'udánda'-un huyúlhni, ndunne yugha hodul'ehne ubúlhni, “Dugwe! Bulh úztoodilh! Wheni cha si bulh yats'odlah!”

17 Sizi whuz oozya 'et nahoon'ai Lazarus 'ahuyalhti whuts'un dit dzin inle'.

18 Njan keyoh wheyaz Bethany huwhútni, 'et Jerusalem tube whenghoh whuz'ai. Ts'iyalh whe 'ilhoh sadzi hukw'e' hoonit'oh at'en 'uwuhldzoh 'uhoont'oh.

19 Tube bubenghoh whuz'ai 'et huwa lhane Lizwifne bughu nindil. Mary 'ink'ez Martha bulh bubulhutsin dazsai 'et whe bunehúdoohya' ha 'et huwa bughu nindil.

20 'Et Sizi whuz de úyalh Martha whulh údants'o whe yududziza. Mary 'en yoh 'awet usda.

21 'Et Martha Sizi 'uyulhni, “SMoodihti, njan sinda inle' de, 'aw da' sulhutsin dalhitsa oole' da'.

22 'Et hoonts'i, 'andit hoonts'i, ndai la Yak'usda oots'o kwa' dini-i ngha íta'alh, 'et t'éwhunúszun.”

23 'Et Sizi 'uyulhni, “Nyulhutsin dunadója' la.”

24 'Et Martha 'uyulhni, “T'éwhunúszun 'udek'ez dzin de, ts'iyanne dunáduátáduh, 'et de la 'en cha dunadója'.”

25 'Et Sizi 'uyulhni, “Si 'ust'oh dunene ts'iyanne dunabudusdle 'ink'ez 'ilhiz wheni huye k'hóona'-i bughu yús'aih. Ts'iyanne mbene la ooba 'alha 'ust'ohne, dahúzsai 'et hoonts'i hukhutinalh.

26 'Ink'ez mbene la 'awhuz khunane 'ink'ez ooba 'alha 'ust'ohne, 'aw dahóotsah aít'oh. 'Et mba 'alha 'uhoont'oh eh?”

27 'Et Martha 'uyulhni, “A sMoodihti, sba 'alha 'uhoont'oh nyun Yak'usda ooYe, Christ, mbe la ndi yun k'eitayalh-un, 'en 'int'oh.”

28 Njan 'et ndudáni' hukw'elh'az 'et dulhtus Mary yughu nanja 'ink'ez whe'ízyaz yúlhni, “Whuneodulh'eh-un whusaínya 'ink'ez nka 'oodulhkut.”

29 Soo whudánts'o ibulh dudinya 'ink'ez yuts'óozya.

30 Sizi 'awhuz keyoh wheyaz whuts'un úyalh whe, ndet da' Martha yududzizá-un, 'et za 'ut'en.

31 'Et ndunne Lizwifne, yoh bez ts'e hizih dilhts'i, hinedíhyai wheni, Mary soo 'a cho dudinya 'ink'ez 'az whinya, hinilh'en 'et huyuntizdil 'ink'ez 'ulhodútni, “Ts'un k'ut ts'e titso wheni whuz tizya whe 'ut'en.”

32 Sizi ndet da' 'ut'en Mary whuz oozya. Soo yutilh'en ibulh yubut dugwutsi be nenínya 'ink'ez 'uyulhni, “SMoodihti, njan 'int'oh de, 'aw da' sulhutsin dalhital oole' da'.”

33 'Et Sizi yunilh'en utso, 'ink'ez Lizwifne mbene la yulh nudilhne, 'enne cha hutso hubunilh'en whe, tube whuts'u disnih 'ink'ez ooyughi whe ooba dzoh 'uhooja,

34 'ink'ez uboodulhkut, "Nts'e 'alhti?" 'Et 'uhuyúlhni, "'Anih, whunolh'en si!"

35 'Et Sizi intse.

36 Lizwifne 'et 'ulhodútni, "Nulh'en dalcho-i be yuk'entsi!"

37 'Ink'ez whulohne 'uhutni, "Hoos'en-un hoo'en nayulhtsi 'inle', 'aw eh ndun dune 'en cha datítsah whuch'a 'uyooleh aít'oh inle'?"

38 'Et Sizi doo cha za dudzi yo whe ooba dzoh 'uhooja, 'ink'ez ni suli' whe ts'un k'uz oozya. Njan ts'un k'ut 'et 'an tse whudádin'ai-un 'uhoont'oh.

39 'Et Sizi 'ubúlhni, "Nyoo tse 'udun dutah'aih!" 'Et Martha dune dazsai-un bulhtus, 'en 'utni, "SMoodihti, ndun 'awet dit dzin 'adalhte' 'ink'ez lhtsun cha suli'."

40 'Et Sizi 'uyulhni, "'Aw lakw lhunyudúsnel inle', si sghun mba 'alha 'uhoont'oh de, 'et de Yak'usda yé dízti-i tan'elh'?"

41 'Et nyo ts'un k'ut dune 'adilhí-un, tse 'udun hidutiz'ai. 'Et Sizi ndo yútan'en 'ink'ez 'utni, "SBá sudánts'o 'inka musi nyudúsní."

42 'Ink'ez t'éwhunúszun 'ahoolhyiz wheni soozílhts'ai. 'Et hoontsi'i njan 'udusní-un ndunne 'ilhozdíhne njan nodilhya, 'et de la nyun whuz de sútílh'a'-un 'alha 'uhot'e'."

43 'Et ndúdiya hukw'elh'az soo khuni ti be yatílhduk, "Lazarus, ndiz ínyalh!" yúlhni.

44 'Et nyoon dune dazsai-un tsa k'ez ts'e hanája. Oola 'ink'ez ooke te 'awhuz naih huyulh 'ábulhtih-i, 'i be oogha 'ósduz, 'ink'ez dzezoh cha oonin 'awhuz oogha yóonasduz. "Ook'una'uh'uk 'ink'ez oola duhni!" ubúlhni Sizi.

45 Ndunne Lizwifne, Mary yughu nindil inle'ne, Sizi bunalh 'uja 'et buba 'alha' yint'oh suli'.

46 'Et hoontsi'i whulohne, 'enne Phariseene buts'un nahoosdil 'ink'ez Sizi nts'oh te ne'ust'en-un, 'et buba hudani'.

47 'Et hukwa lubret bumoodihne 'ink'ez Phariseene yahútilhduk wheni 'ilhúnahosdil 'ink'ez 'uhutni, "Nts'en'a dáztinelh? Ndun dune stabe lhat-un hooncha te ne'út'en!"

48 Whute 'ut'en ts'ilh'i de, ts'iyanne la buba 'alha oot'e' 'ink'ez Romanne whusahándil whe la njan nelugliz whucho 'ink'ez neyun k'ut cha negha hahóhchoot, 'ink'ez la ts'iyawh yats'ódilh."

49 'Et 'ilhoghun butoh Caiaphas huyulhni, 'en la 'et naooduzuk wheni lubret 'uk'enus dízti'-un unli 'inle', 'en ubúlhni, "'Aw hoonli t'éwhunuzúhzun!"

50 'Aw eh huwun nuni lhnuzulhzut, ts'iyanne ba 'ilhoghun dune za dazsai de, 'et de 'on nus soo' whutat'elh, 'et huwa la 'aw neyun k'ut gak hole' aít'oh."

51 Caiaphas didutch'oh iloh ndi khuni yaka ni ntizut, 'et lubret 'uk'enus dízti'-un unli, 'et naooduzuk huba, 'et huwa whuz un'a nus hón'en Sizi 'en 'awet nilhdukw whe ts'iyanne Lizwifne 'et yun k'ut whut'enne ba datítsah.

52 'Et 'aw Lizwif didowhne, 'enne ba za iloh. Mbene la Yak'usda buzkeh unline, nts'e la yahandil, 'oh whut'enne, 'enne buba cha. 'Et huwa la ts'iyawh 'ilhunabootalelh 'ink'ez 'ilhoh whut'enne dune hutileh.

53 Soo 'et dzin whuts'un la lhahóduleh hituzilghelh wheni.

54 'Et whu la gha ts'e Sizi 'aw ts'et Lizwifne butoh nulhúsyoh. K'us yun k'ut 'aw dune luhóot'ih-un ts'e whuzih whuz'ai, 'ilhoghun keyoh Ephraim huwhútni, whuz whinya 'ink'ez yugha hodul'ehne tubulh 'et hudáts'i'.

55 'Et doo cha Lizwifne budzenis whuti ndet da' Butus Lhuseya huwhútni-un, 'awet whenghoh whudizulh. 'Inka lhane yun k'ut whut'enne Lizwifne bubuna'udoh hukw'un'a 'uhutinelh wheni keyoh whuti Jerusalem ts'e hoozdil.

56 Lugliz whucho nódilhya 'ink'ez Sizi hika itís'en, 'et 'ulhodútni, "Daja nahzun? 'Aw tilah dzenis whuti wheni whusalhóosya' nahzun eh?"

57 'Et lubret bumoodihne 'ink'ez Phariseene te, 'uda' dunene toh khuni butl'aídan'ai Sizi nts'e 'ut'en t'éhonínzun de, 'aho hudooni', 'et de 'awet huy-itálhchulh.

## 12

### *Soo 'udek'ez Sizi Jerusalem ts'e tizya*

1 Dzenis whuti Butus Lhuseya huwhútni-un 'awhuz lhk'utat dzin whuz'ai, 'et Sizi keyoh wheyaz Bethany huwhútni, 'et 'uja Lazarus dazsai whe yaid-lanne toh dunaidilhti inle', 'et Lazarus whut'i, whuz oozya.

2 'Et hulhgha na'tit'ulh wheni hiba lhadúja. Martha 'en buba hukw'e'ile. 'Et Lazarus 'en cha bubulh na'ut'alh.

3 'Et Mary lubot dizbun at'en, k'unuts'újul soo dízti'-i, 'ughih nard huyulhni, 'i tahaltsus-i whusayán'ai. 'I be Sizi yuke yulhlho 'ink'ez dutsigha' be yuna'alhde. Yoh ndulcho whe k'unuts'újul be soo whultsun suli'.

4 'Et 'ilhoghun yugha hodul'eh-un Judas Iscariot, Simon ooye', 'en 'utinelh ye 'óotakulh-un,

5 'en 'utni, "Di ha ndi k'unuts'újul be lhé'oochkulh 'ink'ez tel'enne gha lhúzahdzaih? Tube dízti' whe 'unt'oh!" ni.\*

6 'Et 'aw tel'enne buba dátni iloh huwa 'et ndutni. Undunut'ih-un unli 'ink'ez sooneya zus ndai la be yúkat-i, didut buba nuyá'a, 'ink'ez hukwa' nínzun totsuk ndai la be yúkat-i 'ants'i yilhchuk, 'inka 'utni.

7 'Et Sizi 'utni, "Ndun ts'eke oots'áhalhozah'ai, ndi asotilhtelh dzin wheni, 'et yáhl'a' 'i 'unt'oh.

8 Tel'enne 'ahoolhyiz nohbulh 'úhint'oh, 'et si 'ahoolhyiz wheni iloh nohbulh 'útist'elh."

9 'Et Lizwifne Sizi 'et usda t'éhonanzin whe, soo tube lhane 'ilhozdílne, 'enne whusahándil. 'Aw Sizi 'en gha za iloh, Lazarus mbe da' Sizi dunaidilhti inle', 'en huyuntilh'elh ha.

10 'Et lubret bumoodihne, 'enne cha 'ilhuhozdil Lazarus 'en cha hituzil-hghelh 'et howu yahutilhduk wheni.

11 'En oogha tube lhane Lizwifne bube 'ut'en k'oh whuch'a huzdil 'ink'ez Sizi 'en ghun buba 'alha' yint'oh, 'inka Lazarus hituzilhghelh hukwa' hun-inzun.

### *Sizi Jerusalem ninya*

12 'Et 'om bun dzin lhane 'ilhozdílne, 'enne dzenis whuti wheni Jerusalem ts'u hoozdil Sizi huyúlh údants'o whuz de úyalh hutni 'inka.

13 'Ul hudílhchoot 'ink'ez 'i hidilelh whe hidudízil 'ink'ez tube cho 'uhutni, "Yak'usda ooba whudúlhti!"

Mbe la neMoodihti boozí' gha whusaínya-un,

'en 'uk'enus hoonzoo-un oogha whults'ut!

'En Israel oots'u haindene bulerwe 'unt'oh!"

14 'Et Sizi yeztliyaz hiba whusaílhti 'ink'ez yuk'etl'adida'. 'Et whundúlya whe ndi 'uda' ooghun 'uk'une'úsguz-i, 'i ndutni,

\* 12:5 Tel'enne ba 'ilhu yus k'ut yuk'elha 'it'en, 'et 'ultsuk.

15 “Zion† whuzkehke nohdzi úlhtus ulhtsi!

Nulh'en nohlerwe yeztliyaz k'ut usda 'ink'ez nohts'un úyalh!”

16 'Et 'udechoo whe Sizi yugha hodul'ehne 'aw dudení be t'éhonúszun nduwhi 'i ghun. 'Et yak'uz ooba whudílti' ts'e, whenája hukw'elh'az 'et whunahilni nduwhi ooghun 'uk'uné'usguz-i 'et ndutni 'ink'ez 'et Jerusalem whuts'o uyalh whe didut 'oh te hiba ne'úst'en.

17 'Et ndunne 'ilhozdíline, mbene da' yugha hodul'eh whe Lazarus yuka hizya 'ink'ez ts'un k'ut yaidláne toh dunaidílti whe hinalh'en inle', 'et howu yawhehuníhduk.

18 'Et ndunne 'ilhozdíline hooncha túne' 'ust'en-un whulh 'úhudants'o 'inka 'uhuja hidudízdil.

19 'Et Phariseene dich'oh 'ulhodutni, “Nulh'en! 'Aw hoonli-unyaz lhe'ts'uhóole! Ndi yun k'ut dune, ts'iyawh huyúntízdil!”

*Whulohne 'udun yun k'ut whut'enne, 'enne cha Sizi hiti'elh hukwa' hun-inzun!*

20 Mbene la dune Jerusalem ts'e tizdíline, 'enne butoh, whulohne Greekne cha' hut'en. Dzenis whuti 'et Yak'usda ts'u teni 'uhuntílhzilh, 'et wheni.

21 Philip, 'en keyoh Bethsaida huwhútni, Galílee yun k'ut whuz'ai, 'et whut'en-un 'unt'oh, 'en highu nindil 'ink'ez 'uhuyúlhni, “Wheni cha Sizi uzti'elh hukwa 'uznínzun.”

22 'Et Philip, Andrew yughu ninya 'ink'ez yudáni', 'ink'ez Andrew Philip bulh Sizi hidáni'.

23 'Et Sizi ubúlhni, “Awet yinka dune ye' ooba whudutálti'-un, 'et whusahónzut.

24 Soo ts'ih'un un'a nohdúсни, hanyeh-i oomai' 'aw yun k'ut nálhnilts'ulh de, dant'oh la didutch'oh 'et za ndutit'elh. 'Et hoonts'i yun k'ut ánis'ai de, soo lhai oomai'-i, 'i ooghu hanáyuntijeh.‡

25 Mbe la dune ye khuna-i yuk'entsi' de, 'et de ye khúna-i ninta itá'alh whe 'unt'oh. 'Et hoonts'i mbe la ndi yun k'ut ye khúna-i ooba 'ants'i yint'oh de, yootatun whe 'ilhiz oole' wheni khutinalh.

26 Mbene la sba ne'tit'en hukwa' nínzunne, 'enne sunónoodilh 'ink'ez nts'e la 'ust'oh-un sba ne'ut'enne cha 'et 'uhutit'elh. 'Ink'ez mbene la sba ne'ut'en unlíne, 'enne SBá bubudutálti'.

*Sizi datitsah-un howu yalhduk*

27 “Andit 'awet tube szul ba ndo ha' hoot'en, 'ink'ez daja doosni' suba? SBá njan sts'un whudílt's'ulh-un whuch'a sla 'ineh doosni' eh? 'Awundooh! Njan sts'un whudílt's'ulh-un, 'et wheni whusásya. 'Ink'ez 'udusni,

28 SBá nyoozi' 'on nus dítzi' ílhtsi.” 'Et yak'uz whuts'un khuni huduzts'ai, “'Uda' soozí' dasti' 'ink'ez doo cha za 'on 'un dutásti',” whutni.

29 Whulohne 'ilhunaosdíline, 'et nódilhya 'ink'ez hodánts'o. 'Et 'ulhodútni, “Dítzi disnih!” 'Et whulohne, “Lizas yulh yátílhduk whe 'uwhutni,” hutni.

30 'Et Sizi 'ubulhni, “Ndi khuni huduzts'ai dáhts'o-i, 'aw si sba iloh 'uwhutni, nohni nohba 'uwhutni.

31 'Andit 'awet yinka whudune'ne buba nahutideh 'ink'ez whutso da' ndi yun k'ut humoodih,§ 'en 'ilhiz 'un hítinoh.

† 12:15 Njan Zion ni 'et Jerusalem keyoh 'et 'uwulhni. ‡ 12:24 Ndi hanyeh oomai'-i, 'i Sizi Gri dult'oh, 'ink'ez ndi oomai' gha hanányih-i, 'i mbene la buba 'alha yint'ohne 'uhint'oh, ni whe 'utni.

§ 12:31 Ndi yun k'ut humoodih, 'en netsudule 'unt'oh.

32 'Ink'ez ndi yun k'ut dube' sodunintan de, 'et de soo ts'iyanne ts'úbun tizt'i.\*

33 'Et ndutni whe nts'en'a la datítsah, 'et bunalh ni whe 'utni.

34 'Et 'ilhunaosdílne 'uhuyulhni, "Moses 'uk'unéyuzguz inle'-i, 'i gha whulh 'úzdits'o ndun Christ 'en 'ilhiz khutinalh. 'Ink'ez dálhti' 'udini 'et yinka dune ye', 'en wehebe' dutáltsi' dini? Mbe whe 'unt'oh ndun yinka dune ye?" hutni.

35 'Et Sizi 'ubulhni, "'Awhuz dzoh sa'yaz whuz'ai' 'et ndi be hóot'en-i nohbulh 'útit'elh. 'Awhuz ndi be hóot'en-i nohbulh 'únt'oh whe ahdulh za' aht'en. 'Et nduht'en de, 'aw tsalhgus nohk'édolts'it aít'oh. Mbene la tsalhgus yo udúlhne 'aw nts'e hidulh t'éhonúszun.

36 Dáwhuldzoh la ndi be hóot'en-i aht'í-i, 'ink'ez nohba 'alha 'unt'oh de, 'et de be hóot'en-i buzkeh tihleh."

'Et Sizi ndubulhni hukw'elh'az, bughu whenája 'ink'ez buch'a untilh'i.

37 Tube 'ut'en-i uncha-i bunalh 'alh'en 'et hoonts'i 'aw buba 'alha lhe'ít'oh.

38 'Et nus hóo'en-un Isaiah 'uk'unéyuzguz-i, 'i gha whuz un'a 'oh te ne'whust'en. Njan ndutni whe 'uk'une'úzguz,

"Moodihti ndi khuni whutl'azdan'ai-i mbe za ooba 'alha' yint'oh?

NeMoodihti yé ulhtus-i mbe ts'un yuna'dunilhtan?"

39 'Et huwa cha buba 'alha lhe'hóot'oh, Isaiah njan cha ndutni 'et huwa,

40 "Yak'usda buna cha hoohoos'en ubulhtsi,  
'ink'ez budzi cha duts'un yulhtsi.

'Et 'aw duna be huhoo'en aít'oh

'ink'ez budzi be 'aw t'éhononozin aít'oh.

'Soo na'butisdlelh huba sts'un nahooyeh aít'oh,' ni Yak'usda."

41 'Et Isaiah Yak'usda yé dizti'-i yunalh'en whe 'et yughun ndutni inle'.

42 'Et hoonts'i 'alha-i be lhane dune ando 'unt'ohne, 'enne Sizi buba 'alha yint'oh, 'et hoonts'i 'aw hudooni' aít'oh. 'Et ndo dija de, Phariseene Lizwifne bulugliz whuch'a 'ilhiz tebohohneh la 'et whehunuljut.

43 'Enne dune ubudíhlti'-un, 'et Yak'usda ubúdutálhti'-un whanus huhóont'i'.

44 'Et Sizi khuni ulhtus-i be ndutni, "Ts'iyanne mbene la si buba 'alha 'ust'ohne, 'aw si sghun za íloh, mbe la whuz de sútilh'a'-un, 'en buba 'alha' yint'oh.

45 'Ink'ez mbene la sunilh'éenne, 'enne mbe la whuz de sútilh'a'-un, 'en hinilh'en.

46 Yinka whudune'ne ba be hóot'en-i 'et hukwa ndi yun k'ut nenúsyá. 'Et huwa mbene la ooba 'alha 'ust'ohne, 'aw tsálhgus yo hudolts'i' aít'oh.

47 'Ink'ez mbene la sghuni hidits'o hoonts'i buba 'alha lhe'yít'ohne, 'aw buba nahoosyeh aít'oh. Ndi yun k'ut whudune'ne buba nahutísyeh íloh ha whusásya, ubutisyih ha whusásya.

48 Mbene la sts'u disnihne 'ink'ez 'aw sghuni lhuyílhchootne, 'ilhoghun 'en buba nahutiyeh. Ndi khuni be nohbulh yasduk-i, 'i khuni za 'udek'ez dzin de be nohba nahutideh.

49 'Aw sich'oh za íloh yasduk. SBá, mbe la whuz de sútilh'a'-un, 'en didutch'oh khuni yutulhúhizye'-i, 'i stl'aídan'ai daja doosni' whe yaosduk 'et wheni.

50 'Ink'ez t'éwhunúszun ndi khuni yutulhúhizye'-i, 'i gha 'ilhiz be khútna-i unli. 'Inka ndai la sich'oh be yásduk-i, nts'en'a la SBá sudáni'-un, si cha whuz un'a za yasduk," ubúlhni.

\* 12:32 Dube' hidunintan ni, 'et tualhgus ulhni whe 'utni.

## 13

*Ndi yun k'ut howu natidalh-un Sizi yugha hodul'ehne ubulh yálhduk*

<sup>1</sup> Dzenis whuti ndet da' Butus Lhuséya huwhútni-un, 'et whutso da' Sizi 'awet oots'o whúdilts'ulh-un ba 'et newhúninzut t'éwhunínzun ndi yun k'ut howu tiyalh 'ink'ez duBá ts'un natidalh. Ndi yun k'ut mbene la ooch'e'ne ts'iyawh buk'entsi'. Soo ooba 'udek'ez tileh whuts'un buk'entsi'.

<sup>2</sup> 'Et hulhgha na'hit'al hukw'elh'az 'uda' netsudule Judas Iscariot Simon ooye' Sizi ye 'óotakulh hukwa' noozin-un, yudzi yo neoodin'ai.

<sup>3</sup> 'Et Sizi t'éwhunínzun oobá ts'iyaitsuk k'úne' yool'en-un, 'et yugha óonin'ai. 'Ink'ez Yak'usda ts'un haínya 'ink'ez Yak'usda ts'un nátidalh 'et cha t'éwhunínzun.

<sup>4</sup> 'Et na'hit'al 'ink'ez yoo'az ye dune unli-i 'udúneninla. Lusooma ilhchoot dubut neiníhbal 'ink'ez yulh ts'ú dilh'oo.

<sup>5</sup> 'Et 'awet be la'ts'uldeh bez too dilhdzo 'ink'ez yugha hodul'ehne buke tunagus 'ink'ez lusooma yulh ts'ú dilh'oo-i, 'i be buke yuna'ulhdeh.

<sup>6</sup> 'Et Sizi Simon Peter ghu ninya whe 'et Simon Peter 'uyúlhni, "SMoodihti, 'aw si cha ske tunatangus whé 'int'en?"

<sup>7</sup> 'Et Sizi 'uyulhni, "Andit dast'én-un 'aw nyeni be t'éwhunuzínzun, 'et k'at le, 'et de la t'ewhunonzeh."

<sup>8</sup> 'Et Peter 'uyulhni, "Awundooh! 'Aw ske tunaóongus aít'oh!" 'Et Sizi 'uyulhni, "Aw nyunalhe'usdoh de, 'aw sulh 'ónt'e' aít'oh."

<sup>9</sup> 'Et Simon Peter 'uyulhni, "SMoodihti, 'aw ske za iloh, sla 'ink'ez stsi cha tunaíngus!"

<sup>10</sup> 'Et Sizi 'uyulhni, "Mbe la buna'ide-un, duke za tunaooogus huba' hoont'oh. 'Et hoontsi' ndulcho whe lhdáhtsun whe aht'oh. 'Et nohni ts'iyawh nohuna'ideh 'et hoontsi' nohtoh 'aw ts'iyawh iloh nohuna'ide."

<sup>11</sup> 'Et 'uda' t'éwhunínzun mbe la ye 'óotakulh-un 'inka' utni, "Aw ts'iyawh iloh nohuna'ide."

<sup>12</sup> Buke tunagus-un 'awet lhadúja whe, ye dune unli-i yé naja 'ink'ez butoh nanátl'adida', 'ink'ez ubulhni, "Hadi', njan 'andit danóhusdla la, soo cho eh noheni be t'éwhunáhzun?

<sup>13</sup> Whuneoodulh'eh-un 'ink'ez Moodihti sudúhni. 'Et 'alha' duhni whe' duhni, si 'en 'ust'oh 'et huwa.

<sup>14</sup> 'Et si 'en 'ust'oh dune hodul'eh-un 'ink'ez Moodihti usdli whe nohke tunasuguz, 'et nohni cha whuz un'a ulhke tunaóohgus huba' hoont'oh.

<sup>15</sup> 'Andit nohnal danóhusdla la, whuz un'a nohni cha 'et ndulhóol'en.

<sup>16</sup> Soo ts'ih'un un'a nohdúsní, 'aw ustlen-un, 'en dumoodih ando lhe'ít'oh. 'Et whuz un'a za khuni na'á-un 'aw mbe la yutílh'a'-un yandó lhe'ít'oh.

<sup>17</sup> 'Et noheni be t'éwhunáhzun de daja nohdásni', 'ink'ez danóhusdla la, 'et nohni cha whuz un'a 'aht'en de, 'et de tube hootáht'e'.

<sup>18</sup> 'Aw soo ts'iyawh iloh nohghun 'et ndudúsní. Mbene la 'utahábisdlane, 'enne t'ébunúszun. 'Et 'utahábisdla-un, 'et huwa Yak'usda ooghuni 'uk'únusgúz-i k'ut dawhútanelh la 'et huwun njan ndutni, 'Mbe la lhes sulh ín'al-un, 'en sch'az nedinja whe sozoohlghelh hukwa' ninzun.'

<sup>19</sup> Njan 'et nduwhtánelh-un whutso 'et nohdúsní. 'Et ndúhooja de, 'et de la t'éwhunóhzin mbe usdli-un, 'en 'ust'oh.

<sup>20</sup> Soo ts'ih'un nohdúsní mbe la whes'a'-un, 'en dudzi yo whe huyílhchoot de, si cha suhílhchoot whe 'uhoont'oh. 'Et mbene la dudzi yo whe sílhchootne, 'enne mbe la whuz de sútílh'a'-un, 'en cha huyílhchoot whe 'uhoont'oh."

21 'Et Sizi njan ndudáni' hukw'elh'az ooyughi ba ndo ha' hoot'en. 'Et ubulh yátilhduk 'ink'ez njan ndúbulhni, "Soo ts'ih'un nohdúсни 'ilhoghun nohtoh 'en se' óotakulh."

22 'Et yugha hodul'ehne ts'iyawh lhonul'en k'us umbe suba 'uyúlhni 'aw t'éhonúszun.

23 'Et 'ilhoghun yugha hodul'eh-un, Sizi k'us yúk'entsi'-un soo yuzih k'ut usda,

24 'et Simon Peter yuba núlhni whe Sizi yoodolhkut soo mbe suba 'uyulhni yughu yalhdud-un 'inka.

25 'Et yuts'un le 'uja 'ink'ez yúlhni, "SMoodihti, mbe whe 'unt'oh?"

26 'Et Sizi 'uyulhni, "Mbe la ndi lhesyaz détunasus'ai 'ink'ez ootl'ayís'ai-un, 'en 'unt'oh." 'Ink'ez lhesyaz détunayuz'ai 'ink'ez Judas Iscariot Simon ooye', 'en yutl'ayán'ai.

27 'Et ndi lhesyaz yutl'ayán'ai whe 'awet Satan ye yínya. 'Et Sizi 'uyúlhni, "Ndet da' 'uwhtanlelh, 'a cho lhaóodinlelh."

28 'Et 'onghunne ts'iyawh mbene la Sizi yugha hodul'ehne, di ha 'et ndúyulhni-un 'aw t'éhonúszun.

29 Whulohne, 'enne 'uhuninzun Judas 'en sooneya zus nuyá'a 'inka ndai la dzenis whuti wheni ooka' nudzún-i, 'i yoket ha 'uyúlhni. K'us tel'enne te hoonliyaz bugha oo'alh ha 'uyulhni huninzun.

30 'Et 'awet lhesyaz yílhchoot ibulh, 'aho 'a cho 'az whinya. 'Et 'awet 'ulhdzis 'uhoont'oh.

31 'Az whénya hukw'elh'az 'et Sizi 'utni, "Awet yinka dune ye' ooba whudálti' 'ink'ez 'en oogha Yak'usda ooba whudálti'.

32 'En oogha Yak'usda ooba whudálti' de, 'et de Yak'usda didutch'oh cha yinka dune ye' soo 'aho 'et yuba whudutálhti'.

33 Suzkehke 'aw sa' iloh nohbulh 'utist'elh. Sutih'elh hukwa' ntihzilh, 'et hoonts'i Lizwifne ubudásni', whuz un'a nohni cha nohdúсни, nts'e la tisyalh ts'e 'aw nohni cha sulh tóohdilh aít'oh.

34 'Ilho khuni 'andidi-i nohtl'adís'ai 'ink'ez ndi 'i 'unt'oh, ts'iyawh lhk'eoohsi'. Nts'en'a la si nohk'esi', 'et whuz un'a za nohni cha lhk'eoohsi'.

35 'Ndi be lhk'ets'utsi'-i nohtoh hoonli de, 'i gha la sgha hodul'ehne ahli ts'iyanne t'éhonózin."

36 'Et Simon Peter yoodulhkut, "Moodihti, nts'e tanyalh?" 'Et Sizi 'uyúlhni, "Nts'e la tisyalh ts'e, 'aw 'andit suntonya' aít'oh, 'et hoonts'i k'at le, 'et de la suntonya'."

37 'Et Peter 'uyulhni, "Moodihti, 'et di ha 'andit 'et 'aw nyun toosya' aít'oh? Be khúsna-i, 'i hoonts'i nyun mba oola dutisnih!"

38 'Et Sizi 'uyulhni, "Alha eh be khína-i, 'i sba oola dutatnih? Soo ts'ih'un un'a nyudúсни lugok dune 'udutinelh whutso, tat 'et t'ésunúzínzun dutanelh."

## 14

*Sizi yugha hodul'ehne ubúlhni, "Si sgha za sBá oots'u tÍhdulh."*

1 "Khun te nohdzi úndooda' junih. Yak'usda nohba 'alha 'unt'oh, whuz un'a si cha nohba 'alha 'oost'e'.

2 sBá ookeyoh lhat-un yoh whuzdla whe 'uhoont'oh. 'Aw 'alha lhe'hóot'oh de, nohdóсни' da'. Whuz tisyalh nohba lhawhúdutisdleh wheni.

3 Whuz oozusya 'ink'ez nohba lhawhúsdsla de, doo cha za whusanátisdalh 'ink'ez ts'iyawh nohitáschulh, ndet susda-un, 'et si sulh 'óoht'e'.

4 'Ink'ez nts'e la whénya ts'e 'ink'ez nts'e ti whéhon'a 'et t'éwhunáhzun."



5 'Et Thomas yoodulhkut whe uyúlhni, “Moodihti, nts'e tanyalh 'aw t'ets'onúszun, 'ink'ez nts'en'a whuz ti t'éts'ontázin?”

6 'Et Sizi 'uyulhni, “Si yak'uz ti, 'ink'ez khuni 'alha' 'unt'oh-i cha usdli. 'Ink'ez 'ilhiz wheni be ts'ukhuna-i, 'i cha 'usdli. 'Et huwa si sk'ahayaih te za sBá hits'óotayalh.

7 Si t'ésunahzun inle' de, 'et sBá cha da' t'enóhzin oole'. 'Et 'andit whúts'un, 'en 'awet t'enahzun 'ink'ez ah'en cha áhja.”

8 'Et Philip 'uyulhni, “Moodihti, mBá bunenilhtun 'ink'ez uznoolh'en, 'et 'awet za hukwa' uzninzun.”

9 'Et Sizi 'uyulhni, “Philip, lhe'whuldzoh nohbulh 'úst'en, 'et 'awhuz eh t'ésunuzínzun? Mbene la san'enne, 'enne sBá cha hiyan'en. 'Ink'ez di ha, 'MBá bunenilhtun, 'díni?

10 Si sBá ooyudúsa 'ink'ez sBá cha syudínda. 'Et 'aw eh mba 'alha lhe'hóot'oh? Khuni be nohbulh yásduk-i 'aw si sghuni iloh 'unt'oh. SBá mbe la syudínda-un, 'en ndi 'ut'en 'uyulh'en-i 'unt'oh.

11 Nohba 'alha 'uhot'e' si sBá ooyudúsa 'ink'ez sBá 'en syudínda. 'Et nohba 'alha lhe'hóot'oh de, ndi 'ut'en ndai la 'ulyá-i, 'i gha si sghun nohba 'alha 'uhot'e'.

12 Soo ts'ih'un un'a nohdúsi, mbene la buba 'alha 'ust'ohne, 'enne ndi 'ut'en ndai la 'us'én-i, 'enne cha 'uhitil'h'elh. 'Et si sBá oots'u nátisdalh 'et huwa si 'ut'en 'is'én-i 'on nus 'ulcho-i 'ut'en 'i la 'uhuyoolh'en.

13 'Ink'ez ndai la si soozí' gha ooka' dahni-i 'oh te nohba ne'tist'en. 'Et huwa la sBá 'en ooYe' gha ooba whudólti'.

14 Ndaí la si soozí' gha ooka' dahni-i, 'et nohba 'uwhtisdlelh.

15 Nohni sk'ehtsi' de, ndai la ndi khuni nohtl'adísdla-i ook'une' 'ooht'en.

16 'Ink'ez sBá 'en la 'ilhiz wheni nohLa'tit'elh-un, 'en nohgha ítalhtelh, 'et la oots'u hukwa' doosni'.

17 'En Ndoni 'unt'oh. Ndaí la khuni 'alha 'unt'oh-i, 'i za oots'u haídults'uk. Ndi yun k'ut whudune'ne\* 'aw dudeni be t'ehinúszun 'et huwa 'aw huyólhchoot aít'oh. 'Et nohni t'enahzun, nohbulh 'únt'oh 'ink'ez nohyudútilts'ulh.

18 'Aw ts'unóhne ahli le'aht'oh whe nohghu toosya' aít'oh. Nohts'u tóosya' la.

19 Dzoh sa'yaz inle' de, 'ink'ez yinka whudune'ne, sulhotis'el, 'et hoonts'i nohni suntilh'elh. Si khusna 'et huwa nohni cha khutihnalh.

20 'Et dzin de' et la t'ewhunohzin si sBá ooyudúsa 'ink'ez sBá cha syudínda 'ink'ez 'on 'un nohni cha nohyudusda.

21 Mbene la khuni 'et nédisdla-i yuk'úne' 'ut'enne, 'enne sk'entsi'ne 'uhint'oh. 'Ink'ez mbene la sk'entsi'ne, sBá cha buk'etitsi', 'ink'ez si cha buk'etisi' 'ink'ez mbe usdli 'et la t'ehoninzun hubooselh.”

22 'Et Judas, 'aw Judas Iscariot 'en iloh, 'en Sizi 'uyulhni, “Moodihti, nts'en'a 'uhoont'oh whe nyun nghun t'ets'onózin-un neba 'uwhutánlelh, 'et hoonts'i yinka whudune'ne, 'enne nyun nghun 'aw t'éhontászin dini?”

23 'Et Sizi 'uyulhni, “Mbene la sk'entsi'ne, 'enne sghuni yootatun. 'Enne sBá buk'etitsi' 'ink'ez bubulh 'útit'elh 'et whe la si bulh butoh óke'.

24 Mbene la sk'elhísi'ne, 'aw sghuni hik'unulhe'ust'en. 'Ink'ez ndi khuni nohni dahts'ó-i, 'aw sich'oh sghuni iloh 'unt'oh. SBá, whuz de sítih'a'-un, 'en ooghuni 'unt'oh.

25 'Awhuz nohtoh 'ust'oh whe njan 'et nohdúsi.

\* 14:17 Mbene la ndi yun k'ut Yak'usda ooba 'alha lhe'yít'ohne, 'enne 'ubúlhni bughu yalhduk.

<sup>26</sup> 'Et ndun nohLa'ut'en-un, Ndoni 'unt'oh, 'en si soози' gha sBá 'en nohts'ítílh'alh, ts'iyantsuk whunohodutilh'eh 'ink'ez daja nohdásni' la 'et soo cho whunalhnhíh cha nohtíltshel.

<sup>27</sup> Be nedzi dizghel-i, 'i nohghu nenánust'ai. 'I sich'oh be sdzi dizghel-i, 'i nohgha nús'ai. Ndi be nedzi dizghel nohgha nús'ai-i, 'i 'aw yinka whudune'ne nohgha húyu'aih-i, 'i ndúlhilt'oh whe 'unt'oh. Khun te nohdzi úndooda' 'ink'ez noohljut júnih!

<sup>28</sup> Sudahtso whe nohdásni. 'Awet nohghu tisyalh 'ink'ez nohts'u tóosya' la. SBá 'en sanus dízti' 'et huwa 'en oots'u nátisdalh, 'ink'ez sk'ehtsi' de, 'andit daja nohdásni' 'et huwa la whunólhni.

<sup>29</sup> 'Ink'ez 'oh te ne'whutit'en-un, 'andit nohdásni'. 'Et de la whusahóolts'ut de, si sghun nohba 'alha 'uhot'e'.

<sup>30</sup> 'Aw dzoh sa'yaz' on 'un nohbulh yaóosduk aít'oh. Ndi yun k'ut humoodih† 'az de úyalh 'ink'ez si sghun 'aw ntsool-iyaz 'i hoonts'í ooch'e' lhuyíloh 'et huwa.

<sup>31</sup> Dugwe' dudahdilh, 'awet njan huwuztoddilh, 'et huwa la yinka whudune'ne t'éhonózin sBá ook'esi' 'ink'ez nts'oh te la khuni stl'aídan'ai, 'oh te ne'úst'en.

## 15

*Sizi yugha hodul'ehne hubodulh'eh nts'en'a la mai chun oozischum oots'u há nalyeh, 'et whuz un'a za yugha hodul'ehne huyulh za' oot'e'. 'Et huwun hubodulh'eh*

<sup>1</sup> "Soo mai chun 'i 'ust'oh 'ink'ez sBá 'en mai k'et huwunlí-un unli.

<sup>2</sup> Mbene la si sgha 'uzischum unline, bumai' hooloh de, 'i 'uzischum but's un háidule. 'Ink'ez mbene la bumai' lhai de, ndai la 'utsi'-i bughu wheyoonli-i, 'i 'et de la 'on nus bumai' lhai oole'.

<sup>3</sup> Ndi khuni be nohbulh yasduk-i, 'i be 'uda' nohuna'ideh whe 'aht'oh.

<sup>4</sup> Nohni syúdólhts'i' 'ink'ez si cha nohyudóosda'. 'Uzischum mai chun ooneídan'a de za, 'oomai' whutaleh. 'Et whuz un'a za nohni nohghun 'alha 'uhoont'oh. Si syudúlhts'i' de, 'et de za nohmai' whutáleh.

<sup>5</sup> Si mai chun le'ust'oh 'ink'ez nohni 'uzooschum le'aht'oh. Mbene la si syudínda 'ink'ez si cha ooyudúsdane, 'enne za bumai' lhai tileh. 'Et si sch'oh 'unt'ohne, 'aw hoonli 'uhuhooloh-un hooloh.

<sup>6</sup> Mbene la si syudínda ílohne, 'enne 'uzooschum k'un'a k'uhídu'tus 'ink'ez n'un hidutulht'oh, 'et dugi, 'et nduhínt'oh. 'Ohwhi 'uzooschum nahidulhd-zooh 'ink'ez tsuh hidulhkuk 'ink'ez hidílhk'un.

<sup>7</sup> 'Et si syódulhts'i' 'ink'ez sghuni nohyo diz'ai de, 'et ndet hukwa' nahzun-un, 'et ts'iyawh nohba 'et nduwhutanelh.

<sup>8</sup> 'Ink'ez mai lhai nohts'u hanúlhyeh de, 'et huwa la sBá 'en ooba whudólti'. 'Et la sgha hodul'ehne oohle'.

<sup>9</sup> SBá 'en si sk'entsi'. 'Et whuz un'a za nohk'esi', 'et huwa be nohk'esi'-i bulh za 'ooht'e'.

<sup>10</sup> SBá nts'en'a la sba lhúhizey' ook'úne' zust'en 'ink'ez yé sk'entsi'-i, 'i cha bulh 'íst'e'. 'Et whuz un'a za khuni nohtl'adisdla-i ook'úne' 'aht'en de, 'et de la be nohk'esi'-i, 'i bulh 'óoh't'e'.

<sup>11</sup> 'Andit njan nohdúsni-un, 'et whe la be hoonust'i'-i, 'i be hoonáht'i' de, 'et de la hoonáht'i' k'et 'aw 'on 'un hóht'e' aít'oh.

<sup>12</sup> Ndi sghuni nohtl'adis'ai 'i ndutní, ts'iyawh 'ílhone ahli whe nts'en'a la nohk'esi', whuz un'a za lhk'eohtsi'.

† 14:30 Ndi yun k'ut humoodih, 'en netsudule 'unt'oh.

<sup>13</sup> 'Ilhoghun dune duyadanke buk'uz dazsai de, 'aw 'on 'un ye búk'eoots'i-i hooloh.

<sup>14</sup> 'Ink'ez khuni nohtl'adísdlá-i ook'úne' 'aht'en de, 'et nohni syadanke ahli.

<sup>15</sup> 'Aw 'on 'un se 'ustlenne lhunohduzúsní. 'Ustlene, 'enne bumoodih nts'oh tune' 'ut'en, 'aw t'éhonúszun. Si nts'oh tula sBá ooghun whudásts'o, 'et soo ts'iyawh whunóhnistan, 'et huwa syadanke nohdúsní.

<sup>16</sup> 'Aw nohni 'utahalhúsulhtel. Si 'utáhanóhisdla toohdilh 'ink'ez mai hanóolhyeh 'ink'ez nohmai 'ilhiz wheni oot'e, 'et huwka 'et nenóhnusdla. 'Et huwa la sBá ndai la si soozí 'gha oots'o hukwa' dahni-i, 'i la nohgha íyo'alh.

<sup>17</sup> 'Andit nohdúsní, ts'iyawh lhk'eoohsi'.

<sup>18</sup> 'Ndi yun k'ut whudune'ne nohts'u hudutni de, whunalhnihi nohni nohts'o dutitni whutso, 'et 'uda' si sts'u hudutni inle'.

<sup>19</sup> 'Enne buloh ahli de, 'et da' nohk'ehootsi' oole' da', nohni cha butoh aht'oh 'et huwa. 'Et hoonts'i nohni butoh 'utáhanóhisdla, 'ink'ez 'aw 'on 'un buloh lháhloh, 'et huwa yinka whudune'ne nohts'u hudutni.

<sup>20</sup> 'Et huwa daja nohdásni' la whunalhnihi, 'aw 'ustle-un, 'en dumoodih ando lhe'ít'oh. si dzoh nusúhulhdzut de, nohni cha dzoh nunóhotilhdzut. 'Et sghuni hik'úne' 'ust'en de, nohni nohghuni cha la hik'úne' oot'en.

<sup>21</sup> 'Et nohni sch'e' ahli, 'et huwa la 'oh te ne'nohuhoohl'en, mbe la ndun whuz de sútilh'a'-un, 'aw t'éhinúszun 'et huwa.

<sup>22</sup> 'Aw si whusalhúsyal 'ink'ez bubulh yálhusdih de, lubeshi 'ulh'enne hinli 'aw t'éhonózin aít'oh. 'Et 'andit whuts'un dulubeshi 'aw whé nuhínoohl'i'-un hooloh.

<sup>23</sup> Mbene la sts'u dutníne, sBá 'en cha hits'u dutni whe 'uhint'oh.

<sup>24</sup> 'Ndi 'ut'en 'aw 'uyoonne lhe'yulh'éni bunalh lhe'yús'el de, 'et de lubeshi 'ulh'enne hinli-un 'aw da' t'éhonószin. 'Et 'andit 'ut'en 'us'en-i hinalh'en 'et huwa si 'ink'ez sBá bulh nanilt'oh nets'u hudutni.

<sup>25</sup> 'Ink'ez ndi Yak'usda ooghuni buba 'uk'unusguz whe 'et ndutni, "Aw hoonli huwa iloh sts'u hudutni.' Daja ni la 'andit 'awet 'oh te ne'whust'en.

<sup>26</sup> 'Et hoonts'i nohLa'ut'en-un, Ndoni, ndai la be 'alha' uhoont'oh-i 'oots'u háidilts'ut, 'en 'unt'oh, sBá oots'un 'en nohts'un tis'alh, 'en la whusainya de, si sghun ts'iyawh whunóhnoolhtun, sBá yuts'u háinya 'et huwa.

<sup>27</sup> 'Ink'ez nohni cha la si sghun 'uyoonne whúbuntilhtun, soo 'udechoo da' whuts'un sulh 'aht'en 'et huwa."

## 16

*Sizi yugha hodul'ehne yununúdílhne hinli, 'et huwa ndi yun k'ut whut'enne dzoh nubotilhdéh-un, 'et huwun ubúlhni*

<sup>1</sup> Sizi 'et 'on 'un ubulhni, "Nohba 'alha' hoont'oh-un doo ka si whuladooht-nih, 'inka 'unohdúsní.

<sup>2</sup> Luglíz 'et cha whuch'a nóhjoot la. 'Et 'awet 'oh de whuz de whudizulh, 'et de la mbene la nohtighánne Yak'usda ba 'uhut'en huntizilh.

<sup>3</sup> Si 'ink'ez sBá bulh t'énehunúszun 'et huwa la 'oh te ne'nohohoolh'en.

<sup>4</sup> 'Et 'uda' nohdásni', 'awet 'oh te ne'nohohulh'en de, 'et la whunaoolhnihi. Nohbulh 'ust'en inle' 'et huwa 'aw lhunoh dusnel.

<sup>5</sup> 'Andit mbe la whuz de sútilh'a'-un, 'en oots'un nátsidalh, 'et hoonts'i 'aw 'ilhoghun nohtoh nts'e tisyalh-un hukwa sulhooduzulhkut.

<sup>6</sup> 'Et njan nohdúsní, 'et huwa nohdzi ts'odi be dízbun,

<sup>7</sup> 'et hoonts'i khuni 'alha' 'unt'oh-i nohdusni, nohghu natsidalh-un, 'et nohni nohba hootázoo'. 'Aw whenáhusdal de, nohLa'ut'en-un 'aw nohts'un tooya' aít'oh. Whenásja de, 'et de 'en nohts'un tis'alh.

<sup>8</sup> 'Et whusaínya de bubeni toh diz'ai-i gha la yinka whudune'ne lubeshi 'ulh'enne hinli t'éhonózin. 'Ink'ez ndai la ts'ih'un 'unt'oh-i 'ink'ez Yak'usda ye náhizya-i cha 'i ghun t'éhonózin.

<sup>9</sup> Si sghun 'aw buba 'alha lhe'hóot'oh 'et huwa la bubut t'ewhunoolhzeh lubeshi 'ulh'enne hinli.

<sup>10</sup> SBá oots'un nátsidalh 'ink'ez 'aw 'on 'un sooh'en aít'oh. 'Et 'i gha la ndai la ts'ih'un 'unt'oh-i\* Ndoni, 'en la bubut'ewhunoolhzeh.

<sup>11</sup> Ndi yun k'ut humoodih-un† 'uda' ooba nahisda, 'et huwa la ndi be náhudeh-i ndi yun k'ut whudune'ne, Ndoni 'enne yúbunoolhtun, 'enne cha whuz un'a za buba nahutideh.

<sup>12</sup> 'Awhuz tube lhat-un nohdutásnelh-un whuz'ai, 'et hoonts'i 'andit 'aw whulh óohyin, aít'oh.

<sup>13</sup> 'Et Ndoni, mbe la khuni 'alha' 'unt'oh-i oots'u háidul'ts'it-i, 'en nohyudánde de, 'en la ndi khuni 'alha' 'unt'oh-i, noheni toh neído'alh. 'Et ndi 'i be 'ut'en 'unt'oh; 'aw didutch'oh dughuni be iloh nohbuhl yátilhduk, ndet la whudánts'o-un, 'et za whunoh untillhtun, 'ink'ez nts'oh te la ne'whutit'en-un, 'et cha t'ewhunóhzun nohtilttselh.

<sup>14</sup> Se' 'ut'en k'oh ts'iyawh hootálhchulh 'ink'ez whunóhuntillhtun, 'et whe la si sba whudólhti'.

<sup>15</sup> Ts'iyaitsuk ndai la sBá ooch'e' yinli-i, 'i si sch'e' 'unt'oh. 'Inka 'uno-hdúsní Ndoni 'en ndai la se' 'ut'en k'oh unli-i, ts'iyawh itálhchulh 'ink'ez yunóhuntillhtun.

<sup>16</sup> 'Awet sBá oots'u nátsidalh 'et huwa 'udusni dzoh sa'yaz inle' de, 'et 'aw sooh'en aít'oh. 'Et doo cha dzoh sa' inle' de, 'et sutih'elh." ubúlhni.

<sup>17</sup> 'Et yugha hodul'ehne didutch'oh lhuhoodulkut, "Ndi khuni ye nébulh yalhduk-i lhe'utni, 'SBá oots'u nátsidalh,' 'ink'ez, 'Dzoh sa' inle' de, 'et 'aw sooh'en aít'oh. 'Et doo cha dzoh sa' inle' de, 'et sutih'elh.' 'I daja ni whe 'utni?'"

<sup>18</sup> 'Et 'on 'un cha 'uhutni, "Njan dzoh sa' inle' de ní-un, 'et daja ni whe 'utni? Wheni 'aw t'ets'onúszun."

<sup>19</sup> 'Et Sizi hukwa huyoodutalhkut hukwa' huninzun, 'uda' t'éwhunúnzun 'inka ndubúlhni, "Nohdásni' dzoh sa' inle' de, 'et 'aw sooh'en aít'oh. 'Et doo cha dzoh sa' inle' de, 'et sutih'elh. 'Et eh nohnich'oh nohtoh hukwa lhoodulhkut?'"

<sup>20</sup> Soo ts'ih'un un'a nohdúsní, tíhtso 'ink'ez 'on 'un cha tube sk'enitihleh, 'et hoonts'i yinka whudune'ne hontálhni. Nohni tube ts'odi tihleh, 'et hoonts'i nts'odi-i bé hoonah't'i-i tileh.

<sup>21</sup> 'Et whuz un'a ts'eke ooyaz whutáleh-un, 'en k'un'a 'et ndúhoont'oh. 'Awet benghoh whudizulh te, whuch'a ní unli lhíh. 'Et ooyaz whulíh te, yé ndida-i yunaoodulnoh, ts'oodun yinka nenílhti 'inka tube hóont'i'.

<sup>22</sup> 'Et whuz un'a za nohni 'andit ts'odi ahli, 'et hoonts'i nanohtist'elh 'ink'ez nohdzi hóotat'e', 'ink'ez be hóonah't'i-i 'aw nohghu hayólhchoot aít'oh.

<sup>23</sup> 'Et dzin de, 'aw hoonli sts'u ka' doohni' aít'oh. Soo ts'ih'un un'a nohdúsní, sBá si soozí' gha hoonli oots'u hukwa' dahni de, ndai ookwa dahni-i, nohgha íta'alh.

<sup>24</sup> 'Andit whuts'un si soozí' gha 'aw oots'o hukwa' dahní-un hooloh. 'Et sBá oodulhkut, 'et la nohgha whútalts'ulh, 'ink'ez 'et la be ts'oohoont'i tíht'elh.

*"Ndi yun k'ut humoodih, 'ink'ez be 'ut'en k'oh cha, ts'iyawh ooch'a' nusde," ní Sizi*

\* **16:10** Sizi Gri 'en cha ts'ih'un 'unt'oh, 'et cha bubut'ewhunoolhzeh. † **16:11** Ndi yun k'ut humoodih, 'en netsudule 'unt'oh.

25 “Whutso da 'udada' oogha lhoohoolna'-i be ndi khuni nohdusni inle'. 'Et hoonts'i whuz de hoolts'ulh, 'udada' be iloh 'udutisnelh. SBá 'en ooghun soo ts'et khuni 'i be nohdutasnelh.

26 'Et neóodinzut de, 'aw si iloh la sBá nohba oodoskut, nohnich'oh si soozi' gha oodutalhkut.

27 Nohni sk'ehtsi' 'et huwa sBá didutch'oh nohk'entsi', 'ink'ez Yak'usda ts'un hasya 'et nohba 'alha 'uhoont'oh, 'et huwa nohni nohk'entsi'.

28 SBá 'en oots'u hánya whe ndi yun k'ut nenúya. 'Awet ndi yun k'ut whuch'a natisdalh 'ink'ez sBá 'en oots'u nátidalh,” ubúlhni.

29 'Et yugha hodul'ehne 'uhuyúlhni, “'Andit 'awet ts'et khuni be nebulh yáilhduk, 'aw 'udada' khuni be iloh 'udini.

30 'Andit 'awet t'ets'onínzun soo ts'iyantsuk 'et t'éwhúnínzun 'et huwa 'aw 'on 'un nts'uyoodolhkut aít'oh. Daja nedáni'-un, 'et huwa Yak'usda oots'un hainya neba 'alha 'uhoont'oh.”

31 'Et Sizi ubulhni, “Soo eh nohba 'alha 'uhoont'oh?

32 Nulh'en whuz de whúdzulh-un 'awet 'et néwhudinzut, ndet la 'ilhone ahli whe yaitáhdulh 'ink'ez nohnich'oh 'utiht'elh. Si cha sich'oh úsdli whe sghu tíhdulh, 'et hoonts'i 'aw sich'oh iloh 'ust'oh, sBá 'en sulh 'únt'oh 'et huwa.

33 'Andit njan 'et huwun ndi khuni 'i be nohbulh yásduk, daja nohdásni' la, 'et huwa la be nedzi be dizghel-i ooh't'e'. Ndi yun k'ut tube la nohehúzoola', 'et hoonts'i hóht'e', ndi yun k'ut humoodih 'ink'ez be 'ut'en k'oh cha, ts'iyawh ooch'a' nusde 'et huwa.

## 17

### *Sizi Gri lubret 'uk'enus dízti'-un unli whe yugha hodul'ehne buba tenadudli*

1 Sizi njan 'et ndudáni' hukw'elh'az, ndo yak'uz yutan'en 'ink'ez 'utni, “'UBá, 'awet sts'o dizulh-un 'awet whusahoolts'ut. NYe' ooba whudílhiti' 'et whuz un'a la nYe' cha mba whudólhiti'.

2 'Et whuz un'a za 'et ndineh whe yinka whudune'ne ts'iyawh buba ndo oot'e'-un, 'et oogha ónin'ai, 'et whe la mbene la sghá buninlane 'ilhiz wheni huye khútinalh-i bugha ítas'alh.

3 Ndunne, 'enne za 'ilhiz huye khuna-i huyut'i, nyun za ts'ih'un Yak'usda inli. 'Ink'ez mbene la nyun 'ink'ez Sizi Gri whuz de haílh'a'-un, 'enne bughun soo dudeni be t'éhonínzunne, 'enne 'ilhiz huye khuna-i huyut'ih.

4 'Ut'en sgha nín'ai-i 'awet lhadúsdla whe ndi yun k'ut mba whudásti'.

5 'Inka sBá, ndi yun k'ut 'uwhutálnelh whutso da', ndai la nyun bulh 'oh da' bé whúdalti'-i, 'i be 'andit doo cha za sba whudílhiti'.

6 Mbene la ndi yun k'ut whudune'ne butoh sghá buninlane, ts'iyawh nyun nghun whúbunistan. Nyun nch'e' hinli whe si sghá buninla 'ink'ez nghuni hik'úne' 'ust'en.

7 Ndai la sgha nínla-i, 'i ts'iyawh nyun nts'u haínkat-i 'unt'oh. 'Et 'andit dudeni be t'éhonínzun.

8 Ndai la khuni 'enne buba stl'adán'ai-i, 'i cha bugha ínus'ai. Soo cho huyílhchoot 'ink'ez dudeni be t'éhonínzun, 'et huwa nyun nts'u hánya 'ink'ez nyun whuz de sútílh'a', 'et cha soo dudeni be t'éhonínzun 'ink'ez buba 'alha 'uhoont'oh.

9 Buba tenadusdli. 'Aw ndi yun k'ut whudune'ne, 'enne iloh buba tenadusdli. Mbene la sghá buninlane, 'enne za buba tenadusdli, nyun nch'e' hinli 'et huwa.

10 Ndai la si sch'e' unli-i, 'i nyun nch'e' 'unt'oh, 'ink'ez ndai la nyun nch'e' unli-i, si sch'e' 'unt'oh. 'Ink'ez 'enne bugha 'awet sba whudásti'.

11 'Aw 'on 'un ndi yun k'ut susda íloh whe nts'un usyalh, 'et hoonts'i ndunne, 'enne ndi yun k'ut 'uhint'oh. 'Ubá, lubeshi ooghu hooloh 'int'oh, 'ink'ez ndunne sghá buninlane, nyoozi' be ílhtus-i, 'i be huboontun, 'i be la nyun si bulh 'íloho ídli, whuz un'a la didut cha 'íloho hoole'.

12 Mbene la sghá buninlane, ndi yun k'ut 'awhuz bubulh 'úst'oh da', nyoozi' be ílhtus-i, 'i be hubostun 'ink'ez bughosdle'. 'Et 'aw kwuncho yo whuye', 'en íloh, 'et huwa la nts'oh te la ooghun 'uk'une'úsguz inle'-un, 'oh te né'hoot'en.

13 'Andit 'awet nts'un tisyá. 'Et hoonts'i 'awhuz ndi yun k'ut susda whe njan 'et howu yasduk, 'et whe la soo ts'ih'un un'a ndai la be whúnusni-i, 'i be budzi doobun.

14 Nghuni bugha ídis'ai 'ink'ez ndi yun k'ut whudune'ne butsu hudutni. Nts'en'a la si 'aw ndi yun k'ut whudune'ne bubundulh lhuzt'oh 'et whuz un'a 'enne cha 'aw ndi yun k'ut whudune'ne' bubundulh lhúhilt'oh. 'Et huwa ndi yun k'ut whudune'ne butsu hudutni.

15 'Aw ndi yun k'ut whuch'a nabónlelh-un, 'et íloh nts'u húkwa' dusni, 'et hoonts'i ntsi'-un, 'en ch'a soo cho bughonle', 'et nts'u húkwa' dusni.

16 Nts'en'a la si 'aw ndi yun k'ut whudune'ne bubundulh lhuzt'oh, 'et whuz un'a 'enne cha 'aw ndi yun k'ut whudune'ne' bubundulh lhuhílt'oh.

17 Khuni 'alha' 'unt'oh-i nts'u hadílt'sut, 'i be nyunch'oh mba 'udun nébuninle. Nghuni 'i khuni 'alha' 'unt'oh-i 'unt'oh.

18 Nts'en'a la nyun ndi yun k'ut whudune'ne butsu whesalh'a, 'et whuz un'a 'enne ndi yun k'ut whudune'ne butsu whebis'a'.

19 'Ink'ez 'enne bugha si 'udun ne'dunuzti, 'et whuz un'a la 'enne cha soo ts'ih'un un'a nyun mba 'udun nebuninlane hoole'.

20 'Aw ndunne, 'enne za íloh buba tenadusdli, mbene la dughuni gha si sghun ooba 'alha' 'uwhutat'elhne, 'enne cha buba tenadusdli.

21 'Et de la soo ts'iyanne 'íloh udulhne ts'ooole'. 'UBá nts'en'a la nyun syudínda, 'ink'ez si cha nyudúnda, 'et whuz un'a za neyó 'uhoot'e'. 'Et whe la yinka whudune'ne soo ts'ih'un un'a buba 'alha' 'uhot'e' nyun whuz de sútílh'a'-un, 'et huwa.

22 'Ink'ez ndi be dusti' sgha nín'ai-i, 'on 'un bugha ínus'ai. 'I be la nyun si bulh da ít'oh whe la 'íloho ídli, whuz un'a za 'íloho hoole'.

23 Si buyoghi usdli 'ink'ez nyun si syoghi inli, 'et whuz un'a la ndunne 'íloho hinli whe lhahádootneh. 'Et huwa la yinka whudune'ne soo dudeni be t'éhonózin nyun whuz de sútílh'a'. 'Ink'ez nts'en'a la sk'eintsi', whuz un'a 'enne cha buk'eintsi'.

24 Ndi yun k'ut 'uwhutálnelh whutso da' sk'eintsi', 'ink'ez bé dusti'-i sgha nín'ai ínle', 'et soo cho huwhuti'elh hukwa' nuszun. 'Et huwa 'uBá ndunne sghá buninlane, 'andit nts'e 'ust'oh 'et sulh 'úhoot'e' hukwa' nuszun.

25 'UBá nyun ts'ih'un 'unt'oh-un inli. 'Et yinka whudune'ne nyun nghun 'aw soo cho dudeni be t'ényonúszun. 'Et si t'ényonúszun 'ink'ez ndunne sulh 'út'enne cha t'éhonínzun nyun whuz de sútílh'a'.

26 'Ink'ez nyun nghun soo cho dudeni be t'éhonózin ubuzúsi. 'Ink'ez nyun nghun 'on 'un cha soo cho t'éhontázin ubutíselh. 'Et huwa la ndai la be sk'entsi'-i buyo do'a', 'ink'ez si cha buyo 'utisdalh,' ni whe tenadidli.

1 Sizi ndi khuni be tenadidli hukw'elh'az, yugha hodul'ehne tubulh 'ukoh wheyaz Kedron huwhútni, nyan yahunindil. 'Et haniyeh k'et whuz'ai. 'Et yugha hodul'ehne tubulh dahunindil.

2 'Ink'ez Judas, mbe da' ye 'ónket'un, 'en cha nyo t'éwhunínzun, Sizi yugha hodul'ehne tubulh lhat 'et 'ilhúnahodulh 'et huwa.

3 'Et lubret bumoodihne 'ink'ez Phariseene te, ndunne lhuganne 'ink'ez neilhchúkne te, Judas dulh ubutilhdil. Too dízk'un te, bé nukwunult'a-i, 'ink'ez saluzti te, ts'iyawh hitizdla.

4 Sizi nts'oh te la didut ooghun ne'whutit'en, soo ts'iyawh t'éwhunínzun, 'inka bududziza 'ink'ez uboodulhkut, "Mbe kunúhta whe 'aht'en?" ubúlhni.

5 'Et 'uhuyúlhni, "Sizi Nazareth whut'en-un, 'en kúnzuta." 'Et Sizi 'ubulhni, "Si 'en 'ust'oh." 'Et Judas ye 'ónket-un, 'en cha butoh usyin.

6 Ndet la Sizi si 'en 'ust'oh ubúlhni whe, ts'iyawh k'oh le duhúja 'ink'ez yun k'ut nahánkat.

7 'Et doo cha za uboodulhkut, "Mbe kunúhta whe 'aht'en?" 'Et 'uhutni, "Sizi Nazareth whut'en-un, 'en kúnzuta."

8 'Et Sizi 'ubulhni, "'Uda' nohdasni', si 'en 'ust'oh. 'Inka si skunáhta de, ndunne, 'enne nahutoodílh-un bugha óonah'aih."

9 'Et Sizi whutso da' daja tenadidli ínle' da', "Sghá buninlane 'aw 'ilhoghun hoonts'i nintalhústel," ni, 'et 'oh te né'hoot'en 'inka 'ubúlhni.

10 'Et Simon Peter saluzti ut'i, déhayalhtsus, 'i be lubret 'uk'enus dízti'-un be 'ustle-un ye yoonilht'o whe nailhni ts'un k'us yudzo habe' yalht'o. 'En 'ustle-un boozí' Malchus huyúlhni.

11 'Et Sizi Peter 'uyúlhni, "Nyoo saluzti oozus be naántih. 'Alha iloh lakw ndi lubot be dzoh nudeh-i, sBá stl'ayánkai-i, 'ulhtuzisnel?"

12 'Et lhuganne bumoodih 'ink'ez Lizwifne neilhchukne Sizi huyílhchoot 'ink'ez huyulghel.

13 Soo 'udechoo Annas 'en cho highu hinílhti. 'En la Caiaphas 'et nawhuduzuk huba lubret 'uk'enus dízti'-un unli ínle', 'ink'ez Annas, 'en oozaz unt'oh 'inka.

14 'Et ndun Caiaphas 'en 'utni ínle', Lizwifne bugha utni whe ndutni, 'ilhoghun dune 'en ts'iyanne dune ba dazsai de, 'et hootázoo' ni ínle'.

### *Peter Sizi 'aw t'éinúszun ní.*

15 'Ink'ez Simon Peter 'ink'ez 'ilhoghun yugha hodul'eh-un bulh Sizi huyúntiz'az. Ndun 'ilhoghun yugha hodul'eh-un, 'en lubret 'uk'enus dízti'-un t'éinínzun, 'inka 'en Sizi nanistl'oo bet yúlh danínya.

16 'Et Peter 'en dati yoo'az ts'e usyin. 'Et ndun Sizi yugha hodul'eh-un 'ilhoghun, mbe la lubret 'uk'enus dízti' t'éinínzun-un, 'en 'az tenínya 'ink'ez dati ghunlí-un yulh yaílhduk whe Peter cha daínilhti.

17 'Et nyoon ts'ekeyaz, dati ghunlí-un, 'en Peter 'uyulhni, "Nyun cha iloh lakw nyoon dune yugha hodul'eh-un 'ilhoghun inli?" 'Et Peter, "Awundooh," yúlhni.

18 'Et whulohne 'ustlene 'ink'ez neilhchukne te whúzk'uz 'inka kwun húdulhk'an. Nahuldzilh whe Peter 'en cha butoh usyin 'ink'ez naldzilh.

19 'Et ndun lubret 'uk'enus dízti'-un Sizi yugha hodul'ehne, 'ink'ez hubodulh'eh-un hukwa yoodulhkut.

20 'Et Sizi 'uyúlhni, "Soo ts'et gaih 'et ndi yun k'ut whudune'ne bubulh yásduk. 'Ahoohyiz wheni lugliz 'ink'ez lugliz whucho nts'e la Lizwifne 'ilhúnahodulh-un, 'et dune hodus'eh. 'Aw 'ilhooh whu'iz khuni be yalhúsdih.

21 'Ink'ez di ha hukwa soodulhkut? Daja dusni la mbene sudánts'one, 'enne uboodulhkut, soo ts'ih'un t'éhonínzun daja disni' la."

22 'Et Sizi njan 'et ndutni whe, 'ilhoghun neilhchuk-un yuzih usyin-un, yunin ts'e yunízkuk 'ink'ez 'uyúlhni, "Mbe na'dunínzun whe 'udini? Nyoon lubret 'uk'enus dízti'-un, 'en whuz un'a bulh yáilhdúk!"

23 'Et Sizi 'uyúlhni, "Dzoh k'un'a yatísdúk de, 'et nedini daja dusni. 'Et ts'ih'un un'a 'udusni de, di ha sunínkúk?"

24 'Et Annas 'awhuz Sizi 'ulhghel whe lubret 'uk'enus dízti'-un Caiaphas, 'en ts'un wheyalh'a'.

25 'Et Peter 'awhuz kwun ba usyin 'ink'ez naldzilh, 'et 'uhuyúlhni, "Nyun cha iloh lakw yugha hodul'ehne butoh 'ilhoghun inli?" 'Et whuts'oodidlai 'ink'ez, "Awundooh," ubúlhni.

26 'Et lubret 'uk'enus dízti'-un be 'ustle-un 'ilhoghun, Peter mbe da' yudzo háilht'az-un, 'en oonadun 'unt'oh, 'et yúlhni, "Nyun cha iloh lakw haníyeh k'et bulh 'ínt'en whe nyis'en íne!"

27 'Et doo cha za Peter whuts'oodidlai whe soo 'aho lugok dune 'udíja.

### *Sizi Pilate but néhinilhti.*

28 'Et Sizi Caiaphas ooyoh tenáhinilhti, yun k'ut humoodih, Pilate huyulhni 'en ooyoh ts'e whe úyhalhti. Bundada tube 'uda' 'uhoont'oh 'ink'ez Lizwifne 'aw hiyoh dálhidulh. 'Et yoh dahúnindil de, 'enne buba me hoonli.\* 'Et ndahúja de, 'aw njan Butus Lhuseya na'yut'ulh-un, 'aw 'uhoo'alh aít'oh 'et huwa.

29 'Et Pilate 'az butsun teninya 'ink'ez uboodulhkut, "Ndun dune ndet hukwa ook'éwhuh'ai whe 'aht'en?"

30 'Et 'uhuyúlhni, "Aw ndun dune ninta lhe'ít'el de, 'aw nts'uz toolhte' aít'oh."

31 'Et Pilate ubúlhni, "Ulhchóot 'ink'ez nohnich'oh nohba ootulhúhíside-i k'un'a ooba nahahyeh!" 'Et ndunne Lizwifne 'uhuyulhni, "Wheni 'aw dune ts'uzoolhghel-un negha lhúhoot'al."

32 Njan 'et nduhútni whe Sizi nts'en'a la datítsa howu yáilhdúk íne', 'oh te né'hoot'en ha' hutni.

33 'Et Pilate yoh ts'e whenája. Sizi yukunáwhulh'a' 'ink'ez 'uyúlhni, "Nyun eh Lizwifne bulerwe inli?"

34 'Et Sizi 'uyulhni, "Nyunch'oh eh 'et ndunínzun, k'us 'uyoonne si sghun nyodáni?"

35 'Et Pilate yúlhni, "Si eh Lizwif-un usdli nínzun? Nyunch'oh nyulh dunene 'ink'ez lubret bumoodihne, 'enne stl'ányuhalhti! Ndet whe ninta' nint'en?"

36 'Et Sizi 'uyulhni, "Nts'e la lerwe usdli-un 'aw ndi yun k'ut iloh 'uhoont'oh. 'Et ndi yun k'ut whulerwe usdli de, sunidulhne 'aw da' Lizwifne tl'asulhoolhtel oole' da'. Awundooh, whulerwe usdli-un 'aw ndi yun k'ut iloh 'uhoont'oh."

37 'Et Pilate yoodulhkut, "Et de lerwe inli whe 'int'oh!" 'Et Sizi 'uyulhni, "Nyun 'alha 'udini lerwe usdli. 'Et wheni whuzúsdi 'et huwa yinka whudune'ne soo cho dudeni be khuni 'alha 'unt'oh-i t'éhinoozeh 'inka ndi yun k'ut nenúsya. Mbene la khuni 'alha 'unt'oh-i t'ehunínzunne, daja dusni la soo cho suhoozilhts'ai."

38 'Et Pilate 'uyúlhni, "Di la 'unt'oh khuni 'alha 'unt'oh-i?" 'Et ndúdija hukw'elh'az doo cha za Lizwifne 'az butsun tenanja 'ink'ez ubulhni, "Aw whe ninta'unt'en-un ooghu nahós'alh-un hooloh!

\* 18:28 Ndun 'en 'udun yun k'ut whut'en-un 'unli, 'aw Lizwif yughu daóoya' huba lhe'hóot'oh.



39 'Et nohni nohe'út'en k'oh whuz'ai Nohtus Lhuséya-un whutoh 'ilhoghun dune 'adin'ai-un, 'en nohba oolanadustnih lhih. Ndun Lizwifne bulerwe, 'en eh oola nadutistnih hukwa' nahzun?"

40 'Et soo ts'iyawh sulya hulhduk whe 'uhutni, "Barabbas 'en oola nadintni, 'aw ndun 'en íloh!" 'Et ndun Barabbas 'en 'undunut'ih-un 'unt'oh.

## 19

### *Pilate Sizi tulalhgus unduntált'oh-un whuts'u be' hininya*

1 'Et hukw'elh'az Pilate Sizi huyolhtsas-un huwá balh'a,

2 'ink'ez lhuganne whus cho 'awh nahinilhjaz-i, 'i hitsi nehídan'ai, 'ink'ez luglok dulk'un-i, 'i hit'uhúyulhbal,

3 'ink'ez 'uhuyulhni, "Lizwif bulerwe-un sa' cho hona.'" 'Ink'ez hinin ts'e huyoonukat.

4 'Et doo cha za Pilate 'az buts'ú tenanja 'ink'ez 'ubulhni, "Nulh'en, ndun si 'aw whe ninta 'unt'en-un ooghu nahós'alh aít'oh, 'inka nohts'ú tenanusti."

5 'Et Sizi whus cho ootsi nedin'ai 'ink'ez luglok dulk'un-i naits'uz whe tenánja Pilate yunilh'en 'et 'ubúlhni, "Nulh'en, ndun dune!"

6 Lubret bumoodihne 'ink'ez neilhchúkne te, hitilh'en íbulh, soo tube cho sulya hulhduk 'ink'ez, "Tulalhgus 'undunulht'ah! Tulalhgus 'undunulht'ah!" hutni. 'Et Pilate 'ubúlhni, "Nohnich'oh ulhchoot 'ink'ez tulalhgus undunulht'ah! Si 'aw whe ninta 'unt'en-un ooghu nalhuwhús'al aít'oh 'et huwa!"

7 'Et Lizwifne 'uhuyúlhni, "Wheni khuni neba ootulhúhisde-i ts'ut'i, 'i k'ut 'utni, daáotsah huba 'uhoont'oh. Lhe'utni Yak'usda ooYe' 'ududulhtsi 'et huwa."

8 'Et Pilate whudánts'o whe tube 'on nus nílhjoot.

9 'Et doo cha za duyoh ts'e danánja 'ink'ez Sizi yoodulhkut, "Nts'ez de haínya whe 'int'oh?" yúlhni. 'Et Sizi 'aw yulh yálhtilhdih.

10 'Et Pilate 'uyúlhni, "Aw eh sulh yaóolhduk aít'oh? 'Aw eh t'éwhunuzínzun tulalhgus nyundunóst'a-un sghá whunt'ai k'us nla nadutistníh-un cha sghá whunt'ai?"

11 'Et Sizi 'uyúlhni, "Aw ndus de yak'uz whuts'un ngha lhúhoot'al de, 'aw sando 'ont'e' aít'oh. 'Et huwa mbe la ntl'asálhti-un, 'en oolubeshi nyun nlubeshi anus 'ulcho."

12 'Et Pilate whudánts'o whe Sizi whe yúla nadootnih-un, 'et nahó'alh hukwa 'it'en. 'Et Lizwifne sulya hulhduk 'ink'ez huyúlhni, "Ndun dune oola nadantni de, 'aw lerwe Caesar ooyadan íloh 'int'oh! Mbe la lerwe na'dudil'í-un, 'en lerwe Caesar yuch'az dítni-un 'unt'oh!"

13 'Et Pilate whuduzts'ai whe kw'uts'uzda yuk'usda whe dune ba nahiyilh-i, 'i k'enátl'adida'. 'Et Sizi dubut nehéyolhtelh ndet la Hebrew k'un'a Gabbatha huwhútni, 'i khuni 'utni tse ook'ut hoodzo-i ni whe 'utni. 'I k'ut kw'uts'uzda yulh'ai dune ba nahiyilh wheni.

14 Ndet dzin da' Butus Lhuséya-un, 'et dzin wheni lha húdútneh-un, 6:00 at'en 'uhúnit'oh, 'et Pilate Lizwifne ubúlhni, "Ndun nohlerwe nulh'en!"

15 'Et hoonts'i sulya hulhduk 'ink'ez 'uhutni, "N'awh bulh 'udini! Tulalhgus undunilht'ah!" 'Et Pilate 'ubúlhni, "Nohlerwe 'en eh tulalhgus k'eíastelh?" 'Et lubret bumoodihne 'uhutni, "Lerwe Caesar 'aw 'en za nelerwe, 'aw 'uyoon nelerwe hooloh!"

### *Sizi tulalhgus k'ehýilhti.*

16 'Et 'awet hodánts'o Pilate Sizi tulalhgus k'ehúyolhtelh wheni butl'ayálhti. Huyílhchoot 'ink'ez 'on 'un whenáhuyalhti.

17 'Et dutulalghus yuditelhe whe, nts'e da' 'Utsin Ts'un huwhútni, whuz oozya. 'Et Hebrew k'un'a Golgotha huwhútni.

18 'Et tulalghus k'ehíyilhti. 'Uyoonne nane cha huyúlh 'ubihinla. 'Ihoghun whe 'intl'us ts'e, 'et 'ilhoghun cha ooghu náilhni ts'e, 'et Sizi 'en soo buniz 'uhuyínla.

19 'Et Pilate yuk'úne'uzguz-i, 'i butl'ayán'ai tulalghus huyundunólht'a ha. 'I k'ut 'utni,

Sizi Nazareth Whut'en,  
Lizwifne bulerwe 'unt'oh.

20 Tube keyoh whenghoh 'uhuyinla whe tulalghus k'ehúyilhti 'et huwa, tube lhane Lizwifne ndi Pilate yuk'úne'úzguz-i hik'uyailhduk. 'Ink'ez ndi khuni tawh didowhne buk'un'a 'uk'unusguz. Hebrew k'un'a cha, Greek k'un'a cha, 'ink'ez Latin k'un'a cha.

21 'Et huwa Lizwif lubret bumoodihne Pilate huyúlhni, "Aw ndun Lizwifne bulerwe 'unt'oh dini whe iloh 'uk'einges. 'Ants'i njan ndutni dini, si Lizwifne bulerwe 'ust'oh."

22 'Et Pilate 'ubúlhni, "Ndai la 'uk'únusúsguz-i, 'i nts'en'a usdla, 'et whuz un'a oot'e' ha usdla."

23 'Et ndunne lhuganne Sizi tulalghus 'uhídunilht'o hukw'elh'az, hinaih huyílhchoot 'ink'ez dunghi huyulhtsi whe 'ilhone hinli whe lhtahúyulya. 'Et ndi 'ude k'ut ye usdá-i, 'i 'aw lhundunikai iloh whe 'ilho za unli whe 'ulya-i.

24 'I ghun didutch'oh 'ulhodutni, "Ndi 'i 'aw yanúlhts'udoolhch'ul. 'Ants'i ooghu 'áts'ool'ih, mbe suba oots'ítooneh." 'Et nduhútni whe Yak'usda ooghuni soo ook'oh te né'hoot'en 'inka 'uhutni. Ndi khuni 'i ndutni inle', "Snaih-i, 'i ts'iyawh lhtahuyulya.

'Et 'ude k'ut be susda-i, 'i higha 'ainlih."

'Et soo 'oh te lhuganne né'hust'en.

25 'Et Sizi ootulalghus soo benghoh 'et ooloo usyin. Ooloo bulhtus cha, 'ink'ez Mary Clopas oo'at cha, 'ink'ez Mary Magdala whut'en cha.

26 Sizi duloo yunilh'en 'ink'ez 'ilhoghun yugha hodul'eh, soo 'uk'enus yuk'entsi-un, 'en cha ye nghoh usyin. 'Et Sizi duloo 'uyulhni, "Ts'eke, ndun nye' nilh'en."

27 'Et ndun yugha hodul'eh-un, 'en cha yunilh'en whe uyúlhni, "Ndun nloo nilh'en." Soo 'et whuts'un ndun yugha hodul'eh-un Sizi ooloo duyoh dánilhti.

### *Tulalghus k'ut Sizi ye khúna-i yula ditni.*

28 Njan 'oh te ne'whust'en hukw'elh'az Sizi t'éwhunínzun soo ts'iyantsuk lhaóoduja. 'Et didut ooghun Yak'usda ooghuni 'uk'unusgúz-i daja ni la, 'et ndúhoneh 'et huwa, "Ta'óosda," ni.

29 'Et nyoo 'oosa'yaz ts'ekoo too' ts'ulki-i 'et us'ai. 'Et nyoo oota'nilt'sít-i nyoo ts'ekoo too' huyé tunahuyuz'ai 'ink'ez duchun hyssop huyúlhni, 'i la hídalh'oo', 'ink'ez hize ts'e dube' hidunintan.

30 'Et nyoo ts'ekoo too' ts'ulki-i yunawhúzdlih 'ink'ez 'utni, "Awet ts'iyantsuk lhawhúduja." Yo nenint'ai 'ink'ez ye khúna-i yula ditni.

31 'Et dzin 'et la nahulyís-un dzin huba lhadúdnuthe, 'ink'ez nyoo nats'ulyís-un dzin whudízti' whe 'uhoont'oh. Lizwifne 'et dzin nezi 'aw tulalghus k'ut oola' hukwa lhe'hunízun, 'inka Pilate huyoodulhkut bukechun k'unuhúyooyuz\* 'ink'ez buzi nanáhuyoooleh 'et hukwa.

32 Lhuganne whuz hoozdil whe soo 'udechoo ndunne nane Sizi hiyulh tulalghus k'ut sulhtíne, 'enne cho bukechun k'unuhúzyuz.

\* 19:31 'A cho dahóotsah ha.

<sup>33</sup> 'Et Sizi highu nindil whe 'uda' dazsai hinilh'en, 'inka 'aw hikechun k'unulhúhiyus.

<sup>34</sup> 'Et hoonts'i 'ilhoghun lhugan-un sohtuz be yuzih k'ut 'et yúzgwut. 'Aho 'uskai' 'ink'ez tooyaz bulh, 'i oots'u hay'jul.

<sup>35</sup> 'Et ndun mbe la howu yalhduk-un, soo 'alha whunalh'en whe 'utni. 'Ink'ez daja ni la soo didutch'oh t'éwhunúnzun whe 'utni. 'Et huwa la nohba 'alha 'uhot'e'.

<sup>36</sup> 'Et whuz un'a 'oh te ne'whust'en. 'Et huwa ndai la Yak'usda ooghuni 'uk'unusguz-i, 'i k'un'a lhawhúduja whe ndutni, "Aw 'ilho oots'un 'i hoonts'i k'ulhítih," ni.

<sup>37</sup> 'Et Yak'usda be 'udustl'us 'uk'unusgúz-i, 'i k'ut 'udun 'et cha 'utni, "Mbe la huyúzgwut-un, hinoohl'en la," ni.

### *Sizi 'ahúyalhti.*

<sup>38</sup> 'Awet 'oh te ne'whust'en hukw'elh'az 'et Joseph, Arimathea whut'en-un, Pilate yughu ninya 'ink'ez Sizi oozi yólhchoot hukwa yoodulhkut. 'Et ndun Joseph 'en cha Sizi yugha hodul'eh-un unli, 'et hoonts'i Lizwifne bube nuljut 'inka whu'iz Pilate 'awet yugha ónin'ai Sizi oozi nayólhchoot 'ink'ez whusainya 'ink'ez oozi yílhchoot.

<sup>39</sup> 'Et Nicodemus, 'en cha yulh whúsain'az. 'En 'uja ínle' soo 'udechoo Sizi whe' dit'en whe 'ilhe 'ulhdzís yughu ninya.† Yoo sooltsun-i, myrrh 'ink'ez aloes bulh lhtadilyá-i whe 100 pounds at'en 'uldaz, 'i whusayán'ai.

<sup>40</sup> 'Et Sizi oozi huyílhchoot 'ink'ez Lizwifne bube 'ut'en k'oh hukw'un'a, naih dizti' 'ulhyúl-i huyílhchoot 'ink'ez yoo sooltsun-i lhtahidínla-i hik'únuhúyuzdzai, 'ink'ez Sizi oozi higha húyozdúz 'ahitilhtelh wheni.

<sup>41</sup> 'Et nyo ndet da' tulalhghus 'ahidunilh'tó-un, 'et whenghoh haniyeh k'et whuz'ai. 'Et la 'awhundidi-un tse be tsa k'et 'aw whutso da' dune 'alhuhulhtí-un whuz'ai.

<sup>42</sup> 'Et tube nilhdukw 'inka Sizi oozi 'et 'uháyalhti, Lizwifne 'et dzin lhahúdutneh-un 'uhoont'oh 'et huwa.

## 20

### *Sizi ts'un k'ut dunadija*

<sup>1</sup> Lisman whutoh 'udechoo dzin 'awhuz tshólhghus whe Mary Magdala whut'en-un, ts'un k'uz tizya. Whuz oozya whe tse cho ts'un k'ut whudadín'ai-i, 'udun duniz'ai whe yutilh'en.

<sup>2</sup> 'Et 'awet Simon Peter 'ink'ez nyoon 'ilhoghun Sizi yugha hodul'eh-un k'us yúk'entsi-un, 'en bulh, bughulgai 'ink'ez úbulhni, "NeMoodihti oozi huyílhchoot. 'Uts'un whe húyalhti, 'ink'ez 'aw t'éts'onúsuzun nts'e suba whe húyalhti."

<sup>3</sup> 'Inka Peter 'ink'ez nyoon 'ilhoghun bulh ts'un k'uz ts'e hutilhgai.

<sup>4</sup> Lhga hilgai. 'Et nyoon 'ilhoghun 'en Peter anus 'a nulgai huwa 'udechoo ts'un k'uz oolhgai.

<sup>5</sup> 'Awet whuz oolhgai da, nyo duja 'ink'ez ni' whunalh'en. 'Et naih dizti'-i 'et usdla yunilh'en, 'et hoonts'i 'aw dálhiyal.

<sup>6</sup> 'Et soo yunilgih whe Simon Peter whuz oozya. 'En ts'un k'ut danínya 'ink'ez naih dizti'-i 'et usdla yutilh'en.

<sup>7</sup> 'Et nyoo dzezoh ootsigha gha yóonaszuz inlé'-i, 'aw naih dizti'-i ootoh whe yooloh. Soo cho lhénintan 'ink'ez 'udun sulhchooz.

† 19:39 Tat yus k'ut at'en ínle', 'et huwu yalhduk whe 'utni.

8 'Et nyoon 'ilhoghun yugha hodul'eh 'udechoo ts'un k'uz oolhgai-un, 'en cha danínya. Soo cho whunalh'en 'ink'ez ooba 'alha' hooja.

9 'Et 'awhuz soo cho dudení be t'éhonúszun daja ni la ndi Yak'usda ooghuni 'uk'unusgúz-i k'ut, Sizi yaidlanne toh dunáduádálh 'et huwun.

10 'Et 'awet Sizi yugha hodul'ehne duyoh ts'un whenáhit'az.

*Sizi Mary Magdala whut'en-un, 'en yunalhts'et háinya.*

11 'Et hoonts'i Mary 'en ts'un k'ut 'awet nétl'adinda'. Yoo 'az ts'e usyin 'ink'ez utso. 'Ink'ez utso whe nyo dunt'oh 'ink'ez ni' tse bez whunilh'en.

12 Khunsul nane lizas soo ulhyúl-i be húzke, ndet whe ubutilh'en. 'Ilhoghun 'en yutsi t'ah, 'et 'ilhoghun cha yuk'etl'ah ndet la Sizi oozí ilhte'-un, 'et huzke.

13 'Et huyoodulh'kut, "Ts'eke, di ha' d'ini intso?" 'Et 'ubúlhni, "SMoodihti 'uts'un whe húyalhti 'ink'ez nts'e suba 'ahúyalhti 'aw t'éwhunuzúszun."

14 'Et ndúdiya hukw'elh'az n'awh nalh'a whe khunsul Sizi 'et usyin whe yutilh'en, 'et hoonts'i 'aw Sizi 'unt'oh 'aw nalhuyóolts'ulh.

15 'Et Sizi 'uyulhni, "Ts'eke, 'et di ha intso? Mbe kunínta whe 'int'en?" 'Et Mary 'uninzun haniyeh k'et huwunlí-un tole 'ut'en, 'ink'ez 'uyulhni, "Nyun ílhchoot 'ink'ez 'uts'un wheílhti de, nts'e nenilh'it-un sudíni, 'et de si naóoschoot."

16 'Et Sizi yukahizya, "Mary," yúlhni. 'Et Mary n'awh nalh'a 'ink'ez, "Rab-boni!" yúlhni ('i khuni nehodulh'eh-un ni whe 'utni).

17 'Et Sizi 'uyúlhni, "Aw njan soontun iloh. 'Awhuz ndo sBá oots'un nálhtuzusdai. 'Et hoonts'i sulhutsinke buts'un naíndalh 'ink'ez ubudíni, ndo sBá oots'un nátsidalh. 'En nohni cha nohBá. Si sYak'usda 'ink'ez nohni cha nohYak'usda unli."

18 'Et Mary Magdala whut'en-un Sizi yugha hodul'ehne bughu nanja 'ink'ez ndi khuni buba whusanaídan'ai, 'ink'ez neMoodihti cha yan'en ubúlhni. 'Et Sizi daja yudáni'-un hukw'u bubulh náhoolnuk.

*Sizi yugha hodul'ehne bunalh'ts'et háinya.*

19 'Et dzin 'et 'udechoo dzin lisman whutoh 'uhoont'oh, 'et hulhgha za, 'et yugha hodul'ehne 'ilhunahosdil. Dulh Lizwifne bube hunuljut 'inka datih ts'iyawh dádinla. Khunsul Sizi butoh usyin hitilh'en. 'Et ubúlhni, "Soo cho nohdzi doghel."

20 'Et ndúbudani' whe dula cha, 'ink'ez duzih k'ut cha bunalh'ts'et hahonla. 'Et yugha hodul'ehne tube cho huhóost'et buMoodihti huyan'en 'inka.

21 'Et Sizi doo cha za 'ubúlhni, "Soo cho nohdzi doghel. Nts'en'a la sBá whuz de sútih'a', 'et whuz un'a si cha nohtis'alh."

22 'Et ndúdiya hukw'elh'az buk'uz injiz 'ink'ez ubúlhni, "Ndoni nohyudóolts'it.

23 Mbene la bulubeshi buba 'un tilhdilne, 'enne 'uda' buba 'un tizkat whe 'unt'oh. 'Ink'ez mbene la bulubeshi buba 'un lhituzulhdilne 'aw buba 'un lhitikulh whe 'unt'oh."

24 'Et nyoonne whunizyanne 'on 'at nane butoh 'ilhoghun, 'ut'udánda'-un, Thomas huyulhni-un, 'aw butoh hooloh whe Sizi bughu ninya.

25 'Et nyoonne yugha hodul'ehne, 'enne Thomas huyulhni, "NeMoodihti ts'an'en!" 'Et 'ubúlhni, "Soo sich'oh sna be oola lugloo k'oh whunis'en, 'ink'ez slasga be 'anúdizga de, 'ink'ez oozih k'ut 'et sla be ooka k'et 'anúdizni de, 'et de za la sba 'alha 'uhot'e,'" ni.

26 'Et 'ilhu lisman inle' whe, doo cha za Sizi yugha hodul'ehne yoh bez ts'e hudilh'ts'i whe Thomas 'en cha butoh usda. Datih duts'o dadin'ai, 'et hoonts'i khunsul Sizi butoh usyin hitilh'en, 'ink'ez 'ubulhni, "Soo cho nohdzi doghel."

27 'Et Thomas 'ulhni, "Sla nilh'en 'ink'ez nlasga be ska k'et nudilga 'ink'ez nla be szih k'ut cha nudílnih. 'On 'at si sghun whuts'oodónlai' junih. Mba 'alha 'uhot'e," yúlhni.

28 'Et Thomas 'uyúlhni, "SMoodihti 'ink'ez sYak'usda!"

29 'Et Sizi 'uyúlhni, "Thomas, 'andit san'en, 'et huwa mba 'alha 'uhoont'oh. 'Et hoonts'i mbene la 'aw sulhí'el hoonts'i, 'ink'ez buba 'alha 'uhoont'ohne, 'enne 'uk'enus hoonzoo-un bugha whults'ut."

30 'Et 'on nus lhat-un yugha hodul'ehne bunalh Sizi hooncha túne' 'ust'en 'et hoonts'i 'aw ndi 'udustl'us k'ut 'uk'ulhúhooguz.

31 'Et hoonts'i nduwhi 'uk'unusgúz-i soo cho oogha t'éwhunohzin 'ink'ez nohba 'alha 'uhot'e', 'alha Sizi 'en Christ, Yak'usda ooYe', 'en 'unt'oh. 'Et njan nohba 'alha 'uhoont'oh whe 'ilhiz oole' be ts'úkhuna-i, 'i Sizi Gri boozi' gha tiht'elh.

## 21

### *Sizi yugha hodul'ehne lho ha' hut'en-un, 'et doo cha za bunalh'ts'et haínnya*

1 Njan 'oh te ne'whust'en hukw'elh'az, doo cha za Sizi yugha hodul'ehne bunalh ts'et haínnya. Bunghun Tiberias huwhútni-un, 'et 'uja.\* 'Ink'ez bunalh ts'et haínnya whe njan 'oh te ne'whust'en:

2 Simon Peter, Thomas 'ut'udánda'-un, Nathanael, 'en keyoh Cana huwhútni Galilee yun k'ut whuz'ai, 'et whut'en-un, Zebedee ooye'ke cha, 'ink'ez 'uyoonne nane Sizi yugha hodul'ehne cha, 'enne ts'iyawh 'alhgoh hudilhts'i.

3 'Et Simon Peter 'ubúlhni, "Lho ha' tist'elh." 'Et ts'iyawh 'uhuyulhni, "Wheni cha la nyulh 'úztodilh." 'Et 'aho soo ts'iyawh ts'i cho be hándil. 'Ulhdzis ndúwhulyiz whe nute'hule', 'et hoonts'i 'aw lhe'hílooh.

4 'Om bun bundada' sa haín'ai whe khunsul Sizi taba usyin hitilh'en, 'et hoonts'i ndunne yugha hodul'ehne 'aw Sizi 'en 'unt'oh t'éhonúszun.

5 'Et Sizi 'ubúlhni, "Ts'oodunne† 'aw eh lhe'áhlooh?" "Gak," huyúlhni.

6 'Et doo cha 'ubúlhni, "Nohlembil ts'i ooghu naílhni ts'e whuz talhkat, 'et de la be 'óohloo." 'Inka whuz tahiyalhkat, lho whuz lhai huzdlooh k'et, 'aw lhembilh hanáhuyoolelh aít'oh.

7 'Et ndun 'ilhoghun Sizi k'us yúk'entsi'-un, 'en Peter 'ulhni, "NeMoodihti 'ut'en." 'Et neMoodihti 'ut'en ni Peter yudánts'o whe soo 'a cho yoo'az ts'e ye usdá-i yunállhoh, 'ankw'us 'ust'et 'unt'oh ínle' 'inka, 'ink'ez bunghun tooz tállhoh, Sizi ts'u tiyalh 'et wheni.

8 'Aw taba howu nilhza' iloh 'uhut'en, whunizyat 'on 'at whunizyat negan ghútistni at'en 'uwuldzoh. 'Inka nyoonne yugha hodul'ehne ts'iyaz be hándil 'ink'ez lhembilh lho tubulh toot huyigus whe yaháyulhdlat.

9 Yanáhuski whe taba kwinyaz dízgun 'ink'ez lho ook'ut butá'unekh 'ink'ez lhes cha 'et us'ai huwhutilh'en.

10 'Et Sizi 'ubulhni, "Nyoo lho suhlooh-i ooloh dizáhlelh."

11 'Et Simon Peter ts'i yenya, 'ink'ez lhembilh taba yáyuzguz. Lho soo ncha-i za dízbun, 153 'ultsuk. Tube lhai 'ink'ez undaz, 'et hoonts'i lhembilh 'aw k'ulhíh'ulh.

12 'Et Sizi 'ubulhni, "Anih, njan na'uht'alh." Huyéntsaz whe 'aw 'ilhoghun hoonts'i mbe 'unt'oh-un hukwa lhahuyoodulhkat, 'uda' t'éhonínzun neMoodihti 'en 'unt'oh 'inka.

\* 21:1 Ndi bunghun 'i Galilee cha huyúlhni. † 21:5 'Oh da' whuloh te whuz un'a duyadanke bulh yáhalhduk.

<sup>13</sup> 'Et Sizi whuz oozya, lhes yílhchoot 'ink'ez bugha ínin'ai. 'Et whuz un'a za lho cha bugha íninla.

<sup>14</sup> 'Et 'awet yaidlanne toh dunadija whuts'un, whulh tat Sizi yugha hodul'ehne bunalh ts'et hainya.

<sup>15</sup> 'Awet na'hit'al hukw'elh'az, Sizi Simon Peter yoodulhkut, "Simon Jonas ooye', ndunne, 'enne buba nús eh sk'eintsi'?" 'Et Peter 'uyúlhni, "A sMoodihti, nyunch'oh t'éwhunínzun nyadan usdli." "Et de se 'usbaiyazne bube 'olh'alh," yúlhni.

<sup>16</sup> 'Et doo cha za whulh nat yoodulhkut, "Simon Jonas ooye', 'usk'eintsi' eh?" 'Et Peter 'uyúlhni, "A sMoodihti, nyunch'oh t'éwhunínzun nyadan usdli." "Et de se 'usbaine bughonle'," yúlhni.

<sup>17</sup> 'Et doo cha za 'andit yoodulhkut, "Simon Jonas ooye' 'alha eh syadan inli?" 'Et Peter tube ooba dzoh sulí', Sizi whulh tat-un yoodulhkut whe 'uyúlhni, "Syadan inli eh?" 'uyúlhni. 'Et Peter 'uyúlhni, "SMoodihti, nyunch'oh ts'iyantsuk t'éwhunínzun. 'Ink'ez nyunch'oh t'éwhunínzun nyadan usdli." 'Et doo cha Sizi 'uyúlhni, "Se 'usbaine bube 'ilh'alh!

<sup>18</sup> Soo ts'ih'un un'a nyudúsní, soo chilh inli da' soo cho soo nadint'ih 'ink'ez nts'e la hukwa' nínzun, 'oh te ninya inle'. 'Et hoonts'i hoonyan sinli' de, nla nusóontun 'ink'ez 'uyoon dune nla yé'dinguz, 'i t'az nts'e hukwa lhe'nínzun, 'oh te hoonts'i núnyutilhtelh," yulhni.

<sup>19</sup> 'Et Sizi ndúyulhni whe nts'en'a la didut datítsah huwa Moodihti yudutálhti', 'et wheínulhtun whe 'utni. 'Et ndi dani' hukw'elh'az 'et, "Sunanyalh," yúlhni.

<sup>20</sup> 'Et Peter 'awh nalh'a whe nyoon mbe da' Sizi k'us yúk'entsi'-un, 'en 'uja 'udek'ez na'hút'alh-un yuts'un le'uja 'ink'ez yoodulhkut, "SMoodihti, mbe 'utinelh nye 'óotakulh?" yúlhni, 'et Peter 'awh nalh'a whe 'en 'ubuniyalh whe yutilh'en,

<sup>21</sup> Peter yan'en whe Sizi 'uyúlhni, "SMoodihti, ndun 'en do' datínelh?"

<sup>22</sup> 'Et Sizi 'uyúlhni, "Whusanátisdalh whuts'un 'et hoona' hukwa' nuszun de, nyun mba lhe'hoot'oh. 'Et nyun sunanyalh."

<sup>23</sup> Mbene la lhulhutsinke sulí'ne 'et ndi khuni Sizi ye yátílhduk-i ts'iyawh butoh nídilhts'ut, nyoon mbe da' Sizi yuk'entsi'-un 'aw dálhtisa. 'Et hoonts'i Sizi Peter 'aw lhídínel ndun 'en 'aw dálhtisa. 'Ants'i yúlhni, "Whusanátisdalh whuts'un 'et 'en hoona' hukwa' nuszun de, nyun mba lhe'hoot'oh?"

<sup>24</sup> 'Et ndun yugha hodul'eh-un, mbe da' Sizi 'uk'enus yuk'entsi'-un, 'en 'udani' njan howu yailhduk 'ink'ez 'uk'ehoonguz 'ink'ez daja dani' la soo 'alha 'uhoont'oh 'et t'éts'onínzun.

<sup>25</sup> 'On 'un cha tube lhat-un Sizi ne'úst'en. 'Et huwun ts'iyawh 'uk'éhooguz de, 'udust'us lhai k'et ndi yun k'ut 'et hoonts'i 'aw soo lhe'hoolcho oole' da' 'et tilalh wheni núsun. 'Et ndo honeh.

## Whel'a'ne Bube 'Ut'en K'oh

### *Luke Theophilus hadih yulhni*

<sup>1</sup> Syadan Theophilus, hadih. 'Udechoo 'ook'une'úguz 'uk'unusúsguz-i Sizi nts'oh te ne'úst'en 'ink'ez nehodulh'eh 'et huwun ndet dude 'ut'en whe' yudilh'en,

<sup>2</sup> 'ink'ez ndet dzin ndo yak'uz whenája 'et whuts'un. 'Et ndo yak'uz natiltelh whutso ndunne dune whel'a'ne ubullh'tsi, 'enne Ndoni gha buba núhizye'.

<sup>3</sup> Sizi dazsai hukw'élh'az dit whunizyat dzin ndoohoolyiz lhat whe bunalhts'et nusúya 'et whuz un'a 'alha khuna 'aw whuts'u hoodódlai' ait'oh. Hinilh'en 'ink'ez Yak'usda dune k'úne' bul'en-un huwun bubulh yálhduk.

### *Ndoni buts'u yoosdzi*

<sup>4</sup> 'Et la 'iloh hudilh'tsi i whe bugha khúni nin'ai whe ubúlhni, "Jerusalem huwu toohdilh junih! SBá ye nóhts'u náhizya-i, 'i ooba oolh'é'. Ndai la nohgha tít'alh-i huwun nohdúsní inle'.

<sup>5</sup> John dune too be 'ulh'en-un, 'en too be too be' nohulh'en inle', 'et hoonts'i 'aw lhadzin iloh inle' de, 'et whusawhútilts'ulh. sBá 'en Ndoni nohts'o t'l'aiduti'alh 'ink'ez nohyudútilts'ulh. 'Et whuz un'a too bé' nohtilelh," ubúlhni.

<sup>6</sup> 'Et whel'a'ne Sizi te 'ilhunahosdil whe 'et Sizi huyoodulh'kut, "NeMoodihti, 'awet eh whusahónzut Israel oots'u hainzutne doo cha za 'uyoonne yun k'ut whut'enne bumoodih nahutidleh?"

<sup>7</sup> 'Et Sizi ubúlhni, "Nts'o whude 'uwhutánelh-un 'aw nohni t'oonózin huba lhe'hóot'oh. SBá, 'en za t'ewhunínzun.

<sup>8</sup> 'Et hoonts'i Ndoni nohyudúts'ut de soo nohdzi ulhtus whe Jerusalem 'et si sba dune whunulhtunne tihle, Judea yun k'ut ndulcho whe cha, Samaria yun k'ut cha, 'ink'ez ndi yun k'ut ndulcho whe cha," ubúlhni.

### *Sizi Gri yak'uz whenája*

<sup>9</sup> 'Et ndi yughu yatílhduk whe 'awet ndo yak'uz whenája. 'Et hinilh'en whuz za kw'us yo ts'e hooloh sulí'.

<sup>10</sup> 'Et 'awhuz ndo yat ts'e hika itís'en whe khunsul nane dune ulhyul 'i be dune unlíne buzih bube hóodiltsai.

<sup>11</sup> "Galilee whut'enne, di ha 'et núdulhya 'ink'ez ndo yat ts'e whunulh'en? Ndund Sizi ndo yak'uz ts'e nohghu whenája-un 'andit nulh'en ndo yak'uz whenája, whuz un'a za whusanátidalh," ubuhútni.

### *Tenahudutidli huba 'et 'iluhodulh*

<sup>12</sup> 'Et la whel'a'ne dzulh Olive huyúlhni-i hiye nádídl whe Jerusalem ts'e nahoosdil keyoh whuts'un dzoh nilhdza' whe' hoont'oh.

<sup>13</sup> Jerusalem ts'e náhoosdil whe, 'aho ndo yoh huwhut'i-un danáhundil. Peter, John, James 'ink'ez Andrew, Philip 'ink'ez Thomas, Bartholomew 'ink'ez Matthew, James Alphaeus ooye', Simon Lizwifne ba huwu daóodit'owh-un, 'ink'ez Judas James ooye', 'enne 'et yoh hudilh'tsi.

<sup>14</sup> 'Ahoohlyiz 'iluhodulh tenahudutidli hukwa. Ts'ekoo bulh cha, Sizi bulhutsinke cha, 'ink'ez Mary ooloo cha, ts'iyawh tenahududli.

### *Judas k'enádija-un*

<sup>15</sup> 'Et 'oh da' dzin yugha hodil'e'ne 'ilhúhózdil ('alghoh 120 at'éenne dune). 'Enne butoh Peter bubulh yátílhduk ha dudinya,

16 'ink'ez ubúlhni, “Sulhutsinke ndi Yak'usda ooghuni 'uk'unusgúz-i 'et lhaóodotneh huba' hoont'oh. Ndet David hón'en Ndoni 'en gha Judas datínelh 'et yughu yalhduk. Judas 'en húbunilhtan whe 'oh da' Lizwifne Sizi huyílhchoot inle'.

17 'En cha nebulh 'óot'en ha 'utahálti inle'. 'Et huwa Judas wheni k'un'a en cha whel'a'-un inle'.

18 (Ndi sooneya Judas oogha íninkat ninta' 'ant'en huwa 'i be yun lhadínt'oh-i onket. 'Et Judas nadílduz 'ink'ez ooyust'e ndulcho whe bé hahooltal.

19 Jerusalem whut'enne ts'iyawh whulh 'úhudants'o 'inka nahahoozi “Akel-dama” huwhútni. 'I khuni, “'Uskai' Yun” ni whe 'utni.)

20 Peter 'et cha ndutni, “Yak'usda ooghuni 'uk'unusgúz-i k'ut 'Shun' huyúlhni, 'i ndutni, 'Ooyoh 'aw dune lhuhoót'ih hoole'. 'Ink'ez cha ndutni, 'Oobe 'ut'en k'oh 'uyoon yuk'enádooja'!

21-22 “'Et huwa 'uyoon netaóoya' Sizi Gri dunadija-un huwun nela ts'ih'un 'udooni' ha. Mbe la dune 'utaháztilhtel-un, 'en 'ahoolhyiz huba nebulh 'it'en inle', 'en 'uztilelh. 'Udechoo Sizi neMoodihti nebulh tizya da' 'et whuts'un, 'et ndet la John dune too be 'ulh'en-un too bé' yinla da' 'ink'ez ndo yak'uz negho whenája 'et whuts'un.”

23 Hukw'elh'az Peter budáni'-un, 'inka nane dune, 'enne 'utahábahalhti. 'Ilhoghun Joseph 'en la Barsabbas huyúlhni, Justus cha huyúlhni. 'Et 'ilhoghun cha 'en Matthias huyúlhni.

24 'Et tenahudidli whe nduhútni, “NeMoodihti nyun ts'iyanne dune budzi yo téoonínzun. 'Et huwa whunénilhtun k'us umbe 'en neba 'utuhaílti.

25 Judas ninta' 'ant'en whe nts'e huba 'ant'oh ts'e wheínya, 'et huwa ndun yuk'enádutidalh-un, 'en whel'a'-un whunénilhtun mbe suba 'uts'oooleh.”

26 'Et nahúlt'oh buboozi' tse k'ehúyinguz 'ink'ez huyuntílhgai k'us umbe boozí' ndo nádilhts'ut-un, 'en 'utahatíltelh. 'Et ndúja whe Matthias 'en whel'a'ne whunizyane 'on 'at 'ilhoghun hinli whe butanínya.

## 2

### *Ndoni mbe la ooba 'álha' hoont'ohne, 'enne buyudílt's'ut*

1 'Et la Lizwif budzenis whuti, Pentecost\* huwhútni-un, whusahóolts'ut whe ts'iyanne Sizi ooba 'alha' hoont'ohne 'ilhoghun yoh 'ilhuhozdl.

2 Khunsul ndo ya 'tah ts'e 'uhuduzts'ai 'ants'i nilhts'i cho dílt's'ulh le'whutni. 'Ink'ez nyo yoh hudilhts'í-un ndulcho whudutni.

3 'Ink'ez la 'ants'i kwun dult'oh-i hitilh'en 'ink'ez lhawh tizkat whe yoh dílt's'íne 'ilhone hinli whe buk'édinkat.

4 'Et la dílt's'íne ts'iyawh Ndoni buyudílt's'ut 'ink'ez khuni whutso da' t'ehinúszun-i be yawhehúnilhduk, 'et Ndoni bugha óonin'ai ndo dooni' ha.

5 'Et 'awet lhane Lizwifne, Yak'usda yunidúlhne hinli Jerusalem húdilhts'í nilhdza' keyoh ts'e hahándil njan dzenis whuti 'et wheni.

6 'Et la keyoh whut'enne 'ants'i whudutni 'et huwhudánts'o ha, whe la ts'iyawh lhelhts'un keyoh whut'enne bughuni be bubulh yáwhehuniilhduk tube whe bughá 'unjaz.

\* 2:1 Njan dzin dakelh k'un'a Ndoni dzin huwhútni. 'Oh da' Lizwifne budzenis whuti 'i ha'nukat-un huwhútni.



7-8 Buba hooncha k'et lhdulhyo 'uhudutni, “Nts'en'a 'uwhutát'elh? Ndunne Galilee whut'enne lhe'hutni nek'uyáhulhduk wheni nek'un'a ubuzdits'o,” hutni.

9 “Wheni Parthia, Media, 'ink'ez Elam whut'enne ts'inli. Mesopotamia whuts'un, Judea 'ink'ez Cappadocia whut'enne cha ts'inli. Pontus whuts'un, 'ink'ez Asia ts'u haíndilne cha ts'inli.

10 Phrygia whuts'un, 'ink'ez Pamphylia whut'enne cha ts'inli. 'Et Egypt whuts'un, 'ink'ez Lybia whunat Cyrene whuzih whut'enne cha, whulohne cha Rome ts'e hats'ándil.

11 'Alhgho Lizwifne 'ink'ez 'udun yun k'ut whut'enne, mbe la Lizwif ts'u nálhyane, netoh whulohne cha Crete 'ink'ez Arabia ts'u haíndilne ts'inli. 'Et hoonts'i dáhoolcho 'i be Yak'usda ne'úst'en-un, 'et ndúhoolcho whe whenich'oh neghuni k'un'a, whuz un'a ubuzdits'o,” hutni.

12 Bughá ne'usjaz 'ink'ez 'uhoot'e' ts'e hooloh whe ts'iyawh lhuhoodulkut, “Dawhúanelh whe suba 'uwhutni?” lhodutni.

13 'Et 'uyoonne, 'enne la Sizi ooba 'alha' 'unt'ohne ghu hidloh, “Ndunne dune yatahinátnai,” whe' hutni hubuhútni.

### *Peter Lizwifne bubulh yálhduk*

14 'Et Peter whel'a'ne butoh dudinya 'ink'ez 'ilhozdilne bubulh whe nduniltul, “Sulh dunene 'ink'ez nohni Jerusalem whut'enne cha ts'iyawh soo zúlhts'ai, 'et la nohdósní' dáhooja njan 'et huwun.

15 Ndunne dune 'aw talhahunítnai' nohni ndunáhzun hoonts'i, ts'ant'ez 'andit ts'iya dzetniz whutso 9:00 'uhoont'oh.

16 Njan dawhút'en-un, 'et la Yak'usda be nus hón'en-un, Joel, huwu yailhduk whe ndutni,

17 'Nts'en'a la 'andit dune ts'inli 'etsul 'uhóoja de, ni Yak'usda, 'et de syughi si sgha 'en ts'iyanne dune yududútilts'ulh.

Nohuzkehke nus daóotanelh-un 'et huwu yahutilhduk.

Nohchilke cha bubenghun newhúlt's'uk-un t'ehontázin.

Nohduneti 'enne cha nótitus whe t'ehóntizeh.

18 'Ink'ez 'oh de sba 'ut'enne, 'enne hoonts'i dune cha ts'ekoo cha ts'iyawh syughi si sgha 'enne buye idutilts'ulh 'et huwa 'enne cha nus daóotanelh-un huwu yahutilhduk.

19 Ndo yat 'et cha 'ink'ez ndi yun k'ut cha huwa 'ít'en te né'whutis'en.

'Et la 'uskai' cha, kwun cha,

'ink'ez lhut lhai cha whutáleh.

20 Sa 'i cha tsálhgus yudútilts'ulh 'ink'ez 'ulhdzis ooza' 'i cha 'uskai' k'un'a dulk'un tileh, ndet la whéwhunujut 'ink'ez whudízti' dzin neMoodihti whusatíyahl 'et whutso 'uwhutánelh.

21 'Et ndet la whusahónzut-un, 'et whusaóotilts'ulh mbene la neMoodihti hudutijih hits'u hukwa 'utnine, 'enne hudutijih.' ”

22 Peter 'et cha ndutni, “Israel oots'u hainzutne sghuni soo cho oozúlhts'ai, Sizi Nazareth whut'en-un, Yak'usda nohts'ítih'a'-un, 'en Yak'usda gha huwa 'ít'en te ne'út'en, 'et whe whunóhnilhtun njan nohtoh 'uhoot'en 'et huwa t'ewhunáhzun.

23 Yak'usda nanínízut 'ink'ez 'uda' t'eeoninzun-un, 'i be 'uda' Sizi noht'atíltelh néwhunin'ai. Nohni nohgha lubeshi 'ulh'enne Sizi tulalhgus 'uhídunilht'o 'et whuz un'a súlghhi.

24 'Et hoonts'i nahuyílhna'. Be dats'útsaih-i yuch'a nilde, 'aw 'ilhiz daootsah huba lhe'hóot'oh 'et huwa.

25 'Et la 'uda' David yughu yailhduk ínle' whe ndutni, "Ahoohlhyiz neMoodihti szih nus'en.

Noolhni ts'un'k'us szih usyin dzoh noszut whuch'a.

26 'Et huwa 'ahoolhyiz sdzi hóont'i',  
'ink'ez whuníni bulh cha yasduk,  
'ink'ez si 'atsul yinka susda.

Datísah de 'aw whénoozjut aít'oh.

27 Natnilh keyoh si szul 'aw 'et neóolhtelh aít'oh

'ink'ez mbe la ts'ih'un mba 'únt'oh-un 'aw ooyust'e oohljut aít'oh.

28 'Ilhiz khutisnalh-un, 'et whusúniltan.

Sulh 'ínt'oh 'et huwa hoonúst'i' sotalhtselh.'"

29 Peter 'on 'un cha ndutni, "Sulh dunene David netsoda'-un keyoh whuduchun unlí-un, 'en ghun ts'ih'un un'a whunóhnoostun hukwa' nuszun. David dazsai 'ink'ez 'uháyáhlhti 'ink'ez oots'un k'ut 'awhuz nezih whuz'ai.

30 'En Yak'usda be nus hóo'en-un 'unt'oh 'ink'ez Yak'usda ye yúts'u nahizya t'einínzun. 'Ink'ez Yak'usda whuz un'a yuba néwhunin'ai whe yúlhni, 'David oots'u hainzut-un, 'en 'ilhudzin David k'un'a ookw'uts'uzda cho dizti-i k'utidalh,' 'en Christ 'unt'oh.

31 David nus hón'en whe Yak'usda datínelh la t'eeonanzin 'inka Christ dunádutádah 'et huwu yailhduk whe ndutni,

'Yaidlane toh 'aw néyolhtelh aít'oh,  
ooyust'e cha 'aw oohljut aít'oh.'

32 'Et ndun Sizi 'en za dazsai whe Yak'usda nahuyílhna' inle' 'ink'ez wheni oogha hodul'ehne ts'iyawh khuna whe ts'an'en 'et huwa. 'Alha nahítna' t'ets'onínzun.

33 Ndo yak'uz 'uk'enus whudízti'-un, 'et Yak'usda oonailhni ts'e natl'aidalhda' 'ink'ez nets'ú yoozi-i, 'i gha Yak'usda duYe' yutl'ahón'ai. 'Inka 'en Ndoni nets'ítihl'a' 'ink'ez neyudílt's'ut. 'Ink'ez 'alha 'unt'oh 'andit dzin ndi 'i oozúlhts'ai 'ink'ez nulh'en.

34 'Aw David yak'uz nulhiyal, 'et hoonts'i nja dutni,  
'Moodihti 'en sMoodihti 'et ndúyulhni,

"Njan nailhni ts'e sghu sinda,

35 Ndet la nch'az ditnine buch'a' nusde hukw'éhl'az 'et la 'ilhiz bumoodih onle.'"

36 'Et huwa Israel oots'u hainzutne ts'ih'un nohdúсни, 'alha ndun Sizi tulalhghus undunulht'ó-un, 'en Yak'usda Moodihti 'ink'ez Christ yulhtsi."

37 'Et Peter hidánts'o whe soo ts'ih'un budzi t'aíznai. 'Ink'ez Peter 'ink'ez 'uyoonne whel'a'ne bulh hubuhoodulhkut, "Neulhutsinke, Peter nedani'-un huwun dáztinelh?"

38 'Et Peter ubulhni, "'Ilhone ahli whe lht'ananahdilh 'ink'ez Sizi Gri boози' gha too be 'úlhneh. 'Et la nohlubeshi nohunaoodeh 'ink'ez la Ndoni nohyudóolts'it.

39 Mbene la Yak'usda neMoodihti buka' dutinelhne, 'ilhone ahli whe Ndoni nohts'ú yoozi inle', nohuzkeh cha 'ink'ez nilhza' yun k'ut whut'enne, 'enne hoonts'i."

40 'Et Peter sa' whe bubulh yálhduk 'ink'ez buba nus whúnilt'i 'ink'ez ubúlhni, "'Ududúlhyis! Nduenne ntsi'ne buch'az nálh'ah, 'ink'ez bubulh áht'en iloh, Yak'usda dzoh nubutilhdeh whe' hoont'oh."

41 Lhane huhóont'i' whe highuni huyílhchoot 'ink'ez too be' hulya. 3,000ne at'enne, 'enne buts'únne hudindil.

42 'Ahoohlhyiz 'iluhodulh, 'ink'ez whel'a'ne whubuhodulh'eh. Ts'iyawh 'alghoh lhulh 'uhut'en. 'Ink'ez 'udek'elhaz hulhgha na'hit'al-un whe whu-nahulnih ha lhla'hut'alh 'ink'ez 'alghoh tenahududli.

*Nts'en/a la ooba 'alha' hoont'ohne yinka hudilhts'i*

43 Whel'a'ne huwa 'ít'en te ne'hust'en 'et whe 'on nus ts'iyane ba hooncha.

44 Ooba 'alha' hoont'ohne ts'iyawh 'ilho h nuhúdilh 'ink'ez huyut'i-i ts'iyawh huyé lhla'ut'en.

45 'Ilhoghun yut'i-i be 'óokuk te 'i la ts'iyanne mbene la 'en dunidzítne, 'enne ndi sooneya butahuyudzih.

46 Lizwif bulugliz whucho 'et dzin totsuk 'iluhodulh. Duyoh 'et 'alghoh budzi únzoo 'ink'ez huhóont'i' whe lhla na'hut'ulh.

47 'Et mbene la ooba 'alha' hoont'ohne Yak'usda ba hodílt'i, 'ink'ez Jerusalem whut'enne, 'enne cha buts'un hínzoo. Mbene la dijízne, 'enne neMoodihti dzin totsuk 'on nus 'uhuniltsuk bubulh tsíh.

### 3

*Whel'a'ne nulhúsyoh-un soo ná'hinla*

1 'Et la 'ilhudzin Peter 'ink'ez John bulh dzetniz hukw'elh'az, 3:00 at'en 'uhúnit'o Lizwif bulugliz whucho ts'ótiz'uz, tenahududli neóoninzut 'et wheni.

2 Hukwuti hoonzoo huwhútni-un, 'et la dune yinka usda ndulyiz whe nulhúsyoh-un usda. Dzin totsuk whuz huyookaih. Mbene la Lizwif bulugliz whucho ts'e túdilhne sooneya ha buts'u dátso.

3 'Et la Peter 'ink'ez John bulh yoh ts'e hótiz'az whe ubutílh'en 'ink'ez hoonliyaz higha óo'alh ha buts'u dátso.

4 Soo cho hinilh'en whe la Peter utni, "Nenilh'en!" yulhni la.

5 'Inka la ubunilh'en hoonli higha ti'alh ha buts'e úka tse hooli.

6 'Et Peter uyúlhni, "Aw silver 'ink'ez gold cha lhust'i, 'et hoonts'i ndai la ust'i-i ngha tís'alh. Sizi Gri Nazareth whut'en-un whelhtus 'ink'ez boozi' gha neghá whults'ut-un huwa didinyaih 'ink'ez ninya!"

7 'Ink'ez Peter ndun dune nulhúsyoh-un nailhnih ts'e yula ilhchoot 'ink'ez dedilhya ibulh ooke, ookechunoh tubulh hoolhtus nawhusdli'.

8 'Aho dudillhoh 'ink'ez nádinya. 'Et Lizwif bulugliz whucho ts'e bubúlh tiz'az. Nuya whe ndo túllhuk cha 'ut'en 'ink'ez Yak'usda dílti'.

9 Ts'iyanne yunilh'en nuya 'ink'ez Yak'usda dílti'.

10 Ndun dune nulhúsyoh-un nahuyóolhts'it Lizwif bulugliz whucho hukwuti hoonzoo 'et usda-un, 'en 'únt'oh. Soo whe búgha 'unjaz whe hinilh'en 'ink'ez buba hooncha.

*Lizwifbulugliz whucho ts'e Peter bubulh yálhduk*

11 Peter, John bulh 'awhuz ndun dune soo na'yinla-un uboontun za 'unt'oh whe dune ts'iyawh njan Solomon oobuntsilh bet huwhútni-un ts'e whuz buts'ú hoolhghaz.

12 'Et la Peter ubunilh'en 'ink'ez ubúlhni, "Israel oots'u hainzutne, di ha nenulh'en 'ink'ez whe nógha 'unjaz? 'Aw whenich'oh be ts'inzoo k'us be ts'íltus 'i gha iloh ndun dune nuya nats'úlhtsi.

13 Netsoda'ne Abraham, Isaac, 'ink'ez Jacob lhan'un te lhuzkehke hinli whe 'uhoont'oh. 'Ink'ez buYak'usda Sizi Gri yuk'úne' 'ust'en-un, 'en ncha yulhtsi

'ink'ez yudálhti'. Lizwif huwunlíne t'l'álhti Pilate yulanadutitnih 'et hoonts'i nohni ooch'az nedihdil inle'.

14 'En lubeshi ooghu hooloh 'ink'ez ts'ih'un dune cha unli, 'et hoonts'i ooch'áz nedihdil 'ink'ez dune silhghí-un, 'en Pilate nohts'u yúlanadootni oots'o húkwa' dahni.

15 Mbe la oogha ts'ú khuna-un, 'en úhla súlghí, 'et hoonts'i Yak'usda nahuyílhna' 'et ndulcho whe wheni nena be ts'uhon'en.

16 'Et Sizi ooba 'alha' yint'oh 'ink'ez ndai la yé ulhtus 'i gha ndun dune soo ná'uja. 'En 'unt'oh nilh'en. 'Alha 'i be hoont'oh ndun dune nohbut usyin-un, 'en Sizi ooba 'alha' yint'oh-un, 'et 'i be soo ná'uja.

17 'Et 'awet sulhutsinke t'ewhunúszun nohni 'ink'ez nohtso whudilhduzhne te Sizi dálh'en la t'éoonuzúhzun 'et huwa 'íht'en.

18 'Et 'uda' whe Yak'usda dani' 'et ndunne Yak'usda be nus hoo'enne 'et la, Christ dzoh nutizut, hutni. 'Et whuz un'a 'uhóoja whúlhsi.

19 'Andit noheni nahandunahle 'ink'ez Yak'usda oots'u nálhyeh, 'awet de za la nohlubeshi nohunáyóolhdeh.

20 'Et whe la Yak'usda nohdzi ulhtus nohba yoolhtselh 'ink'ez Sizi Gri 'en cha nohts'ítooh'a'. Whutsoda' 'uda' 'et yughun nohodáni' inle'.

21 'En ndo yak'uz 'et usda ndet la ts'iyantsuk doo cha soo ná'whutilelh nasdli' 'et whuts'un. 'Uda' Yak'usda be nus hoo'enne huwu yuhalhduk íne'.

22 Nilh'en 'uda' Moses ndutni inle', 'Yak'usda neMoodihti 'ilhoghun Yak'usda be nus hoo'en-un si sk'un'a 'unt'oh-un, 'en nohts'ítílh'alh. Nohkeyoh 'ilhoghun 'en 'utinelh. Daja nohdutánelh-un ts'iyawh oozólhts'ai'.

23 Mbene la ndun Yak'usda be nus hoo'en-un lhuhuyoozilhts'aine, 'enne la Yak'usda oodune'ne buch'a buhuzdla 'ink'ez gak ubotilhtselh.'

24 'Et Peter 'on 'un ndutni, "Mbene la Yak'usda be nus hoo'enne ndet la 'uwhutánelh-un huwu yahalhduk da', Samuel cha 'ink'ez 'uyoonne la yuk'élh'az khana'ne cha, ts'iyawh whuz un'a za 'uhutni inle'.

25 Nohni cha Yak'usda be nus hoo'enne buts'u háhde 'ink'ez ndai la Yak'usda nohtsoda'ne khuni buba lhaídinla-i, nohni cha nohba 'unt'oh. Ndi khuni buba lhaídinla-i, Abraham cha t'l'adílts'ut inle', 'Nts'u hainzut-un, 'en gha dune ndi yun k'ut buba hoonzoo tileh,' 'et Yak'usda Abraham yulhni.

26 'Ink'ez Yak'usda duYe' Sizi, 'en dunaidilhti whe nohni 'udechoo 'en nohts'ú wheyalh'a'. 'Et dutsun-i be túne' aht'en-un whuch'a nanóhuzdla. 'Et huwa Yak'usda Sizi 'udechoo nohts'ítílh'a' whe nohba hoonzoo oole' ha."

## 4

### *Peter John bulh nahíyilhne but nébonilhti*

1 'Et 'awhuz Peter John bulh dune bulh yahulhduk whe lubretne, lugliz whucho howunlíne bumoodih cha, 'ink'ez Sadducee\* hubuhútnine bugho nindil.

2 Whuts'odutni ndunne nane whel'a'ne Sizi dazsai 'ink'ez dunadija 'et huwun whubuhodulh'eh. 'Et whe yaidlánne dunahudutádulh 'alha' hoont'oh.

3 'Inka 'om bun whuts'un 'abuhan'ai 'awet hulhgha ts'un yoo 'un hoozulh 'et huwa.

4 'Et hoonts'i lhane ubudánts'one Sizi dazsai 'ink'ez dunadija-un buba 'alha' hoont'oh suli'. 'Et 'awet 'alhgoh buba 'álha' hoont'ohne 5,000ne at'enne suli'.

\* 4:1 Sadduceene, 'enne la 'uhutni, 'Dats'úzsai 'ink'ez 'aw nats'uhótnalh aít'oh'.

<sup>5</sup> 'Et la 'awet 'om bun dzin Lizwif bumoodihne, butso whúdilhdzuhlne cha, 'ink'ez Moses be 'udustl'us 'uk'ununáguzne Jerusalem 'et 'ilhúhozdil.

<sup>6</sup> 'Ink'ez la lubret 'uk'enus dízti'-un Annas huyúlhni-un Caiphas cha, John cha, Alexander cha, 'ink'ez la lubret 'uk'enus dízti'-un' ts'u haíndene, 'enne cha, ts'iyawh Jerusalem 'ilhuhozdil.

<sup>7</sup> Whel'a'ne 'ink'ez soo na'huyinla-un, 'en cha dubut nébodinla 'ink'ez hubuhoodulhktu "Dáhla whe ahla? Ndai be úlhtus-i be uht'i? Mbe boozi' gha ndun dune soo na'uhla?"

<sup>8</sup> Ndoni Peter 'on nus ulhtus yulhtsi whe ubúlhni, "Israel oodune'ne bu-moodihne 'ink'ez butso whúdilhdzuhlne cha,

<sup>9</sup> ndun dune nulhúsyoh-un, 'en ba 'ut'en unzoo-i 'uts'ínla-i 'ink'ez dats'ínla whe soo ná'ts'inla whe 'i 'andit ooka neoodulhktu.

<sup>10</sup> 'Et huwa nöhni 'ink'ez Israel oots'u hainzutne ts'iyawh soo cho nohdutásnelh, Sizi Nazareth whut'en-un, 'en tulalhgus k'eílhti, 'en Yak'usda nahuyílhna'. 'En boozi' 'ink'ez whélhtus-un 'i be ndun nulhúsyoh-un, 'en soo ná'ts'inla.

<sup>11</sup> Sizi, 'en 'unt'oh Yak'usda 'uk'unusguz-i k'ut ndutni whe ooghu yaduk, 'Nöhni yoh 'uwuhul'enne tse 'úndutulh'uz-i,

'i la 'uja 'uk'enus tse† ooka dáhotni-i suli'.

<sup>12</sup> Yinka ndulcho whe Sizi Gri 'en gha za uzdutijih. 'Aw 'uyoonne yé ulhtus-i gha uzdoojih aít'oh. 'Et whuz un'a Yak'usda neghá whunin'ai."

<sup>13</sup> 'Et nahíyilhne t'ehonínzun Peter 'ink'ez John 'enne 'ants'i 'oh dune, 'aw whulhodíl'elne 'uhint'oh. 'Aw lhoníljut whe yahulhduk, 'et huwa buba hooncha, 'ink'ez t'ehonanzin Sizi Gri yulh nusudilne hinli.

<sup>14</sup> Ndun nulhúsyoh-un soo ná'uja 'ink'ez Peter John bulh buzih usyin hinilh'en whe 'et huwa 'aw dája hudooni' aít'oh.

<sup>15</sup> 'Et 'inka yaduk bayoh tenábonilh'a' 'ink'ez la hukw'u nuhúhulhye'.

<sup>16</sup> 'Ink'ez la lhuhoodulktu, "Ndunde dune dábuztilelh?" hutni la, "Jerusalem whut'enne ts'iyawh t'ehonínzun 'uk'enus huwa 'ít'en-un, 'et 'uhuhóonla. 'Aw whuts'uts'oodódlai aít'oh.

<sup>17</sup> 'Et huwa 'aw 'on 'un 'uyoonne t'eeonoozeh whuch'a, ndunne dune tube cho bube' ts'oonolhjoot Sizi Gri boozi' gha 'aw 'on 'un 'uyoonne dune bulh yáhoohlhduk junih."

<sup>18</sup> 'Et yoh danáboninla 'ink'ez ubuhútni, "Nts'oh dáhoont'oh 'et hoontsi, 'aw Sizi boozi' gha yahoolhduk k'us dune húhodoohl'eh iloh!"

<sup>19</sup> 'Et Peter John bulh 'uhútni. "Nohnich'oh hukw'u nuní nulhzut, nohk'un'a tilah k'us Yak'usda ook'un'a tilah 'uztinelh? Ndet la Yak'usda nalh ts'ih'un 'uhoont'oh?"

<sup>20</sup> Nts'en'a suba ts'uhon'en-un 'ink'ez ts'odánts'o-un huwu yalhts'oolhduk?"

<sup>21</sup> Nahíyilhne soo khuni ulhtus-i be doo cha, "Sizi ghu yahoolhduk junih!" ubuhútni, 'ink'ez bulanahuditni. 'Aw huwa dzoh nubuhoolhdzut-un hooloh, dune ts'iyanne Yak'usda ba hodílhiti' njan dáhooja 'et huwa.

<sup>22</sup> Ndun dune huwa 'ít'en k'un'a soo ná'huyinla-un, 'en dit whunizyat 'on 'un be yus k'ut whe 'unt'oh.

### *Oobá 'alha' hoont'ohne hunooljut-un whuch'a ténahadudli*

<sup>23</sup> 'Et soo bulanahuditni ibulh, Peter John bulh bubulh nudilhne butsu náhoost'az 'ink'ez lubret 'uk'enus dízti'un 'ink'ez butsó whudilhhdzuhlne cha dája ubuhútni la 'et hukw'ú nuhuhoolluk.

† 4:11 Ndi tse 'undutulh'uz-i Sizi Gri 'unt'oh, ni whe utni.

24 'Et hodánts'o whe ts'iyawh lhgha Yak'usda ts'un tenawhehúndunidli, "NeMoodihti nyun Yak'usda 'int'oh t'éts'onínzun, yat, ndi yun, yattoo', 'ink'ez bunghun cha ínla, 'ink'ez ndai la bulh 'úhoonla-i tubulh.

25 Netsoda'-un David mba nye'ustlen-un, Ndoni gha mba yalhduk ínle' whe ndutni,

"Udun yun k'ut whut'enne,

di ha howuní'ch'e? Di ha ndunne dune Yak'usda ch'az yáhalhduk?

26 Ndi yun k'ut lerwene,

'enne cha lhotigan wheni.

'Ink'ez yun moodihne cha 'ilhúhozdil Yak'usda 'ink'ez OoChrist,

'enne hich'az nedindil whe' hut'en.' "

27 'Et 'on 'un tenahududli whe 'uhutni, "'Et 'alha' 'i be njan Jerusalem 'et Herod 'ink'ez Pontius Pilate bulh 'udun yun k'ut whut'enne cha 'et Israel oots'u hainzutne cha ts'iyawh 'ilhuhozdil whe n'Ye' Sizi lubeshi ooghu hooloh-un, 'en ooka tse hóodli neba yulhts'í-un, 'en hich'az nedindil 'et wheni.

28 'Et 'uda' be ilhtus-i 'ink'ez nyeni be ndunínzun ínle' whe lhawhudinla. 'Et 'andit 'ilhuhozdil 'ink'ez daóotanelh dini ínle' 'et 'oh whuya lhe'hit'elh.

29 'Et huwa neMoodihti, neye' hoonulhjoot-un, 'andit dzin buboozilhts'ai 'ink'ez 'aw lhts'uníljut whe wheni, mba' ts'ut'enne, nghuni unzoo-i be yats'oolhduk neghá whunin'aih.

30 'Et huwa neMoodihti, be íltus 'i be dune ílhyis 'ink'ez n'Ye' Sizi, lubeshi ooghu hooloh-un, 'en yé ulhtus-i, 'i gha ts'iyanne bunalhts'et hooncha 'ink'ez huwa 'ít'en tune' whut'en hóle!'"

31 'Et 'awet tenáhúdídi 'etsul 'uhudíja whe, nyo 'ilhúhozdil-un dulcho nahúhoosnai 'ink'ez Ndoni buyudí'lt's'ut whe 'aw lhoníljut whe Yak'usda ooghuni be bubulh yáwhehunilhduk.

### *Ooba 'alha' hoont'ohne alhgoh lhghuhudli*

32 Ooba 'alha' hoont'ohne 'alhgoh ts'iyanne lhgha za' hut'en. 'Aw ooch'e'ne hooloh. Ndai la huyut'i 'alhgoh huyé ne'ut'en.

33 'Aw lhoníljut whe whel'a'ne soo khuni ulhtus-i be, "'Alha' hoont'oh whe Sizi neMoodihti 'en dunadija,' hutni, 'ink'ez Yak'usda tube but's'un únzoo.

34 'Aw 'ilhoghun butoh 'endunidzit-un hooloh. Mbene la yoh k'us yun lhadínt'oh ut'íne, whe'honket,

35 'ink'ez la sooneya bugha yúlts'uk-i, whel'a'ne butl'aháyudzih. 'I la 'alhgoh mbene la 'en dunidzítne butáháyúdzih.

36 'Et whuz un'a 'uja 'ilhoghun dune, Joses huyúlhni, 'en Levite-un<sup>‡</sup> 'unt'oh 'et Cyprus whuzdí-un, 'en whel'a'ne "Barnabas" huyúlhni, ndi boozí' 'i la, "'En nezdi ulhtus ilh'í-un,'" ni whe 'utni.

37 'En cha yun yut'í-i be 'ónket 'ink'ez whel'a'ne butl'ayándzai.

## 5

### *Ananias du'at Sapphira bulh dahútinelh la*

1 'Et hoonts'i 'ilhoghun dune, Ananias huyúlhni-un, 'ink'ez oo'at Sapphira bulh yun huyut'í-i, 'i ye 'ónket,

2 'ink'ez la sooneya yuloh dich'oh duba yílhchoot. 'Et oo'at cha t'eeonínzun. 'Ink'ez yuloh 'i la whel'a'ne butl'ayándzai, 'ink'ez la, "'Ndi sooneya 'i ts'iyawh 'unt'oh,'" ubúlhni.

<sup>‡</sup> 4:36 Levite 'enne lubret 'uk'enus dizti'-un la'ut'enne 'uhint'oh.

<sup>3</sup> 'Et Peter uyúlhni, "Et di ha Satan\* ook'úne' tant'en hukwa' nizun? 'Ink'ez lhe'dini sooneya ooloh ílhchoot 'ink'ez Ndoni ts'un honts'it?

<sup>4</sup> Ndi yun be 'óotahkulh whutso nohch'e' unli íne'. Be 'óhket whe oozooneya 'i cha nohch'e' 'unt'oh. 'Ink'ez di ha ndzi yo whe njan ninta' nint'en? Yak'usda ts'un honts'it 'aw dune ts'un iloh!"

<sup>5</sup> Soo Ananias whudánts'o íbulh, nadálduz 'ink'ez dazsai. Mbe la whulh údants'one tube cho whehunilhjoot.

<sup>6</sup> Chilke 'enne la dahánindil 'ink'ez hizi highá 'ozduz, téhinilhiti, 'ink'ez 'aháyálhti.†

<sup>7</sup> 'Et tat sadzi hukw'u hoonist'o at'en íne', 'et oo'at 'aw dáhooja t'éoonúszun whe danínya.

<sup>8</sup> 'Et Peter uyúlhni, "Sudíni ndi sooneya, nki netl'ayándzai-i be 'óhket-i oozooneya, ts'iyawh tilah 'unt'oh?" "A, ts'iyawh 'unt'oh," yúlhni.

<sup>9</sup> 'Et Peter uyúlhni, "Et di ha nki bulh Ndoni ólhdzih hukwa' aht'an? Nduenne chilke nki ailhtíne dati nódilhya, nyun cha whuz un'a tenányotalhtelh!"

<sup>10</sup> 'Et 'aho 'en cha yubut náls'tut 'ink'ez dazsai. Chilke dahánindil 'ink'ez 'en cha dazsai hinilh'en. 'Inka 'en cha téhinilhiti 'ink'ez ooki hizih 'ahuyálhti.

<sup>11</sup> 'Et ooba 'alha' hoont'ohne 'ink'ez 'uyoonne dune tubulh ts'iyawh hodánts'o whe 'uk'enus whé hunilhjoot.

### *Whel'a'ne huwa 'ít'en te né'hut'en*

<sup>12</sup> 'Et dune toh whel'a'ne lhat-un huwa 'ít'en te né'hut'en. Solomon oobuntsilh bet huwhútni-un, 'et la ts'iyanne ooba 'alha' hoont'ohne whuz 'íluhozdil.

<sup>13</sup> Ts'iyanne 'unt'ohne ubuhuninzun, 'et hoonts'i 'aw ooba 'alha' hoont'ohne 'uyoonne dune butahoodilh aít'oh. Njan lhe'hóoja 'et huwa whehíntsaz.

<sup>14</sup> Sizi Gri ooba 'alha' yint'ohne 'on nus huldlai sulí', dune cha 'ink'ez ts'ekoo cha.

<sup>15</sup> Whel'a'ne huwa 'ít'en tené'hut'en 'et huwa ti whuzih ndudáne hik'ustez 'i bulh tébuhulih khun si Peter 'oh whuya uyalh de ootsin 'i hoonts'i buk'ut lhúyolts'it.

<sup>16</sup> Lhane whe dune Jerusalem whunat keyoh whut'enne, 'enne cha whusahúdilh. Ndudáne cha 'ink'ez ntsi-i nudúdeh buyudúls'ine cha whusábuhule 'ink'ez ts'iyawh soo ná'buhulh'en.

### *Whel'a'ne dzoh nubuhulhdeh*

<sup>17</sup> 'Et 'awet Lizwif lubret 'uk'enus dizti-un, 'ink'ez yuts'ú ditnine Saduceene hinli 'enne la whel'a'ne tube bughe' hoolni sulí'.

<sup>18</sup> 'Et la 'awet whel'a'ne ubuhílhchoot 'ink'ez 'oh dune 'adinla-un, 'et la 'abuhanla.

<sup>19</sup> 'Et hoonts'i la 'et 'ulhdzis neMoodihti oolizas 'aha' dinla-un dáha' dantan, tenábuninla 'ink'ez la ubúlhni,

<sup>20</sup> "Ahdulh 'ink'ez Lizwif bulugliz whucho núdulhya 'ink'ez ndi 'andit be ts'úkhuna-i ghun bubulh yálhduk."

<sup>21</sup> 'Et whel'a'ne hik'oh ts'e 'uja. Soo yulhkai 'et Lizwif bulugliz whucho dahánindil 'ink'ez 'awet dune whuba hodulh'eh.

'Et la Lizwif lubret 'uk'enus dizti-un 'ink'ez yuts'ú ditnine, 'enne Lizwif butso whúdilhdzulhne 'ink'ez nahíyilhne cha bughú nahúzya yahatilhduk-un

\* 5:3 'En netsudule 'unt'oh. † 5:6 Dune dahátsai te, 'aho 'abuhulhtih íne', keyoh whunulwus 'et huwa.

huwun. 'Et 'ink'ez whel'a'ne 'ahudinla ts'e dudune'ne bukuwhenábuhalh'a' bubut nébotalelh ha.

<sup>22</sup> 'Et la whuz hoozdil whe whel'a'ne 'ahudinla-un, 'et hoochooloh hotil'h'en. 'Et la nahíyilhne but's'u náhoosdil 'ink'ez ubodáni',

<sup>23</sup> "Dune 'ahudinla ts'e ts'oozdil whe 'awet dá'dinla ts'e dóohoot'oh. 'Ink'ez huwunlíne cha 'awet huwuhinli 'et dáha' uzdan'ai whe 'aw nyoonne whel'a'ne huhooloh!"

<sup>24</sup> Lugliz whucho huwunlíne bumoodih, Lizwif lubret 'uk'enus dizti'ne, 'ink'ez Lizwif bulubret moodih tubulh whulh 'úhudants'o whe 'et huwu yahulhduk, "Whel'a'ne dahúja suba 'uhint'oh?" hutni.

<sup>25</sup> 'Et 'ilhoghun dune danínya 'ink'ez ubúlhni, "Whunulh'en ndunne dune 'abihláne nghuz lugliz whucho ts'e dune huhodulh'eh!"

<sup>26</sup> Lugliz whucho huwunlíne bumoodih, dudune'ne tubulh whuz whe handilh, 'et ndunne 'ilhozdíle bubé hunuljut doo ka la tse be bubuhoghan, 'et huwa whel'a'ne nánihltsulyaz nabuhílhoot.

<sup>27</sup> 'Et whel'a'ne dunáboninla 'ink'ez nahíyilhne bubut néboninla 'ink'ez lubret 'uk'enus dízti'-un, 'et uboodulhkut,

<sup>28</sup> "Soo khuni ulhtus-i be nohba nats'úhizya ínle' ndun Sizi ghun dune hubodulh'eh íloh nohts'útni ínle'. 'Andit whunulh'en lhe'ahja, Jerusalem ndulcho whe 'awet hubodilh'e'. 'Et ndun dune dazsai whe ndulcho whe wheni nek'éwhuh'ai!" hutni.

<sup>29</sup> Peter 'ink'ez 'uyoonne whel'a'ne bulh whuz yahatilhduk, "Yak'usda za ook'uné' ts'oot'en huba' hoont'oh, 'aw dune ook'uné' ts'oot'en huba lhe'hóot'oh," hutni.

<sup>30</sup> "Et Sizi tulalhghus-un undunulht'o whe súlghhi 'et hoont's'i netsoda'ne buYak'usda 'en nahuyílhna'.

<sup>31</sup> 'Et Yak'usda yak'uz whenáyalhti dunailhni ts'e duzih 'et yulhda, 'ink'ez Moodihti 'ink'ez neulhyís-un cha yulhtsi. 'Et Israel oots'u hainzutne dudeni náhondunooleh, 'et de la bulubeshí buba 'ún yutoolhdilh.

<sup>32</sup> 'Et wheni Yak'usda ne'ust'en-un hon'enne ts'inli 'ink'ez huwu yats'ulhduk. 'Ink'ez Ndoni, 'en Yak'usda k'une' 'ut'enne bugha ínin'ai-un, 'en cha nela'ut'en," 'et ndúbulhni.

<sup>33</sup> 'Et la nahíyilhne njan huwhudánts'o whe, tube cho 'on nus hukwa howunilch'e k'et whel'a'ne ubotuzilhghelh hukwa' huninzun, 'et howu yahalhduk.

<sup>34</sup> 'Et hoont's'i 'ilhoghun dune, Gamaliel huyúlhni-un, 'en Pharisee unli ts'iyanne ba ncha, 'en butoh dudinya 'ink'ez ubúlhni, "Atsulyaz 'az úbilhlelh."

<sup>35</sup> 'Et 'ink'ez nahíyilhne ndúbulhni, "Israel whuduné'ne huwa 'óohli whe ndunne dune né'bulh'en.

<sup>36</sup> Dzoh sa' ínle' 'ilhoghun dune Theudas huyúlhni-un, 'en la ninya 'Dune ncha-un usdli, 'n whe dune bulh yálhduk. 'Et la 400ne at'en 'enne hits'ú nedindil, 'et hoont's'i hizilhghi, 'ink'ez yuts'ú nedindil ínle'ne ts'iyawh 'ants'i yanahadil. 'Et nduhúja whe gak huzdli'.

<sup>37</sup> 'Et whuz un'a za 'uyoon dune cha nduja, Judas Galilee whut'en-un huyúlhni, 'et dune naoolto whe 'et ninya. 'Et cha lhane dune hits'ú nedindil. 'En cha hizilhghi 'ink'ez yuts'ú nedindil ínle'ne, 'enne cha ts'iyawh yanahadil.

<sup>38</sup> 'Et ndúhooja ínle' 'et huwa nohdúsní, ndunne dune hoonli uboohleh junih, but's'ú halhozah'ai! 'Et dich'oh duba 'uhut'en 'ink'ez whunohodulh'eh de, 'aho gak naóotadleh.

<sup>39</sup> 'Et hoont's'i Yak'usda ndi 'ut'en k'oh ts'e bugha ínin'ai de, 'aw buch'a' oolhdeh aít'oh, doo ka si Yak'usda ch'a ne'aht'en oohle'."



40 'Et la nahíyilhne buba 'alha' dija. Whel'a'ne danáboninla 'ink'ez "Bubuholhtsas," ubuhútni. 'Ink'ez hukw'elh'az, "Sizi boozí' gha dune huhodoolh'eh junih!" ubuhútni, 'ink'ez la bulanahuditni.

41 'Et la whel'a'ne nahíyilhne bughu tenáhundil. Yak'usda Sizi Gri ba dzoh nuhude 'et huba soo' hulzoo' didutch'oh 'et nduna'hundunudzun, 'ink'ez howu nílhni.

42 'Et dzin totsuk Lizwif lugliz whucho 'ink'ez dune buyoh te 'awhuz Sizi Yak'usda OoChrist, 'en ghun dune huhodulh'eh 'ink'ez khuni unzoo-i be dune bubulh yáhulhduk, 'aw 'etsul lhe'hudínel.

## 6

### *Lhtak'ant'i dunene whel'a'ne la'ut'enne*

1 'Et 'oh da' yugha hodul'ehne 'on nus huldlai sulí'. Yugha hodul'ehne Lizwif nawh la hudidowh, Greek bughuni k'uyalhdukne 'ink'ez Lizwif dich'oh dughuni k'uyalhdukne, 'enne la lhdulhyoh nehúwhunt'ai. Greek k'uyalhdukne hutni, "Netsandilhne 'aw bugha lhé'hus'ai dzin totsuk sooneya dune huye la'ut'en-i whutahudzih te."

2 'Et whunizyane 'on 'at nane whel'a'ne Sizi Gri yugha hodul'ehne, ts'iyawh 'ilhubuhozdla 'ink'ez 'uhutni, "Aw lhe'hóozoo' Yak'usda ooghuni be yats'ulhduk whulazdunitni 'ink'ez sooneya dune be la'whut'en-i za 'uts'oolh'en aít'oh.

3 'Et huwa sulhutsinke lhtak'ant'ine dune nohtoh mbene la t'ebunáhzun Ndoni buyudínda 'ink'ez huwhunih cha 'uhint'ohne 'utahábuhle 'enne ndi 'ut'en 'uhuyoolh'en wheni 'enne huwu hinli buts'oolhtselh.

4 'Et la wheni tenazdudli 'ink'ez Yak'usda ooghuni be yáts'ulhduk-un, 'et za 'uts'otilh'elh," ubuhútni.

5 'Et 'ilhozdíne ts'iyawh whel'a'ne buba soo' hudija 'inka Stephen 'en 'utahahúyalhti soo cho be 'alha' hoont'oh ut'i-un 'únt'oh 'ink'ez Ndoni ooyudínda. 'Et Philip, Prochorus, Nicanor, Timon, Parmenas cha, 'ink'ez Nicolaus, 'en la 'udun yun k'ut whut'en-un, Antioch whut'en-un 'unt'oh 'en la Lizwif ts'ú nenadinja inle, 'enne 'utahábahanla.

6 'Et la whel'a'ne but néboninla whe whel'a'ne buba tenahudidli 'ink'ez buk'odálni.\*

7 'Ink'ez Yak'usda ooghuni 'awet ndulcho t'enidzin. Yugha hodul'ehne, Jerusalem whut'enne cha 'on nus huldlai huzdli'. Lhane Lizwifne bulubret 'enne cha Yak'usda ooghuni huyílhchoot.

### *'Awet Stephen huyílhchoot*

8 'Et la Stephen be 'alha' hoont'oh ut'i 'ink'ez Ndoni ye óolhtus ha yugha ínín'ai 'i gha dune toh hooncha huwa 'ít'en túne'ust'en.

9 'Et hoonts'i whulohne dune hich'az nédindil Lizwifne Cyrenia 'ink'ez Alexandria ts'u haíndilne, 'enne 'uhint'oh. 'Enne, 'et 'ulhna unlíne oolana-ditníne 'ilhoghun lugliz 'et whehúhoozi 'et 'ilhuhozdil. 'Uyoonne Cilicia 'ink'ez Asia ts'u haíndilne, 'enne cha Stephen hidulhyoh 'utni.

10 'Et hoonts'i Stephen Ndoni gha whunih k'et yalhduk te 'aw hich'a oolhdeh aít'oh.

11 'Inka 'ants'i 'oh dunene, 'enne buba k'elha whuhalhtsi Stephen Moses ooghuni 'uk'unusguz-i 'ink'ez Yak'usda ch'az yalhduk hudooni' ha.

12 'Et nduhútni whe, butso whúdílhduzhne, Moses be 'udust'us 'uk'ununáguzne cha, 'ink'ez 'onghunne cha buba hodín'ai, 'enne ts'iyawh

\* 6:6 'Et whuz un'a ts'iyanne t'ehininzun bubulh 'ilughí hinli'.

Stephen huyulh húnilch'e. Highu nindil, huyílhchoot, 'ink'ez nahíyilhne but néhinilhti.

<sup>13</sup> 'Et la whulohne dune hiba hoots'it ha whusábahanla 'ink'ez nahíyilhne nja dubuhútni, "Ndun dune nelugliz whucho whudziti' 'ink'ez Moses huwa néulh'a-un' 'ahoolhyiz whuch'az yálduk.

<sup>14</sup> Nja dutni whe uzdzits'o. 'Ndun Sizi Nazareth whut'en-un nelugliz whucho nawhúduhtiyus 'ink'ez Moses khuni net'láidan'ai-i cha ts'iyawh 'uts'un un'a za na'whutilelh,' 'et ndutni whe uzdzits'o."

<sup>15</sup> Mbene la nahíyilhne ts'iyawh Stephen 'en za hínilh'en oonin unzoo k'et 'ants'i lizas nin 'et ndunt'oh.

## 7

### *Stephen yé búbulh yalhduk-i Butsoda'ne Egypt 'et hudáls'i'*

<sup>1</sup> 'Et Lizwif bulubret 'uk'enus dízti'-un Stephen yoodulhkut, "'Et ndunne 'alha' hutni whe eh hutni?"

<sup>2</sup> 'Et Stephen uyúlhni, "Sulhutsinke 'ink'ez 'ubákene soo zúlhts'ai! Netsoda'-un Abraham 'awhuz Mesopotamia usda, Haran ts'e natidalh whutso whe, Yak'usda oots'u hayánduz-un, 'et oonalhts'et ahóolts'ut.

<sup>3</sup> 'Et la Yak'usda uyúlhni, 'Nyunatneke 'ink'ez nkeyoh cha whuch'a sinyaih 'ink'ez nts'e la keyoh whúnyuntistun whuz inyalh.'

<sup>4</sup> 'Et la Abraham Chaldea yun k'ut whuch'a súya 'ink'ez Haran ts'e oozya. 'Et hukw'elh'az oobá dazsai whe ndi yun 'andit ook'udúlhts'i Yak'usda whuz wheyálh'a'.

<sup>5</sup> 'Aw Yak'usda yun ntsool-iyaz hoonts'i yughá lhi'al 'et hoonts'i yuts'ú yoozi whe ndúyulhni, 'Nyun 'ink'ez mbe la nyedúdadulhne, 'enne ndi yun buch'e' tileh.' 'Et 'oh da' Yak'usda ndúyulhni whe Abraham 'aw buzkeh hooloh inle'.

<sup>6</sup> 'Et la Yak'usda ndúyulhni, 'Nyedúdadulhne 'uts'un yun k'ut ts'e whuz 'ulhna hutileh 'ink'ez 400 naoodizut 'et dune dzoh nubutilhdoh.'

<sup>7</sup> 'Et Yak'usda ndúbulhni, 'Mbene la 'ulhna ubut'íne sich'oh buba nahutisye. 'Et hukw'elh'az whuch'a nahúsdil 'ink'ez njan keyoh si za sk'úne' hutit'en.'

<sup>8</sup> 'Et Yak'usda Abraham ndi ye yuts'u nahizya-i, 'i gha oots'u háinzutne, 'enne hika dune unli-i k'ut ubuhít'us. 'Et whuz un'a Yak'usda hiyulh 'ílhugi huzdli'. 'Et la Abraham ooye' Isaac whuzdli 'ink'ez whulh lkh'udit dzin 'et la huyúzt'us. 'Ink'ez la Isaac cha ooye' Jacob whe Jacob, 'en cha ndunne duye'ke whunizyat 'on 'at nane, 'enne cha netsoda'ne whuníhne ndúbuhinla.

<sup>9</sup> 'Et doo cha nohtsoda'ne, Joseph bulhutsinke, 'enne la highe 'oolnih 'inka la Egypt ts'e hiye 'ónket 'ulhna tileh ha 'et hoonts'i Yak'usda yulh 'út'en,\*

<sup>10</sup> 'ink'ez la dzoh nutizut-un whuch'a nayulhti. 'Et Pharaoh, Egypt whulerwe, yubut nenínya whe Yak'usda whunih cha yulhtsi, 'ink'ez lerwe yót'e' ha 'et cha yugha óonin'ai. 'Et huwa la lerwe Pharaoh 'en duyoh cha 'ink'ez keyoh dulcho whe cha whumoodih yulhtsi.

<sup>11</sup> 'Et la Egypt 'ink'ez Canaan whulh dulcho whe dai whuzdli'. Tube dune dzoh nudeh k'et netsoda'ne 'aw t'alh-i nahólelh ait'oh.

<sup>12</sup> 'Et la whulh údants'o Egypt ts'e whuz 'ut'alh-i 'ílhúhozdla 'inka la duzkeh, netsoda'ne, 'enne 'udetso whuz whebalh'a'.

<sup>13</sup> Whúlh nat 'ukunáhududilh whe 'et la 'ants'iya Joseph bubulhutsin unli bubut t'éoonalhdzin 'ink'ez la lerwe Pharaoh Joseph oonatnéke 'ants'iya bubulh údants'o.

\* 7:9 Butso da'ne Egypt 'et hudáls'i'.

14 'Et la Joseph dubá Jacob yuts'ótl'a khuni in'ai, dich'oh 'ink'ez dunatnéke te ts'iyawh whusahóodilh, ubúlhni. 'Alhghoh lhtak'ant'i whunizyai 'on 'at kwulane, 'enne hinli.

15 'Et la Jacob Egypt ts'e hoozdil, didut cha 'ink'ez netsoda'ne cha 'et hudáls'i' 'et keyoh yahadla.

16 Buzi 'i la keyoh Shechem huwhútni ts'e whuz nabuhoodla. 'Et whutso da' Abraham keyoh Hamor whut'enne yunyaz bubonket-i inle', 'i k'ut 'abuhanla.

17 'Et la ndi yun Yak'usda Abraham ye yúts'u nahizya-i bengho whúdzulh 'ink'ez nedune'ne Egypt dilhts'ine 'on nus huldlai suli'.

18 'Et 'ants'iya 'uyoon lerwe suli'. 'En 'aw Joseph be 'ut'en k'oh 'aw t'éwhunúszun. 'En la Egypt whut'enne bumoodih suli'.

19 Nedune'ne bubé' whulhts'it 'ink'ez netsoda'ne dzoh nubulhdeh whe buchalhts'ulne tébuholeh yahódlah ha, 'et úbulhni, lerwe Pharaoh.

20 'Et 'oh da' la Moses whuzdli, 'en tube dune zoo' 'ink'ez tat sanun 'et la dubá ooyoh hinalhyai.

21 'Et 'awet téhinilhti whe Pharaoh ootse' 'en la ílhchoot 'ink'ez didutch'oh duyaz k'un'a yunilhyai.

22 Egypt whut'enne ndai la huyé whunih-i ts'iyawh la whuhuyodalh'e'. 'Et dune ncha-un suli' ooghuni gha cha 'ink'ez be 'ut'en cha.

23 'Et la dit whunizyat be yus k'ut suli' whe ndun Israel oots'u hainzut-un Moses, 'en dudulh whut'enne, 'enne butun nanátidalh hukwa' nínzin.

24 'Et whuz oozya whe 'ilhoghun bulh whút'en-un, 'en la yunilh'en whe ndun Egypt whut'en-un dzoh nuyulhdzut 'en yuk'ut duneh whe k'ut ja 'ink'ez nyoon Egypt whut'en-un yuzilghí.

25 Moses dich'oh nduninzun, 'Sdune'ne, njan t'ewhunuszun si Yak'usda buts'un sútilh'a', si sgha bulánáhúdútitnih ha.' 'Et hoonts'i 'aw t'elhonízil Moses Yak'usda buts'ú wheyalh'a'.

26 'Et 'om bun dzin 'et la nane Israel oots'u hainzutne llehút'us 'et la, 'Dah!' ubúlhni, 'Soo zúlhts'ai sulh dune lhulhutsin ahli, di ha lhéht'us?' ubúlhni.

27 'Et la nyoon ooghá' whut'en-un Moses 'un be' yunilhtsut 'ink'ez la, 'Mbe nemoodih 'ink'ez nahíyilh-un nyulhtsi whe 'int'en?

28 Hulhda' nyoon Egypt whut'en-un lhé'inla sílghí! Whuz un'a si cha sutuzalghelh ninzun whe 'int'en?' yúlhni.

29 'Et Moses whudánts'o whe, 'et la whetsélhya, 'ink'ez keyoh Midian huwhútni ts'e whuz whinya, 'et dune unli, 'ink'ez 'et la nane ooye'ke whúzdli'.

30 'Et doo cha dit whunizyat yus k'ut nadle' whe dzulh Sinai huyúlhni 'i oozih dune lhuhóot'ih ts'e 'et la whus dilhtán-i dízk'un 'i toh neMoodihti oolizas in'en.

31 'Et Moses ba hooncha-un hon'en 'inka whuz wheínya, soo cho whuntilh'elh ha. 'Et Yak'usda yulh yátilhduk whe ndutni,

32 'Si 'ust'oh, ntsoda'ne buYak'usda usdli. Abraham 'en ooYak'usda 'ust'oh, 'ink'ez Isaac cha Jacob cha buYak'usda 'usdli.' Moses nuljut k'et dutlut 'ink'ez 'aw whunoolh'en aít'oh.

33 'Et Yak'usda ndúyulhni, 'Ke hain'es, njan yun whudízti'-un 'int'oh hukw'usinyin.

34 Egypt hudilhts'i sdune'ne ubunus'en dalcho-i be dzoh nuhudeh 'ink'ez 'ubudústs'o lhelcho-i be tehududli 'enne ubutisyyih 'et wheni 'usja ndus hasya. 'Anih 'awet Egypt ts'e nyutís'alh.' "

35 'Et Stephen 'on 'un ndutni, "Moses 'en 'unt'oh Israel oots'u hainzutne hich'az nálhya inle', 'Mbe nemoodih 'ink'ez nahíyilh-un nyulhtsi whe 'int'en?'

huyúlhni inle'. 'En yuinla Yak'usda but's'ítílh'a' ndun lizas whus dízk'un-i toh yan'en-un, 'en yula'ut'en whe Moses bumoodih 'ink'ez whuch'a nabuzdla-un yulhtsi.

<sup>36</sup> 'Et hooncha 'ink'ez huwa 'ít'en te ne'út'en-un, 'et huwa Egypt whut'enne bula k'éhanabanla, 'et dulk'un bun huwhútni, yatoo' loh 'unt'oh, 'et cha 'ink'ez 'et dit whunizyat yus k'ut 'et dune luhóot'ih-un lhék'unabutulih whuz za inle'.

<sup>37</sup> Moses 'en 'unt'oh Israel oots'u hainzutne ubúlhni whe ndutni, 'Yak'usda be nus hoo'en-un, sundult'oh-un, 'en Yak'usda nohts'ítílh'alh. Nohkeyoh 'ilhoghun 'en 'utinelh. 'En la oozólhts'ai'.

<sup>38</sup> Moses 'en dune luhóot'ih-un 'et Israel oots'u hainzutne huyulh 'ílhodulh inle'. Netsodá'ne butoh 'it'en 'ink'ez 'en za 'unt'oh Sinai dzulh k'ut lizas yulh yailhduk inle' Yak'usda ooghuni netl'aídooh'alh ha. Ndi Yak'usda ooghuni oolatoh hooloh whe 'unt'oh.

<sup>39</sup> 'Et hoonstsi'i netsoda'ne Moses hik'éne' oot'en hukwa lhe'hunízun, hich'az nálhya, 'ink'ez Egypt ts'e nahutidulh za hukwa hunínzun.

<sup>40</sup> 'Et 'inka Aaron 'uhuyúlhni, "Uk'éltsi neba inleh! Yak'usda ts'oot'e-i k'oh nanetoolelh ha. Moses whusáneanla-un, 'en dája suba 'aw t'ets'onúszun 'et huwa.'

<sup>41</sup> 'Oh da' 'et la musdoosyaz k'elstsi 'uhínla inle' 'ink'ez loodel k'ut hits'e' dilhk'un. 'Et la huhóont'i' whe la honílhni dula be nyoo 'uhuyínla-i 'et huwa.

<sup>42</sup> 'Et Yak'usda buch'az nálh'a 'ink'ez n'un hubutilhdil ndo yat sum 'i la hits'un téni' noolhzin ha. 'Et huwa Yak'usda be nus hoo'enne 'i k'ut 'uk'unusguz inle' whe ndutni, 'Dune Israel oots'u hainzutne,

ndi khuna-i uhghan 'aw si sts'un iloh loodel k'ut dulhk'un whe 'unt'oh njan dune luhóot'ih-un dit whunizyat yus k'ut whutoh.

<sup>43</sup> 'Et nimbali 'i nohyak'usda Moloch 'i 'ulh'en nuhle 'ink'ez sum k'elstsi 'i cha nohyak'usda Rephan hiyulhni-i,

'i 'unt'oh whe la 'uk'elstsi 'uhla-i oots'un téninulhzun 'et huwa 'awet Babylon 'on 'un ts'e nohts'alh.'

<sup>44</sup> 'Et Stephen 'on 'un ndutni, "Et la netsoda'ne dune luhóot'ih-un ts'e nimbali be yoh whucho Yak'usda bubengho' 'unt'oh-i, 'i la nahúyule. 'Et nts'en'a Moses Yak'usda 'uyúlhni whe whuz un'a 'uyínla, nts'en'a 'uk'ehóoltsi 'et la Moses wheínilhtan inle'.

<sup>45</sup> 'Ink'ez k'at le netsoda'ne nimbali be yoh whucho bubáke butl'ahúhon'ai. 'Et Yak'usda 'udun yun k'ut whut'enne yun k'unábuntízyoot whe hidune'ne ndi yun huyílchhoot inle'. 'Ink'ez ndi nimbali be yoh whucho 'et whuz'ai Joshua huyulh tizdil David whusatíyalh whuts'un.

<sup>46</sup> 'En Yak'usda ba unzoo 'inka Yak'usda oodulhkut, "Aw eh 'udun yoh mba néhos'alh aít'oh? 'Ilhiz wheni 'et whutá'alh-un.' Ndund Yak'usda David 'ink'ez ootsoda'-un Jacob, yuts'u ténadildi-un, 'en za 'unt'oh.

<sup>47</sup> 'Et hoonstsi'i Solomon 'en la 'uja Yak'usda ba yoh 'uhóonla inle'.

<sup>48</sup> 'Et hoonstsi'i 'uk'enus Yak'usda dizti-un 'aw dune yoh 'uhóonla-un lhídhoh. 'Et Yak'usda be nus hoo'enne inle'-un 'et ndutni,

<sup>49</sup> 'Moodihti utni, yak'uz whuts'un ts'iyawh k'úne' whuz'en 'ink'ez ndi yun ske ookw'usudla huba' 'unt'oh.

Nts'en'a usutilhlelh yoh sba' whutilhlelh 'ink'ez nts'en'a natizyis-un, 'et sba naootáh'alh?

<sup>50</sup> 'Aw t'éoonuzúhzun sich'oh ts'iyaitsuk 'usdla inle', 'ni whe utni.'

<sup>51</sup> 'Et Stephen 'on 'un ubúlhni, "Ndi Yak'usda ooghuni be nohbulh yasduk, tube 'uts'un únahzunne uhli whe 'aw oozólhts'ai aít'oh, 'ink'ez Yak'usda 'aw

bulh 'ilhoghun l'húhlo! Nohni cha nohtsodá'ne dahánt'e' la 'et daht'oh. Ndoni ook'úne' tíht'en 'aw hukwa lhe'náhzun!

<sup>52</sup> Ts'iyanne Yak'usda be nus h'óo'enne nohtsoda'ne bube húzula inle'. 'Ink'ez nyoonne Yak'usda be nus h'óo'enne, mbe la Yak'usda ba ts'ih'un un'a-un 'unt'oh whusatíyahl-un huwun bunalh h'útni whe, nohtsodá'ne hizilghhi inle'. Ndon 'en 'unt'oh be 'óhket 'ink'ez súlhghi inle'.

<sup>53</sup> Nohni 'uht'oh, Yak'usda ooghuni oolizas nohtl'aídan'ai 'et hoonts'i 'aw ook'únulhe'aht'el!" ubúlhni Stephen.

### *Stephen tse be hizilghhi*

<sup>54</sup> 'Et la dune nahíyilhne Stephen hidánts'o whe 'on nus huyulh húnilch'e k'et 'et huwa hituzilghelh hukwa' huninzun.

<sup>55</sup> 'Et hoonts'i Ndoni Stephen soo yuyudílt's'ut, ndo yak'uz ts'e yután'en whe Yak'usda oots'u hayánduz-i, 'i yutilh'en 'ink'ez Sizi Yak'usda nailhni ts'e yughusyin.

<sup>56</sup> 'Ink'ez utni, "Ndo lhe'h'óoja whunulh'en, yak'uz dáha' dankez 'ink'ez yinka whudune'ne ye'+ Yak'usda nailhni ts'e yughusyin whe whunus'en!"

<sup>57</sup> 'Et la soo 'uhultus whe 'uhúldzul 'ink'ez dudzeh whuduhúdílni 'ink'ez ts'iyawh 'alghoh huyúlh tilhtsut

<sup>58</sup> whe la Jerusalem tenáhinino, 'ink'ez tse be whehúyoonilh'uz. 'Et la mbene Stephen neínulh'uzne‡ nahuyits'úz-i ts'ahaháyilya 'et dune chilh, Saul huyúlhni-un, 'en zih néhininla yughole' ha.

<sup>59</sup> 'Et whuz un'a za Stephen tse be nahínulh'uz 'ink'ez neMoodihti yulh yálhduk, "Sizi neMoodihti szul ilhchoot!" yúlhni.

<sup>60</sup> 'Et dugwutsi be nenínya 'ink'ez soo 'ultus-un utni, "SMoodihti ndi lubeshi 'uhuyínla-i, 'i buba 'un yutolhdilh!" Ndúdíja 'ink'ez dazsai.

## 8

1 'Et la nyoon Saul hiyeni k'un'a uyínla.

### *Saul ooba 'alha' hoont'ohne bube zúla*

'Et la 'et dzin za Jerusalem ts'e Sizi ba 'ilhozdílni bube túzilalh 'ink'ez dzoh nótizut. 'Et ts'iyanne ooba 'alha' hoont'ohne Judea 'ink'ez Samaria whut'enne bukeyoh ts'e whuz ts'iyawh whutabonínyoot. Whel'a'ne, 'enne za 'awet hudilhts'i.

<sup>2</sup> Whulohne soo Yak'usda ts'un téninilhzunne Stephen 'uhuyalhti tube oogha budzi únduda 'ink'ez hutso.

<sup>3</sup> 'Et hoonts'i Saul Sizi Gri gha 'ilhozdílni gak hubutilhtselh hukwa' ninzun. Yoh totsuk dune cha, ts'ekoo cha tébugus 'ink'ez abule.

### *Ndi khuni unzoo-i Philip ye yátilduk*

<sup>4</sup> 'Et 'awet ooba 'alha' hoont'ohne ndulcho whe nuhúdilh 'ink'ez ndi khuni unzoo-i huye yálhduk.

<sup>5</sup> 'Et la Philip 'en keyoh Samaria whuz'ai-un whuz oozya 'ink'ez Christ, 'en ghun dune bubulh yálhduk.

<sup>6</sup> 'Et la 'ilhozdílni Philip yalhduk hidánts'o 'ink'ez huwa 'ít'en te ne'út'en cha hinilh'en whe, ts'iyawh t'ehudusnih 'ink'ez huyoozílhts'ai.

<sup>7</sup> 'Et whe ntsi-i nududeh-i buyáhanainanyoot whe 'ahúldzul. 'Ink'ez lhane dune délhudusnini cha 'ink'ez dzoh nudilhne cha 'enne soo ná'balh'en.

† 7:56 Sizi Gri whuz un'a cha huyoozi. ‡ 7:58 Nduenne neínulh'uzne, 'enne Stephen hich'az yalhduk inle'ne 'uhint'oh.

8 'Et huwa nyo keyoh Samaria whuz'ai-un ts'iyawh huhóont'i'.

9 'Et hoontsi'i whuz 'ilhoghun dune, Simon huyúlhni-un, 'et usda. 'En 'ahoolhyiz duyun 'ink'ez buba né'dulhde 'et whe, "Si dune unchá-un 'ust'oh!" ubúlhni whe Samaria whut'enne buba hooncha.

10 'Ink'ez ts'iyanne keyoh dilhts'íne hoonzoo' 'unt'ohne cha 'ink'ez tel'enne cha hinilh'en 'ink'ez huyoozilhts'ai. 'Et, "Ndun Simon 'en la 'unt'oh Yak'usda ba hooncha túne'ut'en-unli," hutni.

11 Soo sa' whe buba duyun unli 'ink'ez buba hooncha 'et huwa soo hits'u níyaztan.

12 'Et hoontsi'i Philip ooghuni buba 'álha' utni-un, 'et huwa dune cha, ts'ekoo cha, ts'iyawh too bé' hulya. 'En khuni unzoo-i be yáilhdúk inle'. Ndi khuni Yak'usda dune k'úne' bul'en-un huwun 'ink'ez Sizi Gri boozi' ghun, 'i ye bubulh yáilhdúk inle'.

13 'Et huwa Simon 'en cha ooba 'alha' hoont'oh suli'. 'Et la too be' úlya whe Philip yulh za' ut'en. Nts'oh la huwa 'ít'en 'ink'ez hooncha te ne'út'en-un ts'iyawh 'et huwun la Simon ooba hooncha.

14 'Et la whel'a'ne Jerusalem ts'e whulh uhúdants'o Samaria whut'enne Yak'usda ooghuni huyílhchoot 'inka la Peter 'ink'ez John bulh whuz whe-buhalh'a'.

15 'Et whuz hooz'az whe 'et la ooba 'alha' hoont'ohne Ndoni buyudóolts'it ha buba tenahudidli.

16 'Awhuz Ndoni buyúlh dulhts'it, Sizi boozi' 'i gha za too be' hulya.

17 'Et la Peter 'ink'ez John bulh buk'ehúdiini whe 'awet Ndoni buyudílt's'ut.

18 'Et la Simon ubunilh'en whel'a'ne dune buk'odílhni te Ndoni buyudílt's'uk. 'Et la Peter John bulh sooneya bugha óó'alh hukwa' bulh'en.

19 'Ink'ez ubúlhni, "Si cha ndi be ts'íltus-i sghu náh'aih 'et huwa la buk'udúznine Ndoni buyudóolts'it."

20 'Et hoontsi'i Peter uyúlhni, "Ndi Yak'usda negha óonin'ai-un sooneya be ootankulh ninzun de, nyun 'ink'ez nzooneya bulh hukw'elha dutáhk'un whe' hoont'oh!

21 Ndi ne'ut'en 'aw nela'olh'en huba lhe'ínt'oh 'ink'ez Yak'usda nalh 'aw ndzi ts'ih'un lhe'ít'oh 'et huwa, 'aw nets'úlh dintni cha 'ínt'oh.

22 Njan tank'us un'a núní ninzut-un lht'ananadaih 'ink'ez neMoodihti oots'un ténadinli njan dunínzun-un, khun tilah mba 'ún whutoolhdilh.

23 Whuz un'a t'enyunúszun, daint'oh la 'oonih ntsi'-i dimbun 'ink'ez lubeshi 'etsul onleh aít'oh!"

24 'Et la Simon, John 'ink'ez Peter bulh ubúlhni, "Daja sudáhni-un 'et dósneh hukwa lhe'núszun, 'et wheni nohMoodihti ts'un sba tenadahdli."

25 Soo bughuni ulhtus whe neMoodihti ooghuni ghu yáhálhdúk hukw'elh'az John 'ink'ez Peter bulh Jerusalem ts'e nahoost'as. Hi'us whe Samaria whutoh keyoh whuyaz totsuk khuni unzoo-i be dune bubulh yáulhdúk.

### *Philip Ethiopia moodih yuyátildúk*

26 'Et la neMoodihti oolizaz Philip yulh yátildúk whe 'uyúlhni, "Lhadíntneh 'ink'ez ndet la Jerusalem whe diti n'az Gaza ts'u ti ts'e whuz ti inyalh," whuz dune lhuhóot'ih ts'e.

27-28 'Inka Philip lhadúja 'ink'ez whuz whenya. 'Et la Ethiopia dune, 'en eunuch hubuhútnine,\* 'en la duyoh ts'e nádalh. Ethiopia whulerwe ts'eke† 'en ba sooneya ghunli-un dune ncha huyilh'i. Jerusalem ts'e la Yak'usda ts'un

\* 8:27-28 'Aw ts'ekoo t'aóonalh aít'oh huyulhtsi-un ni whe 'utni. † 8:27-28 Ndun lerwe ts'eke Candace cha huyúlhni.

teni noolhdzin ha whuz nusúya, luwagin be whuz de nágooh. 'oh whuya ugooh whe la Isaiah, Yak'usda be nus hoo'en-un, 'en yuk'une'úzguz-i, 'i la yuk'uyalhduk.

<sup>29</sup>'Et la Ndoni Philip yulh yátilhduk, "Whuz oots'ínyalh 'ink'ez luwagin oozih k'ut tainyaih," yúlhni.

<sup>30</sup>'Et la Philip yughulgai 'ink'ez la Isaiah 'uk'unéyuzguz 'i k'ut 'uk'uyalhduk yuduzts'ai, 'inka yoodulhkut, "Ndai la ook'uyailhduk-i daja ni-un, 'et t'eeonínzun eh?" yúlhni.

<sup>31</sup>"Nts'éna t'entászin? Dune hiye súnulhtun de, 'et de za la daja ni whe 'utni-un nahós'alh," yúlhni. 'Ink'ez la Philip, "Sghu dinyaih, 'ink'ez szih sinda," yúlhni.

<sup>32</sup>Nyoo Yak'usda ooghuni ook'unusgúz-i, 'ilhoghun 'et la hukw'u yalhduk-un ndutni whe,

"Usbai hituzilhghelhel ts'u hítulhtih-i, soo dant'oh la,  
'ink'ez 'usbaiyaz hahitit'us te t'edusnih,  
'et ndunt'oh 'aw yalhtíldih.

<sup>33</sup>Ts'iyanne nalhts'et 'et hooncha whe hukwayá hoonli tuné' huyulh'en, 'ink'ez 'aw ts'ih'un un'a nulhé'huyilh'el.

Ndi yun k'ut ye khúna-i, 'i ooghu yílchoot 'et huwa 'aw ye kédindene, 'enne cha dune t'ebunúszun."

<sup>34</sup>'Et la eunuch Philip 'ulhni, "Sudíni ndun Yak'usda be nus hoo'en-un mbe ulhni, dich'oh tilah na'dudútni k'us 'uyoon dune tilah 'ulhni?"

<sup>35</sup>'Et la Philip yawhénilhduk ndi dune yuk'uyailhduk-i Yak'usda ooghuni 'et whe 'e dini' whe khuni unzoo-i Sizi ghun ts'iyawh yudáni'.

<sup>36</sup>Higooh whe la too hoonli-un hugho ningoo. 'Et la nyoon moodih 'utni, "Njan too hooni. Dáhoont'oh huwa 'aw too be' 'óoznih aít'oh?"

<sup>37</sup>'Et la Philip uyúlhni, "Ndzi ndulcho-i be, be 'alha' hoont'oh int'i de, 'et too be' talnelh." "Sizi Gri 'en Yak'usda ooYe' 'unt'oh, 'et sba 'álha' hoont'oh!" yúlhni.

<sup>38</sup>'Et la nyoon eunuch luwagin 'ilhiz nenintan 'ink'ez nahult'oh Philip nyoon eunuch bulh déhahan'az 'ink'ez tahán'az. 'Et la Philip eunuch too be' yílna.

<sup>39</sup>'Et la too hanáhit'az íbulh Philip Ndoni be whedánde 'ink'ez nyoon eunuch 'aw 'on 'at nalhuyít'el whe la didut tube cho whunílhni whe dukeyoh ts'e whenágo.

<sup>40</sup>'Ink'ez la Philip keyoh Azotus huwhútni 'et nuya whe hitilh'en. 'Et whunat keyoh wheyaz whut'enne keyoh Caesarea ts'ootayalh whuts'un ts'iyawh khuni unzoo-i be bubulh yálhduk.

## 9

### *Saul Sizi Gri ts'u nálh'a*

<sup>1</sup>'Et hoozulh whu la Saul neMoodihti yugha hodul'ehne húnilch'e k'et ts'iyawh butighan huwu yalhduk 'inka la Lizwif lubret 'uk'enus dízti'-un ts'ú whenya,

<sup>2</sup>'ink'ez yoodulhkut keyoh Damascus huwhutni ts'e Lizwif bulugliz whu-lubretne duba buts'ó k'ehoo'ooges buts'u húkwa' utni, ndunne Sizi k'un'a uninzunne ts'iyawh dune 'ink'ez ts'ekoo cha abule, 'ink'ez Jerusalem ts'e nabutoola' ha 'et wheni.

<sup>3</sup>'Et la Saul Damascus whenghoh uyalh whe, 'et khunsul ndus de whuts'un oonat tube kwun ulhtus dult'oh-i diznukw.



4 'I gha yun 'et nált's'ut 'ink'ez la' whutni, “Saul di ha dzoh nusílh'dzut whe 'int'en?”

5 “Moodihti mbe inli?” ni Saul. “Si Sizi 'ust'oh. Si 'usilh'en dzoh nusílh'dzut. Mbe la tutsus nulé-un ook'únulhe'zint'en de, nyunch'oh za dzoh nuná'dudildzut,” yúlhni.

6 'Et dutlut 'ink'ez ooba hooncha, 'ink'ez 'utni, “SMoodihti ndet datísnelh-un sts'u hukwa' ninzun?” 'Ink'ez neMoodihti 'uyúlhni, “Dunadindaih 'ink'ez keyoh ts'e ínyalh. 'Et la dune datánelh-un nyodóni,” yúlhni.

7 Nyoonne dune Saul bulh nudilhne 'ilhiz nehúnindil 'ink'ez t'ehudínel, yaduk hodidts'o hoonts'i 'aw dune lhuhis'en.

8 Saul dunadija 'ink'ez yután'en whe lhuhoos'en sulí. 'Inka hila ilhchoot 'ink'ez Damascus ts'e huyoolhya.

9 Tat dzin 'et 'aw lhuhoos'en. 'Et delyiz whe 'aw lhe'us'al 'ink'ez too hoonts'i lhusnai'.

10 'Et keyoh Damascus 'et la 'ilhghun ooba 'alha' hoont'oh-un, Ananias huyúlhni, 'en la benghun néwhults'ut whe la neMoodihti yulh yátílhduk 'ink'ez ndutni, “Ananias” yúlhni. 'Et la 'aho Ananias, “SMoodihti, njan susda,” yúlhni.

11 'Et la neMoodihti uyúlhni, “Lhadíntneh 'ink'ez ti lhts'eoodiz'a huwhutni ts'e whuz inyalh Judas ooyoh ts'e, 'ink'ez dune Tarsus whut'en-un, Saul huyúlhni-un, 'en ooka' oodolh'kut. 'Et tenadudli whe 'unt'oh.

12 'En cha benghun néwhults'ut whe Ananias huyúlhni-un, 'en la daninya yunilh'en 'ink'ez yutsi k'ut dilhni hoon'en naoodle' ha.”

13 Ananias 'et la uyúlhni, “NeMoodihti nts'en'a 'utisnelh, lhane dune ndun Saul 'en ghun sodáni'. Njan 'et ndúja, Jerusalem whut'enne, nch'e'ne, lhe'ulcho 'i be dzoh nubulhde whe 'unt'oh.

14 'Et 'ink'ez ndiz Damascus ts'e oozya lubret moodihne mbene la ooba 'alha' hoont'oh ilhchootne 'ink'ez nyoozi' be yalhduk, ts'iyawh aboolelh ha higha óonin'ai.”

15 Moodihti 'et uyúlhni, “Inyalh 'ink'ez dája nyudúsni-un 'uhoonleh. Si Saul 'utahásti whe 'unt'oh, sba' tit'elh 'et wheni. 'Udun yun k'ut whut'enne, lerwene cha 'ink'ez Israel oots'u hainzutne cha ts'iyawh si sghun t'ehonózín 'et whúbuntíltun 'et wheni.

16 'Et 'ink'ez sich'oh whúntistun dat'en whe si sgha dzoh nutizut-un huwun.”

17 'Inka Ananias whuz whenya 'ink'ez yoh daninya whe Saul yek'édilni 'ink'ez ndutni, “Saul, sulhutsin neMoodihti sutílh'a', Sizi dich'oh, ndiz ínyalh whe ti nyenghun be hódilts'ai-un, 'en sutílh'a' hon'en naoodle' 'ink'ez Ndoni nyudóolts'it ha.”

18 'Et 'aho hoonliyaz 'ugoos dult'oh-i Saul oona k'éhayankat, 'ink'ez 'aho hoo'en nasdli'. Dudinya 'ink'ez too bé' ulya.

19 'Et hukw'elh'az 'an'al 'aho ulhtus násdli'. 'Et la Saul Sizi yugha hodul'ehne dzoh sa' dzin Damascus 'et buzih inda'.

### *Damascus 'et Saul khuni unzoo-i be bubulh yálhduk*

20 'Et 'aho Lizwif bulugliz ts'e daninya 'ink'ez Christ ghun bubulh yáwhenílhduk, “'En Yak'usda ooYe' 'únt'oh,” ubúlhni.

21 Mbene la yudits'óne ts'iyawh buba hooncha 'ink'ez 'ulhodutni, “Ndun dune Jerusalem 'et ndi yoozi' be yalhdukne, 'enne ubughan 'en 'unt'oh 'ink'ez 'et huwa za ndiz oozya ndunne ubitálhchulh 'ink'ez lubret moodihne ts'u nábutíleh 'et wheni.”



22 'Et hoonts'i Saul ooghuni 'on nus ulhtus whe dune bubulh yálhduk 'ink'ez Sizi 'en Christ 'unt'oh ts'ih'un buba 'álha' hoont'oh ubulhtsi k'et Lizwifne Damascus whut'enne 'aw dája hidóni' ait'oh.

23 'Et la lhat dzin inle' whe Lizwifne 'ilhúhozdil 'ink'ez Saul nts'en'a la hituzilghelhel huwun lhadóduleh.

24 Dzin 'ink'ez 'ulhdzis ibulh njan keyoh hukwuti-un 'ahoolhyiz huwu hinli hituzilghelhel ha, 'et hoonts'i Saul dahítilelh-un 'et t'ewhunanzin.

25 'Et la 'ilhe 'úlhdzis Sizi yugha hodul'ehne Saul huyílhchoot 'ink'ez si keyoh whunasú'a-i ookonín'a-un, 'et hukwa húyalhti 'ink'ez chalhyal cho be húyalhti 'ink'ez yoo 'az ts'e nahúyalhduk.

### *Saul Jerusalem ts'e oozya*

26 'Et Saul Jerusalem ts'e oozya 'ink'ez Sizi yugha hodul'ehne but's'ú nedoja' hukwa 'ut'en, 'et hoonts'i 'en 'aw Sizi yugha hodul'eh-un 'unt'oh lhonízun, 'ink'ez tube huyé nuljut.

27 'Et la Barnabas yughu ninya 'ink'ez yula 'uja whe whel'a'ne but's'ú yoolhti 'ink'ez la ubudáni' dája whe Saul ti uyalh whe neMoodihti in'en 'ink'ez yulh yáilhduk cha 'uja. 'Ink'ez ubúlhni dat'en whe 'aw lhníljut whe Damascus whut'enne Sizi boozí' gha bubulh yálhduk.

28 'Et la Saul buzih net'l'adinda' 'ink'ez Jerusalem ndulcho whe nuya, 'aw lhníljut whe Sizi boozí' gha Yak'usda ooghuni be bubulh yálhduk.

29 Lizwif, Greek k'uyalhdrukne, 'enne cha bubulh yálhduk 'ink'ez bubulh húk'u nuhúlhye' 'et hoonts'i hizoolghelhel hukwa' huyulh'en.

30 'Et la ndunne ooba 'alha' hoont'ohne náhuhoon'ai whe Saul Caesarea ts'e buch'a húyoolhti. 'Ink'ez la dukeyoh Tarsus huwhút'ni ts'e whehúyalh'a'.

31 'Et la ndulcho whe Judea, Galilee, 'ink'ez Samaria whulh Sizi ba 'ilhúhozdilne 'aw dzoh nulhuldehne hooloh. 'Et whe la buba honzoo whe lhódizut 'ink'ez cha Ndoni gha ooba 'alha' hoont'ohne ulhtus úbulhtsi. 'Et huwa 'on nus lhane huzdli' 'ink'ez neMoodihti za hudilhti' sulí'.

### *Keyoh Lydda 'ink'ez Joppa huwhút'ni-un, 'et Peter huwa 'ít'en tune' 'út'en*

32 'Et 'awet Peter soo ndulcho whe nuya. 'Et la 'ilhoth Yak'usda ooch'e'ne, Lydda whut'enne,

33 'enne la but's'ú nuya whe 'ilhoghun dune, Aeneas huyúlhni, ghu ninya. 'En la lhk'udit yus k'ut délhudusni 'ink'ez la sulhti za 'unt'oh.

34 'Et la Peter uyúlhni, "Aeneas Sizi Gri soo na'unylna! Dunadinyaih 'ink'ez nllli k'ut soo ná'hoonleh," yúlhni. 'Aho Aeneas dudinya.

35 Mbene la keyoh Lydda 'ink'ez Sharon huwhut'ni-un whut'enne ndun dune Aeneas huyan'en whe ts'iyawh neMoodihti hits'u nálhya.

36 'Et la keyoh Joppa huwhút'ni-un 'ilhoghun ts'eke 'et whut'en-un Tabitha huyulhni. 'En ooba 'alha' hoont'oh-un. Boozí' Greek k'un'a "Dorcas" huyúlhni 'et "yests'e" ni whe 'utni. 'En 'ahoolhyiz honzoo túne'ut'en, 'ink'ez tel'enne cha la'ut'en.

37 'Et 'oh da' nduda sulí' 'ink'ez dazsai. Hizi tunáhuyulhti 'ink'ez howhut'í-un dohyo 'et nehinilhti.

38 Joppa Lydda whuts'un 'aw lhnilhda' 'et la Sizi yugha hodul'ehne, Peter Lydda usda whulh 'úhudants'o nane dune, 'enne la whuz whe bahalh'a', "Awhe' soo 'a nets'ínyalh!" huyúlhni.

39 'Et 'aho Peter lhadúja 'ink'ez bubulh whenát'az. Whuz oozya whe ndo dune whut'i dohyo ts'e, whuz whenya. Ts'iyawh tsandilhne higha óozdil,

hutso whe nyoon ts'eke, Dorcas huyúlhni-un, khuna da' dzoot'an 'ink'ez dzoot te buba 'uyalh'en-i, hinalhts'et nahúyule.

<sup>40</sup> 'Et Peter ts'iyanne 'az whenaílh'a', dugwutsi be nenínya 'ink'ez tenadidli. Nyoo nezi yuts'u nálh'a 'ink'ez utni, "Tabitha, dudinyaih!" 'Et yután'en ibulh Peter yutílh'en whe 'aho dó netl'adinda'.

<sup>41</sup> 'Et Peter yula ílhchoot 'ink'ez didilhya. 'Et la Yak'usda ooch'e'ne, tsandil-hne tubulh, bukahizya 'ink'ez khuna whe butl'anáyalhti.

<sup>42</sup> 'Et Joppa dulcho whe njan whulh 'úhudants'o whe lhane neMoodihti buba 'álha' yint'oh sulí'.

<sup>43</sup> 'Et la Peter, Simon 'uzus 'úlh'en-un, 'atsulyaz yuzih inda'.

## 10

### *Peter Cornelius khuni unzoo-i be yulh yálhduk*

<sup>1</sup> Caesarea 'et la 'ílhoghun dune Cornelius huyúlhni-un 'et usda. Roman lhuganne, 'enne la, "Italy bohne" hubuhútni 'enne ndun bumoodih unli.

<sup>2</sup> 'En la teni' nilhdzun-un dune unli, 'ink'ez Yak'usda émuljut-un 'unt'oh. Didut 'ink'ez ook'ekooke ts'iyawh Yak'usda za hudílti'. Lizwif tel'enne, 'enne cha tube bula 'ut'en 'ink'ez 'ahoolhyiz Yak'usda ts'un tenadudli.

<sup>3</sup> Dzetniz hukw'elh'az, 3:00 at'en, 'et la 'uja hoonli bengahun néwhults'ut. 'Et soo ts'ih'un Yak'usda oolizasne 'ílhoghun 'en danínya 'ink'ez, "Hadih Cornelius," yúlhni.

<sup>4</sup> Tube oogha 'únjaz whe la lizas yunílh'en 'ink'ez la, "Dáhooja?" yúlhni la. 'Et la lizas utni, "Yak'usda ntenadudli yudánts'o, 'ink'ez nye 'ugha té'nizeh cha unzoo, 'et huwa Yak'usda nyunalni.

<sup>5</sup> Dugwe', Joppa ts'e 'ílhoghun dune Simon, 'en la Peter cha huyúlhni, 'en ookunáhoolh'a'.

<sup>6</sup> Ndun dune, 'uzus 'úlh'en-un, 'en cha Simon huyúlhni, yatoo' ba whut'i, 'en zih usda, 'ink'ez datánt'elh-un, 'et huwun nyudutánelh."

<sup>7</sup> 'Et hukw'elh'az ndun lizas yulh yáílhduk-un whenádide whe Cornelius nane yoh 'ut'enne, dich'oh oodune'ne, 'ink'ez 'ílhoghun lhugan-un, 'en soo Yak'usda za dílti', 'en cha dich'oh yunat ne'út'enne tahayálhti.

<sup>8</sup> Daja-un huwun ts'iyawh ubudáni' 'ink'ez Joppa ts'e whébalh'a'.

<sup>9</sup> 'Et 'om bun dzin ndunne tane keyoh Joppa 'awet whenghoh hidulh, 'et 'oh whuya hoozulh whu za Peter 'en cha Joppa usda whe, dzetniz at'en 'et ndo bun k'ut\* whuz dugha ínya tenadutidli 'et wheni.

<sup>10</sup> 'Et la Peter ooye'ílt's'ul, 'uti'ulh hukwa' ninzun t'alh-i lhaíduleh whutoh, 'et la hoonli bengahun néwhults'ut.

<sup>11</sup> Ndo yat ts'e lhch'az 'úhoja 'ink'ez la ts'ut cho dult'oh-i, didun whédint'i, 'i t'az ndus de haímbal, 'ink'ez la yun nenímbal.

<sup>12</sup> 'I bet la khuna didowh-i, tí'ughus, 'ink'ez yinka dut'ai cha, 'i ts'iyawh yuk'udílh'ts'i.

<sup>13</sup> 'Ink'ez la, "Peter dudinyaih, 'inghan, 'ink'ez 'in'alh," whutni.

<sup>14</sup> 'Et hoont's'i Peter ndutni, "SMoodihti ndi khuna-i me ts'útni ooch'az níjoot whe' hoont'oh, 'et huwa 'aw oos'alh aít'oh!"

<sup>15</sup> 'Et doo cha za 'uw'hútni, "Ndai la Yak'usda oot'alh ni-i, 'aw, 'Lait'i 'unt'oh,' dini iloh!"

<sup>16</sup> Soo tat whucho 'et njan bengahun nenáwhults'ut 'ink'ez ndi naímbal inle'-i ndo whenált's'ut.

\* 10:9 'Et keyoh bun k'ut lh'ts'e whudiz'a-un huhooh'i.

17 'Et Peter njan benghun néwhults'ut-un 'et dawhút'en whe' whut'en, 'et huwu nuni nuzut whe 'ink'ez la ndunne Cornelius whuz whebalh'a'ne nts'e Simon ooyoh 'et t'ehonanzin 'ink'ez la hukwuti 'et nódilhya.

18 Húháyih 'ink'ez 'uhoodulhkut, "Aw Simon 'en Peter cha huyúlhni-un njan hidoh?"

19 'Et Peter 'awhuz njan hon'en-un beni taóodolts'it hukwa' 'ut'en whe Ndoni uyúlhni, "Oozílhts'ai, njan tane dune, 'enne nkáhitis'en.

20 Dunadindaih 'ink'ez nyo naíndalh. Buch'a tsédoni junih bubulh 'útanelh, si whuz whebis'a' whe' hut'en," yúlhni.

21 'Et Peter nanája 'ink'ez nyoonne dune ubúlhni, "Si 'ust'oh, dune ookaitáh'en-un. Di ha ndiz tihdil?"

22 'Et 'uhuyúlhni, "Lhuganne moodih, Cornelius, 'en netilh'a' whe' ts'ut'en. Dune unzoo 'ink'ez 'ahoolhyiz Yak'usda ts'u ténadudli, Lizwifne cha ts'iyawh hidilhti'. Yak'usda oolizas 'ilhoghun 'en duyoh ts'e nka'doni' yulhni, 'ink'ez dája dutanelh 'et nyoozólhts'ai 'et wheni."

23 'Et la Peter yoh dábaninla 'ink'ez 'et hantez.

'Et 'om bun dzin lhadúja 'ink'ez bubúlh nátist'az whe whulohne ooba 'alha' hoont'ohne Joppa whut'enne, 'enne cha bubulh lhunáhusdil.

24 'Et 'om bun dzin la Caesarea ts'e oozya. 'Et la Cornelius yuba sulh'i duk'ekene 'ink'ez dunatneke cha, "Anih," hubudáni'.

25 Soo Peter yoh ts'u tizya whe Cornelius yududizya 'ink'ez yubut nachániti.

26 'Et Peter, "Dunadindaih. 'Ants'i 'oh dune 'ust'oh," yúlhni.

27 'Et la yoh ts'e hóota'us whuts'un Peter Cornelius bulh yálhduk za utni 'ink'ez yoh ts'u hooz'az whe lhane dune 'ilhúhozdil whunilh'en.

28 'Et ubúlhni, "Nohnich'oh soo cho t'éoonáhzun, Lizwifne whuch'az nijoot 'udun yun k'ut whut'enne buyoh dats'óoya' 'ink'ez bubulh né'ts'oot'en huba lhe'hóot'oh. 'Et hoonts'i, Yak'usda whusúniltan 'aw 'uyoonne dune me sba hinli doosni' aít'oh.

29 'Et huwa skunaóozulh'a' whe 'aw tselhdúсни whe nohts'u whúsasya. 'Inka nohóoduskut di ha 'ahja skunaóozulh'a'?"

30 'Et Cornelius utni, "Et ndowheya hoozulh at'en tat dzin inle' whe dzetniz hukw'elh'az 3:00 at'en 'uhunit'o whe syoh sóo hoosni 'ink'ez tenadusdli whe khunsul dune naih soo ulhyul-i be usda-un

31 sbut usyin 'ink'ez súlhni, 'Cornelius, Yak'usda ntenadudli yudánts'o, 'ink'ez nye 'ugha té'nize cha unzoo, 'et huwa Yak'usda nyunalni.

32 Dugwe', Joppa ts'e 'ilhoghun dune Simon, 'en la Peter cha huyúlhni, 'en ookunáhoohl'a'. Ndun dune 'uzus 'ulh'en-un, 'en cha Simon huyúlhni, yatoo' ba whut'i, 'en zih usda, 'ink'ez whusaínya de la nyulh yátalhdruk, 'et njan lizas sudáni'.

33 'Et huwa 'aho nka whenáhoos'a', 'ink'ez soo 'ínja nets'u whúsainya. 'Ink'ez njan 'awet ts'iyawh Yak'usda bulh 'úts'int'oh mba ts'ilh'i dája neMoodihti huwá nyulh'a-un huwun nebulh yátalhdruk."

### *Peter khuni unzoo-i be bubulh yálhduk*

34 'Et 'awet Peter yawhénilhdruk whe ndutni, "Soo ts'ih'un t'éooníszin 'et 'álha' hoont'oh 'alghoh lhgha Yak'usda nenilh'en. 'Aw 'ilhoghun dune 'on nus yuts'ilh ditni-un hooloh.

35 Mbene la ndi yun k'ut Yak'usda za dílhti'ne 'ink'ez tank'us 'utit'elh whénuljutne, 'enne Yak'usda buka datni nts'oh 'udun yun k'ut whut'enne 'et hoonts'i.

<sup>36</sup> Israel oots'u hainzutne bubulh 'údahts'o la dahúja whe khuni unzoo-i butl'adilts'ut 'ink'ez Sizi Gri, 'en gha, dahúja whe ndi khuni unzoo-i be budzi dinghel, 'en ts'iyanne dune buMoodihti unli whe 'unt'oh 'et huwa.

<sup>37</sup> 'Ink'ez cha Israel oots'u hainzutne bukeyoh ndulcho whe nts'oh te hooncha tune' whust'en, ndet la John too be' ts'ul'ih huwu yailhduk whe Galilee 'et whust'un whe' whudit'en, ts'iyawh t'éoonáhzun.

<sup>38</sup> T'enahzun Sizi Nazareth whut'en-un, 'en daja whe Yak'usda Ndoni 'ink'ez be ts'íltus-i cha yuyudán'ai 'et huwa ndulcho nuya hoonzoo te ne'út'en 'ink'ez mbene la netsudule k'une' bul'en 'enne cha soo na'bulh'en, Yak'usda Sizi yulh 'unt'oh 'et huwa.

<sup>39</sup> Lizwif bukeyoh nts'oh te ne'úst'en t'ets'onínzun, nenalh 'úhoot'en 'ink'ez Jerusalem 'et tulalhgus 'uhíndunilht'o whe hizilghí.

<sup>40</sup> 'Et hoohts'i, whulh tat dzin 'et Yak'usda nahuyílhna' 'ink'ez nenalhts'et noya' yulhtsi,

<sup>41</sup> dune ts'iyawh iloh, wheni za mbene la nenalh 'úhoot'enne Yak'usda 'utahánéyanla íne'. Dunadija hukw'elh'az bulh uts'an'ulh 'ink'ez bulh 'úts'itnai' inle'.

<sup>42</sup> 'Et huwa ndi khuni unzoo-i dune be bubulh yáts'oolhduk, huwa néulh'a 'ink'ez 'et 'uzdooni' Yak'usda Sizi 'en 'utahayálhti dune yaidlanne 'ink'ez khunane cha huba nahooyeh ha.

<sup>43</sup> Yak'usda be nus hóo'enne ts'iyawh highu yailhduk mbene la ooba 'alha' hoont'ohne Sizi Gri 'en gha bulubeshi buba 'únyutílhduh."

### *'Udun yun k'ut whut'enne Ndoni buyudílt's'ut*

<sup>44</sup> 'Et Peter 'awhuz yalhduk whe mbene la yoozilhts'aine Ndoni buyudílt's'ut.

<sup>45</sup> Ndunne Lizwif ooba 'alha' hoont'ohne, Peter bulh whusaindílné, buba hooncha 'uhooja' 'udun yun k'ut whut'enne hoohts'i Ndoni buts'ó t'l'aidilts'ut 'ink'ez buyudílt's'ut.

<sup>46</sup> 'Ink'ez 'enne khuni whutso da' t'ehinúszun-i be yawwéhúnilhduk whe Yak'usda hudílti' whe hubodíts'o. 'Ink'ez 'et Peter uboodulhduk,

<sup>47</sup> "Ndunne, 'enne cha wheni nek'un'a Ndoni buyudílt's'ut. Ndunne too be' tilnelh de mbe dah dutinelh?"

<sup>48</sup> 'Inka 'et bugha óonin'ai neMoodihti boozí' gha too be' hutilnelh. 'Et hukw'elh'az la Cornelius Peter yughu tedudli 'atsulyaz buzih ooda' ha.

## 11

### *Jerusalem ooba 'alha' hoont'ohne Peter bubulh yátilhduk*

<sup>1</sup> 'Et whel'a'ne 'ink'ez ndunne ooba 'alha' hoont'ohne te Judea ndulcho whe 'udun yun k'ut whut'enne, 'enne cha Yak'usda ooghuni huyílhchoot 'ink'ez hits'u nálhya 'et whulh úhudants'o.

<sup>2</sup> 'Et la Peter Jerusalem ts'e oozya, whulohne Lizwif ooba 'alha' hoont'ohne Peter hidulhyoh utni,

<sup>3</sup> "'Udun yun k'ut whut'enne, Lizwif lhilohne, 'enne buzih hoont'i 'ink'ez bula 'an'al cha 'inja inle,'" huyúlhni.

<sup>4</sup> 'Inka Peter ndulcho whe 'udechoo whust'un bulh dahooja-un huwun ts'iyawh bubulh náhoolnuk.

<sup>5</sup> "Keyoh Joppa 'et tenadusdli whe hoonliyaz senghun néwhults'ut ts'ut cho didun whedint'i, 'i ndus de hámbal 'ink'ez szih nenímbal.

<sup>6</sup> Soo cho nis'en whe khuna-i didowh whe t'l'ughus, 'ink'ez yinka dut'ai cha 'i yuk'udilhts'i nus'en.

7 'Ink'ez sulhyá 'e'dutilhduk, 'Peter dudinyaih, 'inghan, 'ink'ez 'in'alh,' whutni.

8 'Et hoonts'i, 'SMoodihti 'awundooh, ndi khuna-i me ts'útni, ooch'az nijoot whe' hoont'oh, 'et huwa 'aw oos'alh aít'oh,' dusni.

9 'Et doo cha za ndus de 'úwhutni, 'Ndaí la Yak'usda oot'alh ni-i, 'aw lait'i 'unt'oh dini iloh!'

10 Soo tat whucho 'et njan benghun nenáwhults'ut 'ink'ez ndi naímbal inle-'i ndo whenáalts'ut.

11 'Et 'oh whuya hoozulh whuza tane dune Caesarea whuts'un sts'ú botilh'a'ne 'awet yoh susda ts'e hoozdil.

12 'Et Ndoni 'usúlhni, "Aw buch'a tséíhdini whe bubulh ín'us.' 'Ink'ez ndunne lkh'utáne ooba 'alha' hoont'ohne, 'enne cha Caesarea ts'e sulh hütizdil 'ink'ez ts'iyawh Cornelius ooyoh ts'e dáznindil.

13 'Et nedáni' ndun lizas duyoh usyin whe yunilh'en 'ink'ez uyúlhni, 'Joppa ts'e whuz ndun dune Simon Peter huyúlhni, 'en ookunáhoohl'a'.

14 'En la nohdutánelh datúhnelh 'et whe la nyun 'ink'ez nk'ekoone te duti-hjih.'

15 'Et 'awet yawhénusduk whe 'udechoo whe wheni lhe'ts'uja whuz un'a 'enne cha Ndoni buyudílt's'ut.

16 'Et whunazni neMoodihti 'et ndutni inle', 'John dune too be 'ulh'en-un, 'en too be too be' nohulh'en inle', 'et hoonts'i 'et whusawhútilts'ulh, sBá 'en Ndoni nohts'ó t'l'aiduti'alh 'ink'ez nohyudútilts'ulh 'et whuz un'a too be' nohtilelh.'

17 'Et 'alha' hoont'oh wheni danéinla inle' Sizi Gri neba 'alha' 'unt'oh sulí' whe Yak'usda hoonzoo negha óonin'ai, ndunne 'udun yun k'ut whut'enne, 'enne cha whuz un'a 'ubínla. Mbe usdli ha suba Yak'usda ooch'áz dosni?"

18 'Et Jerusalem ooba 'alha' hoont'ohne hodánts'o whe Peter hich'az yálhduk 'etsul 'uhudíja 'ink'ez 'enne cha Yak'usda hudílh'ti'. 'Ink'ez nja nduhútni, "Udun yun k'ut whut'enne, 'enne cha lht'anahunoodilh 'ink'ez 'ilhiz hukhoona'. 'Et whuz un'a Yak'usda bughá whunin'ai," hutni.

### *Antioch whut'enne Yak'usda ooghuni hidutáts'o*

19 Stephen hizilghí hukwel'h'az ndunne Yak'usda k'une' 'ut'enne ube húzula, 'et 'oh da' Yak'usda k'une' 'ut'enne ts'iyawh yahándil. 'Inka whulohne nilhza' Phonecia ts'e, Cyprus 'ink'ez Antioch ts'e cha whehándil. Khuni Unzoo-i Lizwifne za be bubulh yáulhduk.

20 'Et hoonts'i whulohne ooba 'alha' hoont'ohne dune Cyprus 'ink'ez Cyrene ts'e haíndilne, 'enne Antioch ts'e whehándil 'ink'ez 'et 'udun yun k'ut whut'enne bunalh húdani' khuni unzoo-i Sizi neMoodihti 'en ghun ubulh yáulhduk.

21 NeMoodihti hiyé ulhtus-i bugha ínín'ai 'et whe la lhane dune Yak'usda ooghuni hílhchoot 'ink'ez hits'u nálhya.

22 'Et la Jerusalem ooba 'alha' hoont'ohne whulh 'úhudants'o, 'inka Barnabas 'en Antioch ts'e whehúyalh'a'.

23 'Et whuz oozya whe whunilh'en daja whe Yak'usda ndunne dune ye unzoo-i be buts'un unzoo. 'Et hóost'et 'ink'ez buba nus whúnilt'i, "Nts'oh dáhoont'oh 'et hoonts'i neMoodihti soo bulh za 'ooht'e," ubúlhni.

24 Barnabas 'en la soo Ndoni yudínda 'ink'ez tube dune ooba 'álha' hoont'oh. 'Ink'ez la lhane dune neMoodihti hits'u nálhya.

25 'Et la Barnabas keyoh Tarsus ts'e whenya Saul 'en kunúta.

26 'Et nayilhti 'ink'ez Antioch ts'e nayooldi. 'Et 'ilhoh náwhudizut whe nahúlt'oh dune Sizi Gri yugha hodul'ehne butoh dune hubuhodalh'e'. 'Ink'ez Antioch 'et la Sizi Gri yugha hodul'ehne, 'enne 'udechoo Sizi Gri oodune'ne ubuwhútni.

27 'Et 'oh da' za Yak'usda be nus hoo'enne Jerusalem whehúndil whe Antioch ts'e hoozdil.

28 'Et butoh 'ilhoghun Agabus huyúlhni-un, 'en la dudinya 'ink'ez Ndoni gha, "Awet nilhdukw yun k'ut ndulcho whe dai whútale," hubúlhni la. 'Et Claudius lerwe 'uk'enus dízti'-un unli whe 'et la ndúhooja.

29 'Inka Sizi Gri yugha hodul'ehne lhgha 'úhudija whe 'ilhoghun hinli whe bubulh ooba 'alha' hoont'ohne, Judea dilhts'ine, ndet 'úhint'oh whe bula 'hutit'elh hutni.

30 'Et la nduhúja whe la Barnabas 'ink'ez Saul bulh nyoo sooneya butl'aháyudzih whe ubuhútni, "Ndi sooneya nebulh ooba 'alha' hoont'ohne be búla'tiht'en, dune tso whudilhduzhne butl'ayóohdzaih."

## 12

### *Lerwe Herod ooba 'alha' hoont'ohne bube túzilalh sulí'*

1 'Et 'oh da' at'en Lerwe Herod ooba 'alha' hoont'ohne bube zúla sulí'.

2 'Et la James, John bulhutsin huwá balh'a' whe saluzti be hizilighi.

3 'Et Herod t'eeonanzin Lizwif huhóont'i' whe honilh'en 'inka Peter 'en cha 'ayan'ai, lhes lhuntildoh-i ut'alh-un whewhúnahulnih 'et 'uhooja inle'.

4 'Et Peter huyilhchoot hukw'élh'az, 'uhayan'ai whe huwunline dine whe lhuganne lh'enáhudidulh, 'enne highole' ha butl'aháyalhti. Njan Butus Lhuseya-un hukw'elh'az ts'iyanne nalh huyootálhzhiz 'et wheni.

### *Peter 'adin'ai-un lizas tenínlhti*

5 'Inka Peter 'uhidilh'ai 'et hoonts'i ooba 'alha' hoont'ohne soo ndet 'úhint'oh-un, 'et hiba tenadudli.

6 'Et Peter dune ts'iyanne but nehítalhtel whutso 'ulhdzis, 'et la Peter nane huwunline bube guz nanisti, sih nanistl'oo-un whenkuti 'et cha nane lhuganne huwunli.

7 Khunsul neMoodihti oolizas benghun be hódiltsai, yoh cha hoot'en sulí'. 'Et lizas Peter 'ún be nilhni whe ts'enainilhzut 'ink'ez, "Soo 'ah dudinyaih!" yúlhni. 'Et 'aho nyoo lhuztih tl'ool be yulghel-i oola oots'u hayáankat.

8 'Et la lizas, "Tsunadil'oo 'ink'ez kenadil'ooch cha 'ineh," yúlhni. 'Et Peter ndúja 'et la lizas, "Nluglok cha t'unásilchoos, 'ink'ez sunanyalh," yúlhni.

9 'Et Peter 'adin'ai-un yuténinya 'aw t'éoonúszun dat'en-un ndun lizas 'alha tilah 'unt'oh k'us 'ants'i benghun néwhults'ut ninzun.

10 'Udechoo huwunline zih lhunáhust'az, 'et whulh nat-un cha. 'Et la lhuztih dá dintan-i cho keyoh datí-un hugho nin'az whe dich'oh ndi dati buba dáha'dankez. 'Et tenáhant'az 'ink'ez ti hutiz'az ibulh lizas hooloh sulí'.

11 'Et la Peter beni naóodisdli' 'ink'ez la 'uninzun, "Awet t'eeoniszin 'alha' hoont'oh, neMoodihti dulizas whusayálh'a' 'ink'ez Herod Lizwifne tubulh dzoh nusotilhzut-un, 'et whuch'a súlhyih."

12 'Et njan howu nuní nízut whe Mary ooyoh 'et howu ninya, 'en John Mark ooloo. 'Et la lhane dune 'ilhúhozdil 'ink'ez tenahududli.

13 'Et la Peter yoo 'az ts'e dati dunulkw'uz whe ts'ekeyaz, 'et 'ut'en-un Rhoda 'et huyúlhni-un, 'en la dati nenínya whe yudánts'o.

14 'Et 'aho Peter 'utni natséyoodilhts'it whe hóont'i k'et, 'aw dáhalhe'ditel 'ink'ez 'ants'i yoh danálgai 'ink'ez, "Peter dati usyin!" ubúlhni.

15 “Nyeni hooel whe 'udini,” huyúlhni. 'Et hoonts'i, “'Alha' dusni,” ni za 'utni whe, “'Awundooh, oolizas la 'ut'en,” hutni.

16 'Et whutoh Peter dati dunulkw'uz za 'utni. 'Udek'ez te hiba daha' dantan, tube buba hooncha hitilh'en whe.

17 'Et buba núlhni whe t'ehudoosni ubulhni 'ink'ez buba hukw'u nuhúlhye' daja whe neMoodihti 'adin'ai whe tenáinilhti. “James 'ink'ez 'on 'unne ooba 'alha' hoont'ohne ts'iyawh ubodóhni,” ubúlhni. 'Et 'awet 'uts'un bughu whenája.

18 'Et bundada' la lhuganne huwunlíne Peter hik'énintai whe whewhunujut whe lhtahúwhunt'ai, “Peter 'en dája,” lhodútni.

19 'Et la Herod, “Peter hikunoota,” ubúlhni. 'Aw nahayóhltel ait'oh 'inka mbene la yughinle'ne ubuhoodalhku 'ink'ez, “Uboohooghan,” ubúlhni.

'Et hukw'elh'az la Herod Judea ts'e whenya 'et whuts'un la Caesarea ts'e cha 'ít'en.

### *'Et 'awet Herod datítsah*

20 'Et ndunne nat-un keyoh Tyre 'ink'ez Sidon whut'enne, 'enne Herod tube cho bubulh húnilch'e 'inka lhane hinli whe Herod highu nindil. Blastus 'en la lerwe yoh yuba huwunli, 'en ts'ú nehidilti. 'Et la 'ants'iya Herod highu nindil 'ink'ez buba soo' hooleh-un hits'u húkwa' 'utni lerwe ookeyoh ts'e whuz de za huya'alh-i whuz hakat 'et huwa.

21 'Et dzin buba hoozi-un Herod 'et dulerwe naih yé naja 'ink'ez kw'uts'uzda ooba' yint'oh-i yuk'etl'adida'. 'Et whuts'un la dune bubulh yálhduk.

22 'Et 'ahúldzul whe huhuyih, “'Aw dune iloh utni, yalhduk, Yak'usda unli-un utni!” huyúlhni.

23 'Et 'on nus óost'et, 'et 'aho Yak'usda oolizas Herod nduda yulhntsi 'ink'ez 'usgo yúlh hanildo 'et hukw'e dazsai.

24 Yak'usda ooghuni lhane dune buba 'alha' yint'oh 'ink'ez ndulcho whe t'enudzun suli'.

### *Barnabas Saul bulh Ndoni 'atahábalhti 'ink'ez whebalh'a'*

25 Barnabas Saul bulh 'uhuwulh'en-un lhahódinla whe Jerusalem ts'e hanáhidil John Mark 'en dulh 'úhuyul'en.

## 13

1 'Et la keyoh Antioch Sizi gha 'ilhozdíline whulohne Yak'usda be nus hoo'enne 'ink'ez Yak'usda ooghuni hodulh'ehne cha hudilhts'i. Ndunne dune, 'enne whulohne 'uhint'oh, Barnabas, 'ink'ez Simeon, 'en la dune dulghus huyúlhni, Lucius cha, Cyrene whut'en-un 'unt'oh, Manaen, 'en la yun whu moodih, Herod yulh dúnduninyai-un, 'ink'ez Saul cha 'unt'oh.

2 Soo húhoonih 'ink'ez neMoodihti hiba 'út'en whutoh, Ndoni ubúlhni, “Barnabas Saul bulh sba 'udun nébutalhtel, ndi 'ut'en bugha ínus'ai-i 'uhuy-ooléh 'et wheni.”

3 'Et doo cha za soo húhoni 'ink'ez tenahudidli whe butsi k'ódalni 'ink'ez whébahalh'a'.

### *Barnabas, Saul 'ink'ez bubulh 'út'enne te, Cyprus noo k'éhindil*

4 'Et Ndoni ubutilh'a' whe Barnabas 'ink'ez Saul bulh Seleucia ts'e hoozdil, 'et whuts'un noo Cyprus huyúlhni whuz hoozki.

5 'Et keyoh Salamis ts'e hoozdil whe Lizwif bulugliz 'et Yak'usda ooghuni be yáhalhduk. John Mark 'en cha bula 'ut'en 'et wheni dulh 'úhuyul'en.



6 'Et la ndi noo ndulyiz whe hik'oozdil 'ink'ez Paphos ts'e hoozdil. 'Et la ndun ne'dulhdeh-un, Joshua ooye' huyúlhni-un, Lizwif unli, 'en Yak'usda be nus hóo'en-un na'dudil'i, 'en cha 'et usda.

7 'Ink'ez njan noo k'ut whumoodih, Sergius Paulus huyúlhni, dune beni hoonli-un 'unt'oh, 'en ndun ne'dulhdeh-un ooyadan unli. 'En la Barnabas Saul bulh, "Anih," hubudáni' Yak'usda ooghuni dutáts'o hukwa' ninzun 'et wheni.

8 'Et hoonst'i ndun ne'dulhdeh-un, Greek bughuni k'un'a Elymas cha huyúlhni, 'en Yak'usda ooghuni yuch'az yúnoolht'i hukwa' yulh'en.

9 'Et Saul, 'en Paul cha huyúlhni, Ndoni k'une' yul'en whe soo cho yunin ts'e yunilh'en

10 'ink'ez uyúlhni, "Netsudule ooye", ndai la unzoo-i ts'iyawh ooch'az dintni. Soo hoonst'i' whe dune nanin'ah ts'iyawh hoonst'i, Yak'usda ooghuni 'i cha whuts'it khuni naoolhtselh hukwa' ilh'en.

11 Yak'usda nyulh húnilch'e 'inka soo ts'ih'un whuzan'en tanleh 'atsulyaz wheni!"

'Et 'aho ndun Elymas dulhgus-i oona k'einde, 'ink'ez hoos'en suli'. 'Ink'ez la dune yula t'az nítilhyalh-un hahuyih.

12 'Et la noo k'ut whumoodih njan dahooja hoon'en whe Yak'usda ooba 'alha' yint'oh suli'. Ndai la neMoodihti ghun whuhuyodalh'e'-un tube huwun ba hooncha.

*Barnabas Paul bulh Antioch Pisidia buyun k'ut whuz'ai-un whuz hoozdil*

13 'Et Paul 'ink'ez yulh nudilhne tubulh Paphos 'et nus huzki whe Perga 'et la Pamphylia whuz'ai-un whuz hoozki. 'Et John Mark buk'enaja 'ink'ez Jerusalem ts'e whenája.

14 'Et Perga whehúndil whe 'on no Antioch, Pisidia whuz'ai-un, whuz hoozdil. 'Et la Lizwif nahulyis-un dzin bulugliz dahúnindil 'ink'ez nátl'ahudilts'i.

15 Moses ooghuni 'uk'unusguz-i 'ink'ez Yak'usda be nus hóo'enne bughuni cha hik'eayilhduk hukw'elh'az, Lizwif lugliz whumoodihne Paul, Barnabas cha 'enne ubuhútni, "Neulhutsinke, khuni huye tílhtus-i bugha dútan'alh aht'i de, ndunne dune bubulh yátilhduk hukwa' uzninzun."

16 'Et la Paul dudinya 'ink'ez buts'u dúdilni whe bubulh yáwhenilhduk 'ink'ez ubúlhni,

"Sulh dunene 'ink'ez 'udun yun k'ut whut'enne cha, mbene la Yak'usda dilhti'ne soo zúlhts'ai.

17 Israel oots'u hainzutne buYak'usda 'en netsoda'ne 'utahábanla 'ink'ez Egypt whut'enne bunalh hinchá ubulhtsi. 'Et hukw'elh'az Yak'usda whelhtus-un 'et whe ndunne Egyptne bukeyoh whuts'ahanábanla.

18 'Ink'ez dune lhuhoot'ih ts'e 'et dit whunizyat yus k'ut whutoh 'et hich'a ne'ut'en, 'et hoonst'i k'úne' bulh'en whe inle'.

19 'Et Ihtak'ant'it didowhne, 'enne Canaan whuyun k'ut whuzdla-un, 'et dilhts'ine, 'enne Yak'usda gak hubulhtsi, 'ink'ez 'et ndunne dudune'ne, 'enne bukeyoh whulhtsi.

20 'Et 450 naoodizut whutoh 'et dune hanle'.

'Et hukw'elh'az Yak'usda be nus hóo'en-un Samuel whusatíyálh whuts'un lhane whe bumoodih inle'.

21 'Et lerwe ha' hutni whe, Saul Kish ooye', 'en Yak'usda bugha ínilti. 'En Benjamin ekédinzut-un 'ilhoghun 'unt'oh, 'ink'ez dit whunizyat yus k'ut 'et bulerwe inle'.



22 'Et Saul Yak'usda whusanáyalhti hukw'elh'az whe 'et la David 'en bulerwe yulhtsi 'ink'ez Yak'usda 'en yughun ndutni, 'David Jesse ooye' 'en sdzi k'oh ts'e dune unli. Ts'iyantsuk whe sk'úne' tit'en whe 'unt'oh.'

23 Sizi David ekédinzut-un, 'en la Israel oots'u hainzutne ubutilhyis wheni Yak'usda buts'ítih'a' buts'úyoozi inle' 'et huwa.

24 'Et Sizi whe'dutat'elh whutso 'et la John dune too be 'ulh'en-un Israel oots'u hainzutne bubulh yálhduk, dudeni náhondunooleh 'ink'ez too be' hoolneh, ubúlhni.

25 'Et 'awet John dune too be 'ulh'en-un dude 'ut'en lhai dutileh whe 'et ubúlhni, 'Mbe usdli nahzun? 'Aw ndun ooba sulh'í-un, 'en iloh 'ust'oh, 'et hoonts'i whunulh'en, suntiyalh whe 'unt'oh. Ooke hana'tisdlelh-un 'et wheni hoonts'i 'aw huba soo lhe'uzdzoo,' " ubúlhni.

26 'Et Paul 'on 'un ubúlhni, "Sulhutsinke, Abraham ekédinzutne, 'ink'ez 'udun yun k'ut whut'enne, mbene la Yak'usda ts'un tenadudline, nohni ts'iyawh, wheni cha, ndi khuni 'i netilhyis wheni nets'ó t'adilts'ut.

27 Jerusalem 'et whut'ine 'ink'ez bumoodih unline cha 'aw t'éhinúszun neulhyis-un 'únt'oh. Lizwif nahulyis-un dzin totsuk ndi Yak'usda be nus hoo'enne 'uk'unuháyuzguz-i ook'uyaduk 'et hoonts'i 'aw bubeni tálhodulhts'it. Sizi datítsah ts'e be' hininya, 'et huwa Yak'usda be nus hoo'enne bughuni 'alha' 'unt'oh huyulhtsi.

28 'Et 'aw huwa hizoolhghel-un hooloh 'et hoonts'i Pilate 'en highu tédudli hizoolhghel ha.

29 'Et ndi ooghun 'uk'únusgúz-i dája ni 'oh te ne'huyulh'en whe tulalhgus k'ut nehinihlti, 'ink'ez 'uhayalhti.

30 'Et hoonts'i Yak'usda yaidlánne toh nahuyílhna'.

31 'Et la Galilee 'ink'ez Jerusalem whuts'un yúlh lhusudilne, 'enne hukw'elh'az lhat dzin hiyan'en. 'Enne Israel oots'u hainzutne highun whúbontilhtunne hinli.

32-33 'Et wheni njan whusats'ándil khuni unzoo-i ook'unohbulh nats'otilnuk. 'I Yak'usda netsoda'ne, 'enne buts'un datínelh ni-un 'andit wheni, bube uzdindilne, nenalh 'ít'en whe Sizi nahiyílhna'. 'Ink'ez ndi bulh nanki Shun 'uk'unusguz-i cha ndutni, 'Nyun Si SYe' 'int'oh,

'andit dzin, mBá susdli,' ni.

34 'Et Sizi nahuyílhna' 'ink'ez 'aw oozii tilhjut ts'e natoools'it aít'oh 'et huwun Yak'usda njan dutni.

'Ndai la oogha 'ít'en unzoo-i David oots'u yóozuszi inle'-i, 'andit nohgha tís'alh.'

35 'Et 'udun 'uk'unusgúz-i cha ndutni,

'Yak'usda 'aw dulh 'únt'oh dízti'-un ooyust'e oolhjut aít'oh yulhtsi.'

36 'Et David soo whe Yak'usda k'úne' 'ust'en khuna whutoh. 'Et dazsai whe mbene la ootsoda'ne 'uhudinla-un, 'et 'ahuyalhti 'ink'ez ilhjut.

37 'Et hoonts'i mbe da' Yak'usda nahuyílhna'-un, 'en 'aw ooyust'e lhílhjut."

38-39 'Et Paul 'on 'un ndutni, "Sulhutsinke nohni, ts'iyawh, 'alha' hoont'oh ndun Sizi dája la 'et huwa nohclubeshi nohunatidoh. 'Et t'ewhunóhzin ndai la Moses ye náhizya-i, 'i gha whuloh te nohclubeshi nohunaoodeh aít'oh inle'. 'Et hoonts'i Sizi Gri 'en gha nohclubeshi ts'iyawh gaki nohba whulhtsi.

40 Huwuhli ndet la Yak'usda be nus hoo'enne huwu yuhalhdruk-un, 'et nohbulh 'úhoneh junih!

41 'Et ndutni,

'Ughudlohne ndet la huwú nuni untihzut,

'ink'ez yaitáhdlah.

Ndi khuhna whutoh 'ut'enusdleh-i,

'i lhk'uz te whunóhonilhtan,

'et hoonts'i 'aw nohba 'alha hot'e' aít'oh tileh.' ”

42 'Et Paul Barnabas bulh Lizwif lugliz huwu nahutist'az whe 'udun yun k'ut whut'enne, “Nats'ulyis dzin de nets'u nátooh't'as, 'ink'ez doo cha za ndi ooghu yalhduk-i ooghun nebulh yaóolhduk,” ubuhútni.

43 'Et yanahadil kukw'elh'az Paul Barnabas bulh nahutist'az whe Lizwifne 'ink'ez 'udun yun k'ut whut'enne, Lizwif ts'u nálhyané, bubontizdil 'inka Paul Barnabas bulh bubulh yáhlhduk whe, “Yak'usda nohts'un yé unzoo-i, 'i za gha yinka dólhts'i,” ubuhútni. 'Et whe budzi ulhtus ubuhulhtsi.

44 'Et 'on 'at nats'ulyis dzin 'ankw'us ts'iyawh keyoh dilhts'íne Yak'usda ooghuni huyootuzálhts'ilh wheni 'ilhuhozdil.

45 'Et Lizwifne 'ilhozdíline hubonilh'en, 'oonih za hudizbun suli' whe Paul huye dúdulh 'ink'ez hiba whuts'it. Daja ni-un, 'et cha whuch'az yáhlhduk.

46 'Et hoonts'i Paul Barnabas bulh 'on nus hoolhtus whe yahulhduk, “Ndi Yak'usda ooghuni 'i nohni cho be nohbulh yaóoduk huba' hoont'oh. 'Et hoonts'i ookalhe'náhzun de, 'ink'ez 'ilhiz khutihnalh-un huba soo lhe'ulhzoo' ná'dunáhdzun de, 'ants'i nohba' dítni, 'et huwa 'udun yun k'ut whut'enne, 'enne buts'un tat'us!

47 'Et ndi khuni 'i neMoodihti ye néts'u nahizya 'i 'unt'oh, 'et nja ndutni, 'Nohni ndunne 'udun yun k'ut whut'enne be hoot'en-i buba tihle.

'Et whuz un'a yun k'ut ndulcho whe cha nohgha dune hudutijih,' ”

ni, Paul.

48 'Et la 'udun yun k'ut whut'enne hodánts'o whe, huhoont'i' whe neMoodihti ooghuni hiba oodálhti' 'ink'ez mbene la 'ilhiz khutinalh huba utahályane buba 'alha' hoont'oh suli'.

49 Ndulcho whe 'et keyoh neMoodihti ooghuni nudúts'ut suli'.

50 'Et la dune 'unt'ohne, 'ink'ez ts'ekoo unchane hoonzoo' 'unt'ohne, 'enne, Yak'usda ts'un tenadudline hinli, whulohne Lizwif bughe' hoolnihne 'uts'un úbonilht'i whe Paul Barnabas bulh buhe húzula suli', 'ink'ez duyun k'unabontizyoot.

51 'Et 'inka 'et keyoh whulez ch'a dukegon naháyanghat 'ink'ez keyoh Iconium ts'e hooz'az.

52 'Et Sizi yugha hodul'ehne Antioch dilhts'íne Ndoni be hilhtus suli' 'ink'ez tube cho honilhni.

## 14

### *Iconium whut'enne khuni unzoo-i hudánts'o*

1 'Et la Iconium ts'e hooz'az whe 'et cha ndúhooja. Paul, Barnabas bulh Lizwif lugliz ts'e hooz'az whe 'uk'enus soo bubulh yáhalhduk, 'et huwa tube lhane Lizwifne 'ink'ez 'udun yun k'ut whut'enne cha Sizi buba 'alha' 'unt'oh huzdli'.

2 'Et hoonts'i ndunne Lizwifne be 'alha' hoont'oh lhílhchulhne 'udun yun k'ut whut'enne 'uts'un úbonilht'i whe ndunne ooba 'alha' hoont'ohne buch'az náhulhya.

3 'Et hoonts'i ndunne whel'a'ne sa' 'et hanke'. 'Aw lhoníljut whe neMoodihti ghun bubulh yáhlhduk daja whe Yak'usda ndunne dune ye únzoo-i be buts'un únzoo howu yahalhduk. 'Et Yak'usda njan hooncha 'ink'ez huwa 'ít'en te né'hut'en ubulhtsi. 'Et huwa bughuni 'alha' 'unt'oh t'ehonínzun suli'.

4 'Et keyoh 'ilhozdilne whulohne, 'enne Lizwif ts'u nehudindil 'ink'ez whulohne cha whel'a'ne ts'ú nehudindil.

5 'Et la 'udun yun k'ut whut'enne, Lizwifne cha, 'ink'ez bumoodihne tubulh, whel'a'ne tebotil'h'en 'ink'ez tse be ubotuzilghel hukwa' huninzun.

6 'Et whel'a'ne whulh 'úhudants'o whe, keyoh Lystra 'ink'ez Derbe, Lycaonia 'oh whuzdla-un whuz buch'a whetsehalhdil, 'oh ho whunat cha.

7 Whuz khuni unzoo-i be bubulh yá hulhduk Lystra 'ink'ez Derbe whut'enne whel'a'ne khuni unzoo-i be bubulh yá hulhduk.

*Lystra 'ink'ez Derbe whut'enne khuni unzoo-i hudits'o*

8 Lystra 'et la 'ilhoghun dune ooke délhudusni-un 'et whut'i, 'en la whuzdli whuts'un 'aw nulhúsyo.

9 'Et usda 'ink'ez Paul yalhduk yoozilhts'ai. 'Et Paul yunilh'en, t'éoonínzun ndun dune ooba 'alha' hoont'oh 'et whe soo ná'titnelh ninzun 'inka soo cho yunin ts'e yunilh'en whe

10 soo 'ultus-un uyúlhni, "Dudinyaih 'ink'ez ts'ih'un un'a sinyin!" 'Et nyoon dune dudillhoh 'ink'ez 'awet nádinya.

11 'Et la ndunne 'ilhozdilne Paul daja hinilh'en whe soo 'ultus-un dughuni, Lycaonia k'un'a, 'uhutni, "Neyak'usdane, 'enne cha yinka dune' k'un'a 'uhint'oh huzdli' 'ink'ez ndus de nets'un hahán'az."

12 Barnabas 'en buyak'usda Zeus be náhuyoozi 'ink'ez Paul cha 'uyoon buyak'usda Hermes huyúlhni-un, 'en be náhuyoozi, 'en yalhduk-un 'unt'oh 'et huwa.

13 Buyak'usda Zeus huyúlhni 'en oolubret, soo keyoh yoo'az ts'e 'et lugliz huwhulh'ai, 'en la musdoos dune 'ink'ez 'indai 'i la keyoh datí-un whuz huyoozdla. N dunne 'ilhozdilne whel'a'ne but's'e' hudutalhk'un 'et wheni.

14 'Et Barnabas Paul bulh 'awet ndunne dune dahútinelh whulh 'úhudants'o whe, buba dzoh k'et dunaih k'uhidutilhch'ul\* 'ink'ez 'ilhozdilne nus buniz 'et nehúgai 'ink'ez soo 'ultus-un 'uhutni,

15 "Di ha 'et ndaht'en? Wheni cha nohk'un'a dune ts'inli, 'aw Yak'usda lhts'íloh whe' ts'int'oh. Njan khuni unzoo-i nohghá uztí'alh 'et wheni whusats'án'az. Ndi galdus unli-i nohyak'usdane ooch'az nálhyeh 'ink'ez Yak'usda khuna-un oots'un nálhyeh. 'En 'unt'oh yat, ndi yun k'ut, yatao' cha, 'ink'ez ndai la ook'ut whuyoonli-i ts'iyawh 'uyínla whe 'unt'oh.

16 'Et whuts'o da' k'úne' hut'en 'et hoont's'i but's'u halhuwhus'ai.

17 'Et hoont's'i 'ahoolhyiz dunábunultun whe ndus de 'ut'en unzoo-i 'uyulh'en, 'i be ndi chan nalhtih-i 'ink'ez haníyeh 'i cha soo 'et 'ut'en ilh'i. 'Et whuz un'a t'alh-i cha nohghat'aih whe nohdzi cha hoont'i' ilh'i."

18 N dunne 'ilhozdilne whel'a'ne but's'é' hudutalhk'un-un, 'et whuch'a 'ankw'us ubuhotun aít'oh, 'et hoont's'i Paul dughuni be k'oh 'uboohoontun.

19 'Et la whulohne Lizwifne Antioch Pisidia whuz'ai ts'e hahándil 'ink'ez Iconium whuz de cha 'ink'ez nyoonne 'ilhozdilne, 'enne ts'iyawh ts'u ne-bodoldilh hukwa' hut'en. Paul tse be whe hínuzilghghi 'ink'ez dazsai za huninzun 'inka keyoh yoo 'az ts'e 'et nehininguz.

20 'Et hoont's'i Sizi Gri yugha hodul'ehne higha óozdil whe dunadija 'ink'ez keyoh ts'e whenaja. 'Et 'óm bun dzin Barnabas bulh keyoh Derbe ts'e whehán'az.

*Paul Barnabas bulh Antioch Syria whuz'ai-un ts'e whuz nahutit'us*

\* 14:14 'Et whuz un'a Lizwifbube 'ut'en buba dzoh te.

<sup>21</sup> 'Et Paul Barnabas bulh keyoh Derbe 'et khuni unzoo-i be bubulh yá hulhduk whe lhane Sizi k'úne' hut'en huzdli'. 'Et la 'awet Lystra ts'e whenáhit'az. 'Et Iconium ts'e cha 'ink'ez Antioch, Pisidia whuz'ai-un 'oh whuya cha lhuhúz'az.

<sup>22</sup> Mbene la yugha hodul'ehne soo budzi ulhtus whe ndet la buba 'alha' hoont'oh-un whulh hóoyin bubuhulh'tsi. "Lhat-un whe dzoh nuts'ude de, 'aw 'et de za nts'e la Yak'usda whe lerwe unli-un dáztidulh," hutni whe whubuhodulh'eh.

<sup>23</sup> Ndet la Sizi Gri gha 'ilhozdíline hoonli-un dune tso whudilhduzhne buba 'utahahánla. 'Et tenadudli 'ink'ez soo húhoonih, 'ink'ez whuz un'a la neMoodih'ti tl'ábahanla 'enne Sizi soo hit'anínintan.

<sup>24</sup> 'Et Pisidia whuyun k'ut lhuhuz'az hukw'elh'az 'et Pamphylia ts'e hooz'az.

<sup>25</sup> 'Et Perga whut'enne cha Yak'usda ooghuni be bubulh yá hulhduk 'ink'ez nyo Attalia ts'e hooz'az,

<sup>26</sup> 'ink'ez 'et whuts'un Antioch ts'e nahooski. Ndet la keyoh Paul Barnabas bulh Yak'usda be 'ut'en k'oh butl'aháhonla inle'. 'Awet ndi 'uten lhahídinla whe 'uhoont'oh.

<sup>27</sup> 'Et Antioch ts'e nahoost'az whe Sizi Gri yugha hodul'ehne, ts'iyawh 'ilhubuhozdla 'ink'ez nts'oh te la Yak'usda gha né'hust'en-un 'ink'ez 'udun yun k'ut whut'enne cha be 'alha' hoont'oh-i hut'i sul'i' hutni whe bubulh nahuwulh'nuk.

<sup>28</sup> Sa' yugha hodul'ehne butoh hanke'.

## 15

*Paul, Barnabas bulh Jerusalem ts'e whel'a'ne 'ink'ez dune tso whúdilhdzulhne bubulh 'ilhuhozdil*

<sup>1</sup> 'Et whulohne dune Judea whédindilne keyoh Antioch ts'e hoozdil 'ink'ez ndunne ooba 'alha' hoont'ohne Moses ooghuni 'uk'unusguz-i ghun ooka dune ahli-i k'ut nohahúzt'us de, 'aw 'et de za dutihjih, ubuhútni.

<sup>2</sup> Paul Barnabas bulh tube cho Moses ooghuni 'uk'unusguz-i ghun dája hutni 'et huwun lhdulhyo nehúwhunt'ai, ndunne Judea ts'e haíndilne tubulh. 'Inka huwu lhgha 'úhudija whe Paul, Barnabas, 'ink'ez 'uyoonne Antioch whut'enne tubulh, Jerusalem ts'o toodilh 'ink'ez whel'a'ne ndunne dune tso whudilhduzhne bulh huwu yahoolhduk ubuhútni.

<sup>3</sup> 'Et whel Sizi Gri gha 'ilhozdíline, ndunne whel'a'ne whebahalh'a'. 'Et Phoenicia 'ink'ez Samaria whutulhuhúz'az whe 'udun yun k'ut whut'enne dahúja Yak'usda ts'u náhulhya ubuhútni whe tube cho ndunne Sizi Gri k'úne' 'ut'enne huhóont'i' sul'i'.

<sup>4</sup> 'Et la Jerusalem ts'e hooz'az whe ndunne Sizi Gri gha 'ilhozdíline tube cho ubúnahunílhni. Nduhne whel'a'ne 'ink'ez dune tso whudilhduzhne, 'enne la bubulh náhuwhulh'nuk Yak'usda gha nts'oh te la né'hust'en 'et huwun.

<sup>5</sup> 'Et whulohne ooba 'alha' hoont'ohne Pharisee ts'ú ditnne dodindil 'ink'ez 'uhutni, "'Udun yun k'ut whut'enne hika dune unli-i k'ut ubuhot'as 'ink'ez ndi Moses ooghuni 'uk'unusguz-i k'úne' hoot'en ubuhudóni' huba' hoont'oh.'"

<sup>6</sup> 'Et whel'a'ne 'ink'ez dune tso whudilhduzhne ts'iyawh 'ilhuhozdil 'ink'ez njan 'uhutni-un hukw'u nuhúhulhye'.

<sup>7</sup> Sa' hukw'u nuhúhulhya whe Peter dudinya 'ink'ez ubúlhni, "Sulhutsinke t'oonáhzun 'uda' whe Yak'usda nohtáhasálhti Yak'usda ooghuni unzoo-i ghun 'udun yun k'ut whut'enne bubulh yaóosduk ha, khun si sodóts'o 'ink'ez buba 'alha' hot'e' ha.

8 'Ink'ez Yak'usda dune dahínt'oh la t'ebunínzun, 'et huwa 'udun yun k'ut whut'enne, 'enne cha buk'entsi' whe wheni danéinla da' whuz un'a ndunne cha Ndoni buyudílt's'ut whe' hoont'oh.

9 Wheni Lizwifne ts'inli 'ink'ez 'enne 'udun yun k'ut whut'enne hinli 'et hoont's'i 'aw lhelht's un'a lhene 'ílhdzun. 'Et whe la ndunne Sizi Gri buba 'alha' hoont'oh sulí' 'et huwa bulubeshi bubunayalhde.

10 Ndi Moses ooghuni 'uk'unusguz-i wheni 'ink'ez netsoda'ne, 'enne hoont's'i 'aw ts'ih'un un'a hukw'ú nulhe'hit'el inle'. 'Et 'ink'ez 'andit di ha Yak'usda 'en óolhdzih whe' dahni? Ndunde yugha hodul'ehne 'uhót'e' aít'oh te buba né'dahni.

11 'Et nts'en'a 'uwhutát'elh? Neba 'alha' hoont'oh 'ink'ez nts'en'a la 'uhint'oh, whuz un'a wheni cha Sizi Gri neMoodihti ye únzoo-i be uzdoojih ha neghá whunt'ai."

12 'Et soo dílhts'ine ts'iyawh t'ehudusni Barnabas Paul bulh nahuwulnuk whutoh 'udun yun k'ut whut'enne butoh nts'en'a la Yak'usda gha hooncha 'ink'ez huwa 'ít'en te né'hust'en 'et huwun.

13 'Et yahulhduk 'etsul 'uhudija whe James dudinya 'ink'ez utni, "Sul-hutsinke soo zúlhts'ai!

14 Simon 'andit nohdáni', nts'en'a Yak'usda 'udechoo ndunne 'udun yun k'ut whut'enne dunabunilhtan whe dune butoh utahábanlane. 'Enne 'uhuja Yak'usda boozí' dízti' huyulhtsi."

15 'Et James 'on 'un ndutni, "Et Yak'usda be nus hoo'enne bughuni 'uk'unusguz-i ts'iyawh lhgha 'uhudija whe ndutni,

16 "Et hukw'elh'az whusanátisdalh, ni neMoodihti, "Ink'ez David ooyoh naoonankat-un dunaoodutás'alh 'ink'ez yahónkat-un cha soo ná'whutisdleh,

'ink'ez lhunaoodutisleh.\*

17 'Et whuz un'a ndunne dune 'et nenínkatne cha skahúnoota' 'ink'ez 'udun yun k'ut whut'enne,

mbene la sich'oh sba 'udunébusudlane,  
'enne cha skahúnoota', neMoodihti utni.  
'En 'unt'oh ndi ts'iyawh 'uhóonla.

18 Yak'usda ndi yun 'ítilelh 'et whutso da' ts'iyantsuk t'ewhunínzun.' "

19 'Et James 'on 'un ubúlhni, "Si 'et ndunúszun ndunne 'udun yun k'ut whut'enne, ndunne Yak'usda ts'u nálhyane, 'aw buba hoontsi' ts'u holh'e' huba lhe'hóot'oh.

20 'Et hoont's'i but's'ó k'e'ts'ooges 'ink'ez ubuzdóni', 'Ndai la t'alh-i buyak'usda 'uk'eltsi-i ts'u hítulhdilh 'et whe ooch'az nijoot whe 'unt'oh, khun te ooh'alh junih. Ts'ekoo k'us dune bulh ninta' 'ooh't'en junih. Khuna ooze' 'úsguz-i 'ink'ez 'uskai' bulhitsu-s-i ooh'alh junih, 'ink'ez 'uskai' cha ooh'alh junih.'

21 'Et 'alha' hoont'oh Lizwif lugliz 'et nats'ulyis dzin totsuk sa' whuts'un Moses ooghuni 'uk'unusguz-i ook'uyaduk 'ink'ez keyoh totsuk cha ooghuni huye búbulh yalhduk," ni, James.

*Whel'a'ne 'ink'ez dune tso whudilhdzuhlne 'udun yun k'ut whut'enne but's'ó k'e'hanguz*

22 'Et la whel'a'ne cha, dune tso whudilhdzuhlne, 'ink'ez Sizi Gri gha 'ilhozdilne tubulh lhgha 'úhudija whe Paul Barnabas bulh Antioch ts'e bubulh ti'usne 'utahábotilhtelh. 'Inka Judas, 'en la Barsabbas huyúlhni, 'en Silas bulh

\* 15:16 David ekédinzutne doo cha za híncha nábulhtsi ni whe utni.

'utahábalhhti. 'Et ooba 'alha' hoont'ohne butoh ndunne nane, 'enne la soo whunihne hinli.

<sup>23</sup> 'Enne la ndi ook'une'úsguz-i butl'aháyan'ai 'i ndutni,

"Wheni whel'a'ne, dune tso whudilhduzhne, 'ink'ez ooba 'alha' hoont'ohne cha Jerusalem uzdilhts'i wheni ts'iyawh nohts'o k'e'ts'uges, neulhutsinke, 'udun yun k'ut whuzdline, keyoh Antioch, Syria 'ink'ez Cilicia yun k'ut dúlhts'ine, Hadih nohts'utni. <sup>24</sup> Whulh 'úzdits'o whulohne dune netahaindilne nohts'ú hoozdil 'ink'ez tank'us un'a 'unohuhútni. 'Moses ooghuni 'uk'unusguz-i ook'une' 'ooht'en 'ink'ez ooka dune ahli-i k'ut nohohoot'us.' 'I be nohch'a nintahoninya, 'aw wheni 'ubuts'útni 'iloh whe' hutni. <sup>25</sup> 'Et 'inka 'ilhuts'ozdil 'ink'ez ts'iyawh lhgha 'úzdija whe dune whunihne nohts'u uztilh'alhne 'utahábats'alhti 'ink'ez soo nek'ekene Barnabas Paul bulh hubulh hútoo'as 'et wheni. <sup>26</sup> 'Enne 'uhuja hukw'é dahootsah tilah t'ehonínzun 'et hoonts'i Sizi Gri, neMoodihti, ooghuni be yáhalhduk. <sup>27</sup> 'Et la Judas 'ink'ez Silas nohts'ú buztilh'alh 'enne didutch'oh daja ts'utni whe nohts'o k'e'ts'angus 'et la ts'iyawh nohodóni'. <sup>28</sup> 'Et la Ndoni 'en bulh lhgha 'úzdija 'aw 'on 'un cha howu whúlna' nohba ts'uhólh'e' hukwa lhe'uznínzun. Ndet la 'andit nohghá whunt'ai whuz un'a za 'ooht'e' hukwa' uznínzun. <sup>29</sup> T'alh-i buyak'usda k'eltsi ts'u túlhdihl-i 'ooh'alh junih! 'Uskai' cha, khuna ooze' 'úsguz-i buzkai' búlhitsus-i cha ooh'alh junih! 'Ink'ez ts'ekoo k'us dune bulh ninta' 'ooht'en junih! 'Et whuch'a khahtli de, 'et de la soo 'óoht'e'. 'Et 'awet za."

<sup>30</sup> 'Et la khuni na'ane whébalh'a' whe Antioch ts'e hoozdil. 'Et ts'iyawh ooba 'alha' hoont'ohne 'ilhubuhozdla 'ink'ez 'udustl'us butl'aháyan'ai.

<sup>31</sup> 'Et whut'enne ndi buts'o k'ehuyanguz-i hik'eyailhduk whe ook'unúyusguz-i, 'i gha budzi ulhtus nasdli' 'ink'ez tube huhóont'i'.

<sup>32</sup> 'Et la Judas Silas bulh dich'oh cha Yak'usda ba yalhdukne hinli, 'ink'ez la ooba 'alha' hoont'ohne sa' whe Yak'usda ooghuni be hubulh yahalhduk 'et whe la soo budzi unzoo 'ink'ez hilhtus cha hubuhulhts'i.

<sup>33</sup> 'Et hukw'elh'az dzoh sa' buzih hudáts'i'. 'Et la ooba 'alha' hoont'ohne ndunne khuni na'ane nts'ez de da' hahándil ts'e whuz budzi hoont'i' whe whel'a'ne buts'u whenábalh'a'.

<sup>34</sup> 'Et hoonts'i Silas 'en 'awet tidalh hukwa' nínzun.

<sup>35</sup> 'Et Paul Barnabas bulh Antioch 'et cha 'et hanke', 'uyoonne cha bulh khuni unzoo-i be bubulh yáhalhduk 'ink'ez neMoodihti ooghuni ghun whubuhodulh'eh.

### *Paul Barnabas bulh lhch'a hust'az*

<sup>36</sup> 'Et hukw'elh'az dzin Paul Barnabas uyúlhni, "Keyoh totsuk neMoodihti ooghuni be yálhdukne neulhutsinke buts'ú nunaoot'as 'ink'ez nahót'alh dahínt'oh suba."

<sup>37</sup> 'Et Barnabas John Mark dudulhtóo'as hukwa' nínzun,

<sup>38</sup> 'et hoonts'i Paul 'aw ts'ih'un ooba lhe'hóot'oh. 'Oh da' da' Pamphylia bughu whenája 'ink'ez 'ut'en bubulh lhalhídilel, 'et huwa bubulh 'útinelh-un, 'aw Paul hukwa lhe'nínzun.

<sup>39</sup> 'Et tube lhdulhyoh 'uhuditni' k'et, lhch'a nahust'az. Barnabas Mark dulh 'iyilya 'ink'ez Cyprus ts'e whenáki.

<sup>40</sup> 'Et la Paul Silas za butaháhtli 'ink'ez ooba 'alha' hoont'ohne Yak'usda tl'ábahanla ye únzoo-i, 'i be bughodle' ha, 'et hukw'elh'az whenáhit'az.

<sup>41</sup> 'Et la Syria 'ink'ez Cilicia whuyun k'ut whutulhhúz'az 'ink'ez Sizi Gri gha 'ilhozdíne 'on nus budzi ulhtus ubuhulhts'i.

## 16

*Timothy 'en Paul Silas bulh bubúlh tiz'az*

<sup>1</sup> 'Et la Paul 'en keyoh Derbe 'ink'ez Lystra ts'e oozya. Whuz 'ilhoghun dune ooba 'alha' hoont'oh-un Timothy huyúlhni, 'en la 'oh whut'en. Ooloo cha ooba 'alha' hoont'oh-un, 'en la Lizwif 'unt'oh, 'et oobá, 'en la Greek 'unt'oh.

<sup>2</sup> Keyoh Lystra 'ink'ez Iconium whut'enne, ooba 'alha' hoont'ohne, 'enne la Timothy soo za highu yalhduk.

<sup>3</sup> 'Et Paul 'en la Timothy dulh tíl'us hukwa' ninzun 'inka yuka dune unli-i k'ut huyúzt'us. 'Et nduhúyinla whe Lizwifne 'oh whut'enne, 'enne la Timothy oobá Greek unli t'ehinínzun 'et huwa.

<sup>4</sup> 'Et keyoh whutuhidulh whe 'et ooba 'alha' hoont'ohne ndai la whel'a'ne 'ink'ez dune tso whudilhdzulhne Jerusalem 'et highu nahizya-i, 'i za k'úne' hoot'en hubuhútni.

<sup>5</sup> 'Et Sizi Gri gha 'ilhozdilne whe be 'alha' hoont'oh-i, 'i be 'on nus hilhtus huzdli, 'ink'ez 'et huwa dzin totsuk nus lhe'huniltsuk.

*Paul Ndoni gha benghun néwhults'ut Macedonia ts'e tóoya' ha*

<sup>6</sup> 'Et la Phrygia 'ink'ez Galatia yun k'ut 'oh whuya lhu húzdil whe Asia yun k'ut 'et Yak'usda ooghuni be yáhutlhduk Ndoni whuch'a bunizyoot 'et huwa.

<sup>7</sup> 'Et 'awet Mysia yun k'ut whan'az nehúnindil, Bithynia yun k'ut ts'e hútoodilh hukwa' hit'en, 'et hoonts'i Ndoni 'aw bugha lhu hoo'al.

<sup>8</sup> 'Inka Mysia yun k'ut 'oh whuya lhu húzdil whe keyoh Troas ts'e hoozdil.

<sup>9</sup> 'Et 'ulhdzis Paul hoonli oonalhts'et ha hóolts'ut whe dune Macedonia yun k'ut whut'en-un yunilh'en 'et usyin 'ink'ez yughu tsédudlih, "Macedonia yun k'ut ts'e nets'ínyalh 'ink'ez nela'ineh!" yúlhni.

<sup>10</sup> Soo njan oonalhts'et núwhults'ut ibulh lhazduja Macedonia yun k'uz ts'e uztikelh 'ink'ez ndunne 'et whut'enne khuni unzoo-i be bubulh yats'oolhduk ha. NeMoodihti neka' dani' t'ets'onínzun 'inka whuz un'a 'uts'uja.

*Lydia ooba 'alha' hoont'oh suli'*

<sup>11</sup> 'Et Troas 'et la ts'i cho be nus ts'uzki 'et soo ts'ihyan whuz Samathrace ts'e yats'úzki, 'ink'ez 'om bun dzin 'et Neapolis ts'e ts'oozki.

<sup>12</sup> 'Et whezdindil whe keyoh Philippi ts'e ts'ozdil. 'I la yun 'udechoo tadít'az 'et whuz'ai. 'Et Roman keyoh whuch'e' hoonli whe' hoont'oh. 'Et keyoh Philippi lhat dzin 'et na'ts'alh'ai.

<sup>13</sup> 'Et Lizwif nats'ulyis-un dzin whe keyoh whuch'a ts'uzdil 'ink'ez 'ukoh whuba ts'e ts'oozdil. 'Et la Lizwifne tenahududli-un hoonli uzninzun 'et huwa 'et nátl'azdilts'i 'ink'ez ts'ekoo 'ilhozdilne bubulh yáts'ulhduk.

<sup>14</sup> 'Ilhoghun ts'eke, Thyatira whut'en-un Lydia huyúlhni, 'en cha nedánts'o. 'En la naíh dulk'un dizi' be 'óoket-un unli, 'ink'ez 'ahoolhyiz Yak'usda ts'un teni' nilhdzun. 'Et huwa neMoodihti Paul Yak'usda ooghuni ye yálhduk-i soo cho yoozólh'ts'ai 'ink'ez beni taóodolts'it yulhtsi.

<sup>15</sup> 'Et la didut 'ink'ez hiyoh dilhts'íne ook'ekoone ts'iyawh too be' hulya. 'Et hukw'elh'az neghu nusuya, "NeMoodihti soo cho oot'anunistan-un nohba 'alha' hoont'oh de, 'anih syoh ts'e szih dulhts'i," neyúlhni 'ink'ez 'ilhez nets'ulhé'dits'il 'inka bulh úztizdil.

*Paul Silas bulh Philippi 'et 'abahan'ai*

<sup>16</sup> 'Et la 'ilhudzín tenazdudli-un ts'u ts'ídulh whe 'ilhoghun 'ulhna-un, 'en ts'eke nedudziza. 'En la ntsi'-i nudúdeh-i ooyudínda 'i be nus hoo'en 'ink'ez



nus daóotanelh-un ts'iyawh ubúlhni. 'Et whe ndunne yughunline lhai sooneya huye 'úlh'en.

17 'Et la 'ut'en Paul 'ink'ez wheni te neununúya 'ink'ez 'aldzul whe utni, "Ndunne dune 'uk'enus ndo Yak'usda oodune' hinli. Nts'en'a la dutihjih 'oh te nohba nuhúhuye!"

18 Lhat dzin ndut'en, 'udek'ez Paul tube taídizni, yuts'u nálh'a 'ink'ez ntsi-i nududeh-i nja díyulhni, "Sizi Gri boozí' gha ooyáhanadindaih!" 'Et 'aho ntsi-i nududeh-i yuyáhanade.

19 'Ink'ez ndunne ts'eke oomoodihne t'ehonanzin ndet whe la sooneya 'uhulh'en-un, 'etsul 'uhooja, 'inka Paul Silas bulh hubuhúzgooh 'ink'ez huba' hoont'oh-un, 'et keyoh moodihne bubut nébonilhti.

20 'Et la lhganne moodih but nebonilhti 'ink'ez ubuhutni, "Ndunne Lizwifne 'uhint'oh. Netoh 'ahoolhyiz dune tehuduleh.

21 Ndet la wheni huwun neba nahisda-un ts'iyawh whuch'az un'a whubuhodulh'eh. Wheni Romanne 'uts'int'oh 'et huwa 'aw buk'oh ts'e 'uts'ooneh ait'oh 'ink'ez 'oh te né'ts'oot'en aít'oh."

22 'Et 'ilhozdilne ts'iyawh buch'az nehúdíndil, lhuganne moodih Paul Silas bulh bunaih buk'uhidutilhch'ul 'ink'ez ubuholht'ah ubuhútni.

23 'Et soo tube ubuholht'o whe 'adin'ai-un 'et 'abahan'ai 'ink'ez huwunli-un, "Buch'az dana'do'alh," huyúlhni.

24 'Et 'adinlane ghunli-un huyúlhni whe 'aho soo 'udebez 'adin'ai-un, 'et 'abahan'ai 'ink'ez duchun dindaz huba' 'unt'oh-i bukechun ghu néhininla 'ink'ez hiduna'danla.

25 'Et tuzniz at'en Paul Silas bulh Yak'usda ts'un tenahududli 'ink'ez hujun. 'Et la nyoonne 'adinlane huboohoozilhts'ai.

26 Khunsul tube cho yun náhisnai whe yoh 'ahudinla-un, 'et cha ndulcho nahúwhutnah. 'Et la' hooja dati ts'iyawh dáhadankat 'ink'ez ibulh lhuztith tl'ool huyélhghel-i butsu hayánkát.

27 'Et la 'adinlane ghunli-un ts'enandzut whe dati ts'iyawh 'udun dizdla whutilh'en whe ts'iyawh 'adinlane ninta nahulghaz ninzun, 'inka dusaluzti hayáhltsus 'ink'ez 'awet na'dutuzilghel.

28 Paul soo 'ultus-un 'uidílya, "Dah! 'Udun dóldah junih, ts'iyawh 'awet uzdilhts'i!" yúlhni.

29 'Et 'adinlane ghunli-un kwun nult'ai ha utni whe yoh dálgai 'ink'ez soo dutlut whe Paul Silas bulh bubut nachániti.

30 'Et la tenábunilhti 'ink'ez uboodulhkut, "Soo sudutáhnelh datísnelh whe dutisjih?" ubúlhni.

31 "Sizi Gri neMoodihti 'en mba 'alha' oot'e', 'et whe la dutanjih, nyun 'ink'ez nyoh dilhts'ine cha," huyúlhni.

32 'Et la neMoodihti ooghuni ghun huyulh yálhduk 'ink'ez ts'iyawh mbene la 'et yoh dilhts'ine cha.

33 'Et 'ulhdzis soo 'oh whúya hoozulh whe 'adinlane ghunli-un dábnunilhti 'ink'ez buka k'et tunáwhuzguz. 'Et didut 'ink'ez duyoh dilhts'ine te ts'iyawh 'aho too be' hulya.

34 'Et la Paul Silas bulh duyoh ts'e náboolhti 'ink'ez bughu na'unt'ai, 'ink'ez tube cho whunílhni didut 'ink'ez duyoh dilhts'ine te ts'iyawh Yak'usda buba 'alha' 'unt'oh sulí' et huwa.

35 'Et 'om bun bundada' lhugan moodihne neilhchukne butsu'ú whe-buhalh'a, "Nyoonne dune bulanaduhnih!" ubuhútni.



36 'Inka 'adinlane ghunli-un Paul 'en yudáni', "Lhugan moodihne buts'a ha khuni ults'ut, 'Nyun 'ink'ez Silas bulh nohlanazdootni,' hutni 'et huwa soo cho khohdle' whe natooh't,as," ubúlhni.

37 'Et hoonts'i Paul 'en neilhchúkne ubúlhni, "Hukwa 'anehoo'alh-un hooloh 'et hoonts'i dune bez nehohltsus, wheni Romanne keyoh ts'uwhut'en whe' ts'int'oh, 'et hoonts'i 'anehan'ai 'ink'ez 'andit whu'iz 'et nanehutooh'a' hukwa' hut'en. 'Awundooh, 'aw ndulhúhoot'oh whe' hoont'oh! Lhugan moodihne dich'oh whusahóodil 'ink'ez nelanahudootni huba' hoont'oh."

38 'Et la neilhchukne ndi khuni ghun lhugan moodihne hudáni', 'et Paul Silas bulh Romanne keyoh whut'enne 'uhint'oh whulh 'úhudants'o whe tube whehunilhjoot.

39 'Et huwa buts'un k'eke nahuditni' whe 'ahudinla-un whuch'a nabuhuzdla 'ink'ez keyoh whuch'a nahoodilh hubuhútni.

40 Paul Silas bulh 'ahudin'ai-un tenáhunt'az 'ink'ez Lydia ooyoh ts'e hooz'az. 'Et ooba 'alha' hoont'ohne, 'enne cha 'et hudilhts'i. Khuni be ts'ílhut-si be bubulh yáhalhduk 'ink'ez whenáhit'az.

## 17

### *Paul 'ink'ez yúlh nudilhne keyoh Thessalonica 'et dzoh nubotilhdzut*

1 'Et hidulh whuza keyoh Amphipolis 'ink'ez Apolonia whutoh lhuhúz'az, 'et la keyoh Thessalonica ts'e hooz'az. 'Et la Lizwif bulugliz whuz'ai.

2 'Et whutso da' ne'út'en huwa Paul njan Lizwif bulugliz ts'e oozya. 'Et tat nats'ulyis-un dzin whutoh 'et la ndi Yak'usda ooghuni 'uk'unusguz-i ghun whúbunoolhtun hukwa' utni.

3 'Et buba hukw'ú nuhúlhye' Christ 'en 'utinelh dzoh nutizut, datítsah, 'ink'ez nakhitátnalh. 'Et ts'ih'un 'uhoont'oh buba hoolh'ih, "Ndun Sizi 'andit ooghun nohbulh yásduk-un, 'en Christ, 'en 'unt'oh," Paul ubúlhni.

4 'Et whulohne la buba 'alha' hooja whe Paul Silas bulh buts'ú nehudindil whe lhane Greekne Yak'usda buba 'alha' 'unt'ohne cha 'ink'ez ts'ekoo 'unt'ohne cha ts'iyawh la buts'ú nehudindil.

5 'Et hoonts'i Lizwifne huwe' hoolnih 'inka galdus ti núdilhne, 'enne nabaháldzoo 'ink'ez lhts'un nébodinla keyoh ndulcho whe whudutni buch'az yáhalhduk-i be 'ilhoghun dune, Jason huyúlhni, 'en cha ooyoh ninta' honílh'en Paul Silas bulh nabuhóhtelh hukwa' hut'en 'ink'ez 'az dune ts'un tébotalhtelh 'et wheni.

6 'Et hoonts'i 'aw nalhubuhíhtel whe Jason 'ink'ez whulohne ooba 'alha' hoont'ohne te 'enne la huske bulh keyoh whumoodihne ts'ú buhoolhtsus 'ink'ez hudultul whe nja nduhútni, "Nduune dune yun k'ut ndulcho whe ninta' huwhulh'ih 'ink'ez 'awet njan nekeyoh cha 'et ndótit'elh wheni whusahándil,

7 'ink'ez Jason 'en duyoh ubuzdla. Ts'iyawh nelerwe 'uk'énus diziti'un yugha néulh'a-i k'uhunyis whe' hut'en 'ink'ez 'uyoon lerwe unli, "En Sizi ts'utni,' nehútni."

8 'Et la ndi khuni 'i be ts'iyawh 'ilhozdilne 'ink'ez keyoh whumoodihne tubulh ndulcho 'ants'i whuts'odutni whe huwu yahalhduk.

9 'Et keyoh whumoodihne, 'enne Jason 'ink'ez 'onghohne cha tenáhudidulh wheni sooneya k'enáhudidzai 'et la bulanahuditni.

### *Paul, Silas bulh Berea ts'e whebahalh'a'*

10 'Et soo nadálghel ibulh ooba 'alha' hoont'ohne Paul Silas bulh keyoh Berea ts'e whebahalh'a'. 'Et whuz hooz'az whe, 'et la Lizwif bulugliz ts'e dahánin'az.

11 Nyoonne 'et whut'enne, 'enne la Thessalonica whut'enne bubanus hinzoo. Ndi khuni buts'otl'aidilts'ut-i soo hika' nizun whe Paul huyoozilhts'ai, 'ink'ez dzin totsuk Yak'usda ooghuni 'uk'unusgúz-i hik'uyalhduk hiyodool'eh ha, ndi khuni Paul ye yálhduk-i 'alha tilah 'unt'oh t'ehontizeh hukwa' hunzun 'et huwa.

12 'Et lthane whe ooba 'alha' hoont'oh sulí'. Greek ts'ekoo 'unt'ohne 'ink'ez dunene cha.

13 'Et la Lizwif Thessalonica whut'enne whulh 'úhudants'o keyoh Berea huwhútni 'et cha la Paul Yak'usda ooghuni be hubulh hálhduk whe whuz huyoonizdil 'ink'ez la buch'a nín'ta' huhoh'en hukwa' hut'en.

14 'Et 'aho la ooba 'alha' hoont'ohne Paul yatoo' ba ts'e whenáhuyalh'a' 'et hoonts'i nahúlt'o Silas Timothy bulh Berea 'awet hanke'.

15 Nduune dune mbene la Paul bulh 'ujane keyoh Athens whuts'un za huyúlhúsúdil, 'et la Berea ts'e lht'anahunisdil. 'Et Silas Timothy bulh soo 'a cho duts'un hutoo'as ubúlhni whe buts'otl'a khuni in'ai, 'inka 'aho hits'u whin'az.

### *Paul Athens 'et yalhduk*

16 'Et Paul keyoh Athens 'et la Silas Timothy bulh buba sulh'i 'ink'ez la bukeyoh ndulcho whe buyak'usda k'eltsi za hoonli 'et whe la Paul tube huwun oodzi unduda.

17 'Inka la Lizwifne bulugliz ts'e, 'ink'ez Greek tenadudline cha, 'ink'ez whulohne dune 'ants'i 'az 'oh nudilhne dune 'ilhodulh-un cha, ts'iyawh dzin totsuk Paul nyoo buyak'usda k'eltsi ghun hubunoolhtun hukwa' utni.

18 'Et Epicureanne 'ink'ez Stoicne dune hodulh'ehne huwun huyulh yálhduk whe whulohne howu yahalhduk, "Nduun iloh te ne'duni-un, daja dutinelh hukwa' ninzun whe 'utni," hutni.

'Et 'uyoonne cha hutni, "Nduun 'uyoonne buyak'usdane, 'enne bughu yalhduk dududli whe' utni," hutni. Paul, Sizi 'ink'ez dunadija-un huwun ubulh yálhdak 'et huwa hutni.

19 'Inka Paul shusyaz, Mars huyúlhni, yo whudo huyúlh nenindil 'ink'ez 'uhuyúlhni, "Ndi 'andit buneodilh'eh-i ooghu yailhduk soo cho t'ets'untizeh hukwa' uzninzun.

20 Ndaí la ooghu yailhduk-i whulukhi uzdits'o hoonts'i 'aw t'eznuszun, 'et huwa soo cho t'ets'onoozeh hukwa' uzninzun."

21 Keyoh Athens whut'enne 'ink'ez 'uts'un keyoh whut'enne cha 'et whut'ine, 'enne ts'iyawh 'andit ooghu yaduk-i huhoont'i' whe 'ahoolhyiz wheni huwu yahulhduk. 'Enne hoonín'enne hinli, 'ink'ez 'ants'i ts'iyantsuk t'ehontizeh hukwa' hunzun.

22 'Et Paul dune dilhts'i-un shusyaz k'ut, 'et la 'ilhozdilne buniz usyin 'ink'ez 'ubulhni, "Athens whut'enne nohnus'en ts'iyawh 'ahoolhyiz nohyak'usda ts'un tenadahdi.

23 'Et 'az nunadusda whe nohloodel lhe'ultsuk nus'en. 'Ilho loodel k'ut ook'une'úsguz ndutni, 'Yak'usda t'enuszun-un, 'en ba 'unt'oh.' 'En t'enzuzhun whe oots'un tenadahdi, 'en 'andit ooghun nohbulh yátisduk.

24 Nduun Yak'usda t'énuzuhzun-un, 'en 'unt'oh, ndi yun k'ut 'ink'ez ndai la ook'ut uyint'oh-i ts'iyawh uyínla. Ndo yak'uz 'ink'ez ndi yun k'ut ts'iyawh whumoodih unli, 'et huwa lugliz whucho dune 'uhoonla-un 'et lhídoh whe' hoont'oh.

25 'Et 'ink'ez dune buyiz huye khúna-i 'ink'ez ts'iyaitsuk cha soo dich'oh za huwá yunle whe 'unt'oh. 'Et huwa 'aw dune 'uyinla-i yukalhe'nizun.

26 'Ilhoghun dune 'en la toh ts'e za yun k'ut didowhne ts'iyanne 'ulya inle'. Yak'usda nkede ndi yun dune 'utilelh 'ink'ez nts'e huhutit'elh-un, 'et whutso t'ewhunínzun. 'Et whe la ndi yun k'ut ndulcho whe huwhut'i suli'.

27 'Et whuz un'a 'uja didut hika itó'en 'inka 'et dune hoos'enne k'un'a la 'oh hikudúlmi de nahuyólhel telah. 'Et hoontsi' Yak'usda 'aw nilhdza' neghulhe'ít'oh whe 'unt'oh.

28 'Et la 'ilhoghun dune yughun ndúdija inle',  
 "En gha dune ts'inli 'ink'ez ts'ukhuna.'  
 'Ink'ez la whulohne nohtoh 'uk'une'úguzne 'uhutni,  
 'Wheni cha buzkeh 'uts'int'oh.'

29 'Wheni Yak'usda buzkeh ts'inli de, 'aw 'uk'elsti k'un'a gold k'us silver k'us tse be 'úya-i, 'i Yak'usda uznózen ait'oh. 'I ts'iyawh dune yuhoolh'ai-i 'unt'oh.

30 'Et 'oh da' dune ndet la t'ehonúszun huwa Yak'usda dzoh nulhúbilhdzulh, 'et hoontsi' 'awet 'andit Yak'usda ts'iyanne dune ndulcho dudeni nahon-dunooleh ubulhni.

31 'Et la 'ilhudzin 'utahahón'ai ndet la ndi yun k'ut ndulcho whe ye ts'ih'un un'a 'unt'oh-i, 'i be dune ba nahutiye h. Ndun 'ilhoghun dune 'en dune ba nahutiye h 'utahayálhti. 'En dunaidilhti 'et huwa 'alha' 'et ndó tanelh."

32 'Et la Paul hidánts'o ndun dune dunadija yughu yalhdruk whe whulohne cha highudloh, 'ink'ez whulohne 'uhutni, "Doo cha za njan huwun nebulh yaóolhdruk hukwa' uzninzun," huyúlhni.

33 'Ink'ez Paul 'awet 'ilhozdilne butahanája.

34 Whulohne dune hits'ú nedindil. Butoh 'ilhoghun, 'en la Dionysius huyúlhni, 'en la nahiyilh-un 'ilhoghun 'unt'oh. 'Ilhoghun ts'eke cha, Damaris huyúlhni, 'ink'ez 'uyoonne cha, 'enne buba 'alha' hoont'oh suli'.

## 18

### *Paul Corinth whut'enne khuni unzoo-i be bubulh yálhdruk*

1 'Et hukw'elh'az Paul Athens huwu natisja 'ink'ez keyoh Corinth huwhútmi ts'e oozya.

2 'Et la Lizwif 'ilhoghun Aquila huyúlhni-un yughu ninya. 'En la yun k'ut Pontius huwhútmi-un 'et whuzdli inle', 'andit za yun k'ut Italy huwhútmi ts'e whuz de du'at Priscilla bulh whusahán'az. 'Et lerwe Claudius huyúlhni-un Lizwifne ts'iyawh keyoh Rome whuch'a nahoodilh ubúlhni 'et huwa whusahán'az, 'ink'ez Paul butsi'ú whenya.

3 'Et la buzih usda 'ink'ez bubulh 'út'en. Didut dahút'en la whuz un'a nimbali 'ulh'en 'et whe whuch'a na'duldeh.

4 Nats'ulyis dzin totsuk Lizwif bulugliz 'et Paul bubulh yaoolhdruk hukwa' utni. Lizwifne 'ink'ez Greekne tubulh whúbunoolhtun hukwa' utni.

5 'Et la Silas Timothy bulh Macedonia ts'e hanáhit'az. 'Et Paul Ndoni yula 'ut'en whe ndunne Lizwifne soo cho whúbunulhtun Sizi, 'en Christ, 'en 'unt'oh.

6 Ndet la buba 'alha' lhe'dusnih 'ink'ez hoontsi' te ne'hiduni' de, 'et la bulez ch'a dunaih nayughat 'ink'ez ubulhni, "Ninta nahkat de, nohnich'oh whuzahni whe' tihnelh. Si sk'ého'ah aít'oh. 'Andit whuts'un 'udun yun k'ut whut'enne, 'enne la butsi'ú tóosya!'"

7 'Et 'inka bughu whenája 'ink'ez la 'udun yun k'ut whut'en-un, Justus huyúlhni-un, 'en 'ahoolhyiz Yak'usda ts'un teni nilhdzun, 'en la yuzih whutit'elh ha yuts'óosya. Ooyoh 'et la Lizwif bulugliz whuzih whuz'ai.

<sup>8</sup> 'Et Crispus, Lizwif bulugliz whumoodih, 'en la, ts'iyawh duyoh dilhts'ine te, neMoodihti buba 'alha' yint'oh 'ink'ez lhane Corinth whut'enne, 'enne cha khuni unzoo-i hudánts'o whe buba 'alha' hoont'oh suli, 'ink'ez too be' hulya.

<sup>9</sup> 'Et la 'ilhe 'ulhdzis Paul bengahun néwhults'ut whe la neMoodihti 'uyúlhni, "Whénijut iloh, yailhduk za' dini, 'aw 'etsul 'udóni' junih,

<sup>10</sup> 'ahoolhyiz nyulh 'ust'oh 'et huwa. 'Aw dune nyun dólhdahne hooloh, lhane njan keyoh sulh 'únt'ohne hoonli whe' hoont'oh."

<sup>11</sup> 'Inka Paul 'ilho naóodizut 'on 'at lhúhoolcho 'et butoh inda'. 'Et Yak'usda oogghuni ghun whubodulh'eh za inle'.

<sup>12</sup> 'Et yun k'ut Greece huwhútni, 'et la Galio Roman moodih huyulhtsi. 'Ink'ez Lizwifne 'alghoh lhtahundil 'ink'ez Paul huyilchhoot whe nahiyilh-un but néhinilhti.

<sup>13</sup> 'Ink'ez 'uhutni, "Ndun dune ndai la be néba nahisda-i, 'i dulhyoh dune hodulh'eh. 'Ats'un un'a Yak'usda ba hoot'en hukwa' bulh'en," huyúlhni.

<sup>14</sup> 'Et Paul soo yatilhduk whe la Galio Lizwifne ubúlhni, "Alha njan tank'us 'úhoont'oh de, k'us 'on nus hooncha whe ninta' whúnt'en whe' dahni de, 'et de da', Lizwifne, 'alha' hoont'oh whe nohoózósts'ai' oole'.

<sup>15</sup> 'Et ndi 'i ooghu lhdulhyoh 'uzdooni'-i unli khuni 'ink'ez oozi cha 'ink'ez be néba nahisda-i nohnich'oh lhanádahleh. 'Aw si huwun nahátisyeh-un hukwa lhe'núszun."

<sup>16</sup> 'Et 'ink'ez nahídilh-un bayoh 'et tenábuninyoot.

<sup>17</sup> 'Et la Lizwif bulugliz bumoodih, Sosthenes huyúlhni-un Greekne 'en huyúzgooh 'ink'ez nahiyilh-un but 'et la yahuyalht'o, 'et hoonts'i 'aw Galio ooba dalhúhoot'oh.

### *Paul Antioch ts'e naóosja*

<sup>18</sup> 'Et Paul ooba 'alha' hoont'ohne Corinth 'et sa' butoh nada'. Hukw'elh'az Syria ts'e nahutikelh, Priscilla, Aquila, 'enne cha, hiyulh na'uja. 'Et natikelh whuts'o Cenchrea 'et la Yak'usda ts'un nahizya inle'. 'Et whuz un'a hitsigha' ts'iyawh hahinant'az.

<sup>19</sup> 'Et Ephesus ts'e nahooski 'et la Priscilla Aquila bulh bughu whénya whe Lizwif bulugliz 'et la daninya 'ink'ez Lizwifne bubulh yaoolhduk hukwa' utni.

<sup>20</sup> 'Et la 'on nus sa'yaz duzih ooda' huyúlhni 'et hoonts'i 'aw buk'oh ts'e lhe'ínel.

<sup>21</sup> "Njan Jerusalem dzenis whuti 'et huwa 'a whuts'u lhunatisdaldh hukwa' nuszun. Yak'usda 'uninzun de, 'et de la nohts'u nátoosja'," ubulhni. 'Et 'awet Ephesus whuch'a naski.

<sup>22</sup> 'Et Caesarea ts'e naoski whe 'ink'ez la Jerusalem ts'e whénya 'ink'ez whuz oozya whe Sizi Gri gha 'ilhozdilne, "Hadih," ubúlhni, 'ink'ez 'et Antioch ts'e whénya.

<sup>23</sup> Sa'yaz 'et inda' 'ink'ez whenája. Galatia 'ink'ez Phrygia whu yun k'ut 'oh whuya la lhusúya whe Sizi Gri yugha hodul'ehne ts'iyawh budzi do ná'yinla.

### *Apollos 'en Ephesus 'ink'ez Corinth cha 'et Yak'usda oogghuni be yalhduk*

<sup>24</sup> 'Ihoghun dune, Lizwif, 'en la Apolos huyúlhni-un, keyoh Alexandria 'et whuzdli inle', Ephesus ts'e oozya. 'En dune soo oogghuni dinzoo whe ubulh yálhduk 'ink'ez Yak'usda oogghuni 'uk'unusguz-i soo cho cha t'einúnzun.

<sup>25</sup> Nts'en'a la neMoodihti be 'ut'en k'oh huwun hodil'e', 'inka la soo howu daóodit'oh whe Sizi ghun ts'ih'un un'a yalhduk 'ink'ez whubodulh'eh. 'Et

hoontsi'ndet la John dune too be 'ulh'en-un too be' úlya inle' 'et za t'éoonínzun whe' utni.\*

<sup>26</sup>Lizwif bulugliz 'et la soo lhníljut whe yawhénihduk. 'Et la Priscilla Aquila bulh hidánts'o whe, duyoh ts'e náhayoolhti. 'Et soo cho nts'en'a la Yak'usda be 'ut'en k'oh hiba hukw'un nahúhulhye'.

<sup>27</sup>'Et la Apolos 'en la Achaia ts'e tiyalh ninzun, 'inka Ephesus whut'enne Sizi Gri yugha hodul'ehne, 'enne ooba 'alha hoont'ohne Achaia ts'e hiba whuts'ó k'e'anguz whe hila 'ooneh ha. 'Ink'ez 'et, "Whuz oozya de, soo cho ooghohle," hubuhútni. 'Et whuz oozya whe mbene la Yak'usda ye únzoo-gha ooba 'alha' hoont'oh sulí'ne, tube cho bula 'it'en.

<sup>28</sup>'Et Lizwif 'ilhozdilne hidulhyoh utni whe buch'a' nilhde, daja ni whe Yak'usda ooghuni 'uk'unusguz-i gha Sizi 'en ts'ih'un 'alha' hoont'oh whe Christ, 'en 'unt'oh. 'Et whuz un'a buba hukw'u núhilhye'.

## 19

### *Paul Ephesus 'et Yak'usda ooghuni be yalhduk*

<sup>1</sup>'Et Apolos 'en Corinth ts'e 'ut'en whe, Paul 'en yun k'ut la nukéduzut whe Ephesus ts'e oozya. 'Et la whulohne Sizi yugha hodul'ehne bughu ninya,

<sup>2</sup>'ink'ez la ubulhni, "Nohba 'alha' hoont'oh sulí' whe Ndoni nohyudílt's'ut inle' eh?" "Aw Ndoni hoonli tilah, 'aw whulhé'uzdusts'o!" huyúlhni.

<sup>3</sup>'Et 'ink'ez, "Ndai be too be' ts'ul'ih úlhchoot?" ubúlhni.

"Be too be' ts'ul'ih John dune too be 'ulh'en-un yughu yalhduk-i" hutni.

<sup>4</sup>'Et Paul utni, "Be too be' ts'ul'ih John dune too be 'ulh'en-un yughu yailhduk-i, mbene la dulubeshi yuch'az nálh'ane, 'enne buba' yint'oh. 'Ink'ez la Israel oots'u hainzutne cha ubúlhni inle', 'Mbe la sk'elh'az whusatíyalh-un, 'en nohba 'alha' 'oot'e', 'Christ 'en Sizi 'unt'oh."

<sup>5</sup>'Et njan hodánts'o whe, Sizi neMoodihti boozí' be too be' hulya.

<sup>6</sup>Paul buk'udílhni whe 'et Ndoni buyudílt's'ut. 'Ink'ez lhelhts'un un'a khuni be yahalhduk, 'ink'ez Yak'usda gha nus húhon'en.

<sup>7</sup>Whunizyai 'on 'at nane dune at'enne 'uhint'oh.

<sup>8</sup>'Et tat sanun, dzin totsuk Paul Lizwif bulugliz ts'e k'unádaih 'ink'ez lhníljut whe Yak'usda dune k'úne' bul'en-un huwun whubunulhtun 'ink'ez soo cho buba hukw'u nuhúlhye'.

<sup>9</sup>'Et hoontsi' whulohne bubeni dúts'o whe 'aw buba 'alha lhe'hóot'oh 'ink'ez neMoodihti be 'ut'en k'oh 'et 'ilhozdilne toh whuch'az yáhulhduk. 'Et 'inka Paul mbene la Sizi Gri yugha hodul'ehne ubílhchoot 'ink'ez bughu whenája. 'Ink'ez la Tyrannus dune hodul'eh bayoh whulh'ai 'et la dzin totsuk Yak'usda ghun whubunulhtun.

<sup>10</sup>Nat naoodizut 'et la 'et za nduhút'en. 'Et huwa la Asia yun k'ut whudune'ne, ts'iyawh Lizwifne 'ink'ez Greekne cha, Sizi neMoodihti ooghuni bulh 'uhúdants'o.

### *Sceva ooye'ke ntsi'-i nududeh-i hiyáhanahinooyoot hukwa' hut'en*

<sup>11</sup>'Et Paul 'en be Yak'usda lhe'whust'en k'un'a huwa 'ít'en te ne'út'en.

<sup>12</sup>Dzezoh 'i hoontsi' but kats'ulhbal te Paul ye 'ít'e'-i, ndunáne ts'u há yoolhchus te, 'aho ndudáne soo na'hut'ih 'ink'ez ntsi'-i nudúdeh ut'íne bughu whenahonuyukw.

<sup>13</sup>Whulohne Lizwifne la 'ahoolhyiz nukéhududeh, 'ink'ez ntsi'-i nudúdeh ut'íne bughu whenáhonuyukw. 'Ink'ez la neMoodihti boozí' gha cha 'uhoot'en

\* **18:25** Sizi Gri be 'ut'en k'oh 'aw soo cho t'ewhunúszun whe utni.

hukwa' hut'en. 'Et la ntsi'-i nudúdeh 'uhuyúlhni, "Wheni nts'u yútni, Paul yughu yalhduk-un Sizi Gri boozi' gha ooyáhanaindaih!" hutni.

<sup>14</sup> Lhtak'ant'ine hinli ndun Lizwif lubret 'uk'enus dizti'-un, Sceva huyúlhni, 'en ooye'ke 'enne 'uhut'en.

<sup>15</sup> 'Et la nduhútni whe ntsi'-i nududeh-i bubulh yátílhduk 'ink'ez ubulhni, "Sizi 'en t'enuszun, 'ink'ez Paul cha ooghun t'éoonúsuzun, 'et hoonts'i nohni, mbe ahli whe' 'uht'oh?"

<sup>16</sup> Nyoon dune ntsi'-i nudúdeh ooyudinda-un soo hoolhtus whe bubenínya. 'Aw hich'a 'oolhdeh aít'oh. Tebudínla, ka ubulhtsi 'ink'ez buk'e'dutilhch'ul 'inka yoh tenátsehuldil.

<sup>17</sup> Ts'iyawh Lizwifne 'ink'ez Greekne Ephesus dilhts'íne whulh 'úhudants'o whe ts'iyawh whéhunilhjoot 'ink'ez Sizi neMoodihti boozi' 'on nus buba idízti' sulí'.

<sup>18</sup> 'Ink'ez mbene la dune dedúle unlíne, lhane butoh ooba 'alha' hoont'oh sulí'ne. 'Et whusahándil 'ink'ez ts'iyanne nalh khunahahoolnuk.

<sup>19</sup> Lhane mbene la dune dedúle huhóolhdzihne ts'iyawh ndi 'udustl'us higha 'ut'en-i 'ilhunahayozdla. 'Et ndi 'udustl'us oozooneya huyolhto whe \$50,000 at'en sulí'. 'Ink'ez ts'iyanne nalh hidálhk'un.

<sup>20</sup> 'On nus lhane Yak'usda ooghuni hidánts'o whe 'et whuz un'a Yak'usda ooghuni hoolhtus whe lhanne dune lhba hodit'ai whe la Sizi hik'úne' tit'en.

### *Ephesus 'et lhtahuwhunt'ai*

<sup>21</sup> 'Et njan ndulcho ne'whust'en hukw'elh'az, Paul Ndoni nuyúlh'a' whe Macedonia 'ink'ez Greece buyun k'ut 'oh whuya lhutíyalh 'ink'ez Jerusalem ts'e ootáyalh, whuz un'a dudeni lhaidinla. "'Et whuz oozúsyá de, 'et Rome ts'e cha nutísyalh," ni Paul.

<sup>22</sup> 'Et 'inka nane yula'ut'enne, Timothy 'ink'ez Erastus, 'enne dutso whébil'a' Macedonia ts'e 'ink'ez la didut 'awhuz Asia yun k'ut 'et 'atsul inda'.

<sup>23</sup> 'Et 'oh da' at'en Ephesus njan nts'en'a la neMoodihti be 'ut'en k'oh 'et huwun tube lhdulhyoh 'uhudutni sulí'.

<sup>24</sup> Ephesus 'et lugliz whuz'ai. Ndi ts'eke k'eltsi, Artemis huyúlhni, hits'u ténadudlih. 'Ilhoghun dune, Demetrius huyúlhni, silver ulh'uz-un. Ndi ts'eke k'eltsi hits'u ténadudli-un, 'en ndi silver, 'i be yuk'éne'ulhtsi'. 'I la 'ants'i 'oh dunene dizti' whe hiye buts'e' hooket. Whuz un'a la sooneya lhai 'uhulh'en.

<sup>25</sup> 'Et 'inka Demetrius yuba 'ut'enne ts'iyawh, "'Anih," ubudáni'. 'Uyoonne duk'un'a 'ut'enne, 'enne cha 'ink'ez ubúlhni, "Sulh dunene t'éoonáhzun ndi 'ut'en 'i gha hoonzoo' ts'int'oh.

<sup>26</sup> Nohnich'oh whunulh'en 'ink'ez whuduhts'o ndun dune Paul daneh whe 'ut'en, 'Ndi neyak'usda dune 'ayalh'en 'aw yak'usda lhe'ít'oh, neyúlhni. Lhane whe buba 'alha' hoont'oh ubulhtsi, njan Ephesus 'ink'ez Asia yun k'ut ndulcho whe cha at'en buba 'alha' utni.

<sup>27</sup> Neba húwa 'óodli sulí'. Njan sooneya whe ts'ulh'en-un ninta' hot'en la. 'Et za iloh, njan neyak'usda Artemis oolugliz whucho hukwa lhe'hunízun oole' la, 'ink'ez dich'oh ye dízti'-i cha la hoonli lhiloh oole' la. 'En Asia 'ink'ez yun k'ut ndulcho ndun ts'eke neyak'usda hits'un tenadudli."

<sup>28</sup> 'Ink'ez ndunne dune ndi khuni hidánts'o whe tube hahunílh'e whe 'ultus-un uhúldzul 'ink'ez 'uhutni, "Ephesus ts'uwhut'en neyak'usda Artemis 'en za neba dízti' whe 'unt'oh!"

<sup>29</sup> 'Et keyoh ndulcho whe huwa lhtahawhunt'ai. 'Enne 'ilho h nudilhne, 'enne la Macedonia whut'enne, nane Gaius 'ink'ez Aristarchus hubuhútni,

Paul bulh na'ásne, ubuhúzgooh 'ink'ez dune nuwhúlyeh huba whuz'ai-un ts'e ubuhinoh whe whuz ubuhoolhti.

<sup>30</sup> 'Et Paul didutch'oh cha nus 'ilhozdilne bubut netíyalh hukwa' ninzun, 'et hoonts'i Sizi Gri yugha hodul'ehne, "Dah!" huyúlhni.

<sup>31</sup> Whulohne Asia yun moodihne, Ephesus dilhts'ine, 'enne la Paul ooy-adánke hinli, 'enne cha hits'otl'a khuni in'ai highu tedudlih whe dune nuwhúlyeh huba whuz'ai ts'e tóoya' junih.

<sup>32</sup> 'Et za 'ilhozdilne 'awhuz lhtahuwhunt'ai whe whulohne 'ilhoghun za huwa 'uhúldzul 'ink'ez oolohne cha 'udun huwe' hutni. 'Et k'us lhane 'aw t'ehonúszun ndet huwa 'ilhuhozdil.

<sup>33</sup> 'Et 'ilhozdilne butoh, 'ilhoghun dune Alexander huyúlhni-un, 'en la Lizwifne nus bubut néhinilhti buba yaoolhduk wheni. 'Et dula be t'ehudoosnih hubulhni.

<sup>34</sup> 'Et hoonts'i 'ilhozdilne ndun Lizwif 'unt'oh t'ehinanzin whe, nat sadzi hukw'u hoonist'o-un whutoh la 'on nus 'ahúldzul whe' hutni, "Ndun Ephesus 'et neyak'usda Artemis 'en za neba dízti' whe' 'unt'oh!"

<sup>35</sup> 'Et 'ants'iya keyoh huba 'uk'une'úguz-un 'ilhozdilne 'etsul 'uhudija ubulh-tsi 'ink'ez ubulhni, "Ephesus whut'enne soo zúlhts'ai, ts'iyawh ndulcho whe t'ehonúszun nekeyoh Ephesus 'et ndun neyak'usda Artemis oolugliz whucho 'et huwu ts'inli whe' hoont'oh, 'ink'ez ndi tse dízti' ts'eke k'eltsi unli whe ndus de yak'uz ts'e hádilt'sut 'i cha.

<sup>36</sup> 'Aw dune whuts'oododlai'ne hooloh, 'et huwa t'eduzahni 'ink'ez iloh te ne'óoh't'en junih!

<sup>37</sup> Ndunne dune 'aw lugliz whucho huwe' hutizdla iloh, 'ink'ez neyak'usda cha ch'az yalhúhulhduk, 'et hoonts'i njan whusábilhla.

<sup>38</sup> Demetrius 'ink'ez yuba 'ut'enne 'uyoonne hoonli huwun buk'ehúhoota'alh de, dzin dune ba nahudeh-un whuz'ai, 'ink'ez nahíyilhne cha 'et dilhts'i. 'Enne bubut 'uhudooni' da!

<sup>39</sup> 'Et hoonts'i, 'on 'un cha hoonli hukwa' nahzun de, keyoh whut'enne 'ilhodulh te, 'et la ts'ih'un nohba nehóh'alh.

<sup>40</sup> Tube neba huwa 'óodli whe' hoont'oh, 'andit dzin 'uhóoja-un lhtahuwhunt'ai-un. Roman bumoodih wheni la nek'ého'alh. 'Aw 'et ndúhoneh huba lhe'hóot'oh. 'Aw di ha ts'uja 'uzdooni' aít'oh."

<sup>41</sup> 'Et ndúdija hukw'elh'az ts'iyawh yanahódilh ubúlhni, 'et la whenáhidil.

## 20

### *Paul, Macedonia 'ink'ez Greece whulh doo cha za whuz nanátidalh*

<sup>1</sup> 'Et 'awet 'etsul 'uhudija whe, Paul, nyoonne Sizi Gri yugha hodul'ehne, "Anih," hubudáni'. Khuni budzi be óolhtus-i be bubulh yáilhduk 'ink'ez, "Awet natisdalh," ubúlhni. 'Et bughu whenája whe Macedonia ts'e whénya.

<sup>2</sup> 'Et lhat-un keyoh la whutoyalh whe dune 'oh whut'enne budzi oolhtus ha bubulh yálhduk whe la Greece ts'e oozya.

<sup>3</sup> 'Ink'ez ta sanun 'et inda'. 'Et whuts'un la Syria yun k'ut ts'e tikelh huba lhadútneh whe Lizwifne hituzilghelh huwu yahulhduk whulh 'údants'o, 'inka no Macedonia ts'e 'oh whéya lhunátidalh ninzun.

<sup>4</sup> 'Et Sopater huyúlhni, 'en Pyrrhus ooye', Berea whut'en-un, 'en la yulh nátist'az, 'et Thessalonica whut'enne Aristarchus 'ink'ez Secundus bulh cha 'et Derbe whut'en-un Gaius huyúlhni, 'ink'ez Timothy cha 'et Asia whut'enne Tychicus 'ink'ez Trophimus, 'enne cha.

<sup>5</sup> 'Enne ts'iyawh nus netso whehándil 'ink'ez Troas 'et neba halh'e'.



6 'Et la lhes lhuntíldoh-i ut'alh-un, hukwelh'az 'et Philippi 'et nus nats'uski 'ink'ez kwulat dzin inle' 'et Troas 'et bughu nats'undil 'ink'ez 'ilhu lisman 'et uzdált'si'.

*Paul 'awet 'udek'ez Troas whut'enne buts'un nunasja*

7 'Et lisman 'udechoo dzin 'et la Sizi yugha hodul'ehne lhunahosdil lhes tahídanuz nahitit'ulh huba. 'Ink'ez tuzniz whuts'un la Paul dune hubulh yáilhduk 'om bun dzin bughu natidalh 'inka.

8 Dohyo ts'e 'ilhuts'odulh-un lhai be hóot'en-i dizk'un.

9 'Ink'ez 'ilhoghun chilh, Eutyclus huyúlhni-un, 'en la dadint'az k'et 'et la hukw'usda. 'Ink'ez la Paul yalhduk za utni ndun chilh Eutyclus 'en dughu nantutih za 'ut'en. 'Udek'ez 'awet dughu nantisti whe tat lhando whuz'ai ts'e dohyo ndus de whuts'un nadílduz. 'Ink'ez dazsai whe dunahidilhti.

10 'Et Paul nyo whenya 'ink'ez dushih bé' yilchoot, "Ooghu ni uhli íloh 'awhuz khuna," ubúlhni.

11 'Et 'ink'ez ndo dohyo ts'e whenaja. Lhes tadányuz 'ink'ez 'uhan'al. 'Et sa hatí'alh whuts'un bubulh yáilhduk 'ink'ez whenája.

12 'Et la nyoon chilh khuna whe ooyoh ts'e whuz bubulh naóosja 'ink'ez 'et huwa tube huhóont'i'.

*Paul Troas whuts'un Miletus ts'e oozki*

13 'Et la nus butso ts'e ts'i ts'u náts'oosdil 'ink'ez Assos ts'e uztizki. 'Et Paul denáztihlhel wheni, 'et nduts'ooneh neúlhni 'ink'ez didut yun k'ut lhutíyahl ní.

14 'Et keyoh Assos 'et neghu nanja whe denáts'alhti 'ink'ez keyoh Mitylene ts'e ts'oozki.

15 'Et nus nats'uski 'ink'ez 'om bun Chios whanch'az 'et yats'uzki. 'Et 'om bun 'et Samos no nats'uzki 'ink'ez Trogylium nézninki. 'Ink'ez 'om bun 'et 'awet Miletus ts'e ts'oozki.

16 'Et Paul 'en keyoh Ephesus 'oh whuya lhutíkelh hukwa' ninzun tube 'aóodulni 'et huwa. 'Aw Asia yun k'ut ooda' hukwa lhe'nízun. Soo 'a cho Jerusalem ts'e ootáyahl hukwa 'ut'en soo tilah Pentecost dzin, 'et neóoya' hukwa' ninzun.

*Ephesus 'et butso whudilhdzulhne Paul 'awet 'udek'ez whe bubulh yáilhduk, 'ink'ez bughu whenája*

17 'Et la Miletus usda whuts'un Ephesus ts'e Sizi gha 'ilhozdílne butso whúdilhduhne dudodódil ubulhni whe buts'otl'a khuni in'ai.

18 'Et highu nindil whe ubúlhni, "T'éoonáhzun dast'en whe nohtoh susda, 'udechoo dzin Asia yun k'ut nenúsya whuts'un.

19 Soo yo 'úduduzdzun 'ink'ez natsul too' hoonli whe neMoodihti be 'ut'en k'oh 'uhoos'en, dzoh nuszut-un, 'et whutoh sghá whults'ut ndunne Lizwif sotuzilghelh huwa yahulhduk 'et huwa.

20 Nohnich'oh t'éoonáhzun whe nohla'oost'en-un nohch'a hóostun-un hooloh whe nohbulh yásduk, dune bez cha 'ink'ez nohyoh cha whunohodus'eh.

21 Lizwifne 'ink'ez 'udun yun k'ut whut'enne 'alghoh tube cho bugha dísní' Yak'usda ts'un dudení nahondunooleh, 'ink'ez Sizi Gri neMoodihti 'en buba 'alha' yot'e'.

22 'Et 'andit tube cho whuts'u lhé'dusts'il whe Jerusalem ts'e tisyahl. 'Et datísnelh-un 'aw t'éoonuzúszun.

23 'Et za t'éoonúszun, keyoh totsuk Ndoni sgha khuni a'aih, 'Dzoh nutánzut 'ink'ez 'atalts'ulh 'et mba whuz'ai,' súlhni.



<sup>24</sup> 'Et hoontsi 'i et 'ants'i' hoont'oh, 'ink'ez si be khúsna-i cha sba 'ants'i' unli, khun si ndi 'ut'en sghalts'út-i 'ink'ez Sizi Gri neMoodihti 'ut'en k'oh stl'ahón'ai-un cha, hoonúst'i' whe lhaóodoosdleh khuni unzoo-i be Yak'usda ye únzoo-i ghun whúbunoostun ha.

<sup>25</sup> Soo ts'iyawh nohtoh nusúsya Yak'usda dune k'úne' bul'en-un huwun nohbulh yásduk. 'Et 'awet t'éoonúszun 'aw doo cha za nasooht'en aít'oh.

<sup>26-27</sup> 'Aw Yak'usda ghun nohdutásnelh-un nohch'a hóostun iloh whe nohtoh usda'. 'Et huwa 'andit dzin soo cho nohdúzni, 'ilhoghun hoontsi kwuncho yo ts'e whénya de, 'aw si sgha iloh 'utinelh.

<sup>28</sup> Nohni cha soo cho khohdle' 'ink'ez ndai la Yak'usda be 'usbai Ndoni ooghohle' ha nohtl'ábanla njan Yak'usda gha 'ilhozdílné, 'enne 'usbai ghunline bubahli, duzkai' be duch'e' ubulhtsi inle' 'et huwa.

<sup>29</sup> T'éoonúszun whenásja de, dune untsi'ne, yus huske-i k'un'a 'unt'ohne, 'enne nohtoh nehútidulh, 'ink'ez nohóduntálhdah, 'ink'ez 'aw nohgha' hole' aít'oh.

<sup>30</sup> 'Ink'ez 'ilhudzin whusaóotilts'ulh nohtuhaíndilne dune, 'enne la buba hodul'ehne ubahanoo'ah whe la nohch'az nahool'ah 'ink'ez la ts'u nebodyelh.

<sup>31</sup> 'Et 'inka nohdúzni, huwahli 'ink'ez whunaoolhni, lhat snatsúl too' hoonli whe dzin 'ink'ez 'ulhdzis 'i bulh 'ilhone ahli whe tat yus k'ut 'et whunohodis'e'.

<sup>32</sup> 'Ink'ez, sulhutsinke, 'andit 'et Yak'usda 'ink'ez ooghuni k'úne 'ooht'en-un cha ootl'ánóhisda. 'Et whe la nohdzi 'on nus úlhtus nohtilhtselh, 'ink'ez la Yak'usda ba 'udun nelyane butoh, ndet la Yak'usda 'udun nohba neonin'a-un, 'et nohgha whútalts'ulh.

<sup>33</sup> 'Aw 'uyoonne buzooneya, silver k'us gold cha, k'us bunaih te butsu dalheiduzni.

<sup>34</sup> Nohnich'oh t'éoonáhzun ndi sich'oh sla be 'ust'en. 'Ink'ez súlh nudilhne hik'uhuna-i huye ndunidzit-i ts'iyawh buba' yus'en.

<sup>35</sup> 'Ink'ez ts'iyantsuk whunóhniistan whe nduts'út'en 'i be mbene la 'aw 'oot'en aít'ohne, 'enne bula 'ts'oot'en. Sizi neMoodihti daja ni 'et whunats'oolnih, 'et nja dutni, 'Huwa' ts'a'aih te negha 'últs'uk-un whanus hoonzoo whe' hoont'oh.'"

<sup>36</sup> 'Et Paul lhadúja whe, ts'iyawh bubulh dugwutsi be nenínya 'ink'ez tenadidli.

<sup>37</sup> 'Et 'awet ts'iyawh hutso 'ink'ez dushih be' huyoltun whe, "Soo cho khondle'," huyúlhni.

<sup>38</sup> "Aw 'on 'at nasulhtuziht'el," ubulhni whe bubulh yaílhduk 'et huwa tube cho budzi únduda 'ink'ez ts'i ustan whuts'un huyúlh nunasdil 'ink'ez k'enahidil'en.

## 21

### *Paul Jerusalem ts'e nunátidalh*

<sup>1</sup> 'Et 'awet bughu nus nats'uski. 'Et ts'ihyan lhunats'uski 'ink'ez Cos ts'e ts'oozki. 'Et 'om bun Rhodes nezninki, 'ink'ez 'et whuts'un Patara ts'e uztizki.

<sup>2</sup> 'Et la Phoenicia ts'e ts'utizkez-i, 'i be ts'andil 'ink'ez uztizki.

<sup>3</sup> Soo noo k'ut Cyprus ts'onilh'en-un 'oh whuya intl'us ts'e nyoo ooghu lhuts'úzki, 'ink'ez Syria yun k'ut ts'e ts'oozki. 'Et keyoh Tyre 'et ts'i be ha' hutileh whutoh 'et no uzdálts'i'.

<sup>4</sup> 'Et Sizi Gri yugha hodul'ehne buka' ts'oodulhkut whe nabuts'inla 'ink'ez 'ilhu lisman 'et buzih uzdálts'i', Ndoni be Paul Jerusalem ts'e tóoya' junih huyúlhni.

5 'Awet buzih lházduja, bugho whenáts'idil 'ink'ez naztisdil whe ts'iyawh du'atkoo te 'ink'ez duzkeh te nebulh lhunahusdil whe keyoh whuch'a nats'usdil. Taba 'et negwutsi be néznindil 'ink'ez tenazdidli.

6 'Et 'awet ts'iyawh lhk'enalhts'udil'en 'ink'ez ts'i be náts'idil whe didut cha duyoh ts'e whenáhidil.

7 'Et ts'ikelh za' ts'ut'en Tyre nus nats'uski whe Ptolemais ts'e ts'oozki. 'Et 'ilhu dzin za ooba 'alha' hoont'ohne buzih uzdáts'i'.

8 'Et 'om bun dzin uztizdil whe Caesarea ts'e ts'oozdil. Khuni unzoo-i be yálhduk-un, Philip huyúlhni, 'en oots'ú ts'oozdil 'et oozih uzdutáts'ilh. 'En la Jerusalem lhtak'ant'ine 'utahálya inle'ne, 'enne butoh 'ilhoghun 'unt'oh.

9 'Ink'ez Philip 'en la dine oots'e'ke, 'aw dune t'enuszun unline, 'enne la Yak'usda be nus hoo'enne hinli.

10 Lhat dzin 'et uzdáts'i' whe 'ilhoghun Yak'usda be nus hoo'en-un, Agabus huyúlhni, 'en Judea yun k'ut ts'e haínya.

11 Neghu ninya whe Paul se yets'ú dilh'oo, 'i yuts'u hayánla 'ink'ez 'i be duke 'ink'ez dula cha lhuyulht'oo 'ink'ez utni, "Et Ndoni ndutni, 'Jerusalem whut'enne Lizwifne ndi se ooch'e' yinli-un whuz un'a huye hítihghel, 'ink'ez 'udun yun k'ut whut'enne butl'ahítihthelh."

12 'Et whulh 'úzduts'ai whe wheni cha 'ink'ez 'uyoonne cha 'et dilhts'íne Paul ooghu tezdudlih Jerusalem ts'e tooya' whuch'a.

13 'Et 'uneúlhni, "Et di 'uhleh whe' dahni, ahtso 'ink'ez sdzi ts'odi ulh'i? Jerusalem sotilhghel 'et huba lhadúst'oh, 'et hoonts'i 'on 'un Sizi Gri neMoodihti 'en ooba 'et datísah huba lhadúst'oh whe' 'ust'oh."

14 'Et hoonts'i 'aw nek'oh ts'e lhé'inel 'inka, "T'ezdínel, nts'en'a la neMoodihti hukwa' ninzun k'un'a la 'ahóneh," ts'utni.

15 'Et hukw'elh'az 'atsulyaz 'et nazdáts'i' 'ink'ez ndai la be' ts'int'oh-i lhanázdinla 'ink'ez Jerusalem ts'e naztisdil.

16 'Et whulohne Sizi Gri yugha hodul'ehne Caesarea whut'enne, 'enne cha nebulh hütizdil. 'Enne ndun dune oozih uzdutáts'ilh-un hits'u néoozdla, Cyprus whut'en-un, Mnason huyúlhni, 'en la 'uda' whuts'un ooba 'alha' hoont'oh-un 'unt'oh.

### *Paul James ts'un nuséya*

17 Jerusalem ts'e ts'oozdil whe, ooba 'alha' hoont'ohne neunahunilhnih.

18 'Et 'om bun dzin Paul nebúlhtiz'az James uzti'elh wheni, 'ink'ez la ts'iyawh butso whudilhduzhne, 'enne cha 'et hudilhts'i.

19 'Et Paul, "Hadih," ubúlhni. 'Ink'ez ts'iyawh nts'oh la 'udun yun k'ut whut'enne butoh oobe 'ut'en be Yak'usda ne'ust'en-un, 'et huwun ubulh náwhulnuk.

20 'Et hidánts'o whe ts'iyawh Yak'usda ba hodálhti 'ink'ez Paul 'uhuyúlhni, "Neulhutsin whunilh'en la dáhoont'oh tube lhane Lizwifne ooba 'alha' hoont'oh sulí'ne hoonli 'ink'ez ts'iyawh Moses ooghuni 'uk'unusguz-i soo cho hik'úne' 'ut'en.

21 'Enne nyulh 'úhudants'o nts'en'a la Lizwifne 'udun yun k'ut hudilhts'i, 'enne whubodilh'eh. Moses ooghuni 'uk'unusguz-i híladootnih, 'ink'ez duzkeh hika dune unli-i, 'i k'ut hubuhít'us-un, 'ink'ez Lizwif k'un'a dune hinli-un cha 'etsul 'uhooneh whuz un'a hubodilh'eh hutni.

22 Njan whusainya huwun t'ewhuntidzeh whe' hoont'oh 'ink'ez dats'óoneh suba?

23 'Et huwa ne'úzduni' te ne'ónt'en. Dine dune Yak'usda ts'un nahizyanne, 'enne njan nezih hudilhts'i whe' hint'oh.

24 'Enne bubulh 'int'en 'ink'ez but's'ú nedindaih 'ink'ez nts'en'a la duna'huldoh nyun buba 'uk'el'háhoolltsi, 'et la soo dutsi náhunoozo. 'Et ndinja de, 'et whuz un'a nyunch'oh ndi Moses ooghuni 'uk'unusguz-i ook'úne' 'int'en hunoozin la. 'Ink'ez daja nyuhútni-un buba 'alha' lhe'whudoosnih.

25 'Et hoont's'i ndunne 'udun yun k'ut whut'enne ooba 'alha' hoont'oh suli'ne but's'ó k'e'ts'anguz 'ink'ez nts'en'a la 'uzdíja-un, 'et ubuzdáni' ndai la t'alh-i buyak'usda k'eltsi ts'u hítluhdilh ooh'alh junih. Ts'ekoo k'us dune bulh ninta 'ooh't'en junih. Khuna ooze' 'úsguz-i 'ink'ez 'uskai' bulhítsus-i ooh'alh junih, 'ink'ez 'uskai' cha ooh'alh junih," Paul hudáni'.

### *Paul lugliz whucho 'et huyílhchoot*

26 'Et 'inka Paul nyoonne dine dune hubílhchoot 'ink'ez 'om bun dzin 'et nts'en'a la duna'huldoh 'et bubulh duna'ilde. 'Et 'awet bulugliz whucho danánja, 'et whe la 'awet Lizwifne k'un'a buna'ide. 'Ink'ez Lizwif lubretne ubudáni' dáwhuldzoh dzin 'et 'uhutit'elh njan 'et lhahódutileh whuts'un loodel k'ut 'ilhone hinli whe cha buba 'uhudutálhk'un.

27 'Et 'awet lhtak'ant'it dzin 'etsul 'uwhutánelh whe, whulohne Lizwifne, Asia yun k'ut ts'u haíndilne, Paul lugliz whucho 'et huyan'en. Whulohne 'ilhozdilne tubulh lhba hodit'ai whe Paul huyílhchoot.

28 "Israel oots'u hainzutne, nela 'uhneh!" hutni whe huhuyih, "Ndun dune 'en 'unt'oh, whunílhcho nuya 'ink'ez Israel oots'u hainzutne Moses ooghuni 'uk'unusguz-i cha 'ink'ez nelugliz whucho cha ts'iyawh whuch'az yálhduk. 'Ink'ez 'andit 'udun yun k'ut whut'enne cha nelugliz whucho dábuninla 'et whe neba me whulh'tsi!" hutni.

29 ('Et ndun dune Trophimus, Ephesus whut'en-un, Jerusalem 'et la Paul bulh na'as whe hinilh'en inle'. 'Et Paul bulugliz whucho dánilhti huninzun 'inka' hutni.)

30 Jerusalem ndulcho whe dune buba hót'e' hooyal. Ts'iyawh 'alghoh 'ilhuhólhghaz, Paul huyílhchoot, 'ink'ez bulugliz whucho 'et tenáhininguz. 'Et 'aho bulugliz whucho dána'dinkez.

31 Nduonne lhulh nudilhne Paul hizoolhghel hukwa' hut'en whe la lhuganne moodih hudáni'. "Jerusalem whut'enne ts'iyawh lhtahawh'unt'ai!" hubuhútni.

32 'Et 'aho lhuganne moodih 'uyoonne moodih 'ink'ez lhuganne cha hilhchoot 'ink'ez 'ilhozdíline but's'u whe hilghaz. 'Et ndunne dune lhuganne bulh ubotilh'en whe 'et Paul njan hiyedúlh-un 'etsul 'uhuyínla.

33 'Et lhuganne moodih Paul yuts'oozuya, yílhchoot, 'ink'ez nanki lhuztih t'ool be huyoolhghel hubulhni. 'Ink'ez uboodulh'kut, "Ndun dune mbe 'unt'oh, 'ink'ez daja whe ninta 'unt'en?"

34 'Ilhozdíline ts'iyawh lhelhts'un un'a 'uhutni whe huhuyih, 'on nus huyan'un ha'dani' k'et lhuganne moodih dáhooja-un 'aw t'élhonízil. 'Et 'inka dudune'ne Paul lhuganne dilhts'i ts'e hitoolhte' ubúlhni.

35 Soo ook'ut dughaíti ts'e huyoolhti 'et dune budáindil. 'Et 'on nus hiyulh húnilch'e, 'et huwa lhuganne hitilhti.

36 Ts'iyawh huyunilwus 'ink'ez 'uhúldzul whe, "Sulh'ghe!" hutni.

### *Paul duba yanalduk*

37 'Et 'awet Paul lhuganne dilhts'i ts'e hitilhti whe la lhuganne moodih bulh yátihduk, "Nyulh yatisduk hukwa' nuszun."

'Et la lhuganne moodih yúlhni, "Greek k'un'a azih yailhduk!"

38 “Et de Egypt ts'e haínya-un dune 'en iloh lakw 'int'oh? Nyun tilah 'inja, ndunne 4,000ne lhuganne dudulh dune dzoh nuhulhdeh ubuzilhtsi? 'Ink'ez dune lhuhóot'ih ts'e whuz buba whénya, nyun tilah 'int'oh?” yúlhni.

39 ‘Et Paul utni, “Si Lizwif 'ust'oh. Tarsus, Cilicia yun k'ut whuz'ai, 'et keyoh whudízi, 'et whust'en. N dunne dune bubulh yatisduk-un, 'et sgha oonin'aih.”

40 ‘Et lhuganne moodih yugha óonin'ai 'inka Paul dughaíti usyin 'ink'ez dune buba núlhni whe t'ehudínel 'ink'ez Paul Hebrew k'un'a bubulh yáwhenilhduk.

## 22

1 “Sulh dunene, sulhutsinke, 'ink'ez 'ubákene, soo zúlhts'ai, 'andit nohbulh duba yanatizduk!” ubúlhni.

2 ‘Et Hebrew k'un'a bubulh yawhénilhduk hidits'o whe 'on nus t'ehudínel. 'Et Paul 'utni,

3 “Si Lizwif 'ust'oh. Tarsus, Cilicia yun k'ut whuz'ai 'et whuzúsdli. Jerusalem nísyai, Gamaliel 'en whusodalh'e' whe netsoda'ne hik'úne' 'ut'en-i soo cho yusodalh'e'. Nohni 'andit Yak'usda ba daht'oh la, whuz un'a nohunduzt'oh inle'.

4 Mbene la Sizi unidúlhne ts'iyawh dahútsah whuts'un bubezúsdla inle'. Dune cha ts'ekoo cha ts'iyawh abusdle inle'.

5 Lubret 'uk'enus dizti'-un 'ink'ez ts'iyawh dune tso whudilhdzuhlne, 'enne ts'iyawh ts'ih'un 'udusni, 'enne cha la nohodóni', ndai la Lizwif didowhne Damascus dilhts'ine buts'ó k'ehuyanguz-i si stl'ahúyanla 'i gha dune buts'ú tisyá ubitáschulh 'ink'ez lhuztih t'ool be ubutisghel 'ink'ez Jerusalem ts'e dzoh nubotilhdzut wheni whuz whebusdlih inle'.

### *Paul Sizi ts'u nálh'a-un huwu yalhduk*

6 “‘Et 'oh whuya usyalh whe' hooja, 'awet Damascus whenghun dzetniz at'en khunsul ndus de kwun ulhtus-i hadanat, 'ink'ez snat núdiznat.

7 'Ink'ez yun nadízdúz 'ink'ez 'et la whudusts'o 'ink'ez nduwhutni-un whudusts'o, 'Saul di ha dzoh sezínla whe 'int'en?’

8 ‘SMoodihti mbe inli?’ dusni whe ooduskut. ‘Sizi Nazareth whut'en-un usdli, si 'usilh'en sezínla,' sulhni.

9 'Ink'ez ndunne dune sulh nudilhne ndi kwun hiyan'en 'ink'ez whe hunuljut 'et hoonts'i ndun sulh yatilhduk-un 'aw lhuhidits'il.

10 ‘Et udusni, ‘SMoodihti datíselh?’ 'Ink'ez neMoodihti usúlhni, ‘Dunadindaih, 'ink'ez Damascus ts'e inyalh 'ink'ez 'et la ts'iyawh nyodóni' ndet Yak'usda ba datánt'elh-un.’

11 ‘Et usja ndi kwun tube snat diznukw k'et whuzis'en susdli,' inka ndunne sulh nudilhne sla hilhchoot 'ink'ez Damascus ts'e suhoolhya.

12 ‘Et 'ilhoghun dune Ananias huyúlhni-un, 'en Moses ooghuni 'uk'unusguz-i yuk'úne' 'ut'en 'ink'ez Lizwif Damascus whut'enne ts'iyawh hidilhti'.

13 'Ink'ez 'et sghu ninya whe szih usyin 'ink'ez usúlhni, ‘Saul sulhutsin hoon'en naoodle!' 'Et ndudija ibulh 'aho yutás'en 'ink'ez tís'en.

14 'Ink'ez ndutni, 'Netsoda'ne buYak'usda 'en 'utahányalhti Yak'usda be 'ut'en k'oh t'éoononzeh 'ink'ez Sizi Gri 'en ts'ih'un un'a yuba 'ut'en-un cha on'en 'ink'ez dich'oh cha nyulh yaóolhduk ha.

15 ‘Et la nyun ts'ih'un ndun Sizi ghun ubudutánelh ndet la hon'en 'ink'ez whudánts'o-un huwun.

16 'Ink'ez 'andit 'et 'on 'un huba silh'i íloh. Dudinyaih 'ink'ez too be' ilneh 'ink'ez 'en yé ulhtus-i gha nlubeshi nyunaodeh!' "

*Paul, Yak'usda 'udun yun k'ut ts'e tilh'a'*

17 'Et Paul 'on 'un ubúlhni, "'Et Jerusalem ts'e whenásja 'ink'ez nohlugliz whucho tenadusdli whutoh 'et njan senghun néwhults'ut,

18 whe neMoodihti 'en nus'en 'ink'ez 'usúlhni, 'Soo 'a njan Jerusalem whuch'a nasindaih. Si sghun yailhdúk-un 'aw nyuhoozólhts'ai' ait'oh 'et huwa.'

19 'Ink'ez udusni, 'NeMoodihti, soo cho t'ehonínzun lugliz totsuk 'ubus'en mbe la nyun ooba 'alha' 'int'ohne ts'iyawh ubuschuk 'ink'ez dzoh nubusdzut inle'.

20 'Ink'ez Stephen nyun nghun dune bubulh yálhduk 'et hukwa hizilghih whe 'oh da' si cha 'et susyin inle', sba ts'ih'un 'uhut'en. Mbene la yuzilghine buluglok nahuyits'uz-i buba ooghusdli.'

21 'Et hoonts'i neMoodihti súlhni, 'Inyalh, nilhdza' 'udun yun k'ut whut'enne butúz nyutis'alh!' "

22 'Et dune 'ilhozdíne Paul huyoozílhts'ai 'et hoonts'i 'et ndúdiya whe soo duyiz t'ahúzulh whe 'uhutni, "Nalhtel, sulhge, 'aw hoona' huba lhe'ít'oh!"

23 Soo 'uhultús-un whe dunaih k'uhídutulch'oolh 'ink'ez huske k'et lhez cha do hütutsuk.

24 'Et la Roman lhuganne moodih Paul lhuganne dilhts'i ts'e nahitoolhte' 'ink'ez huyoolhtsas whe huyoodolhkut ndet huwa ndunne Lizwifne huyúlh 'aldzul ubúlhni.

25 'Et hoonts'i 'awet huyootalhtsus wheni huyulhghel whe nyoon Paul huwunli-un, 'et usyin 'en ulhni, "'Et nghá whunt'ai whe 'int'en, Roman yun k'ut whut'en-un 'aw ninta' 'unt'en hukwa ooba nalhuhídel 'et hoonts'i ootalhtsus hukwa' ninzun?"

26 'Et la ndun huwunlí-un whudánts'o whe lhuganne moodih yughu ninya 'ink'ez yoodulhkut, "Daint'en whe 'int'en? N dun dune Rome yun k'ut whut'en-un 'únt'oh!" yúlhni.

27 'Inka dich'oh lhuganne moodih Paul yughu ninya 'ink'ez yoodalhkut, "Rome yun k'ut whut'en inli eh?"

"A," ni Paul.

28 'Et lhuganne moodih utni, "Si lhai whe sooneya hukw'elha susi whe Rome whut'en-un susdli' whe 'ust'oh."

'Ink'ez Paul utni, "Si 'et whuzúsdi 'et huwa whuch'e' usdli."

29 'Et ndunne dune mbene la Paul oodutalhkutne 'aho hich'a nasdil 'ink'ez ndun lhuganne moodih t'éoonanzin Paul Rome yun k'ut whut'en-un 'únt'oh 'ink'ez lhe'yínla yulhghel cha 'uyinla 'et huwa whénilhjoot.

*Paul nahíyilhne bubut usyin*

30 N dun lhuganne moodih soo nahootá'alh hukwa' ninzun ndet huwa Paul huyulh huske, 'inka 'om bun 'et Paul lhuztih tl'ool hits'ahanahayanla 'ink'ez lubret dízti'ne, nahíyilhne cha ts'iyawh 'ilhuhódilh ubúlhni 'et Paul bubut nénilhiti.

## 23

1 Paul soo cho 'ubunilh'en 'ink'ez ubúlhni, "Sulhutsinkene neyo ts'e oogha t'ets'oninzun-i<sup>\*</sup> 'i gha Yak'usda but 'ahoolhyiz wheni be khusna-i ts'ih'un un'a 'ust'oh."

2 Lubret 'uk'enus dízti'-un, Ananias huyúlhni, 'en Paul zih usyinne hize hookuk ubulhni.

3 'Et Paul uyúlhni, "Yak'usda 'en cha la nyunookuk. Sih dutsun-i nadistl'us-i le'int'oh whe nyo 'et sinda 'ink'ez ndai la Yak'usda ye nébalhúhizye'-i, 'i gha sba nahutanyeh 'et hoonts'i soonookuk huwa bilh'a, 'et whuz un'a Yak'usda ooghuni k'uninys whe' dini!"

4 Nyoonne dune Paul zih nudilhyanne 'uhuyúlhni, "Nyoon Yak'usda oolubret 'uk'enus dízti'-un ooba dzoh 'udinja."

5 'Et Paul utni, "Sulhutsinke 'aw t'éoonuzúszun 'en lubret 'uk'enus dízti'-un unli. Yak'usda ooghuni 'uk'unusguz-i k'ut ndutni, 'Nohmoodih 'en dzoh ts'e ooghu yaoolhduk junih."

6 'Et la Paul hubunilh'en 'ilhozdílhne whulohne Sadduceene 'uhint'oh 'ink'ez whulohne cha Phariseene 'uhint'oh whe la tube cho bubulh yátilhduk, "Sulhutsinke si cha Pharisee 'ust'oh! Pharisee ye' usdli, 'ink'ez sba 'alha' hoont'oh yaidlanne dunáhudutádulh 'et huwa njan sba nahutideh-un huba susda!"

7 'Et ndúdija ibulh Phariseene 'ink'ez Sadduceene te lhéwhehundunidulh 'et huwa 'ilhozdílhne nawh hitzkat sulí."

8 'Et la Sadduceene yaidláne dunahudutádulh 'ink'ez lizas cha, nudúdehne cha hoonli 'et 'aw buba 'álha lhe'hóot'oh, 'et hoonts'i Phariseene nahoolt'oh 'et buba 'álha' hoont'oh.

9 'Et 'on nus 'ulcho-i be 'awhehúnizul 'ink'ez Moses ooghuni 'uk'unéyuzguz-i hodulh'ehne, Pharisee didowhne, 'enne dodindil 'ink'ez tube cho whuch'a' hutni, "Ndun dune 'aw hoonts'i-un ooghu nalhts'uhóo'al. Lizas tilah k'us nududeh-i tilah yulh yálhduk whu tilah utni! 'Et huwa Yak'usda bulh dulhyoh uzdooni' ait'oh."

10 Whuz tube lhdulhyoh 'uhutni k'et, Roman lhuganne moodih whénilhjoot Paul yahayidólhch'oolh la ninzun 'inka dulhuganne Paul bugha hanáhuoyoltelh 'ink'ez lhuganne dilhts'i ts'e whuz hitoolhte' ubúlhni.

11 'Et 'ulhdzis za neMoodihti Paul yuzih usyin 'ink'ez uyúlhni, "Ndo 'udunilt'i. Njan Jerusalem nts'en'a la si sghun ts'ih'un ubudáni' 'et Rome cha whuz un'a za 'udutánelh."

*Whulohne Lizwifne Paul hituzilhghelh hukwa' huninzun*

12 'Et 'om bun budada' whulohne Lizwifne 'ilhúhozdil 'ink'ez 'alghoh nahúhizya whe nduhútni, "Lhé'ts'oos'al 'ink'ez too cha lhts'oosnai' Paul ts'utuzilhghelh whuts'un."

13 'Alghoh dit whunizyanne 'on 'un 'uhunilsuk 'enne hukw'u núhuhilhye'.

14 'Et la 'awet Lizwif lubret 'uk'enus dízti'ne 'ink'ez butso whúdilhzulhne cha bugho nindil 'ink'ez ubuhútni, "Ts'iyawh 'alghoh nats'úhizya 'aw hoonli lhts'utis'ulh Paul ts'utuzilhghelh whuts'un."

15 'Et huwa 'andit 'et nohni 'ink'ez nahíyilhne tubulh ndun Roman lhuganne moodih 'en oots'ót'l'a khuni uh'aih 'onilha Paul ndiz náhitoolhte' 'on nus soo cho be 'ut'en k'oh t'ewhutihzeh 'et wheni doohni' la. 'Et la wheni ooba lhazdoot'e' njan nenátidalh whuts'o la ts'uzoolhghelh," hubuhútni.

\* 23:1 Ndi khuni, 'neyo ts'e oogha t'ets'oninzun-i, 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun ts'utni whe' ts'utni.

16 'Et hoonts'i Paul bulhtus ooye' 'en la khunabundunáts'o 'inka lhuganne dilhts'i ts'e oozya 'ink'ez Paul dáni'.

17 'Et la Paul 'ilhoghun neilhchuk-un, "Anih," yudáni' 'ink'ez uyúlhni, "Ndun chilh lhuganne moodih ts'u nílhtelh hoonliyaz yudutánelh."

18 'Et la neilhchuk-un yílhchoot 'ink'ez lhuganne moodih ts'u wheyalhti 'ink'ez uyúlhni, "Paul 'adin'ai-un, 'an'ih sulhni 'ink'ez ndun chilh nts'u tóoste' súlhni, hoonliyaz nyudutánelh 'inka."

19 'Et nyoon lhuganne moodih yula ilhchoot 'ink'ez disoh ts'e neínlihti 'ink'ez yoodulhkut, "Dahoont'oh-un huwun sudutánelh?" yúlhni.

20 'Et uyúlhni, "Nyoonne Lizwif moodihne bunde nyuhóodútáhlkut Paul nahíyilhne ts'un tolhte' nyodutánelh, 'onilha 'on nus soo cho highu t'ewhutzeh, 'et wheni hudutinelh.

21 'Et hoonts'i khun te uboozólhts'ai' junih! Dit whunizyanne 'on 'un Lizwifne, 'enne ti hika óodilhts'i, 'enne ts'iyawh hitizilhghel whuts'un 'aw lhe' hutis'ulh 'ink'ez too lhotisnel hutni whe nahúhizya. 'Andit 'aho 'uhutinelh huba lhahúdint'oh nyun nahútanyeh-un za ubahilh'i," yúlhni.

22 'Et lhuganne moodih utni, "Khun te 'uyoonne dóni' junih, njan sudáni'-un huwun." 'Et 'awet chilh whenáyalh'a'.

*Paul Felix yun moodih ts'u whehúyalhti*

23 'Et ndun lhuganne moodih neilhchukne moodih nane, 'enne buka' dani' 'ink'ez ubúlhni, "200ne lhuganne lhábudahleh keyoh Caesarea ts'e tidulhne, lhtak'ant'i whunizyane yeztli be nudilhne cha, 'ink'ez 200ne sohtuz nudúlene cha, 'ulhdzis de 'ilho hooloh sadzi hukw'éhunint'o de at'en (9:00) 'et whe húdudatulh wheni lhahúdoot'e'.

24 Paul cha yeztli ooba lhadáhleh soo cho ooghohle' whe Felix, yun moodih, 'en ooghu yólhtelh."

25 'Et 'ink'ez lhuganne moodih yuts'o k'eyanguz-i ndutni,

26 "Felix yun moodih dízti'-un si Claudius Lysias nts'ó k'e'usges, hadih.

27 Lizwifne ndun dune huyílhchoot 'ink'ez hituzilhghelh íle'. Rome keyoh whut'en-un unli 'et whulh 'údusts'o 'inka sulh lhuganne úschoot 'ink'ez bugha hunaínuzti. 28 Ndet huwa huyílhchoot 'et nahootás'alh 'inka bunahíyilhne ts'u whésti. 29 'Aw hoonliyaz tank'us 'út'en-un ooghu nálhuwhús'al datítsa k'us huwa 'átílt's'ulh huba. 'Ants'i duk'un'a hiba nahooyeh hukwa' hutni. 'Et huwa hich'az yálhduk. 30 'Ink'ez ndet la Lizwifne ndun dune hituzilhghelh-un huwa yahulhduk sodáni' whe, 'aho nts'u tóostelh nuszun. 'Ink'ez mbene la yuch'az yálhdukne cha, nyun whulh nts'o tooya' ubudúsni. 'Awet za."

31 'Et lhuganne dahóot'en ubúlhni te, 'oh te ne'hust'en, Paul huyílhchoot 'ink'ez 'et 'ulhdzis za keyoh Antipatris huwhútni ts'e huyoolhti.

32 'Et 'om bun lhuganne núdilhne ts'iyawh lhuganne dilhts'i ts'e nahoosdil 'ink'ez yeztli be 'út'enne za 'enne Paul bulh hútoodilh ha.

33 'Et keyoh Caesarea ts'e huyóolhti, 'et yun moodih cha yuts'ó k'eyanguz-i hitl'áhayán'ai, 'ink'ez Paul cha hitl'aháyalhti.

34 'Et la yun moodih nyoo yuts'o k'eyanguz-i yuk'uyailhduk 'ink'ez Paul oodulhkut, "Nts'ez de yun k'ut haínya?" yúlhni. 'Et yun k'ut Cilicia huwhútni ts'e haínya t'éoonanzin whe,

35 'et la utni, "Nyoonne nch'az yálhdukne whusahándil de, 'et la nyoozósts'ai'." 'Et Paul Herod ooyoh whucho ts'e hitoolhte', 'ink'ez highole' 'ubúlhni.

## 24

*Lizwifne Paul ch'az yalhdruk*

1 'Et 'awet kwulat dzin inle' whe la lubret 'uk'enus dízti'-un, Ananias huyúlhni, butso whúdílhduzhne te, 'ink'ez 'ilhoghun dune yalhdruk-un, Tertulus huyúlhni-un, 'enne ts'iyawh Caesarea ts'e hoozdil. 'Enne la yun moodih, Felix huyúlhni-un, hibut 'et Paul ch'az yáhalhdruk.

2 'Et la Paul dáhinilhti 'ink'ez la nyoon Tertulus dune yalhdruk-un, Paul ch'az yáwhenilhdruk whe ndutni,

“Uk'enus dízti'-un hoonih whe neghinli 'et huwa sa' whe neyun k'ut whudizghelh 'et ndúhont'e' 'ink'ez lhat-un cha neyun k'ut whe' ts'oot'e'-un neba na'hóonla.

3 'Et huwa 'ahoolhyiz ts'uhóont'i' neyilh'i tube k'eke-un nts'uyútni.

4 'Aw sda sa' nyostun aít'oh 'et hoonts'i' hoondokw-unyaz yatzilhdruk-un neozúlhnts'ai nts'u tédusdlih.

5 T'éts'onínzun ndun dune tube wheóonujut whe ntsi'-un dune unli. Yun k'ut ndulcho whe 'en gha Lizwifne cha lhtáhuwhút'aih 'ink'ez Nazarenne butso nuyá-un 'ududil'i.

6 'Ink'ez Lizwif bulugliz whucho 'et cha me neba whulhtsi 'inka ts'ílhchoot whenich'oh nek'un'a ooba nats'otiyeh hukwa' uzninzun.

7 'Et hoonts'i' ndun lhuganne moodih, Lysias huyúlhni, danínya 'ink'ez negha hanáyulti.

8 'Et Lysias 'en ndun Paul ch'az yálhdrukne nyun nts'ó toodilh ubúlhni. 'Et nyunch'oh ndun dune oodilhkut de tube lhat-un whe óoghu yats'ulhdruk-un la t'éwhunonzeh.”

9 'Et Lizwifne cha la Paul ch'az yalhdruk-un ts'iyawh 'alha' hutni, hutni la.

*Felix oobut Paul duba yanaldruk*

10 'Et la yun moodih Paul yatilhdruk-un yutl'ahón'ai whe ndutni,

“T'éoonúszun ndi yun k'ut lhat naoodizut 'et nahíyilh-un inle' 'et huwa hoonúst'i' mbut duba yanazduk.

11 'Et nyunch'oh la nahón'alh 'aw whunizyat 'on 'at nat dzin at'en inle' teni ntisdzilh ha Jerusalem ts'e tisyá.

12 'Aw Lizwif bulugliz whucho 'et dune dulhyo 'úúsni whe Lizwif sulh úhis'en, 'ink'ez bulugliz cha, 'ink'ez bukeyoh 'et dune lhebusdulh whe cha sulh úhis'en.

13 'Aw daja suhútni-un ts'ih'un mba nehúho'alh aít'oh.

14 'Et njan nyudúsni nyoonne Sizi k'un'a 'uninzunne 'et whuz un'a si cha netso whudilhdzuhlne buYak'usda oots'un teni nusdzun, 'et hoonts'i' ndunne Lizwifne whuch'az yáhalhdruk. 'Ink'ez cha Moses ooghuni 'uk'unusguz-i 'ink'ez Yak'usda be nus hoo'enne 'uk'unuhúyuzguz-i cha sba 'alha' 'unt'oh.

15 Nduune yaidláme unzoo k'us ntsi' inle'ne ts'iyawh dunahudutádulh Lizwifne buba 'alha' hoont'oh, whuz un'a si cha Yak'usda sba 'alha' 'unt'oh.

16 'Et huwa si 'ahoolhyiz Yak'usda ts'un 'ink'ez dune cha ts'un neyo ts'e oogha t'ets'oninzun-i\* 'i gha ts'ih'un un'a oost'e' hukwa 'ust'en.

17 'Et lhat nawhudizut Jerusalem whuch'oh 'ist'en inle' whe sulh whut'enne ba ndai sooneya buba lhunayost'ai-i buts'u naítis'ai 'ink'ez Yak'usda ts'un loodel k'ut 'udutásk'un wheni whuz naoozúsja.

\* **24:16** Ndi khuni, 'Neyo ts'e oogha t'ets'oninzun-i,' 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun, ts'utni whe' ts'utni.



18 'Et bulugliz whucho Lizwifne bubuna'udeh k'un'a lhaóodusdla inle'. 'Et whutoh ndust'en whe suhan'en. 'Aw dune 'ilhozdil 'ink'ez 'aw lhts'u dé'hadulh iloh inle'.

19 'Et la whulohne Lizwifne Asia yun k'ut whut'enne cha 'et hudilhts'i 'enne mbut nehóodilh huba' hoont'oh 'ink'ez sch'az yáhooldhuk hoonliyaz whe sdulhyoh 'úhint'oh de.

20 K'us ndunne te nyodóni' ndet whe ninta' nust'én-un sghu náháhoon'ai bunahíylh-un but susyin whe,

21 'et hoonts'i 'ilhoghun za la disni' nahíylh-un but susyin whe, 'Yaidláne dunahudutádulh sba 'alha' hoont'oh,' 'et huwa 'andit dzin 'et sba nahinyeh."

22 'Et Felix ndai la Sizi k'un'a 'unt'oh-i ghun soo t'eóoninzun. 'Et Paul yuba nahooyeh hukwa lhe'nízun 'inka ubúlhni, "K'at le lhuganne moodih Lysias whusaínya de la mba nahoosyeh."

23 'Et la Paul neilhchuk-un yughunli-un 'ulhni, "Ahooldhyiz ooghinli hoonts'i, 'on nusyaz k'úne' oot'en whute ook'ekoone hits'ú k'unaoodulh 'ink'ez ye ndunidzit-i be highole' ha."

### *Paul Felix 'ink'ez Drusila bubut nenínya*

24 'Et la dzoh lhat dzin inle' whe Felix du'at Drusila bulh whúsain'az, 'en cha Lizwif 'unt'oh. 'Et la Paul hikunáwhulh'a', nts'en'a la Christ ooba 'álha' 'unt'oh-un 'et huwun bubulh yálduk, 'et la huyoozilhts'ai.

25 'Et hoonts'i Paul, be ts'ih'un un'a 'uhoont'oh-un, 'ink'ez whenich'oh khuts'udli-un cha, 'ink'ez neba nahutideh dzin whusáwhutilts'ulh de huwun whúbunoolhtun hukwa' utni. 'Et la Felix nílhjoot 'ink'ez utni, "Awet 'andit naindalh, doo cha la nkana'doosni' sghá whults'ut de."

26 'Et yalhduk whutoh la, "Khun tilah Paul sooneya sgha óó'alh, 'et la oolanadoosnih," ninzun. 'Et huwa za lhghunsul yuka'dunih 'ink'ez yulh yálduk.

27 Nat yus k'ut naodizut inle' la, Porcius Festus huyúlhni-un, 'en Felix yun moodih k'enádíja. Felix 'en la Lizwifne dune unzoo donózin ninzun 'et huwa za Paul 'aidilh'ai.

## 25

### *Paul lerwe 'uk'enus dízti'-un but neóoya'-un yuts'u húkwa' utni*

1 'Ink'ez tat dzin inle' Festus yun moodih Judea yun k'ut ts'e oozya. 'Et la keyoh Caesarea whédinya 'ink'ez Jerusalem ts'e oozya.

2 'Et la lubret 'uk'enus dízti'-un 'ink'ez Lizwif bumoodihne Festus ts'u hoozdil whe Paul hich'az yálduk 'ink'ez Festus highu tédudilh,

3 Paul Jerusalem ts'e naitoolh'a' hukwa' hunínzun 'et whe dula 'ooneh huyúlhni, 'onilha highun lhaóodinla 'oh whuya uyalh de 'et hituzilghelh 'et wheni.

4 'Et Festus utni, "Paul Caesarea 'et 'adin'ai-un unli whe 'unt'oh. 'Et sich'oh cha 'aho 'et whuz natísdalh.

5 'Inka nohmoodihne sulh náhutoodilh 'et la hich'az yaóoldhuk Paul ninta' 'unt'en-un hoonli de," ubúlhni.

6 'Et whunizyat dzin at'en 'et butoh nada' 'et 'ink'ez Caesarea ts'e whenya. 'Et 'om bun 'awet dune ba nahidilh-un hukw'étl'adida' 'ink'ez, "Paul daháyolhtelh," ubúlhni.

7 'Et Paul danínya whe Lizwifne Jerusalem ts'e haíndilne higha óozdil 'ink'ez lhat-un hooncha 'et ninta' 'unt'en huyúlhni whe hich'az yálduk 'aw ts'ih'un 'alha' hutni huhooldhtselh aít'oh.

8 'Et hoonts'i Paul duba yanalduk whe 'uyúlhni, "Aw Lizwifne be buba nahisda-i cha, 'ink'ez bulugliz whucho cha, 'ink'ez Romanne bulerwe cha buts'un cha ninta lhe'ust'el."

9 'Et Festus Lizwifne soo cho soo nubana'a 'inka Paul yoodulhkut, "Jerusalem ts'e ndi hiye nch'az yálhduk-i, 'i gha whuz sbut tanyin hukwa' ninzun eh?"

10 Paul utni, "Njan lerwe 'uk'enus dízti'-un dich'oh nahíyilh-un, 'et mbut susyin 'et sba nahoodéh huba' 'ust'oh. Lizwifne buts'un nintalhe'úst'el nyunch'oh soo cho t'eeonínzun.

11 'Et be ba nahisda-i k'unusyuz de k'us hoonliyaz hukw'elha daóosah huba' hoont'oh-un 'usja de, 'aw whuch'a ne'óost'en aít'oh. 'Et 'aw daja soo útni-un 'alha lhe'hóot'oh de 'aw dune butl'asóolhtelhne hooloh. Lerwe 'uk'enus dízti'-un 'en but neóosya' 'et nts'u húkwa' dusni."

12 'Et Festus dugha utníne naboodalkut hukw'elh'az, 'et Paul 'ulhni, "Lerwe 'uk'enus dízti'-un but netányalh-un hukwa' ninzun 'et huwa lerwe 'uk'enus dízti'-un, 'en la but neóonya'!" yúlhni.

### *Festus Lerwe Agrippa 'en Paul ghun yulh yálhduk*

13 'Aw sa' iloh hukw'elh'az Lerwe Agrippa huyúlhni-un 'ink'ez ts'eke yúlh na'as-un, Bernice huyulhni-un cha, Caesarea ts'e hooz'az Festus k'eke hidutatnelh wheni.

14 'Awet lhat dzin hanke' hukw'elh'az Festus Lerwe Agrippa Paul ghun dáhoont'oh ts'iyawh yulh náhoolnuk, "Njan 'awhuz 'ilhoghun 'adin'ai-un 'et usda, 'en la Felix 'ayan'ai íne'le'.

15 'Ink'ez Jerusalem ts'e oozúsyá whe Lizwif lubret 'uk'enus dízti'ne 'ink'ez butso whudilhduzhne cha hich'az yálhduk 'ink'ez datítsah huba ooba nahoozyeh ha sts'u téhududlih.

16 'Et hoonts'i ubudusni, 'Romanne buk'un'a 'et ndúhoont'oh, dune ninta' 'unt'en dáhni-un 'udechoo yuch'az yálhdukne bubut inyin 'ink'ez bubut la la'dootni' huba' hoont'oh 'aw 'et de za ooba nahutideh.' "

17 'Et whusahándil whe 'om bun 'ahoh dune ba nahudeh-un, 'et nátl'adisda' 'ink'ez, 'Nyoon dune daháyolhtelh, 'ubudúsni.

18 'Et yuch'az ditnine dodindil tube la' hidóni' nuszun whe 'aw daja luhidínel.

19 Lizwif dulugliz huwun 'ink'ez 'ilhoghun dune Sizi huyúlhni-un dazsai íne' 'et hoonts'i Paul utni, 'Khuna, 'ni. 'Oh huwun za lhdulhyoh 'uhuditni'.

20 'Aw whe náhos'alh ts'e hooloh njan 'uwhutni-un huwun, 'inka Paul oodaskut, soo tilah Jerusalem ts'e tooya' 'et nahíyilh-un but ootáldzih huba.

21 'Et Paul buts'u húkwa' dani' 'adodoolh'a' 'ink'ez lerwe 'uk'enus dízti'-un, 'en duba nahoozyeh ni, 'inka lerwe 'uk'enus dízti'-un, 'en ts'un tís'alh 'et whuts'un 'adoo'a' dusni," ni Festus.

22 'Et Agrippa Festus ulhni, "Ndun dune sich'oh ootuzasts'ilh hukwa' nuszun," yúlhni.

'Et Festus utni, "Bunde la oozólhts'ai," yúlhni.

23 'Et 'om bun Agrippa Bernice bulh soo buba hodílhti' whe whusahán'az. 'Et lhugan moodihne 'ink'ez keyoh whumoodihne cha dune 'ilhodulh-un 'et bulh dahánindil. 'Et Festus, "Paul daháyolhtelh," ubúlhni, 'inka dáhinilhti.

24 Festus utni, "Lerwe Agrippa 'ink'ez nohni dune njan dilhts'ine ts'iyawh ndun dune nulh'en. Lizwifne njan 'ink'ez Jerusalem cha sulh náwhuhulnuk whe Paul tank'ús ne'ust'en, hutni. Soo tube cho 'uhutni, 'aw khoona' huba lhe'ít'oh.

25 'Et hoonts'i 'aw tank'us ne'ust'en-un hukw'elha daóotsah-un ooghu nal-huw'hús'al 'ink'ez dich'oh lerwe 'uk'enus dízti'-un yuts'u húkwa' dani' 'et huwa 'en oots'ítis'alh.

26 'Et lerwe 'uk'enus dízti'-un oots'o k'etisgus hoonts'i 'aw Paul whe tank'us 'uja-un ts'ih'un ooghun nálhuwhús'al. 'Et huwa njan nohbut nenústi, nyun soo Lerwe Agrippa mbut nenústi, khun si hoonli ooghun náwhuh'ai de, 'et la 'uk'ehóosges.

27 'Aw ndun dune hoonli ooghun nalhts'oo'hóo'al whe whuz whe ts'álh'a' de 'aw ts'ih'un sba lhe'hóot'oh."

## 26

### *Agrippa oobut 'et Paul duba yanalduk*

1 'Et Agrippa Paul ulhni, "Duba yanatalduk 'et ngha óonus'ai." Paul dudilne 'ink'ez duba yanawhénilduk whe ndutni,

2 "Lerwe Agrippa, Lizwifne lhat-un sk'ehúhoonla-un huwun, sich'oh mbut duba yanatizduk 'andit dzin sgha óonin'ai 'et huwa tube sba' hóolya nuszun.

3 'Et njan 'alha' hoon't'oh nyunch'oh soo t'eóoninzun nts'en'a la Lizwif duk'oh ts'e dune hinli 'ink'ez huwulh dulhyoh 'uhudutni 'oh cha 'et huwa soo cho soo zólhts'ai'-un nts'u húkwa' dusni.

4 Usóol da' whuts'un nts'en'a la yinka susda-un Lizwif ts'iyawh t'éhonínzun soo 'udéchoo whuts'un sich'oh skeyoh 'ink'ez Jerusalem cha 'oh za dune usdli 'et t'éhonínzun.

5 'Udechoo whuts'un soo 'uk'enus dulugliz hukw'un né'ut'enne, Phariseene, 'enne bubulh dísdoh 'et t'éhonínzun 'et huwa hukwa' huninzun de 'et da' sla'hudooni' oole'.

6 Ndai la Yak'usda netsodá'ne buts'ú yoozi-i, si cha ooká tse hóosdli 'et huwa 'andit njan ootázdzih ha mbut susyin.

7 Whunizyat 'on 'at nawh didowhne dune,\* 'enne ndi khuni buts'ú yoodszi bughá ítalts'ulh 'et hukwa tse huhooli dzin 'ink'ez 'ulhdzis whulh Yak'usda ts'u téni' 'uhunilhdzun-un whutoh 'ink'ez lerwe dínti'-un, ndet la ndunne Lizwifne, hukwa tse húhooli-un si cha hukwa tse hoosdli, 'et hukwa sk'ehúhoon'ai.

8 'Et ndet huwa nohba 'alha' hot'e' aít'oh njan Yak'usda yaidláne dunabudile-un huwun?

9 Ndun Sizi Nazareth whut'en-un ts'iyantsuk whe ooch'az dosni nuszun ínle'.

10 Jerusalem 'et ndust'en inle', lubret 'uk'enus dízti'ne stl'aháhon'ai whe lhane Yak'usda ooch'e'ne abisdla 'ink'ez yahitádlá wheni buba nahisda whe, si cha buch'az dasni'.

11 Si 'udusni huwa lugliz totsuk dune dzoh nubuhulhdeh Sizi Gri hich'az naóol'ah hukwa' bus'en. Whuz tube bubulh húnuzch'e k'et nilhdza' keyoh hoonts'i bubúnunúsya dzoh nubutisdzut ha."

### *Paul Sizi ts'un dudzi náhunduniz'ai-un hukw'u náwhutlilnuk*

12 "Njan 'et wheni lubret 'uk'enus dízti'ne stl'ahóhon'ai 'inka Damascus ts'e tísyá.

13 'Ink'ez lerwe dínti'-un, dzetniz at'en 'et ti ts'idulh whe kwun dult'oh-i sa anus 'ultus-i, 'i dune sulh 'udulhne bulh nenat núdiznat.

\* 26:7 Ndunne whunizyat 'on 'at nawh didowhne, 'enne Jacob buzkehne 'uhant'e'. Lizwifne, 'enne ndunne buts'u hahánde whe' hint'oh.

14 'Et ts'iyawh yun nats'ánkat whe Hebrew k'un'a sulh yáztihduk whe nduwhútni, 'Saul, di ha 'int'en, dzoh nusílhdzut? Mbe la tutsus nulé-un ook'únulhe'zint'en de nyunch'oh za dzoh nuná'dudutaldzut,' súlhni.

15 'Et ooduskut, 'Moodihti mbe inli?' dúsni. 'Si Sizi 'ust'oh. Si 'usil'h'en sezínla.

16 'Et hoonts'i dudinyaih 'ink'ez sinyin, njan nyunalhts'et hasya sba 'int'en nyutiselh ha. 'Andit dzin san'en 'ink'ez 'udun cha nus de whúnyuntistun, 'et cha huwun 'uyoonne ubudóni'.

17 Lizwif 'ink'ez 'udun yun k'ut whut'enne, 'enne buts'un 'únyutis'alh. Dzoh nunyotilhdzut 'et hoonts'i nla'tist'elh.

18 Whúbuntalhtun nts'en'a la tsálhghus yáhahudutidulh 'ink'ez hoot'en-un nehútidulh 'ink'ez 'ants'i hitán'en le'huja de Satan uboontúnne Yak'usda ts'un 'unáhutiyalh. 'Enne si buba 'alha' 'ust'oh huwa bulubeshi bubunaitidoh 'ink'ez Yak'usda ba 'udun nebuninlane butoh 'et bugha óotalts'ulh,' súlhni.

*Paul dude 'ut'en k'oh huwu yalhduk*

19 "'Et huwa, Lerwe Agrippa, njan ndus de kwun diznukw-un 'ink'ez whudasts'o-un 'aw whudulhyoh lhe'úsnel.

20 'Udechoo Damascus 'et 'ink'ez Jerusalem cha 'et hukw'elh'az Lizwifne buyun k'ut ndulcho whe, 'udun yun k'ut whut'enne butoh cha, dudeni nahondunooleh huba' hoont'oh 'ink'ez Yak'usda ts'u náhoolyeh 'ink'ez dudzi náhondunizdla ts'e whuz un'a za ne'hóot'en, ubudúsni.

21 'Et njan huwa lugliz whucho 'ust'en whe Lizwifne suhílhchoot 'ink'ez sozoolhghelh hukwa' hít'en.

22 'Et 'oh da' 'andit dzin whuts'un Yak'usda sla'ít'en. 'Ink'ez 'andit njan nohbut susyin ts'iyanne dósni' ha, tel'enne cha 'ink'ez dízti'ne cha. 'Ink'ez daja dusni-un Yak'usda be nus hóo'enne 'ink'ez Moses cha daóotanelh hutni-un, 'et za 'uwhudúzni.

23 Christ 'en dzoh nutizut 'udéchoo dune utinilh, datítsah, 'ink'ez 'ilhiz dunadutádalh whuz un'a ooneh huba' hoont'oh. 'Et whe la Lizwif 'ink'ez 'udun yun k'ut whut'enne hudutijih. 'Ants'i be hoot'en-un le'hooja, 'i be ndi tsálhghus hiyáhanadutidulh."

24 'Et Paul whuz un'a la' dutni whe, 'et Festus yúlh dilhtulh, "Paul nyeni hooel! 'on nus hodil'eh k'et, nyeni hooloh sulí!'"

25 'Et Paul utni, "Festus dízti'-un 'aw seni hooloh iloh, ndi khuni be yásduk-i, 'i khuni 'alha' 'unt'oh-i 'unt'oh 'ink'ez ts'ih'un un'a 'udusni.

26 Lerwe Agrippa soo ts'et whucho nyudúsni, nyunch'oh cha soo t'éooninzun hoonliyaz nts'oh te ne'whust'en soo ts'iyawh nyunalh 'úhoot'en, 'aw whunist'i whe 'et ndulhúhoot'el.

27 Lerwe Agrippa, Yak'usda be nus hóo'enne khuni 'uk'unuhúyuzguz-i mba 'álha' utni eh? T'éoonúszun mba 'álha' whutni."

28 'Et Agrippa Paul ulhni, "Andit 'atsulyaz 'et 'ankw'us Sizi Gri uniyálh-un susílhsti."

29 'Et Paul utni, "Dawhulduk k'us dawhuldzoh nyun cha 'ink'ez mbene la soo zílhts'aine ts'iyawh sundulht'oh uncha nuszun whe nohba tenadusdli. Ndi lhuztih t'l'ool be suzghel-i, 'i za nohba ooka lhe'núszun."

30 'Et 'awet lerwe, 'ink'ez yun k'ut moodih, 'ink'ez Bernice, 'ink'ez 'uyoonne cha ts'iyawh dunahudidil,

31 'et whenáhidil hukw'elh'az 'ulhodútni, "Ndun dune 'aw hoonli hukw'elha datítsah k'us 'aduti'alh-un lhe'ínel."

32 'Ink'ez Agrippa Festus ulhni, "Ndun dune lerwe 'uk'enus dízti'-un yubut ooyin-un hukwa lhe'dínel de, 'uda' da' oolanazditni óole'!"

## 27

### *Paul Rome ts'e whehúyalhti*

1 'Et 'awet lhgha 'úhudija whe Italy ts'e luwel be uztóoke' hutni. 'Inka Julius huyúlhni 'en Roman lhuganne moodih unli, nyoonne lhuganne, 'enne lerwe dízti'-un oodune'ne lhuganne ubuhútni, 'en Paul 'ink'ez 'uyoonne 'adinlane cha, Julius 'en hitl'ábanla.

2 Ts'i cho, keyoh Adramyttium ts'e haínkez, 'i Asia ts'e yatoo ba ts'i yanákuk-un whutunútkwus, 'i be ts'ándil 'ink'ez 'awet uztizki. 'Ilhoghun dune Aristarchus huyúlhni-un, 'en keyoh Thessalonica Macedonia yun k'ut whuz'ai ts'e whuz de haínya, 'en cha nebulh 'úja.

3 'Om bun 'et 'awet keyoh Sidon ts'e ts'ozki. Julius 'en Paul ts'un unzoo duk'ekene naboot'en ha 'et yugha óonin'ai, ndai la ye ndunindzit-i higha óoleh 'et wheni.

4 'Et whuch'a ts'uzki whe nedudzits'i 'et whuch'a noo Cyprus 'i oo'ih lhuts'úzki.

5 Yatoo Cilicia 'ink'ez Pamphylia huyúlhni 'ohwhi hukw'u ts'oozki 'ink'ez keyoh Myra, 'et Lycia yun k'ut whuz'ai, 'et yats'úzki.

6 'Et nyoon lhuganne moodih ts'i cho keyoh Alexandria ts'e haínkez-i, Italy ts'e tíkwus, 'i ye néanla.

7 Lhat dzin 'et nánilhntsa za ts'ikelh tube huwa whulna' whe ts'ikelh. 'Et 'udek'ez keyoh Cnidus 'et whuzih lhuts'úzki. Nedudzits'i huwun 'aw 'á uztooke' aít'oh. 'Et huwa nus si noo cho Crete huyúlhni 'i oots'un 'úts'uja, Salmone huwhútni, 'oh whuya lhuts'úzki, 'ink'ez noo oo'ih za ts'ut'en whe,

8 no whuzih za ts'ikelh, tube huwa whulna' whe Tl'oh Dizghel huwhútni-un, 'et keyoh Lasea huwhútni-un, 'et huwu nilhdza' iloh, 'et yats'úzki.

9 'Et sa' whe 'et 'uzdálts'i'. 'Et 'awet Lizwifne soo húhooni-un dzin 'et cha 'uda' whengho dizut, tube huwa 'óodli-un whudizulh nuts'úke huba.\* 'Inka Paul bugha dání' whe njan ndúbuhni,

10 "Dunene 'awet njan whuts'un tube huwa 'oodli tileh. Ts'i cha 'ink'ez be yuzdla-i cha ninta' tit'elh, 'ink'ez whulohne cha yaitádlah whe' hoont'oh."

11 'Et hoonts'i nyoon lhuganne moodih Paul yuba 'alha lhe'dusnih. Ts'i niz ts'e usda-un, 'ink'ez ts'i ooch'e yinlí-un, 'enne za hiba 'álha' utni.

12 Nyo hudilhts'í-un khít hudutálts'ilh huba nek'e' hoot'oh. 'Inka nyoonne dune k'us lhane, 'enne nus hutikelh hukwa' huninzun, soo' hutinelh de keyoh Phoenix ts'e hutikelh hutni. 'Et noo cho k'ut tl'oh whucho whuz'ai, yándzuz nilhnts'i 'ink'ez nus nilhnts'i cha ch'a whu'ih whuz'ai, 'et khít hutileh hukwa' huninzun.

### *Yatoo k'ut whudutilhnt'sut*

13 'Et nánilhntsulyz yandzuz tizts'i 'ink'ez nyoonne dune soo' hutinelh huninzun 'inka ts'i bulh too us'ai-i too hanahayan'ai 'ink'ez nus huzki 'ink'ez noo cho Crete 'i soo oozih k'ut za hutizki.

14 'Et 'aw lhotuszit whuza nilhnts'i ulhtus, ndaz danus huyúlhni-i, noo soo oots'u haínts'i whe tizts'i.

15 Ts'i udilhnt'suk whe 'aw nilhnts'i dulhyoh uztooke' aít'oh sulí'. 'Inka hukwa' ts'ut'en-un 'etsul 'uts'uja 'ink'ez whute nilhnts'i be uzdufílhduz.

\* 27:9 'Et soo dak'et 'uhoont'oh.

16 'Uyoo nooyaz Clauda huyúlhni-i, 'i oo'ih ts'ánki, 'et 'ankw'usyaz neba' hónt'e'. 'Et soo 'uznut'en whe ts'iyaz dézdilt'i-i duts'o ts'úlhsti,

17 'ink'ez dets'ántan. 'Et ts'i cho t'l'oolh be oonane'ts'uzguz. Luwel nanáhayana, Lybia 'oh ho taba desk'ut 'ink'ez teh whudutle 'i hik'étaaluh 'et whe hunuljut 'et huwa. 'Ink'ez 'ants'i nilhts'i be uzdildus.

18 Whéwhunujut whe nilhts'i za' whut'en 'inka 'om bun ts'i be usdla-i ooloh táwhehinilhdil.

19 'Et doo cha whulh tat dzin nyoo ts'i bet be ne'whut'en-i cha whenich'oh tats'álhdil.

20 Lhat dzin inle' 'et sa cha 'ink'ez sum cha 'aw lhts'ís'en 'ink'ez whuz tube nilhts'i za' whut'en. 'Edek'ez 'awet uzdutijih-un whulanízdunande.

21 'Et sa' whe dune 'aw lhe'hus'al whe Paul butoh usyin 'ink'ez ubúlhni, "Dunene soo sólhts'ai' huba' hoont'oh, noo cho Crete 'aw whuch'a ts'ooke' huba lhe'hóot'oh. 'Et 'uts'úja de, 'et de da' 'aw hoonli nech'a ninta lhe'oost'el 'ink'ez nintalhe'ts'ílele oole' da'.

22 'Et hoonts'i 'andit nohghu tédusdlih, nohdzi ulhtus cho ulh'i! 'Aw nohtoh 'ilhoghun hoonts'i dálhtisa, ts'i za ninta' tit'elh.

23 Yak'usda ooch'e' usdli-un, 'ink'ez ooba ne'ust'en-un, 'en 'ulhdzis da' oolizas 'en szih be hóodiltsai

24 'ink'ez utni, 'Paul whéniljut iloh! Lerwe dízti'-un oobut tanyin whe' hoont'oh, 'ink'ez Yak'usda nyudánts'o whe ye únzoo-i, 'i gha la nyulh dédilhts'ine yalhotásdla.'

25 'Et huwa dunene nohdzi ulhtus cho oole!' 'Et sba 'álha' hoont'oh nts'en'a la Yak'usda 'usúlhni, whuz un'a la 'uhót'e'.

26 'Et hoonts'i 'ilho nooyaz k'ut 'et yázdutaldus."

27 'Awet nat lisan inle' 'et Adria yatoo k'ut 'awhuz uzdildus. 'Et tuzniz at'en nyoonne ts'i bet 'ut'enne yun enghoh 'uts'ut'en huninzun.

28 Tl'oolh ndaz-i huyé dinguz 'ink'ez tahúyan'ai. 'Et nahuhoon'ai tube takhulh 120 feet 'et ta'dikhulh. 'Et hukw'elh'az 'et doo cha za whunduna'hoolhdzai, 'et 90 feet ta'dikhulh.

29 Tse k'ehítal'ulh-un whéznuljut 'inka dunghi ts'i bulh too usdla-i, 'i ts'i niz ts'e taháyanla 'ink'ez soo 'a úncha yulhkai húninzun.

30 Ts'i bet 'ut'enne neghu déhahunool'ilh hukwa' hót'en. Ts'iyaz tahítitelh 'ink'ez ts'i bulh too usdla-i nus tahítilelh nahahoolh'i.

31 'Et Paul nyoonne lhuganne 'ink'ez bumoodih cha ubúlhni, "Ndunde dune 'ut'enne 'aw ts'i be lhódilts'ih de, 'aw doohjih aít'oh."

32 'Inka nyoonne lhuganne tl'oolh k'uhinint'az 'ink'ez ts'iyaz hiladitni.

33 'Awet yutílhkalh whe Paul ubúlhni, "Uhoo'alh, 'awet nat lisan hubalh'e' 'et ndúhoolyiz whe 'aw hoonli lhuzah'al.

34 Nohghu tédusdlih 'ah'alh! 'Et whut'az dutihjih whe' hoont'oh. Nohtsigha' 'ilho hoonts'i nintalhdutáskwus."

35 'Et ndudáni' hukw'elh'az, Paul lhes yílhchoot ts'iyawh bubut Yak'usda ts'un, "Musi," dani, taídanyuz 'ink'ez whe nin'al.

36 'Et budzi ulhtus násdli' 'ink'ez 'ilhoghun hinli whe 'úhan'al.

37 'Alhgho 276ne ts'inli whe ts'i bez dilhts'i.

38 Ts'iyanne soo 'ultsuk nahít'al hukw'elh'az, ts'i ndza oole' ha, lhes haníyeh-i desdzaí-i tahúyalhdil.

### *Desk'éhinki whe tatsi be ts'i yaijut*

39 'Et 'awet yulhkai whe ts'i bet 'út'enne no yun nalhúhuhóoltsulh. Tl'oh taba hoonli-un, 'et hotil'h'en, soo' hutinelh de whute ts'i yahítajooch huninzun.

40 'Et 'inka ts'i bulh too yuzdla-i k'unuhúyuzt'az 'ink'ez nyo 'awet hiladitni. Tl'oolh ts'i be nuhunukes-i be dint'i 'i cha k'unuhúyuzt'az 'ink'ez nus luwel 'i whe náhidintsi nilhts'i be no yádoldis ha. 'Et 'awet no hudutilhduz.

41 Nyo lhedli dúwhult'oh sai dutlé-i haín'a 'i ts'i yuk'énzez 'ink'ez nus ts'i bintsit duts'o súli 'aw nuhóotnah aít'oh. 'Ink'ez niz ts'e 'et 'awet tatsi be yawhínan'il.

42 'Et la lhuganne nyoonne 'adinlane hubotighan ha lhahódinla, doo ka la yaháhl'il 'ink'ez ninta nahoolghas.

43 'Et hoonts'i lhuganne moodih Paul yutilhyih hukwa' ninzun 'inka, "Dah," bubúlhni. "Mbene la dune núl'ilh t'éwhunínzunne, ts'iyawh 'enne cho tahóollhat 'ink'ez no hútool'ilh," bubúlhni.

44 'Et 'onghunne, 'enne dzihtel k'us ts'i oots'u há nidistuk-i 'ohwhi hit'az yahúhl'il. 'Et whuz un'a ts'iyawh dálhts'inel whe yats'úzdil.

## 28

### *Paul Malta whut'enne bula 'tit'elh*

1 Soo yats'úzdil ndi noo 'i Malta huyúlhni 'et t'ets'onanzin.

2 'Et whut'enne tube nets'un hínzoo. Náwhewhunilhtan 'ink'ez whuzk'uz. Kwun neba húdulhk'an 'ink'ez soo cho nene'hulh'en.

3 Paul tsuz naidalhdzoo-i nus tsídule whe tl'ughus 'oolhch'oolh-i kwun be nílgaz whe Paul yula súlhch'ulh.

4 'Et whut'enne nyoo tl'ughus Paul yula yé dint'i hinilh'en 'et 'ulhodútni, "Ndun dune ughan-un la 'unt'oh. Wheni neyak'usda, 'en boozí, 'i 'ahoolhyiz 'uk'elháhoohl'i-un ts'útni, 'en hutinalh-un yughá ho'alh aít'oh, yatoo k'ut dujih hóonts'i."

5 'Et hoonts'i Paul 'aw dálhinel whe kwun k'ut dula yuzghat 'et tl'ughus 'oots'ahayáncat.

6 Hibasulh'i 'ólk'et tilah k'us khunsul tilah nadílduz 'ink'ez daóotsah. Sa' hiba ilh'e' hukw'elh'az 'aw hoonli lhe'inel 'inka 'uts'un un'a na'hunudzun 'ink'ez ndun duyak'usda bulh 'ilhoghun la 'unt'oh huninzun.

7 'Aw bughu nilhdza' iloh 'et tl'o k'ut whuzdla, noo k'ut whudayi, Publius huyúlhni, 'en ooch'e' hoonli. Soo oo'ih te ooghu dáznnidil 'ink'ez tat dzin oozih uzdáts'i'.

8 Publius oobá lili k'ut sulhti dada be cha 'ink'ez dubut k'e dzoh nuzut. Paul sulhtí-un, 'et yughu danínya 'ink'ez tenadidli, yuk'událni, 'ink'ez soo ná'yinla.

9 'Et ndúhooja hukw'élh'az noo k'ut whut'enne ndudáne ts'iyawh whusahándil 'ink'ez 'enne cha soo ná'huja.

10 Hoonliyaz lhai nets'ótilhdil 'ink'ez uztizki whe ndai la ooka' ts'untizilh-i cha netl'anáhayilya.

### *Malta whuts'un Rome ts'e hutizki*

11 Ta sanun inle' hukw'elh'az, keyoh Alexandria ts'e haínkez-i, 'i Lhulhutsin Lht'udánke' huyúlhni, 'i ts'i khít noo k'ut intan, 'i be uztízki.

12 Keyoh Syracuse huwhútni 'et uzninki 'ink'ez tat dzin 'et uzdáts'i'.

13 'Et whezdinki 'et doo cha keyoh Rhegium huwhútni-un whuz ts'oozki. 'Et 'om bun 'et n'az ha tists'i 'et nat dzin inle' 'et keyoh whuyaz Puteoli huwhútni 'et yats'úzki.

14 Whulohne ooba 'álha' hoont'ohne nabuts'ínla whe 'ilhoh lisman 'et duzih uzdáts'i' nehútni. 'Et 'awet no 'uts'uja whe Rome ts'e ts'oozdil.

15 Ndunne neulhutsinkene Rome 'et nebulh 'úhudants'o whe, 'e'óoket-un, Appius huwhútni-un, 'ink'ez ts'uztez bayoh cha tat-un 'ut'alh-un huwhútni-un, 'et lhe'hooldzoh ts'e whuz nedodizdíl. 'Et Paul ubutilh'en whe, Yak'usda, "Musi," yudáni' 'ink'ez 'awet oodzi doná'uja.

*Paul Rome 'et Sizi Gri ghun dune bubulh yálhduk*

16 'Et Rome ts'e ts'oozdil whe Paul whute lhugan-un 'ilhoghun za yughunli whe dich'oh whút'i-un higha óonin'ai.

17 'Et hukw'elh'az tat dzin inle' whe Paul 'et whut'enne Lizwif dune unchane bubulh yátihduk ha usda ts'e duts'ó toodilh ubúlhni. Whusahándil whe 'et ubúlhni, "Dunene 'ink'ez sulh Lizwifne 'aw hoonli sulh didowhne buch'a nulhé'ust'el 'ink'ez netsodá'ne buk'oh ts'e né'whut'en-un 'oh cha whuch'a nulhé'ust'el. 'Et hoonts'i Jerusalem 'et 'asodilh'ai 'ink'ez Rome whut'enne, 'enne butl'ásahalhti.

18 'Et 'enne suhoodalhkut 'ink'ez hoonli whe nínata' nust'en-un hukw'elha datísah sghun nálhuhuhóo'alh 'et huwa sla nahudutitnih hukwa' huninzun.

19 'Et hoonts'i Lizwifne whanch'az nehúnindil 'ink'ez sulh dunene 'aw whe tank'us un'a bughu yaosduk ait'oh 'et hoonts'i 'oosneh huba' hoont'oh 'et huwa lerwe dízti'-un oobut netísyalh 'ink'ez oots'u tédutisdlilh.

20 Mbe la Israel oots'u hainzutne hika tse hóoli-un, 'en sba 'álha 'unt'oh huwa ndi lhuztih t'ool be suzghel. 'Et huwa nohtis'elh 'ink'ez nohbulh yátisduk-un hukwá' dísní'."

21 'Et nja duhúyulhni, "Aw nyun nghun yun k'ut Judea whuts'un 'udust'l'us nets'ó t'l'alhúhUSDloh, 'aw neulhutsinkene cha whuz de haíndilne cha nyun hoonts'i' k'un'a nghu yalhuhulhduk.

22 'Et hoonts'i daja dutanelh-un nts'u yootuzalhts'ilh hukwa' ts'uninzun. T'ets'onínzun dune'ne buts'ú dintnine ndulcho whe yunka buch'az yáhalhduk 'et huwa."

23 'Et Paul ts'un lhahódinla ndet dzin hits'u tídulh-un. 'Et 'on nus 'ultsukne, 'enne 'et dzin hits'u whúsaidil. 'Et bundada' hulhgha whuts'un Yak'usda dune k'úne' bul'en-un huwun hubodulh'eh. Yak'usda be nus hóo'enne 'uk'unuhúyuzguz 'ink'ez Moses 'uk'unúyuzguz-i cha 'i gha Sizi buba 'alha' 'oot'e' hoole' ubúlhni.

24 Whulohne buba 'alha dija 'et hoonts'i 'onghunne, 'enne 'aw buba 'alha lhe'dusnih.

25 'Et Lizwifne lhdulhyo 'uhudutni. 'Et 'az náhidulh whe Paul njan dúbulhni, "Dalcho-i be Ndoni 'en Yak'usda be nus hóo'en-un Isaiiah huyúlhni-un, yudáni' ndi khuni nohtsodá'ne butl'aídoo'alh ha.

26 'Et utni,

'Inyalh 'ink'ez ndunne dune ndubudini,

soo cho 'oozúlhts'ai 'et hoonts'i 'aw t'eeonoozhaz ait'oh;

soo cho whunulh'en 'et hoonts'i lhozíh'en.

27 Ndunne dune bubeni dúts'o,

dudzeh cha whudá'hudinla,

'ink'ez hunílhts'ul cha 'uhint'oh.

'Et njan 'aw ndulhúhit'oh de soo da' huhoo'en,

'ink'ez 'uhudóts'o, 'ink'ez bubeni cha da' t'eeonoozhez óole'.

'Et de da' sts'un náhalhya 'ink'ez da' soo ná'boosdeh, ni Yak'usda. "

28 'Ink'ez Paul 'udek'ez ubúlhni, "Njan t'eeonohzin huba' hoont'oh, Yak'usda ooghuni be uzdujih-i 'udun yun k'ut whut'enne, 'enne buts'o t'l'aidan'ai. Huyoozólhts'ai' la!"



<sup>29</sup> 'Et Paul 'et ndudáni' hukw'elh'az tube cho lhdulhyo 'uhudutni whe Lizwifne whenáhidil.

<sup>30</sup> Nat yus k'ut 'et Paul nyo hukw'elha hoolh'i-un 'et hoot'e'. Mbene la yughundilhne du'ih te bubutulh'ih.

<sup>31</sup> Soots'et whucho Yak'usda dune k'úne' bul'en-un, 'ink'ez Sizi Gri neMood-ihti 'en ghun cha dune hodulh'eh. 'Aw dune whuch'a lhinúsyoot whe ndutni.

## Paul Rome Whut'enne Buts'ó K'eyanguz-i

*Paul be 'udustl'us Rome ts'e ooba 'álha' hoont'ohne buts'ó k'eyanguz-i*

<sup>1</sup> Si Paul Sizi Gri be 'ulhna-un, 'en ba za whel'a'-un 'úst'oh. Ndi khuni unzoo-i dune dósni' huba, Yak'usda 'udun nésunilhti whe 'ust'oh.

<sup>2</sup> Tube 'uda' whe ndi Yak'usda be 'udustl'us lubeshi ooghu hooloh-i, 'i Yak'usda be nus hóo'enne, 'enne bugha nets'ú yoozi, 'ink'ez ndi Yak'usda ooghuni 'i neba 'uk'ehíynguz.

<sup>3</sup> Njan Yak'usda nets'ú hoozi-un duYe' ghun, 'en Sizi Gri neMoodihti 'unt'oh. 'En lerwe David ye kédinzut. 'Et huwa dune 'únt'oh t'éts'onínzun.

<sup>4</sup> Yak'usda cha unli. Yak'usda ye ulhtus-i gha dazsai 'ink'ez dunadija. 'Et whe Ndoni whunénilhtan 'en Yak'usda ooYe' 'únt'oh.

<sup>5</sup> 'En ye únzoo-i, 'i gha whel'a'-un usdli 'ink'ez ooba 'ust'en. 'Et huwa khuni unzoo-i ndi yun k'ut ts'iyanne dune budutásnelh highuni hiyólhchoot ha, 'ink'ez boozí' gha ook'une' ts'oot'en,

<sup>6</sup> 'enne butoh nohni cha Sizi Gri oodune' sahli'.

<sup>7</sup> 'Et huwa Rome whut'enne ndi 'udustl'us nohts'ó tl'atis'alh. Yak'usda nohk'entsi' 'ink'ez Yak'usda ooch'e'ne\* nohúlhtsi. NeBá Yak'usda 'ink'ez Sizi Gri neMoodihti ts'un nohba tenadusdli, nohdzi dóghel 'ink'ez Yak'usda ye únzoo-i nohbulh 'óot'e' ha.

*Paul mbene la ooba 'alha' hoont'ohne Rome ts'e buts'un nutiyalh hukwa' nínzun*

<sup>8</sup> 'Udechoo nohdutásnelh-un njan 'et 'uhoont'oh, ndi yun k'ut dunene ts'iyawh nohbulh 'uhudits'o Sizi Gri ts'un be 'alha' hoont'oh-i ghun. 'Et huwa nohni nohghun Sizi Gri gha sYak'usda nohba musi dusni.

<sup>9</sup> Syughi ndulcho-i be Yak'usda ba ne'ust'en, 'uyoonne ndi khuni unzoo-i budúsni ooYe' ghun. 'Ink'ez oonalh nohdúsni, nohba tenadusdli-un 'aw 'etsul lhe'duzisni.

<sup>10</sup> 'Ink'ez 'ahoolhyiz Yak'usda ooduskut, 'et nduwhúanelh hukwa' nínzun de, 'et de la nohts'u tóosya'.

<sup>11</sup> Tube nohtis'elh hukwa' nuszun Sizi Gri be 'ut'en bunóh huntistun ha. 'I gha la ulhtusne oohle' 'ink'ez 'aw ooch'az naóolhyeh aít'oh.

<sup>12</sup> 'Aw nohni za iloh, nohba 'alha' hoont'oh-i 'ink'ez si cha be 'alha' hoont'oh-i, 'i be la 'alghoh nusúznoot'i.

<sup>13</sup> Sulhutsinke 'et t'ewhunoozhzeh hukwa' nuszun, lhat nohts'u tísyalh wheni lhadúst'ih 'et hoonts'i 'aw 'oosneh aít'oh. Nts'en'a la 'uyoonne 'udun yun k'ut whutenne dahája la, 'et la ndóhneh, si sgha la ts'iyawh Sizi Gri ts'un naóolhyeh ha.

<sup>14</sup> Njan 'et ndósneh huba' hoont'oh, khuni unzoo-i, 'i Greek k'uyalhdukne 'ink'ez 'uts'iz de haíndene cha, mbene la whuníhne cha k'us lhuhóonihne cha, 'enne hubodoos'eh ha.

<sup>15</sup> 'Et huwa nohni Rome whut'enne nohts'u tísyalh wheni lhadúst'oh, 'et de la khuni unzoo-i bunóhnoostun.

*Khuni unzoo-i Sizi Gri ooghun 'i Yak'usda ye ulhtus-i 'unt'oh, 'i be dune hudutijis*

\* 1:7 Mbene la Sizi Gri hik'úne'ut'enne, 'enne Yak'usda ooch'e'ne hinli.

16 'I khuni unzoo-i Christ ooghun 'aw hukwaya lhusdloh whe be yásduk. Yak'usda ye ulhtus-i 'unt'oh 'ink'ez 'i gha Lizwifne k'us 'udun yun k'ut whut'enne buba 'alha' hoont'oh de, 'et de hudutjih.

17 Ndi khuni unzoo-i yunénilhtan nts'en'a la neba 'alha' hoont'oh de za, ninta' uts'ut'ih-un Yak'usda ts'iyawh neba gak whutilhtselh 'et huwa ts'ih'un dune ts'uzdli'. 'Et Yak'usda be 'udustl'us 'uk'unusguz ndutni, "Mbene la Yak'usda ooba 'alha' 'unt'ohne 'et whe ts'ih'un na'ujane, 'enne 'ilhiz hukhuti-nalh."

*'Udun yun k'ut whut'enne ninta' hunt'en whe' hint'oh*

18 Ndi Yak'usda ye hunilch'oh-i yunénilhtan mbene la Yak'usda dulhyoh 'ink'ez tank'us ít'elhne, 'enne ndi khuni 'alha' 'unt'oh-i t'ehinínzun tank'us 'uhut'en whe yo hinilht'i. 'Et huwa buba nahutiye.

19 Ndai la Yak'usda be 'ut'en Yak'usda whunénilhtan, 'et huwa ts'iyanne t'ehinínzun.

20 'Aw Yak'usda yi'enne hooloh 'et hoonts'i dant'oh la t'ehonínzun. Ndi yun uyínla 'andit whuts'un ndet la Yak'usda dát'en huwhunalh'en. 'Et huwa Yak'usda 'únt'oh 'ink'ez ye ulhtus-i 'aw oola tunalhuhó'o'oh ts'iyanne t'ehonínzun. Njan t'ehonínzun-un 'et huwa Yak'usda but huzyin de, 'aw t'éwhunuzúszun hudooni' aít'oh.

21 Yak'usda t'ehinínzun 'et hoonts'i 'aw lheidílti' 'ink'ez 'aw musi luhidúsni. 'Et huwa 'ants'i iloh te nuni hunuzut 'ink'ez tank'us 'uhuninzun, 'et huwa 'aw ts'ih'un un'a k'us tank'us 'úhoont'oh-un t'ehonúszun.

22 Whunihne dune na'hundunúdzun 'et hoonts'i 'aw t'ehonínzun-un hooloh.

23 Yak'usda dízti' 'ink'ez 'ahoolhyiz khuna hits'u ténadoodli huba' hoont'oh k'us 'et 'uk'eltsi 'uhuyulh'en-i dune, dut'ai, khuna-i, 'ink'ez tl'ughu te, 'ohwhi yaidláh-i 'unt'oh, 'i 'ohwhi ook'eyiltsi-i, 'i hits'un ténahududli.

24 'Et huwa Yak'usda bula ditni hukwa' huninzun k'un'a la yinka hudólt's'i'. 'Ut'en dutsun-i 'uhulh'en. Lhtoh duyust'e hukwayá hoonli hiye ne'ut'en.

25 Yak'usda ye ts'ih'un 'utni-i buba 'ants'i 'úhoont'oh 'ink'ez whuts'it-i buba 'alha' yint'oh. Yak'usda ts'u ténahududli hutni whe, k'us ndai la 'uyalh'en-i, 'i ts'u ténahududli. 'Et hoonts'i Yak'usda 'en za dóti' huba' hoont'oh.

26 Yak'usda buba 'ants'i yúzdli' 'et huwa Yak'usda bula ditni hukwa' huninzun k'un'a la yinka hudólt's'i' ha. Lhat-un whudutsun-un 'uwuhulh'en. Dune ts'ekoo bulh Yak'usda wheni 'ubinla-un, 'et whulahudutni 'ink'ez whulohne ts'ekoo dudulh ts'ekoo 'enne 'uhulh'en.

27 Whulohne dune cha whuz un'a za' hut'en. Dune ts'ekoo bulh Yak'usda wheni 'ubinla-un, 'et whulahudutni. Hudízk'un k'un'a dudulh dune buka' huninzun 'ink'ez hukwaya hoonli te bubulh ne'hut'en. 'Et ndahút'en-un 'et huwa buyust'e dada za dubih, 'et bugha whúlt's'uk.

28 'Ink'ez 'aw hoont'um-unyaz whe Yak'usda ghubun nuní hunoozut hukwa lhe'hunízun. 'Et huwa Yak'usda bula ditni. Bubeni ntsi' súli'. Nts'oh la né'hut'en-un, 'aw 'et ndoohóot'en huba lhe'hít'oh.

29 'Ahoohyiz 'aw ts'ih'un un'a nulhe'hust'en. Lubeshi hukwaya hoonli 'i la 'uhuyulh'en, 'uyoonne ch'e' ha' huninzun, 'uyoonne hundílhdaih, 'uhoolnih, dune hughan, lhehúdulh, e'whuhulhts'it, huhuske, dudulh dune ts'iyawh lghu yuhalduk,

30 dudulh dune ch'az yáulhduk, Yak'usda hits'u dutni, dune ba dzoh 'úhutni, 'uhududílti', duba na'hudzoo, 'ahoolhyiz tank'us 'úhoot'en huninzun, 'aw dudosneke buk'únulhe'hust'en,

<sup>31</sup> 'aw Yak'usda be 'ut'en t'ehinúszun, 'aw dughuni lhuhuyóotun, bubulh dune 'ants'i buba hinli, 'aw dune k'eke nahooltselh aít'oh, 'ink'ez 'aw telhe 'hunízun.

<sup>32</sup> 'Enne dune 'et ndut'éenne dahútitsah whe' hoont'oh. Njan t'ehonínzun 'et hoonts'i, whuz un'a za 'uhit'elh. Mbene la buba hóont'i'ne, 'enne cha Yak'usda ts'ih'un un'a buba nahutiye'h.

## 2

### *Yak'usda ts'ih'un un'a dune ba nahiyilh*

<sup>1</sup> 'Et nyun ndi 'udustl'us k'uyailhduk soo cho dints'o? K'us mbe nohtoh dadulh dune ghu yalhduk-un tank'us 'úhut'en huwun, 'et dich'oh cha 'alha tank'us 'ut'en. 'Et dich'oh cha khúyanalduk whe 'utni. Dich'oh cha whuz un'a za ne'ut'en.

<sup>2</sup> Soo cho whunulh'en, t'ets'onínzun, Yak'usda tank'us un'a 'ut'enne ts'ih'un un'a buba nahutiye'h whe' hoont'oh.

<sup>3</sup> Nyun cha tank'us un'a 'int'en de, 'ink'ez nyulh dune ba nahinyeh de, 'et Yak'usda whuz un'a mba nalhotisyeh ninzun eh?

<sup>4</sup> Soo cho whunilh'en, Yak'usda lhe'whuldzoh nts'un únzoo 'ink'ez 'aw nyulhónulhch'e. 'Et 'ants'i eh mba hoont'oh? 'Awhuz eh t'ewhunuzínzun Yak'usda nts'un únzoo-i, 'i be nyeni nahandunon'ah huba' hoont'oh?

<sup>5</sup> 'Et hoonts'i 'aw ndzi nálhodunín'al. 'Et za 'iltsi'. 'Et huwa 'on nus mba hootátsi'. Yak'usda ye hunilch'oh-i, 'i be ts'ih'un un'a dune ba nahuyeh de,

<sup>6</sup> 'et whe 'ilhone ahli whe nohe'ut'en gha Yak'usda nohba 'uk'elha whutilhtselh.

<sup>7</sup> Whulohne 'aw whuts'u lhodítni whe ts'ih'un un'a 'uhut'en. 'Et duhút'en-un huwun Yak'usda budólhti', híncha uboolhtselh, 'ink'ez 'ahoolhyiz dalhótisa 'et hits'u húkwa' ninzun. 'Et ndunt'óhne dune Yak'usda 'ilhiz wheni hukhutinalh-un bugha whúta'alh.

<sup>8</sup> Whulohne dune k'úwhulh'aine didutch'oh za duk'oh ts'e ne'hutit'en hukwa' huninzun. 'Ink'ez khuni 'alha' unt'oh-i, 'i k'unulhé'hust'en, tank'us za 'uhit'elh. Nduhne dune Yak'usda tube huske whe buba nahutiye'h.

<sup>9</sup> 'Aw nawh lhe'hoot'oh whe Lizwif 'ink'ez 'udun yun k'ut whut'enne butoh tank'us za 'ut'enne, 'enne whewhunujut whe dzoh notideh.

<sup>10</sup> 'Et hoonts'i Lizwif 'ink'ez 'udun yun k'ut whut'enne butoh ts'ih'un 'it'elhne, 'enne Yak'usda budutálhti', 'ink'ez híncha butilhtselh, 'et whe 'aw budzi lhúduhtisdoh.

<sup>11</sup> 'Enne hoonts'i 'et ndúbutileh. Yak'usda ndi yun k'ut dune ts'iyenne 'alghoh lhgha nenilh'en.

<sup>12</sup> Mbene la Moses be 'udustl'us t'einúszunne, lubeshi 'uhulh'en de, 'ilhiz wheni dzoh notidoh. Mbene la Moses be 'udustl'us t'einínzunne, lubeshi 'uhulh'en de, 'uk'unusguz-i, 'i gha buba nahutideh.

<sup>13</sup> Mbene la Moses be 'udustl'us 'ants'et yoozílhts'aine, 'aw Yak'usda ba ts'ih'un lhe'hít'oh. 'Et hoonts'i mbene la Moses be 'udustl'us hik'úne' 'ust'enne, 'enne ninta' hant'en-un Yak'usda buba gak whutilhtselh.

<sup>14</sup> 'Udun yun k'ut whut'enne Moses be 'udustl'us 'aw lhuhuyít'el. 'Et hoonts'i yinka hudilhts'i huwa ndi 'udustl'us hik'úne' 'ust'en de, 'ants'i t'ehinínzun buba le'hoont'oh.

<sup>15</sup> 'Enne Moses be 'udustl'us k'un'a hik'úne' 'ust'en de, 'ants'i budzi k'ut 'uk'unáwhusguz buba le'hoont'oh. 'Et whe neyo ts'e oogha t'ets'oninzun-i\*

\* 2:15 Ndi khuni, 'Neyo ts'e oogha t'ets'oninzun-i,' 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun ts'utni whe' ts'utni.

buba 'álha' hoont'oh. 'Et whuz un'a nts'en'a la dahút'en t'ehonínzun, whuloh te tank'us un'a 'uhoont'oh, k'us ts'ih'un un'a 'uhoont'oh, 'et dudzi yo whe t'ehonínzun.

<sup>16</sup> Ndet dzin Yak'usda 'udunoonin'ai-un, nts'oh la whu'iz whe ne'hust'en, 'et Sizi Gri buba nahutiye. 'Et ndi sghuni unzoo-i, dune be hodus'eh-i 'et ndutni.

*Lizwifne Yak'usda ooghuni 'aw hik'únulhe'it'el*

<sup>17</sup> Lizwif inli 'ink'ez ndi kw'uyailhduk de, hoonliyaz nyudutásnelh. Nyun Moses be 'udustl'us oot'anínintan, 'et Yak'usda ts'u ténadusdli dini 'et whe duba na'inzoo'.

<sup>18</sup> Nyun Yak'usda ndet nts'u hukwa' ninzun-un t'ewhunínzun. Moses be 'udustl'us huwun nyunilhtan 'et whe tank'us 'uhoont'oh 'ink'ez ts'ih'un un'a 'uhoont'oh t'ewhunínzun.

<sup>19</sup> 'Et 'on 'un cha nyudutásnelh, 'udun yun k'ut whut'enne hodilh'eh ninzun, 'et huwa dune hoos'enne dult'óhne bula óontun ninzun, 'ink'ez dune tsalhgus yo dilhts'i dult'óhne, 'enne be hóot'en buba usdli ninzun.

<sup>20</sup> 'Ink'ez 'udun yun k'ut whut'enne ts'oodunne whusnínne duhúlt'oh bubunínzun 'et huwa whuz un'a hubodolh'eh ninzun. Moses be 'udustl'us int'i, 'et huwa 'i gha ts'iyawh t'eeonínzin na'dunínzun. Ndaí la tank'us un'a 'ink'ez ts'ih'un un'a 'unt'oh-i t'eeonínzun na'dunínzun.

<sup>21</sup> Ts'iyanne hodilh'eh dini. Di ha nyunch'oh whunálhe'dunuziltun? Lhe'díni, 'uyoonne dune ubudíni, "Udunooh't'ih junih!" Nyun cha tilah 'undunint'ih?

<sup>22</sup> 'Uyoonne cha ndúbudini, "Ts'ekoo k'us dune bulh ninta' ooh't'en junih!" Nyun cha tilah 'et dint'en? "Uk'eltsi ts'u dusni," dini, 'et hoonts'i 'uk'eltsi ts'u ténahududli-un ts'e 'alha eh 'aw bulugliz hoonliyaz lhizílhchoot bé' tant'elh wheni?

<sup>23</sup> Dune dini Moses be 'udustl'us dalzoo' la, 'et hoonts'i ooghuni k'injus de, Yak'usda 'aw lhdílhti' whé' 'int'en. 'Aw eh huwun nuní lhnuzinzut?

<sup>24</sup> Nohni nohundult'ohne, 'enne bughá 'udun yun k'ut whut'enne Yak'usda ghu hudloh. Soo whuz un'a Yak'usda be 'udustl'us 'utni hukw'un'a lhe'whust'en.

<sup>25</sup> 'Et hukwa ooka dune inli-i k'ut nyuhúzt'us de, 'et whe la nyewhéhoodat'en Lizwif 'int'oh. † 'Ink'ez Moses be 'udustl'us ook'úne' zint'en de, nyuhúzt'us-un mba hóonzoo. 'Et hoonts'i Moses be 'udustl'us 'aw ook'únulhe'zint'en de, njan nyuhúzt'us-un 'aw hoonli lhuhóloh.

<sup>26</sup> 'Et 'udun yun k'ut whut'enne ndet la Moses be 'udustl'us buts'u húkwa' ninzun tuné' hut'en de, 'et 'ants'i buhúzt'us le'hoont'oh, 'et ndulhúbuhilel hoonts'i.

<sup>27</sup> 'Et 'udun yun k'ut whut'enne ndet la Yak'usda buts'u húkwa' ninzun tuné' hut'en de, 'et whe la ts'iyanne t'ehontázin nohni Lizwifne, oht'az 'et hoonts'i, lubeshi 'ulh'enne ahli, Moses be 'udustl'us k'unahyuz huwa.

<sup>28</sup> Mbene la Lizwif online 'ink'ez buhúzt'us Moses be 'udustl'us k'un'a de, 'et nduhúja hoonts'i, 'aw ts'ih'un Yak'usda oodune'ne lhuhíloh.

<sup>29</sup> 'Et hoonts'i mbene la ndet Moses be 'udustl'us buts'u húkwa' ninzun 'oh túne' hust'en de, 'enne za soo Yak'usda oodune'ne hinli. 'Enne soo Lizwif 'uhint'oh. Ndoni gha 'ants'i oodzi k'ut huyúzt'us k'un'a be hóodat'en, 'aw Moses be 'udustl'us k'un'a íloh. 'Enne Yak'usda budutálhti', 'aw dune iloh.

† 2:25 Ts'iyanne t'ewhunínzun Lizwifne Yak'usda 'utahábanla dudune' hoole' ha. (4:11 'et cha hukw'e yailhduk).

## 3

1 'Et njan nohoodutaskut, di ha Lizwifne, 'enne 'on nus buba hoonzoo? 'Ink'ez di ha buba húzt'us-un 'et huwun 'udun yun k'ut whut'enne buba ndo 'uhint'oh?

2 Lhat-un whe buba hoonzoo. Yak'usda dughuni butl'a ídan'ai, 'i be ts'iyanne hubohodoolh'eh ha.

3 'Alha' hoont'oh, whulohne Lizwifne Yak'usda ooghuni 'aw hik'únulhe'ust'en. 'Et ndunt'óhne gha Yak'usda 'onghohne Lizwifne bula dutitnih ninzun eh?

4 Nts'en'a? Gak whe' hoont'oh! Dunene ts'iyawh whuhuts'it 'et hoontsi' Yak'usda 'aw lhuwhusts'it whe' 'unt'oh. 'Aw bula dootnih aít'oh! Lerwe David njan Yak'usda ghun 'uk'unáwhuzguz ndutni, "Nghuni gha 'uyoonne dune 'alha' dini t'ehontázin.

'Uyoonne ndulhyoh 'uhutni de,  
buch'a' talhdoh."

ni.

5 Wheni Lizwifne tank'us 'úts'ut'en de, 'et whe 'uyoonne dune 'aw huwa lhúhoolna' whe t'ehonínzun Yak'usda ts'ih'un 'unt'oh. Tank'us 'úts'ut'en huwa Yak'usda neba nahutiyeh de, ts'ih'un lhe'ust'en ninzun eh? ('Ants'i 'oh dune k'un'a 'udusni.)

6 Yak'usda wheni Lizwifne ts'ih'un un'a neba nalhúhuse de, nts'en'a suba ndi yun k'ut dune ts'ih'un un'a buba nahooyeh? 'Aw 'uhót'e' aít'oh whe' hoont'oh!

7 Si whusts'it huwa Yak'usda ooghuni 'alha' 'unt'oh-i, 'i 'on nus dízti' suli' de, 'et huwa 'uyoonne 'aw Yak'usda lhuwhusts'it 'et t'ehontázin. 'Et di ha sudutáhnelh si lubeshi 'ulh'en-un 'ust'oh?

8 'Et hoontsi' whulohne dune, nech'az yáhalhduk whe hutni, "Tank'us 'úhoot'en buts'útni Yak'usda dízti' t'ehonoozeh ha," 'et whe nech'az yáhalhduk. 'Et 'alha' hoont'oh njan hohonts'it-un 'et hukw'elha Yak'usda buba nahutiyeh, bubulh dawhútanelh-un ts'ih'un 'uhoont'oh.

*Ndi yun k'ut dune 'aw ts'ih'un un'a 'unt'ohne hooloh*

9 Wheni Lizwifne 'udun yun k'ut whut'enne buba nus sóo' ts'inzoo ninzun eh? 'Aw whuz un'a lhe'hóot'oh! 'Uda' whúnyunistan nahúlt'oh Lizwif 'ink'ez 'udun yun k'ut whut'enne lubeshi 'ulh'enne 'uhint'oh. 'Et huwa Yak'usda buba nahutiyeh.

10 Njan daja dusni-un Yak'usda be 'udustl'us k'ut cha 'uk'uwhusguz 'et la ndutni,

"'Aw ndi yun k'ut 'ilhoghun

dune ts'ih'un un'a 'unt'óh-un hooloh.

11 'Aw 'ilhoghun dune Yak'usda yuts'u húkwa' ninzun-un hooloh.

'Ink'ez dune huwa dalhódit'oh.

12 Ts'iyanne Yak'usda ch'az náhulhya.

Ts'iyanne hintsi' súli'.

'Aw 'ilhoghun dune unzoo-un hooloh.

13 Bughuni untsi'. Dune zi ulhjut za bunawhultsun le'hint'oh,

ni whe 'utni bughuni untsi' ni-un.

Huwusts'it-un za 'uwuhulh'en.

Khuni hiye yálhduk-i 'ants'i tl'ughus lubezo dult'oh.

Whuz un'a dughuni be dune hundíldaih.

14 'Ahoohyiz buze hoontsi' 'ink'ez buk'ehuhayih.

15 'Ahoohyiz dune hughan, 'et za huba hilh'i.

16 Nts'oh la nuhúdilh te ts'iyaitsuk ninta' hulh'ih, 'ink'ez dune dzoh nuhulhdeh.

17 'Aw ts'ih'un un'a yinka hudilh'ts'í-un 'aw t'ehonúszun.

18 'Aw Yak'usda hiyé lhnijut cha' hint'oh,"  
ni whe 'utni.

19 'Alha t'ets'onínzun mbe la Moses be 'udustl'us hik'úne' 'ut'enne 'udustl'us daja ni la, ts'iyawh hik'úne' oot'en huba' hoont'oh. 'Et whu la gha ts'e ts'iyanne Yak'usda hibut neníndil de, lubeshi 'uhulh'en t'éhonínzun, 'et huwa 'aw hoonliyaz 'uhudooni' aít'oh.

20 Mbene la Moses be 'udustl'us k'úne' 'ut'enne 'aw 'et huwa lubeshi 'uhulh'en-un huba gak hoolhtselh aít'oh. Moses be 'udustl'us 'i gha lubeshi 'uhulh'enne 'uhint'oh t'ehonínzun.

*Sizi Gri neba 'alha' 'unt'oh de, ninta' ts'unt'en-un Yak'usda neba gak whutilhtselh*

21 'Awet 'andit Moses be 'udustl'us ooyit hoont'si, ts'iyanne Yak'usda nalh ts'ih'un 'uhutit'elh 'et whúbunilhtan. Moses be 'udustl'us cha 'ink'ez Yak'usda be nus hóo'enne bube' 'udustl'us cha whuz un'a 'uwhutánelh hutni.

22 'Et diz un'a Yak'usda nalh ts'ih'un 'uhutit'elh, mbene la Sizi Gri ooba 'alha' 'unt'ohne, 'enne za ts'ih'un na'ujane hinli nasdli'. 'Et hukwa' huninzun de, Yak'usda ts'iyanne ts'ih'un un'a na'butileh, Yak'usda ndi yun k'ut dune ts'iyanne 'alghoh lhgha úbunilh'en 'et huwa.

23 'Et wheni ts'iyawh lubeshi 'uts'alh'en. 'Et huwa Yak'usda ye dizti-i dant'oh la, 'et nduts'óot'e' aít'oh.

24 'Et hoont'si Christ, 'en Sizi ts'utni, 'en gha lubeshi ch'a naneonket. 'Et huwa ninta' ts'unt'en-un, Yak'usda ye unzoo-i, 'i be gak neba whulhtsi. 'Ants'i negha óonin'ai le'neinla.

25 Yak'usda duYe' 'en ndi yun k'ut whut'enne yúbunilhtan Yak'usda soo cho butsu naitot'en ha. 'Et Sizi Gri buz kai' gha neba 'alha' hoont'oh 'et whe Yak'usda duk'eke naneulhtsi. 'Et whuz un'a dich'oh ts'ih'un 'unt'oh-un, 'et whunenulhtan. 'Uda' dune lubeshi 'uhulh'en whe Yak'usda 'ants'i ubunínzun, k'at le de za buba nahutiyeh.

26 'Ink'ez 'aw dzoh nulhúbilhdoh, ndi yun k'ut whut'enne duYe' bugha ínlihti 'et whuts'un. 'Et whe dich'oh ts'ih'un 'unt'oh 'et dunábunilhtan. 'Et 'andit Sizi yuba 'alha' 'unt'ohne ts'ih'un un'a Yak'usda 'enne ninta' hunt'en-un 'et buba gak whulhtsi.

27 'Aw eh hoonliyaz 'óont'e' bulh ooghu yats'oolhduk-i hooloh? Soo gak! Ndet dáhoont'oh-un 'et huwa? 'Ut'en gha tilah? 'Awundooh! 'Et Sizi Gri neba 'alha' 'unt'oh-un, 'i be 'uts'óont'e'-un gak nawhusdli'.

28 Njan whuts'odul'eh, mbene la Yak'usda buba 'alha' 'unt'ohne, 'enne ninta' hut'ih-un buba gak whulhtsi. 'Aw 'on 'un Moses be 'udustl'us hik'únulhe'oost'en huba' hoont'oh.

29 Daja nuhzun? Yak'usda Lizwifne za buYak'usda unli, k'us 'udun yun k'ut whut'enne, 'enne cha tilah buYak'usda unli nuhzun eh? 'Alha 'udun yun k'ut whut'enne, 'enne cha buYak'usda unli.

30 Yak'usda 'ilhoghun za unli. 'Et huwa Lizwifne 'ink'ez 'udun yun k'ut whut'enne buba 'alha' hoont'oh de, 'et de ninta' hunt'en-un buba gak whutilhtselh.

31 'Et whu la gha ts'e, wheni Yak'usda ooba 'alha' ts'int'oh ts'ih'un un'a na'ts'uja, 'et duts'ínt'oh de, Moses be 'udustl'us oonats'odutilnoh nuhzun eh? 'Awundooh! 'Awhuz 'et diz'ai. 'I cha Yak'usda ooghuni 'unt'oh.

## 4

*Abraham Yak'usda ooba 'alha' 'unt'oh 'et whe oolubeshi ooba gak nasdli'*

1 Wheni Lizwifne netsoda-un Abraham ooghu dája uzninzun? Niz de yinka inda' huwa ndet suba nahoon'ai?

2 Ndi yun k'ut yinka inda' 'et huwa eh Yak'usda ninta' 'ant'en-un yuba gak whulh'tsi? 'Et 'alha' hoont'oh de, Abraham whé' ot'e' da', 'et hoont'si 'aw Yak'usda nalh iloh.

3 Yak'usda ooghuni 'uk'éguz-un oonailnih eh? "Abraham Yak'usda ooba 'alha' 'unt'oh 'et huwa ts'ih'un dune unli yúlhni," ni whe 'utni.

4 Dune 'it'en de 'aw ye unzoo-i iloh whe 'uk'elha hole', k'us be 'ut'en ba 'uk'elha hole' la, 'aw 'ants'et oogha lhoohoolts'ulh.

5 'Et hoont'si dune Yak'usda dája ni la ooba 'alha' hoont'oh de, 'et de ninta' ut'ih-un Yak'usda yuba gak whulh'tsi. Whuz un'a yuba' whutilelh 'aw hoonliyaz yuba lhe'ílel 'et hoont'si. Whuz un'a Yak'usda idutánelh ts'ih'un dune inli.

6 Lerwe David 'en cha 'et huwu yalhduk, mbe la Yak'usda yúlhni, "Nyun ts'ih'un dune 'int'oh," 'aw 'ut'en 'uyalh'en-i, 'i gha iloh, 'et hoont'si 'en 'alha' 'uk'enus hoonzoo-un ooghá whul'ts'ut whe 'unt'oh.

7 Njan 'et dutni,

"Mbe la tank'us ít'enne bulubeshi buba 'ún yutilhdilne  
'ink'ez bulubeshi 'aw lhist'en sulí lé'uja de,  
'enne 'uk'enus hoonzoo-un bugha whul'ts'ut.

8 Mbe la dune Yak'usda 'aw lubeshi 'ulh'en-un lhinízun,  
'en dune 'uk'enus hoonzoo-un oogha whul'ts'ut whe 'unt'oh,"  
ni whe' 'utni.

9 'Et daja nahzun? 'Et dune buhúzt'us whe be hóodat'enne, 'enne za tilah Yak'usda gha 'ukenus hoonzoo-un bugha whul'ts'ut? K'us ndunne luhít'usne, 'enne cha tilah Yak'usda gha 'uk'enus hoonzoo-un bugha whul'ts'ut? Njan 'et duts'út'ni, Abraham Yak'usda daja ni la ooba 'alha' hoont'oh 'et huwa ts'ih'un dune unli yúlhni.

10 Nkeda' Yak'usda yudáni' ts'ih'un dune unli? Hitit'us whutso tilah k'us hukw'elh'az tilah? Hitit'us whutso 'et be hóodat'en 'aw hukw'elh'az iloh.

11 Abraham Yak'usda daja yudáni' 'et ooba 'alha' hoont'oh, 'et huwa 'utni Yak'usda ts'ih'un dune yulhni. Yak'usda yudáni' hitit'us-un whutso da'. Hukw'elh'az huyúzt'us 'et whe la be hóodat'en-un ts'ih'un dune 'unt'oh. 'Et huwa mbe la Yak'usda daja ni ooba 'alha' hoont'ohne, 'aw buba lhe'hít'us whe bube hóodat'en hoont'si, 'enne Abraham butso whudilhdzulh íne!. 'Enne cha Yak'usda ubúlhni, ts'ih'un 'uhint'ohne.

12 'Ink'ez whulohne Lizwifne, 'enne cha Abraham butso whudilhdzulh unli. Lizwifne ts'iyawh bubuhúzt'us whe bube hóodat'en. 'Et hoont'si mbe la Lizwifne Abraham k'un'a Yak'usda ooghuni buba 'alha' 'unt'ohne, 'enne za Abraham butso whudilhdzulh-un unli.

*Yak'usda nets'ú hoozi-un be 'alha' nudzun-i gha za nets'ó tilts'ulh*

13 Abraham Yak'usda daja yudáni' 'et ooba 'alha' hoont'oh 'ink'ez Yak'usda yúlhni ts'ih'un dune unli. 'Et whu la gha ts'e Yak'usda Abraham 'ink'ez ye kédindene but's'ú yoozi. 'Et ndi but's'ú yoozi-i gha ndi yun buch'e' whutaleh. Ndi but's'ú yoozi-i 'aw Moses be 'udust'us gha íloh whe but'l'a ídan'ai, 'et k'us Abraham Yak'usda dája yudáni' ooba 'alha' yint'oh. 'Et huwa ndi but's'ú yoozi-i but'l'a ídan'ai.



14 Mbene la Moses be 'udustl'us yuk'úne' 'ut'enne 'aw 'et huwa iloh ndi yun buch'e' whutaleh. 'Et whuz un'a za 'uts'ut'en de, 'et de Yak'usda yuts'ú hoozi-un gak nawhutádleh, 'ink'ez Yak'usda ooghuni neba 'álha' hoont'oh-un 'ants'et 'uwhutát'elh.

15 'Et hoonts'i ndi Moses be 'udustl'us 'i be dune bulubeshi ghun buba nahutideh. 'Et hoonts'i dune Moses be 'udustl'us luhuyít'i de, 'et de Yak'usda highuni hidulhyoh ne'út'en de, 'et huwa 'aw buba nahoodéh aít'oh.

16 'Et huwa Yak'usda ye únzoo-i gha highuni dune yílhchoot de, 'en Yak'usda nalh ts'ih'un dune unli. 'Et whe ndet la Yak'usda dune ts'óhoozi-un ts'iyanne Abraham yukédindene, 'enne buch'e' whutaleh. Mbene la Lizwifne Yak'usda ooghuni ooba 'alha' 'unt'ohne, 'aw 'enne za iloh, ts'iyanne Abraham k'un'a Yak'usda ooghuni hiyílhchoot de, 'alha ts'iyanne netso whudilhduh-un unli.

17 Yak'usda ooghuni 'uk'éguz-i Yak'usda Abraham ndúyúlhni, "Dune lhelhdoh didohne butso whudilhduh-un nyuzúsi." 'Et huwa Yak'usda Abraham lhelhdoh didohne butso whudilhduh-un unli yuba lé'unt'oh. Yak'usda yuts'ú hoozi-un 'aw lhe'whúsi, 'et hoonts'i ts'ih'un un'a 'uhooja k'un'a ooba 'álha' hoont'oh. Ndi Yak'usda 'en 'unt'oh 'en gha yaidláne cha za hukhuna, 'ink'ez ndai la 'uyínla-i musai be 'uyínla.

18 Yak'usda yuts'ú hoozi-un lhane didowhne butso whudilhduh-un tileh. 'Uhóneh aít'oh le'hoont'oh, 'et hoonts'i ooba 'alha' hoont'oh 'et nduwhútanelh. 'Et Yak'usda 'uyúlhni, "Nyukédindene hutildlai," et huwa.

19 Tube duneti súli', nts'en'a suba buzkeh hole'? 'Ankw'us 100 yus k'ut be sulí'. Oo'at Sarah 'en cha 'et dunt'oh, buzkeh whutáleh-un 'on 'un haníjan. 'Et hoonts'i, njan 'aw soo cho howu ni lhíloh, Yak'usda daja yudáni' la, 'et tube cho ooba 'alha' hoont'oh 'et huwa.

20 Yak'usda ndet la yuts'ú hoozi-un 'aw 'uts'un un'a lhe'nízal 'ink'ez 'aw nawh ooba lhe'hóot'oh. Yak'usda ooba 'alha' 'unt'oh, 'et whe ulhtus sulí', 'ink'ez Yak'usda dílhiti'.

21 Yak'usda ndet yuts'ú hoozi-un 'et ye úlhtus-i be ndutínelh t'eeonínzun. 'Aw nawh lhe'hóot'oh whe ooba 'alha' hoont'oh.

22 'Et huwa 'utni Yak'usda, "Ts'ih'un dune inli," yúlhni.

23 Yak'usda ooghuni 'uk'éguz-i Yak'usda Abraham ndúyúlhni, "Ts'ih'un dune inli." Ndi 'aw Abraham za iloh ooba 'uk'éguz,

24 wheni cha neba 'unt'oh. Yak'usda Sizi Gri neMoodihti dazsai whe dunaidilhti 'et neba 'alha' 'uhoont'oh de, 'et de Yak'usda nedutánelh, "Ts'ih'un dune ts'inli."

25 Tank'us 'úts'ut'en huwa Yak'usda Sizi Gri butl'a yálhti, 'ink'ez dazsai whe dunaidilhti. 'Et huwa ninta' ts'ut'ih-un Yak'usda neba gak whulhtsi.

## 5

### *Yak'usda ook'eke nats'usdli*

1 Yak'usda daja nedáni' 'et neba 'alha' hoont'oh. 'Et whe la ninta' ts'ut'ih-un Yak'usda neba gak whulhtsi. 'Et whu la gha ts'e Sizi Gri neMoodihti 'en gha Yak'usda ts'un nedzi dizghel.

2 Sizi Gri neba 'alha' 'unt'oh, 'et huwa Yak'usda ye únzoo-i nech'e' unli whe 'unt'oh, 'ink'ez 'i be 'ilhiz wheni 'et néznindil. 'Et la ts'uhóont'i' whe huba ts'ilh'i ndet la whusawhútils'ulh-un Yak'usda dádíziti' la t'ets'ontizeh.

3 'Ink'ez 'aw 'et za iloh, 'et huwa dune ne-ezúla hoonts'i, ts'uhóont'i', 'ink'ez whulh ts'úyín-un whunénilhtan lé'hoont'oh.

<sup>4</sup> 'Ink'ez ts'iyanne t'ehonózin dant'óhne dune ts'inli. 'Et whuz un'a dune ts'inli huwa, huba ts'ilh'i ndet la whusawhútilts'ulh-un Yak'usda dádziti' la t'ets'ontizeh.

<sup>5</sup> Yak'usda Ndoni nets'ó t'l'aidan'ai 'ink'ez neyudífts'ut. 'En gha Yak'usda dalcho 'i be nek'entsi' t'ets'onínzun. 'Et huwa 'et dzin whusawhútilts'ulh-un 'aw hukwayá lhts'íloh whe huba ts'ilh'i.

<sup>6</sup> Whutso da' 'aw be ts'íltus-i lhts'ít'i inle', Yak'usda ts'ih'un un'a ooba yinka uzdutáfts'ilh huba. 'Et hoonts'i ndet dzin Yak'usda 'udun néwhunin'ai-un, 'et dzin Christ ts'iyanne lubeshi 'ulh'enne ooba dazsai.

<sup>7</sup> Howu nuní nuhzut, 'aw dune ts'ih'un 'unt'oh-un ba daóotsah hukwa' nínzun hooloh. Nohtoh 'ilhoghun tilah hoonli oodzi hóonli cha 'unt'oh, 'en dune unzoo-un ba datítsah huba.

<sup>8</sup> 'Et hoonts'i wheni 'awhuz lubeshi 'ulh'enne ts'inli inle' whe Christ neba dazsai. 'Et whe Yak'usda whunénilhtan dalcho-i be nek'entsi'.

<sup>9</sup> 'Aw 'et za íloh, Sizi Gri buzkai' be Yak'usda ninta' ts'unt'en-un neba gak whulhtsi. 'Et huwa ndet la Yak'usda lubeshi 'ulh'enne whewhunujut-un whe buba nahutiyeh. 'Et huwa Sizi Gri 'en be Yak'usda ye húnilch'oh-i, 'i ch'az uzdutijih.

<sup>10</sup> 'Awhuz Yak'usda ooch'az úzditni inle' whe ooYe' neba dazsai. 'Et huwa 'aw Yak'usda 'awhuz nebulh lhónulhch'eh. 'Et 'on 'un cha, Sizi ye khúna-i, 'i be uzdutijih 'et huwa.

<sup>11</sup> 'Aw 'et za íloh, Sizi Gri neMoodihti 'en gha Yak'usda bulh ts'uhóont'i', 'aw 'on 'un nebulh lhuntalhch'oh 'et huwa.

*Adam 'en la gha ts'e lubeshi 'uts'ulh'en, 'ink'ez Sizi Gri 'en gha Yak'usda nelubeshi neba gakyulhtsi*

<sup>12</sup> Hwúwú nuní nuhzut, Adam lubeshi ílhchoot, 'i la gha ts'e ts'iyanne ndi yun k'ut lubeshi 'ulh'enne huzdli'. Lubeshi 'uts'inla de, dáztitsah. Ts'iyawh lubeshi 'uts'inla, 'et huwa ts'iyawh yats'adlah.

<sup>13</sup> Yak'usda Moses dughuni yutl'aídan'ai. 'Et whuts'un dune lubeshi 'uhulh'en. Dunene Moses be 'udustl'us 'aw lhahuyít'ih, 'et huwa bulubeshi ba nahutideh-un k'at le wheni 'et néwhunin'ai.

<sup>14</sup> 'Et hoonts'i Adam yinka usda da' Moses yinka nenínya 'et whuts'un, dune lubeshi 'uhulh'en, 'et huwa yahadlah. Adam Yak'usda ooghuni t'eínínzun, 'et hoonts'i k'eínínyuz, 'et whe lubeshi ílhchoot. 'Et whu la gha ts'e ts'iyanne lubeshi 'uhulh'en. Nduune dune 'aw Adam k'un'a lubeshi lhe'hílel, 'et hoonts'i lubeshi 'uhulh'enne hinli inle' 'et huwa yahadlah. Adam 'en whusatíyahl-un dult'oh.

<sup>15</sup> Yak'usda ndun whusayalh'a-un, 'en gha nelubeshi neba yunawhudilh-noh. 'I 'ants'i negha ínin'ai. Ndi 'ants'i negha ínin'ai-i 'aw Adam la gha ts'e 'uts'úja-un whundúlhilt'oh. Adam lubeshi yílhchoot 'et huwa ts'iyanne yahadlah sulí'. 'Et hoonts'i Yak'usda ye únzoo-i gha nelubeshi yunawhudilhnoh. 'Et huwa Yak'usda ye únzoo-i Sizi Gri gha 'i lhane ghalts'ut.

<sup>16</sup> 'Et Adam lubeshi ílhchoot whe dáhooja la whunulh'en. Yak'usda ndi negha ínin'ai-i, 'i 'aw 'et whundúlhilt'oh. 'Alha' hoont'oh whe ndi 'ilho lubeshi 'ulya 'i gha Yak'usda ye náhutiyeh inla-i ts'iyanne dune dahútitsah. Lubeshi lhai 'uts'inla hoonts'i, Yak'usda 'ants'i negha ínin'ai-i, 'i be ninta' ts'unt'en-un neba gak whulhtsi.

<sup>17</sup> Adam oolubeshi 'i gha ts'iyanne dune yahitádlah. Ndi dune yé datsah-i 'aw hila gha óoya' aít'oh. 'Et hoonts'i Yak'usda ye néts'un unzoo-i, 'i 'on nus unzoo. Mbene la yílhchootne, 'enne 'i gha, 'ants'i negha ínin'ai-i dult'oh, whe

Yak'usda neúhni, ts'ih'un dune ts'inli. 'Ink'ez nedutálhti' cha whe 'ilhiz wheni huztinalh. 'Et Sizi Gri whuz un'a neba hoonla.

<sup>18</sup> Njan 'et whunóhnoostun hukwa' dusni, Adam lubeshi ílhchoot, 'et huwa ts'iyanne dune yahitádlah k'un'a buba nahisda. 'Et Sizi Gri whuz un'a za ts'ih'un 'uhoont'oh k'un'a neba 'uja. Njan hukwa' uzninzun de ninta' ts'unt'en-un Yak'usda neba gak whulhtsi, 'ink'ez 'ilhiz wheni khuztinalh whe' hooont'oh.

<sup>19</sup> Adam 'aw khuni k'únulhe'it'el, 'et huwa 'en oogha' hooja ts'iyanne dune lubeshi 'ulh'enne huzdli'. 'Et hoonts'i Sizi Gri 'úk'une' 'ust'en-un huwa lhane dune ts'ih'un 'uhint'oh tileh.

<sup>20</sup> 'Et 'on 'un cha Yak'usda dughuni Moses tl'aídan'ai, 'et whe la whunenulh-tun dáhooltsuk whe Yak'usda ooghuni k'úzninyuz. Ndet la t'ets'onínzun lubeshi 'ulh'en ntsi'ne ts'inli de, 'et de nats'uhoó'aih Yak'usda ye néts'un únzoo-i, 'i 'on nus ulhtus whe nelubeshi yuch'a' nilhde.

<sup>21</sup> 'Oh da' lubeshi gha dune ye dátsah-i 'aw yula gha óoya' aít'oh. 'Et hoonts'i 'andit Yak'usda ye únzoo-i, dune huyílhchoot de, 'i gha 'ilhiz hukhutinálh. NeMoodihti Sizi Gri ts'ih'un 'unt'oh, 'et huwa 'en gha whuz un'a neba' hoonla.

## 6

### *Netsudule ooch'az náts'oolyeh 'ink'ez Sizi Gri ook'úne' ts'oot'en*

<sup>1</sup> T'ewhunúhzun eh dája nohdásni'? Lubeshi 'uts'ulh'en za eh uztit'elh, Yak'usda dalcho-i be nets'un únzoo t'ets'ontázin huba?

<sup>2</sup> Nts'en'a 'uwhutát'elh? Nets'en'a la lubeshi 'uts'ulh'en-un whulazditni, 'ink'ez doo cha za lubeshi uztilh'elh? 'Aw 'uhót'e' aít'oh!

<sup>3</sup> 'Awhuz eh t'ewhunúhzun? Mbene la Sizi Gri gha too be' hulya de, 'et de dune t'ehontázin Sizi Gri oodune'ne hinli. 'Et duts'úja de 'ants'i 'en bulh dats'úzsai lé'ts'int'oh.

<sup>4</sup> Ndi too be' ts'ulya 'i gha 'ants'i Christ bulh dats'úzsai, 'ink'ez hiyulh ánealhti le'ts'int'oh. 'Ink'ez ndet la neBá ye ulhtus-i be yaidl'anne toh dunaidilhti da', 'et whuz un'a za wheni 'uyoon nats'usdli' k'un'a yinka uzdólt's'i' huba' hooont'oh.

<sup>5</sup> 'Ants'i Sizi Gri hiyulh ánealhti bulh 'ilhoghun duts'últ'oh de, 'et whuz un'a dunadija da' bulh 'ilhoghun ts'inli lé'uztit'elh.

<sup>6</sup> Njan t'ets'onínzun, 'uda' dats'int'oh la inle', 'et Sizi Gri tulalhgus k'ut whulh dazsai. 'Et whe lubeshi uztilh'elh hukwa' uzninzun-un gak neba whutaleh. 'Et huwa nts'en'a la niz de né'ts'ust'en-un, 'aw 'on 'un hukw'ú ne'ts'oot'en aít'oh. 'Aw 'on 'un netsudúle be ulhna lhts'utisdle, 'ink'ez 'aw 'on 'un lubeshi uztilh'elh-un hukwa lhe'ts'untisil.

<sup>7</sup> Mbe la Sizi Gri yúlh dazsai le'uja-un, 'en oolubeshi ts'u hanáti whe 'unt'oh.

<sup>8</sup> 'Et huwa wheni Christ bulh dats'úzsai le'ts'uja de, 'et de 'en bulh khuztinalh, 'et neba 'alha' hooont'oh.

<sup>9</sup> 'Et t'ets'onínzun, Christ yaidl'anne toh danadija 'ink'ez 'ilhiz khutinálh. 'Aw whulh nat daótsah aít'oh whe' hooont'oh.

<sup>10</sup> 'Ilhoh za ts'iyanne ba dazsai. 'Et hoonts'i 'andit khuna 'ink'ez Yak'usda bulh khuna.

<sup>11</sup> Nohni cha lubeshi be yaihda nahzun, 'et hoonts'i Yak'usda, Sizi Gri neMoodihti 'en bulh, khahna whe aht'oh.

<sup>12</sup> 'Et huwa lubeshi nohdzi yo hóle', 'ink'ez k'une' nohool'en junih!

<sup>13</sup> 'Aw 'on 'at nohyust'e tank'us un'a 'utit'elh wheni ootl'á'dudoolhyelh junih, 'et k'us khahna hukw'un'a ootl'a'dudulhye 'ink'ez Yak'usda ba nohyust'e ts'ih'un un'a 'ut'en oolh'e'.

14 Moses ooghuni nohtl'aídan'ai-i inle', 'i oot'anínohtan junih. Yak'usda ye únzoo-i, 'i za oot'anínohtan. 'Et de la lubeshi nohmoodih oole' ait'oh.

15 Daja nahzun? Niz de khuni netl'aídan'ai-i, 'i 'aw 'on 'un oot'aníznootan huba lhe'hóot'oh. 'Et Yak'usda ye únzoo-i, 'i za t'anízintan de, lubeshi uztilelh-un netl'ahóot'ai nahzun eh? 'Aw 'uhót'e' ait'oh.

16 Njan 'aw t'ewhunuzúhzun? 'Et 'ilhoghun dune ootl'á'dudilhya de, ndet hukwa' ninzun-un 'oh tíht'en, 'et de 'en be 'ulhna aht'oh. 'Et whuz un'a za lubeshi ootl'á'dudilhya de, lubeshi be úlhna aht'oh, 'ink'ez 'ilhiz wheni kwuncho yo 'et ts'u tíhdulh, 'i nohba k'elha tileh. 'Et hoonts'i Yak'usda ootl'á'dudilhya de, Yak'usda be 'ulhna tihleh, 'ink'ez Yak'usda nohdutánelh ts'ih'un aht'oh, 'et whuz un'a nohba k'elha whutáleh.

17 'Ink'ez sulhutsinke tube nohba hoonúst'i' 'et huwa Yak'usda, "Musi," dusni. Niz de lubeshi be 'ulhna ahli inle', 'et hoonts'i nohdzi ndulcho-i be ndet la whunoh hodalh'e-un hukw'úne' zaht'en.

18 'Et 'andit lubeshi ch'a dahjih, 'ink'ez Yak'usda be 'ulhna suhli'.

19 Ts'iyanne 'ulhna e'ut'en k'oh t'ehonínzun, 'et huwa whuz un'a nohbulh yásduk. 'Et huwa daja nohdutásnelh-un 'aw nohba huwa lhúhoolna' whe sudutáhts'o. Niz de nohyust'e lubeshi be 'ulhna tihleh huba ootl'a'dudilhya inle'. 'Ink'ez hoonts'i-un 'uhoolh'en-un nus za lhe'hooltsi' whulh'i. 'Andit Sizi Gri oodune' ahli 'inka whuz un'a za Yak'usda nohyust'e ootl'aítihleh be 'ulhna tihleh huba. Whuz un'a aht'en de, ts'ih'un utiht'elh, 'ink'ez ts'iyanne t'ehontázin Yak'usda ba 'udun nebuninlane sahli'.

20 Lubeshi be 'ulhna ahli da', 'aw ts'ih'un un'a utiht'elh lhnúhzil inle'.

21 'Et hukwayá hoonli tune' zaht'en inle'. 'Aw whe soo lhe'aht'el 'ink'ez 'et hukw'elha 'ilhiz wheni kwuncho yo ts'u tíhdulh whe' hoont'oh. 'Et whuz un'a dune ahli inle'.

22 'Et 'andit Yak'usda be 'ulhna ahli. Whuz un'a aht'én-un 'et hukw'elha Yak'usda ba 'udun nebuninlane sahli', 'ink'ez hukw'elh'az 'ilhiz wheni yak'uz ts'u tíhdulh.

23 Lubeshi 'uts'alh'en-un, 'i k'elha daztitsah. 'Et hoonts'i neMoodihti Sizi Gri, 'en gha Yak'usda 'ilhiz be ts'ukhutinalh-un, 'et 'ants'i negha óonin'aih.

## 7

### *Sizi Gri k'úne' 'ut'enne 'aw Moses be 'udustl'us 'i gha iloh buba nahutideh*

1 Sulhutsinke, Yak'usda dughuni Moses tl'aídan'ai-i soo ts'ih'un t'enuhzun, 'et huwa' dusni be nohbulh yasduk. Dune khuna whutoh ndai la khuni Yak'usda butl'a ídan'ai hik'úne' oot'en huba 'unt'oh.

2 Njan whunulh'en, ndet la ts'eke dune ghusda de, yinka usda whutoh, yulh 'ilhoghun lhih. 'Et ooki dátsaih te, 'et 'aw yulh 'ilhoghun lhíloh nawhudlih. 'Et whuz un'a Moses be 'udustl'us ni whe' utni.

3 'Et ooki dazsai de, 'et Moses be 'udustl'us gha ndun ts'eke soh natisja whe 'unt'oh. Hukwa' ninzun de, 'uyoon dune ghu natidalh 'ink'ez 'aw lubeshi ooba lhuhóoloh. 'Et hoonts'i ooki 'awhuz khuna whe 'uyoon dune zih usda de, 'et de lubeshi 'ulh'en, 'ink'ez lubeshi 'ulh'en-un 'unt'oh.

4 Sulhutsinke ndet la whunoh hodis'e-un 'et huwa t'eeonáhzun nts'en'a la Sizi Gri k'úne' aht'enne ahli. Nohni 'ants'i Christ bulh dasáhtsai léaht'oh inle'. 'Et huwa 'aw 'on 'un Moses be 'udustl'us oot'anínohtan-un huba lhe'hóot'oh. Christ bulh dats'uzsai, 'et huwa Moses be 'udustl'us yuch'a naneuzdla. 'Et 'alha 'andit mbe la dazsai 'ink'ez dunadija-un, 'en bulh 'ilhoghun tihleh.

<sup>5</sup> Niz de Moses be 'udustl'us lubeshi yech'a neniyooot 'et hoonts'i nedzi hukwa' ninzun k'un'a yinka uzdilhts'i. Neyust'e lubeshi ootl'ats'iyalhti le'ts'inla, 'et duts'úja huwa kwuncho 'i neba k'elha tileh.

<sup>6</sup> Niz de Moses be 'udustl'us oot'aníznintan ínle'. 'I gha 'ants'i ts'úlhghel lé'ts'int'oh ínle'. 'Et hoonts'i Sizi Gri bulh dats'úzsai da' nela nawhuditni lé'ts'úja. 'Et 'andit Ndoni ooghuni 'andidi-i, 'i 'ulhna ts'inli whe ook'úne' ts'oot'en huba' hoont'oh, 'aw 'on 'un Moses be 'udustl'us oot'aniznootan aít'oh.

*Moses be 'udustl'us unzoo eh?*

<sup>7</sup> Moses be 'udustl'us ooghu dája uznootin súbá? Moses be 'udustl'us 'i ghá eh lubeshi 'uts'ulh'en? 'Awundooh! 'Aw 'uhót'e' aít'oh. 'I gha lubeshi 'ulh'en-un usdli t'éwhunúszun. Moses be 'udustl'us k'uyasduk whe 'utni. "Uyoonne ch'e' ha' nonzin junih," 'i gha nawhus'ai lubeshi 'ulh'en-un usdli.

<sup>8</sup> 'Et whutso da' Moses be 'udustl'us ooyit lubeshi 'us'en-un ínle' 'aw t'éoonuzúszun. 'Et hoonts'i Yak'usda khuni netl'aídan'ai-i t'eniszin whe, 'et dalcho-i be syust'e lubeshi ts'u nánt'i-un 'et nawhus'ai.

<sup>9</sup> 'Et whutso da' Moses be 'udustl'us ooyit kwuncho yo ts'e tísyalh t'éoonuzúszun. 'Et hoonts'i Yak'usda khuni netl'aídan'ai-i t'eniszin whe lubeshi 'ulh'en-un usdli, 'ink'ez kwuncho yo ts'e tísyalh 'et nawhus'ai.

<sup>10</sup> Yak'usda khuni netl'aídan'ai-i, 'i 'ilhiz ts'ukhutinalh-un whunénilhtan, 'et hoonts'i ook'uyasduk huwa kwuncho yo ts'e tísyalh-un nawhus'ai.

<sup>11</sup> 'Et Yak'usda khuni netl'aídan'ai-i t'eniszin whe syust'e lubeshi ts'u nánt'i 'i khasúnint'a whe nanist'a 'et huwa kwuncho yo ts'e tísyalh t'éoonuszin.

<sup>12</sup> 'Et huwa Moses be 'udustl'us lubeshi ooghu hooloh, 'ink'ez nankilt'oh 'uyoo khuni netl'aídan'ai-i, 'i cha lubeshi ooghu hooloh ts'ih'un un'a 'ink'ez unzoo whe 'unt'oh.

<sup>13</sup> Dája ts'un tizilh 'et huwun? Ndaí la sba unzoo-i, 'i gha kwuncho yo ts'e tísyalh tóleh? 'Aw 'uhót'e' aít'oh! Ndi Yak'usda khuni netl'aídan'ai-i nela' 'oot'en ha negha ínla. 'I gha lubeshi dáltsi' t'eniszin. Sich'oh lubeshi ts'u núst'i 'et huwa lubeshi 'ulh'en-un usdli 'et nawhus'ai, 'ink'ez whu la gha ts'e kwuncho yo ts'e tísyalh ínle'.

*Neyust'e 'ahoolhyiz lubeshi ts'u nánt'i, 'et huwa neba huwa whulna' 'aw Moses be 'udustl'us ook'úne' ts'oot'en aít'oh.*

<sup>14</sup> Ndoni gha Moses be 'udustl'us neghá yunle, 'et hoonts'i syust'e lubeshi ts'u nánt'i, 'ink'ez lubeshi e'ulhna tisdleh 'et t'éoonuszin.

<sup>15</sup> 'Ink'ez syust'e lubeshi ts'u nánt'i te, si sba 'aw lhe'hóozoo' whe' hoont'oh. Ndaí la 'óos'en hukwa lhe'núszun 'i za 'us'en, 'ink'ez ndaí la 'uk'enus whuts'u dusní-un, 'oh te za ne'ust'en.

<sup>16</sup> 'Et ndet la hukwa lhe'nuszun-un 'ust'en te, 'et Moses be 'udustl'us sba ts'ih'un 'unt'oh t'éwhunúszun.

<sup>17</sup> 'Et hoonts'i, 'aw si hukwa' nuszun íloh whe 'ust'en, ndi lubeshi syust'e ts'u nánt'i-un, 'i gha 'ust'en.

<sup>18</sup> 'Aw syust'e hoonzoo-un whuts'úlhnit'i. Hoonzoo te né'tist'en hukwa' nuszun 'et hoonts'i 'aw 'oosneh aít'oh.

<sup>19</sup> 'Et hoonzoo te né'tist'en hukwa' nuszun te, 'aw 'uhóosdle aít'oh. 'Ink'ez hoonts'i 'uwhutis'elh hukwa lhe'núszun hoonts'i, 'aw huwa lhúhoolna' whe 'oh te ne'úst'en.

<sup>20</sup> Hoonts'i te ne'úst'en de, 'aw hukwa lhe'núszun, 'et hoonts'i 'aw si hukwa' nuszun íloh whe 'ust'en, ndi lubeshi syust'e ts'u nánt'i, 'i gha 'ust'en.

<sup>21</sup> 'Et ndet la ts'ih'un 'utist'elh hukwa' nuszun totsuk, ndi lubeshi ts'u núst'i 'i whuch'az súnilt'i. 'Et nduwhút'en-un nawhus'ai.

<sup>22</sup> Sdzi be Yak'usda ook'oh ts'e hoonúst'i'.

<sup>23</sup> 'Et hoonts'i 'uts'un un'a cha t'eóonúszun. 'Et ndiz un'a syust'e seni dúlhyo né'tit'en whuts'u nint'i. 'I be lubeshi soontun 'et ndust'oh, 'ink'ez syust'e whuz za nint'i.

<sup>24</sup> Tube tez'en. Ndi syust'e lubeshi za ts'u nint'i. 'I gha kwuncho yo ts'e tísyah. Mbe 'et whuch'a sútilhyih?

<sup>25</sup> Sizi Gri 'en za 'utinelh. 'Et huwa tube cho Yak'usda, "Musi," dusni.

'Et ndiz un'a 'ust'oh, seni be Yak'usda ook'oh ts'e za ook'úne' 'ust'en, 'et hoonts'i syust'e 'awhuz lubeshi ts'u nint'i za 'unt'oh.

## 8

### *Sizi Gri Ndoni gha 'ilhiz ts'ukhutinalh-un 'et neghá whunin'ai*

<sup>1</sup> 'Awet 'andit, mbene la Christ oodune' unline, 'aw kwuncho yo ts'e wheni buba nalhuhídil. 'Et ndunt'ohne 'aw buyust'e nint'i ts'e hukw'u nulhe'hust'en, 'et k'us Ndoni ook'oh ts'e za hukw'u ne'hut'en.

<sup>2</sup> Ndoni gha 'ilhiz khutisnalh whe Christ bulh 'únt'oh. 'Ink'ez Ndoni ook'oh ts'e ook'úne' 'ust'en-un 'i be lubeshi ch'a nasulhti. 'Et huwa 'aw dalhtuzisa.

<sup>3</sup> Neyust'e lubeshi ts'u nint'i, 'et huwa Moses be 'udustl'us 'aw nela 'ooneh aít'oh. 'Et hukw'elh'az Yak'usda duYe' nets'ítih'a'. 'En ooyust'e neyust'e dult'oh, 'et hoonts'i neyust'e 'i lubeshi bulh 'únt'oh. 'Ink'ez datítsah-un whutl'a'dudilti ndi yun k'ut dune bulubeshi k'elha whutilhtselh 'et wheni.

<sup>4</sup> 'Et whe ndai la Moses be 'udustl'us nets'u húkwa' 'utni-un, ts'iyawh neba lhaóodinla. Wheni 'uts'int'oh, 'aw neyust'e nint'i ts'e hukw'u nulhe'ts'ust'en, 'et k'us Ndoni ook'oh ts'e za hukw'u ne'ts'ust'en.

<sup>5</sup> Mbene la lubeshi za ghu nuní nuzutne 'ahoolhyiz lubeshi 'uhulh'en. 'Ink'ez mbene la Ndoni k'oh ts'e za nuní nuzutne, 'enne Ndoni k'oh ts'e za hukw'ú ne'hut'en.

<sup>6</sup> 'Et mbene la lubeshi ts'u nint'ine, 'enne kwuncho yo ts'e hutidulh, 'ink'ez mbene la Ndoni k'oh ts'e dune unline, 'enne Yak'usda whudizghel-un buch'e' whutaleh 'ink'ez 'ilhiz hukhutinalh.

<sup>7</sup> Njan huwa' dusni, mbene la 'ahoolhyiz lubeshi ghu nuní nuzutne, 'enne Yak'usda ch'az ditnine hinli 'ink'ez Yak'usda ook'oh ts'e k'úne' hoot'en-un whutl'a lhé'hudulhti, Yak'usda k'úne' hutit'en 'aw 'úhóoneh aít'oh 'et huwa.

<sup>8</sup> 'Et ndunt'ohne, buyust'e lubeshi ts'u nint'ine, 'aw Yak'usda ba lhe'hízoo'.

<sup>9</sup> 'Et Yak'usda ooyughi nohyudínda de, 'alha Ndoni oodune'ne ahli 'ink'ez nohyust'e lubeshi ts'u nint'i-un 'aw ook'únulhe'zagt'en. 'Et hoonts'i mbene la Christ ooyughi\* lhit'ihne, 'enne 'aw oodune'ne lhuhíloh.

<sup>10</sup> Nohyust'e lubeshi gha datítsah, 'et hoonts'i Christ nohyudínda de, 'et de nohyughi 'ilhiz khutinalh Yak'usda ba ts'ih'un aht'oh sulí 'et huwa.

<sup>11</sup> Christ dazsai whe Yak'usda dunaidilhti. Ndoni Christ dunaidilhti-un, 'en ooyughi nohyudínda de, 'en gha nohyust'e dóo cha khutinalh-un yughá oota'alh.

<sup>12</sup> Sulhutsinke, nja dúhoont'oh whe' hoont'oh, nohyust'e lubeshi ha' ninzun de, 'aw whuz un'a oohneh huba lhe'hóot'oh.

<sup>13</sup> 'Et whuz un'a dune ahli de, 'et 'alha hoont'oh whe kwuncho yo ts'u tídulh. 'Et hoonts'i Ndoni 'en gha nohyust'e lubeshi ha' ninzun-un 'etsul 'uhla de, 'et de 'ilhiz wheni khutihnalh.

<sup>14</sup> Mbene la Ndoni buts'u húkwa' ninzun hukw'un'a 'uhut'enne, 'enne Yak'usda oodune' hinli 'et huwa.

\* 8:9 Yak'usda ooyughi 'ink'ez Christ ooyughi 'ilho za unli. 'En Ndoni huyúlhni.

15 'Et Ndoni nohyudíłts'ut whe 'aw Yak'usda be ntilhjut wheni 'ulhna lhunohíłtsel. 'Et nohyudíłts'ut whe Yak'usda oodune' nohulhıtsi. 'Et huwa whélhıts'uniljut whe bulh yáts'ulhduk 'ink'ez, "Abba, 'uBá," ts'utni.

16 Ndoni 'en 'unt'oh neyughi whubunullhtun, wheni Yak'usda buzkeh ts'inli.

17 'Ink'ez mbene la Yak'usda buzkeh unlıne, ndai la Yak'usda buts'ú yoozi-i, 'i buch'e' whutaleh. 'Et whuz un'a Christ bulh úztit'elh, Christ bulh dzoh nuts'uzut de, 'en bulh uzdutáti' 'et huwa.

### *K'at le Yak'usda nedutálhti'*

18 'Et nja dudúsnı, Yak'usda ye diziti'-i whuneuntilhtun-un hooncha k'et njan 'andit Sizi Gri ooba dzoh nuts'uzut-un, 'et ants'i 'uhoont'oh.

19 Nđai la Yak'usda 'uyinla-i, ts'iyawh dudune'ne whubuntilhtun-un, 'et soo hukwa tse húhoolih.

20 Nđi yun k'ut 'ulya-i, 'i 'atsul wheni 'uyınla. 'aw dich'oh 'utahalhúhoo'al, Yak'usda dich'oh 'utahahón'ai whuz un'a 'uhót'e' ha. 'Et huwa ndi yun k'ut 'ulya-i hukwa tse húhoolih 'uts'un un'a na'whutátnel' 'et huwa.

21 Nđi yun k'ut 'ulya-i, njan whusahóolts'ut de, 'et nuján-un 'etsul 'uwhutánelh. Tube la whudızıti' hóle'. 'Et Yak'usda buzkeh k'un'a buk'una'it'oh lé'hutinelh.

22 Njan t'ets'onínzun, ndai la Yak'usda 'uyinla-i, 'ohwhi 'andit whuts'un khun dutso, nts'en'a la ts'ekoo buyaz whutále whuz un'a dzoh nuzut.

23 'Aw 'i za íloh, whenich'oh cha ts'ukhun dutso Yak'usda buzkeh gaih za uztileh 'et whuts'un. 'Et 'oh de de, neyust'e 'ants'i kw'una'it'oh lé'tinelh. 'Et Ndoni nets'ú whusayalh'a' inle', 'et whe t'ets'onínzun Yak'usda nedání'-un whuz un'a 'et nduwhútanelh.

24 'Et nts'en'a la Yak'usda oots'u húkwa tse ts'úhooli, whuz un'a uzđijiz. 'Et hukw'u nunı nulhzut, ndet la hukwa tse ts'úhooli-un 'uhóoja de, 'aw 'on 'at hukwa tse ts'úhole' aít'oh. Ndet la dune honalh'en-un, 'aw 'on 'at hukwa tse húhole' aít'oh 'et huwa.

25 'Et hoonts'i Yak'usda ndet la nets'ú hoozi-un 'awhuz lhıts'úhoos'en de, 'alha hukwa tse ts'úhole' za' ts'oot'e'.

26 Lhawh hukw'un'a 'aw lhıts'íłhtus. Ndoni nela 'ut'en. 'Aw whuloh te ndet huba tenazdudidı-un 'aw t'ets'onúszun. 'Et hoonts'i Ndoni neba tedudlı, khun dutso le'utni, khuni 'aw be yaóoduk aít'oh, 'i be neba tenadudlı, 'et whe nela 'ut'en.

27 Mbe la nedzi yo nunúta-un, 'et Ndoni dája ninzun-un t'éwhunínzun. Yak'usda hukwa' ninzun hukw'un'a. Ndoni Yak'usda ooch'e'ne, buba tedudlı 'et huwa.

28 'Et huwa t'ets'onínzun mbene la Yak'usda yuk'entsı'ne ts'iyantsuk hoonzoo k'un'a za buba whulhıh. 'Enne 'uhint'oh, Yak'usda dutijih ha buka' dani'ne hinli.

29 'Udechoo whuts'un Yak'usda ooch'e' tilehne ts'iyawh t'ebunínzun. 'Et huwa whutso da' buba lhawhúdinla duYe' lé'hutit'elh. 'Et whuz un'a Sizi Gri neulhutsinke lhanne butoh 'udéchoo-un buba unlı.

30 Mbene la whutso da' duch'e' tilehne t'ebunínzun 'enne hutijih ha buka' dani'. 'Et tank'us 'uhut'en-un buba gak whulhıtsi, 'ink'ez 'enne bubudálhti'.

### *Sizi Gri 'en gha Yak'usda nek'entsi'*

31 T'éwhunúhzun eh njan dáwhulzoo' la? Yak'usda nets'ú ditni de, mbe suba nech'az dotni?



<sup>32</sup> 'Aw Yak'usda duYe' buch'a lhúyootun whe neba datítsah wheni butl'a yálhti. 'Et Yak'usda neba edúja de, 'et duYe' bulh 'alha 'et hóont'i' whe ts'iyaitsuk negha tiléh.

<sup>33</sup> Mbene la Yak'usda 'utahábanlane, mbe 'udutinelh lubeshi 'uhulh'en budutánelh? Gak! Yak'usda 'en 'uja tank'us 'úhut'en-un buba gak whulh'tsi.

<sup>34</sup> Mbe 'udutinelh hoontsi' k'un'a neba nahutiye'h? Gak! Christ 'en za 'uja neba dazsai. 'Aw 'et za íloh, 'en dunadija 'ink'ez Yak'usda náilhni ts'e yughusda 'en neba tenadudli.

<sup>35</sup> Ndai útinelh Christ ye nék'entsi'-i yuch'a nanetálhtelh? Nech'a húhoolh'i, k'us howa whúlna'-un neghá honkat-un, k'us dune neúzula-un, k'us dai ts'ínli-un, k'us tube tets'ul'en, k'us nebulh howa óodli-un uzdilhts'i, k'us nehutuzilghelhel tilah? 'Aw hoonli 'ooneh-i hooloh!

<sup>36</sup> 'Uda' ndai la Yak'usda be 'udustl'us njan dutni, "Usbai nahituzilghel-h-i k'un'a 'uts'int'oh. Nyun ngha dzin totsuk nehutuzilghelhel le'hoont'oh," ni whe 'utni.

<sup>37</sup> Hoontsi'-un nebulh 'uwhut'en 'et hoontsi', nek'entsi'-un, 'en gha 'aw nech'a' oodeh aít'oh.

<sup>38-39</sup> Christ 'en gha Yak'usda nek'entsi', 'inka 'aw nek'entsi'-i yuch'a náneólihl-i hooloh. 'Et whuz un'a sba' hooja. Dats'úzsai-un tilah k'us dzoh nuts'úzut-un tilah, lizasne k'us ndi yun k'ut hiye úlhtus-i be tilah nemoodih hutileh, 'andit dzin 'uhoont'oh-un k'us nus de dawhútat'elh-un, ntsi'-i ndi yun k'ut nudúdeh-i tilah k'us ntsi'-i kwuncho yo ts'e nudúdeh-i tilah, ndai la Yak'usda 'uyinla-i, ts'iyawh Yak'usda ye nek'entsi'-i, Sizi Gri neMoodihti bulh 'unt'oh, 'aw yuch'a náneólihl-i hooloh.

## 9

*Ndai la hoonliyaz Yak'usda Lizwifne buts'ú yoozi-i 'aw bugha lhíyikulh, Yak'usda hits'u disni 'ink'ez ooghuni 'aw lhuhuyóotun 'et huwa. 'Inka 'uja Yak'usda 'udun yun k'ut whut'enne dudune'ne hoole' ni.*

<sup>1</sup> Njan nohdutásnelh-un Christ oonalh 'ú dusni. 'Aw lhozusts'it whe' dusni. Dája nohdutásnelh-un Ndoni oonalh syo ts'e oogha t'ets'oninzun-i 'et cha 'álha' hoont'oh.

<sup>2</sup> Njan 'et dudúсни whe' dusni, Lizwifne Yak'usda t'anílhonitan 'et huwa 'enne bubughun tube bughu sdzi únduda, 'ink'ez 'ahoolhyiz bughu ni usdli.

<sup>3</sup> Lizwifne sulh údidowh 'et huwa bula' tiselh hukwa' nuszun. 'Et whe bula 'e'whudutánelh de, whute Yak'usda skehooyih da' 'ink'ez Christ ch'a naoosja' doosni' oole' da'.

<sup>4</sup> Ndune Israel oots'u haindene Yak'usda 'utahábanla dudune' hoole' ha. 'Enne 'uhint'oh Yak'usda budálhti' 'ink'ez be buts'ú nahizya-un, 'et buba nahoosdzi. 'Enne 'uhint'oh Moses be 'udustl'us butl'a ídan'ai 'i be nts'en'a la Yak'usda ts'ih'un un'a hiba 'oot'en ha.

<sup>5</sup> Israel oodune'ne 'uda' dune tso whúdilhldzuhlne ts'u hahánde whe' hint'oh, 'ink'ez Christ 'en cha buts'u hainzut. 'Et huwa ooyust'e dune k'un'a 'uchainya inle'. 'En 'unt'oh ts'iyantsuk whuYak'usda unli. 'Et huwa 'ilhiz wheni whe hidíhlti'. 'Et ndo honeh.

<sup>6</sup> 'Oh da' Israel khuni ye buts'u nahizya-i, ts'iyawh lhaoodutatneh whe' hoont'oh. Mbene la Israel oots'u haindene, 'aw ts'iyawh iloh Israel whudune'ne hinli.

<sup>7</sup> 'Ink'ez Abraham ye kédinzutne 'aw ts'iyawh iloh Israel whudune'ne hinli. Yak'usda Abraham yudáni, "Isaac 'en gha za nyukédindene hootádzilh."



8 Njan 'et 'udúsni-un, Yak'usda oodune'ne 'aw dune yust'e ts'u háindene, 'enne iloh 'uhint'oh. Mbene la khuni ye but's'u nahizya-i, buba 'alha' yint'ohne, 'enne Yak'usda oodune'ne 'uhint'oh.

9 Yak'usda Abraham 'en yuts'u náhizya, “Ndet la hoozúsi-un 'et whu-sanátisdalh 'ink'ez n'at Sarah dune ooyaz tìleh,” yúlhni.

10 'Aw njan 'et za iloh, Rebecca buzkeh lht'udánke'ne, 'enne bubá, netsoda'-un Isaac, 'en 'únt'oh.

11-12 'Aw lhahuwhusdle whutso da' whuts'un 'aw hoontsi' k'us hoonzoo-un l'he'whuhusdle da' Yak'usda Rebecca yudáni', “‘Udechoo-un, 'en duk'oh-un yuk'úne' tit'en.” 'Et whe nts'en'a la Yak'usda hukwa' ninzun-un, 'et whuz un'a 'uhója.

13 Njan 'et Yak'usda be 'udustl'us k'ut 'uk'úwhusguz, ndutni, “Jacob\* 'ink'ez bulhutsin cha Esau huyúlhni. 'en ookw'esi, 'et hoontsi' Esau 'en 'ants'i sba unli.”

*Mbene la yuka' ninzunne, 'enne Yak'usda bugha té'untazeh*

14 'Ink'ez dája uzduťinelh nuhzun? Yak'usda 'aw ts'ih'un lhi'ít'oh uzduťinelh eh? 'Aw whuz un'a 'uhót'e' aít'oh!

15 Yak'usda nts'en'a la Moses yudáni'-un, “Mbe la oogha té'untaszeh huba 'utahásti-un, 'en oogha té'untaszeh, 'ink'ez mbe la ooghu sdzi dúntida'-un, 'en ooghu sdzi dúntida'.”

16 'Et huwa Yak'usda ye 'ugha té'nizeh-i, 'i gha, mbene buka' ninzunne, 'enne 'utahábanla. 'Aw dune dich'oh hukwa' huninzun iloh huwa' hooja, 'ink'ez 'aw hukw'elha 'uhoot'en cha aít'oh.

17 Yak'usda ooghuni 'uk'unusgúz-i k'ut Pharoah nja ndúyulhni, “Njan 'et huwa Egypt whulerwe nyuzúsi, nyun ungha ndet la whéstus-un dune whúntistun. 'Et whuz un'a sooz'i' ndi yun k'ut ndulcho whe t'entádzin,” yúlhni.

18 'Et njan t'eeonóhzin hukwa' nuzun, mbene la Yak'usda 'utahábanlane, 'enne bugha te'untazilh. 'Et mbene la 'uts'un úninzunne, 'enne cha whuz un'a 'uhint'oh ubilh'i.

19 Whulohne nohtoh 'et tilah sudóhni, “Nts'en'a la Yak'usda ne'úst'en-un 'aw whudulhyoh 'uts'oot'e' aít'oh de, 'ink'ez lubeshi 'uts'ulh'en te, 'et nts'en'a 'utni Yak'usda nek'éhoota'alh?”

20 Mbe ahli whe Yak'usda oodulhyoh udutíhnelh? 'Et dune 'uyínla-i ndi 'uyínla-i nts'en'a 'udutinelh, “Di ha 'inja whuz un'a 'usínla dutinelh?”

21 Nja whunilh'en, dune whutl'us be 'oosa' inla de, 'ilho unzoo yulh'tsi de ye' dudutálti' huba, 'ink'ez 'ilho yé' tit'elh wheni 'uyínla. 'Et whuz un'a 'uyínla de, didutch'oh za ooba' hoont'oh.

22 'Et whuz un'a Yak'usda lhelhyoone whe lhelh'ts'un un'a buba 'uhóonla. Whulohne bulubeshi gha Yak'usda kwuncho yo ts'e whébule, dich'oh khanáhuwhut'aih huwa' bul'h'ih. Sa' buba sulh'i 'et hoontsi' dzoh nubutilhdzut. 'Enne bugha Yak'usda dáltus ts'iyanne t'éhontázín, 'ink'ez dalcho-i be lubeshi yuts'u dutni, 'et cha ts'iyawh t'éhontázín.

23 'Et wheni cha sa' neba sulh'i. Whutso da' 'utahanéanla negha te'untazilh ha. 'Et whuz un'a wheni cha uzduťát'i. Wheni negha ts'iyanne t'éhontázín Yak'usda yé ditz'i-i dálzoo' whe 'unt'oh.

\* 9:13 Ndu'n Jacob, Israel cha huyúlhni, 'ink'ez bulhutsin cha Esau huyúlhni.

24 Wheni Yak'usda dutijih ha neka' dani'ne ts'inli, 'aw Lizwif butoh za íloh, 'udun yun k'ut whut'enne cha.

25 Yak'usda 'et 'utni nus hoo'en-un Hosea be 'udustl'us k'ut, whuz un'a 'uwhutánelh whe 'utni,  
 "Aw sdune'ne íloh 'enne sdune'ne budutásnelh,  
 'ink'ez buk'elhúsi'ne, 'enne buk'etisi'.

26 Nts'oh la yun k'ut whudune'ne,  
 'aw sdune'ne íloh 'aht'oh hubudáni'ne,  
 'enne hoonts'i Yak'usda khuná-un dudune'ne bubudutánelh."

27 'Et nus hoo'en-un Isaiah Israel oodune'ne bughu yalhduk whe 'et khuni ulhtus-i be ndutni,  
 "Israel oodune'ne taba sai nduhuniltsuk de,  
 'et hoonts'i whulohneyaz za hudutijih.

28 'Ink'ez nts'oh la hudilhts'í-un ndet la Yak'usda ubudáni'-un khunsul 'et dutínelh,  
 'ink'ez 'ilhiz wheni buba nahutiyeh,"  
 ubúhni.

29 Nts'en'a la nus hoo'en-un Isaiah ndutni,  
 "Mbe la ts'iyaitsuk whuMoodih unlí-un,  
 Lizwifne oolóhne lhubílhiz de,  
 'et de Sodom 'ink'ez Gomorrah whut'enne 'et da' bubulh dahooja la,  
 wheni cha 'et dúztinelh."†

*Israel oodune'ne Yak'usda 'aw highuni lhuhuyilhchoot 'et huwa bula ditni*

30 Njan 'et whunóhnoostun hukwa 'ust'en, 'udun yun k'ut whut'enne 'uda' Yak'usda nalh 'aw ts'ih'un un'a 'uhoot'e' hukwa lhe'hust'en, 'enne 'uhint'oh 'andit Yak'usda nalh ts'ih'un 'uhint'oh, be 'alha' nudzun hut'i, 'i gha 'uhuja.

31 'Et hoonts'i Israel oodune'ne 'aw Yak'usda ook'oh ts'e ts'ih'un un'a hukwa' hit'en, 'et hoonts'i 'aw lhe'huhóolel.

32 'Et di ha diz un'a 'uhóoja? Yak'usda ooghuni 'aw buba 'alha' lhe'yít'oh, 'et huwa 'aw ts'ih'un lhe'hit'el. Moses be 'udustl'us, 'i za hik'úne' oot'en hukwa' hit'en.

33 'Et soo whuz un'a 'uhóoja nus hoo'en-un Isaiah whutso da' Yak'usda ooba dája bubúhni la whe 'utni,

"Whunulh'en, keyoh Zion ts'uwhtútni-un,  
 'et tse‡ 'et nedúntas'alh,  
 'i la dune hinedúntidaih.  
 'Et mbene la Yak'usda ooghuni lhuyúlhchootne,  
 ndi tse buba lhe'yízoo'.  
 'Et hoonts'i mbene la ooba 'alha' hoont'ohne,  
 'enne 'aw hukwaya hoole' aít'oh."

## 10

*Israel oodune'ne, 'aw khuni unzoo-i hiyit 'oohoot'e' aít'oh*

1 Sulhutsinke Yak'usda oots'u ténadusdli khun tilah Israel oodune'ne hu-doojih. Njan 'et sdzi yo whe hukwa' nuszun.

2 'Enne bughun 'alha' dusni whe' dusni. Tube ncha-i be Yak'usda ndet la buts'u húkwa' ninzun-un hukw'ú ne'hutit'en hukwa' huninzun 'et hoonts'i 'aw t'ehonúszun nts'en'a 'aw soo ts'ih'un un'a 'uhutit'elh.

† 9:29 Njan Sodom 'ink'ez Gomorrah whut'enne 'on nus hintsi' k'et 'aw lhubudínel whe musai ubulhtsi. ‡ 9:33 Ndi tse 'i Sizi Gri 'unt'oh.

<sup>3</sup> Ts'ih'un un'a Yak'usda k'úne' hutit'en-un 'et 'aw t'éhonúszun. 'Et huwa nts'en'a la dich'oh 'uhuhóonla whuz un'a ts'ih'un un'a 'uhint'oh na'hududil'i. 'Ink'ez ndet la Yak'usda but's'u húkwa' ninzun-un 'aw hukw'un'a lhe'hínel.

<sup>4</sup> Ndai la Moses be 'udustl'us nets'u húkwa' ninzun-un, 'i Christ Yak'usda ts'un ts'iyantsuk neba' 'etsul 'uhóonla. 'Et huwa Christ nts'en'a la neba 'etsul 'uhóonla, neba 'alha' unt'oh de, 'en gha' ts'int'oh Yak'usda nalh ts'ih'un dune ts'inli.

<sup>5</sup> Mbene la Moses be 'udustl'us gha ts'ih'un dune hik'un'a 'uhoot'en hukwa 'uhut'en de, njan howun, 'et Moses 'uk'unúwhuzguz whe ndutni, "Nts'en'a la ndi khuni nohts'u húkwa' ninzun-un, whuz un'a 'ooht'e' huba' hoont'oh."

<sup>6</sup> 'Ink'ez nts'en'a la be 'alha' hoont'oh-i, 'i gha Yak'usda nalh ts'ih'un un'a 'uts'int'oh, njan 'uk'ehónguz, "'Aw na'ts'oodudolkut aít'oh, 'Mbe utinelh ndo tíyalh Sizi Gri ndus de haitilhtelh?'

<sup>7</sup> K'us mbe utinelh, 'Christ neba whusaítihelh, yaidlánne tuz tíyalh 'et wheni?'

<sup>8</sup> 'Et Yak'usda ooghuni daja ni whe 'utni? Njan 'et 'uk'ehóoguz, "Ndi khuni ndai la oogha ts'ih'un un'a 'uztit'elh, 'i ne-enghoh diz'ai whe 'unt'oh, neze cha 'ink'ez nedzi yo cha diz'ai." 'I 'unt'oh, ndi khuni be 'alha' hoont'oh-i, ndai la be nohbulh yáts'ulhduk, 'i 'unt'oh.

<sup>9</sup> 'Et 'uyoonne Sizi Gri 'en sMoodihti unli, budíni de, 'ink'ez ndzi yo whe mba 'alha' hoont'oh Yak'usda Sizi Gri dazsai whe dunaidilhtih, 'et de dutanjih whe' hoont'oh.

<sup>10</sup> Njan 'et ndzi yo whe mba 'alha' hoont'oh de, Yak'usda nalh ts'ih'un un'a 'int'oh. 'Ink'ez njan 'et 'uyoonne dune budíni de, 'et de dínjih whe 'int'oh.

<sup>11</sup> Yak'usda ooghuni 'utni, "Mbe la neMoodihti ooba 'alha' yint'oh-un, 'aw yooya ulhtisdle."

<sup>12</sup> Lizwifne 'ink'ez 'udun yun k'ut whut'enne 'aw lhelhts'un un'a lhe'hít'oh. Yak'usda ts'iyanne buMoodihti whe 'unt'oh. 'Et huwa mbene la oola' whudóneh hits'u húkwa' utnine, 'enne but's'un tube te'ninzun whe 'unt'oh.

<sup>13</sup> Mbe hinli hóont's'i, neMoodihti hudoojih hits'u húkwa' 'utni de, 'et 'alha' hoont'oh whe hudutijih.

<sup>14</sup> 'Et mbene la Sizi Gri buba 'alha' lhe'ít'ohne, 'et nts'en'a 'uhudutinelh huboolhyis-un hits'u hukwa' dutinelh? 'Aw hiyulh é'dusts'o de, 'et nts'en'a buba 'alha' yutát'elh? 'Uyoonne dune budáni' de za.

<sup>15</sup> Dune but's'ó whehal'h'a' ubudutánelh huba, 'et de za hiyulh údutats'o. Njan huwun Yak'usda be 'udustl'us k'ut 'et 'utni, "Dáwhulzoo' whe' hoont'oh dune khuni unzoo-i whuneuntlhtun, nts'en'a la nedzi yo whudutághel 'ink'ez Yak'usda be 'ut'en unzoo-i ts'olhchoot huba."

<sup>16</sup> 'Et hoont's'i 'aw ts'iyanne íloh khuni unzoo-i hik'úne' 'ust'en. Nts'en'a la nus hóo'en-un Isaiah 'utni, "NeMoodihti ndunne dune daja but's'út'ni-un 'aw buba 'alha' lhe'hóot'oh."

<sup>17</sup> 'Et 'inka Sizi Gri neba 'alha' tít'elh de, bulh úzdits'o de za. 'Et ndi khuni 'i Yak'usda ooghuni 'unt'oh.

<sup>18</sup> Njan 'et hukwa nohooduskut, Israel oodune'ne 'aw eh ndi khuni hiyulh e'dits'il? A, huyulh 'údants'o. Njan Yak'usda be 'udustl'us k'ut 'et 'utni, "Ndunne nakhúni u'áne bughuni ts'iyanne ndi yun k'ut yudánts'o

'et ndi khuni dune hiyubodulh'eh-i nts'e la dune huwhut'í-un ts'iyawh hidánts'o."

<sup>19</sup> 'Et cha za nohooduskut, 'et Israel oodune'ne 'aw eh njan whulhé'hudusts'o? A, huyulh 'údants'o. 'Udechoo Moses njan 'et 'utni, "Mbene la dune ookeyoh hooloh ninzúnne,

'enne bughe' ootalhni h nohtíselh.  
 'Et ndunne keyoh whut'enne iloh tune' hut'enne,  
 'enne bugha tube huntálhch'oh nohtíselh,"

ubúlhni.

<sup>20</sup> Nus hoo'en Isaiah 'aw whélnhijut dája dutinelh la, ndet la Lizwifne bubulh yáilhduk da' 'ink'ez Yak'usda ba yalhduk whe ndutni,

"Mbene la 'aw skalhe'hoodulhkútne,  
 'enne la sghu nahahoon'ai.

Mbene la 'aw skúlhnust'ohne,  
 'enne la bubuná' duniztan."

<sup>21</sup> Njan 'et Yak'usda Isaiah ts'un 'et 'utni 'udun yun k'ut whut'enne bughun.  
 'Ink'ez Israel oodune'ne njan 'et úbulhni,

"Dzin dullyiz whe nohkadúzni khun tilah sts'u tóohdil ha.

'Et hoonts'i 'aw 'uk'únuhlhe'ust'enne 'ink'ez 'uts'un 'uninzunne hinli.

'Ink'ez 'aw sts'ó tooya' hukwa lhe'hunízun."

## 11

### *Yak'usda Israel oodune'ne 'awhuz bugha té'ninzun*

<sup>1</sup> 'Et cha za nahooduskut, Yak'usda dudune'ne 'ilhiz eh 'ún ubutilhdil?  
 'Awundooh! Si cha 'ilhoghun Israel oodune' 'ust'oh. Abraham be dusya  
 'ink'ez Benjamin bulh díszulh.

<sup>2</sup> 'Awúndooh, 'aw Yak'usda dudune'ne ts'iyawh iloh únubutilhdil. 'Et whutso  
 da' t'ebuninzunne. 'Et 'aw eh whunalhuzulhni Yak'usda be 'udustl'us k'ut  
 dája ni nus hoo'en-un Elijah 'en ghun? Nts'en'a la Yak'usda yuts'u tédudli Israel  
 oodune'ne, 'enne buch'a 'útni,

<sup>3</sup> "SMoodihti nyenus hoo'enne cha buba hanghan 'ink'ez nloodel cha  
 nanáhinanyuz. Si za 'et nenúts'ut. Si cha suhutuzilghelhel ha ska hunuta,"  
 whe yuts'u tédudli.

<sup>4</sup> 'Et hoonts'i ndet Yak'usda yadáni'? Njan 'et déyulhni, "Awhuz 7,000ne  
 dunene 'et buzúsdla. 'Enne 'aw ndi 'uk'eltsi Baal 'aw 'i hits'u téninoohlzin  
 'ink'ez hits'u ténadoodli áit'oh."

<sup>5</sup> 'Et hoonts'i 'andit dzin 'awhuz whulohne Israel oodune'ne dujihne  
 hoonli. 'Enne Yak'usda ye únzoo-i be 'utahábanlane, 'enne 'uhint'oh.

<sup>6</sup> 'Et whuz un'a Yak'usda ye únzoo-i, 'i be uzdijiz, 'aw khuni netl'adít'ai-i  
 ookw'úne' ts'ut'en-un 'aw 'et huwa iloh. 'Aw nja dulhúhoot'el de, Yak'usda ye  
 únzoo-i hootáloh whe' hoot'oh. 'Et ndi khuni netl'adít'ai-i ook'úne' ts'ut'en  
 huwa uzdujih ts'utni de, 'ink'ez nts'en'a Yak'usda ye únzoo-i be uzdutijih  
 uzdutinelh? 'Et dune howu yahalhduk nts'en'a hudutijih, ndi khuni Moses be  
 'udustl'us gha netl'adíls'ut-i ook'úne' ts'ut'en hoonts'i, 'i gha uzdoojih áit'oh.  
 Njan 'et uw'húlhni.

<sup>7</sup> Khuni njan ndutni whe 'utni, Israel oodune'ne budzi duts'un, 'et huwa  
 hukwa húnuta-un 'aw nalhuhuhó'al. 'Et hoonts'i 'onghohne 'utahályanne,  
 'enne nahoooon'ai.

<sup>8</sup> Nts'en'a la Yak'usda be 'udustl'us k'ut 'uk'unúwhusguz-un soo whuz un'a  
 'uhóoja.

"Yak'usda 'ants'i stézne dune lé'binla.

Buna hóoni 'et hóonts'i 'aw hiye lhúhoos'en.

Budzo cha hoonli 'et hoonts'i 'aw hiye lhe'dusts'o.

'Andit dzin whuts'un 'et za ndihínt'oh,"  
 whe ndutni.

<sup>9</sup> David 'en cha njan bughun ndutni,  
 "Ndai la Yak'usda ncha-i bugha íninla-i whute bilh 'ink'ez tsayilh buka  
 néyults'ut lé'uja.

Ndai bughá íninla-i, hikayá oole' buboolhtselh.

'Et whuz un'a ndi dulubeshi dich'oh hik'elha whutlhtselh.

<sup>10</sup> Buna whute hiye lhuhoos'en Yak'usda ye únzoo-i hiye nóolh'en whuch'a.  
 'Ink'ez hiyé dzoh nudeh-i,  
 'i be yo húnoot'i dune ndaz-i nughe k'un'a,"

ni.

*Yak'usda Israel oodune'ne 'aw 'ilhiz iloh bula ditni*

<sup>11</sup> 'Et cha za nohooduskut, Lizwifne 'et tse gha huntízhghal, 'et 'ilhiz wheni  
 nintá hutilts'ulh ha eh nahílt'sut? 'Aw whuz un'a 'uhót'e' aít'oh! Yak'usda  
 ooghuni hika lhe'nízun 'et huwa 'udun yun k'ut whut'enne 'et 'andit hiye  
 dújis. 'Et whuz un'a 'uhutinelh Lizwifne 'udun yun k'ut whut'enne bughe'  
 hootalnih.

<sup>12</sup> 'Et hoonts'i tank'us un'a 'uhut'en-un 'et huwa hut'en, 'uyoonne Yak'usda  
 ye únzoo-i be huhóont'i' suli' de, 'et de ndet la Yak'usda Lizwifne buch'a  
 hóontun-un 'i be 'udun yun k'ut whut'enne tube huhóont'i' ubulhtsi. 'Et 'oh  
 de whusahóolts'ut de, Lizwifne, 'enne cha Yak'usda buzkeh huzdli' de, 'et 'on  
 nus hoonzoo tileh.

<sup>13</sup> 'Awet nohni 'udun yun k'ut whut'enne nohbulh yásduk, Yak'usda  
 'utáhasálhiti nohni nohba whel'a-un nóosdle' ha. Tube sba tube hooncha.

<sup>14</sup> Njan nohdutásnelh-un, 'et whe sulh Lizwifne huwe' hoolnih huwa tilah  
 whulohne hudoojih.

<sup>15</sup> Yak'usda Lizwifne 'únubutilhdil, 'ink'ez Sizi Gri 'en gha nohni 'udun yun  
 k'ut whut'enne 'aw 'on 'un nohbulh lhónilch'oh. 'Et Lizwifne Sizi Gri hits'u  
 nálhya buboolhyih ha de, 'et Yak'usda nabitálhchulh whe' hint'oh. 'Ants'i dune  
 yaidlanne cha za dune nahusdli' le'hutinelh.

<sup>16</sup> 'Et whunóhunistun nts'en'a la 'uwhutánelh. Whunulh'en, lhes nantílhdo  
 de, 'udechoo-i unzoo 'únt'oh de, 'et whuloh cha ts'iyawh unzoo tileh. 'Et  
 'udun, duchun ooghih unzoo de, 'et oozooschum cha ts'iyawh 'utizoo'.\*

<sup>17</sup> 'Et hoonts'i ndi duchun unzoo-i oolohkhi oozischum k'unúdistuk. 'Et  
 nohni 'udun yun k'ut whut'enne, 'et duchun 'oh núnilhye'-i Olive duchun  
 huyúlhni, 'i le'aht'oh. 'Et ndet la oozooschum k'unúdistuk-un 'et nohni  
 hik'enánohdanla. 'Et huwa ndi duchun ooghih gha 'ink'ez ook'unih unzoo-i  
 nohch'e' suli'.†

<sup>18</sup> Ndi oozooschum k'unúdistuk-i ooch'az dóhtni junih! Whuz un'a  
 'ududúlhti' de, 'aw t'ewhunúzúszun ndi 'ughih 'aw oolalhe'zaht'en k'us 'ughih  
 'i nohla' ut'en.

<sup>19</sup> Ndi uzooschum k'unúdistuk wheni ook'enázdoodilh ha doohtni' la.

<sup>20</sup> Njan ndudahní-un 'álha' hoont'oh. Lizwifne 'aw Yak'usda ooghuni  
 lhahuyílhchulh 'et huwa 'uhuja k'unódistuk. 'Et nohni Yak'usda ooghuni  
 úlhchoot 'et huwa áhya Lizwifne buk'enánohodanla. 'Et whe' dudolhti' junih,  
 'ants'i whenoolhjut.

<sup>21</sup> Ndi duchun soo oozooschum 'aw Yak'usda yugha télhe'nizil de, 'et de  
 nohni cha tilah nohgha télhe'nooszin.

\* **11:16** Paul 'en Abraham yughu yalhduk. 'En 'udechoo-un Yak'usda nalh ts'ih'un un'a 'unt'oh whe  
 'unt'oh. Yak'usda ooghuni ooba 'álha' yant'e' 'únt'oh-un whe 'unt'oh. 'En k'un'a yuk'élh'az tizdíline  
 Yak'usda buzkeh huzdli', ni whe 'utni. † **11:17** Ndi 'uzooschum k'unúdistuk-i Lizwifne le'hint'oh.  
 'Et mbene la hik'enádidíline 'udun yun k'ut whut'enne e'hint'oh ni whe' utni.

<sup>22</sup> Njan whudáhts'o-un 'et hodulh'e', Yak'usda dalcho-i be nets'un únzoo 'ink'ez 'uyoonne dálcho-i be bubúlh huskeh. Mbene la Yak'usda ooghuni lhahuyílhchulhne, 'i be nahílt's'ut, 'enne buts'un ooghuni tube duts'un whe 'unt'oh. 'Et nohni 'udun yun k'ut whut'enne ooghuni úlhchoot, 'et Yak'usda ye únzoo-i be whuz un'a za aht'oh de, 'et huwa 'unt'oh nohts'un únzoo. 'Et Yak'usda ook'un'a 'aw hukwa lhe'núszun de, nohni cha k'únudútihtuk, uzooschum k'un'a.

<sup>23</sup> 'Et ndunne Lizwifne Yak'usda hits'u nátidulh hukwa' huninzun 'ink'ez highuni hitalhchulh de, 'et de ndi uzooschum k'unúdistuk-un 'et Yak'usda yuke'enábudutieleh, Yak'usda dich'oh za 'et dutínelh 'et huwa.

<sup>24</sup> Nohni 'udun yun k'ut whut'enne ndi duchun Olive huyúlhni, 'oh nunulhye'-i, 'i oozooschum le'aht'oh. Yugha 'óoli whe k'unídizsel 'ink'ez Olive duchun unzoo-i, 'i yughun nenaídinla, 'aw whuz un'a lhe'hust'en 'et hoonts'i. 'Et Lizwifne ndi duchun dinzoo-i 'et duhínt'oh. 'Et huwa Yak'usda 'aw ooba howa lhúhoolna' ndi uzooschum k'unúdistuk-i duchun unzoo-i ghu nenaídutalelh.

<sup>25</sup> Sulhutsinke njan whe 'hoont'oh hooyoh-un, 'et t'ewhutihzeh nohba hukwa' nuszun, doo ka la ts'iyantsuk t'ets'onínzun na'dudólh'e'. Njan 'et dúhoont'oh, 'et whulohne Lizwifne budzi duts'un hutileh, ndet la 'udun yun k'ut whut'enne whudizulh-un, 'enne buba 'etsul 'uwhutánelh 'et whuts'un.

<sup>26</sup> 'Et hukw'elh'az Israel oodune'ne ts'iyawh hudutijih. 'Et Yak'usda be 'udustl'us k'ut 'uk'uwhusguz 'et ndutni, "Neulhyis-un 'et keyoh whuti Zion huwhútni ts'e whuz de hatíyalh.

'Et Jacob oodune'ne<sup>‡</sup> nts'en'a la tank'us 'úhut'en-un whuch'a nabutálelh.

<sup>27</sup> 'Et ndet la bulubeshi buba 'ún tisdil de, 'et 'oh de whuz un'a buts'un khuni lhadúsda inle', 'et huwa tisnelh."

### *Yak'usda ts'iyanne gha te'ninzun*

<sup>28</sup> Ndi khuni unzoo-i be nóhbulh yasduk, 'i 'aw Lizwifne hiyólhchoot hukwa lhe'hunízun, Yak'usda hich'az ditnine hinli. 'Et huwa nohni 'udun yun k'ut whut'enne duhjih. 'Et hoonts'i Yak'usda butsoda'ne<sup>§</sup> 'utahábanla. 'Et 'enne bugha Yak'usda Lizwifne buk'entsi'.

<sup>29</sup> Mbene la Yak'usda dutijih ha buka' dani'ne, 'ink'ez ndai la Yak'usda bugha iúnle-i, 'aw 'ats'un un'a naootneh aít'oh.

<sup>30</sup> 'Et nohni 'udun yun k'ut whut'enne niz de ha óodanzut-un Yak'usda 'aw ook'únulhe'zagt'en. 'Et hoonts'i 'andit dzin whuts'un 'et Lizwifne, 'enne Yak'usda 'aw hík'unulhé'ust'en. 'Et whu la gha ts'e lubeshi 'ulh'en-un nohba 'ún whutílhduh-un nohghá whults'ut.

<sup>31</sup> Nduunne Lizwifne, 'aw 'uk'únulhe'ust'enne, 'enne bugha Yak'usda nohgha te'ninzun. 'Et whuz un'a za Yak'usda 'ílhudzin 'enne cha la bugha té'nozeh.

<sup>32</sup> Ts'iyanne yuk'únulhe'ust'en 'et huwa 'adinlane lé'binla, didut bugha té'nozeh ha.

### *Yak'usda dálzoo' la Lizwifne 'ink'ez 'udun yun k'ut whut'enne butilhyis huba*

<sup>33</sup> Yak'usda ye néts'un unzoo-i, ye whúnih-i 'ink'ez ndet la ts'iyantsuk t'ewhunínzun-un, 'et tube hooncha whe' hoont'oh. Nts'en'a la be 'ut'en k'oh 'ink'ez 'utáhawhúle-un,

<sup>‡</sup> 11:26 'Et njan Jacob oodune'ne Israel oodune'ne 'i khuni 'i za 'unt'oh. <sup>§</sup> 11:28 Butsoda'ne, 'enne Abraham, Isaac, 'ink'ez Jacob 'uhint'oh.

'aw dune t'ehonózinne hooloh 'ink'ez 'aw nahó'alhne cha hooloh.

<sup>34</sup> Yak'usda be 'udustl'us k'ut 'uk'unúwhusguz-un 'et dutni,  
'Yak'usda dája ninzun la, 'aw dune t'ehonínzun-un hooloh.

'Ink'ez 'aw yugha dóoni'-un cha hooloh.

<sup>35</sup> Yak'usda ts'iyaitsuk negha unle,  
'aw ooba k'elha ts'oooolhtselh ait'oh."

<sup>36</sup> Ts'iyaitsuk inla,  
'ink'ez 'en oogha ts'iyaitsuk 'uyínla k'un'a 'unt'oh,  
'ink'ez 'en ba ts'iyaitsuk ulya.

'Et huwa nohdúсни 'ilhiz wheni Yak'usda 'en za uzdólhti'. 'Et ndó honeh.

## 12

*Yak'usda oodune'ne nts'en'a la Yak'usda hukwa' ninzun, whuz un'a 'uhoot'e'huba'hoont'oh, 'aw dich'oh hukwa' huninzun-un huwa iloh 'uhut'en*

<sup>1</sup> Sulhutsinke ndai la Yak'usda ye negha te'ninzun-i, 'i be nohts'u tédusdli, lubeshi yit whe be khahna-i 'ilhiz wheni Yak'usda oogha ínah'aih. 'Et ndahja de, Yak'usda hootát'e' 'ink'ez whuz un'a ts'ih'un un'a ooba' tih't'elh.

<sup>2</sup> 'Ink'ez nts'en'a la dune 'andit dzin dahínt'oh bubun dóht'e' hukwa 'ooh't'en junih. 'Et k'us 'andit noheni 'ats'un un'a na'ahleh. 'Et ndaht'en de, 'et la t'éwhunóhzin ndet la Yak'usda nohts'u húkwa' ninzun-un. Yak'usda be 'ut'en k'oh ts'iyawh hoonzoo, ts'iyanne ba hoonzoo, 'ink'ez ts'ih'un un'a 'uhoont'oh.

<sup>3</sup> Yak'usda yé sts'un unzoo-i, 'i gha nohdúсни, nohni mbe la Sizi Gri k'úne' 'ut'enne dubanadóhti' junih. Yak'usda nalh dune nchane ahli, 'et whe' dudolhti' junih, 'et k'us noheni 'ats'un un'a oolhdzin. 'Uyoonne ghú núní nuhzut te, whulohne 'on nus hoolhtus whe Yak'usda buba 'alha' 'unt'oh.

<sup>4</sup> Neyust'e 'ilho za unli, 'et hoonts'í lhai oogho hoonlí. 'Et 'i ts'iyawh neyust'e lhelhdun huba' 'unt'oh.

<sup>5</sup> Christ oodune'ne whuz un'a za ts'int'oh. Wheni ts'uldai hoonts'i, ts'iyawh Christ ooyust'e ooch'e' ts'inli, 'et huwa 'ilho za ts'inli.

<sup>6</sup> 'Et hoonts'i ts'iyawh lhelhts'un un'a Yak'usda ba 'uts'ut'en, ye únzoo-i gha 'úja 'ut'en lhelhyoo neghalya 'uts'oolh'en ha. Whulohne Yak'usda be nus hoo'en-un, 'et bughá óonin'ai, dahoolcho la Yak'usda bughá óonin'ai-un, whuz un'a za yahoolhduk huba' hoont'oh.

<sup>7</sup> Whulohne huye 'ut'en 'utilh'elh oole' ha buka' hudani'. Whulohne whunih bubulhtsi 'uyoonne hodoolh'eh ha.

<sup>8</sup> Whulohne 'uyoonne dune budzi úlhtus ubólh'e' ha bughá whunt'ai, whulohne huyut'i-i 'uyoonne hiye bulá' 'oot'en ha 'ink'ez 'aw highu yalhoolduk. Whulohne mbene la dune tso whudílhdzulhne soo cho huwa hinli whe nduhóot'e'. Whulohne cha budzi hóont'i' whe 'uyoonne gha te'hunozeh ha, 'et cha bughá whunt'ai.

<sup>9</sup> Whahts'it whe 'uyoonne k'eooh'tsi' junih. Tank'us 'úhoont'oh-un whuts'u doohtni, Ts'ih'un 'uhoont'oh-un 'et hoohtun.

<sup>10</sup> Nts'en'a la lhulhutsinke lhk'ehutsi', 'et whuz un'a soo ts'ih'un un'a lhk'eh'tsi'. Ts'ih'un un'a né'lhoolh'en nohgha whúlts'uk totsuk.

<sup>11</sup> Ndai la 'ut'en oogha ítahnalh-i, soo cho 'oolh'en. Ndai la Ndoni ye nohla 'ut'en-i, 'i be soo hoonáht'i' whe Yak'usda ooba 'ooh't'en.

<sup>12</sup> Ndet la Yak'usda oots'u húkwa tse hoolhlí-un 'et huwa tube hóht'e'. Ndet la Sizi Gri ook'úne' aht'en huwa dune nohezúla de, 'etsul 'oohneh junih, 'ahoolhyiz neMoodihti oots'u tenádahdli.

13 Mbene la Yak'usda ooch'e'ne\* 'endunidzítne, ndai la aht'í-i whuloh be bula aht'en. 'Ahoohyiz huba nohyoh 'udun udólhtan.

14 Dune nohezúla de, buts'un oohzoo' 'ink'ez buk'ehoohyih junih.

15 Mbene la hóont'i'ne bubulh hóonah't'i', 'ink'ez mbene la utsóne bubulh áhtso.

16 Ahcha na'dudolh'e' junih. Tel'enne buba nus dáht'i' noohzin junih. Whuníhne dune na'dudólh'e' junih.

17 Nohni dune tank'us un'a nohts'u ne'hut'en de, nohni cha tank'us un'a buts'un ne'ooht'en junih. 'Et k'us ts'iyanne nalh 'ahoolhyiz Yak'usda ba ts'ih'un un'a za ne'ooht'en.

18 Ndet la soo 'on 'un oohneh aít'oh whe ts'iyanne dune ts'ih'un un'a lhts'un 'ooht'e'.

19 Sk'ekene khun k'unóohdzin junih. Yak'usda 'en ootl'awháh'aih. Njan Yak'usda ooghuni 'et 'utni, "Be k'uznudzun-i, si sch'e' 'unt'oh. Si hukw'elha whutiselh," ni.

20 'Et huwa nohch'az ditni-un ooye'ílt's'ul de, oogha 'óoh'alh.

'Et ta'óosda de, too oogha óolhdzeh.

'Et diz un'a aht'en de,

'et de 'ants'i kwuntsit ootsi la dahdzaih le'tiht'elh.†

21 'Uyoonne tank'us 'úhut'en 'i be nohch'a' hoolhdeh junih k'us hoontsi'-un 'ut'en unzoo-i be whuch'a' oolhdeh.

## 13

### *Keyoh whumoodih buk'úne' oot'en*

1 Sizi Gri oodune'ne ndet la keyoh hudilhts'í-un, mbene la keyoh huwun-line buk'úne' hoot'en huba' hoont'oh, 'et whuz un'a Yak'usda 'uhóonla 'et huwa.

2 Ndet la keyoh dune hudilhts'í-un, dája hubuhútni la, 'et whudulhyoh 'uhut'en de, 'et de Yak'usda 'uhóonla-un, 'et whudulhyoh 'uhut'en whe' hut'en. 'Et ndut'enne, 'enne ndi yun k'ut buba nahutiyeh.

3 Ts'ih'un un'a ndi yun k'ut dúlhts'i de, 'et de nohmoodihne bubé noohljut aít'oh. 'Et la ts'ih'un un'a nohghu yaooduk. Hoonzoo k'un'a aht'en de, 'et ndai la khuni nohtl'aídan'ai-i, 'i be noohljut huba lhe'hóot'oh.

4 Nduhne nohmoodihne, 'enne Yak'usda ba 'ut'enne lé'hint'oh. 'Et tank'us ne'áht'en de, 'et de bube noohljut. Ndai la hiye úlhtus-i butl'á yuz'ai 'i be dzoh nunóhotilhdzut 'et huwa. 'Aw 'ants'i íloh 'uhint'oh.

5 'Et huwa mbene la nohmoodih online buk'úne' 'oohten huba' hoont'oh. Nohbulh huhuntalch'oh, 'et huwa za iloh, nohyo ts'e oogha t'ets'oninzun-i nohba hoonzoo whutilhtselh de, 'et ndi khuni ook'úne' ooht'en huba' hoont'oh.

6 Mbene la Yak'usda ba nohmoodih unlíne, 'enne 'ahoolhyiz 'uhut'en. Ndi 'ut'en 'uhuyulh'en-i 'et buba k'elha hole' huba' hoont'oh.

7 'Et huwa njan ndet la nohts'ú whuz'ai-un 'uk'elha whulh'i. Ndet la nohnich'oh 'ink'ez nohyun cha nohts'ú whuz'ai-un, ts'iyawh hukw'elha whulh'i. Nohmoodihne sóo ne'bulh'en 'ink'ez budólhti'.

*Sizi Gri oodune'ne nts'en'a la dich'oh k'enahutsi', whuz un'a dudulh dunene buk'éhootsi'*

\* **12:13** Mbene la Sizi Gri hik'úne'ut'enne, 'enne Yak'usda ooch'e'ne hinli. † **12:20** 'Et 'ut'en unzoo-i buts'un áhla, 'ink'ez lubeshi ch'az náluhuil'al de, 'et de Yak'usda yé k'utitnelh whe 'unt'oh. 'Et whuz un'a howu nuni hunoozut, ni whutílah 'utni.



<sup>8</sup> 'Uyoonne nohts'ó holh'a' junih, 'uyoonne dune k'etihtsi'-un 'et whe za nohts'ú whuz'ai. 'Et la nyulh dune k'entsi' de, 'et ndai la Yak'usda khuni whutl'aídan'ai-i, 'i ts'iyawh ook'úne' 'int'en whe 'int'oh.

<sup>9</sup> Ndai la khuni Yak'usda whutl'aídan'ai-i, 'i dune úlhni, "Ts'ekoo k'us dune bulh ninta' 'ooht'en junih, dune soolhghelh junih, 'undunooht'ih junih, 'uyoonne ba hoohts'it junih, 'uyoonne ch'e' ha' noohzin junih."

Nts'en'a la k'enats'utsi', whuz un'a nohbulh dune buk'ehtsi' de, 'et de ndi Yak'usda khuni whutl'aídan'ai-i 'ink'ez' onghoh-i cha, ts'iyawh kw'úne' zaht'en whe' hoont'oh.

<sup>10</sup> Mbe la dudulh dune k'entsi'-un, 'aw yuts'un tank'us un'a ooneh aít'oh. 'Et huwa hoont'oh, nohbulh dune buk'ehtsi' de, ndai la Yak'usda ook'oh ts'e nohts'u húkwa' ninzun-un ts'iyawh lhaoodulhla whe' hoont'oh.

<sup>11</sup> 'Et ndi t'ewhunáhzun ndet la whudizulh-un 'awet neba whulatoh tileh. 'Uda' Sizi Gri neba 'alha' 'unt'oh ínle'. 'Oh da' whézdutijih-un nilhza' whuz'ai ínle'. 'Et 'andit' on nus nilhdukw hoolts'ulh, 'et huwa ts'ets'oodeh huba' hoont'oh.

<sup>12</sup> 'Awet yutilhkai, 'et huwa ndai la 'ut'en tsalhgus yo 'uts'ulh'en-i, 'etsul 'uts'oolh 'ink'ez ndai la 'ut'en 'uztilh'elh-i dzenis 'uts'oolh'en.\* 'Et nduts'út'en whe soo cho netsudule ets'udulh le'ts'oot'en. 'Et de 'aw nech'a' oolhdeh aít'oh.

<sup>13</sup> Ndai la dzenis 'ul'en-i, 'i za ts'oolh'en. 'Et whuz un'a za ts'ih'un un'a yinka uzdólt's'i. Tátnaine bulhe'ts'oost'en, taznutnai-un 'et cha 'etsul 'uts'ooneh, 'ink'ez ts'ekoo k'us dune bulh lubeshi 'uts'ulh'en-un, 'et cha 'etsul 'uts'ooneh. Lhe'ts'údulh-un 'ink'ez 'uts'ooln'ih-un 'et cha 'etsul 'uts'ooneh.

<sup>14</sup> Ndi 'ut'en ntsi'-i, 'i ook'et neMoodihti Sizi Gri 'en za ook'ún'a 'uts'oot'e', 'ink'ez 'aw' on 'at neyust'e lubeshi ts'úlhnoost'i.

## 14

### *Sizi Gri oodune'ne 'aw buba nats'oohooyeh huba lhe'hóot'oh*

<sup>1</sup> Sizi Gri be 'ut'en k'oh huwun, mbe la ye be 'alha' hoont'oh-i, 'i be soo lhe'íltus de, whute nohbulh tenadoodli, 'ink'ez oodulhyoh 'udoohni' junih.

<sup>2</sup> Whulohne Sizi Gri unidúlhne, hiyé 'alha' ninzun-i tetsun huwa, buba 'álha' hoont'oh 'aw 'utsung lhúhus'al. 'Et whulohne ts'iyai tsuk ha'alh-un, 'et buba 'alha' hoont'oh.\*

<sup>3</sup> Mbe la ts'iyaitsuk a'álh-un, ndun 'utsung lhús'al-un, 'et hukwa yuts'u dootni junih. 'Ink'ez mbe la 'utsung lhús'al-un, ndun ts'iyai a'álh-un, 'en cha 'aw ooba nahooyeh junih. Yak'usda hóont'i' whe ts'iyawh hubílhchoot 'et huwa.

<sup>4</sup> Mbe na'dunúhdzun Yak'usda ba 'ut'en-un ooba nahutihyeh nahzun? Oomoodih 'en za' idutánelh soo 'int'en k'us 'aw soo lhe'zint'en. Didutch'oh soo tiyin, Yak'usda 'en yula tit'elh 'et huwa.

\* **13:12** Ndi khuni whunéulhtun whe 'utni, tsalhgus yo 'ut'en-i, netsudule be 'ut'en, dzenis 'ut'en-i, Yak'usda be 'ut'en 'unt'oh ni whe 'utni. \* **14:2** 'Et 'oh da' 'udun yun k'ut whut'enne buk'el'tsi hits'u tenadudli-i, 'i khuna-i hits'u dílhk'un. Whuloh 'i la loodel k'ut hidílhk'un 'et 'on 'un-i, 'i huye 'óoket. Whulohne Sizi Gri unidúlhne 'utsung be 'óoket-i me 'únt'oh huninzun. 'Et whu la gha ts'e huyoo'alh aít'oh. 'Ink'ez whulohne Lizwifne cha Sizi Gri hits'u nálhyanne hukw'elh'az Moses be 'udustl'us gha 'aw guogoosung hoo'alh hukwa lhe'hunízun.

<sup>5</sup> Whulohne dune 'uhuninzun whuloh dzin-un 'on nus whudíztí', 'et whulohne 'uhuninzun dzin totsuk buba lhghazá' hoont'oh. 'Et ts'iyanne dája huninzun-un, 'et buba 'alha' hot'e' la.

<sup>6</sup> Mbe la whuloh dzin 'on nus whudíztí' ninzún-un, 'en njan 'et dzin neMoodihti yudólhti' ha, 'udun neóonin'ai huwa 'útni. Mbe dune la dzin 'on nus lhodíti' ninzun-un, whuz un'a la neMoodihti wheyúdílhti'. Mbe la ts'iyaitsuk a'álh-un Yak'usda musi yúlhni 'ink'ez yunalh 'et yu'alh. Mbe la 'utsung lhús'al-un, 'en cha Yak'usda musi yudáni'.

<sup>7</sup> Yinka uztídalh 'ink'ez dáztsisah, 'aw whenich'oh 'utáhats'óhoo'alh aít'oh. 'Aw whenich'oh duba moodih nalhts'idloh 'et huwa.

<sup>8</sup> Yinka uzdlilhts'i de, neMoodihti kw'úne' ts'oot'en huba' hoont'oh. 'Et dáztsisah de, Sizi Gri yununúdilhne k'un'a dats'óotsah. Nts'en'a la ts'ukhuna k'us daztsisah de, neMoodihti ooch'e' ts'inli.

<sup>9</sup> Christ dazsai, dunadija, 'ink'ez cha za yinka usda. 'Et yinka dilhts'íne 'ink'ez yaidlánne cha buMoodihti tileh ha 'uja.

<sup>10</sup> 'Et di ha Sizi Gri be nohulhutsinke online buba nahahyeh, k'us 'et di ha 'enne buka lhe'nahzun? 'Wheni ts'iyawh Christ neba nahutiyeh ha oobut núzdutalyah whe' hoont'oh.

<sup>11</sup> Njan huwun Yak'usda be 'udustl'us 'uk'ehóoguz-un 'utni,  
 "NeMoodihti nja dutni,  
 nts'en'a la khusna hukw'un'a,  
 ts'iyanne sbut dugwutsi be hóoyin.

'Ink'ez ts'iyanne ooba 'álha' hot'e' Yak'usda usdli.'

<sup>12</sup> 'Et huwa 'ilhoghun ts'inli whe dats'it'en-un, 'et Yak'usda uzdutánelh.

<sup>13</sup> Njan whuts'un 'aw 'uyoonne ba nalhts'uhooosye. Ts'iyawh whuz un'a za uznoozin, 'aw 'on 'at neyulhutsinke Sizi Gri hich'az naóol'ah ha whuz lhuznoolht'i, k'us buba dzoh 'uts'udooni' junih.

### *Nyun ngha te nyulhutsin sizi Gri ch'az naóol'ah junih*

<sup>14</sup> Sizi Gri 'en gha t'ewhunúszun 'alha' hoont'oh 'aw 'ut'alh-i me ts'utni-i hooloh. 'Et hoonts'i whulohne 'uhuninzun 'i 'ut'alh-i me 'únt'oh uninzun de, 'et de 'en dune ooba me yinli whe 'unt'oh.

<sup>15</sup> Ndai la ah'álh-i, 'ink'ez nohulhutsinke yuch'a nijoot ninzun de, 'ink'ez bunalh yah'alh de, 'et de be nék'ets'ints'i-i yit yinka dúlhts'ih whe' aht'oh. Ndai la ah'álh-i, 'i gha Christ buba dazsaine ninta' bólh'en junih.

<sup>16</sup> 'Et huwa nts'en'a yinka dúlhts'i-un nohba 'alha' hoont'oh de, 'et 'uyoonne tank'us un'a howu yahutilhduk de, 'ants'i whula doohtnih.

<sup>17</sup> Yak'usda dune k'úne' bul'en-un huwun, 'aw ts'a'álh-i k'us ts'utnai-i, 'i ghun iloh 'uhoont'oh. 'Ndoni neyudílts'ut 'et huwa Yak'usda nalh ts'ih'un 'úts'ut'en, 'en gha nedzi dóghel, 'ink'ez ts'ohót'e'.

<sup>18</sup> Mbe la Christ diz un'a yuba 'ut'en-un Yak'usda tube yúlh hoont'i' 'ink'ez dune cha buba ts'ih'un 'ut'en.

<sup>19</sup> 'Et huwa ndiz un'a yinka uzdólts'i' huba' hoont'oh, 'ahoolhyiz neba whudizghel ts'úznoot'i' 'ink'ez lhla ts'oot'en.

<sup>20</sup> 'Ut'alh-i gha Yak'usda be 'ut'en gak hoolhtselh junih. 'Et 'alha' hoont'oh 'aw hooliyaz me unli hooloh. 'Et hoonts'i mbe la yuti'ulh-i ooba náwh 'uhoont'oh de, yan'al de, 'et ooba lubeshi 'uhoont'oh.

<sup>21</sup> 'Utsung tíh'ulh, k'us ts'ekoo too' tíhtnelh, k'us ndai la 'ilh'en-i, 'i gha nohulhutsin ooba nawh 'uwhut'ih, k'us ooba dzoh cha lhiih, k'us ye 'alha' ninzun-i cha tetsun lhiih de, 'et ndaht'en de, 'aw nohba ts'ih'un lhe'hóot'oh.

<sup>22</sup> Nts'oh te la ndaht'en-un, be 'alha' hoont'oh-i, 'i be ndaht'en de, nohni 'ink'ez Yak'usda bulh za nohba' hoont'oh. Mbene la njan dahút'en-un, tank'us 'úhut'en lhonízunne de, 'enne hóont'i'ne 'uhint'oh.

<sup>23</sup> Et hoonts'i mbene la 'utsung á'alhne 'aw buba 'alha lhe'hóot'oh ninzunne, 'et hiyu'alh de, 'et dudzi yo whe t'ehontázin ninta' hant'en, hiyé 'alha' ninzun-i gha 'et dulhúhinel 'et huwa. 'Ink'ez ndai la hoonliyaz 'uts'ulh'é-n-i be 'alha' uzninzún-i gha lhe'ts'ulh'en de, 'et neba lubeshi hoonli.

## 15

### *'Uyoonne dzi óolhzoo' za hukwa' ooh't'en*

<sup>1</sup> Wheni mbene la Sizi Gri ba ulhtúsne, ndunne Sizi Gri ba tetsúnne bu-bodin'ai le'hint'oh, 'enne bula ts'oot'en. 'Aw whenich'oh za nedzi ts'ilhdzoo' hukwa lhe'ts'oost'en.

<sup>2</sup> 'Ilhone ts'inli whe nebulh dunene bula ts'oot'en. 'Et de la Sizi Gri ooba ulhtusne hoole'.

<sup>3</sup> Christ'en 'aw dich'oh k'únulhe'it'el. Yak'usda be 'udustl'us k'ut 'uk'unúsguz whuz un'a 'it'en. 'Et ndutni, "Mbe la nch'az yálhdukne ndai la hiye nch'az yálhduk-i, 'i ts'iyawh si sts'e' hutni."

<sup>4</sup> Ndet la 'uda' Yak'usda be 'udustl'us k'ut 'uk'ehóoguz-un oogha whúts'o dool'eh ha 'uk'éguz. 'Et whe ndet la Yak'usda nets'u hoozi-un 'i ooba ts'ilh'i 'ink'ez ooba ts'ilh'i za ts'int'oh.

<sup>5</sup> Njan 'et nohba hukwa' nuszun, Christ, Sizi ts'utni-un, 'en ook'un'a ts'ih'un un'a lhulh yínka dólhts'i'. Yak'usda nalhts'ulyaz neba sulh'i, 'ink'ez nedzi ílhdzoo, whuz un'a uncha lhts'un aht'oh.

<sup>6</sup> Lhgha za' uznudzun 'ink'ez lhgha za' lhulh yáts'oolhduk nohba hukwa' nuszun. 'Ilhoh 'alhgoh Yak'usda Sizi Gri neMoodihti oobá uzdólhti'.

### *Sizi Gri 'en gha Lizwifne 'ink'ez 'udun yun k'ut whut'enne 'ilhoghun za huzdli'*

<sup>7</sup> 'Et nts'en'a la Christ nenilh'en, whuz un'a za lhunoolh'en. 'Et ndaht'en de, Yak'usda dutálhti'.

<sup>8</sup> Njan nohdúsní, Sizi Gri Lizwifne buba ne'ut'en-un sulí' whunéoolhtun ha ndet la butsoda'ne Yak'usda buts'u hoozi-un 'et 'alha' hoont'oh.

<sup>9</sup> 'Ink'ez 'udun yun k'ut whut'enne buba ne'ut'en-un sulí', 'i gha Yak'usda ye te'ninzun-i yúbunilhtan, 'et huwa hidílhti'. Yak'usda be 'udustl'us k'ut nja dutni,

"'Et huwa 'udun yun k'ut whut'enne butoh khuni 'alha' 'unt'oh-i be nyun nghun bubulh yaóosduk,  
'ink'ez nyoozi' 'i la dósti!'"

<sup>10</sup> 'Ink'ez doo cha za 'utni,

"'Udun yun k'ut whut'enne

'ink'ez dunene ts'iyawh neMoodihti dúlhti!'"

<sup>11</sup> Njan cha 'et dutni,

"'Udun yun k'ut whut'enne ts'iyawh Moodihti dúlhti'

'ink'ez nohni dune cha ts'iyawh dúlhti!'"

<sup>12</sup> Isaiah be 'udustl'us k'ut njan cha 'et dutni,

"Jesse 'en ye kédinzut tile.

'En 'alha whusatíyáhl 'ink'ez 'udun yun k'ut whut'enne bumoodih tileh.

'Ink'ez ndet la buts'u hoozi-un 'et huba utit'elh."

<sup>13</sup> 'Et nohba tenadusdli, ndet la Yak'usda nohts'u hoozi-un huba sulh'i whutoh, 'en gha 'et úncha nohdzi sóo nedinzut ndet la nohts'u hoozi-un

nohba 'alha' hoont'oh huwa. 'Et whuz un'a la 'ilhiz bulh óoh't'e', 'ink'ez ndet la nohts'u hoozi-un 'on nus ulhtus whe la huba oolh'e' Ndoni ye úlhtus-i nohídan'ai huwa.

*Paul 'udust'lus butso k'e'uges-i, 'i ghun 'aw lhníljut whe butso k'e'uges*

<sup>14</sup> Sulhutsinke 'alha t'éwhunúszun lhat-un hoonzoo-un 'uwhulh'en, lhat-un cha t'éwhunúhzun, 'ink'ez Sizi Gri be 'ut'en k'oh dune whúntilhtun-un 'et huba cha soo 'úldzoo'.

<sup>15</sup> Ndi 'udust'lus k'ut whulohkhi 'aw lhnúzjut whe nohts'ó k'e'usgus, whu-naoolhni ha Yak'usda ye únzoo 'et sghá whunt'ai-un 'i gha 'ust'en.

<sup>16</sup> 'Et de la Sizi Gri ooba 'ust'en-un usdli, 'udun yun k'ut whut'enne Yak'usda ooghuni ghun bubulh yaosduk ha. 'Et de la Ndoni Yak'usda ba 'udun nelyanne huzdli' 'ink'ez Yak'usda hoont'i' whe la ubólhchoot.

<sup>17</sup> 'Et huwa 'ust'oh hoonúst'i', ndai la Yak'usda ba 'yus'é-n-i, 'i be Sizi Gri dústi' huwa.

<sup>18</sup> 'Ink'ez ndet la Christ dája la si sgha 'udun yun k'ut whut'enne hik'úne' oot'en ha, 'i za nohbulh yátisduk. Dája budásni' la 'ink'ez buba dást'en la, ts'iyawh si sgha Christ buba daja-un, 'et huwun 'aw lhnúzjut whe nohbulh yátisduk.

<sup>19</sup> Ndoni ye ulhtus-i, 'i be hoolhtus 'ink'ez huwa 'ít'en te cha ne'zust'en, 'et Jerusalem Ílyricum keyoh dúwhulyiz ts'e ts'iyanne 'et Christ ooghuni unzoo-i ts'iyawh budásni'.

<sup>20</sup> Ndi khuni unzoo-i mbene la dune lhidústs'one Christ ghun 'enne tube budatásnelh hukwa' nuszun. 'Aw 'uyoon dune yoh whulh'ai-un, 'aw 'et yoh neóohos'alh hukwa lhe'núszun.\*

<sup>21</sup> 'Et hoonts'i ndiz un'a Yak'usda be 'udust'lus k'ut 'uk'unúwhusguz, "Mbene la 'aw highun lhubudínelne, 'enne huwhutí'elh, 'ink'ez mbene la hiyulhé'dits'ilne, 'enne t'ehontizeh"

*Paul ubulhni Rome ts'e tíyalh hukwa' tit'elh*

<sup>22</sup> Lhat nohts'u tísyalh hukwa' nuszun inle', 'et hoonts'i Sizi Gri be 'ut'en us'en inle' 'et huwa 'aw nohts'ún lhtuzusyai.

<sup>23</sup> 'Et hoonts'i 'awet Sizi Gri be 'ut'en us'en-i ndoh keyoh ndulcho whe ts'iyawh lhadúsdla. 'Et lhat yus k'ut whuts'un nohts'un tísyalh hukwa' nuszun.

<sup>24</sup> Ndet la Spain yun k'ut ts'u ts'ya de, 'atsul wheni nohts'ú nutisyalh. Whuz nusya de, 'et hukwa' nahzun de, 'et la 'on 'un ts'iyalh huba sla 'oohneh.

<sup>25</sup> 'Et hoonts'i 'andit' aho Jerusalem ts'u tísyalh 'et la Yak'usda ooch'e' online bula 'oosneh ha.

<sup>26</sup> Sizi Gri yunidúlhne, ndunne Macedonia 'ink'ez Achaia whut'enne tube cho hukwa' huninzun sooneya be ndunne tehul'en Yak'usda ooch'e'ne Jerusalem dilhts'íne bula' hutinelh, 'et huwa whuz ts'iyalh.

<sup>27</sup> Huhóont'i' whe sooneya bugha húnin'aih. Ndunne Jerusalem whut'enne butso húwhulh'ai le'hint'oh 'et huwa. Lizwifne, 'enne gha 'udun yun k'ut whut'enne Yak'usda ooba 'ut'en-i be hoonzoo' huja de, 'et de 'udun yun k'ut whut'enne Lizwifne hiye ndunidzit-i be bula' hooneh 'ínka.

<sup>28</sup> Ndi 'ut'en lhadúsdla de, 'ink'ez ndai la bugha íyulya-i ts'iyawh butl'a yísdla de, 'et de Spain ts'u ts'iyalh. 'Et la nohk'osya'.

\* **15:20** Ndet la 'uda' Christ be 'ut'en k'oh whe' whudil'en-un, 'aw whuz tóosya' hukwa lhe'núszun ni whe' utni.

<sup>29</sup> 'Et nohghu nusya de, Christ ooghuni unzoo-i ts'iyawh 'i bulh la oosneh. 'Et la t'ewhunóhzin ndi khuni unzoo-i dáldzoo' la.

<sup>30</sup> Sulhutsinke neMoodihti Sizi Gri 'en be Ndoni gha lhk'ets'utsi', 'et huwa nohooduskut Yak'usda tube cho súlh oots'u tenadoohdli.

<sup>31</sup> 'Et la ndunne Judea whut'enne 'aw ooba 'alha lhe'hóot'ohne dasúlhuhoosdle, 'ink'ez se' 'ut'en Jerusalem Yak'usda ooch'e'ne bube 'ut'én-i, 'i la hiyólhchoot.

<sup>32</sup> 'Ink'ez Yak'usda hukwa' ninzun de, hoonúst'i' whu la nohts'un tóosya'. 'Et de la 'ilhoh 'uts'oot'e' nohts'óozusya de.

<sup>33</sup> 'Et si cha nohba tenadusdli Yak'usda nohbulh óot'e' ha, 'ink'ez ndi be whúdzghel-i, Yak'usda huwa yú'aih-i, ts'iyawh uncha nohbulh 'únt'oh. 'Et ndo honeh.

## 16

### *Paul, Rome dilhts'ine hadih ubúlhni*

<sup>1</sup> 'Et njan Cenchrea keyoh Sizi Gri gha 'ilhozdílne butoh 'ilhoghun ts'eke unzoo-un, Phoebe huyúlhni, 'en 'ahoolhyiz wheni neba 'ut'en-un.

<sup>2</sup> Nohts'óozya de hoonáht'i' whe Sizi Gri boози' gha yoh daóolhtelh ha. Yak'usda ooch'e'ne ahli, whuz un'a ts'ih'un un'a nohba hoont'oh 'utihnelh huba. Ndaí la ye ndunidzít-i cha be óola ooht'en. Lhanne la 'it'en whe 'unt'oh. Si cha sla 'it'en.

<sup>3</sup> Priscilla 'ink'ez Aquila sba bózoo budóhni'. Christ Sizi ts'utni-un, 'enne sulh 'úhut'en inle'.

<sup>4</sup> 'Enne hiye khúna-i, 'i 'ants'i buba 'unt'oh whe suhúlhyih inle'. 'Et dahúja huwa, si 'ink'ez 'udun yun k'ut whut'enne Sizi Gri ooba 'ilhozdílne, ts'iyawh musi buts'útni.

<sup>5</sup> Mbene la Christ ooba buyoh 'ilhozdílne, 'enne cha ts'iyawh sba bózoo budóhni'.

Sk'eke Epaenetus 'en cha sba bózoo dóhni'. 'En Achaia yun k'ut 'udechoo Christ ooba 'alha yint'oh sulí-un.

<sup>6</sup> Mary 'en cha sba bózoo dóhni'. 'En cha tube ncha-i be nela 'ut'en inle'.

<sup>7</sup> Andronicus 'ink'ez Junias 'enne cha sba bózoo budóhni'. Snatneke 'uhint'oh, sulh 'áhudan'a' inle'. Whel'a'ne butoh dune ncháne hinli 'ink'ez stso da' Christ hits'u nálh'a inle'.

<sup>8</sup> Amplias 'en cha Sizi Gri uniyalh-un 'unt'oh. Tube ookw'esi', sba bozoo dóhni'.

<sup>9</sup> Urbanus dune, 'en cha nebulh 'ít'en Christ be 'ut'en 'uts'ulh'en whe 'ink'ez sk'eke Stachys 'enne cha sba bózoo budóhni'.

<sup>10</sup> Christ uniyáhl-un, Apeles, ts'iyanne ba unzóo-un, 'ink'ez Aristobulus 'et ooyoh dilhts'íne, 'enne cha sba bózoo budóhni'.

<sup>11</sup> Snadun Herodion 'ink'ez mbene la Narcisus ooyoh dilhts'íne Sizi Gri unidúlhne,

'enne cha sba bózoo budóhni'.

<sup>12</sup> Tryphaena 'ink'ez Tryphosa 'enne cha Sizi Gri be 'ut'en 'uhulh'en, 'ink'ez sk'eke Persis tube ncha-i be Sizi Gri be 'ut'en tube yughaizna' inle', 'enne cha sba bózoo budóhni'.

<sup>13</sup> Rufus 'en 'uk'enus soo Sizi Gri ba 'ut'én-un, ooloo cha 'ants'i sloo le'únt'oh, 'enne cha sba bózoo budóhni'.

<sup>14</sup> Asyncritus, Phlegon, Hermas, Patrobas, Hermes, 'et 'onghohne neulhutsinke bubulh 'út'enne, 'enne cha sba bózoo budóhni'.

15 Philologus 'ink'ez Julia cha, Nereus 'ink'ez bulhtus cha, 'ink'ez Olympas 'ink'ez mbene la Yak'usda ooch'e'ne bubulh 'út'enne, ts'iyawh sba bózoó budóhni'.

16 'Et bózoó lhudáhni de,

'et de lubeshi ooghu hooloh-i be nalhudoohs'toos.\*

'Et mbene la njan Christ gha 'ilhozdíline,

Rome whut'enne bózoó nohts'útni.

*Paul ubúlhni, mbene la Yak'usda ooghuni 'ats'un un'a wheyodulh'éhne buka tse hóhleh'*

17 Sulhutsinke njan huwun nohgha dúzni, nohtoh mbene la nts'en'a la whunohodalh'e' whuch'az yálhdukne, 'enne bugha lhch'az nedutahdulh 'ink'ez nohba hoontsi' tileh. 'Et ndunt'óhne buka huwohlh'e' 'ink'ez buch'az naóolh'ah.

18 'Et dunt'óhne dune neMoodihti Sizi Gri hik'únulhe'ust'enne. Dich'oh k'un'a 'uhut'en, 'ink'ez nts'en'a la dich'oh hukwa' huninzun hukw'une' 'ut'enne. Nanuhona'ah whe khuni unzoo-i be nohbulh yáhalhduk, 'et mbene la hukwa tse lhuhoohlhne whuz un'a nabonti'ah.

19 Nts'en'a la Sizi Gri be 'ut'en k'oh hukw'úne' aht'éen-un ts'iyanne whulh 'údants'o. 'Et huwa tube nohba hoonúst'i'. Whunihne oohlh'e' nohba hukwa' nuszun ndai la 'ut'en unzoo-i ghun, 'ink'ez la lubeshi k'únulhe'zooht'en.

20 Yak'usda 'en whudizghel-un negha whu'aih-un, 'aw lhotuszit whe Satan nohketl'ah gak yutilhtselh. 'Et nohba tenadusdli neMoodihti Sizi Gri ye únzoo-i, 'i nohbulh óot'e' ha.

21 Timotheus, sulh 'út'en-un, bozoó nohúlhni. 'Ink'ez snatnekoo Lucius, Jason, Sosipater, 'enne cha bózoó nohuhútni.

22 Tertius suhútni, si 'usja ndi 'udustl'us Paul ba 'uk'uneízusguz. Si cha bózoó nohdúzni.

23 Gaius, 'en duyoh dásunilhti, 'en cha bózoó nohúlhni. 'En ooyoh 'et Sizi Gri unidúlhne 'ilhuhozdil. Erastus, 'et keyoh whut'i sooneya ghundli-un, 'ink'ez neulhutsin Quartus, 'enne cha bózoó nohuhútni.

24 NeMoodihti Sizi Gri ye únzoo-i ts'iyawh nohbulh óot'e'. 'Et ndo honeh.

*Paul, 'awhuz 'ilhoghun budutánelh-un whuz'ai*

25 Yak'usda uzdólhti'. 'En 'unt'oh ye ulhtus-i ut'i Sizi Gri ooba ulhtusne nohoolhtselh ha. Nts'en'a la nohdásni' whuz un'a 'utihnelh, ndet la whuno-hdus'eh Sizi Gri ooghuni unzoo-i ghun. 'Uda' 'aw dune ndi khuni unzoo-i highu t'ehonúszun. 'Oh da' Yak'usda ndi yun k'ut 'uyinla, 'et whuts'un njan whe' hoont'oh hooyoh-un buch'a nónut'i' inle'.

26 'Et 'andit ts'iyawh t'eeonidzin. 'Ink'ez Yak'usda ooghuni nus be t'eeonudzun-i dune didohne ts'iyanne t'ehinanzin. Yak'usda 'ilhiz wheni khuna-un, 'i khuni netl'aídan'ai, 'i ndi yun k'ut dunene ts'iyawh t'ehinanzin. 'Et t'ehoninzun Sizi Gri ooghuni hiyólhchoot whe hik'úne' oot'en ha.

27 Yak'usda 'en za whunih whe 'unt'oh. Sizi Gri 'en gha 'ahoolhyiz uzdólhti' 'ilhiz wheni. 'Et ndo honeh.

\* 16:16 Whuz keyoh 'et whuz un'a huhoont'i' whe ilhanahodulh.

## Paul Corinth Whut'enne 'Udechoo Buts'ó K'eyanguz-i

*Yak'usda ba 'ilhunaoodulhne keyoh Corinth ts'e, 'enne Paul hadih ubulhni*

<sup>1</sup> Si Paul ndet la Yak'usda hukwa' ninzun k'un'a, 'i be Sizi Gri oosal'a-un\* suhutni, 'ink'ez ndun neulhutsin Sosthenes huyulhni, 'en cha,

<sup>2</sup> mbene la keyoh Corinth ts'e Yak'usda ba 'ilhunaoodilne hinli, nohni ndi 'udustl'us k'ut nohts'o k'e'usges. Christ, Sizi ts'utni-un, 'en ooch'e'ne ahli 'inka 'et whe Yak'usda ba 'udun nenohninla. Yak'usda ooch'e'ne nohuwhutni. Nohni 'ink'ez mbene la neMoodihti Sizi Gri yoozi' be yuts'u tedudlihne, 'enne cha Yak'usda ooch'e'ne 'uhint'oh. 'Enne buMoodihti unli 'ink'ez wheni cha neMoodihti unli.

<sup>3</sup> NeBá Yak'usda 'ink'ez Sizi Gri neMoodihti ts'un nohba tenadusdli 'et whe nohdzi doghel 'ink'ez ye unzoo-i nohbulh 'oot'e'.

*Yak'usda 'en gha ts'iyantsuk nohghalts'ut*

<sup>4</sup> Sizi Gri ooch'e'ne ahli 'et huwa Yak'usda ye unzoo-i nohghalts'ut. 'Et huwa sYak'usda ts'un 'ahoolhyiz musi dusni.

<sup>5</sup> Yak'usda ye unzoo-i nohghalts'ut. 'Et huwa nts'en'a la 'en ghun t'eeonihzin 'ink'ez nts'en'a la ooghu yalhduk, 'et whuz un'a 'en gha ts'iyantsuk whe 'on nus unzoone sahli'.

<sup>6</sup> Nts'en'a la Christ ghun nohdasni-un, 'i ts'ih'un un'a nohdzi yudilts'ut.

<sup>7</sup> 'Et huwa 'aw hoonliyaz nohgha unt'ai-i 'aw nohba ndukw lhiloh whe neMoodihti Sizi Gri netoh be hoodutaltsilh-un, 'et huba sulh'i.

<sup>8</sup> 'Et 'udek'ez dzin whuts'un, 'et 'en gha be ts'ilhtus-i be nudutalhyalh 'et whuts'un. 'Et whe la neMoodihti Sizi Gri oodzin de, 'et dzin 'aw be nohk'eholts'it-i hootaloh.

<sup>9</sup> Yak'usda 'aw nohla dootnih ait'oh. 'Et huwa duYe' bulh 'ilho oohle' ha nohka'dani'. NeMoodihti Sizi Gri 'en 'unt'oh.

*Lhch'az úzdotni Christ neba hukwa' ninzun eh?*

<sup>10</sup> Sulhutsinke, neMoodihti Sizi Gri 'en boozii' gha nohts'u tédusdlih, 'et nohnihch'oh nohtoh lhch'a natihdulh whuch'a, 'et huwa nohni 'ilhoh k'un'a za nuni untihzut nohts'oh hukwa' nuszun. 'Et whe 'ilhohne ahli hukw'un'a utihnelh 'ink'ez ts'iyantsuk whe lhgha nuni untihdeh 'ink'ez lkh'un'a za tih'telh.

<sup>11</sup> Sulhutsinke Chloe ooyoh dilhts'ine, whulohne, 'enne bulatoh ts'e nohni lhedahdulh-un whulh 'údasts'o.

<sup>12</sup> Njan 'et 'uwuhudusni, whulohne nohtoh njan duhutni, "Paul ooch'e' usdli," k'us "Apollos ooch'e' usdli," k'us "Cephas ooch'e' usdli," k'us "Christ ooch'e' usdli," 'et whuz un'a hukwa lhedahdulh.

<sup>13</sup> 'Et ts'ih'un 'uhoont'oh nuhzun eh? Christ ch'az ditni eh? K'us Paul 'en eh tualhghus k'ut nohba dazsai? K'us Paul boozii, 'i gha eh whe nohni too be 'ulhya?

<sup>14</sup> Yak'usda musi dusni whe nohni nohtoh 'aw 'ilhoghun hoonts'i too be lhe'usdleh whe' hoont'oh. Crispus 'ink'ez Gaius 'enne za too be' busdla,

<sup>15</sup> doo ka la whulohne 'uhudooni', sich'oh soozii' gha dune too be' 'ís'en hudooni' tilah.

<sup>16</sup> 'Ink'ez Stephanas ooyoh dilhts'ine, 'enne cha too be' busdla. 'Uyoonne cha tilah too be' usdla 'et 'aw whunalhuzuzni.

\* 1:1 Ndi khuni whusal'a-un, 'i Abodun cha ni whe 'utni.

17 'Aw dune too be' oos'en huba iloh whe Christ whuz de whut'l'a salh'a'. Khuni unzoo-i be bubulh yatisduk huba usinla. 'Aw dune khuni whunih be iloh njan nohbulh yasduk, doo ka la Christ ootulalhgus 'ants'et 'unt'oh oole'.

*Yak'usda ye ulhtus-i 'ink'ez ye whunih-i, Christ 'en 'unt'oh*

18 Mbene la ninta' nisdilne ndi khuni tulalhgus ghun 'enne whusni khuni za buba yinli. 'Et hoonts'i wheni mbene la 'i be uzdutijihne ts'oole' huba' hoont'oh, ndi khuni 'i Yak'usda ye ulhtus-i neba 'unt'oh.

19 'Et whuz un'a Yak'usda ooghuni 'uk'eguz whe ndutni, "Mbe la whunih na'dudil'ine, 'enne hiye whunih-i musai tiselh, 'ink'ez mbe la ts'iyantsuk t'ooninzunne, 'enne hiye t'ooninzun-i gak tiselh."

20 Nts'e 'uhoont'oh whunihne hoonli? 'Ink'ez nts'e 'uhoont'oh Moses be 'udust'us 'uk'ununáguzne hoonih? 'Ink'ez nts'e 'uhoont'oh mbe la ndi yun k'ut 'uk'enus whunih na'dunudzunne 'uhint'oh? Gak whe' hoont'oh! 'Et 'alha' hoont'oh ndai la ndi yun k'ut whut'enne ye whunih-i, 'i Yak'usda ts'iyawh be ts'uwhusnih yulhtsi? A, 'alha' hoont'oh.

21 'Et njan nduhoont'oh, Yak'usda whunih whe 'unt'oh 'et huwa whunenulhtun, ndi yun k'ut whut'enne, ndai la hiye whunih-i, 'i be 'enne 'aw Yak'usda t'ehinuzun. 'Et k'us ndi khuni unzoo-i ooba 'alha lhe'hoont'ohne, 'enne buba whusni k'un'a be yats'ulhduk le'hoont'oh, 'et hoonts'i 'i be Yak'usda hoont'i' whe mbene la ooba 'alha' hoont'ohne, 'enne hubulhyih.

22 Soo cho whunulh'en, ndunne Lizwifne huwa 'it'en-un za hukonuta 'ink'ez ndunne Greekne, 'enne hiye whunih-i za ha' hoozilhts'ai.

23 'Et hoonts'i wheni Christ tulalhgus k'ut dazsai-un, 'et za howu yats'ulhduk. 'Ink'ez 'alha 'i be ndunne Lizwifne 'ankw'us buba dzoh suli', 'ink'ez ndunne Greekne, 'enne ndi khuni whusni buba yuzdli'.

24 'Et hoonts'i mbene la hudutijih ha buka' dani' Lizwifne 'ink'ez Greekne, Christ 'en Yak'usda ye ulhtus-i buba unli, 'ink'ez ye whunih-i cha buba unli.

25 Nda la Yak'usda ye whusni-i, 'i dune ye whunih-i, 'i anus 'ultus, 'ink'ez ndai la Yak'usda ye tetsun-i, 'i dune ye ulhtus-i, 'i anus 'ultus 'et huwa.

*NeMoodihti 'aw 'en za ncha ts'óolh'e' huba' hoont'oh*

26 Sulhtsinke nohni 'oh da' dutihjih ha nohka' dani' inle', 'et dant'ohne ahli t'oonuhzun. Nts'en'a la ndi yun k'ut whut'enne whuz un'a uninzunne ts'iyawh, 'aw lhane iloh nohtoh duba whutnihne unli, 'ink'ez 'aw lhane iloh nohtoh dune be hoolhtus unline, 'ink'ez 'aw lhane iloh nohtoh dune nchane unli.

27 'Et hoonts'i ndiz un'a Yak'usda hukwa' ninzun, ndi yun k'ut ndai la whusni-i, 'i be ndunne duba nawhutnihne, 'enne yooya ubutilhtselh. 'Ink'ez ndi yun k'ut ndai la huye tetsun huninzun-i, 'i be duba naltusne, 'enne yooya ubutilhtselh.

28 'Et ndunne tel'en whe whuzdli, 'ink'ez mbe la yuch'a yo nenilya, 'enne Yak'usda 'utahabanla. 'Ink'ez doo cha ndai la 'ants'i unli hoonts'i, 'i cha 'utahayanla, 'i be ndai la ndi yun k'ut 'unt'oh unli-i, 'i be gak yutilhtselh. 'Et whuz un'a Yak'usda hukwa' ninzun.

29 'Et whuz un'a 'aw 'ilhoghun hoonts'i Yak'usda nalh ncha na'dudol'e' ait'oh.

30 'Et huwa Yak'usda gha Christ, Sizi ts'utni-un, 'en ooch'e'ne ahli. 'En 'unt'oh Yak'usda gha be ts'uwhunih-i neba yulhtsi, 'ink'ez be ts'ih'un un'a 'uhoont'oh-i cha neba yulhtsi, 'ink'ez 'en gha 'udun neneninla, 'ink'ez naeoket cha 'uja.

31 'Et huwa 'et ndiz un'a 'uk'eyanguz whe ndutni,



"Mbe la ncha na'dudutal'e' hukwa 'ut'en,  
 'et 'aw 'uhot'e' ait'oh.  
 NeMoodihti 'aw 'en za uzdólhti' huba' hoont'oh."

## 2

### *Sizi Gri tulalhgus k'ut neba dazsai-un, 'et huwun za nohbulh yatisduk*

<sup>1</sup> Sulhutsinke ndet la nohts'oh whusasya-un whe Yak'usda ghun nohbulh yasduk, 'aw 'ududiti' khuni 'i be 'ink'ez 'aw ndi yun k'ut huye whunih-i be cha nohbulh yalhusdih.

<sup>2</sup> Seni lhadusdla 'et huwa 'udechoo nohtanusya whe 'aw 'udun seni toh whudo'a' hukwa lhe'nuszun. Sizi Gri ghun 'et cha 'ink'ez tulalhgus k'ut neba dazsai-un, 'et za seni toh whudo'a' hukwa' nuszun inle'.

<sup>3</sup> 'Et hoonts'i nohtanusya da', 'et whenuzjut 'ink'ez syust'e dutlut 'et huwun cha 'ink'ez tesun.

<sup>4</sup> 'Ink'ez sghuni be nohbulh yasduk, 'aw ndi yun k'ut dune ye whunih-i khuni ulhtus-i, 'i be nohbulh yalhusdih. 'Et k'us t'oonahzun sghuni Ndoni ts'u hadilts'ut 'ink'ez dilhtus suli'.

<sup>5</sup> 'Et whe Yak'usda nohba 'alha' 'unt'oh, Yak'usda ye ulhtus-i, 'i be, 'aw dune ye whunih-i, 'i be iloh.

### *Yak'usda ye whunih-i, 'i be yats'ulhduk*

<sup>6</sup> 'Et hoonts'i mbene la dune suli'ne, 'enne khuni whunih-i be butoh yats'ulhduk. 'Et hoonts'i ndai la yun k'ut be whutnih-i k'us ndi yun k'ut whumoodihne, 'enne hiye whunih-i, 'aw 'i be iloh bubulh yats'ulhduk. Ndunde 'ants'i gaih gak hutileh.

<sup>7</sup> 'Et k'us Yak'usda ye whunih-i, 'i be yats'ulhduk. Ndi neghuni buba whe' hoont'oh hooyoh-un 'ink'ez nunut'i' bulh 'unt'oh. Yak'usda ndi yun itileh whutso 'et whuz un'a lhaoodinla. 'I neba dizti' whe 'unt'oh.

<sup>8</sup> Ndi khuni neba whe 'unt'oh hooyoh, 'i ndi yun whumoodihne 'aw 'il-hoghun daja ni t'eininzunne hooloh. 'Et ndi khuni neba whe 'unt'oh hooyoh t'ehininzun de, 'et de neMoodihti, mbe la dizti-un, 'en 'aw da' tulalhgus k'el'húhiyilhtel oole'.

<sup>9</sup> 'Et hoonts'i ndiz un'a Yak'usda neba lhaoodinla. Nts'en'a la 'uk'ehooguz-un, 'et huwa 'uhooja whe ndutni,

"Mbene la Yak'usda k'entsi'ne,  
 ndet whe la Yak'usda buba lhaoodinla,  
 'i ts'iyawh duna be lhuhuhoos'en,

'ink'ez dudzeh whe 'aw lhuhodíts'il,  
 whuz buba hooncha k'et 'aw howu nuni hunoozut ait'oh."

<sup>10</sup> 'Et hoonts'i Yak'usda ooyughi 'i be whunenilhtan. 'Et Yak'usda ghun Ndoni neba nahoole-un ts'iyawh whunenulhtun, ndai la yoo yoh 'unt'oh-i, 'i hoonts'i 'i cha yunenulhtun.

<sup>11</sup> 'Et nohtoh nts'en'a la dune dahint'oh 'aw dune ts'ih'un t'ebuninzunne hooloh. Ooyughi ooyudin'ai-un 'i gha za t'ooninzun. 'Et whuz un'a Yak'usda dant'oh la 'aw t'eininzun-un hooloh, Ndoni 'en za t'eininzun.

<sup>12</sup> 'Aw ndi yun k'ut ne'whut'en-un huwa iloh Yak'usda ghun t'ets'oninzun, Yak'usda ooyughi negha din'ai. 'Et whe la ndai la Yak'usda 'ants'i negha íyanlih-i, 'i ts'iyawh t'ets'unoozeh ha.

<sup>13</sup> Di la ooghu yats'ulhduk-i, 'aw dune ye whunih-i iloh 'unt'oh whe whuneodulh'eh. Ndoni 'en gha whuts'odul'eh. 'I za ghu yats'ulhduk. 'Et whuz un'a nts'en'a la be 'alha' nudzun-i Ndoni ts'u hadults'it-i 'ink'ez nts'en'a la Ndoni ye yalhduk-i, 'i ts'iyawh lhzih neztilelh. 'Et whuz un'a Ndoni whuneodulh'eh.

14 'Et hoonts'i mbe la Ndoni lhit'ih-un, ndai la Yak'usda ooyughi oots'u hadults'it-i, 'i 'aw lheyulhchoot, whusni be hoonli k'un'a ba' yint'oh 'et huwa. Soo Ndoni 'en gha za t'ehontizeh, 'et huwa Ndoni daja ni 'aw t'eeonoozeh ait'oh.

15 'Ink'ez mbe la Ndoni yuk'une' 'ut'en unli-un, 'en ts'iyawh t'eeoninzun. 'Aw 'uyoonne dune yuba nahooeyehne hooloh.

16 'Et whuz un'a 'uk'eguz whe ndutni, "Mbe t'eeoninzun neMoodihti daja ninzun, k'us mbe whuyodalh'e' whe hoonli t'ewhuntizeh?" 'Et hoonts'i wheni Christ beni neghu diz'ai, 'et huwa wheni t'ets'oninzun.

### 3

#### *Ndoni ook'unulhe'zaht'enne ahli*

1 'Ink'ez sulhutsinke nohni Ndoni k'une' 'ut'enne k'un'a, 'et 'aw whuz un'a nohbulh yaosduk ait'oh. 'Et hoonts'i nohyust'e lubeshi oots'u nint'ine k'un'a, 'et whuz un'a nohbulh yasduk. Christ ooch'e'ne ahli 'et hoonts'i 'ants'i 'awhuz chalhstul ahli hukw'un'a aht'oh. 'Et whuz un'a nohbulh yaosduk huba' hoont'oh.

2 Lilet nohgha szoh. 'Ink'ez 'aw duts'un-i iloh nohghas'aih, 'aw tih'ulh huba soo lhe'ulhcho 'et huwa. 'Ink'ez 'awhuz tih'ulh huba soo lhe'aht'oh.

3 'Awhuz nohyust'e lubeshi ts'u nint'i. Nohni ts'iyawh eh t'eeonuhzun? Nohtoh 'oonih-i, 'i nohtoh hoonih, 'ink'ez lheda'dulh, 'ink'ez lhendowh nena'dhil hukw'un'a ahja. 'Et whuz un'a ndaht'en de, 'et 'alha la 'awhuz nohyust'e lubeshi ts'u nint'i whe aht'oh. Ndi yun k'ut whut'enne k'un'a ne'áht'en.

4 'Ilhoghun 'utni, "Si Paul ooch'e' 'ust'oh," 'ink'ez 'uyoon cha 'et dutni, "Apollos ooch'e' usdli." 'Et whuz un'a ndudahni de, 'et 'alha la 'awhuz nohyust'e lubeshi ts'u nint'i?

*Yak'usda 'en gha za ts'untiyeh. Soo cho khahdli, ndet dzin whusahoolts'ut de, 'et ts'iyawh 'ilho 'ut'en kwun be t'entidzeh*

5 'Et huwa sudutahnelh hukwa' nuzun, Paul mbe unli, k'us Apollos 'en cha mbe 'unt'oh? 'Ants'i Yak'usda ba ne'ut'enne za 'uhint'oh. 'Enne bugha nohni ooba 'alha' hoont'ohne sahli'. Nts'en'a la neMoodihti Yak'usda ba ne'ut'enne 'ilhone whe bugha oonin'ai, 'et whuz un'a 'uja.

6 'A'nusdle, Apollos too be nainulhstul, Yak'usda hainulhyeh.

7 'Et 'inka mbe la 'a'nanla-un, k'us mbe la too be nainulhstul-un, 'enne 'ants'i 'uhint'oh. Yak'usda 'en gha za hantiyeh.

8 'Et 'awet 'a'nanla-un 'ink'ez too be nainilhstul-un, 'enne 'ilho za 'uhint'oh. 'Et hoonts'i nts'en'a la 'ilhone whe dich'oh 'uhit'en hukw'un'a, 'et whuz un'a buba 'uk'elha whutaleh.

9 'Aw dune, 'udun yoh ook'ehoolts'uk-i ooleh ait'oh. 'Ilho 'uda' 'uja, 'ink'ez ndi yoh ook'oh whuz'ai-i, 'i lhadusdla. 'Ink'ez ndo un'a 'uwhtulh'elne huwolphle' nts'en'a la yoh 'uwhtulh'en hukw'un'a.

10 'Aw dune, 'udun yoh ook'ehoolts'uk-i ooleh ait'oh. 'Ilho 'uda' 'uja, 'ink'ez ndi yoh ook'oh whuz'ai-i, 'i Sizi Gri, mbe la nets'u yoozi-i, 'en 'unt'oh.

11 'Aw dune, 'udun yoh ook'ehoolts'uk-i ooleh ait'oh. 'Ilho 'uda' 'uja, 'ink'ez ndi yoh ook'oh whuz'ai-i, 'i Sizi Gri, mbe la nets'u yoozi-i, 'en 'unt'oh.

12 'Et ndi yoh ook'oh whuz'ai-i mbe la ndo un'a 'uwhtulh'elh whe gold, silver, tse diziti'-i, k'us duchun, t'l'o, t'l'o zukw, 'et 'i be hoolya de,

13 'Et ndet dzin whusahoolts'ut de, 'et ts'iyawh 'ilho 'ut'en kwun be t'entidzeh. Nts'en'a la be' hoolya-i kwun be t'entidzin hukw'un'a.

14 Ndi be' hoolya-i kwun be lhdik'il de, 'et de 'enne za whuba k'elha whutaleh.

<sup>15</sup> 'Et ndi be' hoolya-i dank'un de, 'et de 'enne ts'iyawh ninta hotalelh. 'Et hoonts'i yoh 'uhoonlane kwun toh hanabanla hukw'un'a ubulhyih.

<sup>16</sup> 'Aw t'eeonuzuhzun nohni Yak'usda oolugliz whucho ahli 'ink'ez Ndoni nohyudinda?

<sup>17</sup> Mbe la Yak'usda ooyoh ninta' whunilh'en-un, 'en cha Yak'usda ninta' yutal'h, Yak'usda oolugliz whucho lubeshi huwu hooloh 'et huwa. 'Ink'ez nohni ndi lugliz whucho ahli.

### *Ndi yun k'ut ye whunih-i, 'i Yak'usda ba whusni 'unt'oh*

<sup>18</sup> Khun nyunch'oh na'dunont'ah junih. 'Et nohtoh 'ilhoghun usda whe ndi yun k'ut ye whunih-i be dune whunih na'dunudzun de, 'et de dich'oh ndi yun k'ut whusni hininzun-i, whuz un'a na'dudooitselfhuba' hoont'oh. 'Et whe ts'ih'un un'a whunih-un dune utileh.

<sup>19</sup> Ndi yun k'ut ye whunih-i, 'i Yak'usda ba whusni k'un'a 'unt'oh. 'Et whuz un'a 'uk'ehóoguz, "Nyoonne whunihne dich'oh huye duzoh-i, 'i be Yak'usda uboolhgooh."

<sup>20</sup> 'Ink'ez cha za 'uk'ehóoguz whe ndutni, "Nyoonne whunihne nts'en'a la nuni hunuzut-un, neMoodihti t'eeoninzun 'i 'ants'i gaih unli."

<sup>21</sup> Ts'iyawh nohch'e' 'unt'oh. 'Et huwa 'aw 'ilhoghun dune 'on nus unzoo uzdooni' ait'oh.

<sup>22</sup> Paul, k'us Apollos, k'us Cephas, k'us ndi yun k'ut, k'us be ts'ukhuna-i, k'us be yats'adlah-i, k'us 'andit ndai ts'ut'i-i, k'us ndet whusaootilts'ulh-un, 'i ts'iyawh nohch'e' 'unt'oh. 'Et huwa 'aw 'ilhoghun dune 'on nus unzoo uzdooni' ait'oh.

<sup>23</sup> 'Ink'ez nohni Christ ooch'e'ne ahli, 'ink'ez Christ, Yak'usda ooch'e' unli.

## 4

### *Yak'usda ghun buba whe' hoont'oh hooyoh-un, 'et whunohts'unoolhtun ha netl'ahon'ai*

<sup>1</sup> 'Awet dune 'et ndiz un'a neghu nuni noozut, 'ants'i Christ la 'ut'enne 'uts'int'oh, 'ink'ez ndai la Yak'usda ghun buba whe' hoont'oh hooyoh-un, 'et whunohts'unoolhtun ha netl'ahon'ai.

<sup>2</sup> 'Aw 'et za iloh, mbe la yutl'ahon'ai-un, 'et ndun dune hit'aninootan huba' hoont'oh.

<sup>3</sup> 'Et nohni sba nahizuhya de k'us 'uyoonne cha but nenusya, 'ink'ez sba nahuhizya de, 'et hoonts'i ts'iyawh 'ants'i sba' hoont'oh. 'Aw sích'oh hoonts'i duba nahoosdeh ait'oh.

<sup>4</sup> 'Et seni toh diz'ai-i 'aw lhditsun 'et hoonts'i 'aw 'et whe iloh ts'ih'un dune usdli. 'Et neMoodihti 'en 'unt'oh sba nahuyeh-un 'unt'oh.

<sup>5</sup> 'Et huwa ndet dzin whusaootilts'ulh whuts'un, 'aw hoonliyaz buba nahoohyeh-un hooloh. NeMoodihti whusatiyalh whuts'un whuba sulh'ih. 'En 'unt'oh ndi tsaligus yo ts'e nunu'i-i, 'i ts'iyawh ts'et hanaitileh. 'Ink'ez nts'en'a la dune budziyo ts'e 'uhuninzun-un, ts'iyawh ts'iyanne bunalhts'et haóotileh. 'Et hukw'elh'az Yak'usda 'ilhone hinli whe hoonzoo whe ubulh buba whudutalhti'.

### *'Ilhohun dúlhti', k'us 'ilhoghun nohba 'ants'i oole' junih*

<sup>6</sup> Sulhtsinke wheni si 'ink'ez Apollos bulh ndai la oogha' ts'ut'en-i k'un'a nohni nohba. 'Et whe wheni negha 'on nus hodoohl'eh. Ndi 'uk'eguz-i 'on 'un khuni ootaná'doh'alh junih. 'Et whe 'ilhoghun dúlhti', k'us 'ilhoghun nohba 'ants'i oole' junih.

<sup>7</sup> Mbe 'unohinla 'uyoon dulhulht'oh nohulhtsi? Gak! Di za 'int'i ndai la nghá lhikuhl-i? Gak! 'Et hoonli ngha ninkat de, 'et di ha howindloh whe 'aw hoonli sgha lhikuhl dutanelh?

<sup>8</sup> 'Awet lhai aht'i. 'Awet hoonzoo' aht'oh. Wheni neyit hoontsi'i lerwene k'un'a aht'oh. 'Et 'alha uncha 'et whuz un'a aht'oh. 'Et whe la wheni cha nohbulh lerwene ts'ooole'.

<sup>9</sup> 'Ink'ez nuszun wheni whel'a'ne hukw'e'i 'uts'ultus 'et whuz un'a Yak'usda 'uneinla. 'Ants'i ts'iyanne nalh daztitsah hukw'un'a neinla. Ts'iyanne ndi yun k'ut ambez neneninla hukw'un'a whe nehunilh'en, lizasne 'ink'ez dunene cha 'enne ts'iyawh.

<sup>10</sup> Wheni Christ ba whusnine ts'inli, 'et nohni Christ bulh whunihne ahli. Wheni tets'utsun 'ink'ez nohni ulhtus. Nohni dune nchane ahli, 'et wheni 'aw lhditi'ne ts'inli.

<sup>11</sup> 'Andit dzin whuts'un neye'ults'ilh 'ink'ez t'a'ts'óosda. Nenaih lhe'izoo' 'ink'ez 'ants'i 'oh nuts'iya yoh cha lhts'uhoot'ih, 'ink'ez dunene ne-ehuzula.

<sup>12</sup> Whenich'oh nela be 'uts'ut'en. Hoontsi-i khuni be neghu yahalhduk 'et hoontsi'i wheni khuni unzoo-i be bubulh yáts'ulhduk. Dzoh nunehulhdzut 'et hoontsi'i soo whulh ts'uzyin.

<sup>13</sup> Nech'az yahalhduk 'et hoontsi'i wheni k'eke be bubulh yats'ulhduk. Ndi yun k'ut whuzukw le'ts'uja. 'Andit whuts'un ndi yun k'ut 'utsi'-iyaz k'un'a 'uts'int'oh.

*Suzkeh k'un'a nohk'esi', 'et huwa khuni ulhtus-i be nohbulh yasduk*

<sup>14</sup> Ndi 'uk'unususguz-i 'aw be yooya nohtiselh huba iloh usdla. Suzkeh k'un'a nohk'esi', 'et huwa khuni ulhtus-i be nohbulh yasduk.

<sup>15</sup> Ndi yun k'ut soo 'uk'enus dune lhane whe Christ ghun whunohodulh'ehne hoonli de, 'et hoontsi'i 'aw lhane iloh la nohbáke k'un'a lhuno-honilh'en. Christ, Sizi ts'utni-un, 'en ooghuni unzoo-i, 'i be si sgha be ts'ukhuna-i ahti 'et huwa nohba susdli'.

<sup>16</sup> 'Et huwa nohts'u tedusdli si sk'un'a 'ooht'e'.

<sup>17</sup> 'Et huwa ndun Timothy nohts'o whes'a'. 'En sye' k'us ook'esi'-un k'un'a 'unt'oh. 'Ink'ez Christ ghun 'i ts'iyawh 'aw yula dootnih ait'oh. 'En si neMoodihti bulh be 'ut'en k'oh, 'et nohba whunatilnih. 'Ink'ez ndulcho whe ndet la Yak'usda ba 'ilhunaoodulhne, nts'en'a whubodus'eh si, 'i ts'iyawh nohba whunatilnih.

<sup>18</sup> 'Et nohtoh whulohne 'awhuz 'uhududilti', Paul 'aw whusalhtisyal hunzun 'et huwa.

<sup>19</sup> 'Et hoontsi'i neMoodihti hukwa' ninzun de, 'et de 'aho nohts'o tísyalh. 'Et nohghu nusya de, 'et de ndunne 'ududilti'ne, 'aw bughuni iloh k'us huye ulhtus-i dant'oh, 'et nahoots'alh.

<sup>20</sup> Yak'usda nohtoh k'une' yul'en-i 'aw khuni be iloh k'us ye ulhtus-i, 'i be 'unt'oh 'et huwa.

<sup>21</sup> K'us ndet hukwa' nahzun whe nohts'u tísyalh? Tutsus tilah k'us be nék'ets'intsi'-i 'ink'ez nalhtsulyaz ne'nohtis'en tilah whe nohts'u tísyalh?

## 5

*Tlhunaoodulhne butoh lubeshi ninta' bulh'ih*

<sup>1</sup> 'Et ts'iyanne whulh 'uhudits'o, nohtoh dune ts'eke bulh lubeshi 'uhulh'en-un. 'Et duhut'en-un, hukwaya hoonli k'et 'onghohne 'udun yun k'ut whut'enne 'aw howu yahutoolhdih ait'oh. Ts'iyanne whulh udits'o dune dubá oo'at 'en yuchan t'esti.

<sup>2</sup> 'Ink'ez nohni 'ududúlhti' 'et hoontsi'i soo cho huwu ni oohle' huba' hoontoh, 'et mbe la nduja-un, 'en nohtahanaóolh'a' huba' hoont'oh.

<sup>3</sup> Syust'e be nohtoh lhe'ust'oh 'et hoonts'i sich'oh syughi be nohtoh 'ust'oh 'ink'ez 'ants'i nohzih susda le'ust'oh. 'Et huwa si ndun mbe la lubeshi 'ulh'en-un, 'en 'uda' ba nahisda.

<sup>4</sup> 'Inka ndet la 'on 'at Sizi Gri neMoodihti boozii' gha 'ilhunaoozahdil de, 'ink'ez sich'oh syughi cha, 'ink'ez Sizi Gri ye ulhtus-i, 'i be,

<sup>5</sup> 'et ndet la 'ilhunaoodulh te, 'et de ndun mbe nduja-un, 'en Satan ootl'aitilhtelh ooyust'e ninta 'yutalh'elh 'et wheni. 'Et whe la Sizi Gri neMoodihti oodzin de, 'et 'oh de de ndun ooyughi yutilhyih whe' hoont'oh.

<sup>6</sup> Huwahdloh-un 'aw lhe'hoozoo'. 'Aw t'eeonuzuhzun eh 'ants'i ndi lhes ilhjut, 'i nilhtlus de, lhe'tinelh untildoh.\*

<sup>7</sup> 'Et ndi lhes ilhjut-i ts'iyawh 'untulhdil. 'I ooyit 'et whe la nohni 'andit lhes lhuntildoh-i k'un'a 'ooht'e'. Nohni 'andit lhes lhuntildoh-i k'un'a aht'oh 'et huwa. Christ, 'en Yak'usda be 'usbai neba unli, 'et wheni neba hizilghhi 'et huwa.

<sup>8</sup> 'Et huwa la ts'onólhni whe 'alghoh na'ts'oot'alh le'ts'oot'en, 'aw lhes ilhjut-i bulh iloh. Ndi lhes ilhjut-i, 'i hoonts'i-un 'ink'ez lubeshi 'uts'ulh'en-un 'i k'un'a 'unt'oh. 'Et hoonts'i ndi 'andit lhes lhuntildoh-i, 'i 'unt'oh be ts'ih'un 'uhoont'oh 'ink'ez khuni 'alha' 'unt'oh-i k'un'a 'unt'oh.

*Mbene la nebulh 'unt'ohne, 'enne za buba nats'oohooyeh huba' hoont'oh*

<sup>9</sup> 'Et 'uda' 'udustl'us be nohdasni' mbe la dune ts'eke bulh lubeshi 'uhulh'en 'enne khun 'ilhiz oole' buch'oh 'ooht'e'.

<sup>10</sup> 'Et hoonts'i mbene la ooba 'alha lhe'hoot'ohne 'aw 'enne iloh buch'oh 'ooht'e' whe dune ts'eke bulh lubeshi 'ulh'enne, k'us 'uyoonne ch'e' ha' ninzunne cha, k'us 'undunut'ihne cha, k'us 'uk'eltsi ooba 'alha 'unt'ohne cha, 'aw 'enne iloh buch'oh 'ooht'e' iloh whe nohdúsní. 'Et whuz un'a ndaht'en de, 'ants'i ndi yun ooch'a tihyalh hukw'un'a 'utiht'elh le'hoont'oh, ts'iyanne ndi yun k'ut 'et nduhút'en 'et huwa.

<sup>11</sup> 'Et awet nohts'o k'e'isguz mbe la Sizi Gri gha neulhutsinke buts'útnine, 'ink'ez dune ts'eke bulh lubeshi 'ulh'en-un, k'us 'uyoonne ch'e' ha' ninzun-un cha, k'us 'uk'eltsi ooba 'alha 'unt'ohne, k'us 'uyoonne dzoh ne'duni-un cha, k'us tanutnai-un, 'en cha, k'us 'undunut'ih-un cha, 'et mbe la Sizi Gri gha neulhutsinke buts'útnine ndunt'ohne dune, 'enne 'et nduhút'en de, 'aw 'en ubulh lhe'zooh't'en, 'aw bubulh 'utih'ulh-un 'et hoonts'i 'aw 'uhot'e' ait'oh.

<sup>12</sup> 'Ink'ez mbene la nebulh lhe'it'ohne, 'enne si sba lhe'hoot'oh buba nahutisye'huba. 'Et mbene la nebulh 'unt'ohne, 'enne za buba nats'otiyeh huba' hoont'oh.

<sup>13</sup> 'Et hoonts'i ndunne mbene la nebulh lhé'it'ohne, 'enne Yak'usda buba nahutiyeh. 'Et huwa neulhutsin tank'us ne'út'en-un, 'en nohnich'oh nohtahanaóolh'alh.

## 6

*Khun te Yak'usda ba nohulhutsin unli-un, 'en ndi yun k'ut nahiyilh-un but neóolhtelh junih*

<sup>1</sup> 'Et mbe la nohtoh ooba 'alha' hoont'oh-un, 'et 'uyoon bulh dulhyoh 'uhutni de, 'et nts'en'a 'uw'hatat'elh whe ooba 'alha lhe'hoot'ohne but nebutalhtelh buba nahoodeh ha? 'Aw nduhóot'en huba lhe'hóot'oh! 'Ink'ez nts'en'a 'uw'hatat'elh whe Yak'usda ooch'e'ne 'aw bubut neyolhtelh ait'oh?

<sup>2</sup> 'Aw t'eeonuzáhzun eh yak'usda ooch'e'ne ndi yun k'ut ooba 'alha lhe'hoot'ohne, 'enne buba nahotiyeh? 'Et nohni ndi yun k'ut ooba 'alha lhe'hoot'ohne buba nahutiyeh de, 'et nts'en'a ndi hoonliyaz lhdulhyoh 'unt'oh-i nohni ba nahutiyeh huba soo lheahtoh?

\* 5:6 Whuz un'a ndun dune oolubeshi butádútádo'h ni whe 'utni.

<sup>3</sup>'Aw eh t'eeonuzáhzun Lizasne, 'enne hoontsi' buba nats'otiyeh? 'Et 'alha 'uhoont'oh. 'Et huwa ndi yun k'ut lhdulhyoh 'unt'oh-i ghun nats'otiyeh huba soo' ts'ulzoo' whe' ts'int'oh?

<sup>4</sup>'Et ndi yun k'ut whe 'ut'en lhdulhyoh 'unt'oh-i ghun buba nats'otiyeh de, 'et de nohni Yak'usda ba 'ilhunaoosdilne toh, mbene la nohba soo lhe'ilzoo'ne ooba 'alha' hoont'ohne hoontsi', 'enne za nohba nahutiyehe ubuzulhtsi.

<sup>5</sup>Yooya oohle 'inka' nohdusni. 'Et 'alha lakw nohni nohtoh 'aw 'ilhoghun hoontsi' dune whunih-un nohba nahutiyehe-un hooloh?

<sup>6</sup>'Et hoontsi' lhe'ahja! 'Ilhoghun dune dulhutsin ba nahutideh ts'e yoolhti. Ndunne nahiyillhne ooba 'alha lhe'hoot'ohne 'et hoontsi' bubut nenilhti.

<sup>7</sup>'Ink'ez njan dune ba nahutide ts'e yoolhti, 'et whe 'uda' nohnich'oh ch'a na'nulhde whuzdli'. Dune 'ats'un un'a ne'nohul'en de, di ha whulalhts'uzahnti? K'us dune noh'e'huwhulhts'it de, 'et cha whute 'uhoont'oh.

<sup>8</sup>'Et hoontsi' nts'en'a la daht'en-un, 'et whe ninta' aht'i 'ink'ez nohulhutsinke 'e'whulhts'it.

<sup>9</sup>'Aw t'eeonuzahzun, nts'e la Yak'usda whe lerwe unli-un, 'et mbene la ts'ih'un lhe'it'ohne, 'enne 'aw bugha lhuhootas'al? Khun nohnich'oh na'dunooh't'ah junih! Mbene la dune ts'eke bulh lubeshi 'ulh'enne, k'us 'uk'eltsi ooba 'alha 'unt'ohne, k'us mbene la lhghu dilhts'ine lubeshi ts'u nint'ine hinli, k'us dudulh dunene hoontsi' k'un'a bulh ninta' ut'ihne 'ink'ez ts'ekoo dudulh ts'ekoo bulh ninta' ut'ihne,

<sup>10</sup>k'us 'undunut'ihne cha, k'us 'uyoonne ch'e' ha' ninzunne, k'us tanutnaine cha, k'us 'uyoonne dzoh ne'duni'ne, k'us 'on nus dáhatnine cha, 'enne ts'iyawh ndunt'ohne nts'e la Yak'usda lerwe unli-un, ndai la Yak'usda ooch'e unli-i, 'i' aw huyólhchoot ait'oh.

<sup>11</sup>'Ink'ez nohni whulohne nohtoh 'et daht'en inle'. 'Et hoontsi' whuz un'a tunanohuzguz le'aht'oh. Yak'usda ba 'udun nenohninla cha, 'ink'ez ts'ih'un dune nohulhtsi. 'Et ndi ts'iyawh Sizi Gri neMoodihti boozii' gha 'ink'ez neYak'usda ooyughi gha cha 'et whuz un'a 'unohinla.

*Neyust'e 'ink'ez neyughi te, 'i be Yak'usda uzdólhti'*

<sup>12</sup>'Et 'aw hoonliyaz whuch'a nusjoot-un hooloh, 'et hoontsi' whulukhun sba lhe'hoozoo'. Hoonliyaz whuch'a nusjoot-un hooloh, 'et hoontsi' 'aw hoonli k'une' sool'en-i hooloh, 'ilhiz wheni 'et ndutist'elh.

<sup>13</sup>T'alh-i nebut ba 'unt'oh 'ink'ez nebut t'alh-i ba 'unt'oh, 'et hoontsi' 'et ndi nankult'oh 'i Yak'usda 'ants'i 'unt'oh yutilhtselh. 'Et whuz un'a nduhoont'oh, neyust'e 'aw dune k'us ts'eke bulh lubeshi 'uhulh'en hukw'un'a be' ts'oot'en huba lhe'yilel. 'Et neyust'e neMoodihti ba 'ulya 'ink'ez neMoodihti neyust'e ba 'unt'oh.

<sup>14</sup>'Et Yak'usda ye ulhtus-i, 'i be neMoodihti dunaidilhti, 'ink'ez wheni cha ye ulhtus-i, 'i be dunanedutalelh.

<sup>15</sup>'Aw eh t'eeonuzáhzun nohyust'e Christ ooyust'e whuloh unli? Nts'en'a 'uwhtat'elh whe Christ ooyust'e whuloh unli-i whe 'ul'en-un ts'eke ooyust'e whuloh tiselh? 'Aw whuz un'a lhe'hoot'oh!

<sup>16</sup>'Aw eh t'eeonuzáhzun dune ts'eke 'ul'en-un ts'u nedinja 'et buyust'e 'ilho sulii' hukw'un'a 'uhint'oh? 'Et whuz un'a 'uk'ehooguz whe ndutni, "Nanki 'ilho yust'e sulii?"

<sup>17</sup>'Et mbe la Sizi Gri ts'u nedinja-un, ooyughi cha 'en bulh 'ilho sulii' whe 'unt'oh.

<sup>18</sup>'Et huwa dune k'us ts'eke bulh lubeshi 'uhulh'en 'et nduhoont'oh-un whuch'a ne'ooht'en. 'Et 'uyoo lubeshi 'aw neyust'e gha lhitasnal, 'et hoontsi' mbene la dune k'us ts'eke bulh ninta' 'ant'en de, 'et de dich'oh duyust'e lubeshi be ninta' yulh'ih.

19 Nohyust'e 'i Ndoni oolugliz whucho 'unt'oh 'ink'ez nohyudinda, 'aw t'oonuzáhzun eh? 'En 'unt'oh Yak'usda nohgha inin'ai 'et huwa 'aw nohnich'oh ch'e' lhahloh.

20 Lhe'hoolcho whe 'uneinla 'et whe Yak'usda naneonket 'inka nohyust'e 'i be 'ink'ez nohnich'oh nohyughi 'i be cha Yak'usda ba whudolhti' ooch'e'ne sahli 'et huwa.

## 7

### *Lhgho dilhts'i-un huwun*

1 'Et 'awet ndai la sts'o k'ehguz-i, 'i ghun 'et nohdutasnelh, dune ts'eke bulh ninta lhe'ust'i 'et hoonzoo.

2 'Et hoonts'i dune k'us ts'eke bulh lubeshi 'uhulh'en 'et nduhoontoh-un whuch'a 'et huwa dune 'ilhone hinli whe didutch'oh bu'at hóle' 'ink'ez ts'ekoo cha dich'oh buki hóle' huba' hoont'oh.

3 'Et dune du'at ts'ih'un un'a yuk'eootsi' yughusda huwa 'ink'ez ts'eke duki cha 'et whuz un'a za yuk'eootsi' huba' hoont'oh.

4 Mbe la ts'eke ooki hoonli-un, 'en duyust'e yumoodih lhiloh, ooki 'en za yumoodih unli. 'Ink'ez whuz un'a za mbe la dune oo'at hoonli-un, 'en duyust'e yumoodih lhiloh, oo'at 'en za yumoodih unli.

5 'Aw lhch'oh oohke' huba lhe'hoot'oh. 'Et hoonts'i 'atsulyaz whe soo hootahni 'ink'ez tenadutihdli hukwa' nuhzun de, 'et nanulht'o soo lhgha hoonuht'i' de, 'et soo' whutat'elh. 'Et hukw'elh'az doo cha za lhk'eoohsi' 'ink'ez lhzih nenaooht'as, doo ka la 'aw nohyust'e ooghu tihle huba soo lhe'ah't'oh de, 'et whe Satan nohootalhdzih.

6 'Aw 'oh te ne'ooht'en ha iloh 'onohdusni. 'Ants'i 'et whuz un'a 'et doht'en hukwa' nuhzun de, 'et huwa dusni.

7 'Et ts'iyanne dune si sk'un'a za nducha 'uhint'oh 'et whuz un'a hukwa' nuszun. 'Et hoonts'i Yak'usda ts'iyanne 'ilhone hinli whe ndai la huwa yu'aih-i, 'i bugha inin'ai. Ts'iyawh 'ilhone hinli lhendowh didowh-i, 'i bugha inin'ai.

8 'Et 'awet mbene la soh núdilhne 'ink'ez tsandilhne cha, 'enne diz un'a 'ubudúsní, si sk'un'a za 'uhint'oh de, 'et de buba hootazoo'.

9 'Et hoonts'i 'aw 'oohudodotun ait'oh de, lhgho dólts'i'. 'Ants'i kwun k'un'a lhts'onint'i de, lhgho dilhts'i de, 'et 'on nus soo' hoont'oh.

### *Lhghu dilhts'ine 'aw lhch'a nahoodilh ait'oh*

10 'Et 'awet mbene la lhghuskene, 'aw si iloh dusni, neMoodihti ndi khuni yutulhuhizye' 'i 'unt'oh, 'aw ts'eke duki ch'a naooja' junih.

11 'Et hoonts'i duki ch'a nasja de, 'et de 'aw 'uyoon ghu naooda' junih. 'Et hoonts'i hukwa' huninzun de, huhoont'i' whe lhzih nenahoot'as huba' hoont'oh. 'Ink'ez dune du'at 'ún yutooneh junih.

12 'Et 'awet whulohne nohtoh, si nohdutasnelh, 'aw neMoodihti iloh 'utni. Mbe neulhutsin 'en oo'at ooba 'alha' hoont'oh-un lhiloh de, 'et hoonts'i duki 'ilhiz oole' hizih ooda' hukwa' ninzun de, 'et de du'at 'ún yutooneh huba lhe'hoot'oh.

13 'Ink'ez ts'eke 'en ooki ooba 'alha' hoont'oh-un lhiloh de, 'et hoonts'i 'ilhiz wheni yuzih tidalh hukwa' ninzun de, 'et de duki 'ún yutooneh junih.

14 'Et ooki ooba 'alha' hoont'oh-un lhiloh, 'et hoonts'i 'en oo'at 'en gha Yak'usda ba 'udun nelti whe 'unt'oh. 'Et whuz un'a oo'at ooba 'alha' hoont'oh-un lhiloh, 'et hoonts'i ooki 'en gha Yak'usda ba 'udun nelti whe 'unt'oh. 'Et whuz un'a ndulhúhoot'oh de, 'et de buzkehke Yak'usda ba 'ats'un un'a 'uhutit'elh whe' uhoont'oh. 'Et hoonts'i 'enne Yak'usda ba 'udun nelyanne huzdli'.

15 'Et hoonts'i mbe la ooba 'alha' hoont'oh-un lhiloh whenája de, whute natooja'. 'Et whuz un'a nduhooja de, 'et de mbe la neulhutsin k'us neulhtus unline, 'aw lhts'u nóhnoolht'ine holoh huba' hoont'oh. 'Et hoonts'i nedzi doghel-i, 'i be ndi yun k'ut uzdolts'i, 'et huba Yak'usda 'utáhanéanla.

16 'Et nohni nohgha tilah nohkike hudoojih. 'Ink'ez nohni nohgha tilah noh'atke hudoojih, 'inka' dusni.

*Dant'ohne ahli whe Sizi Gri ts'u nálhyané sahl'i, 'et whuz un'a za 'ooht'e'*

17 'Et 'awet nts'en'a la ndulcho whe Yak'usda ba 'ilhunaosodilne bube' 'ut'en k'oh buba 'uwghusdla, 'et nohni cha 'et whuz un'a nohba whutat'elh. 'Et nts'o whuda' Yak'usda 'utahanohanla 'ink'ez nts'en'a la ndi yun k'ut dolhts'i, whute 'et whuz un'a ndi yun k'ut dulhts'i.

18 Mbe la 'uda' yuka dune unli-i k'ut huyuzt'us 'ink'ez 'utahayalhti de, 'et de lhit'us hukw'un'a 'oot'e' junih. K'us mbe lhit'us-un unli da', 'ink'ez 'utahayalhti de, 'et de yuka dune unli-i k'ut huyuzt'us hukw'un'a 'oot'e' junih.

19 'Et yuka dune unli-un k'ut huyuzt'us k'us lhit'us-un, 'i 'ants'i 'uhoont'oh. Yak'usda ooghuni netl'aídan'ai ook'une' ts'ut'en de, 'et za neba hooncha whe' hoont'oh.

20 Nts'en'a la 'ilhone hinli whe dahint'oh la whe 'utahabalhti, 'et whuz un'a 'uhoont'e' huba' hoont'oh.

21 Nyun 'ulhna inli whe 'utahanyalhtih de, 'et huwuni onle' junih. 'Et hoonts'i nyumoodih nladutitnih de, 'et de ndineh.

22 'Et mbene la neMoodihti 'utahayalhti-un 'ulhna unli hoonts'i, 'en neMoodihti yula naditni k'un'a 'unt'oh 'et huwa. 'Et whuz un'a mbene la neMoodihti dutijih ha yuka' dani', 'ulhna lhiloh hoonts'i, Sizi Gri ye 'ulhna unli.

23 Dahoolcho whe nanohonket, 'et huwa 'aw dune be 'ulhna oolhe' junih.

24 Sulhutsinke nts'en'a la daht'oh dune ahli whe Yak'usda 'utahanohanla, 'et whuz un'a za 'ooht'e' huba' hoont'oh.

*Mbe la 'aw dune k'us ts'eke t'elhnusze-un, 'enne bughun yatilhduk*

25 'Et 'awet mbe la 'aw dune k'us ts'eke t'elhnusze-un, 'enne bughun nohbulh yatisduk. 'Enne bughun neMoodihti 'aw khuni st'l'alhdi'al 'et hoonts'i neMoodihti sgha te'ninzun whe st'aninintan-un ooba tisdleh 'et huwa ndiz un'a nohbulh yatisduk.

26 Ndaí la 'andit be dzoh nahdeh-i 'et whu la gha ts'e dune nts'en'a la 'uhint'oh la, 'et whuz un'a za 'uhoot'e' huba' hoont'oh nuszun.

27 Ts'eke ghu sinda de, ooch'a natandalh hukwa 'ont'en junih. 'Et soh ninya de, 'et de 'uyoon ha' nonzin junih.

28 'Et hoonts'i lhghu sahke de, 'aw lubeshi lhuhooleh. 'Ink'ez ts'eke 'aw dune t'elhnusze-un ki yut'i de, 'aw ooba lubeshi lhuhooleh. 'Et hoonts'i mbene la lhghu dilhts'ine, 'enne ndi yun k'ut dzoh notideh, 'ink'ez 'et whuch'a whuz un'a nohba hukwa' nuszun.

29 Sulhutsinke 'andit ts'ih'un un'a nohdutasnelh, ndet la nohts'u hoolts'ulh-un 'awet nilhdukw whe 'uhoont'oh. 'Inka njan whuts'un ndiz un'a dune uztileh whe 'uhoont'oh. Mbe la bu'at hoonine, 'enne hoonts'i bu'at hooloh k'un'a 'uhint'oh.

30 Mbene la 'uk'enudlehne, 'aw 'uk'elhnusdene k'un'a 'uhint'oh. 'Et mbene la huhoont'ine, 'aw lhuhoot'ine k'un'a 'uhint'oh. 'Et mbene la hoonli ooksete, 'aw buch'e' lhiloh le'hint'oh.

31 'Ink'ez mbene la ndi yun k'ut whuch'e'-i, 'i huyut'i de, 'aw buch'e' lhiloh k'un'a 'uhint'oh. Ndi yun k'ut uzdilhts'i-un hukw'un'a gak whutaleh 'et huwa.



<sup>32</sup> Howuni ahli-un, 'et whuch'a nohts'u hukwa' nuszun. Whunilh'en, mbe la soh nuyá-un, 'en neMoodihti be 'ut'en k'oh 'ink'ez nts'en'a la ba hootazoo', 'et za howu ni aztan.

<sup>33</sup> 'Et hoonts'i mbe la oo'at hoonli 'en nts'en'a la ndi yun k'ut uzdlilhts'i-un hukw'un'a 'ink'ez du'at nts'en'a la ooba hootazoo' ninzun-un, 'et za howu ni aztan.

<sup>34</sup> 'Et mbene la ooki hoonli-un 'ink'ez 'aw dune t'enuszun-un bulh lhents'un un'a 'uhint'oh. Ndun 'aw dune t'enuszun-un neMoodihti 'en za ghun nuni nuzut. 'Et whe 'en duyust'e 'ink'ez dich'oh ooyughi bulh 'i cha lubeshi ooghu hooloh-un unli. 'Et mbe la ooki hoonli-un, 'en ndi yun k'ut uzdlilhts'i-un hukw'un'a, 'ink'ez nts'en'a la ooki ba hootazoo', 'et za howu nuni nuzut.

<sup>35</sup> 'On 'un nohba hootazoo'-un, 'et huwa ndi khuni nohdusni. 'Aw k'oh nónust'i iloh whe' dusni. 'Et hoonts'i ndai nohnich'oh be tihzoo'-i 'ink'ez nts'en'a la 'aw whelhahtsaz whe nohdzi ndulcho 'i be neMoodihti oogha' dunulhya, 'et huwa ndi khuni nohdusni.

<sup>36</sup> 'Et 'aw dune t'enuszun-un ndun dune yulh ninta' tit'elh ninzun de, 'ink'ez 'awet k'ényai whe 'uda' teninya whe 'unt'oh, 'et de whute lhghu hooke' huba' hoont'oh, 'aw lhuhóotsi'.

<sup>37</sup> 'Et hoonts'i mbe la dune dudzi dulcho-i be dant'oh whe dune tileh 'et t'ooninzun de, 'ink'ez 'et huwa 'aw 'at tit'elh hukwa lhe'ust'en whe dich'oh hukwa' ninzun hukw'un'a 'unt'oh de, 'et ndiz un'a dudzi be nahizya 'et whe soo' tit'elh.

<sup>38</sup> 'Et whe la mbe la 'at tit'elh-un 'et dúja de, 'et hoonzoo whe' hoont'oh. 'Ink'ez mbe la 'at lhít'el de, 'et 'on nus hootázoo'.

<sup>39</sup> 'Et Moses be 'udust'l'us ndutni, "Mbe la ooki hoonli-un, 'et ooki 'awhuz khuna de, 'et 'ilhiz oole' lhulh uhoot'e' huba' hoont'oh. 'Et ooki dazsai de, mbe yuka' ninzun ghu natidalh, 'et whuz un'a 'oot'e', hukwa' ninzun de." 'Et hoonts'i Yak'usda ooba 'alha' yint'oh-un, 'en za yughu nooda' huba' hoont'oh.

<sup>40</sup> 'Et hoonts'i nts'en'a la hoont'i' whe dant'oh de, whuz un'a za 'oot'e'. 'Et whuz un'a nahizusya. 'Ink'ez si cha Yak'usda dich'oh ooyughi ust'i nuszun.

## 8

### *Nohulhutsinke bugha te'noohzin*

<sup>1</sup> 'Et 'awet ndi ndai la t'alh-i 'uk'el'tsi gha t'aih-i 'et huwun nohbulh yátisduk. Soo t'ets'onínzun be t'oonudzun-i ts'ut'i 'ink'ez ndi be t'oonudzun-i 'et whuloh te 'ududílti' neilh'i. 'Et hoonts'i be nek'etsi'-i, 'i be 'on nus Yak'usda ba ts'ilhtus neilh'i.

<sup>2</sup> 'Et mbe la ts'iyantsuk duba t'enaonúdzun-un, 'en ndet la t'eóonózin huba' hoont'oh-un, 'et 'aw t'eóonúszun.

<sup>3</sup> 'Et hoonts'i mbene la Yak'usda k'entsi'ne, 'enne Yak'usda t'ebunínzun.

<sup>4</sup> 'Et 'awet ndi t'alh-i 'uk'el'tsi gha t'aih-i uzti'ulh, 'i ghun nohbulh yatisduk. 'Et ndi yun k'ut nts'e la 'uk'el'tsi 'unt'oh 'et hoonts'i 'ants'i unli 'i t'ets'onínzun. 'Ink'ez 'uyoo Yak'usda lhiloh, 'ilhoghun za Yak'usda unli.

<sup>5</sup> Lhane 'et whuz un'a nduhútni, yak'uz ts'e yak'usda huldlai. 'Ink'ez 'alha' uhoont'oh ndunne nduhutni yak'usda huldlai 'ink'ez moodihtine cha huldlai hutni.

<sup>6</sup> 'Et ndahútni 'et hoonts'i, wheni neba Yak'usda 'ilhoghun za unli, neBá 'en 'unt'oh. 'En za ts'iyantsuk oots'u hayúkat whe' hoont'oh. 'En za ba ts'oot'en ha ndi yun k'ut uzdlilhts'i. 'Ink'ez neMoodihti 'ilhoghun za unli, Sizi Gri 'en 'unt'oh. 'En gha la ts'e ts'iyantsuk 'ulya, 'ink'ez wheni cha 'en gha za ts'ukhuna.

<sup>7</sup> 'Et hoonts'i 'aw ts'iyanne ndi be t'oonudzun-i lhuhít'i'. 'Ink'ez 'andit whuts'un ndi t'alh-i 'uk'el'tsi gha t'aih-i, 'i huya'alh whe nyoo 'uk'el'tsi ooch'e'

huninzun 'ink'ez 'awhuz buba 'alha 'uhoont'oh. 'Et huwa 'et ndi huya'alh 'et whe buyo ts'e oogha t'ets'oninzun-i\* tetsun-i, 'i be ntsi' yulhtsi.

<sup>8</sup>'Et hoontsi'i 'antsi'i t'alh-i 'aw 'i be Yak'usda nalh unzoone lhts'íloh. Ts'an'al de, 'et whe 'aw 'on nus soo zoo' ts'ooole ait'oh. 'Et 'aw lhts'i'ulh de, 'et whe 'aw 'on nus neba whutát'elh le lhe'ts'it'oh.

<sup>9</sup>Nohnich'oh khaadli doo ka la ndai la khuni nohtl'aidan'ai-i, 'i gha la ndunne tetsunne tank'us hunoot'i.

<sup>10</sup>Soo cho whunilh'en, nyun be t'oonudzun-i 'int'i, 'ink'ez nyulhutsin cha buyo ts'e oogha t'ets'oninzun-i tetsun de, 'en 'uk'eltsi lugliz 'et higha hiya'aih-i 'et sinda whe nyunilh'en ndi t'alh-i 'uk'eltsi gha t'aih-i, 'i in'alh de, 'et 'alha lakw 'en cha whuz nilht'i ndi t'alh-i 'uk'eltsi gha t'aih-i 'uti'ulh eh? A, 'alha 'en cha whuz ntalht'i yuti'ulh wheni.

<sup>11</sup>'Et 'inka nyulhutsin 'uk'eltsi ghun beni toh diz'ai-i tetsun-un unli, 'en be t'oonudzun-i 'int'í-i, 'i be ninta' whutálh'elh, Christ yuba dazsai hoontsi'i.

<sup>12</sup>'Et nohulhutsinke nohni nohgha lubeshi 'uhulh'en de, buyo ts'e oogha t'ets'oninzun-i cha undóldah la. 'Et whuz un'a za ndutiht'elh de, 'et de Christ 'en cha ooch'a lubeshi itálhchulh.

<sup>13</sup>'Et huwa ndi t'alh-i huwa t'aih-i, 'i gha sulhutsin tank'us 'óoneh de, 'et de 'aw 'on 'at 'utsung óos'ah ait'oh, doo ka la si sgha sulhutsin tank'us 'óoneh.

## 9

### *Paul didutch'oh khunayaldukd nts'en'a la Sizi Gri ba whel'a-un unli*

<sup>1</sup>'Et 'alha lakw si whel'a-un usdli? 'Et 'alha lakw ndai la Yak'usda ba 'utis'elh-i, 'i ts'iyawh stl'ahon'ai? 'Et 'alha lakw neMoodihti Sizi Gri us'en? 'Et 'alha lakw ndai 'ut'en neMoodihti 'en ba 'us'en-i, 'i be buba 'alha 'uhoont'ohne sahli? 'Et ts'iyawh ts'ih'un 'alha 'uhoont'oh.

<sup>2</sup>'Et 'onghohne buba whel'a-un lhusdloh de, 'et hoontsi'i 'alha nohni nohba whel'a-un usdli. 'Ink'ez nts'en'a la ts'iyanne t'ehinozin si whel'a-un 'ust'oh, 'et neMoodihti nohyudinda 'ink'ez 'et whe snutsi k'oh ts'e aht'oh.

<sup>3</sup>'Et mbene la sch'az ditnine, 'enne 'et ndiz un'a 'ubudutasnelh,

<sup>4</sup>'Et 'alha lakw hukwa' uzninzun totsuk 'uzti'ulh 'ink'ez 'uztitnelh, 'et Yak'usda neba' hoonla?

<sup>5</sup>'Ink'ez wheni cha eh neba' hoonla whe mbene la neulhtuske buts'utni hukwa' uzninzun de, 'enne hoontsi'i bughu ts'ooda' huba' hoont'oh? 'Et 'onghunne whel'a'ne cha, neMoodihti bulhutsinke cha, 'ink'ez Cephas cha, 'enne cha bu'at hoonli. 'Et 'enne buk'un'a 'uts'oot'e' ha eh 'uneinla?

<sup>6</sup>'Et k'us si 'ink'ez Barnabas 'aw wheni za eh nela be uzti'el'el' uzti'ulh huba? Nohba ts'ih'un 'uhoont'oh eh? 'Awundooh!

<sup>7</sup>'Et mbe la salda unli whe ndai la ye ndunidzit-i dich'oh yuk'elha lhuhoohl'ih eh? K'us mbe la soo ha' nulhyeh-un, 'en ndai la hainulhyeh-i, 'i yuloh ti'ulh eh? K'us mbe la musdoos yughundli-un unli whe oolilet yuloh 'utnai eh?

<sup>8</sup>'Et njan nohbulh yasduk-un dune k'un'a iloh 'unohdusni. Moses be 'udustl'us 'i k'un'a 'unohdusni.

<sup>9</sup>'Et ndutni, "Ndet la musdoos dune tl'o mai' 'uzti'ulh wheni 'uyulh'en te, 'aw 'uti'ulh whuch'a 'enol'a' ait'oh," ni.

<sup>10</sup>Yak'usda musdoos dune yughu ni unli k'us wheni neba 'et ndi ts'iyawh utni eh? 'Et 'alha wheni neba ndi 'uk'uneyuzguz. 'Et whe la 'et mbe la haniyeh k'et 'et whulh ch'ul-un, 'ink'ez mbe la tl'o mai' oonuyin-un khun la whuloh buts'u natookat huninzun.

\* **8:7** Ndi khuni, 'Neyo ts'e oogha t'ets'oninzun-i,' 'i hoonli ts'ih'un un'a k'us tank'us un'a 'úhoont'oh-un, 'i gha t'ets'oninzun, ts'utni whe' ts'utni.

11 'Ink'ez wheni nohtoh Yak'usda ooghuni nohnat 'a'nule le'uja de, 'et de nohba hooncha eh whe nohts'un ndai la be uzdundizit-i whuloh be neghohle' huba' hoont'oh? A, 'alha' hoont'oh.

12 'Et 'onghunne nohghunline, hoonli bughahle, di ha wheni negha lhe'zahloh? 'Et hoonts'i ndai la Yak'usda negha ooninla 'aw 'et whuz un'a ndulhts'it'el inle'. 'Et k'us ts'iyawh soo whulh ts'uzyin doo ka la khuni unzoo-i Christ ghun doo ka la ninta' ts'uholh'en.

13 'Aw t'eeonuzáhzun mbene la Lizwifne bulugliz whucho bez ts'e 'ut'enne, 'enne ndi lugliz whucho huwa t'aih-i hiloh oo'alh huba' hoont'oh. 'Ink'ez mbene la loodel nat 'ut'enne, 'enne ndi loodel k'ut huwa t'aih-i 'enne cha 'et whuz un'a za.

14 'Et whuz un'a mbene la khuni unzoo-i be yalhduk online, ndai la hiye ndunidzit-i, ndi khuni unzoo-i, 'i gha 'i bughia iyunkat. 'Et whuz un'a neMoodihti nets'u hukwa' dani'.

15 'Et hoonts'i ndai la Yak'usda khuni 'et netl'aídan'ai-i, 'et 'i be nohdusni, 'et hoonts'i 'aw hoonli 'ants'et nohghu lhuschulh inle'. 'Ink'ez 'aw 'et whuz un'a iloh nohts'o k'elhe'usgus. Soo hoonust'i' whe nja duhoont'oh-un, 'et howu yasduk te, 'i 'ants'i hóle' hukwa lhe'nuszun. 'Et hoonts'i 'et ndudútsinelh de, 'et whutso unducha dasusai 'et de sich'oh 'on nus sba hootazoo'.

16 'Aw whe' duduziti' iloh whe ndi khuni unzoo-i be nohbulh yasduk. Ndi khuni stl'adilts'ut-i 'ants'i 'oh whuya ist'elh-un 'etsul oosdleh ait'oh. 'Et ndi khuni unzoo-i be yalhuzusduk de, dawhulsi'-un 'et whuch'a ootasdoh!

17 Ndi 'us'en-i, sdzi ndulcho 'i be 'us'en de, 'et de sba 'uk'elha whutaleh. 'Et hoonts'i ndi 'us'en oosdleh huba' hoont'oh de 'ink'ez 'et huwa 'us'en de, 'et de 'ants'i 'ut'en stl'alts'ut-i k'un'a 'us'en hukw'un'a 'uwhutat'elh.

18 'Et daja nuhzun? Di za sba k'elha tileh? Nohdutasnelh. Nts'oh tula ndi khuni unzoo-i Christ ghun, 'i be nohbulh yatisduk, 'aw 'uk'elha iloh be nohbulh yatisduk. Whel'a-un 'ust'oh 'et huwa stl'ahóolts'ut whe ndi 'ut'en us'en-i ha nohni sba k'elha hoolhtselh huba' hoont'oh. 'Et hoonts'i 'aw ndulhusdoh. 'Et 'awet sghuni ulhchoot de, 'et 'awet sba k'elha whuzdli' whe 'uhoont'oh.

### *Ts'iyanne ba 'ulhna na'duzúzi, ni Paul*

19 'Et 'aw 'ulhna lhusdloh 'et hoonts'i ts'iyanne ba 'ulhna na'duzuzsi. 'Et whe la 'on nus 'ultsukne uboosyih.

20 Lizwifne bulh 'ust'oh de, 'et Lizwif k'un'a na'duzuzsi, 'et tilah Lizwifne 'on nus lhane uboosyih. 'Ink'ez ndai la Moses be 'udustl'us yuk'une' 'ut'enne, 'enne buk'un'a 'ust'oh na'duzuzsi, 'et tilah ndunne 'on nus lhane uboosyih.

21 'Et mbene la Moses be 'udustl'us yuyit 'unt'ohne, 'enne buk'un'a 'ust'oh na'duzuzsi. 'Et tilah mbene la Moses be 'udustl'us yit 'unt'ohne, 'enne cha uboosyih. 'Et hoonts'i ndet la Yak'usda neba lhuhizye' 'et 'aw whuyit lhe'duzusni, et Christ ndet la neba 'utni-un hukw'un'a 'ust'oh 'et huwa.

22 'Ink'ez tetsunne toh 'ust'oh de, 'enne buk'un'a si cha tesun tileh, 'et whé tilah uboosyih. 'I be la whuch'a bósdeh. 'Et huwa njan 'et ndust'en-un niz de haoodanzut ndai la is'en-i 'et whe whulohne tilah uboosyih.

23 'Inka ndi khuni unzoo-i, 'i gha 'ust'en. 'Et de la ndai la unzoo-i negha ninla, 'i 'alghoh la ts'ólhchoot.

### *Whuch'a' tisdoh hukwa' nuszun, ni Paul*

24 'Aw t'eeonuzuhzun mbe la lhghu natulwusne butoh 'ilhoghun za whuch'a 'alhdoh. Nohni cha 'et whuz un'a whuch'a nilhde-un k'un'a 'utihnelh.

<sup>25</sup> Mbe la soo hoolhdzihne dich'oh khudli. 'Et lhghu natilwusne ndi whuch'a italhdoh-i 'utsi' tileh. 'Et hoontsi' wheni be whuch'a ts'otalhdoh-i 'aw 'utsi' oole' ait'oh.

<sup>26</sup> 'Et 'inka si cha whuz un'a ndoya uzgih. 'Antsi' 'oh whunilhchoh núzgaih iloh whe 'ust'en. 'Ink'ez ndai la be whesyaih-un, 'aw 'antsi' 'oh nuduzchus iloh whe 'ust'en.

<sup>27</sup> Sich'oh syust'e be syaih 'et whe sk'une' tit'en. 'Et 'aw ndiz un'a ndulhuzust'en de, lhenyoone khuni unzoo-i be bubulh yasduk hoontsi' sich'oh sba dzoh naóodle' la.

## 10

### *Netsoda'ne, 'enne bugha whuts'odul'eh*

<sup>1</sup> 'Et 'awet sulhutsinke njan netsoda'ne, 'enne bunats'odoolnoh hukwa lhe'nuszun. Soo kw'us yanyus ts'e 'unt'ohne, yatoo' toh lhuhúzdil.

<sup>2</sup> 'Et netsoda'ne kw'us 'ink'ez yatoo' 'i bulh ts'iyawh Moses ts'un too be' yinla.

<sup>3</sup> Ts'iyawh ndai la t'alh-i yak'uz hainkat-i, 'i ndunne ts'iyawh huyan'al.

<sup>4</sup> 'Ink'ez ts'iyawh ndai la huyitnai' yak'uz ts'e hahuyanla 'i 'alghoh huyitnai'. Ndi yak'uz whutse' 'i buwhusaínilt'sut, 'et huwa 'i oots'u hayíjul-i, 'i ts'iyawh 'alghoh huyitnai'. 'Ink'ez ndi tse 'i Christ unli inle' 'unt'oh.

<sup>5</sup> 'Et hoontsi' k'us lhane Yak'usda ba 'aw lhe'hízoo'. 'Et huwa dune lhuhoot'ih-un ts'e buzi ndulcho whe núdist'ai sulí'.

<sup>6</sup> 'Et ndi ts'iyawh oogha t'ets'oninzun-i neba sulí' hukw'un'a 'uhooja. 'Et huwa la 'aw 'enne buk'un'a lubeshi uztilh'elh hukwa' uznoozin ait'oh.

<sup>7</sup> 'Ink'ez whulohne, 'enne buk'un'a 'uk'eltsi nohba 'alha 'oot'e' junih. 'Et whuz un'a 'uk'une'úsgus whe ndutni, "Dunene hudilhtsi, na'hit'al 'ink'ez 'uhitnai' cha' huja. 'Et 'awet do dindil 'ink'ez 'uk'enus hoontsi' k'un'a nahúwhulhya."

<sup>8</sup> 'Enne buk'un'a ts'ekoo bulh lubeshi olhchoot junih! Whulohne 'et whuz un'a lubeshi 'uhinla. 'Et whu la gha ts'e 'ilhudzin 23,000ne 'et 'ultsukne yaidla.

<sup>9</sup> 'Enne buk'un'a Christ ts'oolhdzih le'ts'oot'en junih. Whulohne huyóolhdzai 'et huwa tl'ughus be higan.

<sup>10</sup> 'Ink'ez 'enne buk'un'a howu tádohtni tuzai junih! Whulohne 'et whuz un'a nduhuja 'et huwa mbe la musai 'ulhtsih-un ndunne howu tahúditni tuzaine, 'enne ts'iyawh gak hubulhtsi.

<sup>11</sup> 'Et ndi 'i ts'iyawh buba 'et 'úhooja 'i ts'iyawh ooghá t'ets'onozin ha ndóohooja, 'ink'ez neba 'uk'eyanguz whe wheni uneúlhni. Wheni 'uts'int'oh nts'en'a la ndi yun k'ut uzdilhtsi-i-un hukw'un'a, wheni neba 'awet whula toh sulí'.

<sup>12</sup> 'Et huwa mbe la soo usyin unli-un na'dunúdzun-un, 'en soo cho howole' doo ka la naoolts'it.

<sup>13</sup> 'Et ndet whe la netsudule dunene ubóolhdzih, whuz un'a za nohni cha nohóolhdzai. 'Et hoontsi' Yak'usda 'aw nela dootnih ait'oh. Ndet whe la netsudule nohóolhdzih, 'et dáwhultsuk ulhtus-i be whulh áhyin, 'et za Yak'usda ba soo' whutat'elh. 'Et nohóolhdzih de, 'et de whuz un'a whuch'a natihdulh whuz un'a Yak'usda nohba' whutileh.

### *'Uk'eltsi ts'u teni' noolhdzin junih*

<sup>14</sup> 'Inka ook'esi'ne, ndi 'uk'eltsi nohba 'alha' 'unt'oh-i, 'i ooch'a ne'ooht'en huba' hoont'oh.

15 Whunihne k'un'a ahli 'et huwa diz un'a nohbulh yasduk. 'Inka njan huwun nohbulh yasduk-un nohnihc'h'oh soo cho ts'ih'un neóonah'aih 'ink'ez 'et whe nohnic'h'oh soo ts'ih'un neóonah'aih.

16 'Et ndi lubot 'i be musi ts'utni, 'et 'alha Christ duzkai' bulh úts'int'oh nuhzún eh? A! 'Ink'ez ndi lhes lhst'e uzdanuyuz 'et 'alha Christ ooyust'e bulh 'uts'int'oh nuhzun eh? A!

17 'Et huwa daltsukne ts'inli, 'et hoonts'i ndi lhes 'ilho za 'uts'int'oh 'ink'ez ndi yust'e 'ilho za unli. Ndi lhes 'ilho wheni ts'iyawh bulh uts'int'oh 'et huwa.

18 Israel oodune'ne k'oh ts'e t'eóonúhzun eh? Soo cho whunulh'en, mbe la loodel gha t'aih-i huyan'alne, 'enne ndi loodel bulh 'úhint'oh.

19 Daja dusni 'et t'eóonúhzun eh? Daja nuhzun? 'Uk'elsti hoonli 'unt'oh eh? K'us 'uk'elsti gha t'aih-i, 'i cha eh hoonli unli? 'Awundooh!

20 'Et 'udun yun k'ut whut'enne ndai la 'uk'elsti gha huya'aih-i, 'i ntsi'ne nududehne, 'enne butsu hitoolhdilh 'aw Yak'usda ts'un iloh. 'Ink'ez nohni ntsi'ne nududehne bulh 'utih't'elh nohba hukwa lhe'núszun 'et huwa.

21 NeMoodihti oolubot 'ink'ez ntsi'ne nududehne bulubot bulh 'aw lh-tats'ootnai' aít'oh. 'Et neMoodihti ooludab 'ink'ez cha ntsi'ne nududehne buludab 'aw nankilt'oh ook'ut 'uts'oo'alh huba lhe'hóot'oh. 'Aw whuz un'a 'uhóneh aít'oh!

22 'Et neMoodihti 'óotálnih uztilhtselh eh? 'Aw 'et duts'óot'en huba lhe'hóot'oh. 'En ba nus ts'ilhtus nahzun eh? 'Awundooh!

*Nts'en'a la Yak'usda whe dulhti'-un, 'et whuz un'a dune oohle' huba' hoot'oh*

23 'Et 'aw hoonliyaz whuch'a nusjoot-un hooloh, 'et hoonts'i whulukhun sba lhuhóozoo'. Hoonliyaz whuch'a nusjoot-un hooloh, 'et hoonts'i whulukhun ndutist'elh de 'aw dune whe bula 'e'whudóneh aít'oh.

24 'Et huwa ndet la wheni za neba unzoo-i, 'i ha' ts'oot'en aít'oh. 'Uyoonne ba unzoo-i, 'i za ha' ts'oot'en.

25 'Et ndai la 'ilhunaoodulhne huye 'óoket-i, 'i ts'iyawh ah'alh whe 'unt'oh. 'Ink'ez nohyo ts'e oogha t'ets'oninzun-i hoonts'i, ooka' oodolhkut junih.

26 Ndi yun k'ut 'ink'ez ndai la hoonli-i, 'i ts'iyawh neMoodihti 'en ooch'e' 'et huwa.

27 'Et ooba 'alha lhe'hoot'ohne, 'enne ndet la nohghu nuhúzya 'ink'ez whuz tanyalh de, ndai nohbut néhininla-i, 'i ooh'alh 'ink'ez nohyo ts'e oogha t'ets'oninzun-i hoonts'i ooka' oodolhkut junih.

28 'Et hoonts'i dune nohdutánelh, "Ndi 'uk'elsti gha t'aih-i 'unt'oh," 'et de 'aw lhuzooh'al. Mbe la nohdutánelh-un 'ink'ez ooyo ts'e oogha t'ets'oninzun-i 'et huwa 'et la 'aw lhuzooh'al. 'Et hoonts'i ndi yun k'ut 'ink'ez ndai la hoonli-i, 'i ts'iyawh neMoodihti 'en ooch'e' 'unt'oh.

29 Ndi neyo ts'e oogha t'ets'oninzun-i ooghuyasduk-un, 'aw nohni nohyo ts'e oogha t'ets'oninzun-i, 'et iloh howu yasduk. Ndun ooyo ts'e oogha t'ets'oninzun-i, 'i ghu yasduk whe' dusni. 'Et di ha 'uyoon ooyo ts'e oogha t'ets'oninzun-i, 'i be 'aw hoonli whe whuch'a nusjoot-un, nts'en'a 'uyoonne beni tidiz'ai 'i sba nahutiyselh?

30 'Et t'alh-i ha musi dusni whe us'al 'et hoonts'i sghu yahalhdud. 'Et di ha sghu yahalhdud musi dusni 'et hoonts'i?

31 'Et 'inka ndet la ah'alh totsuk, 'ink'ez ahtnai-i de cha, k'us nts'oh daht'en 'i cha, 'et ts'iyawh 'i be 'et nts'en'a la Yak'usda whé dulhti'-un, 'et whuz un'a za dune oohle' huba' hoot'oh.

32 'Et huwa Lizwifne cha, 'ink'ez 'udun yun k'ut whut'enne cha, 'ink'ez Yak'usda ba 'ilhunaoodulhne, 'enne cha, mbene hinli hoonts'i, 'et hoonliyaz 'óohneh buba dzoh junih.

<sup>33</sup> Si cha whuz un'a 'et ts'iyanne ts'un ooszoo' hukwa 'ust'en. Sich'oh hootást'e' hukwa lhe'zust'en. K'us ndet la ts'iyanne ba hoonzoo 'oh túne' 'ust'en, 'et huwa 'enne tilah hudoojih.

## 11

<sup>1</sup> Nts'en'a la Christ k'un'a 'ust'oh, 'et nohni cha si sk'un'a 'ooht'e'.

*Netsi k'e'uzbal-i whe tenazudli huwun*

<sup>2</sup> 'Et 'awet sullhutsinke nja dudusni soo iht'en. Ts'iyantsuk whe snalnih. 'Et whunohodus'eh-un ts'iyawh hoohtun.

<sup>3</sup> Njan t'ewhutihzin hukwa' nuszun, Christ 'en za dunene ts'iyawh an ndo 'unt'oh. Dunene, 'enne za ts'ekoo an ndo 'úhint'oh. 'Ink'ez Yak'usda 'en za Christ an ndo 'unt'oh.

<sup>4</sup> 'Et mbe la dunene ootsi k'e'uzbal whe tenadudli 'ink'ez k'us nus hoo'en de, 'et de mbe la dunene an ndo 'unt'oh-un, 'en yooya yutilhtselh.

<sup>5</sup> 'Et mbe la ts'eke ootsi k'ulhe'ibal whe tenadudli 'ink'ez k'us nus hoo'en de, 'et de mbe la ts'eke an ndo 'unt'oh-un, 'en yooya yutilhtselh. 'Ants'i ootsigha' hooloh le'tit'elh 'et huwa.

<sup>6</sup> 'Et 'aw dutsi k'et tilhbal hukwa lhe'nizun de, 'et dutsi dulcho nahinoozo. 'Et hoots'i hukwaya unli ootsigha' dunene k'un'a hananit'az k'us hananidzo de, 'et de dutsi k'e'oolhbal huba' hoot'oh.

<sup>7</sup> 'Et 'alha dunene, 'enne Yak'usda k'eguz-i k'un'a 'uhint'oh, 'ink'ez ye diziti'-i k'un'a 'uhint'oh. 'Et huwa dutsi k'e'oolhbal ait'oh. 'Et ts'ekoo 'enne dune huye diziti'ne 'uhint'oh.

<sup>8</sup> Dune, 'en 'aw ts'eke ts'u halhizulh, 'et ts'eke 'en dune ts'u hainzut 'et huwa.

<sup>9</sup> 'Ink'ez Yak'usda dune 'aw ts'eke ba lhe'yilel, 'et ts'eke 'en dune ba 'uyinla.

<sup>10</sup> 'Et huwa ndunne Lizasne, 'enne bula toh ts'e ndet la ts'ekoo buba' hoonla-un 'i butsi k'eoobal huba' hoot'oh.

<sup>11</sup> 'Ink'ez neMoodihti ooch'e'ne 'uts'int'oh. 'Et huwa dunene, 'enne ts'ekoo yit 'uhoot'e' ait'oh, 'ink'ez ts'ekoo 'enne dunene yit 'uhoot'e' ait'oh.

<sup>12</sup> 'Et ts'eke dune ts'u hainzut 'ink'ez dune ts'eke gha whuzdli, 'ink'ez ts'iyawh Yak'usda ts'u hainde-i, 'i 'unt'oh.

<sup>13</sup> Nohnich'oh ts'ih'un un'a whe duba nahutihdeh. 'Et mbe la ts'ekoo unline tenahududli de 'aw dutsi k'ulhehilhbal de, 'et nohba ts'ih'un 'uhoot'oh eh? 'Et nohba dahoot'oh?

<sup>14</sup> Njan ndet za whuts'odil'e' ndi yun k'ut? Soo cho whunulh'en, dune ootsigha' dinyiz de, 'et ooba hukwaya hoonli whe' hoot'oh.

<sup>15</sup> 'Et hoots'i ts'eke ootsigha' dinyiz de, 'et whe 'en ba hoonzoo, ootsigha' dinyiz-un, 'et ooghá whunt'ai ootsi k'e'uzbal le'oot'e' ha.

<sup>16</sup> 'Et mbe la njan whudulhyoh 'udutinelh hukwa' ninzun de, 'et ndiz un'a za nja dudusni, 'et diz whuz un'a za neba' hoot'oh whe' hoot'oh. Wheni cha 'ink'ez yun k'ut dune ts'iyawh mbene la Yak'usda unidulhne 'ilhunahodulh totsuk.

*NeMoodihti hulgha na'ut'alh-un huba*

<sup>17</sup> 'Et 'awet ndi be bunohodus'eh-i ulhtus whe be nohbulh yasduk. Ts'iyawh 'ilhunaoozahdil de, 'aw soo 'áht'en lhduzusni. 'Et 'ats'un un'a aht'en nohdusni.

<sup>18</sup> 'Udechoo khuni dusts'o-i ndet la Yak'usda ba 'ilhunaoohdulh totsuk, ndet la 'ilhunaoohdulh te, 'et hoots'i whulohne nohtoh lhdulhyoh 'udahni, 'et whulh údusts'o. 'Ink'ez sba 'alha' hoot'oh.

<sup>19</sup> 'Et nohtoh lhehts'un un'a didohne hinli 'et whuz un'a 'et dótanelh. 'Et whe la mbene nohtoh Yak'usda ba unzoone, 'enne ts'iyanne t'ebuntizeh whe' hoot'oh.

<sup>20</sup> 'Et huwa ndet la 'ilhunaoozahdil whe 'et hulhgha neMoodihti na'ut'alh-un huba, 'aw 'et huba iloh whusahdil.

<sup>21</sup> Lhe'ahja nohnich'oh 'onghohne butso hulhgha t'alh-i ah'al. 'Et huwa whulohne buye'ilts'ul 'ink'ez whulohne tahanísnai'.

<sup>22</sup> 'Aw yoh lhuwhaht'i utih'ulh k'us tatihtnelh whuba whe aht'en? K'us ndi Yak'usda ba 'ilhunaoohdulh te 'ants'i nohba hoonli eh? 'Ink'ez mbe la hoonliyaz lhit'ih-un be yooya ubutalhtselh. Daja uncha nohdosni? Soo 'aht'en nohdusni eh? Gak! 'Aw soo 'aht'en lhduzusni.

*NeMoodihti whusanatidalh whuts'un, ndi lhes ts'oo'ah 'ink'ez ndi lubot be ts'ootnai', 'et whuz un'a neba dazsai-un oonaztilnih*

<sup>23</sup> 'Et neMoodihti khuni st'adan'ai 'ink'ez 'i 'unt'oh nohtl'as'ai whe ndutni, neMoodihti Sizi Gri 'ulhdzis da' ndet da' butl'a ihitilhtel whutso, 'et lhes yilhchoot.

<sup>24</sup> 'Udechoo musi ni 'ink'ez lhts'edanyuz. 'Et ndubulhni, "Ndi lhes ulhchoot 'ink'ez ah'alh. Ndi syust'e 'unt'oh. 'I nohni nohba lhts'ehidanyuz. 'Et ndulh'en whe snalhnih."

<sup>25</sup> 'Ink'ez ndi lubot 'et whuz un'a za 'uja. 'Uhan'al hukw'elh'az ubudani', "Ndi lubot 'i 'andidi khuni nohba lhadúsda-i, 'i 'unt'oh. Suzkai' gha nohba usdla. 'Et ahnai totsuk, 'et ndaht'en whe snalhnih."

<sup>26</sup> 'Inka ndi lhes tih'ulh 'ink'ez ndi lubot tihnelh de, 'et 'ahoolhyiz 'et ndutilh'elh totsuk, neMoodihti whusanatidalh whuts'un 'et za ndóh'en. 'Et 'i be neba dazsai-un whubuznoolhtun.

*Sizi neba dazsai-un oonaztilnih whutso, na'uzdunool'en, 'awhuz tilah lubeshi bulh 'uts'int'oh*

<sup>27</sup> 'Et huwa mbe la ndi lhes yuti'ulh 'ink'ez neMoodihti oolubot yutitnelh whe hiba soo lhe'hildzoo' whe huyilhchoot de, 'en nduja de, neMoodihti ooyust'e 'ink'ez buzikai' bulh 'i gha lubeshi ilhchoot.

<sup>28</sup> 'Et dune dich'oh na'dunul'en 'et hukw'elh'az ndi lhes huyoo'alh 'ink'ez ndi lubot huyootnai'.

<sup>29</sup> 'Et mbe la yuba 'ants'i whe ndi yu'alh 'ink'ez yutnai' de, 'et Yak'usda yuba nahutiye, 'et dich'oh khanáwhunt'ai. Dich'oh 'aw ts'ih'un un'a whe neMoodihti ooyust'e ghun t'ewhunúszun 'et huwa.

<sup>30</sup> 'Et huwa la lhane nohtoh tehutsun sulí', whulohne hunduda cha sulí', 'ink'ez lhane 'ilhiz nahunistez.\*

<sup>31</sup> 'Et huwa t'ena'uzdunudzun whe whenich'oh na'uzdunool'en de, 'et de neMoodihti 'aw neba nahooyeh ait'oh.

<sup>32</sup> 'Ink'ez neMoodihti neba nahuyeh de, 'et neoohltsas. 'Et whe la 'aw ndi yun k'ut whudune'ne bubulh neba nahookeh ait'oh.

<sup>33</sup> 'Et huwa sulhutsinke, nkede la utih'ulh huba 'ilhunaoohdulh te, lhba sulh'i.

<sup>34</sup> Mbene la ooye'ilts'ulne duyoh ts'e 'uhoo'alh. 'Et whe la nkede la 'ilhunaoohdulh de, 'aw nohba nahookeh ait'oh. 'Ink'ez 'udun cha whunohodutis'eh-un ndet la nohts'óozusya de, 'et ts'iyawh ts'ih'un un'a nohba neootas'alh.

## 12

*Lhenyoo negankat-i 'et hoonts'i 'ilhoghun za Ndoni 'en za ts'iyawh negha yúle*

<sup>1</sup> 'Et 'awet sulhutsinke dant'oh-i Ndoni negha yú'aih, 'i neghalts'ulh, 'i ghun 'et cha t'eóonóhzin nohba hukwa' nuszun.

\* 11:30 Ndi nahunistez ni-un, 'et yahadla ni whe 'utni.

<sup>2</sup> T'eóonúhzun ooba 'alha' hoont'ohne lháhloh inle'. 'Et huwa nts'en'a la ndi yun k'ut dalhts'i' hukw'un'a, 'et ndi 'uk'eltsi yalhúhduk-i ook'oh ts'e ook'úne' aht'en inle'.

<sup>3</sup> 'Et huwa noheni taóodutalts'ulh hukwa' nuszun. Soo cho whunulh'en, 'aw 'ilhoghun dune Yak'usda ooyughi gha Sizi Gri 'en untsi' dooni' ait'oh. 'Et whuz un'a 'aw dúzdooni' ait'oh whe' hoont'oh. 'Ink'ez Ndoni 'en gha za ts'utni Sizi Gri 'en neMoodihti ts'ilh'i.

<sup>4</sup> 'Et 'awet lhenyoo neghankat-i 'et hoonts'i 'ilhoghun za Ndoni 'en za ts'iyawh negha yúle.

<sup>5</sup> 'Et lhat-un whe neMoodihti ooba ne'ts'ut'en.

<sup>6</sup> Lhat-un whe Yak'usda ba' ts'oot'en huba' hoont'oh 'ink'ez 'en Yak'usda za ts'iyawh ye 'út'en lhaídulh'ih.

<sup>7</sup> 'Et ts'iyawh 'ilho whe Ndoni be hóodiltsih le'hoont'oh whe wheni ts'iyawh neba hoonzoo tileh.

<sup>8</sup> 'Et 'ilhoghun dune, 'en Ndoni gha khuni be ts'uwhunih-i, 'i yugha nín'ai. 'Et 'uyoon dune cha whuz un'a za Ndoni 'en za khuni be t'eeonudzun-i yugha óonin'ai.

<sup>9</sup> 'Et 'uyoon cha Ndoni 'en za be 'alha' hoont'oh-i yugha nínla 'ink'ez doo cha 'uyoon, 'en cha Ndoni 'en za ulhtus-i whe dune soo na'ulh'en-un, 'et yugha óoninai.

<sup>10</sup> 'Et doo cha 'uyoon 'en ulhtus-i be huwa 'ít'en tuné' tit'en 'et yutl'ahón'ai. 'Et doo cha 'uyoon buba nus hoo'en 'et yugha óonin'ai. 'Et doo cha 'uyoon 'et nahootá'ah nts'en'a la buyughi lhelhts'un un'a 'unt'oh 'et yugha óonin'ai. 'Et doo cha 'uyoon lhelhts'un un'a yahatilhduk-un yutl'ahón'ai. 'Et 'uyoon doo cha lhelhts'un un'a yahalhduk-un, 'et t'ewhüntázin 'et yutl'ahón'ai.

<sup>11</sup> 'Ink'ez ndi ndunt'oh-i ts'iyawh 'ilho Ndoni za nts'en'a la hukwa' ninzun k'un'a, 'et whuz un'a buba lkh'éhónla. 'Ink'ez 'andit ndet la butaonínla 'ilho Ndoni 'i be za 'uwhut'en.

### *Christ ooyust'e lhai unli, 'et hoonts'i 'ilho za unli*

<sup>12</sup> Ndiz un'a njan dúhoont'oh, dune yust'e 'ilho za unli. Neyust'e lhat-un wheni 'ulya whe 'unt'oh, 'et hoonts'i 'ilho za unli. Christ 'en cha 'et whuz un'a ndunt'oh.

<sup>13</sup> 'Ink'ez 'ilho Ndoni 'en gha wheni ts'iyawh too be' ts'ulya whe 'ilho yust'e ts'uzdli'. 'Et Lizwifne ts'inli, k'us 'udun yun k'ut whut'enne ts'inli, k'us 'ulhnane ts'inli, k'us oola naditnine ts'inli, nts'oh dant'ohne ts'inli hoonts'i 'ilho Ndoni 'i gha ts'iyawh ts'itnai' neyulhtsi.

<sup>14</sup> Neyust'e 'ilho za unli 'et hoonts'i lhat-un wheni 'ulya whe 'unt'oh.

<sup>15</sup> Nulh'en dune ke 'i utni, "Aw úla lhusdloh, 'et huwa yust'e ooch'e' lhe'ust'oh." 'Et whuz un'a yalhduk de, 'et ndi yust'e ooch'e' lhiloh eh? 'Awundooh!

<sup>16</sup> 'Ink'ez dune dzo 'i utni, "Aw 'una lhusdloh, 'et huwa yust'e ooch'e' lhe'ust'oh." 'Et whuz un'a yalhduk de, 'et ndi yust'e ooch'e' lhiloh eh? 'Awundooh!

<sup>17</sup> 'Et dune yust'e ts'iyawh 'una unli de, 'et de nts'en'a suba hoonliyaz dós'o? K'us yust'e ts'iyawh 'udzo unli de, 'et de nts'en'a suba hoonliyaz 'oolhtsun? 'Aw 'uhót'e' ait'oh!

<sup>18</sup> 'Et 'inka Yak'usda neyust'e lhat-un wheni 'ulya yulhtsi, 'et whuz un'a hukwa' ninzun 'inka 'et dúyinla.

<sup>19</sup> Nts'en'a suba 'ilho za oole'? 'Et 'úja de, 'et nts'en'a suba yust'e oole'? 'Aw 'uhót'e' ait'oh!

<sup>20</sup> 'Et whe la yust'e lhat-un wheni 'ulya unli 'et hoonts'i 'ilho za unli.



21 'Ink'ez 'una 'ula, "Aw nka' nooszin aít'oh," dooní' aít'oh. 'Ink'ez cha 'utsi 'uke, "Aw nka' nooszin aít'oh," dooní' aít'oh.

22 'Et k'us ndi yust'e whuloh tube tetsun unli uzninzun 'et hoonts'i 'i ooyit 'aw 'uts'oot'e' aít'oh.

23 'Ink'ez ndi yust'e whuloh ndai la 'aw lhdítí' uzninzun, 'i 'unt'oh 'on nus unzoo 'ink'ez sóo ne'ts'oolh'en huba' hoont'oh. 'Ink'ez ndi yust'e whuloh ndet la 'aw dune nalhts'et huba lhe'hóozoo' 'i 'unt'oh 'uk'enus sóo ne'ool'en huba' hoont'oh.

24 Ndet la 'uyust'e soo ot'en de, 'awet soo 'únt'oh. 'Et hoonts'i Yak'usda ts'iyawh lhkayánla. 'Et whe la ndai la yust'e whuloh ootoh huyooloh-i, 'i ba 'on nus ooba idíztí' k'un'a 'uyínla.

25 'Et diz un'a yust'e 'aw lhk'eokat aít'oh. 'Et hoonts'i ndai la yust'e whuloh ts'iyawh lhgha hudli.

26 'Et yust'e whuloh 'ilho hoonts'i dzoh nuzut de, ts'iyawh 'alghoh dzoh nuhudeh. 'Et 'ilho yust'e whuloh hidílti' de, ts'iyawh 'alghoh lhba huhóont'í'.

27 'Et whuz un'a za nohni cha Christ ooyust'e aht'oh. 'Ilhone ahli whe 'i yust'e whuloh aht'oh.

28 'Et huwa 'ilhunaoodulhne butoh, Yak'usda dich'oh 'utahábanla whe whé'a'ne, 'enne 'udechoo nébuninla. 'Et nus hoo'enne whulh nat-un nébuninla. 'Et dune hodulh'ehne whulh tat-un nébuninla. 'Et 'on 'at-un huwa 'ít'en túne' 'ut'enne nébuninla. 'Et 'on 'at-un butl'a hón'ai whe dune soo na'bulh'enne nébuninla. 'Et 'on 'at-un 'uyoonne la 'ut'enne nébuninla. 'Et 'on 'at-un dune moodihne nébuninla, 'ink'ez whulohne lhelh ts'un un'a yahalhduk nébuninla.

29 'Et wheni ts'iyawh eh whé'a'ne ts'inli? Wheni ts'iyawh eh nus hoo'enne ts'inli? 'Et wheni ts'iyawh eh dune hodulh'ehne ts'inli? Wheni ts'iyawh eh huwa 'ít'en túne' uztií'elh?

30 'Et wheni ts'iyawh eh netl'ahóolts'ut dune soo ná'ts'ulh'en? Wheni ts'iyawh eh lhelh ts'un un'a yastilhduk? Wheni ts'iyawh eh lhelh yoo khuni t'eznuzih netl'ahóolts'ut? 'Awundooh!

31 'Et ndi 'uk'enus uzoo'-i negha nt'ai-i soo cho hukwa' nuhzun, 'ink'ez 'on nus hoonzoo-un, 'et whunóhunistun.

## 13

### *Be nék'ets'intsi'-i, 'i 'uk'enus diziti' whe' hoont'oh*

1 'Et dune bughuni hiye yalhduk-i 'ink'ez lizasne hiye yalhduk-i cha, 'et whuz un'a ts'iyawh be yasduk, 'et hoonts'i be nék'ets'intsi' lhúst'ih de, 'et de luglos cho 'ink'ez luglosyaz 'ants'i 'alghoh lhendunuts'o le'dutisnelh.

2 'Et dune buba nus hoos'en de, 'ink'ez buba whé' hoont'oh hooyoh-un ts'iyawh t'eóonúszun de, 'ink'ez khuni be t'eóonudzun-i 'et cha t'eeoniszin de, 'ink'ez ts'iyawh be 'alha' hoont'oh-i 'ust'i de whe dzulh hoonts'i 'udun netís'alh de, whuz un'a 'et dust'oh whe be nék'ets'intsi'-i lhúst'ih de, 'et de 'aw hoonli lhúslah.

3 Ndaí la ook'e dune ts'inli ts'iyawh howa núsdlá de, 'ink'ez syust'e cha duták'un whuba butl'a yísti, 'ink'ez be nék'ets'intsi'-i ooyit 'ust'oh de, 'et de 'aw sba k'elha hole' aít'oh.

4 Ndi be nék'ets'intsi'-i, 'i gha hoonli talhódini. 'I gha nedzi unzoo hukw'un'a 'uts'int'oh. 'I gha 'aw howu lhe'ts'oolhni 'ink'ez 'aw dune 'uzdudil'i whe yalhts'ulhduk cha, 'ink'ez 'aw ts'incha nalhe'uzdudil'i.

<sup>5</sup> Ndi be nék'ets'intsi'-i, 'i gha 'aw 'uyoonne hoontsi' k'un'a bubulh úts'oot'e' ait'oh. 'Aw whenich'oh hukwa' uzninzun te né'ts'oot'en ait'oh. 'I gha 'aw 'a cho ts'onóich'e ait'oh 'ink'ez 'aw hoontsi'-un huwun nuní uznoozut ait'oh.

<sup>6</sup> 'I gha ndai la 'aw ts'ih'un un'a lhe'ít'oh de, 'aw ts'uhót'e' ait'oh. 'Et hoontsi' ndai la khuni 'alha' 'unt'oh-i, 'i be ts'uhóont'i'.

<sup>7</sup> Ndi be nék'ets'intsi'-i, 'i gha 'aw whe 'etsul uts'ooneh ait'oh. Ts'iyán tsuk neba 'alha' hoont'oh. Nts'oh dáhoont'oh whe hukwa ts'e ts'úhooli, 'ink'ez 'et ts'iyán tsuk whúlh ts'úzyin.

<sup>8</sup> Ndi be nék'ets'intsi'-i 'aw oolatoh hooloh. 'Et hoontsi' ndi be nus t'eeonudzun-i 'et 'etsul 'uwhutánelh. 'Et lhents'un un'a yaduk-un, 'et cha gak whutaleh. 'Ink'ez ndi be t'eeonudzun-i, 'i cha 'etsul 'utinelh.

<sup>9</sup> 'Andit ndi be t'eeonudzun-i whuloh za ts'ut'i 'ink'ez ndi be nus t'eeonudzun-i, 'i cha whuloh za ts'ut'i 'et huwa.

<sup>10</sup> 'Et hoontsi' 'oh de oola toh tileh de, nkede la whusahóolts'ut de, 'et de ndet la whuloh za unli-i, 'i ts'iyawh 'etsul 'uwhutánelh.

<sup>11</sup> 'Et ts'oodun usdli da', 'et ts'oodun k'un'a yasduk, ts'oodun k'un'a nuní nuszut, 'ink'ez ts'oodun k'un'a lhtahawhúsdle. 'Et 'awet dune susdli', 'et ndai la be ts'oodunne k'úne' zust'en-un, ts'iyawh 'udun neóonusdla.

<sup>12</sup> 'Et whuz un'a za be ná'uzdunul'en 'utsi'-i, na'dunuz'en lé'ust'oh. 'Et 'awet whusahoolts'ut de, 'et whuzis'en-un, 'et soo ts'ih'un nts'en'a la ts'unul'en, 'et whuz un'a ts'uhoo'en suli'. 'Et 'awet whulukhun za t'eeonúszun 'et hoontsi' ndet la whusahoolts'ut de, 'et de nts'en'a la Yak'usda t'esunínzun, 'et si cha whuz un'a za ts'iyantsuk t'ewhuntsizeh.

<sup>13</sup> 'Et 'awet ndi tawh whúdidah-un, be 'alha' hoont'oh-i, be hukwa' tse hóodli-i, 'ink'ez be nék'ets'intsi'-i 'et ta whult'oh 'awhuz 'et njan whuzdla. 'Ink'ez 'uk'enus dízti'-i, 'i bé lhk'ets'utsi'-i, 'i 'unt'oh.

## 14

### *Bé nus hoot'en-i, 'i 'uk'enus ooka' noohzin huba' hoont'oh*

<sup>1</sup> 'Et 'awet ndi be nék'etsintsi'-i, 'i za soo cho ts'u náht'i. 'Ink'ez ndai la Ndoni negha ínínla-i, 'i soo cho ooka' noohzin. 'Et ndi be nus hoot'en-i, 'i 'uk'enus ooka' noohzin huba' hoont'oh.

<sup>2</sup> 'Et mbe la lhelhyoo khuni be yalhduk-un, 'en Yak'usda ts'un yálhduk, 'aw dune ts'un yalhduk iloh whe utni, daja ni-un 'aw dune t'ehonúszun 'et huwa. 'Ants'i buba whe' hoont'oh hooyoh-un, duyughi gha yálhduk 'et huwa.

<sup>3</sup> 'Et hoontsi' buba nus hoo'en-un, 'en dune ts'un yalhduk. 'Et whe la 'on nus Yak'usda ba hilhtus oole', budziyo hoolhtus lneh, 'ink'ez budzi do óot'e' ha.

<sup>4</sup> 'Et lhelhts'un un'a khuni be yalhduk-un, dich'oh 'on nus Yak'usda ba ulhtus na'dudulhtsi. 'Et hoontsi' ndun nus hoo'en-un, 'en ndunne 'ilhu-naoodulhne 'on nus Yak'usda ba hilhtus hoole' ubulhtsi.

<sup>5</sup> Ts'iyawh unducha lhelhts'un un'a khuni be yalhduk 'et hoontsi' nus hoo'enne oohle' 'et 'on nus nohba hukwa' nuszun. Mbe la nus hoo'en-un, 'en nohni nohba lhelhts'un un'a yalhduk-un anus ncha whe 'unt'oh. Mbe la lhelhts'un un'a khuni be yalhduk-un, ndet 'uwwhúlhni 'aw t'ets'onuszun. 'Et nts'en'a la daja ni t'eeoniszin de, 'et de za ts'ih'un un'a daja ni t'ets'ontizeh. 'Et whe la 'ilhunaoodulhne Yak'usda ba hilhtus hútile.

*Mbe lhelhts'un un'a khuni be yalhduk-un, 'et 'uyoo khuni ye yátílhduk-i daja ni whe 'utni t'einoozeh 'et huba soo cho tenadoodli*

<sup>6</sup> 'Et 'awet sulhutsinke nohghu nusya de lhelhts'un un'a be yaduk-i be nohbulh yásduk de, 'et de nts'en'a suba nohba hózoo?' 'Et hoontsi' ndai la

nohba whe 'útni hooyoh-i, k'us be t'eóonudzun-i, k'us bé nus hoot'en, k'us be whúnohts'odulh'eh-i, 'et whuz un'a nohbulh yasduk de, 'aw 'et de za nohba hootázoo'.

<sup>7</sup> Ndai la nulhúkhusna-i 'ants'i ndai la oolaz dunul'ai whe be ts'ujun-i k'us 'ult'o-i, 'i bé' dists'ai 'ink'ez 'ilhoh k'un'a za dusts'o de, 'et nts'en'a suba shun t'eznoozeh?

<sup>8</sup> Ink'ez be ts'ujun huye jih-i 'uts'un un'a bé' dists'ai de, 'et de nts'en'a suba lhutiganne lhahádootneh eh?

<sup>9</sup> Nohni cha 'et whuz un'a za lhents'un un'a yalhduk de, 'et nts'en'a suba daja dahni-un t'ets'onoozeh? 'Ants'i taza-i k'uz yalhduk le'dutihnelh.

<sup>10</sup> 'Et lhat-un ndi yun k'ut lhelhts'un un'a khuni be yats'ulhduk. 'I ts'iyawh 'ilho whe hoonli-un yaz 'uwuhúlni.

<sup>11</sup> 'Et huwa daja ni 'aw t'eóonuzúszun de, 'et de mbe la lhelhts'un un'a khuni be yalhduk-un, 'en lhendowh didowh-un sba le'hoont'oh 'ink'ez si cha lhelhdowh didowh-un ooba lé'ust'oh.

<sup>12</sup> 'Et whuz un'a nohni ndai la Ndoni negha óonin'ai-un soo cho ooka' nahzun 'ilhunaoodulhne hilhtus huboolhtselh ha. 'Et huwa ndet la Ndoni ts'un 'uk'enus nohba hootázoo'-un, 'i soo ts'ih'un ooka' nahzun. 'Et whuz un'a 'ooht'e' huba' hoont'oh.

<sup>13</sup> Njan howa mbe lhelhts'un un'a khuni be yalhduk-un, 'et 'uyoo khuni ye yátihduk-i daja ni whe 'utni t'einoozeh 'et huba soo cho tenadoodli. 'Et whe la daja ni-un t'ehonoozeh.

<sup>14</sup> 'Et ndi lhelhts'un un'a khuni be tenadusdli de, 'et de sich'oh syughi 'i be tenadutisdli 'et huwa. 'Et hoonts'i sich'oh seni ba 'et 'ants'i whutále.

<sup>15</sup> Nts'en'a 'uk'enus neba hootázoo'? Daja nuhzun? Diz un'a 'on nus soo' hoont'oh, 'et sich'oh syughi cha 'ink'ez sich'oh seni be cha tenadutisdli. 'Et sich'oh syughi cha 'ink'ez sich'oh seni be shun be cha tisjun.

<sup>16</sup> 'Et hoonts'i nyunch'oh nyughi 'i be za khuni be yailhduk, 'et Yak'usda díłht'i whe yailhduk de, 'et whe 'ilhoghun t'oonuszunne butoh usda-un, ndi khuni dizti'-i be yailhduk de, nyudits'o de, 'et de nts'en'a ndo honeh dooni', daja ni-un 'aw t'eoonuszun 'et huwa.

<sup>17</sup> 'Et 'alha nghuni dizti'-i, 'i tube únzoo. 'Et hoonts'i ndun t'elhonusze-un, 'et huwa Yak'usda ba 'aw ulhtus oole' aít'oh.

<sup>18</sup> Yak'usda musi dusni ndi lhelhts'un un'a khuni be yalhduk-un si nohanus lhat-un whe lhents'un un'a yasduk.

<sup>19</sup> 'Et hoonts'i 'ilhunaooedlyne butoh, kwulai' khuni be hoonts'i nohbulh yátisduk de, 'et lhái cho lhelhyoo khuni be nohbulh yátisduk-un, 'et whanus hoonzoo. 'Et hukwa' nuszun.

*Lhelhyoo khuni be yaduk-i, 'i ooba 'alha lhe'hóot'ohne, 'enne za buba whe hoodal'en 'unt'oh*

<sup>20</sup> Sulhutsinke ts'oodunne k'un'a 'ooht'e' junih noheni be. 'Et chalhts'ul dahint'oh la 'aw hoontsi'-un t'ehonuszun, 'et whuz un'a 'ooht'e'. 'Et hoonts'i dune suli'-un k'un'a nuní noohzut.

<sup>21</sup> 'Et Yak'usda ooghuni k'ut 'uk'unuzguz 'et ndutni, "Lhane lhelhyoo khuni be yalhduk, 'ink'ez dune 'ats'un keyoh whut'enne,

'enne bugha nyoonne Lizwifne 'i be bubulh yátisduk, 'et hoonts'i 'aw sodóts'o hukwa lhe'hunízun."

<sup>22</sup> 'Et whe la ndi lhelhyoo khuni 'i be Lizwifne, 'enne buba whe hóodal'en. Mbene la ooba 'alha' hoont'ohne ba lhe'ít'oh. Ooba 'alha lhe'hóot'ohne, 'enne za buba 'unt'oh. 'Et hoonts'i nts'en'a la dune Yak'usda buba nus hoo'en-i, 'i

be ooba 'alha' hoont'ohne buba 'unt'oh, ooba 'alha lhe'hóot'ohne, 'enne ba lhe'yít'oh.

<sup>23</sup> 'Et huwa Yak'usda ba 'ilhunaoodulhne, 'enne ts'iyawh 'illoh 'ilhuna-hootáduh de, 'ink'ez ts'iyawh 'ilhone whe lhelhyoo khuni be yahutilhduk de, 'et whuz un'a 'uhóoja whe whulhodulh'ene k'us ooba 'alha lhe'hóot'ohne, 'enne nohgho nindil 'ink'ez nohzih hudilhts'i de, 'et 'alha lakw nohni whus-nine ahli nohódutánelh eh? A, 'alha' hoont'oh!

<sup>24</sup> 'Et hoonts'i ts'iyawh Yak'usda be nus húhoo'en de, 'et whe 'ilhoghun butoh whulhodulh'e-un k'us 'aw ooba 'alha lhe'hóot'oh-un nohghu ninya 'ink'ez nohzih usda de, 'et ndunne nus hoo'enne, 'enne bugha ndet whe la ninta' 'ut'ih-un unli, 'et nahootá'alh. Uboozílhts'ai huwa ts'iyanne hiba nahizya.

<sup>25</sup> 'Et whe la dudzi yo whe untilh'i-i, 'i ts'iyanne nalhts'et haóotilts'ulh whe' hoont'oh. 'Et huwa nachánitno, Yak'usda ts'un teni' untilhdzilh, 'ink'ez 'alha Yak'usda nohtoh 'únt'oh dutinelh.

*Yak'usda ba 'ilhunaooohdulh de, ndiz un'a dutihnelh*

<sup>26</sup> 'Et sulhutsinke, 'et whu la gha ts'e, nkede la 'ilhunaootáhdulh, 'oh de de, 'ilhone ahli whe daja dutihnelh? 'Et huwa 'on nus ndo tihyih 'ink'ez lhat-un lhut'ewhuntilhdzeh. 'Et whe 'ants'i nus lhúnulht'i lé'aht'oh. 'Ilhoghun ahli whe Ndoni nohgha whunin'ai-un, whuz un'a 'ooht'en. 'Et 'ilhoghun Yak'usda ts'un uztijun-un whut'i, k'us 'ilhoghun whubodutilh'eh-un whut'i, k'us 'ilhoghun 'uyoo khuni bé nohtoh yatilhduk-un whut'i, k'us 'ilhoghun ndai la Yak'usda ts'un be hóodiltsih-un whut'i, k'us 'ilhoghun ooghuni daja dutinelh-un whut'i.

<sup>27</sup> Mbe la 'uyoo khuni bé nohtoh yatilhduk de, yuba yatilhduk-un ut'i de, 'et ndudóoni'. 'Et nane k'us tane 'uyoo khuni be yatilhduk de, 'enne za 'udooni'. 'Ilhone hinli whe 'et dódooni'.

<sup>28</sup> 'Et hoonts'i yuba yatilhduk-un hooloh de, 'et de 'ilhunaoodsilne butoh 'ants'i t'edoosnih. Dídut'oh dudzi yo whe 'ink'ez Yak'usda ts'un cha yaoolhduk.

<sup>29</sup> 'Et mbe la nus hoo'enne 'ants'i nane k'us tane, 'enne za Yak'usda ooghuni be yahoolhduk. 'Et ndai la hiye yáilhduk-i, 'et 'onghohne, 'enne daja hutni-un, 'uyoonne ba ts'ih'un un'a 'unt'oh tilah k'us 'ats'un un'a tilah 'unt'oh.

<sup>30</sup> 'Ink'ez butoh 'ilhoghun hoonliyaz benghun néwhults'ut, 'et howu yatilhduk de, 'et 'udechoo yatilhduk-un, 'en t'edoosnih.

<sup>31</sup> 'Et whuz un'a 'ilhone ahli whe nus hóoh'en de, 'et de la ts'iyawh 'on nus soo t'ewhunoozhzeh, 'ink'ez ts'iyawh buba nus whúnulht'i whe bula 'ooht'en.

<sup>32</sup> 'Ink'ez dich'oh ooyughi 'i be ndet la nus hoo'en, dich'oh za k'úne' whul'en.

<sup>33</sup> 'Et Yak'usda 'en ndai la be nédzi dizghel-i 'en oots'u hayúkat. 'Et hoonts'i dune ye dulhyoh 'uhudutni-i, 'aw 'en oots'u halheyuskat. 'Et whuz un'a nts'oh tula yak'usda ooch'e'ne 'ilhunahodulh-un, 'et ndi be nedzi dizghel-i díz'ai.

<sup>34</sup> 'Et nohni 'ilhunaooohdulh te, 'et nohts'ekoo 'enne t'ehudoosni huba' hoont'oh. 'Enne yahutilhduk huba lhe'hóot'oh, dune an nyo 'uhint'oh 'et huwa. Moses be 'udust'l'us 'i cha 'et whuz un'a za 'et ndutni.

<sup>35</sup> 'Et ts'ekoo hoonliyaz hodutil'eh hukwa' huninzun de, duyoh ts'e dukike 'enne hubuhoodolhkut. Yak'usda ba 'ilhunaoodúlhne butoh, ts'eke yalhduk de, nohba hukwaya hoonli whe' hoont'oh.

<sup>36</sup> Daja nuhzun, Yak'usda ooghuni nohni eh nohts'u hadílts'ut? 'Ink'ez nohni za eh nohts'u hadúkat? 'Awundooh!

<sup>37</sup> 'Et mbene la nus hoo'en na'dunúdzunne k'us Ndoni hoonliyaz 'enne bugha ínín'ai, 'et whuz un'a dóninzun de, 'et ndiz un'a cha ndunóozin, ndai ghun nohts'o k'e'isguz-i, 'i Yak'usda khuni netl'áidan'ai-i, 'i za 'unt'oh.

<sup>38</sup> 'Et hoonts'i mbene la hoonli t'eóonínzun na'dunúdzunne, 'enne cha whute whuz un'a 'uhoot'e'.

<sup>39</sup> 'Et sulhutsinke 'on 'un cha nus hoo'enne tihle soo cho hukwa' nuhzun, 'ink'ez mbene la lhelhyoo khuni be yálhdukne, 'enne cha whuch'a bunóhyoot junih.

<sup>40</sup> 'Inka ts'iyawh hoonzoo hukw'un'a 'ink'ez ts'ih'un un'a 'uhót'e'.

## 15

### *Christ dunadija-un 'alha' hoont'oh*

<sup>1</sup> 'Et 'awet sulhutsinke ndi khuni unzoo-i be nohbulh yásduk. Soo cho t'entihzeh hukwa' nuszun. 'Uda' úlhchoot 'ink'ez 'et huwa 'i be ndi yun k'ut dúlhts'i.

<sup>2</sup> 'Ink'ez ndi khuni be nohbulh yásduk-i, 'i soo cho oohtun de, 'et 'i be dahjih. 'Et hoonts'i 'ants'i nohba 'alha' hoont'oh de, 'aw ook'e dóohjih aít'oh.

<sup>3</sup> 'Et 'udechoo da' nohni nohtl'ahoos'ai ndet la stl'ahóolts'ut-un, nts'en'a la Christ nelubeshi k'elha dazsai. 'Et whuz un'a Yak'usda ooghuni 'et ndutni.

<sup>4</sup> 'Ink'ez nts'en'a whula 'ahuyalhti. 'Et whulh tat dzin dunadija. 'Et whuz un'a Yak'usda ooghuni 'et cha ndutni.

<sup>5</sup> 'Ink'ez nts'en'a la Cephas yunalh ts'et hainya, 'et hukw'elh'az nyoonne whunizyai 'on 'at nane, 'enne bunalh ts'et hainya.

<sup>6</sup> 'Et hukw'elh'az 500ne neyulhutsinke 'et ts'iyawh 'alhgoh bunalh ts'et hainya. 'Et k'us lhane 'awhuz hukhuna, 'et 'onghohne 'ilhez nahunistez.

<sup>7</sup> 'Et James 'en cha yunalh ts'et hainya, 'ink'ez whél'a'ne, 'enne ts'iyawh bunalh ts'et hainya.

<sup>8</sup> 'Ink'ez 'udek'ez, si cha, 'aw soo 'oh whuya whudizulh whe whúzusdli iloh, 'et hoonts'i snalh ts'et hainya.

<sup>9</sup> Whel'a'ne butoh si 'uk'enus buk'e'i 'ust'oh na'dunúsdzun. 'Et Yak'usda ba 'ilhunaoodulhne, 'enne dzoh nubusdeh inle', 'et huwa 'aw whél'a'-un sodutánelh-un 'et huba soo lhe'uzdzoo'.

<sup>10</sup> 'Et hoonts'i Yak'usda ye unzoo-i, 'i gha nts'en'a la dast'oh, 'et whuz un'a za 'ust'oh. 'Ink'ez Yak'usda whe sts'un únzoo-i, 'aw 'ants'i lhe'hóot'oh. 'Et k'us whel'a'ne butoh buba nus 'ultus-i be 'ist'en. 'Aw si iloh, Yak'usda ye unzoo-i sulh 'únt'oh, 'i be 'úst'en.

<sup>11</sup> 'Et huwa si sgha k'us 'onghohne bugha, nts'en'a la Yak'usda ooghuni be nohbulh yáts'ulhduk, 'et whuz un'a za neghuni nohba 'alha' 'unt'oh.

### *T'ets'oninzun Christ yaidlane toh dunadija*

<sup>12</sup> T'eóonúhzun Christ yaidlane toh danadija. 'Et whuz un'a wheni nelatoh ts'e whudáhts'o. 'Ink'ez nts'en'a whulohne nohni yaidlane 'aw dunadudódilh aít'oh dahni?

<sup>13</sup> Ndiz un'a nja dúhoont'oh, ndunne yaidlane 'aw dunahudódilh aít'oh de, 'et de Christ 'en cha 'aw dunalhdídal.

<sup>14</sup> 'Ink'ez Christ 'en cha 'aw nalhehítal de, 'et de 'en ghun neghuni 'aw hoonliyaz lhiloh whé 'unt'oh, 'ink'ez be nohba 'alha' 'uwhutát'elh, 'i cha 'ants'et 'uwhutát'elh.

<sup>15</sup> 'Et hoonts'i yaidlanne dunalhodídulh de, Christ 'en cha 'aw dunalhdídal. 'Ink'ez wheni cha Yak'usda ghun whuts'it be yaztilhduk whe' hoont'oh. 'Et

whuz un'a ts'iyanne toh be hóodilts'ai, wheni 'uts'utni Yak'usda 'en gha Christ nahítinah whe dunadija 'et huwa.

16 'Et yaidlane dunalhóodilul de, Christ 'en cha 'aw dunalhdídal whe' hoont'oh.

17 'Ink'ez Christ 'aw dunalhdídal de, 'et de be nohba 'alha' hoont'oh-i 'aw hoonliyaz lhiloh whé 'unt'oh 'ink'ez 'awhuz nohlubeshi bulh 'áht'oh.

18 'Ink'ez mbene la Christ ooch'e'ne hinli whe yaidlane, 'enne ts'iyawh 'ilhiz wheni ninta' ninkatne hinli.

19 'Et ndai la Christ ts'un ooka tse ts'úhooli ndi yun k'ut uzdilhts'i-un huba za 'unt'oh de, 'et de ts'iyanne toh wheni 'uk'enus tel'enne ts'inli.

*Dats'utsah-i, 'i 'udek'ez 'uch'az ditni-i unli, 'i musai tileh*

20 'Et hoonts'i 'alha yaidlane toh Christ 'en 'uja dunadija. 'Ilhiz nanitezne toh 'en 'udechoo dunadija-un whuzdli'.

21 Dune, 'en gha dune yahadlah 'ink'ez dune, 'en gha nahahítinah 'et huwa.

22 'Et nts'en'a la Adam 'en gha ts'iyanne yats'adlah, 'et whuz un'a Christ, 'en za dunabudile 'ink'ez nahuhítinah.

23 'Et hoonts'i 'ilhone hinli whe nts'oya buba hoozulh whe bugha óonin'ai, 'et whuz un'a 'uhutit'elh. Christ 'en 'udechoo-un suli'. 'Et hukw'elh'az mbene la Christ ooch'e'ne hinli whe buba whusanátídalh, 'et de 'enne cha dunahudutádulh 'ink'ez nahuhítinah.

24 'Et whulatoh suli' de, nduwahi ts'iyawh 'uda' 'uhooja tileh. 'Et 'oh de de oola toh whutáleh de, ts'iyanne moodihtine, ndi yun k'ut be ts'ilhtus cha, ndet la ndi yun k'ut 'ink'ez yat cha, 'i ts'iyawh 'alhgho musai yutilhtselh. 'Et hukw'elh'az ndai la Sizi Gri dich'oh za yugha lerwe unli-un, 'i ts'iyawh Yak'usda tl'áitileh. 'Et whuz un'a 'udek'ez dzin whutáleh whe' hoont'oh.

25 'Et ndet whuts'un la duYe' yuch'a ne'ut'enne, 'enne duBá duke tl'ah nébutaleh 'ink'ez buk'edútat'us de, 'et whuts'un 'ink'ez ts'iyaitsuk an do 'unt'oh. 'Et whe lerwe tileh huba' 'unt'oh.

26 'Ink'ez be dats'utsah-i, 'i 'udek'ez 'uch'az ditni-i unli, 'i musai tileh.

27 'Et huwa nja dutni, "Ts'iyaitsuk dudanyo 'unt'oh yulhtsi." 'Et hoonts'i 'oh da' 'uk'eyánguz whe ndutni, "Ts'iyaitsuk dudanyo 'unt'oh yulhtsi," 'et hoonts'i 'aw Yak'usda duYe' Sizi Gri an nyo ne'dudoltelh ait'oh ni whe 'utni.

28 'Et 'oh de de, nkede la ts'iyaitsuk dudanyo 'unt'oh yutilhtselh de, 'et de si ooYe' 'en cha duBá yanyo 'unt'oh 'udutilhtselh. 'En 'unt'oh ts'iyaitsuk dudanyo 'unt'oh yulhtsi-un. 'Et whe la Yak'usda dich'oh ts'iyaitsuk an ndo tileh.

*Whulohne Sizi Gri dunadija-un 'awhuz buba 'alha lhe'hoot'oh*

29 'Et 'alha yaidlane dunalhóodilul de, 'ink'ez ndunne yaidlane 'uyoonne, 'enne buba too be' buhulh'en, 'ink'ez 'et de dahútinelh? 'Et di ha ndunne yaidlane 'uyoonne, 'enne buba too be' buhulh'en? 'Gak 'ants'et 'uhut'en.

30 'Ink'ez di ha wheni cha dzin totsuk 'ahoolhyiz neba wheóonujut? Nohni daja nuhzun?

31 'Ink'ez nts'en'a la hootáht'e'-un si cha 'et whuz un'a Christ neMoodihti Sizi ts'utni-un, 'en gha ootást'e'. 'Ink'ez nohdusni, ndi khuni be yasduk-un, 'i gha dzin totsuk dásaih.

32 'Et keyoh Ephesus ts'e dune k'un'a si khuna-iti be núsya. 'Et dahoont'oh huwa 'usja nuhzun? Nts'en'a 'uhoot'oh sba hootázoo'? 'Et yaidlane dunalhóodilul de, whute 'uts'oo'alh, tats'ootnai', bunde yats'itádlah 'et huwa.

33 Nanooh'tah junih! Ntsi'ne bubulh áht'en de, 'et de noh'e'ut'en k'oh hoonzoo-un ts'iyawh ninta' tit'elh.

34 Ndai la ts'ih'un 'unt'oh-i, 'i doo cha za noheni tánadih'aih hukwa 'ulh'en. Lubeshi 'ulh'en-un 'etsul ahneh! Whulohne 'awhuz Yak'usda ghun ts'ih'un t'ehonúszun. Yooya oohle' ha 'unohdúсни.

*Yaidlane dunahudutádulh de, dant'oh-i yust'e be whusanáhutidulh?*

35 'Et whulohne nduhútni, "Nts'en'a la yaidlane dunáhudutádulh? Dant'oh-i yust'e be whusanáhutidulh?"

36 Tube whuzahnih! Soo cho whunulh'en, ndai la 'ananla-i, dazsai de za, 'et whuz un'a za nahítánnalh.

37 'Ink'ez ndi whé 'ílh'en 'aninle, 'et ndai tileh hanányai de, 'et 'ananla-i, 'i iloh 'unt'oh 'ants'i oomai' 'i za 'unt'oh.

38 'Et hoonts'i Yak'usda nts'en'a la hukwa' ninzun, 'et whuz un'a 'uyulh'ih. 'Ink'ez ndi oomai' ts'iyawh lhelhdoh didowh 'i 'unt'oh.

39 'Ink'ez ndai khuna-i tsung ts'iyawh 'aw lhk'un'a lhe'ít'oh. Dune tsung 'i uyoo 'unt'oh. Khuna-i tsung 'i cha 'uyoo 'unt'oh. 'Et lho tsung 'i cha 'uyoo 'unt'oh. 'Et dut'ai tsung 'i cha 'uyoo 'unt'oh.

40 'Et yak'uz whut'enne buyust'e hoonli 'ink'ez ndi yun k'ut whut'enne, 'enne cha buyust'e hoonli. 'Et hoonts'i yak'uz whut'enne buyust'e hiyé dizti'-i 'ink'ez ndi yun k'ut whut'enne buyust'e hiyé dizti'-i, 'i bulh lhelhyoo 'unt'oh.

41 'Et sa 'i cha be yúdziti'-i hoonli. 'Ulhdzis ooza' 'i cha be yúdziti'-i hoonli. Sum 'i cha be yúdziti'-i hoonli. 'Et ndi sum ts'iyawh be yúdziti'-i, 'i lhenyoo unli.

42 'Et yaidlanne dunahudidil de, 'et cha lhents'un un'a 'uhint'oh. Nts'en'a la buyust'e 'anulye-i k'un'a, 'i tilhjut whe 'unt'oh. 'Et dunahudidil de, 'aw buyust'e oohljut ait'oh.

43 'Et buyust'e lhdíti' whe 'ahuyalhti. 'Et hoonts'i dizti'-i whe dunáhudutádulh. Tetsun whe 'ahuyalhti, 'et hoonts'i ulhtus whe dunáhudutádulh.

44 Yinka dune yust'e k'un'a unli whe 'ahuyalhti. 'Et dunahudutádulh de, 'et cha yak'uz huba 'uyoo buyust'e natidleh. 'Et ndi yun k'ut uzdilhts'i-un huba, neyust'e ts'ut'i. 'Et ndo yak'uz whuba 'uyoo neyust'e natídhle.

45 'Et whuz un'a 'uk'ehóoguz whe 'et dutni, "Et 'udechoo dune 'en Adam yúlhni 'et oozul khuna sulí'." 'Et 'udek'ez-un Adam 'en gha neyughi khuna, 'et whuz un'a 'uneínla.

46 'Et hoonts'i neyust'e 'aw yak'uz huba lhe'ít'oh. Neyust'e ndi yun k'ut whuch'e' 'unt'oh. 'Et dats'uzsai hukw'elh'az yak'uz huba 'uyoo neyust'e nádlih.

47 'Et Yak'usda 'udechoo dune 'en ndi yun k'ut whutl'us 'i dune yulhtsi. 'Et whulh nat-un dune, 'en neMoodihti, 'en yak'uz ts'e hainzut-un 'unt'oh.

48 'Et ndun dune whutl'us be 'ulya-un, dant'oh whe dune unli, 'et mbene la whutl'us be 'ulyanne, 'enne 'en k'un'a 'uhint'oh. 'Et whuz un'a ndun yak'uz ts'u hainzut-un, dant'oh-un unli, 'et mbene la yak'uz huba 'unt'ohne, 'enne 'en k'un'a 'uhint'oh.

49 'Et ndun whutl'us be 'ulya-un dant'oh dune unli inle', 'et wheni cha 'en bundúts'últ'oh. 'Et whuz un'a ndun yak'uz ts'u hainzut-un, 'en dant'oh dune unli 'et whuz un'a wheni cha 'en bundúts'últ'oh uztille.

*Bé dats'utsah-i, 'i cha hooloh tileh*

50 'Et sulhutsinke njan dunóhdusni, ndet la Yak'usda whe lerwe unli-un, 'et ndi yun k'ut neyust'e 'i be iloh Yak'usda ndai la yut'i-i 'aw ts'ólhchoot ait'oh. Ndi yun k'ut neyust'e tilhjut-i, ndai la lhtilhjut-i, 'i be iloh ts'uhootálhchulh 'et huwa.

51 'Et 'awet soo zúlhts'ai. Ba whé' hoont'oh hooyoh-i, 'i ghun nohbulh yátisduk. Whulohne 'aw 'ilhiz nalhts'untistus, 'et hoonts'i ts'iyawh lhents'un un'a na'uztitnelh.

52 Tube khun 'uwhutánelh, 'ants'i ts'oonults'ilh hukw'un'a ba 'uwhutánelh. 'Oh de de 'udek'ez be ts'újun huye jih-i be' dists'ai de, 'et whuz un'a 'uwhutánelh. 'Et 'oh whuya whudizulh yaidlane, buyust'e 'aw lhilhjut whe dunáhudutádulh, 'ink'ez wheni ts'iyawh lhents'un un'a na'uztitnelh.

53 'Et whe la ilhjut-i, 'i 'aw lhilhjut natidleh. 'Ink'ez ndi bé dats'utsah-i, 'i 'aw be dalhts'utsa-i natidleh.

54 'Et nkede la ilhjut-i, 'aw lhilhjut nasdli' de, 'ink'ez bé dats'utsah-i, 'i cha hooloh sulí' de, 'et 'oh whuya whudizulh de, 'uk'hooguz-un ts'iyawh 'et 'awet lhaóodutanelh. 'Et huwa whuz un'a ndutni, "Bé dats'utsah-i, ooch'a' ninde whe 'unt'oh."

55 'Et huwa 'uts'utni, bé dats'utsah-i 'aw 'on 'at be dats'ootsah aít'oh.

'Ink'ez ndet yaidlanne hudilhts'i,

'aw nehotun aít'oh.

56 'Alha ndi bé dats'utsah-i, 'i lubeshi 'i gha' hooja. 'Ink'ez Moses ooghuni k'uzninyuz-un, 'i be 'ets'onanzin lubeshi dáltus la whe 'unt'oh.

57 'Et hoonts'i neMoodihti Sizi Gri, 'en gha Yak'usda whuch'a ts'ulhdehne neulhtsi. 'Et huwa tube cho musi uzninzun.

58 'Et huwa sulhutsinke, ulhtusne oohle'. Khun nahóohnah junih! 'Ahoohyiz neMoodihti be 'ut'en k'oh soo cho 'uwuhulh'en. T'eóonúhzun 'andit nts'en'a neMoodihti ba 'aht'en, 'et huwa 'aw 'ants'et iloh 'aht'en whe' hoont'oh.

## 16

### *Yak'usda ooch'e'ne sooneya buba 'ilhunats'oz'ai-i*

1 'Et 'awet ndi Yak'usda ooch'e'ne sooneya buba 'ilhunats'oz'ai-i, 'i ooghu yátisduk. 'Et ndet la yun k'ut Galatia 'ilhunahodulh, nts'en'a la butoh budásni' da', 'et nohni cha 'et whuz un'a ndóht'en.

2 'Et 'ilhone ahli whe daltsuk at'en be hoonzoo' ahja, 'et whuz un'a lisman 'udechoo dzin, 'i whuloh lhadáhle. 'Et de nohts'óozusya de, 'et 'oh whuya whudizulh-un 'ilhuna'óh'alh huba lhe'hóot'oh.

3 Ndet la nohts'óozusya, 'et de nahootás'alh ndi nohe'dustl'us 'i be mbene la nohba unzoone unli, 'enne ndi sooneya Yak'usda ooch'e'ne buba bugha ínah'ai-i, 'i bulh Jerusalem ts'u 'ubutis'alh.

4 'Et si cha whuz tisyalh huba hootázoo' de, 'et de 'enne sulh útidulh.

### *Paul datínelh*

5 'Et yun k'ut Macedonia 'et 'oh whuya lhutísyalh. 'Et 'oh whuya lhusúsyá de, 'et 'awet nohts'u tisyalh.

6 'Atsul whuba tilah 'et nohzih oosda' k'us khit duwhulyiz tilah nohzih oosda'. 'Et whe la nts'e la tisyalh ts'e, nohni sla ooh't'en ha.

7 'Oh whuya usyálh de, 'aw nohk'ulh túzisyál. 'Et huwa 'aw 'andit nohoos'en aít'oh. 'Et hoonts'i sMoodihti usunínzun de, 'et huwa 'atsulyaz nducha nohzih usda'.

8 'Et hoonts'i ndet dzin 'uhoont'oh Pentecost huwhút'ni-un, 'et whuts'un keyoh Ephesus tisdalh.

9 'Et 'ants'i dati k'us úncha-i, 'i sba dáhaidantan lé'hooja, 'ink'ez lhane sch'az ditnine unli.



10 'Et Timothy nohghu ninya de, 'aw hoonli whe lhníljut whe nohzih ooda'. 'Et ts'iyawh nohni nohba 'uhoont'oh. Si sk'un'a neMoodihti be 'ut'en k'oh ne'ut'en 'et huwa.

11 'Et huwa nohni nohtoh 'en 'ants'i nohba oole' junih. 'Et hoonts'i oodzi dizghel whe sts'u nátoolh'a'. Si 'ink'ez lhulhutsinke wheni ts'iyawh ooba ts'ih'i.

12 'Et neulhutsin Apollos 'en ghun 'unohdutásnelh. 'Andit neulhutsinke bulh nohts'u tóoya' 'et ooba hukwa' nuszun, 'et hoonts'i 'aw hukwa lhe'nizun. 'Et huwa sa' howu bulh yásduk. 'Et hoonts'i nts'owhuya whudizulh-un 'et ooba hoonzoo de, 'et de la nohts'u tóoya'.

### *Soo cho huwahli*

13 'Et soo cho huwahli. Be 'alha' hoont'oh-i, 'i be whuduts'o whe sahyin. Nohni nohdzi hóoni whe 'et núdolhya'. Ulhtusne oohle'.

14 Ndai la ooghahna-i, 'i ts'iyawh be nék'ets'intsi'-i be 'oolh'en.

15 'Et sulhutsinke khuni ulhtus-i be nohdutásnelh. T'eóónáhzun Stephanas 'ink'ez ooyoh dilhts'ine, 'enne yun k'ut Achaia 'et 'udechoo ooba 'alha' hoont'ohne huzdli'. 'Ink'ez t'eóónáhzun nts'en'a la Yak'usda ooch'e'ne buba né'hutit'en-un huwa' hududulya.

16 'Et huwa nohdutásnelh, ndunt'ohne 'ink'ez mbene la soo cho hoolhtus whe nebulh 'út'enne, 'enne nohnich'oh butl'á' dudulhye.

17 Nkeda' Stephanas, Fortunatus, 'ink'ez Achaicus, 'enne sgho nindil da', 'et huwa whunúsni. Ndai la sghá lhikulh-i 'enne bugha sgha níngat.

18 'Et whu la gha ts'e sich'oh syughi 'ink'ez nohnich'oh nohyughi cha 'enne bugha do na'uja. 'Et huwa ndunt'ohne, 'enne ts'ih'un un'a ne'boolh'en.

### *Yak'usda yé unzoo-i nohbulh óot'e'*

19 'Et yun k'ut Asia nts'e la 'ilhunahodulh-un, 'enne cha ts'iyawh hadih nohuhútni. Aquila, Priscilla, 'ink'ez duyoh Yak'usda ba 'ilhunaoodúlhne, 'enne cha soo cho hadih nohuhútni.

20 Ts'iyawh neulhutsinke, 'enne cha hadih nohuhútni. Lubeshi yit nalhudahts'oós. 'I be la hadih lhudahtni.

21 Si Paul sich'oh sla be 'uk'unusúsguz. 'I be hadih nohdúsni.

22 NeMoodihti Sizi Gri mbene la 'en yuk'elhítsi'-un, 'en Yak'usda ye huske-i, 'i be ook'ehóotalts'ulh. O sMoodihti 'a cho nets'ínyalh!

23 NeMoodihti Sizi Gri ye unzoo-i, 'i nohbulh 'óot'e' 'et za nohba hukwa' nuszun.

24 Be nóhk'esi'-i Christ Sizi 'en gha, 'i ts'iyawh nohbulh 'óot'e' hukwa' nuszun. 'Et ndo honeh.

## Paul Corinth Whut'enne Whulh Nat Buts'ó K'eyanguz-i

*Yak'usda ba 'ilhunaoodulhne, keyoh Corinth ts'e, 'enne Paul hadih ubulhni*

<sup>1</sup> Si Paul ndet la Yak'usda hukwa' ninzun k'un'a, 'i be Sizi Gri ba whel'a'-un 'ust'oh. 'Ink'ez ndun neulhutsin Timothy huyúlhni, 'en cha sulh 'ut'en. 'Et mbene la keyoh Corinth ts'e Yak'usda ba 'ilhunaoodulhne hinli, 'ink'ez ndulcho whe yun k'ut Achaia dilhts'ine, mbene la nohbulh Yak'usda ooch'e' unline, 'et nohni ts'iyawh ndi 'udustl'us k'ut nohts'o k'e'isguz.

<sup>2</sup> NeBá Yak'usda 'ink'ez Sizi Gri neMoodihti ts'un nohba tenadusdli 'et whe ye unzoo-i 'ink'ez nohdzi dóghel nohbulh óot'e'.

*'En za Yak'usda 'unt'oh whe wheni ts'iyai-i be k'enaneni'oh*

<sup>3</sup> Yak'usda, Sizi Gri neMoodihti ooBá 'unt'oh 'et whe uzdlíhtl'. NeBá 'en gha be négha té'nidzeh-i whuz un'a neghalts'ut. 'En za Yak'usda 'unt'oh whe wheni ts'iyai-i be k'enaneni'oh.

<sup>4</sup> Ndet la hoontsi'-un neghá honkat 'et whuch'a k'enaneni'ah. 'Et huwa whuz un'a 'uyoonne hoontsi'-un bughá honkat de, 'et de wheni cha Yak'usda ye k'enaneni'ah-i, 'i gha k'enábuzzno'ah huba' hoont'oh.

<sup>5</sup> 'Et nts'en'a la Christ whe dzoh nusúzut-un, 'et whe wheni cha 'en gha dzoh nuts'uzde. 'Et whuz un'a wheni cha Christ ye k'enaneni'ah-i 'et neghun hoonli whe 'uwuhultsuk-un k'enaneni'oh.

<sup>6</sup> 'Et hoontsi' ndet la hoontsi'-un nets'u hóolts'ulh de, 'et 'i gha k'enánohuzní'ah 'ink'ez dahjih. Ndi hoontsi'-un nohts'u hóolts'ulh whe dzoh nahde 'et hoontsi' ndi k'enanenin'a-i, 'i be wheni cha 'ink'ez nohni cha ts'iyawh whulh nuzdilhya. 'Et whuz un'a 'uwuhút'en. 'Ink'ez ndet la k'enanenin'a de, 'et nohni za nohba 'uhoont'oh. 'Et 'i be k'enánohuzní'ah 'ink'ez dahjih.

<sup>7</sup> 'Ink'ez t'ets'onínzun nts'en'a la nohni dzoh nuts'udeh whe nets'ú nedihdil, 'et 'uwuhultus 'i be za ndi ye k'enanenin'a-i, 'i be nets'ú nedihdil.

*Ndi tube hoontsi' daztitsah-un, Yak'usda whuch'a neúlhyis*

<sup>8</sup> Sulhutsinke 'et whunulh'en, nyan-i Asia yun k'ut ndi hoontsi'-un negha óoninkat, 'et nebulh dahooja-un la t'ewhunoozhew hukwa' nusuzun. Whuz ts'e nebulh dahooja-un la tube hoontsi' k'et 'aw uzdooni' ait'oh. 'On nus neba hoondaz k'et 'aw whúlh nuzdolya' ait'oh neba le'hoont'oh. Neba hoontsi' k'et yats'itádlá uznanzin neba le'hooja.

<sup>9</sup> 'Ahoohlhyiz daztitsah-un hukwa tse ts'úholih. 'Et whuz un'a nebulh ndúhooja de, 'et whu la gha 'aw whenich'oh t'aníuznotan uznoozin junih. Yak'usda za t'aníuznootan. 'En za yaidlanne dunabudutáleh 'et huwa.

<sup>10</sup> 'Ink'ez ndi tube hoontsi' daztitsah-un, 'en whuch'a neúlhyih. 'Et 'ahoolhyiz whuz un'a za 'uwuhutát'elh. 'Et whuz un'a za lhan'un te neileh za 'tit'elh, 'et za 'ilhiz hukwa tse ts'uholeh.

<sup>11</sup> Nohni cha tenadudli be 'alghoh nela ooh't'en whe nela tenadoohdli. Lhane neba tenadudli 'et whe hoonliyaz neghá honkat. 'Et huwa nebulh dáhooja la lhane Yak'usda ts'un musi neba hutni.

*Ndet la neyo ts'e oogha t'ets'oninzun-i di la whunénulhtun, 'i za ts'uhóont'i'*

12 'Et ndet la neyo ts'e oogha t'ets'oninzun-i di la whunénulhtun, 'i za ts'uhóont'i' whe howu yats'oolhduk. 'Et whe whunénilhtan ndi yun k'ut uzdalts'i'. Yak'usda oobé 'alha' nudzun-i, 'ink'ez 'aw nanki khuni be yalhts'usduk, 'et whuz un'a za 'uk'enus nohtoh uzdalts'i'. Ndi yun k'ut whut'enne be whútnih-i, 'i be lhe'ts'ílel. Yak'usda ye unzoo-i, 'i gha 'uts'it'en. 'Et whuz un'a ne-eni toh whudiz'ai-i whunénilhtan.

13 'Et ndi la ook'uyalhdruk-i, 'ink'ez ndet t'eeonihzin, 'et whuz un'a za nohts'o k'ets'uges. 'Et whulatoh whuts'un 'i t'ewhutihzeh nohba hukwa'nuszun.

14 'Et whuz un'a hoontsool-unyaz dats'int'oh la 'et neghun t'ewhuniszin. 'Et huwa Sizi Gri neMoodihti oodzin whusahóolts'it de, 'et de nohni nebe'oonáht'e', wheni cha nohni nohbe' ts'oont'e'.

### *'Aw nohundósdah hukwa lhe'nuszun*

15 'Et dune ts'iyawh t'enohnúszun daht'oh dune ahli. 'Et huwa soo 'alha' nuszun whe nohts'u tísyalh inle'. 'Et whe la whulh nat-un hoonzoo-un nohgha hólts'it.

16 'Et whuz un'a Macedonia yun k'ut ts'e 'et 'oh whuya nohk'utisyalh inle'. 'Et Macedonia ts'e hanásja de, doo cha za nohk'unatisdulh inle'. 'Et whuz k'onásdahl whe Judea yun k'ut ndai la be ndunusdzit-i be sla tihnelh inle'.

17 'Ants'i 'oh ne'dusni' nuhzun eh? K'us nts'en'a la neyust'e ts'u nín'ti-un, 'et whuz un'a seni be lhaóodusdla nuhzún eh? 'Et whuz un'a ndust'oh de, 'et de si whuloh te, "A" doosni' 'ink'ez whuloh te, "Awundooh" doosni' la.

18 'Et hoonts'i Yak'usda 'aw nela dootnih ait'oh. 'Et whuz un'a be nóhts'u yats'ulhdruk-un 'aw, "A" 'ink'ez, "Awundooh" lhiloh! 'Aw nawh yalhts'ulhdruk.

19 'Et Sizi Gri Yak'usda ooYe' 'unt'oh. 'Et 'oh da' Sylvanus, Timothy, 'ink'ez si cha 'en ghun 'i be nohbulh yáts'ulhdruk da', 'aw, "A" 'ink'ez, "Awundooh" lhts'udínel inle', 'en be, "A" za 'unt'oh 'et huwa.

20 'Et Yak'usda yé nets'u nahizya-i, 'i ts'iyawh, "A" ni, 'ink'ez 'en be, "Ndo honeh" ts'utni. 'Et wheni negha Yak'usda uzdólhti'.

21 'Ink'ez mbe la Christ bulh soo cho 'ilhiz nohbulh núzdilhya neulhtsi, 'en Yak'usda 'unt'oh. 'Ink'ez Yak'usda 'en za 'uneinla Ndoni ye ulhtus-i 'et negha óonin'ai whe 'unt'oh.

22 'Ink'ez cha be 'ehóodal'en-i, 'i be wheni cha neye hóodat'en neulhtsi. 'Ink'ez Ndoni nedzi yidan'ai. 'I be yuloh neba 'uk'elha whulhtsi.

23 Yak'usda ooka' disni' szul ghun st'a tiyin huba, 'aw nohundósdah hukwa lhe'núszun. 'Et huwa 'awhuz Corinth ts'e lhoozúsyai.

24 'Aw nohba 'alha' hoont'oh-un whumoodih uztileh hukwa lhe'ts'ust'en. 'Et k'us ndet hoonáht'i' hukw'un'a 'unohts'oolhzin. Bé 'alha' hoont'oh-i, 'i be Yak'usda ba núdulhyai 'et huwa.

## 2

1 'Ink'ez si cha seni lhadúsdla 'aw ts'odi bulh nohts'u tísyalh hukwa lhe'núszun.

2 'Et si sgha nohdzi ts'odi susi de, mbe suba hoonust'i'-un sghá ho'alh? Nts'en'a suba nohni ts'odi ahli de, hoonúst'i'-un sghá hoh'alh? 'Aw 'uhót'e' ait'oh!

### *Mbe la ninta' ant'en-un, 'en ooba whunats'odoolnoh huba' hoont'oh*

3 'Ink'ez njan 'andit nohdúsní-un 'i ghun za 'uda' nohts'ó k'e'isguz inle'. 'Et nohts'óozusya de, doo ka la nohni nohghan ts'odi oosdle'. 'Et hoonts'i nohni

nohghan hoonúst'i'-un sghá holts'it, 'et za hukwa' nuszun. 'Et huwa 'awhuz nohts'úlhutzusyai. Be hóonust'i'-i, 'i ts'iyawh nohni cha be whúnolhni hukwa' nuszun. 'Et whuz un'a 'et ndaht'oh-un, 'et sba 'alha' hoont'oh.

<sup>4</sup>'Et sdzi ts'odi be dzoh nuzut inle', 'et whuz un'a ndust'oh whe 'i be snatsul too' hoonli whe nohts'ó k'e'isguz. 'Aw nohdzi ts'odi ooselh huba iloh nohts'ó k'e'isguz. 'Et nts'en'a la be nek'ets'ntsi'-i ncha-i nohba ust'i, 'et t'ewhutihzeh hukwa' nuhzun, 'et huwa nohts'ó k'e'isguz.

<sup>5</sup>'Et hoonts'i 'aw si za ts'odi lhúsdloh, nohni cha ts'iyawh 'et huwun 'en daja la 'et huwa ts'odi ahli. 'Et huwa 'andit nohdúsní-un doo ka la 'aw tube cho nohba dzoh 'udoosni' junih.

<sup>6</sup>Nohni cho olhtsus de, 'et 'awet soo' hoont'oh.

<sup>7</sup>'Et 'andit ts'iyawh ooba 'ún ts'uhutoolhdilh 'ink'ez 'uk'enázno'ah, doo ka la 'on nus oodzi ts'odi unli de, 'et whe 'i be ooch'a'oodeh.

<sup>8</sup>'Et huwa khuni ulhtus-i be nohdúsní, ndun dune ba 'ún ts'uhutulhdilh de, 'i be 'et whuz un'a la t'eeonózin ook'ehtsi'.

<sup>9</sup>'Et ts'ih'un un'a 'alha 'i be t'ewhutihzeh hukwa' nuszun nts'en'a la nohdásni'-un, ts'iyawh tilah hukw'u ne'zaht'en. 'Et huwa nohts'ó k'e'isguz.

<sup>10</sup>'Ink'ez mbe la hoonli ooba 'ún whutulhdilh de, si cha ooba 'ún whutis-dulh. Hoonli ooba 'ún whutusdilh-un, mbe la ooba 'ún whutusdilh-un, 'en Christ oonah nohni cha nohba 'ún whutusdilh' et huwa.

<sup>11</sup>'Et whuz un'a 'uts'ut'en de, 'et de Satan 'aw nech'a' oolhdeh ait'oh. Ndet whu la nech'a' tilhdoh-un, ts'iyawh t'ets'onínzun.

### *'Et neMoodihti 'ants'i dáti sba dáhaidantan le'uja*

<sup>12</sup>'Et 'awet keyoh Troas ts'uwhútni-un, 'et nusya whe 'et ndi Christ ooghuni unzoo-i, 'i be bubulh yatisduk 'et wheni whuz oozúsyá. 'Et Moodihti 'ants'i dáti sba dáhaidantan le'uja.

<sup>13</sup>'Et hoonts'i sulhutsin Titus 'en ookwa itús'en, 'et hoonts'i 'aw naóostelh ait'oh. 'Et whe syughi be sba ts'ih'un lhe'hóot'oh le'ust'oh. 'Et whe dusya whe 'et huwa Macedonia yun k'ut ts'e ts'óozusya.

<sup>14</sup>'Et hoonts'i Yak'usda ts'un musi dusni. 'En gha Christ 'en be 'ahool-hyiz whuch'a' ts'ulhdeh. 'Ink'ez ndai la 'en ghun be t'ets'onínzun-i, 'ants'i sooltsun-i k'un'a wheni negha n'un ndulcho whe whedándi le'unt'oh.

<sup>15</sup>'Et Christ 'en ba Yak'usda ts'un ooba sooltsun-i le'ts'int'oh. 'Ink'ez mbe la dijizne 'ink'ez mbe la kwuncho yo ts'u tidulhne, 'enne butoh whuz un'a 'uts'intoh.

<sup>16</sup>Whulohne dahútsisah-un whunahultsun. 'Et 'onghunne cha be ts'ukhuna-i nahultsun 'i be 'ilhez wheni hukhutinah, 'et whuz un'a za buba le'ts'int'oh. 'Ink'ez mbe 'unt'oh 'et huba soo 'úldzoo'?

<sup>17</sup>Mbene la soo 'únt'ohne ndiz un'a nja dúhint'oh, lhane Yak'usda ooghuni 'uts'un un'a náhuyulh'en. 'Et whe sooneya 'uhulh'en. 'Et wheni 'aw ndúlhts'it'oh. 'Et ts'ih'un un'a whe 'ants'i Yak'usda ba yats'ulhduk whe' ts'utni, 'et whuz un'a oonah whe Christ 'en be yats'ulhduk.

## 3

### *Nohni Christ whuts'ó k'éyanguz-i lé'ah't'oh*

<sup>1</sup>Doo cha za ztiti'elh ts'ih'un dune ts'inli nohts'u dutánelh eh? 'Awun-doo! 'Et whulohne ndiz un'a nja nduhut'en, nohni nohba 'udustl'us k'ut nohba na'oodudoszi'. Whuz un'a nets'u hukwa' nuhzun. 'Ink'ez nohni nohts'un 'udustl'us k'ut, 'i cha buba na'oodutasdzi'. 'Et hoonts'i wheni 'aw ndúlhts'ust'en.

<sup>2</sup> Nedzi k'ut 'uk'usahguz whe ts'iyanne hukw'u yahalhduk. 'Et whuz un'a ts'iyanne dune t'ehonínzun.

<sup>3</sup> Nts'en'a la nohba ne'úzninla whe nohla ts'ut'en 'et huwa Christ whuts'ó k'eyanguz-i lé'ah't'oh. Ts'iyanne t'éoonínzun 'et huwun. Ndai la 'uk'eguz-i 'aw bé k'weguz be lhe'inel, Yak'usda mbe la ye khuna-i, 'en ooyughi 'en be 'uk'éguz whe 'unt'oh. 'Aw tse k'ut 'uk'ulhíguz, 'ants'i dune budzi k'ut 'uk'éguz whe 'unt'oh.

*'Uda' khuni 'uk'eguz-i, 'i gha dune yáhádlah, 'et hoonts'i Yak'usda ooyughi be dune hukhuna*

<sup>4</sup> Christ 'en gha Yak'usda 'en za oot'aníuznintan, 'et huwa whuz un'a yats'ulhduk.

<sup>5</sup> 'Et hoonts'i ndi 'ut'en huba whenich'oh duba sóo uzdutneh whe ndi 'ut'en 'uts'ulh'ih, 'et 'aw whuz un'a lhts'unízun. 'Et k'us Yak'usda 'en gha za neghalts'ut whe ndi 'ut'en huba sóo uzdutneh 'et huwa.

<sup>6</sup> 'En gha neghalts'ut whe wheni cha huba sóo uzduja. Ndi 'andit nets'u hoozi-un neba ne'oonin'ai-un, 'et huba Yak'usda ba ne'úst'enne ts'inli. 'Et whuz un'a Yak'usda negha óonin'ai. Njan ndi 'andit nets'ú hoozi-un, dich'oh duyughi gha 'útni. 'Aw 'uda' khuni 'uk'eguz-i 'aw 'i gha iloh. 'Et ndi 'uda' khuni 'uk'eguz-i, 'i gha dune yáhádlah, 'et hoonts'i Yak'usda ooyughi be dune hukhuna nasdli 'et huwa.

<sup>7</sup> 'Et ndi 'uda' khuni 'uk'unusguz 'ink'ez tse k'ut ook'éyíguz-i. 'Ink'ez ndi khuni 'i gha 'ants'i yaidláne le'binla. 'Et ndai la ndi yé dizti'-i, 'i be 'uyinla. 'Et whe Moses oonin k'ut oots'u hayánduz suli'. 'Et oots'u hanáwhendunide whe 'et hoonts'i Israel oodune'ne 'on nus buba hoolhtus 'et whe 'aw hinoohl'en ait'oh.

<sup>8</sup> 'Et hoonts'i Yak'usda ooyughi, nts'en'a la nela 'ut'en, 'et 'on nus neba yé dizti'-i 'unt'oh.

<sup>9</sup> 'Et ndi 'uda'-i, 'i gha 'ants'i yaidlane le'binla, 'i dízti' de, 'et de ndi 'andit be nela 'ewhudut'en-i whe ts'ih'un dune ts'inli, 'i 'on nus dízti' whe 'unt'oh.

<sup>10</sup> 'Et ndai la 'uda' 'unt'oh-i, 'i 'aw 'on nus 'uk'enus yé dizti'-i 'unt'oh. Ndi 'andit yé dizti'-i, 'i gha la ndi whutsoda' yé dizti'-i hukw'e-i 'unt'oh.

<sup>11</sup> 'Et ndi 'uda' 'unt'oh-i, 'i dizti' hoonts'i, 'i gak wheninle' de, 'et ndi 'andit 'unt'oh-i, 'i 'ilhiz wheni 'unt'oh. 'Et huwa 'i 'uk'enus dizti' whé 'unt'oh.

<sup>12</sup> 'Et huwa ndai la Yak'usda ts'un hukwa tse ts'uhooli-un, 'et hooncha. 'Inka whe lhts'óojoh whe nohbulh yáts'ulhduk.

<sup>13</sup> 'Aw Moses k'un'a lhe'ts'ust'en. Ndi ndai la oots'u hayánduz-i hooloh whénininle', 'et whuch'a dunin yuts'o álhbál. 'Et whuz un'a whulatoh oole' whuch'a, Israel oodune'ne 'aw 'ahoolhyiz honoolh'en ait'oh.

<sup>14</sup> 'Et hoonts'i bubeni duts'o suli'. 'Et 'andit dzin whuts'un ndi ndai la 'uda' buts'u hoozi-un hik'uyalhduk-i, 'i oots'oh yuzbal-i, 'ahoolhyiz 'et za ndunt'oh. 'Aw whusanálhuhuyulhchooz. Christ 'en za whusanátilhchus.

<sup>15</sup> 'Et hoonts'i 'andit dzin whuts'un ndai la Moses 'uk'unéyuzguz-i huk'uyalhduk de, budzi 'awhuz oots'oh úzbal le'hint'oh.

<sup>16</sup> 'Et hoonts'i 'ilhoghun neMoodihti ts'u nálh'a de, 'et de ndi oots'oh yuzbal-i whusanáhitilhchus.

<sup>17</sup> 'Ink'ez neMoodihti 'en Yak'usda ooyughi 'unt'oh. 'Ink'ez neMoodihti ooyughi nts'e la diz'ai-un, 'et whe nelawhudítini.

<sup>18</sup> 'Et wheni cha nenin oots'oh lhe'ibal whe nts'en'a la be na'uzdunul'en 'i be ts'onilh'en, 'et whuz un'a neMoodihti yé dizti'-i, 'ahoolhyiz uznilh'en. 'Ink'ez ndi 'uk'eguz-i uznilh'en-i, 'et 'i k'un'a 'uts'uja. NeMoodihti yé dizti'-i, 'i

'on nus yé ditzit'i-k'un'a 'uts'int'oh. Dzin totsuk nusyaz za lhé'ts'it'elh. 'Ink'ez neMoodihti ooyughi, 'en gha whuz un'a 'uhóoja.

## 4

### *Christ ooghuni unzoo-i, 'i neba be hoot'en-i unli*

<sup>1</sup> 'Et huwa ndi 'andit nets'u hoozi-un, 'et huba Yak'usda ba ne'út'enne ts'inli. 'Et whuz un'a Yak'usda ye te'ninzun-i, nts'en'a la neghalts'ut, 'et whe 'aw 'etsul 'uts'ooneh ait'oh.

<sup>2</sup> 'Et hoonts'i dune nunúline tube hukwaya hoonli, 'et huwa wheni ts'iyawh 'et whuch'a dah ts'utni. Dune huzna'ah-un, 'et wheni 'aw ndúlhts'ust'en. 'Ink'ez Yak'usda ooghuni 'aw whuts'it bulh lhtalhts'usdloh. 'Et hoonts'i khuni 'alha' 'unt'oh-i búbuznllhtun. 'Et whuz un'a Yak'usda nalh ts'iyanne buyo ts'e oogha t'ets'oninzun-i, 'i ts'un buba nats'oodutadzi'.

<sup>3</sup> 'Et ndi khuni unzoo-i be yats'ulhduk-i ook'e'uzbal de, mbene la kwuncho yo ts'u tídulhne, 'enne buch'a ook'e'uzbal whe 'unt'oh.

<sup>4</sup> Ooba 'alha' lhe'hóot'ohne 'enne 'uhint'oh. 'Ink'ez ndi yun k'ut whuyak'usda, 'en 'unt'oh ndunne dudeni be lhuhoos'en ubulhtsi. 'Et whu la gha ts'e Christ ooghuni unzoo-i yé ditzit'i, Christ, 'en Yak'usda k'éguz-i 'unt'oh hoonts'i, ndai la oots'u háyanduz-i ndunne dudeni be lhuhoos'enne 'aw bube ídodi ait'oh.

<sup>5</sup> 'Aw whenich'oh khuyanats'ulduk iloh. Christ, 'en Sizi neMoodihti, 'en ghun 'unohts'út'ni. 'Et wheni Sizi 'en ba noh'eustlenne ts'inli.

<sup>6</sup> 'Et Yak'usda tsahólhgus whe be hoot'en-i yuka' dani' íbulh 'aho hoot'en sulí, 'et whuz un'a 'uhóoja. 'En za 'unt'oh 'et huwa nedzi bé dindi le'uja. Ndi Yak'usda yé ditzit'i ghun t'ezninzun-i, 'i neba be hóot'en-i whe 'unt'oh. 'Et 'i nedzi bé dindi. 'Ink'ez ndi yé ditzit'i, 'i Sizi Gri oonin oots'u háyanduz whe 'unt'oh.

### *Ts'iyaitsuk hoonli hoonts'i-un nets'ó tukat 'et hoonts'i 'aw nech'a' oodeh ait'oh*

<sup>7</sup> 'Et be' tilalh-i lhadzeh be 'ulya, neyust'e 'et whuz un'a 'únt'oh. 'Et ndiz un'a nja dúhoont'oh, ndi ye hoonzoo 'unt'oh-i ts'ut'i-i, 'i Yak'usda negha ininla. 'Aw whenich'oh nech'e' iloh. 'Et whe la ts'iyanne t'ehonóozin ndi 'uk'enus yé ulhtus-i, 'i Yak'usda oots'u háyankat-i 'unt'oh, 'aw wheni nets'u háinkat iloh.

<sup>8</sup> Ts'iyaitsuk hoonli hoonts'i-un nets'ó tukat 'et hoonts'i 'aw nech'a' oodeh ait'oh. Tube whets'ítsaz 'et hoonts'i 'awhuz uznint'i za' ts'int'oh.

<sup>9</sup> Whuloh te nech'a ne'whut'en 'et hoonts'i Yak'usda 'en 'aw nela dootnih ait'oh. Khuni be nanéhulhdulh de, 'et hoonts'i 'aw nech'a' oodeh ait'oh.

<sup>10</sup> Nts'en'a la Sizi neMoodihti neba dazsai-un, 'et 'ilhiz neyó whudiz'ai. 'Et 'i be ts'iyanne t'ewhuntizeh Sizi ye khuna-i, 'i neyust'e ootoh 'uyint'oh.

<sup>11</sup> Wheni ndi 'ilhiz be khútna ut'ine, wheni ts'iyawh Sizi 'en ooba daztitsah 'et wheni butl'azdudilya 'et huwa. 'Et la ndi yun k'ut neyust'e, 'i be Sizi ye khúna-i ts'iyanne t'ehontizeh.

<sup>12</sup> 'Et ndiz un'a nja dúhoont'oh, wheni be daztitsah-i, 'i neyust'e ghu hoonli. 'Ink'ez nohni 'ilhiz be khútna-i, 'i nohni nohghu hoonli.

<sup>13</sup> 'Ink'ez nohni nts'en'a la be nohba 'alha' hoont'oh-i 'ink'ez wheni cha nts'en'a la be neba 'alha' hoont'oh-i, 'i bulh lhgha za' 'unt'oh. 'Et huwa nts'en'a la 'uda' 'uk'eguz-i ndet 'uwuhlhni, 'et ndiz un'a nja dutni whe ndutni, "Et sba 'alha' 'unt'oh 'et huwa 'i khuni be yasduk." 'Et wheni cha 'i ts'iyawh neba 'alha' 'unt'oh 'et huwa 'i khuni be yats'ulhduk.

<sup>14</sup> 'Et huwa njan 'et nduts'útni, mbe la Sizi neMoodihti dunaidilhti-un, 'et wheni Sizi 'en bulh dunánedutáleh. 'Et whuz un'a wheni 'ink'ez nohni cha ts'iyawh 'ilhunaneoozdla whe dubut nenéninla.

<sup>15</sup> Whunilhchoh nebulh ne'whut'en 'et whe nohba hootázoo' 'et huwa. 'Et whuz un'a ndi 'uk'enus yé unzoo-i, nohtoh hoonli, 'et whe nohni nohgha 'on nus Yak'usda ts'un musi ts'utni. 'Et whe hiba whudílti'.

*Ndai la lhts'is'en-i, 'i hoonts'i be 'alha' hoont'oh-i, 'i be uznilh'en*

<sup>16</sup> Doo ka la 'uts'ut'en uznoozin junih. Neyust'e whénilhjut 'et hoonts'i ndai la neyughi unli-i, 'i dzin totsuk ts'iyawh 'andidi nadleh.

<sup>17</sup> 'Et ndet la hóontsi'-un neghá honkat-un, 'et 'atsulyaz za neba 'uwuhut'ih 'et huwa. 'Et neba 'ants'i le'uhoont'oh. 'Et k'us ndi be hóontsi'-un neghá honkat, 'et 'i be 'on nus neba be óodizti'-i neba yulhtsi. 'Ink'ez ndi be óodizti'-i, 'ilhiz wheni uyíla. 'Et neba hooncha k'et 'aw uzdooni' ait'oh.

<sup>18</sup> Ndai la ts'i'en-i, 'i neba 'ants'i unli. Ndai la 'aw lhts'is'en-i, 'i za neba ts'ih'un 'unt'oh. Ndai la ts'i'en-i, 'et 'atsulyaz neba whutát'elh 'et huwa. 'Et hoonts'i ndai la lhst'en-i, 'i 'ilhiz wheni 'unt'oh.

## 5

*'Aw ts'an'en-i, 'i bé iloh whe ndi yun k'ut uzdilhts'i, be 'alha' hoont'oh-i, 'et 'i be za ndi yun k'ut uzdilhts'i*

<sup>1</sup> 'Et 'alha t'ets'oninzun ndi nimbali, 'i neyust'e unli k'un'a be ts'uwuhut'i ndi yun k'ut, 'et whénilhjut de, 'et cha Yak'usda 'en 'udun yoh neba whulh'ai. 'Aw dune dula be 'uhóonla-un iloh, 'et 'ilhiz ndo yak'uz 'et 'úhoont'oh.

<sup>2</sup> 'Inka 'alha ndi nimbali be ts'uwuhut'i whe ts'ukhun dutsó le'ts'utni. 'Ink'ez neyoh ndo yak'uz whuz'ai 'et ookw'éznintai. 'Et huwa nedzi be nek'eyútalhbilh oots'o hukwa' uzninzun.

<sup>3</sup> Nek'éyilhun 'i be soo nanedinla le'neyíla, 'et whuz un'a nduts'úja de, 'et de za 'aw ust'et lhts'íloh le'ts'int'oh.

<sup>4</sup> 'Alha wheni mbene la ndi nimbali be whut'ine, wheni lhat-un hoontsi'-un nek'ut whuz'ai, 'et huwa khun duts'utso. 'Aw nenaíh bé ha ts'ooya' hukwa lhe'uznínun. 'Et k'us 'on nus 'uyoo lhai be' ts'oot'e' hukwa' uzninzun. 'Et whuz un'a be ts'ukhuna-i ndi be dáztsah-i 'ants'i whélnó le'tit'elh.

<sup>5</sup> 'Et mbe la njan wheni 'et huba lhanédinla-un, Yak'usda 'en 'unt'oh. 'Uda' Ndoni be lhanédinla 'et whe whulokhun neba 'uk'elha whulhtsi.

<sup>6</sup> 'Aw whéllhts'uniljut. T'ets'onínzun neyust'e be nduts'int'oh de, 'aw neMoodihti bulh lhe'ts'it'oh.

<sup>7</sup> 'Aw ts'an'en-i, 'i bé iloh whe ndi yun k'ut uzdilhts'i, be 'alha' hoont'oh-i, 'et 'i be za ndi yun k'ut uzdilhts'i.

<sup>8</sup> 'Et huwa nedzi hoonli. 'Ink'ez neyust'e yoh lhts'uhoot'ih de, 'et k'us neMoodihti bulh uzdilhts'i, 'et whe 'on nus soo ts'uhootát'e'.

*Yak'usda ooch'e'ne, 'enne Christ 'en nahiyilh-un oobut néztialh*

<sup>9</sup> 'Et huwa ndi yun k'ut uzdilhts'i k'us yak'uz uzdilhts'i, ndet la Yak'usda nets'o hukwa' ninzun, 'et 'ahoolhyiz ooba 'uts'uwuhulh'en whuz uznint'i.

<sup>10</sup> 'Et 'ilhone ts'inli whe Christ 'en nahiyilh-un oobut néztialh. 'Et whe nts'en'a la ndi yun k'ut dats'últi', k'us dats'úldzoo' la, 'et whuz un'a neba k'elha whutaleh.

<sup>11</sup> 'Ink'ez neMoodihti, 'en bé whunujut-un, 'et huwun 'et t'ets'onínzun. 'Et huwa ts'iyanne dune whúz ubuznilht'i. 'Et Yak'usda 'ilhone ts'inli whe wheni cha t'enenínzun. 'Ink'ez 'et uncha wheni cha nohyo ts'e oogha t'ets'oninzun-i whe t'enenázhun.

*Yak'usda Christ yudinda whe yinka dune'ne ts'iyawh ts'un nenábudilya*

12 'Et wheni cha doo cha za nohba nats'oodudodzi' ait'oh. 'Et k'us nohni neyé ootaht'e-un, 'et nohts'u hukwa' uzninzun. 'Et whe la 'onghohne nts'en'a la dune buzoo' k'un'a 'et whe huhóont'i', 'ink'ez 'et dahínt'oh la budzi be di hut'i, 'aw howu nuni lthonusde, 'et mbene la nohdulhyoh 'utnine, dats'ínt'oh la soo ts'ih'un un'a ubudutáhnelh whe' hoont'oh.

13 'Et ne-eni hooloh le'ts'int'oh de, 'et Yak'usda ooba' hoont'oh. 'Et ts'ih'un nuni nudehne ts'inli de, 'et nohni nohba' hoont'oh.

14 Christ ye nek'entsi'-i, 'i be 'on nus úzdunult'i 'et huwa. 'Ilhoghun ts'iyanne ba dazsai de, 'et de ts'iyanne yahadlah le'hínt'oh, 'et whuz un'a t'ets'onínzun.

15 'Ink'ez ts'iyanne ba dazsai 'et whe la wheni mbe la khunáne, 'aw whenich'oh neba za iloh whe ndi yun k'ut uzdilhts'i. 'Et k'us mbe la neba dazsai 'ink'ez dunadija-un, 'en ba ndi yun k'ut uzdólt's'i.

16 'Et 'inka 'andit njan whuts'un ndi yun k'ut dune nena be uznilh'en dahínt'oh la, 'et 'aw whuz un'a iloh whe dune t'ebuzninzun. 'Et 'alha whutso da' 'et whuz un'a Christ 'en ghun t'ezninzun. 'Et hoonts'i 'andit 'aw whuz un'a za 'en ghun t'ets'onínzun.

17 'Et ndiz un'a 'uhoont'oh, 'et mbe la Christ yudínda-un, 'et whuz un'a ooyughi ndúwhulcho 'áwhundidi nawhúsdli'. 'Et whutso da' 'unt'oh hukw'un'a, 'et ts'iyawh ba gak whuzdli'. 'Et be 'ut'en k'oh ts'iyawh 'andidi nawhúsdli'.

18 Ndi Yak'usda ts'un 'únt'oh. Sizi Gri 'en gha ts'un nenánedilya. 'Ink'ez ndi dune ts'un nenánedilya-un, 'et huwun dune bulh yáztihduk, 'et 'andit Yak'usda negha óonin'ai.

19 'Et whuz un'a, Yak'usda Christ yudinda whe yinka dune'ne ts'iyawh ts'un nenábudilya. Ts'iyantsuk whe hich'a ne'ust'en, 'et 'aw 'on 'un buk'elhuóho'al. 'Ink'ez ndi khuni dune yé ts'un nenábudilya-i, 'i negha ínin'ai.

20 'Et huwa Christ 'en ba khuni naáne ts'inli. 'Ants'i Yak'usda wheni nebe nohbulh yálhduk le'utni. 'Et whe nohts'un tézdudli, 'andit whuts'un soo Yak'usda ts'un naóolhyah!

21 Christ, mbe la lubeshi ooghu hooloh-un, 'en Yak'usda wheni neba lubeshi sulí 'et huwa. 'Et whe la 'en gha Yak'usda ye ts'ih'un un'a 'unt'oh-i k'un'a 'uts'int'oh ha.

**6***Yak'usda ba ne'ts'ut'en-un*

1 'Ink'ez wheni Yak'usda bulh 'ilhoh ne'ut'enne ts'inli' khuni ulhtus-i be nohts'útni, Yak'usda ye unzoo-i 'ants'i 'et ólhchoot junih.

2 'Et nja ndutni,

“Soo 'et neóoninzut-un, 'et nyudásts'o.

Ndet dzin la dinjih-un,

'oh whuya hoozulh 'et nla 'usja,”

ni. Dukw'e' oozúlhts'ai, 'ilhudzin 'awet nela 'ewhudutánehl-un, 'et 'awet 'et neóoninzut. Dukw'e' oozúlhts'ai, 'oh de uzdutijih-un neóoninzut, 'et 'awet ndúhooja.

3 'Aw nohba dzoh-un nohghá ts'úho'alh hukwa lhe'uznínzun. 'Et huwa nts'en'a la Yak'usda ba ne'ut'enne ts'inli, 'aw whe hukw'éholts'it-un hooloh.

4 'Et hoonts'i ndúwhulcho whe ts'ih'un un'a Yak'usda ba ne'ut'enne 'uts'int'oh. 'Et ndiz un'a nja dúts'int'oh, 'uts'oot'e' ait'oh 'et hoonts'i whulh ts'ooyin. Nek'éhoot'oh-un nets'u hóolts'ulh-un, hoonliyaz ha' ezdunidzut, whulokhun neba howa whúl'a-un,



<sup>5</sup> 'ink'ez nehoollhtsas-un, 'anehudilh'ai-un, nebulh hódutulhzhuk-un cha, 'ut'en howa whúlna'-i cha. Lhts'itoh-un cha, soo ts'úhooni-un, 'et cha.

<sup>6</sup> Lubeshi ch'a khuts'udli-un, be t'eeonudzun-i, khun lhuts'onúsch'e-un, 'uyoonne ts'un ts'inzoo-un, 'i cha, 'ink'ez Ndoni be ts'ukhuna-un cha, 'et ts'ih'un un'a be nék'ets'intsi'-i, 'et cha.

<sup>7</sup> Khuni be 'alha 'unt'oh-i be yats'ulhduk-un, Yak'usda ye ulhtus-i, 'i be ts'ut'en-un, be lhts'ugan-i, 'i ts'ut'i whe ts'ih'un un'a 'et wheni lhalhch'az ts'e nela be nuts'úle-un. Whuz un'a Yak'usda ba ne'út'enne ts'inli.

<sup>8</sup> Ndet la buba uzdízi' k'us buba lhts'udíti', 'ink'ez ndet la hoonstsi' k'un'a neghu yahalhduk k'us hoonzoo k'un'a neghu yahalhduk, 'ink'ez dune uzna'ah nehutni, ts'ih'un un'a khuni be 'uts'utni 'et hoonstsi'.

<sup>9</sup> Dahoot'oh whu la dune t'enehunúszun huninzun, 'et hoonstsi' ts'iyanne t'enenínzun. Nts'en'a la hukw'é daztitsah le'ts'int'oh 'et hoonstsi' dáhooja la, 'et whulh ts'úkhuna. Nehutuzilghelh hukw'un'a nehoollhtsas de, 'et hoonstsi' whulh ts'úkhuna.

<sup>10</sup> Dats'int'oh whu la ts'odi ts'inli 'et hoonstsi' nedzi be ts'uhóont'i'. Dats'int'oh whu la tets'ul'en 'et hoonstsi' ndai la ts'ih'un hiye hoonzoo 'oot'e'-i, 'i lhane gha ts'ú'aih. Dáhoont'oh whe ndai la hoonli be tets'ul'en 'ink'ez lhts'ít'i' 'et hoonstsi' ts'iyaituk ts'ut'i. 'Et ndi ts'iyai 'i be whunóhuznilhtan Yak'usda ba ne'út'enne 'uts'int'oh.

### *Ndai la Yak'usda ooba tsun unli-i, 'i oot'aóohnalh junih*

<sup>11</sup> Nohni Corinth whut'enne ts'et whucho nohuzdáni'. Nohni nohts'un nedzi unzoo cho ts'úllhtsi.

<sup>12</sup> 'Aw wheni neghá iloh k'oh náht'i'. Nts'en'a nets'un daht'oh-un, 'et whuz un'a aht'oh.

<sup>13</sup> Ts'oodunne ahli hukw'un'a nohbulh yásduk. Nts'en'a la nohts'un 'úts'int'oh, nohni cha 'et whuz un'a nets'un óoht'e'.

<sup>14</sup> Mbene la ooba 'alha lhe'hoot'ohne, 'enne buts'ú nedohdilh junih. Nts'en'a suba ts'ih'un un'a ne'ut'en-un 'ink'ez ts'ih'un 'un'a nulhe'ust'en-un, 'en 'aw lhulh 'uhoot'en ait'oh. 'Aw whuz un'a 'uhót'e' ait'oh! Nts'en'a hoot'en usda-un 'ink'ez tsalhgus yo usda-un bulh, lhzih hooke'?

<sup>15</sup> Nts'en'a suba Christ, 'en Beliar 'en bulh 'ilhoh 'uhoot'e'? 'Et nts'en'a suba ooba 'alha' hoot'oh-un 'ink'ez ooba 'alha lhe'hóot'oh-un, bube 'ut'en k'oh lhgha 'úwhutat'elh?

<sup>16</sup> Nts'en'a suba Yak'usda oolugliz whucho 'ink'ez 'ants'i 'uk'eltsi bulh lhgha' tit'elh? Soo cho whunulh'en Yak'usda whe khúna-un, 'en oolugliz whucho ahli. 'Et whuz un'a Yak'usda ndutni,

"Budzi yo 'ust'oh 'ink'ez butunusya.

BuYak'usda tisdleh 'ink'ez 'enne sdune'ne hutileh."

<sup>17</sup> 'Inka neMoodihti nets'u náhizya whe ndutni,

"Nohni 'enne butoh ts'u hanáhdilh

'ink'ez buch'oh aht'oh.

Ndai la tsun unli-i, 'i oot'aóohnalh junih,

'et de nohitáschulh.

<sup>18</sup> 'Et Si nohBá tisdleh,

'et nohni sye'ke 'ink'ez stse'ke tihleh.

NeMoodihti ts'iyantsuk whe ulhtus-un, 'en 'utni."

## 7

<sup>1</sup> Ook'esi'ne soo zúlhts'ai, ndi yé nets'u nahizya-i, 'i neghun hoonli. 'Et huwa neyust'e 'ink'ez neyughi 'i ndai la lubeshi be dutsun sulí', 'i ts'iyawh

buna'ts'oolhdeh. Yak'usda 'en bé uznuljut. Ndi bé uznuljut-un huwa 'et 'i be ndi lubeshi ooghu hooloh-un, soo ts'ih'un un'a lhats'ódooleh.

*'Aw 'ilhone hoonts'i dach'e núlhe'ts'ust'en*

<sup>2</sup> Nohni nohdzi neba oodáha' dahtih. 'Aw 'ilhone hoonts'i dach'e núlhe'ts'ust'en. 'Aw 'ilhone hoonts'i ninta lhe'ts'us'i. 'Aw 'ilhoghun hoonts'i gha halhe'ts'undunist'a.

<sup>3</sup> 'Aw nohk'ehos'alh hukwa iloh 'udusnih. 'Oh da' nohdásni' nedzi yo ahli whe nohbulh yáts'itadlah k'us nohbulh ts'ukhutinalh.

<sup>4</sup> Tube cho 'aw whelhusaz whe 'et huwun nohbulh yátisduk. Tube cho nohdústi' whe nohghu yasduk. Bé k'enaznit'ah-i sdzi dizbun. Hoonts'i-i sk'uz nint'i 'et hoonts'i tube cho be ts'úhoont'i-i-i sdzi dizbun.

<sup>5</sup> Soo ts'ih'un un'a whunulh'en, Macedonia yun k'ut néznindil, ts'iyaitsuk be nech'a tuza néwhut'en. 'Et whulohne neghun lhdulhyo 'uhudutni. Ts'iyaitsuk whe uznuljut, 'et huwa 'aw nats'oolyis te ait'oh.

<sup>6</sup> 'Et hoonts'i Yak'usda budzi undudane ts'iyawh k'ena'binin'a. 'Et Titus neghu ninya whe, 'et whe wheni cha k'enánenin'a.

<sup>7</sup> 'Aw 'et huwa za iloh. Nohni ts'iyawh sk'énihtai 'et whe la sk'elh'o neóonah'ai, 'ink'ez sk'enaih ahli. 'Et whuz un'a tube ncha-i be si ba hukw'úne' tiht'en hukwa' nahzun. Titus ts'iyawh 'et hukw'un nebulh náhoolnuk, 'et whe 'on nus whunúsní suli'.

<sup>8</sup> Soo cho nulh'en, ndi 'udustl'us nohts'o tl'as'ai 'et huwun ts'odi ahli inle'. 'Aw whuts'ulh dusni 'et hoonts'i sdzi únduda whe 'uk'únusúsguz. 'Et hoonts'i 'aw sdzi lhúndidowh. T'éoonúszun ndi 'udustl'us be nohdzi dúntida', 'et hoonts'i 'atsulyaz huba za nohdzi unduntida'.

<sup>9</sup> 'Et 'andit 'awet whunúsní. Ts'odi ahli 'aw 'et huwa iloh whunúsní. Ndi ts'odi gha nohdzi k'oh na'ahla 'et huwa whunúsní. Yak'usda hukwa' ninzun k'un'a ts'odi ahli inle' 'et huwa. 'Et huwun ts'odi ahli hoonliyaz huwun wheni negha nitálhowháh'al.

<sup>10</sup> Yak'usda hukwa' ninzun k'un'a ts'odi ts'inli de, 'et lht'anaznoodilh uzdoojih ha, whuz un'a 'aw nedzi úndooda' ait'oh 'et huwa. 'Et hoonts'i ndi yun k'ut ts'odi, 'i be yats'adlah.

<sup>11</sup> Howu nuní nuhzut, Yak'usda hukwa' ninzun k'un'a ts'odi ahli inle'. 'Et dahooja la ts'iyawh 'a cho ndutíhnelh hukwa' nahzun. Yak'usda 'en ts'uk'eke dutihnelh hukwa' nahzun. 'Et nohba dzoh whuzdli'. 'Et huwun whenulhjut léah't'oh, 'et whe sk'enihtai. Tube cho ts'ih'un nenaóotah'alh hukwa' nahzun. Nohba dzoh 'uhoont'oh-un, 'et cha ts'iyawh. 'Et whe ndúwhulcho whe lubeshi nohghu hooloh suli'.

<sup>12</sup> Ndi 'udustl'us nohts'ó k'ésguz-i, mbe la ninta' ant'en-un 'ink'ez mbe bulh ninta' ant'en-un 'aw 'enne bugha iloh nohts'ó k'éisguz. 'Et hoonts'i Yak'usda nalh ts'ih'un un'a whunoh uznulhtun, 'et huwa nohts'ó k'eisguz.

*Titus nedani'-un tube hoonúst'i'*

<sup>13</sup> 'Et whu la gha ts'e k'enániht'a. 'Et 'i be za wheni cha k'enánit'a. 'Et 'on 'un cha, Titus ooyughi nohni nohgha 'et whe 'andidi nasdli' lé'uja. 'Et huwa 'on nus tube cho ts'onílhni.

<sup>14</sup> 'Et nts'oh tula Titus ts'un nohé'oonust'e' whe za nohghu yasduk-un, 'aw 'et hukwayá lhusdloh. 'Et k'us ndi khuni be 'alha' 'unt'oh-i be yats'ulhduk-i, 'i be za nohbúlh yats'ulhduk. 'Ink'ez 'et whuz un'a za nts'oh tula Titus ts'un nohé'oonust'e' whe za nohghu yasduk-un, 'et cha 'alha' hoont'oh whe Titus nahoon'ai.

<sup>15</sup> 'Et whunalnih nts'en'a la khuni k'une' aht'en. 'Et whuz un'a nohyust'e dutlut 'ink'ez nohba wheóonujut whe n'az de nohts'óyalh whe nulh'en. 'Et whe 'on nus nohk'esi' suli'.

<sup>16</sup> 'Et ts'iyantsuk whe ne'aht'en ts'ih'un un'a ne'aht'en, 'et huwa 'i be tube cho whunúsnih.

## 8

### *Ts'iyantsuk ndai la ilh'en-i, 'i 'uk'enus hoonzoo k'un'a 'uhóonla*

<sup>1</sup> 'Et 'awet sulhutsinke online, 'et 'awet Macedonia yun k'ut Yak'usda ba 'ilhunaoóúlhne, nts'en'a la Yak'usda ye unzoo-i 'et butl'a hóolts'ut, 'et huwun ts'iyawh 'et t'ewhutihzeh hukwa' uzninzun.

<sup>2</sup> Tube te'hil'en-un whutoh 'et hoont'i tube cho huhóont'i'. 'Ink'ez tehel'en 'et hoonts'i bula hoonli whe 'onghohne bula' huja.

<sup>3</sup> 'Ink'ez cha dahínt'oh whe dáwhultsuk-un bugha húwhunle, 'et hoonts'i 'et 'on nus 'uwultsuk-un, 'et za bugha' hutilelh, whuz un'a hukwa' huninzun 'ink'ez 'et whuz un'a nduhuja. 'Et t'ewhuniszin 'et ts'ih'un un'a 'uhoont'oh.

<sup>4</sup> Ndi ye unzoo-i, 'et Macedonia whut'enne butl'a hón'ai 'et whe Yak'usda ooch'e'ne lhulh 'uhint'oh hukw'un'a whe bula hutinelh. 'Et hukwa soo cho nehoodulhkut 'et ts'iyawh Yak'usda ooch'e'ne buba ts'uyilhchoot.

<sup>5</sup> 'Et ndahúja, 'aw hukwa tse lhts'uhoolih k'un'a unehínla. 'Udechoo dich'oh Yak'usda gha' hududulya. 'Et 'ink'ez Yak'usda hukwa' ninzun k'un'a negha' hududulya.

<sup>6</sup> 'Et 'inka Titus khuni ulhts-i be uzdáni', ndi ye unzoo-i nohni 'udechoo nohbulh whe yudilh'en, 'et ts'iyawh lhaóodooleh huba' hoont'oh.

<sup>7</sup> Ts'iyantsuk ndai la ilh'en-i, 'i 'uk'enus hoonzoo k'un'a 'uhóonla. Be 'alha' hoont'oh-i, 'i be, 'ink'ez nohghuni cha. Be t'éoonudzun-i, 'i cha. 'A cho ndutihnelh-un, 'et cha. 'Et be nek'ehtsi'-i, 'i cha. 'I ts'iyawh 'uk'enus hoonzoo hukw'un'a 'uhóonla. 'Et whuz un'a ndi ye unzoo-i, 'i be hoonzoo whuzúlhtsi.

### *Christ 'en k'un'a 'uts'oot'en*

<sup>8</sup> 'Aw 'et ndahneh nohdusni iloh. 'Et hoonts'i nts'en'a la 'uyoonne 'enne 'a cho 'uhudutinelh-un, 'ink'ez be nék'ehtsi'-i whunéuntalhtun, 'et whuz un'a 'unohdusni.

<sup>9</sup> NeMoodihti Sizi Gri, 'en ye unzoo-i ooghu t'éoonáhzun 'et huwa. Nts'en'a la dalcho-i be la hoonzoo 'unt'oh, 'et hoonts'i nohni nohba tel'en suli'. 'Et whe ndai la ye tel'en-i, 'i nohni be hoonzoo' 'oohneh.

<sup>10</sup> Ndi daja nuszun la 'et ts'ih'un nohdutasnelh, 'et 'uk'enus nohba hootázoo'. Nada' nohni hukwa' nahzun 'ink'ez hoonáht'i' whe whe'daht'en, 'et 'awhuz tilah 'et ndaht'en.

<sup>11</sup> 'Et 'andit lhaóodooleh huba' hoont'oh. 'Et nts'en'a la noheni lhadáhla, whuz un'a lhaóodooleh.

<sup>12</sup> 'Et soo cho whunulh'en, 'et dune dudeni lhaídinla whe sooneya daltsuk huwa íta'alh, 'i 'aw 'et soo 'útsuk whe 'unt'oh. Ndai la huwa íta'alh-i 'on 'unyaz huwa íta'alh hukwa' ninzun hoonts'i, 'aw 'ooneh ait'oh-un, 'et soo' hoont'oh.

<sup>13</sup> 'Et 'aw nohni nohba howa whulna 'ink'ez 'onghunne 'aw hoonliyaz lhe'hust'en, 'et 'uwhudúsnih.

<sup>14</sup> 'Et k'us ts'iyanne ba lhgha' hot'e'. 'Et whuz un'a nohni lhai aht'i te, ndunne lhe'it'ihne, 'enne whuloh bughah'aih. 'Et whuz un'a lhla ts'oot'en huba' hoont'oh.

<sup>15</sup> 'Et whuz un'a whutso da' 'uk'ehóoguz whe ndutni, "Et ndun mbe la k'us lhai ilhchoot-un, 'en 'aw ch'uditízkat-i hoonts'i lhit'i, 'ink'ez ndun mbe la hukw'e-i ilhchoot-un, 'aw hoonliyaz ye ndunidzit-i hónloh."

*Yun k'ut Judea ts'e Christ ooch'e'ne, 'enne buba sooneya lhnats'ootá'alh*

16 Yak'usda ts'un musi ts'utni. 'En 'uja Titus ba hoolhtus whulhtsi, 'et whe soo cho nohla tit'elh 'et whuz un'a hukwa' ninzun.

17 'Aw neghuni ulhtus-i ilhchoot 'aw 'et za iloh huwa, 'et dich'oh hukwa' ninzun huwa nohts'ú whinya.

18 'Ink'ez 'uyoon neulhtsin, mbe la khuni unzoo-i be yalhduk-un, 'et huwa Yak'usda ba 'ilhunaoodúlhne, 'enne ts'iyawh hiba oodíhti'. 'En cha Titus bulh whuz nohts'ú whe buts'alh'a'.

19 'Aw 'et za iloh, ndun 'en Yak'usda ba 'ilhunaoodúlhne neba 'utahahúyalhti nebulh tí'us 'ink'ez nela' tit'elh whuba. 'Et whuz un'a ndi 'ut'en unzoo-i 'onghohne buba ne'ut'enne ts'inli. 'I be neMoodihti dich'oh ye dizti-i t'ehinoozeh. 'Ink'ez 'i be la noheni lhadínt'oh t'ets'onózin.

20 Ndi huwant'ai-i whutaztilelh-i 'aw ooka nek'éholts'i junih. 'Et whuch'a ne'ts'ut'en.

21 'Et neMoodihti nalh 'ink'ez ts'iyanne cha nalh soo ts'ih'un un'a 'uts'otilelh.

22 'Ink'ez neulhtsin, 'en cha, 'enne bubulh whe ts'alh'a'. Ndun lhat whe ts'óolhdzai 'et whe t'ets'onínzun 'ahoolhyiz huba sulh'i tube cho 'et ndutínelh huba. 'En za nohbulh oodzi hoonli whe nohni 'a cho nohts'utíyalh hukwa' ninzun.

23 'Et mbe la Titus há' 'oodulhkutne, 'en ts'úditni-un, nohni nohba sulh 'ut'en'un 'unt'oh, budóhni. 'Et mbene la neulhtsinke há' 'oodulhkutne, 'enne Yak'usda ba 'ilhunaoodúlhne khuni buba na'áne 'ink'ez Christ ye dizti'ne 'uhint'oh, budóhni.

24 'Et 'inka Yak'usda ba 'ilhunaoodúlhne bunalh mbene la nohts'oozdilne, nts'en'a la be nek'ets'intsi'-i aht'i, 'ink'ez nts'en'a la nohba ts'odilhti'-un, 'et ts'iyawh bunalhts'et haootihlelh.

## 9

*Lhadóoht'e' ndi sooneya huwa tih'alh-un*

1 'Et 'awet Yak'usda ooch'e'ne bula tihnelh, 'aw 'uyoo khuni nohts'o k'eosges huba lhe'hoot'oh.

2 'Et ndutínelh hukwa' nahzun t'eeonuzsun. 'Et huwa ndunne Macedonia whut'enne ts'un nohdústi' whe nohghu yasduk. Achaia yun k'ut nohwhenghoh whut'enne ndet la lhadóutileh-un, 'et nada' lhadódinla budásni' 'et huwa. 'A cho 'uwhutánelh hukwa' nahzun 'et t'eeonúszun. 'Et huwa nohni nohgha ndunne Macedonia whut'enne k'us lhane sooneya howa huti'alh 'et huhóost'et.

3 'Ink'ez nts'en'a la be nóhdusti'-i, 'i 'aw howu t'eduzoosnih ait'oh, 'et huwa neulhtsinke nohts'un whebis'a'. 'Et whutso da' nohdúzni, 'inka nohzooneya be lhadóoht'e'.

4 'Et whulohne Macedonia whut'enne, khun la sulh hutooya', 'et nohni 'aw lhalhduzahne de, nts'en'a la be nóhdusti'-i, 'i wheni ookwaya uztileh. 'Ink'ez nohni, 'et do', nohba dáhoont'oh?

5 'Et ndunúszun whe neulhtsinke 'uda' cho stso nohts'ó toodilh ubudúzni. 'Et hoonáht'i' whe howa tih'alh, 'et de la k'udada huwa tih'alh-i lhadídooleh. 'Et whuz un'a ndi huwa tit'alh-i, hoonáht'i' whe huwa tih'alh, 'et 'aw soo 'a cho 'et dahneh nohts'udóne' ait'oh.

*Hoonáht'i' whe ndi sooneya huwa óoh'alh. Whuz un'a Yak'usda nohts'o hukwa' ninzun*

6 'Et diz un'a nja dúhoont'oh, mbe la ntsool-i 'anuleh-un, 'en ntsool-i hantilelh. 'Ink'ez mbe la lhai 'ananla-un, 'en k'at le lhai hántilelh.

7 'Ilhone hinli whe ndai la dudzi be hukwa' huninzun huwa híta'alh, 'et 'ultsuk-i huwa hóo'alh. 'Aw 'et dantsi' be iloh k'us whuz hinilht'i huwa iloh. 'Et huwa mbe la hoont'i' whe huwa 'á'aih-un, 'en Yak'usda yuk'entsi'.

8 Yak'usda soo 'últus whe ndai la ye unzoo-i, 'i 'on nus 'ultsuk-i negha nántikulh. 'Et whe ndai la be ndunahdzit-i, 'i 'on 'un lhai tiht'elh. 'Et 'ut'en unzoo-i 'ulh'en-i, ts'iyaitsuk nohanus 'uniltsuk-i, 'i nohtl'anátikulh.

9 'Et khuni 'uk'eguz-i 'et ndutni,  
"Ndulcho whe dune la 'uja, tel'enne,

'enne cha bula 'uja.

Ye ts'ih'un un'a 'unt'oh-i, 'ilhiz wheni 'unt'oh."

10 'Et mbe la nogha íyunle-un, 'en 'on nus lhai úncha nohghale. 'Et whe la nohe'ut'en ts'ih'un un'a 'unt'oh-i, 'i 'on nus lhai tileh.

11 'Et ndúwhulcho whe soo dah'a 'et whe ndet whe la lhts'u nahzoo-un, 'i be 'onghohne buts'un nohla hoonli. 'Et whe Yak'usda musi ts'utni.

12 'Et dahoot'oh huwa nohsooneya gha noh'e'ut'en be ne'ut'enne ahli, 'et whe Yak'usda ooch'e' online huye ndunidzit-i buba soo' yunoltsuk. 'I gha la lhane Yak'usda ts'un tube cho musi ts'utni.

13 'Ink'ez ndet whe la 'uyoonne noh'e'ut'en k'oh whe whubuntalhtun, 'i be, 'et ndúwhulcho whe 'onghohne Yak'usda 'on nus buba whudálhti'. Christ ooghuni unzoo-i daja dahni-un, 'et za hukw'úne' aht'en. 'Et huwa nohla hoonli whe Jerusalem whut'enne, 'enne bula aht'en, 'ink'ez n'un whut'enne, 'enne cha bula ahja.

14 Yak'usda ye unzoo-i, hóont'i' whe nohyé dan'ai-i, 'et huwa nohk'e ni hinli 'ink'ez nohba tenahududli.

15 Ndi Yak'usda 'ants'i negha óonin'ai-un, unzoo k'et, 'aw uzdooni' ait'oh. 'Inka tube cho musi ts'utni.

## 10

### *Ndai la be lhts'ugan-i, 'aw ndi yun k'ut whuts'u haínzut-i, 'i iloh 'unt'oh*

1 'Et 'awet Si Paul nohghu tédusdli. Nts'en'a la Christ ye yo 'ududaldzin-i, 'ink'ez yé soo ne'ust'en-i, 'i be' dusni. Nts'en'a la dast'oh whe nohtoh susda' da, 'aw lhoogh-un lhúsdloh. 'Et hoontsi' lhe'hutni, nohch'oh 'ust'oh te, 'et nohélhooosjoh.

2 'Et nts'en'a la neyust'e whuts'u nint'i hukw'un'a, 'et whuz un'a za 'uts'ut'en huninzun. 'Et nohtoh ndunt'ohne, wheóonujut whe bubut nenátisdalh. 'Et huwa nohts'u te'dusdli ndet nohbulh 'ust'oh de, 'aw nohts'un lhootásjoh hukwa lhe'núszun whulohne za buts'un lhootásjoh.

3 'Et ndi yun k'ut uzdilhts'i-un, neyust'e whuts'u nint'i whuz un'a iloh nuts'íya.

4 Nulh'en ndai la be lhts'ugan-i, 'aw ndi yun k'ut whuts'u haínzut-i, 'i iloh 'unt'oh. 'Et Yak'usda be ts'ílhuts-i, 'i be lhts'ugan-i 'unt'oh. 'Et whe ndai la be néch'az whuditni-i, 'i ts'iyawh náninizyuz.

5 Ndet la lhtoh 'alghoh howa yahalhduk-un, 'i cha ts'iyawh hooloh whé nilhtsi. Ndai la Yak'usda ye whunih-i, 'i cha huyando 'oot'e' hukwa' hut'en, 'i cha ts'iyawh hooloh yutilhtselh. 'Ink'ez daja huninzun-un, 'et cha nahuhootálhchulh, 'et whe Christ hik'oh ts'e nuni hunoozut.

6 'Et 'awet ndai la ts'iyantsuk hukw'u ne'zacht'en de, 'et de mbene la hukw'ú nulhe'it'elne, wheni 'enne ts'iyantsuk whe dzoh notideh-un bugha ts'óta'alh.

*Wheni cha Christ ooch'e'ne 'uts'int'oh*

<sup>7</sup> Hadi' njan 'et nohba dáhoont'oh? Ndet hooh'en, 'et za eh whunulh'en? Mbene la Christ ooch'e'ne na'dunúdzunne, dáhoont'oh whe Christ ooch'e'ne 'uhint'oh, 'et whuz un'a za, wheni cha Christ ooch'e'ne 'uts'int'oh. 'Et cha soo cho howu nuní hunoozut!

<sup>8</sup> 'Et neMoodihti dune an ndo 'uts'int'oh-un negha óonin'ai, 'i be ulhtus nohuztilhtselh, 'aw musai tihleh k'un'a iloh unohts'uleh. Ndet la negha óonin'ai-un, óont'e' be howu yasduk, 'et 'aw hukwa yálhusdloh.

<sup>9</sup> Njan ndunóh dusni-un, 'aw 'et whe nohwhe'oonusjoot iloh whe' dusni.

<sup>10</sup> Njan 'et huwa ndiz un'a nja dudúzni, whulohne hutni, "Ndi Paul 'udustl'us 'uk'oneyuzguz-i tube be óonujut 'ink'ez ulhtus. 'Et hoonts'i netoh usda te, ooyust'e tetsun 'ink'ez ndai la ye yalhdúk-i 'ants'i 'unt'oh," hutni.

<sup>11</sup> 'Et hoonts'i mbe la 'et ndiz un'a howu yalhdúkne, soo cho howu nihotan, ndi ne-e'dustl'us, 'i be nts'en'a la neghuni daja ni, 'et nkede la wheni nohtoh 'uts'int'oh de, whuz un'a uzit'elh.

### *Ndai 'ut'en negha ínin'ai, 'i za 'uts'oolh'en huba' hoont'oh*

<sup>12</sup> 'Et whulohne didutch'oh ts'ih'un dune na'hududútni. 'Et huwa 'aw wheni ndúlhts'udoosih. Didutch'oh dutoh dahínt'oh la 'et 'enne buk'un'a nullé'ts'oost'en. 'Et hoonts'i mbene la didutch'oh dutoh duba na'udzoo'ne, 'et ndunt'ohne 'aw huwhunih iloh whe' hint'oh.

<sup>13</sup> 'Et wheni ndai la 'ut'en Yak'usda neba yoozi-i, 'i ts'uhóont'i' whe howu yats'ulhdúk. 'Et ndi 'ut'en neba yoozi-i, nohni soo nohbulh 'utni. 'Et 'uyoo 'ut'en ooghu yats'oolhdúk huba lhe'hóot'oh.

<sup>14</sup> 'Et ndet whuts'un neba hoozi-un, 'et whan 'un ha' ts'oot'en ait'oh. 'Et huwa nohni cha Christ ooghuni unzoo-i, 'i bulh nohghuznindil.

<sup>15</sup> 'Ink'ez 'uyoonne dune Yak'usda 'ut'en buba yoozi-i 'aw 'uts'óont'e' whe ooghu yats'oolhdúk ait'oh. 'Et nkede 'uwhutánehl whe nohba 'alha' 'unt'oh-i, 'on nus 'ulcho nohba tileh, 'et de wheni cha nohtoh 'on nus nohba ts'íncha tileh. Ndai la 'ut'en neba yoozi-i 'et whe nohni nohba ts'íncha tileh.

<sup>16</sup> 'Et whe la nohan 'awh ho khuni unzoo-i be yats'oolhdúk. 'Ink'ez 'uyoonne 'ut'en buba yoozi-i 'et cha 'aw 'uts'óont'e' be 'oh ho yats'oolhdúk ait'oh.

<sup>17</sup> 'Et hoonts'i mbene la 'ududálti'ne, 'enne neMoodihti, 'en be 'ududólti' huba' hoont'oh.

<sup>18</sup> 'Et mbe la dich'oh duba na'hoodudzi, 'et ndunt'ohne, 'enne 'aw soo huyulh nelhuhoo'al inle'ne. Mbe la neMoodihti yoozi-un, 'en za 'ódzilh huba' hoont'oh.

## 11

### *Paul bughu ni unli*

<sup>1</sup> Ndi khuni 'ants'i 'oh be neyasduk nuhzun la, 'et huwa 'atsulyaz nducha 'on 'unle sgha óonah'aih. 'Ink'ez 'alha' 'i be whuz un'a soo zúlhts'ai.

<sup>2</sup> 'Et Yak'usda be 'oonih, 'i be si cha nohba 'ooznih. Nohba nahizúsyá 'ilhoghun dune ooghu tíhdalh, Christ 'en 'unt'oh. Nohni sak'usda nohtsun hoolohne le'aht'oh whe Christ gha nóhnusdla.

<sup>3</sup> 'Et hoonts'i 'oh da' nyoo t'l'ughus ye 'uts'un uninzun-i, 'i be nts'en'a la Eve yunan'a, 'et whenuzjut nohni cha 'et whuz un'a noheni ninta' itáll'elh. 'Et ndúhooja de, 'et de noheni Christ ts'un 'aw 'ilho oole' ait'oh.

<sup>4</sup> 'Ink'ez lhe'ahja nulh'en, 'ilhoghun dune nohghun ninya whe 'uyoon Sizi ghun nohbulh yalhdúk, 'aw 'en whuz un'a Sizi nohyulh yalhts'ilhdih. K'us 'uyoo 'uyughi úlhchoot de, 'aw wheni neghá iloh úlhchoot. K'us 'uyoo khuni

unzoo-i úlhchoot de, 'aw wheni neghá iloh úlhchoot. 'Et 'alha' hoont'oh nahzún eh?

### *Whel'a' na'dudil'ine*

<sup>5</sup> 'Ink'ez ndunne whel'a' nchane, 'aw buba nyo lhe'ust'oh na'dunusdzun.

<sup>6</sup> 'Et yasduk-un t'oonuzúszun 'et hoonts'i lhat-un t'éoonuszun whe 'ust'oh. 'Ink'ez ts'iyantsuk t'éoonóhzun nohzúsi.

<sup>7</sup> Yak'usda ooghuni unzoo-i 'aw 'uk'elha iloh bé nohbulh yasduk. Te'duduz'en 'et whe 'i be nchane tihle. 'I be lubeshi úshchoot nahzun eh?

<sup>8</sup> 'Uyoonne Yak'usda ba 'ilhozdilne' enne buzooneya sba 'uk'elha hohoolh'i. 'Et hoonts'i bughi ndunust'ih le'ust'en, 'et nohni nohba ne'úst'en whutoh.

<sup>9</sup> 'Oh da' nohtoh susda whe hoonliyaz be ts'uwhuzdoh-i, 'et hoonts'i 'aw nohts'u de' lhuzusnih. 'Et sulhutsinke Macedonia ts'e hahándil whe ts'iyaitsuk be sla' hit'en. 'Et huwa nohts'u de' dusni-un whuch'a' duduzdzun. 'Et whuz un'a za ndutist'elh nduwhulyiz whe.

<sup>10</sup> Christ khuni yé 'alha' 'unt'oh-i, 'i be dúsbun. 'Et huwa njan Achaia yun k'ut ndulcho whe ndai la bé oonust'e-i, 'aw 'etsul 'udósnih ait'oh.

<sup>11</sup> Di ha nja dudúsní? 'Aw nohk'elhúsi' nahzún tilah? 'Et hoonts'i Yak'usda t'éoonínzun.

<sup>12</sup> Ndai la 'ut'en 'us'en-i, 'i k'elha nohts'u dé' doosni' ait'oh, whuz un'a za 'et ndutist'elh. 'Et whe la nyoonne wheni nek'un'a huhóolhdzih hukwa' hut'enne 'ink'ez 'óont'e' be howu yahulhduk de, 'et soo 'etsul 'ahudutánelh ubutiselh.

<sup>13</sup> 'Et ndunt'ohne 'aw ts'ih'un whel'a'ne iloh 'uhint'oh. Dich'oh dude 'ut'en k'oh hukw'un'a 'uyoonne nahuna'ah. Christ whel'a'ne buk'un'a na'hududil'i.

<sup>14</sup> Khun te nohba hooncha oole' junih! Satan 'en lizas be hoot'en-un na'dudil'i 'et huwa.

<sup>15</sup> 'Et huwa mbene la yula 'ut'enne, 'enne dich'oh mbene la ts'ih'un un'a ne'út'enne na'hududil'i. 'Et hoonts'i 'aw lhuhóocha-un 'uhoont'oh. 'Et ndut'enne dich'oh bube 'ut'en k'oh hukw'un'a buba k'elha whatáleh!

### *Si whusni-un usdli noohzin junih*

<sup>16</sup> 'Et doo cha za nohdusni, 'aw dune whusni-un 'unt'oh sonózin junih. 'Et hoonts'i whuz un'a za 'unahzun de, whute, whusni k'un'a nesúnulhti 'et whe hoot'un-unyaz 'óont'e' be yatisduk.

<sup>17</sup> Daja nohdusni-un, 'aw neMoodihti yalhduk hukw'un'a iloh si yasduk. 'Ants'i whusnine k'un'a 'unohdusni. Sdzi hoonli whe óont'e' sghu diz'ai.

<sup>18</sup> Lhane ooyust'e ts'u nint'ine hukw'un'a 'óont'e' be yahalhduk. 'Et si cha whuz un'a óont'e' be 'et yatisduk.

<sup>19</sup> Noheni hoonli 'et hoonts'i ndunne dune 'aw lhe'hoot'oh k'un'a dune unline nohtoh hudilhts'i, 'et hoonts'i 'aw nohba dalhúhoot'oh.

<sup>20</sup> Lhe'aht'en, 'ilhoghun nohtoh usda whe de 'ustl'enne nohulhtsi, k'us 'ilhoghun nohúlhgooh, k'us 'ilhoghun ndai la aht'i-i nohghu yílhchoot, k'us 'ilhoghun nohtoh ncha na'dudulhtsi, k'us 'ilhoghun nohóonúkat, 'et ndúwhulcho nohba dalhúhoot'oh.

<sup>21</sup> Hukwaya usdli whe nohbulh yatisduk. 'Oh da' nohtoh úzdilhts'i da' 'ants'i tets'utsun lé'ts'int'oh. 'Et hoonts'i mbe la njan huwun lhoojoh-un, 'en ook'un'a, whuz un'a si cha lhóosjoh whe yatisduk.

### *Christ 'en ba dzoh nususzut-un*

<sup>22</sup> Ndunne Hebrew bughuni yalhdukne na'hududútni, 'et si cha 'ilhoghun 'ust'oh. Israel whudune'ne na'hududutni, 'et si cha 'ilhoghun 'ust'oh. Abraham oots'u haíndene na'hududútni, 'et si cha 'ilhoghun 'ust'oh.

<sup>23</sup> Nduinne Christ ba ne'ut'enne eh 'uhint'oh? 'Ants'i seni hooloh hukw'un'a yasduk, 'et hoonts'i si 'on nus 'ust'oh. Si 'on nus 'ut'en buba nus 'ultus 'i be 'ust'en. 'On nus lhat suhólhtsus k'et 'aw uzdooni' ait'oh. 'On nus lhat sch'az dá'dan'a', 'ink'ez k'us lhat-un whe 'ankw'us dasúsus.

<sup>24</sup> Nyoonne Lizwifne 'alghoh kwulat sts'o holhtsus. 'Ilhoh suhoolhtsas totsuk, tat whunizyat 'on 'at 'ilho hooloh stsé'hulhtsus.

<sup>25</sup> Tat tut'oh be suholht'o. 'Ilhoh tse be sozoolhghelh hukwa' sahalh'en. Tat ts'i sulh nádizghuz. 'Ilhoh ya too' k'ut lhlulcho nusúsdlat, 'ilhe 'úlhdis 'ink'ez 'ilhudzín.

<sup>26</sup> 'Ahoohlyiz lhen ts'u kédiszulh. 'Et 'ukoh cha tube sba whe whunujut. 'Undunut'íne 'enne buts'un sba howa óodli-un. Sulh didohne, 'enne hoonts'i, buts'u tse hoosli. 'Udun yun k'ut whut'enne, 'enne cha buts'u tse hoosli. Keyoh susda-un, 'et hoonts'i sba howa 'óodli. Dune hooloh-un susda de, 'et hoonts'i sba howa 'óodli. Ya too k'ut 'et cha sba howa óodli. 'Ink'ez mbene la sulh didowh na'dudil'íne, 'enne butoh cha sba howa 'óodli.

<sup>27</sup> 'Ut'en ulhtus-i be 'ust'en. 'Et huwa whuloh te tube nenúsi. Lhat 'aw lhústoh. Lhat sye'últ's'ilh 'ink'ez ta'óosda. Lhat-un whe sóo hoosnih, k'us lhat hukw'uz yo nusúsya dzoh 'et dune usdli whe.

<sup>28</sup> 'Aw 'et za iloh, nts'en'a la Yak'usda ba 'ilhunaoodúlhne bughusdli, 'et whe 'ants'i dutuszas le'ust'oh.

<sup>29</sup> 'Aw t'eoonuzázhun eh 'ilhoghun oodzi tetsun sulí' de, si cha sdzi tetsun lhih. 'Ink'ez mbe la nebulh dune 'onghohne lubeshi be nalts'uk le'ut'ihne 'et huwun huzúske 'ink'ez 'ants'i dusk'un le'ust'oh.

<sup>30</sup> Hoonli huwun ootást'e' de, 'et ndet la dast'oh whe tesun, 'et la whé 'ost'e'.

<sup>31</sup> Yak'usda, Sizi Gri 'en neMoodihti oobá, 'en za 'ilhiz wheni uzdílhí, 'en t'eoonínzun 'aw lhozusts'it.

<sup>32</sup> 'Et lerwe Aretas huyulhni-un, 'en ookeyoh Damascus huwhútni, 'et humoodih-un dune, 'en setálhchulh hukwa' nínzun.

<sup>33</sup> 'Et hoonts'i sih ghun dadint'az k'et, 'et chalhyal cho be súhalhti. 'Ink'ez nanásahalhlukw. 'Et whe oola k'éhanasja.

## 12

### *Yak'usda dune yunalhts'et hahón'ai-un*

<sup>1</sup> 'Alha ndi 'ududíti' khuni be yasduk-un, 'aw sba lhe'hóozoo' whe' dusnih. Ndet la neMoodihti bengahun newhúkat-un 'ink'ez ba be hódilts'ih-i, 'i ghun nohbulh yátisduk hukwa' nuszun.

<sup>2</sup> 'Ilhoghun Christ uniyalh-un, 'en t'enuszun. 'Et ndun 'oh da' whunizyat 'on 'at dit yus k'ut inle' whe 'en whulh tat-un yak'uz 'et 'ants'i khun be' dúzgooh le'uja. Ooyust'e bulh k'us ooyit, 'aw si t'éoonuzúszun, Yak'usda 'en t'éoonínzun.

<sup>3</sup> 'Et ndun 'en t'enuszun. Ooyust'e bulh k'us ooyit, 'aw si t'éoonuzúszun, Yak'usda 'en t'éoonínzun.

### *Yak'usda 'unt'oh whe wheni ts'iyai-i be k'enáneni'oh*

<sup>4</sup> K'us hoonzoo-un neltí lé'uja, 'et 'ants'i khun be' dúzgooh hukw'un'a 'unt'oh. 'Et whuts'un ndai la khuni 'aw ye yátoolhdih ait'oh, 'et whudánts'o. 'Aw ye yátílhduk-un yutí'alhúwhus'ai 'et huwa.

<sup>5</sup> 'Et ndunt'oh-un dune, 'en bé' 'oonust'e' whe ooghu yatisduk. 'Et hoonts'i 'aw se' 'ut'en k'oh huwa whe' 'oonust'e' k'un'a howu yaoosduk ait'oh. Ndet la dast'oh whe tesun, 'et za whe 'oonust'e' whe howu yasduk.



<sup>6</sup> 'Et be' 'oonúst'e'-un k'un'a yatisduk hukwa' nuszun de, 'et hoontsi' 'aw whuzusni tisdleh hukwa lhe'núszun. 'Et huwa ndai la khuni 'alha 'unt'oh-i, 'i gha za yatisduk. Ndi be' 'óotast'e' whuch'a whuz un'a 'utist'elh. Doo ka la n'awh dunene sonilh'en 'ink'ez sulhódits'o de, 'et whuz un'a za dune unli sostázin.

### *Satan ntsi'-un nududeh-un, 'en gha 'ust'en dzoh nuszut*

<sup>7</sup> 'Et njan ndet la senghun newhúkat-un, 'et whu la ndi 'ududutázi' whuch'a 'ink'ez ncha-un na'dudutizselh 'et whuch'a, 'et whu la gha ts'e whus cho soo dulhkaish le'ust'en. Satan ntsi'-un nududeh-un, 'en gha 'ust'en dzoh nuszut. 'Et whuz un'a 'aw 'ududózi' ait'oh.

<sup>8</sup> Tat neMoodihti oots'u tédisldi, khun la whus cho suhanaóokat.

<sup>9</sup> 'Ink'ez 'usúlhni, "Be úszoo-i 'awet 'i mba soo 'únt'oh. Be ústus-i, 'i be teinsun-i, 'i ts'iyawh lhaóoduja 'et huwa." 'Et huwa hoonúst'i' whe ndi be tesun-i, 'i gha 'et whe oonust'e'. 'Et whe la Christ ye ulhtus-i sulh 'óot'e'.

<sup>10</sup> 'Inka ndet suba teosun, 'ink'ez sghu hudloh, 'ink'ez hoonli sba howa whúlna', 'ink'ez ndet la dzoh nusahalhdzut, 'ink'ez hoontsi'-un sghá honinla, 'i ndi ts'iyawh 'alghoh Christ 'en gha sba 'uhóoja de, 'et de 'oonúst'e'. 'Et whuz un'a be tesun-i, 'i be ústus nadleh, 'et huwa hoonúst'i'.

### *Whel'a'ne bube 'ut'en k'oh-un*

<sup>11</sup> Nja whe 'oonust'e'-un, 'et 'i be whuzusni le'ust'oh. Nohni whuz sunulht'i 'et dósni ha. 'Et nohni nohgha buba na'óodudosdzi' huba' hoont'oh. Nyoonne whél'a' nchane, 'aw hoonliyaz whe buk'elh'ih lhe'úst'oh, 'ants'i 'ust'oh 'et hoontsi'.

<sup>12</sup> 'Et 'alha ndai la whél'a'-un be whe hóodal'en-i, 'i ts'iyawh si sgha lhawhúdin't'oh nohba whuzúsi. Dzoh nusuzut-un whulh súsyin, 'ink'ez huwa ít'en-un cha, 'ink'ez hooncha túne' zust'en cha, hoolhtus-un cha túne' 'ust'en, 'et ts'iyawh nohtoh huwhúsdla.

<sup>13</sup> 'Onghohne Yak'usda ba 'ilhunaosdilne, nohni nts'en'a hukw'e'ih utiht'elh? 'Et 'aw hoonli nohts'e 'úkalhe'duzusnih. 'Et huwa eh ninta' ust'ih nahzún eh? Ndi dai la 'uts'un un'a be ne'zust'en-i, 'et ts'iyawh sba whu-nawhudoollhnoh!

### *Dahoont'oh huwa buk'entsi'*

<sup>14</sup> 'Et 'awet lházduja whe whulh tat nohts'u nátisdalh. 'Aw ndai la aht'i ookwa' lhe'núszun, nohni za nohka' nuszun. 'Et huwa nohts'u dátiso ha íloh. 'Et ts'oodunne 'aw dudusneke ubonoolhyeh huba lhe'hóot'oh. K'us budusneke duzkeh 'enne ubonoolhyeh huba' hoont'oh.

<sup>15</sup> 'Ink'ez 'uk'enus be nohk'esi', nohni hukw'e'ih sk'ehtsi' 'et hoontsi' sba 'uts'un un'a lhe'hóot'oh. Nohzul 'i ba hoonúst'i' whe ookw'elha whutiselh. Be khusna-i, 'i hóontsi' kw'elhá yutiselh.

<sup>16</sup> Nts'oh dája nahzun 'et hoontsi' hoonliyaz whe nohch'a nulhé'zust'en, nohni'oh t'éoonúhzun. 'Et hoontsi' lhe'usja, nunúz'i'-un hukw'un'a whuts'it bulh nohúschoot lé'usja.

<sup>17</sup> Mbe la nohts'ú whes'aihne, 'enne bugha 'et whe nohgha há' dunust'ah nahzun t'lah?

<sup>18</sup> 'Et Titus khuni ulhtus-i be dásni' whe ndun neulhutsin 'en bulh nohts'ó wehis'a'. 'En cha eh nohgha há' dunit'ah? 'Awundooh! Ts'uhóont'i' whe lhgha za whe nohtoh 'uts'ut'en? Lhk'un'a za eh uzdit'us? A!

<sup>19</sup> 'Et doo cha za nohoodutaskut, wheni nohts'u k'úzdutitnelh nahzun eh? 'Awundooh! Yak'usda nalh Christ 'en gha nja duts'útni, ook'entsi'ne ndai la

hoonliyaz nohtoh 'uts'alh'en-i, 'et ndúwhulcho whe nohni za nohba ts'tit'en. 'Et whe la nus za lhé'tilhtus whe nohba ts'ut'en.

<sup>20</sup> 'Et tube whesaz whe doo cha za nohts'u nátisdalh. 'Et khun 'et dsja de, 'et si ndiz un'a tilah nahós'alh. 'Et ndet la nohts'o húkwa' nuszun, 'et 'aw whuz un'a tilah lhe'zoohe. 'Ink'ez 'et whuz un'a nohni cha sts'o hukwa' nahzun-un, 'aw whuz un'a lhe'ust'oh-un tilah nahóh'alh. Nohghu nusya de, 'et ndiz un'a tilah 'ooht'e', ts'iyawh lhedáhdulh 'ink'ez lhghe' 'oolhni. 'Et khun lhulh húnulhch'oh 'ink'ez lhch'az nedáhdulh. Lahoot'oh whe lhch'á nedahni'. Ts'iyawh lhghune' dahni'. Nchane na'dudulh'i 'ink'ez ts'iyantsuk hoontsi'-un nohba lht'a'whúnt'en.

<sup>21</sup> 'Inka whesaz whe doo cha za nohts'u natisdadh. K'us lhane nohtoh lubeshi 'uhínla tilah. Lhe'hóozoo' tune' hut'en. Dune ts'eke bulh ninta' hunt'en 'et whe lubeshi 'uhinla. 'Ink'ez lubeshi dutsun-i 'uhulh'en. 'Et 'awhuz tilah budzi k'oh nalhe'huyilel. 'Et whuz un'a 'et ndúhoont'oh de, 'et howa sdzi yo útinelh 'ink'ez howu ni tisdleh. 'Enne bugha Yak'usda 'et whe yo úsutilelh.

## 13

*Paul buba ndo 'unt'oh-un, Yak'usda yutl'ahón'ai*

<sup>1</sup> 'Et njan 'awet whulh tat nohts'u nátisdalh. Nane k'us tane 'enne bunalh ne'whut'en, ts'iyantsuk nohni nohtoh, ndai la be 'uk'ehoot'aih-i, 'enne bughuni gha ts'iyantsuk lhaóodutanelh.

<sup>2</sup> 'Whutso da' njan nohdasni'-un whusdloh 'et hoonts'i nohzih susda hukw'un'a whulh nat nohts'o k'e'usges 'ink'ez nanohdúsní, mbene la lubeshi 'alh'en 'ink'ez 'onghohne tubulh nanohdúsní whe dzoh notizut-un, 'aw hukw'ut dodóya' ait'oh whe' hoont'oh.

<sup>3</sup> Si sgha Christ yalhduk t'ewhúntázhin, 'et huwa nohni si soo zúlhts'ai. 'Inka whuz un'a nohdásni'. 'Ink'ez 'alha 'en 'unt'oh nohts'u telhítsun, 'ink'ez nohtoh 'uk'enus úlhtus-un 'unt'oh.

<sup>4</sup> 'Et Christ 'en ye tésutsit-i whe tulalghus k'ehúyilhti, 'et hoonts'i Yak'usda yé ulhtus-i, 'i gha khuna. 'Ink'ez wheni cha, 'et whuz un'a za ooyuzdúltis'i hoonts'i tets'utsun. 'Et hoonts'i ndi Yak'usda yé ulhtus nohbulh 'uhoont'oh-un, 'et whe ts'ukhuna. 'Et whe Christ 'en bulh ts'ótinalh.

<sup>5</sup> Na'ooduzúlhdzih! Ndi bé 'alha' hoont'oh-i, 'i bulh áht'oh k'us ooyit áht'oh, 'et 'i be nohnich'oh whuná'dunulhtun. Sizi Gri nohyó 'unt'oh, 'aw t'éoonuzázhun eh? 'Aw soo cho t'éoonuzázhun de, 'et de 'et tilah n'ún tizkatne ahli.

<sup>6</sup> 'Et hoonts'i 'aw n'ún tizkatne 'aw 'enne iloh 'uts'int'oh. Soo cho nducha t'éoonázhun.

*Nohni soo ts'ih'un un'a lhadínt'ohne tihle, 'et whuz un'a nohba tenazudli*

<sup>7</sup> 'Et hoonts'i hoonts'i-un 'utiht'elh, 'et whuch'a, Yak'usda ts'un nohba tenadusdli. 'Aw nohba nats'oodududzi hukw'un'a iloh tenadusdli. 'Et hoonts'i nohni hoonzoo k'oh ts'e 'utiht'elh, 'et whuz un'a nohba tenadusdli, 'et hoonts'i 'ants'i 'ún tizkatne hukw'un'a nohba 'uts'int'oh tilah.

<sup>8</sup> 'Et ndi khuni 'alha' 'unt'oh-i, 'aw be ts'ílhtus-i lhts'ít'ih whe oodulhyoh uzdooni' ait'oh. Be ts'ílhtus-i ts'ut'i be ts'ih'un uzdutinelh huba za' hoont'oh.

<sup>9</sup> 'Et wheni tets'utsun 'ink'ez nohni ulhtusne ahli de, wheni 'on nus ts'uhóont'i'. 'Ink'ez soo ts'ih'un un'a lhadínt'ohne tihle, 'et whuz un'a nohba tenazudli.

<sup>10</sup> 'Et huwa nohch'oh 'úst'oh whe whuz un'a nohts'ó k'e'isguz. 'Et whuz un'a nohbulh 'úst'oh de, ndet whe la dune an ndo 'ust'oh 'et neMoodihti sgha

óonin'ai, 'i be 'aw nohdách'e ne'doosni' ait'oh. Ndi be 'udedo 'ust'oh, 'i be 'onus Yak'usda ba ulhtus tihle. 'I 'aw be nóhundosda' ait'oh.

*Nohbulh 'úhot'e'-un*

<sup>11</sup> Sulhutsinke soo 'udek'ez nohdusni. Whunólhni! Soo ts'ih'un un'a lhadulyane tihleh. Yak'usda k'enaínin'ane tihleh. 'Ilho za noheni tileh. Whudizghel-i, 'i be ndi yun k'ut dúlhts'i. 'Ink'ez Yak'usda, mbe la nek'entsi-un 'ink'ez nedzi bé dizghel-i negha ínin'ai-un, 'en nohbulh 'óot'e'.

<sup>12</sup> 'Et lubeshi ooghu hooloh-i be nalhudahts'oos.

<sup>13</sup> Yak'usda ooch'e'ne nezih dilhts'ine, 'enne cha ts'iyawh hadih nohuhútni.

<sup>14</sup> Sizi Gri neMoodihti ye unzoo-i, 'ink'ez Yak'usda ye nek'entsi-i cha, 'ink'ez Ndoni bulh 'ilhoh ts'indli-un, 'et 'i ts'iyawh nohbulh 'úhot'e'. 'Et ndo honeh.

## Paul, Galatia Whut'enne Buts'ó K'eyanguz-i

*Yak'usda ba 'ilhunaoodulhne, Galatia yun k'ut dilhts'ine, 'enne Paul hadih ubulhni*

<sup>1</sup> Si Paul whel'a-un usdli. 'Aw dunene, 'enne bugha iloh 'usja, k'us 'ilhoghun dune za iloh gha 'usja. 'Et hoonts'i Sizi Gri 'ink'ez Yak'usda neBá, 'en 'unt'oh Sizi yaidlanne butoh dunaidilhti, 'ink'ez 'en gha whel'a-un 'ust'oh.

<sup>2</sup> 'Ink'ez neulhutsinke mbene la szih dilhts'ine, 'enne ts'iyawh nohni yun k'ut Galatia ts'e Yak'usda ba 'ilhunaoodulhne ahli, nohni ts'iyawh hadih nohts'utni.

<sup>3</sup> Yak'usda neBá 'ink'ez Sizi Gri neMoodihti, 'en ye unzoo-i 'ink'ez nohdzi dingel-un, nohgha óonin'ai, 'i ts'iyawh 'i bulh 'óoht'e'.

<sup>4</sup> 'En 'uja nelubeshi gha huwa' dudulti. 'Et whe ndi yun k'ut ntsi-i yuch'a naneuzdla. Yak'usda neBá, 'et whuz un'a hukwa' ninzun.

<sup>5</sup> 'Ilhiz wheni ooba ts'odílhti', 'et ndo honeh.

*'Aw 'uyoo khuni unzoo-i hooloh*

<sup>6</sup> Tube sba hooncha whe aht'en. Christ ye unzoo-i, 'i be dutihjih ha nohka' dani, 'et hoonts'i 'en 'ahoh ooch'az násulhya 'ink'ez 'uyoo khuni unzoo-i nahzun, 'i ts'u násulhya.

<sup>7</sup> 'Et hoonts'i 'aw 'uyoo khuni unzoo-i hooloh. Whulohne dune nohba lhtanahuhólelh hukwa' hut'en. Christ ooghuni unzoo-i 'uts'un un'a nohba na'huyooleh hukwa' hut'en.

<sup>8</sup> 'Et hoonts'i wheni k'us yak'uz whulizas 'en hoonts'i, ndi khuni unzoo-i nohts'udani' 'ink'ez doo cha za ndai la 'uts'un un'a 'unt'oh-i, 'i be nohbulh yats'ulhduk de, 'et de mbe hoonts'i 'utni-un, Yak'usda hoontsi' ts'e yulh ni untizulh.

<sup>9</sup> Nts'en'a la nohts'udáni', 'et doo cha za nohts'utni, ndi khuni unzoo-i 'uda' ulhchoot, 'ink'ez mbe la 'uts'un un'a nohulhni de, mbe hoonts'i 'utni-un, Yak'usda hoontsi' ts'e yulh ni untizulh.

<sup>10</sup> Daja nuhzun? Yak'usda tilah k'us dune tilah ba whudósti'? Soo cho whunulh'en, dune ba uszoo na'duduz'i de, 'et de Christ be 'ulhna-un tisdleh, 'aw oosdle' ait'oh.

*Yak'usda 'utahásalhti 'en ba whel'a-un tisdleh*

<sup>11</sup> 'Et sulhutsinke njan nohdúsní' t'eeonóhzin ha ndi khuni unzoo-i be nohbulh yasduk, 'aw dune ghuni be lhe'duzusnih.

<sup>12</sup> 'Et 'aw ndi dune ts'un uschoot iloh, 'ink'ez 'aw dune whusodalh'e' cha iloh, Sizi Gri 'en whusunilhtan.

<sup>13</sup> 'Et 'oh da' nts'en'a la si lizwifne bube 'ut'en k'oh-un huwasna inle', 'et ts'iyawh whulh 'udahts'o. Yak'usda ba 'ilhunaoodulhne, 'enne tube dzoh nubusdeh 'ink'ez musai ubooselh hukwa' 'ust'en.

<sup>14</sup> 'Ink'ez stso da'ne dahánt'e' la 'et ts'iyawh soo cho hostun hukwa' 'ist'en. 'Et whe la ndi lizwifne bube 'ut'en k'oh-un huwun, ndunne sulh didowhne, mbene la sundult'ohne, 'et hoonts'i ts'iyawh buba nus unzoo-un susdli'.

<sup>15</sup> 'Et 'awhuz chadusda da', 'et Yak'usda ba hoonzoo whe 'utahasálhti 'ink'ez ye unzoo-i be dutisjida ha ska' dani',

<sup>16</sup> 'ink'ez duYe' yusunilhtan. 'Et la 'en ghun 'udun yun k'ut whut'enne, 'enne ndi khuni unzoo-i be bubulh yátisduk ha. 'Et 'oh da' sulh 'et dúhooja whe 'et 'awhuz huwu yalhtúzusdih whe

<sup>17</sup>ndo Jerusalem ts'e hoonts'i lhtúsyal whe ndunne, mbene la stso whel'a' unline, 'enne bubulh yalhusdih. 'Et hoonts'i yun k'ut Arabia whuz nususya. 'Et hukw'elh'az doo cha za keyoh Damascus ts'e naozusja.

*Nts'en'a la dat'en keyoh whuti Jerusalem ts'e*

<sup>18</sup>'Et tat yus k'ut hukw'elh'az, 'et ndo Jerusalem ts'e whesya. Peter 'en oozih tisdalh hukwa' nuszun 'ink'ez whunizyat 'on 'at kwulat dzin oozih usda.

<sup>19</sup>'Et 'onghohne whel'a'ne, 'enne 'aw lhubus'el. NeMoodihti bulhutsin James, 'en za us'en.

<sup>20</sup>'Ink'ez ndi nohts'o k'esges-i, Yak'usda nalh 'unohdúsní, 'aw lhozusts'it.

<sup>21</sup>'Ink'ez 'et hukw'elh'az yun k'ut Syria 'ink'ez Cilicia, n'oh ho nususya.

<sup>22</sup>'Et Judea yun k'ut ts'e, mbene la Christ ba 'ilhunaoodulhne, 'enne 'awhuz sulh lhuhs'en.

<sup>23</sup>'Ants'i sulh 'uhudants'o. Ndiz un'a hodants'o, "Ndun mbe la 'oh da dzoh neunulhdzut inle'-un, 'en 'awet ndi be 'alha' hoont'oh-i ghun, ts'iyanne khuni unzoo-i be bubulh yalhduk sulí, 'uda' musai yoolhtselh hukwa' yalh'en hoonts'i."

<sup>24</sup>'Ink'ez si sgha Yak'usda hudílhti'.

## 2

*Khuni unzoo-i soo ts'ih'un un'a ooghu yaoolhduk*

<sup>1</sup>'Et whunizyat 'on 'at dit yus k'ut hukw'elh'az, Barnabas bulh doo cha ndo Jerusalem ts'e natit'az. Titus 'en cha uschoot 'ink'ez nebulh tizya.

<sup>2</sup>Senghun ne'whulsts'ut-un, 'et huwa doo cha za Jerusalem ts'e nunásusja whe Jerusalem whut'enne whunilhchoh 'ubudásni'. Nts'en'a la ndi khuni unzoo-i, 'i be ndunne 'udun yun k'ut whut'enne bubulh yasduk, 'et whunilhchoh 'ubudásni'. 'Ink'ez mbene la nchane unline, 'enne whu'iz 'et bubulh yasduk. 'Et whe 'aw 'ants'et lhe'úst'el whuzdli'.

<sup>3</sup>'Et hoonts'i Titus, mbe la sulh 'ut'en-un, 'en Greek whut'en-un unli, 'et hoonts'i 'aw yuka dune unli-i hitit'us whuts'un lhehinilht'i.

<sup>4</sup>Ndiz un'a nja dúhooja, whulohne, 'enne neulhutsinke na'hududil'i. 'Enne nunút'i' be netaboníla. Neghu hoole' ha dats'int'oh whe dune ts'inli. Dáhoont'oh Sizi Gri 'ants'i nek'una'an'oh ne'le'neyinla. Wheni doo cha za Moses be 'udust'us k'ut 'i be 'ulhnane nehoolhtselh hukwa' hut'en.

<sup>5</sup>'Et hoonts'i ndunt'ohne 'aw 'ilhoh sadzi ook'oh whuntát'oh 'et hoonts'i butl'a' dudooztelh ait'oh. 'Et whe la ndi khuni unzoo-i be 'alha' hoont'oh-i, 'i be whuz un'a za 'ooh't'e'.

<sup>6</sup>'Et ndunne nchane unli buts'utni, 'enne lhgha za ubunus'en. Mbene hinli dahint'oh, 'et hoonts'i sba dalhúhit'oh. Yak'usda nalh lhgha za' ts'int'oh 'et huwa.

<sup>7</sup>'Et hoonts'i nts'en'a la Peter ndi khuni unzoo-i yutl'aidan'ai whe 'i be yuka dune unli-i k'ut huyzot'usne, 'enne bubulh yatilhduk ha, 'et whuz un'a si cha ndi khuni unzoo-i stl'aidan'ai. 'I be 'udun yun k'ut whut'enne bubulh yaóosduk ha. Mbe la ndunne nchane, 'enne ts'iyawh ts'ih'un un'a t'ehonanzin.

<sup>8</sup>Nts'en'a Yak'usda Peter lizwifne buba whel'a'-un yulhtsi, 'et whuz un'a si cha 'udun yun k'ut whut'enne buba whel'a'-un sulhtsi 'et huwa.

<sup>9</sup>Inka James, Cephas, 'ink'ez John, 'enne buts'utni keyoh whuduchun unline, 'enne ndi ndai la ye unzoo-un 'et stl'ahón'ai, 'et ts'ih'un un'a t'ehonanzin, 'et de Barnabas 'ink'ez si cha 'et huwa nela nahúz'ai. 'Et whuz un'a ts'iyanne whúbznilhtan, wheni 'ink'ez James, Cephas 'ink'ez John te lhulh 'uts'int'oh

za búznidulh. Wheni 'udun yun k'ut whut'enne buts'úztidulh, 'ink'ez 'enne Lizwifne buts'u hutidulh.

<sup>10</sup> Mbe la tel'enne, 'enne 'aw bunalh ts'odulhnoh'et whuz un'a za hukwa' huninzun. 'Et si cha whuz un'a za hukwa' nuszun.

*Moses be 'udustl'us 'aw doo cha ook'une' ts'oot'en huba lhe'hóot'oh*

<sup>11</sup> 'Et Peter 'oh da' keyoh Antioch nusiya whe 'uts'un un'a 'uja. 'Et huwa soo oonin ts'e dásni'.

<sup>12</sup> 'Et ndiz un'a nja duhooja, whulohne James yulh 'ut'enne, 'enne keyoh Antioch nehútidulh whutso, Peter, 'en 'udun yun k'ut whut'enne 'ahoolhiz bula 'á'alh. 'Et hoonts'i James yulh 'ut'enne whusahándil whe, 'et Peter buch'a nasja. Nduhne Lizwifne bube nuljut 'et huwa.

<sup>13</sup> 'Ink'ez 'onghohne Lizwifne, duba na'udzoo'ne whe 'enne cha Peter bulh buch'a nahusdil. 'Ink'ez Barnabas, 'en hoonts'i, hinalh nduhút'en 'ink'ez 'en cha bubundul'en suli'.

<sup>14</sup> Ndi khuni unzoo-i 'alha' 'unt'oh-i, 'i daja ni la, ndunne Lizwifne 'aw ts'ih'un hik'únulhe'ust'en. 'Et nawhus'ai whe, ts'iyanne nalh 'et hukwa Peter nja dúdusni, "Nyun Lizwif 'int'oh 'et hoonts'i 'udun yun k'ut whut'enne k'un'a ndi yun k'ut inda'. 'Ink'ez di ha 'udun yun k'ut whut'enne Lizwif k'un'a dune hoole' hukwa' bilh'en?

<sup>15</sup> Wheni Lizwif ts'inli whe ts'uwhezdi. 'Aw 'udun yun k'ut whut'enne k'un'a lhe'ts'ít'oh.

<sup>16</sup> Moses be 'udustl'us 'i gha za 'uts'ut'en de, 'aw ts'ih'un dune lhts'iloh. Sizi Gri neba 'alha' 'unt'oh 'et huwa ts'ih'un dune ts'inli 'et t'ets'oninzun. 'Ink'ez Sizi Gri 'en neba 'alha' 'unt'oh-un unli 'et whe la njan Christ neba 'alha' 'unt'oh-un, 'et 'i be ts'ih'un dune ts'uzdli'. Moses be 'udustl'us k'une' ts'ut'en de, 'aw 'et huwa iloh ts'ih'un dune ts'uzdli'. Moses be 'udustl'us k'une' 'ut'enne, 'aw 'ilhoghun hoonts'i ts'ih'un un'a lhe'inel 'et huwa.

<sup>17</sup> Wheni Lizwifne, Christ 'en be ts'ih'un 'unt'ohne ts'ooole' 'et za hukwa' 'uzninzun de, 'et hoonts'i lubeshi 'ulh'enne ts'inli, 'et whuz un'a nats'uhoon'ai de, Christ 'en cha eh lubeshi ts'u nóhnihlt'i unli? Nts'en'a 'uwhtat'elh? 'Aw 'uhót'e' ait'oh!

<sup>18</sup> 'Et ndi Moses be 'udustl'us k'ut 'udun nenúsdla 'ink'ez doo cha za náschoot 'ink'ez ook'une' tist'en de, 'et de khuni k'unusyuz whe' tiselh.

<sup>19</sup> Moses be 'udustl'us k'ut, 'ants'i whulh dasúsaí le'ust'oh, 'aw 'on 'at ook'únulhe'tuzist'el 'et huwa. 'Et whuz un'a Yak'usda ba khusna za' tist'elh.

<sup>20</sup> Christ tulalhgus k'ut bulh dasúsaí le'ust'oh, 'et 'aw 'on 'un lhuhúsnoh le'ust'oh, 'et hoonts'i Christ syudinda. 'Ink'ez ye khuna-i, 'i be khusna. Yak'usda ooYe' sba 'alha' 'unt'oh-un, 'et 'i gha ndi yun k'ut khusna. 'En 'uja sk'ents'i k'et sba whutl'a' dudilti.

<sup>21</sup> 'Aw Yak'usda ye unzoo-i 'aw 'udun neos'alh ait'oh! 'Alha Moses be 'udustl'us k'ut, 'i be ts'ih'un dune ts'ooole' ait'oh. 'Et whuz un'a 'uhoont'oh de, 'et Christ 'ants'et whe neba dazsai le'whutat'elh,' Peter 'et ndudúsní.

### 3

*Be 'alha' hoont'oh-i, 'i be za Yak'usda nalh ts'ih'un dune ts'uzdli'*

<sup>1</sup> Nohni Galatia whut'enne whuzahni! Mbe duyun-un nist'i whe nohnan'a ndi khuni 'alha' 'unt'oh-i ook'unulhé'zooh't'en ha? Nohnich'oh Christ tulalhgus k'ut neba dazsai-un, 'ants'i whunilh'en le'hoont'oh. 'Et whuz un'a nohba be hóodat'en.

<sup>2</sup> 'Ilhoghun 'et sudutáhnelh hukwa' nuszun. Nts'en'a Ndoni nohyudílt's'ut'? Moses be 'udustl'us ook'une' 'uht'en k'us ndet la whudahts'o-un tilah nohba 'alha' hoont'oh?

<sup>3</sup> Whuz un'a stabe whuzahni! Ndoni 'en be whe' daht'en. 'Ink'ez 'andit nohyust'e dalh'en-un, 'et whuz un'a ts'ih'un 'unt'ohne tihleh, nahzún eh? 'Awundooh!

<sup>4</sup> Nohni lhat-un whe dzoh nusahde whe' hoont'oh. 'Et ndúwhulcho whe 'ants'i 'uhoont'oh nahzun eh? 'Et nts'en'a 'ants'i nohba 'uwhutát'elh!

<sup>5</sup> 'Et huwa Yak'usda 'en 'unt'oh Ndoni nohyeidan'ai 'ink'ez nohtoh huwa 'it'en tune' 'ut'en. Di ha 'uhoonla? Moses be 'udustl'us ook'une' 'uht'en k'us ndet la whudahts'o-un nohba 'alha' hoont'oh?

<sup>6</sup> Abraham, 'en cha, nts'en'a Yak'usda yuba 'alha' 'unt'oh whe Yak'usda ts'ih'un dune unli yúlhni,

<sup>7</sup> 'et whuz un'a nohni cha ndi soo cho ts'ih'un un'a t'ewhutihzeh 'et nohts'u hukwa' nuszun. Mbe la be 'alha' hoont'oh ut'ine, 'enne za Abraham buzkeh hinli.

<sup>8</sup> Yak'usda ooghuni ndet la nus de dawhútanelh, 'et whunénulhtun. Be 'alha' hoont'oh-i, 'i be Yak'usda 'udun yun k'ut whut'enne, 'enne ts'ih'un 'unt'ohne ubutilhtselh. 'Et whutso 'uwhutánelh-un, 'et Yak'usda Abraham nja dúyulhni, "Nyun ngha 'udun yun k'ut whut'enne, 'enne ts'iyawh dáwhuldzoo'-un bughá hóotalts'ulh."

<sup>9</sup> 'Inka ndiz un'a nja dúhoont'oh, Abraham Yak'usda yuba 'alha' 'unt'oh 'et huwa 'uk'enus hoonzoo-un oogha whults'ut. 'Ink'ez mbe la Yak'usda ooba 'alha' yint'ohne, 'enne cha whuz un'a za njan 'uk'enus hoonzoo-un bughá hóotalts'ulh.

*Moses be 'udustl'us 'i be 'aw dune Yak'usda nalh ts'ih'un hoole' ait'oh*

<sup>10</sup> 'Et nts'en'a la Moses be 'udustl'us yut'aninintanne, 'enne ts'iyawh ndi Yak'usda musai butilhtselh-un, 'et whuts'e' hut'en. 'Et ndiz un'a 'uk'éhóguz whe ndutni, "Moses be 'udustl'us, ndai la 'uk'eyanguz-i, 'i ts'iyawh mbene la ts'iyawh hik'unulhe'ust'en de, 'et de ndet la musai ubutilhtselh-un, ts'iyawh huwhuti'elh."

<sup>11</sup> 'Ink'ez ndi Moses be 'udustl'us 'i be 'aw dune Yak'usda nalh ts'ih'un 'uhoot'e' ait'oh. 'Et Yak'usda ooghuni nja dutni, "Mbene la ts'ih'un 'unt'ohne, 'enne be 'alha' hoont'oh-i, 'i be 'alghoh ts'ukhuna."

<sup>12</sup> 'Et Moses be 'udustl'us be 'alha' hoont'oh-i 'aw 'i gha iloh. 'Et mbe la dune Moses be 'udustl'us yuk'une' 'ut'en de, 'et de 'i be 'et whuz un'a ndi yun k'ut hukhutinahl.

<sup>13</sup> Mbe la Moses be 'udustl'us k'unyisne, 'enne musai hoole' huba' hoont'oh. 'Ink'ez 'et whuch'a Christ naneoket. Ndet la whe musai netilhtselh-un dich'oh k'éhoot'ai. 'Et whuz un'a 'uk'éhonguz whe ndutni, "Mbe la duchun undunilt'o-un, 'en musai tileh whe 'unt'oh," ni.

<sup>14</sup> 'Ink'ez Sizi Gri neba daja la 'et huwa Abraham dawhuldzoo'-un la ooghá whults'ut, 'udun yun k'ut whut'enne, 'enne cha Sizi Gri gha bughá whútalts'ulh. 'Et whuz un'a neBá Ndoni 'en nets'u yoozi. 'En neba 'alha' hoont'oh-i, 'i be neyudoalts'it ha.

*Yak'usda ndet la khuni neba lhaídanla-i, 'aw 'ats'un un'a nahótneh ait'oh*

<sup>15</sup> Sulhutsinke ndi yun k'ut ne'ts'ut'en-un, 'et huwun nohbulh yasduk. Ndunde lkh'oh ts'e nehónin'ai de, 'et huwun lhgha huhoont'i' 'ink'ez 'uk'éhooguz de, 'aw dune 'udun nehóho'alh ait'oh. 'Ink'ez dune 'udun whutanahahó'alh-un hooloh.

<sup>16</sup> 'Et Yak'usda Abraham 'ink'ez oots'u hayánzut-un, ndai la ye yuts'u náhizya, 'aw 'en za 'ink'ez oots'u hayánzut-un, 'enne za but's'ú yoozi. 'Aw Abraham ts'u haíndene, 'enne iloh 'ubudusni. 'Aw lhane iloh 'ulhni. 'Et hoonts'i Yak'usda 'ilghun dune za ghu yalhduk whe 'utni. 'Et whuz un'a

'udija whe Abraham, "Nts'u haínzut-un," yúlhni. 'Ink'ez ndun Christ 'en Abraham oots'u hainzut-un 'unt'oh.

<sup>17</sup> Daja nohdusni-un, 'et ndi khuni be yuts'u náhizya, 'uda' Yak'usda Christ bulh lhaohóinla whe' hoont'oh. 'Et 430 be yus k'ut hukw'elh'az 'et Moses be 'udustl'us 'uk'uneyuzguz. 'Et huwa njan Abraham khuni ooba lhaíndanla-i, ndi khuni 'aw gak nahooseh ait'oh.

<sup>18</sup> 'Et Yak'usda yut'i-i negha ítalesh-i, nts'en'a Moses be 'udustl'us gha negha ítalesh? Gak! 'Aw 'uhot'e' ait'oh. 'Et hoonts'i Yak'usda Abraham yuts'u náhizya-un, 'et whuz un'a ndi yut'i-i yugha ítalesh-i, 'et yughá whunin'ai.

*Moses be 'udustl'us 'i ndet huba unzoo?*

<sup>19</sup> 'Et ndi Moses be 'udustl'us ndet huba 'uzoo' nahzun? Ninta' ts'ut'ih-un 'et whuch'a neba 'uhóonla. 'Ink'ez nkede 'uwhutánelh whe whusawhútilts'ulh, Abraham oots'u hayánzut-un whusatiyalh whuts'un, 'et whuts'un neba' hóonla. 'Ink'ez mbe la yuts'u haínzut-un, ndi yé nets'u nahizya-i, 'en ghun 'uhoot'oh. 'Et mbe la dune eguz unli-un, 'et lizas daja hidáni'-un, 'et 'on 'un budáni'.

<sup>20</sup> 'Et mbe la dune eguz unli-un, 'aw 'ilhoghun za ba lhe'ít'oh. 'Et hoonts'i Yak'usda 'en 'ilhoghun za unli.

<sup>21</sup> Daja nahzun? Ndi Moses be 'udustl'us 'ink'ez Yak'usda Abraham yuts'u nahizya-un, 'et lhge 'uts'un un'a eh 'unt'oh? 'Awundooh! 'Et hoonts'i Moses be 'udustl'us daja ni, 'et butl'a hón'ai. 'Et 'i be dune 'ilhiz wheni hukhuna de, 'et de 'alha Moses be 'udustl'us 'i be dune ts'ih'un un'a 'uhint'oh hutileh inle'.

<sup>22</sup> 'Et hoonts'i Yak'usda ooghuni nja dutni, ts'iyanne dune lubeshi bulh 'uhint'oh inle'. 'Et la ndi ye buts'u náhizya-i, 'i mbene Sizi Gri la ooba 'alha' yint'ohne, 'aw 'enne za bugha whútakulh.

<sup>23</sup> 'Et hoonts'i be 'alha' hoont'oh-i uztit'elh whutso da', Moses be 'udustl'us 'i be 'ants'i 'azdanla' le'ts'ant'e'. 'I be duts'o nehulltsi, nkede la be 'alha' hoont'oh-i buneuntitun 'et whuts'un.

<sup>24</sup> 'Et whuz un'a ndi Moses be 'udustl'us nehodalh'e'-un inle'. 'Et whe Christ ts'un neozdla. 'Ink'ez be 'alha' hoont'oh-i 'i be la ts'ih'un dune ts'oole' ha.

<sup>25</sup> 'Et 'awet be 'alha' hoont'oh-i ts'ut'i. 'Et huwa ndi whuneodalh'e'-un 'aw 'on 'un ook'une' ts'oot'en huba lhe'ít'oh.

*Nohni ts'iyawh Christ, Sizi ts'utni-un, 'en be 'ilhoghun za ahli*

<sup>26</sup> 'Et nohni ts'iyawh Christ, Sizi ts'utni-un, 'en gha 'et be 'alha' hoont'oh-i, 'i be Yak'usda buzkeh ahli.

<sup>27</sup> 'Et nohni nohtoh mbene la Christ ba too be 'ulyane, whuz un'a bulh 'áht'oh sahli'.

<sup>28</sup> 'Inka 'aw lizwifne k'us 'udun yun k'ut whut'enne hooloh. 'Ink'ez 'aw 'ulhnae k'us oola naditnne cha hooloh. 'Ink'ez 'aw dune k'us ts'ekoo cha hooloh. Nohni ts'iyawh Christ, Sizi ts'utni-un, 'en bulh 'ilhoh 'aht'oh.

<sup>29</sup> 'Et Sizi Gri oodune' ahli de, 'et Abraham ts'u haindene cha ahli. 'Ink'ez ndi Yak'usda Abraham ye yuts'u náhizya-i, 'i gha ts'iyawh nohts'u whutikulh.

## 4

*Dune 'awhuz ts'oodun unli de, 'ants'i 'ulhna-un unli le'unt'oh, 'et hoonts'i 'ilhudzin moodih tileh*

<sup>1</sup> 'Et ndiz un'a nohdusni, mbe la 'uk'elhutizulh-un, 'en 'awhuz ts'oodun unli de, 'ants'i 'ulhna-un unli le'unt'oh, 'et hoonts'i 'ilhudzin moodih tileh.

<sup>2</sup> Nkede la oobá yuba hoozi-un whusawhútilts'ulh 'et whuts'un, ndunne yughundline 'ink'ez yoh huwundline, 'enne 'awhuz highunli.



3 Wheni cha 'et za 'et duts'ánt'e'. Ts'oodunne k'un'a nduts'ult'oh whe 'uts'ant'e'. Ndi yun k'ut 'ut'en be tank'us úznan't'i. 'Et huwa ndi yun k'ut whe 'ulhna ts'anle'.

4 'Et hoonts'i 'awet whusahóolts'ut whe Yak'usda duYe' whusayá'h'a'. Ts'eke 'en yulhtsi, Moses be 'udustl'us yuk'úne' tit'en ha.

5 'Et whuz un'a 'enne mbene la Moses be 'udustl'us k'úne' 'ut'enne, 'enne ts'iyawh nabonket. 'Et whe wheni 'ants'i Yak'usda buzkeh ts'oolle' ha.

6 'Ink'ez Yak'usda buzkeh sahli'. 'Et huwa Yak'usda duYe' ooyughi, 'en nohts'un whusayá'h'a', nohdzi yoh ooda' ha. Tube cho "Abba" ni. 'UBá ni whe 'utni.

7 'Et huwa 'aw 'on 'un 'ulhnane lháhloh, k'us 'en buzkeh sahli'. 'Ink'ez buzkeh sahli' de, 'et de Christ 'en gha Yak'usda yut'i-i nohch'e' tileh.

*Paul Galatia whut'enne ubulhni, "Et nohba whénuzjut! Ndet la 'oh da' nohba 'uwhúsda-un, 'et 'ants'i 'ist'en whutaleh"*

8 'Et hoonts'i niz de whudizulh da' 'aw Yak'usda t'elhnuzahzun inle'. Whulohne Yak'usda lhílohne, 'enne hoonts'i buba 'ulhnane aht'oh inle'.

9 'Ink'ez 'andit 'awet Yak'usda t'enihzin, k'us ndiz un'a tilah 'udoosni', Yak'usda nohni ts'iyawh soo cho t'enohnanzin. 'Et di ha nohni doo cha ndai la ndi yun ye tetsun-i, 'ink'ez ndai la lhe'ízoo'-i, 'i ts'iyawh oots'u nátilhye hukwa' aht'en? 'Ohwhi doo cha za eh be 'ulhna tihleh hukwa' nahzun eh?

10 Lhe'uh't'en! Whuloh dzin, sanun te, 'ink'ez hoonli nts'owhuya whudizulh k'us whulukhun yus k'ut cha, 'i ts'iyawh neba whudizti' duhni!

11 'Ants'i 'et tilah nohba 'ist'en, 'et huwa nohba whénuzjut.

12 Sulhtsinke nohni nohts'u tedusldilh sk'un'a 'oot'e' ha. Nohni si nohk'un'a 'ust'oh 'et huwa. 'Aw hoonli whe sulh lhundúsdal.

13 T'eoonahzun ndai la bé syust'e tetsun-i, 'et huwa soo 'udechoo ndi khuni unzoo-i be nohbulh yasduk inle'.

14 'Ink'ez nts'en'a la syust'e be dzoh nuszut, 'et hoonts'i whunilhchoh nohba dalhúhoot'oh. 'Et huwa 'aw tenásulhnahyulh. 'Et hoonts'i Yak'usda oolizas usdli nohba le'ust'oh. 'Et whuz un'a nohyoh ts'e dasunulhti. Christ, Sizi ts'utni-un, 'en nohba le'ust'oh, 'et huwa 'anih' sudahni.

15 Ndet la whe ndi 'uk'unus hoonzoo-un nohgha whults'ut? 'Et dáhooja? Ts'ih'un un'a 'unohdusni, 'et whuz un'a da' 'oohneh, nohna haníhla 'ink'ez da' sgha nóhlel' sna natisel' ha.

16 'Et dahooja? Ts'ih'un un'a nohdusni. 'Et huwa nohch'az nedisja nahzun eh?

17 'Et 'uyoonne nunút'i' be khanóhonot'ah hukwa' hut'en, buts'un nenádohdil' ha. 'Et whe nohni nohba híncha na'hudatal'elh 'et hukwa' hut'en.

18 'Et hoonts'i ndet la ts'ih'un 'uhoont'oh-un, 'et za soo cho hukwa' aht'en nohbulh 'ust'en k'us 'aw nohbulh lhe'zust'en 'et hoonts'i.

19 Suzkehke nkede whusaootilt's'ulh soo ts'ih'un un'a Christ nohbulh utit'elh 'et whuts'un, 'ants'i ts'oodun ha sulh 'ults'ulh nohba le'ust'oh.

20 'Andoit 'aho nohbulh 'utist'elh hukwa' nuszun. 'Et la khuni be 'on nus hoonzoo' hukw'un'a nohbulh yaosduk. Nohbulh nawh 'unuszun 'et huwa.

*Nane ts'ekoo, Sarah 'ink'ez Hagar, 'enne nawh hukw'un'a khuni neba lhadulya-i hinli le'hint'oh*

21 Nohni mbe ahli ha Moses be 'udustl'us ook'úne' tiht'en hukwa' nuhzun, 'et ts'ih'un un'a suduhni, ndi Moses be 'udustl'us daja ni la, soo ts'ih'un un'a t'eoonúhzun eh?

<sup>22</sup> 'Et ndiz un'a 'uk'eyanguz whe nja dutni, Abraham nane buzkeh ooye'ke, 'ilhoghun, 'en 'ustle-un, 'en ooyaz. 'Et 'ilhoghun 'aw 'ustle-un lhíloh, 'en ooyaz.

<sup>23</sup> 'Et ndun ts'eke 'ustle-un ooyaz, 'en neyust'e k'oh ts'e whuzdli. 'Et hoonts'i ts'eke 'ustle-un lhíloh ooyaz, 'en nts'en'a Yak'usda Abraham yuts'ú hoozi, 'et hukw'un'a whuzdli.

<sup>24</sup> 'Et ndi 'i ts'iyawh oogha ne'ts'ut'en-i neba unli. Njan dahoont'oh whe ndunne ts'ekoo 'enne nawh hukw'un'a khuni neba lhadulya-i hinli le'hint'oh. 'Et 'udecho-i khuni neba laidinla-i, 'i dzulh Sinai ts'un hadilts'ut-i 'unt'oh. 'Ink'ez mbene la 'et whuzdline, ts'iyawh 'ulhnane hinli. 'Ink'ez ndai la khuni neba lhaidinla-i, 'i nyoon ts'eke 'ustle-un Hagar huyulhni, 'en k'un'a 'unt'oh, ni whe 'utni.

<sup>25</sup> Ndiz un'a nja dúhoont'oh, ndun ts'eke Hagar, 'en ndi dzulh Sinai, yun k'ut Arabia ts'uwhutni-un, 'et whuz un'a 'unt'oh. 'Ink'ez njan keyoh Jerusalem, 'et ndun Hagar k'un'a 'uhoont'oh. Njan keyoh, 'et 'ulhnane keyoh 'uhoont'oh. 'Ink'ez mbene la 'et whuzdline, 'enne ts'iyawh 'ulhnane 'uhint'oh.

<sup>26</sup> 'Et hoonts'i 'udun keyoh ts'e 'et cha Jerusalem ts'uwhutni. 'Et ndo yak'uz 'uhoont'oh. 'Et 'ulhnane keyoh lhe'hoot'oh 'ink'ez wheni ts'iyawh njan keyoh neloo 'uhoont'oh le'hoont'oh.

<sup>27</sup> Et njan keyoh ndiz un'a nja duhoont'oh whe Yak'usda be 'udustl'us k'ut 'et ndutni,

“Whunilhni ts'eke!

Nyuzkeh honloh.

Nyun 'int'oh 'aw nyuzkeh hóle' ait'oh.

'Aw nyaz whutaleh hukw'un'a whélhdintnih.

'Awet 'andit hootánt'e'! Tube cho hoonánt'i'!

Mbe buzkeh hooloh-un, 'en ooki hooni-un,  
anus buzkeh lhai tileh 'et huwa,”

ni.

<sup>28</sup> 'Et sulhutsinke, wheni cha Isaac k'un'a 'uts'int'oh. Wheni cha ndet la Yak'usda Abraham yuts'u hoozi-un, 'en buzkeh ts'inli.

<sup>29</sup> 'Et hoonts'i 'oh da' ndun neyust'e k'oh ts'e whuzdli-un, 'en nyoon Ndoni ye ulhtus-i be whuzdli, 'et ndet huwa dzoh nuyulhdzut 'et 'andit dzin 'awhuz 'et za neba ndúhoont'oh.

<sup>30</sup> 'Et hoonts'i Yak'usda be 'udustl'us daja ni la? 'Et ndiz un'a Sarah Abraham nja duyulhni, “'Et 'ustle-un ts'eke, duye' bulh tenabuninyoot. 'Alha ndun 'ustle-un ts'eke ooye', 'aw nk'elhe'toolelh ait'oh. Si ts'eke 'ustle-un lhusdloh, si sye' 'en za nk'élhe'tilelh,” yulhni.

<sup>31</sup> 'Et huwa sulhutsinke wheni 'aw 'ustle-un ts'eke buzkeh lhts'íloh. 'Et k'us 'ustle-un ts'eke lhíloh-un, 'en buzkeh 'uts'int'oh.

## 5

*Christ ye nék'un'a'an'oh-i, 'i be 'et whuz un'a nelanaditni. 'Et whe soo cho whulh núdolhya'*

<sup>1</sup> 'Et huwa ndi Christ ye nék'un'a'an'oh-i, 'i be 'et whuz un'a nelanaditnih. 'Et whe soo cho whulh núdolhya'. 'Aw 'on 'at 'ulhnane k'un'a oolghel junih.

<sup>2</sup> Soo zulhts'ai. Paul si 'ust'oh whe nja nohdusni, 'et nohni ooka dune ahli-i k'ut nohotit'us de, ndet la Christ nohba 'uhoonla, 'aw hoonli nohba lhuhóoloh tileh.

<sup>3</sup> Doo cha za ndi whunohuntistun. Mbe la dune yuka dune unli-i k'ut huyuzt'us de, 'et ndunt'oh dune, 'en Moses be 'udustl'us, 'i ts'iyawh yuk'une' oof'en huba' hoont'oh.

<sup>4</sup> Nohni mbene la ndi Moses be 'udustl'us 'i be Yak'usda nalh ts'ih'un un'a 'ooh't'e hukwa' aht'en de, 'et de Christ ooch'a nasulhyeh whe aht'en. Ye unzooh-i, 'i cha ooch'a sahkak whe 'ahja.

<sup>5</sup> Ndoni gha ndi be 'alha' hoont'oh-i, 'i be za wheni ooka tse ts'úhoolih whe ts'ih'un un'a whe dune ts'oole' ha, 'et whuba ts'ilh'i 'et huwa.

<sup>6</sup> 'Et wheni ts'iyawh Christ, Sizi ts'utni-un, 'en bulh 'uts'int'oh de, 'et de yuka dune unli-i k'ut huyuzt'us, k'us 'aw lhi't'us-un, 'et 'aw 'ants'i 'uhoont'oh. 'Et hoont's'i be 'alha' hoont'oh-i, 'i hooncha whe' hoont'oh. 'I gha 'on nus lhk'ets'ootsi'.

<sup>7</sup> Soo úlhwus inle! Mbe gha njan khuni 'alha' 'unt'oh-i ooch'a nasahdil?

<sup>8</sup> Ndun nohoolhgooh-un 'aw 'anih nohulhni-un, 'en ts'un iloh 'unt'oh.

<sup>9</sup> Ndi lhes oogha untuldoh-i, ntsool-iyaz 'i lhes ncha-i oogha yuntuldoh.

<sup>10</sup> NeMoodihti sba 'alha' 'unt'oh 'aw 'uts'un un'a 'unoohzin ait'oh. Mbe la dune tank'us nohnilt'i-un, 'en mbe unli hoont's'i, Yak'usda yaba nahutiyyeh.

<sup>11</sup> 'Et sulhutsinke ndi ooka dune ulhli-i 'awhuz hiyot'as dusni de, 'awhuz 'et za ndudúsní de, 'et di ha 'awhuz hukwa dzoh nusulhdzut? 'Et whuz un'a howu yasduk de, 'et Sizi Gri tulalhgus k'ut dazsai-un howu yasduk de, 'aw da' buba dzoh lhe'duzoosnih oole' da'.

<sup>12</sup> Nduune mbene la tank'us nohnilt'ine, 'enne didutch'oh úncha na'hoodudut'as.

<sup>13</sup> Sulhutsinke whunulh'en, Moses be 'udustl'us hik'úne' 'ust'en-un oola naditnine ahli whé aht'oh. 'Et whe Yak'usda nohoozi. 'Et hoont's'i 'aw 'ilhoghun za nohba whuz'ai. Ndi whe oola naditni-un 'et whaht'i, 'et hoont's'i soo cho khohdle'. Nohyust'e ninta' tit'elh-un, 'et whuts'u nint'i de, 'et hólhchoot junih! 'Et k'us be nék'ets'intsi'-i, 'i be lhba ne'óoh't'en.

<sup>14</sup> Moses be 'udustl'us daja ni la 'et whunúlhcho 'ilho khuni be lhaooduja, ndi khuni 'et ndutni, "Nts'en'a la nyunch'oh k'enaintsi', whuz un'a nyulh dune cha buk'eoontsi'," ni.

<sup>15</sup> 'Et hoont's'i 'ants'i lhike k'un'a lheidulh de, doo ka si ninta' lhólh'en. 'Et whuch'a soo cho huwohle!'

### *Ndoni 'en be ndi yun k'ut dulhts'i*

<sup>16</sup> 'Et nja nohdusni, Ndoni 'en be ndi yun k'ut dulhts'i. 'Et huwa nohyust'e 'uts'un nóot'i ait'oh.

<sup>17</sup> 'Et neyust'e Ndoni ch'az nint'i. 'Et doo cha Ndoni neyust'e ch'az nint'i. 'Et whe lhch'a húhool'i. 'Et huwa nts'en'a hukwa' nahzun, 'et hoont's'i 'aw whuz un'a ndohneh ait'oh.

<sup>18</sup> 'Et Ndoni 'en za ook'oh tune' aht'en de, 'et de Moses be 'udustl'us daja ni la, 'aw 'on 'un k'únunoh noojoot ait'oh.

<sup>19</sup> 'Et neyust'e be 'ut'en k'oh-un, 'et whunilhchoh t'ets'oninzun. 'Ink'ez ndiz un'a nja duhoont'oh. 'Uyoonne 'at bulh ninta' ts'ut'ih, k'us lhghu lhikohne, 'enne bubulh ninta' ts'ut'ih, k'us lubeshi dutsun-i 'uts'ulh'ih. 'Ink'ez 'ahoolhyiz dune k'us ts'ekoo bulh lubeshi 'uztilelh whuts'úznint'i.

<sup>20</sup> 'Et 'uk'eltsi neba 'alha' 'unt'oh-un cha, 'ink'ez dune dezduh-un cha. Ts'iyawh lhts'uzdutni 'ink'ez lhch'a ts'úhooli. 'Ink'ez lhghe' ts'oolnih 'et whé neba dzoh. Whenich'oh nek'un'a za' 'uts'it'elh. 'Et lhelhdoh 'uts'int'oh whe 'ilhoh didohne, wheni ts'iyawh whenich'oh nek'un'a 'onghohne whubuts'odulh'eh de.

<sup>21</sup> 'Uyoonne dune ch'e' ha' uzninzun 'ink'ez dune ts'ughan. 'Ahoohyiz taznutnai 'ink'ez ts'iyantsuk whe hoont's'i tune' ts'ut'en. Ndi ndunt'oh-i, 'ink'ez ndet la tank'us neyust'e whuts'u nint'i-un, 'et whutso nohdusni, whuz un'a 'uda' cha nohdasni'. Mbene la 'et ndúhoont'oh tune' 'út'enne, 'aw Yak'usda whulerwe unli-un, 'et 'aw butl'a hólts'it ait'oh.

22 'Et hoonts'i ndai la Ndoni neba' yinla-i, 'i 'unt'oh, be lhk'ets'utsi'-i, be ts'ónilhni-i cha, be nédzi dizghel 'i cha. 'Ink'ez sa' whe hoonli talhts'odini-un, 'ink'ez 'uyoonne ts'un ts'inzoo 'i cha. 'Et ndai la ts'iyaitsuk unzoo-i 'uts'ulh'en, Yak'usda neba 'alha' 'unt'oh-un, 'i cha.

23 'Uyoonne gha' ts'ole' cha, 'ink'ez k'o 'uzdunoolt'i. 'Et njan 'i ts'iyawh Ndoni neba' hoonla whe' hoont'oh. 'Et hukw'une' ts'oot'en huba' hoont'oh. Nduts'int'oh de, 'et de 'aw hoonli whe nek'ehootalts'ulh-un hooloh.

24 'Ink'ez mbene la Christ ooch'e' unline, 'et dáhoont'oh neyust'e lubeshi ts'u nint'i, 'et 'ants'i lubeshi ts'uznint'i-un le'ts'int'oh, 'et njan ts'iyawh tulalghus 'uts'odunilht'o.

25 Ndoni 'en be ts'ukhuna. 'Et huwa Ndoni 'en za bulh úztoodilh huba' hoont'oh.

26 Khun te whe' dudolhti' junih. Khun te ts'úhoske' junih. 'Ink'ez khun te 'uyoonne ch'e' ha' uznoozin junih.

## 6

### *Ndet la huwa whúlna'-un lhla 'aht'en*

1 Sulhutsinke nohni ts'iyawh mbene la Ndoni k'une' 'ut'enne, 'ink'ez mbe la nohtoh lubeshi be ulhgooh-un, 'en nalhchoot. Nánilhtsul ts'ih'un nenánulhtih. Nohnich'oh na'dunulh'en, doo ka si nohni cha tank'us nóoht'i.

2 'Ilhone ahli ndet la nohba howa whulna' hoonts'i lhla 'ooht'en. 'Et de la Christ, ooghuni netl'adilts'ut-i, ook'une' tiht'en whe' hoont'oh.

3 Mbe la hoonli 'ust'oh na'dunudzun-un, 'en dich'oh na'dunut'ah. 'Aw hoonli lhiloh whe 'unt'oh 'et huwa.

4 'Et 'ilhoghun ahli whe dude 'ut'en k'oh soo cho honoolh'en. 'Et 'ut'en unzoo-i inla de, 'et la didutch'oh duba hót'e', 'ink'ez 'aw 'uyoonne ba iloh.

5 'Ilhone ts'inli whe whenich'oh ne-e'ut'en 'uts'oolh'en huba' hoont'oh.

### *Tube cho dahzoo 'ink'ez hoonzoo tune' 'aht'en*

6 'Et mbe la Yak'usda ghuni hodulh'eh-un, 'en mbe la whuyodalh'e'-un, 'en ndai la unzoo-i yut'i, 'i yuloh ye yula 'oot'en huba' hoont'oh.

7 Khun nanooht'ah junih. 'Aw Yak'usda ooghoht'oh ait'oh. 'Et ndai la dune 'ainulih-i, 'i za hayuntilelh whe 'unt'oh.

8 'Et nts'e la dune ooyust'e nint'i ts'e, 'et ooyust'e whuts'u nint'i-un, whuz un'a datitsah. 'Et hoonts'i mbe la Ndoni yunilht'i k'un'a ne'ut'en-un, 'en Ndoni gha 'ilhiz khutinalh.

9 'Et hoonzoo-un 'uts'uwhulh'en 'et huwa néznotsilh junih. 'Et 'aw whulalhts'udustni de, whusahóolts'ut de, 'et de ha 'úznoolelh.

10 'Et huwa negha whultsuk te, 'uyoonne la' ts'oot'en. Mbene la be 'alha' hoont'oh unline, 'enne 'uk'enus bula' ts'oot'en huba' hoont'oh. 'Et la 'ilhoh 'uts'int'oh whe' ts'int'oh.

### *Sizi Gri tulalghus k'ut dazsai-un, 'et whe ts'ohót'e'*

11 Ndi nulh'en sich'oh nohts'o k'eusguz-i 'unt'oh. Lhelcho susi whe ook'une'zsguz.

12 'Et mbene la ooyust'e 'et huba soo 'uldzoo'ne, 'enne 'et hukwa' hut'en, 'enne 'uhint'oh, nohni ooka dune ahli-i k'ut nohotit'us whuts'u nohonilht'i. 'Et njan huwa hut'en, Christ tulalghus k'ut neba dazsai-un huwa yats'ulhduk-un, 'et huwa dzoh nunéhulhdzut, 'et whuch'a ne'hoot'en-un hukwa' hut'en.

13 'Et ndunne yuka dune unli-i k'ut ust'úsne, 'enne hoonts'i Moses be 'udustl'us 'aw hik'unulhe'ust'en. 'Et hoonts'i whuz un'a ooka dune ahli-i k'ut nohotit'us whuz nohonilht'i. 'Et ndunóhohinla de, 'et da' whe' hot'e' oole' da'.

<sup>14</sup> 'Et Sizi Gri tulalhgus k'ut neba dazsai-un, 'et za whdúst'i' whe' hoont'oh. NeMoodihti Sizi Gri ootulalhgus, 'i gha za sdzi do 'úja. 'En bulh dasusai le'ust'oh. 'Et huwa ndi yun 'ants'i sba whuzdli'. 'Ink'ez si cha 'ants'i whuba usdli suli'.

<sup>15</sup> Wheni ts'iyawh Christ, Sizi ts'utni-un, 'en bulh 'uts'int'oh de, 'et de yuka dune unli-i k'ut 'ust'usne, k'us dune lhit'usne, 'et 'ants'i 'uhoont'oh 'et huwa. 'Et hoont's'i wheni mbene la Christ, Sizi ts'utni-un, 'en bulh 'unt'ohne, doo cha za ts'uwhuzdli whe' ts'int'oh.

<sup>16</sup> 'Ink'ez mbene la ndi khuni 'i gha yuk'úne' 'úst'enne de, 'et de be nedzi dizghel-i, 'ink'ez be negha te'nidzeh-i, 'ohwhi la huyulh 'oot'e'. Israel oots'u haínzutne, mbene la Yak'usda oodune' unline, 'enne cha.

*Yak'usda ye unzoo-i, 'i nohbulh óot'e'*

<sup>17</sup> 'Andit whuts'un 'aw dune dzoh nusoolhdzut junih! Sizi Gri ooba 'ust'en whe dzoh nusúsdzut, 'et huwa syust'e ndulcho whe be hóodat'en whe 'unt'oh.

<sup>18</sup> Sulhutsinke, neMoodihti ye unzoo-i, 'i nohbulh 'oot'e'. 'Et ndo honeh.

## Paul Ephesus Whut'enne Buts'ó K'eyanguz-i

### *Ephesus whut'enne Paul hadih ubulhni*

<sup>1</sup> Si Paul Sizi Gri 'en gha whel'a'-un usdli. 'Et whuz un'a Yak'usda sts'u hukwa' ninzun.

Nohni Yak'usda ooch'e'ne keyoh Ephesus 'et whut'ine, nohni Sizi Gri 'aw oola doohntni ait'oh ndet la nohba 'alha' hoont'oh-un, nohni ts'iyawh hadih nohdusni.

<sup>2</sup> Yak'usda neBá 'ink'ez Sizi Gri neMoodihti, 'en ts'un ye unzoo-i 'ink'ez nohdzi dizghel-un nohgha óonin'ai, 'i ts'iyawh nohbulh óot'e'.

### *Christ, 'en naneonket*

<sup>3</sup> Yak'usda, Sizi Gri neMoodihti ooBá 'unt'oh, 'en uzdlíhti'. 'En 'unt'oh Sizi Gri be ndet la yak'ut whudizti'-un, 'et whunilhchoh Ndoni gha ndi neghant'ai.

<sup>4</sup> Ndzi un'a neBá nja duja, ndi yun 'uitilelh whutso 'utahanéanla Sizi Gri ooyúzdutílt's'ilh whuba. 'Et whe lubeshi ooghu hoolohne ts'oole'si, 'ink'ez 'aw nek'ehootalts'ulh-un hooloh. Ndi be lhk'ets'utsi'-i, 'i be neBá oobut 'et whuz un'a 'uts'oot'e' huba' hoont'oh.

<sup>5</sup> 'Et whe neBá ndiz un'a 'uda' neba lhaóodinla, wheni Sizi Gri 'en be dich'oh buzkehke uztilte. Ndet la neBá 'en ba hoonzoo, 'ink'ez nts'en'a la didutch'oh hukwa' ninzun, 'et whuz un'a 'uhoonla.

<sup>6</sup> 'I gha ndi ye unzoo dizti'-i, 'i uzdlíhti'. 'Et whuz un'a duYe' yuk'entsi'-un, 'en ooba soo' ts'uldzoo' nesulltsi.

<sup>7</sup> Yak'usda neBá Sizi Gri 'en be duduzkai' be naneonket. 'Ink'ez ninta' ts'unt'en-un neba whuna'alhdeh. Ye unzoo-i dádziti', 'et whuz un'a 'uniltsuk whe neba 'uhóonla.

<sup>8</sup> Ndi ye unzoo-i, 'i be lhan'un te ye whunih-i 'ink'ez be t'eeonudzun-i, ts'iyawh 'i be 'et whuz un'a neba 'uhóonla.

<sup>9</sup> Ndet la Yak'usda didutch'oh hukwa' ninzun-i, neba whe' hoont'oh hooyoh-un, 'et cha whunénilhtan. Ndet la dich'oh dudeni lhadínla, 'et whe hoont'i', 'et whuz un'a 'uhóoja.

<sup>10</sup> 'Et ndiz un'a duwhútni, nts'oya hoozulh whu la whusahóolts'ut de, 'et de ndet la yak'uz dilhts'ine, ndi yun dilhts'ine cha, 'enne ts'iyawh Christ 'en be 'ilho za ubutilhtselh.

<sup>11</sup> Nts'en'a la Yak'usda dich'oh dudeni lhaídinla, 'et whuz un'a 'uwhut'en 'et huwa. 'Et whuz un'a 'uda' neba lhaoodinla whe Sizi Gri 'en be nets'ó tikulh-un nech'e' whuzdli'.

<sup>12</sup> 'Et wheni Lizwifne 'udechoo Christ, 'en ooka tse ts'uhooli. 'Et huwa wheni negha Yak'usda ye dizti'-i dóti'.

<sup>13</sup> 'En be khuni 'alha' 'unt'oh-i wheni negha nohni 'udun yun k'ut whut'enne dáhts'o. 'Et whuts'un Sizi Gri nohba 'alha' 'uja. Ndi khuni, 'i gha duhjih. Sizi Gri hukw'elh'az nohba 'alha' 'uja, 'et Ndoni, nets'úyoozi-un, 'en be nohehóodat'en Yak'usda ooch'e' sahli'.

<sup>14</sup> Ndi neBá yut'i-i nets'u whutikulh-un, Yak'usda Ndoni negha ídin'ai. 'I be 'et whuloh neba 'et nelts'ut, mbene Yak'usda dich'oh duch'e' ubulhtsine, 'enne nabootakulh 'et whuts'un. 'Et whe Yak'usda ye dizti'-i, 'i dutáti'.

### *Yak'usda ye whunih-i nohgha ído'ah, 'et huba tenadahdli*

<sup>15</sup> 'Et nts'en'a la Sizi Gri neMoodihti nohba 'alha' 'unt'oh, 'ink'ez Yak'usda ooch'e'ne, 'enne ts'iyawh buk'ehtsi', 'et nohbulh 'údsts'o.

16 'Et huwa si cha nohba tenadusdli-un whe nohba musu dusni, 'aw 'etsul 'udósnih aít'oh. 'Ahoohyiz stenadudli toh nohghuni zástan.

17 NeMoodihti Sizi Gri ooYak'usda, 'en ooBá ye dizi'i bulh 'unt'oh, 'en ts'un nohba tenadusdli whe Ndoni 'en be be whutnih-i 'ink'ez noheni taoodutakulh-un, 'et nohtl'ahón'ai. 'Et whe Yak'usda dant'oh-un unli, 'on nus t'entihzeh.

18 'Et whuz un'a noheni be whunul'en k'un'a 'on nus hoohe'en whe soo ts'ih'un un'a lhat-un whuntih'elh. 'Et whuz un'a njan uzdoojih ha neka' dani'un negha óonin'ai, 'et whuz un'a la hukwa itoh'en, 'et la 'on nus t'ewhutihzeh. 'Ink'ez Yak'usda ooch'e'ne bulh ndi yut'i-i nets'ú whutikulh-un ts'uwhut'i, dáwhuldzoo' whe' hoont'oh, 'et cha 'on nus t'ewhutihzeh.

19 Wheni cha mbe la ooba 'alha' hoont'ohne, Yak'usda ye ulhtus-i daltus whe nets'un 'unt'oh, ndi hooncha whe yé ulhtus-i, 'i be 'ut'en. 'Et whuz un'a nohba tenadusdli.

20 'Oh da' Christ, 'en yaidlance toh dunadilhti. 'Ink'ez ndo yak'uz dughu nailhni ts'un k'us nátl'aidallda'.

21 'Et whuts'un Christ ts'iyawh buba ndo 'unt'oh. Mbene la 'udetso whudilhdzulhne, 'enne cha butso whudilhdzulh. Mbene la dune an ndo 'unt'ohne, 'enne cha buba ndo 'unt'oh. Mbene la ulhtusne, 'enne cha k'une' bul'en. 'Ink'ez mbene la moodih unline, 'enne bumoodihti 'unt'oh. 'Andit'aho 'ink'ez whuz de whudizulh-un, 'et hoontsi' mbene la boozí' nchane, 'enne ts'iyawh Christ buba ndo 'unt'oh.

22 Ndai la Yak'usda 'uk'enus ye ulhtus-i, 'i be ts'iyaitsuk Christ duketl'ah neíninla. 'Ink'ez Yak'usda ba 'ilhunaoodulhne ts'iyai be 'enne ts'iyawh butso whudilhdzulh.

23 Yak'usda ba 'ilhunaoodsilne, 'enne ts'iyawh Christ ooyust'e 'uts'int'oh. Ooyust'e lhadúyane ts'inli. 'En ts'ut'i de, 'aw 'uts'un un'a 'uts'oot'e' hukwa lhe'ts'untiszil.

## 2

### *Ye unzoo-i, 'i be dahjih*

1 'Ink'ez nohni ninta' naht'en 'ink'ez nohclubeshi be dasáhtsai le'ahja, 'et khahna nohulhtsi.

2 'Et 'oh da' ndi yun k'ut whe 'ut'en k'un'a yinka dúlhts'i inle'. Mbe la tazai k'uz ye ulhtus-i whe moodih tileh-un, 'et yutl'ahón'ai, 'en netsudule 'en k'une' nohul'en-un inle'. Mbene la 'awhuz Yak'usda yuk'unulhe'ust'enne, 'enne buyudinda.

3 'Oh da' wheni cha whuz un'a za buk'un'a 'usts'int'oh inle'. Nts'en'a whe neyust'e lubeshi ts'u nint'i, 'et whuz un'a za neyust'e 'utit'elh hukwa' ninzun, 'ink'ez ne-eni cha, 'et ts'iyawh 'uts'uholh'en inle'. 'Ink'ez Yak'usda ndet la whe bubulh hunilch'e-un, 'et cha neba whusaóotikulh ínle' 'uyoonne k'un'a.

4 'Et hoontsi' Yak'usda dalcho-i be nek'entsi', 'et huwa tube cho negha te'ninzun.

5 'Oh da' ninta' ts'unt'en-un 'et whe yaidlance le'ts'ant'e'. 'Et hoontsi' Christ 'en be Yak'usda ts'ukhuna nesulhtsi. Ye unzoo-i, 'i be dahjih.

6 'Ink'ez yak'uz ts'e Christ, Sizi ts'utni-un, 'en bulh Yak'usda dunanedinla. Lhelhdun ndo yak'uz ts'e 'en yuzih nenéninla.

7 'Et whe la neBá dalcho ye unzoo-i nus de whudizulh-un whusaootilts'ulh, nduwhulyiz Christ, Sizi ts'utni-un, 'en be neBá whunéuntihltun. 'I be la nets'un tizoo' whe' hoont'oh.

8 Ye unzoo-i, 'i be be neba 'alha' hoont'oh-i gha uzdujih 'et huwa. 'Aw whenich'oh negha iloh whe uzdujih. Yak'usda 'en negha óonin'ai.

<sup>9</sup> 'Aw 'ut'en unzoo-i, 'i gha iloh uzdujih. Doo ka la whulohne dune whe' hududólti'.

<sup>10</sup> Wheni Yak'usda 'uyinlane 'uts'int'oh 'et huwa. Christ, Sizi ts'utni-un, 'en ooyúzdults'i whe 'en be 'andidi nats'usdli', 'ut'en unzoo-i 'uztilh'elh ha. 'Et whe la whutso Yak'usda neba lhaóodinla. 'Et la ook'oh nuts'óodilh ha.

*Christ duzkai' 'i be Yak'usda benghoh nenóhminla*

<sup>11</sup> 'Et huwa whunalhnh, nohyust'e be 'udun yun k'ut whut'enne aht'oh. N dunne Lizwifne, mbe la dune dula be hika dune unli-i k'ut ust'úsne, 'enne ooka dune ahli-i k'ut 'aw lhít'us nohuhútni.

<sup>12</sup> 'Et 'oh da' nohni Christ ooch'oh aht'oh inle'. Israel oots'u haíndene 'aw butoh lhe'áht'oh inle'. N dai la Yak'usda dudune'ne dughuni buba laidinla-i buts'ú yoozi buts'un whusaootikulh-un, 'aw hoontsool-unyaz hoonts'i hoo'h'en aít'oh inle'. 'Aw hukwa itoh'en-un hooloh 'ink'ez Yak'usda ooyit aht'oh inle'.

<sup>13</sup> 'Et 'andit Christ, Sizi ts'utni-un, 'en bulh aht'oh. 'Oh da' Yak'usda ooghu nilhza' aht'oh inle', 'et hoonts'i Christ, 'en duzkai', 'i be 'andit benghoh aht'oh.

*Christ 'en gha nedzi dizghel*

<sup>14</sup> Christ 'en gha nedzi dizghel. Ndi sih le'unt'oh 'i ne-eguz, 'i be lhelhdun uzdilhts'i inle'. Ndi sih 'i neba hooloh yulhtsi. 'Et whe 'iloh didowhne nats'usdli' 'et huwa.

<sup>15</sup> Ndi Moses be 'udustl'us 'uk'unusguz-i, 'i be Lizwifne 'ink'ez 'udun yun k'ut whut'enne lhch'az uzditni inle', 'et neBá Sizi Gri duyust'e be neba gak whulhtsi. 'Et huwa wheni whutso da' nawh uzdidowh inle' whe 'andit Sizi Gri bulh 'uts'int'oh. 'Et whuz un'a nawh didowhne 'iloh uzdidowh za neulhtsi. 'Et huwa netoh whudizghel whulhtsi.

<sup>16</sup> 'Ink'ez dutulalhghus 'i be nawh didowhne 'ilho za neulhtsi. 'Et whe lhk'eke nabulhtsi. 'Et whuz un'a Yak'usda ts'u neozdla. Ndi lhch'az uzditni-un, dutulalhghus, 'i be 'et ts'iyawh neba gak whulhtsi.

<sup>17</sup> 'Ink'ez nohni mbene la 'aw Yak'usda ghu nuní lhnuszutne, 'ink'ez mbene la Yak'usda ghu nuní nuzutne, 'enne cha Sizi Gri whusainya 'ink'ez 'enne ts'iyawh khuni unzoo-i be nts'en'a la ts'ih'un un'a lhts'un 'uhoot'e' 'et ubudáni'.

<sup>18</sup> 'Et huwa Sizi Gri 'en be wheni nawh didowhne 'ilho za ts'uzdli' whe Ndoni, 'en be neBá netl'ahón'ai whe ts'iyawh oots'uztoodilh ha.

*Christ 'en tse yoh ook'uwhuz'ai-un unli*

<sup>19</sup> 'Andit ndóohoont'oh, 'uts'un whut'enne 'ink'ez 'uts'un keyoh whut'enne ahli inle', 'et 'andit 'et 'aw ndúlhaht'oh. 'Et k'us Yak'usda ooch'e'ne bubulh didowhne sahlí. Yak'usda ooyoh dilhts'ine butoh aht'oh sahlí.

<sup>20</sup> Nohni Yak'usda ooyoh léaht'oh. N dunne whel'a'ne 'ink'ez Yak'usda be nus hoo'enne, 'enne ts'iyawh yoh ook'uwhuz'aine hinli. 'Ink'ez nohni 'enne whunohodalh'e', 'et huwa bubulh 'áht'oh. Christ 'en dich'oh 'uk'enus tse yoh ook'uwhuz'ai-un, 'i unli whe 'unt'oh.

<sup>21</sup> Sizi Gri 'en be njan yoh ndulcho whe ts'iyawh whuduts'o whe 'uhóolya. 'Et 'i be neMoodihti ooyoh 'on nus whudizti' suli'.

<sup>22</sup> Nohni cha 'en be za lhadúlyane ahli. 'Et whe Yak'usda Ndoni be nohyudinda.

### 3



<sup>1</sup> 'Et whu la gha ts'e Si Paul nohni 'udun yun k'ut whut'enne nohba Christ, Sizi ts'utni-un, 'en ba 'ust'en. 'Et huwa 'adin'ai-un usdli.

<sup>2</sup> 'Et Yak'usda dich'oh ye unzoo-i, 'i nohni nohba sghant'ai, 'et whulh údahts'o de.

<sup>3</sup> 'Ink'ez sba whe hódiltsai-un, 'et 'i be dahoont'oh-un huwa Yak'usda sut'eoonalhdzin, ndi buba whe' hoont'oh hooyoh-un huwun. 'Et cha la whulh údahts'o. Whutso da' khuni ntsool-iyaz be nohts'ó k'e'isguz.

<sup>4</sup> 'Et ook'uyalhduk de, Christ 'en gha buba whe' 'unt'oh hooyoh-i, nts'en'a la t'eoonúszun, nohni cha whuz un'a t'ewhuntihzeh.

<sup>5</sup> 'Uda' niz dak'ez ndi yun k'ut whut'enne ndet 'uw'húlhni-un, 'aw t'eluhonizil inle'. 'Et 'andit dzin ts'ih'un un'a ts'iyawh t'ets'onanzin. Ndoni be Yak'usda ba whel'a'ne 'ink'ez Yak'usda be nus hoo'enne, 'enne ts'iyawh bubut'eoonalzhin.

<sup>6</sup> 'Udun yun k'ut whut'enne 'ink'ez Lizwifne, 'enne cha 'ilho yust'e hoole' huba' hoont'oh. 'Ink'ez Yak'usda, Christ 'en be ndi khuni unzoo-i, 'i be nets'u hooszi. Wheni ts'iyawh neba' hoont'oh whe' hoontoh.

<sup>7</sup> Khuni unzoo-i be 'ustle-un susdli'. Dahoont'oh hukw'un'a Yak'usda ye ulhtus-i, 'i be 'uw'hut'en, 'et whuz un'a ye unzoo-i, 'i be st'ahóolts'ut.

#### *Whe' hoont'oh hooyoh-un ts'et hahóolts'ut 'et huwun*

<sup>8</sup> Si hoonts'i, Yak'usda ooch'e'ne ba nyo 'unt'ohne, 'enne buba nyo 'ust'oh hukw'un'a 'ududuzdzun 'et ndunúszun. 'Et hoonts'i ndi Yak'usda ye unzoo-un, 'et sghá whults'ut. 'Et 'i be 'udun yun k'ut whut'enne, khuni unzoo-i be ndúwhulcho budutásnelh. Christ Ye dizti'-i hooncha k'et, 'aw whu la toh hooloh, 'et huwun budutásnelh.

<sup>9</sup> 'Et whe la buba whe' hoont'oh hooyoh-un, 'et 'i be ts'iyanne 'alghoh 'ilho didowhne ts'ooole'. Soo 'udechoo whuts'un, Yak'usda ts'iyanne buch'á whuntiz'i. 'Ink'ez ts'iyanne dune honilh'en ubutiselh ha. 'En 'uja Sizi Gri 'en be ts'iyaitsuk inla.

<sup>10</sup> 'Et whe la yak'uz ts'e mbene la 'udetso whudilhdzuhlne, 'ink'ez mbene la moodihne, 'enne ts'iyawh Yak'usda ba 'ilhunaoosdilne bugha ndo Yak'uz dilhts'ine, Yak'usda ye whunih-i ts'iyawh ndet 'uw'húlhni-un bubut'ewhuntilhzeh.

<sup>11</sup> 'Udechoo whuts'un neBá 'uninzun-un, whuz un'a Christ, Sizi ts'utni-un, 'en neMoodihti, 'en gha 'uhóonla.

<sup>12</sup> 'En be 'aw whélhts'oojoh whe be 'alha' hoont'oh-i, 'i gha 'aw whelhts'uniljut whe neBá oobut néztiyalh.

<sup>13</sup> 'Et huwa nohts'u tedusdli, nohba dzoh nususzut-un huwa, nohdzi k'oh 'ooneh junih, 'et nohts'u hukwa' dusni. 'Et whe la whunólhni.

#### *Whe' hoont'oh hooyoh-un ts'et hahóolts'ut neba hooncha*

<sup>14</sup> 'Et huwa Sizi Gri neMoodihti ooBá, 'en oobut sgwutsi be nenúsyá.

<sup>15</sup> 'Boozí' gha mbene la yak'uz dilhts'ine 'ink'ez ndi yun k'ut khunane cha, 'enne ts'iyawh buzkehke hoodzi.

<sup>16</sup> 'En ts'un ndiz un'a nohba tenadusdli, Ye dizti'-i, 'i hooncha k'et 'aw uzdooni' ait'oh, 'et 'uw'hultsuk Ndoni gha ye ulhtus-i nohgha íta'alh. 'Et whe la nohyughi unli-i, 'i be ulhtus tiléh.

<sup>17</sup> Be nebe 'alha' hoont'oh-i, 'i be Christ nohdziyo whutit'elh. 'Ink'ez be nek'ets'intsi'-i, 'i be ndi yoh ook'uw'huz'ai-i, ooghih hoonli k'un'a duts'o.

<sup>18</sup> 'Et whe Yak'usda ooch'e'ne bubulh nohni cha Sizi Gri be nek'ets'intsi'-i, soo cho be t'éwhuntihzeh, dádiltel 'ink'ez dadilyiz, dádiltai cha 'ink'ez ndo dawhuldzoh ts'e cha, 'et 'ulcho-i be.

<sup>19</sup> Christ ye nék'entsi'-i, hooncha k'et, 'aw t'ets'onózin ait'oh, 'i be la t'eoonoohzeh. 'Ink'ez ndai la Yak'usda yé dizbun-i, 'i be la doohbun.

<sup>20</sup> 'Et 'awet neBá ndet la oots'o hukwa' ts'utni-un 'ink'ez howu nuni uznuzut-un cha, 'et 'on nus 'ultsuk-i negha tilelh whe 'unt'oh. Ndai la Ndoni ye ulhtus-i neyoh 'unt'oh, 'et 'i be' whut'en.

<sup>21</sup> 'Inka ndi yun 'etsul 'utinelh whuts'un 'ink'ez hukw'elh'az 'ilhez wheni, 'et whuz un'a Christ, Sizi ts'utni-un, 'en ba 'ilhunaoodúlhne neBá uzdólhti' huba' hoont'oh. 'Et ndo honeh.

## 4

### *Ilho 'oohle'*

<sup>1</sup> Si neMoodihti ooba 'adin'ai-un 'ust'oh. Njan Yak'usda dutihjih ha nohka' dani, 'et huba soo úlhdzoo' whe whuz toohdilh, 'et nohts'u hukwa' dusni.

<sup>2</sup> 'Ahoohlyiz yo 'údudulhdzun, 'ink'ez nanilhtsulyaz né'lhooh'en. Dzoh nahdeh-un whuts'udoohtni junih. Lhk'ehtsi' whe 'ilhoh dune oohle'.

<sup>3</sup> Ndoni 'en be ts'iyawh lhulh dune oohle'. Ts'ih'un un'a lhts'un 'ooh't'e', 'i be 'ilho 'oohle'. 'Et 'i be nohdzi ndulcho-i be whuz un'a za hukwa 'ooh't'en.

<sup>4</sup> 'Ilho yust'e ts'uzdli' 'ink'ez 'ilho Ndoni neyudinda. Nts'en'a la Yak'usda dutihjih ha nohka' dani 'et hukwa tse hóhle'.

<sup>5</sup> 'Ilhoghun neMoodihti 'ink'ez be néba 'alha' hoont'oh-i, 'i cha 'ilho za. 'Ink'ez 'ilho za be too be' ts'ul'ih-i hoonli.

<sup>6</sup> 'Et 'ilhoghun Yak'usda, 'en ooba 'alha' hoont'ohne, ts'iyawh buBá unli. Ts'iyai an ndo 'unt'oh 'ink'ez wheni ts'iyawh netoh 'ut'en. 'Ink'ez nohni ts'iyawh, 'ilhoghun ahli whe nohyudinda.

### *Ndai la Christ negha ínla-i*

<sup>7</sup> 'Et Christ, 'ilhone ts'inli whe ndi yun k'ut lhelhdun huwa ts'ana-un, ye unzoo-i, 'i be negha óoninla.

<sup>8</sup> 'Et huwa Yak'usda ooghuni nja dutni, 'oh da' Christ yoo do whenya whe nyoonne nabilhchukne, whuz whe nábanla. 'Ink'ez dunene bugha' ninla.

<sup>9</sup> 'Andit nohdutásnelh daja ni whe 'utni. Tulalhgus k'ut dazsai whe yaid-lanne toh ts'e whenya, 'et 'uwhúlhni.

<sup>10</sup> Mbe la ndun nyo whenya-un, 'en za 'udedo yak'uz whenája. Whuz ts'iyaitsuk lhadútileh ha.

<sup>11</sup> 'En za 'ut'en, whulohne cha whel'a'ne butl'a hón'ai. Whulohne cha nus hoo'enne butl'a hón'ai. 'Et whulohne cha khuni unzoo-i be yahutilhduk-un, 'et butl'a hón'ai. 'Ink'ez whulohne cha Yak'usda ba 'ilhunaoodsilne bughu tilelh 'ink'ez dune hodutilh'ehne, 'et cha butl'a hón'ai whe' hut'en.

<sup>12</sup> 'Et whe la Yak'usda ooch'e'ne lhadúlyane nabalhtsih. 'Et whuz un'a Sizi Gri be 'ustléne 'ut'en 'uhuyulh'en 'ink'ez Christ ooyust'e nus za lhe'iltus, 'et wheni 'uhut'en.

<sup>13</sup> 'Et njan whuts'un ndet be neba 'alha' hoont'oh-un cha, 'ink'ez ndet t'ets'oninzun Yak'usda ooYe' ghun, 'et whuts'un ts'iyawh 'ilho 'uztileh. 'Et whuz un'a soo lhadúlyane uztileh. 'Ink'ez Christ nts'en'a soo 'et ndunt'oh-un, 'en ook'oh ts'e hukw'un'a uztinelh.

<sup>14</sup> 'Aw 'on 'un ts'oodunne k'un'a lhe'ts'oost'e' 'et huwa. Dune buka hóodilhts'i nabonti'ah ha. Lhents'un un'a dune hubohodulh'eh, 'i be 'ants' i nilhts'i k'un'a lhelh ts'u náhutukuk le'hut'en.

<sup>15</sup> K'us ndet khuni 'alha' 'unt'oh-i, be lhk'ets'utsi'-i, 'i be yats'ulhduk, 'ink'ez Christ netso whudilhduh-un, 'en ts'un soo cho uznooyeh hukwa' ts'ut'en.

16 'En be ooyust'e ndulcho lhkayánla. Whuz un'a ye ulhtus-i be lhootun. 'Et ts'iyawh lhghu naoodilghuz-un 'i be' whut'en 'Et whuz un'a za 'uw'whut'en de, 'et de ooyust'e be lhk'ets'utsi'-i, 'i be 'on nus ulhtus 'ink'ez unzoo tileh.

### *Andidun-un dune*

17 'Et huwa njan huwun nohdutasnelh, neMoodihti nalh 'udusni, 'udun yun k'ut whut'enne 'aw lahoot'oh hukw'un'a nuni hunudeh. 'Enne buk'un'a ooh't'e' junih.

18 Bubeni tsalhgus yo 'unt'oh, 'et huwa Yak'usda ye khuna-i ch'oh 'uhint'oh. 'Aw hoonli t'ehonuszun, budzi duts'un suli' 'et huwa.

19 'Aw ts'iyantsuk hukw'u ní lhonulhdzut. Ts'iyantsuk whulahuditni. Buyust'e whuts'u nint'i-un, 'et za hukwa' hununzun. Soo hunint'i whe 'ut'en dutsun-i 'uhutilh'elh, 'et za whuts'ó nint'i.

20 'Et hoontsi' nohni Christ 'aw doohoont'oh-un ooghun lhuhodúl'h'el.

21 'Alha 'i be 'et whuz un'a ndunuszun, 'en ghun whulh 'údahts'o 'ink'ez 'en be hodilh'e', nts'en'a whu la Sizi be 'alha' nudzun-i unli 'et huwa.

22 'Et 'uda' dats'int'oh la inle', 'et ts'iyawh 'etsul 'uw'wahleh 'ink'ez ch'az whúnulht'i. 'Et duhoont'oh-un, 'et ts'iyawh tube hoontsi' whe' hoont'oh. Ndet la whuts'u náht'i-un, 'et whe naniht'a.

23 'Ink'ez noheni be howu nuní nahzut-un, 'et dúwhulcho 'andit-i nahoolht-selh.

24 'Et 'andit hukw'un'a yun k'enaihdiilh, 'et whuz un'a whulhchoot. Yak'usda be 'ut'en k'oh 'uhoont'oh. Ndiz un'a Yak'usda 'uhóonla, ndet la ts'ih'un 'uhoont'oh-un, 'ink'ez ndai la khuni 'alha' 'unt'oh-i 'et whe lubeshi ooghu hooloh, 'et whuz un'a neba 'uhóonla.

### *Yak'usda ooyughi khun oodach'e 'oohneh junih*

25 'Et huwa 'ilhone ahli whahts'it-un 'etsul 'udóhni! 'Ink'ez 'andit whuts'un 'ilhone ahli whe nohenghoh whut'ine bulh, 'enne cha khuni 'alha' 'unt'oh-i, 'i be bubulh yaoolhduk, ts'iyawh 'ilho didowhne ts'inli, 'et huwa.

26 Nohuhuske be lubeshi olhchoot junih. Khun te hunúl'hch'e whe te sa yo tó'alh junih.

27 Khun te netsudule hukwa' ninzun tune' nohoolh'en junih.

28 Mbene la 'undunut'ihne, 'enne ts'iyawh 'etsul 'uhooneh, 'ants'i 'uhoot'en, 'et de la buba 'uk'elha hole'. Ndai la dula be hoonzoo-un huwaóona'. 'Et de la dune hoonli undunidzitne hoonli be bula 'ooneh.

29 Khuni ntsi'-i be yaoolhduk junih. 'Et khuni unzoo-i hiye yalhduk-i, 'i be 'on nus hiltus hutileh, 'i be yalhduk. 'Et de la mbene la nohoózilhts'aíne, 'enne buba hootázoo'.

30 Yak'usda ooyughi khun oodach'e 'oohneh junih. 'En nohbe hóodat'en nohulhtsi ndet dzin nanohootakulh-un 'et wheni.

31 Ndet la nohba dzoh 'uhoont'oh-un, 'ink'ez huske k'et 'ants'i nohdzi dízk'un leaht'oh, 'ink'ez huske cha, 'ink'ez 'i be 'ahoolhyiz lhulhúzahke cha, 'ink'ez 'ahoolhyiz lhghú yalhduk, 'ink'ez dune ts'u dahni-un cha, 'i ts'iyawh ch'a nasulhye.

32 'Ink'ez nohni ts'iyawh lhts'u noóhzoo', 'ink'ez ts'iyantsuk whe nohdzi 'óolhdzoo' whe lhgha te'untihdzin, 'ink'ez nts'en'a la Christ, 'en be Yak'usda nohlubeshi nohba yuna'alhde, 'et nohni cha whuz un'a za 'ilhone ahli whe lhba 'un whutoolhdilh.

1 'Et nohni Yak'usda yuk'entsi'ne aht'oh, 'et whe 'en buzkeh ahli, 'et huwa ook'oh túne' ooht'en.

2 Be lkh'ets'utsi'-i, 'i be ndi yun k'ut dúlhts'i. Nts'en'a la Christ whe nék'entsi' whe neba butl'a' dudilti, nohni cha whuz un'a za 'et ndóhneh. Neba daja whu la Sizi whe khuna-un, 'et Yak'usda ba 'et whuladitni wheni neba. Christ neba daja la Yak'usda ooba hoonzoo 'ink'ez hóont'i'.

3 'Et hoonts'i ndet whe la ninta' aht'ih-un, 'ink'ez 'ut'en dutsun-i cha, k'us 'uyoon dune ch'e' ha' nahzun, 'i cha, 'aw hoontsool-unyaz, hoonts'i nohni nohtoh 'et whuz un'a ndóht'en junih. Ndunt'i-i nohtoh hóle' junih. Nohni Yak'usda ooch'e'ne ahli 'et huwa whuz un'a ndi yun k'udólhts'i' huba' hoont'oh.

4 'Et ndai la dutsun-i 'ink'ez la hoot'oh-i be yats'ulhduk. Hoontsi' whe dlo k'unezduni-un cha, 'et ts'iyawh 'aw whuz un'a nohba lhe'hóot'oh. 'Et k'us tube cho Yak'usda ts'un musi dahni.

5 Njan t'eonahzun, mbene la ninta' 'ut'ihne, k'us 'ut'en dutsun-i 'ulh'enne, k'us 'uyoon dune ch'e' ha' ninzunne, 'enne 'uk'elsti ts'u tenadudline bubúlh hulhgha 'uhint'oh, 'et 'enne ts'iyawh, Yak'usda 'ink'ez Christ, nts'e la lerwe unli, 'aw hoontsool-unyaz hoonts'i 'aw bughá hokat ait'oh.

6 Khun dune khuni lait'óh-i be nohnoo'ah junih. Ndunt'ohne Yak'usda yé huske-i, Yak'usda yuk'unulhe'ust'enne buk'éduatals'ulh whe' hoont'oh.

7 'Et huwa buts'ú nedohdilh junih.

### *Hoot'en-i niz nohdilh*

8 'Oh da' tsálhgus yo dúlhts'i inle' 'et huwa. 'Et 'andit neMoodihti, 'en be hoot'en-i nohba sulí. 'Inka ts'oodunne be hoot'en-i niz nuhúdilh 'et ndóht'e' huba' hoont'oh.

9 Ndoni be 'ut'en k'oh, ts'iyantsuk ndet hoonzoo-un, ts'ih'un un'a 'uhoont'oh-un cha, 'ink'ez khuni 'alha' 'unt'oh-i, 'i ts'iyawh Ndoni búlh oots'u hawhúkat 'úhoont'oh whe' hoont'oh 'et huwa.

10 'Et ndaht'en de, 'et whuz un'a la neMoodihti hoont'i' tilhtselh.

11 Tsalhgus yo dílhts'ine bube 'ut'en k'oh ndúwhulcho whe 'aw lhe'hóozoo'. Khun buts'u nedohdilh junih, k'us ndut'enne hukwa' budáhni.

12 Ndet whunist'i whe ne'hut'en-un, 'et hukwaya hoonli k'et, 'aw whulohkhun howu yats'oolhduk ait'oh.

13 'Et hoonts'i ndai la ts'iyanne t'ewhunilhdzin-un, 'et ndi Yak'usda be hoot'en-i, 'i be t'eonudzih. 'Et nts'en'a la ts'iyanne t'ehonanzin, ndi Yak'usda be hoot'en-i, 'i be 'uwhut'i.

14 'Et huwa nja dutni,

“Mbe la usti-un ts'enindzit!

Yaidlanne toh dunadindaih.

'Et de la Christ oots'u hayánduz-i,

'i la nk'édodi.”

### *Whunih be yinka dúlhts'i*

15 Soo cho khahdli. Whunih be yinka dúlhts'i. Whusnine k'un'a iloh. K'us whunihne k'un'a 'ooht'e'.

16 'Andit dzin whudizulh-un 'ahoolhyiz dune tank'us uhit'elh za' hut'en. 'Et huwa hoondukw-unyaz neba 'et whuz'ai-un, 'et ts'ih'un un'a 'uts'uhoolleh hukwa' ts'oot'en.

17 'Et huwa khun ilóh tune' ooht'en junih. K'us neMoodihti 'en ndet la nohts'u hukwa' ninzun-un, 'et za t'eonahzeh hukwa' aht'en.

18 Khun te tanoohntnai' junih. 'I be be khahna-i ninta' 'ulh'ih. 'Ants'i Ndoni be dahbun.

<sup>19</sup> Yak'usda ooghuni be ahjun. Shun teni' uznilhzun-i, be cha ahjun, 'ink'ez Ndoni shun be ahjun. Nohdzi yo whe nohMoodihti shun be dúlhti', 'et whuz un'a lhlulh yalhduk.

<sup>20</sup> Sizi Gri neMoodihti, 'en boози' be Yak'usda 'en 'uBá, 'en ts'un ts'iyantsuk hawun 'ahoolhyiz musi dahni.

<sup>21</sup> Yak'usda ts'un te'nahzun 'et whe nohni 'alhgoh lhudúlhti' whe 'ilhoh dune oohlhe'.

*Ndi yun k'ut lghuzdilhts'i-un 'ants'i Christ 'ink'ez oolugliz duwhult'oh*

<sup>22</sup> Nohni mbe la ookike hoonine, nohnich'oh nohkike buk'une' aht'en. 'Et nts'en'a la neMoodihti ooghuni ulhchoot, 'et whuz un'a 'ooht'e'.

<sup>23</sup> Nohkike 'enne nohtso hudilhdzulh 'et huwa. Nts'en'a la Christ, Yak'usda ba 'ilhunaoodulhne butso-un unli, 'et whúz un'a 'et ndúhoont'oh. 'Ink'ez Christ, wheni ooyust'e 'uts'int'oh, 'en neulhyis-un 'unt'oh.

<sup>24</sup> 'Et huwa wheni Yak'usda ba 'ilhunaoodulhne, nts'en'a la Christ nean do 'unt'oh ook'une' ts'ut'en, 'et whuz un'a ts'ekoo cha didutch'oh dukike ts'iyantsuk whe buk'úne' hoot'en.

<sup>25</sup> Nohnihch'oh noh'atke buk'eohtsi'. Nts'en'a la Christ wheni Yak'usda ba 'ilhunaoodulhne nek'entsi' k'et neba huwá' dudulti.

<sup>26</sup> 'Et whe la Christ neba daja la, wheni Yak'usda ba 'ilhunaoodulhne Yak'usda ba 'udun nenéninla. Soo ts'ih'un too za-i k'un'a dughuni be ootsun hoolohne naneulhtsi.

<sup>27</sup> 'Et whuz un'a wheni Yak'usda ba 'ilhunaoodulhne soo 'uk'enus lhadint'ohne ts'inle whe Christ dich'oh dubut nenételeh. 'Aw tsunyaz hoonts'i nek'ut be lhuóodast'en. 'Ink'ez 'uts'un un'ayaz hoonts'i lhets'ít'oh. 'Et whuz un'a 'et dúts'ot'en uztileh. 'Ink'ez lubeshi ooyit uztit'elh, 'aw whuz un'a nek'ehóota'alh-un hootaloh.

<sup>28</sup> 'Et whuz un'a dunene du'atke buk'ehootsi'. 'Et dahint'oh la dich'oh k'enahutsi', whuz un'a za du'atke cha buk'ehootsi' huba' hoont'oh.

<sup>29</sup> 'Et 'aw 'ilhoghun dune dich'oh duyust'e ts'u dutnine hooloh k'us dich'oh duyust'e soo cho né'yulh'en. 'Et whuz un'a za neMoodihti Yak'usda ba 'ilhunaoodulhne ts'iyawh bughunli.

<sup>30</sup> Christ ooyust'e ndulcho whe wheni ts'iyawh whuloh ts'inli 'et huwa.

<sup>31</sup> Njan 'et huwa, dune dubá 'ink'ez duloo cha buch'a ooya' 'ink'ez du'at za yulh 'oot'e' 'ink'ez nahúlt'o 'ilho za hoole'.

<sup>32</sup> Ndi buba whe' hoont'oh hooyoh-un, 'et hooncha whe' hoont'oh. 'Et daja dusni whe' dusni, mbe la Christ ts'utni-un 'ink'ez Yak'usda ba 'ilhunaoodulhne, 'enne 'ubudúsní.

<sup>33</sup> Njan 'et doo cha za nohdutasnelh, dáhoont'oh whe ts'iyawh nohnich'oh k'enahtsi', 'et whuz un'a za noh'atke buk'eohtsi' huba' hoont'oh. 'Ink'ez nohni ts'ekoo nohkike soo cho ubudólhti'.

## 6

*Ts'oodunne uznulhyeh-un*

<sup>1</sup> Ts'oodunneyaz nohni cha neMoodihti 'en gha nohdusneke buk'une' 'oohten. 'Et ts'ih'un un'a 'uhoont'oh whe' hoont'oh.

<sup>2</sup> Nohbá nohloo bulh budólhti'. Ndi khuni 'i 'udechoo netl'áidan'ai-i 'ink'ez nets'u hoozi whe 'unt'oh.

<sup>3</sup> Et huwa 'i be sa' ndi yun k'ut khutihnalh 'ink'ez ts'iyantsuk whe sóo' tiht'elh, 'et nohts'ú hoozi.

<sup>4</sup> 'Ink'ez nohni dune buzkeh hoonline, nohuzkeh khun hubunólhch'eh junih. 'Et hoonts'i neMoodihti whuneoodulh'eh-un, 'et 'i be soo cho bugha dahni, 'et whuz un'a dubun dunólhyeh

*'Ulhane 'ink'ez moodihne cha soo cho ne'lhulh'en*

<sup>5</sup> 'Ulhane nohni cha, nts'en'a la Christ nohdzi ndulcho-i be ook'une' aht'en, 'et mbene la ndi yun k'ut nohmoodih online, 'enne cha whuz un'a za najut be dahtlut whe buk'une' 'oohten.

<sup>6</sup> Nohmoodih nohnih'en whe ahcha na'dudulh'i de, 'et whuz un'a ndaht'en iloh, k'us Christ be 'ulhnane sahli' whe nohzul 'ink'ez nohyust'e ndulcho-i be ndet Yak'usda nohts'u hukwa' ninzun-un, 'et hukw'un'a 'ooht'en.

<sup>7</sup> Noheni hoonáht'i' whe neMoodihti ba 'ulhnane ahli, 'aw dune ba 'ulhnane lháhlöh.

<sup>8</sup> 'Et ts'iyawh 'ilhone ahli whe t'oonáhzun, dune 'ulhnane k'us 'ulhnane bula nahuditnine hoonts'i, 'ut'en unzoo-i ahla, 'et whuz un'a neMoodihti ts'un nohba k'elha whutáleh.

<sup>9</sup> 'Ink'ez mbe la moodih online, nohni cha nohdutasnelh, nohbe 'ulhnane bube' 'oonulhjoot-un whuladahtnih. T'oonuhzun nohnich'oh nohMoodihti, 'en ndo yak'uz usda 'ink'ez 'en oonalh ts'iyanne lhulh hulgha 'uts'int'oh whe' ts'int'oh.

*Nts'en'a netsudule ooch'a 'uznilhde*

<sup>10</sup> Sulhutsinke, ndi khuni 'udek'ez-i 'unt'oh 'i be nohbulh yatisduk. NeMoodihti, 'en bé ts'ilhtus. Ndai la yé ulhtus-i, 'i be ts'ilhtus.

<sup>11</sup> Lhts'utigan wheni be sóo nazdutitneh-i huba, Yak'usda negha ininla-i, ts'iyawh be soo nadahtneh. 'Et de la netsudule ye 'uyoo unli-i, 'aw nohch'a' oolhdeh ait'oh.

<sup>12</sup> 'Et ndi yun k'ut yinka dune'ne iloh bubulh lhets'údulh. 'Et k'us ntsi-i nududehne, 'enne ndo yak'uz ndus de haíndilne cha, 'ink'ez mbene la 'udetso whudilhdzulhne cha, 'ink'ez ntsi'ne yat whumoodihne cha, 'ink'ez ndi yun k'ut tsálhgus yo whumoodihne, 'enne ts'iyawh 'alhgoh 'et hbulh lhets'údulh whe' ts'ut'en.

<sup>13</sup> 'Et huwa lhts'utigan wheni be sóo nazdutitneh ha negha ininla-i, 'i ts'iyawh be soo nadoohtneh huba' hoont'oh. 'Et whe 'oh de hoonts'i-un whusahónzut de, 'aw nohch'a' oodeh ait'oh. Ts'iyawh lhadáhja de, 'et de soo cho nudútalhyalh!

<sup>14</sup> 'Et huwa dudahdilh 'ink'ez nohts'i toh ndai la khuni 'alha' 'unt'oh-i, 'i be soo cho tsunadulh'oooh. Nohyust'e be ts'ih'un un'a 'uhoont'oh-i, 'i cha be náhdilh.

<sup>15</sup> Khuni unzoo-i whe nedzi ba be soo' hoont'oh-i, 'i be 'ants'i be óoh'es le'ooohneh.

<sup>16</sup> Ndi neba be 'alha' hoont'oh-i, 'i 'ants'i ne'i súbale'unt'oh. 'Ink'ez ólhchoot. 'I be k'aza kwun le'unt'oh, 'i ntsi'-un nets'ítutsoh ndi neba be 'alha' hoont'oh-i, 'i be la nanoohlhoh.

<sup>17</sup> Ndi be uzdujis-i, 'i be úznih'ai le'ts'int'oh. 'Ink'ez Ndoni oosaluzti, 'ohwhi ulhchoot. 'I Yak'usda ooghuni 'unt'oh.

<sup>18</sup> Be tenadudli-i, 'ink'ez Yak'usda ts'un teni' uznilhhdzun-i cha, 'et whuz un'a tenadahdli. Ndoni 'en be za 'ahoolhyiz 'etsul lhe'duzíhni whe tenadahdli. 'Ink'ez nts'oh dawhut'en 'et hoonts'i, huwahli whe Yak'usda ooch'e'ne, 'enne ts'iyawh buba tenadahdli.

<sup>19</sup> 'Ink'ez sich'oh cha soo cho sba tenadahdli. 'I be khuni unzoo-i sgha tíkulh 'ink'ez 'aw whelhusaz whe ndi khuni 'i be yatisduk. 'Et whe la be whe' hoont'oh hooyoh-i, 'i ghun 'onghohne daja ni-un, 'et ts'iyawh whubuntistun.

<sup>20</sup> 'Et whe Yak'usda ba usyin-un 'ust'oh, 'adus'ai hoonts'i. 'Inka soo cho sba tenadahdli. 'Et whe 'aw whelhusaz whe 'uyoonne cha bubulh yatisduk, 'ink'ez si ts'ih'un un'a 'uwhtisdlelh.

*Ye unzoo-i nohbulh 'óot'e'*

<sup>21</sup> Si nts'en'a la dast'en 'ink'ez si sts'un sulh dahooja la, 'et Tychicus 'en ts'iyantsuk nohdutánelh. 'En 'unt'oh neulhutsin ook'ets'intsi', mbe la neMoodihti 'en ts'ih'un un'a ba 'ustle-un, 'en 'unt'oh.

<sup>22</sup> 'Et huwa ndun nohts'ú tis'a'. 'Et de la dats'út'en-un t'eoonohzeh. 'Ink'ez soo cho nohdzi hoont'i' yoolhtselh.

<sup>23</sup> Nohni sulhutsinke ts'iyawh be nédzi dizghel-i nohgha tíkulh. Yak'usda neBá 'ink'ez Christ neMoodihti 'en be, be nék'etsints'-i, 'ink'ez be 'alha' hoont'oh-i, 'i bulh nohgha tít'alh.

<sup>24</sup> Mbene la Christ neMoodihti soo 'alha 'i be yuk'entsi'ne, 'enne ye unzoo-i bubulh utit'elh. 'Et ndo honeh.

## Paul Philippi Whut'enne Buts'ó K'eyanguz-i

### *Paul Philippi whut'enne, hadih, ubulhni*

<sup>1</sup> Wheni Paul 'ink'ez Timothy 'et Sizi Gri be 'ulhnane ts'inli. Nohni keyoh Philippi whut'enne mbene la Christ, Sizi ts'utni-un, 'en gha Yak'usda ooch'e'ne 'uht'oh, 'ink'ez mbene la huwunline 'ink'ez yula 'ut'enne cha, nohni ts'iyawh hadih nohdítni.

<sup>2</sup> Yak'usda neBá 'ink'ez Sizi Gri neMoodihti, 'en ts'un ye unzoo-i 'ink'ez be nedzi dizghel-i nohgha ínín'ai, 'i ts'iyawh nohbulh 'óot'e' nohba hukwa' nuszun.

### *Nohnaznih totsuk 'et huwa Yak'usda ts'un musi dusni*

<sup>3</sup> Nohnaznih totsuk, 'et huwa Yak'usda ts'un musi dusni.

<sup>4</sup> Tenadusdli totsuk hoonúst'e' whe nohni ts'iyawh nohba tenadusdli.

<sup>5</sup> 'Udechoo dzin 'ink'ez 'andit whuts'un ts'iyanne khuni unzoo-i be yasduk, 'et whe nohni cha sla 'uht'en.

<sup>6</sup> Njan 'et sba nawh lhe'hoot'oh, mbe la nohni nohbulh ndi 'ut'en unzoo-i whe' yudilh'en-un Sizi Gri oodzin de, 'et de lhaídutíleh.

<sup>7</sup> Ts'ih'un 'uhoont'oh hukw'un'a huwun nuni nuszut. 'Inka sdzi yo 'unohusdzun. Nts'en'a dast'oh njan lhuztíh t'l'ool be whédust'i, 'et hoonts'i ndi khuni unzoo-i, 'i ba susyin 'ink'ez ts'iyanne t'ehontázin 'et 'alha' hoont'oh. 'Et whuz un'a nohni cha ye unzoo-i ts'iyawh lhundúníltuk whe lhtats'úlya.

<sup>8</sup> Yak'usda nalh nohdusni, nts'en'a la Sizi Gri dudzi ndulcho-i be nek'ets'i-i, 'et whuz un'a si cha tube nohk'énsli.

<sup>9</sup> Ndiz un'a nohba tenadusdli, be t'éoonudzun-i, 'i be cha 'ink'ez ye whunih-i cha ts'iyawh 'i be, 'et whuz un'a be nek'ets'intsi'-i, 'et lhat-un lhk'uz te nohba whutáleh.

<sup>10</sup> 'Et whuz un'a ndet la 'uk'enus hoonzoo-un, 'et t'ewhutihzeh. 'Et huwa Christ oodzin whusahóolts'ut de, 'et de nohtsun hooloh 'ink'ez 'aw whe hoonli-unyaz nohk'éholts'it-un hootáloh.

<sup>11</sup> 'Ink'ez Sizi Gri 'en gha 'ut'en ts'ih'un 'unt'oh-i, 'et whuz un'a ndutiht'elh. 'Et whuz un'a Yak'usda ba ts'odólhti' 'ink'ez 'on nus uzdólhti'.

### *Christ 'en ooghu yaduk*

<sup>12</sup> Sulhutsinke sulh dahooja la, 'et whulagha ts'e 'on nus lhane dune ndi khuni unzoo-i huyoozílhts'ai sulí'. 'Et t'ewhutihzeh hukwa' nuszun.

<sup>13</sup> 'Et huwa lerwe ooyoh whucho, ndunne saldanne 'ink'ez 'onghohne, 'enne cha, 'et ts'iyanne t'ehoninzun Christ 'en gha lhuztíh t'l'ool be whédust'i lé'ust'oh.

<sup>14</sup> 'Ink'ez mbene la neMoodihti be lhulhutsinke unline, 'enne ndi sluztíh t'l'ool 'i gha 'enne 'on nus 'ulcho-i be whéloníljut Yak'usda ooghuni unzoo-i yahutílhduk ha.

<sup>15</sup> 'Alha whulohne sghe hoolnih, 'ink'ez sondólhдах hukwa' hut'en. 'Et hoonts'i whulohne si sts'un budzi unzoo. 'Et whuz un'a Christ 'en ghu yahalhduk.

<sup>16</sup> Ndunne sghe 'oolnihne, dich'oh 'ahuninzun hukw'un'a, Christ 'en ghu yahulhduk. 'Aw ts'ih'un un'a iloh 'uhut'en. 'Ants'i 'adus'ai-un 'on nus sba hoonts'i huhoóltstselh hukwa' hut'en.

<sup>17</sup> 'Et hoonts'i whulohne 'enne be nek'ets'intsi'-i, 'i be Christ 'en ghu yahalhduk. T'ehonínzun ndi khuni unzoo-i ba njan susyin, 'et hukwa 'asodílh'ai.



<sup>18</sup> 'Et nts'en'a la yahalhduk 'et whunilhchoh sba 'ants'i 'uhoont'oh. Dich'oh duk'un'a tilah yahalhduk k'us khuni 'alha' 'unt'oh-i tilah 'uhutni. Christ 'en ghu yahalhduk 'et huwa hoonust'i'. 'Ink'ez 'et nduwihylyz 'et whuz un'a za hoonúst'i'.

*Ts'ukhuna-un, 'et Christ 'unt'oh*

<sup>19</sup> Nohni ts'iyawh t'enohtnuszun, mbene la sba tenadudline, 'ink'ez ndai la Sizi Gri ooyughi 'i be sla ewhudíja, 'et 'i be 'et huwa sla nahudutitnih.

<sup>20</sup> Ndet la hukwa tse hoosdli-un, 'et daooduzni nts'oh ne'ust'en, 'et hoonts'i 'aw hukwaya oosdle' ait'oh. 'Et k'us whutso da' ndast'en inle' la, 'et 'andit whuz un'a za 'utist'elh, 'et huwa 'aw hukwaya lhotisdleh. Khusna k'us dasusai 'et whuz un'a za be khusna-i, 'i be Christ 'et whe dústi'.

<sup>21</sup> Ndiz un'a sba nja duhoont'oh, 'awhuz khusna za 'ust'oh de, Christ, 'en za 'unt'oh. K'us dasúsaí de, 'et de whuch'a hootásdoh.

<sup>22</sup> 'Et 'awhuz khusna za 'ust'oh de, se' 'ut'en 'i mai le'tinelh. Nts'en'a 'utahaootisalh 'aw t'oonuzúszun.

<sup>23</sup> 'Et sba nawh 'uhooja njan 'et 'ants'i whulhetoh nenúts'ut. Nts'e suba hoolhtus oole', 'et whuz un'a la 'oosneh. Ndo Christ bulh natisdalh hukwa' nuszun. 'Et 'uk'enus hootázoo' whe' hoont'oh.

<sup>24</sup> 'Et hoonts'i dálhusal de, 'et 'on nus nohni nohba hootázoo'.

<sup>25</sup> 'Et whuz un'a 'uk'enus soo' hoont'oh, 'et dulcho whe sba 'alha' hoont'oh. 'Et huwa t'oonuszun dálhusal de, 'ink'ez njan za tisdalh 'ink'ez nohni ts'iyawh nohbulh za tist'elh. 'Et whuz un'a be nohba 'alha' hoont'oh-i 'on nus untiyeh, 'ink'ez 'on nus hootáht'e'. 'Et whuz un'a 'uwhutát'elh.

<sup>26</sup> 'Et whuz un'a za nohghu nánusja de, 'et de si sgha lhk'uz te Sizi Gri dutálhti'.

*Christ ba soo uznoot'i 'ink'ez 'en ba dzoh nuts'oozuz*

<sup>27</sup> Nts'oh dahooja hoonts'i, Christ ooghuni unzoo-i, nts'en'a la nohba hukwa' ninzun, whuz un'a za yun ka dúlhts'i. Khun nohbulh 'ust'oh de, k'us nohch'oh 'ust'oh de, ts'iyantsuk whe nohbulh údutasts'o nohyughi 'ink'ez nohzul bulh 'ilho za lé'unt'oh. 'Et whuz un'a za Sizi ba oohyin. Ndi khuni unzoo-i, 'et 'i be be 'alha' hoont'oh-i ts'ut'ih, 'et 'i be 'alghoh 'ants'i 'ilho za lé'ah't'oh 'et 'i be hukwa 'ah't'en.

<sup>28</sup> 'Ink'ez mbene la nohch'az ditnine, 'enne bube noolhjut junih. 'Et whuz un'a ndaht'oh de, 'et soo ts'et whucho whúbunulhtun, 'enne musai tilehne 'uhint'oh. 'Et hoonts'i nohni dujihne ahli. Yak'usda 'en nohba' hoonla.

<sup>29</sup> 'Et Christ 'en ba nohtl'ahóolts'ut, 'aw nohba 'alha' 'unt'oh za iloh, ooba dzoh nahdeh-un cha.

<sup>30</sup> 'Et huwa ndet la whe dzoh nusuzut-un, 'et whunulh'en 'ink'ez whu-dahts'o, 'et nohni cha whuz un'a za 'et ndaht'oh.

## 2

*Te'uzdudil'en whe 'alghoh 'ilho za ts'oole'*

<sup>1</sup> 'Et huwa Christ 'en nohbulh 'unt'oh nohla' tinelh ha eh? Christ ye nohk'entsi'-i, 'i be eh k'enánohni'ah? Ndoni 'alghoh eh nohbulh 'unt'oh? 'Ink'ez nohts'un únzoo eh? 'Ink'ez nohgha te'ninzun eh?

<sup>2</sup> 'Et whuz un'a 'uhoont'oh, 'inka be hóonust'i'-i ts'iyawh lhadáhla. 'Et whuz un'a hukwa' nuhzun de, 'et noheni ts'iyawh 'alghoh 'oot'e'. Be lhk'ehts'-i, 'i cha 'ilho za 'utit'elh. Nohzul bulh 'ilho sahli' le'ooht'e'. 'Et whe nts'en'a la daja nahzun, 'et 'ilhoghi za tileh.

<sup>3</sup> Nohnich'oh hukwa' nahzun te za ne'óoht'en junih. 'Ants'i yo údudulhdzun 'ink'ez 'uyoonne nohanus hínzoo noohzin.

4 Khun nohnich'oh za khun nuni noohzut junih. 'Et k'us 'uyoonne cha bughu nuni nahzut bula tiht'elh ha.

*Christ, Yak'usda unli, 'et hoonts'i te'dudil'en whe ndi yun k'ut inda'*

5 'Oh da' ndet la Christ, Sizi ts'utni-un, 'en howu nuni nuzut, nohni cha 'et za howu nuni noohdeh.

6 Yak'usda dant'oh, whuz un'a za 'unt'oh.

'Ink'ez Yak'usda yundult'oh whe 'unt'oh.

'Et hoonts'i dich'oh Yak'usda yulh hulhgha 'unt'oh-un 'aw whe lhé'dudilti'.

'Et huwa 'aw Yak'usda gho tiz'ai lhnízun.

7 'Et k'us ts'iyawh whuladitni whe be 'ulhnane dahint'oh la,

'et hóolhchoot, 'ink'ez dune dót'en suli'.

8 'Ink'ez dune dót'en whe hinilh'en

'ink'ez dich'oh ts'iyanne an yo 'unt'oh na'dudulhtsi.

Datítsah whuts'un duBá yuk'une' 'ut'en tulalhgus k'ut datítsah 'et hoonts'i.

9 Et huwa Yak'usda ts'iyantsuk whando whe yudálhti'

'ink'ez boozi' 'uk'enus hooncha hukw'un'a yoozi' whulhtsi.

10 'Et whuz un'a ndi Sizi boozi',

'i gha ts'iyanne dugwutsi be hits'un nudútalyah whe' hoont'oh.

Yak'uz whut'enne 'ink'ez ndi yun k'ut whut'enne,

'ink'ez yun t'ah 'unt'ohne, 'enne cha ts'iyawh.

11 'Et ts'iyawh lhen yoo khuni be yalhdukne,

'enne ts'iyawh nja duwhúdutinelh,

Sizi Gri neMoodihti 'unt'oh.

'Et whuz un'a nduhútni, 'et whe Yak'usda neBá,

'en hidílti' whe' hutni.

*Be hoot'en-i nulene.*

12 'Et huwa ook'esi'ne nts'en'a daht'oh nohbulh 'ust'en inle' whe Yak'usda k'une' aht'en. 'Andit 'aho 'aw nohbulh lhe'ust'oh 'et hoonts'i 'on nus 'uk'une' 'ut'enne tihleh, 'et nohts'u hukwa' nuszun. 'Et huwa soo ts'ih'un un'a nohdusni, nts'en'a la dihjiz inle', 'et whénulhjut 'ink'ez nohyust'e dutlut, 'et whuz un'a lhadáhleh hukwa 'uht'en.

13 Yak'usda 'en 'unoh'ulh'en. Ndai yuka' ninzun 'ink'ez nts'en'a hukwa' ninzun, 'oh te né'nohulh'en.

14 Ts'iyantsuk whe lhdulhyoh 'udoohni' junih. 'Ink'ez khun te lhch'a holh'e' junih.

15 Nohk'ehóotalts'ulh-un, 'et whuyit 'uht'oh 'ink'ez soo ts'ih'un ootsun hoolohne oohle', 'et whuz un'a Yak'usda buzkeh tihleh 'et whe 'aw nohk'e' holtisit aht'oh. Nduune tank'us 'unt'ohne 'ink'ez lubeshi 'uk'enus ntsi'-i 'ooleh hukwa 'ut'enne, 'enne butoh 'ulhdzis be hoot'en-i k'un'a 'ooh'te'.

16 Ndi khuni be ts'ukhuna-i, 'i za soo cho oohun. 'Et whuz un'a Christ oodzin de, dalcho-i be hootást'e'. 'Oh de de, whusúntilhtun niz de ndet la hukwa 'ist'en-un 'ink'ez ndai la 'is'en-i, 'i ts'iyawh 'aw 'ants'et lhe'úst'el.

17 'Et hoonts'i be nohba 'alha' hoont'oh-i, 'ink'ez Yak'usda ba 'aht'en-un, 'ohwhi 'ants' i Yak'usda gha t'aih-i le'unt'oh. 'I k'ut be khusna-i 'ants' i nadísjul le'ust'oh, 'et huwa hoonúst'i', 'ink'ez ts'iyawh nohbulh whúnusni.

18 'Et huwun za nohni cha hoonáht'i' 'ink'ez sulh whunulhni.

*Paul Timothy ghu yalhduk*

19 'Et Sizi neMoodihti 'en oot'aninustan whe Timothy 'aho nohts'un tis'alh. 'Et whusanája de, daht'oh la sudáni' de, 'et la hóst'e'.

20 'Aw dune yundult'ohne hooloh. 'En la soo cho nohghole'.

21 'Uyoonne ts'iyawh didutch'oh dude 'ut'en k'oh za hukwa hunuta, 'aw Sizi Gri be 'ut'en k'oh iloh.

22 'Et hoonts'i Timothy nts'en'a la dune unli, nohni ts'iyawh t'eeonúhzun. Dune ooye' nts'en'a la dubá yula 'ut'en, 'et whuz un'a za 'ulhna k'un'a ndi khuni unzoo-i, 'i be lhla 'ít'en.

23 'Et huwa 'et njan nts'en'a sulh daootanelh-un, 'et nawhus'ai de, 'aho tilah nohts'ún tóos'a'.

24 'Et hoonts'i neMoodihti 'en oot'anínustan si cha 'aho nohts'u tisyalh nuszun.

### *Paul Epaphroditus yudálhti'*

25 'Et howu nuni nuszut, Epaphroditus 'en nohts'u tóos'a' huba' hoont'oh. 'En neulhutsin 'unt'oh. Sulh 'ut'en-un cha 'unt'oh 'ink'ez 'ilhoh salda ídli. 'Et nohni nohba khuni na'á-un cha unli. 'En 'unt'oh ndet hukwa' nuszun-un, 'et whunilhchoh whe sla 'ut'en.

26 'Oh da' ndun bulh údachts'o nduda inle'. 'Et huwun oodzi únduda 'ink'ez nohni ts'iyawh nohk'éninli.

27 'Ink'ez 'alha tube ndida'. 'Ankw'us dazsai, 'et hoonts'i Yak'usda yugha té'ninzin. 'Aw 'en za iloh, si cha sgha té'ninzun. 'Et huwa 'on 'un lhan'un te ts'odi lhúsdloh.

28 'Et huwa 'aoodunih be nohts'u whes'a'. Ah'en de, 'et de la hóht'e'. 'Ink'ez la 'aw tube sdzi lhundoosdoh.

29 'Inka neMoodihti 'en gha hoonáht'i' whe yoh danúlhtih. 'Et ndunt'ohne, ubudúlhti'.

30 'Et Christ 'en be 'ut'en k'oh huwa, 'ut'en ooba lhai k'et, 'ankw'us dazsai. Dich'oh ye khuna-i, 'i hoonts'i ooba 'ants'i yint'oh. 'Et huwa ndet whe sla tihnelh inle', ndai la be sla lhe'áhnél-i, 'i ts'iyawh dich'oh be sla 'uja.

## 3

### *Christ 'en za ba ts'oot'en*

1 Sulhutsinke njan 'et 'udek'ez-un 'uhoont'oh, 'et nohdusni. NeMoodihti 'en bulh ts'ónilhni! N dai la nohts'ó k'egus-i, 'i za 'unt'oh. 'Et hoonts'i sba 'ants'i hoonli, 'ink'ez bé dóohjih sih.

2 Mbene la lhike dult'ohne buch'a huwahli. 'Ink'ez 'ut'en ntsi'-i 'ulh'enne, 'enne cha buch'a huwahli. 'Ink'ez mbene la yané'dudut'asne, 'enne cha buch'a huwahli.

3 'Et wheni ts'ih'un un'a ts'ot'az 'et huwa. 'Ink'ez wheni Ndoni 'en be Yak'usda ts'un teni' uznilhdzun. 'Ink'ez Christ, Sizi ts'utni-un, 'en ba ts'odilhti'. 'Ink'ez neyust'e k'oh ts'e 'et 'aw whut'anílhts'unítan.

4 'Et hoonts'i si cha hukwa' nuszun de, syust'e k'oh ts'e, 'et za whut'aninustan 'et hoonts'i hukwa lhe'núszun. Soo cho whunulh'en, 'et 'uyoonne cha duyust'e k'oh ts'e 'uhint'oh, 'et si 'on nus whuz un'a 'ust'oh.

5 Whuzusdli whuts'un lhk'udit dzin 'et nts'en'a la ooka dune ts'inli k'ut nehoot'as, 'et ndusíhinla. Israel oots'u hainzut-un usdli. Benjamin bulh didowhne, 'enne 'ilhoghun 'ust'oh, 'ink'ez Hebrew bughuni k'oh ts'e 'uk'enus soo yasduk-un 'ust'oh. 'Ink'ez ndunne pharaseene, 'enne dahoont'oh whe Moses be 'udustl'us k'une' hut'en, 'et si cha bubulh didowh-un 'ust'oh.

6 Soo tube cho hoolhtsh whe 'ust'en. 'Ink'ez mbene la Yak'usda ba 'ilhu-naoodulhne, 'enne dzoh nubusdeh inle'. 'Ink'ez nts'en'a la dune Moses be 'udustl'us be ts'ih'un 'unt'oh-un tileh de 'et huwa 'aw whe sk'ehóotalts'ulh-un hootáloh whe 'ust'oh.

7 'Et hoonts'i ndóohoolcho whe 'on nus sba hoonzoo sutilhtselh inle', 'et Christ 'en ba 'ants'et 'íst'en whuzdli' 'et nawhus'ai.

8 'Aw 'et za iloh 'uwhudusni, Christ, Sizi ts'utni-un, 'en sMoodihti dant'oh la t'ezninzun-un, 'et hooncha k'et 'aw uzdooni' ait'oh. 'Ink'ez ndet la dáhoont'oh ooghu t'eeonúszun-un sghu hóolhchoot-un, 'et whunilhchoh whuladisi. 'I ts'iyawh 'un tukat-i sba 'unli 'et huwa 'on nus Christ t'enooszeh ha.

9 'Ink'ez 'en ooyudúsa. Ndi Moses be 'udustl'us, 'aw 'i gha ts'ih'un dune lhúsdloh inle'. 'Et k'us Christ sba 'alha' 'unt'oh 'et huwa ts'ih'un dune susdli'. Ndi be ts'ih'un un'a be dune ts'inli-i, be 'alha' hoont'oh-i, 'i be Yak'usda ts'u hawhúts'uk.

10 'Et Sizi Gri ' en soo cho t'entiszeh hukwa' nuszun. Ye ulhtus-i, 'i be dunaidilhti, 'ink'ez dahoont'oh whe dzoh nusuzut, 'et cha t'ewhuntsizéh. 'Et nts'en'a dazsai, si cha whuz un'a za 'utisnelh.

11 'Et 'alha' hoont'oh, si cha yaidlanne toh ye dunadija-i, si cha uncha ndúsa.

### *Ndo whuz za hukwa' ts'oot'en*

12 'Awhuz 'aw whunilhchoh huba soo lhe'ust'oh. 'Ink'ez soo 'et lhadúya-un susdli', 'aw howu yalhuzusduk. 'Et hoonts'i nust'i za 'ust'oh. Di ha Christ, Sizi ts'utni-un, 'en silhchoot, 'et whuz un'a si cha itáschulh.

13 Sulhutsinke sich'oh 'awhuz hootáschulh lhnúszun, 'et hoonts'i 'ilhoghun huba za 'et ndust'en. Ndet la senghu hooskat-un, 'et 'aw howu nuni lhnuzuszut whe whunaoodíznoh. 'Ink'ez stso ts'e hoonli-i, 'i za óschoot hukwa 'ust'en.

14 Ndaí la Yak'usda Christ, Sizi ts'utni-un, ndo negha whúta'ah-un, 'et whuts'un za hukwa 'ust'en.

15 'Et huwa mbene la lhadulyane, 'enne cha whuz un'a za nuni hunoodeh, 'ink'ez nohni 'uts'un un'a unahzun de, 'et hoonts'i ts'iyawh Yak'usda t'enohwhuntihdzeh.

16 'Et hoonts'i ndet la 'uda' neghá whults'ut-un, whuz un'a za nuts'óodilh 'ink'ez lkh'un'a za nuni uznoodeh.

### *'Awet ndi yun k'ut uzdilhts'i 'et hoonts'i yak'uz nekeyoh whe' hoont'oh*

17 Sulhutsinke sk'un'a aht'en. 'Ink'ez 'uyoonne si sk'un'a neMoodihti ba yinka dilhts'ine, 'enne cha bunulh'en. 'Wheni nek'oh ts'e 'ooht'e' ha 'uts'int'oh.

18 'Et lhane 'aw whuz un'a yinka lhuwhudílts'ih. Lhat nohdásni'. Doo cha za snatsul too' hoonli whe nohdúsi, 'et ndunt'ohne, 'enne Christ ootulalhgus ch'az ditnine 'uhint'oh.

19 'Et ndunne ooba 'alha lhe'hoot'ohne ninta' hutit'elh. Bubut 'i buba Yak'usda unli. Ndi yun k'ut yooya ts'iyawh hiyulh 'unt'oh 'ink'ez 'i za hiba whudílhti'. Ndi yun k'ut hoonli-i, 'i za ghu nuni hunudeh.

20 'Wheni 'et yak'uz nekeyoh whe' hoont'oh 'et huwa. 'Et whuts'un neulhyis-un nets'u tiyalh, 'et huba néznisdil. Sizi Gri neMoodihti, 'en 'unt'oh.

21 'Ink'ez neyust'e tel'en-i, 'i duyust'e dizti'-i k'un'a 'unt'oh yutilhtselh. Ndaí la ye ulhtus-i, 'i be ts'iyantsuk ook'une' whut'en, 'i be 'uyoo just'e neba itilhtselh.

## 4

1 'Et huwa sulhutsinke ook'esi'ne nohk'énisli cha 'ust'oh. Nohni nohga hoonúst'i', 'ink'ez nohni sba be whuch'a whunde-i ahli. Ook'esi'ne, neMoodihti 'en ba soo cho núdulhya.

2 Nohni ts'ekoo Euodia 'ink'ez Syntyche, nohts'u tedusdli, neMoodihti 'en be lkh'un'a za nuni nuhzut.

*'Ithoh za ts'oot'e', 'alhgoh ts'uhót'e', 'ink'ez tenazdoodli*

<sup>3</sup> 'Ink'ez nyun ts'ih'un sts'úditni-un inli, nts'u tedusdli, ndunne ts'ekoo, khuni unzoo-i be sla 'it'enne, 'enne bula 'oneh. Clement, 'en cha, 'ink'ez 'onghohne cha sla 'it'enne, 'enne ts'iyawh ndi 'udustl'us khunane buboozi' ook'usguz-i, 'i k'ut'enne cha buboozi' 'uk'usguz.

<sup>4</sup> NeMoodihti 'ahoolhyiz 'en be whunúlhni! Doo cha za 'udusni, whunúlhni!

<sup>5</sup> Ts'iyanne dune soo ne'bulh'en. NeMoodihti whusanátidalh-un 'awet whenghoh 'úhoont'oh.

<sup>6</sup> Hoonli huwu ni oohle' junih! 'Et k'us ts'iyaitsuk ooba tenadahdli. 'Ink'ez tedahdlih, 'ink'ez musi dóhni'. Ndai la be ndunihzut-i, 'i ts'iyawh Yak'usda ts'un ooka' dahni.

<sup>7</sup> 'Ink'ez Yak'usda be nedzi dizghel-i, hooncha k'et 'aw t'eznoozeh ait'oh. 'Et Christ, Sizi ts'utni-un, 'en be ndi be nedzi dizghel-i, 'i nohdzi yo 'ink'ez noheni yo cha 'et ts'iyawh yughu tileh.

*Ts'iyawh ndet la nohba whudizti'-un, 'et za howu nuni nuhzut*

<sup>8</sup> Sulhutsinke ndi khuni, 'i 'udek'ez-i 'únt'oh. Ndai la 'alha' 'unt'oh-i, ndai la k'us hóoncha-un, ndet la ts'ih'un 'uhoont'oh-un cha, di la ootsun hooloh-i, di la 'uzoo'-i, ndet la 'et nduhoot'oh-un hoonzoo whe howu yats'ulhduk, ndi ts'iyawh nohba whudizti'-un, 'et za howu nuni nahdeh.

<sup>9</sup> Ndet la si sgha whe hodilh'e-un, 'ink'ez ndai sghuni ulhchoot-i, 'ink'ez whudáhts'o-un, 'ink'ez nohnal'h 'ist'en-un, 'et cha, whuz un'a ne'ooht'en. 'Ink'ez Yak'usda be whúdzizghel-un, 'en si nohbulh 'óot'e'.

*Philippi whut'enne dahinzoo*

<sup>10</sup> 'Et sa' inle' whe doo cha za sghu nuní nahzut 'ink'ez 'ahoolhyiz snalhnih 'et hoonts'i whe sla' tiht'elh 'aw nohgha lhuwhulhtsit. 'Et huwa neMoodihti 'en be hoonúst'i'.

<sup>11</sup> 'Aw be ndunusdzit-i, 'i ooghu yalhuzusduk. Nts'en'a la dast'oh, 'et hoonts'i hoonúst'i'. 'Et whuz un'a hodiz'e'.

<sup>12</sup> T'oonuszun nts'en'a la hoonliyaz ezdunidzit, 'ink'ez lhai ust'i-un, 'et cha t'oonuszun. 'Et huwa nts'oh dahoot'oh hoonts'i sye'últ's'ilh-un, 'ink'ez unusdai-un cha, 'ink'ez 'usdlai-un cha, 'ink'ez 'endunisdzit-un, ts'iyawh t'oonuszun.

<sup>13</sup> Christ 'en 'uja be stus-i sgha nín'ai. 'En be ts'iyantsuk 'uwhus'en.

<sup>14</sup> 'Et hoonts'i dzoh nusúszut-un huwa, 'et hoonzoo whe 'ahja sla 'iht'en.

<sup>15</sup> Philippi whut'enne, nohni za sla 'áhja. 'Udechoo khuni unzoo-i be yawhenusduk whe, 'ink'ez hukw'elh'az yun k'ut Macedonia howu natsíja whe, ndunne Yak'usda ba 'ilhunaoodulhne ts'iyawh, 'aw 'ilhoghun hoonts'i hoonliyaz sgha lhi'al. Nohni za 'et ndúsahla.

<sup>16</sup> Keyoh Thessalonica 'et susda whe, ndai lhúst'i inle', nat lkh'elh'az stoo t'l'a'ih'ai.

<sup>17</sup> 'Aw hoonliyaz sgha' tih'alh-un, 'et hukw'úlhuzust'oh. Nus de nohba 'uk'elha tileh-i, 'i za nohba ooka' nuszun.

<sup>18</sup> 'Alha ts'iyai lhai ust'i. Epaphroditus 'en be ndai la stoo t'l'ahla-i, 'i ts'iyawh úschoot, 'ink'ez 'unísdaí. Sooltsun-i, 'i ndulcho whe oonawhultsun leúnt'oh. 'I huwa t'aih-i 'unt'oh. 'Et huwa Yak'usda tube cho hoont'i'.

<sup>19</sup> 'Ink'ez Christ, Sizi ts'utni-un, ye dizti'-i, 'i gha sYak'usda ndai la be ndunihdzit-i, ts'iyawh nohgha ítalelh.

<sup>20</sup> 'Et neYak'usda 'ink'ez neBá, 'en ts'un 'ilhiz wheni tube cho uzdílhiti'. 'Et ndo honeh.

*Ts'iyanne Yak'usda ooch'e'ne, 'enne ts'iyawh hadih budohni*

<sup>21</sup> Mbene la Christ, Sizi ts'utni-un, 'en be Yak'usda ooch'e'ne, 'enne ts'iyawh hadih sba budohni. 'Et mbene la sulhutsinke szih dilhts'ine, 'enne cha hadih nohuhútni.

<sup>22</sup> 'Ink'ez Yak'usda ooch'e'ne njan dilhts'ine, 'enne ts'iyawh hadih nohuwhutni. Mbene la Ceasar ooyoh dilhts'ine, 'enne soo hadih hutni.

<sup>23</sup> NeMoodihti Sizi Gri ye unzoo-i, nohni ts'iyawh nohbulh 'oot'e'. 'Et ndo honeh.

## Paul, Colossia Whut'enne Buts'ó K'eyanguz-i

### *Colossia whut'enne Paul hadih ubulhni*

<sup>1</sup> Si Paul Sizi Gri 'en be whel'a-un 'ust'oh. Yak'usda whuz un'a sba hukwa' ninzun. 'Ink'ez neulhutsin Timothy, 'en bulh,

<sup>2</sup> nohni Colossia whut'enne mbene la Christ unidulhne hadih nohts'útni. Christ 'en ooyudúlhts'i. Yak'usda ooch'e' ahli. Nohni neulhutsinke ooba 'alha' hoont'ohne ahli. Yak'usda neBá 'ink'ez Sizi Gri neMoodihti, 'en ts'un nohdzi dóghel 'ink'ez ye unzoo-i cha nohbulh óot'e' ha, 'et whuz un'a za 'ooht'e' hukwa' nuszun.

### *Dahoont'oh whe Christ, Sizi ts'utni-un, 'en nohba 'alha' unt'oh*

<sup>3</sup> 'Et Yak'usda Sizi Gri neMoodihti ooBá, 'en ts'un musi ts'utni, 'ink'ez 'ahoolhyiz nohni nohba tenazdudli.

<sup>4</sup> Nohni nohbulh uzdits'o dahoont'oh whe Christ, Sizi ts'utni-un, 'en nohba 'alha' unt'oh 'ink'ez Yak'usda ooch'e' online, 'enne ts'iyawh buk'ehtsi'.

<sup>5</sup> Ndai la yak'uz ts'e nohba 'ilhozkati, 'i ookwa tse hóhle'. 'Et huwa buk'eohtsi', 'ink'ez ts'ih'un khuni unzoo-i whutso da' bulhúdahts'o.

<sup>6</sup> Nts'en'a la khuni unzoo-i ndi yun k'ut ndulcho whe núdilh'ts'ut 'ink'ez 'i be 'ants'i 'uniz't'ai le'hint'oh. Nohni cha whuz un'a za nohghu dilts'ut. Ndet dzin 'udechoo whudáhts'o whe khuni 'alha' unt'oh-i, 'i gha Yak'usda ye unzoo-i t'ewhunihzin, 'et whuz un'a 'on nus soo náhyeh.

<sup>7</sup> Epaphras 'en 'ilhoghun be ustle-un, 'en nebulh 'ut'en-un 'unt'oh 'ink'ez ookw'ets'intsi'. 'En gha ye unzoo-i hodilh'e'. 'En nohni noba Christ 'en yuba ne'ut'en-un unli 'unt'oh, 'ink'ez 'aw nohla dootnih ait'oh.

<sup>8</sup> 'Ink'ez Ndoni be ts'iyanne k'ehtsi', neúlhni.

### *Christ 'en ts'iyantsuk whe 'uk'enus dizti-un 'unt'oh*

<sup>9</sup> 'Et whulagha ts'e 'oh da' ndet dzin whulh 'úzdants'o, 'oh da' whuts'un nohba tenazdudli-un 'aw 'etsul lhe'ts'udisni. Whuz un'a Yak'usda nohba ts'oodulh'kut whe nohts'o hukwa' ninzun-un, soo ts'ih'un un'a t'ewhunoozhéh. 'Et whe la Ndoni 'en be, be whutnih-i 'ink'ez be t'eeonudzun-i cha, 'i ts'iyawh 'i be dutihbun.

<sup>10</sup> 'Et whe la neMoodihti 'en ba soo ts'ih'un un'a ndi yun k'ut dúlhts'i. Ndai 'ulh'en-i ts'iyawh yé hot'i' la. 'Ut'en unzoo-i 'i la oots'u hayóokat, 'ink'ez Yak'usda 'on nus t'entihzéh.

<sup>11</sup> Ye ulhtus-i dizti-i, ts'iyawh 'i be 'on nus ulhtus óohle. 'Ink'ez hoonáht'i' whe soo hoonli talhodahtni 'ink'ez dzoh nahdeh-un whulh nudulhya.

<sup>12</sup> 'Ink'ez neBá musi dahni. Yak'usda ooch'e'ne be hóot'en-i toh nudilhyanne, 'enne ndai la yut'i-i bugha ítalelh-i, 'i ooloh negha tikulh, 'et wheni soo' ts'uldzoo' nesulhtsi.

<sup>13</sup> NeBá ndi tsalhgus yo ulhtus-i ts'u hanáaneanla, 'ink'ez duYe' yuk'entsi'-un, nts'e whulerwe unli-un, 'et nenáneninla.

<sup>14</sup> 'En duduzkai' be naneonket. 'Et whe nelubeshi ts'iyawh neba 'un yutilhdil.

<sup>15</sup> 'Et Yak'usda 'aw lhist'en whe 'unt'oh 'et hoonts'i ooYe' 'en yundult'oh whe 'unt'oh t'ets'oninzun. Ndi ts'iyaitsuk 'ulya-i, 'i 'udechoo whuzdli-un unli, 'et huwa ts'iyawh whumoodih unli.

<sup>16</sup> 'En be ts'iyaitsuk 'ulya' et huwa. Ndai la yat 'ink'ez yak'uz cha 'unt'oh-i, 'ink'ez ndi yun k'ut cha. Ndai la uznilh'en-i 'ink'ez lhts'is'en-i cha. Yak'uz ts'e kw'uts'uzda cho dizti-i k'udilh'ts'ine, 'ink'ez nududeh-i ulhtus-i, 'i cha 'uyínla.

Ndet la whe hooncha tune' whut'en-un, 'ink'ez whulohne nududeh-i 'uyoo nududeh-i k'une' yul'en, 'ohwhi cha 'uyínla. 'En oogha 'úhoolya 'ink'ez ooba' hóolya.

<sup>17</sup>'Ink'ez 'en 'unt'oh ts'iyai tso unli, 'ink'ez 'en gha ts'iyai lhootun le'unt'oh.

<sup>18</sup>'Ink'ez Yak'usda ba 'ilhunaoodulhne, hiyust'e hinli, 'en butso whudilhduh-un 'unt'oh. Mbe 'udechoo whe' whudit'en-un, 'en 'unt'oh. 'Ink'ez yaidlanne butoh, 'en 'udechoo whuzdli-un 'unt'oh. 'Et whuz un'a 'en ts'iyaitsuk yanus dizti'-un 'unt'oh.

### *Christ Yak'usda duts'un nenánedilya*

<sup>19</sup>Yak'usda hoont'i' whe nts'en'a la dant'oh, ooYe' yulh hulgha 'unt'oh whe 'unt'oh.

<sup>20</sup>'En gha ts'iyaitsuk 'ink'ez wheni cha Yak'usda duts'un nenánedilya. Ts'iyaitsuk ndi yun k'ut 'unt'oh-i, 'ink'ez yak'uz cha 'et hoontsi'i, tulalhgus k'ut buzakai' ooch'a yunsus-i, 'i be whudizghel neba whulhsti.

<sup>21</sup>'Ink'ez 'oh da' nohni cha Yak'usda ooch'oh aht'oh inle'. Noheni be ooch'az ditnine ahli inle', 'ink'ez hoontsi' tune' zaht'en. 'Et hoontsi' dughu nanohnínla.

<sup>22</sup>OoYe' ndi yun k'einya whe wheni nek'un'a ooyust'e whuzdli', 'ink'ez 'i be neba dazsai. 'Et huwa 'aw 'on 'un nebulh lhúhiskoh. 'Et whe nohtsun hooloh tileh. Nohk'éholts'it cha ait'oh. 'Ink'ez 'aw 'on 'un nohch'az yaooduk ait'oh. 'Et whuz un'a duBá ts'un nohtileh.

<sup>23</sup>Be nohba 'alha' hoont'oh-i, soo duts'o-i be oohntun. 'Ink'ez whuduts'o-un yoh ook'uwhuz'ai-i le'aht'oh. 'Ink'ez khuni unzoo-i bulh udahts'o-un, ndi khuni ooka tse hóohli khun oola doohtnih junih. Ndi yun k'ut ndulcho whe ndi khuni unzoo-i bugha dílts'ut. 'Et huba si, Paul, Christ ba ne'ut'en-un susdli'.

### *Soo hooltus whe 'ust'en*

<sup>24</sup>'Et 'andit Christ 'en gha nohba dzoh nuszut-un hoonúst'i'. 'Et ndai la syust'e k'oh 'uhoont'oh-un 'i be 'en ooyust'e ba lhaoodutisdleh. Ndi ooyust'e, 'i Yak'usda ba 'ilhunaoodulh-un, 'et 'uw'húhni

<sup>25</sup>'Et huba ooba ne'ut'en-un susdli'. Yak'usda ye soo' whulh'en-i, ndet la nohni nohgha sgha whunt'ai, 'et whe nohba oola 'ust'en-un susdli'. 'Et whuz un'a Yak'usda ooghuni ts'ih'un un'a lhadutisdleh.

<sup>26</sup>Njan whe' hoont'oh hooyoh-un, 'aw niz de haoodanzut-un whuts'un, ts'iyanne buch'a whunist'i. 'Et hoontsi' 'awet mbene la Yak'usda ooch'e'ne, wheni ts'iyawh ts'et gaih whunénilhtan.

<sup>27</sup>Ndi whe' hoont'oh hooyoh-un, 'et t'ets'ontizeh 'et nets'u hukwa' ninzun. Dawhuldzoo' 'ink'ez dawhulcho 'uhoont'oh 'ink'ez 'udun yun k'ut whut'enne, 'enne buba' hoont'oh. Christ 'en nohyudinda, 'et huwa Yak'usda ye dizti'-i, 'i ooka tse hooqli, 'et whuz un'a za 'uhoont'oh.

<sup>28</sup>'En ghun ts'iyanne bulh yats'ulhduk. Be whutnih-i, 'i be ts'iyanne bugha ts'útni, 'ink'ez ts'iyawh whubuts'odulh'eh. 'Et whe ts'iyanne Christ, Sizi ts'utni-un, 'en be lhadulyane 'uhoot'e'. 'Et whuz un'a za 'uhint'oh whe neBá oots'u buztileh.

<sup>29</sup>'Et huba soo hoolhtus whe 'ust'en. Nts'en'a la ye ulhtus-i, 'i ye sílhtus whe 'ust'en, 'et 'uw'hultus whe hukwa 'ust'en.

## 2

*Ndi yun k'ut khuni, 'i 'ants'i 'únt'oh, Christ 'en 'udetso 'unt'oh*



1 'Et nohni, ndunne Laodicea whut'enne, 'enne cha, 'ink'ez mbene la 'aw sulhi'elne, nohni ts'iyawh t'ewhuntihzeh 'et nohts'u hukwa' nuszun, dawhulcho-i be soo hoolhtus whe nohba hukwa 'ust'en.

2 'Et la budzi do na'ootneh 'ink'ez be lhk'ets'utsi-i be 'ilho nahoodle'. 'Et whuz un'a ndet la Yak'usda be whe' hoont'oh hooyoh-un, daltsuk 'uzoo'-i, 'i be' hoont'oh, 'i ts'iyawh soo ts'ih'un un'a t'ewhuntiszeh. NeBá cha 'ink'ez Christ cha, 'enne bughun 'uhoont'oh.

3 Dawhuldzoo'-i be ts'uwhunih-i 'ink'ez daldzoo'-i be t'eeonúdzun-i cha, 'i ts'iyawh Christ 'en ooyo ts'e neba whuntilh'i.

4 Njan nohdusni khun 'uyoonne soo yahalhduk whé nanohonoo'ah junih.

5 'Aw syust'e be nohbulh lhe'ust'oh. 'Et hoonts'i syughi 'i be nohbulh 'ust'oh. 'Ink'ez hoonust'i' whe ts'ih'un un'a ne'aht'en-un 'ink'ez Christ ulhtus-i be nohba 'alha' 'unt'oh, 'et ts'iyawh t'eeonúszun.

6 'Et huwa nts'en'a la Christ, Sizi ts'utni-un, 'en neMoodihti úlhchoot, 'et whuz un'a ndi yun k'ut díhts'i.

7 'En be 'ants'i nohghih whuzdli' le'aht'oh, 'ink'ez 'en be ulhtus sáhli. 'Et whuz un'a nohba 'alha' hoont'oh-un, 'en bulh 'ilho oohle' ha. 'Et nts'en'a whunanohodalh'e', 'et whe 'on nus ulhtusne tihle. 'Et huwa lhk'uz te musi dáhtni.

8 Soo cho khohdle' doo ka la 'uyoonne nanohonoo'ah buk'úne' 'ooht'en ha. Nts'en'a la dune dich'oh duk'un'a nuni hunuzut-un, k'us 'ants'i khuni be yáhalhduk-un cha, k'us dune didutch'oh duk'oh ts'e huhutni, k'us ndi yun k'ut huwu ni hukw'un'a dune hohodulh'e'. 'Aw njan Christ ts'un halhúhoozulh.

9 Yak'usda dant'oh la unli, 'et Christ 'en cha ts'iyawh 'ilho yust'e za yudinda 'et huwa.

10 'Ink'ez nohni cha ooyudúhts'i, 'et whe lhadínt'ohne sahli'. Njan dune 'udetso whudilhhdzulh-un 'ink'ez dune an ndo 'uhint'oh-un, Christ 'aw 'en za ts'iyantsuk k'une' whul'en.

*Ndi Moses be 'udustl'us ookune' ts'ut'en-un, Christ ts'iyawh neba gak whulh'tsi*

11 'Ink'ez 'en be nohuhúzt'us le'aht'oh. 'Aw dune la be lhe'hóonel. Lubeshi nohyust'e be 'ulh'en-i, ts'iyawh nohyust'e yuch'a nayuzdla. Whuz un'a Christ 'unohínla.

12 Too be úlhneh whe 'et 'ants'i hiyulh ánohalhti lé'aht'ih. 'Ink'ez Yak'usda be 'ut'en-i, 'i be yaidlanne toh Christ dunabudinla, 'et nohba 'alha' hoont'oh. 'Et 'i be nts'en'a la dunabudinla, 'et whuz un'a nohni cha hiyulh dúnanuhodinla whe' hoont'oh.

13 'Ink'ez nohni ninta' aht'ih-un 'ink'ez nohyust'e k'ut 'aw lhunohuhít'us, 'et huwa dazahtsa whe aht'oh. 'Et hoonts'i 'andít 'en bulh nakhúhna' whe aht'oh. Ts'iyawh whe tank'us 'úts'it'en-un neba whuladitni.

14 Dune ne'hutit'en-un Moses ooghuni 'uk'uneyuzguz-i nedulhyoh 'uhoont'oh'un, 'et ts'iyawh neba whusanáhon'ai. Ndi 'uk'ehóoguz-un, 'et neduba ts'e' hoont'oh. 'Aw whenghu ts'óya' ait'oh. Ndi khuni yílhchoot 'ink'ez tulalhgus k'ut wheyundunilh't'o whe ts'iyawh neba gak whulh'tsi.

15 Ndet la ntsi-i nududehne 'udetso whudilhhdzulhne, 'ink'ez dune an ndo 'uhint'oh-un cha, 'et whe hilhtus-un ts'iyawh bughu nahóolhchoot. Ts'iyanne nalh yooya ubulh'tsi. 'Et whe buch'a' nilhde.

16 'Et huwa ndai la ah'alh-i 'ink'ez ndai ahtnai cha, k'us budzenis whuti, 'ink'ez sa yi'aih-un cha, 'ink'ez Lizwif nahulyis dzin cha, ndi 'i ts'iyawh 'et huwun nohodoolhts'i' junih.

17 'Ohwhi 'ants'i tsa whus'ih le'hoont'oh. 'Et hoonts'i ndet la nus de whusawhutilts'ulh-un, Christ ooch'e' 'uhoont'oh, 'et za ts'ih'un 'uhoont'oh.

18 Ndet whuch'a oonúhde-un nohghá whults'ut khun 'uyoonne nohghu haóodunit'ah de, khun buk'oh ts'e 'oohneh junih. Ndut'enne huhoont'i' whe huwhuts'it whe dudzi yo 'uhilhdzun na'hududil'i. 'Ink'ez lizas ts'u tenahududli. 'Ink'ez ndet la 'aw lhuhuhóo'el-un cha t'e honínzun na'hududil'i. 'Ink'ez buyust'e whuts'u nint'i-un, 'et whuz un'a 'uhuninzun. 'I be 'ants'i nahúchun le'hut'en.

19 'Ink'ez Sizi netso whudilhdzuhl-un, 'en ooyust'e 'uts'int'oh. 'En 'aw soo cho lhuhuyootun. 'Et hoonts'i 'en gha 'on nus ts'ilhtus lneh. 'Ink'ez 'en gha ts'iyawh 'ilho uztileh. 'Et whuz un'a ooyust'e nuyeh. Ndai la nuyeh-i, 'i Yak'usda 'en 'uhóonla.

20 'Udak'ez ndi yun k'ut nohba 'alha' hoont'oh-un, 'et whuch'a Christ 'en bulh dasáhtsai le'ahja. 'Ink'ez 'andit dzin 'et di ha 'awhuz hukw'une' aht'en?

21 Oot'aohnalh junih! Khun oonahóhlih junih! Nóhle' junih! 'Et za whunohodalh'e'.

22 Ndi ndunt'oh-i, 'i ts'iyawh gak whulhih. Ndi khuni netl'adit'ai-i 'ink'ez dune whuneoodalh'e-un, 'et whuz un'a za 'uhoont'oh.

23 'Et ts'iyawh be ts'uw'hunih-i bulh 'unt'oh le'unt'oh. 'Et whe dune dich'oh duk'un'a tenahududli huwhulhtsi. Te'hududil'en na'hududil'i. 'Ink'ez duyust'e dzoh nahuyulhdzut. 'Et hoonts'i 'ohwhi 'aw hoonli lhuhooleh. 'Et ndúhoont'oh-un ts'iyawh 'aw neyust'e lubeshi whuts'u nint'i-un, 'aw 'et whuch'a nela 'ewhudoneh ait'oh.

### 3

*Neyust'e lubeshi whuts'u nint'i-un whulazdootni k'us Christ nets'u hukwa' nínzun-un, 'et za hukwa' 'uznoozin*

1 'Et huwa Christ 'en bulh dunadahdil de, 'et ndo Yak'uz ts'e dahoont'oh la 'et za hukwa' ntihzilh. 'Et Christ Yak'usda nailhni ts'unk'us whuz yulh usda.

2 Ndo yak'uz ts'e dahoont'oh la 'et za noheni toh whudóh'a', ndi yun k'ut 'uhoont'oh'un, 'et iloh huwun nuní nahzut.

3 Dasáhsai le'ah't'oh 'ink'ez 'ilhiz be kháhna-i, 'i Christ 'en bulh Yak'usda bulh 'ilho sahle' le'ahja.

4 Christ 'en be ts'úkhuna-i 'unt'oh. 'Ilhudzin ts'iyanne ba be hoodutaltsilh 'et 'oh de nohni cha ye dizti'-i, 'i be 'en bulh whuz un'a 'utihnelh.

5 'Et huwa ndi yun k'ut nohyust'e daootsah-un howa núlhtih. Ninta lhe'zooht'en, ninta' ts'ut'ih-un, 'ink'ez whudutsun tune' 'ooht'en junih, 'ink'ez ninta' uzti't'el'h'un, 'et hukwa lhe'nuzooszin, hoonts'i' tune' utiht'en-un hukwa' noohzin junih, 'ink'ez 'uyoonne ch'e' ha' noohzin junih, 'et 'uk'el'tsi neba 'alha' untóh-un le'hoont'oh.

6 'Et wu la gha ts'e, mbene la ndut'enne, 'enne bugha Yak'usda ye hunilch'e-i, mbene la yuk'unulhe'ust'enne, 'enne ts'iyawh buts'u hóolts'ulh.

7 'Oh da' nohni cha 'et za edáht'en inle'.

8 'Et hoonts'i 'andit nja daht'en-un ts'iyawh whuladuoohtnih huba' hoont'oh. Huzahke-un, hunulhch'oh cha, k'unáhdzun, Yak'usda ch'az yalhduk-un, khuni untsi'-i bé yalhduk,

9 'ink'ez lhunooh't'ah junih. 'Et 'uda' dats'int'oh la inle', 'un whutulhdil 'et huwa.

10 'Ink'ez 'andit 'uyoonne nasahdli'. 'Et mbe la whuz un'a 'uneyinla, ndet ooghun t'ets'oninzun-un, 'et 'i be 'on nus ulhtusne nats'usdli'. 'Et whe nts'en'a la Christ unli-un, 'en ook'un'a 'uts'oot'e' ha.

11 Mbene la ooba 'alha' hoont'ohne, 'enne ts'iyawh lhunduhúlt'oh. Greekne k'us Lizwifne, yuka dune unli-i k'ut ust'usne k'us 'aw lhit'usne cha, 'uts'iz de haindene k'us Scythia whut'enne cha, 'ulhnane k'us bula nahuditnine

dune cha, 'enne ts'iyawh. 'Et hoonts'i Christ 'en za ts'iyai unli 'ink'ez ts'iyawh nebulh 'unt'oh.

*'Andit dune nasdli-un dant'oh la*

<sup>12</sup> Yak'usda 'utahanóhanla 'et whe ooch'e' ahli, 'ink'ez nohk'entsi'. 'Et huwa ndiz un'a 'oohte'. 'Uyoonne gha te'noohzin, 'uyoonne ts'un oohzoo', yo 'ududólhdzin, 'ink'ez 'uyoonne nanilhtsulyaz ne'boolh'en. 'Ink'ez ts'iyantsuk sa' whe dzoh nutihzut-un whulh oohyin.

<sup>13</sup> Lhulh soo' ts'int'oh, 'ink'ez ts'iyantsuk lhba whunawhudulhneh. Nohtoh 'ilhoghun 'uyoon k'ehoon'ai de, nts'en'a la Christ nohba whunaoodilhnoh, nohni cha whuz un'a za buba whunaoodoolhnoh.

<sup>14</sup> Be lhk'ets'utsi'-i, 'i 'udetso nets'óo'alh. 'I be 'uk'enus hoonzoo whe 'ilhoh 'uts'int'oh.

<sup>15</sup> 'Ink'ez Yak'usda be nedzi dizghel-i, 'i be nohdzi yo k'une' hool'en. 'Et whuz un'a 'utahanóhanla 'ilho yust'e oole' ha. 'Ink'ez 'ahoolhyiz musi noohzin.

<sup>16</sup> Christ ooghuni be whutnih-i cha soo cho nohdzi yo hóle'. Yak'usda ooghuni be ahjun. Shun be teni' uznilhdzun-i cha. 'Et Ndoni be cha ahjun. Whulhodulh'eh 'ink'ez lhgha dáhtni. Be hoonzoo-i, 'i be nohdzi yo hóle', 'ink'ez neMoodihti ts'un ahjun.

<sup>17</sup> Nts'en'a daht'en nohghuni 'ink'ez nohe'ut'en whe cha, Sizi neMoodihti boozi', 'i be ndaht'en. 'Ink'ez 'en be Yak'usda neBá, 'en ts'un musi dahni.

*Lhuzkehkene Yak'usda ooba 'alha' unt'ohne*

<sup>18</sup> Nohni ts'ekoo nohkike butl'a' dudulhye, 'et neMoodihti ba hoonzoo whe' hoont'oh.

<sup>19</sup> Dune noh'atke buk'eoohsi'. 'Ink'ez bube zóohla' junih.

<sup>20</sup> Ts'oodunne ts'iyantsuk whe nohdusneke buk'une' 'oohten. 'Et whuz un'a ndaht'en de, neMoodihti hoont'i'.

<sup>21</sup> 'Ink'ez dunene nohuzkehke hubunólhch'eh junih!

Doo ka si iloh tune' hut'en hoole'.

<sup>22</sup> Nohni 'ustlene online, ndi yun k'ut nohmoodih online, 'enne ts'iyawh buk'une' 'ooht'en. Nohmoodih nohnill'en te za 'ooht'en junih. 'Et hoonts'i nohdzi ts'ih'un un'a whe Yak'usda bé nulhjut, 'ink'ez nohmoodihne buk'une' 'ooht'en.

<sup>23</sup> 'Ink'ez daht'en-un nohdzi ndulcho-i be ndóht'en. Ndaht'en-un neMoodihti za ba aht'en 'aw dune ba iloh aht'en.

<sup>24</sup> T'eeonúhzun ndai la neMoodihti nohts'u yoozi-i, 'i nohgha ítalelh. Christ neMoodihti 'en be 'ulhnane ahli 'et huwa.

<sup>25</sup> 'Et hoonts'i tank'us ít'elhne, 'enne whuz un'a buba k'elha whutaleh. 'Ink'ez neBá nalh ts'iyawh lhgha za 'uts'int'oh 'et huwa.

## 4

<sup>1</sup> 'Ink'ez nohni moodih online, nohe'ustlenne ts'ih'un 'unt'oh-i 'ink'ez lhgha 'unt'oh, 'i buba k'elha yulh'i. T'eeonuhzun nohni cha ndo yak'uz ts'e nohMoodihti hoonli.

*Ye unzoo-i, 'i bulh Christ ba ts'oot'en*

<sup>2</sup> Soo cho huwahli whe tenadahdli. 'Ink'ez musi dahni.

<sup>3</sup> Wheni cha neba tenadoohdli. Yak'usda neba dáha' dootan. 'Et de la ooghuni be yats'oolhduk. 'Et whuz un'a Christ ghun whe' hoont'oh hooyoh-un, 'et ts'iyanne, ts'un howu yats'oolhduk. 'Andit 'et huwa 'adus'ai.

<sup>4</sup> 'Ink'ez sba tenadoohdli, 'et whe nts'en'a yatisduk whuba 'et ts'ih'un newhútas'alh.

<sup>5</sup> Mbene la ooba 'alha' lhe'hoot'ohne, 'enne soo cho bughohle'. Ndet la 'andit nohghá whults'ut-un, whunih be 'uhoohl'en.

<sup>6</sup> Nohghuni 'ahoolhyiz unzoo-i be bubulh yaoolhduk. 'Et huwa t'eeonóhzin nts'en'a buba hootazoo' k'un'a, 'et whuz un'a 'ilhoghun hinli whe bubulh yátilhduk.

*'Udek'ez khuni butl'a nádit'ai*

<sup>7</sup> Nduun Tychicus, 'en neulhutsin ookw'ets'intsi-un, 'ink'ez neMoodihti 'en ba ts'ih'un un'a nela'ut'en, 'ink'ez Sizi Gri ba sulh 'ulhna unli. 'En si sghun ts'iyawh nohdutánelh.

<sup>8</sup> 'Inka Njan 'et huwa nohts'ú tís'a'. 'Et la nts'en'a daht'oh-un t'ewhuntizeh, 'ink'ez nohdzi do na'yooleh.

<sup>9</sup> Onesimus 'en yulh t'iyalh. 'En cha ts'ih'un un'a neulhutsin 'ink'ez wheni ts'iyawh ookw'etsintsi', 'ink'ez nohbulh 'ilhoghun 'unt'oh. 'Enne bugha njan ts'iyawh dawhut'en-un t'ewhuntihzeh.

<sup>10</sup> Aristarchus, 'en cha sulh 'adin'ai 'ink'ez hadih nohúlhni. 'Et Barnabas oonat-un, Mark, 'en cha hadih nohúlhni. Nts'en'a datít'elh, 'et 'uda' t'eeonáhzun. Nohghu ninya de, soo cho hoonáht'i' whe nohghoya'.

<sup>11</sup> 'Et Sizi, Zoosta cha huyulhni, 'en cha hadih nohúlhni. Nduunne, 'enne ts'iyawh yuka dune unli-i k'ut ust'usne 'úhint'oh. Nduunne 'enne za Yak'usda dune k'úne' bul'en-un, 'et huba sla' hut'en, 'ink'ez sóo ne'suhulh'en.

<sup>12</sup> Epaphras 'en cha nohbulh 'ilhoghun 'unt'oh, 'ink'ez hadih nohúlhni. Christ ooba 'ulhna 'unt'oh. Soo k'us hooncha whe nohba tenadudli. 'Et whe Yak'usda nohts'u hukwa' ninzun-un, 'et 'i be ts'ih'un un'a 'en ba nudútalhyalh 'ink'ez lhadúlyane cha tihleh.

<sup>13</sup> 'En ooba 'alha ts'ih'un un'a 'udisni', hooncha whe nohba nint'i. 'Aw nohni za iloh, ndunne Laodicea whut'enne cha 'ink'ez ndunne Hierapolis whut'enne, 'enne cha.

<sup>14</sup> Luke 'en yoo be duyun unli, 'en wheni ts'iyawh ookw'ets'intsi' 'ink'ez Demas 'en cha hadih nohúlhni.

<sup>15</sup> Nduunne Laodicea whut'enne, mbene la neulhutsinke, 'enne ts'iyawh hadih neba budóhni. 'Ink'ez Nymphas, 'en cha, 'ink'ez mbene la duyoh Yak'usda ba 'ilhunaoodulhne, 'enne cha hadih sba budóhni.

*Ye unzoo-i nohbulh óot'e'*

<sup>16</sup> Nohnich'oh nohtoh ndi 'udustl'us ook'uyalhdruk de, mbene la Laodicea Yak'usda ba 'ilhunaoodulhne, 'enne cha hik'uyaooldruk huba' hoont'oh. 'Et ndai la 'udustl'us buts'o tl'aiyan'ai-i, 'i cha nohni cha ook'uyaooldruk.

<sup>17</sup> 'Ink'ez Archippus 'en dóhni', neMoodihti ndet la yutl'ahón'ai-un, ts'iyawh lhaoodoleh. 'Et whuz un'a 'en ba yula'ut'en-un tileh.

<sup>18</sup> Sich'oh sla be hadih dusni whe 'uk'unusúsguz-i, "Paul". Ndi sluzt'ih tl'oolh be 'adus'ai oonaoodoolhnoh junih. Ye unzoo-i nobulh 'oot'e'. 'Et ndo honeh.

## Paul Thessalonica Whut'enne 'Udechoo 'Udustl'us Buts'ó K'eyanguz-i

### *Thessalonica whut'enne Paul hadih ubulhni*

<sup>1</sup> Wheni tane ts'inli Paul, Silvanus, Timothy, nohni keyoh Thessalonica ts'e Yak'usda neBá 'en ba 'ilhunaoodulhne, hadih nohts'utni. NeBá Yak'usda 'ink'ez Sizi Gri neMoodihti ts'un nohba tenazdukli, 'et whe ye unzoo-i 'ink'ez nohdzi doghel nohbulh 'oot'e'.

### *Hoonzoo k'un'a ne'hut'en*

<sup>2</sup> 'Ahoohyiz nohni nohghun Yak'usda ts'un musi ts'utni. Netenadudli toh nohnats'ulnih.

<sup>3</sup> Nohnats'ulnih-un 'aw 'etsul lhe'ts'usne, be 'alha hoont'oh-i, 'i ghun nohe'ut'en. 'Ink'ez nts'en'a la be nék'ets'intsi'-i be soo cho 'aht'en. 'Ink'ez neMoodihti Sizi Gri 'en ghun hukwa tse hoohli-un, 'aw whulalhduzahni. Yak'usda neBá 'en oonalh 'et whuz un'a ndaht'en.

<sup>4</sup> Neulhutsinke t'ets'oninzun Yak'usda nohk'entsi' 'ink'ez 'utáhanóhanla.

<sup>5</sup> 'Et neghuni unzoo-i, 'aw khuni za iloh unli whe nohtl'adilts'ut. 'Et hoonts'i be hoolhtus-i be 'ink'ez Ndoni gha cha, 'et whuz un'a nohtl'adiltsut. 'Et nts'en'a nohtl'adilts'ut 'et whe la t'oonuhzun ndi khuni 'i ts'ih'un un'a 'unt'oh. 'Et huwa 'oh da' nohtoh uzdilhts'i whe nohni nohba dant'ohne dune ts'inli, 'et ts'iyawh t'oonáhzun.

<sup>6</sup> 'Et wheni 'ink'ez neMoodihti cha, ts'iyawh nek'un'a aht'oh sahli'. Tube dzoh nusuhde whe Ndoni ye whunilhni-i, 'i be Yak'usda ooghuni unzoo-i hoonáht'i' whe ulhchoot.

<sup>7</sup> 'Et nohni nohgha nts'oh tune' aht'en-un, 'et ndunne Macedonia 'ink'ez Achaia yun k'ut cha, mbene la Sizi Gri ooba 'alha' 'unt'ohne, 'enne nohk'un'a 'uhint'oh huzdli'.

<sup>8</sup> 'Et Macedonia whut'enne 'ink'ez Achaia whut'enne cha, 'enne neMoodihti ooghuni, 'i ts'iyawh nohni nohgha huyulh udants'o. 'Et hoonts'i 'aw 'et za iloh, Yak'usda ts'un nohba 'alha' hoont'oh-un, 'alghoh ndulcho whe t'ehinanzin, 'et huwa wheni 'aw 'on 'un daja uzdooni' ait'oh.

<sup>9</sup> 'Enne didutch'oh nohni nohghun nebulh nahuhoolnuk 'et whe k'eke nedáhtni. 'Ink'ez cha nts'en'a la 'uk'eltsi nohba 'alha' 'unt'oh-un, 'et whuch'a nasahdil whe Yak'usda ts'u nasulhya. Yak'usda, mbe la khuna-un, 'ink'ez 'alha Yak'usda unli-un, 'en za ooba 'ooht'en ha.

<sup>10</sup> 'Ink'ez ooYe', yak'uz ts'u hainya-un, 'en cha ooba sulh'i. Sizi 'en 'unt'oh. 'En yaidlanne butoh dunaidilhti 'ink'ez Yak'usda ye nebulh hunilch'e-i negha tikulh-i, 'i ch'a neulhyis-un, 'en 'unt'oh.

## 2

### *Paul Sizi Gri ba be 'ut'en k'oh 'unt'oh*

<sup>1</sup> Neulhutsinke nohnich'oh t'oonahzun 'aw 'ants'et nohts'u nalhts'utidulh.

<sup>2</sup> 'Et keyoh Philippi, 'enne bugha tube dzoh nuts'uzde, 'et ts'iyawh t'oonuhzun. 'Et hoonts'i hukw'elh'az Yak'usda 'en gha 'aw whelhts'itsaz whe ooghuni unzoo-i be nohbulh yats'ulhduk, lhat-un whe nedulhyoh 'uhant'e' 'et hoonts'i.

<sup>3</sup> 'Et ndi khuni ulhtus-i be nohbulh yaduk inle', 'aw tank'us lhe'it'oh, k'us dutsun-i bulh lhe'it'oh, k'us 'aw ntsi'-i cha ootoh hooloh, whuz un'a nohbulh yats'alhduk inle'.

4 'Et hoonts'i Yak'usda nebulh soo neonin'ai whe ooghuni unzoo-i, 'i be netl'ahon'ai, 'et whuz un'a za ts'iyawh 'alhgoh yats'ulhduk. 'Et hoonts'i nts'en'a dune hodutáts'o 'et hukwa' huninzun, 'i khuni 'aw whuz un'a iloh yats'ulhduk. 'Et k'us Yak'usda nets'u hukwa' ninzun-un, 'et za howu yats'oolhduk. Yak'usda 'en nedzi yoolhdzih.

5 T'eonahzun 'aw khuni 'uyoo unli 'i be iloh nohbulh yats'ulhduk. 'Aw hoonliyaz aht'i-i, 'i negha óohlelh, 'et whuz un'a iloh nohbulh yats'ulhduk. 'Et Yak'usda nalh njan ts'ih'un un'a nohdusni.

6 Nohni k'us 'uyoonne cha nedutalhti' hukwa lhts'eti'en, Christ ooba whel'a'ne ts'inli 'ink'ez netl'ahon'ai 'et huwa be hóolhtus-i, 'i be nohando 'uts'int'oh.

7 'Et hoonts'i nohtoh uzdilhts'i da, nohts'un ts'inzoo. Nts'en'a la ts'ekoo duduzke nulhyeh 'ink'ez buk'ehintsi', 'et whuz un'a nanilhts'ulyaz nunóhts'ulh'en.

8 Nohk'enits'inli, 'et huwa ts'uhoont'i' whe Yak'usda ooghuni unzoo-i be nohbulh yats'ulhduk. Be ts'ukhuna-i, 'i hoonts'i nohni nohgha huwázi't'alh, nohk'ets'intsi' 'et huwa.

9 Neulhutsinke soo cho whunalhni, 'oh da' nts'oh tune' ts'ut'en 'ulhdzis 'ink'ez dzin 'i bulh lhla' ts'óodat'elh! Tube neba howa whulna' t'eonahzun. doo ka la nohba howa whulna' ts'uhoohltselh 'et whuch'a. 'Ink'ez 'et whuz un'a Yak'usda ooghuni unzoo-i be nohbulh yats'ulhduk.

10 Nohni nohnal' 'uts'ut'en, Yak'usda cha, dalcho-i be teni' uznilhduzun whe 'ink'ez ts'ih'un un'a ne'ts'ust'en whe nohni ooba 'alha' hoont'ohne nohtoh nek'éholts'it whuch'a.

11 'Ink'ez t'eonuhzun nts'en'a la nohbáke nohk'entsi' whe nohgha hanle', 'et whuz un'a nohbulh 'uts'int'oh. 'Et huwa khuni ulhtus-i be nohbulh yats'ulhduk, 'ink'ez k'enánohts'uni'a. Datiht'elh-un, 'et whunohuznulhtun.

12 'Ink'ez Yak'usda ba soo' whuldzoo', whuz un'a toohdil. 'En 'unt'oh nts'e la usda-un, 'et lerwe unli, 'et whe ts'iyantsuk whe k'une' whut'en unli, 'ink'ez ye dizi'-i cha bulh 'unt'oh. 'Et whuz de 'anih nohúlhni.

### *Sizi Gri hits'u nalhya-un*

13 Wheni negha Yak'usda ooghuni dáhts'o 'et ts'iyawh hoonáht'i' whe ulhchoot. Yinka dune ghuni iloh k'un'a úlhchoot. 'Alha' hoont'oh Yak'usda ooghuni 'unt'oh. Ndi khuni 'i be 'on nus ulhtus nóhulhtsi. Nohni ooba 'alha' yint'ohne, ndi khuni ulhchoot 'et huwa 'etsul lhe'ts'udísni whe Yak'usda musi ts'utni.

14 Neulhutsinke nyoonne Christ, Sizi ts'utni-un, 'en ooch'e' unline, mbene la Judea yun k'ut whe Yak'usda ba 'ilhunaoodulhne, 'enne buk'un'a za aht'oh. 'Et nts'en'a la ndunne Judea dilhts'ine, 'enne 'onghoh Lizwifne dzoh nubuhulhdeh, 'enne buk'un'a za nohbulh keyoh whut'enne, 'enne dzoh nunóhohulhde.

15 Lizwifne, 'enne 'uhuja neMoodihti Sizi Gri hizilhghi. 'Ink'ez mbene la buba Yak'usda be nus hoo'enne, 'enne cha buhuhangan. 'Ink'ez wheni cha duyun k'ut hukw'u nanehuntízyoot. 'Ants'i ts'iyanne ch'az huditni, 'et huwa 'aw Yak'usda hoont'i' hukw'un'a nulhé'hust'en.

16 Khun tilah 'udun yun k'ut whut'enne hudoojih ha bubulh yaztilhduk, 'et whuch'a nehuniyoot. Ndunde Lizwifne ndai la 'uhuyulh'en-i 'et whe lubeshi be hudizbun. 'Et huwa Yak'usda ye bubulh hunilch'e-i, 'i 'ilhiz wheni huyulh utit'elh.

### *Buk'eninli*

17 'Et neulhutsinke, 'atsulyaz wheni nohch'a nehunízyoot, 'et hoonts'i nedzi be nohbulh 'uts'int'oh. Tube cho nanohts'utit'elh-un, 'on nus hukwa ts'uninzun.

18 'Et huwa tube nohts'uztidulh hukwa' uznanzin. 'Alha si, Paul, nat whucho nohts'u toosya' hukwa 'ist'en, 'et hoonts'i ndun Satan 'en nedáđinya.

19 'Et ndet 'uhoont'oh hukwa tse ts'uhooli, k'us ndai be ts'uhoont'i? Ndaí la neba k'elha tileh-i, 'i be eh ts'oohootat'e'? NeMoodihti Sizi Gri nkede la whusanatidalh 'ink'ez nohni cha ts'iyawh oobulh utiht'elh, 'et za 'uhoont'oh!

20 Nohni be uzdziti'-i, 'ink'ez be ts'úhoont'i'-i ahli 'et huwa.

### 3

#### *Buba 'alha' hoont'oh-un, 'et huwu ninli*

1 'Et huwa 'oh da' 'aw 'on 'un whulh ts'ooyin ait'oh suli'. 'Et neba hoonzoo nídzun whe whenich'oh keyoh Athens íke'.

2 'Et 'inka ndun neulhutsin, Timothy Yak'usda ba ne'ut'en-un, 'en nohts'u whets'alh'a'. 'En 'unt'oh Christ ooghuni unzoo-i ooghá ts'ana nela'ut'en-un. 'En gha nohba 'alha' hoont'oh-un, 'et whuz un'a 'ilhiz oole' hukw'un'a za 'utih't'elh, 'ink'ez dughuni be nus nohnih't'i.

3 'Et njan dune dzoh nuneulhdeh-un whe nohba dzoh oole' junih. Nohnich'oh t'eeonahzin njan neba' hóolya whe' hoont'oh.

4 'Et nohzih íke' whe dzoh nuztidedh whe' hoont'oh nohdát'ni' inle'. 'Et whuz un'a 'uhooja 'ink'ez 'andit t'eeonahzun.

5 'Et huwa si cha 'aw 'on 'un whulh óosyin ait'oh. 'Et huwa Timothy, 'en nohts'u whes'a' ndi be 'alha' hoont'oh-i ghun daht'oh ts'iyawh neba nahoota'alh. Doo ka si mbe la neóolhdzih-un, nohni cha tilah nohóolhdzai de, 'et de ne-e'ut'en 'ants'et 'utit'elh.

#### *Timothy daja nedani'-un, 'et huwa nedzi hoont'i'*

6 'Et 'awet Timothy nohts'u hanája 'ink'ez neghu nanja. 'Ink'ez daht'oh la 'et hukw'un nebulh nahoolnuk. Ndi be 'alha' hoont'oh-i, be nek'etsi'-i cha, 'et ts'iyawh nawhus'ai. 'Et nets'un ahzoo 'ink'ez wheni netih'elh hukwa' nahzun, 'et cha hukw'un nebulh nahoolnuk. 'Ink'ez wheni cha whuz un'a za nohuzti'elh hukwa' uznanzin.

7 'Et huwa neulhutsinke 'uyoonne gha dzoh nuts'udeh 'ink'ez dzoh nebulh 'uhoont'oh, 'et hoonts'i be 'alha' hoont'oh-i aht'i, 'et 'i be nedzi do na'uja.

8 'Et neMoodihti 'en bulh ulhtus whe núdulhya de, ts'uhoont'i' k'et ts'ukhuna le'ts'int'oh.

9 Ndaí la be ts'oohoont'i'-i, 'i be ts'iyawh Yak'usda but nohba ts'uhoont'i'? Nts'en'a suba soo 'ulcho-i be Yak'usda nohba musi uzdóni'?

10 Nohts'uti'elh hukwa' ts'uninzun. Be 'alha' hoont'oh-i aht'i-un, ndet la ts'ih'un t'eeonuzahzun 'et ts'iyawh nohba lhats'odutileh. 'Et huwa 'ulhdzis 'ink'ez dzenis 'i bulh tube Yak'usda oots'o hukwa' ts'utni.

#### *Yak'usda ba 'ilhunaoodulhne buba tenahududli*

11 'Et tenazudli, Yak'usda 'en dich'oh neBá, 'ink'ez neMoodihti Sizi Gri, 'en nohts'un nétoohl'a'.

12 'Ink'ez nts'en'a whe la nohk'ets'intsi', 'et whuz un'a neMoodihti 'en gha tube cho lhk'uz te lhk'ehtsi'. 'Ink'ez 'uyoonne cha 'enne ts'iyawh nducha buk'ehtsi'.

13 'Et whe la neMoodihti Sizi Gri 'ink'ez ooch'e' unline, 'enne ts'iyawh whusanahidil de, 'et de la neBá, Yak'usda, 'en nalh, 'aw nohdzi be ye nohk'eho'alh-i hootaloh, 'ink'ez nohlubeshi cha hootaloh.

## 4

*Lubeshi ooghu hooloh 'et buts'u hukwa' ninzun*

<sup>1</sup> 'Et huwa neulhutsinke, ndi 'udek'ez khuni be nohbulh yáts'ulhduk-i, neghuni úlhchoot whe nts'en'a la Yak'usda hót'e' ha tóohdilh nohts'útni inle'. 'Et doo cha za whuz un'a za Sizi neMoodihti, 'en be khuni ulhtus-i be nohts'utni, tube cho lhan'un te oohzoo', 'ink'ez whuz un'a za 'ooh't'e'.

<sup>2</sup> T'eeonuhzun neMoodihti Sizi khuni netl'aídan'ai, 'i ts'iyawh nohts'udani'.

<sup>3</sup> 'Et Yak'usda ba 'udun nenohninlane, lhghu lhdúlhts'i whe lhulh ninta' 'ooh't'en junih, 'et whuz un'a Yak'usda nohba hukwa' ninzun.

<sup>4</sup> Ts'iyawh 'ilhoghun ahli nohyust'e 'i Yak'usda ba 'udun neóolhtelhuba' hoont'oh 'ink'ez soo cho ooghole'.

<sup>5</sup> Nohyust'e hoolhtus whe lubeshi ts'u nint'i, 'et 'aw whuz un'a aht'oh iloh! 'Udun yun k'ut whut'enne, Yak'usda t'enuszunne, 'aw 'enne buk'un'a iloh ahtoh.

<sup>6</sup> Khun te neulhutsin unline neghá whunist'en whe bu'at bulh ninta' ts'oot'en junih. 'Et whuz un'a za whutso da' nohdasni'. 'Ink'ez doo cha za nohdusni, neMoodihti 'en za ndóohoont'oh-un huwun ts'iyawh k'útneh-un 'unt'oh. 'Et huwa nja nohdusni, soo cho khahdlí!

<sup>7</sup> Yak'usda 'aw 'ut'en untsi'-i uztilh'elh huba iloh uzdoojih ha neka' dani' 'et huwa. 'En ba lubeshi ooghu hoolohne uztileh ha 'et wheni neka' dani'.

<sup>8</sup> 'Et huwa mbe la ndi khuni hidots'o hukwa lhe'hunizun, 'aw dune ch'az nult'ine lhuhiloh. Yak'usda ch'az nult'ine za 'uhint'oh. 'Ink'ez Yak'usda Ndoni 'en cha negha inin'ai-un unli.

*Ndi yun k'ut whut'enne, 'enne bunalh soo ts'ih'un un'a toohya'*

<sup>9</sup> Lhulhutsinke yé lhk'etsi'-i, 'i ghun 'aw nohts'o k'e'oosges huba lhe'hoot'oh, Yak'usda dich'oh whunohodalh'e' lhk'eooh'tsi' ha.

<sup>10</sup> 'Et whuz un'a ndaht'en ts'iyawh neulhutsinke Macedonia yun k'ut dilhts'ine, 'enne buts'un. Neulhutsinke khuni ulhtus-i be nohts'utni, lhan'un te lhk'eooh'tsi'.

<sup>11</sup> 'Ink'ez cha, nánilhts'ulyaz yun k'ut dólhts'i', 'ink'ez nohe'ut'en za noolh'en. Nohnich'oh nohla be 'ooh't'en. 'Et whuz un'a 'edóht'en nohts'udáni'.

<sup>12</sup> 'Et whuz un'a ndaht'oh de, 'et de mbene la ooba 'alha' lhe'hoot'ohne, 'enne bunalh soo ts'ih'un un'a toohya'. 'Et whe 'aw hoonliyaz ets'uhóldoh ait'oh.

*Sizi Gri whusanatidalh-un, 'et whut'aniznintan*

<sup>13</sup> 'Et 'awet sulhutsinke, ndunne 'uda' nanistezne,\* 'enne bughu t'ewhuntihzeh nohba hukwa' nuszun. Ooba 'alha' lhe'hoot'ohne 'aw buba whulanalhuhó'o'oh hukw'un'a ts'odi hinli, doo ka si whuz un'a ndoht'e'.

<sup>14</sup> Sizi dazsai 'ink'ez dunadija-un, 'et neba 'alha' hoont'oh de, 'et whuz un'a za mbene la Sizi ooba 'alha' yint'oh whe yahadlane, 'enne ts'iyawh Yak'usda Sizi bulh ndo nabutieleh.

<sup>15</sup> 'Ink'ez neMoodihti ooghuni be nja nohdusni, neMoodihti neka whusanatidalh-un, nts'en'a la dawhutanelh-un, mbene la 'awhuz khunane, 'et ndunne nanistezne, 'enne 'aw butso uztoodilh ait'oh.

<sup>16</sup> 'Et neMoodihti dich'oh soo 'ultus-un 'awet 'udutinelh, 'ink'ez lizas 'uk'enus dizti'-un, 'en cha dutinelh, 'ink'ez Yak'usda ba be ts'ujih-i, 'i cha 'udutinelh. 'Et whuz un'a Sizi Gri yak'uz ts'e whusanatidalh. 'Ink'ez mbene la Sizi Gri ooba 'alha' yint'ohne, 'et whuz un'a yaidlanne, 'enne cho dunahudutádulh.

\* 4:13 Yaidlanne ni whe 'utni



<sup>17</sup> 'Et hukw'elh'az wheni 'awhuz khunane, wheni cha, 'ink'ez ndunne cha, 'alhgoh 'aw lhts'odutílh'el whe khun be' ne-eduzgooh le'ts'uja whe ndo kw'us toh 'alhgoh neMoodihti tazai ooduzdutádulh. 'Et whuz un'a 'ilhiz wheni neMoodihti bulh 'úztit'elh.

<sup>18</sup> 'Et huwa ndi khuni 'i be ts'iyawh k'únulhunoht'ah.

## 5

### *NeMoodihti oodzin dawhútanelh-un*

<sup>1</sup> Neulhutsinke nkede 'uwhutanelh 'ink'ez nts'oya hoozulh whe' whutanelh, 'aw 'et huwa nohts'o k'eosges ait'oh.

<sup>2</sup> Nohnich'oh soo ts'ih'un un'a t'eonahzun nts'en'a la 'undunut'ih-un k'un'a 'ulhdzis whusanúl'ih, whuz un'a za neMoodihti oodzin neba whusaootilts'ulh.

<sup>3</sup> Dalhúhoot'oh 'ink'ez 'aw howa lhe'oodli, hutni te, 'et khunsul bubulh haoodults'uk. Nts'en'a la ts'ekoo ulchane bubulh 'útults'ulh, 'et whuz un'a 'et nduwhutanelh. 'Et de ndutnine, 'enne 'aw buyit 'uhóneh ait'oh.

<sup>4</sup> 'Et hoonts'i nohni sulhutsinke 'aw tsalhgus yo lhdúlhts'i. 'Et huwa njan dzin whusahoolts'ut de, 'aw 'undunut'ihne k'un'a nohgha óonol'ih ait'oh.

<sup>5</sup> Nohni be hoot'en-i 'ink'ez dzenis be hoot'en-i, 'i niz dulhts'i. 'Aw wheni 'ulhdzis 'ink'ez tsalhgus yo lhts'udílt's'ih.

<sup>6</sup> 'Et huwa 'uyoonne k'un'a lhts'oostez, whenich'oh khuts'oodle'.

<sup>7</sup> 'Et huwa mbene la stezne, 'enne 'ulhdzis hoot'e'. 'Ink'ez mbene la tatnaine, 'enne 'ulhdzis tahunutnih.

<sup>8</sup> 'Et hoonts'i wheni dilhts'ine, soo whunih be 'uts'oot'e' huba' hoont'oh. Neba 'alha' 'unt'oh-i, 'ink'ez be lhk'ets'utsi-i, 'i lhuztih dzoot dukw k'un'a nohba le'tit'elh. 'Ink'ez be uzdujih-i, ooka tse ts'uhooli-i, 'i ts'oh duts'un-i k'un'a nézdol'a'.

<sup>9</sup> 'Aw Yak'usda ye huske-i, 'i be neotalhtus, 'et huba iloh 'udun neneninla 'et huwa. 'Et k'us neMoodihti Sizi Gri 'en gha be úzdutjih-i, 'i ts'itálhchulh.

<sup>10</sup> Neba dazsai. 'Et huwa nts'oh dahooja hoonts'i, 'awhuz ts'ukhuna k'us yats'adla, wheni ts'iyawh 'en bulh 'uts'oot'e' huba' hoont'oh.

<sup>11</sup> 'Et 'inka 'ilhone ahli whe k'únulhunaht'ah 'ink'ez lhba nus lhúnulht'i. 'Andit daht'en la whuz un'a za 'et daht'en.

### *Lhelhts'un un'a ndi yun k'ut uzdólt's'i*

<sup>12</sup> Neulhutsinke wheni soo cho nohts'u tezdudli, mbene la nohtoh Sizi Gri ba 'ut'enne, 'enne neMoodihti gha nohghu hinli 'ink'ez nohba huwhunih nunats'uhulye, 'enne 'unt'ohne nohba hoole'.

<sup>13</sup> 'Et bube 'ut'en gha nchane ubulh'ih. Be nek'etsi-i, 'i gha ndaht'en. Ts'iyawh nanilhtsulyaz lhtoh dune ahli.

<sup>14</sup> 'Ink'ez neulhutsinke khuni ulhtus-i be njan dunohts'utni, nyoonne nohtoh tsedutnine soo cho bugha dahtni. Mbene la oodzi yo 'unt'ohne, soo nenabunih'ah. Yak'usda ba tetsunne cha bula aht'en. Ts'iyanne nánilhtsulyaz né'boolh'en.

<sup>15</sup> 'Mbe la hoontsi' nohts'un 'uja-un, khun te hoontsi-i be buba k'elha hoolhtselh junih! 'Et k'us nohnich'oh cha 'ink'ez 'uyoonne ba cha, ndai la unzoo-i ts'unóht'i, 'i za lhunihdulh.

<sup>16</sup> 'Ahoohyiz whunulhni.

<sup>17</sup> Tenadahdli-un, 'etsul 'udóhni junih.

<sup>18</sup> Ts'iyantsuk whe musi dahni. Sizi Gri 'en gha 'et whuz un'a Yak'usda nohts'u hukwa' ninzun 'et huwa.

<sup>19</sup> Ndoni whunóhnulltun-un khun te dah noohzin junih.

<sup>20</sup> Khuni be nohba nus hoot'en-i, khun te 'ants'i 'uhoont'oh noohzin junih.

<sup>21</sup> Ts'iyantsuk naoodúlhhdzih. Ndai la unzoo-i duts'o cho oohtun.

<sup>22</sup> Ntsi'-i ts'iyawh ooch'oh 'aht'oh.

*Yak'usda ye unzoo-i nohbulh 'óot'e'*

<sup>23</sup> 'Et 'awet Yak'usda, be nedzi dizghel-i negha nin'ai-un, 'en soo 'et whe nohni dich'oh duba 'udun nenóholeh-un. 'Ink'ez nohyust'e, nohzul, nohyughi, 'alhgoh 'aw hoonli whe nohk'éholts'it-un hooloh whe neMoodihti Sizi Gri whusanatidalh whuts'un, 'et whuz un'a Yak'usda nohba' hooleh nohba hukwa' nuszun.

<sup>24</sup> Mbe la dutijih ha nohka dani'-un, 'en 'aw neladootnih ait'oh, 'en nohba' whutileh.

<sup>25</sup> Neulhutsinke neba tenadahdli.

<sup>26</sup> 'Et lhulhutsinke nalhutulh'ih te soo cho dushih be' lhoodhtun whe lubeshi ooghu hooloh-i be nalhudahts'oos.\*

<sup>27</sup> NeMoodihti nalh 'unohdusni, neulhutsinke 'enne Yak'usda ooch'e' un-line, 'enne ts'iyawh ndi 'udustl'us buba ook'uyaoohlhduk.

<sup>28</sup> NeMoodihti Sizi Gri, 'en ye unzoo-i, 'i nobulh 'óot'e'. 'Et ndo honeh.

---

\* 5:26 Whuz keyoh 'et whuz un'a lhlá nuhút'a.

## Paul Thessalonica Whut'enne Whulh Nat Buts'ó K'eyanguz-i

### *Thessalonica whut'enne Paul hadih ubulhni*

<sup>1</sup> Wheni tane ts'inli Paul, Sylvanus, Timothy, nohni keyoh Thessalonica ts'e Yak'usda neBá 'ink'ez Sizi Gri neMoodihti ba 'ilhunaoodulhne, hadih nohts'utni.

<sup>2</sup> Ye unzoo-i 'ink'ez nohdzi dóghel, 'et Yak'usda neBá 'ink'ez neMoodihti Sizi Gri oots'u hayúkat-i, 'i nohbulh óot'e'.

### *Yak'usda 'udek'ez neba nahutiye'h 'ink'ez yé dizi-ti-i*

<sup>3</sup> Ooba 'alha' hoont'oh-i, 'i lhk'uz te aht'i 'ink'ez 'ilhoghun ahli lhan'un te lhk'ehtsi'. 'Et huwa neulhutsinke 'ahoolhyiz Yak'usda ts'un nohba musi uzdóni' huba' hoont'oh.

<sup>4</sup> 'Et huwa 'onghohne Yak'usda ba 'ilhunaoodulhne, 'et huwun 'uk'enus nohba ts'uhóont'i' nohni nohghun. Dune dzoh nunohulhdeh 'ink'ez howa whulna'-un nohghá whunkat-un, 'et hoonts'i ooba 'alha' hoont'oh-i, 'i be ndai la be nohba whuts'ulhdáhni whe whulh nudulhya.

<sup>5</sup> 'Inka ts'iyanne t'ehininzun Yak'usda ts'ih'un nahiyilh-un 'unt'oh. 'Et huwa nts'e la whe Yak'usda lerwe unli, 'et la soo 'úlhazoo' oole' ook'éh'otih'alh. 'Et huba 'andit dzoh nahde.

<sup>6</sup> Mbene la dzoh nunóhulhdehne, 'enne Yak'usda buk'elha whutilhtselh. Yak'usda ts'ih'un un'a ne'ut'en-un 'unt'oh 'et huwa.

<sup>7</sup> 'Ink'ez nohni dzoh nudehne nebulh nátilhyis. Whuz un'a neba k'elha whutilhtselh. Ndet la neMoodihti Sizi Gri 'ink'ez oolizas ulhtusne bulh, 'et yak'uz ts'e bube hóodutaltsilh.

<sup>8</sup> 'Et 'oh de de mbene la Yak'usda t'enuszunne 'ink'ez neMoodihti Sizi Gri ooghuni unzoo-i k'únulhe'ust'enne, 'enne kwun tluk be buba k'elha whutaleh. 'Et whuz un'a 'enne buts'un k'utitnelh.

<sup>9</sup> NeMoodihti 'ink'ez 'uk'enus ye dizi-ti-i, 'i 'ilhez wheni yuch'a nabutáleh. 'Et 'ilhez wheni hiye dzoh nutideh 'ink'ez 'aw buba oolatoh nalhuhóo'oh. 'Et whuz buba k'elha whutilhtselh.

<sup>10</sup> 'Et dzin whusanája de, 'et nduwhtanelh. 'Et dzin, Yak'usda ooch'e' unline, 'enne ts'iyawh buba whudutálhti'. 'Ink'ez ndunne buba 'alha' hoont'ohne, 'enne buba hooncha tileh. Wheni neghuni gha nohba 'alha' hoont'ohne, nohni cha bubulh 'útiht'elh.

<sup>11</sup> 'Et huwa 'ahoolhyiz Yak'usda ts'un nohba tenazdudli. Yak'usda dutihjih ha nohka' dani', 'et whe soo 'úlhazoo' nohulhsti. Ts'iyaitsuk unzoo-i yughunli, 'ink'ez 'ut'en 'ulh'en-i, be 'alha' hoont'oh-i be 'ulh'ih-i, 'i ts'iyawh ye úlhtus-i bulh 'únt'oh, 'et ts'iyawh lhaóodutihleh.

<sup>12</sup> 'Et whuz un'a neMoodihti Sizi Gri boozii', nohni nohgha dutáti'. 'Ink'ez nohni cha 'en gha ahcha tileh. Yak'usda 'ink'ez Sizi Gri ye unzoo-i, 'i gha nduwhtanelh.

## 2

### *Whuch'a nahusdilh whutáleh-un*

<sup>1</sup> 'Et neulhutsinke, neMoodihti whusanátidálh-un 'ink'ez 'en ts'un ooba 'ilhunats'ootádulh, 'et huwun soo cho neyoozúlhts'ai.

2 Dune Ndoni gha nohbulh yalhduk na'dudil'i whe 'unohúlhni Christ oodzin, 'et dzin 'uda' whusahoolts'ut. K'us dune dich'oh dughuni be nohbulh yálhduk, k'us 'uyoon nohts'o k'e' anguz 'ink'ez si 'usdla leúnt'oh de, 'et nduhúja de, khun huwun khun nantoohdilh junih, 'et whuz un'a nohts'u tezdudlih.

3 Khun te dune nanohnoo'ah junih. Sizi Gri oodzin whusaóotilts'ulh 'et whutso, 'et 'udechoo whuch'a nahusdilh whutáleh, 'ink'ez nyoon lubeshi 'ulh'en-un, 'en ts'iyanne nalh be hoodutaltsilh. Ndun lubeshi 'ulh'en-un, musai yulh'tsi-un, 'en ooye' 'unt'oh. 'Et hukw'el'h'az 'et de za njan dzin whusaóotilts'ulh.

4 Yak'usda ch'az ditni, 'ink'ez yando 'unt'oh na'dudil'i-un, 'en ts'iyanne budutanelh, "Si za Yak'usda usdli. 'Uyoon Yak'usda oots'u tenadoohdli junih!" 'Et whuz un'a Yak'usda oolugliz whucho 'et dayaih 'ink'ez 'et Yak'usda buba nadudil'i.

5 'Aw eh whunalhuzulhni? Nohbulh 'ust'en whe 'uda' nohdasni'.

6 'Et 'awet ndai k'oh 'únilht'i-i, 'i nohni t'enahzun. 'Et 'oh de ndun lubeshi 'ulh'en-un ts'iyanne ba be hoodat'en tileh.

7 'Et ndi dune hukw'un nulhé'ust'en ubulh'tsih-un, 'et whe' hoont'oh hooyoh-un, 'et 'uda' 'andit nduw'hút'en whe' hoont'oh. 'Et hoonts'i ndun k'oh 'únilht'i-un, 'et za ndutit'elh whusanátiltelh whuts'un.

8 'Ink'ez 'et de la ndun uk'unulhe'ust'en-un, 'en be hóodutaltsilh. 'En itileh neMoodihti dich'oh ye usjiz-i, 'i be ndun gak yutilhtselh. 'Et whuz un'a neMoodihti whusanátidalh-un, ndi oots'u hayánduz-i, 'i be ndun yuk'unulhe'ust'en-un, 'en 'ilhiz wheni hooloh yutilhtselh.

9 Ndun yuk'únulhé'ust'en-un whusatiyalh-un, 'en be 'ut'en k'oh, nts'en'a la Satan 'ut'en, 'et whuz un'a za 'utit'elh. Hoolhtus tuné' tit'en, 'ink'ez hooncha tuné' tit'en cha 'utit'elh. 'Ink'ez 'uk'enus whuts'it-un, 'et buba hooncha tileh.

10 Mbene la kwuncho yo ts'u tudilhne, 'enne ts'iyawh ts'ih'un un'a lhe'hoot'oh-i, 'i be nabuna'ah. Khuni 'alha' 'unt'oh-i, 'i hik'elhítsi', 'et huwa 'aw hudoojih aít'oh.

11 'Et huwa hoonli nabuna'ah-i, 'et Yak'usda whuz un'a whute bula dutitnih. 'Et la ndai whuts'it-i, 'i za buba 'alha yutát'elh.

12 'Et la mbene la khuni 'alha' 'unt'oh-i, ooba 'alha lhe'yit'ohne, 'et ndunt'ohne, 'enne ndet la ts'ih'un lhe'hóot'oh-un, 'oh ho za 'et huhoont'i' whe 'oh te ne'hut'en, 'enne ts'iyawh Yak'usda buba nahutiye'h.

### *Soo cho whulh núdolhya'*

13 'Et hoonts'i neulhutsinke neMoodihti nohk'entsi'. 'Et 'udechoo whuts'un 'utáhanóhanla dutihjih ha. 'Et huwa Yak'usda 'ahoolhyiz musi nohba ts'utni. Ndoni be Yak'usda ba 'udun nenóhminla 'ink'ez ndi khuni 'alha' 'unt'oh-i, 'i nohba 'alha' 'unt'oh.

14 'Et whuz un'a neghuni unzoo-i, 'i be Yak'usda dutihjih ha nohka' dani'. 'Et la neMoodihti Sizi Gri ye diziti'-i, 'i nohgha tíkulh.

15 'Et 'inka neulhutsinke, soo cho núdulhya. 'Ink'ez nts'en'a la ndi hiye hodulh'eh-i, 'et wheni negha hodilh'e', 'i neghuni gha, k'us neye 'udustl'us gha cha, 'i ts'iyawh soo cho oohtun.

16 'Et neMoodihti Sizi Gri dich'oh, 'ink'ez Yak'usda neBá, 'en nek'entsi'. 'En ye unzoo-i, 'i be 'ilhiz wheni whuz nenilht'i whe 'et whuz un'a ooka tse ts'uhole'.

17 Nohdzi óozoo', 'ink'ez khuni unzoo-i cha, 'ink'ez 'ut'en unzoo-i toh nenóholeh.

## 3

*Neulhutsinke neba tenadoohdli*

<sup>1</sup> 'Et ndi 'udek'ez khuni be nohbulh yats'ulhduk-i, neulhutsinke neba tenadoohdli. NeMoodihti ooghuni 'a cho nohtadókat 'ink'ez nohba dóti' nohni dáhja la, whuz un'a.

<sup>2</sup> Mbene la tank'us ne 'út'enne 'ink'ez dune ntsi'ne, 'enne buch'a naneólelh. 'Aw ts'iyawh iloh buba 'alha' hoont'oh 'et huwa.

<sup>3</sup> 'Et hoontsi'i neMoodihti oot'aníuznootan huba' hoont'oh. 'En soo cho ulhtus-i be núdulhya nohulhtsi. 'Ink'ez ndun ntsi'-un, 'en ch'a nohghunli.

<sup>4</sup> 'Ink'ez nohni nohghun neMoodihti oot'aníuznintan nohba nutsúhizye'-un, 'et ndaht'en 'ink'ez 'et za ndóht'en.

<sup>5</sup> Yak'usda ye nék'entsi'-i 'ink'ez Christ hoolhtus whe usyin-un, 'et whuz un'a nducha neMoodihti nohdzi wheínulhtun.

*Tsedoohtni junih*

<sup>6</sup> 'Et 'awet neulhutsinke, neMoodihti Sizi Gri boozí' gha njan dunohs'utni, mbene la ooba 'alha' hoont'ohne neulhutsinke hinli, 'ilhoghun te tsedutni 'ink'ez 'ants'i ooghá' tikulh za huba sulh'i de, 'et ndunt'ohne, 'enne ts'iyawh buch'a nasahdílh, 'ink'ez buyit 'aht'oh. Ndi Yak'usda ooghuni whubuts'odalh'e-un, 'aw luhuhóotun 'et huwa' hint'oh.

<sup>7</sup> 'Et wheni nohbulh 'uts'ut'en whe 'aw tselhts'udít'ni. 'Et whe t'oonihzin wheni nek'un'a 'ooht'e' huba' hoont'oh.

<sup>8</sup> Aht'i-i, 'aw 'ants'et lhts'i'ulh. Tube neba howa whulna' whe 'ulhdzis 'ink'ez dzenis 'i bulh 'uts'ut'en. 'Et la noht'anílhhts'unoostan.

<sup>9</sup> Ts'iyai be nela 'ooht'en huba' hoont'oh 'et hoontsi'i 'aw dúlhhts'ust'en. Nek'un'a 'ooht'e' ha whuz un'a 'uts'int'oh 'et huwa.

<sup>10</sup> 'Et 'oh da' nohbulh 'uts'int'oh whe nohba nuts'úhizye', 'et whulohne 'aw 'uhutit'elh hukwa lhe'hunízun de, 'aw 'uhoo'alh huba lhe'hóot'oh.

<sup>11</sup> 'Et nohni nohtoh whulh 'úzdits'o, tsedutnine cha hoonli 'ink'ez 'aw lhe'hust'en. 'Et hoontsi'i 'uyoonne e'ut'en k'oh huwu hinli.

<sup>12</sup> 'Et ndunt'ohne neMoodihti Sizi Gri boozí' gha ndi khuni ulhtus-i be ndunóhts'utni, nánilhtsulyaz 'uhoot'en whe didutch'oh huya'alh-i nahólelh.

<sup>13</sup> 'Et hoontsi'i neulhutsinke, 'ut'en unzoo-i 'ulh'en, khun 'etsul 'oohneh junih.

<sup>14</sup> 'Ink'ez ne'e'dustl'us be, neghuni yuk'unulhe'ust'en-un, 'en t'enoohzeh 'ink'ez bulh lhe'zooht'en. 'Et de si yooya oole'.

<sup>15</sup> Khun nohulhutsinke 'uts'un un'a ne'hut'en de, 'aw nohch'az ditni-un nóohzin junih. Nohulhutsin k'un'a oogha dóohni'.

*Yak'usda ye unzoo-i nohbulh 'óot'e'*

<sup>16</sup> Nedzi whúdzighel-un whuMoodihti, 'en dich'oh 'ahoolhyiz 'ink'ez ts'iyantsuk nohdzi whúdoghel nohghá holelh. 'Et nohni ts'iyawh neMoodihti nohbulh 'óot'e'.

<sup>17</sup> Si, Paul, sich'oh sla be 'uk'unusúsuguz-i, 'i be hadih nohdúsní. Nohts'o k'e'usgus totsuk 'et ndunóhdusni.

<sup>18</sup> NeMoodihti Sizi Gri ye unzoo-i, 'i nohni ts'iyawh nohbulh 'óot'e'. 'Et ndo honeh.

## Paul 'Udechoo 'Udustl'us Timothy Ts'ó K'eyanguz-i

*Paul Timothy hadih yúlhni*

1 Si Paul si cha Sizi Gri ba whel'a'-un 'ust'oh. Yak'usda, neulhyis-un, 'en ooghuni gha whe whel'a'-un susdli'. 'Ink'ez neMoodihti Sizi Gri oot'aniuznintan-un, 'en cha ooghuni gha whel'a'-un susdli.

2 Timothy ts'un be 'alha' hoont'oh-i 'i gha soo sye' inli. 'Ink'ez ndi 'udustl'us nts'o tl'as'a'ih-i, Yak'usda neBá 'ink'ez Sizi Gri neMoodihti, 'en gha ye unzoo-i cha, be ugha te'nudzun-i cha, 'ink'ez be nedzi doghel-i cha, 'i ont'e' hukwa' nuszun.

*Khuni whuts'it-i whuch'a khondle'*

3 Macedonia yun k'ut ts'u tisyá whe keyoh Ephesus 'et nenyunusti. Soo cho 'ut'en utalh'elh huba mba nust'i. Whute, 'et za sinda. Daja nyudasni', 'et doo cha za nyudatasnelh, soo khuni ulhtus-i be whulohne dune whuts'it be dune hubohodoolh'eh 'et whuch'a.

4 'Enne 'udada' buba 'alha' yint'oh, 'ink'ez lhelhdun butso'da'ne buba 'alha' hoont'oh-un. Ndoohoont'oh huwa hukwa lhdulhyoh 'uhudutni. 'Aw Yak'usda be 'ut'en k'oh iloh 'uhoont'oh. Be 'alha' hoont'oh-i Yak'usda negha inin'ai-i, 'i gha 'on nus ts'inzoo 'et huwa.

5 Budzi lhditsun, 'ink'ez buyo ts'e oogha t'ets'oninzun-i\* unzoo-i be cha, 'ink'ez 'i be buba 'alha' hot'e' cha, 'et whuz un'a lkh'ehootsi'. 'Et wheni ndi khuni Yak'usda netl'aidan'ai.

6 'Et whulohne 'ants'i iloh ts'e whehanya. 'Et huwa tank'us 'uhuja 'ink'ez lahoot'oh-un howu yahalhduk.

7 Nduhne Moses be 'udustl'us k'ut 'uk'unusguz-i hubodutilh'eh hukwa' huninzun 'ink'ez daja hutni-un, 'aw t'ehonuszun 'et hoontsi 'alha' hoont'oh hutni.

8 'Et hoontsi t'ets'oninzun Moses be 'udustl'us 'uk'uneyuzguz-i mbene la soo ts'ih'un un'a hiye 'ut'en te, 'enne buba yinzoo.

9 Ndi Moses be 'udustl'us 'uk'uneyuzguz-i 'aw dune ts'ih'un 'unt'ohne ba lhe'it'oh 'et cha t'ets'oninzun. 'Ink'ez nja dunt'ohne, 'enne buba' yilya mbene la 'i k'uneyuzuzne cha, ndi khuni netl'adilts'ut-i 'aw hik'unulhe'it'elne cha, budzi dutsunne cha, lubeshi 'ulh'enne cha, mbe la Yak'usda ghudlohne cha, ooze hoontsi'ne cha, mbene la duloo, dubáke ughanne, 'enne cha, dune ughanne, 'enne cha,

10 ts'ekoo k'us dune bulh ninta' 'ut'ihne, 'enne ts'iyawh, whulohne dune dudulh dune ts'un bubeni untsi'ne cha, dune 'ulhnane cha, whuts'itne cha, dich'oh dughuni k'unuyuzne cha, 'et ndunt'ohne dune, 'enne ndi Moses be 'udustl'us buba' yilya. Yak'usda ooghuni unzoo-i, 'i ts'iyaitsuk unzoo whe dune whubodulh'eh. 'Et 'udun huwa ts'ih'un khuni huyodil'e'-i, 'i hich'az ditni de, 'enne cha buba' yilya.

11 Ndi khuni unzoo-i 'uk'enus diziti', 'ink'ez Yak'usda za unzoo-un, 'en ghun za 'unt'oh. 'Et si st'aninintan whe stl'aidan'ai.

*Yak'usda ye unzoo-i, 'i gha uzdólhti'*

\* 1:5 Ndi khuni, 'Neyo ts'e oogha t'ets'oninzun-i, 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun, ts'utni whe' ts'utni.

<sup>12</sup> Christ, Sizi ts'utni-un, 'en neMoodihti 'en st'aninintan whe ustus sulh'tsi 'ink'ez de 'ut'en k'oh ooba' tist'elh-un, 'et st'l'ahon'ai, 'et huwa 'en ts'un musi dusni.

<sup>13</sup> Niz de haoodanzut Yak'usda ch'az dasni 'ink'ez ooba 'alha' hoont'ohne, 'enne dzoh nubuzusde. Ts'iyanne ba dzoh 'udusni inle'. 'Et hoontsi 'aw hoonli t'oonuzusun-un, sba 'alha' lhe'hoot'oh 'et huwa 'ist'en, 'et hoontsi sgha te'duninzin.

<sup>14</sup> 'Et neMoodihti ye sts'un unzoo-i tube lhai cho whe 'unt'oh, 'ink'ez Christ, Sizi ts'utni-un, 'en ye sk'entsi-i, be 'alha' hoont'oh-i, 'i cha 'en bulh 'uhoont'oh.

<sup>15</sup> Ndi khuni be nyulh yasduk-i, 'i 'alha' 'unt'oh 'ink'ez 'i soo ts'iyawh oot'aninintan, 'et ndutni: Christ, Sizi ts'utni-un, 'en ndi yun k'uz nusiya lubeshi 'ulh'enne bubutllyih 'et wheni, 'ink'ez si 'uk'enus dune untsi'-un usdli inle'.

<sup>16</sup> 'Et hoontsi Sizi Gri, 'en sa' whuts'un whuts'ulhditni whe whuba sulh'ih. 'Et 'ink'ez 'en ba 'udechoo 'oh tene'ust'en-un oosdle'. 'Et huwa sgha te'ninzin. Mbene la 'awet nilhduk'w buba 'alha' yint'oh whe 'ilhez hukhutinalh-un hoti'elh, 'enne whubunilhtan-un usdli.

<sup>17</sup> 'Et 'andit mbe la 'ilhez wheni whulerwe unli-un, 'en ba ts'odilhti'. 'En 'uk'enus diziti'-un unli. 'En 'unt'oh dalhtisa 'ink'ez 'aw ts'oo'en ait'oh. 'En za Yak'usda whunih-un unli. 'En 'ilhez wheni ba ts'odilhti'-un uztileh. 'Et ndo honeh.

### *Netsudule soo cho be óonyaih*

<sup>18</sup> Timothy sye' inli. Di khuni ulhtus-i Yak'usda be nus hoo'enne, 'uda' nghu yahalhduk inle', 'et si cha whuz un'a ntl'ahoos'ai. 'I be si netsudule ch'a ts'ih'un un'a bube óonyaih.

<sup>19</sup> Be 'alha' hoont'oh-i 'ink'ez nyo ts'e oogha t'ets'oninzun-i ndi 'ut'en eni, 'i be soo ubontun. Whulohne ndai la bubeni toh yudiz'ai-i, 'i ts'iyawh hukwa lhe'hunizun. 'Et huwa be buba 'alha' 'uhoont'oh-i ninta' honilh'en.

<sup>20</sup> Nduenne Hymenaeus 'ink'ez Alexander 'enne duhulya. 'Enne Yak'usda ch'az yahalhduk. 'Et t'ehonozin ndulhuhoost'en ha, 'et huwa Satan† t'abisti inle'. Ts'iyanne ba tenadondli

## 2

<sup>1</sup> 'Et huwa soo cho nyudusni, 'udechoo Yak'usda ts'un ts'iyanne buba oots'u tedindli, 'et la bula 'ooneh. 'Ink'ez hukwa' ninzun k'un'a la 'et whuz un'a bula tit'elh, 'ink'ez Yak'usda ts'un musi dini.

<sup>2</sup> Lerwene cha 'ink'ez ts'iyawh neando 'ududildzonne cha buba tenadindli. 'Et de la t'ezdusni 'ink'ez nedzi doghel whe ndi yun k'ut uzdolts'i'. 'Et whuz un'a Yak'usda ba ndi yun k'ut uzdolts'i' 'ink'ez ts'iyanne ba ts'inzoo oole'.

<sup>3</sup> 'Et whuz un'a yinka uzdilhts'i-un, 'et hoonzoo whe' hoont'oh 'ink'ez Yak'usda neulhyis-un whuz un'a neba hukwa' ninzun.

<sup>4</sup> 'En 'unt'oh ts'iyanne butllyih hukwa' ninzun 'ink'ez khuni 'alha' 'unt'oh-i t'ehinoozeh ha.

<sup>5</sup> Yak'usda 'ilhoghun za unli. Yak'usda 'ink'ez ndi yun k'ut dilhts'ine hubulheguz 'ilhoghun buba yalhduk-un za unli, nyoon dune Christ, Sizi ts'utni-un, 'en 'unt'oh.

<sup>6</sup> Wheni ts'iyawh nenaotakulh ha butl'a' dudilti. Ndet la whusahoolts'ut-un soo 'et 'uja, ts'iyanne whunilhtan 'et whuz un'a.

<sup>7</sup> 'Et wheni Yak'usda utahasalhti whel'a'-un tisdleh ha 'ink'ez ooba yatisduk. Si 'utisnelh 'udun yun k'ut whut'enne be 'alha' hoont'oh-i 'ink'ez khuni 'alha' 'unt'oh-i cha 'et whúbuntistun ha. 'Et Christ oonalh daja dusni 'alha' 'unt'oh-i be' dusni, 'aw lhozusts'it.

† 1:20 Nduen Satan 'en netsudule unli.

*Dune 'ink'ez ts'ekoo mbene la ooba 'alha' hoont'ohne Yak'usda ba 'ilhunhodulh-un dahutit'elh-un*

<sup>8</sup>'Et 'awet ndi yun k'ut ndulcho whe dunene tenahudoodli. 'Et huwa bula hoonliyaz lubeshi ooghu hooloh whe dodolni. 'Aw huske bubeni toh hooloh 'ink'ez buba nawh lhe'host'e' whe tenahudoodli. 'Et whuz un'a sdzi ndulcho i be 'enne buba hukwa' nuszun.

<sup>9</sup>'Ink'ez whuz un'a ts'ekoo 'enne cha ts'ih'un un'a whe soo nahudoot'ih. Huwhunih hukw'un'a soo hudoot'e', buyust'e ts'iyawh ook'e 'uzdla hukw'un'a. Ditsigha' lhat te cho nahidoolhtsi' junih. K'us gold, k'us kw'usul nehídilya-i, k'us naih 'on nus dizti'-i, 'et ndóohoont'oh-un 'et huwa whulohne dune tank'us hunint'i, 'et huwa 'utni,

<sup>10</sup>'et hoontsi' ts'ekoo, mbene la Yak'usda ts'un teni nilhdzunne, 'enne 'ut'en unzoo-i 'uhutilh'elh, 'i be, 'et whuz un'a ts'ekoo soo ot'enne hutileh.

<sup>11</sup>'Et ts'ekoo dune but'l'a hududoolyelh 'ink'ez t'ehudusnih whe soo cho Yak'usda ooghuni huyodool'eh.

<sup>12</sup>'Et ts'eke 'aw dune hodoolh'eh ha, 'ink'ez yumoodih oole' ha oot'althuwhus'al. 'Ink'ez 'ants'i t'edoosnih huba' hoont'oh.

<sup>13</sup>Yak'usda Adam 'en cho 'uyinla, 'et hukw'elh'az Eve inla 'et huwa.

<sup>14</sup>'Ink'ez Adam 'aw nalhni't'oh, k'us nyoon ts'eke 'en nainan'a 'ink'ez tank'us 'uja.

<sup>15</sup>'Et hoontsi' ts'ekoo ts'ih'un un'a dudeni be khuhudli whe be 'alha' hoont'oh-i hut'i, Yak'usda k'ehintsi' cha, 'ink'ez buyust'e lubeshi ooghu hooloh de, 'et za ndihint'oh de, buyaz whulhiih te hudutijih.

### 3

*Yak'usda ba huwunli-un, 'et diz un'a dune oole' huba' hoont'oh*

<sup>1</sup>Ndi khuni oot'aniuznintan-i 'et ndutni: Mbe la Yak'usda ba huwunli-un tileh hukwa' ninzun de, 'et de 'en 'ut'en unzoo-i 'utilh'elh hukwa' ninzun whe 'unt'oh.

<sup>2</sup>'Ink'ez Yak'usda ba huwunli-un, 'aw dune hoonli whe tank'us lhe'oost'e'. 'Ilhoghun za oo'at oole'. Duba whutnih. Ts'ih'un ni nizulh. Dune yoh dali. Soo dune hodulh'eh-un unli,

<sup>3</sup>'ink'ez ts'ekoo too' 'i cha ha dalhatni. 'Aw khun lhonulhch'e cha 'unt'oh. 'Aw sooneya ha dalhatni. Dune dach'e nulhe'ust'en. Dune dulhyoh lhe'dusnih. 'Uyoonne dune ch'e' ha lhe'nizun.

<sup>4</sup>Ts'ih'un un'a duyoh dilhts'ine bughole' 'ink'ez dich'oh duduzkeh, 'enne cha dich'oh budzi be hik'une' 'ut'en uboolhtselh.

<sup>5</sup>'Et ts'ih'un un'a duyoh dilhts'ine bughunli 'aw t'oonuszun de, 'et de nts'en'a Yak'usda ba 'ilhunaoodulhne bughu tileh?

<sup>6</sup>'Aw 'andit ooba 'alha' hooja-un iloh 'oot'e'. Doo ka si ut'udilti'-un oole', 'ink'ez netsudule be ba nahisda-i, 'et doo ka la didut cha whuz un'a 'ooneh.

<sup>7</sup>'Ink'ez cha mbene la ooba 'alha' whe'hoont'ohne, 'enne cha soo highu yaoolhduk, doo ka si tank'us 'uja 'ink'ez netsudule yoolhgooh.

*Yak'usda ba ne'út'en-un, 'et nts'en'a dune tileh*

<sup>8</sup>Whuz un'a za Yak'usda ba ne'út'en hukwa 'ut'enne, 'enne Yak'usda buba dóti'. 'Aw nanki bughuni lhiloh. 'Aw ts'ekoo too' 'i cha ka dalhatni, 'ink'ez 'aw sooneya cha ka dálhatnih.

<sup>9</sup>'Et whe' hoont'oh hooyoh-un, be neba 'alha' whutat'elh 'i bulh, buyo ts'e oogha t'ets'oninzun-i, soo ootsun hooloh 'et hahotun.

<sup>10</sup>'Et hoontsi' ndunne Yak'usda ba ne'út'enne, 'udechoo soo cho dune t'ebunoozeh 'ink'ez 'aw hoonliyaz whe hik'eho'alh-un hooloh de, 'et de Yak'usda ba ne'tit'en.



<sup>11</sup> Whuz un'a za ts'ekoo 'enne cha Yak'usda buba dóti', 'uyoonne ch'az yalhoooolhduk, duba whutnihne hoole', 'et huwa ts'iyantsuk whe but'aniuznootan ha.

<sup>12</sup> Ink'ez ndunne Yak'usda ba ne'út'enne, 'enne cha 'ilhoghun za oo'at oole'. Dich'oh duduzkeh ink'ez duyoh dilhts'ine cha ts'iyawh whe ts'ih'un un'a bughole' huba' hoont'oh.

<sup>13</sup> Mbe la soo Yak'usda ba ne'ust'enne, 'enne 'uyoonne toh soo cho Yak'usda ba hooyin, ink'ez Christ, Sizi ts'utni-un, 'en ye 'alha' unt'oh-i, 'aw whelhnijut whe 'i ghun 'uyoonne bulh yaoolhduk.

### *Hooncha whe' hoont'oh hooyoh-un*

<sup>14</sup> Awet nilhdukw nts'un tisyalh hukwa' nuszun 'et hoonts'i nts'o k'e'usges.

<sup>15</sup> 'Et hoonts'i sa'yaz ne'zust'en de, 'et de la ndi 'udustl'us 'i gha la t'oononzin whe Yak'usda ooyoh dahutit'elh-un. Mbe la Yak'usda gha 'ilhodulhne, 'enne Yak'usda khuna-un ooyoh hinli whe' hint'oh. N dunne 'ilhunaoodulhne ndi khuni 'alha' unt'oh-i be highunli ink'ez ts'ih'un un'a highu yalhduk.

<sup>16</sup> Ink'ez 'aw huwun lhdulhyoh lhe'ts'udusnih whe Yak'usda ba ndi yun k'ut uzdolts'i ha, 'et hooncha whe' hoont'oh. 'Et Yak'usda dich'oh dune suli' 'et whe whubunilhtan. Ndoni ts'ih'un unt'oh unli yulhni. Lizasne huyan'en. 'Udun yun k'ut whut'enne, 'en ghun whulh 'uhudants'o. Ndi yun k'ut whut'enne, 'en ooghun ooba 'alha' yint'oh suli', ink'ez yak'uz ts'e huhoont'i' whe danahinilhti.

## 4

### *Whuch'a nahusdilh whutáleh-un*

<sup>1</sup> 'Et 'awet Ndoni soo ts'ih'un un'a ts'et gaih yalhduk whe ndutni, k'at le ntsi'-i nududehne whulohne dune nabunti'ah. 'Et huwa ndet la whubodutilh'eh-un, 'et za huhootuzalhts'ilh. Ink'ez ndi be 'alha' hoont'oh-i, 'i hila dutitnih whe' hoont'oh.

<sup>2</sup> N dunne duba na'udzoo' whe whuts'it-i be za yahalhdruk. 'Et buyo ts'e oogha t'ets'oninzun-i 'ants'i kwun be k'eyiguz le'hut'ih.

<sup>3</sup> Lghu dutalts'ilh-un, 'et cha whuch'a hontayoot, ink'ez whulohkhi t'alh-i, 'i cha hich'a buntáyulh. 'Et hoonts'i mbene la ooba 'alha' hoont'ohne ink'ez khuni 'alha' unt'oh-i t'eininzunne, 'enne hika' ninzun-i ts'iyawh huyoo'alh huba' hoont'oh, Yak'usda 'uyinla' et huwa. 'Et 'udechoo ndi t'alh-i ha Yak'usda ts'un musi hudooni' ink'ez huyoo'alh.

<sup>4</sup> Yak'usda 'uyinla-i, 'i ts'iyawh 'uzoo' whe 'unt'oh, ink'ez ookwa lhe'ts'unooszin junih. 'Et huwa Yak'usda ts'un musi ts'utni ink'ez ts'oo'alh.

<sup>5</sup> Yak'usda ooghuni ink'ez tenadudli bulh 'i be neba unzoo ulhiih whe ts'u'alh.

### *Sizi Gri ba soo ne'ut'en-un onle'*

<sup>6</sup> Lhulhutsinke unline, 'enne Yak'usda ghun hubodilh'eh de, 'et de la Sizi Gri ba soo ne'út'en-un tanleh. Ink'ez ndi khuni be 'alha' hoont'oh-i, 'i ghun t'oonanzin, ink'ez 'i soo cho ook'une' zint'en.

<sup>7</sup> 'Et hoonts'i khuni lhizoo'-i, ink'ez lait'oh-i khuni, 'i oozólhts'ai' junih! K'us Yak'usda ba ndi yun k'ut uzdolts'i ha, 'i be ilhtus onle'.

<sup>8</sup> 'Et neyust'e ba ne'uzdunuldze' te, 'atsul za neba hootazoo', 'et hoonts'i Yak'usda ba ndi yun k'ut uzdolts'i ha, 'et ts'iyantsuk whe whudít'i'. 'I gha la ndi yun k'ut uzdilhts'i-un nela' 'ewhudutit'elh ink'ez yak'uz neztiyalh de wheni' et cha nela' 'ewhudutanelh.

<sup>9</sup> Ndi khuni be nyulh yasduk-i, 'i oot'anínontan ink'ez itálhchulh huba soo 'uldzoo' whe 'unt'oh.

<sup>10</sup> 'Et wheni 'uts'uten 'ink'ez hukw'elha dzóh nuts'udeh. Yak'usda khuna-un, 'en oot'aniuznitan 'et huwa. 'En ts'iyanne butilhyis hukwa' ninzun, mbene la yuba 'alha' yint'ohne, 'enne soo ubulhyis.

*Yak'usda ba ne'int'en-un, soo cho howinli*

<sup>11</sup> 'Et ndi khuni nt'ladis'ai-i, 'i be 'uyoonne khuni ulhtus-i be whubodutalh'eh.

<sup>12</sup> Chilh inli hoontsi 'uyoonne ba 'ants'i onle' junih. K'us ooba 'alha' hoont'ohne, nyun nyuhunilh'en de, 'et huwa huhodool'eh. Ndai khuni be yailhduk-i, nts'en'a la ndi yun k'ut sinda, nts'en'a la 'uyoonne k'eintsi', nyughi be cha, mba 'alha' hoont'oh-i, 'i cha, 'ink'ez nts'en'a la lubeshi ch'az 'undunilt'i cha. 'Et 'ohwhi be la ooba 'alha' hoont'ohne whubunolhtun.

<sup>13</sup> 'Et ndet la nts'u tisyalh whuts'un, khun ndi Yak'usda ooghuni buba k'ooyailhduk-un, 'et 'etsul lhe'duzonih. Ndai la khuni be ts'oolhtus ha be nebulh yailhduk, 'i be bubulh yailhduk, 'ink'ez 'on 'un cha whubunilhtun.

<sup>14</sup> 'Et 'oh da' ndunne 'utso whudilhduzhne dula ntsi k'ut hudalni. 'Et whe mba nus huhon'en 'ink'ez 'i nghant'ai-i 'ants'i mba oole' junih.

<sup>15</sup> 'Et njan howun nuni ninzut 'ink'ez whut'l'a'dudiltih. 'Et de la oot'az ninyeh-i, ts'iyanne hinoohl'en.

<sup>16</sup> Nyunch'oh soo cho khinli 'ink'ez khuni be whuts'odul'eh-i cha. 'I be bulh za 'ont'e'. 'Et ndint'oh de, 'et de nyunch'oh 'uduzilyih 'ink'ez mbene la nyudits'one, 'enne cha ubalhyiz whe 'int'oh.

## 5

*Yak'usda ba 'ilhunaoodulhne, soo cho né'bilh'en*

<sup>1</sup> Dune nyanus whudilhduzhul-un hoonli hukwa' dóni' junih. K'us mbá k'un'a bulh yailhduk. Dune nk'oh whudilhduzhne, nyulhutsinke k'un'a bubulh yailhduk.

<sup>2</sup> Ts'ekoo nyanus whudilhduzhne, nloo k'un'a bubulh yailhduk. 'Ink'ez ts'ekoo nk'oh whudilhduzhne, nyulhtuske k'un'a khuni ootsun hooloh-i be bubulh yaoolhduk.

*Mbene la soo tsandilh unline ubuzdólhti'*

<sup>3</sup> Ndunne soo ts'ih'un tsandilh unline, 'enne cha ubudólhti'.

<sup>4</sup> 'Et hoontsi'i mbene la tsandilh buzkeh hoonline, k'us oochaike hoonline, ndunne tsandilh yuts'u haindene, 'enne duloo ts'ih'un un'a highole'. 'Et whe Yak'usda be 'ut'en k'oh whutaleh. 'Et 'udechoo duyoh dilhts'ine bubodólhti', 'ink'ez dudusneke bula' hoot'en. Ndiz un'a hoonzoo whe' hoont'oh 'ink'ez Yak'usda buts'u hukwa' ninzun.

<sup>5</sup> Mbe la soo ts'ih'un tsandilh unli-un 'ink'ez oonat 'ehooloh de, Yak'usda 'en za yut'aninootan yula' tit'elh huba. 'Et dzin 'ink'ez 'ulhdzis-i bulh 'ahoolhyiz Yak'usda ts'un teni' nilhdzun whe tenadudli.

<sup>6</sup> 'Et hoontsi'i tsandilhne, mbe la dich'oh duk'un'a za whe ndi yun k'ut usda, ndunt'ohne hukhuna hoontsi'i dahuzsai whe' hint'oh.

<sup>7</sup> Daja nyudasni' la 'i khuni ulhtus 'i be ts'iyanne bubulh yailhduk. 'Et whe buk'eholts'it-un hooloh.

<sup>8</sup> 'Et hoontsi'i mbene la 'aw dunatneke ghu lhilohne, 'ink'ez duyoh dilhts'ine, 'enne ghu lhuhiloh de, 'et ndunt'oh-un ndi be 'alha' hoont'oh-i yuch'az nal'alh, 'ink'ez ooba 'alha' lhe'hoot'ohne ba nus lhe'hizoo' whe 'unt'oh.

<sup>9</sup> Tsandilh lkh'utat whunizyat 'on 'un be yus k'ut (60) de, 'ink'ez 'ilhoghun za ghinda' de, 'en za buboozi' 'uk'oguz huba' hoont'oh.

10 Unzoo-i za' hulh'en huwa t'ehunoodzin. Ts'oodunne nilhyai de, dune t'ebunuszunne, 'enne hoonts'i yoh dabulih, Yak'usda ooch'e'ne buke tunagus, dzoh nuzutne la 'ut'en de, 'et ndi 'ut'en unzoo-i soo cho ts'iyawh 'uyoolh'en.

11 'Et hoonts'i mbe la tsandilh t'et unline, 'enne buboozi' 'uk'eonges junih. 'Ut'en ntsi'-i ha' huninzun sulii, 'ink'ez Christ ch'az nahulh'a de, ki hutit'elh hukwa' huninzun.

12 'Ink'ez 'udechoo dughuni huye nahizya-i k'ahininyuz de, 'et de buba nahutideh.

13 'Ink'ez cha tsehudutni cha huhodil'e' 'ink'ez kwun toh nuhuya. 'Ink'ez 'aw tsehudutni za iloh, 'ughu yahulhduk 'ink'ez 'uyoonne e'ut'en k'oh huwu hinli cha' hint'oh. 'Aw ne' hudooni' huba lhe' hoot'oh, 'oh te ne' huduni'.

14 Njan 'et buts'u hukwa' nuszun, ndunne tsandilh 'aw yoo' un lhiszuhlne, ke náhoot'e' 'ink'ez bubuzkeh hole', 'ink'ez duyoh cha huwo hoole'. 'Et njan nduhut'en de, 'aw nech'az ditni-un nebulh yatilhduk-un ooghá holts'it ait'oh.

15 Whulohne 'uda' Sizi Gri hich'az nalh'a whe Satan hik'une' 'ut'en 'et huwa.

16 Mbe la dune k'us ts'eke 'en ooba 'alha' hoont'oh unli-un, 'ink'ez ooloo tsandilh unli de, 'et de ndai la ye ndunidzit-i, 'i be bula' hoot'en. 'Et whuz un'a 'onghohne Yak'usda ba 'ilhunaoodulhne hoonliyaz bugha hoo'alh ait'oh. 'Et nduhut'en de, 'et de la soo ts'ih'un tsandilh unline, ndai la hiye ndunidzit-i, 'i be bughu hoole'.

### *Mbene la netso whudilhdzulhne ubuzdólhti'*

17 Netso whudilhdzulhne soo dune tso nuyane, 'enne soo ubudólhti' 'ink'ez nawh 'ultsuk-i be bughohle'. Mbe la 'ut'en ulhtus-i be 'ut'en whe Yak'usda be 'ut'en k'oh dune hodulh'eh 'ink'ez Yak'usda ooghuni be yalhdukne, 'enne 'uk'enus soo ne'boolh'en.

18 Yak'usda ooghuni 'et cha ndutni, "Ndet la musdoos dune tl'o mai' 'uzti'ulh wheni 'uyulh'en te, 'aw 'uti'ulh whuch'a 'enol'a' huba lhe' hoot'oh." 'Ink'ez 'et cha ndutni, "'Ut'en-un be 'ut'en ooba 'uk'elha whutaleh whe' hoont'oh."

19 Mbene la 'utso whudilhdzulhne hoonli huwun buk'ehuhoota'alh de, 'et nane k'us tane te, 'enne hiyulh t'ewhuninzun de, 'et de za huwu yahoolhduk huba' hoont'oh.

20 Mbene la lubeshi ilhchootne, ts'iyanne nalh whe ninta' hant'en-un hukwa' bodóni' huba' hoont'oh. 'Et de la 'onghohne cha whe hunooljut.

21 Yak'usda cha, Sizi Gri neMoodihti cha, 'ink'ez lizas 'utahalyane cha, 'enne ts'iyawh bunalh soo ts'ih'un un'a nyudutasnelh, ndi khuni be daja nyudasni' 'et huwa 'ilhiz oole' ontun. Ndai la 'utalh'elh-i, 'i ts'iyawh dune dach'e hole' hukw'un'a 'oneh junih. 'Ink'ez 'aw 'ilhoghun za k'entsi' 'ink'ez hoonliyaz oots'u nolht'i junih.

22 Sta'a dune k'edolnih junih. 'Ink'ez 'uyoonne lubeshi 'ulh'enne e'ut'en k'oh ts'u tonya' junih! Nyunch'oh cha lubeshi yit 'ududoldzin.

23 'Et lhat whe mbut gha ndinda, 'et huwa 'aw too za ontnei' junih, ts'ekoo too' nt'umiyaz ook'eto 'ontnai'.

24 Whulohne bulubeshi ts'iyanne yunilh'en, 'et huwa ndai la ye buba nahutideh whutso, 'i dahaja la, ts'iyanne t'ehontazin. 'Ink'ez whulohne bulubeshi nahinu'i, 'et hukw'elh'az ndai la ye nahizya-i, 'i dahaja la, ts'iyanne t'eyuntizeh whe' hoont'oh.

25 'Ink'ez cha mbe la 'ut'en unzoo-i 'ulh'en ts'iyanne t'ewhuntizeh 'ink'ez 'ut'en unzoo-i nahinu'i' de, 'i hoonts'i ts'iyanne t'ewhuntizeh.

## 6

*'Ulhna unline, 'enne cha dumoodihne hubodólhti'*

1 'Et mbene la 'ulhna unline, 'enne cha dumoodihne ts'ih'un un'a bughu nuni hunoodeh whe soo cho hubodolhti'. 'Et nduhut'en de, 'et de Yak'usda boosi' ink'ez ye whubodalh'e' i cha 'aw 'uyoonne yuch'az dootni ait'oh.

2 'Et 'ulhnane bumoodih ooba 'alha' hoont'oh hinline, 'enne butsu hu-dootni junih, lhulhutsinke hinli 'et huwa. 'Et k'us ndunne 'ulhnane, 'enne 'on nus 'ulhtus-i be buba' hut'en. Nyoonne bumoodihne, 'enne Sizi Gri ghun ooba 'alha' yint'ohne hinli 'ink'ez buk'entsi'. 'Et huwa 'on nus 'ulhtus-i be buba' hut'en whe dube' 'ut'en be bula' hut'en whe' hut'en. 'Et ndi khuni be nyulh yasduk-i, 'i 'uyoonne cha hubodilh'eh 'ink'ez budzi do na'inleh.

*Sooneya nohyak'usda oole' junih*

3 'Et mbe la dune whuts'it be dune hodulh'eh-un, 'en Sizi Gri neMoodihti ooghuni unzoo-i italhchulh hukwa lhe'nizun-un. 'Ink'ez nts'en'a Yak'usda ba ndi yun k'ut uzdolts'i' ha hukw'un'a ubodutilh'eh hukwa lhe'nizun de,

4 'en dune 'ududilti' whe 'unt'oh. Hoonli t'oonuszun. 'Et huwa 'ahoolhyiz dune dach'e za 'udinelh 'ink'ez khuni ghun dune dulhyoh 'utni. 'Et huwa ndunt'ohne dune 'oonih ooghu diz'ai unline 'uhint'oh. 'Uyoonne cha dulhyoh hutni, khuni ntsi'-i be 'uyoonne cha ghu yahalhduk. 'Et 'uyoonne lubeshi e'ut'en za ghu nuni hunudeh.

5 Ndunne bubeni ntsi' sul'i' whe 'ahoolhyiz lhdulhyoh 'uhunudzun. Khuni 'alha' 'unt'oh-i lhuhit'i'. 'Enne 'uhuninzun mbe la Yak'usda be 'ut'en koh hukw'u ne'ut'en-un, 'en 'utinilh hoonzoo' tinelh. 'Enne buch'az nasindaih.

6 'Et hoonts'i soo ts'uhooht'i' whe Yak'usda be 'ut'en k'oh 'uts'uwulh'en de, nedzi hoont'i'-un, 'et neba 'uk'elha whuzdli' whe' hoont'oh.

7 Ts'uwhezdli' da', 'aw hoonliyaz whusalhts'ilel, 'ink'ez 'alha neba dzin whulatoh sul'i' de, 'aw hoonli naztoola' ait'oh.

8 'Et huwa 'ut'alh-i 'ink'ez be dune ts'inli-i ts'ut'i de, 'et 'awet neba soo' hot'e'.

9 'Et hoonts'i mbene la hoonzoo' tinelh hukwa' ninzunne, 'enne whunih ooghu lhd'i'ohne 'ink'ez ndai la hoonli hiye ninta' tit'elh, 'i 'aw' i za highu nuni nudeh. 'Et whu la gha ts'e yo ubonilht'i' 'et whe ndi yun k'ut hudilhts'i-un ninta' whutat'elh 'ink'ez hoonts'i' ts'e hutiyalh.

10 Sooneya ooba diti'-i, 'i 'unt'oh lhat-un hoonts'i' oogha whe' whududit'ih. 'I gha whulohne dahatni k'et be 'alha' hoont'oh-i ch'a hudulh 'ink'ez lhat-un budzi unduda-un khanáhuwhut'ai.

*Dune hodilh'e'-un cha 'ink'ez nyunch'oh cha soo cho khondle'*

11 'Et hoonts'i Timothy Yak'usda oodune' inli. Nyun ndowhi, 'i ooch'a tilgaih, 'ink'ez be ts'ih'un 'uhooht'oh-i, be Yak'usda k'une' whut'en-i, be 'alha' hoont'oh-i, be nek'ets'ints'i'-i, 'i cha, be whulh ts'uzyin-un cha, 'ink'ez be yo uzduhdilzun-i cha, ndi 'i ts'iyawh whunanyalh hukwa 'int'en.

12 Neba 'alha' 'unt'oh-i, 'i gha 'on 'un 'uts'ooneh ait'oh whe hukwa' ts'ut'en. Nyun cha 'on 'un ooneh ait'oh-un hukwa' 'ont'en. 'Ilhiz be ts'ukhuna-i, 'i duts'o cho hontun. Nyun cha dutanjih ha nka hisda 'et huwa. 'Ink'ez lhane nalh soo hoonzoo whe budani'.

13 'Et Yak'usda 'en gha ndi yun k'ut ts'iyaitsuk khuna 'ink'ez Christ, Sizi ts'utni-un, 'en Pontius Pilate oonalh soo hoonzoo k'un'a yudani'. 'Et huwa Yak'usda 'ink'ez Christ, Sizi ts'utni-un, 'en nalh soo cho nyudutasnelh,

14 khuni ntl'adis'ai-i ookw'une' 'ont'en. Khun naoolts'it junih. 'Uyoonne dzoh ts'e nghu yahutilhduk, 'et 'oh te ne'ont'en junih. 'Et neMoodihti Sizi Gri whusatiyalh whuts'un, 'et za ndont'e'.

15 Sizi Gri whuz de tiyalh-un, ndet 'uwhutanelh, 'oh de neMoodihti 'en hukwa' ninzun de, 'et de 'uwhutanelh. 'En 'uk'enus unzoo 'ink'ez neMoodihti

'en za k'une' 'ut'en-un unli. Lerwene ts'iyawh bulerwe unli 'ink'ez moodihne cha ts'iyawh bumoodih unli.

<sup>16</sup>'Aw 'en za be dalhts'utsa-i yut'i. Nts'e la usda-un, 'et ndi oots'u hayanduz-i, 'i gha 'aw dune yuzih neooya' ait'oh. 'Aw dune lhuyiz'en 'ink'ez 'aw dune yoo'enne hooloh. 'En 'aw 'en za 'ilhiz be hoolhtus-i yut'i. 'Et huwa uzdilhti'. 'Et ndo honeh.

*Hoonzoo' 'unt'ohne 'ududólhti' junih*

<sup>17</sup>Ndi yun k'ut' hoonzoo' 'unt'ohne, 'enne khuni ulhtus-i be budoni', 'aw ndi yun k'ut' be' hoonzoo' ts'int'oh-i 'aw di lhiloh. 'Et huwa 'aw 'i oot'aninoohtan huba lhe'hoot'oh. 'Aw ndi sooneya oot'aninintan-i iloh 'unt'oh. 'Et k'us Yak'usda mbe la khuna-un, 'aw 'en za oot'aninoohtan. Yak'usda 'en 'unt'en oola hoonli whe ts'iyaitsuk be ts'ohot'e' ha negha yunleh.

<sup>18</sup>Ts'ih'un un'a 'uhoot'en budoni'. Bula hoonli whe 'ut'en unzoo-i 'uhoolh'en. 'Ahoohyiz 'uyoonne hiye ndunidzit-i, 'i be bula' hutit'elh-un huba lhahúdoot'e'. Soo hoont'i' whe lhata's'oolyelh.

<sup>19</sup>'Et nduhut'en de, 'i be ndo yak'uz dizti-i dich'oh duba 'ilhe'hosdle, whusaootilts'ulh-un wheni. 'Et la 'ilhiz be ts'ukhuna-i huyitálhchulh.

*Be 'alha' hoont'oh-i soo cho ooghondle'*

<sup>20</sup>Sye' Timothy ndi khuni ntl'adis'a-i, 'i soo cho ook'une' tant'en, 'et wheni usdla. 'Ants'i 'oh neyalhdukne 'ink'ez Yak'usda ch'az yalhdukne, khun buzih nonya' junih. Mbene la whuz un'a yalhdukne, t'ehoninzun huninzun hoonts'i, 'enne nech'az ditnine hinli.

<sup>21</sup>'Et huwa be 'alha' hoont'oh-i whuz un'a highu yalhdukne, 'enne tank'us hidulh whe' hutni.

'Et Yak'usda ye unzoo-i, 'i nyulh 'oot'e'. 'Et ndo honeh.

## Paul Bulh Nanki 'Udustl'us Timothy Ts'ó K'eyanguz-i

### *Paul Timothy hadih yulhni*

<sup>1</sup> Si Paul, Sizi Gri ba whél'a'-un usdli. Ndi 'ilhiz be ts'úkhuna-i, 'i Christ, Sizi ts'utni-un, 'en yut'i 'ink'ez 'ilhiz wheni 'unt'oh nedáni'. 'I gha la Yak'usda ndet la sts'u hukwa' ninzun 'et huwa whél'a'-un susdli'.

<sup>2</sup> Nyun Timothy sye' ook'esi'-un inli 'ink'ez ndi 'udustl'us nts'o t'l'as'aih-i. Yak'usda neBá 'ink'ez Christ, Sizi ts'utni-un, 'en neMoodihti, 'en gha ye unzoo-i cha, be úgha te'nudzun-i cha, 'ink'ez be nedzi dizghel-i cha, 'i ont'e' hukwa' nuszun.

### *Paul Timothy yuba whunalni nts'en'a la Sizi Gri ts'u nalh'a-un*

<sup>3</sup> 'Et Yak'usda ts'un musi dusni. Stsoda'ne k'un'a, syo ts'e oogha t'ets'oninzun-i, lubeshi ooghu hooloh whe Yak'usda ooba' ne'ust'en. Dzin 'ink'ez 'ulhdzis-i bulh, ndet la tenadusdli totsuk nghu ni zástan.

<sup>4</sup> Nyunats'ultoo' nus'en 'et whunaznih 'ink'ez 'on nus nyutis'elh hukwa' nuszun, 'et de la hóst'e'.

<sup>5</sup> Ndi soo be 'alha' hoont'oh-i, 'i nyulh 'unt'oh, 'i oonaznih. Ntsoo Lois, 'en 'udechoo ndi be 'alha' hoont'oh-i yulh 'unt'oh inle', 'ink'ez nloo, Eunice 'en cha. 'Ink'ez nyun cha 'et whuz un'a za 'int'oh, 'et sba 'alha' hoont'oh.

<sup>6</sup> 'Et huwa mba whunazni ndet da' ntsi k'et duznih whe Yak'usda huwa yú'aih-i, 'i ntl'aídan'ai. 'I 'ants'i bulh ne'hilhnah le'ilh'en, 'et la 'on nus ulhtus oole'.

<sup>7</sup> Soo cho whunaoolni, Yak'usda Ndoni neyídan'ai whe 'aw lhts'uníljut. K'us Ndoni gha be ts'ílhtus be lhk'ets'utsi'-i, 'i cha ts'ut'i, 'ink'ez ne-eni be whunih ts'inli.

### *Khuni unzoo-i khun hukwaya onle' junih*

<sup>8</sup> 'Et huwa 'uyoonne neMoodihti ghun bubulh yailhduk de, khun hukwaya onle' junih. 'Ink'ez si cha 'adus'ai-un, 'et cha khun hukwaya onle' junih. K'us 'uyoonne khuni unzoo-i be bubulh yailhduk whe dzoh ninzut de, 'et de Yak'usda ye ulhtus-i, 'i gha 'ínt'en.

<sup>9</sup> 'En 'uja neulhyih. Nedzi lubeshi ooghu hootáloh 'et whuz un'a za neka' ninzun. 'Aw neye 'ut'en k'oh gha iloh neka' dani'. Dich'oh ye unzoo-i, 'i gha uzdutijih ha neka' dani', 'et whuz un'a za hukwa' ninzun. 'Ink'ez ndi ye unzoo-i, 'i Christ, Sizi ts'utni-un, 'en oots'u hayílt'sut whe neghalts'ut. 'Et 'udechoo whe' whudutát'elh, 'et whutso da' 'uhoonla.

<sup>10</sup> 'Et 'awet Sizi Gri netaninya. 'Et whuz un'a Yak'usda ndet la dich'oh hukwa' ninzun-un 'ink'ez ye unzoo-i cha, 'i yunénilhtan. Wheni bé dáztsisah-i, 'i Sizi Gri neba gak yulhtsi 'ink'ez khuni unzoo-i, 'i be 'ilhiz be ts'úkhuna-i negha ínín'ai. Ndi 'aw dálhts'utisa-un, 'et neba whusahón'ai, 'et whe whunénilhtan.

<sup>11</sup> 'Et wheni si 'udun yun k'ut whut'enne, 'enne buts'u tisyalh. 'Enne butoh ubulh yátisduk, 'ink'ez whubodutis'eh, 'et whuba buts'u whel'a'-un tisdleh.

<sup>12</sup> 'Et huwa si cha dzoh nuszut, 'et hoonts'i 'aw hukwaya lhusdloh. Mbe sba 'alha' unt'oh-un t'enuszun 'et huwa. 'Ink'ez ndet la ootl'ahoos'ai-un, 'udek'ez dzin whuts'un soo 'ultus whe sba hootatun, 'et sba 'alha' hoont'oh.

### *Ndi khuni unzoo-i soo cho oontun*

<sup>13</sup> Ndi khuni ulhtus-i oogha 'uts'ut'en-i le'unt'oh-i, si sts'un dants'o, 'i duts'o cho oontun. Ndi be 'alha' hoont'oh-i 'ink'ez be lhk'ets'utsi-i, 'i Christ, Sizi ts'utni-un, 'en oots'u hayande 'et huwa.

<sup>14</sup> N dai la unzoo-i ntl'álya-i, 'i ts'iyawh Ndoni be ulhtus-i, 'i be soo cho hoontun. 'En 'unt'oh neyudínda.

<sup>15</sup> Njan t'ooninzun ts'iyanne Asia whut'enne sch'az nahulhya. Phygellus 'ink'ez Hermogenes 'enne cha.

<sup>16</sup> Onesiphorus 'en lhat sdzi dona' yulh'ih. 'Ink'ez ndi lhuzt'ih t'l'ool be whe dust'i-i, 'aw yukaya lhiloh whe sunalh'en. 'Et huwa 'en ooyoh dilhts'ine neMoodihti bugha te'nozeh.

<sup>17</sup> 'Et keyoh Rome ninya whe soo cho skunúta whe nasilhti.

<sup>18</sup> 'Et dzin neMoodihti\* yugha te'nozeh. 'Ink'ez keyoh Ephesus ts'e lhat whe sla 'uja íne!, 'et cha soo t'ooninzun.

## 2

### *Ndi Sizi Gri ye unzoo-i, 'i be soo ilhtus ónle'*

<sup>1</sup> 'Et huwa sye' nyun Sizi Gri ye unzoo-i, 'i be soo ilhtus ónle'.

<sup>2</sup> 'Ink'ez lhane nalh daja nyudásni'-un 'enne ndi khun Sizi Gri ts'u ditnine t'l'adínle, 'on 'un 'uyoonne huye hódoolh'eh ha.

<sup>3</sup> 'Et huwa Sizi Gri oosalda unzoo-un k'un'a, nyun cha whuz howu whúlna'-un hoonts'i whulh ónyin.

<sup>4</sup> Dune salda unli-un, 'en dumoodih ba za 'ut'en. 'Aw 'udun 'ut'en-i gha lhasnoh.

<sup>5</sup> 'Ink'ez cha, mbe la noye toh whuch'a' 'ulhdeh-un, ts'ih'un un'a whuch'a' nilhde de, 'et de za hiba k'elha whulhtsih.

<sup>6</sup> Mbe la tube 'ut'en-un ha' nulhyeh-un, 'en ndi naínalhyai-i, 'en cho yuloh yolhchoot huba' hoont'oh.

<sup>7</sup> Ndet la nyudúsní-un howu nuní ninzut. 'Ink'ez neMoodihti, 'en nla 'ut'en whe ts'iyantsuk t'eeononzeh.

<sup>8</sup> Soo whunailnih, Sizi Gri yaidlanne butoh dunadija. David oots'u haínzut-un cha 'unt'oh. 'Et whuz un'a ndi sghuni unzoo-i 'unt'oh whe nyudásni'.

<sup>9</sup> 'Et huwa dune untsi'-un k'un'a 'adus'ai whe dzoh nuszut. 'Et hoonts'i Yak'usda ooghuni 'i 'aw lhilghel whe 'unt'oh.

<sup>10</sup> 'Et huwa 'utahályanne, 'enne buba whulh susyin. 'Et de la 'utahályane, 'enne cha Christ, Sizi ts'utni-un, 'en ye néulhyis-i, 'i huyóolhchoot 'ink'ez 'ilhiz huhót'e'.

<sup>11</sup> Ndi khuni 'i soo cho oot'aniuznootan 'et ndutni,  
"En bulh dats'uzsai de,

'et de 'ilhiz wheni bulh úztit'elh cha 'uztit'elh.

<sup>12</sup> Nts'oh dawhut'en hoonts'i whulh ts'úzyin de,

'et de 'en bulh lerwe uztileh.

Ooch'az nats'ulh'a de,

didut cha nech'az nátil'a.

<sup>13</sup> Oolazditni de,

'et hoonts'i 'aw didut nela dootnih ait'oh,

'ink'ez 'aw 'ats'un un'a na'ootneh ait'oh 'et huwa."

*Sizi Gri ba ne'ut'enne, 'enne whulohne hinzoo 'ink'ez whulohne cha hintsi'*

\* **1:18** 'Et ndi boozi' neMoodihti, 'i 'ilhoghun Yak'usda 'unt'oh 'ink'ez 'ilhoghun Sizi Gri 'unt'oh ni whe 'utni.

14 'Et ndi khuni 'i buba oonailnih. NeMoodihti nalh budutánelh, 'et khun 'i khuni gha hukwa lhdulhyoh 'uhudootni' junih. Ts'iyawh buba lhe'yízoo'. 'Ants'i mbe la yudánts'one ts'iyawh ninta' butálh'elh.

15 'Et Yak'usda ba dune unzoo-un onle', whuz un'a hukwa 'int'en. Nye 'ut'en 'aw la hukwa yálhuzonle'. Ndi khuni 'alha' 'unt'oh-i ts'ih'un un'a dune hubodilh'eh.

16 'Et hoonts'i 'ants'i 'oh nuyálhdukne 'ink'ez Yak'usda ghudlólhne, 'enne buzih nónya' junih. Ndunt'ohne, 'enne 'uyoonne 'on nus Yak'usda ch'az yalhdukne ubuhutilhtselh la.

17 Bughuni, dada k'un'a la butaidózit. Nyoonne Hymenaeus 'ink'ez Philetus cha, 'enne ndunt'ohne hinli.

18 'Et ndunt'ohne dune ndi khuni 'alha' 'unt'oh-i tank'us 'uhint'oh huwa hich'a súdi. 'Enne 'uhutni, ndi dunahudutádulh-un, 'uda' 'uhooja hutni. 'Et whu la gha ts'e whulohne be 'alha' hoont'oh-i, ts'iyawh buba musai suli'.

19 'Et hoonts'i Yak'usda ooyoh ook'uwhuz'ai-i whuduts'o. 'Aw gak hóle' ait'oh. 'I k'ut ndi khuni 'uk'eyánguz-i whe ndutni, "Mbene la neMoodihti ooch'e' hinline, 'enne ts'iyawh t'ebunínzun." 'Ink'ez cha, "Mbene la 'uhutni, Christ oodune'ne ts'inli de, 'enne 'ut'en utsi'-i ts'u nint'ine, 'et ndoohoont'oh-un, 'et ts'iyawh whuch'az náhooyeh huba' hoont'oh."

20 Njan yoh whucho whambe ts'e ts'iyaitsuk 'et usdla. Be' ts'utnai-i 'ink'ez bé uzut'alh-i, whulohkhi gold cha, 'ink'ez silver cha, 'i be 'ulya. Whulohkhi duchun 'ink'ez whut'lus be 'ulya, 'i cha 'et usdla. Whulohkhi unzoo 'ink'ez whulohki 'aw lhízoo'.

21 'Et whuz un'a, mbe la dich'oh lubeshi yuch'az nálh'a de, 'et de la duMoodihti ba 'udune'ududulti 'ink'ez ooMoodihti ye' tit'elh, 'ut'en unzoo-i ts'iyawh yeni lhadint'oh whe 'unt'oh.

22 'Ink'ez nyun cha chilke ntsi-i buyust'e oots'i nint'i-i, 'i ooch'a tilgaih. K'us ts'ih'un 'uhoont'oh-un, be 'alha' hoont'oh-i, be lhk'ets'utsi'-i be nedzi soo óot'e'-i cha, ndi 'i ts'iyawh bunanyalh. Nyoonne budzi yo lubeshi ooghu hooloh whe neMoodihti ts'u dedudline, 'enne bubulh ín'us.

23 'Et hoonts'i whusni ghuni 'ink'ez khuni t'enusdzun-i, 'i hoonts'i be yáhalhduk, 'i ts'iyawh ooch'oh onle'. T'eeonínzun ndi khuni ndunt'oh-i, 'i dune huyé lhdulhyoh 'utni-i, 'i 'unt'oh.

24 'Et neMoodihti be 'ulhna-un, 'en 'aw dune élhdoosyaih. K'us ts'iyanne dune dach'e núlhe'ust'en 'ink'ez soo dune hodulh'eh-un tileh. Ts'iyanne nanilhtsulyaz ne'bulh'en.

25 Yo 'údudildzun 'ink'ez buch'az ditnine ts'ih'un bubulh nenáhoho'alh. 'Et tilah Yak'usda dudeni nahundunizdla uboolhtselh. 'Et de la khuni 'alha' 'unt'oh-i t'ehinoozeh.

26 'Ink'ez 'et de la bubeni bugha nádolts'it, 'ink'ez netsudule hubilhchoot inle' hik'une' 'oot'en ha, 'et la nts'oh te whe tank'us unint'i-un whuch'a nahooja'. 'Et 'udek'ez dzin whenghoh de, tube howa whútilna'

### 3

1 'Et njan t'eeononzin, 'et 'udek'ez dzin whenghoh de, tube howa whútilna'.

2 'Et nilhdukw suli' de, dune dich'oh k'enahutitsi', sooneya ka dáhadatni, ts'iyantsuk whe hududílti', 'uhududílti', Yak'usda 'ink'ez oodune'ne', 'enne buch'az yahatilhduk, dudusneke cha k'únulhe'hutist'en, 'aw musi lhontiszin, 'ink'ez Yak'usda ghudlohne cha hutileh.



<sup>3</sup> Dudulh dune k'elhihítsi', 'aw hoonli lhba whunalhnohodulhnoh. Dudulh dune dzoh ne'huduni' hukwa' huninzun te za ne'hut'en. 'Ants'et 'uyoonne dzoh nuhulhdeh, 'ink'ez ndet hoonzoo-un hukwa lhe'huntzilil.

<sup>4</sup> 'Uyoonne k'ehintsi' nahoooolh'i 'ink'ez yoo yoh whe dune hundulhda, 'inkez butsi dunuts'un. Duba na'hutidzoo', Yak'usda k'elhuhítsi', 'ink'ez ndet la whuníni-un, 'et za hukwa' huntzilil.

<sup>5</sup> 'Et Yak'usda ba ndi yun k'ut hudólts'i' na'hududil'i' 'et hoonts'i Yak'usda yé ulhtus-i hits'oodidlai. Timothy ndunt'ohne, 'enne buch'a nasindaih.

<sup>6</sup> Ndunt'ohne 'uyoonne yoh ts'e dahánul'ih 'ink'ez ts'ekoo whusnine, lubeshi be dizbunne, 'enne 'ilhiz ubihilhchuk. Nduhne lhelhdowh 'ut'en dutsun-i, 'ohwhi za hits'u nint'i.

<sup>7</sup> 'Ahoohyiz hohodul'eh 'et hoonts'i khuni 'alha' 'unt'oh-i daja ni 'aw t'ehoonozeh ait'oh.

<sup>8</sup> 'Et nyoonne Jannes 'ink'ez Jambres bulh Moses hich'az nint'i inle'. 'Et whuz un'a ndunne khuni 'alha' 'unt'oh-i, hich'az nint'i. 'Enne bubení soo 'uk'enus untsi' sulí'. 'Ink'ez ndi be 'alha' hoont'oh-i ghun buba 'ants'i hoont'oh.

<sup>9</sup> 'Et hoonts'i 'aw 'on 'un hutooya' ait'oh. Whe ninta' hunt'en-un ts'iyanne t'ewhüntázin. Nts'en'a la Jannes 'ink'ez Jambres bubulh dahooja la, 'enne buk'un'a hiye whusni-i, ts'iyanne bughun t'ewhüntizilh.

#### *Yak'usda uniyalhne dune bube túzilalh*

<sup>10</sup> 'Et hoonts'i huwa 'óonli whe khuni bunyodis'e-i ook'un'a 'ant'en. Timothy nyunch'oh njan t'ewhunínzun. Nts'en'a dune usdli-un, nts'e la hukwa 'ust'en-un, 'ink'ez Yak'usda sba 'alha' 'unt'oh. Howa whúl'na'-un whulh susyin, 'ink'ez ts'iyanne be k'ési' 'i cha, 'aw hoonli talhódusni.

<sup>11</sup> Dune sezula inle', 'ink'ez dzoh nusuhulhdzut. 'Et whuz yun k'ut Antioch, Iconium, 'ink'ez Lystra, whuz sulh 'et 'úhooja inle', 'i soo ts'iyawh t'eeonanzin. Dune sezula whulh susyin, 'ink'ez neMoodihti ts'iyawh whuch'a sla 'uja.

<sup>12</sup> 'Alha' hoont'oh mbene la Christ, Sizi ts'utni-un, 'en gha Yak'usda ba khutinalh hukwa 'ut'enne, 'enne dune bube hütuzilalh whe' hoont'oh.

<sup>13</sup> 'Et dune ntsi'ne, 'uyoon na'dudil'íne, 'enne 'on nus hintsi' tileh 'ink'ez 'on 'un cha hintsi' hutileh. 'Et 'uyoonne nahunti'ah 'ink'ez dich'oh cha na'hunduntit'ah.

<sup>14</sup> 'Et hoonts'i nyun ndet la hodal'e-un whe 'i ts'iyawh 'alha' 'unt'oh t'enínzun whuz un'a za 'int'oh. 'Ink'ez mbene la oogha hodal'e'ne, 'enne t'ebuninzun.

<sup>15</sup> 'Et nyun ts'oodun inli da' whuts'un ndi Yak'usda ooghuni lubeshi ooghu hooloh whe 'uk'éguz-i t'enanzin. 'I gha be whutnih-i int'i whe dinjih, Christ, Sizi ts'utni-un, 'en mba 'alha' 'unt'oh 'et huwa.

<sup>16</sup> Yak'usda ooghuni 'i ts'iyawh Yak'usda ye sjiz-i bulh 'únt'oh. 'Ink'ez oogha whúts'odul'eh huba unzoo, ninta' ts'ut'ih-un whunénulhtun, neba ts'ih'un newhu'aih cha, 'ink'ez 'et whuneodulh'eh ts'ih'un un'a yinka uzdólts'i ha.

<sup>17</sup> 'I be Yak'usda oodune'ne lhadúlyane hutileh, 'ut'en unzoo-i wheni lhahúdint'oh.

## 4

#### *Yak'usda ooghuni bé bubulh yáilhduk*

<sup>1</sup> 'Et huwa Yak'usda 'ink'ez neMoodihti Sizi Gri 'en oobut nyudutásnelh, 'en 'utinelh ts'iyanne nalh be hóodutaltsilh, ndai la k'úne' yul'en-i, 'i bulh. 'Oh de khunane 'ink'ez yaidlanne cha, 'enne buba nahutiye'h.

<sup>2</sup> 'Ahoohyiz lhadint'oh Yak'usda ooghuni bé bubulh yaílhduk. Whúbunilhun ndet whe ninta' hut'ih-un, 'ink'ez tank'us 'uhut'en-un hukwa budíni, 'ink'ez budzi do ná'inleh. Howa whúlna'-un whulh sinyin, 'ink'ez dune hodilh'eh.

<sup>3</sup> Whuz de whúdizulh, ndi khuni ts'ih'un un'a 'unt'oh-i, 'i 'aw huyodool'eh hukwa lhe'huntiszin. K'us dich'oh hukwa' huninzun k'un'a, 'et za 'uhodutats'o hukwa' huninzun. Mbene la didutch'oh hukwa' huninzun te za whuz un'a dune hodulh'ehne, 'enne za uboohootuzálhts'ilh hukwa' huntizilh.

<sup>4</sup> Khuni 'alha' 'unt'oh-i, 'i 'aw hidóts'o hukwa lhe'huntiszil. 'Et k'us khuni 'ants'i unli-i, 'ohwhi za hika' ntizilh.

<sup>5</sup> 'Et hoonts'i Timothy nyun ts'iyantsuk whunih-i be whuch'a soo cho khinli. Ndi Yak'usda be 'ut'en k'oh whulukhun mba howa whulna' 'et hoonts'i nilht'i za 'ilhdzun. 'Ink'ez Yak'usda ooghuni be yaílhduk whe dune ilhyís-un, 'et za ndónt'en. 'Ink'ez Yak'usda be ooba 'int'en-i, 'i ts'iyawh lhadónleh.

### *Paul datítsah-un howu yalhduk*

<sup>6</sup> Si 'awet be khusna-i Yak'usda ba huwa t'aih k'un'a nadiusjulh le'usneh.\* 'Ink'ez ndo tisyalh-un 'awet nilhdukw sulí.

<sup>7</sup> Hoonzoo whe ts'ih'un un'a lhisgan. 'Awet Yak'usda be 'ut'en k'oh 'uwhus'en-un ts'iyantsuk lhaoodusda. Ts'ih'un un'a be 'alha' hoont'oh-i hostun.

<sup>8</sup> 'Udek'ez khuni be' dusni, ndet ts'ih'un un'a hoont'oh whe whuch'a oonusde-un, 'et sba us'ai. NeMoodihti ts'ih'un nahiyilh-un, 'en yutilhtselh-i, 'i 'oh de dzin sgha íta'alh. 'Ink'ez 'aw si za iloh. Mbene la dudzi ndulcho-i be bunalh be hóodutalhtsilh 'ink'ez yuti'elh hukwa' ninzunne, 'enne 'ilhoghun hinli whe ts'iyawh si sk'un'a za 'úbutilelh.

### *Ts'iyanne sla ditni*

<sup>9</sup> 'A cho sts'u tónya'.

<sup>10</sup> Demas sla ditni. Ndi yun k'ut núkat-i 'on nus yuka' ninzun. 'Et huwa keyoh Thessalonica whuz whinya. Crescens 'en yun k'ut Galatia ts'e whinya 'ink'ez Titus 'en cha yun k'ut Dalmatia whuz whinya.

<sup>11</sup> Luke 'en za szih usda. Mark 'en ookunainda 'ink'ez ndiz nyulh tóo'as, 'en sba 'ut'en huba unzoo 'et huwa.

<sup>12</sup> 'Ink'ez Tychicus 'en keyoh Ephesus ts'e whes'a'.

<sup>13</sup> Ndzit tanyalh de, sdzoot sba tolhchoos. 'I Carpus keyoh Troas ts'e 'en da' oozih neínuschooz. Nyoo khuni úk'éguz-i, 'i cha ton'a, 'ink'ez ndai la ndi khuna-i zuz ook'une'úsguz-i, 'i onaoodolnoh junih. 'I soo ooka' nuszun.†

<sup>14</sup> Nyoon lhuztih 'ulti'uz 'ut'en-un, Alexander huyulhni, 'en tube lhat-un whe sundílhda'. Be 'ut'en k'oh huwa uncha neMoodihti yuba 'uk'elha whulhtsi.

<sup>15</sup> Nyun cha ookwa huwonle'. 'En dune ulhtus-i be neghuni dulhyoh 'it'elh-un 'unt'oh 'et huwa.

### *NeMoodihti 'aw neladootnih ait'oh*

<sup>16</sup> 'Et 'udechoo ooduzkut da', 'aw 'ilhoghun hoonts'i st'anélhiyal. K'us ts'iyanne sla huditni, 'et hoonts'i 'aw buk'eholts'it hukwa lhe'núszun.

<sup>17</sup> 'Et hoonts'i neMoodihti szih inyin 'ink'ez 'en ye ulhtus-i, 'i gha ustus inle'. 'Et ndi ulhtus-i, 'i be si sgha la ndi Yak'usda be ba yaduk-i, 'i ts'iyawh

\* **4:6** Ndaí la ts'ekootoo' dizi'ti 'i loodel oozih nahidiyulh-i inle', 'i Lizwifne bube 'ut'en 'unt'oh. 'Ink'ez ndi nahidiyulh-i, 'i Paul khuna le'unt'oh ni whe 'utni. † **4:13** Paul khuna whe 'oh da' khuna-i zuz lhahidulh'ih-i, lhts'enuhuyut'az 'ink'ez 'i hik'une'uguz inle'.

ts'ih'un un'a huyoozálhsts'ai'. 'Et de la 'uyoonne 'udun yun k'ut whut'enne cha ts'iyawh huyoozólhsts'ai'. 'Ink'ez cha neMoodihti 'en khuna-iti sutuzilhghelhi yuch'á sulhyih.‡

<sup>18</sup> 'Et yak'uz neMoodihti 'en lerwe unli, 'et wheni sghunli, 'ink'ez oozih tisdalh whuts'un, 'ut'en untsi'-i ts'iyawh yuch'a sutálhtelh. 'Et huwa 'en 'ilhiz wheni 'ink'ez 'on 'un cha uzdólhti'. 'Et ndo honeh.

*Khit whutso whusaóonya'*

<sup>19</sup> Ndunne Prisca 'ink'ez Aquila, 'ink'ez cha Onesiphorus ooyoh dilhsts'ine, ts'iyawh hadih sba budóni'.

<sup>20</sup> Erastus 'en keyoh Corinth 'et usda. Trophimus 'en nduda 'inka keyoh Miletus ts'uwhútni, 'et nenústi.

<sup>21</sup> 'Et khit tileh whuts'o, 'et soo 'int'oh whe sts'u tonya'. Eubulus, 'en cha hadih nyulhni, 'ink'ez Pudens, Linus, Claudia, ts'iyawh lhulhutsinke, 'enne cha hadih nyuhútni.

*Ye unzoo-i nyulh 'óot'e'*

<sup>22</sup> NeMoodihti Sizi Gri 'en ndzi yo ooda' 'ink'ez ye unzoo-i, 'i nyulh 'óot'e'. 'Et ndo honeh.

---

‡ **4:17** Ndi khuna-iti sutuzilhghelhi 'et whuz un'a Lerwe Caesar lhane Sizi Gri yulh 'ut'enne, 'enne cha ubuhangan, ni whe 'utni.

## Paul Titus Ts'ó K'eyanguz-i

### *Paul Titus hadih yulhni*

<sup>1</sup> Si Paul Yak'usda be 'ulhna-un 'ink'ez Sizi Gri ba whel'a'-un usdli. Nyoonne Yak'usda buba 'alha' yint'ohne, 'et wheni 'utahabanla. 'Ink'ez khuni 'alha' 'unt'oh-i t'ehontanz whe Yak'usda ba ndi yun k'ut uzdolts'i' ha. 'Et wheni 'ulhna-un usdli whe whusaz'a'.

<sup>2</sup> 'Ilhiz be ts'ukhuna-i ooka tse hoodli-i, 'i Yak'usda 'aw lhuwhusts'it 'ink'ez soo 'udechoo da' whuts'un 'i nets'u yoozi.

<sup>3</sup> 'Et 'awet nts'oya whudizulh Yak'usda hukwa' ninzun-un, 'et whusa-hoolts'ut. 'Ink'ez ndi Yak'usda be ba yaduk-i, 'i yubunilhtan. 'Et Yak'usda, neulhyis-un, ndi khuni 'i stl'aídan'ai.

<sup>4</sup> Titus ndi be neba 'alha' hoont'oh-i, 'i gha sye' sinli'. 'I ghun nts'o k'e'usges. Yak'usda 'ink'ez neMoodihti Sizi Gri, neulhyis-un, 'en gha ye unzoo-i, be negha te'nudzun-i, 'ink'ez be nedzi dizghel-i, 'i ts'iyawh nyulh 'oot'e'.

### *Yak'usda ba 'utso whudilhduzhne, whuz un'a 'uhoot'e' huba' hoont'oh*

<sup>5</sup> 'Et wheni Crete 'et nenyunusti, ndai la khuni ntl'adis'ai-i, 'i be ndet la lhahodit'oh-un ts'iyawh ts'ih'un un'a lhaoodutanleh 'ink'ez lhelhdun keyoh 'oh 'utso whudilhduzhne 'utahabinle.

<sup>6</sup> Dune ook'éhot'alh-un ooghu hooloh-un. 'lhoghun za oo'at unli. Buzkeh cha buba 'alha' hoont'ohne, 'aw nzulhuhoodil'ih, 'ink'ez khuni k'une' 'ut'enne hoole, 'whuz un'a 'uhoot'e', 'et ndunt'oh-un dune oot'e' huba' hoont'oh.

<sup>7</sup> Dune huwunli-un unli de, 'en Yak'usda be 'ut'en k'oh-un yutl'áwhulh'ai, 'et huwa ook'éhóotalhts'ulh-un whuyit 'oot'e'. 'Aw dich'oh duk'un'a hukwa' noozin huba lhe'hóot'oh. 'Aw khun lhonúlhc'e, ts'ekoo too' cha ka dálhatni. 'Et dune 'eyaih-un cha lhiloh oole', 'ink'ez 'aw sooneya cha ha dálhatni.

<sup>8</sup> 'Et k'us dune yoh dalih-un oole'. 'Ink'ez ndet la hoonzoo-un ts'iyawh hóont'i'. Ts'ih'un ni nizulh, 'ink'ez ts'ih'un dune unli-un cha. 'Et oodzi lubeshi ooghu hooloh whe 'ink'ez dich'oh ts'ih'un un'a khudli-un cha oole'.

<sup>9</sup> Ndi khuni 'i be Yak'usda neba 'alha' 'unt'oh-i, nts'en'a la huyodil'e', 'i ts'iyawh huyotun. 'Et whe la ndi ts'ih'un un'a be whuts'odul'eh-i, 'i be 'uyoonne 'on nus budzi ulhtus hitilhtselh. 'Ink'ez cha mbene la ndi be whuts'odul'eh-i, 'i yuch'az yalhdukne, 'enne ndi khuni 'i be la ninta' hut'ih-un 'et whubuntilhtun.

### *'Utso whudilhduzhne bube 'ut'en*

<sup>10</sup> Tube lhane ndi khuni hik'úne' tit'en hukwa lhe'hunizun 'ink'ez 'ants'i lahóot'oh te nuyahalhduk. 'Ink'ez 'uyoonne nahuna'a, butoh Lizwif unline, 'enne 'uk'enus hintsi'.

<sup>11</sup> Nduunt'ohne yahalhduk-un whuch'a bontayulh. Nduunt'enne 'enne tank'us un'a dune huhodulh'eh. 'Et 'i be 'uyoonne dune duyoh dilhts'ine ninta' buhulh'ih. 'Enne huduzoh hukw'un'a bughá' tizulh 'et wheni.

<sup>12</sup> 'Et Crete whut'enne butoh, 'ilhoghun dune nus hoo'en-un 'en 'utni, "Crete whut'enne 'ahoolhyiz howhusts'it, khuna-i untsi'-i duhult'oh, tse-hudutni cha' uhint'oh, 'ink'ez bucha hooncha cha' uhint'oh."

<sup>13</sup> 'Et daja ubulhni-un, 'alha' 'utni. 'Et huwa tube cho hukwa' budini. 'Et de la be neba 'alha' hoont'oh-i, 'i be 'on nus hilhtus oole'.

<sup>14</sup> 'Inka Lizwif be 'udada' 'aw buba 'alha' lhe'yít'oh sulí'. 'Ink'ez ndunne khuni 'alha' 'unt'oh-i ch'az nálhyanne, 'enne bughuni uboozólhts'ai' junih.

<sup>15</sup> 'Et mbene la buyo ts'e lhoditsunne, 'enne ts'iyaitsuk buba me lhiloh. 'Et hoontsi'i mbene la budzi dutsun sul'i'ne, 'ink'ez buba 'alha lhe'hóot'ohne, ts'iyai buba me yinli. 'Ink'ez hubeni 'ink'ez buyo ts'e 'i gha t'ets'oninzun-i, 'i ts'iyawh dutsun whe 'unt'oh.

<sup>16</sup> Ndunt'ohne, "Yak'usda t'ets'onínzun," hutni, 'et hoontsi'i dube 'ut'en be hich'az ditni. 'Enne butsi'u hoontsi'ne hinli, 'ink'ez dich'oh k'une' hutit'en-un 'et za hukwa' huninzun. 'Et huwa ndet la 'ut'en unzoo-i 'uhutilhelh-un, 'aw huba soo lhe'hildzoo' whe 'hint'oh.

## 2

### *Yak'usda ba 'ilhunaoodulhne bube 'ut'en k'oh*

<sup>1</sup> 'Et hoontsi'i Titus ndi ts'ih'un un'a be whuts'odul'eh-i, 'et za ndudóni'.

<sup>2</sup> Ndunne yoo'un uzulhne, talhonoosnai' huba' hoont'oh, te'hunoolhdzin, 'ink'ez ts'ih'un ni hunidoh. Whuduts'o whe buba 'alha' hot'e'. Be lhk'ets'utsi-'i 'ink'ez 'aw hoonli talhohodinine, 'et whuz un'a 'úhoot'e'.

<sup>3</sup> Ts'ekoo yoo'un uzulhne, 'enne cha whuz un'a 'uhoot'e'. 'Enne teni' nilhdzunne hoole'. 'Uyoonne hoontsi' k'un'a bughu yalhuhoolduk. Ts'ekoo too' ghu dalháhatni. 'Ink'ez hoonzoo-un za 'uyoonne huhodoolh'eh.

<sup>4</sup> 'Et de la t'edukoo dukike 'ink'ez duduzkehke cha buk'ehoontsi', whuz un'a bughu hudooni'.

<sup>5</sup> Ts'ih'un ni hunidoh, Yak'usda ba 'udun nebunilane hutileh. Duyoh cha ts'iyoh'un un'a howu hinli, hoozoo', 'ink'ez dukike buk'une' hoot'en. 'Et de la 'uyoonne 'aw Yak'usda ooghuni ch'az yahoolduk ait'oh.

<sup>6</sup> 'Et chilke unline, 'enne cha ts'ih'un ni nidohne hoole'.

<sup>7</sup> 'Ink'ez Titus nyun cha ts'iyantsuk whe ngha 'ut'en unzoo-i 'uhoolh'en, whuz un'a 'ont'e'. 'Et ndi be whuts'odul'eh-i, 'i ts'iyawh 'aw lhdoosun, dólhti', 'ink'ez 'aw hoonliyaz whe 'ats'un un'a 'oot'e' junih.

<sup>8</sup> Khuni duts'o-i ooba nahodeh ait'oh-i, 'et nch'az ditni-un yooya oole'. 'Aw khuni ntsi-i be nghu yaooduk ait'oh.

<sup>9</sup> 'Ulhane 'enne cha dumoodihne buk'une' hoot'en budini. Nts'en'a la budzi hóolhdzoo' 'oh te za ne'hoot'en. 'Ink'ez 'aw budulhyoh cha lhe'hudoosnih.

<sup>10</sup> 'Ink'ez 'aw bughu lhe'hundunoost'i. K'us dumoodihne ts'un ts'ih'un un'a 'uhoot'e', hoonzoo k'un'a whúbunilhtun-un 'et la whut'az 'uhoot'e'. 'Et de la Yak'usda neulhyis-un, ooghuni be whuts'odul'eh-i ts'iyantsuk whe 'on nus unzoo oole'.

### *Yak'usda ye unzoo-i, 'i ts'iyanne nalhts'et hahoolts'ut*

<sup>11</sup> 'Et Yak'usda ye unzoo-i be uzdujih-i, 'i ts'iyanne nalhts'et hahoolts'ut.

<sup>12</sup> 'Et whuneoodulh'eh, ndet la Yak'usda be 'ut'en lhuhooolh-un, 'ink'ez whenich'oh ndi yun k'ut hukwa' uzninzun-un, 'et ts'iyawh dah uzdooni'. 'Et k'us ts'ih'un ni uznizulh-un, ts'ih'un dune ts'inli-i, 'i cha, 'ink'ez Yak'usda ts'un teni' uznilhdzun k'oh ts'e za ts'oot'e', 'andit whuz un'a za 'uts'oot'e'.

<sup>13</sup> 'Et neYak'usda 'uk'enus uzdilhti-un, Sizi Gri neulhyis-un, 'en 'unt'oh oots'u hayánduz-i, 'i bulh 'et nenalhts'et haóotilts'ulh whuts'un, ndi 'uk'enus hoonzoo-un huba ts'ilh'i.

<sup>14</sup> Sizi Gri wheni neba huwa' dudulti nelubeshi ch'a nenaootakulh ha. 'Ink'ez wheni dich'oh oodune'ne dune 'ut'en unzoo-i za 'uts'oolh'en.

<sup>15</sup> Titus ndúhoot'oh-un huwun bubulh yailhduk, buba nus whunilht'i, 'ink'ez mba' hoont'oh, 'et huwa whe nín'ta' hut'ih-un hukwa' budini. Dine 'ants'i buba onle' junih.

## 3

*Ye unzoo-i be ndi yun k'ut uzdilhts'i-un*

<sup>1</sup> 'Et nyoonne Crete whut'enne bula 'ineh njan huwu ni hotan ha. Mbene la keyoh huwunline 'ink'ez bumoodih unline, 'enne buk'une' hoot'en. 'Ahoohiyiz 'ut'en unzoo-i, 'uhutilh'elh wheni lhaúúoot'e'.

<sup>2</sup> 'Uyoonne hoontsi' k'un'a bughu yahoolhduk junih, 'ink'ez 'aw lhdulhyoh 'uhudootni' junih. K'us ts'iyanne nalhtsulyaz né'boohoolh'en 'ink'ez 'uyoonne ts'un yo 'úhududoldzin.

<sup>3</sup> Wheni cha whuz un'a za ts'uwhusni ínle'. Khuni k'unulhe'ts'ust'en. Naznut'ah. Lhelhdun ts'uhóont'i' whe hoontsi' te ne'ts'ust'en. Ts'intsi' whe ndi yun k'ut uzdálts'i', 'ink'ez 'oonih bulh cha' ts'ant'e'. 'Uyoonne ts'uzdutni 'ink'ez ts'iyawh 'alghoh lhts'uzdutni.

<sup>4</sup> 'Et hoontsi' 'oh da' 'uja neYak'usda neulhyis-un, 'en nets'un yé nek'entsi'-i 'ink'ez yé nets'un unzoo-i 'i bulh, 'i ts'iyanne nalh be hóodiltsai, 'et whe uzdiijiz.

<sup>5</sup> Ndet la ts'ih'un un'a 'uts'it'en-un ínle', 'aw 'et huwa íloh uzdiijiz. 'Et hoontsi' ye te'ninzun-i gha, 'i be neúlhyih. 'Et ndi 'ants'i tunáts'usguz 'et whe doo cha za ts'uwhuzdli, 'ink'ez Ndoni be 'andit-un nats'usdli'.

<sup>6</sup> 'Ink'ez Yak'usda nets'un oola hoonli whe Ndoni nets'itilh'a'. Sizi Gri neulhyis-un, 'en be 'uja.

<sup>7</sup> 'Et whe la ye unzoo-i gha nelubeshi ts'iyawh neba hooloh yulhtsi. 'Ilhiz be ts'ukhuna-i hukwa tse hoodli-un, 'et nech'e' whutaleh 'et huwa.

<sup>8</sup> Ndi khuni 'alha 'unt'oh-i 'unt'oh. 'Ink'ez 'ahoolhyiz 'et za nudóni' nts'u hukwa' nuszun. Mbene la Yak'usda ooba 'alha' yint'ohne, huwu hinli whe 'ut'en unzoo-i za 'ahoolhyiz higha oona'. Ndi khuni ts'iyanne ba unzoo 'ink'ez dune whe soo' hutit'elh.

*Lhdulhyoh 'udoohni' junih*

<sup>9</sup> 'Et hoontsi' Moses ooghuni 'uk'oneyuzguz-i ghun, whusni khuni cha, 'ink'ez lhenyoone whutso da'ne huye yailhduk-i, 'i cha, 'ink'ez lhdulhyoh 'uhudutni, 'et ts'iyawh ooch'oh 'ont'e'. 'Aw ts'iyanne ba lhe'hoozoo' 'ink'ez 'ants'i hoonli whe' hoont'oh.

<sup>10</sup> Mbe la dune lhch'az nilht'i-un, 'et whulh nat-un dah dáni' de, 'ink'ez 'aw lhyunudústs'o de, teneóolh'a'.

<sup>11</sup> T'eeonínzun ndunt'oh-un dune 'en dudeni be tank'us úninzun 'ink'ez lubeshi 'ulh'en-un 'et za hoont'i'. 'Et huwa 'i be dich'oh ninta' dudulti whe 'unt'oh.

*Udek'ez khuni yé bubulh yánalduk*

<sup>12</sup> 'Et Artemas k'us Tychicus 'enne 'ilhoghun nts'u tís'alh de, 'et 'aho diz tonya', njan keyoh Nicopolis ts'uwhút'ni-un. 'Et khit wheni njan tisdalh-un lhaóodusla 'et huwa.

<sup>13</sup> 'Et Zenas dune ba yalhduk-un 'ink'ez Apollos, 'enne khun nk'uhun'as de, di la hika' ninzun-i, 'i butl'a yónlelh, 'a cho hutoo'as. 'Ink'ez khun hoonli 'ehundunóts'it junih.

<sup>14</sup> 'Ink'ez nets'u ditnine, tehonoozeh 'ut'en unzoo-i za 'uhoolh'en. 'Uyoonne hiye ndunidzit-i huye búla' hoot'en. 'Et de la ndi yun k'ut 'ants'i 'et lhodólhts'i.

*Ye unzoo-i nohbulh óot'e'*

<sup>15</sup> Mbene la szih dilhts'ine, 'enne hadih nyuhút'ni. Mbene la ooba 'alha' hoont'ohne nek'entsi'ne, 'enne cha ts'iyawh neba hadih budíni. 'Et ndi Yak'usda ye unzoo-i nohni ts'iyawh nohbulh 'oot'e'. 'Et ndo honeh.

## Paul Philemon Ts'ó K'eyanguz-i

### *Paul Philemon hadih yúlhni*

<sup>1</sup> Si Paul 'ust'oh. 'Et Sizi Gri ba 'adus'ai. 'Et Timothy neulhutsin, 'en cha sulh 'unt'oh. Philemon nyun nts'o k'etisgus. Neulhutsin, nk'ets'intsi'. Nek'eke 'ink'ez nebulh 'ut'en-un inli.

<sup>2</sup> 'Et ndun Apphia 'en cha ook'ets'intsi'. 'Ink'ez Archippus 'en cha neBá ba nebulh lhugan-un unli. 'Ink'ez nyoh Yak'usda ba 'ilhunaoodulhne, 'enne ts'iyawh hadih buts'utni.

<sup>3</sup> Yak'usda neBá 'ink'ez Sizi Gri neMoodihti, 'en ye unzoo-i 'ink'ez nohdzi doghel-i nohbulh 'óot'e'.

### *Sizi Gri mba 'alha' 'unt'oh 'ink'ez ook'entsi'*

<sup>4</sup> SYak'usda musi dusni. Tenadusdli totsuk nghu nuní nuszut.

<sup>5</sup> Whulh údusts'o Sizi Gri mba 'alha' 'unt'oh 'ink'ez ook'entsi'. 'Ink'ez Yak'usda ooch'e'ne, 'enne cha whuz un'a za buk'entsi'.

<sup>6</sup> 'Et huwa be mba 'alha' hoont'oh-i, 'i be óodutnih oole'. 'Et whe Christ, Sizi ts'utni-un, 'en gha 'ut'en unzoo-i ooghá izana'-i, 'et la t'oonoodzeh.

<sup>7</sup> Sulhutsin nyun ngha Yak'usda ooch'e'ne budzi do ná'uja. 'Et huwa be nék'ets'intsi'-i 'int'-i, 'i gha tube ts'uhóont'i' 'ink'ez sóo k'unuznut'ah cha ts'int'oh.

### *Paul Onesimus ba tedidli*

<sup>8</sup> 'Et whe la Christ 'en be khuniti be nts'o hukwa' dusni-un 'oh tune' ont'en. 'Et whuz un'a ts'ih'un un'a ne'ónt'en.

<sup>9</sup> 'Et hoonts'i be nek'ets'intsi'-i, 'i gha nts'u tédusdli. Sunilh'en nts'en'a dast'oh yoo 'un uzulh-un usdli. 'Ink'ez 'andit Sizi Gri 'en ba 'adus'ai.

<sup>10</sup> Sye' Onesimus 'en ba nts'u tedusdli. 'En 'unt'oh nkeda' la lhuztih tl'ool be suzhel whe ooba 'alha' hoont'oh susi.

<sup>11</sup> Whuts'o da' nyun nts'un 'aw hoonli huba unzoo-un hooloh inle'. 'Et 'andit nyun 'ink'ez si sba cha unzoo sulí'.

<sup>12</sup> 'Andit 'en nts'u whenas'a' 'ink'ez naóolhchoot. 'Et 'ants'i sich'oh sdzi ilhchoot le'tanelh.

<sup>13</sup> Njan szih tidalh hukwa' nuszun inle', njan khuni unzoo-i gha suzhel. 'Et da' nyun ngha snat ne'óot'en oole' da'.

<sup>14</sup> 'Et hoonts'i nyun, "A'a," lhuziznih de za, 'aw hoonli 'uwhutislelh-un hukwa lhe'nuszun. 'Et whuz un'a nyunch'oh hoonínt'i' de za.

<sup>15</sup> 'Et huwa tilah 'atsulyaz nghu whinya inle'. 'Et de la 'ilhiz wheni naóolhchoot de, 'ilhiz la nzih ooda'.

<sup>16</sup> 'Aw 'on 'un nye 'ulhna lhtisdle. 'Et 'andit 'ulhna unli-un whanus 'unt'oh. Neulhutsin ookw'ets'intsi'-un unli. Si tube sba dízti' 'et hoonts'i dalcho-i be sba nyun 'on nus mba dízti'. 'Et náwhult'oh, ndi yun k'ut huba cha 'ink'ez neMoodihti ba cha.

### *Si sk'un'a nailhchoot*

<sup>17</sup> Si nyulh 'úst'en suninzun de, si nasilhchoot hukw'un'a nailhchoot.

<sup>18</sup> 'Et ndun hoonliyaz whe nts'u ninta' 'ant'en de, k'us oots'u whuzilh'ai de, si sba 'uk'ehoonges.

<sup>19</sup> Si, Paul, sich'oh sla be nts'o k'e'usges. Si la ook'elha hooselh. 'Et hoonts'i hoonliyaz mba whunatzini, nyunch'oh be khina-i, 'i be hoonts'i nts'ú whuzus'ai le'hoont'oh.

<sup>20</sup> A, sulhutsin neMoodihti be nyun n'gha 'on nus hoonzoo-un nts'u hukwa' nuszun. Nts'en'a la syo ts'e whedúsní, 'et neMoodihti be sdzi dona' inleh.

<sup>21</sup> Nts'ó k'esges-i, ook'un'a 'utanelh-un sba 'alha' hoont'oh. Daja dusni-un, 'i be 'on nus 'utant'elh nuszun.

<sup>22</sup> 'Et hoonts'i tisdálh-un sba lhaóodonleh. Ntenadudli gha la 'et ndó honeh. 'Ink'ez la nts'un sla nahudootnih.

*Ye unzoo-i nyulh 'óot'e'*

<sup>23</sup> Epaphras ndun Sizi Gri gha sulh 'adin'ai-un, 'en cha hadih nyulhni.

<sup>24</sup> Mark cha, Aristarchus cha, Demas 'en cha 'ink'ez Luke 'en cha, sulh 'ut'enne, 'enne ts'iyawh hadih nyuhutni.

<sup>25</sup> NeMoodihti Sizi Gri 'en ye unzoo-i nyughi bulh 'óot'e'. 'Et ndo honeh.



## Hebrew K'uyalhdukne Buts'ó K'eyiguz-i

*'Andit 'udek'ez dzin whe Yak'usda duYe' 'en be nebulh yaílhduk*

<sup>1</sup> Lhat-un 'ink'ez lhelh'ts'un un'a, niz haóodanzut, Yak'usda be nus hoo'enne, 'enne bube netsoda'ne bubulh yaílhduk.

<sup>2</sup> 'Et njan 'andit 'udek'ez dzin whe Yak'usda duYe' 'en be nebulh yaílhduk. 'En za 'uja ooBá ndai la yut'i-i, 'i ts'iyawh ooch'e' yutileh, 'et whuz un'a ooBá yutl'ahón'ai. OoYe' 'en be 'uja ts'iyaitsuk 'uhóonla.

<sup>3</sup> 'En za 'unt'oh ooBá ye ditz'i-i, 'i whunénulhtun. 'Ink'ez ooBá dant'oh la, 'et ooYe' 'en soo ts'ih'un yundult'oh. Ndai la 'uhóonla, ooghuni ulhtus-i be yalhduk-un, 'i be ndulcho hoontun. 'En za 'uja, nelubeshi 'i ts'iyawh neba yuna'ahde. 'Et hukw'elh'az 'et yak'uz ts'e Yoodoghun ncha-un, 'et nailhni ts'e yughu nátl'adida'.

<sup>4</sup> 'Et huwa lizasne buba nus ncha-un 'unt'oh. Ndi booz'i oogha ídilt's'ut-i, 'i lizas buboozi' ba nus ditz'i' whé 'unt'oh. 'Et 'uhoolcho whe buba ndo 'unt'oh.

*Yak'usda ooYe' 'en lizasne buba ndo 'unt'oh*

<sup>5</sup> Ndiz un'a nja dúhoont'oh, Yak'usda 'aw 'ílhoghun lizas 'et ndulhúbudinel, "Nyun sYe' 'int'oh.

'Inka 'andit dzin sYe' sinli',  
whuz un'a nyoozú'szi."

'Ink'ez njan cha Yak'usda 'utni,

"'En ba 'uBá tisdleh

'ink'ez si sba sYe' tileh."

<sup>6</sup> 'Ink'ez 'udechoo whuzdlí-un, Yak'usda doo cha ndi yun k'ut neítalhtelh whe 'et ndutni,

"Yak'usda oolizas,

'enne ts'iyawh hits'u teni' noolhdzin."

<sup>7</sup> 'Et dulizas bughu yalhduk whe nja dutni,

"Oolizas nilh'tsi k'un'a 'ubinla.

'Enne yuba 'ut'enne 'uhint'oh

'ink'ez kwun nudúnat-i k'un'a nabalh'tsi."

<sup>8</sup> 'Et hoont's'i duYe' yughu yalhduk whe ndiz un'a 'et ndutni,

"O Yak'usda nts'e la whulerwe inli-un,

'et 'i 'ilhiz wheni 'unt'oh.

'Ink'ez ts'ih'un un'a k'une' whutal'en.

<sup>9</sup> Ts'ih'un 'uhoont'oh-un za hukw'entsi'.

'Uk'únulhe'ust'en-i, 'i oots'u dintni.

'Et huwa O Yak'usda,

nYak'usda ndi khe 'ílo didowh-i,

'i dune be ba ts'odilh'ti-i 'unt'oh,

'i gha budzi hoont'i,

'i nts'ú ditnine buba nus lh'ai be nyúlhtlo."

<sup>10</sup> 'Ink'ez 'udun cha ooghuni 'uk'eguz whe 'et ndutni,

"Moodihti nyun 'udechoo whe' whudit'en 'et whuts'un, ndi yun cha inla.

Nla be yat cha 'uhóonla.

<sup>11</sup> 'I ts'iyawh gak whutáleh,

'et hoont's'i nyun 'ílhiz wheni 'int'oh.

Ndai la inla-i, 'i 'ants'i naih 'ujut 'ulhih te whuz un'a 'uwhutanelh.

<sup>12</sup> 'Ink'ez nahuyitsuz-i, 'i k'un'a lhenántantelh,

'ink'ez 'uyoo natidleh.

'Et hoonts'i nyun whuz un'a za 'et ndint'oh.

Nye yus k'ut 'aw whulátanálhuhó'o'oh,"

Yak'usda 'et duyúlhni.

<sup>13</sup> 'Et hoonts'i Yak'usda oolizas 'aw 'ilhoghun hoonts'i 'et njan dúlh budinel, "Nch'az ditníne ts'iyawh ne buk'ut natalhyis-un mba butisdlelh.

'Oh de 'et whuts'un 'et dhójoja de, nailhnh ts'e sughu tandalh."

<sup>14</sup> 'Et ndiz un'a nja dúhoont'oh, ndunne lizasne, 'enne nudúdeh 'ink'ez be 'ustlene 'uhint'oh. Yak'usda whébalh'a' 'et de la mbene la ndi bé uzdujis-i nets'u tíkulh, 'et huba neba ne'ut'enne 'uhint'oh.

## 2

### *Ndi 'ilhiz be ts'ukhutinalh-i, whulazdootnih junih*

<sup>1</sup> 'Et huwa Yak'usda ooghuni ndet la whulh úzdants'o-un, 'et soo ts'ih'un un'a ts'uhotun 'ink'ez nedzi yo nets'ú ho'alh doo ka la ookw'úne' ts'ut'en-un whulazdootni.

<sup>2</sup> 'Et 'oh da' ndai la khuni lizasne, 'enne Yak'usda ba yahalhduk, 'i khuni ts'iyawh 'ilhiz wheni 'utni. 'Ink'ez mbene la ndi khuni hidutáts'o hukwa lhe'nízunne 'ink'ez k'uyuyúsne, 'enne hoontsi' k'un'a buba k'elha whuzdli'.

<sup>3</sup> 'Ink'ez ndi whe uzdujis-un, 'et hooncha whe' hoont'oh. 'Et ts'iyawh neba 'ants'i 'uhoont'oh de, 'et de 'enne buk'un'a neba k'elha whutaleh. Nemoodihti ndi yun k'ut nuséya-un, 'et whuts'un ndi whézdujis-un howu yalhduk, 'ink'ez ndunne mbene la whudánts'one, 'enne ndi khuni ts'iyawh whunehunilhtan 'et ts'ih'un 'uhoont'oh.

<sup>4</sup> 'Et lhat-un hoolhtus-un huwa 'ít'en-un tune' hust'en, 'ink'ez nts'en'a la Ndoni hukwa' ninzun k'un'a butl'a hón'ai, whuz un'a mbene la nebulh yalhdukne, 'enne Yak'usda bubulh 'ut'en whe whunéhunilhtan daja nehudáni'-un ts'ih'un 'uhoont'oh.

### *Yak'usda ooYe' lizasne 'atsulyaz buba nyo 'ant'e'*

<sup>5</sup> 'Et njan howu yats'ulhduk ndi 'andit-i yun 'i ookw'uzdutáts'ilh huwa, neba whuz de hóolts'ulh, 'et Yak'usda 'aw lizas 'udedo 'uhoote' lhubudinel.

<sup>6</sup> 'Et hoonts'i 'udun cha 'uk'ehooguz-un whe 'et ndutni, "Dunene di hinli whe' hint'oh?

Yak'usda di ha bughu nuní ninzut?

K'us dune ye' di ha ooghu tanleh?

<sup>7</sup> 'Atsulyaz huba lizas an nyo 'unt'oh silhtsi inle'.

'Unt'oh-un silhtsi 'ink'ez whe dizti'-un,

'et cha ootl'ahón'ai.

Ndai la nla be inla-i,

'et ts'iyawh whe whando 'únt'oh-un oogha óonin'ai.

<sup>8</sup> Ts'iyaitsuk ooke t'ah nenínla yumoodihti oole' ha."

'Ink'ez ndi ooke t'ah nenínla-i, 'aw hoonliyaz yit lhe'ínel. 'Et hoonts'i t'ets'oninzun 'awhuz ts'iyaitsuk ooke t'ah nelhúsko.

<sup>9</sup> 'Et hoonts'i mbe la 'atsulyaz huba lizas an nyo 'unt'oh yulhtsi-un, 'en uznilh'en. Sizi 'en 'unt'oh. Dzoh nusuzut whe dazsai 'et huwa soo 'unt'oh-un yulhtsi 'ink'ez whe dizti'-un, 'et cha yutl'ahón'ai. 'Et whuz un'a Yak'usda ye unzoo-i, 'i be ts'iyanne buba dazsai.

### *Yak'usda ooYe' 'en gha lhane Yak'usda ba 'uduné' dudulyane huzdli'*

10 'Et Yak'usda 'en gha ts'iyaitsuk 'uhoont'oh, 'ink'ez ts'iyantsuk oots'u hahonkat. Lhane duduzkeh Sizi whe dizti'-un, 'et butl'a óoti'alh hukwa' ninzun. Sizi 'en whezdutijih-un neba tso nuya-un 'unt'oh. 'Et huwa Yak'usda 'en ooba ts'ih'un 'uhoont'oh whe Sizi whe dzoh nusuzut-un, 'et 'i gha ts'ih'un 'ulya-un sulí' yulhtsi.

11 'Et mbe la Yak'usda ooba 'uduné' dudultí-un, 'ink'ez mbene la Yak'usda ba 'uduné' dudulyane cha wheni ts'iyawh lhgha za' 'uts'int'oh. 'Et whe Sizi 'aw hukwaya lhiloh whe sulhutsinke neúlhni.

12 'Et whuz un'a duBá 'uyúlhni whe nja dutni, "Nyoozi' 'uwuhulhni-un,

'i ghun sulhutsinke budutásnelh.  
Yak'usda ooba 'ilhunaoodulhne butoh,  
mba whudutásti' whe mba tisjun."

13 'Ink'ez doo cha diz un'a nja ndutni, "Si, oot'aníuntistan."

'Ink'ez doo cha za ndiz un'a cha ndutni,  
"Nja si 'ust'oh.

Mbene la ts'oodunne Yak'usda sghá buninlane,  
'enne cha ts'iyawh sulh 'úhint'oh."

14 'Et wheni yinka dune ts'inli neyust'e 'i 'uskai' bulh 'úlya. 'Et huwa Sizi Gri ooyust'e wheni nek'un'a 'unt'oh. 'Et whe tulalghus k'ut neba dazsai-un, 'i be ndun yé datitsah-i ye ulhtus-i ut'í-un, 'en yuch'a' nilhde, 'en netsudule 'unt'oh.

15 'Et whe Sizi Gri ooyust'e wheni nek'un'a 'unt'oh. 'Et whe tulalghus k'ut neba dazsai-un, 'et whe 'et whuch'a nabuzdla.

16 'Ink'ez 'aw Sizi Gri lizasne la tit'elh huwa iloh whusainya, 'et k'us Abraham ts'u haíndene, 'enne bula tit'elh, 'et huwa whusainya.

17 'Et huwa dudulhutsinke k'un'a ts'iyantsuk whuz un'a dune k'un'a 'oolneh huba' hoont'oh. 'Enne buba lubret 'uk'enus dizti'-un tileh, 'et whe Yak'usda ooba bugha te'ninzun 'ink'ez 'aw bula dootnih ait'oh. 'Et whuz un'a Yak'usda ooba ne'ut'en. 'Et buba dazsai-un huwa lubeshi 'ulh'enne Yak'usda buba 'un whutooldihl, 'et de soo cho buka naítat'elh.

18 'Et neMoodihti Sizi Gri lhat-un whe óolhdzai, 'et whe dzoh nusuzut. 'Et huwa mbene la óolhdzaine, nts'en'a bula tit'elh-un t'ewhuninzun.

### 3

#### *Sizi Gri yuladootnih ait'oh-un 'unt'oh*

1 'Inka sulhutsinke, nohni Yak'usda ooch'e'ne ahli, 'ink'ez soo hoonzoo hukw'un'a ndi yun k'ut dólhts'i 'et nohts'u hukwa' ninzun. 'Et huwa nohni ts'iyawh Christ, Sizi ts'utni-un, 'en za ooghuni záhtan 'ink'ez 'en k'un'a 'ooht'e'. 'En whel'a-un 'unt'oh, 'ink'ez be neba 'alha' hoont'oh-un, 'et huba neba lubret 'uk'enus dizti'-un unli.

2 'Et whuz un'a Yak'usda 'utaháyalhti. 'Et huwa nts'en'a la yuts'u hukwa 'utni, 'et ts'iyawh lhaóodinla. Nts'en'a la Yak'usda Moses duyoh datit'elh 'et yuts'u hukwa' ninzun-un, ts'iyawh laóodinla. Sizi 'en cha Moses k'un'a 'unt'oh.

3 Nts'en'a 'uhoont'oh mbe la yoh 'uwuhulh'en-un, 'en yoh whanus dizti'-un 'unt'oh, 'et whuz un'a za Sizi Gri Moses anus dizti'-un 'unt'oh.

4 'Et yoh totsuk lhenyoone 'uhóonla, 'et hoonts'i Yak'usda 'en za ts'iyantsuk 'uhóonla.

5 'Ink'ez Yak'usda ooyoh ts'e Moses 'en ooba 'ustle-un unli, 'ink'ez Moses ts'iyawh lhaóodinla. 'Et whuz un'a 'en ghun ts'iyaitsuk lhaóodutaneh, 'et de nts'en'a la Moses dat'en inle'-un, whunenulhtun Yak'usda dawhutanelh t'ets'ontizeh.

6 'Et hoonts'i Christ, 'uYe' k'un'a whe duBá ooyoh huwole'. 'Et ndai la ooka tse ts'úhooli-i, nedzi yoodo cho whe ts'odólhti', 'ink'ez oot'aniuznintan, 'ink'ez 'udek'ez dzin whuts'un soo cho ts'oontun de, 'et de ooyoh whut'i-un ts'inli whe 'uts'int'oh.

*Wheni cha whulalhts'udoostnine ts'oole'*

7 'Et huwa Ndoni 'alha 'utni whe ndiz un'a nja dutni,  
 "Andit dzin Yak'usda ooghuni dahts'o de,

8 khun nohdzi doolhts'un junih!

'Et whuz un'a 'uhóoja whe 'oh da' mbene la sch'az ditníne,  
 'aw skalhe'hunízun.

'Inka ndi dzin dune Yak'usda 'en huyóolhdzai-i huyúlhni.

'Et nts'e la dune lhuhóot'ih-un,

'et whuz un'a 'uhóoja.

Khun nohdzi 'aw 'enne buk'oh ts'e oolhleh junih!

9 'Et whuz un'a nohtsoda'ne suhóolhdzai inle'.

Dit whunizyat (40) yus k'ut 'et ndúwhulyiz whe se' 'ut'en k'oh honilh'en.

10 'Et huwa ndunne, 'enne bubulh húnuzch'e,

'ink'ez buts'u nahizusya nja dudúsní,

'ahoolhyiz dudzi yo ninta' huwhulh'ih

'ink'ez se' 'ut'en k'oh 'aw t'ehonúszun.

11 'Et huwa bubulh húnuzch'e whe buts'u nahizusya whe nja dudúsní,

'Ndet la dune nalyis huba 'aw dahóodilh ait'oh,' "

ni.

12 Sulhutsinke nohnich'oh soo cho huwahli! Nohni nohtoh whulohne tilah nohdzi tank'us 'unt'oh 'et whe 'aw nohba 'alha lhe'hóot'oh. 'Et huwa Yak'usda 'ilhiz wheni 'unt'oh-un, doo ka si 'en ooch'az naóolh'ah.

13 'Et hoonts'i dzin totsuk, 'awhuz khahna da', 'et ts'iyawh lhba nus whunoolht'i whe lhla'ooht'en. Doo ka si lubeshi gha naniht'a de, nohdzi duts'un oole'.

14 'Et 'udechoo whuts'un Christ ook'úne' ts'ut'en-un, 'et whulatoh whuts'un whulh ts'uzyin de, 'et de za Christ oots'uditnine ts'uzdli'.

15 'Et whuz un'a 'uk'uneyuzguz whe 'et ndutni,

"Andit dzin Yak'usda ooghuni dahts'o de,

khun nohdzi doolhts'un junih!

Ndunne Yak'usda ch'az yalhdukne 'aw 'enne buk'un'a 'ooht'en junih."

*Dune lhuhoot'i ts'e dilhts'ine, 'enne whulahuditnine hinli*

16 'Et whulohne ndunne Yak'usda ooghuni dánt'sone 'ink'ez 'et hoonts'i hich'az ditni. Moses yun k'ut Egypt ts'u hanábanla, 'enne 'uhint'oh, 'et hoonts'i 'aw ts'iyanne whuz un'a ndulhúhust'en.

17 Ndunne ndut'enne, 'enne dit whunizyat (40) yus k'ut ndúwhulyiz whe Yak'usda bubúlh huske? Ndunne 'enne dune lhuhóot'ih ts'e lubeshi ilhchootne, 'et huwa whuz yahadla.

18 'Enne 'uhint'oh Yak'usda ooghuni hik'unulhe't'el, 'et huwa ndiz un'a Yak'usda buts'u hoozi-un, Yak'usda nalyis-un, 'aw dahóoya' ait'oh.

19 'Inka ndiz un'a whuts'odil'e', ndunne mbene la ooba 'alha lhe'hóot'oh, 'et huwa ndet la Yak'usda buts'u hoozi-un, 'aw dahóoya' ait'oh.

## 4

*Yak'usda oodune'ne 'awhuz nahutilyis-un 'et buba whuz'ai*

1 Wheni njan Yak'usda nalyis-un nets'u hoozi-un, nohni nohtoh 'aw tilah lhuwhulhchulh. 'Et huwa wheni ts'iyawh whéznooljut huba' hoont'oh.

2 'Et 'alha 'enne buk'un'a wheni cha ndi khuni unzoo-i be nebulh yaínduk. 'Et hoonts'i ndi khuni be bubulh yaínduk-i, 'aw luhidits'il, 'aw buba 'alha lhe'hóonel 'et huwa. 'Et huwa 'aw bubeni tálheidikulh. 'Et huwa 'aw bula lhewhudínel.

3 'Et wheni mbene la ooba 'alha' hoont'ohne, wheni za njan Yak'usda nalyis-un nets'u hoozi-un negha whútalts'ulh. 'Et hoonts'i ndunne ooba 'alha lhe'hoont'ohne, 'enne ndiz un'a 'et Yak'usda ndúbulhni, "Bubulh húnuzch'e whe buts'u nahizusya, ndet nazysis-un, 'aw dahóoya' ait'oh."

'Et hoonts'i nts'e la 'udechoo whe'whudít'en-un ndi yun 'ulya da', 'oh da' 'et dude 'ut'en lháidinla.

4 'Et 'ilhoghun Yak'usda ooghuni 'uk'unusguz-un, 'et whulh lhtak'ant'it whudzin whuneodalh'e' whe ndiz un'a nja dutni, "Yak'usda ts'iyawh dude 'ut'en lháidinla 'ink'ez whulh lhtak'ant'it dzin 'et nalyiz."

5 'Ink'ez ndi 'udustl'us 'et whuz un'a za ndutni, "Nts'en'a la butsu nahizusya dune nahutilyis, 'aw dahóoya' ait'oh."

6 Mbene la ndi khuni unzoo-i 'udechoo yudánts'one, 'enne 'aw 'oh da' hik'únulhe'it'el. 'Et huwa ndet la nalyis-un, 'et 'aw dalhihiyal. 'Et hoonts'i whulohne, 'enne 'awhuz bugha whútalts'ulh whe' hoont'oh.

7 'Et huwa Yak'usda 'et 'ilho' 'uhoont'oh-un dzin neba 'udun newhúnin'ai. "Andit dzin whudizulh," 'et 'uhoont'oh. 'Et sa' hukw'elh'az 'et Yak'usda David be yailhduk whe nja dutni, "Andit dzin ooghuni dahs'o de, khun te nohdzi doolhts'un junih!"

8 'Et ndun Joshua huyúlhni-un, 'en Moses k'edanya, 'en Israel ts'u hainzutne Yak'usda nalyis-un, 'et bugha whúta'alh de, 'et de Yak'usda hukw'elh'az 'udun dzin whudízti'-un 'aw doo cha 'on 'un howu yaoolhduk ait'oh.

9 'Et huwa t'ets'onínzun Yak'usda oodune'ne 'awhuz nahutilyis-un, 'et buba whuz'ai.

10 Ndiz un'a nja dúhoont'oh, mbe la Yak'usda nalyis-un oogha whulst'ut-un, nts'en'a la Yak'usda dude 'ut'en lháidinla, 'en cha whuz un'a za dude 'ut'en lháidinla.

*'Et Yak'usda ooghuni khuna whe 'unt'oh, 'ink'ez hoolhtus túne' 'ut'en*

11 'Et huwa Yak'usda oodune'ne nahulyis-un, nedzi ndulcho 'i be whuz un'a za ts'uhólhchoot. 'Et 'aw ndúlhts'ust'en de, 'et de ndunne 'uk'unulhe'ust'enne whuz un'a wheni cha 'enne buk'un'a za ninta' ts'ota'alh whe' hoont'oh.

12 'Et Yak'usda ooghuni khuna whe 'unt'oh 'ink'ez hoolhtus túne' 'ut'en. 'I 'ants'i saluzti lhch'az ook'a hoonli-i, 'i ooba nus khundiyyin whe 'unt'oh. Ndiz un'a nja dúhoont'oh saluzti nets'un lhghu nunádz'a-un 'ink'ez neyúnghe' 'i ndi lhts'ítit'us, 'et whuz un'a za Yak'usda ooghuni nezul 'ink'ez neyughi lhk'eitileh. Nedzi yo whe daja uzninzun 'ink'ez nts'en'a dáztit'elh hukwa' ts'unt'en, 'et ts'iyawh whunénulhtun, 'et 'uhoolcho whe Yak'usda ooghuni khundiyyin whe 'unt'oh.

13 'Ink'ez ndai la ndi yun k'ut 'uts'ulh'en-i 'aw 'ilhoghi Yak'usda ooch'a ntist'i-i hooloh. Ts'iyantsuk whunilh'en, 'ink'ez 'ants'i 'i kw'un'a'tizbal le'unt'oh. Yak'usda 'en dats'it'en-un, 'et ts'iyawh uzdutánelh whe' hoont'oh.

*Lubret 'uk'enus dizti'-un te'ninzun-un*

14 'Et huwa 'ilhoghun lubret 'uk'enus dizti'-un neba 'unt'oh. 'En 'uja yat nduhoolcho whutulh lhuséya. Sizi Yak'usda ooYe' 'en 'únt'oh. 'Et huwa ndet la neba 'alha' hoont'oh-un, ts'iyawh duts'o cho ts'uhotun.

15 Nelubret 'uk'enus dizti'-un, 'en ndunt'oh whe 'unt'oh, ndai la be tets'utsun-i, 'i bulh 'alghoh negha te'ninzun dats'int'oh la t'ooninzun. 'En lubeshi yit 'unt'oh 'et hoonts'i 'en cha wheni nek'un'a ts'iyantsuk tank'us óoneh whe óoldzih inle'.

16 'Et huwa Yak'usda ookw'uts'uzda cho dizti'-i whuz de ye únzoo-i negha yú'aih. 'Et huwa 'aw whelhts'uniljut whe whuz uztooya'. 'Et whuz de negha te'ninzun, 'ink'ez wé nets'un unzoo-un, 'et nduwulcho whe ts'uhootálchulh. 'Et whuz un'a la 'en ba ndi yun k'ut uzdilhts'i-un, ndet la whe nela 'ewhudutánelh 'et negha óotalts'ulh.

**5***Lubret 'unk'enus dizti'-un datit'elh la*

1 'Et ts'ianne lubret 'uk'enus dizti'ne bubulh didowhne butahayálhti, Yak'usda but buba netiyalh ha. 'Et whe 'uyoonne bulubeshi gha 'et huba loodel k'ut huwa t'aih-i hidutálhk'un 'ink'ez ndai la Yak'usda higha huya'aih-i buba loodel ts'un wheyúlih.

2 Mbe la Yak'usda yuk'un'a t'oonúszunne 'ink'ez tank'us ít'elhne, 'enne bughun oodzi únduda, didutch'oh cha lhat-un whe tetsun 'et huwa.

3 'Et huwa nts'en'a la 'onghohne bulubeshi k'elha huwa ita'alh-i whuz buba wheya'aih, 'et whuz un'a za 'en hoonts'i didutch'oh dulubeshi ba huwa ita'alh-i, 'i cha whuz wheyá'aih. Whuz un'a edót'en huba' hoont'oh.

4 'Et nts'en'a lubret 'uk'enus dizti'ne hulih, 'aw dune dich'oh 'et duhóoneh ait'oh. 'Et hoonts'i nts'en'a Yak'usda Aaron 'ut'ahayalhti, 'en k'un'a za 'uyoon lubret 'uk'enus dizti'-un 'utahaóoltelh huba' hoont'oh.

*Christ 'en 'ilhiz wheni lubret 'uk'enus dizti'-un 'unt'oh*

5 'Et whuz un'a za Christ, 'en cha 'aw lubret 'uk'enus dizti'-un 'ududooltselsh ait'oh. 'Et hoonts'i mbe la yadáni'-un, 'en 'et whe ndúyulhni, "Nyun sYe' 'int'oh.

'Inka 'andit dzin sye' whuz un'a nyuzúsi."

6 'Ink'ez 'udun cha 'uk'ehóoguz whe ndutni, "Ndun Melchizedek, nts'en'a whe lubret 'unt'oh, nyun cha 'en k'un'a 'ilhiz wheni lubret inli."

7 'Ink'ez 'oh da' Sizi Gri ndi yun k'ut nuseya da', 'et whe la ooBá 'en ye ulhtus-i 'ut'i, 'et hukwa' ninzun de datítsah whuch'a yutilhyih, ndiz un'a Sizi Gri yuts'u tenadidli. Tube oodzi tel'en 'ink'ez oonatsul too' hoonli whe Yak'usda yuts'u tédudlih yula 'ooneh ha. ooBá yudílhiti, 'et huwa yudánts'o daja ni.

8 OoYe' yinli 'et hoonts'i ndet la whe dzoh nasúzut-un, 'et whe yuk'úne' 'út'en hodil'e'.

9 'Et huwa 'uja ts'ih'un 'ulya-un sulí'. 'Inka mbene la yuk'úne' 'ut'enne, 'enne 'ilhiz wheni hudujis-un, 'et bughá óonin'ai.

10 'Et whuz un'a Yak'usda ndi boozí' yugha ídin'ai whe yadáni', "Ndun Melchizedek nts'en'a whe lubret 'uk'enus dizti'-un 'unt'oh, nyun cha 'en k'un'a 'ilhiz wheni lubret 'uk'enus dizti'-un inli."

<sup>11</sup> 'Et 'awet lhat-un nohuzdutánelh 'et hoonts'i nedutáhts'o nohba 'ants'i hoonli. 'Et huwa neba howa whúlna' whe ndi khuni ts'ih'un un'a t'ewhunoozhéh k'un'a nohts'utni.

*Mbene la Yak'usda ooghuni huyoozilhts'ai-un tahodiznih 'enne 'ants'i chal-ts'ul nduhúlt'oh*

<sup>12</sup> 'Et 'andit dune hodoolh'eh-un 'oohle' huba' hoont'oh, 'et hoonts'i soo 'udechoo be whuts'odil'e'-i, 'i Yak'usda ghuni daja ni la, 'et whulohne, 'enne doo cha za ndúwhulcho whe whunanohodutilh'eh huba' hoont'oh. 'Andit ts'oodunne k'un'a lilet 'i za ookw'a khahna, 'aw but duts'un-i, 'i iloh. 'Et whuz un'a 'ahja.

<sup>13</sup> 'Et mbene la lilet za k'udune unline, 'enne ndi Yak'usda ooghuni ts'ih'un 'unt'oh-i, 'i dzoh tsulyaz za t'ehininzun. 'Awhuz chalhts'ulne hinli 'et huwa.

<sup>14</sup> 'Et hoonts'i ndi but duts'un-i, 'i nchane bubu' yint'oh. 'Enne mbene la hodul'eh howun nuni nuzutne 'ink'ez hik'une' hut'en 'et whe bubeni ulhtus leh, 'enne 'uhint'oh. 'Enne unzoo-i 'ink'ez ntsi'-i bulh t'ehininzun.

## 6

*Yak'usda ooghuni butsoodool'eh 'ink'ez 'on 'un cha 'ink'ez 'on 'un cha*

<sup>1</sup> 'Et huwa ndi 'udechoo Christ ghun hodilh'e'-un, 'et za hodoolh'eh junih, k'us 'on 'un cha hodoolh'eh. 'Et de la soo ts'ih'un un'a lhadulyane k'un'a 'ooh'te'. Ndi 'udechoo whuts'odil'e'-un, 'et yoh ookw'uwhez'ai-i dúwhult'oh, 'ink'ez 'i whenich'oh 'aw 'uyoo na'ts'oooleh hukwa lhe'uznínun. Ndi 'udechoo whuts'odil'e'-un, 'et ndiz un'a nja dúhoont'oh, ndai la 'uts'alh'en-i 'ants'et 'uhoont'oh, 'aw nela ooneh ait'oh, 'i ts'iyawh ooch'az náts'ool'ah. 'Et nts'en'a 'uhoont'oh Yak'usda neba 'alha' 'unt'oh-un, 'et cha.

<sup>2</sup> 'Ink'ez nts'en'a la dune too be 'úl'en-un. Nts'en'a la 'uyoonne dune k'ehúdilnih-un cha, 'ink'ez 'et nts'en'a 'uhutinell dune yaidlanne toh dunahudutádalh. 'Ink'ez nts'en'a 'ilhiz neba nahutideh-un whuz uztidulh. Njan 'udechoo hodilh'e'-un, 'et 'uhoont'oh. 'Et cha za 'on 'un whunots'unoollhtun ait'oh.

<sup>3</sup> 'Et whuz un'a Yak'usda netl'ahón'ai de, 'et de ndet la soo ts'ih'un un'a lhadulyane uztiléh.

<sup>4</sup> 'Et mbene la Christ ghun hodil'e'ne 'ink'ez t'ehonínzun, ndi yak'uz howat'aih-i, 'i huyílhchoot 'ink'ez Ndoni cha buyudinda.

<sup>5</sup> 'Ink'ez Yak'usda daja ni-un, 'et dalzoo' la, 'i cha huyílhchoot, 'ink'ez ndet la ye úlhtus-i whuz de hóolts'ulh, 'et cha t'ehonínzun.

<sup>6</sup> 'Et mbene la ndunt'ohne 'et hoonts'i Yak'usda ch'a nahusdil de, 'enne nts'oh dahoon'toh hoonts'i, 'aw doo cha za whuz un'a dudzi nahonduooleh ait'oh. Ndunt'ohne dich'oh Yak'usda ooYe' tulalghus k'enáhuyilhti le'huyulh'en, 'ink'ez ts'iyanne but highudloh.

<sup>7</sup> Soo cho whunulh'en, 'et tube cho nawhúltih te haníyeh ba hoonzoo. 'Ink'ez ts'iyaitsuk t'alh-i neba hanúlhyeh de, 'et de whuz un'a Yak'usda nets'un unzoo.

<sup>8</sup> 'Et hoonts'i, 'i yun whus 'ink'ez 'ut'antsi', 'i za haníyeh de, 'et de 'aw hoonliyaz lhiloh whe 'unt'oh. 'Et huwa ookalhe'ts'unízun. K'at le de ts'iyawh uzdutálhk'un. 'Et soo cho howu ni óhtan!

*Yak'usda ooba ne'ts'ut'en-un 'aw whunaoodoolnoh ait'oh*

<sup>9</sup> Nek'ekene nohni ndi khuniti be dunóhts'utni, 'et hoonts'i Yak'usda ch'a nasdilne lhahloh, 'et neba 'alha' hoont'oh. 'Et k'us be uzdujis-i, 'i gha 'on nus hoonzoo hukw'un'a 'utiht'elh, 'et neba 'alha' hoontoh.

<sup>10</sup> Yak'usda ooch'e'ne, 'enne nohni buba ne'út'enne ahli ínle', 'ink'ez 'awhuz whuz un'a nduht'en. Nohe'ut'en 'ink'ez Yak'usda tube ook'ehtsi' whe aht'en, 'et ts'iyawh Yak'usda whunilh'en. Yak'usda ts'ih'un un'a za 'unt'oh, 'et huwa 'aw whunaoodoolnoh ait'oh.

<sup>11</sup> 'Et 'ilhona ahli whe 'et whulatoh whuts'un, nohdzi ndulcho-i be whuz un'a edóht'en, 'et nohba hukwa' uzninzun. 'Et whuz un'a ndet la hukwa tse hoohti-un, 'et nawh lhe'hoot'oh nohts'un whutikulh.

<sup>12</sup> 'Ink'ez tseadahtni oohle' junih. 'Et k'us ndai la Yak'usda whe nets'u náhizya-un, 'et mbene la bé 'alha' hoont'oh-i 'ink'ez sa' huba whulh huzyin whe 'enne bugha íta'alh whuts'un, 'et nohni cha 'enne buk'un'a 'ooh't'en.

*Yak'usda didutch'oh nets'u hoozi Christ ooka tse ts'uhooli-un 'unt'oh*

<sup>13</sup> 'Et 'aw dune Yak'usda an do 'unt'ohne hooloh. 'Et huwa 'oh da' 'et ndi Yak'usda Abraham yuts'u náhizya-i, dich'oh dudoozi' be yuts'u náhizya.

<sup>14</sup> 'Ink'ez Yak'usda Abraham yudáni', "Tubeh nts'un tíszoó'. Si sgha nts'un haíndene hutildlai'."

<sup>15</sup> 'Ink'ez 'et whuz un'a 'uhooja. Yak'usda Abraham daja yudáni'-un sa' whe yubailh'e', 'et hoonts'i whe yuts'u náhizya-un, 'et ooghá whults'ut.

<sup>16</sup> 'Et ndet la dune hoonli-unyaz huwun 'uyoon dune yuts'u nahutiye'h de, 'et ts'ih'un néhota'alh hukwa' huninzun de, 'et de mbe la yando 'unt'oh-un, 'en boozí' be ts'ih'un nehoho'alh huba' hoont'oh.

<sup>17</sup> 'Et whuz un'a za Yak'usda 'uja. Nduhne mbene la ndai la but's'u hoozi, 'enne bugha íta'alh. Ndet la but's'u hoozi-un, 'aw 'ats'un un'a na'hótne'h ait'oh. Soo ts'ih'un un'a t'ehonoozeh buba hukwa' ninzun, 'et huwa dudoozi' be but's'u náhizya.

<sup>18</sup> Yak'usda 'aw hoots'it ait'oh. 'Et huwa ndet la howu yalhduk-un 'ink'ez but's'u náhizya-un, 'et náwhult'oh 'aw 'ats'un un'a na'hotne'h ait'oh. 'Et huwa t'ets'oninzun Yak'usda 'aw nela dootnih ait'oh. Wheni cha ndet la hukwa tse ts'úhooli-un, 'et ts'ohótun huba' hoont'oh. 'I gha nedzi do ná'ut'i.

<sup>19</sup> Ndet la hukwa tse ts'úhooli-un, 'i ndi yun k'ut uzdlilts'i-un 'ants'i neba tse'dlooh le'unt'oh. 'Et 'ilhiz duts'o 'ink'ez 'aw nuhóotnah ait'oh. 'Ink'ez ndi tse'dlooh, 'i whúlh nat-un whuts'oh súbal-un, 'et us'ai.

<sup>20</sup> 'Et Sizi Gri 'uda' 'uja netso nusiya-un, 'en whuz danínya. Melchizedek 'en k'un'a 'ilhiz wheni lubret 'uk'enus dizti'-un sulí'.

## 7

*Melchizedek lerwe 'uk'enus ts'ih'un ne'ut'en-un*

<sup>1</sup> 'Et 'awet ndun Melchizedek 'ilhoghun keyoh Salem huwhút'ni-un, 'et whulerwe unli. Yak'usda ts'iyantsuk whando 'unt'oh-un, 'en oolubret unli. 'Et whuz un'a 'uhóoja whe 'oh da' Abraham 'en whuz un'a lhane lerwene bulh lhígan 'ink'ez lhane háng'han. 'Et hukw'elh'az dukeyoh ts'u náhutisdil whe ndun Melchizedek Abraham yududziza whe 'et ndiz un'a Yak'usda ts'un yuba tenadidli, 'uk'enus hoonzoo-un yughá ho'alh ha.

<sup>2</sup> 'Ink'ez mbene la buhanghane ndai la hiye ánt'e'-i, 'i ts'iyawh huyílhchoot. 'Et ndi whuloh, 'i 10% ts'utni, 'i Abraham Melchizedek ts'ú be nilhni. 'Et Melchizedek boozí-i ndi 'unt'oh, ts'ih'un un'a lerwe unli. 'Ink'ez keyoh Salem whulerwe cha unli. 'I ts'ih'un un'a lhts'un be' ts'int'oh-i lerwe unli ni whe 'utni.

<sup>3</sup> Ooloo hooloh 'ink'ez oobá cha hooloh. Mbe édinzut-un cha hooloh. 'Aw lhuhóolel 'ink'ez 'aw dálhítsal. 'Et whuz un'a Yak'usda ooYe' k'un'a 'ulya whe 'ilhiz wheni lubret unli.



4 Ndun 'en Melchizedek nts'en'a la dune ncha-un unli, 'et howu nuni nuhzut. Netsoda'-un 'unt'oh-un Abraham 'en lhane yé dinzut, 'et hoonts'i ndai la dune hiyudanghan-i, 'i 10% ts'utni, 'i Melchizedek ts'ú be nilhni.

5 'Ink'ez 'alha' hoont'oh 'i be, Levi ts'u haindene, 'enne za lubret hulih. Yak'usda butl'a hón'ai whe dunene 10% huyut'i-i, 'i lubretne hitl'anáhuyoo'alh huba' hoont'oh. 'Enne Abraham éndindene 'uhint'oh 'ink'ez bubulhutsinke hinli, 'et hoonts'i 'enne whuz un'a 'et nduhút'en inle'.

6 'Et Melchizedek 'aw Lizwifne buts'u háhizulh, 'et hoonts'i Yak'usda Abraham ye yuts'u náhizya-i yugha óonin'ai 'ink'ez Abraham 'en 'uja 10% ts'u be' yunilhni. 'Ink'ez Melchizedek Yak'usda ts'un yuba tenadidli 'uk'enus hoonzoo-un yughá ho' alh ha.

7 'Et nawh lhe'hoot'oh mbe la k'us 'unt'oh-un unli-un, 'en duk'elh'ih 'unt'oh-un, 'en ba tenadidli.

8 'Et diz un'a 'et 'úhoont'oh, nyoonne Levitne, 'enne cha 'ants'i yinka dune za' hint'oh, 'ink'ez whuz un'a za yahadlah, 'et hoonts'i ndi 10% 'i cha whuz un'a za nahuyulhdzoo. 'Et Melchizedek, 'en 'unt'oh 'ilhiz wheni khuna-un huyúlhni, 'en 'uyinla Abraham 10% yugha'aih.

9 'Et ndiz un'a nja dúzdutinelh, Levi 'en 10% nalhdzoo-un 'unt'oh, 'en hoonts'i Abraham gha Melchizedek 10% yugha'aih.

10 Soo cho whunulh'en, whutso da' Melchizedek Abraham ghu ninya whe, 'et Levi 'awhuz lhuwhusle whe.

### *Uyoon lubret whusatíyalh*

11 'Et 'inka nyoonne Levi ts'u háindene, 'aw 'enne za dune buba lubret hulih 'ink'ez 'enne bugha Yak'usda dughuni netl'aídan'ai, 'et hoonts'i 'enne bugha ndet la Yak'usda nets'u hukwa' nínzun, 'et ts'iyantsuk lhalhódusneh. 'Et whuz un'a ts'iyanne t'ehonózin huba' hoont'oh, 'uyoon lubret whusatíyalh. Ndun lubret whusatíyalh-un, 'aw Aaron dulhilt'oh. 'Ink'ez 'ants'i Melchizedek k'un'a ootadzi'.

12 'Et ndet howa mbene za lubret huli, 'et Yak'usda lhk'enaóodan'ai de, 'et de 'et huwun dughuni butl'a ídan'ai, 'et cha 'uts'un un'a na'whutátmelh.

13 'Et ndun ooghun yats'ulhduk-un, 'en neMoodihti 'unt'oh, 'en 'udoh didowhne buts'u háinzut-un 'unt'oh. 'Ink'ez ndunne 'udoh didohne 'aw lubret hoole' ait'oh. 'Enne loodel k'ut 'aw hoonli hudólhk'un huba lhe'hit'oh.

14 'Et neMoodihti 'en Judah didowhne ts'u hainzut-un 'unt'oh, 'et ts'iyanne t'ehonínzun. 'Ink'ez 'enne lubret hutileh huwun, Moses 'aw howu yalhtilhdi.

15 Njan 'on nus soo t'ewhuntihzeh 'et nohts'u hukwa' nuszun, 'et Melchizedek k'un'a 'uyoon lubret whusatíyalh de,

16 'et ye khuna-i be 'aw gak huyoolhtselh ait'oh, 'et whuz un'a Sizi Gri lubret sulí. 'Et hoonts'i nts'en'a la Yak'usda ooghuni be dune Aaron ts'u hainzut whe lubret tileh, 'aw 'et huwa iloh.

17 'Et whuz un'a Sizi Gri ghun Yak'usda ooghuni nja ndutni, "Ndun Melchizedek, nts'en'a whe lubret unli, nyun cha 'ilhiz wheni lubret inli."

18 'Et ndiz un'a nja dúhoont'oh, 'udechoo khuni butl'a dílts'ut da', 'aw dune la'hoot'en ait'oh. 'Et huwa Yak'usda 'udun newhunin'ai.

19 'Et ndai la 'udechoo Yak'usda dughuni netl'aídan'ai-i, 'i be 'aw dune soo lhadúlyane hoole' ait'oh. 'Et hoonts'i ndi khuni netl'aídan'ai-i, 'i be 'et 'on nus hoonzoo-un hukwa tse ts'úhole'. 'Et de 'on nus Yak'usda benghoh uztit'elh.

### *Sizi 'en 'andit lubret 'unt'oh*

20 'Et Yak'usda dich'oh dughuni be Sizi Gri yuts'u náhizya whe yudáni, "Nyun 'ilhiz wheni lubret inli."

21 'Et hoonts'i ndunne Aaron lubretne Yak'usda 'aw whuz un'a buba nalhihiyel whe lubret huzdli'. 'Et hoonts'i dich'oh ts'ih'un yuts'u náhizya-un, 'et whe Sizi Gri lubret unli. 'Et whuz un'a 'et ndutni Yak'usda ooghuni, "Moodihti dughuni yutl'aídan'ai, dudení 'aw 'ats'un un'a na'yooleh ait'oh.

'Ink'ez 'uyulhni,

'Melchizedek k'un'a nyun cha 'ilhiz wheni lubret inli.' "

22 'Et whuz un'a ndi 'andit khuni nets'u lhaidinla-i, Sizi Gri neba dazsai-un, 'et 'i be nets'u whutikulh whe' hoont'oh.

23 'Et ndunne lubret lhane hinli 'et hoonts'i 'ilhoghun hinli whe ts'iyawh yahadlah. 'Et huwa 'aw 'ilhoghun 'ilhiz wheni lubret oole' ait'oh.

24 'Et hoonts'i Sizi Gri 'ilhiz wheni khuna, 'et huwa neba lubret unli-un, 'aw 'uyoon dune yuk'edóoya'ne hooloh.

25 'En 'ilhiz wheni khuna 'ink'ez neba tenadudli, 'et huwa nawh lhe'hóot'oh ts'iyanne, 'en be Yak'usda hiyenghoh hutit'elh, ts'iyawh 'enne buba ye ulhtus-i ut'i whe soo ts'ih'un un'a ubutilhyis ha.

26 Njan 'et ndiz un'a Sizi Gri lubret 'uk'enus diziti'-un neba unli. Lubeshi ooghu hooloh, 'aw whe ook'eholts'it-un cha hooloh. 'Ink'ez tank'us 'uhoont'oh-un 'aw hoontsool-unyaz hoonts'i ookw'uz lhíst'en. Lubeshi 'ulh'enne bubulh 'ut'en inle', 'et hoonts'i 'aw 'enne buk'un'a ndi yun k'ut lhidal. 'Ink'ez buch'a nasja. 'Ink'ez yak'uz whanus diziti' suli'.

27 'Aw Lizwifne buba lubret 'uk'enus diziti'ne bubundúlh lhilt'oh. N dunne lubretne dzin totsuk dulubeshi ba loodel k'ut 'uhudílhk'un. 'Et hukw'elh'az dudulh dunene ba loodel k'ut 'uhudílhk'un. 'Et hoonts'i 'andit Sizi Gri ts'iyanne ba didutch'oh 'et 'ilhoz za 'ink'ez 'ilhiz wheni nelubeshi k'elha dazsai.

28 'Et dunene bulubeshi gha tehutsun 'et hoonts'i ndai la 'oh da' Yak'usda khuni netl'aídan'ai, 'i be dune lubret 'uk'enus diziti'ne hutileh. 'Et ndai la Yak'usda ooghuni Moses 'uk'unéyuzguz-i, 'i ook'elh'az, Yak'usda duYe' 'en ghun nets'u nahizya lubret 'uk'enus diziti'-un tileh. 'En 'unt'oh, duYe' 'en 'ilhiz wheni soo 'et lhadulya-un suli'.

## 8

### *Sizi 'andit lubret unli whe dude 'ut'en k'oh huwana*

1 'Et 'awet niz de daja uzdani', nja 'et 'uw'húlhni, wheni neba lubret 'uk'enus diziti'-un ts'ut'i, mbe la yak'uz k'us úncha-un, 'en ookw'uts'uzda cho diziti'-i, 'i nailhni ts'un k'us yughu nátl'adida'.

2 Ndi ndai nimbali cho neMoodihti nénin'ai-i, 'i ts'ih'un un'a 'uhoont'oh-un 'uhoont'oh. 'I 'aw dune iloh nénin'ai. 'Et huwa 'udéni' nimbali bet whambez, 'ink'ez 'et 'uk'enus whudízti'-un, 'et cha Sizi Gri neba ne'ut'en.

3 'Et mbene la lubret 'uk'enus diziti' online, 'enne loodel k'ut hudílhk'un 'ink'ez doo cha hoonliyaz Yak'usda gha hóc'alh huba' hoont'oh. 'Et whuz un'a za ndun mbe la ooghu yats'ulhduk-un, 'en cha hoonli huwa óo'alh huba' hoont'oh.

4 'Et lhane lubretne ndi yun k'ut, 'enne nts'en'a la Moses ooghuni k'un'a, 'et whuz un'a 'et nduhút'en. 'Et huwa Sizi Gri 'awhuz ndi yun k'ut usda de, 'aw da' lubret lhiloh oolé'.

5 N dunne nimbali cho t'ah ts'e dunene buba ne'hut'en te, 'et ndi nimbali cho 'et yak'uz whuz'ai-un, 'et whunduhúl'en whe' hut'en. 'I yak'uz dahoont'oh-un 'ants'i 'et whunduhúl'en le'hut'en. 'Oh da' Moses nimbali cho neti'alh whe, Yak'usda yudáni', "Nts'e la dzulh k'ut nimbali cho netílt's'ulh-un

whunyunistan-un, 'et wheni ooghá ne'tant'en-i mba usdla, 'i k'un'a onleh. 'Et nts'en'a la whúnyunistan, ndúwhulcho whe whuz un'a onleh!"

<sup>6</sup> 'Et hoonts'i Sizi Gri ndunne 'on nus soo buba nus soo ne'út'en-un suli'. Ndi 'uk'enus hoonzoo khuni nets'u lhaídinla-i, 'et huwa Sizi Gri 'en neba k'elha whulhtsi-un unli. Yak'usda 'on nus hoonzoo k'un'a nets'ú hoozi-un, 'et whuz un'a neba 'uhóonla.

*'Andidi khuni nets'u lhaídinla-i*

<sup>7</sup> 'Et njan khuni 'udechoo khuni butsu lhaídinla-i buba hoolhtus, 'aw hik'unelhe'hit'el. 'Inka 'i gha dune Yak'usda nalh ts'ih'un lhe'hit'oh. 'Et huwa doo cha za whulh nat-un nets'u nahizya.

<sup>8</sup> 'Ink'ez Yak'usda oodune'ne, 'enne ts'iyawh hukwa' budáni'. 'Et whuz un'a ooghuni 'uk'uwhusguz whe nja dutni,  
"Soo zulhts'ai, 'ilhudzin whuz de hoolts'ulh,

'et whusahóolts'ut de,

'et de Israel buyun k'ut dilhts'ine

'ink'ez Judah buyun k'ut dilhts'ine,

'oh de ndi 'andidi whulh nat-un khuni buba lhaídutisdleh.

<sup>9</sup> Ndet la butsoda'ne 'udechoo khuni buba lhaíusdla,  
'et whulh nat-un 'aw 'et hukw'un'a lhe'whutást'el.

'Et 'oh da' 'ants'i bula úschoot

'ink'ez Egypt yun k'ut hukw'unabutísdlá.

'Et hoonts'i sghuni 'aw lhuhuyílhchulh,

'et huwa bula disni, ni neMoodihti.

<sup>10</sup> 'Ink'ez cha neMoodihti ndutni,  
'et hukw'elh'az Israel buzkehke soo 'andidi-i,  
'i khuni buba lhaídutisdle.

Ndiz un'a ndóat'elh,

sk'oh ts'e 'et bubeni táwhudutasdlel,

'ink'ez budzi k'ut cha 'uk'ehóotasgus.

'Ink'ez si buYak'usda tisdleh,

'ink'ez 'enne sdune'ne hutileh.

<sup>11</sup> 'Oh de de ts'iyawh 'ilhoghun hinli whe ts'oodunneyaz  
'ink'ez yoo 'un udohne bulh 'alhgoh, Si t'esontizeh.

'Et huwa datíst'elh-un,

'et huwa dudenghoh whut'íne,

k'us dudulhutsinke 'aw 'ilhoghun hoonts'i,

doo cha za 'neMoodihti ghun hodulh'eh!'

hudooni'huba lhe'hoot'oh.

<sup>12</sup> 'Et dáhoont'oh la 'aw ts'ih'un lhe'hust'en de,

'et huwa bugha té'untaszeh.

'Ink'ez bulubeshi 'ink'ez sk'únulhe'ust'en-un,

'et 'i ts'iyawh 'aw 'on 'un 'aw buba whunaooznih ait'oh."

<sup>13</sup> 'Et huwa Yak'usda ndi soo 'andit-un khuni neba lhaídinla-i howu yailhduk, 'et dája ni whe ndutni, 'i gha njan 'udechoo khuni buba lhaídinla-i, 'aw whe lhé'hoot'oh suli', 'et huwa Yak'usda neba lkh'enaoodan'ai, 'ink'ez 'aw 'on 'un ook'une' ts'oot'en ait'oh.

## 9

*'Oh da' nimbali cho 'ulya-un*

<sup>1</sup> 'Ink'ez njan 'udechoo khuni buba lhaídinla-i, 'i be whubúniltan nts'en'a lubretne Yak'usda ba ne'hóot'en huba' hoont'oh. 'Ink'ez ndet la nimbali cho 'uhuhóonla-un, 'et Yak'usda ts'un teni' hunalhzin-un 'uhoont'oh.

<sup>2</sup> 'Ink'ez nimbali cho be 'uhóolya-un, 'et ndiz un'a nja dúhoont'oh. 'Udechoo-un whambez ts'e, 'et lhtak'ant'i kwun ook'udizk'un-i 'et skai. 'Ink'ez ludab lhes ookw'usdla-i nul'en, 'i cha 'et skai. 'Et njan 'udechoo-un whambez ts'e, 'et whudizti'-un 'uhoont'oh.

<sup>3</sup> 'Et 'on ni' whulh nat whuts'oh subal-i, 'et 'on nus whudizti', 'ink'ez 'uk'enus whudizti' whe' 'uhoont'oh.

<sup>4</sup> 'Et whambez ts'e ludab gold huyalh'uz-i, 'i ndulcho whe ooghá yosduz, 'et uskai. 'I k'ut ooluts sooltsun-i hudílhk'un. 'Ink'ez ndi chunkelh cho, 'i cha bez ts'e 'ink'ez yoo'az ts'e, 'et ndulcho whe ndi gold ndulcho ooghá yosduz, 'i cha 'et us'ai. 'Ink'ez 'i Yak'usda khuni buba lhaídlnla-i oochunkel 'unt'oh. 'I bez ts'e gold 'oosa' cha be us'ai. 'Et ndi gold oosa', ndi lhes manna huyulhni, 'i bé yuz'ai. Aaron ootuz, ndi tuz 'i 'unt'oh 'ut'an oots'u hanálhyai inle', 'i cha be idiztan. 'Ink'ez ndi whunizyai khuni netl'aídan'ai, 'i tse k'ut 'uk'unusguz, 'i cha be ídiz'ai.

<sup>5</sup> 'Ink'ez ndi chunkelh cho k'ut, ndunne Cherubim ubuts'útnine, 'enne bube Yak'usda yé dizti'-un t'ets'oninzun, 'et huwa ndi chunkelh 'i k'ut 'uhint'oh. Buts'unt'a' whutus lht'aítnaih huyulhntsi, 'i t'ah, 'et 'i k'ut 'uskai' yuk'unfidilht'ih whe Yak'usda soo cho nets'u naítot'en ha ts'uwhútni. 'Aw ndi ts'iyawh howu yats'oolhduk ait'oh.

*'Udechoo nimbali cho 'ulya-un, 'i t'ah loodel k'ut hidilhk'un-i 'aw 'et whe ninta' ts'unt'en-un neba 'un whutookat ait'oh*

<sup>6</sup> 'Et nduwahi ts'iyawh nts'e oola'huba' hoont'oh-un, 'et nehínlnla. 'Et 'awet 'udechoo whambez ts'e 'et ndunne lubretne, 'enne dzin totsuk ne'hut'en.

<sup>7</sup> 'Et hoontsi' lubret 'uk'enus dizti'-un, 'en naodizulh totsuk 'ílhoh za 'on ni' whulh nat-un ts'e nuyaih. 'Uskai' yit de, 'aw whuz tooya' ait'oh. 'Et ndi 'uskai' dich'oh duba cha 'ink'ez mbene la 'aw t'ehonúszun whe lubeshi hihhchuk, 'enne buba cha, 'enne ts'iyawh bulubeshi huwa whuz Yak'usda nalh wheyúkaih.

<sup>8</sup> Ndiz whuz un'a Ndoni whunoodulh'eh, ndi nimbali cho 'awhuz 'et us'ai de, 'et de 'uk'enus whudizti' ts'e, nts'e la Yak'usda 'unt'oh-un, 'aw whuz dats'óoya' ait'oh.

<sup>9</sup> 'Et dúhoont'oh-un, 'et huwa hoonli whuts'odul'eh-un huba' hoont'oh. Mbe la Yak'usda ba huwa ita'alh-i 'ink'ez loodel k'ut yadutálhk'un, 'en 'i be la Yak'usda ba ne'tit'en, 'et hoontsi' 'awhuz hoonli-unyaz buyo ts'e oogha t'ets'oninzun-i\* whe' hoont'oh.

<sup>10</sup> 'Ants'i ndai la hiti'ulh-i 'ink'ez hititnelh-i, 'ink'ez lhelhts'un un'a la tunáhududugus, 'ink'ez ndai la buyust'e ba ts'ih'un 'unt'oh-i, ndi 'i ts'iyawh nus de 'andit-un Yak'usda ba ne'hutit'en, 'oh de buba whusawhútilts'ulh-un, 'et whuts'un, 'et whuz un'a 'uhoot'en whuba' hoont'oh inle'.

*Sizi Gri didutch'oh duzkai' be ninta' ts'unt'en-un neba gak whulhntsi*

<sup>11</sup> 'Et hoontsi' Christ lubret 'uk'enus dizti'-un unli whe whusainya. Ndet la hoonzoo-un whusaóotikulh-un, 'en 'et negha whútaíleh. Ndi nimbali cho 'uk'enus ncha-i 'ink'ez 'on nus ts'ih'un un'a 'uhoont'oh-un, 'et whe neba ne'ut'en. 'Aw dune íloh 'uyinla. 'Aw ndi yun k'ut íloh 'uhóolya.

<sup>12</sup> 'Usbai 'ink'ez musdoosyaz bubuzkai', ndi 'uk'enus whudizti' ts'e 'aw whuz whelhúyikaih. K'us dich'oh duduzkai', 'i be 'uk'enus whudizti' ts'e whuz whinya. 'Ílhoh za 'ink'ez 'ílhiz wheni, whuz whinya. 'Et ndúja whe 'ílhiz wheni naneoket.

\* **9:9** Ndi khuni, 'Neyo ts'e oogha t'ets'oninzun-i,' 'i hoonli ts'ih'un un'a k'us tank'us 'úhoont'oh-un, 'i gha t'ets'oninzun, ts'utni whe' ts'utni.

13 'Et mbene la Moses be 'udustl'us gha dahúja la 'et huwa 'aw nimbali cho us'ai ts'e 'aw whuz hutoodilh ait'oh, ndunt'ohne musdoos dune 'ink'ez dube bubuzkai' buk'ehídutalht'ih. 'Ink'ez musdoos hidálhk'un-i oolez 'i buk'unuhítidzi, 'et whuz un'a Yak'usda nalh buyust'e 'aw lhoditsun nahudlih. 'Et whuz un'a 'et duhúja de za nimbali cho us'ai-i whuz hutidulh.

14 'Et hoonst'i Christ 'en dich'oh duduzkai' 'i be 'on nus dáwhulcho whe la neyo ts'e oogha t'ets'oninzun-i 'et ts'iyawh neba whuna'alhde. Ndai la 'uts'ulh'en-i, 'aw nela 'oot'en ait'oh, 'ants'et 'uhoont'oh. 'Et huwa Yak'usda, mbe la khuna-un, ooba né'ts'oot'en huba' hoont'oh. Christ 'en 'uja 'aw hoonliyaz bulh lhodí'oh whe Ndoni mbe la 'ilhiz khuna-un, 'en be Yak'usda yutl'a'dudilti, neba datítsah ha.

15 'Et huwa ndi 'andit-i khuni neba lhaídinla-i, 'et Christ 'en neba k'elha whulhtsi-un unli. 'Et whuz un'a mbene la njan 'udechoo khuni buba lhaídinla-i, 'et hukw'úne' hoot'en hukwa 'uhit'en, 'et hoonst'i lubeshi 'uhalh'en, 'enne ts'iyawh tulalhgus k'ut buba dazsai 'et whe njan 'udechoo khuni buba lhaídinla-i, 'et whuch'a whulanaditnne huzdli'. 'Et whe la mbene la 'ilhiz wheni hudutjih ha buka' dani', 'enne ndi 'andit khuni buba lhaídinla-i, 'i huyólhchoot ha.

*Dune hoonli mba nayoosdzi-i, 'en dune dazsai, 'et de za nts'u tíkulh*

16 'Et dune hoonli mba nayoosdzi-i, 'en dune dazsai, 'et de za nts'u tíkulh, whuz un'a 'uhoont'oh.

17 'Et hoonst'i 'awhuz khina de, ndai la dune ba naoozíndzi-i, khina whutoh, 'et 'awhuz nyun nch'e' unli whe 'unt'oh.

18 'Et whuz un'a 'uhoont'oh, 'oh da' 'udechoo whe Yak'usda ndi 'udechoo khuni buba lhaídinla-un, 'et loodel k'ut 'ink'ez dunene buk'ut cha, Moses 'uskai' be buk'eídilt'ih.

19 'Et la Yak'usda dughuni Moses yutl'aídan'ai, 'i nts'en'a la 'uw'húlhni-un, 'et huwun ts'iyawh Moses budáni'. 'Et hukw'elh'az musdoosyaz 'ink'ez dube bubuzkai' too bulh 'unt'oh, 'i yílhchoot. Dube gha dulk'un-i, 'i duchunyaz 'i hyssop huyúlhni, 'i oozischum, 'i yulaídalh'oo 'ink'ez ndi 'uskai' yé tunayuzsi 'ink'ez Yak'usda be 'udustl'us yuk'uné'dilt'ih 'ink'ez dunene cha, ts'iyawh buk'uné' dilht'ih.

20 'Et ndúbulhni, "Njan Yak'usda khuni nohba laídinla-i, ndi 'uskai' 'i be 'et whuz un'a 'andit whuts'un buba' hóonla," ni Yak'usda.

21 'Ink'ez ndi nimbali cho, 'i cha, 'ink'ez bez ts'e ndai la Yak'usda bé ba 'uw'hut'en-i, 'i 'unt'oh, 'i cha ts'iyawh, ndi 'uskai' yuk'unídilt'ih.

22 'Et Moses be 'udustl'us 'i be 'ankw'us ts'iyaitsuk 'et ndi 'uskai' 'i be whuz un'a lhoditsun nahudlih. 'Et 'aw 'uskai' buk'élhdulht'i de, 'aw lubeshi bubunayoodeh ait'oh.

*Christ 'ilhoh za neba dazsai-un dáhoolcho whe' hoont'oh*

23 'Et huwa ndi yun k'ut hoonli-i, 'ohwhi ts'iyawh yak'uz usdla-i dult'oh whe 'unt'oh. Nts'en'a la Moses dát'en, 'et whuz un'a lhoditsun sulí'. 'Et hoonst'i soo yak'uz ts'ih'un 'unt'oh-i, ndai la 'et 'unt'oh-i dutsun oole' whuch'a, 'i 'on nus hoonzoo be huwat'aih-i hóle' huba' hoont'oh.

24 'Et Christ 'en ndi yun k'ut nja nimbali cho bet, ndet la k'us whúdziti-un, dune dula be 'uhuhóonla-un, 'aw 'et dálhiyal. Njan 'et 'ants'i yak'uz whundóhot'en huwhulhtsi 'et huwa. 'Et k'us ndo yak'uz ts'e whuz whenya. 'Et whuz un'a Yak'usda but neba nenínya.

25 'Et njan lubret 'uk'enus dizti'-un, 'en khuna-i uzakai' be, naoodizulh totsuk, njan 'uk'enus whudízti'-un, whuz k'unádaih. 'Et hoontsi' Christ 'aw dich'oh lhat cho huwá dudóltelh huba lhe'hóot'oh.

26 'Et ndúja de, ndi yun 'ulya da' whuts'un 'andit whuts'un, 'et de tube lhat da' daootsah oole'. 'Et 'andit 'awet ndi yun 'etsul 'utinelh-un nilhdukwhuzdli', 'et 'ilhoh za ndi yun k'ut nuseya, 'ink'ez neba huwa' dudulti. 'Et huwa whuz un'a nelubeshi neba yunaoodilhnoh.

27 'Ink'ez dune 'ilhoh za dahútsisah-un, whuz un'a 'uhóolya, 'et dahúzsai hukw'elh'az 'et de buba nahutideh.

28 'Et whuz un'a Christ, 'en 'ilhoh za huwá' dudulti. 'Et whuz un'a lhane bulubeshi bughu yilhchoot 'i yuk'elha dazsai. 'Et hoontsi' whulh nat-un, 'aw lubeshi gha iloh whe whusanatidalh. 'Et k'us ts'iyanne mbene la yuka tse hooline, 'enne bunalhts'et be hóodutaltsehl, 'et whe hudutijih.

## 10

### *Khuna-i loodel k'ut huidilhk'un-i, 'i be 'aw bulubeshi buna'oodeh ait'oh*

1 'Het Moses 'uk'ehonguz-un dalzoo'-i la whuz hatikulh-un, 'et 'aw soo cho lhunedinel. Mbene la ndi khuni yuk'une' 'ust'enne, 'enne naoodizulh totsuk ndai la huwa t'aih-i whe loodel k'ut huidutálhk'un-i, 'et hoontsi' 'aw Yak'usda nalh lhadulyane uboolhtselh ait'oh.

2 Lhadulyane ubutillhtselh de, ndai la huwa t'aih-i 'etsul 'uhuyooleh huba' hoont'oh. 'Et doo cha bulubeshi ts'iyawh bubunayide de, 'et de buyo ts'e oogha t'ets'oninzun-i, 'i be t'ehontizeh.

3 'Et hoontsi' naoodizulh totsuk, ndai la huwa t'aih-i, 'i be 'et whe ts'iyawh t'ehonínzun 'awhuz lubeshi hut'i.

4 'Et musdoos dune 'ink'ez dube buzakai', 'i nts'oh dáhoont'oh 'et hoontsi' bulubeshi 'aw 'i be buna'oodeh ait'oh 'et huwa.

### *Christ duzkai' 'i be za nelubeshi yuna'alhde*

5 'Et huwa nkeda' Sizi Gri ndi yun k'eínya whe, 'et njan dutni, "O Yak'usda ndai la huwa t'aih-i, 'ink'ez loodel k'ut huidilhk'un-i, 'i ts'iyawh ookwa lhe'nínzun.

'Et hoontsi' 'ilho yust'e 'i sba lhadinla.

6 Ndai la loodel k'ut lubeshi ba dízk'un-i, 'ink'ez 'et 'uyoo huwa huyulih-i cha, 'i ts'iyawh 'aw mba soo lhe'ildzoo'.

7 'Et huwa 'et njan dúdusni,

'O Yak'usda ndi 'udustl'us sghun 'uk'une' úsguz 'et 'alha' hoont'oh.

Nyun hukwa' ninzun-un te ne'tist'en 'et huwa whusásya.' "

8 Njan dutni whe 'utni, "Ndai loodel k'ut lubeshi ba dízk'un-i, 'ink'ez 'et 'uyoo huwa huyulih-i inle' cha, 'i ts'iyawh 'aw mba soo le'ildzoo'," 'et hoontsi' Moses be 'udustl'us 'i gha 'et nduwhut'en inle'.

9 'Et huwa Sizi Gri 'et njan dutni cha 'utni, "O Yak'usda nyun hukwa' ninzun-un te ne'tist'en 'et huwa whusásya." 'Et whuz un'a Yak'usda njan 'udechoo khuni buba lhaídinla-i, 'i gak yulhtsi. 'Ink'ez bulh nanki khuni buba lhaídinla-i, 'i yuk'enaídan'ai.

10 'Ink'ez Yak'usda ndet hukwa' ninzun, 'et whe 'ilhoh 'ink'ez 'ilhiz wheni Sizi Gri duyust'e be neba huwa' dudulti. 'Et whuz un'a 'uda' ooch'e' ts'uzdli'.

### *Christ neba dazsai-un, 'et 'i be 'utahalyanne, 'enne lhadúlyane ubulhtsi*

11 'Ink'ez ndi loodel k'ut hidílhk'un-i, 'et dzin totsuk 'i za ndunne lubret whusaháyuli. 'Ink'ez 'et whuz un'a za dunene buba ne'hut'en. 'Et hoonts'i 'et nduhút'en-un 'aw bulubeshi buna'oodeh ait'oh.

12 'Et hoonts'i Sizi Gri nelubeshi k'elha 'ilhoz za 'ink'ez 'ilhiz wheni 'uja dich'oh huwá' dudulti. 'Et hukw'elh'az Yak'usda nailhni ts'e yughu nátl'adida.

13 'Ink'ez 'andit 'et usda nk'ede 'uwhtanelh whe yuch'az ditnine, 'enne 'ants'i ook'ut neke nályis-i, 'i k'un'a duke t'ah nébutaleh, 'et huba sulh'i.

14 Mbene la Yak'usda ba 'udun nebuninlane, 'enne buba Sizi Gri 'ilhoz za huwa dudulti. 'Et whe 'i be 'ilhiz wheni lhadúlyane ts'uzdli'.

15 Ndoni 'en cha whuz un'a za 'et nduneúlhni. 'Oh da' 'et ndutni,

16 "NeMoodihti nja dutni,

"Et 'oh dzin hukw'elh'az ndi khuni buba lhaídutisdleh,  
'i 'uyoo 'unt'oh.

Sk'oh ts'e budzi yo cha newhudutas'alh

'ink'ez bubeni toh cha 'uk'ehóotagus.' "

17 'Ink'ez cha 'utni,

"Bulubeshi 'ink'ez 'uk'únulhé'ust'en-i,

'i ts'iyawh cha 'on 'un buba whunaooznih ait'oh."

18 'Awet ndai la nelubeshi ts'iyawh neba whunaoodilhnoh, 'ink'ez 'aw 'on 'un nelubeshi ba 'udólk'un ait'oh.

*Sizi Gri neba daja la, khun te neba nawh 'ohot'e' junih 'ink'ez soo cho ts'uhotun*

19 'Et huwa sulhutsinke, Sizi buz kai' gha tube nedzi hoonli whe ndet 'uk'enus whudízti' ts'e 'ahoolhyiz whuz uztudulh, 'et netl'ahon'ai.

20 'Et ndi ti, 'i 'awhudit-i 'ink'ez ts'ih'un un'a 'unt'oh-i neba whulh'tsi. 'Et didutch'oh neba dazsai-un, 'et 'i be ndi whuts'ohsúb'al-i neba lhch'az yilhchoot.

21 'Ink'ez Yak'usda ooyoh dilh'ts'ine, 'enne buba 'en lubret 'uk'enus dizti'-un unli.

22 'Et huwa wheni cha soo cho neba 'alha' 'oot'e' 'ink'ez nedzi ts'ih'un 'unt'oh, 'i be whuz un'a 'ahoolhyiz oots'úztooya'. 'Ink'ez duzkai' be 'uda' nedzi k'únedilht'i. 'I be ndet la neyo ts'e oogha t'ets'oninzun-i whudutsun-un, 'et ts'iyawh neba whuna'alhde. 'Ink'ez neyust'e too unzoo-i be tunásguz le'ts'oot'e'.

23 Ndet la ooka tse ts'úhooli-un, 'et neba 'alha' hoont'oh ts'utni, khun te neba nawh huhot'e' junih 'ink'ez soo cho ts'uhotun. Mbe la nets'é' oozii-un, 'en 'aw nela dootnih ait'oh 'et huwa.

24 'Et ts'iyawh lhghu nuni uznoozut 'et de la nus lh'ts'un noolt'i, 'et de la ts'iyanne buk'ets'ootsi' 'ink'ez 'ut'en unzoo-i be bula ts'oot'en.

25 Nts'en'a la 'ahoolhyiz 'ilhunats'odulh-un khun te whulazdootnih junih! 'Et whulohne 'etsul 'uhut'ih. 'Et hoonts'i 'awet 'udek'ez dzin whuz de hoolts'ulh-un 'awet neba nilhdukw suli'. 'Et huwa 'on nus soo cho nus lh'ts'unoolt'i whe 'ahoolhyiz Yak'usda ba 'ilhunats'ódilh huba' hoont'oh.

*Ts'ih'un un'a 'unt'ohne, 'enne be 'alha' hoont'oh-i, 'i be ndi yun k'ut hudólt's'i'*

26 'Et huwa njan dusni, khuni 'alha' 'unt'oh-i t'ezninzun whe ts'iyawh ts'ilhchoot, 'ink'ez hukw'elh'az ts'ih'un un'a t'ets'onanzin de, 'ink'ez lubeshi ts'ilhchoot de, 'et nduts'út'en 'et whe 'aw be húwa 'ut'aih-i, 'i neba lhe'ít'oh suli'.

27 'Et k'us 'et njan ndet la neba nahutideh-un, 'et wheoonujut k'et 'aw uzdooni' ait'oh. Yak'usda ye hunilch'oh-i, 'et 'i be neba nahutideh. 'Ink'ez

ndi ye hunilch'oh-i, 'i kwun ulhtus k'et be' duldí le'utni, 'i k'un'a mbene la Yak'usda ch'az ditnine, ts'iyawh 'i be huduták'un.

28 Ndi Moses be 'udust'lus k'ut 'uk'eguz-i, mbe la n'un whutuldhilhne, 'enne nane k'us tane te nalh 'et duhút'en de, 'et de be 'ugha te'nidzeh-i, 'i yit dahútitsah inle'.

29 'Et hoonts'i ndiz un'a 'on nus hootátsi'. Mbene la Yak'usda ooYe 'ants'i yuba unli whe yuk'unuya de, 'ink'ez Sizi buzkai' be 'andit khuni buba lhaídínla-i huwhut'i, 'ink'ez Yak'usda ba 'udun nebuninla, 'et hoonts'i ndi buzkai' 'aw hoonliyaz buba lhíloh de, 'ink'ez Ndoni 'en cha 'en be ye unzoo-i oots'u haídults'uk-un, hich'az yalhduk de, 'et ndi ts'iyawh mbene la whuz un'a ndut'enne, 'et 'on nus whéoonujut whe buba nahutideh.

30 'Et neMoodihti, 'en ook'oh ts'e t'ets'oninzun. 'En 'utni, "Be k'uznudzun-i, si sch'e' 'unt'oh! Si hukw'elha whutiselh." 'Ink'ez cha 'utni, "NeMoodihti dudune'ne, buba nahutiye'h."

31 Yak'usda khuna-un, mbene la 'uda' ooch'e yinline 'et hoonts'i hich'az nalhya de, 'enne whewhunujut whe buba nahutiye'h.

32 'Et hoonts'i nohni whunalhnihi ndi khuni niz dakez daja hutni la, soo cho t'eeonáhzun 'ink'ez ulhchoot. Hukw'elh'az tube cho dzoh nusahdeh 'et hoonts'i 'aw nohch'a lhe'ílhoh. 'Et ts'iyawh whutulh usáhdil.

33 Whuloh te Yak'usda gha ts'iyanne nalh dzoh nunóhuhulhdeh 'ink'ez nohch'az yahalhduk. Whuloh te mbe la whuz un'a Yak'usda dzoh nudehne, 'enne buts'ú nedahdaih.

34 'Ink'ez 'oh da' 'asuhan'ai whe sgha te'nahzun 'ink'ez sla aht'en inle'. 'Et ndai la aht'i-i, 'i 'ants'i nohghu hayílhchoot 'et hoonts'i hoonáht'i'. T'eeonáhzun nohni'ch'oh 'on nus hoonzun-un 'ink'ez 'ilhiz 'uhoont'oh, 'et yak'uz nohba whuzdla whe' hoont'oh.

35 'Inka be nóhdi ulhtus-un khun whuladoohtnih júnih! 'I gha hooncha-un nohgha whutalts'ulh.

36 'Et njan 'et ts'iyawh oola doohtnih junih! 'Et Yak'usda nohts'u hukwa' ninzun-un, lhaoodahla de, 'et nóhts'u nahizya-un, 'et nohgha whútakulh.

37 'Uda' khuni 'et nja dutni,  
"Et mbe la whusatíyalh-un,  
'aw sa' iloh whusatíyalh.

38 'Et mbene la ts'ih'un un'a 'unt'ohne,  
'enne be 'alha' hoont'oh-i,  
'i be ndi yun k'ut hudólt's'i' huba' hoont'oh.  
'Et hoonts'i ndunne k'oh na'huja de,  
'et de 'aw si buba hóst'e' ait'oh."

39 'Et 'ink'ez ndunne mbene la Yak'usda ooba 'alha' yint'ohne 'ink'ez k'oh na'huja de, 'enne ndai la Yak'usda bugha whúta'alh-un, 'aw huyólhchoot ait'oh. Wheni 'aw 'enne buk'un'a lhe'ts'it'oh. 'Et k'us wheni Yak'usda ooba 'alha' yint'ohne ts'inli, 'et whe dijizne 'uts'int'oh.

## 11

### *Be 'alha' hoont'oh-i, 'i be t'ets'oninzun*

1 'Et ndai la ooka tse ts'úhooli-i, be 'alha' hoont'oh-i, 'i be t'ets'onínzun neba whusatíkulh. 'Ink'ez nduwihí ndet la lhts'uhoo's'en-un, 'et hoonts'i be 'alha' hoont'oh-i, 'i be t'ets'onínzun 'et whuzúsdla whe' hoont'oh.

2 'Et be 'alha' hoont'oh-i, 'i be ndunne Yak'usda ba 'utso whudilhdzulhne, 'enne soo ts'ih'un un'a howu yahalhduk.



3 Be 'alha' hoont'oh-i, 'i be za t'ets'onínzun Yak'usda daja ni la, 'et whe ts'iyaitsuk ndi yun k'ut 'ulya. Ndai la lh'ts'is'en-i, 'i hoont's'i, dughuni 'i be ts'iyawh 'uyinla-i 'unt'oh.

*Yak'usda ndi yun 'uyinla 'oh da' whuts'un be neba 'alha' hoont'oh-i, 'i gha za Yak'usda oonalh ts'ih'un 'uts'int'oh*

4 Ndun Abel Yak'usda ooba 'alha' yint'oh. 'I be za 'uja dulhutsin Cain 'en anus unzoo-i Yak'usda loodel k'ut yuba ídalkh'un. 'Et ndi huwa ínin'ai-i, 'et Yak'usda hoonzoo k'un'a yughu yalhduk. 'Et Abel dazsai hukw'elh'az hoont's'i nts'en'a daja-un, 'et ooghun nebulh yaínduk, Yak'usda nalh 'en ts'ih'un dune 'unt'oh hutni.

5 Ndi be 'alha' hoont'oh-i, 'i be za Enoch nts'en'a la Yak'usda yuts'u hukwa' nínzun-un, 'et 'uhóonla 'et whuz un'a ooghun t'ewhunúdzun. 'Aw dalhítsal. Khuna whe Yak'usda yak'uz whe yalhti. 'Et whuz un'a Yak'usda ooghuni 'et ndutni, "Yak'usda yak'uz ts'e whenáyalhti. Hooloh. 'Et huwa huyulh 'ut'enne 'aw lhahuyis'en sulí."

6 Bé 'alha' hoont'oh-i, 'i ooyit de, 'aw Yak'usda ooba dzoh ts'oozoo' ait'oh. 'Et huwa mbene la Yak'usda ts'un hutidulh hukwa' hunínzun de, Yak'usda hoonli whe' hoont'oh, 'et buba 'alha' hot'e' huba' hoont'oh. 'Ink'ez soo ts'ih'un dudzi huwa' hooli whe hik'oh ts'e hukwa hítis'enne, 'enne za bula' tinelh.

7 Noah 'en cha Yak'usda ooba 'alha' yint'oh. 'I be ndet la 'awhuz lhuhoos'en-un Yak'usda yúlhni, "Huwondle" 'awet whuz de hóolts'ulh." 'Et huwa whenuljut 'inka 'et whuch'a ndi ts'i cho 'uyínla. 'Et huwa Noah hiyoh dilh'ts'ine, 'enne ts'iyawh ubúlyih. Ndet ndi ts'i cho 'uyínla-i, 'i gha ndi yun k'ut dúlcho whe dunene buba nahisda. 'Ink'ez nts'en'a la whe be 'alha' hoont'oh-i be ts'ih'un un'a 'unt'ohne ts'inli, Noah 'en cha whuz un'a Yak'usda ooba 'alha' yint'oh-un sulí, 'i be ts'ih'un dune inle'.

*Abraham ooba 'alha' hoont'oh-un*

8 Ndun Abraham, 'en cha Yak'usda 'uyúlhni, "Udun yun k'uz tonya'. K'at le de njan yun k'ut 'et nch'e' whutaleh." 'Et be 'alha' hoont'oh-i be Abraham whuz un'a yuk'úne' 'ust'en. 'Et nts'e tiyalh 'aw t'éoonúszun 'et hoont's'i 'awet tizya.

9 Be 'alha' hoont'oh-i, 'i be ndi yun yuts'u yoozi-i, 'i ooch'e' tileh. 'Et njan yun k'ut 'uts'un keyoh whut'en-un unli, 'et whuz un'a njan yun k'ut usda. Nimbali bet za whut'i. Nduone Isaac 'ink'ez Jacob 'enne cha 'en k'un'a nimbali be za huwhut'i. 'Enne cha ndi Abraham ye yuts'u náhizya-un, 'enne bulh buch'e' whutaleh.

10 'Et njan keyoh 'ilhiz 'uwhutat'elh-un, 'et Yak'usda, 'en 'uhóonla, 'et Abraham huba sulh'i whe nimbali be za hoot'e' inle'.

11 Be 'alha' hoont'oh-i, 'i be Sarah 'en cha Yak'usda ye ulhtus-i yutl'anahon'ai 'oolchan ha. Tube yoo 'un uzulh 'aw ooyaz hólé' ooba lhe'hóot'oh. 'Et hoont's'i nts'en'a la Yak'usda yuts'ú hoozi-un Sarah t'éoonínzun Yak'usda 'aw yula dootnih ait'oh.

12 'Et huwa 'ilhoghun dune 'en tube nisjan k'et 'ants'i dazsai le'unt'oh, 'et hoont's'i yé dindene huldlai. Ndoghi sum 'et 'i bundeíniltukne 'ink'ez taba sai 'aw oonlto ait'oh, 'et 'uhuniltuk.

*Ndunne 'uda'ne Yak'usda ooba 'alha'yint'ohne, 'enne ts'iyawh 'awhuz buba 'alha' hoont'oh whe whulh yahadla*

13 Ndunne 'uda'ne Yak'usda ooba 'alha' yint'ohne, 'enne ts'iyawh 'awhuz buba 'alha' hoont'oh whe whulh yahadla. 'Et ndai la Yak'usda yé but's'ú nahizya-i, 'i 'aw butl'alhéyizulh. 'Et hoont's'i ndai la nus huhon'en-i, 'et huwa

'aw nawh buba lhe'hóot'oh. Budzi hóont'i'-un 'et whe huhoontun. 'Ink'ez ts'iyanne hutni, 'aw ndi yun k'ut whut'enne lhuhíloh. 'Ants'i ndi yun k'ut whuk'uhundilh whe' hint'oh.

14 'Et dahutitsa whutso mbene la whuz un'a yalhdukne, 'enne soo ts'et gaih whe ts'iyanne whubuhonulhtun, dich'oh duyun k'ut 'et za hukwa' huninzun.

15 'Et 'alha ndet yun k'ut whuch'a huzdil-un, 'et howu nuní hunudeh de, 'et whuz da' nahutoodilh oole'.

16 'Et hoonts'i 'on nus keyoh hoonzoo-un hukwa' huninzun. Njan keyoh 'uwuhúlni-un, 'et yak'uz whuz'ai. 'Et huwa Yak'usda 'en duYak'usda hidáni'. 'Ink'ez Yak'usda 'en duYak'usda huyulhni, 'et 'aw hukwaya lhiloh, keyoh whuti 'et buba lhaóodinla 'et huwa.

*'Uda' dunene unzoone buba 'alha' hoont'oh-un*

17 Be 'alha' hoont'oh-i, 'i be 'oh da' Yak'usda Abraham yóolhdzai whe 'aw 'ilhoghun duye' Isaac loodel k'eyilhti 'ink'ez Yak'usda ba yutuzilhghelh ha. Ndet whe la Yak'usda yuts'ú hoozi-un whe ooye' oots'u haindene hutildlai, 'et ts'iyawh hóolhchoot.

18 'Ink'ez whutso 'uja 'en Yak'usda Abraham yudáni', "Isaac 'en gha nyéinde 'enne ts'iyawh whusahátidulh."

19 'Et hoonts'i Isaac loodel k'eyítalhtelh whutso Abraham whunalni Yak'usda daja yudáni'. 'Et huwa 'et duninzun, Yak'usda 'en soo 'últus whe Isaac dazsai de, 'et hoonts'i yaidlanne butoh dunaidutálhtelh. 'Ink'ez 'alha' hoont'oh, 'ants'i yaidláne hanáyalhti le'yinla.

20 'Ink'ez be 'alha' hoont'oh-i, 'i be ndet la ts'iyantsuk whusaóotikulh ha, Isaac Yak'usda yoodalhkut, ndunne Jacob 'ink'ez Esau bulh buts'un óozoo' ha.

21 Be 'alha' hoont'oh-i, 'i be Jacob dawhénintsai whe Yak'usda yoodalhkut Joseph ooye'ke buts'un óozoo' ha. 'Et dutuz la chándunuti whe Yak'usda ts'u teni' nalhdzin.

22 'Ink'ez be 'alha' hoont'oh-i, 'i be Joseph 'awet ooyiz latoh whéninle' whe Israel whudune'ne Egypt yun k'ut whuch'a nahutidulh whe huwun bubulh yaílhduk. 'Ink'ez oots'un cha dahítileh la, 'et ubudáni'.

*Moses ooba 'alha' hoont'oh-un*

23 'Oh da' Moses whuzdli da, ts'oodun daldzoo' la, 'et huwa be 'alha' hoont'oh-i, 'i be oodusneke lerwe daja ni-un, 'aw hik'un'a lhe'inel, 'et k'us ta sanun ndúwhulyiz 'et oodusneke nuhínilh'i'.

24 Moses 'awet k'éninyai whe Pharaoh ootse', 'en ooyaz huyúlhni, 'et be 'alha' hoont'oh-i, 'i be nduhúyulhni-un 'ilhiz ch'a bunísjoot.

25 'Et k'us Yak'usda oodune'ne, 'enne bulh tube lhat-un hoonts'i-un dzoh notizut, 'et whuz un'a Moses 'utahahón'ai. 'Atsulayaz lubeshi be hootát'e'-un, 'aw 'et iloh 'utahahón'ai.

26 Christ 'en gha ndunne Egypt whut'enne, 'enne Israel ts'u haindene buch'az yahalhduk. 'Et Moses nja duninzun ndi buch'az yahalhduk-un, 'et Egypt whulerwe daltsuk sooneya, 'i ts'iyawh ban nus yinzoo whe 'unt'oh. Yak'usda 'en nts'en'a la whe och'e'ne buba k'elha whutaleh-un, 'et buba neéonin'ai, 'et huwa 'et dúhoont'oh-un za Moses hukwa itis'en.

27 Yak'usda lhist'en-un, 'en whuz un'a 'ants'i yan'en hukw'un'a 'uja, 'et huwa ooba howa whulna'-un whulh usyin. 'Et huwa be 'alha' hoont'oh-i, 'i be yun k'ut Egypt whuch'a nasja. 'Aw lerwe ye yulh hunilch'e-i, Moses 'aw yé lhníljut.

28 Be 'alha' hoont'oh-i, 'i be Moses ts'iyantsuk Yak'usda k'une' 'ust'en. 'Et huwa ndet la yoh 'uskai' be whe hoodal'en-un, 'et lizas whutus lhuseya. 'Et

huwa yoh 'uskai' be whe hoodat'en-un, 'udechoo whuzdline, 'enne ndun lizas buzoolhghel ait'oh.

<sup>29</sup> Ndi ya too' dulk'un-i, Yak'usda buba lhch'az 'úyinla 'ink'ez yun whudizgih-un whe be 'alha' hoont'oh-i, 'i be hik'ut naníndil. 'Et Egypt ba lhuganne, 'enne cha buba huntizdil whe ts'iyawh too ubanghan.

*'Uda' lhane buba 'alha' hoont'oh-un, 'et whe whuch'a honílhde*

<sup>30</sup> Be 'alha' hoont'oh-i, 'i be Jericho keyoh 'et lhtak'ant'it dzin 'et whunahudidulh whe khunsul hukw'elh'az ndi tse dutai-i whunanilhyo-i nanánkat.

<sup>31</sup> Be 'alha' hoont'oh-i, 'i be ndun 'ul'en-un Rahab huyúlhni, 'en ndunne Moses ba nunúl'i'ne, 'enne bula' tinelh ha duyoh dábininla. 'Et huwa mbene la Yak'usda k'unulhe'ust'enne, 'enne 'aw bubulh dalhital.

<sup>32</sup> 'Awet njan lhe'whultsuk be 'alha' hoont'oh-i k'une' hust'en, ndunne huldai k'et 'aw ts'iyawh bughun nohdósni' ait'oh. Gideon ndet 'uhóonla. Barak 'en cha. Sampson, Jephthah, David, Samuel, 'ink'ez nus hoo'enne, 'enne ts'iyawh,

<sup>33</sup> Be 'alha' hoont'oh-i, lhelhdun keyoh whut'enne, 'enne cha ts'iyawh buch'a hunílhde. Ndet la ts'ih'un un'a 'uhoont'oh-un, be 'alha' hoont'oh-i, 'i be 'uhuhóonla. Ndet la Yak'usda buts'ú hoozi-un, be 'alha' hoont'oh-i, 'i be buch'e' whutaleh t'ehoninzun. Be 'alha' hoont'oh-i, 'i be Yak'usda ndi khunaiti, lion huyúlhni-i, 'i hize lhts'una' hoonla bundólhda whuch'a.

<sup>34</sup> Be 'alha' hoont'oh-i, 'i be kwun dizk'un-i, 'i cha nahinilhno. Yak'usda ch'az ditnine, 'enne oodune'ne, 'enne saluzti be hubuhutighan inle', 'et hoonts'i be 'alha' hoont'oh-i, 'i be buch'a hudujih. Tetsunne, 'enne cha 'i be ulhtusne nahusdli'. Lhuhutigan ts'e hutizdil whe 'et cha be 'alha' hoont'oh-i, 'i be hilhtus suli'. 'Et whuz un'a bubulh lhúhuganne, 'enne cha bubenújut hudan'ai 'et whuz un'a whenábuhunanyoot.

<sup>35</sup> Be 'alha' hoont'oh-i, 'i be whulohne ts'ekoo bughu yaidlanne cha za dunahudidil 'ink'ez bughu nahundil. 'Ink'ez 'uyoonne cha dzoh nubuhulhde, 'et hoonts'i be 'alha' hoont'oh-i, 'i be za didutch'oh 'aw bula nahudutitnih hukwa lhe'hunízun. 'Et whe la 'on nus hoonzoo hukw'un'a dunabudutáleh 'et nahohootá'alh.

<sup>36</sup> 'Et 'uyoonne, 'enne bughu hudlo 'et whe ubuhóolhdzai, 'Et whulohne bubuhoolhtsas. 'Ink'ez whulohne tl'oolh be bubuhulhghel 'ink'ez 'abuhanla.

<sup>37</sup> Whulohne tse be bubahanghan. Whulohne be dugut be buyust'e tánuhidizghut. Whulohne cha ninta' hutit'elh-un whuts'ú bonalht'i. Whulohne saluzti be bubuhanghan. 'Ink'ez whulohne ndai khuna-i zuz, dube te, 'usbai te, 'i ts'iyawh lhenyoo zuz 'i za be dune hinli. 'Ink'ez 'ants'i 'oh nuhudilh. Hik'u khútinah-i, 'i hoonts'i lhuhuyít'i' inle'. Dunene dzoh nubuhulhde. Lhat-un whe hoonts'i' k'un'a ne'bahalh'en.

<sup>38</sup> 'Et ndunt'ohne 'aw ndi yun 'i hoonts'i buba soo lhe'yildzoo'. 'Aw dune lhuhóot'ih-un 'ink'ez dzulh toh te 'oh ho lhelhts'un náhutudulh. Tse 'an te k'us yun 'an te, 'oh huwhut'i.

<sup>39</sup> 'Et ndunne ts'iyawh be buba 'alha' hoont'oh-i, 'et huwa hoonzoo k'un'a bughu yainduk. 'Et hoonts'i ndet la buts'u hoosdzi-un, 'aw butl'alhúhoolzuhl.

<sup>40</sup> Whuz un'a wheni ts'iyawh nús de Yak'usda 'on nus hoonzoo-un neba' 'uhóonla. 'Et whuz un'a ndunne ts'iyawh wheni ts'uhooloh de, ndet whe la Yak'usda buts'u hoozi-un, neyit 'aw ts'ih'un un'a lhadúlyane hoole' ait'oh.

## 12

*Neba 'alha' hoont'oh-i, 'i be lhghu naztoolghas*

1 'Et huwa nohdutásnelh, ndunne ooghun nohdásni'ne, 'enne Yak'usda be 'ut'en k'oh whunénulhtunne, 'enne huldlai k'et, nenat ndúlcho 'ants'i kw'us le'hint'oh. 'Et huwa ndai la 'ants'i neba ndaz-i k'oh nenilht'i-i, 'ink'ez ndi lubeshi 'aw huwa lhúhoolna' whe neilhchuk, 'i ts'iyawh 'un uztoolhdilh. Ndi Yak'usda ba lhghu naztulwus-i, 'i nebut néwhults'ut-i, nelhts'unisi whe uztoolghas.

2 Netso ts'e Sizi Gri uznoolh'en. 'Aw 'en za neba bé 'alha' hoont'oh-un dant'oh la, 'en ts'ih'un un'a whunénulhtun-un 'unt'oh. 'Ink'ez ndi yun k'ut usda-un, 'et ye khuna-i, 'en dúwhulcho whe neba 'alha' hoont'oh-i neba lhaoodulh'ih-un 'unt'oh. Nus de ye whúntalhn-i, oots'u yíkulh, 'et huwa tulalhghus yulh ínyn inle'. Ndai la yugha yooya sul'i-i ooba 'ants'i 'uhoont'oh inle'. 'Ink'ez Yak'usda ookw'uts'uzda cho dizti'-un, 'et naílhni ts'e huwu nátl'adida'.

*Yak'usda khuni yé nebulh yalhduk-i, khun te 'ants'i nohba 'oot'e' junih*

3 'Et Sizi daja la, 'et soo cho huwun nuní noohzut. 'Et ndunne lubeshi 'ulh'enne, 'enne ts'iyawh hich'az ditni, 'et hoonts'i soo whulh ínyn. Nohni cha ts'iyawh 'en za ooghu nuní nahdeh de, 'et whe 'aw nénohtsilh aít'oh 'ink'ez 'aw tehtsun 'oohle' aít'oh.

4 Nohni lubeshi ch'a ne'ah't'en-un, tube nohba huwa whúlna 'et hoonts'i 'aw hukw'e yalhizahdla.

5 'Et Yak'usda khuniti be duye'ke k'un'a nohbulh yalhduk-un, whu-naoodúlhnoh. Ndziz un'a nohMoodihti 'unohúlhni, "Sye'ke khuni be nohbulh yasduk-i oots'u doohtni junih.

Ndet la ninta' aht'ih-un hukwa' nohúlhni de,  
khun yo whú'un 'etsul 'oohneh junih.

6 'Et mbene la neMoodihti buk'entsi'ne,  
'enne ts'iyawh khuniti be bubulh yalhduk.

Mbene la buzke online,  
'enne ts'iyawh uboolhtsas."

7 'Et Yak'usda khuni ulhtus-i be nohbulh yalhduk, 'ink'ez 'aw whulh nuzulhti de, 'et de duzkehke k'un'a nohnulhyeh. 'Et mbe dune suba 'unt'oh oooye' tank'us 'uja de yuts'ahalhoohoos'al?

8 'Et nohni nihiylh whe Yak'usda khuni ulhtus-i be nohbulh yalhduk de, 'ink'ez ts'iyawh whuz un'a 'ilhoghun ts'inli whe uznizyai, 'et 'aw ook'unulhe'zahrt'en de, 'aw nohbá hooloh, 'ink'ez Yak'usda buzkeh lhahloh whé aht'oh.

9 Nja 'on 'un cha nohdusni, ndi yun k'ut nebáke 'enne khuni ulhtus-i be nebulh yahalhduk 'ink'ez buk'úne' ts'ust'en. 'Ink'ez Yak'usda, 'en neyughi ooBá ts'utni-un, 'en neBá 'uk'enus dízti'-un 'unt'oh, 'en 'on nus ootl'a'úzdudooyelh ts'ih'un un'a ndi yun k'ut uzdatalts'ilh huba.

10 Ndi yun k'ut nebáke 'atsulyaz za bubulh 'uts'int'e', ndet la 'uk'enus neba hoonzoo-un, 'et t'ehoninzun, 'et whuz un'a khuni ulhtus-i be nehunilhyai. 'Et hoonts'i Yak'usda neBá, 'en ndet la 'ilhiz wheni neba whutizoo' k'un'a khuni ulhtus-i be nebulh yailhduk. 'Et 'en k'un'a 'on 'un lubeshi neghu hooloh ts'oole' ha.

11 Nts'en'a la ts'ih'un un'a khuni ulhtus-i be nebulh yainduk whe uznizyai, whuloh te whuts'uzdutni, 'et hoonts'i hukw'elh'az 'et whuz un'a uznizya de, 'et de soo ts'ih'un 'unt'ohne dune uztileh whe Yak'usda nalh ts'ih'un un'a lhts'un uztit'elh.

*Yak'usda ooghuni khun te oola doohtnih junih*

12 'Et huwa 'ants'i nénihtsai le'aht'oh whe nohgan naintle 'ink'ez nohgwut cha tetsun suli' de, soo 'on 'un 'oohneh ait'oh whe ulhtus naoolhtselh.

13 Nohke ba ti cha lhts'eoodiz'a nahoolhtselh. 'Et whuz un'a mbene la nohtoh tetsune, 'enne tinch'u hooya' ait'oh, 'et k'us soo hilhtus na'hitileh.

14 Ts'iyanne ts'un ts'ih'un un'a lhts'un 'ooh't'e' hukwa 'ooh't'en. Lubeshi ooghu hoolohne dune oohle' hukwa 'ooh't'en. 'Aw 'et de za neMoodihti uzti'elh.

15 Soo cho nohtoh nohnich'oh nohulhtsinke bughohle! Doo ka si Yak'usda ye unzoo-i hiye nghoya'. 'Et de la whulohne nohtoh nuk'oz hudoole' ait'oh. 'Et ndihínt'oh de, 'et 'enne bugha lhane nuk'oz hudutieleh whe' hooht'oh.

16 Doo ka si nohtoh whulohne, 'uyoonne ts'ekoo k'us dune bulh lubeshi olhchoot whuts'u nooh't'i. K'us Esau k'un'a Yak'usda ooghohtloh. 'En 'udechoo whuzdli-un 'unt'oh 'ink'ez di la oobá yuts'u yoozi-i, 'i ooch'e' yataleh, bubá nahuyoosdzi-i didut oots'itikulh-i, 'i 'uyinla, 'illoh yuti'ulh-i za k'elha yutiz'ai.

17 T'eeonáhzun hukw'elh'az dáhooja. Ndi hoonzoo-un yuk'elh'oti'alh-un hukwa' ninzun, 'et hoonts'i oobá yuch'az náhl'a. Lhat whe huwintse, 'et hoonts'i 'aw oobá dudení nahudunoo'ah ait'oh. Nts'oh dát'en hoonts'i, 'aw hiba lhk'enaóodoo'alh ait'oh.

#### *Yak'uz dilhts'ine buts'un ts'ilwus*

18 Ndiz whuz un'a nohdósn'i hukwa 'ust'en, ndunne Israel buzkehke, 'aw 'enne buk'un'a iloh whe ndi dzulh Sinai\* dune yut'ainaih-i, 'et 'aw whuz ulhtáhyal. Ndi dzulh dulcho dizk'un, 'ink'ez tsahólhgus cha' hooht'oh. 'Ankw'us 'aw hoonli huhoon'en ait'oh, 'ink'ez nilhtsi dus cho cha hoonli.

19 'Et Yak'usda ba be ts'újih-i, 'i cha hudánts'o 'ink'ez Yak'usda yalhduk-un, 'et cha huwhudánts'o. 'Et nyoonne yudánts'one, 'aw 'on 'un hidóts'o hukwa lhe'hunízun. 'Et whuz un'a hits'u tedudli 'aw 'on 'at huwhudutáts'o-un hukwa lhe'hunízun 'et huwa.

20 'Et Yak'usda khuni butl'a ídan'ai-i, 'et 'aw whulh hooyin ait'oh 'et huwa. Khuni nja ndutni, "Khuna-i hoonts'i ndi dzulh yut'aiznai de, 'et de tse be hizoolhghel, k'us k'a za be huyooch'ih."

21 'Et hohon'en whe tube whehúnilhjoot. Moses 'en hoonts'i, "Whenuzjut 'ink'ez dustlut," ni.

22 'Et ndi dzulh ooghun nohuzdáni'-i, 'aw whuz whe lhahtulh. K'us ndi dzulh Zion ts'utni, 'i oots'óozahdil. Yak'usda khuna-un, 'en ookeyoh whuti 'uhoont'oh. 'Ink'ez keyoh whuti Jerusalem ts'uwhtúni. 'Et yak'uz whuz'ai. 'Et lizas huldlai k'et, 'aw uzdooni' ait'oh.

23 'Ink'ez mbene la Yak'usda ooba 'alha' yint'ohne ts'iyanne 'ilhunaoodulh buba whuz'ai. Mbe la 'udechoo whuzdli-un oosdzi-un, 'en mbene la ooch'e' yindline, 'enne yak'uz ts'e buboozi' 'uk'usguz, 'enne cha 'et hudilhts'i. Yak'usda 'en ts'iyanne ba nahiyilh-un, 'en cha 'et usda. 'Ink'ez mbene la ts'ih'un un'a lhadúlyane, 'enne buyughi-i, 'i cha 'et 'unt'oh.

24 'Et Sizi ndi 'andit khuni neba lhaíndinla-i, 'en neba k'elha whulhtsi-un, 'en cha 'et usda. 'Ink'ez ndi 'uskai' neba nadílt'i, 'i be nelubeshi ts'iyawh neba gak suli, 'et ntsen'a la Abel yuzilgh'i whe buzkai' yun nadílt'i, 'i anus hoonzoo-un whunénilhtan, 'et cha 'et whuz'ai. Ndowhi ts'iyawh 'et whuts'u whusalhghaz.

#### *Yak'uz whuts'un nebulh yalhduk-un ts'oozóhts'ai'*

\* 12:18 'Et 'udechoo khuni buba lhaíndinla-i, 'i k'ut whunulh'en Moses dzulh Sinai nusúya-un huwun (Exodus 19:21,22, 20:18-21, Deuteronomy 4:11,12, 5:22-27)

25 'Et Yak'usda nohbulh yálhduk-un, 'et huwun nohbulh yalhduk-un, khun dah doohtni' junih. Soo cho whunulh'en ndi yun k'ut 'et ndúbulhni 'et hoontsi'i 'aw hik'unulhe'it'el, 'et huwa hoolhtus whe buba nahizya. 'Et 'andit yak'uz whuts'un nebulh yalhduk-un, 'en ooch'az náts'ulhya de, 'et 'on nus dáwhultus whe neba nahutideh.

26 'Oh da' Yak'usda bubulh yálhduk whe ndi yun ditlut. 'Ink'ez doo cha za nets'ú hoozi whe nja dútni, "Doo cha za ndi yun dutistlut. 'Aw 'i za iloh, yat cha ndúwhulcho whe whudútistlut."

27 'Ink'ez ndi khuni, "cha za," 'utni-un, 'et ndiz un'a whunénulhtun, ts'iyai ndai la 'ulya-i, 'i ts'iyawh dutitlut. 'Et whuz un'a ditlut-i gak whutaleh. 'Et ndai la 'aw dootlut ait'oh-i, 'i 'ilhiz wheni 'utit'elh.

28 'Et huwa ndet la Yak'usda lerwe unli-un, 'et 'aw nohóhootnah ait'oh. 'Et nets'u whutikulh. 'Ink'ez ndi ye unzoo-i, 'i be si Yak'usda, 'en neba dízti'-un 'ink'ez neba be óonujut-un, 'en ooba ne'ts'oot'en.

29 Wheni neYak'usda kwun ts'iyai dilhk'un-i 'et ndunt'oh whe 'unt'oh 'et huwa.

## 13

### *Ndi yun k'ut lubeshi ooch'az nálhyeh*

1 'Ahoohlhyiz nohulhutsinke buk'eohtsi'.

2 Mbene la whutso da' lhuzih'enne, hoonáht'i' whe nohyoh dáboohlelh. Whulohne lizasne tilah 'uhint'oh 'aw t'eoonuzahzun 'et huwa.

3 Mbene la Sizi Gri unidulhne 'et huwa 'adinlane, bunalhnih 'ink'ez bula 'ooht'en, 'enne bubulh 'ants'i 'adahla léah't'oh 'et huwa. Mbene la be zútlane, 'enne cha whuz un'a noheni toh ubulhdzun. Ts'iyawh 'ilho just'e za' ts'int'oh 'et huwa.

4 Lhghuzdilhts'i-un, ts'iyanne ba' hoont'oh, 'ink'ez whudíziti'. Lhghu dilhts'ine whu'iz whe dulili k'ut duhut'en-un, 'aw lhuhóohtsi' whe' hoont'oh. 'Et hoontsi'i mbe la 'uyoonne ts'ekoo k'us 'uyoonne dune bulh ninta' ut'ihne, 'enne Yak'usda buba nahutiyeh whe' hoont'oh.

5 Nts'en'a la ndi yun dulhts'i-un huwahli. Nda la 'andit aht'i-i, 'on nus 'uyoo ka daohtni junih. 'Et huwa neMoodihti nja dutni, "Aw nohghu toosya' ait'oh,

'ink'ez nohla doosnih ait'oh."

6 'Inka nedzi ulhtus whé 'uzdooni', neMoodihti 'en nela 'ut'en-un 'unt'oh.

Dune danehulh'en 'et hoontsi'i 'aw lhts'unoolhjut.

### *Lhelhts'un un'a hodulh'ehne, 'enne buk'une' 'ooht'en junih*

7 Yak'usda ba 'ilhunaoodulhne mbene la nohtso whudilhdzulhne, 'enne bunaoolhni. 'Enne 'uhint'oh Yak'usda ooguni be nohbulh yáhalhduk. Nts'en'a niz dak'ez ndi yun k'ut hudálhts'i' da' bubulh dáhooja, 'et howu nuní noohzut. 'Enne hiye 'alha' 'unt'oh-i, 'i ook'un'a ne'ooht'en.

8 Sizi Gri 'en hulhda' cha, 'ink'ez 'andit dzin cha, 'ink'ez 'ilhiz wheni, 'et za ndunt'oh.

9 Lhelhts'un un'a 'ink'ez hoontsi' hukw'un'a dune hohodulh'eh, 'enne uboozóhts'ai' 'ink'ez buk'une' 'ooht'en junih. Nda la lizwifne huya'alh-i, 'i 'ants'i unli whe 'unt'oh. 'Et mbene la buk'un'a 'ut'enne, 'aw bula 'e'whudóne' ait'oh. 'Et huwa ye unzoo-i, 'i be whuz un'a nedzi diz'ai de, 'et de za ts'ih'un 'uhoont'oh.

10 Wheni Sizi Gri ooba 'alha' yint'ohne 'uyoo loodel ts'ut'i. 'Ink'ez ndai loodel neba k'ínkat-i, 'i ts'oo'alh huba' hoont'oh. 'Et hoontsi'i mbene la ndi

yun k'ut nimbali cho oot'ah ne'út'enne, 'aw huyoo'alh ait'oh whuz un'a butl'aluhhoolts'ulh.

<sup>11</sup> 'Et lubret 'uk'enus dizti'-un khuna-i uzakai', ndet la 'uk'enus whudizti'-un, lubeshi ba 'et whuz dainikai. 'Et ndi khuna-i oozí, dune whut'i-un, yoo 'az ts'e hidálhk'un.

<sup>12</sup> 'Et whuz un'a za Sizi keyoh whut'i whunanistl'oo datí-un whan 'az ts'e 'et dzoh nuhuyulhdzut. 'Et whe dich'oh duduzkai', 'i be Yak'usda ba 'udun nenéninla.

<sup>13</sup> 'Et huwa ts'uwhut'i-un whan 'az ts'e, nts'e la Sizi Gri 'unt'oh-un, 'et wheni cha 'et 'uts'oot'e'. 'Ink'ez nts'en'a whe yooya huyulhutsi-un, wheni cha ts'uhólhchoot.

<sup>14</sup> 'Et ndi yun k'ut 'aw keyoh 'ilhiz 'uwhutat'elh-un hooloh whe' hoont'oh. 'Et hoonts'i ndet keyoh 'ilhiz 'uwhutat'elh-un, 'et whuz de hoolts'ulh, 'et za hukwa ts'itis'en.

<sup>15</sup> 'Et huwa Sizi Gri boozí' gha 'ahoolyiz Yak'usda musi uzdóni'. 'Et whuz un'a Yak'usda uzdólhti'.

<sup>16</sup> 'Et hoonzoo-un 'uwuhulh'en 'ink'ez ts'iyawh 'alghoh lhla 'aht'en, 'et khun whunaoodoolhnoh junih, 'Et whuz un'a Yak'usda gha whut'aih-un, ts'iyawh 'et tube hóont'i'.

<sup>17</sup> Nohtsó whudilhdzulhne, 'enne buk'une' 'oohten 'ink'ez butl'á' dudoolhyeh. 'Enne nohzul nohba yughundline 'uhint'oh 'et huwa. 'Ink'ez nts'en'a la nohba highunli, 'et whuz un'a Yak'usda but nohba hutiyin. Soo ts'ih'un un'a newhúnah'aih, daht'en-un, 'et huwa ndunne whutso whudilhdzulhne huhót'e' whe Yak'usda ba nohghú hoole' huba' hoont'oh. Khun te nohni nohgha khunani hoodle' junih. 'Et ndaht'en de za, 'et de za nohba hootázoo'.

### *Neba tenadoohdli*

<sup>18</sup> Ts'ih'un un'a t'ets'oninzun neyo ts'e oogha t'ets'oninzun-i 'aw hoonli-unyaz hoonts'i-un whughu hooloh. Whuz un'a za ts'uhootátun hukwa 'uzninzun. Whuz un'a neba tenadoohdli.

<sup>19</sup> 'Et 'on 'un cha nohts'u tédusdli, sba tenadoohdli, 'et de la 'aho Yak'usda nohts'ó t'anasoolhtelh.

### *Ye unzoo-i nohbulh 'óoh't'e'*

<sup>20</sup> 'Et 'awet Yak'usda 'en be nedzi ts'ih'un 'oot'e' negha óonin'ai-un, 'en neMoodihti Sizi Gri buzkai' be neba nadílt'i'-i, 'et huwa yaidlane toh dunaidilhti. 'En 'usbai ghunli ncha-un 'unt'oh. 'Ink'ez ndi 'uskai' 'i be 'ilhiz wheni khuni neba lhaidinla-i whe 'unt'oh.

<sup>21</sup> 'Et Yak'usda soo ts'ih'un un'a lhadulyane nohtilhtselh, 'et whuz un'a nohba tenadutisdlí. 'Et whe Yak'usda nts'en'a nohts'u hukwa' ninzun-un, 'et ts'iyawh ooba 'uwhála. 'Ink'ez ndai Yak'usda Sizi Gri be 'et nohba 'uwuhulh'en-un, 'et 'uhóonla de, 'et whunílhcho whe hootát'e'. 'En za 'ilhiz wheni ooba ts'odólhti'. 'Et ndo honeh.

<sup>22</sup> 'Et sulhutsinke, soo cho nohts'u tédusdlih ndi khuni 'i be la nus nóoh't'i, 'i ts'iyawh soo cho oozólhts'ai' 'ink'ez nohba 'alha' 'oot'e'. 'Et hoonts'i 'aw lhat-un 'uk'elhúwhusug.

<sup>23</sup> Neulhutsin Timothy 'adin'ai-un 'awet tenánja 'et t'ewhunoohzeh hukwa' nuszun. 'Et 'aho whusanája de, 'en bulh nohts'útat'us.

<sup>24</sup> Nohtso whudilhdzulhne cha, 'ink'ez Yak'usda ooch'e'ne, 'enne cha sba hadih budóhni. Yun k'ut Italy whut'enne, 'enne cha hádih nohuhútni.

<sup>25</sup> Nohni ts'iyawh ndi Yak'usda ye unzoo-i nohbulh 'oot'e' nohba hukwa' nuszun. 'Et ndo honeh.

## James Ndi 'Udustl'us 'Uk'unéyuzguz-i, 'I 'Unt'oh

*Mbene la Lizwifne ooba 'alha' hoont'ohne James hadih ubulhni*

<sup>1</sup> Si James, Yak'usda 'ink'ez neMoodihti Sizi Gri ba 'ulhnan-un usdli. Nohni Lizwifne, mbene la Sizi Gri ooba 'alha' yint'ohne, nohkeyoh whuch'a nohonízyootne ahli, ndi 'udustl'us nohts'ó k'esges-i, 'i be hadih nohdúsní.

*Dzoh nuhudeh-un huwa hóhodul'eh*

<sup>2</sup> Sulhutsinke lhat-un whe lhelhts'un un'a dzoh nahzut de, 'et hoonts'i hoonahiti' whe whuz un'a za 'ooht'e'.

<sup>3</sup> T'ewhunáhzun nts'en'a la Yak'usda oot'aninahtan whe lhelhts'un un'a dzoh nahzut, 'et whuz un'a hodoolh'eh soo ulhtus whe núdolhya' 'et huwa.

<sup>4</sup> 'Et hoonts'i nts'en'a la Yak'usda ba ulhtusne sahli', 'et 'alha' soo ts'ih'un un'a ts'iyawh hodoolh'eh. 'Et de la Yak'usda ba lhadúlyane 'oohle'. 'Ink'ez soo ts'ih'un un'a 'ut'en k'oh lhaóodahla. 'Et whuz un'a Yak'usda ba hoonliyaz whuyit lheáhnel.

<sup>5</sup> 'Et nohni whulohne Yak'usda be whútñih-i 'aw ts'iyawh lhaht'ih de, 'et de Yak'usda hika huyoodolhkut. 'Et de la mbene la hika oodulhkutne, ye dánzoo whe bugha ita'alh. 'Ink'ez 'aw yooya boolhtselh ait'oh.

<sup>6</sup> Mbene la yoodulhkutne, bé 'alha' hoont'oh-i be huyoodolhkut. Khun te buba nawh 'uhot'e' junih. 'Et mbene la ba nawh 'uhoont'ohne, 'enne nts'en'a nilhts'i too bubulh nudutun le'hint'oh.

<sup>7</sup> 'Et huwa ndunt'ohne dune khun te neMoodihti 'aw hoonli-unyaz bugha óota'alh hunoozin junih!

<sup>8</sup> Ndunt'ohne, 'enne 'ahoolhyiz nawh 'uhit'elhne hinli.

*Hoonzoo 'unt'ohne 'ink'ez tel'enne cha Yak'usda ba lhgha za' 'uhint'oh*

<sup>9</sup> Mbene la neulhutsin tel'en-un, 'en Yak'usda 'unt'oh-un yulhtsi, 'et huwa hó't'e' huba' hoont'oh.

<sup>10</sup> 'Et hoonts'i hoonzoo 'unt'oh-un duzooneya be do 'údudildzun-un, 'en Yak'usda yo na'yinla, 'et huwa hó't'e' huba' hoont'oh. 'Et t'ewhunónzin nts'en'a la 'índaiyaz dátsaih, whuz un'a za ye hoonzoo 'unt'oh-i, 'i gha khoona' ait'oh.

<sup>11</sup> 'Et sa ha'aih te 'i be tube whúnilwus. 'I be 'índai chun dugih te, bindai nakuk. 'Et lheldzoo' whundoút'en 'et hoonts'i hooloh llih. 'Et whuz un'a za mbene la hoonzoo 'unt'ohne 'awhuz dude 'ut'en 'uhulh'en whe didutch'oh hoonts'i hooloh hutileh.

*Dzoh nuts'uzut 'et hoonts'i Yak'usda ook'ets'intsi'*

<sup>12</sup> Mbe la óolhdzai-un, 'et hoonts'i 'awhuz whulh usyin, 'en 'uk'enus hoonzoo-un oogha whutalts'ulh. 'En 'unt'oh 'ilhez ye khútinalh-un ooghá whunt'ai. Ndet la whuch'a' whunílhde-un, 'et cha oogha whútalts'ulh. Mbene la neMoodihti yuk'entsi'ne, 'et whuz un'a buts'ú hoozi.

<sup>13</sup> 'Ihoghun lubeshi ts'unín'ti de, khun te Yak'usda sóolhdzih dooni' junih. 'Aw Yak'usda ntsi'-i be óldzih ait'oh. 'Ink'ez didutch'oh cha whuz un'a za 'uyoonne hoonts'i' ts'e bunoolht'i ait'oh.

<sup>14</sup> 'Et hoonts'i wheni 'ilhone ts'inli whe whenich'oh hukwa' uzninzun 'et huwa lubeshi 'uztilh'elh-un ts'e whuts'úznint'i.



<sup>15</sup> Nduts'ut'en de, 'et nts'en'a la hukwa' uzninzun k'un'a whe lubeshi 'uts'ulh'ih-un, 'et lubeshi whedit'en. 'Et lubeshi 'uts'ulh'en te, 'et 'i gha dats'útsaih.

<sup>16</sup> Sulhutsinke ook'esi'ne, nanooh't'ah júnih!

<sup>17</sup> NeBá, 'en yak'uz be hoot'en-i ts'iyawh 'uyinla. Ndi be hoot'en-i whuloh te 'uts'un un'a na'ut'ih 'ink'ez tsawhús'ih le'whulh'ih. 'Et hoonts'i neBá 'aw nawh whuninizun-un unli iloh. 'Et huwa dai la ndus de negha whúninla-un, 'et unzoo 'ink'ez soo ts'ih'un 'uhoont'oh, 'i ts'iyawh 'en za ts'u ha whúkat whe' hoot'oh.

<sup>18</sup> Nts'en'a la dich'oh hukwa' ninzun-un, 'et whuz un'a 'uja whe ndi khuni 'alha' 'unt'oh-i, 'et 'i be doo cha ts'uwhezdi. 'Et whuz un'a ndúhooja ndai la 'uyalh'en-i ootoh 'et whe wheni 'udechoo ooch'e'ne ts'uzdli'.

### *Ilhoghun ahli whe 'a cho ohts'o*

<sup>19</sup> 'Et huwa sulhutsinke ook'esi'ne, 'ilhone ahli whe Yak'usda ooghuni soo 'a cho ohts'o. Nánihltsulyaz hukw'u núní nulhzut whe yatulhdih. 'Et khun te hunólhch'eh junih.

<sup>20</sup> Huzáhke de, Yak'usda ye ts'ih'un un'a 'unt'oh-i, 'aw whuz un'a ook'une' 'ooht'en ait'oh.

### *Yak'usda ooghuni ook'une' aht'en 'ants'i oozúhts'ai iloh*

<sup>21</sup> 'Et 'inka ts'iyai whudutsun k'un'a neaht'en, 'ink'ez lhat-un whe tank'us un'a aht'en-un, 'et 'i ts'iyawh whula doohtnih. 'Ink'ez Yak'usda ooghuni nohyudánde-i, 'i nohdzi yo úlhdzun whe ólhchoot. Ndi khuni 'i be za nohtilhyih.

<sup>22</sup> 'Et nohni Yak'usda ooghuni daja ni la, 'et whuz un'a ook'une' 'ooht'en. 'Ants'i oozúhts'ai iloh. 'Et ndaht'en de, nohnich'oh na'dunaht'ah whé aht'en.

<sup>23</sup> 'Et mbene la ndi khuni 'ants'i hidits'o 'et hoonts'i lheyúlhchootne, 'enne ndunt'ohne, 'enne 'uhint'oh, ndai la be na'uzdunul'en 'i be na'hundunul'en, huk'oh ts'e 'uhint'oh.

<sup>24</sup> Dich'oh na'dunul'en, 'ink'ez 'et daoot'en la 'et 'aho whunahoodulneh.

<sup>25</sup> 'Et hoonts'i Yak'usda dughuni lhaóodinla-i, 'i be lubeshi ch'a naneulhti, mbene la 'et soo cho hik'uyalhduk 'ink'ez whunalhuhodulhnoh, 'ink'ez daja ni 'ahoolhyiz hukw'úne' hut'en de, mbene la ndut'enne, 'enne 'et whuz un'a dude 'ut'en k'oh huwa 'ukenus hoonzoo-un bugha whutalts'ulh.

<sup>26</sup> Mbene la nohtoh Yak'usda ba ne'hut'en huninzun, 'et hoonts'i 'aw dughuni gha lhé'oolihne, 'et dich'oh za na'hundunut'ah. 'Et 'ants'et ndunt'ohne Yak'usda ba hut'en-un, 'et 'aw hoonli lhuhóoloh.

<sup>27</sup> 'Et nts'en'a la ts'ih'un 'uhoont'oh, 'ink'ez 'alha' 'uhoont'oh whe Yak'usda neBá, 'en ba né'ts'ut'en-un, 'et nja dúhoont'oh: ts'unohne 'ink'ez tsandilhne, 'enne dzoh nahudeh huwa buzih nuts'oodilh huba' hoot'oh bula ts'oot'en ha. 'Ink'ez cha ndi yun k'ut dawhút'en la lubeshi 'ul'en, 'i gha dutsun 'oohle' junih.

## 2

### *Khun te 'ilhoghun, 'en 'uyoon anus unzoo whe 'unt'oh noohzun junih*

<sup>1</sup> Sulhutsinke, neMoodihti Sizi Gri whudít'i-un, 'en nohba 'alha' 'unt'oh, 'et huwa khun te 'ilhoghun 'uyoonne anus unzoo-un noohzun junih.

<sup>2</sup> Khunsul tilah 'ilhoghun dune nohgluz nohghu danínya whe latult'o dízt'i-i nedúlya, 'ink'ez naih unzoo-i be dune unli. 'Ink'ez 'et za 'uyoon dune, 'en cha yuniyalh. 'En tel'en-un 'unt'oh, 'ink'ez ts'iyawh oonaih 'uts'i-i be dune unli.

<sup>3</sup> 'Et ndun oonaih unzoo-un hoonáht'i' whe, "Njan hoonzoo-un sinda," dahni. 'Et ndun tel'en-un, 'en 'udahni, "'Ants'i njan yun neke zih sinda k'us 'ants'i tedut ti 'et sinyin."

<sup>4</sup> 'Et whuz un'a ndaht'en de, 'et 'alha nohni 'ilhoghun 'en 'uyoon anus unzoo nahzun. 'Et whuz un'a noheni untsi-i be 'uda' ooba nahizahya.

<sup>5</sup> Sulhutsinke ook'esi'ne, soo zúlhts'ai. Ndi yun k'ut t'el'enne, mbene la Yak'usda k'entsi'ne, 'enne 'utahábanla buba 'alha' hoont'oh-i, 'i be hoonzoo 'unt'ohne ubulhtsi. 'Aw ndi yun k'ut be 'uts'int'oh-i iloh. 'Ink'ez nts'e la Yak'usda lerwe unli-un, neBá yut'i-i bugha ítalelh-i, 'et 'i bugha ítakulh. 'Et whuz un'a za mbene la yuk'entsi'ne, 'enne cha bugha ítalelh.

<sup>6</sup> 'Et ndun tel'en-un nohghu ninya whe oots'e' dudulhti'. 'Et hoonts'i hoonzoo 'unt'ohne, 'enne hoonts'i hukw'un'a nuné'nohuhulh'en. 'Ahoohyiz nahíyilh-un but nenóhohugus.

<sup>7</sup> Ndi boozi' unzoo-i, 'i be' nohúhni, 'alha 'i hidulhyoh yalhdruk.

<sup>8</sup> 'Et Yak'usda nelerwe, ndi ooghuni netl'aídan'ai-i neba 'uk'eyánguz-i, 'et nja dutni, "Nts'en'a la nohnich'oh k'enahtsi", 'et whuz un'a za 'uyoonne buk'eohtsi'." 'Et nduht'en de, 'et soo' hoont'oh.

<sup>9</sup> 'Et hoonts'i 'ilhoghun 'uyoon anus unzoo-un nahzun de, 'et lubeshi aha whe aht'oh. 'Et whuz un'a ndi Yak'usda ooghuni netl'aídan'ai-i whunóhnulhtun khuni k'unyisne ahli.

<sup>10</sup> 'Et ndi Yak'usda ooghuni netl'aídan'ai-i, 'i hoontsool-unyaz k'uzninyuz de, 'ants'i ts'iyawh k'uzninyuz 'et za 'uhoont'oh.

<sup>11</sup> 'Et la ndun 'et dutni-un, "Dune k'us ts'eke bulh ninta' 'ooht'en junih." 'En njan cha nja dutni, "Dune solhghelh junih." 'Et nja dúhoont'oh, 'uyoonne 'at bulh ninta' lhe'ínt'el de, 'et hoonts'i dune sílhghih de, 'et ndi Yak'usda ooghuni netl'aídan'ai-i, 'i ts'iyawh k'uninyuz whe' hoont'oh.

<sup>12</sup> 'Et 'inka Yak'usda ooghuni netl'aídan'ai-i, 'i be lubeshi ch'a naneulhti, 'awet nilhdruk whe 'i be nohba nahutideh noohzin. 'Et huwa 'et whuz un'a nohnich'oh lhtoh ts'ih'un un'a lhulh yaoolhdruk, 'ink'ez whuz un'a za ne'óoht'en.

<sup>13</sup> 'Inka ndet dzin suba neba nahutideh-un whusaóotilts'ulh, mbene la lhgha t'elhenízun-un, 'en oogha telhe'whunídzun whe Yak'usda yuba nahutiyeh. 'Et mbe la 'uyoon gha té'ninzun-un, 'en Yak'usda yugha te'untázh whe yuba nahutiyeh.

*Be 'alha' hoont'oh-i 'ut'en unzoo-iyit de, 'aw hoonli lhuhóloh whe' hoont'oh*

<sup>14</sup> Sulhutsinke, mbe la dune 'utni, "Be 'alha' hoont'oh-i 'ust'i," 'et hoonts'i Yak'usda 'aw yuk'únulhé'ust'en de, 'i 'aw ooba lhe'hóozoo' whe' hoont'oh! 'Et ndunt'oh-i be 'alha' hoont'oh-i, soo butilhyih nahzun eh? 'Awundooh!

<sup>15</sup> 'Et neulhutsinke k'us neulhtuske, naih lhuhít'i, k'us 'andit dzin huba hoonts'i, 'aw huyoo'alh-i lhuhít'i' de,

<sup>16</sup> 'et 'ilhoghun nohni nohtoh ubúlhni, "Soo óoht'e' la. Noolhwus la. Soo cho na'ooht'ah." 'Et hoonts'i ndai la hoonli hiye ndunidzit-i 'aw hiye bula lhe'áhnél de, nts'en'a nohba hootázoo'? 'Aw khuni za hik'ukhoona' ait'oh.

<sup>17</sup> 'Et whuz un'a za dune 'utni, "Be 'alha' hoont'oh-i ust'i," 'et hoonts'i Yak'usda 'aw yuk'únulhé'ust'en de, 'aw hoonliyaz lhiloh.

<sup>18</sup> 'Et hoonts'i 'ilhoghun tilah ndiz un'a nja dusúdoni', "Nyun be 'alha' hoont'oh-i int'i, 'ink'ez si 'ut'en 'ust'i. 'Awet nye 'ut'en ooyit be, be mba 'alha' hoont'oh-i whusunilhtun, 'et de la si cha se' 'ut'en be, 'i be la sba 'alha' hoont'oh-un whunyoostun."

<sup>19</sup> 'Ink'ez ndiz un'a cha sudóni, "Yak'usda 'ilhoghun za 'unt'oh." 'Et mba 'alha' hoont'oh, 'et huwa 'ut'en unzoo-i 'ilh'en. 'Et hoonts'i ntsi-i nududeh-i 'enne hoonts'i 'et whuz un'a buba 'alha' 'uhoont'oh whe nujut bulh hudutlut.

<sup>20</sup> 'Et nyun tube whuzini! 'Awhuz eh t'eóonuzinzun? 'Ut'en yit de, 'et de ndunt'oh-i be 'alha' hoont'oh-i, ndi yun k'ut 'aw hoonli lhiloh whe 'unt'oh.

<sup>21</sup> Ndiz un'a nja dúhoont'oh, netso da'-un, Abraham, 'en duye', Isaac, 'en loodel k'eyilhti, Yak'usda ba yutuzilhghel ha. 'Et huwa dude 'ut'en be ts'ih'un dune suli'.

<sup>22</sup> Soo ts'ih'un un'a t'ewhunonzeh, Abraham be 'ut'en k'oh, be 'alha' hoont'oh-i, 'i be 'uja. 'Et be 'ut'en k'oh huwa, be 'alha' hoont'oh-i soo ts'ih'un un'a lhadúlya suli'.

<sup>23</sup> 'Et Yak'usda ooghuni daja ni 'en ghun, 'i ts'iyawh 'uhóonla. Ndiz un'a nja dutni, "Abraham 'en Yak'usda yuba 'alha' 'unt'oh. 'Et huwa Yak'usda ts'ih'un dune inli," yúlhni. 'Ink'ez Yak'usda ook'eke suli'-un, huyúlhni.

<sup>24</sup> T'ewhunúhzun eh? Ndiz un'a nja dúhoont'oh. 'Aw be 'alha' hoont'oh-i gha za iloh whe ts'ih'un dune ts'ulih. Ne-e-'ut'en gha cha, 'et whuz un'a ts'ih'un dune ts'ulih.

<sup>25</sup> Ndun lubeshi 'ulh'en-un, Rahab huyúlhni, 'en dich'oh dude 'ut'en k'oh huwa, dune nalh ts'ih'un 'unt'oh-un suli'. 'Et ndiz un'a ndúja, ndunne Joshua ba khuni na'áne, 'enne dábúninla whe 'et hukw'elh'az 'udun teti-un tenábuninla.

<sup>26</sup> 'Et 'inka nja dúhoont'oh, neyust'e neyughi ooghu whe yooloh de, 'aw lhts'uhínoh. 'Et whuz un'a za be 'alha' hoont'oh-i, 'ink'ez ne-'ut'en k'oh cha ooghu wheyooloh de, 'et be 'alha' hoont'oh-i 'aw hoonli lhuhóoloh.

### 3

#### *Neghuni ooghu lhts'iloh de*

<sup>1</sup> Sulhutsinke nohtoh khun te stalhane dune hodulh'ehne 'oohle' hukwa 'ooh't'en junih. Wheni hodulh'ehne, 'et 'on nus hooncha whe neba nahutideh 'et huwa.

<sup>2</sup> Lhat-un hukw'un'a lubeshi 'uts'ulh'en 'et huwa. 'Et dune dich'oh dughuni be 'aw lubeshi lhilhchulh de, 'en dune soo lhadúlya-un suli'. Duyust'e dulcho whe ts'ih'un un'a né'yulh'en.

<sup>3</sup> Nja howu nuní noohzut, ndi yeztli ooze yuzdla-i ooa ts'uyulih te, nts'oh tula núznulht'i', ooyust'e 'oh túne' 'ut'en.

<sup>4</sup> Nja 'et cha howu nuní noohzut, lubaz ncha-i be ts'ikelh 'ink'ez tube nilhts'i de, 'oh te nulhts'i. Nts'oh ts'i dalcho 'et hoonts'i niz ts'uchus lheltsool-i 'et hoonts'i whuz un'a za yuk'úne' 'ut'en.

<sup>5</sup> 'Ink'ez netsoola lhe'ultsool, 'et hoonts'i hooncha-un howu yalhduk. 'Ink'ez whunulh'en, kwun nt'um-iyaz dik'aih te, dáwhulcho chuntoh be whúdutak'un whe' 'uhoont'oh.

<sup>6</sup> Netsoola 'ants'i kwun le-'unt'oh. Ndaí la khuni ts'ih'un un'a lhe'ít'oh be yats'ulhduk-i, 'i be dubih. 'I be dulcho neyust'e ninta' yulh'ih. Ndi yun k'ut neyust'e whuts'u nint'i-un, 'ants'i kwun k'un'a hoolhtus whulhtsih. 'Ink'ez netsoola 'i kwuncho yo whumoodih, 'en be dik'aih.

<sup>7</sup> 'Et ndi yun k'ut khuna-i didowh-i, dut'ai cha, ndaí la yun k'ut núlh'as-i cha, 'ink'ez ndaí la toot hoonli, 'i cha, wheni ndi yun k'ut dunene, 'i ts'iyawh k'une' ts'ool'en huba' hoont'oh.

<sup>8</sup> 'Et hoontsi'i 'aw 'ilhoghun netoh hoontsi'i, khuni be yats'ulhduk-un, 'aw k'une' ts'uhool'en ait'oh. 'Ahoonlyiz bé hoontsi' tune' uzduni-un 'aw 'et-sul uzdóneh ait'oh. 'Et neghuni lubezo le'unt'oh, 'i be 'uyoonne ts'ughan le'ts'ut'en.

<sup>9</sup> Neze whe Yak'usda neBá tube cho ooba ts'odílhiti'. 'Ink'ez 'et whe za nebulh dunene bubézduyaih, 'enne Yak'usda duk'un'a ubínla, 'enne hoontsi'i neghuni be 'et dúbuts'utni.

<sup>10</sup> 'Et whuz un'a za nawh k'un'a yats'ulhduk. Whuloh te hoonzoo k'un'a neuzduni'. 'Ink'ez whuloh te hoontsi' whe tuné uzduni'. Sulhutsinke 'et 'aw whuz un'a lhe'hóst'e' huba' hoont'oh.

<sup>11</sup> Too unzoo-i 'ink'ez too ntsi'-i 'aw 'ilhoghun za haóoli ait'oh.

<sup>12</sup> Sulhutsinke, ndi duchun fig huyulhni, 'i oomai' olive cha oots'u hanóoyeh ait'oh. 'Ink'ez mai chun, 'i cha 'aw oomai', fig huyulhni, oots'u hanóoyeh ait'oh. 'Et whuz un'a za too dunink'oz-i 'ink'ez too unzoo-i bulh nankult'oh 'ilhoghun za haóoli ait'oh.

### *Yak'usda ye whunih-i 'ink'ez netsudule ye whunih-i*

<sup>13</sup> Mbe la nohtoh whunih-un dune unli 'ink'ez lhat-un t'ewhunínzun? 'Et dunt'óh-un hoonzoo k'un'a nohtoh dune oole'. 'Et whuz un'a oobe 'ut'en k'oh whunih-i be 'ink'ez yo 'ududildzun 'i be tit'elh whe' hoont'oh.

<sup>14</sup> 'Et hoontsi'i nohni 'uk'enus lhghe' oolhnihne aht'oh, 'ink'ez 'ahoolhyiz k'une' tiht'en hukwa' nahzun. 'Et whuz un'a nohdzi diz'ai de, 'et whe óont'e' be howu yaoolhduk junih! Ndet la khuni 'alha' unt'oh-i, khun te huwun hoohts'it junih.

<sup>15</sup> 'Aw ndi be whútlih-i, 'aw ndus de hálhdilts'ulh. K'us ndi yun k'ut hiye whunih-i, 'i 'unt'oh. Nts'en'a la neyust'e whuts'u nint'i-un hukw'un'a 'úhoont'oh. Ntsi'-i nududeh-i, 'en ye whunih-i, 'i 'unt'oh.

<sup>16</sup> 'Et nts'e la 'uhoont'oh dune lhghe' oolnih 'ink'ez 'ahoolhyiz dich'oh za khununi hunudzut, 'et whuz un'a ts'iyawh buba whe' hoont'oh hooyoh dawhúanelh suba, 'ink'ez ts'iyaitsuk hoontsi'-un 'oh 'uwahulh'en.

<sup>17</sup> 'Et hoontsi'i ndus de be whutnih-i ndiz un'a nja dut'en, 'udechoo-i netsun hooloh neilh'i, 'ink'ez nedzi dizghel cha yulhtsi, 'ink'ez nánilhtsulyaz néts'ut'en. 'Et whe 'uyoonne hukwa' huninzun k'un'a bugha ts'úwhunle. Be te'nudzun-i, 'i be uzdutábun. 'Ink'ez 'uyoonne ba cha 'ut'en unzoo-i 'uts'oolh'en. 'Ink'ez ts'iyanne lhgha za nebuts'oolh'en, 'ink'ez 'aw nawh lhe'ts'unizun whe ne'ts'oot'en.

<sup>18</sup> Mbene la 'uyoonne gha ts'ih'un 'uhoot'e' 'et buba hukwa' huninzun, 'i bube 'ut'en gha ts'ih'un un'a buba ne'hoot'en. 'Et de lhane ts'ih'un un'a lhts'un 'uhútit'elh.

## 4

### *'Uduúti'-i, 'i be dune lhdulhyoh nehúwhulyih*

<sup>1</sup> Nohni nohtoh di ha ts'iyawh lhdulhyoh 'udahnih, 'ink'ez lhéhdulh? 'Et nts'ez de hahóolts'ut whe' hoont'oh? Ts'iyanne duk'un'a hukwa' huninzun, 'et whuz de hahóolts'ut whe' hoont'oh.

<sup>2</sup> Tube hoonli-unyaz hukwa' nuhzun 'et hoontsi'i 'aw lhuwháht'ih. 'Et huwa dune sulhghih. Dune ghe' oolhnih 'et hoontsi'i ndet la hukwa' nahzun-un 'aw lhuwháht'ih. 'Et huwa lhdulhyoh 'udahnih 'ink'ez lhédúhdulh, 'ink'ez Yak'usda 'aw ookwa lhe'yooduzulhkut, 'et huwa 'aw lháht'ih.

<sup>3</sup> Yak'usda ookwa oodulhkut 'et hoontsi'i 'aw nohghá yo'alh ait'oh. Hoontsi' hukw'un'a ookwa oodulhkut. 'Ants'i nohnihch'oh nohba hoonzoo hukwa' nahzun te, bé ne'tiht'en, 'et huwa 'aw nohghá yo'alh ait'oh.

<sup>4</sup> Nohni dune 'ink'ez ts'ekoo lhulh ninta' aht'ihne léaht'oh, soo zúlhts'ai, ndi yun k'ut hoontsi' túne aht'en-un, 'et za hoonáht'i' de, 'et de Yak'usda ch'az ditnine ahli. 'Et huwa mbene la ndi yun k'ut hoontsi' tune' tit'en hukwa' ninzunne, 'enne Yak'usda ch'az ditnine na'hududulhtsi.

<sup>5</sup> Yak'usda ooghuni 'ants'et 'et lhe'dusni whe nja dutni "Ndoni neyudinda-un, 'en tube cho 'uyoonne neba halhe'nizun."

<sup>6</sup> 'Et Yak'usda lhan 'un ye unzoo-i negha ínin'ai, 'inka ndiz un'a ooghuni nja dutni,

"Mbene la 'ududílti'ne,

'enne Yak'usda budulhyoh 'unt'oh.

'Et hoontsi'yo údudildzunne,

'enne ye unzoo-i bugha yú'aih whe 'unt'oh."

*Be yo 'uzdudildzun-i, 'i ndi yun k'ut hoonli za ghu nuni uznuzut de, 'et whuch'a' ulhdeh*

<sup>7</sup> 'Et huwa ts'iyantsuk whe Yak'usda ook'une' 'ooh't'en huba' hoont'oh. Netsudule, 'en oodulhyoh 'oohyin, 'et de nohghu nátsetilyalh.

<sup>8</sup> Yak'usda benghoh nenahya de, 'et de Yak'usda didut cha nohenghoh netiyalh. Nohni ninta' ut'ihne, 'et whuch'a nohla tunáhgus. Nohni nawh ninidohne, nohdzi ootsun hooloh naoohltselh.

<sup>9</sup> 'Et dáhja la, 'et nohnich'oh tube cho yoo yo 'ududolhdzin! 'Ink'ez howuni 'oohle! 'Ndet la hoontsi'-un howahdloh-un, 'et 'etsul'udóhnh, 'et huwohtso! Be hóonaht'i'-i, 'i ts'iyawh whuladohtni, 'ink'ez nohdzi undooda'.

<sup>10</sup> NeMoodihti oobut yo 'ududoolhdzin, 'et de la nohdólhti'.

### *Nyulhutsin ooba nahonyeh junih*

<sup>11</sup> Sulhutsinke lhdulhyoh yaoolhduk junih! Mbe la dulhutsin dulhyoh yalhduk-un 'ink'ez yuba nahizya de, 'en Yak'usda dughuni netl'aídan'ai-i, 'i yudulhyoh yalhduk whe 'utni. 'I yanus unzoo na'dunúdzun. 'Et ndint'en de, 'aw Yak'usda khuni netl'aídan'ai-i, 'aw kw'unulhe'zint'en, 'ants'i Yak'usda k'un'a nahiyilh-un 'int'oh na'dunínzun.

<sup>12</sup> 'Aw 'ilhoghun za 'unt'oh ndi khuni netl'aídan'ai-un. 'Aw 'ilhoghun za dune bulhyis-un k'us kwuncho yo ts'e butilh'alh. 'Et huwa mbe inli na'duninzun whe 'uyoonne ba nahanyilh?

### *Bunde datánt'elh-un whe 'ont'e' junih*

<sup>13</sup> 'Ink'ez nohni ts'iyawh soo zúlhts'ai. Whulohne diz un'a tilah nja dudóohtni, "Bunde k'us 'om bun tilah nguz keyoh ts'uztidulh, k'us nguz tilah 'uts'ooneh. Whuz 'ilheyus k'ut whuz uzdutált's'ilh, whuz la sooneya lhai 'uts'ooleh."

<sup>14</sup> 'Et hoontsi' bunde 'aw dawhútanelh-un t'eóonuzáhzun. Be kháhna-i, 'i ndai whé 'unt'oh? 'Ants'i lhut lé'unt'oh. 'Atsulyaz za ndo whe dudoh, 'ink'ez gak lih.

<sup>15</sup> 'Et k'us ndiz un'a nja dudóohtni' huba' hoont'oh, "NeMoodihti hukwa' ninzun de, 'ink'ez 'awhuz ts'ukhuna de, 'et de ndi k'us ndi, 'et whuz un'a nja dúztinelh."

<sup>16</sup> 'Et 'awet nohni 'ududílti'ne ndet 'ududíti' be yalhduk, 'et ndi ts'iyawh hoontsi' whe' hoont'oh.

<sup>17</sup> 'Et 'inka mbe la t'ehoninzun ts'ih'un un'a ne'hoot'en huba' hoont'oh, 'ink'ez ndulhúhust'en de, 'et de ooba lubeshi 'uhoonli.

<sup>1</sup> 'Et nohni hoonzoo' 'unt'ohne soo zúlhts'ai. Dawhultsi'-un nohts'u hóokulh, 'et huwa tube cho ahtso 'ink'ez 'alhdzul.

<sup>2</sup> Whe soo dah'a-un, 'et ts'iyawh holhjut. Nohnaih 'i hoonts'i 'i cha musdziyaz ts'iyawh ya'alh.

<sup>3</sup> Nohgold 'ink'ez silver 'i bulh, 'i ndulcho k'enáditsan. 'Ink'ez ndi k'enáditsan-un, 'et whe nahohootá'alh dant'ohne ahli. Ndi ndai la kwun gak ilh'i-i, 'et whuz un'a ndaht'en-un ninta' nohtálh'elh. 'Et 'udek'ez dzin 'et huba 'aohli!

<sup>4</sup> 'Et tl'o nohba nadulhdzóohne, 'enne cha ts'iyawh bube' whulhts'it. 'Et huwa nohch'a tsó yahalhduk. 'Ink'ez mbene la nohba whut'ásne, 'enne cha whuz un'a za 'ubulh'en. 'Ink'ez Yak'usda, mbe la ts'iyantsuk whuMoodih unli-un, 'en nohch'a húnahutso whe ts'iyawh budánts'o.

<sup>5</sup> Nohni hoonzoo' 'unt'ohne, ndi yun k'ut hoonah't'i-un za 'uwulh'en, 'ink'ez hoonzoo hukw'un'a za dune ahli. 'Et nohni 'et ts'iyawh hukwa' nahzun tune' aht'en. 'Et nts'en'a la musdoos nats'uzulghih te whutso 'et naznulhk'oh, 'et whuz un'a za nohni cha 'et ndaht'en.

<sup>6</sup> Mbene la ts'ih'un un'a 'ut'enne, 'enne nohni buk'éwhah'ai, 'ink'ez 'et whe ubahghan, 'et hoonts'i 'aw k'úlhonidzun, nohnich'oh hukwa' nahzun huwa 'áht'en.

#### *Dzoh nahdeh-un nohba huwa whúlna 'et hoonts'i whulh sahyin*

<sup>7</sup> 'Inka sulhutsinke neMoodihti whusanátidalh whuts'un, 'et huba sulh'ih. Soo zúlhts'ai, ndun dune haníyeh 'ulh'en-un, ndi hafnulhyeh-i, 'i soo 'úlcho tileh whuts'un, sa' whe yuba sulh'i. 'Olulh 'ink'ez dak'et naootilhtelh-un, 'et huba sulh'i.

<sup>8</sup> Nohni cha neMoodihti whusanatidalh-un, 'et whuz un'a za huba oolh'e', 'ink'ez nohdzi soo cho ulhtus óolh'e'. 'Awet neba nilhdukw sulí' 'et huwa.

<sup>9</sup> Sulhutsinke lhch'a ne'doohtni' junih, doo ka si nohk'éholts'it. Nulh'en Yak'usda, nahiyilh-un, 'en dati usyin 'et huwa.

<sup>10</sup> Sulhutsinke ndunne nus hoo'enne, mbene la neMoodihti boozí' be yalh-dukne, 'enne dude 'ut'en k'oh huwa dzoh nuhúde de, 'et hoonts'i neMoodihti datinelh la, 'et huba hilh'i. 'Enne bugha hodoolh'e!

<sup>11</sup> Soo zúlhts'ai, mbene la howa whúlna' hoonts'i whulh huzyin, 'enne 'uk'enus hoonzoo-un bubulh 'úhooja buts'utni. 'Et ndun Job ts'utni, 'en cha nts'en'a la dzoh nusuzut, ooba howa whúlna' hoonts'i whulh ínyin. 'Ink'ez nts'en'a la neMoodihti tube yugha te'nanzin, 'ink'ez hukw'elh'az hoonzoo 'unt'oh-un yutl'anáhon'ai, 'et ts'iyawh whulh údahts'oh.

<sup>12</sup> 'Ink'ez sulhutsinke ndi 'uhoot'oh-un 'unohdúsi, 'et hoonliyaz dune ts'u nahizinya de, khun te yak'uz whunalh 'udúsi k'us ndi yun k'ut whunalh 'udusni, k'us 'uyoo khuni be, whuz un'a te yatoolhdih junih. 'Et k'us, "A," dutihnelh de, 'ants'i, "A," doohtni'. 'Et, "Dah," dutihnelh de, 'et cha, "Dah," doohtni'! Doo ka si nohba nahoodeh.

#### *Lhla ts'oot'en*

<sup>13</sup> Nohni nohtoh dzoh nuzutne hoonli de, 'enne tenahudoodli. 'Ink'ez nohtoh hoont'i'ne hoonli de, 'enne cha shun 'i be Yak'usda hudólhti'.

<sup>14</sup> Nohni nohtoh tetsunne hoonli de, mbene la Yak'usda ba 'ilhunaoodulhne nohtso whudilhdzulhne, 'enne 'anih budóhni'. 'Ink'ez la ndi khe neMoodihti boozí' be 'i ndun tetsun-un, 'et ookw'ut ububoolhtlo 'ink'ez hiba tenadoodli.

<sup>15</sup> 'Ink'ez be 'alha' hoont'oh-i, 'i be la tenadoodli. 'Et de la tetsun-un soo na'ootneh. 'Et de la neMoodihti do ná'yooleh. 'Et de la lubeshi ut'i de, 'i yuba whunawhudoolnoh.

<sup>16</sup>Lhts'un tank'us aht'en de, lhudóhni 'ink'ez lhba tenadoohdli. 'Et ndaht'en de, 'et de la soo na'oohneh. 'Et ts'ih'un dune, 'en ts'ih'un un'a whe tenadudli de, 'et whuz un'a ootenadudli gha lhat-un hooncha túne' whutit'en 'et huwa.

<sup>17</sup>'Et Elijah ts'utni-un, 'en wheni nek'un'a dune unli inle'. 'En 'uja soo chan ch'a tenadidli. 'Et tat yus k'ut 'on 'at lhúhoolcho, 'et 'aw nalhúhoolhtel, ndi yun k'ut.

<sup>18</sup>'Ink'ez doo cha za tenadidli whe chan 'ants'i yak'uz ts'e hájulh 'Et yun doo cha za mai ook'ut hananyai.

*Tank'us nínt'i-un nahundunooya' ha oola'oohneh*

<sup>19</sup>Sulhutsinke nohtoh 'ilhoghun khuni 'alha' 'unt'oh-i yuch'a nasja de, 'et nohtoh neMoodihti ghu nainilhti de,

<sup>20</sup>'en 'et nduja-un, 'et nja dudóhni, "Mbe la lubeshi 'ulh'en-un, be 'alha' nudzun-i 'ants'i yuch'a nasja de, ndújan-un neMoodihti ghu nainilhti de, 'en ndi yun k'ut datítsah-un whuch'a nayulhti whe 'unt'oh. 'Ink'ez 'en gha 'ants'i lhat-un lubeshi ookw'é'imbai le'tinelh."

## 'Udechoo 'Udustl'us Peter 'Uk'eyánguz-i

### *Lizwifne lhelhdun keyoh whut'enne huzdli', 'enne Peter hadih ubulhni*

1 Si Peter Sizi Gri 'en gha whel'a-un usdli. Nohni Lizwifne bukeyoh whut'enne ahli inle'. 'Awet lhelhdun keyoh whut'enne sahlí'. Pontus, Galatia, Cappadocia, Asia, 'ink'ez Bithynia 'et cha. 'Et 'óh ho ndulcho whe 'atsulyaz whuba nenáhtna. Yak'usda ba 'utahályanne aht'oh. 'Et huwa nohni nohts'o k'e'isguz.

2 Yak'usda neBá nus whudizulh-un ts'iyawh t'ooninzun. 'Et huwa 'utahályanne aht'oh. Ndiz un'a nohba 'et 'úhooja, Ndoni Yak'usda ba 'udun nenóhniinla Sizi Gri ook'une' tíht'en ha, 'ink'ez buzkai' nohba nadílt'i 'i be nohclubeshi ts'iyawh nohba gak suli'. Ye unzoo-i 'ink'ez Yak'usda ts'un be ts'ih'un aht'oh-í, 'i lhan 'un te nohgha óokat.

### *Yak'uz ts'e neba 'et 'uzdla-un*

3 Yak'usda, Sizi Gri neMoodihti oobá, 'en uzdíhtí'. Hooncha whe negha te'nanzin et whe nanehíllhna'. 'Et huwa hoonzoo-un hukwa tse ts'úhole' huba' hoont'oh. Sizi Gri 'en yaidlanne butoh dunadija. 'Et huwa wheni cha 'ilhiz ts'ukhutinalh-un, 'et hukwa tse ts'úhooli.

4 'Andit 'awet neBá yut'i-i negha italelh-i, 'i cha wheni neba 'unt'oh. 'Aw oohljut ait'oh. 'Aw nts'i' cha oole' ait'oh, 'ink'ez dutoodeh ait'oh. 'I 'uda' yak'uz ts'e nohba 'et whuzdla.

5 Mbene la Yak'usda ye ulhtus-i be búghudli, 'ink'ez hit'anínintanne 'et whe whéhudutijih-un huhootáhlhchulh. 'Et 'udek'ez dzin de, yak'uz ts'e 'et neba whuzdla-í, 'i ts'iyawh ts'et haóotikulh 'et wheni lhaóodint'oh.

6 'Et whe whunílhchoh hoonáht'i'. 'Et hoonts'i 'andit 'atsulyaz wheni tilah lhelhdun whe dzoh nahzut-un, 'et whe nohóolhdzi.

7 'Et whuz un'a dahoont'oh whe nohba 'alha' hoont'oh-un, 'et nohba 'on nus hoonzoo tileh. Nts'en'a la gold kwun 'i be 'uzoo' huyulhtsih, 'et whe soo ts'ih'un oozai za lhih, 'et hoonts'i 'i cha hooloh tileh. 'Et nohba 'alha' hoont'oh-un gold anus whudízti' whe' hoont'oh. 'Et whuz un'a za 'oh de de ndet dzin Sizi Gri nenalhts'et be hóodiltsai de, 'et de la bé nohba 'alha' hoont'oh-un huwa Sizi Gri nohba whudutáhtí', 'ink'ez ooba hooncha tileh.

8 Sizi Gri 'aw lhuzih'en 'et hoonts'i ook'ehtsi'. 'Aw lhuzih'en 'et hoonts'i nohba 'alha' 'unt'oh. 'Ink'ez ndi be ts'uhooht'i-i ncha k'et 'aw uzdooni' ait'oh, 'ink'ez tube dízti' whe 'unt'oh. 'Et huwa hoonáht'i'.

9 'Udek'ez dzin de nohba 'alha' hoont'oh 'et whe nohzul dutijih whe' hoont'oh.

10 Nduhne Yak'usda be nus hon'enne, 'enne ndi ye unzoo-i nohts'u hóolts'ulh-un, 'et huwun nus huhon'en. Njan whézdujis-un, 'et huwun 'et soo ts'ih'un 'uk'enus huwa' hooli whe nahahootá'ah hukwa' hut'en.

11 'Oh da' Christ ooyughi buyudinda 'ink'ez 'uwhutanelh whutso, 'en bugha yalhduk nts'en'a la Christ dzoh nutizut, 'et hukw'elh'az ooba hooncha tune' tí't'en-un 'uwhutanelh. 'Et nduhoont'oh-un nkede njan 'et nduwhutanelh, 'ink'ez nts'en'a 'uwhutanelh, ndunne nus hon'enne nahahootá'ah hukwa' hut'en.

12 'Ink'ez ndunne nus hoo'enne, 'enne Yak'usda whubunilhtan 'aw 'enne buba lhe'hoot'oh. 'Et k'us wheni za neba nus húhon'en. 'Et 'awet mbene la khuni unzoo-i be yalhdukne, 'enne Ndoni yak'uz ndus de hál'a'-un, 'en be



nohodáni'. 'Ink'ez nduhoont'oh-un, 'et lizasne, 'enne hoontsi'i nahahootá'alh hukwa' huninzun.

*Yak'usda neBá, 'en ook'un'a za 'uts'oot'e'*

<sup>13</sup> 'Et huwa noheni lhadáhle. Nohnich'oh duba whutihnih. 'Et whuz un'a ye unzoo-i nohts'u tihkulh, 'et whulatoh whuts'un ooka tse hóohli. Ndet dzin 'utilnelh Sizi Gri nenalhts'et be hóodutaltsilh. 'Oh de de njan whézdújis-un, 'et nohgha whútalts'ulh.

<sup>14</sup> 'Ts'oodunne k'un'a 'uk'une' 'ut'enne oohle'. 'Aw niz de ha 'íht'en, Yak'usda t'enuzahzun, 'et huwa hoontsi' ts'unáht'i. 'Aw 'on 'un ndóht'en junih.

<sup>15</sup> 'Et hoontsi'i 'awet mbe la dutihjih ha nohka' dani'-un, 'en nts'en'a la lubeshi ooghu hooloh, nohni cha ndaht'en-un la 'en ook'un'a za toohdilh.

<sup>16</sup> 'Et huwa whuz un'a 'uk'ehóguz whe nja dutni, "Si lubeshi ooghu hooloh-un 'ust'oh. 'Et huwa nohni cha 'et dóht'e' huba' hoont'oh."

<sup>17</sup> 'Ilhoghun ts'inli whe nts'en'a la dats'it'en-un, neBá 'aw lhdítni whe neba nahutiye. 'Inka 'en ts'un za tenadahdli de, soo cho khahdli. 'En be nulhjut whe ndi yun k'ut 'oh whuya lhóhdilh.

<sup>18</sup> 'Oh da' ndet la nohdusneke whunohodalh'e-un, whulohkhun 'aw hoonliyaz luhooloh inle'. Silver, gold nduwí, 'i be iloh Yak'usda nanohoket. 'I ts'iyawh hooloh tileh 'et huwa.

<sup>19</sup> 'Et hoontsi'i Christ buz kai' dizi'-i, 'i be naneoket. 'En 'usbaiyaz 'aw hoonli-unyaz bulhodí'oh k'un'a 'unt'oh.

<sup>20</sup> 'Alha 'uda' ndi yun 'utilnelh, whutso da' Sizi Gri daóotanelh-un 'uda' t'ewhunínzun. 'Et njan 'udek'ez dzin nohba whuz'ai-un, 'et 'andit nohba ts'et hahóolts'ut.

<sup>21</sup> 'En gha Yak'usda oot'anahtan. 'En 'uja yaidlanne butoh dunaidilhti 'ink'ez ye dizi'-i, 'i cha yugha nín'ai. 'Et de la Yak'usda oot'anahtan, 'ink'ez ndet la hukwa tse hooohli-un, 'et Yak'usda 'en gha ts'iyawh oosawhútilts'ulh.

*Khuni 'ilhiz 'unt'oh-i*

<sup>22</sup> 'Ndoni 'en be ndai la khuni 'alha' 'unt'oh-i, 'i ook'une' aht'en, 'i be la nohdzi 'aw lubeshi ooghu hooloh sulhtsi. 'Et la nohdzi ndulcho-i be ooba 'alha hoont'ohne buk'ehtsi'. Nohdzi 'aw lhdítsun whe 'ilhoghun ahli whe soo cho lkh'eohtsi'.

<sup>23</sup> 'Yak'usda ooghuni 'i be doo cha za nawhuzáhdli. Nedusneke gha 'ilhiz ts'ukhoona' ait'oh. 'Ink'ez Yak'usda ooghuni 'i be za 'ilhiz ts'ukhutinálh whe' hoont'oh.

<sup>24</sup> 'Et huwa ndi khuni nja dutni, "Ts'iyanne tsuk 'ants'i tl'o le'hint'oh.

Ndi tl'o 'atsulyaz 'unt'oh.

'Ink'ez dune ye dizi'-i,

'i oomai' le'unt'oh.

Ndi tl'o bisdai dugih 'ink'ez nakuk.

<sup>25</sup> 'Et hoontsi'i neMoodihti ooghuni 'ilhiz wheni 'et diz'ai."

'Et ndi khuni 'i khuni unzoo-i be nohbulh yainduk, 'i 'unt'oh.

## 2

<sup>1</sup> 'Inka 'uyoonne ts'un noheni untsi'-i, whuts'it be yalhduk-un, 'ink'ez duba na'ahzoo'. 'Ink'ez 'uyoonne ghe oolhni, 'ink'ez khuni untsi'-i be yalhduk-un cha, 'et ts'iyawh 'ilhiz wheni whuladoohtnih.

<sup>2</sup> 'Andit ts'oodunne whuzdline lilet 'i za hika dátni, nohni cha 'enne buk'un'a ndi khuni ts'ih'un 'unt'oh-i, 'i za ookwa daóohtni 'on nus ulhtus tihleh ha.

<sup>3</sup> NeMoodihti daldzoo' la 'et nawhah'ai de, 'et de ndi khuni 'i za ookwa daóhtni.

*Sizi Gri 'en 'utahayálhti-un, 'ink'ez wheni cha 'utaháltine 'uts'int'oh*

<sup>4</sup> Sizi 'en 'unt'oh tse khuna-i dult'oh. Lizwifne, 'enne 'uhiyinla lhane 'un hitizno le'huja. 'Et hoonts'i Yak'usda 'utahayálhti-un 'ink'ez 'en tube dizti' whe 'unt'oh. 'En za oots'u tóohdilh.

<sup>5</sup> 'Ink'ez nohni cha tse khuna-i, 'i k'un'a 'aht'oh. 'Et whuz un'a Ndoni 'en lugliz whucho nohni nohbé' whulneh. 'Ink'ez 'en be nohni Yak'usda ba lubretne 'aht'oh. 'Et whe ndai la Ndoni nohts'o hukwa' ninzun-un, 'et Sizi Gri 'en be ndai la Yak'usda ooba soo' yint'oh-i, 'i oogha íóhlelh.

<sup>6</sup> 'Et huwa Yak'usda nja dutni whe 'uk'unusguz, "Whunulh'en, nohni keyoh Zion whut'enne, 'et koontl'at tse,

soo 'uk'enus ookwa dahotni-i 'et nédis'ai.\*

'En 'utahasti, 'ink'ez dizti' whe 'unt'oh.

'Et 'alha' hoont'oh mbene la buba 'alha' yint'ohne, 'aw yooya hoole' ait'oh."

<sup>7</sup> 'Et huwa mbene la nohba 'alha' hoont'ohne, nohba dizti' whe 'unt'oh. 'Et hoonts'i mbene la hik'unulhe'ust'enne, 'enne bughun nja dutni, "Ndunne yoh 'uwuhulh'enne ndi tse 'un hidutl'uz le'huja, ndi koontl'at tse soo 'uk'enus ookwa dahotni-i sulí."

<sup>8</sup> 'Ink'ez njan cha nja dutni,

"Ndi tse 'i hit'az nunughalh

'ink'ez 'i be 'ahoolhyiz buba dzoh llih."

Yak'usda ooghuni hik'unulhe'ust'en, 'i gha nónuughalh. 'Et whuz un'a Yak'usda buba' hóonla.

<sup>9</sup> 'Et hoonts'i nohni dune 'utahályane ahli. Yak'usda lerwe oolubretne ahli. Yak'usda ooch'e'ne aht'oh. Nohni oodune' 'unt'ohne ahli. 'Onghohne, 'enne ts'ih'un un'a daldzoo' whe 'unt'oh, ts'iyawh budutáhnelh ha. 'Awhuz tsalhgus yo dulhts'i whe 'anih nohdáni', oots'u toohdilh ha. Oogha ít'en-i be hoot'en-i 'et 'uhoont'oh.

<sup>10</sup> 'Uda' Yak'usda oodune' lháhloh inle'. 'Et 'andit Yak'usda oodune' sahli'. 'Uda' 'aw bé nohgha te'whunizeh-i lhulhchulh inle'. 'Andit 'awet bé nohgha te'whunizeh-i nohghant'ai.

*'Udun yun k'ut whut'enne toh ts'ih'un un'a yinka dólhst'i'*

<sup>11</sup> Nohni ookw'esi'ne ahli, ookeyoh hoolohne k'un'a, 'atsulyaz za ndi yun k'ut ahdulh. 'Et huwa nts'e la nohyust'e whuts'u nint'i-un, whuyit 'ooht'e', 'et hukwa nohts'u tédusdli.

<sup>12</sup> 'Udun yun k'ut whut'enne toh ts'ih'un un'a yinka dólhst'i'. 'Et whe la nohch'az ditnine, 'enne hoonts'i tune' aht'en nohohútnei, 'ink'ez 'ut'en unzoo-i ahla 'et honilh'en de, 'et de nkede Yak'usda dune toh nutiyalh, 'et huwa 'on nus hoonzoo k'un'a hidutálhti'.

*Nts'en'a la dune ne'hutit'en-un 'uk'ehonguz-un, 'et ts'iyawh whuk'úne' 'ooht'en*

<sup>13</sup> 'Inka neMoodihti, 'en gha nts'en'a la dune ne'hutit'en-un 'uk'ehonguz-un, 'et ts'iyawh whuk'úne' 'ooht'en. Dant'ohne dune hinli 'et hoonts'i, buk'une' 'ooht'en. Mbe la lerwe unli-un, soo 'udetso whudilhdzulh-un, 'en cha ook'une' 'ooht'en.

\* 2:6 Sizi ndi tse 'i dult'oh whe 'untoh.

<sup>14</sup> K'us ndi yun moodihne, 'enne cha. Nduhne, 'enne lerwe ba whel'a'ne 'uhint'oh. 'Et whe la mbene la hoontsi'-un 'uwhulh'enne, 'enne lerwe ba bube' whutilhya. 'Et hoonzoo-un 'uwhulh'enne, 'enne budutálhti'.

<sup>15</sup> 'Et whuz un'a Yak'usda hukwa' ninzun-un, ts'ih'un un'a ne'aht'en de, 'i be la whusni be yalhdukne buze whudána'doh'ahl.

<sup>16</sup> Sizi gha lubeshi ch'a nasdilne aht'oh. 'Et hoontsi' 'et whut'anínahtan whe nohba 'ants'i hoonli whe lubeshi 'oolh'en junih! 'Et k'us Yak'usda be 'ulhnane k'un'a yinka dólhtsi'.

<sup>17</sup> 'Ink'ez ooba 'alha' hoont'ohne, 'enne ts'iyawh soo cho budólhti' 'ink'ez buk'eoohsi'. Yak'usda be noohjut 'ink'ez lerwe 'en cha dólhti'.

*Nohni 'ulhnane nohmoodih bube núlhtut whe butl'a' dudoolhyelh huba' hont'oh*

<sup>18</sup> 'Et nohni 'ulhnane nohmoodih bube núlhtut whe butl'a' dudoolhyelh huba' hoont'oh. Unzoone 'ink'ez soo ne'ut'enne, 'enne za iloh buk'úne' 'ooht'en. 'Aw ts'ih'un lhe'it'ohne, 'enne hoontsi' buk'úne' 'ooht'en.

<sup>19</sup> Ts'ih'un 'aht'oh 'et hoontsi' dzoh nunóhohulhdeh de, 'ahoolhyiz Yak'usda ghu nuni nahzut-un huwa nohba 'ants'i hoonli whe dzoh nahdeh de, 'et Yak'usda ba hoonzoo whe' hoont'oh.

<sup>20</sup> 'Et huwa tank'us un'a ahja de 'et hukwa yanohahulhtsus de, 'tezahnih whe whúlhchoot de, di suba nohgha óokat? 'Et hoonzoo-un 'uwhulh'en 'ink'ez 'ants'i nohba hoonli whe hukw'elha dzoh nahzut de, 'et Yak'usda ba hoonzoo whe' uhoont'oh.

<sup>21</sup> 'Et ndiz un'a za Yak'usda notso' hukwa' ninzun. 'Et Christ 'en cha neba dzoh nusúzut. 'Et whe 'en ook'un'a bune'úznoot'en ha whunénilhtan. 'Et huwa 'en za butso'untodilh huba' hoont'oh.

<sup>22</sup> 'En 'aw lubeshi lhe'ilel,  
'ink'ez 'aw whuts'it-i be yalhulhduk.

<sup>23</sup> 'Et khuni untsi'-i be hiyulh yalhduk 'et hoontsi' 'aw khuni untsi' be butso'un k'ulhditnel. 'Oh da' dzoh nusúzut whe, 'et hoontsi' 'aw bubulh lhe'oonílhjoot. 'Et k'us mbe la soo ts'ih'un un'a nahiyilh-un, 'en yutl'a' dudilti.

<sup>24</sup> Nelubeshi didutch'oh duyut'e be tulalhgus ts'ú yoozdla. 'Et huwa 'aw 'on 'un nelubeshi nemoodih oole' aht'oh. 'Et de la ts'ih'un un'a ts'ukhoona'. Ooka k'et 'et whe ts'iyawh soo ná'ts'ulya.

<sup>25</sup> 'Antsi' 'usbaiyaz ninta nilh'az-i le'aht'oh inle'. 'Et 'andit mbe la 'usbai ghunli le'unt'oh-un 'ink'ez nezul ghúndli-un cha, Sizi 'en 'unt'oh, 'en ooghu nanahdil.

### 3

*Nohni ts'ekoo nohkike buba nyo 'udúdoohlhdzin*

<sup>1</sup> 'Et nohni ts'ekoo 'et whuz un'a za nohkike buba nyo 'udúdoohlhdzin whe butl'a' dudoolhyelh. Whulohne Yak'usda ooghuni hik'únulhe'ust'en whe bu'atke, nts'en'a 'uhint'oh huwa tilah khuni yit hoontsi' dudeni náhondunoooleh.

<sup>2</sup> Dálhdzoo' la 'ink'ez Yak'usda enulhjut-un, 'et whuz un'a nohonilh'en de, 'et huwa la dudeni náhondunoooleh.

<sup>3</sup> Yoo 'az ts'e daóoh't'en la, 'et whuz un'a za iloh. Nts'en'a la nohtsigha' dalhdzun, k'us gold nédulhya, k'us khusulhya te 'ulhdzun-i, k'us naih unzoo-i be dune ahli de, 'ohwhi ts'iyawh 'ants'i 'unt'oh.

<sup>4</sup> 'Et k'us nts'en'a la nohdzi yo dáhoont'oh la, nohyo ts'e nts'en'a la t'ewhudusnih 'ink'ez soo ne'aht'en, 'et 'i be soo nadaht'ih le'hoont'oh. 'Et 'ohwhi Yak'usda oonalh whudízi' whe' hoont'oh.

5 'Et niz de haóodanzut nduwulhyiz whe ndunne ts'ekoo Yak'usda ooch'e'ne, 'enne Yak'usda t'aníhunantan, 'enne cha soo cho soo nahudut'ih. Dukike butl'a' hududilya.

6 Whuz un'a za Sarah Abraham yuk'une' 'ust'en whe, "Smoodih" yulhni. Nohni cha 'aw whelhnulhjut whe 'ut'en unzoo-i 'ulh'en de, 'et de nohni cha Sarah k'un'a 'utiht'elh. 'Et whuz un'a nohkike butl'a' dudoolhyelh.

*Nohni dune noh'atke ts'ih'un un'a ne'boolh'en*

7 Nohni cha dune noh'atke ts'ih'un un'a ne'boolh'en whe buzih dulhts'ih, 'ink'ez ubudólhti'. Soo náhtsayaz whe ne'boolh'en lhihíltus whe 'hint'oh 'et huwa. 'Et ndi 'ilhiz be ts'ukhutinálh-i nohghant'ai nanúlht'oh be áht'oh 'et huwa. 'Et dúlhaht'oh de nohtenadudli-i Yak'usda 'aw yoozóhts'ai ait'oh.

*K'unóohdzin junih*

8 'Et njan 'udek'ez-un nohdutásnelh. Nohni ts'iyawh noheni 'ilho za oole'. Lhgha te'nohdzin 'ink'ez ooba 'alha' hoont'ohne ts'iyawh lhk'eoohsi'. Lhts'un nohdzi oozoo' 'ink'ez soo cho lhts'úk'eke oohle'.

9 'Et khun 'uyoonne nohts'un tank'us 'uhuninzun de, khun te k'unóohdzin junih. 'Uyoonne nohch'az yáhalhduk de, nohni khun buch'az yaóolhduk junih. K'us 'ants'i khuni unzoo-i be za bubulh yaóolhduk. T'eeonáhzun 'et whuz un'a Yak'usda nohts'o húkwa' ninzun. 'Et de la Yak'usda yut'i-i, 'i nohghá holts'it.

10 Ndz un'a 'uk'ehonguz whe nja dutni,

"Mbene la 'andit khuna-un hóont'i'ne  
'ink'ez dzin totsuk ba hoonzoone,  
'et ndunt'ohne mbene la 'et whuz un'a hukwa' ninzunne,  
'enne hoontsi' túnulhe'hudoosni,  
'ink'ez khuni whuts'it-i be yalhuhoolduk.

11 Hoontsi' tune' hut'en whuch'az náhoolyeh

'ink'ez 'ut'en unzoo-i za 'uhoold'en.  
Be ts'ih'un un'a lhts'un 'uts'oot'e',  
'et za soo cho hukwa' hoot'en huba' hoont'oh.

12 'Et 'alha neMoodihti mbene la ts'ih'un 'unt'ohne,

'ahoolhyiz bughunli.  
Hits'u tedudliht totsuk uboozilhts'ai.

'Et hoonts'i mbene la lubeshi 'ulh'enne,  
'enne huske be bunilh'en."

*Ts'ih'un un'a aht'en hukw'elha dzoh nahdzut de, 'et 'uk'enus hoonzoo-un nohgha whútalts'ulh*

13 Ndet la hoonzoo hukw'un'a aht'oh de, 'et de mbe 'utinelh nohunduntálhdah?

14 'Et hoonts'i ts'ih'un un'a aht'en hukw'elha, huwa dzoh nahdzut de, 'et 'uk'enus hoonzoo-un nohgha whútalts'ulh. 'Ink'ez nohé' hoonulhjoot de whénoohjut junih, k'us huwuni oolhle' junih!

15 'Et hoonts'i Yak'usda neMoodihti, nohdzi be soo 'uk'enus dólhti'. 'Et whuz un'a mbe la nohoodutalhkut ndet hukwa tse hoolhli-un, 'et huwa 'ahoolhyiz khuni lhadóolhdzin. 'Et hoonts'i soo ts'ih'un un'a bunulh'en 'ink'ez soo cho ne'bulh'en whe budóhni'.

16 'Et lubeshi nohghu hooloh de, 'et 'uyoonne hoontsi' k'un'a nohch'az yáhalhduk, 'et hoonts'i t'ehoninzun Christ, 'en be hoonzoo hukw'un'a whe ndi yun dúlhts'i, 'et de la hukwaya hoole'.

17 'Et Yak'usda, hukwa' ninzun de, 'ut'en unzoo-i huwa dzoh nahdzut de, 'et nohba hoonzoo whe' hoont'oh. 'Et hoonts'i tank'us un'a aht'en-un huwa dzoh nahdzut de, 'alha 'aw nohba lhe'hóozoo'.

*Christ neba dzoh nusuzut-un, 'i be whuts'odul'eh*

18 Christ 'en cha dich'oh 'ilhoh za nelubeshi k'elha dzoh nusuzut. 'En ts'ih'un 'unt'oh 'ink'ez wheni 'aw ts'ih'un un'a lhe'ts'it'oh. Whuz un'a neba 'et ndúja whe Yak'usda ts'u néootaleh ha. 'Enne ooyust'e hizilzhgi 'et hoonts'i Ndoni be ooyust'e nakhít'na'.

19 'Ink'ez cha 'en be nts'e la nududehne 'ahudinla ts'e, whuz buts'u whinya 'ink'ez ndet whe buts'u hóolts'ulh-un huwun ubulh yailhduk.

20 Nduhne, 'enne 'uhint'oh 'oh da' 'aw hik'únulhe'it'el inle'. 'Et 'oh da' Noah ts'i cho whe' yudilh'en. 'Et nduw'hulyiz Yak'usda ubulh dzoh nuzut, 'ink'ez bubailh'e'. 'Ink'ez whulohne 'alhgoh lhk'udine, 'aw 'enne za, too butighan whuch'az hudujih.

21 'Et ndiz whuz un'a huwa' t'ets'onanzin. 'Et whuz un'a za too be' ts'ulya-un whézdutih. 'Aw neyust'e tsun buna'ts'ulhde, whuz un'a iloh. 'Et k'us yak'usda ts'oodulh'kut hoonzoo-un neyo ts'e oogha t'ets'oninzun-i whudo'a, 'et whuz un'a uzdujih. Sizi Gri dunadja-un, 'et 'uhoont'oh.

22 'En, 'aw 'en za yak'uz whenaja 'ink'ez 'andit Yak'usda yughu nailhni ts'e usda. 'Ink'ez ndunne lizasne, 'udedone, 'enne 'onghohne hiye óolhtus ha, 'enne cha, 'ink'ez mbene la ye ulhtus-i 'ut'ine, 'enne ts'iyawh 'alhgoh Sizi Gri hik'une' oot'en huba' 'ubínla.

## 4

1 'Inka Christ, duyust'e 'i be neba dzoh nusuzut. 'Et huwa nohni cha noheni ulhtus oolh'e' whe 'en k'un'a nuni noohzut. Mbene la dich'oh duyust'e be dzoh nudehne, 'enne ts'iyawh lubeshi 'onidulh-un 'etsul 'uhuja 'et huwa.

2 'Et whuz un'a dawhuldzoh ndi yun k'ut neba whuz'ai, 'aw 'uyoonne buk'un'a lubeshi ts'úlhnoost'i huba' hoont'oh. 'Et k'us Yak'usda nets'o hukwa' ninzun-un, 'et whuz un'a ts'ukhoona' huba' hoont'oh.

3 'Alha niz de haóodanzut whuts'un, 'udun yun k'ut whut'enne hukwa' huninzun tune' hust'en, 'et wheni cha 'et whuz un'a za 'et duts'it'en. 'Et 'awet sóo hooldzoh 'et duts'it'en. 'Et 'oh da' 'ut'en dutsun-i 'uts'alh'en, neyust'e whuts'u nint'i, 'ink'ez nzoodi 'i be lhtoh 'uts'it'en, 'ink'ez 'ahoolhyiz ts'ekoo too' buznidulh whe taznutnai inle', 'ink'ez 'uk'eltsi neba 'alha' 'unt'oh-un 'et huwa wheni cha ndet la neba whuch'a oonijoot-un, ts'iyawh lhtoh eduts'it'en.

4 Nduhne 'udun yun k'ut whut'enne buba whe' hoont'oh hooyoh dáhoont'oh huwa 'etsul ahja. 'Aw 'on 'un zoodu'i bubulh lhé'tuzilh'el. 'Ink'ez 'aw 'on 'un lahoot'oh te bubulh nulhe'zaht'en. 'Et huwa hoontsi' k'un'a noghu yahalhduk.

5 'Et nahiyilh-un 'awet lhaduja. Mbene la yaidlanne 'ink'ez khunane cha, hibut netidulh buba nahutiye ha. Dahit'en-un, 'et ts'iyawh hidutánelh.

6 'Et huwa ndunne dahútisah whutso 'enne khuni unzoo-i be bubulh yailhduk. 'Et whe nts'en'a la khunane buba nahutiye, 'et whuz un'a za 'enne cha buba nahutiye. 'Et whe nts'en'a la Yak'usda khuna, 'enne cha 'et whuz un'a buyughi khutínalh.

*Ne-e'ut'en be Yak'usda uzdólhti'*

7 'Et 'awet ndi yun whulatoh nilhdukw suli'. 'Inka nohnich'oh duba whahtnih 'ink'ez 'ahoolhyiz khahdli. 'Et whe la soo ts'ih'un un'a tenadoohdli.

8 'Et njan soo 'uk'enus hooncha-un 'uhoont'oh. Soo ulhtus-i be lhk'eoohsi'. Nts'en'a la dune tank'us nunóhulh'en whe nohundulhda de cha, 'et hoonts'i whutus buk'eoohsi' huba' hoont'oh.

9 Nohdzi hoont'i' whe dune ts'u daóohzoo'.

<sup>10</sup> 'Ilhone ahli ndi ndai la Ndoni nohgha ínin'ai-i, 'i be lhla 'ooht'en. Ndi Yak'usda ye unzoo-i lhat-un lhents'un un'a nohghant'ai. 'Et whe 'uyoonne soo cho whuz un'a buba ne'ooht'en.

<sup>11</sup> Mbene dune yatilhdukne, 'enne Yak'usda k'un'a yahoolhduk huba' hoont'oh. Mbene 'uyoonne dune ba ne'út'enne, ndai la ndi ye ulhtus-i Yak'usda bugha ínin'ai, whuz un'a 'uyoonne buba né'hoot'en. 'Et whuz un'a ts'iyanne Sizi Gri 'en be Yak'usda hidólhti'. Sizi Gri 'ilhiz wheni 'ink'ez 'ilhiz wheni, 'en 'on nus uzdólhti' 'ink'ez ooba' hoont'oh-un, 'en ts'iyawh 'en ooch'e' 'uhoont'oh. 'Et ndo honeh.

*Dzoh nuts'uzut-i, 'i be Yak'usda dóti'*

<sup>12</sup> Ook'esi'ne 'uyoonne bugha dzoh nahzut-i, 'et whe óolhdzi, 'ants'i kwun k'un'a be dáhtnih. Nohbulh 'et dúhooja de, khun te ndiz un'a nohbulh 'et dulhótasnel noohzin junih.

<sup>13</sup> K'us ndai la Christ whe dzoh nusuzut-un, 'et whuz un'a za dzoh nahzut de, 'et de soo cho hóht'e'! 'Et whe Christ ye dizti'-i, 'i nohnalsh ts'et hahóolts'ut de, 'et de la tube cho whunólhni.

<sup>14</sup> 'Et Christ bunihdulhne ahli huwa nohodilhtsi' de, 'et de soo 'uk'enus hoonzoo-un 'uda' nohbulh 'úhooja. Yak'usda ooyughi ye dizti'-i, 'i 'ilhiz wheni nohbulh 'unt'oh 'et huwa. 'Et ndunne, 'enne hich'az yalhduk, 'et hoontsi' nohni dúlhti' whuz un'a ooghu yalhduk.

<sup>15</sup> 'Et dudulh dune ughánne, k'us 'undunut'ihne, k'us tank'us it'elhne, k'us 'uyoonne 'ahoolhyiz dahóot'en la buhútni, 'enne ts'iyawh 'et ndunt'ohne, khun te 'enne buk'un'a ne'óoht'en junih. Doo ka si buk'un'a dzoh nohzut.

<sup>16</sup> 'Et hoontsi' mbe la Christ oodune 'online 'ink'ez 'et huwa dzoh nuhúzut de, khun hukwaya hoole' junih! 'Et k'us njan huwa Yak'usda hidólhti'.

<sup>17</sup> 'Awet neba whusahóolts'ut, mbe la Yak'usda ooyoh ts'inline, 'alghoh neba nahutiye. 'Et whenich'oh neba nahutiye de, 'et de ndunne Yak'usda ooghuni unzoo-i daja ni hukwa lhe'nízunne, 'enne dahóoneh suba?

<sup>18</sup> Ink'ez nja dutni,

“Ts'ih'un un'a 'unt'ohne tube buba howa whulna' whe hudutijih.

'Et ndunne Yak'usda lhodilhti'ne

'ink'ez lubeshi 'ulh'enne,

'enne dahútinelh nahzun?”

<sup>19</sup> 'Et de mbene la Yak'usda hik'úne' 'ut'enne hukwa dzoh nuhuzut de, 'ut'en unzoo-i 'uhoohl'en. 'Et whuz un'a Yak'usda hiye khuna-i buba ghole'. 'En 'uja ts'iyaitsuk inla 'ink'ez 'aw neladootnih ait'oh.

## 5

*Nohni dune tso whudilhdzulhne, soo cho bughahli*

<sup>1</sup> Nohni Yak'usda ba 'ilhunaoodulhne, mbene la nohtoh 'utso whudilhdzulhne, si cha nohbulh 'ilhoghun 'ust'oh. 'Ink'ez Christ, 'en dzoh nusuzut da', si cha 'et hoos'en. 'Ink'ez ndai la ndi ye dizti'-i 'awet nilhdukwn nenalhts'et haootilts'ulh, 'et huwa si cha sulh 'uwwhutanelh. 'Et huwa khuni ulhtus-i be njan nohdutásnelh.

<sup>2</sup> Yak'usda be 'usbaine butoh dúlhtsi, 'enne buba 'usbai ghundline oohle'. 'Uyoonne nanóhonuyoot 'et huwa 'et dóht'en junih. Nohnich'oh hukwa' nahzun huwa 'et bughohle'. Nohba k'elha whutale noohzin junih, nohnich'oh hoonáht'i' huwa 'ooht'en.

<sup>3</sup> Noht'ályanne bumoodih cho oohle' junih. 'Et ndunne 'ilho. nuyehne, 'enne bunalh ts'ih'un un'a 'ooht'en, 'et de la 'enne cha nohk'un'a 'uhoot'e'.

<sup>4</sup> 'Et ndun Sizi Gri 'usbai ghundline butso whudilhdzulh-un, ndet la ne-nalhts'et haínya de, 'et de ndi whudíziti'-un whuch'a oonúhde-un, 'aw gak nahodle' ait'oh, 'et nohgha óotalts'ulh.

*Yak'usda ootl'a' dudulhye 'ink'ez netsudule ooch'az dahtni*

<sup>5</sup> 'Et whuz un'a za nohni niyilhne mbene la yoo 'un udohne, 'enne butl'a' dudoolhyelh. 'Alha nohni cha ts'iyawh whuz un'a lhtl'a' dudoolhyelh. Be yo úzdudildzun-i, 'ants'i naih k'un'a bé dolhts'i'. Ndiz un'a 'uk'ehonguz whe nja dutni,

"Ndunne 'ududílti'ne,  
'enne Yak'usda buch'az ditni.  
'Et hoonts'i mbene la yo údudildzunne,  
'enne ye unzoo-i bugha yú'aih."

<sup>6</sup> 'Et huwa Yak'usda soo cho oobut yo 'údudulhdzun. 'Et de la whusahóolts'ut de nohdólhti'.

<sup>7</sup> Ndet la huwu ni ahli-un, 'et ts'iyawh Yak'usda ootl'awháhle. 'Ahoohlizyiz nohghunli 'et huwa.

<sup>8</sup> Duba whahtnih 'ink'ez soo cho huwahli! Netsudule, nohch'az ditni-un, 'en ndi khuna-iti, lion ts'utni, 'i k'un'a nohtunudúlgho. Mbene ninta' butalh'elh 'enne bukunúta.

<sup>9</sup> Yak'usda oot'anínohtan whe ndun ooch'az dohtni. T'eeonáhzun ndet la dzoh nahde, ndi yun k'ut ndulcho whe ooba 'alha' yint'ohne, 'enne cha whuz un'a za dzoh nuhudeh.

<sup>10</sup> 'Et Yak'usda, ye unzoo-i, 'i ts'iyawh yulh 'únt'oh, 'i gha Christ Sizi neba daja la-un, 'et huwa uzdutijih ha neka' dani'. 'Et huwa 'ilhiz wheni yak'uz whudiziti' ts'e uzdotalts'ilh. 'Et hoonts'i 'atsulyaz dzoh nutihdoh. 'Et hukw'elh'az dich'oh soo cho lhanóhdutileh. 'Et ulhtus nóhtilhtselh 'ink'ez yoh ook'u whuz'ai-i k'un'a 'aw nahóohtnah ait'oh nohtilhtselh.

<sup>11</sup> Yak'usda 'en ts'un ye diziti-i 'ink'ez ts'iyawh ye ulhtus-i, ts'iyawh ooch'e 'unt'oh. 'I 'ilhiz wheni 'ink'ez 'ilhiz wheni, 'et ndo honeh.

*Nohni ts'iyawh nohdzi unzoo-un nohbulh 'uhot'e'*

<sup>12</sup> 'Et neulhutsin, Silvanus ts'utni-un, 'en oot'aníwhunintan-un unli, daja nohdasni'-un, 'en sba za 'uk'uneyúzguz. Khuni ti be ndi Yak'usda ye unzoo-i, ts'iyawh huwun nohdásni'. 'I be núdulhya, 'ink'ez 'i soo ts'ih'un un'a 'alha 'unt'oh.

<sup>13</sup> 'Et keyoh Babylon, ndun ts'eke 'en cha nohbulh 'utahálti-un 'unt'oh, 'en cha hadih nohúlhni. Mark sye' k'un'a 'en cha hadih nohúlhni.

<sup>14</sup> Lhk'ehtsi' be nalhadahts'oos, 'i be hadih lhudahtni. Mbene la Sizi Gri yulh 'unt'ohne, nohni ts'iyawh nohdzi unzoo-un nohbulh 'uhot'e'. 'Et ndo honeh.

## Bulh Nanki 'Udustl'us Peter 'Uk'eyánguz-i

*Yak'usda soo hoolhtus whe yulh suyinne, Peter hadih ubulhni*

<sup>1</sup> Si Simon Peter Sizi Gri 'en be' 'ulhna-un 'ink'ez whel'a'-un cha usdli. NeYak'usda neulhyis-un Sizi Gri, 'en ye ts'ih'un un'a 'unt'oh-i, 'et 'i be njan be 'alha' hoont'oh-i dízti'-i, 'et nohni cha 'ink'ez wheni cha 'alhgoh neghalts'ut. 'Et huwun nohts'o k'e'usges.

<sup>2</sup> Yak'usda 'ink'ez Sizi neMoodihti, soo ts'ih'un un'a 'en ooghun t'ets'oninzun-un, 'et 'i be Yak'usda ye unzoo-i 'ink'ez ye ts'ih'un 'unt'oh-i, 'i lhan'un te nohgha óokat.

<sup>3</sup> Nts'en'a la Yak'usda ba ndi yun k'ut uzdolts'i' ha, Yak'usda dich'oh whéulhtus-un, 'et 'i be nduwulcho negha óonin'ai. 'En ndet ooghun t'ets'oninzun 'i gha, neghá whults'ut. 'Et whe ndai la Yak'usda ye dízti'-i 'ink'ez 'aw hoonliyaz whanus hoonzoo-un hooloh, 'et whe 'uzdutijih huwa neka' dani'.

<sup>4</sup> 'Et 'i be njan khuni k'us hooncha-un 'ink'ez khuni dízti'-un, 'et whulh nets'u náhizya. Njan 'et huwa Yak'usda dant'oh la, 'et nohni cha whuz un'a za ook'un'a 'óoht'e'. 'Et whe la ndai la ndi yun k'ut ntsi'-i netilhtselh-i, 'et ndi yun k'ut whut'enne 'et za whuts'ó nint'i, 'et nohni 'uda' ts'iyawh ooch'a nasahdil.

*Sizi Gri 'en ooghun t'eeonihzin-un, 'i be la 'on nus soo nóohyeh*

<sup>5</sup> Njan 'et soo 'et huwa, 'et 'uda' Yak'usda nohba 'alha' 'unt'oh, nohdzi ndulcho-i be ndiz whuz un'a cha 'ooht'e'. Ts'ih'un un'a dune unzoone oohlle, 'ink'ez 'on nus cha Yak'usda t'eenoozh.

<sup>6</sup> Hoontsi-un whuch'a khohdle', 'ink'ez howa whulna' hoontsi' whulh oohyin. 'Ahoohlyiz Yak'usda ooghu nuní noohzut, 'ink'ez ooba whudólhti'.

<sup>7</sup> Yak'usda ooba 'alha' yint'ohne buk'eeohtsi', 'i cha, 'ink'ez be lhk'ets'utsi'-i, 'i be lhk'eeohtsi'.

<sup>8</sup> 'Et ndi ts'iyawh 'et ndaht'en de, 'ink'ez 'i be 'on nus ulhtus lhez de, 'et de la ndi la neMoodihti Sizi Gri 'en ooghun t'eeonihzin-un, 'i be la 'on nus soo nóohyeh, 'ink'ez nohe'ut'en soo ts'ih'un un'a 'oot'e'.

<sup>9</sup> 'Et mbene la Sizi Gri ooba 'alha' yint'ohne, 'enne ndi nja dulhúhust'en de, 'enne nilhdukwyaz za húhoo'en le'hint'oh 'ink'ez 'ankw'us huhooş'en le'hint'oh. 'Ink'ez niz dak'ez bulubeshi huyalh'en-i, 'uda' Yak'usda ts'iyawh bubunayalhde inle, 'et whunahodilhnoh.

<sup>10</sup> 'Inka sulhutsinke nohdzi ndulcho-i be 'ink'ez 'on 'un cha, 'et nts'en'a la dutihjih ha nohka' dani', 'ink'ez 'utahalyane ahli soo ts'ih'un un'a njan 'et whunaooodolhnoh junih. 'Et ndi ts'iyawh 'i be whuz un'a ndaht'en de, 'et de 'aw ntoohghalhit'oh.

<sup>11</sup> Ndiz un'a neMoodihti 'ink'ez neulhyis-un Sizi Gri, nts'e la 'ilhiz wheni lerwe unli-un, 'et hoonzoo whe nohba dáha'dutikwus.

*Peter 'awet datítsah-un*

<sup>12</sup> 'Et huwa njan ts'iyawh t'eeonáhzun 'ink'ez khuni 'alha' 'unt'oh-i, 'i cha úlhchoot whe soo cho oohtun. 'Et hoontsi' nohdásni'-un 'ahoolhyiz lhk'uz te nohnalhts'et hanáwhus'aih.

<sup>13</sup> 'Et t'eeonúszun 'awhuz khusna 'et whuts'un, nohdásni'-un nohba whunaznih 'ink'ez nohnalhts'et nunáwhus'aih. 'I be la hooohnih oohle'.

<sup>14</sup> T'eeonúszun 'awet nilhdukw whe datítsah. Nts'en'a la datísah-un, 'et neMoodihti Sizi Gri whusunilhtan.



<sup>15</sup> 'Inka 'on 'un oosneh ait'oh-un 'et hukwa 'ust'en, 'et dust'en-un 'et huwa la dasúsai hukw'elh'az njan hodilh'e'-un ts'iyawh la whunaoolhnih.

*Yak'usda ooch'e'ne, 'enne nts'en'a Ndoni hubunulhtun yahutilhduk-un, 'et whuz un'a za yahalhduk whe 'uk'ehónguz*

<sup>16</sup> 'Et neMoodihti Sizi Gri, 'en ye ulhtus-i 'ink'ez whusanatidalh-un cha, 'et whunohuznilhtan. Tube whunist'i be yalhdukne, 'enne 'et whuz un'a whulohne ts'ih'un un'a khuni lhe'it'oh-i 'uhulh'en. 'Enne buk'un'a iloh wheni whunoh uznulhtun. 'Et k'us 'oh da' whenich'oh 'et nena be hooncha whe oots'u hayanduz-un, 'et cha ts'onalh'en.

<sup>17</sup> 'Et 'oh da' 'uhooja-un, neBá Yak'usda duYe' yudilh'ti 'ink'ez dádziti' whe 'unt'oh, 'et whunénilhtan. K'us hooncha-un, 'en ooch'e' 'uhoont'oh, 'et dich'oh duYe' yugha oonin'ai. Ndiz un'a nja duhooja. Yak'uz ts'e whe 'uk'enus hooncha-un, 'et Yak'usda ooghuni ndus de hadilts'ut whe 'et dutni, "Ndun 'en sYe' ookw'esi'-un, 'en 'unt'oh. 'En gha tube hoonúst'!"

<sup>18</sup> 'Oh da' dzulh k'ut whudiziti'-un 'et, 'en bulh nuts'udilh whe ndi ooghuni, 'i yak'uz ts'e hadilts'ut-i, 'i 'uzdánt's'o.

<sup>19</sup> Ndi Yak'usda be nus hoo'enne bughuni, 'i 'uk'enus oot'az 'uhoont'oh. 'Et ndi khuni soo cho ulhchoot de, 'et de 'uk'enus nohba hootázoo'. Nts'en'a tsahóh'gus-un kwun be hoot'en, 'et ndi khuni nohba 'et dunt'oh. Christ, sum cho ts'utni, 'en whusanátidalh, 'oh de 'et dúhooja de, nohdzi ndulcho-i be ndi khuni olhchoot.

<sup>20</sup> Ndi soo 'uk'enus hooncha-un t'ewhunoozhze huba' hoont'oh. Yak'usda ooghuni nus t'eznanzin-i, ndet 'uwhulhni-un, 'aw dune didutch'oh duk'un'a na'huyooleh ait'oh.

<sup>21</sup> 'Et ndi khuni 'i be nus t'eznanzin-i, 'aw dune didutch'oh hukwa' huninzun whuz un'a iloh whe neba 'uk'ehónguz. 'Et k'us Yak'usda oodune'ne, mbe la ooch'e'ne, 'enne nts'en'a Ndoni hubúnilhtan yahutilhduk-un, 'et whuz un'a za yahalhduk whe 'uk'ehónguz.

## 2

### *Khuni whuts'it-i be whubodulh'ehne*

<sup>1</sup> 'Et 'oh da' 'uhooja-un ndunne whuhuts'it whe nus hoo'enne, 'enne cha dune toh hudilhts'i inle'. 'Ink'ez whuz un'a za khuni whuts'it-i be whubodulh'ehne, 'enne cha nohtoh hudutáts'ilh. Ndunne whu'iz whe khuni whuts'it-i, bé nohba 'alha' hoont'oh-i, 'i musai hitilhtselh hukwa' hutit'elh, 'et whuz un'a whunohodutilh'eh. NeMoodihti, mbe la naboket-un, 'en hoonts'i hits'oodutádlai. Mbene la whuz un'a dune hodulh'ehne, 'enne la 'ilhudzin de Yak'usda ye huske-i, 'i khunsul bugha whútalts'ulh.

<sup>2</sup> 'Ink'ez khuni duwhuts'it-i be lhane nahunti'ah bubuhuntoodilh ha. 'Et huwa 'enne bugha 'uyoonne njan Yak'usda buznidulh-un, 'et ts'uwwhuts'it whe ts'ut'en, hudutinelh.

<sup>3</sup> 'Uyoonne ch'e' ha' huninzun 'et whe bughuni whuts'it-i be nohgha há' hunduntat'o. 'Et hoonts'i Yak'usda mbe buba nahutiye-un, 'uda' buba lhadint'oh. 'Ink'ez 'en 'unt'oh ye huske-i bugha whúta'ah, 'en 'aw lhitoh whe 'unt'oh.

### *Dune nana'ahne Yak'usda dabutilelh la*

<sup>4</sup> 'Oh da' whuz un'a za nja dúhooja, nyoonne lizasne lubeshi inlane, 'enne Yak'usda 'aw buba whulalhdítne. 'Et huwa tsak'et whut'ah hooloh-un, Tartarus ts'utni, whuz ts'e whéballhdil. 'Ink'ez whuz ts'e tsalhgus yo buba nahutiye whuts'un lhuztih tl'ool be whénumbudizguz.

<sup>5</sup> 'Ink'ez yooniz de haóodanzut da' whuts'un 'uda' yun k'ut whut'enne, mbene la Yak'usda ghu nuni lhnuszutne 'ink'ez 'aw lhaahidilhti'ne, 'enne cha 'aw buba whulalhdítneel. 'Enne bugha ndi yun k'ut ndulcho whe too didilht'o 'ink'ez too hubangan. 'Oh da' lhk'udine 'aw 'enne za 'et whuch'a Yak'usda ubulhyih. Too didutálht'o whutso Noah, 'en Yak'usda ye ts'ih'un un'a 'unt'oh-i, 'i be dune ubulh yailhduk, 'en bubulh 'ilhoghun 'unt'oh.

<sup>6</sup> 'Ink'ez nat-un keyoh Sodom 'ink'ez Gomorrah huwhútni-un, 'et nawhult'oh kwun nailhtan whe whudálhk'un 'ink'ez lhez gaih za whulhtsi. 'Et whuz un'a musai ubulhtsi 'et whe buba nahizya. Nus de mbene la Yak'usda highu nuní lhuntiszutne 'ink'ez 'aw lhaahidutálhti'ne, 'enne huwa t'éhonozin ha 'inka' hóonla.

<sup>7</sup> 'Ink'ez ndun ts'ih'un dune Lot huyúlhni-un, 'en keyoh whuduták'un whutso 'et whuch'a Yak'usda oolizas huyúlhyih. Mbene la butoh inda'ne, 'enne bube 'ut'en k'oh whudutsun-un huwu ni inle'.

<sup>8</sup> 'En dune ts'ih'un 'unt'oh-un, 'en 'oh da' butoh inda' inle', 'et 'ahoolhyiz 'aw khuni k'únulhe'hust'en whe whunilh'en-un 'ink'ez whudits'o-un, ndóohoot'oh-un huwa dzoh nuná'dudulhdzut.

<sup>9</sup> Mbene la Yak'usda énuljutne, 'enne lubeshi 'uhulh'en whuts'ónint'i, nts'en'a whuch'a nabutáleh-un, 'et neMoodihti t'eeoninzun. 'Ink'ez ts'ih'un lhe'ít'ohne, 'enne cha ndet dzin buba nahutiyeh-un, 'et whuts'un bube' whuyah-un, 'et buboontun.

<sup>10</sup> Mbene la soo 'uk'enus buyust'e whudutsun-un za whuts'u nint'ine 'ink'ez bumoodihne buba 'ants'i hinli whe hik'unulhe'ust'en. 'Enne 'uhududílti' 'ink'ez hukwa' huninzun tune' hut'en. Nyoonne nchane 'aw whelhoniljut whe hoontsi' hukw'un'a bughu yahalhduk.

<sup>11</sup> 'Et hoontsi' lizasne, ndunne khuni whuts'it-i be dune hodulh'ehne, 'enne buba nus hihltus 'ink'ez buba nus hinch'a whe 'hint'oh. Nduenne lizasne, 'enne hoontsi' nyoonne nchane nduhut'en-un 'aw neMoodihti but hubodilhtsi' whe buk'elhúhowhus'ai.

*Nduenne khuni whuts'it-i be dune hodulh'ehne, dahúltsi' whe 'hint'oh*

<sup>12</sup> 'Et hoontsi' ndunne khuni whuts'it-i be dune hodulh'ehne, 'enne chuntoh khuna-i duhúlt'oh. Ndunt'ohne whulokhun 'aw t'ehonúszun, 'et hoontsi' hoontsi' hukw'un'a howu yahalhduk. 'Et huwa chuntoh khuna-i k'un'a dahutitsah, 'ink'ez ndi hiye untsi'-i, 'i bulh Yak'usda but hutiyin.

<sup>13</sup> Buyust'e whuts'u nint'i-un dzin dulyiz whe 'et za 'uhúwhulh'en. Ts'ih'un lhe'hoot'oh tune' hust'en-un, 'et hukw'elha buba k'elha whutaleh. Nohtoh bukaya hoonli. Tube huhoont'i' whe nanohona'ah 'et whulh hulhgha nohla 'uha'alh.

<sup>14</sup> 'Uyoonne 'at bulh ninta' hut'ih, 'et za honilh'en. Lubeshi 'uhulh'en-un, 'aw 'etsul 'uhooneh ait'oh. Mbene la buzul soo lhe'íltusne, 'enne tank'us úbonilht'i. 'Uyoonne ch'e' ha' huninzun 'et whuz un'a budzi hodil'e'. Ndunt'ohne Yak'usda bubulh hunilch'e whe 'uda' buba nahizya whe 'hint'oh.

<sup>15</sup> Ts'ih'un ti 'et tinch'u huzdil. Balaam, Beor ooye', 'en be 'ut'en k'oh huhóolhchoot. Dat'en inle' la 'et whuz un'a 'uhut'en. 'En ts'ih'un lhe'hoot'oh tune' 'ut'en-un, hoont'i' whe 'et sooneya be ooba k'elha hoonli.

<sup>16</sup> 'Et hoontsi' hoontsi' k'un'a it'elh-un 'et huwa. Khuna-i donkey huyúlhni-i, 'aw yal hulhduk. 'Et hoontsi' ndun nus hoo'en-un, 'en whusni k'un'a ne'ut'en whe donkey dune k'un'a khuniti be yulh yalhduk whe Balaam, "Dah!" yulhni.

<sup>17</sup> 'Et ndunne ndunt'ohne, 'enne 'ants'i too k'et whuzdla-un, 'aw too hooloh-un whunduhúlt'oh. 'Et ndo kw'us búlh nodults'ut, le'uhint'oh. Ndunt'ohne

whuz un'a khuni be 'alha' hoont'oh-i whuyit 'uhint'oh. Soo nts'e la tsahólhgus 'ink'ez múgaih hoonli, 'et 'ilhez wheni 'et buba 'udun whuz'ai.

### *Dune nana'ahne*

<sup>18</sup> Mbene la ooba 'alha' hoont'ohne ndunne ndi yun k'ut tank'us 'it'elhne, 'enne buch'a nahusdil. Nyoonne khuni whuts'it-i hodulh'ehne, ndunne ooba 'alha' hoont'ohne hubuhoolhgooh hukwa' buhalh'en. Nts'en'a la hoolhtus whe neyust'e lubeshi whuts'u nint'i-un, 'enne whuts'it-i khuni ncha-i be bubulh yahalhduk whe tank'us úbonilht'i hukwa' ba halh'en.

<sup>19</sup> Ts'iyantsuk k'une' 'uhoot'en 'et buts'ú hoozi. 'Et hoontsi' didutch'oh whudutsun-un 'uhuwulh'en 'et whe netsudule be 'ulhna huzdli'. 'Et nawh lhe'hóot'oh, mbe la whuch'a buníldene, 'enne bube 'ulhna hinli.

<sup>20</sup> 'Et ndunne neMoodihti 'ink'ez neulhyis-un Sizi Gri, 'en soo ts'ih'un highu t'ewhunúnzun, 'i be ndi yun k'ut hoontsi'-un, 'et ts'iyawh whuch'a hudujih de, 'ink'ez doo cha za buch'a' ninde, 'ink'ez ntsi'ne butanahandil de, 'et de whutsoda' Yak'usda t'ehunuszun da', dahít'en la, 'et whanus buba hotátsi' tileh.

<sup>21</sup> 'Et ndunt'ohne, 'enne njan ts'ih'un ti 'aw t'ehonuszun de, 'et de da' buba soo' hot'e' oole'. 'Et hukw'elh'az t'ehonanzin de 'ink'ez butl'a hidan'ai whe 'ants'i hich'az nálhya, 'et whuz un'a 'udek'ez 'i 'udechoo anus hotátsi'.

<sup>22</sup> 'Ink'ez nts'en'a la bubulh dahooja, ndi khuni 'i gha whuts'odul'eh, nts'en'a la daja ni, 'et whuz un'a 'uhooja whe ndiz un'a nja dutni, "Lhike nahuyulkoooh-i, doo cha za nahuyut'ulh." 'Ink'ez nja dutni, "Gugooos too be soo cho bubuna'hulhdoh, 'ink'ez hukw'elh'az whutl'us tanahalgok." N dunne 'et whuz un'a 'et duhint'oh.

## 3

### *Yak'usda dune ye ts'u nahizya-i k'oh nálhe'usne*

<sup>1</sup> 'Et 'awet ook'esi'ne, ndi bulh nanki 'udustl'us nohts'o k'esges. 'I be noheni unzoo, 'et hoontsi' nohba whunaznih.

<sup>2</sup> 'Et ndunne nus hoo'enne Yak'usda ooch'e' unline, 'enne 'oh da' daja hudani'. 'Ink'ez wheni whel'a'ne 'uts'int'oh, neMoodihti neulhyis-un ooghuni, 'i be nohbulh yats'alhduk 'ink'ez nohuzdáni', 'et huwa la ts'iyawh whunaoolhni.

<sup>3</sup> Njan 'et 'udechoo soo cho t'ewhunoohzeh huba' hoont'oh. 'Udek'ez dzin de, 'et de Yak'usda ghudlohne, 'enne nts'en'a la buyust'e whuts'u nint'i-un, 'et whuz un'a za 'uhutit'elh hukwa' huninzun, 'enne cha nohtoh 'uhutit'elh.

<sup>4</sup> 'Ink'ez 'uhudutinelh, "Alha eh Sizi Gri nohts'u nahizya doo cha whusanatidalh-un. Nduun 'udáhni-un, 'en nts'é 'ut'en? Netso da'ne ts'iyawh yahadla 'et hoontsi' 'awhuz whusanálhusdai. 'Udechoo ndi yun 'ulya 'ink'ez 'andit dzin whuts'un, ts'iyantsuk dawhút'en la, 'et za nduwhút'en."

<sup>5</sup> 'Uda' dahooja la 'aw whunahoolnih hukwa lhe'hunúnzun. Yak'usda ooghuni, 'i be 'udechoo 'uda' ndo yat 'uhóolya inle'. 'Ink'ez ndi yun whuloh tehtl'ah 'unt'oh 'ink'ez whuloh yun unli inle'.

<sup>6</sup> Yak'usda dughuni 'i be too dudilht'o. 'Et whuz un'a yun k'ut too be' hoonla. 'Et whe ts'iyawh gak whulhtsi.

<sup>7</sup> Mbene la Yak'usda ghu nuni lhnuszutne 'ink'ez 'aw lhahidilhti'ne, 'enne buba nahutiye Yak'usda ye huske-i bugha whútalts'ulh ha, 'et ndet 'udek'ez dzin whuts'un dughuni be buba k'oh hoontun. 'Et de la 'andit yun 'ink'ez ndo yat cha, 'oh de kwun be ts'iyawh whudutálhk'un.

<sup>8</sup> 'Et hoontsi' nohni ook'esi'ne, njan 'ilhoghun whunaoodoolhnoh junih. NeMoodihti 'ilhudzin 'et 'ants'i 1,000 be yus k'ut ba dúwhult'oh. K'us 1,000 be yus k'ut 'et 'ants'i 'ilhudzin ba dúwhult'oh.

<sup>9</sup> NeMoodihti nts'en'a la nets'u náhizya-un, 'aw sa' nulhé'ust'en. 'Et whu-lohne sa' stla 'ut'en huninzun. 'Et hoontsi'i tube sa' neba sulh'i. 'Aw 'ilhoghun hoontsi'i ninta oolts'it hukwa lhe'nizun. 'Et ts'iyanne dudzi nahondunooleh 'et za butsu hukwa' ninzun.

*NeMoodihti oodzin whusaóotilts'ulh*

<sup>10</sup> 'Et ooka tse lhúhoodli whe dune 'undunut'i-un 'ulhdzis whusayaih, 'en k'un'a ooka tse lhúhoodli whe neMoodihti oodzin whusaóotilts'ulh. Ndet la ndúhooja de, 'et ndo yat 'ants'i kwun dilhtulh hukw'un'a gak whutaleh. 'Ink'ez ndai 'ulya-i, ts'iyawh kwun ulhtus-i be ts'iyaitsuk natilgheh. Ndi yun 'ink'ez ndai la ook'e yuzdla-i, 'i bulh ts'iyawh duták'un.

<sup>11</sup> 'Oh de 'et dótanelh de, 'et whutso ndiz un'a dune unline oohle' huba' hoont'oh, lubeshi yit 'ink'ez Yak'usda be 'ut'en k'oh 'et za hukw'u ne'ooht'en.

<sup>12</sup> Yak'usda oodzin whuz de hóolts'ulh-un, 'ahoolhyiz hukwa tse hólhe' 'ink'ez 'a cho whusahóolts'it-un whuz un'a hukwa' hoolh'en. Nts'owhúya hoozulh whe 'et nduwhútanelh, 'et de ndo yat ndulcho whe kwun be gak whutaleh. 'Et ndai la ts'iyaitsuk 'ulya-i, kwun nulwus k'et 'i be ts'iyaitsuk natilgheh.

<sup>13</sup> 'Et hoontsi'i njan ndet la nets'u hoozi-un, ndi yun 'ink'ez yat 'et 'awhundi-un, 'et 'ahoolhyiz hukwa tse ts'úhole'. Njan 'et ye ts'ih'un un'a 'un'oh-i, 'i 'et za 'ilhiz wheni 'et 'uti'elh.

*Soo ts'ih'un za 'ooht'e'*

<sup>14</sup> 'Et huwa nohni ook'esi'ne ndi 'i ts'iyawh ooka tse hóhle'. Soo ndet 'on 'un oohneh ait'oh whe hóolhdzih. 'Et whe la 'aw hoonliyaz hukwaya lhuzoohle'. 'Et de la hoonliyaz nohk'elhúholhts'it, 'ink'ez Yak'usda be ts'ih'un aht'oh-i, 'et whuz un'a 'en ba hóolhdzih. 'Et Sizi Gri whusanája de, 'et de la whuz un'a 'ooht'e'.

<sup>15</sup> 'Ink'ez neMoodihti tube sa' neba sulh'i, 'et lhane hudoojis huba, 'et whuz un'a huwu nuni noohdeh huba' hoont'oh. 'Ink'ez neulhutsin ookw'ets'intsi'-un, 'en Paul huyulhni, 'en ye whunih-i, 'i oogha whults'ut, 'et 'i gha Yak'usda ooghuni nohts'o k'e'anguz.

<sup>16</sup> 'Et ts'iyawh be 'udustl'us 'i k'ut 'et howu yalhduk. Whulukhi khuni tube howa whúlna' whe t'eznuzih. 'Et mbene la 'aw whulhodíl'elne, 'ink'ez 'aw soo lhe'íltusne cha, Yak'usda ooghuni 'i dich'oh hukwa' huninzun k'un'a na'huyínla. 'Et whuz un'a za 'onghoh-i ooghuni 'i cha 'et duhúyinla. 'I gha hoontsi'-un, 'et dich'oh khanáhuwhunt'ai.

<sup>17</sup> 'Et huwa nohni mbene la ookw'esi'ne, njan 'et nduwhútanelh whutso, 'uda' t'eoonaázun. 'Et huwa howahli! Nts'en'a la aht'oh, whuz un'a za 'ooht'e'. Doo ka la ndunne ntsi'ne, 'enne ninta' hut'ih-un, 'enne buk'un'a 'oohneh. 'Et buk'un'a 'ahja de, 'et tehtsun tihleh.

<sup>18</sup> 'Et hoontsi'i neMoodihti 'ink'ez neulhyis-un Sizi Gri ye unzoo-i, daja ni la 'ink'ez ndet ooghu t'ets'oninzun-un, 'et cha, 'on nus ooghun hodoolh'eh. 'En ts'un ye dizti-i nawhult'oh 'andit 'ink'ez 'ilhiz wheni. 'Et ndo honeh.

## 'Udechoo 'Udustl'us John 'Uk'eyánguz-i

### *Ndi khuni be ts'úkhuna-i, 'i ghun*

<sup>1</sup> Soo 'udechoo da' whuts'un hoonli-un soo ts'ih'un un'a whuzdánt's'o-un, nena be cha ts'onalh'en, 'ink'ez nela be cha oot'áts'aznai khuni be ts'úkhuna-i, 'i ghun.

<sup>2</sup> Ndi be ts'ukhuna-i nenalhts'et hahóolts'ut 'ink'ez ts'ohon'en 'ink'ez howu yats'alhduk. Ndi 'ilhiz be ts'ukhuna-i neBá bulh 'unt'oh. 'I nenalhts'et hahóolts'ut, 'et huwun nohts'udáni'.

<sup>3</sup> Ndet la ts'ohon'en-un 'ink'ez ts'odánt's'o-un, 'et huwun nohts'útni. 'Et whe la lhulh 'uts'int'oh ts'ooole'. 'Et 'alha neBá 'ink'ez ooYe' Sizi Gri 'enne bubulh 'ilho uzdidowh.

<sup>4</sup> 'Ink'ez ndi ts'iyawh huwun nohts'ó k'e'ts'anguz, 'et whe la tube cho whunólhni.

### *Ndi be hoot'en-i, 'i ooniz ts'idulh de, 'et de 'ilhoh 'uts'int'ohne ts'inli*

<sup>5</sup> Ndi khuni ts'odánt's'o-un 'i 'unt'oh, 'en ts'aháalts'ut-i, 'i ghun nohts'útni Yak'usda be hóot'en-i 'unt'oh, 'ink'ez 'aw tsálhgus ooghu hooloh gaih.

<sup>6</sup> 'En bulh lhulh 'úts'int'oh ts'utni de, 'ink'ez tsálhgus yo ts'e ts'idulh de, 'et ts'uwhuts'it whe' ts'utni, 'ink'ez 'aw khuni 'alha' 'unt'oh-i ook'unulhe'ts'ust'en.

<sup>7</sup> 'Et hoots'i be hoot'en-i bulh 'unt'oh, 'i ooniz ts'idulh de, 'et de 'ilhoh lhulh 'uts'int'ohne ts'inli 'ink'ez ooYe' Sizi Gri buzkai' be nelubeshi ts'iyawh yuna'alhde.

<sup>8</sup> 'Aw lubeshi lhts'it'ih ts'utni de, na'uzdunut'ah 'ink'ez khuni 'alha' 'unt'oh-i neghu hooloh.

<sup>9</sup> Lubeshi 'uts'alh'en ts'utni de, 'aw nelahdutisni 'ink'ez ts'ih'un 'unt'oh whe nelubeshi neba yunaoodutilnoh 'ink'ez tank'us un'a 'uhoont'oh-un, ts'iyawh whuch'a neyuna'tilhdoh.

<sup>10</sup> 'Aw lubeshi lhe'ts'ílel ts'utni de, Yak'usda whuts'it-un 'unt'oh ts'utni whe' ts'utni, 'ink'ez ooghuni, 'aw neghu hooloh.

## 2

<sup>1</sup> Suzkehkeyaz, 'aw lubeshi 'utilh'elh whuch'a 'et huwa ndi khuni 'i be nohts'ó k'e'usges. Mbene la lubeshi 'ulh'enne, 'enne buba neBá Yak'usda but neba yatilhduk-un, Sizi Gri, ts'ih'un un'a 'unt'oh-un, 'en 'unt'oh.

<sup>2</sup> 'Ink'ez 'en 'unt'oh nelubeshi k'elha dazsai. 'Aw wheni za iloh. Yinka nduluko whe whulubeshi k'elha cha. 'I be la neBá soo cho nets'u naítot'en 'et hukwa.

### *Sizi Gri mbe unli, whuz un'a t'ezninzun*

<sup>3</sup> Khuni netl'aidan'ai-i ook'une' ts'ut'en de, 'et whuz un'a t'ets'onínzun 'i gha Sizi Gri t'ezninzun.

<sup>4</sup> Mbe la 'en t'enuszun ni de, 'ink'ez yughuni yuk'unulhe'ust'en de, 'en whuts'it-un 'unt'oh 'ink'ez ndi khuni 'alha' 'unt'oh-i 'aw lhiyít'ih whe 'unt'oh.

<sup>5</sup> 'Et mbe la yughuni k'une' 'ut'en-un, 'en 'alha Yak'usda ye nék'entsi'-i be ts'ih'un un'a lhadúlya whe 'unt'oh. Njan huwa t'ets'onínzun Sizi Gri ooyúzdults'i whe' ts'int'oh.

<sup>6</sup> Mbe la ye yudínda-un ni de, nts'en'a la nusuya-un, 'et whuz un'a za nóya' huba' hoont'oh.

<sup>7</sup> Sulhutsinke\* 'aw khuni 'andidi-i netl'aidan'ai-i, 'i ghun iloh nohts'ó k'e'usges. 'Udechoo whuts'un t'enahzun ndi khuni 'uda-i' unt'oh. Ndi khuni 'uda-i, 'udechoo whuts'un dahts'o-i, 'i' unt'oh.

<sup>8</sup> Tsalhgus yo 'awet whedúdeh 'ink'ez ts'ih'un be hóot'en-i 'awet be hóot'en sulí. 'Et huwa nohts'ó k'e'usges

'ink'ez doo cha 'unohdúsní, 'andit khuni netl'aídan'ai-i, 'i ndi 'alha khuni 'i yulh 'únt'oh, 'ink'ez nohni cha bulh 'áht'oh.

<sup>9</sup> Mbe la be hóot'en niz 'unt'oh ní de, 'ink'ez dulhutsin ts'udutní, 'en 'awhuz tsalhgus yo usda whé 'unt'oh.

<sup>10</sup> Mbe la dudulhutsin k'entsi-un, 'en be hóot'en toh 'unt'oh 'ink'ez 'aw tank'us 'utit'elh-un whuts'u nóot'i ait'oh.

<sup>11</sup> 'Et hoonts'i mbe dudulhutsin ts'udutní-un, 'en tsálhgus yo 'unt'oh 'ink'ez tsálhgus yo nuya. 'Ink'ez nts'e tizya-un 'aw t'eeonúszun, ndi tsahólhgus-i be hoos'en sulí 'et huwa.

### *Yak'usda ba ulhtusne huzdli'*

<sup>12</sup> Ts'oodunneyaz Sizi Gri boozí' gha nohclubeshi nohba buna'ide, 'et huwa nohts'ó k'e'usges.

<sup>13</sup> Nebáke ndult'ohne ndun mbe 'udechoo whuts'un hoonli-un, 'en t'enahzun, 'et huwa nohts'ó k'e'usges.

Chilke ntsi-un ooch'a' nulhde 'et huwa nohts'ó k'e'usges.

Ts'oodunne neBá t'enahzun, 'et huwa nohts'ó k'e'usges.

<sup>14</sup> Nebáke mbe la 'udechoo whuts'un 'unt'oh-un t'enahzun, 'et huwa nohts'ó k'e'isguz.

Chilke ulhtus 'ink'ez Yak'usda ooghuni nohyudín'ai, 'ink'ez ntsi-un ooch'a' nulhde, 'et huwa nohts'ó k'e'isguz.

### *Ndíz un'a ndi yun k'ut uzdóts'i'*

<sup>15</sup> Ndi yun k'ut tank'us 'uwhut'en-un 'ink'ez ndi yun k'ut hoonli, 'i cha, whuts'u nóot'i junih. Mbe la ndi yun k'ut tank'us ne'whut'en ndóohoont'oh-un whuts'u nint'i de, 'aw neBá ye nék'entsi-i ooghu wheyooloh whe 'unt'oh.

<sup>16</sup> Neyust'e whuts'ú nint'i-un, 'ink'ez nena whuts'u nint'i-un cha, 'ink'ez ndai la aht'i-un be 'ududulhti' de, ndi 'i ts'iyawh ndi yun k'ut huba 'unt'oh, 'ink'ez 'aw neBá ts'u halhúhoolts'ut 'et huwa.

<sup>17</sup> Ndi yun 'awet whewhúls'it 'ink'ez oots'únint'i-i cha, 'et hoonts'i Yak'usda hukwa' ninzun te ne'út'en-un, 'en 'ilhiz khutinalh.

### *Mbene la Christ ch'az ditnine, 'enne buch'a khóhde'*

<sup>18</sup> Ts'oodunne 'awet 'et né'hunint'o whe' hoont'oh. Christ ch'az ditni-un whuz de úyalh whulh údahts'o whe' hoont'oh. 'Andit hoonts'i Christ ch'az ditnine huldlai whe' hoont'oh. 'Et whe t'ets'onínzun 'awet 'et né'hunint'o whe' hoont'oh.

<sup>19</sup> Nets'u hahándil whe' hint'oh 'et hoonts'i 'aw nebulh didowhne iloh 'uhint'oh. Nebulh didowhne 'uhint'oh de, nebulh za da' hoot'e' oole'. 'Et hoonts'i whehandil 'et huwa la ts'iyanne t'ebunózín 'aw nebulh didowhne lhuhíloh.

<sup>20</sup> 'Et hoonts'i ndun Christ lubeshi ooghu hooloh-un, 'en Ndoni nohyúidan'ai 'ink'ez ts'iyantsuk t'eeonáhzun.

\* **2:7** Ndi khuni, "Sulhutsinke," mbene la Sizi Gri ooba 'alha' yint'ohne, 'enne' ants'i lhuzkehke hinli le'hint'oh. 'Et huwa lhulhutsin 'ink'ez lhulhtuske hudli whe' hint'oh.

<sup>21</sup> Ndi khuni 'alha 'unt'oh-i t'enuzahzun huwa iloh nohts'ó k'e'isguz. Ndi khuni t'enahzun 'et huwa nohts'ó k'e'isguz 'ink'ez ndi khuni 'alha' 'unt'oh-i whuts'it ooghu hooloh.

<sup>22</sup> Mbe la Sizi 'en Christ 'unli 'et whuts'oodidlai-un, 'en whuts'it-un 'unt'oh. 'En Christ ch'az ditni-un 'unt'oh. 'En 'unt'oh neBá 'ink'ez ooYe' bulh whuts'oodidlai.

<sup>23</sup> Mbe la neBá ooYe' ts'oodidlai-un, neBá cha lhuyít'ih whe 'unt'oh. Mbe la neBá ooYe' ooba 'alha' yint'oh de, ooBá cha yut'i whe 'unt'oh.

*'Udechoo whuts'un whudáhts'o-un 'ilhiz wheni bulh 'óoh't'e'*

<sup>24</sup> 'Et huwa 'udechoo whuts'un whudáhts'o-un 'ilhiz wheni bulh 'óoh't'e'. 'Et 'udechoo whuts'un whudáhts'o-un nohbulh 'úhoont'oh de, 'et de la neBá 'ink'ez ooYe' cha bubulh útiht'elh.

<sup>25</sup> Njan nets'ú hoozi-un, 'ilhiz ts'ukhutinalh-un, 'et 'uw'húlhni.

<sup>26</sup> Mbene la nanohunti'ah hukwa' 'ut'enne, 'enne bughun ndi nohts'ó k'e'isguz.

<sup>27</sup> 'Et hoonts'i Ndoni neBá nohyeídan'ai-i, 'ilhiz nohbulh 'únt'oh, 'ink'ez 'uyoonne dune 'aw 'on 'un whunohodoolh'eh huba lhe'hóot'oh. 'Et k'us ndi nohyudilts'ut-i ts'iyantsuk whunohdulh'eh 'ink'ez ts'ih'un 'unt'oh, 'aw whuts'it-i iloh 'unt'oh. 'Et soo nts'en'a la whunohdalh'e', whuz un'a za bulh 'óoh't'e'.

*Wheni Yak'usda oodune'ne, 'aw hoonli hukwaya lhts'iloh whe la oobut núzdolya'*

<sup>28</sup> Ts'oodunneyaz ndun 'en za bulh 'óoh't'e'. 'Et whe la nohnalhts'et hainya de, 'ink'ez whusanája de, nedzi ulhtus unli 'ink'ez 'aw hoonli hukwaya lhts'iloh whe la oobut núzdolya'.

<sup>29</sup> 'En ts'ih'un un'a 'unt'oh t'eeonáhzun de, t'eeonahzun mbene la ts'ih'un ne'út'enne 'enne Yak'usda yé ulhtus-i be huwhuzdli whe' hint'oh.

### 3

<sup>1</sup> Dalcho-i be la neBá nek'entsi-un negha óonin'ai, Yak'usda dich'oh uneúlhni buzkeh 'uts'int'oh soo cho whunulh'en. 'Et huwa ndi yun k'ut whut'enne t'enehunúszun, didut 'aw t'ehinúszun 'et huwa.

<sup>2</sup> Ook'esi'ne 'andit Yak'usda buzkeh ts'inli. Daztit'elh-un 'awhuz nenalhts'et halhúwhulhts'it. 'Et hoonts'i t'ets'oninzun ts'an'en de, soo bunduz tilt'elh, soo nts'en'a la dantoh, whuz un'a uztilh'elh 'et huwa.

<sup>3</sup> 'Ink'ez mbene la whuz un'a hits'un hukwa tse hooline, dutsun hooloh na'hudutiltselh, dant'oh la ootsun hooloh, whuz un'a.

*Lubeshi 'uts'ulh'en-un ts'iyawh whulazdootnih huba' hoont'oh*

<sup>4</sup> Mbe la lubeshi 'ulh'en, 'aw khuni yuk'únulhe'ust'en-un whe 'unt'oh. 'Et khuni k'uts'uyus de, lubeshi 'uhoont'oh.

<sup>5</sup> 'Ink'ez t'eeonáhzun nelubeshi neba 'ún yutoolhdilh ha ndi yun k'ut nusuya. 'Ink'ez didut 'aw lubeshi ooghu hooloh whe 'unt'oh.

<sup>6</sup> Mbe la ye yudinda-un, 'aw lubeshi oolh'en ait'oh whe 'unt'oh. Mbe la lubeshi 'ulh'en-un, 'aw lhuyi'el 'ink'ez 'aw t'einúszun.

<sup>7</sup> Ts'oodunneyaz 'uyoon nanohnoo'ah junih. Mbe la ts'ih'un ne'ut'en-un, 'en ts'ih'un 'unt'oh. Dant'oh la Sizi Gri ts'ih'un 'unt'oh, whuz un'a ndunt'oh whé 'unt'oh.

<sup>8</sup> 'Udechoo whuts'un netsudule lubeshi 'ulh'en. Mbe la lubeshi 'ulh'en, 'en netsudule uniyalh-un 'únt'oh. Njan 'et huwa Yak'usda ooYe' ndi yun k'ut nusúya, 'et whe la netsudule be 'ut'en musai yoolhtselh ha.

<sup>9</sup> Mbe la Yak'usda yé ulhtus-i bé whuzdli-un, 'en lubeshi lhe'ulh'en. Ndi Yak'usda ts'u hainzut-i, 'i be 'ilhiz wheni ts'ukhutinahl, 'ink'ez 'ilhiz wheni yulh 'unt'oh. 'Et mbene la 'i be whuzdline, 'enne 'aw lubeshi 'uhoolh'en ait'oh.

*Wheni Sizi Gri unidulhne ts'iyawh lhk'ets'ootsi'*

<sup>10</sup> 'Et ndiz un'a Yak'usda buzkeh 'ink'ez netsudule buzkeh cha t'ehunudzun: Mbe la ts'ih'un nulhe'ust'en, k'us dudulhutsin k'elhítsi', 'en Yak'usda uniyalh-un iloh 'unt'oh whe 'unt'oh.

<sup>11</sup> Soo 'udechoo whe' whudit'en whuts'un ndi khuni dahts'o nja dutni, lhk'ets'ootsi', ni.

<sup>12</sup> Ndundune Cain 'en k'un'a iloh. 'En ndun ntsi'-un uniyalh-un 'unt'oh 'ink'ez dudulhutsin yuzilghí. Ndet hukwa' yinla yuzilghí? Be 'ut'en untsi' 'ink'ez bulhutsin 'en ts'ih'un ne'ut'en, 'et hukwa' yinla.

<sup>13</sup> Sulhutsinke ndi yun k'ut whut'enne nohts'o dutni de, khun te nohba hócha junih.

<sup>14</sup> Neulhutsinke buk'ets'intsi', 'et huwa t'ets'oninzun dats'uzsai le'ts'int'oh 'ink'ez nats'ukhítina' le'ts'int'oh. Mbe la dulhutsin k'elhítsi'-un, 'awhuz dazsai le'unt'oh.

<sup>15</sup> Mbe la dulhutsin ts'u dutni-un, 'en neghan-un 'unt'oh. 'Ink'ez t'oonáhzun mbe la neghan-un, 'en 'ilhiz be ts'ukhuna-i ooghu wheyooloh whe 'unt'oh.

*Sizi Gri neba daja la 'et huwa be lhk'ets'utsi'-i t'ezninzun*

<sup>16</sup> Sizi Gri 'en ye khuna-i neba yuladitni, 'et huwa be lhk'ets'utsi'-i t'ezninzun. 'Ink'ez wheni cha neulhutsinke be ts'úkhuna-i buba oolazdootnih huba hoont'oh.

<sup>17</sup> 'Et hoontsi' mbe la ndi yun k'ut hoonli ut'i-un whe bulhutsin 'e'dunidzit de, 'ink'ez dudzi be 'aw yugha telhe'nizil de, nts'en'a Yak'usda ye nék'entsi'-i yulh 'útít'elh? 'Et dut'en de, nts'en'a Yak'usda k'etitsi'?

<sup>18</sup> Ts'oodunneyaz 'aw khuni be za lhk'ets'utsi' uzdoon'. Soo ts'ih'un un'a ne-e'ut'en be cha lhk'ets'ootsi'.

<sup>19</sup> Njan 'et huwa la t'ets'oninzun khuni 'alha' 'unt'oh-i bulh 'uts'int'oh. 'Et de la oobut nedzi ts'ih'un 'oot'e'.

<sup>20</sup> Nedzi gha neba nahisda de, Yak'usda 'on nus negha te'ninzun whe 'unt'oh, ts'iyantsuk t'oonínzun 'et huwa.

<sup>21</sup> Ook'esi'ne nedzi neba nalhuhusye de, whélhts'uniljut whe Yak'usda oobut núzdilhya.

<sup>22</sup> Di la oots'o óoka' ts'utni-i, 'i negha íyunle, ooghun-i ts'oontun 'ink'ez hoonzoo whe oonalh ne'ts'ut'en 'et huwa.

<sup>23</sup> Ndi dughuni netl'aídan'ai, ooYe' Sizi Gri mbe unli neba 'alha' 'oot'e' 'ink'ez lhk'ets'ootsi'. 'Et whuz un'a dughuni netl'aídan'ai.

*Soo cho huwohle' lthane whe nus hoo'enne na'hududil'i 'uda' netoh 'uhut'en whe' hoont'oh*

<sup>24</sup> Mbe la yughuni oontun-un, 'en Yak'usda yudínda 'ink'ez Yak'usda cha yulh 'unt'oh. Ndoni neyídan'ai 'en be t'ets'onínzun neyo ts'e nebulh 'unt'oh.

## 4

<sup>1</sup> Ook'esi'ne, nudúdeh-i ts'iyawh iloh nohba 'alha' 'oot'e'. Ndi nudúdeh-i oozúldzih Yak'usda ba ts'ih'un 'unt'oh tilah. Lthane huwhuts'it whe nus húhoo'enne yun k'ehindil 'et huwa.



<sup>2</sup> Ndai la nududeh-i Sizi Gri duyust'e be ndi yun k'ut nuseya, ni de, 'i Yak'usda ba ts'ih'un whe 'unt'oh. 'Et whe la Yak'usda ooyughi mbe unli t'ets'onínzun.

<sup>3</sup> Ts'iyai nududeh-i Sizi Gri duyust'e be ndi yun k'ut nuseya, 'aw lhdusnih de, 'aw Yak'usda bulh lhé'it'oh whe 'unt'oh. 'Et ndi nududeh-i, 'i Christ ch'az ditni-i, 'i 'unt'oh. Whusatiyalh whulhúdahts'o 'ink'ez 'uda' ndi yun k'ut hoonli whe 'unt'oh.

<sup>4</sup> Ts'oodunneyaz Yak'usda bulh áht'oh 'ink'ez ndunne Christ ch'az ditnine 'uda' buch'a' nullhde. Mbe la nohyudinda-un, 'en ndi yun k'ut 'unt'oh-un netsudule 'en 'unt'oh, yanus 'ultus whe 'unt'oh 'et huwa.

<sup>5</sup> Ndunt'ohne ndi yun k'ut whuch'e' hinli. 'Et huwa yun k'ut whut'enne buk'un'a yahalhduk 'ink'ez yun k'ut whut'enne buboohoozilhts'ai.

<sup>6</sup> Wheni Yak'usda ooch'e'ne ts'inli. Mbene la Yak'usda t'eninzunne, 'enne nehudits'o. Mbene la Yak'usda ooch'e' lhilohne, 'enne 'aw lhune-hoozilhts'ai. 'Et njan 'et huwa nududeh-i ts'ih'un 'unt'oh-i 'ink'ez tank'us 'unt'oh-i nudúdeh-i t'ebuznínzun.

*Ts'iyanne lhk'etsi'ne, 'enne Yak'usda yé ulhtus-i bé huwhuzdli 'ink'ez Yak'usda t'ehinínzun*

<sup>7</sup> Ook'esi'ne ts'iyawh lhk'ets'ootsi'. Bé lhk'ets'utsi'-i Yak'usda ts'u hált's'ut whe 'unt'oh. Ts'iyanne lhk'etsi'ne, 'enne Yak'usda yé ulhtus-i bé huwhuzdli 'ink'ez Yak'usda t'ehinínzun.

<sup>8</sup> Mbe la dulhdune k'elhtsi'-un, Yak'usda t'enuszun whe 'unt'oh, Yak'usda 'en nek'entsi'-un 'unt'oh 'et huwa.

<sup>9</sup> 'Aw 'ílhoghun duYe' 'en ndi yun k'uz yútilh'a'. 'En be la 'ilhiz wheni ts'ukhoona' ha. 'Et whuz un'a Yak'usda ye nék'entsi'-i yunénilhtan.

<sup>10</sup> Ndiz un'a nja duwhutni, wheni Yak'usda ook'elhts'ítsi' inle', 'et hoonts'i nek'entsi' 'ink'ez duYe' whusayáhl'a' nlubeshi k'elha datitsa ha. 'I be la soo cho nets'u naítat'en.

<sup>11</sup> Ook'esi'ne, 'et whuz un'a Yak'usda nek'entsi' de, wheni cha lhk'ets'ootsi' huba' hoont'oh.

*Lhk'ets'utsi' de, Yak'usda neyudinda*

<sup>12</sup> 'Aw dune Yak'usda yan'enne hooloh. Lhk'ets'utsi' de, Yak'usda neyudinda 'ink'ez ye nék'entsi'-i nedzi yo soo ts'ih'un un'a lhaóodulya.

<sup>13</sup> Njan 'et huwa t'ets'onínzun Ndoni negha ínin'ai 'et whe bulh 'uts'int'oh 'ink'ez didut cha neyudinda.

<sup>14</sup> Ndi yun k'ut whut'enne ubutilhyis-un ha neBá duYe' whusayáhl'a'. 'Et ts'ohon'en 'ink'ez howu yats'ulhduk.

<sup>15</sup> Mbe la Sizi Yak'usda ooYe' 'unt'oh ni-un, 'en Yak'usda yuyudinda 'ink'ez didut cha Yak'usda bulh 'unt'oh whé 'unt'oh.

<sup>16</sup> Ndi Yak'usda ye nék'entsi'-i t'eznanzin 'ink'ez neba 'alha' hoont'oh. Yak'usda nek'entsi'-un 'unt'oh. Mbe la bé lhk'ets'utsi'-i bulh 'unt'oh-un, 'en Yak'usda bulh 'unt'oh 'ink'ez Yak'usda yuyudinda whe 'unt'oh.

*Ndiz un'a be lhk'ets'utsi'-i soo ts'ih'un un'a neba lhadúlya suli'*

<sup>17</sup> Neba nahudeh dzin 'et si nedzi oolhtus ha, 'et whuz un'a be lhk'ets'utsi'-i soo ts'ih'un un'a neba lhadúlya suli'. Christ didut 'et dunt'oh huwa, wheni cha ndi yun k'ut 'et duts'int'oh 'et huwa.

<sup>18</sup> Bé lhk'ets'utsi'-i 'aw nujut ooghu hooloh. 'Et hoonts'i bé lhk'ets'utsi' soo ts'ih'un un'a lhadúlya suli'-i, 'i nujut 'un whenaínuyukw. Nujut dzoh nunéulhdzut whe 'unt'oh. Mbe la nuljut-un, 'en bé lhk'ets'utsi'-i ooyo soo ts'ih'un un'a lhalhdit'oh whe 'unt'oh.

19 Yak'usda didut 'udechoo nek'entsi' 'et huwa ook'ets'intsi'.

*Be 'alha' hoont'oh-i, 'i be Yak'usda ook'une' ts'oot'en*

20 Mbe la Yak'usda ook'esi'ne ni de, 'ink'ez dudulhutsin ts'udutni, 'en whuts'it-un 'unt'oh. Nts'en'a dudulhutsin yunilh'en hoontsi'i yuk'elhísi' de, Yak'usda 'aw lhuyis'en, 'ink'ez nts'en'a yuk'etitsi'?

21 'Ink'ez ndi khuni netl'aídan'ai-i, ndiz un'a nja dúhoont'oh; mbe la Yak'usda k'entsi'-un, dudulhutsin cha k'eootsi' huba' hoont'oh.

## 5

1 Mbe la Sizi, 'en Christ 'unt'oh, ooba 'alha' hoont'oh-un, 'en Yak'usda yé ulhtus-i be whuzdli-un 'unt'oh. Mbene la ndun 'ilhiz be ts'ukhutinálh-un negha óonin'ai-un, hik'entsi' de, mbene la 'en be yé ulhtus-i whuzdline, 'enne cha buk'ehootsi' huba' hoont'oh.

2 Yak'usda ook'ets'intsi' 'ink'ez ooghuni ts'oontun de, 'et njan 'et huwa t'ets'oninzun Yak'usda buzkeh buk'ets'intsi'.

3 Ndi ooghuni ts'oontun de, 'et whuz un'a Yak'usda ook'ets'intsi'. 'Ink'ez ndi ooghuni 'aw oogha lhúhoolna' whe ook'une' ts'oot'en.

4 Mbene la Yak'usda yé ulhtus-i be whuzdline, 'enne ndi yun k'ut 'ut'en ntsi'-i ch'a' nilhde. Bé neba 'alha' hoont'oh-i, 'i be whuch'a' nilhde.

5 Mbe la Sizi 'en Yak'usda ooYe' unli ooba 'alha' hoont'oh-un, 'en ndi yun k'ut 'ut'en ntsi'-i ch'a' ulhdeh.

*Yak'usda duYe' dant'oh-un 'unt'oh whunénulhtun*

6 Sizi 'en Christ 'unt'oh. 'En too 'ink'ez 'uskai' be whusainya. 'Aw too be za iloh. Too 'ink'ez buzakai' be whusainya. Ndoni ts'ih'un be' hoont'oh-i 'unt'oh. 'Et huwa 'en 'uja oonalh 'óohooja.

7 'Et tane 'enne yak'uz whuts'un bunalh 'óohooja. NeBá, 'ink'ez ndun khuni cha, 'ink'ez Ndoni cha. Ndunne tane 'ilhoghun za hinli.

8 'Et ndi ta 'i ndi yun k'ut oonalh 'óohooja. Ndoni 'ink'ez too 'ink'ez buzakai' cha. Ndi ta 'i lhghá' 'uhudija.

9 Dune oonalh 'óohoojane bughuni ts'ilhchoot de, Yak'usda oonalh 'óohooja-un 'on nus hooncha whe' hoont'oh, 'ink'ez ndi Yak'usda duYe' yughu yailhduk-i, 'i 'unt'oh.

10 Mbe la Yak'usda ooYe' ooba 'alha' yint'oh-un, Yak'usda daja ni-un, 'et cha ooba 'alha' hoont'oh whuzdli'. Mbe Yak'usda ooba 'alha' lhe'yit'oh-un, 'en Yak'usda whuts'it ninzun. Yak'usda duYe' yughu yailhduk-un ooba 'alha' lhe'yit'oh 'et huwa.

11 Ndi oonalh 'óohooja-i, 'i Yak'usda 'ilhiz ts'ukhutinálh-un negha óonin'ai. Ndi 'ilhiz be ts'úkhuna-i, 'i ooYe' bulh 'únt'oh.

12 Mbe la ooYe' ut'i-un 'ilhiz be ts'ukhuna-i ut'i whe 'unt'oh. Mbe la Yak'usda ooYe' lhit'ih-un, 'en 'aw 'ilhiz be ts'ukhuna-i lhit'ih whe 'unt'oh.

13 Mbene la Yak'usda ooYe' boozi' ooba 'alha' yint'ohne ndowhi nohts'ó k'esguz. 'Et whe la 'ilhiz khutihnalh-un what'i t'eeonóhzin, 'ink'ez Yak'usda ooYe' boozi' nohba 'alha' 'oot'e' za 'ooht'e'.

*Yak'usda uniyalhne, 'enne ndet oots'o hukwa' hutni-un, ts'iyawh ubudits'o*

14 'Et whelhts'uniljut whe oots'u tezdudli, 'et 'i 'unt'oh, ndet la hoonli oots'u hukwa' ts'utni de, hukwa' ninzun de, nedits'o.

15 'Ink'ez nedits'o t'ets'oninzun de, ndet oots'o húkwa' ts'utni, ndi whutso da' oots'u húkwa' ts'utni-un, 'et nawh lhe'hoot'oh negha tikulh.

<sup>16</sup> Mbe la bulhutsin lubeshi 'aw yuk'é dalhtisah-i 'ulh'en, yunilh'en de, Yak'usda yoodolhkut 'ink'ez 'et la nyoon lubeshi 'aw yuk'é dalhtisah 'ulh'en-un, 'en khutinalh-un yugha óota'alh. 'Et lubeshi ooghá daztisah-i cha hoonli. 'Aw 'et huba tenadondli lhdúzúsní.

<sup>17</sup> Ts'ih'un be nulhe'ts'ust'en-i, 'i ts'iyawh lubeshi 'unt'oh. 'Ink'ez lubeshi ooghá daztitsah-i, 'i cha hoonli.

*Mbe la Yak'usda yé ulhtus-i gha whuzdli-un, 'aw lubeshi lhe'ulh'en*

<sup>18</sup> Mbe la Yak'usda yé ulhtus-i gha whuzdli-un, 'aw lubeshi lhe'ulh'en, 'et t'ets'oninzun. 'Et hoonts'i mbe la Yak'usda yé ulhtus-i gha whuzdli-un didutch'oh khudli whe 'unt'oh, 'ink'ez ntsi'-un 'aw yut'aóonalh ait'oh.

<sup>19</sup> Wheni Yak'usda bulh 'úts'int'oh t'ets'oninzun. 'Ink'ez ndi yun k'ut whut'enne, ntsi'-un ts'iyawh k'úne' bul'en.

<sup>20</sup> Yak'usda ooYe' whusainya 'ink'ez t'ets'onínzun njan t'ets'onózin-un, 'et negha óonin'ai. 'Et whe la ndun 'alha' 'unt'oh-un t'eznoozeh ha. Ndun 'alha' 'unt'oh-un, 'en bulh 'uts'int'oh. OoYe' Sizi Gri 'en cha bulh 'uts'int'oh. Ndun 'en 'unt'oh soo 'alha Yak'usda 'unt'oh 'ink'ez 'ilhiz be ts'úkhuna-i unli whe 'unt'oh.

<sup>21</sup> Ts'oodunneyaz 'uk'eltsi-i och'a khahdli. 'Et ndo honeh.

## Bulh Nanki 'Udustl'us John 'Uk'eyánguz-i

### *Hadih nohdúsní, ní John*

<sup>1</sup> Si 'utso whudilh dzulh-un, ts'eke 'utahálti-un 'ink'ez buzkeh cha butsó k'e'usges. 'Enne buk'esi'. 'Aw si za iloh. Mbene la khuni 'alha' 'unt'oh-i t'eninzunne, 'enne cha buk'ehintsi'.

<sup>2</sup> Ndi khuni 'alha' 'unt'oh neyúdzidla-i, 'ink'ez 'ilhez wheni nebulh útit'elh-i, 'i gha' dusni.

<sup>3</sup> Yak'usda neBá 'ink'ez neMoodihti Sizi Gri neBá ooYe', 'enne buts'un ye unzoo-i, ye té'ninzun-i cha, 'ink'ez nedzi whudizghel-i, 'ohwhi 'ilhez wheni nebulh 'óot'e'. Khuni 'alha' 'unt'oh-i 'ink'ez be lhk'ets'utsi'-i bulh.

### *neBá khuni netl'aídan'ai-i, lhk'ets'ootsi', ní*

<sup>4</sup> neBá khuni netl'aídan'ai-i, ts'ilhchoot k'un'a, whuz un'a whulohne nyuzkeh khuni 'alha' 'unt'oh-i bulh hídulh. 'Et nawhus'ai whe tube hoonúst't'.

<sup>5</sup> 'Ink'ez ts'eke 'andit nts'u tédusdlih. 'Aw khuni yugha né'ulh'ai-i, 'andidi be nts'ó k'eusges iloh. Ndi khuni 'udechoo whuts'un t'ezninzun. Lhk'ets'ootsi', ní.

<sup>6</sup> Ndai la khuni yugha néulh'a oogha nuts'óodilh huba' hoont'oh. Ndi 'i bé lhk'ets'utsi'-i, 'i 'unt'oh. 'Udechoo whuts'un dahts'o ndi khuni yugha néulh'a, 'i ooghá nohdilh huba' hoont'oh.

### *Lhane dune nana'áhne yun k'éhindil, 'et huwa kxahdli*

<sup>7</sup> Lhane dune nana'áhne yun k'éhindil 'et huwa. Ndunt'ohne 'aw Sizi Gri ndi yun k'ut duyust'e be nuséya lhuhudusni. Mbe la ndunt'oh-un, 'en dune nana'ah-un 'unt'oh 'ink'ez Christ ch'az dítni-un cha 'unt'oh.

<sup>8</sup> Nohnich'oh kxahdli! Ndai la 'ut'en beni 'uts'it'en-i ninta ts'oolelh whuch'a. 'Et de la soo cho neba 'uk'elha hóle'.

<sup>9</sup> Mbe la ninta 'ut'ih-un 'ink'ez Christ khuni be ooghu yaduk-i, 'aw lhuyóotun de, 'aw Yak'usda cha lhít'ih. Mbe la ndi Christ ooghu yaduk-i yootun de, neBá duYe' bulh nahúlt'oh ubut'i whé 'unt'oh.

<sup>10</sup> Mbe la Christ ooghu yaduk-i lhuyóotun-un whunoh dutilh'eh huba nohghu ninya de, ndunt'oh-un 'aw nohyoh daóoya' junih, k'us daníyaih dóhni' junih!

<sup>11</sup> Mbe la daníyaih yúlhni-un, 'en cha ndi tank'us ne'út'en-un yula 'ut'en whe 'unt'oh 'et huwa.

### *John ubulhni, "Ilhudzin de nohts'u tisyalh hukwa' nuszun"*

<sup>12</sup> Lhat-un huwun nohts'ó k'etisgus, 'aw 'udustl'us 'ink'ez 'udustl'us too be iloh. 'Ants'i nohts'u tisyalh 'ink'ez soo nohnin ts'e nohbulh yatisduk 'et hukwa' nuszun. 'Et de la tube cho ts'uhót'e'.

<sup>13</sup> Nohulltus 'utahálti-un buzkeh, 'enne hadih nohuhútni. 'Et ndo honeh.

## Bulh Ta 'Udustl'us John 'Uk'eyánguz-i

*John, Gaius ts'iyanne yuk'entsi'-un, 'en yuts'ó k'e'anguz*

<sup>1</sup> Si John 'utso whudilhduh-un Gaius ts'iyanne yuk'entsi'-un, 'en soo 'alha ook'esi'-un, 'en oots'ó k'e'usges.

<sup>2</sup> Ook'esi'-un nzul dáldzoo' la whuz un'a ts'iyaitsuk be hoonzoo 'oneh 'ink'ez soo 'ónt'e', 'et whuz un'a mba tenadusdli.

<sup>3</sup> Daint'en la ts'ih'un un'a inyalh-un, neyulhutsinke whusahándil 'ink'ez ndi khuni 'alha' 'unt'oh-i bulh 'int'oh-i, 'et hukw'ún nahuwulnuk. 'Et huwa tube cho hoonúst'i'.

<sup>4</sup> Suzkehke unline, 'enne khuni 'alha' 'unt'oh-i be ts'ih'un un'a hidulh-un whulh 'údusts'o te, 'et dáhoolcho-i be hoonúst'i' whe' hoont'oh.

*Gaius 'ahoolhiz ts'iyanne bula 'ut'en*

<sup>5</sup> Ook'esi'-un neyulhutsinke 'ink'ez 'uts'un whut'enne 'ahoolhyiz bula 'int'en.

<sup>6</sup> 'Enne 'uhint'oh nts'en'a la buk'entsi', Yak'usda ba 'ilhunaoodulhne, 'enne buts'un nk'unahuwhulnuk. Nts'en'a la Yak'usda hootát'e' hukw'un'a hutidulh ts'e whébilh'aih de, 'et tube soo 'int'en whe 'int'en.

<sup>7</sup> Yak'usda boozi' gha whehándil 'ink'ez 'udun yun k'ut whut'enne bula k'ez lhe'híhchulh 'et huwa.

<sup>8</sup> Wheni cha ndunt'ohne neyoh dábut's'oooleh huba' hoont'oh. 'Et de la khuni 'alha' 'unt'oh-i ba 'ilhoh 'uts'ut'en ts'ooole' la.

*Ilhoghun dune, 'en hoont'i' whe Yak'usda ba 'ilhunaoodúlhne butoh dune 'unt'oh-un na'dudil'i, 'ink'ez 'ilhoghun dune, 'en ts'iyanne soo híghu yalhduk*

<sup>9</sup> 'Et Yak'usda ba 'ilhunaoodúlhne but's'ó k'e'isguz. 'Et hoont's'i 'ilhoghun butoh usda-un, Diotrephes huyulhni, 'en hoont'i' whe buba nus dizti' na'dudil'i, 'et hukwa' ninzun. 'En 'aw nekalhe'nízun.

<sup>10</sup> 'En khuni ook'ewhúnduda 'i be 'ants'i ulgih le'utni nech'az yálhduk. 'Et huwa nohts'u tísyalh de, nts'oh te ne'ut'en-un nohnalh howu yatisduk. 'Aw 'et za iloh ndut'en, neulhutsinke 'aw buka lhe'nízun. 'Ink'ez mbene la buka ninzunne, 'enne tenazdudli bayoh 'et tenábulh'aih.

<sup>11</sup> Ook'esi'-un ndai la ntsi'-i buné'nont'en junih. Unzoo-i za buné'nont'en. Mbe la 'ut'en unzoo-i 'ulh'en-un, 'en Yak'usda bulh 'unt'oh. 'Et hoont's'i mbe la tank'us 'ut'en-un, 'en 'aw Yak'usda lhí'el whe 'unt'oh.

<sup>12</sup> Ts'iyanne Demetrius soo híghu yalhduk. 'Ink'ez khuni 'alha' 'unt'oh-i, 'i gha whunénulhtun dant'oh unli. 'Ink'ez wheni cha soo óoghu yats'ulhduk. 'Ink'ez 'alha' ts'utni t'oonáhzun.

*Ts'iyanne budzi whudoghel-un, 'et buts'u hukwa' ninzun*

<sup>13</sup> Lhat-un huwun 'uk'uné'tisguz inle'. 'Et hoont's'i 'aw 'udustl'us k'ut 'ink'ez 'udustl'us too be iloh.

<sup>14-15</sup> 'Et hoont's'i 'a cho, nyutis'elh hukwa tse hóosdli. 'Ink'ez soo lhuníl'en whe yatálduk. Ts'ih'un un'a lhts'un 'óoht'e'. Nek'ekene nezih dilhts'ine, 'enne hadih nyuhútni. Nek'ekene nyuzih dilhts'ine, 'enne 'ilhoghun hinli hadih ubudíni.

## Jude Ndi 'Udustl'us 'Uk'unéyuzguz-i, 'I 'Unt'oh

*Yak'usda 'utahábanlane, Jude hadih ubulhni*

1 Si Jude Sizi Gri be 'ulhna-un 'ink'ez James bulhutsin 'ust'oh. Nohni Yak'usda neBá, 'en ba 'udun nelyane 'ink'ez Sizi Gri 'en be uboontun. 'Et ndunt'ohne, 'enne 'ut'ahályane 'uhint'oh. Nohni ndi 'udustl'us nohts'ó k'egsz.

2 Ye té'ninzun 'ink'ez be nedzi dizghel-i, 'i cha, 'ink'ez be lhk'ets'utsi-i cha, 'i ts'iyawh nohba lhk'uz lhutookat ha nohba tenadusdli.

*Neba 'alha' hoont'oh-un, soo cho whulh núdolhya'*

3 Ook'esi'ne ndet la whe whédizjiz-un, 'et huwun da' nohts'ó k'etisguz. 'Et hoonts'i be neba 'alha' hoont'oh-un, 'et huwun 'on nus nohts'o k'eoosges huba' hoont'oh. Ndi neba 'alha' 'unt'oh-i, 'ilhoh za 'ink'ez 'ilhiz wheni Yak'usda ooch'e'ne, 'enne Yak'usda butl'a hónla, 'i ba soo cho núdolhya', 'et nohdutasnelh ha nohts'o k'e'isguz.

4 'Et whulohne dune tube nist'i unline whe nohtáhunindil. Niz de whudizulh sa' inle' 'et whuts'un nts'én'a la buba nahutiye, 'et ts'iyawh 'uk'uwhusguz. 'Enne dune Yak'usda yit 'unt'ohne, 'enne 'uhint'oh. NeYak'usda ye unzoo-i, 'i 'uts'un un'a na'huyulh'ih whe 'et nduhútni, ndai la ts'iyawh 'ut'en dutsun-i, 'i 'uts'ulh'en de, 'et soo' hoont'oh nehútni. 'Ink'ez Yak'usda 'en za k'únune'ul'en, Sizi Gri neMoodihti, 'en hits'oodidlai.

*'Uda' 'ink'ez 'andit Yak'usda lanaditnine*

5 'Et hoonli nohba whunatiznih, 'uda' t'eonáhzun 'et hoonts'i. 'Et whengho hodizut njan Egypt yun k'ut 'et whuch'a neMoodihti dudune'ne, 'enne ts'iyawh ubulhyih. 'Et hukw'elh'az mbene la ooba 'alha lhe'hoot'ohne, 'enne ts'iyawh gak ubulhtsi.

6 'Et ndunne lizas, 'enne cha Yak'usda buba' hoonla-un, 'et hoonts'i whulahuditni. 'Ink'ez ndunne neMoodihti tsálhguz yo ts'e 'enne huboontun. Tl'oolh 'ilhiz 'unt'oh-i, 'i be whénubudizguz, dzin hooncha-un whuz de hóolts'ulh 'oh de buba nahutiye.

7 'Et whuz un'a ndunne Sodom 'ink'ez Gomorra whut'enne, 'et whunat whudune'ne, 'enne cha, 'et whuz un'a za buk'oh ts'e 'uhut'en. 'Ut'en dutsun-i 'uhulh'en, 'et wheni dich'oh whutl'a' hududilya. Ts'iyai didowh-i bulh ninta' hutit'ih 'Alha ndi kwun 'aw nalhnusne-i, 'i be dzoh nuhudeh whe' hoont'oh. 'Et huwa 'enne bugha t'ets'onanzin.

8 'Et whuz un'a za ndunne 'et nduhutinelh-un ninzunne, 'enne buyust'e lubeshi be dutsun huyilh'i. 'Ink'ez ndai la hik'úne' oot'en buba an ndo 'unt'ohne buk'unulhe'hust'en. 'Ink'ez ndunne buts'u ha 'ánduzne lizas, 'enne hoonts'i hukw'un'a bughu yahalhduk.

9 'Et hoonts'i Michael 'en 'udedo lizas 'unt'oh-un, 'et 'oh da' netsudule 'en Moses dazsai whe hukw'elh'az oozi 'i ghun lhdulhyoh 'uhudutni. 'Aw dich'oh ooba' hoont'oh lhnízun whe yuch'az ditni be yalhduk 'ink'ez yuba nahutiye. 'Et hoonts'i Michael ndiz un'a netsudule 'uyúlhni, "NeMoodihti hukwa' nyudóni!"

10 'Et hoonts'i ndunne ndet la t'ehonuszun-un, 'et hoonts'i hukw'un'a howu yáhalhduk. 'Ink'ez nts'en'a la neyust'e hukwa' ninzun, 'et whuz un'a za ts'ant'i ne'út'en, whuz un'a duyust'e ninta' huyulh'ih.

11 Dawhulsi'-un butsu'u hóolts'ulh! 'Enne cha Cain duhul'en. 'Et huwa dawhulsi'-un butsu'u hóolts'ulh! 'Et ndun Balaam nanit'a hukw'un'a 'uja. 'Enne cha whuz un'a za tube sooneya ghu dahóodit'oh. 'Et ndun Korah dahoont'oh huwa Moses ch'az nedinja-un, 'enne cha 'en k'un'a hahadla.

*Yak'usda lanaditnine, 'enne tube hintsi' suli' 'ink'ez buba nahisda*

12 Lhk'ehtsi' whe lhana'aht'alh, 'et hoontsi' ndunne ooghu yasdukne 'aw whelhoniljut whe nohla'ha'alh. 'Enne 'ants'i howaóodli-i teh noo duhúlt'oh. Dich'oh za soo ne'hududul'en. 'Antsi' kw'us too ooghu hooloh-i le'hint'oh. 'Et kw'us k'un'a ndulcho bubúlh nuts'i. 'Antsi' dak'et mai chun mai ooghu hooloh le'hint'oh. 'Ink'ez ooghih bulh 'ants'i hánahuyulhch'ulh leúnt'oh. Nat daházalai le'hint'oh.

13 'Antsi' ndulcho tatsi nudútun le'hint'oh. Ndaí la dune buba hukwaya hooni-i, 'i huwus 'et dunt'oh. Sum k'un'a lhtanahikulh le'hut'en. 'Et dunt'ohne dune, 'enne soo tsalhgus t'es le'unt'oh-i, 'i 'ilhiz wheni 'et Yak'usda buba 'udun whulh'ai.

14 'Et ndun Enoch 'en whulh lhtak'ant'it Adam ts'u hainzut-un 'unt'oh, 'en ndunne dune, 'enne bughu nus hón'en whe nja dutni, "Whunulh'en neMoodihti 'awet whusáinya! Oodune'ne, 'enne ts'iyawh ooch'e'ne, lhane k'et 'aw 'ubuts'olhto ait'oh, 'enne bubulh whusatiyalh.

15 Nyoonne Yak'usda yit 'unt'ohne, 'enne ts'iyawh buba nahutiye. 'Enne Yak'usda yit 'unt'ohne, dahoont'oh hukw'un'a Yak'usda ch'az ne'ust'enne whuz un'a buk'ehóota'alh. 'Et ndunne Yak'usda yit 'unt'ohne, 'enne lubeshi 'ulh'enne 'uhint'oh. Nts'en'a la khuni duts'un-i be hidulhyoh yahalhduk, 'et whuz un'a buba nahutiye!"

*Yak'usda lanaditnine, 'enne nja dúhint'oh*

16 Ndunt'ohne, 'enne tsanukhuni huldilhne, 'ink'ez whunúlhch'oh whe buba dzoh hinli. Buyust'e nint'i ts'e hidulh. Khuni ncha-i be yahalhduk. 'Et whe honzoo hukw'un'a dune ghu yahalhduk 'et whe whuch'a nohotálhdoh.

17 'Et hoontsi' ook'esi'ne, neMoodihti Sizi Gri ba whel'a'ne ndai khuni hiye yailhduk-i, soo cho oonaoolhni.

18 Nts'en'a la nohodani' 'udek'ez whusaóotilts'ulh-un lhane neBá ook'oh ts'e huwudlohne whutaleh. Nyoonne nts'e la Yak'usda ch'az nint'i ts'e 'et whuz un'a za hutidulh.

19 Nduune, 'enne ndi yun k'ut whuba za 'uhint'oh. 'Enne dune lhch'az hunilht'i 'ink'ez Ndoni ooyit 'uhint'oh.

*Soo cho Yak'usda bulh 'óht'e'*

20 'Et hoontsi' ook'esi'ne be nohba 'alha' hoont'oh-i, 'i be 'on nus ulhtus 'ududulhtsi. Ndoni 'en be tenadahdli.

21 Ndaí la Yak'usda ye nék'entsi'-i, 'i za bulh 'óht'e'. NeMoodihti Sizi Gri ye te'ninzun-i, 'i be 'ilhiz ts'ukhoona-un ts'uwhut'i, 'et za hukwa itóh'en.

22 Dune t'ebunoohzeh nts'en'a whe lhents'un un'a 'uhint'oh. Whulohne bugha te'nohzin.

23 'Et hoontsi' 'onghohne buba whenulhjut whe uboolhyih, kwun táhanabahle. Ndi naih buyust'e t'aizna-i, 'i hoontsi' oots'u doohni.

*Yak'usda uzdólhti'*

24 'Et 'awet mbe la Yak'usda ch'az natil'ahne whuch'a nohghundli-un, 'ink'ez oots'u hayánduz-i zih nenóhtaleh, 'aw be 'uk'ehóotalts'ulh-i yit. 'Et soo 'uk'enus hóont'i' whe whuz un'a nohba 'uwhtileh.

25 'Aw 'en za Yak'usda whunih-un 'ink'ez neulhyis-un unli. 'Aw 'en za oots'u hayánduz-i 'ink'ez k'us ncha-un 'unt'oh. 'Ink'ez 'en za k'unune'ul'en-un 'unt'oh.

'Ink'ez ts'iyai tsuk an ndo 'únt'oh-un 'unt'oh. 'Andit whuts'un 'ink'ez 'ilhiz wheni, 'et whuz un'a 'uwhutát'elh. 'Et ndo honeh.



## John Ooba Ts'et Hahónkat-un

<sup>1</sup> Ndi khuni 'i Sizi Gri dune buba ts'et hahónla-i 'unt'oh. Yak'usda yutl'aídan'ai be 'ulhnane bunalh ts'et hahóokát ha. 'Awet daóotanelh-un, 'et huwun 'unt'oh. Dulizas 'en dude 'ulhna-un John 'en yughe nílh'a'.

<sup>2</sup> John 'en Yak'usda ooghuni yughu yalhduk-un 'unt'oh. Sizi Gri ndet howu yailhduk-un huwun cha 'et dune budáni', 'ink'ez ts'iyai hon'en-un, 'et cha ubudáni'.

<sup>3</sup> Mbe la ndi 'udustl'us yuk'uyalhduk-un 'ink'ez ndi nus be hoot'en-i khuni huidánts'one huyoontun de, tube 'uk'enus hoonzoo-un bughá whutalts'ulh, 'awet nilhdukw suli' 'et huwa.

### *Lhtak'ant'it-un dune Yak'usda ba 'ilhunaoodulhne, hadih ubulhni*

<sup>4</sup> Yun k'ut Asia ts'e Yak'usda ba lhtak'ant'it-un lhelhdun keyoh dune 'ilhunaoodulhne, nohni si John nohts'o k'e'usges whe nja dudusni: Mbe la 'unt'oh 'ink'ez ant'e-un, 'ink'ez whuz de tíyalh, 'en ye unzoo-i 'ink'ez nedzi bet whudizghel 'ink'ez lhtak'ant'i nududeh-i Yak'usda yuk'usda-i but 'unt'oh, 'enne cha ye unzoo-i 'ink'ez nedzi ba dóghel-i ooht'e'.

<sup>5</sup> Sizi Gri 'en cha whuz un'a 'unohúlhni. 'En 'unt'oh soo ts'ih'un un'a whunénulhtun-un unli. 'En 'uja 'udechoo whuzdli-un yaidlanne toh dunadíja-un 'unt'oh. Ndi yun k'ut lerwene k'une' bul'en. 'En nek'entsi' 'ink'ez duduzkai' be nelubeshi tunáyuzguz.

<sup>6</sup> Oobá Yak'usda 'en ba lerwene 'ink'ez lubretne neyulhtsi. 'Ilhiz 'ink'ez 'ilhiz wheni 'en dóti', 'ink'ez hoolhtus whe k'une ne'ool'en. 'Et ndo honeh.

<sup>7</sup> Whunulh'en! Kw'us toh whuz de tíyalh.

Ts'iyanne hiti'elh.

Mbene la oola 'ink'ez ooke lugloo cho hikunúnihlt'one, 'enne cha.

'Ink'ez ndi yun k'ut lhelhdoh didowhne,  
'en gha khunahutitso.

'Et ndó tanelh, 'et ndó honeh.

<sup>8</sup> NeMoodihti nja dutni, "Si 'ust'oh Alpha 'ink'ez Omega usdli. 'Udechoo whe' whudit'en-un 'ink'ez 'etsul 'uwhutánelh-un, 'en 'ust'oh. Mbe usdli 'ink'ez ist'e-un, 'ink'ez whusatíyalh-un 'ust'oh, 'ink'ez ts'iyai-i anus ulhtus-un 'ust'oh."

### *John noo Patmos huyulhni, 'i k'ut 'adin'ai whe Sizi Gri in'en*

<sup>9</sup> Si John nohulhutsin 'ust'oh. Dzoh nahdeh te si cha nohbulh dzoh nuszut. Njan Yak'usda lerwe unli-un 'ink'ez Sizi Gri ooba howa whúlha' 'et hoonts'i neba whulh inyin-un, si cha whuz un'a za nohbulh susyin. Yak'usda ooghuni be yásduk 'ink'ez Sizi Gri t'ehinoozehe huwa cha, 'et huwa ndi noo Patmos huyulhni-i, 'i k'ut 'ust'oh inle' whe,

<sup>10</sup> 'et 'oh da' neMoodihti oodzin, 'et 'ants'i Ndoni bulh sulh wheóodande lé'usja. 'Et sk'oh ts'e dune tube yatilhduk, be ts'ujih-i k'un'a, 'et whudásts'o.

<sup>11</sup> 'Et nja dutni, "Si Alpha 'ink'ez Omega usdli. 'Udetso-un 'ink'ez 'udek'ez-un 'ust'oh. Ndet whunilh'en-un 'udustl'us k'ut 'uk'éhoonges 'ink'ez lhtak'ant'it-un Yak'usda ba 'ilhunaoodulhne, yun k'ut Asia hudilhts'i, 'enne ndi 'udustl'us buts'o t'ayonlelh. Ndi bukeyoh hoozi' 'unt'oh: Ephesus, Smyrna, Pergamos, Thyatira, Sardis, Philadelphia, 'ink'ez Laodicea whuz cha."

<sup>12</sup> Ndi khuni saniz de ts'e be yáduk-i dásts'o whe oots'u nasuz'a. 'Et whuz nasuz'a whe ndi lhtak'ant'i-i be hoot'en-i nanusa'a-i gold be 'ulya, 'i tís'en.

<sup>13</sup> 'Et nyoo lhtak'ant'i-i be hoot'en-i nanusa'a-i toh, yinka dune ye' k'un'a 'et usyin. Oonaih ooke t'ayanaih-i, 'i be usda. Se gold bulh 'ulya-i, 'i be oots'i toh 'on doh whuya ye ts'udilh'oo.

<sup>14</sup> Ootsi 'ink'ez ootsigha 'usbai gha k'un'a 'ulhyul, yus k'un'a 'ulhyul. Oona 'ants'i kwun k'un'a tizdi doút'en.

<sup>15</sup> Ooke 'ants'i dulk'un t'eh tsáhazdan'ai-i ndoút'en. Ooghuni 'ants'i too natájilh lé'utni.

<sup>16</sup> Oola nailhni ts'unk'us lhtak'ant'i sum 'i yoontun. 'Et saluzti 'i oozá huyan'a. Lhch'az ts'e ook'a hoonli. 'Ink'ez oonin sa ulhtus-i k'un'a be hóodat'en.

<sup>17</sup> Tís'en whe oobut dasúsai hukw'un'a nazts'ut. Dula nailhni ts'unk'us 'i be sk'édilni 'ink'ez 'usulhni, "Niljut íloh! 'Udechoo-un 'ink'ez 'udek'ez-un 'ust'oh.

<sup>18</sup> Khuna-un 'ust'oh. Dasúsai inle' 'ink'ez sunilh'en, 'ilhiz 'ink'ez 'ilhiz wheni khusna. 'Et ndo honeh! Hades 'ink'ez yats'adlah-un whulugli nusdle.

<sup>19</sup> Ndet la hon'en-un 'uk'éhoonges. Hoonli 'unt'oh-i 'ink'ez nduwhi hukw'elh'az nus dawhútanelh-un, 'et cha 'uk'éhoonges.

<sup>20</sup> Ndi lhtak'ant'i sum snailhni sla k'et in'en-i, 'ink'ez lhtak'ant'i nanusa'a-i gold be 'ulya-i be hoot'en-i cha, 'i ooghun whe' hoont'oh hooyoh-un, 'et ndiz un'a nja dúhoont'oh: Lhtak'ant'i sum 'i lhtak'ant'it-un Yak'usda ba 'ilhunaoodulhne, 'enne bulizas 'unt'oh. 'Ink'ez lhtak'ant'i be hoot'en-i, in'en-i, 'i lhtak'ant'it Yak'usda ba 'ilhunaoodulhne 'unt'oh."

## 2

*Keyoh Ephesus dune Yak'usda ba 'ilhunaoodúlhne 'udechoo whe Sizi Gri 'ink'ez nohbulh dunene cha buk'ehtsi' inle', 'et whuladihtni, sba budóni'*

<sup>1</sup> "‘Et keyoh Ephesus dune Yak'usda ba 'ilhunaoodúlhne bulizas 'en oots'ó k'einges:

Mbe la lhtak'ant'i sum nailhni oola k'et 'ink'ez lhtak'ant'i be hóot'en-i toh nuya-un, 'en nja dutni:

<sup>2</sup> Nohe'ut'en k'oh t'oonuszun, nohe'ut'en ulhtus-i cha. Nohba howa whulna' 'et hoontsi' whulh sahyin, 'ink'ez ndunne ntsi'ne 'aw bubulh 'óoh't'e' ait'oh. Mbene la whel'a'ne na'dudil'ine, 'et hoontsi' 'alha 'aw whel'a'ne lhuhíloh, 'enne uboozílhdzai 'ink'ez t'ebunanzin whuts'itne 'uhint'oh.

<sup>3</sup> Soozí' gha soo cho whulh áhyin 'ink'ez 'aw hoonliyaz talhódahni whe tube iht'en 'et hoontsi' 'aw nélhnahtsil.

<sup>4</sup> 'Et hoontsi' 'ilhughun whe 'uts'un un'a sba 'aht'oh. 'Udechoo whe Sizi Gri 'ink'ez nohbulh dunene cha buk'ehtsi' inle', 'et whuladihtni.

<sup>5</sup> 'Et huwa whunaoolhni ndet la nálhts'ut-un. Lht'ananahdaih 'ink'ez 'udechoo nohe'ut'en-i nalhchoot. 'Aw lht'analhíhdil de, khunsul nohts'un tísyalh 'ink'ez nyoo nohbe hóot'en-i nohghu naitáschulh.

<sup>6</sup> 'Et hoontsi' 'ilhoghun hoonzoo-un, 'et whaht'i, Nicolas unidulhne bube 'ut'en oots'u dahni. Si cha tube whuts'u dusni whe' hoont'oh.

<sup>7</sup> Mbe la 'udits'one, Ndoni Yak'usda ba 'ilhunaoodulhne, daja ubúlhni-un, 'en huyoozólh'ts'ai' huba' hoont'oh. Mbene la 'ut'en ntsi-i yuch'a 'ul'hdehne, ndi duchun oogha khutna-i oomai' huyoo'alh-un bugha óotas'alh. Ndi duchun 'i Yak'usda ookeyoh 'uk'enus hoonzoo-un, 'et whuniz ts'e nadán'a."

*Keyoh Smyrna dune Yak'usda ba 'ilhunaoodulhne, nohe'ut'en cha, be dzoh nahzut-i, 'ink'ez whe téhl'en-un cha, ts'iyawh t'eeonúszun, sba budóni'*

<sup>8</sup> "Et keyoh Smyrna dune Yak'usda ba 'ilhunaoodúlhne bulizas 'en oots'ó k'einges, nja dudini:

Mbe la 'udechoo-un 'ink'ez 'udek'ez-un, 'en dazsai inle', 'ink'ez nahítna, 'en nja dutni:

<sup>9</sup> Nohe'ut'en cha, be dzoh nahzut-i, 'ink'ez whe téhl'en-un cha, ts'iyawh t'eeonúszun. 'Et hoonts'i 'alha hoonzoo' 'aht'oh. Ndunne nohch'az dítnine nduhutni, wheni lizwifne 'uts'int'oh, 'et hoonts'i lizwifne lhuhiloh. 'Enne ndun Satan huyúlhni-un, 'en oolugliz 'et whuch'e' hinli whe' hint'oh, 'et cha t'eeonúszun.

<sup>10</sup> Ndet la whe dzoh nutihzut-un, 'awet nilhdukw nohghu whutáts'ulh. 'Et whénoohjut junih! Soo zúlhts'ai! 'Awet nilhdukw whulohne netsudule 'anohtilelh. 'Et whe ootáldzih. 'Et whunizyat dzin 'et dzoh nutihdeh. 'Et yaitahdlah whuts'un 'et nohba 'alha' hoont'oh za' hót'e'. 'Et hukw'elha 'ilhiz khutihnalh-un nohghá whunt'ai, 'on 'un whuch'a oonúlhde, 'et cha nohgha whútas'alh.

<sup>11</sup> Mbene la 'udits'one, Ndoni Yak'usda ba 'ilhunaoodulhne, dája ubulhni, 'enne huyoozóhlt's'ai'. Mbene la 'ut'en ntsi'-i ch'a' nilhdene, 'et dune whúlh nat dahútsah-un, 'i be 'aw hundódah ait'oh."

*Keyoh Pergamos dune Yak'usda ba 'ilhunaoodulhne, se' 'ut'en k'oh whu-lohkhun whuladihtni, sba budóni'*

<sup>12</sup> "Et keyoh Pergamos dune Yak'usda ba 'ilhunaoodulhne bulizas 'en oots'ó k'einges. Nja dudini:

Mbe la saluzti lhch'az ts'e khundiyyin-i ut'i-un, 'en nja dutni:

<sup>13</sup> Nohe'ut'en k'oh 'ink'ez nts'e whaht'i-un t'eeonúszun. Ndet la Satan ookw'uts'uzda cho dizti'-i us'ai-un, 'et whaht'i. Sooz'i, 'i soo cho oohtun. Nts'e la Satan whut'i-un 'ink'ez 'oh da' ndun Antipas huyúlhni-un, 'en sooz'i' gha nohtoh hizilghhi. 'Et hoonts'i nohba 'alha' 'ust'oh-un 'aw whuts'ulhoodáhdai.

<sup>14</sup> 'Et hoonts'i oolohkhun 'uts'un un'a sba aht'oh. Whulohne nohtoh Balaam ooghuni 'i huyoontun 'et huwa. 'En 'unt'oh Balak hodalh'e'. 'En 'uja Israel oots'u haindene whubodalh'e' but 'uk'el'tsi gha t'aih-i, 'i huyoo'alh 'ink'ez 'uyoonne ts'ekoo 'ink'ez 'uyoonne dune bulh cha ninta' hoot'ih whe uboolghoo hukwa 'ut'en.

<sup>15</sup> Nohni nohtoh 'et cha Nicolas ooghuni oontunne hoonli. 'I tube oots'u dusni whe 'unt'oh.

<sup>16</sup> Lht'ananahdil! 'Et ndúlhannel de khunsul nohts'un tisyalh 'ink'ez saluzti szah hain'a-i, 'i be ndunne Nicolas unidulhne, 'enne buch'az nedútasdahl.

<sup>17</sup> Mbe la 'udits'one, Ndoni Yak'usda ba 'ilhunaoodulhne, daja ubulhni, huyoozóhlt's'ai' huba' hoont'oh. Mbene la 'ut'en ntsi'-i yuch'a 'ulhdene, 'enne ndi 'ut'alh-i manna huyúlhni-i, 'i dune buch'a ntist'i-i, 'i whuloh bugha ítas'alh. 'Ink'ez tse dulyul-i cha bughá ntas'alh. 'Ink'ez ndi tse ook'ut 'andidi 'oozi' 'i ook'e itáguz. 'Aw dune booz'i t'ehinuszun. Ndun oogha idilts'ut-un, 'en za t'eyuntázin."

*Keyoh Thyatira dune Yak'usda ba 'ilhunaoodulhne, whulohne tube tank'us ne'ut'enne, 'enne sba budóni'*

<sup>18</sup> "Et Keyoh Thyatira dune Yak'usda ba 'ilhunaoodulhne bulizas 'en oots'ó k'einges. Nja dudini:

Yak'usda ooYe' oona 'ants'i kwun k'un'a tizdi dóut'en 'ink'ez ooke dulk'un t'eh unzoo-i dóut'en, 'en 'utni:

<sup>19</sup> Nohe'ut'en t'enuszun, be lhk'ets'utsi'-i, 'uyoonne la'aht'en, be nohba 'alha' hoont'oh-i, 'ink'ez hoonli talhódahni. 'I 'ut'en 'udechoo whe' daht'en-un 'andit' on nus soo 'aht'en. 'I cha ts'iyawh t'enuszun.

<sup>20</sup> 'Et hoonts'i hoontsool-unyaz whe sba 'uts'un un'a aht'oh. Nyoon ts'eke Jezebeel nus hoo'en na'dudútni. Hubodulh'eh 'ink'ez se' 'ulhnane tank'us úbunilht'i. 'Uyoonne dune 'ink'ez 'uyoonne ts'ekoo bulh ninta' hoot'ih. 'Ink'ez ndi 'uk'eltsi gha t'aih-i huyoo'alh hukwa' bulh'en. 'En ts'eke 'aw whuch'a lhnuzáhyoot.

<sup>21</sup> Ndun ts'eke 'uyoonne dune bulh ninta' 'ut'ih-un, 'et 'etsul 'ooneh dúsnih, 'et 'aw dudzi k'oh nalhe'yilel.

<sup>22</sup> Soo zúlhts'ai, lili k'ut duntida'-un oogha óotas'alh. Mbene la dune yulh ninta' 'ut'ihne, 'enne cha nduhút'en-un, 'aw lht'analhonidulh de, dzoh nodidoh-un bugha óotas'alh.

<sup>23</sup> 'Ink'ez ndun ts'eke buzkeh cha ubutisghan. 'Ink'ez Yak'usda ba 'ilhunaoodulhne, ts'iyawh t'ehontázin, si 'ust'oh dune bubeni toh 'ink'ez budzi bet cha hoonli hukwu nústa. 'Ink'ez 'ilhughun ahli whe nohe'ut'en k'oh huwa nohba k'elha whutiselh.

<sup>24</sup> 'Et hoonts'i nohni 'ink'ez 'uyoonne Thyatira whut'enne, ndun ts'eke ooghuni lhuhyóotun de, 'ink'ez soo Satan be 'ut'en 'uk'enus yoo yo 'unt'oh-i, whuz un'a nduhutni, 'i cha t'ehinúszun de, nohdusni, 'aw 'on 'un howa whúlna'-un nohgha lhótuzas'al.

<sup>25</sup> 'Et hoonts'i whusatsiyalh whuts'un, ndai la 'ut'en unzoo-i 'ulh'en-i soo cho oohun.

<sup>26</sup> Mbene la 'ut'en untsi'-i yuch'a' 'ulhdéhne 'ink'ez 'udek'ez whuts'un se' 'ut'en huyootun de, 'enne lhelhdun keyoh whut'enne bumoodih hutileh-un, 'et bugha óotas'alh.

<sup>27</sup> Ndunt'oh-un lhuztih tuz be 'usbai k'un'a butso nutíyalh 'ink'ez lhent'us oosa' 'i k'un'a yanúbutiyuz.

Whuz un'a 'et bugha tisdleh.

SBá si cha whuz un'a stl'ahón'ai.

<sup>28</sup> 'Ink'ez bundada' sum cha oogha yúntas'alh.

<sup>29</sup> Mbe la 'udits'one, Ndoni Yak'usda ba 'ilhunaoodulhni, dája ubulhni, 'en huyoozólhts'ai'."

### 3

*Keyoh Sardis dune Yak'usda ba 'ilhunaoodulhne, lhane dune 'uhutni, khahna whe aht'oh hutni, 'et hoonts'i yaidlanne ahli whe aht'oh, sba budóni'*

<sup>1</sup> "“Et keyoh Sardis dune Yak'usda ba 'ilhunaoodulhne bulizas, 'en oots'ó k'einges. Nja dudini:

Mbe la yak'usda lhtak'ant'i ndudeh-i 'ink'ez lhtak'ant'i sum cha nule-un, 'en 'utni:

Nohe'ut'en k'oh t'eeonúszun. Lhane dune cha 'uhutni, khahna hutni, 'et hoonts'i yaidlanne ahli whe aht'oh.

<sup>2</sup> Yak'usda ba nohe'ut'en 'aw soo lhe'ildzoo', 'et nawhus'ai. 'Et huwa soo cho huwahli! Whulohkhi 'ut'en unzoo-i nohbulh 'unt'oh, 'awet nilhdukw whe gak tileh. 'Inka 'ut'en unzoo-i cha 'on nus ulhtus ulhtsi.

<sup>3</sup> 'Et huwa whunalhni nts'en'a la ndi khuni dáhts'o 'ink'ez úlhchoot. Soo cho oohun 'ink'ez lht'ananoohdilh! 'Et 'aw whuz un'a za huwu lháhloh de,

soo 'undunut'ih-un k'un'a nohgha óontaz'ilh. 'Ink'ez nts'owhúya 'uhunit'oh-un nohts'un tísyalh 'aw t'ewhuntutázhin.

<sup>4</sup> Whulohne nyulh 'unt'ohne Sardis whut'enne, whulohneyaz, 'enne 'aw dunaih lhuhudíhtsun. 'Enne ulhyul-i be hudilhts'i whe sulh nótidulh. 'Et huba soo' huldzoo' 'et huwa.

<sup>5</sup> Mbene la 'ut'en untsi'-i ch'a 'ulhdehne, naih ulhyul-i be húdútalts'ilh. Ndi 'ilhiz ts'ukhuna-i be 'udustl'us k'ut, 'aw buboozi' 'uk'unatoosges ait'oh. SBÁ 'ink'ez oolizas bulh 'enne bubut 'enne sch'e'ne hinli budutásnelh.

<sup>6</sup> Mbe la 'udits'one, Ndoni Yak'usda ba 'ilhunaoodulhne, dájá ubulhni, 'en huyoozóhts'ai huba' hoont'oh."

*Keyoh Philadelphia dune Yak'usda ba 'ilhunaoodulhne, dzoh nusahde-un soo whulh nudalhya', sba budóni'*

<sup>7</sup> "Et keyoh Philadelphia dune Yak'usda ba 'ilhunaoodulhne bulizas, 'en oots'ó k'inges. Nja dudini:

Mbe la lúbeshi ooghu hooloh-un, ts'ih'un 'unt'oh-un cha, 'ink'ez lerwe David oolugli na'a-un. Mbe la dáha' da'aih-un, 'aw dune dana'do'alh ait'oh. 'Ink'ez dána'di'aih-un 'aw dune dahana'doo'alh ait'oh. 'En 'utni:

<sup>8</sup> Nohe'ut'en t'enuszun. Whunulh'en dati 'udun 'udiztan-un nohbut neónus'ai. 'Ink'ez 'aw dune dána'dotan ait'oh. Be ulhts-i ntsool-iyaz aht'i, sghuni cha oohtun, 'ink'ez soozi' 'aw oots'u lhoodáhdlai 'et huwa.

<sup>9</sup> Soo zulhts'ai, nyoonne Satan oolugliz whut'enne, 'enne lizwif hinli hutni 'et hoonts'i huwhuts'it whe' hutni, 'aw lizwif lhuhiloh. 'Aw nawh lhe'hoot'oh, nohghu bunúsdla 'ink'ez nohbut teni' hunilhdzun ubutiselh. 'Et huwa la t'ehonózin nohk'esi' inle'.

<sup>10</sup> Nohdásní' dzoh nusahde-un soo whulh nudalhya. 'Et whuz un'a sk'une' zaht'en. 'Et huwa ndi yun k'ut ndulcho whe dune dzoh nutidoh-un whusaóotilts'ulh ubootáldzih ha. 'Et whutso whuch'a nanohtásdleh.

<sup>11</sup> Soo zúlhts'ai, khunsul 'utisnelh whusatisyalh. Ts'ih'un aht'oh-un soo cho hoohtun. 'Et la hukw'elha aht'en-un 'aw 'uyoonne nohgho hólhchoot ait'oh.

<sup>12</sup> Mbene la ndi 'ut'en untsi'-i ch'a 'ulhdehne, ndunt'ohne 'ants'i sYak'usda oolugliz whucho whut'ah nain'a-i ubutiselh. 'Ink'ez 'aw tenáhotisdulh. SYak'usda boozi', 'i buk'eyítasgus. 'Ink'ez sYak'usda ookeyoh whuti-un 'oozi', 'andit-un Jerusalem huwhutni, 'i cha buk'eyítasgus. Yak'uz ts'e sYak'usda oots'u haootilts'ulh. 'Ink'ez 'andit-i soozi', 'i cha buk'eyítasgus.

<sup>13</sup> Mbe la 'udits'one, Ndoni Yak'usda ba 'ilhunaoodulhne, daja ubulhni, 'en huyoozóhts'ai'."

*Keyoh Laodicea dune Yak'usda ba 'ilhunaoodulhne, whulohne sghuni 'ants'i nohba 'unt'oh, sba budóni'*

<sup>14</sup> "Et keyoh Laodicea dune Yak'usda ba 'ilhunaoodulhne bulizas, 'en oots'ó k'inges. Nja dudini:

Mbe la ndó honeh-un, 'ink'ez oonalh 'úwhut'en-un cha, 'ink'ez oot'aniuznintan-un cha 'ink'ez ts'ih'un un'a 'unt'oh-un cha. Ndaí la Yak'usda 'uyinla-i 'en 'udechoo whé'whudilh'en-un 'unt'oh, 'en 'utni:

<sup>15</sup> Nohe'ut'en k'oh ts'iyawh t'oonúszun. Nts'en'a la Yak'usda ba aht'en-un, 'aw tube cha lhnáhk'uz 'ink'ez 'aw tube cha lhnúlhwus, soo cho náhk'uz k'us nulhwus 'et da' nohba hukwa' nooszin oole'.

<sup>16</sup> 'Aw lhnáhk'uz cha aht'oh 'ink'ez 'aw lhnúlhwus cha aht'oh. 'Ants'i nahzulyz le'aht'oh. 'Et huwa sze whe n'un nohtisdzoh.

<sup>17</sup> Lhe'dahni, 'Hoonzoo' ts'int'oh 'on nus cha hoonzoo ts'uja. 'Aw 'uyoo hoonliyaz ka lhe'uznizun,' dahni. 'Et dahit'oh la dalhtsi' la ts'iyantsuk nohba nek'e' hoot'oh cha aht'oh. Teilh'en cha aht'oh. Whuzih'en cha aht'oh, 'ink'ez ust'et aht'oh.

<sup>18</sup> Ndaí la gold kwun be 'on nus 'uldzoo' suli'-i, 'i si sts'un óohket nohdusni. 'Et de la hoonzoo 'ooht'e'. 'Ink'ez naih ulhyul-i, 'i cha sts'un óohket. 'Et de la 'et dune oohe', 'ink'ez 'ust'et ahli-un cha la hukwa yálhuzoohe'. Na yoo, 'i na k'et dúlhye, 'et de la soo hóoh'en.

<sup>19</sup> Mbene la k'eke k'un'a buk'esi'ne, 'enne ts'iyawh khuni ulhtus-i be bubulh yasduk 'ink'ez ts'ih'un un'a nenábusdlih. 'Et huwa nohdzi ulhtus cho ulh'i 'ink'ez noheni náhandunoohelelh.

<sup>20</sup> Soo zulhts'ai, dati susyin 'ink'ez dati dunuzkw'uz. Mbe la sudits'o-un 'ink'ez sba dáha' dantan-un, ooghu datsiyalh 'ink'ez bulh na'tist'ulh 'ink'ez didut cha sulh na'tit'ulh.

<sup>21</sup> Mbe la ndi 'ut'en ntsi'-i ch'a 'ulhdeh-un, skw'uts'uzda cho k'ut szih tidalh-un oogha óotas'alh. Si cha whuz un'a cha whuch'a nusde 'ink'ez 'uBá ookw'uts'uzda cho dizti'-i, 'i k'ut oozih nat'l'adisda'.

<sup>22</sup> Mbe la 'udits'one, Ndoni Yak'usda ba 'ilhunaoodulhne, dája ubulhni, 'en huyoozólhts'ai'."

## 4

### *John ndo yak'uz 'ilho dati 'udun diztan whunilh'en*

<sup>1</sup> 'Et hukw'elh'az whunus'en 'ink'ez ndo yak'uz 'ilho dati 'udun diztan whutís'en. 'Et 'udechoo yatilhduk-i duzústs'ai, 'ants'i be ts'ujih be yálhduk le'utni. "Ndiz sts'u dugha inyaih, 'ink'ez 'andit hukw'elh'az daóotanelh-un whúnyuntistun," sulhni.

<sup>2</sup> 'Et 'aho 'ants'i Ndoni bulh sulh wheóodande lé'usja. 'Ink'ez yak'uz kw'uts'uzda cho dizti'-i us'ai 'i k'ut 'ilhoghun yuk'usda, 'et whutís'en.

<sup>3</sup> 'Ink'ez nyoon hukw'usda-un 'ants'i tse dunízti'-i, jasper huyulhni, 'ink'ez carnelian tse cha, 'et whuz un'a ndoút'en. 'Ink'ez ndi kw'uts'uzda cho dizti'-i, 'i ditni nayúgus-i, 'i oonayuzt'i, 'ants'i tse emerald huyulhni 'i ndoút'en.

<sup>4</sup> Ndi kw'uts'uzda cho dizti'-i oonat nat whunizyai 'on 'at dunghi kw'uts'uzda cho dizti'-i, 'i oonaidilhya. 'Ink'ez ndi kw'uts'uzda cho dizti'-i nat whunizyai 'on 'at dine útso whudilhdzuhlne hik'udilhst'i. Naih ulhyul-i be dune hinli. Gold nanizts'un-i butsi k'éyuzdla.

<sup>5</sup> Ditni oolhges, ditni cha, 'ink'ez lhai yaduk-i cha ndi kw'uts'uzda cho dizti'-i oots'u haídukat. 'Ink'ez ndi kw'uts'uzda cho dizti'-i oobut lhtak'ant'i be hoot'en-i dizk'un. 'I ndi lhtak'ant'i Yak'usda oonududeh-i, 'i 'unt'oh.

<sup>6</sup> 'Et ndi kw'uts'uzda cho dizti'-i oobut 'et bunghun wuhocho dizghel k'et too 'ants'i khe le'unt'oh, 'et whuz'ai le'hoont'oh. Lhum dant'oh la ookiúnt'en 'et ndóhot'en. Ndi kw'uts'uzda cho dizti'-i ook'ut cha 'ink'ez oonat cha dunghi hoonliyaz usjiz-i, 'una za unli, bubut ts'e cha 'ink'ez but'a ts'e cha 'una bughu nízla.

<sup>7</sup> 'Udechoo usjiz-i, 'i khuna-iti, lion, doút'en. Bulh nanki usjiz-i, 'i musdoosyaz doút'en. Bulh ta-i usjiz-i, 'i dune k'un'a oonin hoonli. Bulh dunghi usjiz-i, 'i 'ants'i tsibalyan ut'oh-i le'unt'oh.

<sup>8</sup> 'I nyoo dunghi usjiz-i, 'ilho whe lhk'uta ye nut'o-i ooghu yuzdla. 'Ink'ez ndulcho whe 'una za unli ooyo ts'e cha. 'Aw 'ulhdzis 'ink'ez dzenis ibulh nalhuhulhyiz whe njan duhútni,

"Lubeshi ooghu hooloh-un,  
lubeshi ooghu hooloh-un,

lubeshi ooghu hooloh-un,  
 Yak'usda neMoodihti,  
 'en ts'iyai tsuk anus ulhtus-un 'unt'oh.  
 Mbe 'ant'e'-un, 'ink'ez 'unt'oh-un,  
 'ink'ez whusatiyalh-un," hutni.

<sup>9</sup> Ndun 'ilhiz 'ink'ez 'ilhiz wheni khuna-un, kw'uts'uzda cho dizti'-i usda-un, 'en ndunne hoonliyaz usjizne, soo cho ne'hiduni', 'ink'ez hidilhti', 'ink'ez nenachail'en huyúlhni totsuk,

<sup>10</sup> 'et ndunne nat whunizyanne 'on 'at dine dune 'utso whudilhdzulhne, mbe la kw'uts'uzda cho dizti'-i k'ut usda-un, 'ilhiz 'ink'ez 'ilhiz wheni khuna-un, 'en hibut nacháhunuldulh, hits'u téni' hunilhdzun cha' hut'en. 'Ink'ez butsi k'éyuzdla-i hibut nehíninla, 'ink'ez 'uhutni,

<sup>11</sup> "O neMoodihti nts'u ha 'ánduz, dínti',  
 'ink'ez ilhtus cha 'int'oh.

'I ts'iyawh 'et ndun ts'ídoni' huba soo 'ílzoo',  
 ts'iyaitsuk inla 'et huwa.

Nyun inla 'et huwa 'unt'oh,  
 'et whuz un'a hukwa' ninzun."

## 5

### *'Udustl'us ook'une'úsguz-i, 'i Yak'usda be 'usbaiyaz yílhchoot*

<sup>1</sup> Njan 'et whunus'en, mbe la kw'uts'uzda cho dizti'-i yuk'usda-un, 'en nailhni ts'unguz dula be 'udustl'us lhch'az ts'e ook'une'úsguz-i, 'ink'ez 'udustl'us lhyúnduniduz. 'Ink'ez lhtank'ant'it-un, 'et bune'dilhze.

<sup>2</sup> 'Et 'ilhoghun lizas soo ulhtus-un tís'en. 'Ink'ez tube cho njan dutni, "Mbe soo 'uldzoo'-un, 'en ndi 'udustl'us yadáha' dutilhch'ulh 'ink'ez lheaíduntidus?"

<sup>3</sup> Ndo yak'uz, k'us yun k'ut, k'us yun t'ah cha, 'aw 'ilhoghun soo lhé'ildzoo'-un hooloh ndi 'udustl'us yadáha' dutilhch'ulh k'us yuntilh'elh huba.

<sup>4</sup> 'Ink'ez 'aw 'ilhoghun soo lhe'ildzoo' ndi 'udustl'us yadáha' dutilhch'ulh, 'ink'ez yuk'uyatilhduk k'us yuntilh'elh. 'Aw nahuyólhTELh ait'oh, 'et huwa tube huwose.

<sup>5</sup> 'Et 'ilhoghun 'utso whudilhdzulh-un, 'en 'usúlhni, "Intso iloh! Nilh'en Judah bulh didowhne bubukhuna-i cho, lion huyúlhni, mbe la lerwe David ts'u haínzut-un, 'en 'uja ts'iyantsuk whuch'a' nilhde. 'En za soo 'úldzoo' ndi 'udustl'us yadáha' dutilhch'ulh, 'ink'ez ndi lhtak'ant'i be lhúnedilhze-i yadáha' dutilhch'ulh."

<sup>6</sup> 'Et ndet la whutís'en tube sba hooncha. Ndi kw'uts'uzda cho dizti'-i 'ink'ez ndi dunghi hoonliyaz 'usjiz-i, 'ink'ez 'utso whudilhdzulhne butoh cha, 'et 'usbaiyaz 'ilho hizilhghi-i dóut'en 'et usyin. Oode lhtak'ant'i 'ink'ez lhtak'ant'i 'una cha unli. 'I oona 'i 'unt'oh Yak'usda ooch'e' unli lhtak'ant'i nududeh-i. 'I ndi yun k'ut ndulcho whe whé'a'.

<sup>7</sup> 'Et ndi 'usbaiyaz mbe la kw'uts'uzda cho dizti'-i k'usda-un, 'en nailhni ts'ungus 'udustl'us yoontun-i, 'i yula k'éhayan'ai.

### *Yak'usda be' 'usbaiyaz 'aw 'en za soo 'uldzoo'*

<sup>8</sup> 'Et ndi 'udustl'us yílhchoot ibulh, ndi dunghi hoonliyaz 'usjiz-i, 'ink'ez nat whúnizyane 'on 'at dine tso whudilhdzulhne cha, ndi 'usbaiyaz hibut nacháhunildil. 'Ilhoghun hinli ts'iyawh nela be, be ts'ujun-i nuhúle, 'ink'ez tsets'ai gold unli-i, 'i ndi dizk'un-i sooltsun-i bet whúdízbun. 'I ndi 'i 'unt'oh mbene la Yak'usda ooch'e'ne butenadudli 'unt'oh.

<sup>9</sup> 'Ink'ez 'andidi shun 'i hiyé whenijun whe nja duhutni,

“Ndi 'udustl'us itálhchulh  
 'ink'ez oodáha' datalhch'ulh 'et huba soo 'íldzoo'.  
 Dune nyoziilghí 'ink'ez 'uyoonne ts'iyanne didohne,  
 'ink'ez lhelhts'un un'a yalhdukne cha,  
 'ink'ez 'uyoonne dune,  
 'ink'ez lhelhdun keyoh whut'enne cha,  
 nyuzkai' be Yak'usda ba naneonket, 'et huwa.

10 'Ink'ez neYak'usda ba lerwene  
 'ink'ez lubretne nezilhtsi.  
 'Ink'ez ndi yun k'ut k'úne' ts'otil'elh ha uzdutáts'ilh.”

11 'Et njan whutís'en 'ink'ez whudásts'o ndi kw'uts'uzda cho dizti'-i, 'ink'ez  
 hoonli usjiz-i cha, 'ink'ez 'utso whudilhdzuhlne, 'enne cha, 'enne bunat lhane  
 lizasne, 'enne whuz huldlai k'et 'aw buts'olhto ait'oh,

12 'enne tube cho njan duhútni,  
 “Ye ulhtus-i, hiye hoonzoo 'unt'oh-i,  
 be whútñih-i,  
 'ink'ez nut'i cha, be uzdziti'-i,  
 'ink'ez be hóot'en-i,  
 'ink'ez ts'uhóont'i' te bé ne'ts'ul'en-i,  
 'usbaiyaz hizilghí-i,

'en 'unt'oh ndowhi ts'iyawh huba soo 'úldzoo' whe whuz un'a uzdólhti'.”

13 'Ink'ez ndai la usjiz ndo yak'uz 'unt'oh-i, ndi yun k'ut cha, 'ink'ez ndi yun  
 oot'ah ts'e cha, 'ink'ez dai la ya too k'ut hoonli-i, 'enne ts'iyawh njan duhútni  
 whe ubudusts'o,

“Ts'uhóont'i' te bé ne'ts'ul'en-i,  
 be uzdziti'-i, be hóot'en-i,  
 'ink'ez ts'iyantsuk ook'une' whut'en-i cha,  
 mbe la kw'uts'uzda cho dizti'-i k'usda-un cha,  
 'ink'ez 'usbaiyaz hizilghí-i cha,  
 'ilhiz 'ink'ez 'ilhiz wheni buch'e' yole'.”

14 'Et ndi dunghi usjiz-i, 'i 'utni, “‘Et ndo honeh!’” ni. 'Ink'ez nat whunizyat 'on  
 'at dine 'utso whudilhdzuhlne, oobut nacháhumildil 'ink'ez ndun 'ilhiz wheni  
 khuna-un hits'u teni' nalhdzin.

## 6

### *'Udechoo 'udustl'us lhudildze-i*

1 'Et ndi 'udustl'us be lhídildze-i 'ilho 'i 'usbaiyaz yuts'u hayálhch'ul 'et  
 whutís'en 'ink'ez dunghi usjiz-i butoh 'ilhoghi 'i duzusts'ai. 'Ants'i ditni k'un'a  
 'utni 'ink'ez “‘Anih 'ink'ez whunilh'en!’” ni.

2 'Et whunus'en 'ink'ez yeztli ulhyul-i tis'en. Mbe la yuk'usda-un k'aza  
 nutun. 'Ink'ez ndai la netsi k'ustan-i nanizts'un-i, 'i ootl'ayílt's'ut. 'Et whuz  
 un'a ts'iyanne ch'a' tilhdoh 'ink'ez whuch'a butálhdoh ha, 'et whuz whinya.

### *Bulh nanki 'udustl'us lhudildze-i*

3 'Et bulh nanki 'udustl'us be lhídildze-i, 'i yudáha' dalhch'ul. 'Ink'ez bulh  
 nanki usjiz-i, 'i 'utni whe dasts'o, “‘Anih 'ink'ez whunilh'en!’” ni.

4 'Ink'ez 'uyoo yeztli, tube dúlk'un-i, whuz whelget. Mbe la yuk'usda-un,  
 'en be ts'ih'un un'a lhts'un 'uts'int'oh-un, ndi yun k'ut whut'enne bughu  
 hootálhchulh, 'et yutl'ahon'ai dune lhoohoogan ha. 'Ink'ez saluzti cho 'i  
 ootl'ayánkez.

### *Bulh ta-i 'udustl'us lhudildze-i*



<sup>5</sup> Ndet la bulh ta-i 'udustl'us be lhídildze-i yudáhaidalhch'ul. Ndi bulh ta-i usjiz-i dasts'o 'ink'ez 'utni, "Anih, whunilh'en!" Whuz yutas'en 'ink'ez yeztli dulhk'us-i, 'i tis'en. Mbe la yuk'usda-un, 'en bé ne'uldas-i, 'i oola k'é't yuzdla.

<sup>6</sup> 'Ink'ez ndi dunghi usjiz-i ootoh ts'e 'uwhutni, "Lhes hanúyeh-i oosa' 'ilho dizbun, 'i 'ilho sooneya denarius huyúlhni-i, 'i k'elha yutiz'ai. 'Ink'ez ta oosa' ndultsuk-i tl'o mai', barley huyúlhni-i, 'i 'ilho sooneya denarius huyúlhni-i, 'i k'elha yutiz'ai. 'Ink'ez khe be 'ut'es-i 'ink'ez ts'ekoo too' cha, 'i 'ohwhi khun te ninta' oolh'en junih."

### *Bulh dunghi-i 'udustl'us lhudildze-i*

<sup>7</sup> 'Et bulh dunghi-i 'udustl'us be lhídildze-i, 'i yudáha' dalhch'ul whe bulh dunghi-i usjiz-i 'et ndutni whe dást's'o, "Anih 'ink'ez whunilh'en!"

<sup>8</sup> Whunus'en 'ink'ez yeztli 'ants'i bodande-i doút'en-i. 'Ink'ez yuk'usda-un boozi', 'i be yáts'adlah-i huyúlhni. 'Et niz de yaidlanne dilhts'i-un, Hades huwhútni-un, 'et buwhunilts'ulh. Ndi yun k'ut whut'enne hoontsool-unyaz, nedo k'oh, ¼ huwhutni-un, 'et 'uwulcho-un ubuhutighan, 'et bughá whults'ut. Saluzti be, 'ink'ez dai cha, dada nudúzut-i, 'i cha, 'ink'ez chuntoh khuna-i, 'ohwhi be dune yahitádlah.

### *Bulh kwulai' 'udustl'us lhudildze-i*

<sup>9</sup> Ndet la bulh kwulai'-i 'udustl'us be lhídildze-i yudáha' dalhch'ul whe mbene la Yak'usda ooghuni gha 'ink'ez highuni ghu yalhdukne dune ubanghanne buzul, 'enne loodel t'ah ubutís'en.

<sup>10</sup> 'Et tube cho njan duhútni, "Nek'une' 'ul'en-un nyun lubeshi nghu hooloh-un, 'ink'ez ts'ih-un 'int'oh-un cha inli. Ndi yun k'ut mbene la neanghanne dawhuldzoh neuzkai' gha buba nahutanyeh 'ink'ez neba k'utántnelh?"

<sup>11</sup> 'Ink'ez 'ilhoghun hinli whe ulhyul-i nahuyits'uz-i butl'a' húninla. 'Ink'ez ubuhútni, bubulh 'ulhnane 'ink'ez bubulh utsinke 'enne cha ts'iyawh 'enne buk'un'a za hubuhutighan, 'et lhaoodutanelh whuts'un, nahoolyis.

### *Bulh lhk'uta-i 'udustl'us lhudildze-i*

<sup>12</sup> 'Et 'usbaiyaz 'et bulh lhk'uta-i 'udustl'us be lhídildze-i yudáha' dalhch'ul whe khunsul tube yun núkhisna-i, 'ink'ez sa cha dulhk'us sulí', naih dulhk'us-i doút'en. 'Ink'ez 'ulhdzis ooz'a' cha, 'ants'i 'uskai' doút'en sulí'.

<sup>13</sup> 'Ink'ez sum 'i cha yun k'ut nainkat. Ndi duchun figs mai' ntít'ai whutso 'ants'i nilhtsi ulhtus-i be yun nanukuk, 'et whuz un'a sum yun k'ut nainkat.

<sup>14</sup> 'Ink'ez nts'en'a la 'udustl'us lhenahinudus, 'et whuz un'a yat'a lhenawhuniduz 'et whuz un'a gak whuzdli'. Dzulh cha 'ink'ez noo te, ts'iyawh whuzdla-un 'udun neninkat.

<sup>15</sup> Ndi yun lerwene, dune nchane cha, dune hoonzoo 'unt'ohne cha, lhuganne bumoodihne cha, dune ulhtusne cha, 'ulhnane ts'iyawh cha, 'ink'ez 'ulhnane bula naditnine, 'enne cha, 'enne ts'iyawh tse 'an 'ink'ez dzulh toh tse t'ah, 'oh huntilh'i.

<sup>16</sup> 'Ink'ez 'uhutni, "Tse 'ink'ez dzulh tubulh nek'elhúhot'alh. 'Et de la mbe la kw'uts'uzda cho dízti'-i k'usda-un, 'en oonin 'ink'ez 'usbaiyaz ye húnilch'e-i, ch'a neúntoolh'i.

<sup>17</sup> 'Alha ye nebulh hunilch'e-i 'awet whudzin whusahóolts'ut. 'Aw 'ilhoghun hoonts'i whulh ooyin aít'oh."

1 'Et hukw'elh'az dine lizas ndi yun k'ut didun nódilhya whe ubutís'en. Ndi nilhtsi dunghi ndi yun k'ut 'ink'ez yatoo k'ut, 'ink'ez duchun cha, 'ohwhi ook'ut noolhts'i ha, 'et whuch'a k'oh húyoontun.

2 'Et 'uyoon lizas ndaz de ndo út'oh whe tís'en. Yak'usda khuna-un ye hóodalh'eh-i, 'i yi'alh. 'Et ndunne dine lizasne, 'enne yun cha 'ink'ez yatoo bulh ninta' hotálh'elh ha bughá whulst'ut. Soo 'ultus whe

3 'enne ubulhni, "Mbene la neYak'usda be 'ulhna online, 'enne 'et Yak'usda ye 'ehóodalh'eh-i, 'i be buninta bube hóodat'en buts'u tilhtselh, 'et whutso ndi yun, ya too cha, 'ink'ez duchun cha ninta' oolh'en junih!" ubúlhni.

4 'Et dáltukne buninta bube hóodat'en suli'ne whudásts'o. Israel ts'u haíndene bubuzkeh, lhelhdoh didowhne, 'enne ts'iyawh 144,000ne hinli. 'Enne ts'iyawh buninta bube hoodat'en bubuhulhtsi.

5 Judah bulh didowhne ts'u haíndene,  
'enne 12,000ne bube hoodat'en bubuhulhtsi.

Reuben bulh didowhne ts'u haíndene,  
'enne 12,000ne bube hoodat'en bubuhulhtsi.

Gad bulh didowhne ts'u haíndene,  
'enne 12,000ne bube hoodat'en bubuhulhtsi.

6 Asher bulh didowhne ts'u haíndene,  
'enne 12,000ne bube hoodat'en bubuhulhtsi.

Naphtali bulh didowhne ts'u haíndene,  
'enne 12,000ne bube hoodat'en bubuhulhtsi.

Manasseh bulh didowhne ts'u haíndene,  
'enne 12,000ne bube hoodat'en bubuhulhtsi.

7 Simeon bulh didowhne ts'u haíndene,  
'enne 12,000ne bube hoodat'en bubuhulhtsi.

Levi bulh didowhne ts'u haíndene,  
'enne 12,000ne bube hoodat'en bubuhulhtsi.

Issachar bulh didowhne ts'u haíndene,  
'enne 12,000ne bube hoodat'en bubuhulhtsi.

8 Zebulun bulh didowhne ts'u haíndene,  
'enne 12,000ne bube hoodat'en bubuhulhtsi.

Joseph bulh didowhne ts'u haíndene,  
'enne 12,000ne bube hoodat'en bubuhulhtsi.

Benjamin bulh didowhne ts'u haíndene,  
'enne 12,000ne bube hoodat'en bubuhulhtsi.

### *Ndunne ulhyul-i be dilhts'ine*

9 'Et hukw'elh'az whunis'en 'ink'ez lhane dune, huldlaí k'et 'aw ubuts'olhto ait'oh, 'enne ubunus'en. Lhelhdun keyoh whut'enne, lhelhdoh didowhne cha. Yinka dune'ne cha. Ts'iyawh lhelhts'un un'a yalhdukne 'uhint'oh. 'Enne ts'iyawh kw'uts'uzda cho dizti-i 'ink'ez 'usbaiyaz hibut núdilhya. Ts'iyawh ulhyul-i nahuyits'uz-i be dune hinli 'ink'ez 'ul t'otel ndoút'en-i, 'i nuhídúle.

10 'Et 'enne tube cho 'uhutni  
"NeYak'usda kw'uts'uzda cho dizti-i k'usda-un  
'ink'ez 'usbaiyaz cha,

be uzdujih-i, 'enne buts'u hahóolts'ut!"

11 'Ink'ez 'utso whudilhduzhne, 'ink'ez dunghi usjiz-i cha, 'ink'ez lizasne cha, 'enne ts'iyawh ndi kw'uts'uzda cho dizti-i, 'i hinat núdilhya 'ink'ez hibut nacháhunildil 'ink'ez Yak'usda hits'u teni' nallhdzin.

12 'Ink'ez 'uhutni,  
"Ndo honeh! Uzdólhti'.  
'Et huwa ye dizti-i cha,

'ink'ez be whútnih-i,  
 be ts'ilhtus 'ink'ez nut'i cha,  
 be musi ts'utni cha,

'ink'ez be uzdzitzi'-i,  
 'ohwhi neYak'usda ooch'e' yole' 'ilhiz 'ink'ez 'ilhiz wheni.

'Et ndo honeh!"

<sup>13</sup>'Awet 'ilhoghun 'utso whudilhhdzulh-un, 'en 'usúlhni, "Nduhne ulhyul-i be dilhts'ine, mbene whe' hint'oh? 'Ink'ez nts'ez de hahándil?"

<sup>14</sup>'Et 'udúsni, "SMoodih nyun t'oonínzun." 'Et 'usúlhni, "'Oh de soo 'uk'enus dune dzoh nuhutidoh, 'enne 'uhuja 'oh da' whuz un'a dzoh nuhuzde. 'Ink'ez 'usbaiyaz buzkaí' be dunaih tunáhuyuzguz 'ink'ez ulhyul sulí'.

<sup>15</sup>'Et huwa Yak'usda ookw'uts'uzda cho diziti'-i hinat núdilhya.

'Ink'ez dzin 'ink'ez 'ulhdzis ibulh hilugliz whucho hiba ne'ut'en.

'Ink'ez mbe la ndi kw'uts'uzda cho diziti'-i yuk'ut usda-un,  
 'en butoh 'unt'oh 'ink'ez bughu tileh.

<sup>16</sup>'Aw 'on 'un buyelhé'tilhts'ul  
 'ink'ez 'aw 'on 'un ta'hósda ait'oh.

'Aw sa zul niz cha 'uhoot'e' ait'oh,  
 'ink'ez 'aw tube cho buba whunoolwus ait'oh.

<sup>17</sup>'Et huwa 'ubinla, 'usbaiyaz kw'uts'uzda cho diziti'-i butoh 'unt'oh,  
 'en bughu tileh whe butso tiyalh

'ink'ez ndi too 'ilhiz wheni ook'u ts'ukhuna-i,  
 'i ts'un úbutileh.

'Ink'ez Yak'usda bunatsul too' ts'iyawh buna k'et whúnaitilhдох."

## 8

### *Bulh lhtak'ant'i 'udustl'us lhudildze-i*

<sup>1</sup>'Et 'awet 'usbaiyaz ndi búlh lhtak'ant'it 'udustl'us be lhidildze-i yudáha' dalhch'ul whe sadzi lhóhoolcho ha' hunit'o whe 'et 'uwuhldzo at'en, 'et yak'uz t'eoodánel.

<sup>2</sup>Lhtak'ant'ine lizasne Yak'usda but núdilhyane ubutís'en. 'Ink'ez lhtak'ant'i be ts'újih-i, 'i butl'a yánkat.

<sup>3</sup>'Et 'uyoon lizas kwun tsit be nut'a-i, gold be 'ulya-i na'a, whusainya 'ink'ez loodel but usyin. Bet yudutálhk'un-i sooltsun-i lhái hitl'aíndzai. 'I ndi Yak'usda ooch'e'ne butenadudli, 'i bulh loodel, gold be 'ulya-i, 'i k'ut néyoooleh ha. Ndi loodel 'i kw'uts'uzda cho diziti'-i oobut yuzkai.

<sup>4</sup>Ndi kwun tsit be nut'a-i sooltsun-i oolut 'ink'ez ndunne Yak'usda ooch'e'ne butenadudli 'i bulh, ndun lizas oola k'et ts'e Yak'usda ts'un whe dúkat.

<sup>5</sup>'Et ndun lizas kwun tsit be nut'a-i yílhchoot 'ink'ez loodel k'ut kwun 'i be yudilhun. 'Ink'ez yun k'éyilhkat. 'Ink'ez khuni lhái, 'i be taooditni-un, ditni dutni cha, ditni oolhges cha, 'ink'ez yun cha núkhisnai.

<sup>6</sup>'Et ndunne lhtak'ant'ine lizasne, lhtak'ant'i be ts'újih nulene, huye tijih wheni lhaháduja.

### *Udechoo be ts'ujih-i yé' dija*

<sup>7</sup>'Et 'udechoo lizas be ts'ujih-i yé' dija, 'ink'ez 'indloo tsan 'ink'ez kwun 'i 'uskai' bulh 'unt'oh-i, 'i yun k'e híyilhkat. 'Et ndi yun k'ut whuduchun ½ 'i dánk'un. 'Ink'ez yun whut'an niyilh-i ts'iyawh cha dánk'un.

### *Be ts'ujih-i bulh nanki-i yé' dija*

<sup>8</sup> 'Et lizas bulh náne-un be ts'ujih-i be 'udija. Dzulh cho dult'oh-i kwun be dizk'un-i yatoo k'ut tahúyalh'uz. 'Et yatoo ½ 'i 'uskai' za suli'.

<sup>9</sup> Yatoo k'ut khuna-i ½ 'i yaidla. 'Ink'ez ts'i cho nukat-i ½ 'i cha musai suli'.

### *Bulh tane be' ts'ujih-i yé' dija*

<sup>10</sup> 'Et bulh táne lizas be ts'ujih-i be 'udija. 'Ink'ez sum cho yak'uz ts'e halts'ut. Be nekwunult'a-i k'un'a dizk'un 'ink'ez 'ukoh ½ 'et 'uwuhultsuk-un hukw'eilhts'ut. 'Ink'ez too yun ts'u hánusuli-un k'ut cha.

<sup>11</sup> Ndi sum, 'i wormwood, 'i boozi'. Ndi boozi' ts'ulki', 'i huyúlhni. 'Ink'ez too ½ 'i wormwood, 'i suli'. 'Ink'ez dune lhane ndi too hik'eyaídla, ts'iyawh ts'ulki' suli' 'et huwa.

### *Bulh dunghi be ts'ujih-i yé' dija*

<sup>12</sup> 'Et lizas bulh dinene be ts'ujih-i be 'udija whe dzenis ooza', 'ulhdzis ooza' cha, 'ink'ez sum cha ts'iyawh ½ 'i 'ohwhi oot'a'aznai. 'I ts'iyawh dulhghus suli'. 'Et huwa dzenis ½, 'ulhdzis cha ½ tsahólhghus suli'.

<sup>13</sup> 'Et yat'ah ts'e 'ilhoghun lizas 'oh whúya ut'o, 'et nus'en, 'ink'ez soo 'ultus-un whe nja dutni, "Nohni ndi yun k'ut dilhts'ine, 'uk'enus hoontsi'-un nohts'u hóokulh, 'uk'enus hoontsi'-un nohts'u hóokulh, 'uk'enus hoontsi'-un nohts'u hóokulh, ndi tane lizasne be ts'ujih-i be 'awet hiye tǵijh 'et huwa!"

## 9

### *Bulh kwulai' be ts'ujih-i yé' dija*

<sup>1</sup> 'Et bulh kwulane lizas be ts'ujih-i be 'udija, 'ink'ez sum ndus de yun k'élts'ut, 'et whunus'en. 'En ndi tsak'et whucho whutl'ah hooloh-un whulugli, 'en ootl'ayílt'sut.

<sup>2</sup> 'Ink'ez njan tsak'et whucho whutl'ah hooloh-un whudáha' dan'ai. 'Et 'ants'i yoh be oonulwus-i cho k'un'a lhut nyus de hanído. 'I be dzenis ooza' cha 'ink'ez yat'ah 'i bulh ndulcho whe tsahólhghus suli'.

<sup>3</sup> 'Et ndi tulk'us cho lhut tahaíndil 'ink'ez yun k'eíndil. Ndi tulk'us cho nts'en'a hukwa' ninzun ne'tit'en-un, 'et ooghá whults'ut. Ndi lubezo unli-i, scorpion huyulhni, nts'en'a hukwa' ninzun te ne'ut'en 'i k'un'a.

<sup>4</sup> Ndi tulk'us cho 'i khuni hitl'adánla yun k'ut tl'o hanúyeh-i, k'us hanúyeh-i, duchun te, 'ohwhi ninta' yólh'en junih huyúlhni. Mbene dune Yak'usda ye 'ehóodalh'eh-i buninta buk'uhoohlone, 'enne za ubundóldah huyúlhni.

<sup>5</sup> 'Ink'ez ubutighan-un oogha lhuhoalts'ulh. 'Ants'i kwulai' sanun 'et dzoh nuboolhdzut. Ndi scorpion huyulhni ubooget-un whuz un'a hukw'e húduntida'.

<sup>6</sup> 'Oh de dzin whusahóolts'ut de, 'et dune whe yahitadlah-un hukwa huntitalh 'et hoontsi' 'aw nahohó'alh ait'oh. Yahitadlah-un tube hukwa' huntizilh 'et hoontsi' 'aw yahódlah ait'oh.

<sup>7</sup> Ndi tulk'us cho 'ants'i yeztli dune lhutigan ts'e tilh'az duhóotat'en. Ootsi k'eyuzdla gold dout'en-i, 'i ootsi k'éuzdla. 'Ink'ez oonin 'i cha dune nin dóut'en.

<sup>8</sup> Ootsigha', 'i cha ts'ekoo tsigha' dóut'en. ooghoo, 'i cha khuna-iti, lion huyulhni, ooghoo 'et ndóut'en.

<sup>9</sup> 'Et lhuztih dzoot ni'dilya-i hiyé dilhts'i. 'Ink'ez oots'unt'a' 'i cha 'ants'i yeztli lhai 'ilhgooh-i dune lhugan ts'u tilghaz 'et ndutni.

<sup>10</sup> 'Ink'ez ooche 'ants'i scorpion ooche ndóut'en. 'Ink'ez ooche be 'ooget 'ink'ez ook'e whúnduda. 'Et dune kwulai' sanun dune ubundoolhda-un, 'et ooghá whults'ut.

<sup>11</sup> 'Ink'ez tsak'et whucho whutl'ah hooloh-un whulizas 'en bulerwe unli. 'En Hebrew buk'un'a Abaddon huyulhni, 'ink'ez Greek buk'un'a Apollyon be húyoozi.

<sup>12</sup> 'Et 'awet 'udechoo 'uk'enus hoontsi'-un whe hoolts'ut. Soo zúlhts'ai, nawh 'uk'enus 'on nus hoontsi'-un whuz de hoolts'ulh.

*Bulh lhk'uta be ts'ujih-i yé' dija*

<sup>13</sup> 'Awet bulh lhk'utane lizas be ts'ujih-i be 'udija. 'Ink'ez ndi loodel gold be 'ulya-i, Yak'usda but uskai-i, 'i loodel dunghi oode yinli-i, 'i bez 'uwhutni.

<sup>14</sup> Bulh lhk'utane lizas be ts'ujih nutún-un, 'en 'uts'utni, "Nduune dine lizas 'ulhghelne 'ukoh whucho Euphrates huwhútni-un, 'enne bula nadontnih."

<sup>15</sup> 'Et ndunne dine lizasne nts'owheya 'uhunit'o, ndet dzin, ndet sanun, 'ink'ez ndet yus k'ut wheni, 'et wheni lhahúdiint'oh ndi yun k'ut dune ½ 'enne uboohooghan ha bula huditni.

<sup>16</sup> Nduune lhuganne yeztli k'udilhts'ine, 200,000,000ne hinli, 'et 'uhultsuk-un whudásts'o.

<sup>17</sup> Njan hoos'en-un, 'et yeztli cha us'en. 'Et mbene la yuk'udilhts'ine, lhuztih dzoot ni'dinla-i kwun le'unt'oh dulk'un, duldzan-i 'ankw'us dulghus le'unt'oh-i, 'ink'ez sulphur k'un'a dult'uz 'i be húdiilhts'i. 'Ink'ez yeztli ootsi 'ants'i khuna-iti, lion, ootsi dónat'en. 'Ink'ez ooze ts'e kwun, lhut, 'ink'ez sulphur 'ohwhi oozáhaidukat.

<sup>18</sup> Ndi ta hiye dzoh nutideh-i, 'i be ndi yun k'ut dunene ½ne, 'enne yahadla. Ndi kwun 'ink'ez lhut, 'ink'ez sulphur 'i yeztli oozáhaidankat-i, 'i hik'eyaída.

<sup>19</sup> 'Et yé ulhtus-i ooze cha, 'ink'ez ooche cha, whuz de haidukat 'et huwa. Ooche 'ants'i tl'ughus lé'unt'oh 'ink'ez 'utsi oolandunin'ai. 'I be dune hundílhdaih.

<sup>20</sup> Mbene la ndi yun k'ut dunene, ndi hiye dzoh nutideh-i ye k'eyáhladlalne, 'enne dahút'en la 'et lht'analhonídulh. 'Enne 'awhuz ntsi'-i nududeh-i hits'u teni' nilhdzun 'et huwa. 'Ink'ez 'uk'eltsi-i, gold, silver, dulk'un t'eh, tse, 'ink'ez duchun be 'ulya-i, nduwhi 'uk'eltsi-i hoos'en cha 'unt'oh, lhe'dústs'o cha 'unt'oh, 'ink'ez nulhúsyoh cha 'unt'oh, 'ohwhi hits'u teni' nilhdzun-un, 'etsul lhe'hinel.

<sup>21</sup> Dune hughan, 'ink'ez huduyun, k'us dune 'ink'ez ts'ekoo bulh ninta' hutih-un, k'us 'uhundunut'ih-un, 'et ts'iyawh whuch'a lht'analhonídulh.

## 10

*'Uyoon lizas ncha-un 'udustl'usyaz 'i nuyúlhchoos*

<sup>1</sup> 'Et doo cha 'uyoon lizas ncha-un ndus de yak'uz ts'e hainya-un tis'en. Kw'us toh 'unt'oh 'ink'ez ditni na'úlghus-i ootsi k'ut na'ánguz. Oonin dzenis ooza' dóút'en 'ink'ez ooke 'ants'i kwun dóút'en.

<sup>2</sup> 'Ink'ez 'udustl'usyaz 'i nuyúlhchoos. Nailhni ts'e duke be ya too k'edit'ez, 'ink'ez 'intl'us ts'e duke be yun k'edit'ez.

<sup>3</sup> 'Ink'ez nyoon lizas ncha-un soo khuna-iti lion dulgho, whuz un'a 'udija. Soo hanyih íbulh lhtak'ant'i ditni 'udija.

<sup>4</sup> Lhtak'ant'i ditni 'udija whe, 'awet 'uk'une' tisguz. 'Et ndus de yak'uz ts'e sulh yátisduk. 'Et 'usúlhni, "Lhtak'ant'i ditni daja dija-un, nyunch'oh za t'eeonónzin, 'aw 'uk'ehonges junih!"

<sup>5</sup> 'Ink'ez ndun lizas ncha-un yatoo 'ink'ez yun k'ut usyin-un, 'en yak'uz ts'e dudilni nus'en.

<sup>6</sup> 'Et yak'uz 'ink'ez ndai la 'et hoonli-i, yun 'ink'ez ndai la ook'ut wheyoonli-i, yatoo 'ink'ez ndai la ootoh wheyoonli-i, mbe la 'ilhiz 'ink'ez 'ilhiz wheni

khuna-un ts'iyawh 'uhoonla-un, 'en boozí' be lizas ncha-un nja dutni 'awet neóodinzut! 'Aw 'on 'un hubaoolh'e' ait'oh.

<sup>7</sup> 'Et hoonts'i ndun bulh lhtak'ant'it lizas 'awet ndet dzin be ts'ujih-i be 'udutinelh whe Yak'usda whe' hoont'oh hooyoh-un lhaóodutatnelh. 'Et whuz un'a Yak'usda dude 'ulhna nus hoo'enne, 'enne 'et huwun ubudáni' inle'.

### *Ndi 'udustl'usyaz 'i John yan'al*

<sup>8</sup> 'Et whutso da' yak'uz ts'e sulh yalhduk-un whudásts'o doo cha za sulh yatilhduk 'ink'ez 'utni, "Ndun lizas yatoo 'ink'ez yun k'ut usyin-un oots'inyalh 'ink'ez 'udustl'us nuyulhchoos-i, 'i ilhchoot."

<sup>9</sup> 'Ink'ez lizas ooghu nusya 'ink'ez 'udusni, "De' 'udustl'us stl'ailhchoos." 'Et 'usulhni, "Nah! Ilhchoot 'ink'ez in'alh! Mbut ba ts'ulki' tileh, 'et hoonts'i nze 'et ts'ihna tl'uz k'un'a mba tilki."

<sup>10</sup> Lizas 'udustl'us oola k'e hayischooz 'ink'ez us'al. Tsást'ai whe ts'ihna tl'uz k'un'a sba lhki. 'Et whésno whe sbut bet ts'uwhulki' sulí'.

<sup>11</sup> 'Ink'ez 'usulhni, "Lhane dune, lhawh didowhne, lhelh ts'un un'a yalhdukne, 'ink'ez lerwene cha, doo cha za 'enne bughun nus hon'en-un bubudóni' huba' hoont'oh."

## 11

### *Nane oonalh 'uhoojane*

<sup>1</sup> 'Et doo cha tl'oghazilh 'ants'i be 'únduna'ooldzih-i duchun le'unt'oh, 'i stl'aidantan 'ink'ez lizas 'et usyin 'ink'ez 'utni, "Dudinyaih 'ink'ez Yak'usda oolugliz whucho, loodel cha 'ohwhi bunduná'oolhdzih. 'Ink'ez nyo lugliz whucho Yak'usda ts'u teni' nilhdzunne, 'enne cha ubolhto.

<sup>2</sup> 'Et hoonts'i lugliz whucho whuzih tse whunalhtun-i ba n'az ts'e, 'et whute 'aw whundulhe'zolhdzih. 'Et 'udun yun k'ut whut'enne bughá whunt'ai whe' hoont'oh. 'Ink'ez ndi yun k'ut Yak'usda ookeyoh whuti, 'et dit whunizyat 'on 'at nat sanun 'et 'ants'i buba' hoonli hukw'un'a whe ndulcho notidulh whe' hoont'oh.

<sup>3</sup> 'Et ndunne nane sba oonalh 'óohoojane, doso dulhk'us-i be húzke, 'enne 1,260 dzin 'et nus hótí'en-un, 'et butl'a óotis'alh.

<sup>4</sup> Ndunne nane, 'enne nanki duchun, Olive huyúlhni, 'ink'ez nanki be hoot'en-i, neMoodihti, ndi yun k'ut whuYak'usda oobut nánuyuz'a-i hinli whe' hint'oh."

<sup>5</sup> Mbene la oonalh 'óohoojane ubundólhдах hukwa 'ut'enne, kwun buza hadutinulh 'ink'ez buch'az ditnine gak hubuhutilhtselh. 'Et 'ink'ez mbe ubundólhдах hukwa ninzun-un, 'en ndiz un'a hizoolghelh huba' hoont'oh.

<sup>6</sup> Ndunne nane, 'enne ndo yat chan ch'a whudána'huduta'alh buba' hoont'oh. 'Aw nus hoo'hoo'en whutoh 'et 'aw nalhótíhtel 'inka. 'Ink'ez ndi too 'i cha 'uskai' hitilhtselh. 'Ink'ez ndi yun k'ut hukwa' huninzun totsuk hiye dzoh nutideh-i nudútizut, 'et nduhóot'en ha butl'a hóolts'ut.

### *Ndunne nane bunalh 'úhoojane 'ubuhuzilghí*

<sup>7</sup> 'Awet ndunne nane bunalh 'úhoojane dune bulh yáhalhduk-un, 'etsul 'uhudíja whe, khuna-iti ntsi-i tsak'et whucho whutl'ah hooloh halget-i, bubulh útigan, buch'a' tilhdoh, 'ink'ez bubutuzilghelh.

<sup>8</sup> 'Ink'ez buzi, keyoh whuti, 'ilhoghun ti 'et yun hútilhtel. Njan keyoh whuti mbene la Ndoni buyudindane, 'enne huwhútíni, njan keyoh 'i keyoh Sodom 'ink'ez yun k'ut Egypt dúwhult'oh. 'Et neMoodihti tulalghus k'ehíyilhti inle'.

<sup>9</sup> 'Et whulohne dune, lhelhdoh didowhne, lhelhts'un un'a yalhdukne, 'ink'ez lhelhdun keyoh whut'enne cha, ndi buzi tat dzin 'on 'at lhoohoolcho dzin ubuhuntih'elh. 'Ink'ez 'aw dune 'abutilhtelh-un butl'a hóohoo'alh ait'oh.

<sup>10</sup> 'Ink'ez ndi yun k'ut whut'enne hoohootát'e' 'ink'ez huwhuntáalni. 'Ink'ez lhts'e' hutildulh. Nduhne nane nus hoo'en dazsaine, 'enne dzoh nunéhulhde hutni 'et huwa.

*Nduhne oonalh 'uhoojane dune hubanghane dunahudidil*

<sup>11</sup> Tat 'on 'at lhoohoolcho dzin inle' whe Yak'usda ooyiz be ts'ukhuna-i buye ídilt'sut 'ink'ez dunahudit'az. Mbene la ubunalh'enne tube hunílhjoot.

<sup>12</sup> 'Ink'ez ndus de yak'uz ts'e tube cho 'uwuhudija, "Ndiz áh'us!" ni. 'Ink'ez buch'az ditnine bunalh kw'us k'ut yak'uz ts'e whe hán'az.

<sup>13</sup> 'Et 'oh whuya 'uhunit'oh whe za tube yun núkhisna-i. 'Ink'ez keyoh whuti 1/10 'et nawhúnit'ai. 'Et yun núkhisna-i whe 7,000ne dune higan. 'Et 'onghune tube whéhunuljut 'ink'ez yak'uz whuYak'usda, 'en hidáhl'ti.

<sup>14</sup> 'Et whúlh nat-un 'uk'enus hoontsi'-un whehóolts'ut. Soo zilhts'ai whulh tat-un 'on nus 'uk'enus hoontsi'-un 'a whe whuz de hóolts'ulh.

*Bulh lhtak'ant'i be ts'ujih-i yé' dija*

<sup>15</sup> 'Et 'awet whúlh lhtak'ant'it-un lizas be ts'újih-i be 'udíja. 'Et yak'uz ts'e lhane tube njan duhutni,

"Ndi yun k'ut lerwene bukeyoh neMoodihti 'ink'ez ooChrist, buch'e' whuzdli.

'Ink'ez 'ilhiz 'ink'ez 'ilhiz wheni lerwe tileh."

<sup>16</sup> 'Et nat whunizyay 'on 'at dine 'utso whudilhduhne Yak'usda but dukw'ut'suzda cho dizti-i k'udilhts'ine, 'enne Yak'usda but nachahunildil 'ink'ez huts'un teni' hunalhdzin.

<sup>17</sup> 'Ink'ez 'uhutni, "O Yak'usda neMoodihti 'uk'enus ulhtus-un inli.

Mbe inli, 'ink'ez mbe ant'e', 'ink'ez mbe whuz de t'iyalh-un inli.

Ndai be ílhtus-i cho ílhchoot 'ink'ez lerwe inle' 'et huwa.

Musi nts'uyútni.

<sup>18</sup> 'Udun yun k'ut whut'enne huhunílh'e

'ink'ez nyoo be húnílh'e-i 'awet whusahóolts'ut.

'Ink'ez yaidlanne buba nahutideh-un whusahóolts'ut.

'Ink'ez nye 'ulhnane nus hoo'enne 'ink'ez nch'e'ne,

'ink'ez mbene la nyoozi' enuljutne,

ntsoolne 'ink'ez nchane cha,

'enne ts'iyawh buba' k'elha whutaleh.

'Ink'ez mbene la ndi yun k'ut dune nilh'enne,

'enne cha ninta' ant'enne ubutilhtselh."

<sup>19</sup> 'Ink'ez Yak'usda oolugliz whucho yak'uz whuz'ai-un whudáha' dankez. Ndi chunkelh dizti-i, 'i bet khuni neba lháidnla-i, ndi nanki tse k'ut 'uk'unéyuzguz-i, 'i bé dizdla, 'i cha nyo oolugliz whucho nul'en. 'Ink'ez ditni oolhges cha, tube tawhúditni cha, ditni dutni cha' whutni. Yun nukhútna, 'ink'ez 'indloo tsan nincha-i cha nanánkat.

## 12

*'Awet ndo yat'ah ts'e huwa ít'en-un, 'et whe hóodiltsai*

<sup>1</sup> 'Awet ndo yat'ah ts'e huwa ít'en-un, 'et whe hóodiltsai, ts'eke oonaih 'ants'i sa ts'u hainduz-i dóut'en, 'i be dune unli. Ooketl'ah 'et 'ulhdzis ooza' 'us'ai. 'Ink'ez whunizyai 'on 'at nanki sum 'i ootsi náyuzt'i.

<sup>2</sup> 'Ink'ez ts'oodun bulh 'unt'oh. Ka' dutni 'awet ts'oodun whutileh.

<sup>3</sup> 'Ink'ez doo cha za 'uts'un un'a ndo yat'ah ts'e huwa ít'en-un, 'et whe hóodiltsai. Whunulh'en t'l'ughus cho khuna-i k'un'a núlget-i dulk'un, lh-tak'ant'i ootsi 'ink'ez whunizyai cha oode únli. 'Ink'ez lhtak'ant'i ootsi, 'i 'ilho whe lerwe butsi k'éyuzdla-i doút'en, 'i butsi k'éyuzdla.

<sup>4</sup> Duche be ndo yat'ah sum ½ 'ohwhi ndus de hayáldil 'ink'ez yun k'éyilhdil. Ndun ts'eke 'awet ooyaz whutáleh-un, 'en yubut usyin, soo ts'oodun whuzdli ibulh yutilhnoh 'et hukwa.

<sup>5</sup> 'Ink'ez ts'eke duneyaz sulhtsi. 'En ndi yun k'ut lhelhdoh didowhne, ts'iyawh lhuztih tuz be k'une' butil'en. 'Ink'ez ooyaz 'en Yak'usda 'ink'ez ookw'uts'uzda cho dizti-i whuz whehúyalhti.

<sup>6</sup> 'Ink'ez ts'eke chuntoh dune lhuhóot'ih ts'e whetsélhya. 'Et Yak'usda yuba lhaóodilhdzun-un, 'et usda. 'Et whe la 1,260 dzin 'et 'uwuhldzoh, 'et ya'alh-i be ooghu tidleh.

### *Satan yak'uz tenahinino*

<sup>7</sup> 'Ink'ez ndo yat'ah whelhónigan. Michael 'ink'ez dulizas te t'l'ughus cho khuna-i k'un'a nulget-i ch'az nehúndil. 'Ink'ez ndi t'l'ughus cho khuna-i k'un'a nulget-i, dulizas te bubá nch'az nehúnindil.

<sup>8</sup> 'Aw ndunne t'l'ughus khuna-i k'un'a núlget 'ink'ez oolizas te, 'aw whuch'a lhelhíldoh. 'Ink'ez yat'ah hudilhts'i-un whuch'a buhunízoot.

<sup>9</sup> 'Et ndi t'l'ughus cho khuna-i k'un'a núlget-i ncha-un, 'en téhinino. Ndi 'uda' whutl'ughus, netsudule 'ink'ez Satan huyulhni. Ndi yun k'ut ndulcho whe dune nana'ah-un, 'en 'unt'oh. Oolizas tubulh ndi yun k'ébuhuninyoot.

<sup>10</sup> 'Et ndo yak'uz ts'e tube cho njan duhdija,

“‘Awet be uzdutijih-i, 'ink'ez be ts'ilhtus-i,

'ink'ez Yak'usda lerwe unli-un,

'ink'ez ooChrist moodih tileh-un whusahóolts'ut.

Netsudule mbe la neulhutsinke buk'eho'alh-un,

'en ndi yun k'éhininyoot 'et huwa.

Netsudule 'en 'ut'en Yak'usda but uzyin whe dzin

'ink'ez 'ulhdzis ibulh neulhutsinke buk'éhoo'aih.

<sup>11</sup> 'Usbaiyaz buzkai' be,

ndi khuni Yak'usda ghu yalhdúk-i cha,

'i ndowhi ts'iyawh whe netsudule ch'a' hunilhde,

'ink'ez 'aw hukw'elha yahitadlah-un whelhuhuniljut.

<sup>12</sup> 'Et huwa yak'uz whut'ine 'ink'ez Yak'usda oonimbali whucho t'ah dilhts'ine,

nohni ts'iyawh whunúlhni!

'Et mbene la ndi yun k'ut dilhts'ine ya too k'ut cha nohni ts'iyawh 'uk'enus hoontsi'-un nohgha whutalts'ulh.

Netsudule ndus de nohghu ninya tube hunilch'e.

T'ooninzun ooba nilhdúk w suli' 'et huwa.”

### *Ts'eke dzoh nahuyulhdzut-un*

<sup>13</sup> 'Et nyoo t'l'ughus cho khuna-i k'un'a nulget-i ndus de hahínanyoot t'ewhunanzin whe, 'et ndun ts'eke duneyaz ooyaz suli'-un, 'en tube dzoh nuyulhdzut.

<sup>14</sup> 'Et hoontsi' ndun ts'eke tsibalyan cho oots'nyut'a' nanki ootl'ayánkat. 'I be keyoh dune lhuhóot'i ts'e 'et tidalh-un whuz toot'a ha. 'Et tat yus k'ut 'on 'at lhoohoolcho 'et ya'alh-i be ooghudli whe t'l'ughus khuna-i k'un'a nulget-i, 'i ch'a 'et inda'.



<sup>15</sup> 'Ink'ez tl'ughus khuna-i k'un'a ts'eke ts'un too lhai oozáhayangoo. 'I be si ndun ts'eke too bulh tóolt'ah ninzun ha.

<sup>16</sup> 'Et hoonts'i ndi yun ts'eke yula 'uja. Nyo yun lhch'az 'uja 'ink'ez ndi tl'ughus cho khuna-i k'un'a nulget-i too oozáhayangoo-i, whuz 'ajul.

<sup>17-18</sup> 'Ink'ez ndi tl'ughus cho khuna-i k'un'a nulget-i tube ts'eke bulh húnilch'e, 'ink'ez ndun ts'eke oots'u hainzutne bubulh útigan ha buts'ú whelget. Yak'usda ubudani'-un hik'une' ut'en 'ink'ez Sizi Gri ghu yalhdúk-i, 'i cha huyoontun, 'enne 'uhint'oh.

## 13

### *Khuna-iti ntsi'-i tooz haki*

<sup>1</sup> 'Et yatoo k'ut taba susyin whe khuna-iti ntsi'-i tooz haki whe tís'en. Lhtak'ant'i ootsi únli 'ink'ez whunizyai oode únli. 'Ink'ez ndi oode whunizyai lerwe butsi k'éyuzdlai-i doút'en, 'i ook'e yuzdla. 'Ink'ez 'ilho whe ootsi khuni Yak'usda ch'a yalhdúk-i ook'unéyusguz.

<sup>2</sup> Ndi khuna-iti ntsi'-i tís'en-i 'ants'i chuntoh boos cho, leopard huyúlhni, 'i doút'en. Ooke 'i cha sus ke doút'en. 'Ink'ez ooze 'ants'i khuna-i cho lion huyulhni-i, 'i ooze 'et ndó hot'en. 'Ink'ez ndi tl'ughus cho khuna-i k'un'a nulget-i whe úlhtus-un cha, kw'uts'uzda cho dizti'-i, 'ink'ez ts'iyantsuk k'une' oot'en ha, 'et ts'iyawh yutl'ahónla.

<sup>3</sup> Ootsi 'ilho 'i tube ka sulí'. 'I gha dazsai sba lé'unt'oh. 'Et ooka whuzdli'-un nahooje'. 'Et ndi yun k'ut ndulcho whe huwa' hi'en 'ink'ez ndi khuna-iti ntsi'-i hiyuntizdil.

<sup>4</sup> Ndun tl'ughus cho khuna-i k'un'a nulget-i, khuna-íti ntsi'-i k'une' oot'en ha yugha óonin'ai-un, 'en hits'u teni' nalhdzin. Ndi khuna-iti ntsi'-i, 'i cha hits'u teni' nalhdzin 'ink'ez 'uhutni, "Ndi khuna-iti ntsi'-i 'aw yundult'oh-i hooloh. 'Aw yulhóoganne hooloh."

<sup>5</sup> Ndi khuna-iti ntsi'-i tooz haki-i, 'i hooncha-un cha howu yalhdúk 'ink'ez Yak'usda ch'az yalhdúk, 'et wheni ooze ooghá whults'ut. Dit whunizyat 'on 'at nat sanun 'et ndúwhuldzoh whe k'une' oot'en ha ooghá whults'ut.

<sup>6</sup> Yak'usda ch'az yawhénilhdúk. Oonimbali whucho cha whuch'az yawhénilhdúk, 'ink'ez mbene la yak'uz dilhts'ine, 'enne cha, 'et ts'iyawh buch'az yawhénilhdúk.

<sup>7</sup> Mbene la Yak'usda ooch'e'ne, 'enne bubulh lhútigan 'ink'ez buch'a' tilhdoh, 'et ooghá whults'ut. Lhelhdoh didowhne, lhelhts'un un'a yalhdúkne, 'ink'ez lhelhdun keyoh whut'enne, 'enne k'úne' butil'en ha ooghá whunt'ai.

<sup>8</sup> 'Ink'ez ndi yun k'ut dilhtsine', 'enne ts'iyawh ndi khuna-iti ntsi'-i hits'un teni' huntilhdzil. Ndun 'usbaiyaz 'udechoo ndi yun 'uhóolya whuts'un 'uda' lháoodint'oh hituzilghelhel, 'enne ndi 'ilhiz 'ink'ez 'ilhiz wheni ts'ukhuna-un be 'udustl'us k'ut buboozi' 'uk'ulhíguzne, 'enne 'uhint'oh.

<sup>9</sup> Mbe la 'udits'one hoohoozólhts'ai'.

<sup>10</sup> Mbe la 'uyoonne 'ulhna ubulhtsi-un, didutch'oh cha whuz un'a za 'ulhna tileh.

Mbe la saluzti be dune ghan de, didutch'oh cha saluzti be datitsah whe' hont'oh.

'Et huwa Yak'usda ooch'e'ne, njan 'et mbene hiye 'alha' ninzun-i 'ink'ez hoonli talhohodini, 'et 'uwhúlhni.

*'Uyoo khuna-iti ntsi'-i yun ts'u hálget*

11 'Et doo cha 'uyoo khuna-iti ntsi'-i 'et yun k'ut nyus de úlgwulh whe tis'en. 'Usbaiyaz k'un'a nanki oode unli 'ink'ez tl'ughus cho khuna-i k'un'a núlget-i k'un'a yalhduk.

12 Ndun 'udechoo khuna-iti ntsi'-i, ye k'une' 'ut'en-i whuz un'a ts'iyawh yubut 'et ndut'en. 'Ink'ez ndi yun 'ink'ez yuk'ut whut'ine cha ndi khuna-iti ntsi'-i dazsai inle' 'ink'ez naje'-i, 'i hits'u teni' noolhdzun ubulhsti.

13 'Ink'ez ndi bulh nanki khuna-iti ntsi'-i hooncha-un whehóodat'en te ne'út'en. Dune nalh ndus de kwun yun k'éyilhuk 'oh hoonts'i ne'út'en.

14 Ndi bulh nanki khuna-iti ntsi'-i, 'i 'udechoo-i khuna-iti ntsi'-i nalh lhat te huwa 'it'en tene' 'út'en ooghá whunt'ai, 'et whe ndi yun k'ut whut'enne nabuna'ah. Ndun khuna-iti ntsi'-i saluzti be ka suli' inle' 'ink'ez hana' ndi yun k'ut whut'enne 'i ook'eyíltsi-i 'uhooleh ubulhni.

15 'Ink'ez ndi 'uk'eltsi-i usjiz yutilhtselh, 'et ooghá whulsts'ut. 'Et de la ndi khuna-iti ntsi'-i ook'eyíltsi yalhduk cha yulhsti. 'Ink'ez mbene la ndi 'uk'eltsi 'aw hits'un teni' noolhdzin ait'ohne, 'enne ts'iyawh ubuhooghan, ni.

16 Ntsoolne cha 'ink'ez nchane cha, hoonzoo 'unt'ohne 'ink'ez tel'enne cha, 'ink'ez 'ulhnane 'ink'ez oola naditnine cha, 'enne ts'iyawh nailhni bula k'us buninta te whe hóodat'en ubulhsti.

17 Mbene la bube hóodat'en, k'us khuna-iti ntsi'-i boozi', k'us ndi be oolto-i boozi' be 'i buninta k'us nailhni ts'unk'us bula 'aw 'uk'ulhuhooguz de, 'aw 'uhoket 'ink'ez 'e'hoket ait'oh.

18 Ndi 'i be ts'úwhunih-i, mbe la beni hooni-un, 'en ndi khuna-iti ntsi'-i boozi' yolhto huba' hoont'oh. Dune oozii' 'unt'oh. Ndi 'i lhk'uta lhk'uta lhk'uta 'uyulhni.

## 14

*144,000ne neBá boozi' buninta buk'uneyusguz, 'enne Yak'usda be' 'usbaiyaz hizih nudilhya*

1 'Et soo zúlhts'ai, dzulh Zion huyulhni-i, 'i k'ut 'usbaiyaz usyin tis'en. 144,000ne neBá boozi' buninta buk'unéyusguz, 'enne hizih nudilhya.

2 'Ink'ez ndus de 'uwhútni. Too najilh-i le'whutni. 'Ink'ez ditni, tube dutni k'un'a le'utni. 'Ink'ez nela be, be ts'újun-i be 'ujunne, 'i cha dásts'o.

3 'Et kw'uts'uzda cho diziti'-i, 'ink'ez nyoo dunghi usjiz-i, 'ink'ez 'utso whudilhduzhne cha, 'enne bubut soo 'andidi shun be hújun. Ndi shun yodool'ehne hooloh. Ndunne 144,000ne ndi yun k'ut nabuhonketne, 'enne za ndi shun huyodutil'eh.

4 Ndunne, 'enne ts'ekoo bulh ninta' ut'ihne lhuhíloh, oot'alhe'asnaine 'uhint'oh 'et huwa. 'Enne 'uhint'oh 'usbaiyaz nuya te totsuk huyununúdilh. Dune toh naooketne' 'uhint'oh. Yak'usda 'ink'ez 'usbaiyaz 'enne buba 'udechoo buch'e'ne hinli.

5 'Ink'ez buze 'aw whuts'it-i hooloh. 'Alha Yak'usda kw'uts'uzda cho diziti'-i yuk'usda 'en but 'aw whe tank'us 'uhint'oh-un bughu hooloh.

*Tane lizasne, 'enne 'uhudíja*

6 'Et doo cha 'uyoon lizas ndo yat nut'o whe nus'en. Ndi yun k'ut whut'enne, lhelhdun keyoh whut'enne, lhelhdoh didowhne, lhelhts'un un'a yalhdukne, 'ink'ez soo ts'iyanne, 'enne ndi khuni unzoo-i 'ilhiz 'unt'oh-i, 'i ghun budutánelh, 'et huba ndun lizas ndi khuni 'et yudilh'ai.

7 Tube cho nja ndutni, "Yak'usda bé nulhjut 'ink'ez dúlhti'. Dune ba nahutiyeh-un 'awet 'oh whuya há' hunit'o 'et huwa. Yak'uz 'ink'ez yun k'ut, yatoo 'ink'ez yun ts'u hainli-un cha, ts'iyawh 'uhoonla, 'et huwa oots'u teni' nulhdzun."

8 'Ink'ez 'uyoon lizas yunit'oh 'ink'ez 'en cha nja ndutni, “Keyoh whuti Babylon 'awet musai whuzdli, musai whuzdli! Nyo keyoh whuti soo nint'i whe 'uyoon dune bulh ninta' 'ut'ih, tsekoo too' k'un'a lhelhdun keyoh whut'enne bube yulhnaí.”

9 'Et bulh tane lizas 'et bubunit'oh. Dultul whe nja ndutni, “Ndi khuna-iti ntsi-i 'ink'ez ook'eyiltsi-i cha, mbene la yuts'u teni' nilhdzunne, 'ink'ez buninta k'us bula k'ut bube hóodat'en de,

10 'et de dich'oh Yak'usda ye húnilch'oh-i ts'ekoo too' k'un'a ulhtus-i, 'i hititnelh. Ndi lubot ts'ekoo too' k'un'a ulhtus-i dizbun-i, whuz un'a ndi Yak'usda ye húnilch'e-i be dizbun. 'Et mbene la khuna-iti ntsi-i hits'un teni' nilhdzunne, 'enne Yak'usda oolizasne 'ink'ez 'usbaiyaz bunalh kwun 'ink'ez sulphur huyúlhni dizk'un, 'et 'i be dzoh notideh.

11 Ndi huye dzoh nudeh-i whulut, 'ilhiz wheni ndo whedújoot. Mbene la ndi khuna-iti ntsi-i 'ink'ez ook'eyiltsi-i hits'u teni' nilhdzunne 'ink'ez buninta k'us bula k'ut bube hóodat'enne, mbene la 'et ndut'enne, 'enne dzenis 'ink'ez 'ulhdzis-i bulh nalhotilhyiz.”

12 'Et hoontsi Yak'usda ooch'e'ne, 'aw 'enne buk'un'a lhe'hít'oh. Yak'usda dughuni netl'aidan'ai howa whulna' hoontsi whulh huzyin whe Sizi Gri ooba 'alha' yint'ohne, 'enne 'uhint'oh.

13 'Et ndo yak'uz ts'e 'usuhútni, “Ndi 'uk'inges, 'andit whuts'un mbene la neMoodihti t'eínínzun whe yahadla de, 'enne 'uk'enus hoonzoo-un bubulh 'úhooja.” Ndoni, “A,” ni. “'Ut'en 'uhalh'en-un, 'inka nahutilyis. 'Ink'ez dahít'en la bube 'ut'en unzoo-i 'aw ninta huyólelh ait'oh.”

#### *Ndi yun k'ut ha' nukat-un 'awet whusahónzut*

14 'Et whunus'en whe kw'us ulhyul-i tís'en. 'Ilhoghun dune ye' dóut'en-un, 'en ndi kw'us yuk'usda. Ootsi k'éyuztan-i gold 'unt'oh, 'ink'ez tl'o be út'as-i khundiyyin-i nutun.

15 'Et 'uyoon lizas lugliz whucho tenínya 'ink'ez soo 'ultus whe kw'us k'usda-un nja ndúyulhni, “Nyoo be út'as-i, 'i be 'int'as. 'Awet 'utant'us-un whusahóolts'ut. Ndi yun k'ut ha' nukat-un 'awet whusahónzut 'et huwa.”

16 'Inka kw'us k'usda-un ndi be 'út'as-i yun k'ut ye whút'it'us. 'Et ndi yun ndulcho whe 'ada' hont'az.

#### *Yak'usda ye húnilch'oh-i*

17 'Et yak'uz whulugliz whucho, 'et 'uyoon lizas tenínya. 'En cha be út'as-i khundiyyin-i nutun.

18 'Et doo cha 'uyoon lizas 'en loodel ts'u haínya. 'En kwun k'une' 'ul'en-un unli. Nyoon be whút'as-i khundiyyin-i nutún-un, 'en soo 'ultus whe njan dúyulhni, “Nyoo be 'út'as khundiyyin-i, 'i be 'int'as 'ink'ez ndi yun k'ut mai oochun bulh oonujin-i nisch'iz-i nailhdzoo. 'Awet nitzt'ai 'et huwa.”

19 'Et 'awet ndun lizas dube whút'as-i be ndi yun k'ut hont'az 'ink'ez mai oochun bulh oonujin-i nayalhdzoo. 'Ink'ez njan tse cho ook'ut hahóokai-un, 'et ndi mai 'ayalhkát, 'ink'ez ke yit ndi mai yuk'unuya whe ootoo' oots'u hayútsus 'et hukwa. 'Et whuz un'a ndi Yak'usda ye húnilch'oh-i 'unt'oh.

20 'Et keyoh whuti whan'az, 'et njan ts'ekoo too' 'ul'en-un whuz'ai, 'et mai hik'unúdilh 'ink'ez 'uskai' oots'u hayjúl. Yeztli ooze yuzdla-i 'et 'uskai' ta'dikhulh suli'. 'I 200 miles at'en, 'et 'uwuhulyiz.

1 'Et doo cha yat'ah 'udun whe hóodat'en-un whutis'en. Hooncha 'ink'ez huwa ít'en-un. Lhtak'ant'i lizasne, 'enne ndi lhtak'ant'i 'udek'ez hiye dzoh nuzut-i be óonujut-i nahúyule. 'I be yak'usda ye húnilch'oh-i lhaóodutanelh.

2 'Et doo cha, bughun whucho dizghel 'ants'i khe le'unt'oh, kwun ootoh hoonli, 'i dout'en-i tis'en. Mbene la ndi khuna-iti ntsi'-i, ook'eyíltsi-i, 'ink'ez be hóodat'en, 'ink'ez ndi be 'óolto-i boozí' ch'a' nilhdene, ndi bughun whucho dizghel k'ut nódilhya. Nela be ts'ujun-i Yak'usda ooch'e' unli-i, 'i nahúyule.

3 Moses huyulhni-un Yak'usda be 'ulhna-un, 'ink'ez 'usbaiyaz bulh buyun 'i be hújun. Ndi shun nja ndutni, "NeMoodihti Yak'usda 'on nus ulhtus-un inli.

Nye 'ut'en uncha 'ink'ez oogha 'ít'en.

Yak'usda ooch'e'ne bulerwe inli.

Nye 'ut'en k'oh ts'ih'un 'ink'ez 'alha' hoont'oh.

4 O neMoodihti mbe nyelhúntilhjut

'ink'ez nyoozi' lhedutálhti'?

'Alha 'i be nyunch'oh za lubeshi ooghu hooloh-un inli.

'Alha 'udun keyoh whut'enne ts'iyawh whusahátidulh

'ink'ez mbut nts'u teni' huntlhdzun.

Ts'ih'un be né'int'en-i 'awet hooltsai 'et huwa."

5 'Et hukw'elh'az whunus'en 'awet yak'uz ts'e Yak'usda oolugliz whucho whut'ah, Yak'usda ooghuni chunkelh be dizdla-i ook'ut nimbali whucho us'ai, 'et dáha' dankez.

6 'Ink'ez ndunne lhtak'ant'i lizasne lhtak'ant'i dune ye dzoh nudeh-i huyilelh whe lugliz whucho tehúnindil. Naih dizti'-i lhidsun 'ink'ez be hóodat'en be húdilhts'i. 'Ink'ez buts'i toh 'on do se gold unli-i be tsuhudilh'oo.

7 'Et nyoonne dunghi khuna-i usjiz-i, butoh 'ilho lhtak'ant'i oosa' nanizts'un-i gold unli-i, Yak'usda 'ilhiz 'ink'ez 'ilhiz wheni khuna-un, ye húnilch'oh-i be dizbun, 'i lizas lhtak'ant'ine butainíla.

8 'Ink'ez Yak'usda oots'u hayánduz-i 'ink'ez yé ulhtus-i oolut 'i be lugliz whucho whudizbun. Lhtak'ant'i dune ye dzoh nudeh-i lhtak'ant'i lizasne nahúyule-i, lhaóodutatneh whutso lugliz whucho dune daóoya' ait'oh.

## 16

1 'Et whudasts'o nyooz de lugliz whucho ts'e 'uwhutni, tube' whutni 'ink'ez lhtak'ant'i lizasne bubulh yatilhduk whe nja dutni, "Ahdulh 'ink'ez ndi oosa' nanizts'un-i Yak'usda ye húnilch'oh-i be dizbun-i ndi yun ook'ut nadulhukuk!"

*'Udechoo oosa' nanizts'un-i*

2 'Inka 'udechoo lizas ndi oosa' nanizts'un-i yun k'ut naidílhkat. Mbene la dune ndi khuna-iti ntsi'-i bé hoodat'en-i ut'ine, 'ink'ez ook'eyíltsi-i ts'u teni' nilhdzunne, 'enne ndai la yun k'ut naidílhkat, 'i be ntsi'-i 'ink'ez ooba' whuninzun-i be ndunne dune buka whehúnilhjut.

*Bulh nanki oosa' nanizts'un-i*

3 'Et bulh nane lizas dude 'oosa' yatoo k'ut naidílhkat. 'Ink'ez ndi yatoo 'ants'i dune dazsai-un buzikai' dout'en suli'. 'Ink'ez ndai la toot khuna-i ts'iyawh yaidla.

*Bulh ta-i oosa' nanizts'un-i*

4 'Et bulh tane lizas dude 'oosa' 'ukoh ts'iyawh 'ink'ez yun ts'u hanusuli-un cha, 'ohwhi k'ut naidílhkat. 'Ink'ez too ts'iyawh 'uskai' suli'.

5 'En lizas za nja nduti whe dusts'o,

"O neMoodihti ts'ih'un 'int'oh.

Nyun 'int'oh 'ink'ez nyun 'ant'e'  
'ink'ez lubeshi ooghu hooloh-un inli.

Whuz un'a huba nahízinya 'et huwa.

<sup>6</sup> Nduinne Yak'usda ooch'e'ne  
'ink'ez mbe nus hoo'enne bubahangan.  
'Et huwa khuna-iti ntsi'-i unidulhne,  
'enne 'uskai hootnai' ha buba' yínla.  
Njan 'et whuch'a honílhde 'et huwa."

<sup>7</sup> 'Ink'ez loodel ts'e 'uyoon yatilhdruk whudusts'o whe nja ndutni,  
"Yak'usda neMoodihti,  
ts'iyán whanus 'ultus-un inli.

'Alha 'uhoont'oh! Nyun ts'ih'un un'a  
'ink'ez 'alha hukw'un'a dune ba nahinyeh."

### *Bulh dunghi oosa' nanizts'un-i*

<sup>8</sup> 'Et bulh dine lizas dude 'oosa' dzenis ooza' k'ut naidílhkat. 'Ink'ez dune kwun be buka nódutik'un ha ooghá whunt'ai.

<sup>9</sup> 'Ink'ez kwun tube núlwas-i be buka nódizk'an. 'Ink'ez Yak'usda boozí' hidulhyoh yalhdruk. 'En ye úlhtus-i be ndowhi dune ye dzoh nudeh-i hoonli 'et huwa. 'Ink'ez 'aw lht'anahónídulh 'ink'ez 'aw lhuhidílhiti'.

### *Bulh kwulai' oosa' nanizts'un-i*

<sup>10</sup> 'Et bulh kwulane lizas dude 'oosa' khuna-iti ntsi'-i ookw'uts'uzda cho dizti'-i yuk'usda-i k'ut naidílhkat. 'Ink'ez ookeyoh lerwe unli-un ndulcho whe tsahólhgus whuzdli'. 'I gha tube hukw'e húnududa k'et dutsoola hiduna'alh.

<sup>11</sup> 'Ink'ez Yak'usda yak'uz usda-un, 'en hidulhyoh yalhdruk. Stabe buka whunduda 'i be bubulh 'úts'ulh 'et huwa. 'Ink'ez dahút'en-un 'aw whuch'a nalhehídulh.

### *Bulh lhk'uta-i oosa' nanizts'un-i*

<sup>12</sup> 'Et bulh lhk'utane lizas dude 'oosa' 'ukoh whuti-un Euphrates huwhútnei-un, 'i k'ut tayálhkat. 'Ink'ez too hooloh sulí'. 'Et whe nyoonne lerwene ndaz de hatídulhne, 'oh whéya lhuhtídulh 'et wheni 'et huba 'uhóonla.

<sup>13</sup> 'Ink'ez tl'ughus cho khuna-i k'un'a núlget-i, 'ink'ez khuna-iti ntsi'-i, 'ink'ez whuts'it whe nus hoo'en-un tane hult'oh nudúdeh-i ntsi'-i, dulkw'ah doút'en-i, buzá hayandil 'et whutís'en.

<sup>14</sup> Ndowhi netsudule oonudúdeh-i 'unt'oh, whe huwa 'ít'en tune' 'ut'en. Yun k'ut ndulcho whe whulerwene 'ilhubootáleh. Yak'usda mbe la whanus ultus-un oodzin, 'et dzin, 'en bulh lhútigan 'et wheni lhadútneh.

<sup>15</sup> "Soo zúlhts'ai, 'undunut'ih-un k'un'a whuz de níz'ilh. Mbene la 'ahoolhyiz khudline 'ink'ez dunaih lhadilhdzunne, 'enne 'et duhút'en de, 'aw 'ust'et nohooya' ait'oh 'ink'ez bube 'ust'et óot'en ait'oh, 'enne 'uk'enus hoonzoo-un bugha whútalts'ulh."

<sup>16</sup> 'Et Hebrew bughuni k'un'a Armageddon huwhútnei-un, 'et wheni netsudule oonudúdeh-i ndi yun k'ut whulerwene 'ilhubohozdla.

### *Bulh lhtak'ant'i oosa' nanizts'un-i*

<sup>17</sup> 'Et bulh lhtak'ant'itne lizas dude 'oosa' ndo tazai k'uz naidílhkat. 'Ink'ez ndo yak'uz whulugliz whucho kw'uts'uzda cho dizti'-i 'us'ai ts'e, whuz tube cho nja nduwhútnei, "Awet lhaóoduja!"

<sup>18</sup> 'Ink'ez tawhúditni, ditni 'ink'ez ditni cha oolhges, 'ink'ez hooncha whe yun núkhisna-i. Ndi yun k'ut dune whúzdlí' 'et whuts'un 'aw ndulcho-i be whuz un'a yun nulhúkhisnai.

19 'Ink'ez njan keyoh whuti tawh lhk'ehonkat. 'Ink'ez 'udun keyoh whut'enne bukeyoh whuti, 'oh cha nawhúnankat. 'Ink'ez nyoo keyoh whuti Babylon huwhútni-un, 'et cha Yak'usda whunalni, 'ink'ez Yak'usda ye húnilch'oh-i, ts'ekoo too' k'un'a ulhtus-i, 'i yugha ítalhdzoh 'inka.

20 'Et 'ink'ez noo ts'iyawh cha hooloh sulí, 'ink'ez dzulh cha hooloh sulí.

21 'Ink'ez ndus de yak'uz ts'e 'indloo tsan nincha-i cho, 'i dune k'ut nailhtan. 'Ilho 'indloo tsan 100 lbs' et 'uldaz. Ndi 'indloo tsan be óonujut k'et 'i gha dune Yak'usda hiyulh huyih.

## 17

### *Ts'eke 'ul'en-un khuna-iti ntsi'-i soo dulk'un-i, 'i k'usda*

1 'Awet ndunne lhtak'ant'i lizasne lhtak'ant'i oosa' nanizts'un-i nulene, bubulh 'ilhoghun sghu ninya 'ink'ez 'usulhni, "Anih ndun 'uk'enus 'ul'en-un, lhat-un too k'usda-un, ooba nahisda-un whúnuyuntistun.

2 Ndi yun k'ut whulerwene bubulh nínta' 'ut'ih. 'Ink'ez ndi ye nínta' 'ut'ih-i 'ants'i ts'ekoo too' k'un'a, 'i be ndi yun k'ut whut'enne bube inílnhai' le'uja."

3 'Et Ndoni be dune lhuhóot'ih ts'e soolhti. 'Et njan whunus'en, ts'eke khuna-iti ntsi'-i soo dulk'un-i, 'i k'usda. Yak'usda hiyulh huyih khuni, 'i khuna-i ntsi'-i ooyusde ndulcho whe ook'eyusguz. Lhtak'ant'i ootsi hoonli 'ink'ez whunizyai oode únli.

4 Dulk'un-i 'ankw'us dulhk'us-i 'ink'ez soo dulk'un-i, 'i ndun ts'eke ye usda. 'Ink'ez gold 'ink'ez tseyaz dunizti'-i, 'ink'ez kw'usul dunizti'-i cha, 'ohwhi be núdilhtsi'. Lubot gold unli-i, 'i nuyúka. Ndai la ndi yun k'ut whut'enne tank'us whudutsun te ne'húst'en-un 'ink'ez bube 'ut'en ooba' whuninzun-i, 'i be ndi lubot dizbun.

5 Ooninta 'et 'oozi' 'uk'usguz, 'ink'ez ndiz un'a nja ndutni,

Whe' hoont'oh hooyoh Babylon uncha-un,

'ul'enne buloo 'ink'ez ndi yun k'ut 'uk'enus hoontsi'-un cha whuloo, ni.

6 'Et ndun ts'eke tís'en. Sizi ba yaidlane 'ink'ez Yak'usda ooch'e'ne bubuzkai' 'i be tanísnai'. Us'en whe sba hooncha k'et 'aw sba 'alha lhe'hóot'oh.

### *Ts'eke 'ul'en-un 'ink'ez khuna-iti ntsi'-i daja ni whe 'utni-un*

7 'Et lizas 'usulhni, "Di ha mba hooncha? Ndun ts'eke, 'ink'ez ndi khuna-iti ntsi'-i lhtak'ant'i ootsi hoonli 'ink'ez whunizyai oode únli k'usda, 'et ooghun whe' hoont'oh hooyoh-un, 'et nyudutásnelh.

8 Ndi khuna-iti ntsi'-i nalh'en-i, 'i 'ant'e' inle' 'ink'ez 'andit hooloh, 'ink'ez tsak'et whucho whutl'ah hooloh-un whuz de hatílgwulh 'ink'ez nts'e la musai tileh ts'u tilgwulh. 'Ink'ez ndi yun 'udechoo 'ulya whuts'un, ndunne ndi yun k'ut whut'enne, ndi 'ilhiz ts'ukhuna-i be 'udustl'us k'ut, 'i k'ut 'aw buboozi' 'uk'ulhíguzne, ndi khuna-iti ntsi'-i 'ant'e' inle', 'ink'ez 'andit hooloh, 'et hoontsi' hoonli whe 'unt'oh, 'enne huyan'en de buba hootácha.

9 Mbe la beni whúnih-un njan huwu nuni noozut. Ndi lhtak'ant'i 'utsi, 'i lhtak'ant'i shusyaz 'unt'oh. 'I k'ut ts'eke yuk'usda.

10 'Ink'ez lhtak'ant'ine lerwene hoonli. Kwulane, 'enne huholoh sulí'. 'Ilhoghun 'en 'awhuz lerwe unli 'ink'ez 'ilhoghun 'awhuz whusalhúsyai. Whusainya de, 'atsulyaz za lerwe tileh.

11 'Ink'ez ndi khuna-iti ntsi'-i 'ant'e' inle' 'ink'ez 'aw 'andit hooloh, 'en lhk'udunghi-un unli. 'Et hoontsi' ndunne lhtak'ant'ine, 'en bubulh 'ilhoghun 'unt'oh 'ink'ez ndet la musai tileh ts'u tilgwulh.

<sup>12</sup> Ndi whunizyai 'ude in'én-i, 'i whunizyai lerwe, 'awhuz lerwe hutileh-un butl'alhúwhuskatne 'uhint'oh. 'Et hoonts'i 'ilho sadzi ha' hunit'o 'uwuhldzoh-un, 'et ndi khuna-iti ntsi'-i 'en bulh k'une' hutitén-un bugha óotalts'ulh.

<sup>13</sup> 'Enne ts'iyawh lhgha za' huninzun. Hiye ulhtus-i 'ink'ez hiye k'une' 'ut'en-i, ndi khuna-iti ntsi'-i 'et higha óotaleh.

<sup>14</sup> Nduune, 'enne 'usbaiyaz bulh lhotigan. 'Ink'ez 'usbaiyaz buch'a' tilhdoh! 'En 'unt'oh moodihne buMoodihti unli 'ink'ez lerwene bulerwe cha unli 'et huwa. Mbene la yulh 'unt'ohne, 'enne 'utahálya 'ink'ez ooghu nusjáne, 'enne 'aw Sizi hilalhditnelne hinli."

<sup>15</sup> 'Et doo cha lizas 'usúlhni, "Nyo lhat-un too k'ut 'ul'en-un yuk'usda-un whunalh'en-un, ndi too, 'i lhane dune, lhelhdoh didowhne, 'ink'ez lhelh ts'un un'a yalhdukne hoonli whuz un'a ndi too 'et 'enne 'uhint'oh.

<sup>16</sup> Ndi khuna-iti ntsi'-i oode whunizyai in'en-i, ndun 'ul'en-un hits'u dutitni. Ndaí la yut'i, 'i ts'iyawh higha hahitalyelh 'ink'ez 'ust'et gaih tileh. Hiyust'e hiti'ulh 'ink'ez kwun be hidutálhk'un.

<sup>17</sup> Yak'usda nts'en'a daóotanelh-un hukwa' ninzun-un, 'et budzi yo danla soo lhk'un'a za nuni hunoozut ha.

'Ink'ez lerwene hiye k'une' 'ut'en-i, ndi khuna-iti ntsi'-i hitl'aóotileh, ndet la Yak'usda ooghuni lhawhúdutitneh 'et whuts'un.

<sup>18</sup> 'Ink'ez ndun ts'eke in'en-un, 'en njan keyoh whuti unli whe 'unt'oh. Ndi yun k'ut whulerwene bumoodih unli."

## 18

### *Njan keyoh whuti Babylon 'awet musai whuzdli'*

<sup>1</sup> 'Et ndo ho hukw'elh'az 'uyoon lizas yak'uz ndus de út'o whe tís'en. Soo ulhtus whe k'úne' 'ut'en doút'en. Oots'u hánuyuzduz-i ndi yun k'ut be hóot'en.

<sup>2</sup> 'Ink'ez soo dultul whe nja ndutni, "Njan keyoh whuti Babylon 'awet musai whuzdli', musai whuzdli'.

'Ink'ez njan keyoh whuti Babylon,  
ndi ntsi'-i nududeh-i lhai bukeyoh whúzdli'.  
Nududeh-i dutsun-i ts'iyawh dilhts'i-un whuzdli'.  
Ndaí la dut'ai dutsun 'ink'ez oots'o dutni-i,  
cha 'et dilhts'i.

<sup>3</sup> Soo nint'i whe 'uyoon dune bulh ninta' 'ut'ih,  
ts'ekoo too' k'un'a 'udun yun k'ut whut'enne,  
'et whuz un'a za bube inulhnai.  
Ndi yun k'ut whulerwene cha huyulh ninta' ut'ih inle'.

'Ink'ez ndi yun k'ut 'e'óoketne,  
ndun ts'eke whe hoonzoo 'unt'oh-un 'ink'ez whélhtus-un,  
'et huwa hoonzoo 'uhuja."

<sup>4</sup> 'Et doo cha ndus de yak'uz ts'e 'uwhutni whudásts'o whe nja duwhútni, "Sdune'ne oots'u hanáhdilh doo ka si 'en bulh lubeshi 'oolh'en. 'Ink'ez doo ka si ndi dune ye dzoh nudeh-i,  
'i nohghá dolts'it.

<sup>5</sup> Oolubeshi ndo yat'ah ts'e 'udiltai sulí' 'et huwa.  
'Ink'ez yé tank'us 'unt'oh-i ts'iyawh Yak'usda yunalni.

<sup>6</sup> Danóhinla-un whuz un'a za ooba 'uk'elha hoolhtsi.  
'Ink'ez be 'ut'en nawh 'ultsuk ooba 'uk'elha hoolhtsi.  
Ndi lubot mbez nohba lhtainílhzo-i,  
'i nawh 'et 'ultsuk 'i ooba lhtanaoolhdzeh.

7 Duba nacha 'ink'ez whudízi' hukw'un'a za yinka usda,  
whuz un'a dzoh nuzut 'ink'ez ts'odi unli-un oogha óonah'aih.

Dudzi yo whe nja ndutni,  
'Lerwe ts'eke k'un'a susda.  
'Aw tsándilh lhúsdloh,  
'ink'ez ts'odi cha lhuzis'en.'

8 'Et huwa dune ye dzoh nudeh-i,  
'ilhoh dzin za 'et ndi ts'iyawh oogha whútalts'ulh.

Bé dats'utsah-i, ts'odi,  
'ink'ez dai cha ts'iyawh.  
'Ink'ez kwun be soo ts'iyawh dutak'un.  
NeMoodihti Yak'usda yuba nahuyeh-un,  
'en ulhtus 'et huwa."

*Ndun Babylon musai whuzdli-un hukw'e hunudleh*

9 "Ndi yun k'ut whulerwene yulh ninta' ut'ihne, 'enne soo hiyulh hoonzoo  
'ant'e'ne ndi dizk'un whe oolul hinilh'en de, hik'e titso 'ink'ez hik'e ni untileh.

10 Ndi ye dzoh nadinzut-i hinilh'en 'ink'ez hiye nuljut 'inka yoo 'un cho  
nódilhya 'ink'ez 'uhutni,  
'Keyoh whuti Babylon 'uk'enus hoontsi'-un huwá whults'ut,  
'uk'enus hoontsi'-un huwá whults'ut.

Nyo hoolhtus-un keyoh whuti-un,  
'ilhoh sadzi huk'oh hunist'o-un, 'et mba nahisda-un, whusahóolts'ut.'

11 'Et whu la gha ts'e ndi yun k'ut 'e'óoketne hik'e titso 'ink'ez 'enne cha hik'e  
ntidleh. Ndai la hiye ookef-i, 'aw dune lhuhuyoosket suli' 'et huwa.

12 Gold, 'ink'ez silver, 'ink'ez tse dunizti'-i, 'ink'ez kw'usul dunízi'-i, 'ink'ez  
naih dízi'-i, 'ink'ez naih dulk'un 'ankw'us dulhk'us, luswe soo dulk'un-i,  
khuna-i ncha-i oode, ivory huyúlhni, hoonliyaz hiyilh'i-i ts'iyai dízi'-i  
dchun, dulk'un t'eh, iron, tse marble huyulhni, 'ants'i ts'iyai dízi'-i,

13 'ink'ez bulh buta'whut'en-i cinnamon huyulhni, 'ink'ez sooltsun-i  
dizk'un-i, khe sooltsun-i, yoo Frankincense huyulhni, ts'ekoo too', 'ink'ez khe  
olive huyulhni, lhes 'ink'ez lhes hanúyeh-i, 'ink'ez musdoos 'ink'ez 'usbai,  
yetzli 'ink'ez nuyúlhgoo-i tubulh, dune yust'e 'ink'ez buzul cha, ts'iyawh be  
'óoket."

14 'Et 'uhutni, "'Ink'ez soo t'alh-i unzoo-i za kúndunut'a, ndai la tube hika'  
ninzun-i, 'i cha ts'iyawh nch'a hooloh suli'. Ndai la dízi'-i 'ink'ez soo 'ot'en-i,  
'ohwhi ts'iyawh nch'a hooloh suli', 'aw naóonlelh ait'oh."

15 Mbene la ndowhi be óoketne, 'enne la ndun ts'eke hoonzoo 'unt'oh  
ubulhtsine, ndun ts'eke ye dzoh nuzut-i, 'i hiyé nuljut 'inka yoo 'un cho highu  
núdilhya 'ink'ez tube cho hutso, 'ink'ez hukw'e ni nahunudleh.

16 'Ink'ez cha 'uhutni,  
"'Uk'enus hoontsi'-un nghá whults'ut!  
'Uk'enus hoontsi'-un nghá whults'ut!  
'Uya! 'Uya!

Nyo keyoh whut'i naih dulk'un-i 'ankwus dulhk'us,  
'ink'ez dulk'un-i be húdilh'ts'i,  
'ink'ez gold, tseyaz dunízi'-i,  
'ink'ez kw'usul dunizti'-i be nódilh'ts'i'.

17 Soo ts'ih'un 'ilhoh sadzi ha' hunit'o-un ndi whe' hoonzoo' hoont'oh-i cho,  
gak whuzdli'."

'Ink'ez mbene la ts'i cho be nukene, 'ink'ez bumoodihne cha, mbene la whuz  
un'a 'e'hooket 'ink'ez 'oohooketne, 'enne ts'iyawh yoo 'un cho nuhúdilhya.



18 'Ink'ez nyoo dizk'un oolut, 'et hinalh'en whe tube cho nja nduhútni, "Aw ndóhoont'oh-un keyoh whuti 'aw 'udun whuz un'a keyoh whuti hooloh!"

19 'Ink'ez lhez dutsi k'ehúyidzeh 'ink'ez 'ahúldzul 'ink'ez hutso 'ink'ez 'uhutni,

"'Uk'enus hoontsi'-un ooghá whults'ut!

'Uk'enus hoontsi' ooghá whults'ut!

Nyo keyoh whuti ts'i yatoo k'ut núkat-i ts'iyawh hoonzoo' hint'oh ubulhtsi.

'Ilho sadzi ha' hunit'o-un soo ts'ih'un gak whuzdli'."

20 "Nohni yak'uz whut'enne 'ink'ez nohni Yak'usda ooch'e'ne 'ink'ez nohni whel'a'ne,

'ink'ez nus hoo'enne cha ndun ts'eke 'ul'en-un bulh dahooja,

'et huwa soo cho whunúhni!

Nts'en'a la nohba nahizya whuz un'a Yak'usda nohba yuk'elha whulhtsi 'et huwa."

*Keyoh whuti Babylon 'awet 'ilhiz 'etsul 'uhóoja*

21 'Et lizas ulhtus-un tse cho ook'ut lhes dunutsut-i ndoút'en-i, 'i yílhchoot 'ink'ez yatoo k'ut tainalh'uz. 'Ink'ez 'utni,

"Soo wheóonujut whe keyoh whuti Babylon whuz un'a Yak'usda nawhúntiyus 'ink'ez 'aw 'on 'at dune nahó'alh ait'oh.

22 Nela be ts'ujun-i,

'ujune cha, duze whé huye jun-i

'ink'ez be ts'újih be hújihne,

'aw 'on 'at dune ubuhudóts'o ait'oh.

Mbene la lhelhdowh didowh 'ulh'enne,

'enne cha 'ilhiz huholoh tileh.

'Ink'ez tse k'ut lhes hundunutsut-un be duts'o-i 'et cha 'ilhiz 'etsul 'uwhudutánelh,

'aw 'on 'at dune whudóts'o ait'oh.

23 'Aw be hóot'en-i cha hootáloh.

'Aw nyo dune lhghu dilhts'i-un,

'et cha 'etsul 'uwhutanelh.

Mbene la mba 'e'óoketne ndi yun k'ut dune nchane 'uhant'e'.

Duyun-un k'un'a ndi yun k'ut dune lhelhdowh didowhne nyun nabunan'a 'et huwa.

24 'Ink'ez nus hoo'enne 'ink'ez Yak'usda ooch'e'ne bubuzkai',

'ink'ez ndi yun k'ut dune ubanghanne,

'enne cha ts'iyawh bubuzkai' 'et 'unt'oh!"

ni, lizas ulhtus-un.

## 19

*Keyoh whuti Babylon gak whuzdli-un, 'et yak'uz dilhts'ine 'et huwun huwhunúhni*

1 'Et njan hukw'elh'az whudusts'o ndo yak'uz ts'e tube lhane soo tube cho nja nduhútni,

"Yak'usda uzdólhti!"

Be uzdujih-i, 'ink'ez ye dizti'-i,

'ink'ez ye úncha-i,

'ink'ez ye úlhtus-i,

'ohwhi ts'iyawh neMoodihti Yak'usda ooba' yint'oh.

2 Ye nahuyeh-i ts'iyawh 'alha 'unt'oh

'ink'ez ts'ih'un 'unt'oh 'et huwa.

Ndun 'uk'enus 'ul'en-un hoontsi' tune' 'ut'en-un,  
'et whe ndi yun k'ut dune ninta' bunílh'en,  
'ink'ez Yak'usda be 'ulhnane bubuzkai' whulhtsi,  
'et hukw'elha Yak'usda yuba nahizya."

<sup>3</sup> Doo cha za 'uhutni,

"Yak'usda uzdólhti!"

Nyoon ts'eke 'ilhiz 'ink'ez 'ilhiz wheni oolut ndo whedújoot!"

<sup>4</sup> 'Et ndunne nat whunizyat 'on 'at dine 'utso whudilhduzhne, 'ink'ez nyowhi dungghi 'usjiz-i nacháhunildil 'ink'ez Yak'usda dukw'uts'uzda cho dizti'-i, 'i yuk'usda whe, hibut dugwutsi be nachahunildil 'ink'ez hits'u teni' nalhdzin whe nduhútni,

"Et ndo honeh!

Yak'usda nts'idílhiti!"

<sup>5</sup> 'Et kw'uts'uzda cho dizti' ts'e nja nduwhtútni,

"Nohni ts'iyawh Yak'usda be 'ulhnane

'ink'ez hiye nuljutne cha,  
ntsoolne 'ink'ez nchane cha,  
neYak'usda dúlhiti!"

<sup>6</sup> 'Et whudusts'o 'ants'i dune lhane 'iloh yahatilhduk le'hutni. 'Ants'i natájlh k'un'a 'uwhtútni. 'Ink'ez tube cho ditni dutni lé'whutni, whe nja nduhútni,

"Yak'usda uzdólhti!"

NeMoodihti Yak'usda 'uk'enus ulhtus-un,

'en ts'iyantsuk k'une' whul'en 'et huwa.

<sup>7</sup> Ts'ohót'e' 'ink'ez ts'onólhni 'ink'ez uzdólhti'.

'Usbaiyaz 'at tit'elh-un huba whusahónzut

'ink'ez oo'at yutáleh-un 'awet dich'oh lhadúja.

<sup>8</sup> Naih dizti'-i,

lhdítsun 'ink'ez be hóodat'en,  
'i ye tidalh ha ooghá whults'ut."

Ndi naih dizti'-i, 'i Yak'usda ooch'e'ne bube 'ut'en ts'ih'un 'unt'oh-i, 'i 'unt'oh.

<sup>9</sup> 'Et ndun yalhdúk-un, 'en 'usúlhni, "Njan 'uk'ehoonges, 'usbaiyaz 'at tit'elh-un na'hutit'ulh-un, mbene la ooghu nusjane, 'enne 'uk'enus hoonzoo-un bugha whútalts'ulh." 'Ink'ez 'usulhni, "Ndi 'i soo ts'ih'un un'a Yak'usda ooghuni 'utni."

<sup>10</sup> 'Ink'ez oobut nachánisno oots'u teni' untisdzilh ha. 'Et 'usúlhni, "'Et ndint'en iloh! Nyulh 'ulhna-un usdli. 'Ink'ez nyulhutsinke, 'ink'ez Sizi ooghuni ghu yalhdúkne, 'enne ts'iyawh bubulh 'ulhna-un usdli whe 'ust'oh. Yak'usda 'en za oots'u téní' nilhdzun!" súlhni. "Ndi khuni Sizi be ghú yaduk-i, 'i mba nus hón'en whe' hoont'oh."

### *Christ yeztli ulhyul-i 'et k'usda*

<sup>11</sup> 'Et yak'uz dáha' dankez 'et whutis'en, 'ink'ez yeztli ulhyul-i tís'en. Yuk'usda-un, 'en oot'aníuznintan-un 'ink'ez ts'ih'un 'unt'oh-un huyúlhni. 'Ink'ez soo ts'ih'un un'a dune ba lhugan 'ink'ez whuz un'a za buba nahuyeh.

<sup>12</sup> Oona 'ants'i kwun k'un'a tizdi dóút'en. Ootsi k'ut lerwe butsi k'eyúzdla dóút'en, 'i lhai ootsi k'usdla. Boozi' ook'eyusguz, 'aw dune t'einúszun, didutch'oh za t'einínzun.

<sup>13</sup> Nayits'uz-i 'uskai' be túnalhchooz-i, 'i be dune unli. 'Ink'ez boozi', 'i Yak'usda Ooghuni ts'utni.

<sup>14</sup> 'Ink'ez yak'uz lhuganne, naih dizti'-i ulhyul 'ink'ez lhdítsun-i be húdilhiti'. Yeztli ulhyul-i k'ut dilhts'i whe huyunidulh.

15 'Et ndi saluzti, khundiyyin-i oozáhayiki. Ndi 'i be 'udun yun k'ut whut'enne ye but ts'e' tilht'oh ha. Dich'oh lhuztih tuz be k'une' butil'en. 'Ink'ez Yak'usda 'uk'enus ulhtus-un, 'en ye huske-i 'ink'ez ye húnilch'oh-i, 'et njan ts'ekoo too 'ul'en-un whuz'ai k'un'a-i, 'i dich'oh 'i yuk'unutíyahl.

16 Nayits'uz-i 'ink'ez oowuz k'ut 'et 'oozi' 'uk'usguz whe nja ndutni, Lerwene buLerwe 'ink'ez moodihne buMoodihti, ni.

### *Khuna-iti ntsi-i ooluganne tubulh buch'a ninde*

17 'Et doo cha lizas sa niz usyin whe tís'en. 'Ink'ez soo dultul whe ndai la dut'ai ndo núdilh-i, 'i 'uyulhni, "Ndiz 'ilhoozáhdilh Yak'usda ncha-un, ndi tih'ulh-i nohba lhaídina.

18 'Et la lerwene buzi, lhuganne bumoodihne buzi cha, dune nchane buzi cha, yeztli 'ink'ez yuk'udilh'ts'ine, 'ink'ez ts'iyanne zi cha 'ulhnane 'ink'ez oolawhuditnine, ntsoolne 'ink'ez nchane cha, buzi ts'iyawh tih'ulh."

19 'Et khuna-iti ntsi-i tís'en, 'ink'ez ndi yun k'ut whulerwene lhuganne tubulh 'ilhuhozdil 'ink'ez yeztli k'usda-un 'ink'ez yuba lhuganne, 'enne buch'az nehúndil bubulh lhótigan ha.

20 'Et ndi khuna-iti ntsi-i huyílhchoot. 'Ink'ez whuts'it whe nus hoo'en-un, 'en cha huyílhchoot. 'En 'unt'oh khuna-iti ntsi-i nalh huwa 'ít'en te ne'úst'en. 'I be mbene la khuna-iti ntsi-i oonutsi be bube hóodat'enne 'ink'ez mbene la ook'eyílti ts'u teni' nalhdzinne, 'enne ts'iyawh nabunan'a. 'Et ndunne nahúlt'oh hukhuna whe kwun sulphur be dízk'un-i bunghun dúwhulcho-un, 'et tsúbodano.

21 'Et 'onghunne khuna-iti ntsi-i ba lhuganne, 'enne ndun yeztli k'usda-un, saluzti oozá hayiki, ndi saluzti 'i be ts'iyawh 'ubanghan. 'Ink'ez dut'ai ts'iyawh dune zi húnisdai.

## 20

### *Satan 1,000 yus k'ut 'et ulghel*

1 'Et yak'uz ndus de ts'e lizas ut'oh whe tís'en. Lhuztih tl'oolh cho 'ink'ez nyo tsak'et whucho whutl'ah hooloh-un whulugli bulh yilelh.

2 'Et nyoo tl'ughus cho khuna-i k'un'a nulget-i, nyoo 'uda' whútl'ughus, 'en netsudule huyílhni 'ink'ez Satan cha huyílhni. 'En yílhchoot 'ink'ez 1,000 yus k'ut wheni yulghel.

3 Tsak'et whucho whutl'ah hooloh-un, 'et 'ayano 'ink'ez yuch'az dána'din'ai 'ink'ez whudána'dilhdze. 'Et whuz un'a ndi 1,000 yus k'ut lhaóodutaneh 'et whuts'un, ndi yun k'ut ndulcho whe lhelhdoh dídohne dune 'aw'on 'un nabunoo'ah aít'oh 'inka. 'Et hoon'tsi 'et hukw'elh'az de 'atsulyaz hila nadootnih huba' hoon't'oh.

### *Christ ooch'e'ne, 'enne 1,000 yus k'ut huyulh lerwe hanle'*

4 'Et kw'uts'uzda cho dizti-i lhai tís'en. 'Ink'ez yuk'udilh'ts'ine, 'enne dune ba nahutiyeh-un, 'et bughá whunt'ai. 'Et ndunne Sizi ooghuni ghu yalhdukne, 'ink'ez Yak'usda ooghuni cha, 'et huwa 'enne 'oh da' butsi k'unónutselh. 'Ink'ez mbene la nyoo khuna-iti ntsi-i k'us ook'eyílti-hits'u tenelhe'nílhdzilne, 'ink'ez mbene la oonutsi be buninta k'us bula k'ut buk'ulhe'íguzne, 'enne ts'iyawh buzul nus'en. 'Enne nahukhítina' 'ink'ez 1,000 yus k'ut ndúwhulyiz whe ndun Christ 'en bulh moodih hinli.

5 Njan 'et 'udechoo dunazdutádulh-un 'uhoont'oh. 'Et hoon'tsi 'onghohne yaidlanne, 'enne 1,000 yus k'ut lhaóoduja de za dunahudutádulh.

<sup>6</sup> Mbene la njan 'udechoo dune dunadutádulh-un bubulh 'uhooja de, 'enne 'uk'enus hoonzoo-un bugha whútalts'ulh, 'ink'ez lubeshi ooghu hootalohne hutileh. 'Ink'ez whulh nat dune yaitádlah-un, 'aw 'enne buba lhe'hóot'oh. 'Et k'us Yak'usda 'ink'ez Christ bulubret hutileh 'ink'ez 1,000 yus k'ut huyulh moodih hutileh.

*Netsudule ndi kwun, sulphur be dizk'un-un bunghun dúwhulcho-un, 'et ts'u hídano*

<sup>7</sup> 'Et 1,000 yus k'ut lhawhúduja de, Satan tsak'et usda-un hila nadutitnih.

<sup>8</sup> 'Ink'ez 'udun yun k'ut whut'enne ndi yun k'ut ndulcho whe dilhts'ine, 'enne nabunti'ah. Gog 'ink'ez Magog whut'enne, 'enne lhotigan ha, Satan 'ilhubootáleh. 'Enne yatoo ba sai 'et 'uhuniltsuk.

<sup>9</sup> 'Et ndi yun k'ut ndulcho whe whudune'ne whusahátidulh 'ink'ez njan keyoh whuti 'et Yak'usda ooch'e'ne huwhut'i-un, 'et 'uhoont'oh keyoh whuti Yak'usda hukw'entsi'-un, Jerusalem huwhutni 'et whunat 'et 'ilhuhootádulh. 'Ink'ez ndo yak'uz Yak'usda usda-un whuz de kwun hatikulh. 'I be ntsi'ne ts'iyawh gak hutileh.

<sup>10</sup> 'Et ndi kwun, sulphur be dizk'un-un bunghun dúwhulcho-un, 'et khuna-iti ntsi'-i 'ink'ez whuts'it-i be nus hoo'en-un 'et huzke, 'et netsudule, dune nana'ah-un, 'en cha 'et tsu hídano. 'Et dzenis 'ink'ez 'ulhdzis ibulh 'ilhiz 'ink'ez 'ilhiz wheni dzoh nuhutideh.

*Kw'uts'uzda cho ulhyul-i, Yak'usda 'i k'ut usda whe yuk'unulhe'it'elne buba nahutiye*

<sup>11</sup> 'Et 'awet ulhyul-i kw'uts'uzda ncha-i cho dizti'-i, 'ink'ez mbe la yuk'usda-un tís'en. Ndi yun k'ut 'ink'ez yat'ah cha Yak'usda usda-un, 'et ooch'a whúzkat, 'i 'ink'ez ts'iyawh gak whuzdli'

<sup>12</sup> 'Ink'ez yaidlanne ntsoolne, nchane cha Yak'usda but nuhúdilhya whubutís'en. 'Ink'ez 'udustl'us lhai ook'une'úsuguz-i, 'i lhk'enankat. 'Ink'ez 'uyoo 'udustl'us ook'une'úsuguz-i, 'i ts'ukhuna whe' 'udustl'us, 'i cha lhk'enankat. 'Ink'ez yaidlanne bube 'ut'en k'oh huwa ndi 'udustl'us lhai 'uk'uwhusguz-un, 'i gha buba nahisda.

<sup>13</sup> 'Et yatoo k'ut yaidlanne, 'ink'ez be yats'adlah-i, 'i be yaidlanne 'ink'ez Hades dilhts'ine cha, 'enne ts'iyawh whutl'ábahunla buba nahutideh ha. 'Ink'ez 'ilhoghun hinli whe bube 'ut'en gha buba nahisda.

<sup>14</sup> 'Et be yáts'adlah-i 'ink'ez Hades bulh njan sulphur be dizk'un-un bunghun dúwhulcho-un tsú bodalhdil. Njan 'et whulh nat yats'itádlah-un 'uhoont'oh.

<sup>15</sup> 'Et whe mbene la ts'ukhuna-i 'udustl'us k'ut buboozi' 'uk'ulhíguzne, 'enne ts'iyawh ndi kwun bunghun dulcho-i 'et tsú buhudalhdil.

## 21

*Ts'iyaitsuk 'andidi nasdli'*

<sup>1</sup> 'Et 'awhundidi yat'ah 'ink'ez yun cha 'awhundidi-un, 'et whutís'en. 'Udechoo yat'ah yak'uz 'ink'ez 'udechoo yun 'et whehónkat 'et huwa. 'Ink'ez 'aw yatoo cha hooloh sulí'.

<sup>2</sup> 'Et si, John, njan keyoh whuti whulubeshi hooloh-un, 'andit-un Jerusalem huwhútni, 'et ndus de yak'uz ts'e Yak'usda ts'un hahóolts'ut, 'et whutís'en. 'Ants' i ts'ekeyaz ki tit'elh-un ooki yutaleh-un ba soo naduja, 'et ndóhot'en.

<sup>3</sup> 'Et ndus de yak'uz ts'e tube cho 'uwhutni, nja nduwhútni, "Nilh'en 'et Yak'usda dune bubulh whutit'elh, 'ink'ez bubulh dune tileh, 'ink'ez hidune' tileh. 'Ink'ez Yak'usda dich'oh bubulh útit'elh 'ink'ez buYak'usda tileh.

4 'Ink'ez Yak'usda bunatsul too' buna k'et whunaitilhdoh. Yats'adlah-un cha 'etsul 'uwhutanelh. Ts'odi ts'indli-un 'ink'ez ts'utso-un cha 'etsul 'uwhutanelh. 'Aw 'on 'un hukw'e ts'unduda-un cha hootáloh. Whuts'o da' 'uhoont'oh-un ts'iyawh gak whuzdli' 'et huwa."

5 'Et kw'uts'uzda cho dizti-i k'usda-un 'utni, "Soo zilhts'ai ts'iyai tsuk 'awhundi 'uwhusdleh." 'Ink'ez 'usúlhni, "Ndi khuni ts'ih'un 'unt'oh 'ink'ez oot'aniwhunintan whe 'unt'oh, 'et huwa 'uk'eings."

6 'Ink'ez 'usulhni, "Awet lhaóoduja! Si Alpha 'ink'ez Omega usdli. 'Udetso whe' whudit'en 'ink'ez lhawhúdulya-un usdli. Mbene la ta'óosdane hatájilh-un ts'ukhuna-un whutoo' 'ants'i bugha ítasdzoh.

7 Mbene la 'ut'en ntsi-i ch'a' 'alhdehne ts'iyaitsuk buba' yutát'elh. BuYak'usda tisdleh 'ink'ez suzkeh hutileh.

8 'Et hooonts'i mbene la whénuljutne, ooba 'alha lhe'hóot'ohne, huba' whun-inzun tune' 'ut'enne, neghanne cha, hooonts' túne' 'ut'enne, duyunne, 'uk'elstis ts'u tenadudline, 'ink'ez whuts'itne cha, 'enne ts'iyawh nyo bunghun dúwhulcho-un kwun sulphur be dizk'un-un, 'et 'uwhutit'elh. 'Et whúlh nat yats'itádlah-un 'uhoont'oh."

### *Keyoh whuti Jerusalem 'awhundi nawhusdli'*

9 'Et nyoonne lhtak'ant'ine lizas, lhtak'ant'i oosa' nanizts'un-i hiye dzoh nutideh-i, lhtak'ant'i didowh-i, 'i be dizbun-i, 'en bube 'ilhoghun lizas sghu nininya 'ink'ez sulh yailhduk. Nja ndúsulhni, "Anih ndun 'usbaiyaz oo'at tileh-un búnyuntistun."

10 'Et Ndoni be dzulh yoo do hadit'ai-i whuz whe salhti. 'Ink'ez keyoh whuti Jerusalem 'aw whulubeshi hooloh-un, yak'uz ts'e Yak'usda ts'un ndus de hóolts'ulh, 'et whusúnilhtan.

11 Yak'usda oots'u hayánduz-i, 'i bulh 'óohoont'oh. 'Ink'ez oots'u hayánduz-i 'ants'i tseyaz dunizti-i, jasper huyulhni, 'i 'uyoo tse oonohóot'en-i, crystal huyulhni, 'ohwhi bundúyot'en.

12 Sih dutai 'ink'ez duts'o 'ink'ez yoo do 'unt'oh. Whunizyai 'on 'at nanki 'et dati-un. 'Ink'ez whunizyane 'on 'at nane lizas dati-un nuhúdilhya. 'Et whunizyai 'on 'at nane Israel oots'u haindene didowhne, 'enne buboozi' dati 'uk'usguz.

13 Tat-un dati-un nda' whudinla. Tat-un dati-un no whudinla. Tat-un dati-un nyan whudinla. 'Ink'ez tat-un dati-un noo' whudinla.

14 Nyo keyoh whuti sih whunasa'a-i, 'i whunizyai 'on 'at nanki tse lhelhdoh didowh-i ook'u whuz'ai. 'Ink'ez whunizyane 'on 'at nane 'usbaiyaz ba whel'a'ne buboozi' hukw'usguz.

15 Nyoon sulh yalhduk-un gold t'ozilh ut'i, keyoh whuti whudati 'ink'ez whusih cha whunduná'ootalhdzih ha.

16 Keyoh whuti oosih ts'iyawh lhundúwhulcho. Dáwhulhyiz-un, 'et za 'uwuhul-tel. 'Ink'ez keyoh whuti t'ozilh be whunduna'oolhdzai. Dawhulhyiz-un, dahooltel-un, 'ink'ez dayóodo-un, ndoohoolcho whe whunduna'oolhdzai. 12,000 furlongs 'uwuhulyiz.\* 12,000 furlongs 'uwuhul-tel, 'ink'ez 12,000 furlongs ná'daldzoh.

17 'Et sih doo cha whunduna'oolhdzai. 'I 144 cubits huyulhni.† Dune whunduna'oolhdzih, whuz un'a lizas whunduna'oolhdzai.

18 'Ink'ez sih jasper huyulhni-i, tse 'i be' hoolya. 'Ink'ez nyoo keyoh whuti soo dadint'az ookiúnt'en-i ndunt'oh-i, soo gold gaih za keyoh whuti be' hoolya-un 'uhoont'oh.

\* 21:16 †1,500 miles 'uwuhulyiz. † 21:17 †1216 feet at'en.

<sup>19</sup> 'Ink'ez nyo keyoh sih whunasa'a-i, 'i oot'ah soo ts'iyaitsuk tseyaz dunizti'-i, 'i be nyoo keyoh whusih whunasa'a-i ook'u whuz'ai-i, 'i be ook'ut nodilhtsi'. 'Udechoo tse whutl'ah diz'ai-i, 'i jasper 'unt'oh. Bulh nanki tse, 'i sappire huyulhni-i, 'i 'unt'oh. Bulh ta-i tse, 'i chalcedony huyúlhni. Bulh dunghi tse, 'i emerald 'unt'oh.

<sup>20</sup> Bulh kwúlai' tse, 'i sardonyx huyúlhni. Bulh lhk'uta tse, 'i sardius huyúlhni. Bulh lhtak'ant'i tse, 'i chrysolite huyúlhni. Bulh lhk'udunghi tse, 'i beryl huyúlhni. Bulh 'ilho hooloh tse, 'i topaz huyulhni. Bulh whunizyat tse, 'i chrysoprase huyulhni. Bulh whunizyai'on 'at 'ilho tse, 'i jacinth huyulhni. 'Ink'ez bulh whunizyai'on 'at nanki tse, 'i amethyst huyúlhni.

<sup>21</sup> 'Ink'ez whunizyai'on 'at nanki dati, 'i whunizyai'on 'at nanki kw'usul dunizti'-i 'unt'oh, pearl huyulhni, 'et 'ilho kw'usul dunizti'-i cho, 'i 'ilho dati unli. 'Ink'ez ooti keyoh whuti nówhuz'a-un, soo dadint'az k'un'a ookiunt'en-i, soo gold gaih za 'uhoont'oh.

### *Keyoh Jerusalem 'awhundidi-i, 'i Yak'usda oots'u hayánduz-i be hoot'en tileh*

<sup>22</sup> 'Et hoonts'i 'aw lugliz wucho lhuwhús'el. NeMoodihti Yak'usda 'uk'enus ulthun-un, 'ink'ez 'usbaiyaz bulh nyoo keyoh whulgliz hinli 'et huwa.

<sup>23</sup> 'Aw 'ulhdzis ooza' cha 'ink'ez dzenis ooza' cha 'aw nyo keyoh ooka lhe'whunizun Yak'usda oots'u hayánduz-i, 'i be hoot'en. 'Ink'ez 'usbaiyaz 'en whuniz be hoot'en.

<sup>24</sup> Mbene la 'udun yun k'ut whut'enne butoh hudijizne, 'enne hiniz nutidulh. 'Ink'ez ndi yun k'ut whulerwene hiyé dizti'-i 'ink'ez hiyé ncha-i, 'i dich'oh lerwene dahítalelh.

<sup>25</sup> Dzin dúwhulyiz whe whudati 'aw dádola' ait'oh 'aw 'ulhdzis lhotasdle 'et huwa.

<sup>26</sup> Lhelhdowh didowhne hiyé dizti'-i 'ink'ez hiyé úncha-i, 'i dahítalelh.

<sup>27</sup> 'Et hoonts'i hoonliyaz dutsun-i 'et daóolts'it ait'oh. K'us mbe la huba' whunizun tune' 'ut'enne, 'ink'ez whuts'itne cha, 'aw dahóodilh ait'oh. Mbene la 'usbaiyaz ts'ukhuna be 'udustl'us k'ut 'uk'usguzne, 'enne za buba' hoont'oh 'et huwa.

## 22

<sup>1</sup> 'Ink'ez 'ukoh soo too unzoo-i, oogha ts'ukhuna-i soo unzoo k'et teh ndulcho whe hoot'en, 'et whusúnilhtan. Yak'usda 'ink'ez 'usbaiyaz bukw'uts'uzda cho dízti'-i, 'i 'ukoh oots'u hayáni.

<sup>2</sup> Ti soo whuniz 'oh whúya lhusúli. 'Ukoh lhch'az ts'e taba 'et duchun oogha ts'ukhuna-i nánudiz'a. I whunizyai'on 'at nanki oomai' yinli. 'Ilho duchun 'i sanun totsuk oomai' whulhih. 'Ink'ez duchun oot'an 'i lhelhdun yun k'ut whut'enne huye naóojeh ha 'unt'oh.

<sup>3</sup> 'Aw ndai la Yak'usda yuk'e hanya-i, 'i hootáloh. 'Et k'us Yak'usda 'ink'ez 'usbaiyaz bukw'uts'uzda cho dízti'-i, 'et ti'alh. 'Ink'ez be 'ulhnane hinat né'tit'en 'ink'ez hiba ne'hutit'en whe hits'u teni' untillhdzun.

<sup>4</sup> Hinin hiyuntill'h'elh, 'ink'ez boozi' buninta hukw'u duta'alh.

<sup>5</sup> 'Et 'ulhdzis cha hootáloh. 'Aw be hoot'en-i k'us sa be hoot'en-i cha hiyit 'utit'elh. NeMoodihti Yak'usda oots'u hayánduz-i, 'i ooniz 'uwhutát'elh 'et huwa. 'Ink'ez 'ilhiz 'ink'ez 'ilhiz wheni huyulh dútati'.

### *'Awet neba nilhdukw suli'*

<sup>6</sup> 'Ink'ez lizas 'usúlhni, "Ndi khuni oot'aníwhunintan 'ink'ez ts'ih'un 'unt'oh." 'Ink'ez ndunne buMoodihti Yak'usda be nus hoo'enne, daóotanellh-un, 'awet nilhdukw suli'. 'Inka, dude 'ulhnane but'eoonoolhdzeh ha dulizas buts'ú wheyalh'a'.

7 “Soo zilhts'ai, nilhdukwh whusatísyalh. Ndi 'udustl'us 'i k'ut khuni be nus hoot'en-i, mbene la huyoontun de, tube 'uk'enus hoonzoo-un bughá whútalts'ulh.”

8 'Ink'ez si, John, ndo ho hoos'en 'ink'ez whudásts'o whe lizas whusúniltan-un, 'et huwa' 'en oobut nachánisno oots'u teni' untisdzilh ha.

9 'Et 'usúlhni, “'Et ndint'en iloh! Nyulh 'ulhna-un usdli whe 'ust'oh. 'Ink'ez nyulhutsinke nus hoo'enne, 'ink'ez mbene la ndi 'udustl'us ooghuni óontunne, 'enne cha bubulh 'ulhna usdli whe 'ust'oh. Yak'usda, 'en za ts'u teni' nilhdzun!”

10 'Ink'ez 'usulhni, “Ndi 'udustl'us nus hoo'en-i khuni oodána'dolhdzeh junih! 'Awet nilhdukwh sulí' 'et huwa.

11 Mbe la ts'ih'un lhe'it'oh-un, whute 'et za ndót'e'. Mbe la dutsun-un, whute 'et za ndót'e'. 'Ink'ez mbe la ts'ih'un 'unt'oh-un, 'et za ndót'e'. Mbe la Yak'usda ba 'udun nelya-un, 'et za ndót'e',” ni lizas.

*Sizi 'utni, “Ts'iyanne bube 'ut'en gha buba 'uk'elha yutiselh-i, 'i usdleh.”*

12 “Whunilh'en, nilhdukwh whusanátisdalh 'ink'ez ts'iyanne bube 'ut'en gha whuz un'a buba 'uk'elha yutiselh-i, 'i nusdle.

13 Si 'ust'oh Alpha 'ink'ez Omega usdli. 'Udechoo whe' whudit'en-un 'ink'ez 'etsul 'uwhtánelh-un, 'en 'ust'oh. 'Udetso-un 'ink'ez 'udek'ez-un 'ust'oh.”

14 Mbene la yughuni k'une' 'ut'enne, 'enne 'uk'enus hoonzoo-un bughá whútalts'ulh. Ndi duchun oogha khútna-i, 'ink'ez njan keyoh whuti whudati-un dahútidulh-un, 'et 'enne za bughá whunt'ai whe' hooont'oh.

15 'Et hooonts'i njan keyoh whuti yoo 'az ts'e, 'et lhike dult'ohne, 'ink'ez duyunne, dune k'us ts'ekoo bulh nínta' 'ut'ihne, neghane cha, 'ink'ez 'uk'eltsi ts'u tenadudline cha, 'ink'ez mbene la hoo'hóont'i' whe huwhuts'itne, 'enne ts'iyawh yoo 'az ts'e 'uhint'oh.

16 “Si Sizi slizas nohni Yak'usda ba 'ilhunaoodulhne, 'en nohts'ú whes'a'. Ndi khuni Yak'usda ba 'ilhunaoodulhne, 'enne ubudóhni' ha David oots'u hayándene, 'enne bube duszut whe 'ust'oh. Bundada' sum tube be hóodat'en, 'i le'ust'oh!” ni Sizi.

17 'Et Ndoni 'ink'ez Sizi ghu tidalh-un bulh, “'Anih!” hutni. 'Ink'ez mbe la whudits'o-un, 'en cha, “'Anih!” hudooni'. Mbe la ta'óosda-un cha díz tóoya' 'ink'ez ndi be ts'úkhuna-i whutoo', ndet hukwa' ninzun totsuk, hiyootnai'.

*Ts'iyanne bughá 'utni*

18 Ndi 'udustl'us be nus hoot'en-i, be 'udustl'us dits'one, huwahli nohdúsní. Mbene la dich'oh khuni 'uyoo cha inlane, ndi dune ye dzoh nuzut-i ndi 'udustl'us k'ut ooghun 'uk'unusguz-i, 'i 'on 'un cha ndi dune ye dzoh nuzut-i, Yak'usda bughá óota'ah.

19 'Ink'ez ndi 'udustl'us be nus hoot'en-i, mbene la whuloh khuni 'uk'unaitizguzne, ndi be ts'úkhuna-i be 'udustl'us, njan keyoh whuti whulubeshi ooghu hooloh-un cha, 'ink'ez ndi duchun be ts'úkhuna-i, ndai la buch'e' yutaleh-i, 'ohwhi ts'iyawh Yak'usda bughu nahootálhchulh.

*Khunsul whusanátisdalh, ni Sizi*

20 Mbe la ndowhi nohdáni'-un, 'en 'utni, “'Alha 'awet nilhdukwh whuz de úsyalh!” 'Et ndo honeh! NeMoodihti Sizi, whuz un'a za dízínyalh!

21 NeMoodihti Sizi Gri ye unzoo-i ts'iyawh nohbulh 'óot'e'. 'Et ndo honeh.